


2006



Konda Dora New Testament which was published in 2006

కొండ బాసదు నెగ్గి కబ్బు 2006

Konda Dora New Testament which was published in 2006

copyright © 2006 Wycliffe Bible Translators, Inc.

Language: (Konda-Dora)

Contributor: SIL International (in Asia)

All rights reserved.

2020-11-18

PDF generated using Haiola and XeLaTeX on 25 Nov 2022 from source files dated 29 Jan 2022
840896da-3a66-5e43-9018-4a95a349d60c

Contents

మత్తయి	1
మార్కు	48
లూకా	76
యోహాను	122
అపొస్తు	157
రోమ	205
1కొరింథి	229
2కొరింథి	250
గలతి	263
ఎఫెసీ	272
ఫిలిప్పీ	280
కొలోసీ	286
1దెస్స	292
2దెస్స	297
1తిమోతి	300
2తిమోతి	306
తీతు	311
ఫిలోమో	314
ఎబ్రి	316
యాకోబు	333
1పేతురు	338
2పేతురు	344
1యోహాను	348
2యోహాను	354
3యోహాను	355
యూదా	356
ప్రకటన	358

మత్తయి రాస్తి సువార్త

నెల్వ కిబిసినిక

దేవుణు మాటోజ్ రాస్తిమన్ని పుస్తకమాతి బయ్బిలుదు పడాయ్ ఒపుమానం, కొత్త ఒపుమానం ఇజి రుండి ముక్కోజ్ మన్నె, పడాయ్ ఒపుమానమ్దు యేసుప్రబు వందిజ్ వెహ్తిమన్ని సజతిజ్, ఎలాగ పూర్తి ఆతె ఇజి కొత్త ఒపుమానం జాగర్త సద్విజి సుడఃతిజ నెస్తెజానాద్. కొత్త ఒపుమానమ్దు మన్ని మొదోహి పుస్తకమ్నె మత్తయి రాస్తి సువార్త. యేసు ప్రబు సిసుర్ లోఱ మన్ని పన్ను పెర్నికానాతి మహి మత్తయి ఇనికాండ్రె ఇక్క రాస్తమనాన్. (మత్తయి 9:9-13) యేసు ప్రబుజ్ సిలువ పొక్తి వెనుక, ఇంజుముంజు 25-35 పంటేజ్ వెనుక ఇక రాసి ఆత మనాద్. ఇజి యా సజతిజ్ వందిజ్ నెస్తికార్ వెస్సినార్. దేవుణు వన్ని ప్రవక్తరు వెట వర్గితిమహి క్రీస్తు ఇనికాన్ యేసుప్రబునె ఇజి యూదుర్ అతికార్ నెస్తెజ్ ఇజినె ఇక్క రాస్త మనాద్. యేసుప్రబు పుట్టి వందిజ్, మరి దని వెనుక జర్గితి సజతిజ్ వందిజ్ దేవుణు ముజాల వన్ని ప్రవక్తరు వెట వర్గితిక ఎలాగ అయాలెకెండె పూర్తి ఆతె ఇజి పడాయ్ ఒపుమానమ్దాన్ దన్ని వందిజ్ మన్ని మాటేజ్ లాగ్గి రుజుప్ కిజి తోరిసినాన్. దేవుణు ప్రవక్తరు వెట వర్గితి సజతిజ్ యేసుప్రబు బత్కుదు అయాలెకెండె పూర్తి ఆతె (మత్తయి 1:23, 2:6, 14, 18, 23) ఇస్రాఏలు లోకుర్ రాజు అతిమహి దావీదు తెగాదు పుట్టికాన్ ఇజి రుజుప్ కిదిజ్, వన్ని తెగాదు పుట్టివరి పేరుకుబా మజి తోరిసినాన్. మరి దేవుణు ఏలుబడిః కిని వందిజ్ యా పుస్తకమ్దు నండో నుట్టు. రాస్త మనాద్. దేవుణు ఏలుబడిః కిని వందిజ్ యేసుప్రబు లోకురిజ్ నెస్తిన్ కతెజ్ యా పుస్తకమ్దు 13-14 అద్యయమ్కాజ్ రాస్త మనాద్. యేసు, దేవుణు మరిసి అతికాండ్రె ఇజి యా సువార్తదాన్ డటం వెహ్సినాన్.

యాక యేసు తెగ

1 అబ్రహాం తెగాదికాతి దావీదు రాజు* తెగదు పుట్టి యేసు క్రీస్తు తెగ యాక. 2 అబ్రాహాము మరిసి ఇస్సాకు, ఇస్సాకు మరిసి యాకోబు, యాకోబు మరిసిర్ యూదాని వన్ని దాద్గిర్, తంబేర్సిర్. 3 యూదా మరిసిర్ పెరెసుని జెరహు, వరి యాయ పేరు తామారు. పెరెసు మరిసి ఎస్రాము, ఎస్రాము మరిసి అరాము, 4 అరాము మరిసి అమ్మినాదాబు, అమ్మినాదాబు మరిసి నయస్సోను, నయస్సోను మరిసి సాల్మాను. 5 సాల్మాను మరిసి బోయజు, బోయజు యాయ పేరు రాబాబు, బోయజు మరిసి ఓబేదు, ఓబేదు యాయ పేరు రూతు. ఓబేదు మరిసి యెసయ. 6 యెసయ మరిసి రాజు అతి దావీదు. దావీదు రాజు మరిసి సాలోమోను, సాలోమోను అయ్సి, ముజాల ఊరియెజ్* ఆల్ని అతి మహికాద్. 7 సాలోమోను మరిసి రెహబాము. రెహబాము మరిసి అబీయా, అబీయా మరిసి ఆసా. 8 ఆసా మరిసి యెహోసపాతు. యెహోసపాతు మరిసి యెహోరాము, యెహోరాము మరిసి ఉజ్జియా. 9 ఉజ్జియా మరిసి యోతాము, యోతాము మరిసి అహజు, అహజు మరిసి హిజ్కీయా. 10 హిజ్కీయా మరిసి మనసె, మనసె మరిసి ఆమోను, ఆమోను మరిసి యోసీయా. 11 యోసీయా మరిసిర్ యెకొనియని వన్ని దాద్గిర్, తంబేర్సిర్. వరి కాలమ్దు బబులోను దేనమ్ది రాజు యూదురిజ్ వెట్టిపజి కినివరికెండె అసి తొవ్తా ఒత్తాన్. 12 బబులోను దేనమ్దు సాహి వెనుక అబె యెకొనియెజ్ మరిన్ పుట్టాన్. వన్ని పేరు నయల్తీయెలు, నయల్తీయెలు మరిసి జెరుబాబెలు. 13 జెరుబాబెలు మరిసి అబీహూదు, అబీహూదు మరిసి ఎలియాకీము, ఎలియాకీము మరిసి అజోరు. 14 అజోరు మరిసి సాదోకు, సాదోకు మరిసి ఆకీము, ఆకీము మరిసి ఎలీహూదు. 15 ఎలీహూదు మరిసి ఎలియాజరు, ఎలియాజరు మరిసి మత్తాను, మత్తాను మరిసి యాకోబు. 16 యాకోబు మరిసి యోసేపు, వన్ని ఆల్ని అతి మరియ పొటాదు క్రీస్తు ఇజి కూకె అతి యేసు పుట్టాన్. 17 యా లెకెండె అబ్రాహాము బాణిజ్ అసి దావీదు రాజు దాక మొతం పద్నాల్గి తరమ్కు, దావీదు రాజు బాణిజ్ అసి యూదురిజ్ బబులోను

* 1:1 1:1 దావీదు ఇస్రాయేలు లోకుర్ వందిజ్ దేవుణు ఏర్పాటు కితి రాజు. వాండ్రు ఇస్రాయేలుది రుండి రాజు వన్ని ముజాల సపులు ఇనికాన్ ఏలుబడిః కిజి మహాన్. * 1:6 1:6 2నము 11:1-27.

దేసమ్మదు వెట్టి పణి కిని వరిలెకెండ్ తొప్పొజతి కాలమ్దాక పద్నాల్లి తరమ్మకు. యూదురు బబులీసు దేసమ్మదు సొహి బాణిజ్ అసి యేసు క్రీస్తు దాక పద్నాల్లి తరమ్మకు.

యా లెకెండ్ యేసు క్రీస్తు పుట్టాన్. కసెలిజాణిజ్

18 యేసు క్రీస్తు యా లెకెండ్ పుట్టాన్. వన్ని అయ్సి ఆతి మరియెజ్ యోసేపు వందిజ్ వెన్బాత మహాద్. గాని వారు రిపర్ ఉండ్రె బాసె గూర్వండ ముందాల్లి అది దేవుణు అత్తు సత్తుదాన్ పాత డిస్టాద్. 19 గాని దనిజ్ పేరు కితికాన్ ఆతి యోసేపు దేవుణు రూలుజ్ లోజిజి మనికాన్ కక, విజిరిజ్ ఎద్రు సిగు కిబిన్వండ, ఎయెర్బా నెన్వండ, దన్నిజ్ డిసి సీదెజ్ ఇజి ఒండెబితాన్. 20 యోసేపు యా సజతిజి వందిజ్ అలోసనం కిజి మహివలె దేవుణు దూత కలాదు వన్నిజ్ తోరె ఆజి ఈహు వెహ్స, “దావీదు రాజు తెగ్రాతికాన్ ఆతి యోసేపు, నిజి పేరుకితి మని మరియెజ్ డగ్రుకిదెజ్ అనుమానం ఆమ. ఎందనిజ్ ఇహిజి దేవుణు అత్తు సత్తుదాన్ అది పాత డిస్ట మనాద్. 21 అది ఒరెన్ కొడెజ్ ఇడనాద్లె. వన్ని లోకాజ్ వరి పాపమ్కాణిజ్ వాండ్రు రక్కిస్సాన్లె. అందెజి వన్నిజ్ యేసు† ఇజి పేరు ఇడదెజ్వలె”, 22-23 “ఉండ్రె విడిః బోదెలి పాత డిసి ఒరెన్ మరిన్ ఇడ్వాద్లె. వాండ్రు ఇమ్మానుయెలు ఇజి కూకె ఆనాన్లె”, ఇమ్మానుయెలు ఇహిజి దేవుణు మా వెట తోడుః మనాన్ ఇజి అర్థం. ముందాల దేవుణు ప్రవక్త వెట వర్గితె యా మాటెజ్ నిజం పూర్తి అదెజ్ యాకెజ్ విజి యా లెకెండ్ జర్గితె. 24 యోసేపు నిద్రదాన్ తెలిఆతిజ్ దేవుణు దూత వన్నిజ్ వెహ్తి వజనె మరియెజ్ అల్లి లెకెండ్ వన్ని ఇండ్రొ కూక్ ఒతాన్. 25 గాని మరియ మరిన్ ఇడ్విదాక వాండ్రు దని డగ్రు సాన్వితాన్. మరిన్ పుట్టిజ్ వాండ్రు వన్నిజ్ యేసు ఇజి పేరు ఇట్టాన్.

2

తూర్పుదాన్ గ్వాసురు వాజినార్

1 హేరోదు రాజు ఏలుబడిః కిజి మహివలె యూదయ దేసమ్మదుమని బెత్తెహెము ఇని నాటో యేసు పుట్టాన్. వాండ్రు పుట్టి వెన్కా తూర్పు దరోటాన్ గ్వాసురు* యెరూసలేం ఇని పట్టుమ్దు వాతార్ 2 పట్టుమ్దు వాతార్, “యూదురిజ్ రాజు అదెజ్ ఇజి పట్టి కొడెః ఎంబె మనాన్? వాండ్రు పుట్టిదన్నిజ్ గుర్తు తొరిసిని సుక్క, మాపు తూర్పుదరోటు సుడతావ్. వన్నిజ్ పొగ్డిఃజి మాడిఃజి ఇజి వాత మనావ్”, ఇజి వెహ్తార్. 3 యా మాటెజ్ విహారె హేరోదు రాజుని వన్నివెట యెరూసలేమ్దికార్ విజేరె నండో గాబ్ర అతార్. 4 హేరోదు రాజు, పెరి పుజిరిజ్ విజిరిజ్ని యూదురి రూలుజ్ నెప్పిన్ని వరిజ్ విజిరిజ్ కూకెపిస్తాండ్రె, “క్రీస్తు ఆతికాన్ ఎంబె పుట్టాన్?”, ఇజి వెన్బాతాన్. 5 “యూదయ దేసమ్మదుమని బెత్తెహేముదు”, ఇజి వారు వెహ్తార్, “ఎందనిజ్ ఇహిజి, యా లెకెండ్ దేవుణు ముజాల ఒరెన్ ప్రవక్త వెట వర్గితె మహాన్.”

6 “యూదయ దేసమ్మదు మని బెత్తెహెమా, నీసు యూదయ నాహ్కాజ్ లోఇ ఇజిరికి ఆఇ. ఎందనిజ్ ఇహిజి, నీ లోఇహాన్ ఒరెన్ రాజు లెకెండ్† ఏలుబడిః కినికాన్ పుట్టాన్లె. వాండ్రు నా లోకుర్ ఆతి ఇస్తాయేలు లోకురిజ్ గవుడువెన్ లెకెండ్ మంజినాన్లె.” 7 నస్తవలె హేరోదు రాజు, మరి ఎయెర్బా నెన్వండ గ్వాసురుజ్ కూకెపిస్తాండ్రె సుక్క తోరె ఆత్తి సరియాతి టయం వరిజ్ వెన్బాజి నెస్తాన్. 8 వరిజ్ బెత్తెహేమ్దు పొక్తాండ్రె, “మీరు సొన్ని నెగ్రిండ అయో కొడెఃదిజ్ రెబాజి సుడఃజి వాండ్రు ఎంబె మనాన్ ఇజి నజిబా కబ్రురు తగ్గె. అయావలె నానుబా సొన్ని వన్నిజ్ పొగ్డిఃజి మాడిఃజి”, ఇజి వరిజ్ వెహ్తాన్. 9 వారు రాజు వెహ్తి మాట విహారె సోతార్. సొన్ని మహివలె, వారు తూర్పు దరోటు సుడఃతిమహి సుక్క, వరి ముందాల నడిఃజి మహాద్. కొడెః మహి బాడ్డి ముస్కు అందితిజ్ అయా సుక్క అబ్బె నిహాద్. 10 సుక్క సుడఃతిజ్ వారు గొప్ప నర్త అతార్. 11 ఇండ్రొ సొహారె అయ్సి ఆతి మరియ వెట మన్ని కొడెఃదిజ్ సుడిఃతారె ముణుకుజ్ ఊరెజి వన్నిజ్ పొగ్డిఃజి మాడిఃజి. నస్తవలె వారు ఒత్తిమహి పెటెజ్ రేతారె బజారం, సాంబ్రాణి, బోలాం‡ ఇనికెజ్ వన్నిజ్ నొడిత సితార్. 12 “హేరోదు రాజు డగ్రు

† 1:21 1:21 యేసు ఇని మాటదిజ్ అర్థం, యెహోవ దేవుణు రక్కిస్సాన్ సిల్లిజి సాయం కిజినాన్. * 1:22-23 1:22-23 యెసయ 7:14. * 2:1 2:1 సుక్తెజి వందిజ్ నదుపు నెస్తికార్. † 2:6 2:6 మికా 5:2. ‡ 2:11 2:11 సాంబ్రాణిసాంబ్రాణి ఇని మరాన్దాన్ దోహాక్కి నెగ్గె వాసనం మన్ని గొప్ప విలువాతి ఒస్తు బోలంబొలం ఇని మరాన్దాన్ నెగ్గె వాసనం మన్ని ఒస్తు మాయమ్కు లెకెండ్బా పణి కినాద్.

మరజి సొన్యాట్”, ఇజి దేవుణు దూత కలాదు వరిజ్ వెప్తా వజ, వారు మరి ఉండ్రీ సరిదాన్ వరి దేసెం సొహార్.

అయ్గుప్పు దేసమ్దు సొస్సినార్

13 గ్నూరురు మరజి సొహి వెనుక ఒరెన్ దేవుణు దూత యోసేపుజ్ కలాదు తోరె ఆజి, “నీను నిజ్ అ, హేరోదు రాజు కొడోదిజ్ సప్తెజ్ నుడోజినాన్. అందెజె వెటనె కొడోదిజ్ అయ్సిజ్ అసి అయ్గుప్పు దేసమ్దు సొన్ అ. మరి ఇనిక కిదెజ్ ఇజి నాను నిజి వెప్పిదాక అబెనె మన్ అ”, ఇజి వెప్తాన్. 14 నస్తివలె వాండ్రు నిజితండ్రె, కొడోదిజ్ అయ్సిజ్ అస్తాండ్రె అయా పొదొయెనె అయ్గుప్పు దేసమ్దు సొండ్రెజ్ సొతాన్. 15 హేరోదు సొనిదాక అబెనె మహాన్. “అయ్గుప్పు దేసమ్దాన్ నా మరిసిజ్ నాను కూక్”, ఇజి దేవుణు ముందాల ప్రవక్త వెట* వర్గితి మాట యా లెకెండ్రె పూర్తి ఆతాద్. 16 గ్నూరురు వన్నిజ్మోసం కితార్ ఇజి నెస్తాండ్రె హేరోదు రాజు నండో కోపం ఆతాన్. వారు వెప్తా టయమ్దిజ్ లెక కితాండ్రె బేత్తెహేమ్దుని, మరి డగ్రు మని ప్రాంతమ్కాజ్ మన్నినాహ్ కాజ్ మన్ని రుండి పంటిజ్ ని దన్ని అడిగి వయ్సు మని కొడోదిజ్ విజెరిజ్ సప్తెజ్ ఆడ్ర సితాన్.

17-18 “రామా నారుదాన్ ఉండ్రీ పెరి జాటు వెహద్. గుండె కొత్తె ఆజి అడోబాజిని జాటునె. రాహేలుసీ దన్ని కొడోర్ వందిజ్ అడోబజినాద్. కొడోర్ సొతిజ్ అది ఓరిస్తెజ్ అట్ వితాద్.” యిరిమ్యు ప్రవక్తవెట దేవుణు ముజాల వర్గితిమహి యా మాట యాలెకెండ్రె పూర్తి ఆతాద్.

నజరేతుదు మరజి వాజినార్

19 హేరోదు సొతి వెనుక అయ్గుప్పు దేసమ్దు మహి యోసేపుజ్ ఒరెన్ దేవుణు దూత కలాదు తోరె ఆతాండ్రె, 20 “నీను నిజ్ అ, కొడోదిజ్ అయ్సిజ్ అసి ఇస్రాయేలు దేసమ్దు సొన్ అ. ఎందనిజ్ ఇహిజ, కొడోదిజ్ సప్తెజ్ నుడోజి మహికార్ సాత సొహార్”, ఇజి వెప్తాన్. 21 అందెజె యోసేపు నిజితాండ్రె కొడోదిజ్ అయ్సిజ్ అస్తాండ్రె ఇస్రాయేలు దేసమ్దు మరజి సొండ్రెజ్ సొతాన్. 22 గాని హేరోదు సొతి వెనుక వన్ని మరిసి ఆతి అరకెలాయు యూదయ దేసమ్దు ఏలుబడిః కిజినాన్ ఇజి నెస్తాండ్రె అబ్బి సొండ్రెజ్ తియోలాతాన్. కలాదు వెప్తా లెకెండ్రె యూదయ దేసెం సొన్ ఏండ గలీలయ ముటాదు సొహాన్. 23 అబ్బి నజరేతు ఇని పట్టుమ్దు సొహాండ్రె బత్తితాన్. “నజరేతుదికాన్ ఇజి వాండ్రు కూకె ఆనాన్ లె”, ఇజి దేవుణు ప్రవక్తరు వెట క్రీస్తు వందిజ్ వర్గితిమహి మాటెజ్ యా లెకెండ్రె పూర్తి ఆతె.

3

బాప్తినం సీని యోహాను యేసువందిజ్ సరి తయార్ కిజినాన్.

1-2 అయ దినమ్కాజ్ బాప్తినం సీని యోహాను వాతండ్రె, “దేవుణు ఏలుబడిః కిని కాలం డగ్రు ఆత మనాద్. అందెజె మీరు పాపమ్కు ఒప్పుకొడిఃజి డిసి సీదు”, ఇజి యూదయ బిడిఃజ్ బూమి ప్రాంతమ్కాజ్ సాటిసి మహాన్. 3 “ప్రబు లోకుడగ్రు వాదెజ్ సరి తయార్ కిదు, వన్ని వందిజ్ సరి తినాజ్ కిదు”, ఇజి బిడిఃజ్ బూమిదాన్ ఒరెన్ డేల్చి వెప్పిని కంటం వాజినాద్* ఇజి యెసయ ప్రవక్త వెట దేవుణు ముందాల వర్గితిక విని వందిజె. 4 యోహాను ఒంటె బులుస్కాణిజ్ తయార్ కితి సొకెజ్ తోడిఃగితాండ్రె, నడుముదు తోలు బెల్లు తోహా ఆజి మహాన్. వాండ్రు మేపిలెకీని అడిఃవి తేనె, తింజి బత్తిజి మహాన్. 5 యెరుసలేమ్దికార్ని, యూదయ దేసమ్దికార్ విజెరె, మరి యెర్దాను గడ్డ డగ్రు మని నాహ్కాణికార్ విజెరె సొతారె యోహాను వెప్పికెజ్ వెండ్రెజ్ వన్నిడగ్రు వాతార్. 6 వారు, కితి పాపమ్కు ఒప్పుకొడిఃజె యెర్దాను గడ్డదు వన్ని కియుదాన్ బాప్తినం లాగె ఆజి మహార్. 7 వరిసయరు, మరి సదుకయరు నండోండార్ యోహాను బాప్తినం సీజి మహిబాన్ వాతార్. వరిజ్ నుడోజి వాండ్రు ఈహు వెప్తాన్, “మీరు వినం మన్ని సరాన్ లెకెండ్రె మన్నికిదెర్. దేవుణుబాణిజ్ కోపం వాజినాద్ ఇజి నమ్మిజి మీరు వాతిదెరా? సిల్లెద్. వన్ని కోపమ్దాన్ తప్తె ఆదెజ్ ఇజి మీరు వాతిదెరా? నిజమె అయలెకెండ్రె ఇజి నాను ఒడిఃదెజ్ సిల్లెద్. 8 మీ పాపమ్కు ఒప్పుకొడిఃజి డిసి సీజి దనిజ్ తగితి

* 2:15 2:15 హోసెయ 11:1. § 2:17-18 2:17-18 ఇస్రాయేలు (యూదురి) లోకురిజ్ అనిగోగో ఆతి ఇస్సాకు మరిసియాతి యాకోబు ఆల్చిన రాహేలు. నెబుక్కడనెసర్ బబులోసుదు ఏలుబడిః కిజి మహివలె విప్రయెన్ ది యూదురిజ్ అస్త ఒత్తాన్. వరి లోజ నండోండార్ బానె నప్పె ఆతార్. * 3:3 3:3 యెసయ 40:3.

పణిజీకిజి తోరిస్తు. 9 ‘మాపు అబ్రాహము తెగ్గాతికావ్, అందెజె మాపు సిక్కుదాన్ తప్పె ఆనాప్లా’ ఇజి మీ మన్నుదు మీరు ఒడిబిమాట్. ఎందనిజ్ ఇహిజ, యా పణకాణిజ్ అబహమ్ముజ్ కొడోర్ పుటిస్తెజ్ దేవుణు అట్టికాన్ ఇజి నాను మిజి వెప్పాన. 10 దేవుణు మరెక మొదోల్ కత్తి విసిరీదెజ్ కియుదు గొడలి అస్తి వన్నిజ్ పోలిత మనాన్. నెగ్గి పట్టు అన్ఇ మరెకాజ్ విజు కత్తి సినుద్ విసిర్పాన్లె. 11 మీరు పాపమ్కు ఒప్పుకోడెజి డిసిసి సీతి వందిజ్. నాను మిజి ఏరుదాన్ బాప్తినం సీజిన. నా వెనుక వానికాన్ నజి మిస్తి అతికారం మనికాన్. వన్ని జోడ్కు పిండెదెజ్బా నాను తగ్గిక ఆవ. వాండ్రు దేవుణు ఆత్మదాన్ని, సినుదాన్ మిజి బాప్తినం సీనాన్లె. 12 వాండ్రు గాలి ఇడ్డి సేహి కీదు అస్తి వన్నిజ్ పోలిత మనాన్. వాండ్రు వన్ని కలమ్దిజ్ నుబారం కిజి గాలి ఇట్టి కూలిజ్ కొటు ఇండ్రో ఒసి వాక్సాన్లె. పొటుదిజ్ నంబిఇ సినుదు సుర్నాన్లె.”

యేసు బాప్తినం లాగె ఆజినాన్.

13 నస్తివలె యోహాను కీదాన్ బాప్తినం లాగె ఆదెజ్, గలిలయదాన్ యేసు యొర్దాను గడ్డదు వాతాన్. 14 “నీ కియుదాన్ బాప్తినం లాగె ఆదెజ్, నజి అవ్సరం గాని నీను బాప్తినం లాగె ఆదెజ్ నా డగ్గు వాతిదా?” ఇజి యోహాను వన్నిజ్ అడ్డు కెదెజ్ నుడతాన్. 15 “ఏలు యా లెకెండ్ జరగిపిద్. విజు యా లెకెండ్ దేవుణుదిజ్ ఇస్టమాతివజ పూర్తి కినిక మజి తగ్గి”, ఇజి యేసు వెప్టాన్. నస్తివలె యోహాను ఒప్పుకోటాన్.

16 బాప్తినం లాగె ఆతి వెటనె యేసు ఏరుదాన్ వెల్లి వాతాన్. అయావలెనె ఆగాసం రే ఆతాద్. దేవుణు ఆత్మ పాపురపోలి లెకెండ్ యేసు మున్ను డిగ్జి వానిక యోహాను నుడతాన్. 17 “పీండ్రు నా ఇస్టమాతి మరిన్, విని మున్ను. నాను నండో సర్ద ఆజిన”, ఇజి దేవుణు మంజిని బాడిదాన్ వెప్పాని ఉండ్రీ జాటు వాతాద్.

4

యేసుజ్ సయ్యాన్ పరిస కిత్తిక.

1 వెనుక దేవుణు ఆత్మ యేసుజ్ బిడిజ్ బూమి ప్రాంతమ్దు నడెపిస్తాన్. అబె సయ్యాన్ యేసుజ్ తప్ప కిటిస్తెజ్ పరిస కిజి నుడతాన్. 2 నలపయి రొన్ను రెయు పొకల్ఉపాన్మహి వెనుక వన్నిజ్బజ కట్టాద్. 3 సయ్యాన్ వన్ని డగ్గు వాతండ్రె, “నీను దేవుణు మరిసి ఇహిజ, యా పణకుజ తిండి అఅ ఇజి వెహాఅ”, ఇజి వెప్టాన్. 4 నస్తివలె యేసు “లోకు బత్తిజినిక తిండిదానె అవద్, గాని దేవుణు వెయుదాన్వాని విజు మాటెజాణిజ్బా బత్తిజినాన్ ఇజి దేవుణు మాటదు రాస్త మనాద్”[☆], ఇజి వన్నిజ్ వెప్టాన్.

5 వెనుక సయ్యానాను యేసుజ్ దేవుణు పట్టుం ఆతి యెరూసలేముదు కూక్ ఒతండ్రె, అబె మని దేవుణు గుడికొసాదు నిల్వ్టాన్. 6 అబె నిల్వ్టాండ్ర “నీను దేవుణు మరిసి ఇహిజ, ఇబ్బెణిజ్ అడిగి డాట్అ. ‘నీ వందిజ్ వన్ని దూతరిజ్ దేవుణు ఆడ్ర సీనాన్. నీ కాల్యు పణకుజ తగ్గిలీండ వారు నిజి వరి కికాణిజ్ పెర్న అస్సార్’[☆] ఇజి దేవుణు మాటదు రాస్త మనాద్”, ఇజి వెప్టాన్. 7 యేసు వన్నిజ్, “‘నీ ప్రబు అతి దేవుణుదిజ్ పరిస కిదెజ్ అవద్’[☆] ఇజిబా రాస్త మనాద్”, ఇజి వెప్టాన్.

8 మరి ఉండ్రీ సుటు, సయ్యానాను యేసుజ్ నండో ఎత్తు మని ఉండ్రీ గొరోన్ మున్ను ఎకిస్తాండ్రె యా లోకమ్దు మని విజు దేసెమ్కాజ్, మరి వన్యాజ్ మున్ను ఏలుబడికె కినివరి అతికారమ్ని వరిజ్ కలిగితి మనికెజ్ విజు తోరిస్తాన్. 9 అక్కెజ్ తోరిస్తాండ్రె, “నీను నా ఎద్దు ముణుకుజ్ ఊరీజి నజి పొగడిజి మాడిస్తిజి యాకెజ్ విజు నాను నిజి సీన”, ఇజి వెప్టాన్. 10 యేసు వన్ని వెట, సయ్యానా, నా బాణిజ్ సాన్అ, “నీ ప్రబు అతి దేవుణుదిజ్ పొగడిజి మాడిసి, వన్నిజ్ సేవ కెదెజ్ ఇజి దేవుణు మాటదు రాస్త మనాద్”, ఇజి వెప్టాన్.

11 అయావలె సయ్యానాను వన్నిజ్ డిసి సాహాన్. దేవుణు దూతార్ వాజి వన్నిజ్ నెగిణ్ నుడతార్.

యేసు సువార్త సాటిస్తెజ్ మొదోల్పినాన్

12 యోహాను కయ్యది మహాన్ ఇజి విహండ్రె యేసు గలలయదు మని నజరేతు ఇని పట్టుమదు మరజి వాతాన్. 13 వెనుక యేసు నజరేతు పట్టు డిసి జెబులూను, నస్తాలి ప్రాంతమ్కాజ్ డగ్గు, గలలయ సందారం పడకాదు మని కపెర్నహమ ఇని పట్టుమదు వాతండ్రె బత్తితాన్. 14-16 “జెబులూను ప్రాంతమా, నస్తాలి ప్రాంతమా, యోర్దాన్ అతాహ పడక సమదరం డగ్గు మని యూదురు ఆఇకార్ బత్తిజిని గలలయ ప్రాంతమా, సీకటిదు బత్కిజి మహికార్ గొప్ప జాయ్ సుడకెతార్. సాపు ఉండ్రె నీడ లెకెండ్ మని దేసమదు బత్కిజి మహి లోకుర్ ముస్సు జాయ్పుట్టాద్”[☆]. ఇజి దేవుణు ముజాల యెసయ ప్రవక్త వెట వర్గితి మాట యా లెకెండ్ యేసు వాతిజ్ పూర్తి అతాద్. 17 అయా వలెహాన్ అసి యేసు, “దేవుణు ఏలుబడిః కిని కాలం డగ్గు ఆత మనాద్. అందెజి మీ పాపమకు బప్పుకొడిఃజి డిసి సీదు”, ఇజి సాటిస్తెజ్ మొదోల్స్తాన్.

యేసు సిసూరిజ్ కూక్కినాన్

18 యేసు గలలయ సమదరం ఒడుదాన్నడిసి మహివలె, పేతురు ఇజి కూకె ఆతిసిమోనుజ్ని, మరి వన్ని తంబెర్సి ఆతి అంద్రెయెజ్ సుడకెతాన్. వారు జాలెరిజు. వీరు రివిర్ సమదరమదు వల పొక్కి మొయెజ్అసి మహార్. 19 “నా వెట రదు. నా వెట వాదెజ్ లోకురిజ్ నెస్సిస్సివరి లెకెండ్ నాను మిజి తయార్ కినాలె”, ఇజి యేసు వరిజ్ వెప్తాన్. 20 వారు వెటనె వరి వలెజ్డిఃస్తారె వన్ని వెనుక సాహార్. 21 అబెజిజ్ సొన్ని మహిజ్యేసు జెబెదాయి మరిసి ఆతి యాకోబుజ్ని, వన్ని తంబెర్సి ఆతి యోహానుజ్ సుడకెతాన్. వారు రివిర్వరి బుబ్బు ఆతి జెబెదాయి వెట డోణిదు వలెజ్ నెగెణ్కిజి మహివలె యేసు వరిజ్ కూక్తాన్. 22 వెటనె వారు వరి డోణిని వరి బుబ్బుజ్డిఃస్తారె వన్ని వెనుక సాహార్.

యేసు జబ్బుది వరిజ్ నెగెండ్ కిజినాన్.

23 యేసు గలలయ దేసెం విజు బూలాజి యూదురు మీటిజ్ కిజిని ఇల్కాజ్ వరిజ్ నేస్సిసి, దేవుణు ఏలుబడిః కిని కాలం వందెజ్ సువార్త సాటిసి మహాన్. విజు రకమ్ది జబుది వరిజ్ని బాదదాన్ఇజ్ మహివరిజ్ నెగెండ్ కితాన్. 24 యేసు పేరు సిరియ దేసమదు విజు సారితాద్. రకరకమ్ది జబుదివరిజ్లోకుర్వన్ని డగ్గు తతార్. నండో నొపదాన్బాద ఆజి మహి వరిజ్, దెయం అస్సి వరిజ్, మూర్న జబు మహి వరిజ్, కిక్కుకాల్కు సాతివరిజ్వన్ని డగ్గు తతిజ్వాండ్రు వరిజ్ నెగెండ్ కితాన్. 25 గలలయ, దెకపొలి*, యెరూసలేము, యూదయ, యొర్దాను అతాహి పడకదాన్ మంద లోకుర్ వాజి వన్ని వెట సాహార్.

5

గొరొన్ ముస్సు కిత్తి బోద్.

1 యేసు మంద లోకురిజ్ సుడకెతాండ్రె ఉండ్రె గొరొత్ ఎక్తాన్. అబె బసిమహిజ్, వన్ని సిసూర్ వన్ని డగ్గు వాతార్. 2 అయావలె వాండ్రు వరిజ్ యా లెకెండ్ వెప్పి బోద్దిస్తెజ్ మొదోల్స్తాన్. 3 “దేవుణుదిజ్ సెందితిలెకెండ్ బత్తిజి దన్నిలోఇ మాపు తకుదికాప్” ఇజి నెసి మజి మరి మండ్రెజ్ ఎయెర్బా ఇజి కొరిజినరో, దేవుణు సీజిని దీవనమకు మంజినె. ఎందనిజ్ ఇహిజు, వారు దేవుణు కిని ఏలుబడిఃదు మంజినార్. 4 ఏలు దుకమదాన్ అడకబాజి మన్నికార్ దేవుణు సీని దీవనమకు మంజినికార్ ఆనారలె, ఎందనిజ్ ఇహిజు దేవుణు వరిజ్ ఓదరిస్తాన్. 5 నిపాతి గుణం మనికార్ దేవుణు సీని దీవనంకు మంజినికార్ ఆనార్లె ఎందనిజ్ ఇహిజు యా లోకం విజు వరి సొంతం ఆనాద్.

6 దేవుణు వెప్తా వజ నీతినిజాయిదాన్ మండ్రెజ్ ఇజి నండో ఆస మనికార్ దేవుణు సీని దీవనమకు మంజినికార్ ఆనారలె, ఎందనిజ్ ఇహిజు వరి ముస్సు నిండ్రు ఆనిలెకెండ్ వరి ఆసెజ్ దేవుణు తీరిస్తాన్లె. 7 కనికారం తోరిస్సికార్ దేవుణు సీని దీవనమకు మంజినికార్ ఆనారలె, ఎందనిజ్ ఇహిజు దేవుణు వరి ముస్సు కనికారం తోరిస్తాన్లె. 8 నెగ్గి ముస్సు మనికార్ దేవుణు సీని దీవనమకు మంజినికార్ ఆనారలె, ఎందనిజ్ ఇహిజు వారు దేవుణుదిజ్ సూణారలె.

9 లోకుర్ సమాదనమదాన్ మండ్రెజ్ ఇజి పణి కినికార్ దేవుణు సీని దీవనమకు మంజినికార్ ఆనారలె, ఎందనిజ్ ఇహిజు వారు దేవుణు కొడోర్ ఇజి కూకె ఆనారలె. 10 దేవుణు వెప్తా వజ నాయం

[☆] 4:14-16 4:14-16 యెసయ 9:1-2.

* 4:25 4:25 దెక్కుపాలి ఇహిజు వది పట్టుమకు ఇక్కెజ్ గలలయ సమదరం అతాహ పడక మహి.

వందిళ్ మల్లెజ్జ్ ఓరిస్సికార్ దేవుణు సీని దీవనముకు మంజినికార్ ఆనార్లె, ఎందనిజ్ ఇహిజ వారు దేవుణు కిని ఏలుబడిఃదు మంజినికార్లె.

11 నా ముస్సు, నమకు ఇట్టి వందిళ్ లోకుర్ మీ ముస్సు, నిందెజ్ మోస్సి మిజి మల్లెజ్ కిజి, మరి మీ ముస్సు, అబద్ధమాతి సెజ మాటెజ్ విజు వెహ్ని వెలె మీరు దేవుణు సీని దీవనముకు మంజినికార్.

12 అయావలె నండొ నరద ఆజి మండ్రు. ఎందనిజ్ ఇహిజ పరలోకామదు* మిజి నండొ పలం దోహ్కాద్లె. మీ ముందాల బత్రిజి మహి దేవుణు ప్రవక్తరుజ వెటబా వారు యాలెకెండ్ మల్లెజ్ కితార్.

సోరు - జాయ్

13 మీరు యా లోకమదు సోరు ననికిదెర్. గాని, సోరుదిజ్ రుసి సోహిజ, ఎలాగ దనిజ్ రుసి మరజి తప్పిస్తెజ్ ఆనాద్? అక వెల్లి విసిరిజ లోకుర్ మల్లెజ్ నె అఎండ మరి ఇని పణిదిజ్ బా రెజక. 14 మీరు యా లోకమదు మనివరిజ్ జాయ్ ననికిదెర్. గోరెన్ ముస్సు, మని పట్టుం డాజ్ జి మండ్రెజ్ అటవంద. 15 ఎయెర్ బా ఉండ్రి దీవ కసిని తూముదాన్ ముసి ఇడెవెర్. గాని ఇండ్రొణివరిజ్ విజెరిజ్ జాయ్ సీనివజి దీవ కంతుదునె ఇడాన్.

16 అయాలెకెండ్ నె, మీ బత్తు, విజెరిజ్ జాయి సీనివజి మండ్రెజ్. నస్తివలె మీరు కిని నెగ్గి పణిజి సుండఃజి లోకుర్ విజెర్ దేవుణు మంజిని బాడిఃదు మని మీ బుబాతి దేవుణుదిజ్ పొగిడిఃనార్.

దేవుణు సీతి రూలుజ్ వందిళ్

17 దేవుణు సీతి రూలుజ్ గాని, దేవుణు ప్రవక్తరు వెహ్ని మాటెజ్ గాని డెయ్ జి పొక్తెజ్ నాను వాత మన్న ఇజి మీరు ఒడబిమాట్. వనకాజ్ డెయ్ జి పొక్తెజ్ ఇజి సిల్లెద్, గాని అయాలెకెండ్ నె పూర్తి కిదెజ్ నె నాను వాత మన్న. 18 ఏలుహన్ అసి బూమి ఆగాసం సిల్లెండ ఆతిజ్ బా దేవుణు మాటదు మని ఉండ్రి ఇజిరి అక్కరం గాని, నున్న గాని, రాస్తి మని లెకెండ్ పూర్తి అవండ సోన్ ఇజి నాను మిజి నిజం వెహ్నిన.

19 ఎయెన్ బా దేవుణు మాటదు మని ఇజిరి ఆగ్నెజ్ లోక ఉండ్రి దనిజ్ లోజిజి మన్ ఏండ, అయాలెకెండ్ లోజి ఏండ మండ్రెజ్ ఇజి లోకురిజ్ నెస్సిస్తిజి వన్నిజ్, దేవుణు ఏలుబడిః కినివరి లోక లాన్ ఇజిరికాన్ లెకెండ్ వాండ్రు ఇడాన్లె. గాని ఎయెర్ బా దేవుణు మాటదు రాస్తిమని లెకెండ్ లోకురిజ్ నెస్సిసి అయాలెకెండ్ నె కిజి మహిజ దేవుణు ఏలుబడిః కినివరి లోక వారు గొప్పు పెరికార్ ఆనాన్లె.

20 మీరు కిని పణిజ్, పరిసయ్ రుజుని యూదురి రూలుజ్ నెస్సిస్సికార్ కిని పణిజి ముస్సు, దేవుణు ముందాల ఒదె సరి ఆతికెజ్ ఇహిజనె, మీరు దేవుణు కిని ఏలుబడిఃదు మంజినిదెర్లె ఇజి నాను మిజి వెహ్నిన.

సప్పిక ఆవిద్

21 “లోకాజ్ సప్తెజ్ ఆవిద్”* ఎయెన్ బా ఒరెన్ వన్నిజ్ సప్తిజ, వన్నిజ్ తవ్వండ తీర్పు వానాద్లె ఇజి ముందాహన్ అసి వెహ్ని మని మాట మీరు వెహిమనిదెర్ గదె? 22 గాని ఏలు నాను మిజి వెహ్నిక ఇనిక ఇహిజ ఎయెన్ బా, మరి ఒరెన్ వన్ని ముస్సు, కోపం ఆతిజి వన్నిజ్ తీర్పు వానాద్. ఎయెన్ బా మరి ఒరెన్ వన్నిజ్ “పణిదిజ్ రెకెకి”, ఇజి వెహ్నిజి వాండ్రు నన్ హద్రి సజం ఎద్దు దన్ని వందిజ్ సమాదనం వెహ్నిజ్ వలె. ఎయెన్ బా మరి ఒరెన్ వన్నిజ్ “బుద్ది సీలికి”, ఇజి వెహ్నిజి, వాండ్రు ఎలాకాలం సిసు కసి మంజిని బాడిఃదు అర్దు మంజినిన.

23-24 నీను దేవుణుదిజ్ నంద సుర్ని మాలి పీటాదు నంద సిదెజ్ సోనివెలె, మరి ఒరెన్ వన్నిజ్ నీ ముస్సు, ఇనికాదో కోపం మనాద్ ఇజి అబె నిజి ఎతు వాతిజ, నంద సిదెజ్ తతి వన్కాజ్ అబె ఇడఃజి వెటనె నంద సుర్ని మాలిపీట డిఃసి సోస్సి, ముందాల నీను వనివెట రాజినం ఆత. వెనుక మరజి వాజి దేవుణుదిజ్ నంద సుర్ని సీత. 25 నిజి కోర్పు కిదెజ్ అకు మని వన్ని వెట బేగి రాజినం ఆత. టయం మనివెలెనె ఆక కిత. సీలిజి వాండ్రు నిజి తీర్పు కిని వరిజ్ ఒవజెప్పాన్. తీర్పు కినికార్ నిజి జెలిదు ఇడెదెజ్ అతికారిజ్ ఒవజెప్పార్. వాండ్రు నిజి జెలిదు ఇడాన్. 26 ఉండ్రి వయ్ బా సిల్లెండ అపు మనిక విజు సీనిదాక నీను వెల్లి వాదెజ్ అటెజ, ఇజి నాను నిజి నిజం వెహ్నిన.

* 5:12 5:12 దేవుణు మంజినిమబాడ్డి † 5:13 యేసుప్రబు కాలమదు ఏలు దోహ్కె లెకెండ్ మన్ని సోరు సిల్లెతాద్. అయాలె సోరువెట తెల్లని ఇన్సుబా కూడిత మహా తడి కిత్తిజి సోరు విజు కరిగిజి సోనాద్, ఇన్సు మిగిలినాద్. అయాలె లోకుర్ సోరు రుసి సిల్లిక ఇజి వెహ్ని మహార్. * 5:21 5:21 నిగ్గువ 20:13.

27 “రంకు బూలాదెజ్ ఆవిద” ఇజి వెప్తా మనిక మీరు వెహి మనిదెర్ గదె. 28 గాని నాను మిజి వెప్పొక ఇనిక ఇహిజ ఎయెనబా మన్నుదు సెఇ ఆసదాన్ ఉండ్రి అయిలి కొడొడిజ్ బేస్తిజ వాండ్రు అయావలెనె దనివెట వన్ని మన్నుదు పాపం కితికాన్ ఆజినాన్. 29 నీ ఉణెర్ కణక నిజి తప్ప కిబిస్తిజ దనిజ్ లాగ్లి విసీర్త. నీనె ఎల్ల కాలం సిను మంజిని బాడిడు సొన్ని అర్వెండ, మీ ఒడొల్దాన్ ఉండ్రి ముక సొహిజ అక్కాదె నెగెద్. 30 మరి నీ ఉణెర్ కియు నిజి తప్ప కిబిస్తిజ, దనిజ్ కత్తి విసీర్త. నీనె ఎలాకాలం సిను మంజిని బాడిడు సొన్ని అర్వెండ, నీ ఒడొల్దాన్ ఉండ్రి ముక సొనికదె నెగెద్. 31 ఎయెనబా వన్ని ఆల్పిజ్ డిఃసి సీదెజ్ ఇహిజ ఇబ్బెణిజ్ అసి నీను నా ఆల్పి ఆవిద ఇజి దనిజ్ ఉండ్రి విడిఃఆకు రాసి సీదెజ్ ఇజి వెప్తాక మీరు వెహి మనిదెర్గదె? 32 గాని నాను మీ వెట వెప్పొక ఇనిక ఇహిజ, రంకు బూలాఇదనిజ్ మాసి డిఃసి సీతిజ, వాండ్రు దనిజ్ రంకు బూలాదెజ్ కిబిస్తికాన్ ఆజినాన్. మరి ఎయెనబా దనిజ్ వెండొలి కితిజ వాండ్రు దనివెట రంకు బూలానికాన్ ఆజినాన్.

ప్రమాణమ్కాజ్ వందిజ్

33 మరి ఇనిక ఇహిజ, “నీను కితి ఒట్టు పొక్తిక అయాలెకెండ కివిండ తప్పెజ్ ఆవిద, దేవుణు ముందాల కితి ఒట్టుదిజ్ అయావజనె కిదెజ్” ఇజి వెప్తాక ముందాహాన్ అసి మీరు వెహిమనిదెర్ గదె. 34 నాను మీ వెట వెప్పొక ఇనిక ఇహిజ ఇనిదనిజ్ బా ప్రమాణం కిమాల్. ఆకాసం తోడుః ఇజి వెహమాల్, అక దేవుణు బసిని సింహాసనం. 35 సిలిజ బూమి తోడుః ఇజి వెహమాల్, అక దేవుణు వన్ని కాల్యు ఇడ్లి పీట. మరి యెరూసలేం తోడుః ఇజి వెహమాల్, రాజు ఆతి దేవుణుదిజ్ సందితి పట్టుం. 36 నీ బుర్త తోడుః ఇజి బా వెహమా, ఎందనిజ్ ఇహిజ నీ బుర్తది కొప్పవెంటి ఉండ్రిబా తెలాజ్ గాని కరిజ్ గాని కిదెజ్ నీను అల్ఃఇ. 37 మీ మాటెజ్ ‘ఒఒ ఇహిజ ఒఒ’, ఇజి మండ్రెజ్. ‘ఆవిద ఇహిజ ఆవిద’, ఇజి నె మండ్రెజ్. వనకాజ్ మిస్తికెజ్ సెఇ వన్నిబాణిజ్ వానికెజ్”.

కణకాదిజ్ బదులు కణక.

38 “కణకాదిజ్ బదులు కణక, పలుదిజ్ బదులు పలు” ఇజి దేవుణు మోసేజ్ సీత్తి మన్ని రూలుదు వెప్తా మహిక మీరు వెహిమనిదెర్ గదె? 39 నాను మిజి వెప్పొస, సెఇ పణిజ్ కిని వరిజ్ అడ్డు కిమ. మరి నీను వన్ని మున్ను, కోపమాజి వాండ్రు నిజి కిత్తిదన్నిజ్ మర్జి కిదెజ్ ఆవిద. ఎయెనబా ఉణెర్ లెపాదు డెఃయ్తిజ, డేబ్ర లెపబా వన్నిజ్ తోరినెల్. 40 ఎయెనబా నిజి కోర్టు కిజి నీ సొక లాగ్దెజ్ సుడఃతిజ, నీ కండువాబా వన్నిజ్ సీజి మన్త. 41 మరి, ఒరెన్ రోమ సయనమ్దికాన్ వన్ని ఒప్పుజ్ పిండిజి వన్ని వెట ‘ఉండ్రి మయిలు దూరం రల్’ ఇజి నిజి బలవంతం కితిజ వన్నివెట రుండి మయిలుజ్ దూరం ఇడ్లి సొన్త. 42 నిజి లొస్సివన్నిజ్ సీత, మరి నిజి అపు లొస్సివరిబాణిజ్ మొకొం మహామ”.

నీ పగ్గతి వరిజ్ ప్రేమిన్త.

43 “నీ పడకాతి వన్నిజ్ ప్రేమిన్త, పగాతి వరిజ్ ఇన్తం ఆవిండ మన్త. మున్ను, కోపమ్దాన్ మన్త”, ఇజి వెప్తామహిక మీరు వెహిమనిదెర్ గదె? 44 గాని నాను మిజి వెప్పొక ఇనిక ఇహిజ, మీ పగ్గతి వరిజ్ ప్రేమిన్త, మిజి హిమ్స కిజిని వరి వందిజ్ పార్దనం కిదు. 45 అహిజ మీరు పరలోకామ్దు మన్ని మీ బుబ్బాతి దేవుణుది నిజమాతి కొడొర్ ఇజి తోరి ఆనిదెర్లె. దేవుణు సెఇవరి మున్నుబా నెగ్గివరి మున్నుబా వన్ని పొదు జాయ్ సిబిసినాన్. నాయం మని వరి మున్నుబా నాయం సిలివరి మున్నుబా పిరు పొక్కినాన్. 46 మిజి ప్రేమిన్తివరిజి మీరు ప్రేమిన్తిజ దేవుణు మిజి పలం సీనాన్ ఇజి మీరు ఒడిఃబిజినిదెరా? పను పెర్నికార్బా ఆహె కిజినార్ గదె? 47 మీరు మీ కుల వరిజె మీరు మాడిఃసినిదెర్ ఇహిజ మీరు ఆఇకార్ కినిదనిజ్ ఇంక మిస్తిక ఇనిక కిజినిదెర్? యూదురు ఆఇకార్బా అయాలెకెండ కిజినార్ గదె? 48 పరలోకామ్దు మన్ని మీ బుబ్బాతి దేవుణు ఇని కల్తి సీలికాన్. అందెజె మీరుబా అయాలెకెండెనె మండ్రు.”

6

జాగర్త మండ్రు

1 మీరు కిని నెగ్గి పణిజ్ లోకుర్ సుడఃదెజ్ ఇజి వరి ముందాల కివిండ జాగర్త మండ్రు. ఎందనిజ్ ఇహిజ ఆహె కితిజ పరలోకామ్దు మని బుబ్బాతి దేవుణు బాణిజ్ మిజి ఇని పలంబా

దొప్పావిద్. ² అందెజె అవ్వనరం మని వరిజ్ ఇనికబా సితిజ, వేసం కినికార్ కిని లెకెండ అక విజేరిజ్ తెలిని లెకెండ జోడుబాం ఉకేపిసి డేల్ని వెహ్మాట్. విజెరి ముందాల మజి గొప్ప పేరు వాదెజ్ ఇని ఆనదాన్ వారు యూదురు మీటిజ్ కిని ఇల్కాజ్, మరి సర్దు ఆహె కిబిస్సార్. వరిజ్ అయావలెనె పూర్తి పలం దొహ్క మనాద్ ఇజి నాను మిజి నిజం వెహ్పిన. ³ గాని నీను అవ్వనరమ్దు మనివరిజ్ సాయం కినివెలె, నీ ఉణెర్ కియు కినిక నీ డేబ్ర కియు నెస్టెజ్ ఆవిద్. ⁴ అహిజ నీను సితిక ఎయెర్బా నెన్ఎండ మంజినాద్. అయావలె ఎయెర్బా నెన్ఎండ నీను కితిక సుడేజిని నీ బుబ్బాతి దేవుణు నిజి పలం సీనాన్. ⁵ మీరు పార్దనం కినివెలె వేసం కిని వరి లెకెండ మన్మాట్. లోకుర్ విజేరె సూణి లెకెండ యూదురు మీటిజ్ కిని ఇల్కాజ్, మరి సర్దు నిల్ని పార్దనం కిదెజ్ వరిజ్ ఇన్టం. వరిజ్ పూర్తి పలం దొహ్క మనాద్ ఇజి నాను మిజి నిజం వెహ్పిన. ⁶ గాని నీను పార్దనం కినివెలె. నీను గదిదు సొన్ని సేహ్లా కెహ్పి, ఎయెర్బా తోఇ నీ బుబ్బాతి దేవుణు వెట పార్దనం కితి. అహిజ ఎయెర్బా నెన్ఎండ నీను కితిక సుడేజిని ఎయెర్బా తోరె ఆఇ నీ బుబ్బాతి దేవుణు నిజి పలం సీనాన్. ⁷ మరి మీరు పార్దనం కినివెలె యూదురు ఆఇ వరి లెకెండ పణిదిజ్ రెఇ మాటెజ్ వెహ్మాట్. అయాలెకెండ లావ్వగితిజానె దేవుణు వినాన్ ఇజి వారు ఒడేబిజినార్. ⁸ మీరు వరిలెకెండ మండ్రెజ్ ఆవిద్. ఎందనిజ్ ఇహిజ మిజి అవ్వనరం అతిక ఇనిక ఇజి మీరు లొన్సి ముందాలై మీ బుబ్బాతి దేవుణు నెసినాన్.

⁹ “అందెజె మీరు యా లెకెండ పార్దనం కిదెజ్. ‘పరలోకామ్దు మని మా బుబ్బాతి దేవుణు, లోకుర్ విజెరె నీ పేరు గొప్ప నెగ్గె ఇజి గవ్వరం సిపిర్. ¹⁰ నీ ఏలుబడి లోకుర్ విజెరి మున్సు మనీద్. పరలోకామ్దు నిజి ఇన్టమాతికెజ్ జర్గిని లెకెండెనె బూమి మున్సుబా జర్గిపిద్. ¹¹ రోజురోజుదిజ్ మజి కావాలిన్సి తిండి అయ రోజు మజి సీజ మన్అ. ¹² వేరెదికార్ మా వెట కితి తప్పజ్ మాపు వరిజ్ సెమిస్తి లెకెండెనె, మాపు కితి తప్పజ్ మజిబా సెమిన్అ. ¹³ పాపం కిబిస్సి సెఇ ఆనెజ్ మా లోఇ రెవండ, సయ్యూను బాణిజ్ మజి తప్సిన్అ.”

¹⁴ లోకుర్ మిజి కిని తప్పజ్ మీరు వరిజ్ సెమిస్తిజ, పరలోకామ్దు మన్ని మీ బుబ్బాతి దేవుణుబా మీరు కిని తప్పజ్ మిజి సెమిస్సాన్. ¹⁵ గాని, మీరు లోకుర్ మీ వెట కిని తప్పజ్ మీరు వరిజ్ సెమిన్ఎండ మహిజ, పరలోకామ్దు మన్ని మీ బుబ్బాతి దేవుణుబా మీరు కిని తప్పజ్ మిజి సెమిన్ఎన్.”

ఉపాస్

¹⁶ “మీరు ఉపాస్ కినివలె, వేసం కిని వరిలెకెండ మండ్రెజ్ ఆవిద్. ‘మాప్ ఉపాస్ మంజినాప్’ ఇజి విజేరె నెస్టెజ్ ఇజి వారు మొకొం నీర్దం కిజి మంజినార్. అయావలెనె వరిజ్ పూర్తి పలం దొహ్క మనాద్ ఇజి నాను మిజి నిజం వెహ్పిన. ¹⁷⁻¹⁸ గాని మీరు ఉపాస్ కినివెలె బురాదు నూనె రానె ఆజి మొకొం ఉణెర్పాజి మండ్రు. అహిజ మీరు ఉపాస్ కినిక లోకుర్ ఎయెర్బా నెన్ఎర్. గాని ఎయెర్బా తోఇ మీ బుబ్బాతి దేవుణు ఒరెండ్రె నెస్సాన్. ఎయెర్బా నెన్ఎండ మీరు కినిక సుడేజిని మీ బుబ్బాతి దేవుణు మిజి పలం సీనాన్.”

సమ్సారం

¹⁹ డొజారి డుగ్గెజి ఒతెజ్ అక్కు మని, మరి నెదని కరి తిండ్రెజ్ అకుమని యా బూమి మున్సు మీ వందిజ్ సమ్సారం గణెన్మాట్. ²⁰ గాని డొజారిజు డుగ్గెజి ఒతెజ్ అట్ఇ, మరి నెద గాని కరి గాని పాడే కిదెజ్ అట్ఇ దేవుణు మంజిని బాడిడు మీ వందిజ్ సమ్సారం గణెన్సు. ²¹ ఎందనిజ్ ఇహిజ నీ సమ్సారం ఎంబె మనాదో అబెనె నీ మున్సుబా మంజినాద్. ²² కణక ఒడేల్దిజ్ దీవ లెకెండెనె మనాద్. నీ కణక నెగ్గె ఇహిజ నీ ఒడేల్దిజ్ విజు నెగ్గెజ్ తసి మంజినాద్. ²³ నీ సెఇ ఉదెనమ్దాన్ నీ కణకెకాణిజ్ సుడిజి మహిజ, నీ మున్సు విజు సీకటి మంజినాద్. నీ ఒడెల్దిజ్ విజుబా సీకటి ఆజి మంజినాద్. నిజి మనాద్ ఇజినిను ఒడేబిజిని జాయ్ సీకటి ఆతిజ, అయ సీకటి ఎసానో సీకటి. ²⁴ ఎయెన్బా రివెర్ ఎజుమానిరు వందిజ్ ఉండ్రె లెకెండ పణి కిదెజ్ అట్ఎన్. ఒరెన్ వన్నిజ్ ప్రేమిసి మరి ఒరెన్ మున్సు ఇన్టం సిల్లెండ మంజినాన్. సిల్లిజి ఒరెన్ వన్నిజ్ లోజిజి నమ్మకమాతి వనిలెకెండ మంజినాన్. మహివన్ని మున్సు సెఇ మాటెజ్ వర్గిజి మంజినాన్. అయలెకెండెనె దేవుణుదిజ్ నీ డబ్బుదిజ్ ఉండ్రె లెకెండ ప్రేమిస్తిజ్ మీరు అట్ఇదెర్.

విసారిస్ మాట్

25 అందెజి నాను మిజి వెహ్పిక ఇనిక ఇహిజ, ఇనిక తినాల్లె, ఇనిక ఉణావ్లె ఇజి మీ బత్తు వందిజ్విసారం ఆమాట్. మరి మా ఒడొల్వందిజ్ ఇనిక పొరిపానావ్లె ఇజి ఒడిజిబిమాట్. మీ పాణం తిండిదిజ్ మిస్తిక ఆదా? మీ ఒడొల్వ సొక్క పాతెజ మిస్తిక ఆదా? 26 ఆగాసమదు ఎగ్రిజిని పొటిజ సుడొదు. అవి విత్తఉ, కొయ్ఉ, ఒని కొటుదు వాక్ఉ గాని వరలోకామదు మని మీ బుబ్బాతి దేవుణు వనకాజ్ పోస కిజినాన్. మీరు వన్యా మిస్తి విలువ మనికిదెర్ ఆఇదెరా? 27 మీ లోఇ ఎయెంబా విసారిస్ వన్ని బత్తుదిజ్ ఉండ్రీ గంట కుడుఃపైజ్ అట్నాండ్రా?

28 మరి ఎందనిజ్ సొకెజ వందిజ్ మీరు విసారిసినిదెర్? మడిజు మని పూజు సుడొదు, అవి క్లబ్బబాడొఉ, సొక కిదెజ్ నూలుజ్ తయార్ కిఉ. 29 అహిజబా విజు ఆస్తి కలిగితి మన్ని సొలోమోసు రాజు యా ఉండ్రీ పూజు లకెండ్ర సొకు మన్ని ఉండ్రీ సొక్క తొడిగివెతాన్, ఇజి నాను మిజి వెహ్పిన్. 30 నేడ్రు మంజి విగెహిజ్ సిసుద్ సురి ఆని మడిజు మని యా గడిదిజ్ దేవుణు యా లెకెండ్ర సొకు సిత్తాన్. అహిజ, ఇజిరి నమకం మనికిదెరా మరి ఒదె నగెండ్రమిజి సొకెజ్ తొడిగిన్వెతాండ్రా? 31 అందెజి మీరు, “ఇనిక తినావ్లె, మరి ఇనిక ఉణావ్లె, సిలిజ ఇనిక పొర్పానావ్లె”, ఇజి ఒడిజిబిజి బాద ఆమాట్. 32 ఎందనిజ్ ఇహిజ దేవుణుదిజ్ నెన్ఇకారెన్ వినక్ వందిజ్ రెబాజినార్. యాకెజ్ విజు మిజి అవ్నరం ఇజి వరలోకామదు మని మీ బుబ్బాతి దేవుణు నెసిన్. 33 గాని విజు దనిజ్ ఇంక దేవుణు ఏలుబడికి కిని వందిజ్ని మరి వన్ని ఎద్దు మీరు సీతినిజియిదాన్ మండ్రెజ్ ఇజి ఆస ఆజి మండ్రు. నస్తివలె మిజి కావాలిస్తికెజ్ విజు మిజి దోహ్కె. 34 విగెహిజ్ వందిజ్ విసారిస్మాట్. విగెహిజ్ జగ్గిని వన్యా వందిజ్ విగెహిజ్ విసారిస్టు. ఎమేణి రోజుదిజ్ తగితి క్లబ్బం అయ రోజుదు మంజిన్.

7

తీర్పు కిమాట్

1 “మహి వరి ముస్సు తీర్పు కిమాట్. అహిజ దేవుణు మిజిబా తీర్పు కిమాట్. 2 మీరు మహివరిజ్ ఎలాగ తీర్పు కినిదెర్ అయలెకెండ్ర దేవుణు మిజిబా తీర్పు వానాదలె. మీరు ఇని కొల్తదానె దేవుణు మిజిబా తీర్పు సీనాల్లె. 3 నీ కణకాదు ఉండ్రీ తూలం ననిక మహివలె, దనిజ్ సుడొవెండ, నీను, నీ తంబెరి కణకాదు మని ఇజిరి కసరాదిజ్ ఎందనిజ్ బేసిని? 4 ‘నీ కణకాదు తూలం ననిక మనివెలె అక లాగ్ఎండ, నీ తంబెరి కణకాదు మని ఇజిరి కసరాదిజ్ నాను లాగ్గి విసిర్పు’ ఇజి నీను ఎలాగ వెహ్పిని? 5 వేసం కినికిదెరా, ముందాల నీ కణకాదు మని తూలం ననిక లాగ్అ. అయావలె నీ తంబెరి కణకాదు మని ఇజిరి కసరాదిజ్ నెగెండ్ర సుడొజి లాగ్గిదిజ్ అట్టి. 6 దేవుణుదిజ్ నెందితి నజతిజ్ అక్కెజ్ ఇస్టం కిఇ వరిజ్ నెస్సిస్తిజ్ ఇజి సుడొమట్. అయలెకెండ్ర కితిజ, వారు తిండి సీని వరిజ్ కట్టి సెఇ నుకుడిజ్ లెకెండ్ర వారు కొంప ఆజి మరజి మీ ముస్సు వాజి అర్పార్. గొప్ప విలువ మనికెజ్ పండ్రెజ్ ముందాల ఇట్టిజ అక్కెజ్ వన్యాజ్ కాల్యాణిజ్ మట్టి లెకెండ్ర వారుబా కినార్లె. 7 మీరు ఇనిక లొస్సిదెరో అక మిజి దేవును సీనాన్. ఇనిక మీరు రెబాజినిదెరో అక దేవుణు మిజి సీనాన్. కొతు మీ వందిజ్ దేవుణు సెహ్లా రే ఆనాల్లె. 8 లొస్సివరిజ్ విజెరిజ్ దోహ్కె, రెబానివన్నిజ్ తోర ఆజినాద్. కొత్తిని వన్నివందిజ్ సేహ్లా రే ఆనాద్. 9 మీ మరెన్ మిజి తిండి లొస్సిజ, మీరు ఎయిదెర్బా వన్నిజ్ వణుకు సీనిదెరా? 10 మరి వాండ్రు మెయ లొస్సిజ, సరాన్సీనిదెరా? 11 మీరు సెఇకిదెర్ అతిజబా మీ కొడొరిజ్ నెగ్గి ఇనామ్కునె సీదెజ్ ఇజి నెస్సిదెర్. అహిజ పరలోకామదు మని మీ బుబ్బాతి దేవుణు, వన్నిజ్ లొస్సివరిజ్ దినిజ్ ఇంక మరి ఒదె నెగ్గి ఇనామ్కు సేవండ్రా? 12 అందెజి విజు సజతిజ్ లోఇ, మహికార్ మిజి ఇనిక కిదెజ్ ఇజి మీరు కోరిజినిదెరో అయలెకెండ్రెన్ మీరు వరిజ్ కిదు. దేవుణు మోసెజ్ సీతి రూలుజ్ని దేవుణు ప్రవక్తరు వర్గితి మాటెజ అర్థం యాకాదె.”

ఒసార్ సరిని ఇహ్కూ సరి

13 ఇహ్కూ సరి గవ్నిదాన్ సొండ్రు. ఎందనిజ్ ఇహిజ నాసనమ్దు సొని సరి ఒసార్దిక. అయ గవునిబా ఒసార్దిక. అయ సర్దు సొనికార్ నండొండ్రా మనార్. 14 ఎలాకాలం మంజిని బత్తు సీని సరి ఇహ్కూదికాదె, దని గవునిబా ఇహ్కూదిక. అయ సరిదాన్ నడిజినికార్ కొకొండ్రా.

మరాన్ని దని పట్టు

15 నెగ్గికావ్ ఇజి నాటిసినికార్ గాని తవు నెస్సిన్సి ప్రవక్తరు వందిజ్ జాగర్త మండ్రు. వారు ప్రమాదమాతి మూర్కతం మని కార్నుకుడిజ్ లెకెండ మనికార్. గాని వెల్లిహాన్ గొరె లెకెండ ప్రమాదం సిలికార్ ఇజి తోరె ఆజినార్. 16 వరి పణిజాణిజ్ మీరు వరిజ్ నెస్సిదెరెల. ఎయెర్బా సాప్పుతుపెజాణిజ్ ద్రాసపట్టు కొయ్విర. సాప్పు మరెకాజ్ బొడె పట్టు కొయ్విర. 17 అయలెకెండెనె విజు నెగ్గి మరెకాజ్, నెగ్గి పట్టునె అస్సె, మరి సెఇ మరాతు సెఇ పట్టునె అస్సె. 18 ఉండ్రీ నెగ్గి మరాతు సెఇ పట్టు అన్ఉ, మరి సెఇ మరాతు నెగ్గి పట్టు అన్ఉ. 19 నెగ్గి పట్టు అన్ఇ మరెక్ విజు కత్తి సిసుద్ విసిరె అనెలె. 20 అయలెకెండెనె వరి పణిజాణిజ్ మీరు వరిజ్ నెస్సిదెరె. 21 ప్రబువా, ప్రబువా ఇజి నజి కూక్కికార్ విజెరె దేవుణు ఏలుబడిడు మన్విర, గాని పరలోకామ్దు మని నా బుబెజ్ ఇస్టమాతి వజ కినికాండ్రె దేవుణు ఏలుబడిడు మంజినాన్. 22 తీర్పు తీరిసిని దినమ్దు నండొండార్ నా డగ్రు వాజి, “ప్రబువా, ప్రబువా మాపు నీ పేరుదాన్ దేవుణు ప్రవక్తరు వజ వరగిఎతాపా? నీ పేరుదాన్ దెయమ్కాజ్ పెరెవతాపా? నీ పేరుదాన్ నండొ బమ్మాతి పణిజ్ కిఎతాపా?”, ఇజి వెహ్సార్. 23 అయావలె, “నాను మిజి ఎసెజ్బా నెన్ఎత. సెఇ పణిజ్ కినికిదిరా, నా డగ్రుహాన్ సాండ్రు ఇజి వరిజ్ తినాజ్ వెహ్సా.

బుద్ధి మనికాన్ ని బుద్ధి సిలికాన్

24 అందెజె, యా నా మాటెజ్ వెంజి అయా వజ కినికాన్ ఎయెర్బా, సటు ముస్సు వన్ని ఇలు తొహ్తి బుద్ధి మనివన్సిజ్ పొలిత మనాన్. 25 పిరు వాతాద్. గడ్డెజ్ నిండ్రెజి సాహె. గాలి వాజి అయ ఇలు ముస్సు డెతూద్ గాని అయ ఇలు పునాది సటు ముస్సు మనిజ్ అరెఎతాద్. 26 గాని యా నా మాటెజ్ వెంజి వన్కా లెకెండ కిఇకార్ ఎయెర్బా ఇస్సు ముస్సు వన్ని ఇలు తొహ్తి బుద్ధి సిలి వన్సిజ్ పొలిత మనాన్. 27 పిరు వాతాద్. గడ్డెజ్ నిండ్రెజి సాహె. గాలి వాజి అయ ఇలు ముస్సు డెయెతాద్. అయావలె అయ ఇలు నండొ జాటుదాన్ అడిగి అర్తాద్.” 28 యేసు యా మాటెజ్ వెహ్సా వీజితిజ్ లోకుర విజెరె వన్ని బోదదిజ్ బమ్మ అతార్. 29 ఎందనిజ్ ఇహిజు వాండ్రు, యూదురి రూలుజ్ నెస్సిన్సి వరి లెకెండె ఆవండ, అతికారం మనివన్సి లెకెండెనె వాండ్రు బోదిస్తాన్.

8

1 యేసు అయ గొరెన్డిగ్జి వాతివలె మంద లోకుర వన్ని వెనుక వాతార్. 2 కుస్తు రోగం * మనికాన్ ఒరెన్ వాతండ్రె వన్ని ముందాల ముణుకుజ్ ఊర్జి, “ప్రబువా, నాను నెగెణ్ ఆదెజ్ ఇజి నిజి మన్సు మహిజు, నజి నెగెణ్ కిదెజ్ అట్టి”, ఇజి వెహ్సాన్. 3 అందెజె వాండ్రు కియు సాప్పి వన్సిజ్ ముట్టాండ్రె, “నజి మన్సు మనాద్, నీను నెగెణ్ ఆఅ”, ఇజి వెహ్సాన్. వెటనె వన్సిజ్ మహి పెరి జబు డింజు సాహాద్. 4 నస్తివలె యేసు వన్సివెట, “యాక ఎయెరిజ్బా ఇనికబా వెహ్మమ. నీను తినాజ్ సాన్ని నీ ఒడొలె పుజెరిజు తోరిన్అ. నీను నెగెణ్ ఆతి దనిజ్ వరిజ్ రుజువ్ లెకెండె మోసె ముజలె ఆడ్ర సితి వజ దేవుణుదిజ్ సంత సిఅ”, ఇజి వెహ్సాన్.

ఒరెన్ సదాతిపతి ఆతి వన్ని నమకం

5-6 యేసు కెవెర్నహము ఇని పట్టుమ్దు వాతివెలె సదాతిపతి† ఒరెన్ వన్ని డగ్రు వాతండ్రె, “ప్రబువా, నా పణిమన్సి ఒరెన్ కికు కాల్యు సాని జబుదాన్ నండొ బాద ఆజి నా ఇండ్రొ గూర్త మనాన్”, ఇజి వెహ్సా బతిమాలితాన్.

7 “నాను సాన్ని వన్సిజ్ నెగెణ్ కిస”, ఇజి యేసు వెహ్సాన్. 8 నస్తివలె అయ సయన్మది అతికారి ఈహు వెహ్సాన్, “ప్రబువా, నీను నా ఇండ్రొ వాదెజ్ నాను తగ్గిక ఆవ. గాని నీను ఉండ్రీ మాట వెహ్సాజ ఆనాద్, నా పణిమన్సి నెగెణ్ ఆనాన్. 9 నీను అయాలెకెండె కిదెజ్ అట్టిఇజి నాను నెసిస. ఎందనిజ్ ఇహిజు నా ముస్సు అతికారం మన్సికార్ మనార్. నా అడిగి సయన్మదికార్ మనార్. నాను ఒరెన్ వన్సిజ్ ‘సాన్అ’ ఇహిజు సానాన్. మరి ఒరెన్ వన్సిజ్ ‘రఅ’ ఇహిజు వానాన్. నాను నా పణి మనిసిదిజ్ ‘అయ పణి కిఅ’ ఇహిజు వాండ్రు ఆక కినాన్.”

* 8:2 8:2 కుస్తు రోగం ఇహిజు పెరిజబ్బు అయ జబ్బు వాతిజు కికు కాల్యు మన్సి డెస్సెజ్ తెవజ సానాదెలె జబ్బు మన్సిబాన్ ముట్టిజు నెన్విద్ † 8:5-6 8:5-6 సదాతిపతి ఇహిజు రోముసయ్యమ్దు మన్సి వందమణిసెర్ సయ్యమ్ది వరిజ్ అతికారి.

10 యేసు యీ మాట వెంజి బమ్మ అతాండ్రె వన్ని వెనుక వానివరిజ్ నుడేజి, “విన్నిజ్ మన్ని లెకెండ దేవుణు ముస్సు, నిసా పెరి నమకం మని ఎయెరిజ్ బా ఇస్రాయేలు లోకుర్ నడిమి, నాను నుడేదెజ్ సిల్లె ఇజి నాను మిజి నిజం వెస్సిన. 11 నాను మిజి వెస్పాక ఇనిక ఇపాజ, దేవుణు కిని ఏలుబడి: వానివలె, తూర్పుదాన్ పడమరదాన్ నండో లోకుర్ వాజి అనిగొగొర ఆతి అబ్రాహాము, ఇస్సాకు, యాకోబు ఇని వరివెట పరలోకామ్ దు విందుదు బస్సార్. 12 గాని దేవుణు కిని ఏలుబడి:దు తవ్వెండ మంజినావేలె ఇజి ఒడేబిజిని వరిజ్ వెల్లి సీకటిదు విసీర్ నాన్. అబె లోకుర్ అడేబాజి పల్కు కొహొక్కి మంజినార్.”

13 యేసు అయా సదాతిపతిజ్, “సాన్ అ, నీను నమ్మతి వజనె జర్గినాద్”, ఇజి వెహ్తాన్. అయ గడియారునె వన్ని పణిమనిసి నెగెండ్రె ఆతాన్.

యేసు నండ్రె లోకురిజ్ నెగెండ్రె కిజినాన్.

14 వెనుక యేసు పేతురు ఇండ్రె వాతాన్. వన్ని మీమ్ సి నోబుదాన్ గూర్తిమనిక నుడేతాన్. 15 వాండ్రు దని కియుదు ముట్టిజ్ సరి దనిజ్ మహి నోబు డి:స్త సాహద్. అది నిజేతాదె వన్నిజ్ నెగెండ్రె నుడేదెజ్ మొదోల్స్తాద్. 16 పొదు అతివలె, దెయమ్ కు అస్తి వరిజ్ నండ్రె డారిజ్, లోకుర్ వన్ని డగ్రు తతార్. వాండ్రు ఉండ్రె మాటదానె దెయమ్ కాజ్ పెర్తాన్, మరి జబుది వరిజ్ విజేరిజ్ నెగెన్ కితాన్. 17 “వాండ్రు మా నీర్ నమ్ కు లాగితాన్, మరి మా జబుజ్ వాండ్రు పిండితాన్”^{*} ఇజి యెనయ ప్రవక్త వెట దేవుణు ముజాల వర్గితి మాటెజ్ పూర్తి ఆదెజ్ యాక జర్గితాద్.

యేసు వెట సాండ్రెజ్ ఇపాజ ఇనిక కిదెజ్

18 యేసు వన్ని డగ్రు మని మంద లోకురిజ్ నుడేజి సమ్ దరం అతాహ పడక సాండ్రెజ్ ఇజి వన్ని సిసూరిజ్ వెహ్తాన్. 19 నస్తవలె, యూదురి రూలుజ్ నెస్సిస్సికాన్ ఒరెన్ వన్ని డగ్రు వాతండ్రె, “బోద్ కనికి, నీను ఎంబె సాహిజ్ బా నీ వెట నానుబా వాన”, ఇజి వన్నిజ్ వెహ్తాన్. 20 నస్తవలె యేసు, “నకెజ బోరోజ్ మనె, ఆగానమ్ దు ఎగ్రిజిని పొటిజ గూడుకు మనె, గాని లోకు మరిసి ఆతి నజి బుర్త డుట్టి మండ్రెజ్ బా బాడి: సిల్లెద్”, ఇజి వెహ్తాన్. 21 సిసూర్ లొఇ ఒరెన్ వాతండ్రె, “ప్రబువా నాను ముందాల సొన్ని నా బుబ్బు సాతి పిన్ గు పెరెజి పొక్కి వాన”, ఇజి వెహ్తాన్. 22 నస్తవలె యేసు, “సాతికారో[†] వరి సాతి వరిజ్ పెరెజి పొక్కిర్, నీను నావెట రఅ”, ఇజి వన్నిజ్ వెహ్తాన్.

యేసు తుపాన్ దిజ్ ఆలెస్సిసి నాన్

23 యేసుని వన్ని సిసూర్ డోణి ఎక్తారె అబ్బెణిజ్ సోత సాహార్. 24 వారు సొన్ని మహిజ్ యేసు డోణిదు నిర్త కిజి మహాన్. వెటనె అయ సమ్ దరమ్ దు గాలితూపాన్ రేజితాద్. ఉల్కెజ్ వాజి అయ డోణి ముస్సు అర్తె. 25 సిసూరు సొన్ని వన్నిజ్ నిక్తారె, “ప్రబువా, సాన సానాఫ్లె, మజి రక్సీన్ అ”, ఇజి వన్నిజ్ నిక్తారె. 26 అయోవలె యేసు వరిజ్, “ఎందనిజ్ మీరు నిసా తకు నమకం మనికిదెర్ ఆజినిదెర్?”, ఇజి వెహ్తండ్రె నిజ్ జి గాలిదిజ్ ఉల్కెజ్ అలెజి మన్ అ ఇహాన్. ఆకెజ్ పూర్తి పలక్ ఆతె. 27 వారు బమ్మ ఆతారె, “పీండ్రు ఎలాగ మర్తికాండ్రె? గాలిని ఉల్కెజ్ బా వన్నిజ్ లోజిజన”, ఇజి వర్గితార్.

దెయం అస్తి రిఎరిజ్ నెగెండ్రె కిజినాన్

28 యేసు సమ్ దరం అతహి పడక మని గదరెను ఇని నారు అందితిజ్, దెయం అస్తికార్ రిఎర్, యూదురు వరి సాతివరిజ్ సమాది కిని సాలమ్ కాణిజ్ సోతారె వన్ని ఎర్తు వాతార్. వారు జంతు నని మూర్ కతం మనికార్ కక ఎయెర్ బా అయ సరి సాన్ ఏర్. 29 “ఓ దేవుణు మరిసి, మా వెట మిజి ఇని పణి? కాలం వాని ముజాల మజి బాద్ కిదెజ్ ఇబ్బె వాతిదా?” ఇజి డేడి:స్తార్. 30 వరి ఎర్తు కండెక్ దూరమ్ దు పండ్రెజ్ మంద మెయ్ జి మహా. 31 అయ దెయమ్ కు వన్నిజ్ “నీను మజి ఉల్పిని లెకెండ్రె ఇపాజ, అయ పండ్రెజ్ లొఇ మజి పోక్ అ”, ఇజి బతిమాలతె.

* 8:17 8:17 యెనయ 53:4. † 8:22 8:22 అయాలెకెండ్రె వెహ్తావలె దేవుణువెట ఇని పొత్తు సిల్లి ఆత్మదిజ్ నెందితి నజితిజి పందిజ్ యేసు వెహ్తాన్. నిజం సాతివరి పందిజ్ ఆపద్. యా మాటెజ్ దేవుణు ఏలుబడి: అడిగి మన్ ఇ వరి పందిజ్ వెహ్తాన్. యా మాటెజ్ యాలెకెండ్రె లూక 15:24,32, మరి ఎవెను 2:1 బాన్ బా రాస్త మనాద్. § 8:28 8:28 యేనుప్రబు కాలమ్ దు నుట్టు బోరోకిజి సాలమ్ లెకెండ్రె తయార్ కిజి సాతి వరిజ్ సమాది కిజి మహార్. పీనుగు సాలమ్ లొఇ ఇడ్డి పణుకుదాన్ సాలమ్ దిజ్ మూసి మహార్.

32 వాండ్రు వన్నాళ్ల “సొండ్రు” ఇజి వెహ్లాజ్ అయ దయమ్మకు వరిజ్ డిస్సినె పండ్రీజి లోఇ సొహె. అయ మంద పండ్రీజ్ విజు గొరొన్ మున్నుహాన్ ఉహ్ క్వి సొహెనె సమదరమ్మదు అర్తె సొతె. 33 పండ్రీజ్ మేప్పికార్ ఉహ్ క్వి సొన్ని పట్టుమ్మదివరిజ్ జర్గితికెజ్ విజు వెహ్లా. దెయం అస్తి మహివరిజ్ జర్గితికెబా వెహ్లా. 34 నస్తివలె అయ పట్టుమ్మదికార్ విజెరె సొసి యేసుజ్ సుడెడెజ్ వన్ని ఎద్దు వాతార్. వన్నిజ్ సుడెటిజ్, పరి నారు డిసి సొనె అ ఇజి వన్నిజ్ బతిమాలతార్.

9

యేసు కిక్కుకాల్కు అర్తి వన్నిజ్ నెగెండె కిజినాన్

1 యేసు డోణి ఎక్తాండ్రె సెరు డాల్సీ కపెర్నెహము ఇని వన్ని సొంత పట్టుమ్మదు వాతాన్. 2 అయావలె నెగెండార్ కికు కాల్కు అర్తి మంసమ్మదు గూర్జిమహి ఒరెన్ వన్నిజ్ యేసు డగ్రు తతార్. దేవుణు మున్ను వరి నమకం యేసు సుడెతాండ్రె, “మరిన్, దయెరమ్మదాన్ మనె అ, నీ పాపమ్మకు సెమిస్త మన” ఇజి కికు కాల్కు అర్తి వన్నిజ్ వెహ్లాన్. 3 యూదురి రూలుజ్ నెస్సిస్సికార్ నెగెండార్ “పిండ్రు దేవుణుదిజ్ దూసిస్సాన్”, ఇజి వరి లోఇ వారె వర్తితార్. 4 యేసు వరి మన్నుదు మనికెజ్ నెస్తాండ్రె ఈహు వెహ్లాన్ “మీరు ఎందనిజ్ మీ మన్నుదు సెఇకెజ్ ఒడెజినిదెరె?”. 5 “నీ పాపమ్మకు సెమిస్తమన ఇజి వెహ్నిక సులునా? నీను నిజ్జి నడిఅ ఇజి వెహ్నినిక సులునా?”. 6 “లోకు మరిసి ఆతి నజి బూమి మున్ను పాపమ్మకు సెమిస్తాజ్ అతికారం మనాద్ ఇజి మీరు నెస్తిజ్ వెలె.” వెనుక కికు కాల్కు అర్తివన్ని వెట, “నిజ్ అ నీ మనసం అసి ఇండ్రె సొనె అ”, ఇజి యేసు వెహ్లాన్. 7 వాండ్రు నిజితండ్రె ఇండ్రె సొహాన్. 8 లోకురి విజెరె అక సుడెజి బమ్మ అతార్. లోకురిజ్ యా లెకిండె అతికారం సితి దేవుణుదిజ్ పొగిడితార్.

యేసు మత్తాయిజ్ కూక్కినాన్

9 యేసు అబెణిజ్ సొన్ని మహిజ్, వన్ను పెరెనికాన్ మత్తయి ఇనికాన్ వన్ని బాడిడు బన్దు మహాన్. యేసు వన్నిజ్ సుడెజి, “నా వెట రఅ”, ఇజి వెహ్లాజ్, వాండ్రు నిజితాండ్రె యేసు వెట సొహాన్. 10 వెనుక యేసు మత్తాయి ఇండ్రె బోజనం కిదెజ్ బస్తి మహిజ్, నండెండార్ పన్ను పెర్నికార్ ని* పాపం కినికార్ ఇజి పరిసయెరు వహ్నికార్ వాతార్ వన్ని వెటని వన్ని సిసూర్ వెట బోజనమ్మదిజ్ బస్తార్. 11 పరిసయెరు అక సుడెజి, “ఎందనిజ్ మిజి నేరెప్పిస్సికాన్ పన్ను పెరెనివరి వెట, పాపం కినివరి వెట బోజనం కిజినాన్”, ఇజి వన్ని సిసూర్జి వెనెబాతార్. 12 యేసు అయ మాట విహండ్రె, “జబు మనివరిజె డాక్టర్ అవ్సరం, నెగెణ్ మని వరిజ్ డాక్టర్ అవ్సరం సిల్లెద్”, ఇజి వెహ్లాన్. 13 “మీరు మహి వరి మున్ను కనికారం తోరెస్తిజ్ ఇజినె నాను కోరిజిని గాని కత్తి పూజెజి నాను కోరిమ్*, ఇజి దేవుణు వెహ్లా మాటది అర్థం ఇనికాదో ఇజి మీరు సొన్ని నెస్తు. పాపం కిని వరిజ్ కూకెజెజె నాను వాత మన, నెగెణ్ మనికాప్ ఇజి ఒడెబిని వరిజ్ అవద్”, ఇజి వెహ్లాన్.

యేసుజ్ ఉపాన్ వందిజ్ వెనెబాజినార్.

14 నస్తివలె యోహాను సిసూరు వన్ని డగ్రు వాజి, “మాపుని పరిసయెరు డిసెవండె ఉపాన్ మంజినాప్, గాని నీ సిసూర్ ఎందనిజ్ ఉపాన్ మనెవ్రి?”, ఇజి వెనెబాతార్. 15 దనిజ్ యేసు ఈహు వెహ్లాన్, “పెండ్లి దజడాయెన్, పెండ్లి కూలెజి వెట మని వెలె వారు దుకమ్మదాన్ మంజినానా? పెండ్లి దజడాయెన్ వరిబాణిజ్ కూకె ఆతి వెనుక వారు ఉపాన్ మంజినార్.” 16 “ఎయెరెబా పడాయ్ పాతద్దు కొత పాత ముక కుడుప్పి గుత్వెరె. ఆహె కితిజి కొత పాత ముక కేట ఆజి కిజినిక మరి లావ్ అనాద్. 17 ఎయెరెబా పడాయి తోలు సన్నిదు కొత ద్రాక్కు కల్లు వాకెవె. ఆహె కితిజి కొత ద్రాక్కు కల్లు పులాజ్ అనివెలె తోలు సంసి పెడెల్ నాద్, ద్రాక్కు కల్లు వెల్లి సొనాద్. మరి సంసి పాడానాద్. కొత ద్రాక్కు కల్లు కొత తోలు సన్నిదునె వాక్తెజ్. అయావలె రుండెబా పాడె: ఆఉ.”

సాతి అయెలిని జబు మని బోదిలి

* 9:10 9:10 పన్ను పెర్నివరిజ్ యూదురు ఇన్సం కివితార్. యూదురు పన్ను పెర్నివరిజ్ తక్కుదికార్ మరి గొప్ప పాపం కినికార్ ఇజి ఒడెబిజి మహార్. వారు రోమ ప్రెబుత్వం వందిజ్ పన్ను పెర్ని మహార్. అక్క యూదురి రులుదిజ్ పడిఎండ మహార్. వారు కిని వణిదాన్ వారు ఆఇవరివెట కూడెజి మహిజ్ వారు సుబ్బరం సిల్లికార్ ఇజి వరివందిజ్ ఒడెబిజి మహార్. ✱ 9:13 9:13 హోనెయి 6:6.

18 యేసు యా మాటోజ్ వరి వెట వెప్పి మహివలె, యూదురి మిటిజ్ కిని ఇండ్రోణి ఒరెన్ అతికారి వాతండ్రె వన్ని ఎర్దు ముణుకుజ్ ఊరిజ, “నా గాలు యెలె సాతాద్. నీను వాజి నీ కియు దని మున్సు ఇడఃఅ. అది బత్తినాద్”, ఇజి వెప్తాన్. 19 యేసు నిజితండ్రె వన్ని వెట సాహాన్. వన్ని సిసూర్బా సాహాన్.

20-21 నస్తవలె పనెండు పంటజాణిజ్ వెల్లి ఆని జబుదాన్ బాద ఆజిమహి ఉండ్రి బోదెలి, “యేసు తోడిగతిమని నీరి సొక్కదు ముట్టిజ సరి నాను నెగెండ ఆస”, ఇజి దని మన్సుదు ఒడఃబితాద్ వన్ని వెనుక వాతాద్ వన్ని పాత సెంగుదు ముట్టాద్. 22 యేసు వెనుక మరజి దనిజ్ సుడఃజి, “ఓ బయి దయేరమ్దాన్ మన్అ. నీను నా మున్సు ఇట్టి మని నమకమ్నె నిజి నెగెన్ కిత మనాద్”, ఇజి వెప్తాన్. అయావలెనె అయ బోదెలి నెగెండ ఆతాద్. 23-24 నస్తవలె యేసు అతికారి ఇండ్రో వాటిజ్, పిరుడిః ఊక్కివరిజ్ గగోల్ అని వరిజ్ సుడఃజి, “ఇబ్బెణిజ్ సొండ్రు, యా ఇజిరి బయి నిర్దు కిజినాద్ గాని సావద్”, ఇజి వెప్తాన్. వారు వన్నిజ్ వెక్కిసి సిక్టార్. 25 అబె నిండ్రితి మహి లోకురిజ్ విజిరిజ్ వెల్లి పోక్కి వెనుక, యేసు ఇండ్రో డుఃగితాండ్రె అయేలి కీదు అస్తిజ్అది నిజితాద్. 26 యా కబ్బురు అయ ప్రాంతం విజి సారితాద్.

యేసు గుడ్డిదివరిజ్ని గుల్లవన్నిజ్ నెగెండ కిజినాన్.

27 యేసు అబెణిజ్ సొన్ని మహివలె రిఎర్గుడ్డిఃవారు వన్ని వెనుక వాతారె, “ఓ దావీదు మరిసి, మా మున్సు కనికారం తోరిన్ఆ”, ఇజి డేల్లి వెప్తాన్. 28 యేసు ఇండ్రో డుఃగితి వెనుక వారు వన్ని డగ్రు వాతారె. వాండ్రు వరిజ్ ఈహు వెన్బాతాన్. “యాక కిదెజ్ నాను అట్టు, ఇజి మీరు నమిజినిదెరా?”, “ప్రబువా మాప్ నమ్మిజినాప్”, ఇజి వారు వెప్తాన్.

29-30 నస్తవలె యేసు వరి కణకెజి ముట్టి ఈహు వెప్తాన్. “మీరు నమ్మితివజెనె యాక మిజి జర్లిపిద్”, ఇజి వెప్తి వెటనె వరి కణుకు బేస్తారె. “ఎయెర్బా యాక నెస్తిజ్అవిద్”, ఇజి యేసు వరిజ్ గట్టిజ వెప్తాన్. 31 గాని వారు సాహారె అయ ప్రాంతం విజి వన్ని వందిజ్ సాట్టారె. 32 యేసుని వన్ని సిసూర్అబెణిజ్సొన్ని మహిజ్ దెయం అస్తి ఒరెన్ గులవన్నిజ్ వన్ని డగ్రుతతారె. 33 యేసు దెయమ్దిజ్ఉల్పె వెటనె అయ గుల్ల వాండ్రు వర్గిదెజ్ మొదోల్స్తాన్. అక సుడఃజి లోకుర్ విజిరె బమ్మ ఆతారె, “ఎనెజ్బా ఇస్తాయేలు దేసమ్దు యా లెకెండ ఇనికబా జర్గివితాద్”, ఇజి వర్లితారె. 34 గాని పరిసయేరు ఈహు వెప్తారె, “దెయమ్కాజ్ నెయ్యి, సాయమ్దానె వీండ్రు దెయమ్కాజ్ పేర్జినాన్”.

పణిమన్సిర్ తక్కు

35 యేసు విజి పట్టుమ్కాజ్, విజి నాహ్కాజ్ బూలాజి యూదురు మిటిజ్ కిని ఇల్కాజ్ వరిజ్ నేర్పిసి, దేవుణు ఎలుబడిః కిని వందిజ్ సువార్త వెప్పి విజి రకమ్ది జబుది వరిజ్, బాదదాన్ మని వరిజ్ నెగెండ కితాన్. 36 యేసు మంద లోకాజ్ సుడఃజి, వన్ని పాణం నొతాద్. ఎందనిజ్ ఇహిజి వారు గప్పడుఎన్ సిల్లెండ సద్రితి గొరెజ్ లెకెండ, ఇనిక కిదెజ్ ఇజి నెన్ఇ వరి లెకెండ మహారె. 37-38 నస్తవలె యేసు వన్నిసిసురిజ్, “కొయ్దెజ్ మన్ని పంటలెకెండ లోకుర్ నండ్రిండార్ మన్నె. గాని కొయ్నికార్ తకునె. అదెజి వన్ని పంట కొయ్ని వందిజ్ పణికిని వరిజ్ పోకఅ ఇజి కోత యజుమానిజ్ బతిమాలద్”, ఇజి వెప్తాన్.

10

యేసు పన్నెండు మణిసి సిసురిజ్ కూక్కినాన్

1 యేసు వన్ని పనెండు మన్ని సిసూర్జి డగ్రు కూక్తాండ్రె దెయమ్కాజ్ పేర్దెజ్, మరి విజి రకమ్ది జబుది వరిజ్ని బాదదాన్ మని వరిజ్ నెగెండ కిదెజ్ వరిజ్ అతికారం సితాన్. 2 అయ పనెండు మన్ని అపొస్తాడురి పేరుకు ఇకెజ్. మొదోహానాన్సీమోను, (పేతురు ఇజి వాండ్రు కూకె ఆతాన్) వన్ని తంబెర్సి ఆతి అంద్రెయ, జెబదయి పొటాదికార్యాకోబుని యోహాను, 3 పిలిపుని బర్తొలోమాయి, తోమని పన్ను

పెద్ది మహికాన్ మతాయి, అలపయి పొటాదికాన్ యాకోబు, తదాయి 4 యూదయ దేసం వందిజ్ ఉసారాఅజిని సీమోసు*, యెసుజ్ మోసెం కిజి ఒవజెప్పికాన్ ఆతి ఇస్కరియోతు యూద.

5 యేసు అయ పనెండు మన్ని సిసూరిజ్ పోక్కివలె ఈఘు వెవ్తాన్. “యూదురు ఆజవరి నడిఃమి మీరు సొన్మాట్. సమరియదివరి పట్టుమ్కాజ్ బా సొన్మాట్. 6 గాని మీరు ఇస్రాయేలుది మురుతి గొర్రెజ్జెకెండ్ మనివరి నడిఃమి సొండు. 7 మీరు సొన్ని, ‘దేవుణు ఏలుబడిః కినిక డగ్గు ఆత మనాద్’ ఇజి సాట్టు. 8 జబుదివరిజ్ నెగెండ్ కిదు, సాతి వరిజ్ నిక్కు, పెరి కన్వమ్ది వరిజ్ నెగెన్ కిదు, దెయమ్కాజ్ పేర్లు. యా పణిజ్ కిదెజ్ అతికారం సెడ్డిఃనె మిజి దోహ్క మనాద్. అందెజి మీరు ఎయెర్ బాణిజ్ బా ఇనికబా లోన్ ఎండ్ ఇకెజ్ సెడిఃనె కిదు. 9 మీరు సొనివెలె బజారం, రుపాయ్ గాని వెండి, రుపాయ్ గాని రాగి రుపాయ్ గాని మీ సన్నిదు ఒమాట్. 10 పయనం కినివెలె సన్ని ఒమాట్. రుండి సొక్కిజ్, జోడ్కు, డుడు ఇనికబా ఒమాట్. ఎందనిజ్ ఇహజి పణికినికాన్ వన్నిజ్ కావొన్కికె దోహ్కెజ్ తగ్గొనాన్.

11 మీరు ఎమేణి పట్టుమ్దు సొహిజ్ బా అబె ఒరెన్ నెగ్గివన్నిజ్ రెబాజి వన్ని ఇండ్తెనె అబెణిజ్ సొని దాక మండ్లు. 12 మీరు అయ ఇండ్తె డుఃగితిజి సరి, ‘మిజి సమాదనం మనిద్’ ఇజి వెవ్తా. 13 అయ ఇండ్తెణికార్ మిజి డగ్గు కిఇతిజి, సస్తివెలె మీరు వెహ్పొలెకెండ్ వరిజ్ దీవనమ్కు మంజినె. వారు తగ్గికార్ ఇహజి అయాలెకెండ్ వరిజ్ జర్దివిద్. 14 మీరు ఉండ్తి పట్టుమ్దు గాని, ఉండ్తి ఇండ్తె గాని అందితిజి, వారు మిజి డగ్గు కివీండ మరి మీ మాటెజ్ డగ్గు కివీండ మహిజి, వరి మున్సు వార దేవుణు బాణిజ్ సిక్కు అప్పె ఆజినార్ ఇనిదన్నిజ్ గుర్తు లెకెండ్, మీరు అయ పట్టుమ్నో ఇల్లునో డిఃసి సొనివెలె మీ పాదమ్కాణి దుల్లి దూల్పె సొండు. 15 దేవుణు తీర్పు తీరిస్సి రోజుదు అయ పట్టుమ్దు మని వరిజ్ ఒడ్ది లావ్ సిక్కు సీనాల్లె ఇజి నాను మిజి నిజం వెహ్పొన. సోదోమ గొవార పట్టుమ్కాజ్ మహివరిజ్ సొన్ని సిక్కు మన్విద్. 16 కార్నుకుడిఃజి నడిఃమి గొర్రెజ్జెకెండ్ నాను మిజి లోకుర్ నడిఃమి పోక్కిన. అందెజి మీరు సరాన్సు లెకెండ్ బుది మనికిదెర్, పావుర పొటిజి లెకెండ్ సెఇకెజ్ ఇనికెజ్ సిలికిదెర్ ఆజి మండ్లు.

17 లోకుర్ వందిజ్ జాగర్ల మండ్లు. వారు మిజి కోర్దుదు ఒవజెప్పె, మరి యూదురు మీటిజ్ కిని ఇల్లాజ్ మిజి కొర్దెజిణిజ్ డెఃయ్నినారలె. 18 రాజురిజి ముందాల, అదికారిజి ముందాల నా మున్సు నమకం ఇట్టి వందిజ్ మజి ఆసి తోహ్పొ ఒనార్లె. వరి ముందాలని యూదురు ఆజి వరి ముందాల నా వందిజ్ మీరు వరిజ్ సువార్త వెహ్పొదెర్లె. 19 గాని వారు మిజి తోహ్పొ ఒనివెలె ఇనిక వెహ్పొజ్, అక ఎలాగ వెహ్పొజ్ ఇజి మీరు బెజి ఆమాట్. అయావలెనె వర్గిదెజ్ సరి ఆతి మాటెజ్ మిజి దోహ్కొలె. 20 ఎందనిజ్ ఇహిజి అయావలె వర్గినిక మీరు ఆజిదెర్. మీ బుబ్బు ఆతి దేవుణు ఆత్మ మీ లోఇహోన్ వర్గినాన్లె.

21 దాద్ది తంబెరిజ్, తంబెరి దాద్దిజ్, అహోసి మరిసిజ్ సప్తెజ్ ఒవజెహ్పొర్లె. కొడెఃరి అయేసి అహ్పొనిర్ మున్సు గొడబ ఆజి వరిజ్ సపెస్నార్లె. 22 నా మున్సు నమకం ఇట్టి వందిజ్ విజెరె మీ మున్సు పగదాన్ మంజినారలె. గాని ఆకార్ దాక ఓరిస్సి వన్నిజ్ దేవుణు రక్కిస్సాన్లె. 23 ఉండ్తి నాటో మిజి హిమ్న కితిజి, మరి ఉండ్తి పట్టుమ్దు ఉహ్కొన్ని సొండు. లోకు మరిసి వాని ముందాల సువార్త సాటసిని పణి పూర్తి వీజ్ ఎండ్ అనాద్, ఇజి నాను మిజి నిజం వెహ్పొన.

24 సద్దినికాన్ నెస్పిస్సివన్ని మున్సు పెరికాన్ అవన్. పణిమన్ని యెజుమాని మున్సు పెరికాన్ అవన్. 25 సద్దినికాన్ నెస్పిస్సివన్ని లెకెండ్ అతిజి అనాద్. పణిమన్ని యెజుమాని లెకెండ్ అతిజి అనాద్. ఇండ్తెణి యెజుమానిజ్ వారు బయిల్ జెబులు[†] ఇజి కూక్కి మోసెం వెహ్కొర్ ఇహిజి ఇండ్తెణికార్ ఆతి మీ వందిజ్ మరి ఎసోసా సెఇ మాటెజ్ వెహ్కొర్లె. 26 అందెజి వరిజ్ మీరు తియెల్ ఆమాట్. డాప్తి మనికెజ్ విజు తోరె ఆనెలె. నెన్ ఏండ్ మూస్తి మనికెజ్ విజు నెనె ఆనెలె. 27 మీ వెట నాను సీకటిదు వెహ్పొ మాటెజ్, మీరు జాయ్దు వెహ్పొ. మీ గిలిజి వెహ్పొ మాటెజ్ విజెరె వినిలెకెండ్ మిద్దెజి మున్సుహాన్ మీరు డటం వెహ్పొ. 28 ఆత్మదిజ్ సప్తెజ్ అటేండ్ ఒడెఃల్ దిజ్ నె సప్తెజ్ అట్టి వరిజ్ మీరు తియెల్ ఆమాట్. గాని ఆత్మని ఒడెఃల్ దిజ్ సెను మంజిని బాడిఃదు పోక్కి నానసం కిదెజ్ అతికారం మని దేవుణుదిజ్ నె

* **10:4** 10:4 కనారియదికాన్ సీమోసు - తెలుగు రోమది ఏలుబడిఃదాన్ యూదురు దేసమదిజ్ విడుదల కిదెజ్ ఉసారాదాన్ సుడిఃజిని యూదురు సజం మనాద్ అయా సజమదికాన్ ఒరెన్ సీమోసు. † **10:25** 10:25 దేవుణుదిజ్ పోగిడిఃజి మాడిఃనె ఇ యూదురు ఆజికార్ మాడిఃసి మహి, ఉండ్తి బొమ్మనె బెయిల్ జెబులు. యూదురు అయ బొమ్మదిజ్ “పొర్లిజ్ మాడిఃస్సి బొమ్మ”, ఇజి వెక్కిని వహ్మ మహార్. అందెజి వారు యేసుప్రభుజ్ బెయిల్ జెబులు ఇజి కూక్కివెలె వన్నిజ్ నండ్ మోసెం వెహ్కొ మహార్.

తియెల్ ఆజి మండ్రు. 29 ఉండ్రీ కాసుదిజ్ రుండి ఇజ్జి పంట పొటిజ్ పొరె ఆజినెగదె. అహిజబా నీ బుబ్బాతి దేవుణు నెన్విండ దన్ని లోఇ ఉండ్రీబా అడ్లి బూమిదు సాదెజ్ ఇజి డిసి సీవన్. 30 నీ బుర్రది కొప్పు ఏజుబా లెక కిబె ఆత మనాన్. 31 అందెజె మీరు తియెల్ ఆమాట్. మీరు యా ఇజిది పంట పొటిజ్ మిస్తి విలువ మనికిదెర్.

32 లోకుర్ ముండాల నజి ఒప్పుకొణి, విజెరిజ్ నానుబా వరివందిజ్ పరలోకామ్దు మని నా బుబ్బాతి దేవుణు ఎద్రు ఒప్పు కొణా. 33 గాని ఎయెన్బా లోకుర్ ముండాల నజి నెన్వి ఇజి వెహ్తాజ, పరలోకామ్దు మని నా బుబ్బాతి దేవుణు ముండాల నానుబా వన్నిజ్ నెన్వి ఇజి వెహ్తాలె.

34 బూమి ముస్కు, సమాదనం తప్పిస్తెజ్ నాను వాత మన ఇజి మీరు ఒండెబిమాట్. పగ తప్పిస్తెజ్ నె వాత, సమాదనం ఆవెద్. 35 ఎందనిజ్ ఇహిజ, మరిసిజ్ వన్ని అప్పొసి ముస్కు, గాడ్లిజ్ దని అయెసి ముస్కు, కొడియెసిజ్ దని మీమ్సి ముస్కు, పగ కిబిస్తెజ్ నె నాను వాత మన. 36 నా ముస్కు, నమకం ఇట్టి వందిజ్ ఒరెన్ వన్ని ముస్కు, వన్ని సొంత ఇండ్రొణికారె పగాతికారె ఆనార్.*

37 బుబెజ్ బా యాయెజ్ బా నజి మిస్తి ప్రేమిస్తికాన్ నజి తగ్గికాన్ ఆవెన్. మరిసిజ్ బా గాల్లిజ్ బా నజి మిస్తి ప్రేమిస్తికాన్ నజి తగ్గికాన్ ఆవెన్. 38 కష్టమ్కు ఒరిస్తెజ్ మన్ను సిల్లికాన్, మరి నా వెట సాదెజ్ ఇజిబా మన్ను సిల్లికాన్, ఎయెన్బా నజి తగ్గికాన్ ఆవెన్. 39 వన్ని పాణమ్దిజ్ కాపాడెదెజ్ ఇజి సుడితిజ్ వాండ్రు దన్నిజ్ సాన్పిస్సాన్. నా వందిజ్ వన్ని పాణం సొన్నిస్తికాన్ దనిజ్ కాపాడ్సాన్.

40 నిజి డగ్రు కినికాన్ నజెనె డగ్రు కిజినాన్. నజి డగ్రు కినికాన్ నజి పొక్కివన్నిజ్ బా డగ్రు కిజినాన్. 41 ఒరెన్ దేవుణు ప్రవక్తెజ్, వాండ్రు దేవుణు ప్రవక్త ఇజి నెసి ఎయెన్బా వన్నిజ్ డగ్రు కితిజ, దేవుణు ప్రవక్తెజ్ దొహ్కొత్తి లెకెండె వన్నిజ్ బా పలం దొహ్కొద్దె. ఒరెన్ నీతి నిజాయితి మని వన్నిజ్ వాండ్రు నీతి నిజాయితిదికాన్ ఇజి నెసి ఎయెన్బా వన్నిజ్ డగ్రు కితిజ, నీతి నిజాయితి మని వన్నిజ్ దొహ్కొత్తి లెకెండె వన్నిజ్ బా పలం దొహ్కొద్దె. 42 యా నా సిసూర్ లోఇ ఇజిది ఒరెన్ వన్నిజ్ వాండ్రు నా సిసూర్ ఇజి నెసి ఎయెన్బా ఉండ్రీ గలన్ ఏరు సితిజ, దనిజ్ తగితి పలం తవ్వెండె వన్నిజ్ దొహ్కొద్దె ఇజి నాను మిజి నిజం వెహ్సాన్.”

11

యేసుని బాప్తీసం సీని యోహాను

1 యేసు వన్ని పనెండ మన్ని సిసూర్ జ బోదిసి వీజితి వెనుక, అబెణిజ్ సోసి గలిలయ దేసమ్దు మని పట్టుమ్కాజ్, నాహ్కాజ్ సువార్త సాత్తెజ్, బోదిస్తెజ్ సాహాన్. 2-3 జెలిదు మని యోహాను క్రీస్తు కిని పణిజ వందిజ్ వెంజి, “వానికి నీనెనా? నీలిజ మరి ఒరెన్ వన్నిజ్ మాపు ఎద్రు సుండెజి మండ్రెజ్ నా?”, ఇజి వెన్బాదెజ్ వన్ని సిసూర్ జ యేసు డగ్రు పొక్తాన్. 4-5 యేసు వరిజ్ ఈహు వెహ్సాన్, “గుడ్డిదికారె సుండెజినార్, సొటాదికారె నడిజినార్, పెరి జబు మనికారె నెగెణ్ ఆజినార్, బోయెరాదికారె వెంజినార్, సాతికర్ నిజె ఆజినార్, బీదాతి వరిజ్ సువార్త వెహె ఆజినాద్, ఇజి యా లెకెండె, మీరు సుండెజినికెజ్, వెంజినికెజ్ మరెజి సొన్ని, యోహానుజ్ వెహ్సా. 6 గాని నా ముస్కు, మన్ని నమకం డిసి నెఇకాన్ దేవుణు సీని దివెనమ్కు మంజినికాన్ ఆనాన్లె.” 7 యోహాను సిసూర్ మరెజి సొన్నిమహిజ్ యేసు యోహాను వందిజ్ ఈహు వర్గిదెజ్ మొదోల్సాన్. “ఇనిక సుండెదెజ్ మీరు బిడిఃమ్ బూమి ప్రాతమ్దు సొహిమహిదెర్? గాలిదిజ్ దూజ్ జని గడిదిజ్ పొలితి ఒరెన్ వన్నిజ్ సుండెదెజ్ నా? 8 సిల్లిజ మరి ఇనిక సుండెదెజ్ మీరు సొహి మహిదెర్? నెగ్గి సొక్కెజ్ తోడెగితి మని ఒరెన్ వన్నిజ్ సుండెదెజ్ నా? నూనాజ్ మని నెగ్గి సొక్కెజ్ తోడెగితి మంజినికారె రాజురి ఇల్కాజ్ మంజినార్ గదె? 9 సిల్లిజ మరి ఇనిక సుండెదెజ్ మీరు సొహిమహిదెర్? ఒరెన్ దేవుణు ప్రవక్తెజ్ సుండెదెజ్ నా? నిజమె, దేవుణు ప్రవక్తెజ్ ఇంక పెరివన్నిజ్ నె ఇజి నాను మిజి వెహ్సాన్. 10 ‘నాను నా కాల్పు తనివన్నిజ్ నిజి ఇంక ముజాల పొక్కు, వాండ్రు నీ ముజాల నీ సరి నెగెండె కినాన్’* ఇజి వన్ని వందిజ్ దేవుణు మాటుదు రాస్త మనాద్. 11 బోదెక పొటాదు పుట్టివరి లోఇ యోహాను ఇంక మిస్తికాన్ ఎయెన్బా సిలెన్. గాని దేవుణు ఏలుబడి కినిదని లోఇ ఇజిదికాన్ ఆతికాన్, యోహానుజ్ ఇంక పెరికాన్ ఇజి నాను మిజి నిజం వెహ్సాన్. 12 బాప్తీసం సీని యోహాను కాలమ్దాన్ ఏలుదాక దేవుణు ఏలుబడి కినిక బలవందమ్దాన్ ముజాల వాజినాద్. మరి

* 10:36 10:36 మికా 7:6. * 11:10 11:10 మలా 3:1.

గొప్ప సత్తు మనికార్ దనిజ్ అడ్డు కిదెజ్ సుడఃజినార్. ¹³ మోసె సితీ రూలుజ్ని దేవుణు ప్రవక్తరు విజెరెబా దేవుణు ఏలుబడిః కినివందిజె యోహాను కాలమ్దాక వర్గిజి మహార్. ¹⁴ నమిదెజ్ మిజి ఇన్టం మహిజు, ఏలియ వానాన్లె ఇజి ముజాల వెహ్తాక విని వందిజ్నె. ¹⁵ మీ గిబ్బుజ్జాణిజ్ నెగెండ వెంజి అయా వజ నడిఃజి మండ్రు. ¹⁶⁻¹⁷ ‘యా తరమ్ది వరిజ్ ఇనిదనిజ్ నమానం వెహ్తాజ్? వారు సతాదు బసి, మహివరిజ్ డేల్నిని కొణ్ఠోరి లెకెండె మనార్.’ ‘మాపు మీ వందిజ్ పిరుడిః ఉహ్కమ్ గాని డాల్ఇతిదెర్, సాతి ఇండ్రో పాటెజ్ పార్వాప్ గాని మీరు గుండె కొతె ఆజి మీరు అడఃబ ఇతిదెర్’. ¹⁸ యోహాను వాతివెలె వాండ్రు తిండి వందిజ్ లాప్ ఒడఃబివిండ రోజు ఉపాన్ కిజి మహాన్. వాండ్రు అయాలెకెండె తిన్ఎండ, ఉణెఎండ మన్నిజ్ వన్నిజ్ దెయం అస్తాద్ ఇజి వారు వెహ్సినార్. ¹⁹ లోకు మరిసి ఆతి నాను తింజి, ఉణిజి వాతాన్కాక ‘వీండ్రు తిండి కకూర్కాన్ మరి ఉణిజి సోస్సికాన్, పన్ను పెర్నివరిజ్ని పాపం కిజిని వరిజ్ కులాయెన్ ఇజి వారు వెహ్సినార్. గాని దేవుణు బాణిజ్ వాని గెణం మన్నికార్ వారు కిజిని నెగ్గి పణిజాణిజ్ అయ గెణం సరియాతిక ఇజి రుజుప్ కిజినాద్.”

నమకం సిల్లికార్ మన్ని పట్టుమ్కు

²⁰ మరి యేసు ఎమేణి పట్టుమ్కాజ్ నండో బమ్మ ఆతి పణిజ్ కితిజ్బా వారు వరి మన్ను మారిన్ఎతారో, అయ పట్టుమ్కాజ్ మున్ను కోపం అజి వర్గితాన్. ²¹ అబయా! కోరజిన పట్టుమ్దు మనికిదెరా మిజి అస్సా గొప్ప కస్టమ్కు, వానెనో, అబయా! బెత్సెయ్దుపట్టుమ్దు మన్నికిదెరా మిజిబా ఎస్సా గొప్ప కస్టమ్కు వానెనో. ఎందనిజ్ ఇహిజు నాను మీ నడిఃమి కితి మహి బమ్మాతి పణిజ్ తూరుని సీదోను పట్టుమ్కాజ్ కిని మంజినిక ఇహిజు వారు ఎస్సా ముజాలె బన్న సొక్కెజ్ తోడిఃగిజి ఒడఃబు నీరు రాసి ఆజి ఉపాన్ కిజి వరి పాపమ్కు ఒవుకొడఃజి డిఃసి సీజి మన్ను మారిసి అయాలెకెండె మినికార్ ఇజి తోరోస్తారో మరి. ²² అందెజె నాను నిజి వెహ్సొక ఇనిక ఇహిజు తీర్పు తీరిస్సి రోజుదు తూరుని సీదోను పట్టుమ్దివరిజ్ మిస్తి సిక్కు మిజి వానాద్లె. ²³ ఓ కపెర్నహమా, “అగాసమ్దు మనికిదెరా, మీరు అగాసమ్దాక అందిజిని గొప్ప వారు ఇజి మీరు ఒడఃబిజినిదెరా? గాని దేవుణు అయా లోకమ్దు విసీర్నె. మీ నడిఃమి కితి మహి బమ్మాతి పణిజ్ నాణు సొదోము పట్టుమ్దు కిని మంజినిక ఇహిజు అయ సొదోము పట్టుమ్దికారో వరి అలవాటుజ్ డిఃసి సీజి అయ పట్టుమ్దిజ్ దేవుణు సిక్కు సివిండ ఏలుదాక మహాద్ మరి. ²⁴ అందెజె నాను నిజి వెహ్సిన తీర్పు తీరిస్సి రోజుదు సొదోము పట్టుమ్దు మహివరిజ్ వాని దన్నిజ్ మిస్తి సిక్కు మీ లోకురి మున్ను వానాద్లె.”

వందితివరిజ్ కూక్కినిక.

²⁵ వెనక యేసు ఈహు వెహ్తాన్, “పరలోకామ్దిజ్ని బూమిదిజ్ ప్రబువాతి నా బుబ్బా, నాను నిజి పొగ్గిడిఃజి. ఎందనిజ్ ఇహిజు గెణం మన్ని వరిజ్ని సదువు మన్ని వరిజ్ యా సజతిజ్ తెలియ కివిండ యా సదువు సిల్లి వరిజ్ తెలియ కితి. ²⁶ నిజమె బుబ్బా, ఈహు కినికాదె నిజి ఇన్టం ఆతాద్.

²⁷ బుబ్బా విజు సజతిజ్ నా కీదు ఒవజెప్త మనాన్. బుబ్బా ఆవిండ మరి ఎయెర్బా మరిసిజ్ నెన్ఎర్. మరిసిని, మరిసి వన్నిజ్ తెలివి కిదెజ్ ఎర్గితికారె బుబ్బాజ్ నెస్సార్. మరి ఎయెర్బా నెన్ఎర్.

²⁸ కస్టబాడఃజి బరు పిండెజి వందితి విజిదెరె, మీరు నా డగ్రు రదు. నాను మిజి రొబిన్ను. ²⁹ నాను సార్దికాన్. నాను మెతని మన్ను మనికాన్. నా వెట కూడఃజి ఉండ్రె హూండు మీ మెడః మున్ను పొకె అజి మాటు కూడఃజి పణికినాట్, మీరు నా అడ్రెజ్ లోజిజి నా బాణిజ్ నెస్సు. నన్నివలె మీ పాణమ్కాజ్ నిమాలం కలగినాద్. ³⁰ ఎందనిజ్ ఇహిజు నా కూడఃజి నా హూండు అడిఃగి పణి కిత్తిజు పణి సూలు మంజినాద్, బరుబా సుల్కానిక మంజినాద్.”

12

యేసు విస్త్రాంతిదినమ్దు ప్రబు.

¹ అయావలె యూదురి విస్త్రాంతిదినమ్దు యేసు పంట గుడ్డెదాన్ సొన్ని మహివలె, వన్ని సిసూరిజ్ బజ కట్టిజ్, వారు నెరెకె తెప్పి నూల్ని తింజి మహార్. ² అయాక పరిసయరు సుడఃతారె, “ఇదిలో, మోసె సత్తి రులువజ విస్త్రాంతిదినమ్దు కిదెజ్ ఆఇ పణి, నీ సిసూర్ కిజినార్”, ఇజి యేసుజ్ వెహ్తార్. ³ వాండ్రు వరివెట ఈహు వెహ్తాన్, “దావీదు రాజుని వన్నివెట మహివరిజ్ బజ కట్టిజ్, వాండ్రు ఇనిక

కొత్తాండ్రో ఇజి మీరు దేవుణు మాటలు ఎనెజ్బా సద్వివేచిదెరా? 4 వాండ్రు ఇనిక కిత్తాన్ ఇహిజ, గుడారమ్దు† సొన్సి, దేవుణు ముజాల ఇడ్డిమహి రొట్టెజ్ లాగితాన్. వాండ్రుని వన్నివెట మహికార్ విజెరె తిహార్. అయ్యాక పుజేరిజునె తప్ప మరె ఎయెరెబా తిండ్రెజ్ అవద్ ఇజి మోసె సీత్తి రూలుదు వెత్తా మనాద్. 5 దేవుణు గుడిడు మన్ని పుజేరిజు విస్త్రాంతిదినమ్దు పణి కిజనార్ గాని అక తప్ప అవద్ ఇజి దేవుణు మాటలు రాస్తి మన్నిక మీరు ఎనెజ్బా సద్వివేచిదెరా? 6 దేవుణు గుడిడిజ్ ఇంక మిస్సాన్ ఇబ్బె మనాన్ ఇజి నాను మిజి వెహ్సిన. 7 ‘మీరు మహిపరి మున్ను కనికారం తొరెన్జె ఇజినె నాను కోరిజిన గాని కత్తి సీజని పూజెజు నాను కోర్వ’* ఇని మాటదిజ్ అర్థం మీరు నెసిమంజనిక ఇహిజ, ఇని తప్పబా కిజవరి మున్ను తప్ప మూటెజ్ వెహ్వితార్ మరె. 8 ఎందానిజ్ నాను యాలెకెండె వెహ్సానిక ఇహిజ, లోకుమరిసి ఆతి సజి విజు దన్నిజ్ అతికారం మనాద్. విస్త్రాంతి దినమ్దు లోకుర్ ఇనిక కిదెజ్వల ఇజి వెత్తాజ్బా సజి మనాద్. 9 అబ్బెణిజ్ సొన్సి మహివలె, వాండ్రు యూదురు మీటిజ్ కిని ఉండ్రె ఇండ్రో సొహాన్.”

10 వహ్తా అర్తి ఉండ్రె కియు మన్నికాన్ ఒరెన్ అబ్బె మహాన్. యేసు మున్ను తప్ప మొప్పెజ్ ఇనికాదొ ఉండ్రె సజతివందిజ్ సుడిజె బారు వన్నిజ్ ఈహు వెన్బాతార్, “విస్త్రాంతిదినమ్దు ఎయెరిజ్బా నెగెండె కినిక దేవుణు రూలుదిజ్ తగ్గాదా?”. 11 యేసు వరిజ్ ఈహు వెహ్సాన్, “మీ లోఇ ఎయెరిజ్బా ఉండ్రె గొరె మహిజ, విస్త్రాంతిదినమ్దు అక్క ఉండ్రె గాండదు అర్తిజ, మీరు దనిజ్వెల్లి లాగిదెరా? 12 మెండగెరెదిజ్ మున్ను లోకు ఎస్సానొ విలువ మన్నికాన్. అందెజె విస్త్రాంతిదినమ్దు మేలు కినిక దేవుణు మోసెజ్ సీత్తి రూలుదిజ్ తగ్గాద్.” 13 అయ్యావలె వాండ్రు వహ్తా కియు అర్తి వన్నిజ్ “నీ కియు సవ్అ”, ఇజి వెహ్సాన్. వాండ్రు కియు సొహ్సాన్. అయ్యావలె అక నెగెండె మన్నిమరి ఉండ్రె కియు లెకెండె ఆతాద్. 14 గాని పరిసయరు వెల్లి సొహారె యేసుజ్ ఎలాగ సప్తెజ్ ఇజి వన్నిజ్ పడిఎండ అలోసనం కిత్తార్.

దేవుణు ఏర్పాటు కితికాన్

15 యేసు అయ్యా సజతి నెస్త్రాండ్రె అబెణిజ్ సొహాన్. నండెండార్ వన్ని వెనుక సొహార్. వాండ్రు పరి జబ్బుది వరిజ్ విజేరిజ్ నెగెండె కిత్తాన్. 16 నా వందిజ్ ఎయెరిజ్బా వెహ్సాట్ ఇజి వరిజ్ వెహ్సాన్. 17 యెసయ ప్రవక్త వెట దేవుణు ముజాల వర్గితి యా మాటిజ్ పూర్తి అదెజ్ ఇజి యా లెకెండె జర్గితాద్. 18 “ఇదిలో, నాను ఏర్పాటు కితి నా పణి మన్ని వీండ్రె, నాను వన్నిజ్ ప్రేమిసిన, వన్ని మున్ను సర్ల ఆజిన. నాను వన్ని మున్ను నా అత్తుదిజ్ పోక్కు. వీండ్రు విజు జాతిది వరిజ్ నాయం తీరిస్సాన్లె. 19 వీండ్రు జటిజ్ అవ్, డేల్వీవన్, విన్ని కంటం వీదిజు ఎయెరిజ్ వినపివన్. 20 సలిగితి గడిడిజ్ వాండ్రు తెప్పి వినీర్వన్, నమన్ దీవదిజ్ వాండ్రు నవ్వన్.† వాండ్రు నాయమ్దిజ్ గెల్పిసినాన్. 21 లోకుర్ విజెరె వన్నిజ్ ఆసదాన్ ఎద్దు సుడిజి మంజినార్. వాండ్రు విజు జాతిజు వరిజ్ నాయం తీరిస్సాన్.”*

యేసుని బయిల్జెబ్బులు

22 అయ్యావలె నెగెండార్, దెయం అస్తిమహిజ్ వర్గిదెజ్ అట్ఇ గుల్ల ఆతి ఒరెన్ వన్నిజ్ యేసు డగ్గు తతార్. యేసు వన్నిజ్ నెగెండె కిత్తాన్. వాండ్రు సుడిదెజ్, వర్గిదెజ్ అత్తాన్. 23 లోకుర్ విజెరె బమ్మ ఆజి, “మాప్ ఎద్దుసుడిజె కాప్కిజి మంజిని దావీదు రాజు తెగ్గదికాన్ వీండ్రు అవ్ండ్రా?”, ఇజి వర్గిజి మహార్. 24 పరిసయరు అయ మాట విహారె, “విజు దెయమ్కాజ్ నెయ్యి ఆతి బయిల్జెబ్బులు సాయమ్దాన్ వీండ్రు దెయమ్కాజ్ పెరెజినాన్”, ఇజి వెహ్సాన్.

25 యేసు వరి అలోసనమ్కు నెసి వరిజ్ ఈహు వెహ్సాన్. “ఎమేణి దేనెమ్దికార్ బ వ రిజ్ వారి పగ ఆజి ఎరెలిజి మహిజ అయ దేసం పాడానాద్. అయాలెకెండె ఎమేణి పట్టమ్దికార్ గాని ఇండ్రోణికార్

* 12:3 12:3 దావీదు రాజు కిత్తిక సమయలు ప్రవక్త పుస్తకమ్దు రాస్త మనాద్. 21:1-6. † 12:4 12:4 గుడారమ్దు విజు విస్త్రాంతి దినమ్దు దేవుణుదిజ్ పూజ సీత్తిలెకెండె 12 కొత్త రొట్టెజ్, సమాజ గుడారమ్దు మన్ని బల్లారు ఇడ్డి మంజినె కొత్త రొట్టెజ్ ఇడ్డి బాణిజ్ లాగితి పడాయ రొట్టెజ్ పుజెరిజు తినార్. లేవె 24:5-9 అయకాలమ్దు యెరుసల్లేమ్దు మన్ని దేవుణు గుడి సెల్లెతాద్. దావీదు రాజు మరియాతి సొలోమెను కాలమ్దునె యెరుసల్లేమ్దు మన్ని దేవుణు గుడి వాండ్రు తోహిస్తాన్. * 12:7 12:7 హోసయ 6:6. † 12:20 12:20 అయ మాటదిజ్ అర్థం ఇనిక ఇహిజ, లోకుర్ దేవుణు మున్ను మన్ని నమకమ్దిజ్ కండెక్ వెనుక అతిజ్నో దయరం సిల్లెండ అతజ్నో యేసు వన్నిజ్ డిసి సివిన్ మొకె మహ్విన్. * 12:21 12:21 యెసయ 42:1-4.

గాని, వరిజ్ వారె, పగ ఆజి ఎరలిజి మహిజ ని ఎమేణి పట్టుం గాని ఇల్లు గాని ఏలుబా లావ్ రొస్సు నిల్చి మన్ ఏద. 26 నయ్యూను అడిగి మన్నికార్ ఉండ్రీ జటుదికార్, మరి ఉండ్రీ జటుదివరివెటె పగ ఆజి ఎర్రె ఆజి విదెం కిజి మహిజ, వన్ని ఏలుబడిః ఎలాగ లావ్ రొస్సు నిల్చి మంజినాద్.” 27 బయిల్జెబ్బులు సాయమ్దాన్ నాను దెయమ్కాజ్ పేర్రిజ, మీ లోకుర్ ఎలాగ దెయమ్కాజ్ పేర్రినార్? అందెజె నా వందిజ్ మీరు వెప్పికెజ్ తపు ఇజి వారె రుజువ్ కిజినార్. 28 గాని దేవుణు ఆత్మ సత్తుదాన్ నాను దెయమ్కాజ్ పేర్రిన ఇహిజ, నిజమె దేవుణు ఏలుబడిః కినిక మీ నడిఃమి వాత మనాద్.

29 నుడఃదు, ఒరెన్ సత్తుమని వన్నిజ్ ముజాల తోహ్ ఏండ, వన్ని ఇండ్రో డుఃగిజ ఇండ్రోణి సామనమ్కు ఎయెరిజ్ బా ఒతెజ్ అట్నార్? ముజాల వన్నిజ్ అసి తోహ్ జనె డోజ కిదెజ్ అట్నార్. 30 నా వెటె కూడ్డి మన్ ఇకాన్ ఎయెన్ బా నజి పగాతికాన్ ఆనాన్. లోకురిజ్ దేవుణు డగ్రు తత్తెజ్ నా వెటె కూడఃజి మన్ ఇకాన్ లోకాజ్ సెద్దిస్సికాన్ ఆజినాన్. 31 మరి నాను మిజి వెప్పినిక ఇనిక ఇహిజ, లోకుర్ కిని విజి పాపమ్కాజ్, దూసణదిజ్ దేవుణు సెమిస్సాన్, గాని దేవుణు ఆత్మదిజ్ దూసిని వెప్పిజ ఆకెజ్ ఎసెజ్ బా సెమిన్ ఎన్. 32 లోకు మరిసి ఆతి నజి పడిఃఏండ ఇనికబా వర్గితిజ దేవుణు వన్నిజ్ సెమిస్సాన్. గాని దేవుణు ఆత్మదిజ్ పడిఃఏండ వర్గిని వన్నిజ్ యా లోకమ్ దుబా, వాని లోకమ్ దుబా దేవుణు సెమిన్ ఏన్.

33 మరాన్ నెగ్గిక ఇహిజ దని పండుబా నెగ్గికదె. సిలిజ, మరాన్ నెగ్గిక ఆఎండ మహిజ దని పండుబా నెగ్గిక ఆవెద. మరాతి పండుదానె మరాన్ ఎలాగ మర్రికాదో ఇజి నెనెజ్ ఆనాద్. 34 విసం మన్నిసరాన్ నన్నికిదెరా, సెఇకిదెరాతి మీరు నెగ్గి మాటెజ్ ఎలాగ వర్గిదెజ్ అట్టిదెర్? మీ మన్నుదు మీరు ఒడిఃబిని దన్నిజ్ తగ్గితి లెకెండెనె మీ వెయు వర్గిజనాద్. 35 నెగ్గి మన్ను మన్ని వన్నిజ్ కూలిజ్ కొట్టుకిత్తి మన్నిలెకెండె, వని మన్నుదు నెగ్గికెజె మంజినె. అందెజె వన్ని వెయుదాన్ నెగ్గి మాటెజె వానె సెఇ మన్ను మనివన్నిజ్ సెఇకెజె మంజినె. అందెజె వన్ని వెయుదాన్ సెఇ మాటెజె వానె. 36 గాని నాను మిజి వెప్పినిక ఇనిక ఇహిజ, దేవుణు తీర్పు తీరిస్సి రొజుదు, లోకుర్ వర్గితి మహి విజి మాటెజె వందిజ్ లెక్క సిదెజ్ వలె. 37 అహిజ మీ మాటెజాణిజె మీరు సిక్చదాన్ తప్రె ఆనిదెర్, సిల్లిజ మీ మాటెజాణిజె మీరు మీ మున్ను సిక్చ తప్రె ఆనిదెర్.

ఓన ఉండ్రీ గుర్తు

38 నస్తివలె సెగొండార్ పరిసయరుని యూదురి రూలుజ్ నెస్సిస్సికార్ యేసు డగ్రు వాజి వన్నిజ్, “బోదకినికి, నీను దెవుణుబాణిజ్ వాతికాన్ ఇనిదన్నిజ్ గుర్తు లెకెండె నీను తోరిసిని ఉండ్రీ బమ్మాతి పణి నుడుఃదెజ్ ఇజి కోరిజినావ్”, ఇజి వెచ్చార్. 39 వాండ్రు వరిజ్ “యా తరమ్దికిదెర్ ఆతి మీరు సెఇకిదెర్. దేవుణుదిజ్ నెన్ ఇకిదెర్నె, గుర్తు లెకెండె ఉండ్రీ బమ్మాతి పణి కిజి తోరిన్ అ ఇజి వెప్పిదెర్. గాని దేవుణు ప్రవక్త ఆతి ఓనెజ్ జర్గితిక తప్పు మరి ఇని గుర్తుబా ఎయెరిజ్ బా తోరెవెద. 40 ఓన మూండ్రీ రొస్సు వెరి మెయ పొటాదు ఎలాగ మహండ్రో, అయలెకెండెనె, లోకుమరిసి ఆతి నానుబా మూండ్రీ రొస్సు బూమి లోఇ మంజినలె. 41 ఓన వెప్పి మాటెజ్ విహారె నినివెదికార్ వరి పాపమ్కు ఒప్పు కొడిఃజి డిఃస్ట సితార్. అందెజె తీర్పు తీరిసిని దినమ్దు వారు యా తరమ్ది వరి వెటె నిల్చి విరిమున్ను తీర్పు తీరిస్సారె. ఇదిలో, ఓనెజ్ మిస్తికాన్ ఒరెన్ ఇబ్బె మనాన్ ఇజి నాను వెప్పిన. 42 అక్కరి దినమ్కాజ్ తీర్పు తీరిసినివలె, దనిణ దేసెమ్ది రాణి ఉండ్రీ సాసిలెకెండె బాన్ మంజినాద్. ఎందనిజ్ ఇహిజ సొలోమోను వర్గిని గెణంమన్ని మాటెజ్ వెండ్రెజ్ నండో దూరం మన్ని దన్ని దేసెమ్దాన్ వాతాద్. ఇదిలో, సొలోమోనుజ్ మిస్తికాన్ ఒరెన్ ఇబ్బె మనాన్. గాని యా తరమ్దికార్ వన్ని మాటెజ్ గిబ్బిజ్ ఒడిఃజి వెన్ ఏర్, అందెజె యా తరమ్ది వరిజ్ తీర్పు మంజినాద్లె. 43 ఉండ్రీ దెయం ఒరెన్ వన్నిజ్ డిఃసి వెల్లి వాతి వెనుక, మండ్రెజ్ బాడ్డి వందిజ్ రెబాజి బిడిఃమ్ బూమిదు బూలాజినాద్. గాని ఎంబెబా దనిజ్ బాడ్డి దొవ్హ్ ఏతాద్. 44 నస్తివలె ‘నాను డిఃస్టి వాతి నా ఇండ్రో మరజి సొనాలె’, ఇజి దనిజ్ అదిని వెప్పాద్. మరజి వాతిజ్ అది డిఃస్టి సిత్తికాన్, నెగొండె సిపాజి నుబరం

§ 12:39 12:39 పడాయ్ ఒప్పుమానమ్దు ఓన వందిజ్ రాస్ట మనాద్ వాండ్రు పయసం కిజి మహి ఒడదాన్ సమ్దరమ్దు విసిరె అతిజ్ ఉండ్రీ వెరి మెయ, దేవుణు వెప్పి వజి వన్నిజ్ డిఃజితాద్ మూండ్రీ రొస్సు వెనుక వన్నిజ్ సమ్దరం ఒడ్డుదు పాణిమాదాన్ కక్కాద్ ఓన గుర్తు వందిజ్ మూసె ఆని వందిజ్ మరి మూండ్రీ వాండ్రు సాతి వరి బాణిజ్ మరి మరజి నిజిజ వెచ్చన్.

కిజి ఎయెర్బా మన్ఇ ఇల్లు లెకెండ్ మన్నుక నూణాద్. 45 నస్తివలె అది మర్జి సొన్ని, దన్నిజ్ ఇంక సెఇకెజ్ అతి మరి ఏడు దెయ్మకాజ్ దన్నివెట కూక్కు తనాద్. అవిక వని లొఇ సొన్ని అబెనె బస కినె. అయావలె వన్ని గతి ముందాహి దనిజ్ మున్ను కస్టం ఆనాద్. అయలెకెండ్ నె యా తరమ్ది వరిజ్ గతిబా మంజినాద్.”

యేసు అయ్సెని తంబెరిబు
46 యేసు మంద లోకుర్ వెట వర్గిజి మహివలె, వన్ని అయ్సెని తంబెరిబు వన్నివెట వర్గిదెజ్ ఇజి వెల్లి నిహ మహార్. 47 అయావలె ఒరెన్, “ఇదిలో నీ యాయని నీ తంబెరిబు నీ వెట వర్గిదెజ్ ఇజి వెల్లి నిహ మనార్”, ఇజి వన్నిజ్ వెప్తాన్. 48 అందెజె వెప్తివన్నిజ్ సుడేజి, “ఎయెద్ నా యాయ? ఎయెరు నా తంబెరిబు?”, ఇజి వెన్బాతాన్. 49 వన్ని సెసూర్జి కియు తోరిసి, “ఇదిలో నా యాయని నా తంబెరిబు. 50 పరలోకామదు మన్ని నా బుబ్బెజ్ ఇస్టం అతివజి కినికాండ్రె నా తంబెరి, నా తజి, నా యాయ”, ఇజి వెప్తాన్.

13

విత్తు విత్తివన్ని కత.

1 అయ దినమ్దునె, యేసు ఇంఠ్రోణిజ్ వెల్లి సొన్ని సమ్దరం పడకాదు బస్తాన్. 2 మంద లోకుర్ వన్ని డగ్గు వాతిజ్ వాండ్రు ఉంఠి డోణిదు ఎక్క బస్తాన్. లోకుర్ విజెరె సమ్దరం పడకాదు నిహార్. 3 అయావలె వాండ్రు వరిజ్ సుడేజి నంఠో సజతిజ్ కత వజి వరిజ్ వెప్తాన్ “ఒరెన్ రయ్యు వాండ్రు విత్తు విత్తెజ్ సాహన్. 4 వాండ్రు విత్తి మహిజ్ సెగం విత్తు సరి పడకాదు అర్తె. పొటిజ్ వాజి వన్నాజ్ తిహె.

5 సెగం విత్తు సటు మున్ను మని లావ్లోతు సెలి డుల్లిదు అర్తె. డుల్లి లోతు లావ్ సిల్లితిజ్ అవి వెటనె నేర్తె. 6 గాని డుల్లి తకు మహిజ్ వెలెజ్ లొఇ సొన్ఇతిజ్, హిదు సొసి ఎండ తాక్తిజ్ అవి సాతె. 7 సెగం విత్తు సాప్పుతువెజి అర్తె. సాప్పు తప్పుజ్ పెరిసి వన్నాజ్ అణసు తిగితె. 8 మరి సెగం విత్తు నెగ్గి బూమిదు అర్తె. అబ్బె విత్తి విత్తుదిజ్ వంద వంతుజ్, అరువయ్వంతుజ్, ముపయ్వంతుజ్ లెక్క పండితె. 9 గిబ్బిజ్ ఒడేజి వెంజి అయాలెకెండ్ నడిజి మండ్రు.

10 వన్ని సెసూర్ వాతారె, “ఎందనిజ్ నీను కత వజి వరిజ్ వెప్సిని”, ఇజి వన్నిజ్ వెన్బాతారె. 11 వాండ్రు వరిజ్ ఈహు వెప్తాన్. “దేవుణు ఏలుబడిః కిని వందిజ్ డాజితి మని సజతిజ్ దేవుణు మిజి తెలివి కిత మనాన్, గాని విరిజ్ తెలివి కివన్. 12 దేవుణు ఏలుబడి కిని వందిజ్ నెస్తి మని వన్నిజె మరి తెలివి కినాన్. వన్నిజ్ మరి నంఠో నెస్తిస్సాన్. ఇనికబా అర్దం ఆఇ వన్నిబాణిజ్ వాండ్రు నెస్తిమనికబా లాగె ఆనాద్. 13 ఎందనిజ్ నాను కత వజి వరిజ్ వెప్సిని ఇహిజ, వారు సుడేజినార్ గాని సుడేతిక వరిజ్ తోర్వెద్. వెంజినార్ గాని నెగెండ్ వినెవెర్, అర్దంబా కిపెర్.

14-15 మీరు ఎస్తివలెబా వెంజినిదెర్ గాని అర్దం కిదెజ్ అట్ఇదెర్. ఎస్తివలెబా సుడేజినిదెర్ గాని ఇనిక ఇజి నెన్ఇదెర్. వారు వరి కణకాణిజ్ సుడేజి, గిబిజాణిజ్ వెంజి మన్నుదాన్ అర్దం కిజి నా దరోట్ మహ్తిజ, నాను వరిజ్ నెగెన్ కిత మరి. గాని అయ లెకెండ్ జర్గివిండ వరి మన్ను కొడుపుదాన్ నింఠ్రిత మనాద్. వరి గిబిజిజ్ మందజ్ ఆతె. వారు వరి కణ్కు మూక్త మనార్.* యా లెకెండ్ ఎనయ ప్రవక్తవెట దేవుణు ముజాల వర్గితి మాట వరి మున్ను పూర్తి ఆతె.

16 మీ సుడేజినికెజ్, వెంజినికెజ్, మీరు అర్దం కిజినిదెర్. అందెజె మీరు దేవుణు సీజిని దీవనమ్కు మన్నుకిదెర్. 17 నంఠెంఠార్ ప్రవక్తరుని సీతి నిజాయి మన్నికార్ మీరు సుడేజిని వన్నాజ్ సుడేదెజ్ ఆస ఆతారె, గాని సుడేదెజ్ అట్వెతారె. మీరు వెంజిని వన్నాజ్ విండ్రెజ్ ఆస ఆతారె గాని విండ్రెజ్ అట్వెతారె.

18 విత్తు విత్తివన్ని కతదిజ్ అర్దం మీరు జాగర్త వెండ్రు. 19 ఎయెర్బా దేవుణు ఏలుబడిః కిని వందిజ్ వెప్సి మాటెజ్ వెంజి దనిజ్ అర్దం అట్విండ మహిజ, సయ్తాన్ వాజి వన్ని మన్నుదు వితి దనిజ్ పెర్తె ఒనాన్. యాకాదె మడిజి నడిఃమిహాన్ సొని సర్దు అర్తి మన్నివిత్తు. 20 సెగెంఠార్ సట్టు మున్ను మని లోతు సెలి డుల్లి నన్నికార్. సెగం విత్తు అయా డుల్లిదు అర్తె, గాని వారు దేవుణు మాట వెంజి సర్దదాన్ దనిజ్ వెటనె మన్నుదు ఇడ్వార్. 21 వారు కండెక్ కాలం దేవుణుమున్ను.

* 13:14-15 13:14-15 యెసయ 6:9,10.

నమకమ్దాన్ నిల్వార్. గాని కష్టమ్కు, స్రమెజ్ వానివలె వెటనె దేవుణు ముస్సు, మన్ని నమకం వారు డిసి సీజినార్. ²² మరి ఒరెన్ విత్తు అర్ది మన్ని సాప్పుతువెజ్ నేర్పి బూమి నన్నికాన్. వాండ్రు దేవుణు మాట వెంజినాన్ గాని యా లోకమ్ది బత్తు. వందిజ్ విసారం ఆజి మరి డబ్బు వందిజ్ సెజ ఆస ఆజి, వనిజ్ అణసు తిగ్జి మంజినె. వన్ని బత్తుదు పలం సిలి నన్నికాన్ ఆనాన్. ²³ మరి ఒరెన్ విత్తు అర్ది మన్ని నెగ్గి బూమిలెకెండ్ మనాన్. వాండ్రు దేవుణు మాట వెంజి దనిజ్ అరదం కిజినాన్. వాండ్రు, విత్తి విత్తుదిజ్ వంద వంతుజ్, అరువయ్ వంతుజ్, ముపయ్ వంతుజ్ పలం సీనాన్.

కారు మొక్కెజ్

²⁴ యేసు మరి ఉండ్రి సజతి కత వజి వరిజ్ వెహ్లాన్. “దేవుణు ఏలుబడిః ఇహిజ, వన్ని మడిఃజ నెగ్గి విత్తు విత్తి వన్నిజ్ పోలిత మనాద్. ²⁵ గాని విజెరె నిద్ర కిజి మహివలె, వన్ని పగాతికాన్ వాతాండ్రె, కూలిజ నడిఃమి కారు విత్తు వితాండ్రె సాహాన్. ²⁶ కూలిజ్ నేరెజి పిరితెనె, సెరెక్ పోక్తివలె, నెగ్గి కూలిజ్లెకెండ్ మన్ని కారుబా తోరితాద్. ²⁷ వన్ని పణి మసిరె మడిఃజ యాజుమాని డగ్గు వాతారె, “ఓ బాబు, నీను నీ మడిఃజ నెగ్గి విత్తునె వితిగదె? మరి ఎమేణి యా కారు మొక్కెజ్ వాతె?”, ఇజి వెన్బాతారె.

²⁸ “ఒరెన్ పగాతికాన్ యాక కితాన్”, ఇజి వాండ్రు వెహ్లాన్. అయ పణి మనిసిరె మాపు సొన్ని వనకాజ్ లాగ్జి కొటు కిడిజ్ నిజి ఇస్టమ్నా? ఇజి వెన్బాతారె.

²⁹ అయావలె వాండ్రు, “ఏలు హొని, నెగ్గి కూలిజ్లెకెండ్ మన్ని కారు మొక్కెజ్ మీరు లాగ్గివలె వనకవెట బకవెల కూలిజబా తెప్పిదెరెను. ³⁰ కొయ్ని కాలం వానిదాక రుండిబా కూడిజి పిరిపిద్. కొయ్ని కాలమ్దు, నెగ్గి కూలిజ్ లెకెండ్ మన్నికారు మొక్కెజ ముజాల కొయ్జి కటిజ్ తోప్పి సురదు, వెనుక కూలిజ్ కొయ్జి తసి నా కొటుదు వాక్కు, ఇజి కొయ్ని వరిజ్ వెహ్లాన్”, ఇజి వెహ్లాన్.

సర్సుగిడ కత

³¹ యేసు మరి ఉండ్రి సజతి కత వజి వరిజ్ వెహ్లాన్. “దేవుణు ఏలుబడిః ఇహిజ, సర్సు మొక్కెజ్ విత్తుదిజ్ పోలిత మనాద్. ఒరెన్, అక్క వన్ని మడిఃజ విత్తాన్. ³² అయాక విజి విత్తు లోఇ ఇజిరికాదె, గాని పిరితిజి కుస మొక్కెజ విజి వనకాజ్లోఇ పెరిక ఆజి మరాన్ లెకెండ్ ఆనాద్. అగనమ్దు ఎగ్గిజని పొటిజ్ వాజి దన్ని కొమెజ గూడు తోప్పి బస్సు. ³³ యేసు మరి ఉండ్రి సజతి కత వజి వరిజ్ వెహ్లాన్. “దేవుణు ఏలుబడిః ఉండ్రి బోదెలి నండె నెగ్గి దూరుదు కలప్తిమన్ని పులాజ్ మన్ని కండెక్ దూరుదిజ్ పోలిత మనాద్. అయాక కలప్తి మన్ని దూరుదిజ్ విజి పులాజ్ కినిదాక పణి కినాద్.” ³⁴ యేసు కత వజినె విజి మాటిజ్ లోకురిజ్ వెహ్లాన్. కత వజి ఆవిండ ఇనికబా వరిజ్ వెహ్లాన్. ³⁵ “నాను కత వజినె వెయ్దాన్ వెహ్లాన్. లోకం పుట్టి బాణిజ్ అసి డాఃజితిమన్ని సజతిజ్ నాను తెలివి కిన”^{*}, ఇజి ప్రవక్తవెట దేవుణు ముజాల వర్గితి మాటిజ్ పూర్తి ఆతాద్. ³⁶ సస్తివలె వాండ్రు లోకురిజ్ డిసి ఇండ్రి సాహాన్. వన్ని సీసూర వన్ని డగ్గు వాజి, “మడిఃజ మన్నినెగ్గి కూలిజ్లెకెండ్ మన్ని కారు మొక్కెజ వందిజ్ వెహ్లాన్ కతదిజ్ అర్దం మజి వెహ్లాన్”, ఇజి వెహ్లాన్. ³⁷ అందెజి వాండ్రు ఈహు వెహ్లాన్. “నెగ్గి విత్తు విత్తికాన్ లోకు మరిసి ఆతి నాను. ³⁸ మడిఃజ యా లోకం. నెగ్గి విత్తు దేవుణు ముస్సు, నమకం ఇడ్డి మన్ని దేవుణు కొణెరె నెగ్గి కూలిజ్లెకెండ్ మన్ని కారు మొక్కెజ్, సయ్నాను కొణెరె. ³⁹ వనకాజ్ విత్తికాన్ పగాతికాన్ అతి సయ్నాను. కోత్త కొయ్నిక యా లోకమ్దిజ్ ఆక్కరెదినం. కొయ్నికార దేవుణు దూతారె.

⁴⁰ నెగ్గి కూలిజ్ లెకెండ్ మన్ని కారుదిజ్ లాగ్గి కొట్టుకిజి సుర్పి లెకెండ్నె యా లోకమ్ది ఆకరెదినమ్బా వానాద్. ⁴¹⁻⁴² నెగ్గి కూలిజ్ లెకెండ్ మన్ని కారుదిజ్ లాగ్గి కొట్టు కిజి సనుద్ సుర్పి లెకెండ్, పాపం కిజిని వరిజ్, మరి పాపం కిబిన్నె విజి దన్నిజ్ నా ఏలుబడిఃదాన్ వెల్లి పోక్తెజ్ ఇజి, లోకుమరిసి ఆతి నాను నా దూతారిజ్ పోక్తాలె. వారు వరిజ్ సినుద్ విసిరెనాలె. అబ్బె వారు అడఃబాజి, పల్కు కొప్పి మంజినార్.

⁴³ నీతి నిజాప్పు మనికారె వరి బుబ్బాతి దేవుణు కిని ఏలుబడిఃదు పొద్దు లెకెండ్ జాయ్ నీజి మంజినార్. మీరు గిబ్బిజ్ ఒడిజి వెంజి అయావజి నడిఃజ మండ్రు.

దేవుణు ఏలుబడిః

44 “దేవుణు ఏలుబడికి కినిక, మడిఃజదు డాప్తిమన్ని ఏలువాతి ఆస్తిదిజ్ పోలిత మనాద్. ఒరెన్ ఆ ఏలువాతి ఆస్తిదిజ్ సుడఃతిజ్, ఎయెర్బా నెన్ ఏండ మరి డాప్తి, గొప్ప సర్దదాన్ సొన్ని వన్నిజ్ మనికెజ్ విజు పొర్ని అయ మడిఃజ కొటాన్. 45 మరి నాను మిజి వెస్సొన, దేవుణు ఏలుబడికి కినిక ఇహిజ, ఒరెన్ ముజెలు సప్కారి రెబాజని గొప్ప ఏలువ మన్ని ముజెలు తెకెండెనె. 46 వాండ్రు రెబాజనిలెకెండె మన్ని, ఉండ్రీ ఏలువాతి ముజెలుదిజ్ సుడఃతాండ్రె, సొన్ని వన్నిజ్ కల్లితి మనికెజ్ విజు పొర్ని అయ ముజెలు కొటాన్.

47 మరి నాణు మిజి వెస్సొన, దేవుణు ఏలుబడికి కినిక ఇహిజ, సమ్దరమ్దు పొక్కిని రకరకమ్ది మొయెజ్ అస్తి వలాదిజ్ పోలిత మనాద్. 48 అయ వల నిండ్రీతిజ్ మొయెజ్ అస్తికార్, వల పడకాదు లాగ్గి బసి, నెగ్గి మొయెజ్ గంపాదు ఇడ్నార్. సెఇ మొయెజ్ విసిర్నార్. 49 యా లెకెండెనె యా తరమ్ది ఆక్కర్ దినంబా వానాద్. దేవుణు దూతార్ వాజి నీతి నిజాయి్తి మన్ని పరిబాణిజ్, సెఇవరిజ్ ఎర్లిస్తార్. 50 వారు వరిజ్ గొప్ప పెరి సిసు బాడ్డిదు అర్పార్. అబె అడఃబాజి, పల్కు కొహ్కొక్కి మంజినార్.” 51 “యా విజు సజతిజ్ వందిజ్ మిజి అర్దం ఆతాద్?” ఇజి యేసు వరిజ్ వెన్బాతాన్. “ఒఒ”, ఇజి వారు మర్జి వెప్సార్. 52 “దేవుణు ఏలుబడికి కిని వందిజ్ నెస్తి మన్ని యూదురి రూలుజ్ నెస్తిస్తికార్ విజెరె, వన్ని ఆస్తి ఇడ్డి మన్ని గదిదాన్ పడాంకెజ్, కొత్తకెజ్ ఉండ్రె లెకెండె వెల్లి తని ఇండ్రెణి ఎజుమానిజ్ లెకెండె మనాన్”, ఇజి వాండ్రు వరిజ్ వెప్సార్.

53 యేసు యా కతెజ్ వెస్తి వీజతి వెనుక, అబెణిజ్ సొహాన్. 54 వన్ని సొంత పట్టుమ్దు వాతాండ్రె, వాండ్రు యూదురు మీటిజ్ కిని ఇల్కాజ్ లోకురిజ్ నెస్తిసి మహాన్. “వన్నిజ్ యా గెణం, యా బమ్మాతి పణిజ్ కిని సత్తు ఎంబెణిజ్ వాతాద్”, ఇజి వారు బమ్ము ఆజి వర్గితార్. 55 “వీండ్రు కంసెల్ వాండ్రు మరిసి ఆఎండ్రా? విన్ని అయేసి పేరు మరియు గదె? యాకోబు, యోసేపు, సీమోను, యూద ఇనికార్ విన్ని తంబెరిసిర్ గదె? 56 విన్ని తజిసిక్ మా వెట మనెగదె? యాకెజ్ విజు వినిజ్ ఎంబెణిజ్ వాతె? 57 వారు వన్ని ముస్కు కోపం ఆజి మహాన్. గాని యేసు వరిజ్ “ఒరెన్ ప్రవక్త, వన్ని సొంత ఇండ్రెనె గవరవం సిల్లికాన్ ఆజినాన్”, ఇజి వెప్సార్. 58 వన్ని ముస్కు వరిజ్ నమకం సిల్లితిజ్ వాండ్రు అబ్బె లావబమ్మాతి పణిజ్ కివితాన్.

14

యోహాను బుర కత్తినార్

1-2 నస్తివలె హేరోదురాజు యేసు వందిజ్ మాటెజ్ విహండ్రె, “వీండ్రు సొతి పరిబాణిజ్ మర్జి నిజితి బాప్తిసం సీని యోహాను. అందెజె యా బమ్మాతి పణికిని సత్తు వన్ని లొఇ మనాద్”, ఇజి వన్ని పణి మన్నిరిజ్ వెప్సార్.

3 వన్ని తంబెరిసి ఆతి పిలిపు అల్లి హేరోదియ వందిజ్ హేరోదురాజు ఆడ్రె సిత్తిలెకెండె యోహానుజ్ అసి గొలునుదాన్ తొప్పొ జెలిదు ఇడ్డ మహాన్. 4 ఎండనిజ్ ఇహిజ, “దనిజ్ నీ వందిజ్ అల్లి లెకెండె ఇడె ఆతిక దేవుణు మోసెజ్ సీత్తి రూలుదిజ్ పడివద్”, ఇజి యోహాను వన్నిజ్ వెప్సా మహాన్. 5 యోహానుజ్ సప్తెజ్ ఇజి హేరోదు రాజు ఒడిఃబితాన్, గాని లోకుర్ విజెరె వీండ్రు ఒరెన్ దేవుణు ప్రవక్త ఇజి వెస్సొ మహిజ్ విన్నిజ్ సప్తెజ్ తియెలాత మహాన్.

6 హేరోదు రాజు పుట్టి రోజు వాతిజ్, హేరోదియ గాల్ని వాజి వరి వందిజ్ డాట్టి కరజతాద్. హేరోదు రాజుజ్ గొప్ప సర్ద ఆతాన్. 7 అందెజె అది ఇనిక లొస్సిజ్బా సీన ఇజి వాండ్రు దనివెట ఉండ్రీ ఒట్టు పొక్కి దన్నిజ్ ఉండ్రీ మాట సిత్తాన్. 8 అయేసి దనిజ్ సుత్తిస్తి లెకెండెనె అది సొహదె, “బాప్తిసం సీని యోహాను బుర కత్తి ఉండ్రీ వలెందు సిద”, ఇజి లొస్తాద్. 9 రాజు గొప్ప బాద ఆతాన్. గాని వాండ్రు కితి ప్రమాణం వందిజ్, వన్ని వెట విందుదిజ్ బస్తిమిహి కూలెజ్ వందిజ్ అది లొస్సిక సీదెజ్ ఇజి ఆడ్రె సిత్తాన్. 10 జెలిదు మహి యోహాను బుర కత్తిపిస్తాన్. 11 వన్ని బుర ఉండ్రీ వలెమ్దు ఇడ్డి తపిసి దనిజ్ సిబిస్తాన్. అది అయాక దని అయేసి డగ్గు ఒత సీతాద్. 12 యోహాను సిసూర్ వాజి వన్ని పిసుగు పెర్లి ఒసి సమాది కితార్. నస్తివలె వారు యేసు డగ్గు వాతార వెప్సార్.

అయేదు వేలుజ్ లోకాజ్ బోజనం సీనిక

13 జర్గితీ నజతిజ్ విజు విహండ్రె యేసు ఉండ్రీ డోణి ఎక్కి ఎయెర్బా మన్ ఇ ఉండ్రీ బాడ్డిదు ఒరేండ్రె సాహాన్. వాండ్రు సాహి నజతి వెంజి అయ పట్టుమదికార్ నండొండార్ నడిసి వన్ని వెనుక సాహార్. 14 వాండ్రు అతాహా పడక జోరె అందితిజ్, డోణిదాన్ డిగితాన్ అయా మంద లోకురిజ్ సుడెతాండ్రె వరి మున్ను కనికారం ఆతాన్. వరి జబ్బుదివరిజ్ నెగెండ్రె కిత్తాన్. 15 పొద్దు ఆతివెలి వన్ని సిసూర్ వన్ని డగ్రు వాజి, “అక్క ఎయెర్ మన్ ఇ బాడ్డి, ఏలునె పొద్దు ఆతాద్. యా లోకుర్ నాహ్కాజ్ సాన్ని వారి వరిజ్ బోజనమ్కుకు కొండెజ్ వరిజ్ పోకొత్”, ఇజి వెహ్తార్. 16 “వారు సాండ్రెజ్ అక్కర్ సిల్లెద్. మీరె వరిజ్ తిండ్రెజ్ ఇనికబా సిదు”, ఇజి యేసు వరిజ్ వెహ్తాన్. 17 “ఇదిలో, మా వెట అయదు రొటెజ్ ని రుండి మొయెజ్ నె మనె”, ఇజి వారు వెహ్తార్. 18 “అయకెజ్ నా డగ్రు తగాట్”, ఇజి యేసు వెహ్తాన్. 19 వెనుక లోకాజ్ పసి గడ్డి మున్ను బిన్ను ఇజి వెహ్తాండ్రె అయదు రొటెజ్ ని రుండి మొయెజ్ కిదు అస్తాండ్రె అగాసం దరిజ్ సుడెజి దేవుణుదిజ్ వందనమ్కుకు వెప్పి రొటెజ్ రుక్కి సిసూరిజ్ సిత్తాన్. సిసూర్ అక లోకాజ్ సిబాత సిత్తార్. 20 వారు విజేరె పొట పంజు తిహార్. వెనుక మిగిలిత్తి ముక్కెజ్ పన్నెండు గంపెజ్ సిసూర్ వెహ్తార్. 21 బోదెక్ ని కొడోరె అపిండ్రె తిహికార్ అయదువేలు మన్ని మొగకొడోరె మహార్.

యేసు ఏరు మున్ను నడిసినాన్.

22 లోకురిజ్ పొక్కి వెటనె యేసు వన్ని సిసూర్ జ వెటనె ఉండ్రీ డోణి ఎక్కి, వన్నిజ్ ఇక ముజాల అతాహా పడక సాండ్రు ఇజి వరిజ్ పోక్తాన్. 23 వరిజ్ పొక్కి వెనుక, వాండ్రు ఒరేండ్రె పార్లం కిదెజ్ ఉండ్రీ గొరొత్ ఎక్తాన్. పొదు ఆతివెలి వాండ్రు ఒరేండ్రె అబ్బె మహాన్. 24 గాని డోణి ఒడ్డుదాన్ నండొ దూరం సాహాద్ గొప్ప గాలి కిజి మహిజ్ ఉల్కాజాణిజ్ డోణి ఇతల్ అతాల్ దూజ్ జ మహాద్. 25 కోడిజామ్దు యేసు సందారమ్దు ఏరు మున్ను నడిజి వరి డగ్రు సాహాన్. 26 వాండ్రు సమ్దరమ్దు ఏరు మున్ను నడిసినక సిసూర్ సుడెతారె తియెల్ అతార్. “అబయా యాక ఉండ్రీ దూబ”, ఇజి వారు తియెల్ అజి డెల్స్తార్. 27 వెటనె యేసు, “దయరమ్దాన్ మండ్రు, ఇక నానె, తియెల్ అమాట్”, ఇజి వెహ్తాన్. 28 పేతురు, “ప్రబువా, నీనె ఇహిజ, నాను ఏరు మున్ను నడిజి నీ డగ్రు వాదెజ్ నెలవ సిద్ అ”, ఇజి వెహ్తాన్. 29 “రఅ”, ఇజి యేసు వెహ్తాన్. నస్తివలి పేతురు డోణి డిగిజి యేసు దరోట్ ఏరు మున్ను నడిత వాతాన్. 30 గాని గాలిదిజ్ నిజిత్తి ఉల్కాజి సుడెజి తియెలాజి వాండ్రు ముడుజిగిజి మహాన్. “ప్రబువా నజి రసిన్ అ”, ఇజి డెల్స్తాన్. 31 వెటనె యేసు వన్ని కియు సాఫ్ఫి వన్నిజ్ అస్తాన్. “ఇజిరి నమకం మనికి, ఎందనిజ్ నీను అనుమానం ఆతి?”, ఇజి వెహ్తాన్.

32 వారు డోణి ఎక్కిజ్ గాలి అలితాద్. 33 నస్తివలి డోణిదు మనికార్ వాజి, “నిజమె, నీను దేవుణు మరిసినె”, ఇజి వెప్పి వన్నిజ్ పొగిడిజి మాడిస్తార్. 34 వారు అతాహా పడక సాన్ని గెనెనెరెతు నాటో అందితార్. 35 అబ్బెణి లోకుర్ వన్నిజ్ గుర్తు అస్తారె డగ్రు మని నాహ్కాజ్ కల్లు పోక్తార్. లోకుర్ వరి కన్లమ్దు మన్ని వరిజ్ విజేరిజ్ వన్ని డగ్రు త్తార్. 36 జబ్బు మన్నికార్ వన్ని సాక్క నెంగుబా ముట్టెజ్ బతిమాలజి నెలవ లొస్తార్. ముట్టికార్ విజేరె నెగెండ్రె అతార్.

15

నెగ్గెక్కెజ్ నెఇక్కెజ్

1-2 నెగెండ్రె వరిసయరుని యూదురిజ్ రూలుజ్ నెస్సిస్సికార్ యెరూసలేమ్దాన్ వాతారె యేసుజ్, “ఎందనిజ్ నీ సిసూర్ బోజనమ్దిజ్ ముందాల కికు నొరబావిర్, పెద్దెల్ జి అలవాటుజి నెక్కి పొక్కినార్?”, ఇజి వెనెబాతార్. 3 యేసు వరిజ్ ఈహు మరజి వెహ్తాన్, “మీరు ఎందనిజ్ మీ అలవాటుజి వందిజ్ దేవుణు ఆడ్రెజి నెక్కి పొక్కినిదెర్? 4 మీ యాయ బుబ్బురిజ్ గవరం సిదు, మరి ఎయెర్బా అయసి అప్పొసిరిజ్ దూసిసి వెహ్తాజి వన్నిజ్ తప్తెజ్ వలె* ఇజి దేవుణు రూలుదు వెహ్తా మనాద్. 5-6 గాని మీరు నెస్సిసిని దన్ని లొఇ తేడ మనాద్ మీరు నెస్సిసినిక ఇనిక ఇహిజ ఎయెర్బా, “నాను మిజి ఇనికబా ఉండ్రీ సాయం లెకెండ్రె కిన ఇజి ఇట్టి మనిక, దేవుణుదిజ్ సంత సిత్త మన్ను’ ఇజి అయసి అప్పొసిరిజ్ వెహ్తాజి, వాండ్రు మరి గవరమ్దాన్ నెగెండ్రె సుడెదెజ్ అక్కర్ సిల్లెద్. ఇజి అయాలెకెండ్రె మీ అలవాటు వందిజ్ మీరు దేవుణు మాటదిజ్ సిలి లెకెండ్రె కిజినిదెర్.

* 15:4 15:4 నిగ్గమ 21:17; లేవి 20:9. * 15:4 15:4 నిగ్గమ 20:12 ద్వితి 5:16.

7-9 వేసం కినికిదెరా, “యా లోకుర్ వరి బెద్వెజాణిజ్ నజి పొగ్గిజినార్ గాని వరి మన్ను నా బాణిజ్ దూరం మనాద్. వారు పణిదిజ్చెంపిండ నజి పొగ్గిడిజినార్. వారు నెస్సిన్సికెజ్ విజు లోకురి రూలుజ్చెనె,* ఇజి యెసయ ప్రవక్త వెట దేవుణు ముజాల మీ వందిజ్ వర్గితక నిజమె”, ఇజి వెప్తాన్. 10 యేసు అయ మంద లోకురిజ్ డగ్గు కూక్తాండ్రె ఈహు వెప్తాన్, “మీరు జాగర్త వెంజి నెగెండ్ అర్తం కిదు. 11 వెయుదాన్ లోక సొనిక ఇనికబా ఎయెరిజ్చెబా ఇనిక ఆవిద్. గాని లోకహాన్ వెయుదాన్ వెల్లివాని మాటెజ్చెనె ఒరెన్ వన్నిజ్ సెఇక కినె.” 12 నస్తివలె వన్ని సిసూర్ వాతార, “యా మాటెజ్చెంజి పరిసయరు నండొ కోపం ఆతిక నీను నెస్సిదా?”, ఇజి వెప్తాన్. 13 వాండ్రు సిసూరిజ్, “పరలోకామదు మన్ని నా బుబ్బాతి దేవుణు ఉణున్ఇ విజు మొకెజ్ వేలెజాణిజ్ తెరె ఆనె వారబా అయ మొకెజ్ లెకెండెనె. 14 వరిజ్ డిసి సీదు. వారు గుడ్డిదివరిజ్ సరి తోరిన్సి గుడ్డిదికార్. ఒరెన్ గుడ్డిదికాన్ మరి ఒరెన్ గుడ్డి వన్నిజ్ సరి తోరిన్సిజి వారు రిఎర్బా గాంతదు అర్నార్”, ఇజి వెప్తాన్. 15 అందెజి పేతురు, “యా కత వందిజ్ మజి అర్తం ఆనిలెకెండ్ వెహాల”, ఇజి వెప్తాన్. 16 యేసు వరిజ్, “ఏలుబా మీరు మహివరిలెకెండ్ మనిదెరా? ఏలుబా నిన్ని మాటెజ్ అర్తం కిదెజ్ మిజి బుద్ది సిల్లెదా? 17 వెయుదాన్లోక సొనిక, పొటాదు సొన్ని మరి అయొక మీరు బయలు బస్సివలె బూమిదు సొన్నినాద్, ఇక మీరు నెన్ఇదెరా? 18 గాని వెయ్దాన్ వెల్లి వాని మాటెజ్ మన్నుదాన్ వాజినె. ఆకెజి లోకుదిజ్ సెఇక కిజినె. 19 సెఇ ఆలోసనమ్కు, నప్పికెజ్, రంకు బూలానిక, కేలారబూలానిక, డొజి కినిక, అబద్దం వెప్పికెజ్, దేవుణుదిజ్ దూసిన్సికెజ్ యాకెజ్ విజు మన్నుదాన్ వాజినె. 20 యాకెజి ఒరెన్ వన్నిజ్ సెఇక కిజినె. కికు నొరబావిండ ఉటిజి అక ఒరెన్ వన్నిజ్ సెఇక కివి.”

కనానియది బోదెలిజ్ మన్ని నమకం

21 యేసు అబ్బెణిజ్ నండొ దూరం సొన్ని ఉండ్రె గొరెన్ ఎక్కి డిగితాండ్రె తూరు, సీదోను ఇని పట్టుమ్కాజ్ సెందితి ప్రాంతమ్కాజ్ సాహాన్. 22 వాండ్రు అబ్బె అందితిజ్ అబ్బెణిజ్, కానాన దేసెమది ఉండ్రె బోదెలి వాతాద్, “ప్రబువా, దావీదు మరిసి నజి కనికారం తోరిన్అ. నా గాల్లిజ్ దెయం అస్తిజ్ గొప్ప బాద ఆజినాద్”, ఇజి డేల్లి వెప్తాన్. 23 యేసు దనిజ్ ఉండ్రె మాటబా వెహావితాన్. అందెజి వన్ని సిసూర్ వాజి, “ఇది మా వెట గగోల్ ఆజి వాజినాద్, దనిజ్ పొకెఅ”, ఇజి బతిమాల్తార. 24 వాండ్రు వరిజ్, “మురుతి మెండగొరెజ్ లెకెండ్ దేవుణుబానిజ్ దూరం ఆతి ఇస్రాయేలు లోకుర్ డగ్గు నాను పొకె ఆత మన్ను”, ఇజి వెప్తాన్. 25 అది వన్ని ముజాల వాజి ముణుకుజ్ ఉరోజి, “ప్రబువా, నజి సాయం కిత”, ఇజి వెప్తాన్. 26 వాండ్రు దనిజ్, “కోడొరె తిండ్రెజ్ మని రొటెజ్ లాగ్గి నుకుడిజ్ సీనిక నాయం ఆవిద్”, ఇజి వెప్తాన్. 27 అది, “నిజమె ప్రబువా, గాని ఎజమాని తింజిమహిజ్ బల్లదాన్ అర్ని ముక్కెజ్ నుకుడుజ్ తింజినె గదె?”, ఇజి వెప్తాన్. 28 నస్తివలె యేసు, “బయి, నా మున్ను మని నీ నమకం గొప్ప పెరిక. నీను కోరితి లెకెండ్ నెనిజి ఆపిద్”, ఇజి దనిజ్ వెప్తాన్. అయ గడియాదునె దని గాల్లి నెగెండ్ ఆతాద్.

నాల్లి వెయిజ్ లోకాజ్ బోజనం సీనిక

29 యేసు అబెణిజ్ సొన్ని గలిలయ సమదారం పడకాదాన్ వాజి అబె ఉండ్రె గొరెత్ ఎక్తాండ్రె బస్తాన్. 30 సొటావరిజ్, గుడ్డివరిజ్, గుల్లవరిజ్, కికు కాల్కు అర్తివరిజ్ మరి ఆఇ జబ్బుదివరిజ్ నండొడారిజ్ అసి మంద లోకుర్ వన్ని డగ్గు వాతారె వరిజ్ వన్ని కాల్కు అడ్డి ఇట్టార్. వాండ్రు వరిజ్ నెగెండ్ కిత్తాన్. 31 గుల్లవరిజ్ వర్గిదెజ్ వాతాద్. కికు కాల్కు అర్తికార్ నెగెమడ్ ఆతార. సొటాదికార్ నడితార, గుడ్డిదికార్ నుడెదెజ్ అట్టార్. యాకెజ్ నుడెజి లోకుర్ విజెరె బమ్మ ఆతారె ఇస్రాయేలురి దేవుణుదిజ్ పొగిడితార. 32 యేసు వన్ని సిసూర్జి కూక్తాండ్రె వరిజ్, “యా లోకుర్ నావెట మంజి మూండ్రె దినమ్కు ఆతె. విరిజ్ తిండ్రెజ్చెబా ఇనికబా సిల్లెద్. నజి వరి మున్ను కనికారం ఆజిన. వరిజ్ బజదావ్ పొక్కెజ్ మజి మన్ను రెవి. వారు కణ్కు త్రివిజి సర్దు అర్నార్ను”, ఇజి వెప్తాన్. 33 సిసూర్ వన్నిజ్, “నిసా మంద లోకురిజ్ తిప్పినెజ్ బిడిమబూమి ప్రామతమ్దు ఇనిక దొహ్మనె?”, ఇజి వెప్తాన్. 34 యేసు వరిజ్, “మీ బాన్ఎసాడు రొటెజ్ మన్నె?”, ఇజి వెన్బాతాన్. వారు, “ఏడు రొటెజ్ నెగెం ఇజిరి మొయెజ్ మనె”, ఇజి వన్నిజ్ వెప్తాన్. 35 లోకురిజ్ బూమిదు బస్తు ఇజి యేసు వెప్తాన్. 36 వెనుక

అయి ఏడు రోటోజీని మొయజ్ కీడు అస్తాండ్రె దేవుణుడిజ్ వందనముకు వెప్పి అయాకెజ్ రుక్మి వన్ని సిసూర్జు సితాన్. వారు లోకాజ్ సీబాజు సితాన్. 37 లోకుర్ విజెరె పొట పంజు తిహి వెనుక మిగిలితి ముక్కెజ్ ఏడు గంపెజ్ నిండ్రు వన్ని సిసూర్ పెహూర్.

38 బోదెకని కొడోర్ అవిండ తిహి మొగకొడోర్ నాల్లివెయిజ్ మహూర్. 39 అయి మంద లోకురిజ్ పోక్తి వెనుక యేసు డోణి ఎక్రాండ్రె మగదాన్ ఇని నాటో సోహాన్.

16

1 నస్తివలె పరిసయరుని సదుకయరు యేసుజ్ డగ్రు పరిక్కు కిదెజ్, వన్ని మాటెజాణిజ్ వన్నిజ్ అస్తెజ్ ఇజి డగ్రు వాతార్. దేవుణునె వన్నిజ్ పోక్తాన్ ఇనిదన్నిజ్ రుజువ్ లెకెండ్రె ఆగాసమ్దాన్ ఉండ్రె బమ్మాతి పణి కిజి మజి తోరెన్అ, ఇజి వెహూర్. 2 వాండ్రు పరిజ్, “పొద్దు ఆనివెలె ఆగసం ఎర్రజ్ మహిజు నేండ్రు నెగెణ్ మంజినాద్ ఇజి మీరు వెప్పినిదెర్. 3 మరి, పెందల ఆగసం ఎర్రజ్ అజి మొసావ్ మహిజు, నేండ్రు గాలి పిరు వానాద్, ఇజి మీరు వెప్పినిదెర్. ఆగసం సుడోజి అయి రోజు ఎలాగ మంజినాద్ ఇజి వెహూజ్ మీరు నెప్పిదెర్, గాని జర్నికిజ్ సుడోజి కాలమ్దిజ్ గుర్తు అస్తెజ్ అట్ఇదెర్. 4 యా తరమ్దికార్, సెఇకార్ ఆతికార్ దేవుణు వందిజ్ పరిజ్ మన్ను సిల్లెద్ గుర్తు లెకెండ్రె ఉండ్రె బమ్మాతి పణి వందిజ్ వెన్బజినార్, గాని దేవుణు ప్రవక్త ఆతి ఓనెజ్ జర్గితిక తప్ప మరి ఇనికబా ఉండ్రె గుర్తు మరి తోర్ఎద్”, ఇజి వెహూన్. 5 వెనుక యేసు పరిజ్ డిసి అబ్బెణిజ్ సోహాన్. 6 వారు డోణి ఎక్రాం సమ్దరం అతాహ పడక సాన్ని మహివలె, వన్ని సిసూర్ రొట్టెజ్ ఒత్తెజ్ పోస్త మహూర్. నస్తివలె యేసు, “పరిసయరుది మరి సదుకయరుది పులాజ్ కిని దూరువందిజ్ మీరు గొప్ప జాగర్త మండ్రు”, ఇజి వెహూన్.

7 “మావ్ రొట్టెజ్ తెఇతి వందిజె యా మాట వెహూన్”, ఇజి ఒరెన్ వెట ఒరెన్వర్గిజి మహూర్. 8 యేసు అక నెస్తాండ్రె, ఎందానిజ్ మీరు నమకం తక్కు మనికిదెర్ ఆజినిదెర్! మీ బాన్ రొట్టెజ్ సిల్లితిజ్ మీరు ఎందనిజ్ ఒరెన్ మరి ఒరెన్ వెట వర్గిజినిదెర్? 9 ఏలుబా మీరు అర్తం కిజి నెస్తెజ్ అట్ఇదెరా? అయదు రొట్టెజ్ మహివలె అయదు వెయిజ్ లోకాజ్ తిపిస్తిజ్ మిగిలితికెజ్ ఎసోడు గంపెజ్ పెహ్పిదెరో? 10 మరి ఏడు రొట్టెజ్ మహివలె నాల్లి వెయిజ్ లోకాజ్ తిపిస్తిజ్ మిగిలితికెజ్ ఎసోడు గంపెజ్ పెహ్పిదెరో? వినుకాజ్బా మీరు ఎతు కిఇదెరా? 11 నాను వర్గితిక రొట్టెజ్ వందిజ్ అవిద్ ఇజి ఎందనిజ్ మీరు అర్తం కిజి నెన్ఇదెర్? గాని పరిసయరుని సదుకయరుది పులాని దూరు వందిజ్ మీరు జాగర్త మండ్రు ఇజి నాను వెహూ”, ఇజి వెహూన్. 12 నస్తివలె వాండ్రు జాగర్త మండ్రు ఇజి వెహ్పిక రోటి తయార్ కిని పులాని దురు వందిజ్ అవిద్ గాని పరిసయరుని సదుకయరుది పులాని దూరు నని బోద్ వందిజ్ జాగర్త అజి మండ్రు ఇజి వెహూన్, ఇజి వారు అర్తం కిజి నెస్తార్.

13 యేసు పిలిపుది ఆతి కయసెరియ పట్టుమ్దిజ్ డగ్రు మన్ని నాహ్కాజ్ వాతిజ్ “లోకు మరిసి ఆతి నా వందిజ్, నాను ఎయెన్ ఇజి లోకుర్ వెహె ఆజినార్?”, ఇజి వన్ని సిసూర్జు వెన్బాతాన్. 14 “సెగొండార్ బాప్టసం సీని యోహాను ఇజినార్, సెగొండార్ ఏలియ ఇజినార్, మరి సెగొండార్ యిరిమ్మ ఇజినార్, సిల్లె ప్రవక్తెజ్ లోఇ ఒరెన్ ఇజి సెగొండార్ వెహె ఆజినార్”, ఇజి వారు వెహూర్. 15 అందెజె యేసు, “గాని నాను ఎయెన్ ఇజి మీరు వెప్పినిదెర్?”, ఇజి వెన్బాతాన్. 16 పేతురు ఆతి సీమోను, “నీను బత్తిజిని దేవుణు మరిసి ఆతి క్రిస్తు*”, ఇజి వెహూన్.

17 యేసు, వన్నిజ్, “యోన మరిసి ఆతి సీమోను, నీను దేవుణు సీజిని దీవనముకు మంజినికాన్. యాక నిజి తెలియకిత్తిక లోకురెయెర్బా అవిర్ గాని పరలోకామ్దు మని నా బుబ్బాతి దేవుణునె. 18 గాని నాను నిజి వెహ్పిక ఇనిక ఇహిజు నీను పేతురు, నీ పేరుదిజ్ తర్తం సట్టు ఇజి నాను యా సుటు మున్ను నా సజుమ్దిజ్ తోహ్న. అయా లోకమ్ది సత్తుజ్ దనిజ్ గెలిస్తెజ్ అట్ఎద్. 19 దేవుణు ఏలుబడి: కిజిని పరలోకామ్దిజ్ సెందితి ఆతికారం నాను నిజి సీన్, యా లోకమ్దు నీను ఇనిక తోహ్పిద్, అయాక పరలోకామ్దుబా తోహె అనాద్. యా లోకమ్దు నీను ఇనిక కుత్తిద్, అయాక పరలోకామ్దుబా కుతె ఆనాద్”, ఇజి వెహూన్. 20 వెనుక యేసు, వాండ్రు క్రిస్తు ఆతికాన్ ఇజి ఎయెరిజ్బా మీరు వెహ్పెజ్ అవిద్ ఇజి వన్ని సిసూరిజ్ కసితం వెహూన్.

* 16:16 16:16 క్రిస్తు ఇని మాటదిజ్ అర్తం దేవుణు ఏర్పాటు కిత్తి పోక్తికాన్ † 16:19 16:19 పరలోకమ్ది తాలం కిక్కు ఇజి తెలుగుదు రాస్త మనాద్.

21 అయి వెలెహాన్ అసి యేసు, నాను యెరూసలేమ్దు సొండ్రెజ్ వెలె, మరి అబె పెదెలుజ, పెరి పుజెరిజుని యూదురి రూలుజ్ నెస్సెన్సి వరి కిదాన్ నండో ఇమ్సెజ్ ఓరిస్సాలె, లోకుర్ నజీ సప్పారె సాతి మూండ్రె రోజుదు దేవుణు నజీ మరి మరజి నిక్కినాలె ఇజ నండో సజతిజ్ వన్ని సినూరు వెట వెస్సి మహాన్. 22 పేతురు యేసుజ్ ఉండ్రె పడఃకాదు కూక్త ఒతండ్రె, “ప్రబువా, నిజి యా లెకెండ్రె జర్గిదెజ్ ఆవెద్”, ఇజ గటిజ వెహైజ్ మొదోల్స్తాన్. 23 అహిజ, వాండ్రు పేతురు దరిజ్ మరజి బేసి, “ఓ సయ్తానా! నీను నజీ ఉండ్రె అడ్డు లెకెండ్రె మని. నీ మున్నుదు మని సజతిజ్ దేవుణుబాణిజ్ వాతిక ఆవెద్, లోకుర్ ఒడఃబినికెజ్”, ఇజ వెహైన్.

24 నస్తివలె యేసు వన్ని సినూరిజ్ సుడఃజి, “ఎయెన్బా నా వెనుక వాదెజ్ ఇహిజ, వాండ్రు వన్ని సొంత ఆసెజ్ విజు డిఃని సీజి వన్నిజ్ వాజిని కస్టంకు విజు ఓరిస్సెజ్ తయారాజి పిండఃజి నా వెట సాదెజ్బా తయారాజి నా వెనుక వాదెజ్లె. 25 ఎయెన్బా వన్ని పాణంవిదిజ్ వాండ్రె కాపాడఃదెజ్ ఇజ సుడఃజిజి వన్నిజ్ ఎలాకాలం మంజిని బత్కు మన్విద్. నా వందిజ్ ఎయెరిజ్బా వన్ని పాణం నస్టం ఆతిజ, వాండ్రు ఎలాకాలం మంజిని బత్కుదు సొనాన్లె. 26 ఎయెన్బా వాండ్రు కొరిజినిక్యెజ్ దోహ్కేన్ యా లోకమ్ది ఆస్తిని సర్ద విజు దోహ్కేన్ వెనుక దేవుణువెట ఎలాకాలం మంజిని బత్కుదు సొన్విండ మహిజ ఇని లబం మనాద్? దేవుణువెట ఎలాకాలం మంజిని బత్కుదిజ్ బదులు మరి ఇనిక సీదెజ్ అట్నాన్? 27 లోకు మరిసి ఆతి నాను, నా బుబ్బాతి దేవుణు గొప్పు జాయ్దాన్, వన్ని విజు దూతరిజ్ తోడః అసి రాజు లెకెండ్రె వానాలె. వెనుక ఒరెన్ వన్నిజ్ వన్ని పణిదిజ్ తగితి లెకెండ్రె పలం సీనాలె. 28 లోకుమరిసి ఆతి నాను రాజు లెకెండ్రె ఏలుబడిః కినిక నూణిదాక, ఏలు నిహిమన్ని వరిలో ఇ సెగెండ్రె సావీర్ ఇజ నాను మిజి నిజం వెహైన్”, ఇజ వెహైన్.

17

యేసు, మోసెని ఏలియ

1 అరు రొస్కు వెనుక యేసు, పేతురుని యాకోబు, యాకోబు తంబెరిసి ఆతి యోహానుజ్బా కూక్తాండ్రె వన్నివెట ఒతాన్. వారు నండో ఎత్తుమని ఉండ్రె గొరోన్ ముస్కు, ఎక్త సాహార్. 2 అబ్బె వరి ముండాల వన్ని రూపు మారితాద్. వన్ని మొకొం పొద్దు లెకెండ్రె ఆతాద్. వన్ని సాకెజ్ మెర్సిని జాయ్లెకెండ్రె తెలాజ్ ఆతె. 3 ఇదిలో, నస్తివలె అబ్బె మోసెని ఏలియ యేసు వెట వర్గిజ మంజినిక వరిజ్ తోర్ ఆతాద్. 4 నస్తివలె పేతురు, “ప్రబువా, మాటు ఇబ్బె మహిజ నెగెద్. నిజి ఇస్టం ఇహిజ, ఇబ్బె నిజి ఉండ్రె, మోసెజ్ ఉండ్రె, ఏలియెజ్ ఉండ్రె, అహి మూండ్రె గుడుసెజ్ తోహ్నా”, ఇజ వెహైన్. 5 వాండ్రు వర్గిజ మహివలె నండో జాయ్మని ఉండ్రె మొసాప్ వరిజ్ వ్డెగ్తాద్. “ఇదిలోన్ వీండ్రు నజి ఇస్టమాతి నా మరిన్. విన్ని ముస్కు, నాను సర్ద ఆత మన్ను. విన్ని మాటెజ్ నెగెండ్రె వెండ్రు”, ఇజ ఉండ్రె జాటు అయ మొసోపుదాన్ వాతాద్.

6 సినూర్ యా మాట విహార నండో తియెల్ ఆజి పడఃగ్లి అర్దార్. 7 యేసు వరి డర్దు వాజి వరిజ్ ముట్టి, “నిజ్దు, తియెల్ ఆమాట్”, ఇజ వెహైన్. 8 వారు కణ్ణు పెర్డి బేస్తిజ్ యేసుజ్ తప్ప మరి ఎయెరిజ్బా తోవితార్. 9 వారు గొరోన్ డిగ్జి వాజి మహివలె, “లోకు మరిసి ఆతి నాను, సాతి వరిబాణిజ్ మరజి నిజినిదాక, మిజి తోర్ ఆతి యా సజతిజ్ వందిజ్ ఎయెరిజ్బా వెహైట్”, ఇజ యేసు వరిజ్ వెహైన్.

10 నస్తివలె వన్ని సినూర్, “ఏలియ* ముజాల వాదెజ్ ఇజి ఎందనిజ్ యూదురి రూలుజ్ నెస్సెన్సికార్ వెహైనార్?”, ఇజి వన్నిజ్ వెన్బాతార్. 11 అందెజె వాండ్రు, ఏలియానె ముజాల వాజి మండ్రెజ్, యాక నిజమె. వాండ్రు వాజి విజు నెగెణ్ తయార్ కినాన్. 12 అహిజ ఏలియ ముజాల వాత మహాన్, గాని వారు వన్నిజ్ గుర్దు అస్తిజ్ అటేవండ వరిజ్ ఇస్టమాతి లెకెండ్రె వన్నిజ్ పడిఃఎండ్రె కితార్. లోకుమరిసి ఆతి నానుబా అయాలెకెండ్రె వరి కిదాన్ స్తమెజ్ ఓరిస్సాలె”, ఇజి వరిజ్ వెహైన్. 13 బాప్తిసం సీని యోహాను వందిజ్ వాండ్రు వరివెట వర్గిజనాన్ ఇజి వారు అర్దం కితార్.

దెయం అస్తి కొడఃదిజ్ నెగెణ్ కిజనాన్

* 17:10 17:10 పాడయి ఒప్పమానమ్దు మన్ని మలాకి ప్రవక్త పుస్తకమ్దు రస్తిమన్నిలెకెండ్రె ఇహిజ, ఏలియ ముజాల వాదెజ్ ఇజి యూదురు నమ్మిజనార్. మలాకి 3:1, 4:5-6.

14 వారు మంద లోకుర్డగ్రు వాతివలె ఒరెన్ వన్ని డగ్రు వాజి వన్ని ముందాల ముణ్కు ఊరిజి, 15 “ప్రబువా నా మరిన్ మున్కు నీ కనికారం తోరిన్ అ వాండ్రు మూర్పు వెహ్రిజ్ నండ్ బాద ఆజినాన్. వాండ్రు ఎనెజ్ ఎనెజ్ సినుద్ సిలిజ ఏరుదు అర్పి మంజినాన్. 16 నాను నీ సినుర్ డగ్రు వన్నిజ్ తత్త గాని వారు వన్నిజ్ నెగెండ్ కిదెజ్ అట్ అతార్”, ఇజి వెహ్రిజ్.

17 అందెజె యేసు, “యా తరమ్ దికిదెర్ ఆతి మీరు మహికార్ మిజి నెస్సిన్సి తప్ప సరిదాన్ నడిసి మన్నదెర్. మీరు నామున్కు నమకం సిల్లికిదెర్. నాను ఎస్సా కాలమ్ కు డాక నాను మిజి ఒరిసి మండ్రెజ్ వలె వన్నిజ్ నా డగ్రు తగాట్”, ఇజి వెహ్రిజ్. 18 నస్తివలె యేసు అయ దెయమ్ దిజ్ ఉండ్రీ అడ్ర సితిజ్ అక్క వన్నిజ్ డి:స్తతాద్. అయ గడి:యాదునె ఆ ఇజిరికాన్ నెగెండ్ ఆతాన్.

19 దని వెనుక వన్ని సినుర్ వాండ్రు ఒరెండ్ మహివలె యేసు డగ్రు వాతారె, “మాపు ఎందనిజ్ అయ దెయమ్ దిజ్ సాన్ పిన్సిజ్ అట్ అతాప్?”, ఇజి వెనెబాతారె. 20-21 ఉండ్రీ సర్పుగిడ నస్సు నమకం మహిజ యా గొరొన్ దిజ్ సుడే:జి, “ఇబ్బెణిజ్ అబ్బె సాన్ అ’ ఇజి వెహ్రిజ్ అది అబ్బె సానాద్. మీరు కిదెజ్ అట్ ఇక ఇనికబా మన్ ఏద్, ఇజి నాను మిజి నిజం వెహ్రిజ్”, ఇజి వెహ్రిజ్. మిజి నస్సా నమకం సిల్లెద్, అందెజె మీరు కిదెజ్ అట్ ఇదెర్.

22 వారు గలీలయ దేసమ్ దు వాతివలె యేసు, “లోకు మరిసి ఆతి నాను లోకుర్ కియుదు ఒవజెపె ఆనాలె. 23 వారు నజి సప్పారె, మరి మూండ్రీ దినమ్ దు నాను మరజి నిజె ఆనాలె”, ఇజి వరిజ్ వెహ్రిజ్ వారు నండ్ దుకం ఆతారె.

24 యేసుని వన్ని సినుర్ కపెర్నూముదు వాతివలె, నెగం నెకలో లెక్క పన్ను పెర్నికార్ పేతురు, డగ్రు వాతారె, “మిజి బోద్ కినికాన్ దేవుణు గుడిది పన్ను సిఎండ్రా?”, ఇజి వెనెబాతారె. 25 “ఒఒ వాండ్రు సీనాన్”, ఇజి వాండ్రు వెహ్రిజ్. పేతురు ఇండ్రో వాతిజ్, వాండ్రు వర్గిఎండ ముజాల యేసు వర్గితాన్. “సీమోసు, యా లోకమ్ ది రాజుర్ ఎయెర్ బాణిజ్ సిస్సుని పన్నుజ్ ఒనూలు కిజినార్ వరి సాంత దేసమ్ ది వరిబాణిజ్ నా, సిల్లిజ అయ దేసమ్ దు మన్ని ఆఇ దేసమ్ దివరి బాణిజ్ నా? నీను ఇనిక ఒడేబిజిని?”, ఇజి వన్నిజ్ వెనెబాతాన్. 26 “వారు ఏద్దెం కిజి గెల్లిస్తి దేసమ్ దివరిబాణిజ్”, ఇజి పేతురు వెహ్రిజ్. యేసు వన్నిజ్, “అహిజ సాంత దేసమ్ దికార్ సిఎండ్ర తప్పె ఆజినారె. 27 మాటు వరిజ్ అడ్డు మంజిని వరిజ్ లెకెండ్ మండ్రెజ్ ఆఎద్. నీను సేరుదు సాన్పి గాలం పొక్కి ముందాల దోహ్కాని మొయదిజ్ అసి దని వేయు రెక్కి సుడే:తిజ, ఉండ్రీ సెకెల్ కాను దని వెయ్ దు మంజినాద్. అయాక లాగ్గి నీ వందిజ్ ని నా వందిజ్ పన్ను సీఅ”, ఇజి వెహ్రిజ్.

18

దేవును కిని ఏలుబడి:దు పెరికాన్

1 నస్తివలె సినుర్ యేసు డగ్రు వాజి, “దేవుణు కిని ఏలుబడి: కినివలె మాలో ఇ ఎయెన్ అబ్బె పెరికాన్ మంజినాన్?”, ఇజి వన్నిజ్ వెనెబాతారె. 2 వాండ్రు ఒరెన్ ఇజిరి కొడో:దిజ్ కూక్కి వరి నడిమి నిల్ హ్రిజ్. 3 మరి వాండ్రు ఈహు వెహ్రిజ్, “మీరు ఇజిరి కొడో:ర్ లెకెండ్ మన్ను మరిసి, వరి లెకెండ్ ఆఎండ మహిజ, మీరు ఎనెజ్ బా దేవుణు కిని ఏలుబడి:దు సాండ్రెజ్ అట్ ఇదెర్, ఇజి నాను మిజి నిజం వెహ్రిజ్. 4 అందెజె యా ఇజిరి కొడో: లెకెండ్ తగ ఆనికాన్ ఎయెండ్రో, వాండ్రె దేవుణు కిని ఏలుబడి:దు పెరికాన్ ఆనాన్.

5 మరి ఎయెర్ బా నా మున్కు మన్ని నమ్మకమ్ దు యా ఇజిరి కొడో:ర్ లెకెండ్ ఆతికాన్ ఇజి ఒడేబి:నాండ్రో ననివన్నిజ్ డగ్రు కినికాన్, నజి డగ్రు కిజినాన్. 6 గాని, నా మున్కు నమకం ఇట్టి మని యా కొడో: నస్సి ఒరెన్ వన్నిజ్, ఎయెర్ బా పాపం కిబిస్తిజ, వాండ్రు వన్ని మెడదు ఉండ్రీ పెరి జత్తపణకు తోహా ఆజి సమ్ దరం అడ్డి ముడు:గిజి సానిక వన్నిజ్ ఒద్దె నెగెద్.

7 ఎందానిజ్ ఇహిజ, లోకురిజ్ పాపం కిబిస్తి సజతిజ వందిజ్ యా లోకమ్ ది వరిజ్ న్రమెజ్ తప్ ఉ. యాకెజ్ తప్ ఎండ వాదెజ్ వెలె. గాని యాకెజ్ ఎయెన్ వెట వానెనో వన్నిజ్ వెహ్రిజ్ అట్ ఇ నని కస్సుమ్ కు మంజినె. 8 నీ కియుబా, నీ కాల్యుబా నిజి పాపం కిబిస్తిజ, దనిజ్ కత్త్రి విసీర్ అ. రుండి కికు కాల్యు.

† 17:24 17:24 యెరు నల్లెమ్ దు మన్ని దేవుణు గుడిదిజ్ అవనరమ్ మాతికెజ్ కిజి నెగెండ్ సుడి:దిజ్ ఒరెనొరెన్ వన్నిబాణిజ్, నెగం నెకెల్ పన్నులెకెండ్ పెరిజ మహర్. యూదురు అతి మొగవారు 20 వయ్యు డాట్టి మహికార్ విజెరె గుడి: పన్ను సీదెజ్ ఇజి దేవుణు మాటదు రాప్త మనాద్. అక్క రుండి రొస్సు కూలిదిజ్ సమానం మహాద్. నిర్గమ 30:13-16. 2దిసన 24:9-14, నెహ్ మ్య 10:32.

మంజి ఎలాకాలం మంజిని సినుబాడిడు అర్ని దనిజ్ ఇంక, కికు కాల్కు సిల్లెండ ఆజి ఎలాకాలం దేవుణు వెట మంజిని బత్తుడు సొనిక నెగెద్. 9 మరి నీ కణక నిజి పాపం కిబిస్తజి దనిజ్ లాగ్ జి విసీర్ అ. రుండి కణ్కు మంజి ఎలాకాలం మంజిని సినుబాడిడు అర్ని దనిజ్ ఇంక, ఉండ్రె కణక మంజి ఎలాకాలం దేవుణు వెట మంజిని బత్తుడు సొనిక నెగెద్.

10 యా ఇజిరి వరి లొఇ ఎయెరిజ్ బా మీరు ఇజిరి కణక సుడ్డోమాట్. ఎందానిజ్ ఇహిజ పరలోకామదు నా బుబ్బు డగ్రు మంజిని దూతార్ ఎస్తివలెబా వరిజ్ సుడ్డోజి మంజినార్.

మరుతి గొరై కత.

11 గొరైజ్ లెకెండ మురుతి సొహి లోకురిజ్ రెబాజి రక్సిస్తజ్ ఇజినె లోకుమరిసి* ఆతి నాను ఇబ్బె వాత మన్ను. 12 ఒరెన్ వన్నిజ్ వంద గొరైజ్ మంజి వన్నాజ్ లొఇ ఉండ్రె మురుతిజి, మహి తొబయ్ తొమ్మిది గొరైజి డిసి, మురుతి గొరైజి రెబాజి సొన్ ఎండ్రా? మీరు ఇనిక ఒడ్డోబిజినిదెర్? 13 దనిజ్ దొమ్మోతిజి, వన్ని మురువండ మని తొబయ్ తొమ్మిది గొరైజి మున్ను యా మురుతి ఉండ్రె గొరై వందిజ్ వాండ్రు గొప్ప సర్గ్ ఆనాన్, ఇజి నాను మిజి నిజం వెప్పిన. 14 అయలెకెండెన్ యా ఇజిరి వరిలోఇ ఒరెన్ బా పాడాజి సాండ్రెజ్ దేవుణు మంజిని బాడిడు మని మీ బుబాతి దేవుణుదిజ్ ఇస్టం సిల్లెద్.

15 మరి నీ తంబెరిజ్ లొఇ ఒరెన్ నిజి తప్ప పణిజ్ కతిజి, మరి ఎయెర్ బా నెన్ ఏండ వాండ్రుని నీను మనివెలె వాండ్రు కితి తప్ప పణిజ్ తొరెన్ అ. వాండ్రు నీ మాట వెహిజి నీను వన్నిజ్ మరజి నీ వెట కూడ్డోజి మంజిని వన్నిలెకెండ కిత్తి. 16 గాని వాండ్రు నీ మాట వినేండ మహిజ, ఒరెన్ వన్నిజ్ నో, రివిరిజ్ నో నీ వెట తొడు; అసి వన్ని డగ్రు సాన్ అ. అహిజ దేవుణు మాటదు మని లెకెండ రిఎర్ మువీర్ ది సాసిరి మాటజెవెట విజు సజతిజ్ నిజమాతికెజ్ ఇజి రుజువ్ కిడెజ్ వలె. 17 వాండ్రు వరి మాటబా వినేండ మహిజ, అయ సజతి దేవుణు సజమదిజ్ తెలియ కిల. సజమది వరి మాటబా వాండ్రు వినేండ మహిజ వన్నిజ్ ఆఇ వన్ని ననికాన్, సిల్లిజి పన్ను పెర్సికాన్⁵ ఇజి సుడ్డోఅ. 18 యా బూమి మున్ను మీరు ఇనిక తొమ్మిదెరో, అయాకెజ్ దేవుణు మంజిని బాడ్డిదుబా తొహె ఆనెలె. మరి యా బూమి మున్ను మీరు ఇనిక కుత్తిదెరో, అయాకెజ్ పరలోకామ్మ దేవుణుబా అడ్డు కిసాలె. మరి యా బూమి మున్ను ఇనిదన్నిజ్ నెలవ సినిదెరో పరలోకామదాన్ దేవుణుబా దన్నిజ్ నెలవ సిసాలె ఇజి నాను మిజి నిజం వెప్పిన. 19 మరి ఎయెర్ బా రిఎర్ కూడ్డోజి, ఉండ్రె మన్ను కల్లిజి ఇనికబా లొస్తిజ్ బా, పరలోకామదు మన్ని నా బుబ్బుతి దేవుణు, మీరు కోరిజిని లెకెండ మీ వందిజ్ కిసాన్ అ. 20 అహిజ ఎంబె రివిరెనో, మువీరెనో నా పేరుదాన్ కూడ్డోజి వాజి మహిజ, అబ్బె వరివెట నాను మంజినలె.”

కనికారం తొరినెఇ పణిమనిసి

21 నస్తివలె పెతురు యేసు డగ్రు వాతండ్రె, “నా తబేరి ఒరెన్ నా వెట తప్ప కితిజి నాను ఎసోడు సుట్టు. వన్నిజ్ సెమిస్తజ్? ఎడు; సుట్టు సెమిస్తజ్ ఆనాదా?”, ఇజి వెన్ బాతాన్. 22 యేసు వన్నిజ్, “ఏడు సుట్టు. అవద్. డబయ్, సుట్టు ఏడు* ఇజి నాను నిజి వెప్పిన”, ఇజి వెప్తాన్. 23 ఎందానిజ్ ఇహిజ దేవుణు ఎలుబడి; కినిక ఇహిజ, వన్ని పణిమస్సిర్ వెట వారు వన్ని బాణిజ్ లొస్తిమన్ని అప్పదిజ్ లెక్క సూణి ఒరెన్ రాజుజ్ పొలిత మనాద్. 24 లెక్క సుడ్డోదెజ్ మొదోల్స్తి వలె, పది వెయ్యుజ్ తాలందుజ్¹ అప్ప లొస్తిక మరజి సీదెజ్ మన్ని ఒరెన్ వన్నిజ్, వన్ని డగ్రు తత్తార్. 25 వన్నిజ్ అప్ప తీరిస్తజ్ అట్ ఇతిజ్, వన్నిజ్ ని వన్ని అల్లిజ్, కొడోరిజ్, మరి వన్నిజ్ కల్లితి మనికెజ్ విజు పొర్ని అప్ప తీరిన్ అ ఇజి యాజుమాని ఆడ్ర సిత్తాన్. 26 అయ పణిమణిసి వన్ని ఎద్దు ముణుకుజ్ ఊరిజి మాడిస్తాండ్రె, “సజి సెమిన్ అ సజి మరి కండెక్ సమయం సిదా నాను అప్ప విజు మరజి సీన్” ఇజి

* 18:11 18:11 లోకుమరిసి ఇని మాట అరామియ బాసదాన్, “నాను” సిల్లిజి “సజి, నాది”, ఇజి అర్థమానిలెకెండ యూదురు వెప్పి మహో. యేసుప్రబుబా వన్ని వందిజ్ వెహెజ్ యాలెకెండ వెప్పి మహాన్. యాలెకెండ వెప్పి మహివలె నానె క్రీస్తు ఇజి వాండ్రు తినాజ్ వెహిఎండ వన్ని వందిజ్ వెప్పి మహాన్. దానియేలు ప్రవక్త పుస్తకమదు రాస్తి మన్ని దన్నిజ్ తగితిలెకెండ, వాండ్రు యా పేరు వన్ని వందిజ్ వెప్పి మహాన్. దానియేలు 7:13-14. యేసుజ్ వగాతికార్ వాండ్రు మాముల్ గ వన్ని వందిజ్ అహె వెప్పినాన్ ఇజి ఒడ్డోబిత్తార్. గాని వన్నిజ్ నమ్మిత్తికార్ వాండ్రు క్రీస్తు ఇజి వెప్పి మహాన్ ఇజి అర్థం కిత్తార్. † 18:11 18:11 గ్రీక్కు బానాదు రాస్తిమన్ని ముకెలమాతి పుస్తకమకాజ్ యా మాట మన్నె గాని నెగం పుస్తకమకాజ్ సిల్లెద్ ‡ 18:16 18:16 ద్వితి కాండం 19:15 § 18:17 18:17 యూదురు ఆతికార్ ఇనిదన్ని వందిజ్ బా వన్ను పెర్సివరివెట కూడిజి మనీవర్ * 18:22 18:22 నాల్లి వంద తొబయ్ సుట్టు ఇహిజ ఎస్తివలెబా సెమిసి మండ్రెజ్ ఇజి అర్థం. † 18:24 18:24 ఉండ్రె వెయి తాలందు ఇహిజ వెయి లక్క రూపావేదిజ్ లావ్ మన్నె

బతిమాల్తాన్. 27 అయి ఎజుమాని పణిమనిసి మున్ను కనికారం ఆజి, నీ అప్పు విజు తెవితాద్ ఇజి వన్నిజ్ సొండ్రెజ్ సెలవ సిత్తాన్. 28 గాని అయి పణిమనిసి వెల్లి వాజి సొన్ని మహివలె, వన్నిజ్ వంద దినారమ్కు[†] అప్పు మని, వన్నివెట కూడజి పణికిజిని ఒరెన్ వన్నిజ్ సుడజతాన్. వన్నిజ్ అస్తాండ్రె గొతిక పడిసి, “నీను నజి అప్పు మన్ని డబ్బు మర్జి సిదా”, ఇజి బలవంతం కిత్తాన్. 29 వన్నివెట కూడజి పణికినికాన్ అతి అయి పణిమనిసి వన్ని ఎద్దు ముణుకుజ్ ఊర్జి, “నజి సెమిన్ అ, నిజి మరి కండెక్ నమయం సిదా? నిజి సిదెజ్ మన్ని అప్పు విజు నాను మర్జి సీన్”, ఇజి బతిమాల్తాన్. 30 గాని వాండ్రు అక ఒప్పుకొడెవండ, అప్పు విజు మర్జి సీనిదాక వన్నిజ్ జెలుదు ఇడిస్తాన్. 31 వరివెట కూడజి పణికినికార్ సెగొండార్, యా జర్గొతిక విజు సుడజతాం నండో బాద ఆతార్. వారు సొన్ని జర్గొతిక విజు ఎజుమానిజ్ వెహార్. 32-33 నస్తివలె అయి ఎజుమాని వన్నిజ్ కూకెపిస్తాండ్రె, “మురకం మని పణిమనిసి, నీను నజి బతిమాల్తాజ్ నాను కనికారం ఆజి నిజి సెమిన్, నీ అప్పు విజు తెవితాద్ ఇజి నిజి వెష్టిలెకొండ నీ వెట కూడజి పణి కిని వన్నిజ్ నీనుబా సెమిసి వన్ని మున్ను కనికారం తోరిస్తాజ్ గదె?”, ఇజి వెన్బాతాన్. 34 నస్తివలె అయి ఎజుమాని వన్ని మున్ను కోవం ఆతాండ్రె వాండ్రు అప్పు విజు మర్జి సీనిదాక వన్నిజ్ హిమ్స కినివరిజ్ ఒపజెప్తాండ్రె జెలిదు ఇడిస్తాన్.

35 మీరు మీ మున్నుదాన్ మీ తంబెరిజవెట సెమిన్ ఏండ మహిజ వరలోకామ్దు మన్ని నా బుబ్బాత్తి దేవుణుబా యా లెకొండెన్ మీ లోఇ ఒరెన్ వెట కినాన్.

19

అల్సిజ్ డిసిన్సి సీని వందిజ్

1 యా మాటెజ్ వెష్టి విజితి వెనుక యేసు గలిలయ డిసి, యోర్దాన్ గడ్డ అతాహ పడక మని యూదయ నాహ్లాజ్ సొహాన్. 2 మంద లోకుర్ వన్ని వెనుక సొహార్. వాండ్రు అబ్బె వరి జబ్బుది వరిజ్ నెగొండ కిత్తాన్. 3 సెగొండార్ పరిసయరు, వన్ని మాటెజాణిజ్ వన్నిజ్ తప్పు అస్తాజ్ ఇజి వన్ని డగ్రు వాతార్, “ఇని తప్పుబా తోవిండ ఒరెన్ వన్ని ఆల్పిజ్ డిసి సీనిక దేవుణు మోసాజ్ సిత్తి రూలుజ్ వజ నాయమ్నా?”, ఇజి వెన్బాతాన్. 4 వాండ్రు వరిజ్, “ముజాహాన్ దేవుణు లోకురిజ్ తయార్ కితివలె వరిజ్ మొగ్గ కొడెని బోదెలి లెకొండె తయార్ కిత్తాన్[‡]. 5 అందెజి మొగ్గ కొడెని వన్ని అయేసి అప్పొసిరిజ్ డిసి వన్ని అల్పి వెట కూడజినాన్. వారు రివిర్ ఉండ్రె ఒడెల్ ఆనార్.^{*} 6 అందెజి అబ్బెణిజ్ అసి వారు రివిర్ ఆవండ ఉండ్రె ఒడెల్ ఆన మంజినార్. అందెజి దేవుణు జత కడుఃప్తి వరిజ్ లోకుర్ కేట కిదెజ్ అవిద్ ఇజి దేవుణు మాటదు రాస్తి మన్నిక మీరు ఎనెజ్బా సద్విఇతిదెరా?”, ఇజి వరిజ్ వెన్బాతాన్. 7 వారు వన్నిజ్, అక్క అయాలెకొండె మహిజ, ఒరెన్ వన్ని అల్పిజ్ డిసిన్సి ఇహిజ, ఉండ్రె విడ్డి; ఆకు రాసి సీజి దనిజ్ డిసిన్సి ఆనాద్ ఇజి మోసె ఎందనిజ్ ఆడ్ర సిత్తాన్?”, ఇజి వెన్బాతాన్. 8 యేసు వరిజ్, “మిజి నస్సా కటిన్మతి మున్ను మహిజ్, మోసె అయి లెకొండె సెలవ సిత్తాన్ గాని ముజాహాన్ అసి అయి లెకొండె జర్గొవితాద్. 9 రంకు బూలాతిజాన్ తప్పు మరి ఇనిదని వందిజ్బా ఒరెన్ వన్ని అల్పిజ్ డిసి మరి ఉండ్రె దనిజ్ ఇడె ఆతిజి వాండ్రు దనివెట రంకు బూలానికాన్ ఆజినాన్ ఇజి నాను మిజి వెప్సాన్”, ఇజి వెహార్. 10 వన్ని సిసూర్ వన్నిజ్, “అల్పి మాసిర్ నడిమి సజతిజ్ యాలెకొండె మనాద్ ఇహిజ, పెండ్లి ఆవండ మంజినికాడె నెగెద్”, ఇజి వన్నిజ్ వెహార్. 11 యేసు వరిజ్, “మీరు వెష్టి మాట విజెరి అస్తాజ్ అట్విర్, గాని దేవుణు ఎయెరిజ్ అయి లెకొండె సితాండ్రె వారి కిదెజ్ అట్నార్. 12 సెగొండార్ ఆండెరెజ్^{*} లెకొండెనె అయేసి పొటాదాన్ పుట్నార్. సెగొండారిజ్ లోకుర్ ఆండెరెజ్ లెకొండె కిజినార్. మరి సెగొండార్ దేవుణు ఏలుబడి; వందిజ్ పెండ్లి ఆవండ వరిజ్ వారి ఆండెరెజ్ ఆజి మంజినార్. 13 నస్తివలె యేసు కికు ఇడ్డి పార్లనం కదెజ్ ఇజి సెగొండార్ ఇజిరి కొడెరిజ్ వన్ని డగ్రు తత్తార్. వన్ని సిసూర్ కొడెరిజ్ తత్తి వరిజ్ జటిజ్ ఆజి గోల కిత్తార్. 14 గాని యేసు, “యా ఇజిరి కొడెరిజ్ నా డగ్రు రప్పిర్, వరిజ్ అడ్డు కిమాట్. దేవుణు ఏలుబడి; కినిక నినివరిదెన్”, ఇజి వరిజ్ వెహార్. 15 వరి మున్ను కికు ఇడ్డి పార్లనం కితి వెనుక వాండ్రు అబ్బెణిజ్ సొహాన్.

† 18:28 18:28 వంద దినారమ్కు ఇహిజ అయి కాలమ్దు పది రొస్సా పణికిని కూలిదెజ్ నమానం మహాద్. * 19:4 19:4 ఆది 1:27. * 19:5 19:5 ఆది 2:24. * 19:12 19:12 అండెర ఇహిజ వాండ్రు కొడెని ఇడ్డిజ్ అట్ఇకాన్.

ఆస్తి మని దజడాఁయెన్.

16 ఇదిలో, ఒరెన్యేను డగ్రు వాతండ్రి, “ఓ బోదకినికి, దేవుణు వెట ఎలాకాలం మంజిని బత్తుదు నాను మండ్రేక్ ఇహిజ నాను ఇని నెగ్గి పణిజ్కెదెక్”, ఇజ వన్నిజ్ వెన్బాతాన్. 17 యేను వన్నిజ్, “నెగ్గి పణిజ వందిజ్ ఎందనిజ్ నీను సజి వెన్బాజిని? నెగ్గికాన్ దేవుణు ఒరెండ్రె మనాన్. దేవుణు ఎలాకాలం మంజిని బత్తుదు నీను మండ్రేక్ ఇహిజ, దేవుణు సితి ఆండ్రేక్ లోజీజి మన్అ”, ఇజ వెప్తాన్. 18 వాండ్రు, “ఇని ఆండ్రేక్?”, ఇజ వన్నిజ్ వెన్బాతిజ్ యేను వన్నిజ్, “సప్తేజ్ ఆఎద్, రంకు బూలాదెజ్ ఆఎద్, డొజ కిమా, అబద్దమందిజ్ సాస్యం వెప్తా. 19 అయేసి అప్పాసిరిజ్ గవరమ్దాన్ నెగెణ్ సుడొఁ. * మరి నీను నిజి ప్రేమిసినిలెకెండ్రె మహివరిజ్ ప్రేమిన్అ” †, ఇజ వెప్తాన్. 20 అందెజె అయ దజడాఁయెన్, “యాకెజ్ విజు నాను కిజిని మంజిన. మరి ఇనిక నజీ తకు మనాద్?”, ఇజ వెప్తాన్. 21 యేను వన్నిజ్, “నీను పూర్తి నెగ్గికి ఆదెజ్ కోరితిజ, నీను సొన్ని నిజి కల్లితి మనికెజ్ విజు పొర్తి, బీదాతివరిజ్ సీబాజి సిఅ. ఆహె కితిజ పరలోకామ్దు నిజి ఆస్తి కల్లిజి మంజినాద్. వెనుక నావెట రఅ”, ఇజ వెప్తాన్. 22 అయ దజడాఁయెన్ నండ్రె ఆస్తి కల్లిజి మనికాన్ కాక అయ మాట విహండ్రె ఇజిరి మొకొరి అతాండ్రె సొహాన్. 23 నస్తవలె వన్నిసిసూరజ సుడొజి, యేను”, ఆస్తి మన్నికాన్ దేవుణు కిని ఏలు బడిడు సొండ్రేక్ గొప్ప కష్టం ఇజ నాను మిజి నిజం వెప్పాన్. 24 మరి నాను మిజి వెప్పాక ఇనిక ఇహిజ, ఆస్తి మనికాన్ దేవుణు ఏలుబడిడు సొని దనిజ్ ఇంక, ఒంట దొహం బొరొదాన్ డుఁగినిక నులు అనాద్”, ఇజ వెప్తాన్. 25 సిసూర్ యా మాట విహరి నండ్రె బమ్మ అతారె, “దేవుణు రక్కిన్తి లెకెండ్రె ఎయెన్ మండ్రేక్ అల్నార?”, ఇజ వెప్తాన్. 26 యేను వరిజ్ సుడొజి, “యాక లోకాజ్ అల్నకాదె, గాని దేవుణు విజు కిదెజ్ అట్వాన్”, ఇజ వెప్తాన్. 27 పేతురు వన్నిజ్ సుడొజి, “ఇదిలో మాపు విజు డిఁస్తాపె నీ వెట వాజినామ్, మజి ఇనిక దొహ్కాద్లు?”, ఇజ వెన్బాతాన్. 28 యేను వరిజ్, “యా లోకం మరి కొత్తాక ఇనివెలె లోకు మరిసి ఆతి నాను గొప్ప జాయ్మని గొప్ప సింహాసనమ్దు బసి ఇస్తాయేలుది పన్నెండు తెగ్గాతివరిజ్ తీరిపు తీరిస్సివెలె, నా వెనుక వాతి మీరుబా, నావెట పన్నెండు గొప్ప సింహాసనమ్కాజ్ బసి వరిజ్ తీరిపు కినిదెరలె. 29 మరి ఎయెరబా నా వందిజ్ వరి ఇల్లుజొల్లు, అన్నతంబెరిజబ, బీబి తజిసికజ్బా, అయేసి అప్పాసిరిజ్బా, బూమిపుట, కొడొకొక్కరిజ్బా డిఁసి సితిజ నినివరిజ్ యాకెజ్ వంద వందుజ్ దొహ్కా. దన్నివెట ఎలాకాలం మంజినిబత్తుబా దొహ్కాద్. 30 గాని మొదొహికార్ ఇజి ఒడొజిని నండ్రెండ్రె కడెవెరదికార్ ఆనార్. కడెవెరదికార్ ఇజి ఒడొజిని నండ్రెండ్రె మొదొహికార్ ఆనార్లె.

20

ద్రాసటోటాదు పణికినికార్

1 “దేవుణు ఏలుబడిఁ కినిక ఇహిజ, వన్ని ద్రాసటోటాదు పణికిదెజ్ పణికిని వరిజ్ కూకెజ్ పెందాల నిజ్జి వెల్లి సొన్ని మహి ఉండ్రె టోట యెజమానిజ్ పోలిత మనాద్. 2 ఉండ్రె రోజు పణిదిజ్ ఉండ్రె దినారం * కూలి సీన ఇజి ఒప్పకొటండ్రె, వన్ని ద్రాక్స టోటాదు పణి కిదెజ్ వరిజ్ పొక్తాన్. 3 వెనుక అంబెలి వేలాదు వాండ్రు వెల్లి సొహివలె సత్తాదు ఇని పణి సిల్లెండ్రె నిహిమని సెగొండ్రె సుడొజాన్. 4 వాండ్రు వరిజ్, “మీరుబా నా ద్రాక్స టోటాదు పణిదిజ్ సొండ్రు, మిజి సరియాని కూలి సీన”, ఇజ వెప్తాన్. 5 వారు సొహార్. మరి వాండ్రు పన్నెండు గంటజ, మూండ్రె గంటజబా ఆహె కితాన్. 6 మరి అయదు గంటజ సొహిజ్ మరి సెగొండ్రెకాలి నిహిమనివరిజ్ సుడొజాన్. వాండ్రు వరిజ్, “యా దినం విజు ఎందనిజ్ మీరు ఇబ్బె సెడ్డిఁని నిహిమాహెదెర?”, ఇజ వెన్బాతాన్. 7 వారు వన్నిజ్, “ఎయెరబా ఇని పణిదిజ్బా మజి కూక్వెతార్, అందెజె”, ఇజ వెప్తాన్. వాండ్రు వరిజ్ “మీరుబా నా ద్రాస టోటాదు పణిదిజ్ సొండ్రు”, ఇజ వెప్తాన్. 8 పొదు ఆతివెలె అయ ద్రాస టోట ఎజమాని పణి నూణి వన్నిజ్ కూక్తాండ్రె, “పణికినివరిజ్ కూక్కి, కడెవేరి వాతివరిబాణిజ్ మొదొల్లి ముందాల వాతికార్ దాక వరిజ్ కూలి సీఅ”, ఇజ వెప్తాన్. 9 పొద్దు డిగ్గివలె పణిదిజ్ వాతివరిజ్ ఒరెన్ ఒరెన్ వన్నిజ్ ఉండ్రె దినారం కూలి దొహ్కాద్. 10 ముందాల వాతికార్ మజి లావ్ దొహ్కా, ఇజి ఒడొజిబితార్ గాని వరిజ్బా ప్రతి ఒరెన్ వన్నిజ్ ఉండ్రె దినారమ్నె కూలి దొహ్కాద్. 11 అయాక దొహ్కావెలె వారు టోట ఎజమానిజ్ ఎద్రు మొరొ ఆతారె.

* 19:19 19:19 నిర్జమ 20:12-16; ద్విత్తి 5:16-20. * 19:19 19:19 లేమి 19:18. * 20:2 20:2 అయ కాలమ్దు ఉండ్రె రోజు పణిదిజ్ కూలి ఉండ్రె దినారం ముహాద్.

12 వారు, “కడెవెరిదు వాతికార్ ఉండ్రీ గంటనె పణి కిత్తార్ గాని వెలార్ కన్నబడెజి విజు పణి కితిమని మజి ఎండనిజ్ నీను వరిజ్ సమానం కితి?”, ఇజి వెన్బాతార్. 13 వాండ్రు వరి లొఇ ఒరెన్ వన్నిజ్, “బయి, నాను మిజి ఇని అనెయం కివిత. ఉండ్రీ దినారమెదిజ్ పణి కిన్ ఇజి మీరు ఒప్పకొటిదెర్ గదె?. 14 మీ కూలె అసి మీరు సొండ్రు. మిజి సితి లెకెండ కడెవెరిదు వాతివన్నిజ్బా సీదెజ్ నజి ఇష్టం ఆతాద్. 15 నా డబుదాన్ నజి ఇష్టమాతి లెకెండ కిదెజ్ నజి అక్కు సెలదా? నాను వరిజ్ ఒదరిసి సితి వందిజ్ నీను గోస ఆజినిదెర్?”, ఇజి వెన్బాతాన్. 16 అయా లెకెండనె కడెవెరిదికార్ ఇజి ఒడెబిజినికార్ మొదొహికార్ ఆనార్, ముందొహికార్ ఇజి ఒడెబినికార్ కడెవెరిదికార్ ఆనార్.”

యేసు వన్ని సాపు వందిజ్ మరి వెప్పినాన్.

17 యేసు యెరూసలేమ్దు సొన్ని మహివలె, వాండ్రు వన్ని పన్నెండు మణిసిర్ సిసురిజ్ ఉండ్రీ పడెకాదు కూక్ ఒతాండ్రె వరిజ్ ఈహు వెప్తాన్. 18 ఇదిలో మాటు యెరూసలేమ్దు సొన్నినాట్. అబ్బె లోకుమరిసి ఆతి నాను పెరి పుజెరిజి, యూదురి రూలుజ్ నెస్సిన్ని వరిజ్ ఒపజెపె ఆనాలె. వారు నజి సాపుదిజ్ సిక్కు సీనార్లె. 19 మరి వారు నజి వెకన్సి, కొరడెబాణిజ్ డెయెజి, సిలువ పొక్కెజ్ యూదురు ఆఇ వరిజ్ ఒపజెప్పార్లె. మూండ్రీ రోన్కాజ్ నాను మరజి నిక్కాన్లె.”

20 నస్త్రీవలె జెబెదెయి మరిసిర్ అయేసి వరి వెట యేసు డగ్రు వాతాదె ముణుకుజ్ ఊరిజి మాడిసి, “సాయం కిల”, ఇజి వెప్తాద్. 21 “నీను ఇనిక కోరిజిని?”, ఇజి వాండ్రు వెప్తాన్. అందెజె అది, “నీను రాజు వజి ఏలుబడిః కినివెలె, యా నా రిఎర్మరిసిర్ ఒరెన్ నీ ఉణెరి పడెకాదుని ఒరెన్ నీ డేబ్రు పడెకాదు బసి మండ్రెజ్ ఇజి నాను కోరిజిని”, ఇజి వెప్తాద్. 22 యేసు, “నీను ఇనిక వెన్బాజినాదొ ఇజి నిజి తెలివిద్”, ఇజి వెప్తాండ్రె వరిజ్, “నాను ఉండెజ్మని గినాదిక ఉండెజ్మీరు అటినిదెరా?”, ఇజి వెప్తాన్. వారు, “మాప్ ఉండెజ్ అట్టాప్”, ఇజి వెప్తార్. 23 యేసు వరిజ్, “తవ్విండ నాను ఉణి గినాదిక మీరు ఉణెరిదెర్, గాని నా ఉణెరి పడెకాదుని డేబ్రు పడెకాదు బసి కిటిన్సిక నా కీదు సిల్దెద్, నా బుబ్బు కియూదాన్ ఎయేరిజ్ తయార్ కిత మనాండ్రె వరిజ్ అక్కెజ్ దొహొక్కు”, ఇజి వెప్తాన్. 24 మహి పది మన్సిర్ సిసూర్ వరి అయేసి యేసుజ్ లొస్సి అయ మాట విహారె రిఎర్ మున్ను కోపం ఆతార్. 25 యేసు వరిజ్ విజేరిజ్ కూక్తాండ్రె వరిజ్, “యూదురు ఆఇవరి రాజార్ వరి లోకుర్ మున్ను అతికారమదాన్ ముజినార్. వరి పెరి అదికారిబు వరిజ్ మని అతికారమదాన్ లోకురిజ్ అణసు తిగిజినార్ ఇజి మీరు నెస్సిదెర్ గదె? 26 గాని మీరు వారు లెకెండ మండ్రెజ్ ఆవిద్. గాని మీ లొఇ ఎయెర్బా పెరికాన్ ఆదెజ్ ఇహిజి, వాండ్రు మిజి పణిమన్ని ఆదెజ్వెలె. 27 మరి ఎయెన్బా విజేరి మున్ను పెరికాన్ఆదెజ్ ఇజి కోరిజినికాన్, వాండ్రు మిజి విజేరిజ్ వెటి పణికి వనిలెకెండ ఆజి మండ్రెజ్. 28 ఎలాగ ఇహిజి లోకు మరిసి ఆతి నాను, విజేరి నజి పణి కిపీరిఇజి నాను రెవెతా, గాని పణి కిదెజె వాత మన్ను. మరి నండొండారిజ్ బత్కెస్సెజ్, వరిజ్ విడుఃదల కిదెజ్ వరి వందిజ్ నా పాణం సీదెజె నాను వాత మన”, ఇజి వెప్తాన్.

గుడిడికార్ సుడెజినార్

29 యేసుని వన్ని సిసూర్యెరికో పట్టుమదాన్సొన్ని మహిజ్, నండొ లోకుర్ వన్ని వెనుక సాహార్. 30 ఇదిలో సరిపడకాదు బస్త్రీమని రిఎర్ గుడ్డిదికార్, యేసు అయా సరిదాన్ సొన్నినాన్ ఇజి వెహారె, “ప్రబువా, దావీదు మరిసి, మా మున్ను కనికారం తోరిన్లె”, ఇజి డేలీన్ వెప్తార్. 31 లోకుర్ వరిజ్” పలక్ మండ్రు” ఇజి గొల కిత్తార్. గాని వారు, “ప్రబువా, దావీదు మరిసి మా మున్ను కనికారం ఆల”, ఇజి మరి ఒదె డేల్ని వెప్తార్. 32 యేసు నిహండ్రె వరిజ్ కూక్తాన్. “నాను మిజి ఇనిక కిదెజ్ ఇజి మీరు కోరిజినిదెర్?”, ఇజి వరిజ్ వెన్బాతాన్. 33 “ప్రబువా మా కణ్ణు సూణి లెకెండెకెల”, ఇజి వారు వెప్తార్. 34 యేసు వరి మున్ను కనికారం ఆతాండ్రె వరి కణకాజ్ ముట్టాన్. వెటనె వారు సుడెదెజ్ అట్టారె వన్ని వెట సాహార్.

21

ఓనన్న

1-2 వారు యెరూసలేము అందిని ముంజాల, ఒలివ మరెక్ మని గొరొన్ మున్ను మని బెత్సాగె ఇని నాటొ వాతార్. వాతిజ్ యేసు వన్ని సిసూర్ రిఎరిజ్ కూక్తాండ్రె ఈహు వెప్తాన్. “మీ ఎద్రు మని నాటొ

సొండ్రు. అందితిజ సరి, తోహ్తా మన్ని ఉండ్రి గాడెదెజ్‌ని దనివెట మని గాడెదె పిలాదిజబా మీరు నూణిదెర్. వనకాజ్ కుత్తి నా డగ్రు పేరజ తగాట్. ³ ఎయెన్‌బా మిజి ఇనికబా వెన్‌బాతిజ వన్యాజ్ ప్రబుజ్ కావాలి ఇజి వన్నిజ్ వెప్తు. వెటనె వాండ్రు వనకాజ్ మీ వెట పొక్కార్.”

⁴⁻⁵ “ఇదిలోన్ గాడెదె మున్సు ఎక్కి, సార్‌లిదాన్ నీ రాజు వాజినాన్. గాడెదె పిల్ల అతి ఇజిరి గాడెదె మున్సు ఎక్టాండ్రె, నీ డగ్రు వాజినాన్ ఇజి సీయోను గాల్చి* అతి దనిజ్ వెప్తు”, ఇజి దేవుణు ప్రవక్తవెట† దేవుణు ముజాల వర్గితి మాటెజ్ పూర్తి ఆదెజ్ యాకెజ్ జరిగితె. ⁶ యేసు వరిజ్ వెప్తి వజనె సినూర్ సాహారె కిత్తార్. ⁷ వారు గాడెదెని దని పిలదిజ్ తత్తార్. వన్యాజ్ మున్సు వరి సాల్‌వెజ్ పహ్తాజ్, యేసు దని మున్సు బస్తాన్. ⁸ నండొండార్ వరి సాల్వెజ్ సరి అందు పహ్తార్. మరి నండొండార్ మరెకాణి కొమెజ్ కత్తి సరి అందు పహ్తార్. ⁹ మంద లోకుర్ వన్ని ముందాల సొన్ని మహికార్, వన్ని వెనుక వాజి మహికార్, “దావీదు మరిసిజ్ ఓసన్న! ప్రబు సీత్తి అతికారమ్‌దాన్ వాజినాన్ పొగ్గెడె ఆనికాన్ పరలోకామ్‌దు దేవుణుదిజ్ ఓసన్న”, ఇజి వారు డేల్చి మహారె. ¹⁰ యేసు యెయాసలేం పట్టుమ్‌దు వాతిజ్, లోకుర్ విజెరె “వాండ్రు ఎయెన్?” , ఇజి బమ్మ అతారె ఒరెన్ మరి ఒరెన్ వెట వర్గిజి మహారె. ¹¹ “పిండ్రు గలీలయదు మన్ని నజరెతు ఇని నాటోణి ప్రవక్త అతి యేసు”, ఇజి వన్ని వెట మహి అయ మంద లోకుర్ వెప్తార్.

యేసు దేవుణు గుడిదు సొన్నినాన్.

¹² యేసు దేవుణు గుడి: లోఇ సొహండ్రె, అబ్బె గుడి: అరబుదు మహి కొణి వరిజ్ పొర్చి వరిజ్ విజెరిజ్ వెల్లి పొక్తాన్. డబ్బు మారిసిని వరి బల్లెజ్‌ని పావుర పొటిజ పొర్చివరి పీటిజ్ మహ్తా విసిర్‌తాన్. ¹³ వాండ్రు వరిజ్, “నా ఇలు పార్దనం కిని ఇలు ఇజి కూకె ఆనాదెల్,† ఇజి దేవుణు మాటదు రాస్త మనాద్ గాని మీరు దనిజ్ డొజారిజ సాలం‡ లెకెండ్ కితి మనిదెర్”, ఇజి వెప్తాన్. ¹⁴ గుడ్డిదికార్, సొటాదికార్ దేవుణు గుడి:దు వన్ని డగ్రు వాతిజ్ వాండ్రు వరిజ్ నెగెండ్ కిత్తాన్. ¹⁵ గాని వాండ్రు కితి బమ్మాతి పణిజ సుడె:జి, దేవుణు గుడి: అరబుదు మని కొడొర్, “దావీదు మరిసిజ్ ఓసన్న”, ఇజి డేల్చినిక విహారె, పెరి పుజెరిజుని, యూదురి రూలుజ్ నెస్సిస్సికార్ నండొ కొంప అతారె. ¹⁶ వారు వన్నిజ్, “యా కొడొర్‌వెప్సినిక ఇనిక ఇజి నీను వెంజినిదా?”, ఇజి వెన్‌బాతారె. యేసు వరిజ్, “ఓ వెంజిన, కొడొర్‌ని ఇజిరి కొడొర్‌ని వెయుదాన్ నీను పొగ్గెడె:జిని మాటెజ్ తయార్ కితి మన్ని”‡ ఇజి దేవుణు మాటదు రాస్త మనిక మీరు ఎసెజ్‌బా సద్‌విఇతిదెరా?”, ఇజి వెప్తాన్. ¹⁷ వాండ్రు వరిజ్‌డెసి పట్టుమ్‌దాన్ వెల్లి సొహండ్రె బెతానియ ఇని నాటో సొన్ని అయ రయ్తు అబ్బె మహాన్.

బోడెమరాన్ వహ్పినాద్

¹⁸ పెందల వాండ్రు మరజి పట్టుమ్‌దు సొన్ని మహికా వన్నిజ్ బజ కల్టాద్. ¹⁹ సరి పడెకాదు మని ఉండ్రి బోడెమరాన్ సుడె:జి, మరాన్ డగ్రు వాతండ్రె సుడె:తిజ్ ఆకుజ్ తప్ప మరి ఇనికెజ్ తోరెఉతె. వాండ్రు దనిజ్ సుడె:జి, “మరి ఎసెజ్‌బా నీను కాయెజ్ అన్‌ఇలె”, ఇజి వెప్తాన్. వెటనె బోడెమరాన్ వహ్తా సాహాద్. ²⁰ సినూర్ అక్క సుడె:తారె బమ్మ అతారె, “నిస్సా బేగి బోడెమరాన్ ఎలాగ వహ్తా సాహాద్?”, ఇజి వారు వర్గితారె. ²¹ యేసు వరిజ్, “నాను మిజి నిజం వెప్సిన్, మిజి నమకం మంజి, మీ లోఇ అనుమానం సిల్లెండ మహిజ, యా బోడెమరాన్‌దిజ్ కితికదె అఎండ, యా గొరొతిజ్ సుడె:జి”, నీను ఇబ్బెణిజ్ పెరె ఆజి సమ్‌దారమ్‌దు సొన్ని అరెఅ’ ఇజి వెప్తిజ అయవజనె జర్గినాదెల్. ²² మిజి నమకం మహిజ మీరు పార్దనం కిజి ఇనిక లొస్సిదెరొ, అయాక మిజి దొహ్‌కూద్‌లె”, ఇజి వెప్తాన్. ²³ యేసు దేవుణు గుడి:దు సొహండ్రె గుడి: అరబుదు బోర్‌కిజి మహివలె, పెరి పుజెరిజుని లోకుర్ వెద్దెల్‌జి వన్ని డగ్రు వాతారె, “ఇని అతికారమ్‌దాన్ నీను యా పణిజ్ కిజిని? ఎయెర్ నిజి యా అతికారం సిత మనార్?”, ఇజి వన్నిజ్ వన్‌బాతారె.

* 21:4-5 21:4-5 యెరుసలేం పట్టుమ్‌దిజ్ సీయోను పట్టుం ఇజిబా పేరు మహాద్ ఎందానిజ్ ఇహిజ అయ పట్టుం సీయోను గొరొన్ మున్సు తోహ్తా మహాద్. అమదెజి సీయోను గాల్చి ఇజి వెహ్పివలె యెరుసలేం పట్టుమ్‌ది వరిజ్ గుర్చి కిజి వెహ్పిమహారె వారు ఇహిజ ఇస్రాయెలు లోకుర్ గుర్చు. † 21:4-5 21:4-5 జేకె 9:9. † 21:9 21:9 అరాయెయ బాసాదు ఓసన్న ఇని మాటదిజ్ మజి ఏలు రక్సిన అ ఇజి అర్థం మనాద్. గాని లోకుర్ పొగ్గెడె:జి మరి ఎయెన్‌బా పెరికాన్ వానివలె వరిజ్ కూక్కి ఒనిలెకెండ్‌బా వెహ్పిమహారె.

‡ 21:13 21:13 యెసయ 56:7. * 21:13 21:13 యిర్మియా 7:11. * 21:16 21:16 కీర్తన 8:2.

24 యేసు వరిజ్, “నానుబా మిజి ఉండ్రి మాట వెన్బాన. అయాక మీరు నజి వెహ్విజ ఇని అతికారమ్దాన్ నాను యా పణిజ్ కిజిన ఇజి నానుబా మిజి వెహ్పా. 25 బాప్తినం సీని యోహానుజ్, బాప్తినం సీదెజ్ మని అతికారం ఎంబెణిజ్ వాతాద్ దేవుణుబాణిజ్నా, సిల్లిజ లోకుర్ బాణిజ్నా?”, ఇజి యేసు వరిజ్ వెన్బాతాన్. “దేవుణుబాణిజ్ వాతాద్’ ఇజి మాటు వెహ్విజ, మరి ఎందానిజ్ మీరు వన్నిజ్ నమ్మిఇతిదెర్? ఇజి మజి వెన్బానాన్. 26 గాని, యోహాను ఒరెన్ దేవుణు ప్రవక్త ఇజి లోకుర్ విజేరె నమ్మిజనార్. అందెజె లోకుర్ బాణిజ్ వాతాద్’ ఇజి వెహ్విజ్ మజి తియెల్న, ఇజి వరి లోఇ వారి వర్గితార్. 27 అందెజె వారు, “మజి తెలివిద్”, ఇజి యేసుజ్ మరజి వెహ్పార్. నస్తివలె వాండ్రు, “ఇని అతికారమ్దాన్ యా పణిజ్ కిజిన ఇజి నానుబా మిజి వెహ్పా”, ఇజి వరిజ్ వెహ్పాన్.

రిఎర్ మరిసీర్ కత

28 “దన్నివందిజ్ మీరు ఇనిక ఒడెబిజనిదెర్? ఒరెన్వన్నిజ్ రిఎర్ మరిసీర్ మహార్. వాండ్రు పెరివన్ని డగ్రు సాహండ్రె, “మరిన్, నేండ్రు నీను ద్రాక్కు టోటాదు సాన్ని పణి కిఅ”, ఇజి వెహ్పాన్. 29 వాండ్రు, “నాను సాన్వె, ఇజి మరజి వెహ్పాన్. గాని వెనుక మన్ను మారిస్తాండ్రె సాహాన్. 30 నస్తివలె అప్పొసి, కొగ్రిమరిసి డగ్రు సాహండ్రె అయా పజనె వెహ్పాన్. వాండ్రు, ఒబా, నాను సాన”, ఇజి వెహ్పాన్ గాని సాన్వెతాన్. 31 “యా రిఎర్ మరిసీర్ లోఇ అప్పొసి వెహ్పా పజి కితికాన్ ఎయెన్?”, ఇజి యేసు వరిజ్ వెన్బాతాన్. వారు, “పెరికాండ్రె”, ఇజి వెహ్పార్. యేసు వరిజ్ “పన్ను పెరనికారని సానిదికెజ్ మిజి ఇంక ముజాల దేవుణు కిని ఏలుబడిదు సానారలె ఇజి నాను మిజి నిజం వెహ్పాన్. 32 ఎందనిజ్ ఇహిజ యోహాను వాతాండ్రె, నీతి నిజాయిదాన్ బత్తిదెజ్ ఇజి మిజి సరి తోరిస్తాన్ గాని మీరు వన్నిజ్ నమ్మిఇతిదెర్. పన్ను పెరికారని సానిదికెజ్ వన్నిజ్ నమ్మితార్. అయాకెజ్ సుడెతిజ్బా మీరు మన్ను మరిసి మీరు కితి తప్పుజి ఒప్పకొడిజి డిసి సీజి వన్నిజ్ నమ్మిఇతిదెర్”, ఇజి వెహ్పాన్.

పాలి సీతి టోట కత

33 “మరి ఉండ్రి కత విండ్రు. బూమి మనికాన్ ఒరెన్ ఉండ్రి ద్రాసటోట ఉణుస్తాన్. దని సుటులం కోట తోహాన్. ద్రాక్కు పట్టు రసం లాగ్దెజ్ ఉండ్రి గాసుగు తయార్ కిబిస్తాన్. కాపేకిదెజ్ ఉండ్రి ఎత్తుమని ఇలుబా తయార్ కితాన్. వెనుక అయ ద్రాక్కు టోట సెగెండార్ రయేతురిజ్ పాలిదిజ్ సితాండ్రె పయనం కిజి మరి ఉండ్రి దేసం సాహాన్. 34 పట్టు పండ్లి కాలమ్దు వన్ని వంతుజ్ లొస్టెజ్ ఇజి వన్ని పణి మన్నిరిజ్ పాలి అస్తి మని వరి డగ్రు పోక్తాన్. 35 పాలి అస్తిమనికార్ వన్ని పణి మన్నిరిజ్ అస్తారె ఒరెన్ వన్నిజ్ డెయేతార్, ఒరెన్ వన్నిజ్ సప్టార్, మరి ఒరెన్ వన్నిజ్ పణికాణిజ్ డెయేతార్. 36 మరి, వాండ్రు ముజాల పోక్తివరిజ్ ఇంక సండెండార్ పణిమన్నిరిజ్ పోక్తాన్. వరిజ్బా పాలి అస్తిమనికార్ అయాపజనె కితార్. 37 “నా మరినిజ్ పోక్తిజి వన్నిజ్ వారు గవరం సీనారలె”, ఇజి వెహ్పాండ్రె కడెవెరిదు వన్ని మరిసిజ్ వరి డగ్రు పోక్తాన్. 38-39 గాని పాలి అస్తిమనికార్ మరిసిజ్ సుడెతారె, “పిండ్రు యా తోటాదిజ్ అకు మనికాన్, రదు, మాటు వినిజ్సప్పి యా టోట మా సాంతదిక కినాట్”, ఇజి వన్నిజ్ అసి ద్రాక్కు తోటదిజ్ వెల్లి విసీర్తారె వన్నిజ్ సప్టార్. 40 అందెజె అయా ద్రాస టోట ఎజుమాని వానివలె అయ పాలి అస్తిమనివరిజ్ ఇనిక కినాన్? ఇజి వెన్బాతాన్. 41 “అయా సెఇవరిజ్ నండె కటినమతి సావుదాన్ సప్పాన్. మరి పట్టు పండ్లి కాలమ్దు వన్నిజ్ సరియాలె వందుజ్ సీని రెయ్దురిజ్ ద్రాస టోట పాలిదిజ్ సీనాన్”, ఇజి వారు వెహ్పార్.

42 యేసు వరిజ్, “ ఇలు తోహ్పికార్ నెక్తి పోక్తి పణుకునె, మూలాదిజ్ బుర్ పణుకు ఆత మనాద్. యాక దేవుణు కిదాన్ జర్తిక. యాక మా కణకెజి బమ్మాతిక’, ఇజి దేవుణు మాటదు రాస్తి మనిక మీరు ఎనెజ్బా సద్విఇతిదెరా?”.

43 అందెజె దేవుణు ఏలుబడి కినిక మీ నడిమిహాన్ లాగ్గి దనిజ్ తగితి పట్టు సీని వరిజ్ సీనాన్”, ఇజి నాను మిజి వెహ్పాన్. 44 ఎయెన్బా యా పణుకు మున్ను అర్తిజి వాండ్రు ముకెజ్ ఆనాన్. యా పణుకు ఎయెన్ మున్ను అర్నాదొ వాండ్రు గుండ ఆనాన్”, ఇజి యేసు కత వెహ్పా వీజితాన్. 45 యేసు వెహ్పా కతెజ్ విహారె పెరి పుజెరిజుని పరినయరు, వరి వందిజె వాండ్రు వెహ్పా మనాన్ ఇజి అర్తం కితార్. 46 వారు వన్నిజ్ కయేదు కిదెజ్ ఉండ్రి ఉపాయ్ సుడెతార్ గాని లోకుర్ విజేరె వన్నిజ్ ఒరెన్ ప్రవక్త ఇజి నమ్మితి వందిజ్ లోకురిజ్ తియెలతార్.

22

పెండ్లివిందు

1 యేసు మరి కతవజ వరిజ్ వెహ్లాన్ 2 “దేవుణు కిని ఏలుబడిః ఇహిజ వన్ని మరిసి పెండ్లిదిజ్ విందు తయార కితిమని ఒరెన్ రాజుజ్ పొలిత మనాద్. 3 పెండ్లి విందుదిజ్ రదు ఇజి ముజాల వెహ్లా మహివరిజ్ కూక్కి తగాజ్ ఇజి వాండ్రు వన్ని పణిమన్నిరిజ్ వరి డగ్రు పొక్తాన్. గాని వాదెజ్ ఒవ్వితార్.

4 నస్తవలె వాండ్రు మరి సెగొండార్ పణిమన్నిరిజ్ బా పొక్తాండ్రె, “పెండ్లి విందుదిజ్ రదు”, ఇజి ముజాల వెహ్లామహివరిజ్, “నాను కోడ్డిజ్, బలన్తి పడెజ్ ఒవ్విపిసి విజు తయార కిత మన. పెండ్లి విందుదిజ్ మీరు రదు ఇజి వరిజ్ వెహ్లా”, ఇజి వరిజ్ వెహ్లాన్. 5 వారు పణిమన్నిరి వెహ్లా మాటదిజ్ కండెకబా లన్యం కివిండ, ఒరెన్ వన్ని మడిఃజ సాహాన్ మరి ఒరెన్ వన్ని బేరమదిజ్ సాహాన్. 6 మహికార్ వన్ని పణిమన్నిరిజ్ అస్తారె మర్వాద లాగ్గి సప్తార్. 7 అయ రాజు నండొ కోపం ఆతాండ్రె వన్ని నయనమదిజ్ పొక్కి వన్ని పణిమన్నిరిజ్ సప్తివరిజ్ కతిస్తాండ్రె, వరి పట్టుమదిజ్ సిసుదాన్ ముటిస్తాన్. 8 వెనుక వాండ్రు పెండ్లి విందు తయార అత మనాద్, వన్ని పణి మన్నిరిజ్, “గాని ముజాల పెండ్లి విందుదిజ్ కూకతి మహికార్ విందుదిజ్ వాదెజ్ తగ్గికార్ ఆవిర్. 9 మీరు రస్త సహ్కాజ్ సాన్ని మిజి తోరినవరిజ్ విజేరిజ్” విందుదిజ్ రదు’ ఇజి కూక్కు”, ఇజి వెహ్లాన్. 10 అయ పణిమన్నిరి రస్త సహ్కాజ్ సాహార వరిజ్ తోరితి నెగ్గివరిజ్, సెఇవరిజ్ కుడుఃప్పి, వరిజ్ తత్తెజ్ అట్టివరిజ్ విజేరిజ్ తత్తార్. పెండ్లి విందు సమడ నిండ్రితాద్. 11 నస్తవలె పెండ్లి విందుదిజ్ వాతివరిజ్ సుడఃదెజ్ రాజు వాతాన్. పెండ్లిసాక్కు తోడుగివిండ పెండ్లి విందుదిజ్ అబ్బె బస్తమని ఒరెన్ వన్నిజ్ సుడఃతాన్. 12 రాజు వన్నిజ్, “ఓ, కూలాయెన్, పెండ్లిసాక్కు తోడుగివిండ నీను ఎలాగ లొఇ వాతి?”, ఇజివెన్ బాతాన్. వాండ్రు వర్గివిండ అలేత మహాన్.

13 నస్తవలె రాజు, “వినిజ్ కిక్కుకాల్కు తొప్పి వెల్లి దూరమ మన్ని సీకటి బాడిఃదు విసీర్దు. అబ్బె వాండ్రు ఎలాకాలం అడఃబాజి, పల్కు కొహ్కీక మంజినాన్”, ఇజి వన్ని పణి మన్నిరిజ్ వెహ్లాన్. 14 “కూకె ఆతికార్ నండొండార్ గాని, ఎర్లె ఆతికార్ కొండార్.”

కయిసరుజ్ పను సీని వందిజ్

15 నస్తవలె పరిసయరు వెల్లి సాన్ని వాండ్రువర్గిని మాటదాన్ యేసుజ్ తప్ప అస్తెజ్ ఇజి కుట్ర ఆజి మహార్. 16 వారు వరి సిసూరిజ్, హేరోదియరు* జటుదివరివెలు యేసు డగ్రు పొక్తార్. వారు సాన్ని, “బోద కినికి, నీను, మన్ను కర్లివిండ దేవుణు సరివందిజ్ నిజమదాన్ బోదిసిని నెగ్గికి ఇజి మాపు నెస్సాప్. నీను లోకురి ఎలాగ మర్తికార్ ఇజి మొకొ సుడఃజి వరిజ్ సర్ల కిటిన్సిజ్ ఇజి వర్గినికి ఇఇ. 17 అహిజ కయసరుజ్ పను సీనిక నాయమా? నీను ఇనిక ఒడఃబిజిని? మజి వెహ్లా”, ఇజి వన్నిజ్ వెహ్లాన్. 18 యేసు వరి సెఇ బుద్దిదిజ్ నెస్తాండ్రె, “వేసం కినికిదేరా! ఎందనిజ్ నాను వహ్ని మాటదాన్ నజి అస్తెజ్ సుడఃజినిదెర్? 19 పన్ను సీని ఉండ్రీ కాసు నజి తోరిస్తూ”, వారు ఉండ్రీ దినారం వన్ని డగ్రు తత్తార్. 20 “దిని మున్ను మని బొమ్మ ఎయెర్ది? రాస్తమని రాంత ఎయెర్ది?”, ఇజి వాండ్రు వరిజ్, వెన్ బాతాన్. 21 వారు, “కయిసరుది”, ఇజి వెహ్లాన్. నస్తవలె వాండ్రు, “కయిసరుది కయసరుజ్ సీదు, దేవుణుది దేవుణుదిజ్ సీదు”, ఇజి వరిజ్ వెహ్లాన్. 22 యా మాట వెంజి బమ్మ ఆతారె వారు వన్నిజ్ డిఃస్త సాహార్.

23 సాతికార్ మరజి నిజ్నిక సిల్లెద్ ఇజి సదుకయరు వెహ్లానార్. వారు అయా రోజుదనె వన్నిడగ్రు వాజి ఈహు వెన్ బాతార్. 24 “బోదకినికి, ఒరెన్ కొడొర్ సిల్లెండ సాతిజి వన్ని తంబెరి సాతివన్ని అల్లిజ్ పెండ్లి ఆజి సాతివన్ని వందిజ్ కొడొర్ పుట్టిస్తెజ్ వలె ఇజి మోసె రాస్తా సీతి రూలుదు మనాద్. 25 మా నడిఃమి ఏడు గురు తంబేర్జు మహార్. పెరికాన్ పెండ్లి ఆతాండ్రె సాతాన్. వన్నిజ్ కొడొర్ సిల్లెర్ కక వన్ని తంబెరి సాతివన్ని అల్లిజ్ ఇడః ఆతాన్. 26 నడిఃపి వాండ్రుని కొగ్గి నడిఃపి, అయా లెకెండెన్ వీన్ కొడొర్ దాక విజెరె దనిజ్ పెండ్లి ఆజి సాతార్. 27 కడఃవేరిదు అయా బోదెల్ బా సాతాద్. 28 అహిజ

* 22:16 22:16 హేరోదియరు జటుదికార్ రోమదికార్ యూదురు మున్ను కిని ఏలుబడిఃదిజ్ ఇస్తం కిత్తి యూదురు ఆతికార్. వరిసయరిజ్ని హేరోదియరిజ్ ఇని పొక్తు సిల్లెద్. గాని లోకురి యెసుప్రబుజ్ ఇస్తమానిదన్నిజ్ తియెలాజి మహార్.

సాతి వరిబాణిజ్ మర్జి నిజ్ని వెలె యా ఏడుగురు లొఇ ఎయెరిజ్ అది అల్లి ఆనాద్లె? ఇనిక ఇహిజు బత్తిజిమహివలె అది ఏడుగురుదిజ్బా అల్లి అత మహాద్ గదె?”, ఇజి వెన్బాతార్.

29 యేసు వరిజ్, “దేవుణు మాట ఇజి, మీరు నెన్ఇదెర్ దేవుణు సత్తు ఎస్సా ఇజి మీరు నెన్ఇదెర్ అందెజె అర్లం కివండ మీరు నండో తప్పుమాటజ్ వెస్సినిదెర్. 30 ఎండనిజ్ ఇహిజు, సాతి విరబాణిజ్ మర్జి నిజ్ని వెలె ఎయెర్బా పెండ్లి ఆవిర్, పెండ్లిదిజ్ సివర్. వారు పరలోకామ్ది దేవుణుదూతెజ్ లెకెండ మంజినార్. 31-32 సాతికార్ మర్జి నిజ్ని వందిజ్ దేవుణు మిజి వెప్తి మనిక మీరు ఎస్జేబా సద్విఇతిదెరా? నాను అబ్రాహము దేవుణు, ఇస్సాకు దేవుణు, యాకోబురి దేవుణు ఇజి వాండ్రు సాతి వరి దేవుణు ఆవిన్, బత్తిజిని వరి దేవుణునె”*, ఇజి వెప్తాన్. 33 అయ మాట విహారి వన్ని బోద వందిజ్ లోకుర్ బమ్మ ఆతార్.

పెరి ఆడ్ర

34 యేసు సదుకయేరు వెయ్కు మూక్తాన్ ఇజి విహారి పరిసయేరు కూడజి వాతార్. 35-36 వరి లొఇ ఒరెన్ దేవుణు రూలుజ్ నెగెండ నెస్సికాన్, “ఓ బోదకినికి దేవుణు సితి ఆడ్రెజి లొఇ పెరి ఆడ్ర ఇనిక?”, ఇజి వన్నిజ్ పరిక్కు కిదెజ్ వెన్బాతాన్. 37 యేసు వన్నిజ్, “నీ పూర్తి మన్నుదాన్, నీ పూర్తి అత్తుదాన్, నీ పూర్తి పాణమ్దాన్ నీ ప్రబు అతి దేవుణుదిజ్ ప్రేమిస్తెజ్. 38 యాకాద్ గొప్పు ముక్కెలమతికని, మరి మొదోహి ఆడ్ర. 39 రుండి ఆడ్ర ఇనిక ఇహిజు, “నీను నిజి ప్రేమిన్ని లెకెండ మహి వరిజ్బా ప్రేమిన్అ. 40 దేవుణు సితి రూలుజ్ని ప్రవక్తరు వర్గతి మాటజు పునాది ఆతిక యా రుండి ఆడ్రెజ్”, ఇజి వరిజ్ వెప్తాన్. 41-42 పరిసయేరు కూడితి మనివెలె యేసు వరిజ్ సుడెజి, క్రీస్తు వందిజ్ మీరు ఇనిక ఒడెబిజినిదెర్? వాండ్రు ఎయెర్ది కుటుమ్దికాన్ ఆనాన్? ఇజి వెన్బాతాన్. “వాండ్రు దావీదు రాజు తగ్గదికాండ్రె”, ఇజి వారు వెప్తార్.

43-44 అయాలెకెండ మహిజు మీరు నిజుం వెస్సినిదెర్. “నాను నీ పగాతి వరిజ్ నీ పాదమ్క అడిఃగి ఇడ్డిదాక నీను నా ఉణెర్ పడఃకారు బసి మన్అ. ఇజి ప్రబు నా ప్రబు వెలె వెప్తాన్. యా లెకెండ దేవుణు అత్తుదాన్ దావీదు వర్గతివలె వన్నిజ్ ఎలాగ ప్రబు ఇజి కూక్కినాన్? 45 దావీదు వన్నిజ్ ప్రబు ఇజి కూక్కిజ్, వాండ్రు ఎలాగ వన్ని మరిసి ఆనాన్?”, ఇజి వాండ్రు వరిజ్ వెన్బాతాన్. 46 ఎయెర్బా మర్జి ఉండ్రీ మాటబా వెప్తాజ్ అట్ఏతార్. అయా రోజుదాన్ వన్నిజ్ ఇనికబా వెన్బాదెజ్ ఎయెరిజ్బా దయేరం సాల్ఏతాద్.

23

ఏడు కస్టమ్కు

1 నస్తివలె యేసు లోకురిజ్ని వన్ని సిసూర్జు ఈహు వెప్తాన్. 2 యూదురి రూలుజ్ నెస్సిస్సికార్ని పరిసయేరుజ్, ముందాల మోసెజ్ మహి లెకెండ అతికారమ్దాన్ దేవుణు సితి రూలుజ్ నెస్సిస్తెజ్ అక్కు మనికార్. 3 అందెజె వారు మిజి వెస్సి విజు వనకాజ్ లొజిజి అయాలెకెండ కిదెజ్వెలె. గాని వరి పణిజు సుడఃజి, వరి లెకెండ కిమాట్. ఎండనిజ్ ఇహిజు వారు వెప్తార్ గాని అయ లెకెండ కివర్. 4 లోకుర్ గుజుమ్దు పిండెదెజ్ అట్ఇ నని బరుజ్ తోహ్ని ఇడ్డి లెకెండ మని పెరి పణిజ్ కిదెజ్ ఇజి బలవంతం కినార్ గాని ఉండ్రీ డెస్సుదాన్ కద్దిస్తెజ్ అట్టి సుల్కాని బరు లెకండమ్ని ఇజిరి సాయమ్బా వారు కివర్. 5 లోకుర్సూణి వందిజె వారు విజు పణిజ్ కిజినార్. దేవుణు మాటెజ్ రాస్తి ఇట్టి ఇజిరి పెట్టెదిజ్* పెరిక కిజినార్. మరి వరి సొకెజాణి† అన్నుజ్ పెరికెజ్ కిజినార్. 6 విందుదు వారు ముకెలమాతి బాడిజ్ కోరిజినార్. యూదురు మీటిజ్ కిని ఇల్కూజ్ బస్తెజ్ ఇజి వారు ముకెలమాతి

* 22:31-32 22:31-32 నిర్లము 3:6. † 22:37 22:37 ద్వితీ 6:5. ‡ 22:39 22:39 లెవీ 19:18. § 22:43-44

22:43-44 కీర్తన 110:1. * 23:5 23:5 యా ఇజిరి పెట్టెజ్ తోలుదాన్ తయార్ కితిక్కెజ్ దస్సి లొఇ చదాయ్ బుప్పమాసమ్దు మన్నినగం మాటెజ్ రాసి ఇడ్డి మంజినార్. నిర్లము 13:1-10, 13:11-16. ద్వితీ 6:4-9, 11:13-21. దేవుణు మాటదు రాస్తి మన్నికెజ్ ద్వితీ 6:8, 11:18. యా లెకెండ లొజిజి మంజినామ్ ఇజి తోరిస్తెజ్ 12 వయుస్సు డాట్టి మొగ్గకోణెర్ యాపెతి ఉండ్రీ వరి నొర్దుదుని మరి ఉండ్రీ పెతి డేబ్ర కియుదుబా తోహ్ ఆజి మహార్. ముకెలం పార్లనం కినివలె ఆహా కిజి మహార్. † 23:5 23:5 యూదురు అతికార్ దేవుణు పణికినికార్ ఇజి తోరిఅదెజ్, మరి దేవుణు సిత్తి ఆడ్రెజ్ ఎత్తు కిబిస్తిలెకెండ ఉండ్రీ నీలి రంగు సాల్వ నస్తిక పొర్నాజి మహార్. యాక పొర్నాదెజ్ ఇజి వరిజ్ ఆడ్ర సిత్తు మహాన్ సంక్య 15:37-41, ద్వితీ 22:12. గాని యూదురిజ్ రూలుజ్ నెస్సినికార్ని పరిసయెరిజ్ వారు గొప్పు నెగెండ దేవుణుదిజ్ లొజిజినికార్ ఇజి తోరిస్తెజ్ అక్కెజ్ గొప్పు పెరిక పొర్నాజి మహార్.

బాడిఃజ్ కోరిజినార్. 7 నతెజ నడిఃమి వారు లోకుర్ వెట మాడిఃసి ఆదెజ్, బోదకినికార్ ఇజి కూకె ఆదెజ్ కోరిజినార్.

8 గాని మీరు ఇహిజ, 'బోదకినికి' ఇజి కూకె ఆమాట్. ఎందనిజ్ ఇహిజ దేవుణు ఒరేండ్రె మి బోదకినికాన్ మీరు విజిదెరె అన్నతంబేరజు. 9 బూమి ముస్కు ఎయెరిజ్బా బుబ్బు ఇజి పేరు ఇడఃమాట్. దేవుణు ఒరేండ్రె మి బుబ్బు. వాండ్రు పరలోకామ్దు మనాన్. 10 మీరు ఎయిదెరెబా నెస్సిస్సికి ఇజి కూకె ఆమాట్. ఎందనిజ్ ఇహిజ క్రీస్తు ఒరేండ్రె మిజేనెస్సిస్సికాన్. 11 మీ లోఇ విజేరిజ్ ఇంక పెరికాన్, విజేరిజ్ పణిమన్ని ఆదెజ్వెలె. 12 ఎయెరిబా వన్నిజ్ వాండ్రె పెరికాన్ కితిజ వాండ్రు ఇజిరికాన్ ఆనాన్. ఎయెరిబా వన్నిజ్ వాండ్రె తగె ఆతి మహిజ వాండ్రు పెరికాన్ ఆనాన్. 13 వేసం కినికిదెరాతి పరిసయరుజ్ని ఊదురు రూలుజ్ నెస్సిసినికిదెరా! అబయా, మిజి ఎసానొ కళ్లమ్కు వానె. ఎందనిజ్ ఇహిజ లోకుర్ దేవుణు ఏలుబడిఃదు సాన్ఎండ వరి ఎద్దు సెప్లాజ్ కెప్పి పొక్కినిదెరె. మీరె సాన్ఇతిదెరె. సాండ్రెజ్ సుడఃజి మహి వరిజ్ సరి సిఇతిదెరె. 14 వేసం కినికిదెరాతి పరిసయరుజ్ని యూదురు రూలుజ్ నెస్సిసినికిదెరా, అబయా, మిజి ఎసానొ కళ్లమ్కు వానె. మీరు సిగు సిల్లెండ రాండి బోదెకాజ్ మొసెం కిజి మిజి లాబం తప్పిసినిదెరె మీరు ఎలాగమర్రికార్ ఇజి నస్తెజ్ ఆవిద ఇజి మీరు లోకుర్ ఎద్దు లావ్ నీరిండ మన్ని పార్దనం కిజినిదెరె. దన్నివందిజ్ మిజి పెరి సిక్కి వానాద్లె.

15 వేసం కినికిదెరాతి పరిసయరుజ్ని యూదురి రూలుజ్ నెస్సిసినికిదెరా, అబయా! మిజి ఎసానొ కళ్లమ్కు వానె. ఒరెన్ వన్నిజ్ మీవెట కుడుఃప్తెజ్ మీరు నమ్దరం డాట్టి బూమి విజు బూలాజినిదెరె. ఒరెన్ మీ వెట కూడిఃతిజ, వన్నిజ్ ఎల్లకాలం సిను మంజిని బాడిఃదు సాండ్రెజ్, మిజి ఇంక రుండి వంతుజ్ తగ్గి ననికాన్ తయార్ కిజినిదెరె.

16 యూదురు రూలుజ్ నెస్సిసినికిదెరె ఆతి మీరు లోకురిజ్ నెగ్గిసరి తోరిస్తెజ్ మన్నికిదెరె, గాని మీరు మహిపరిజ్ సరి తోరిసిని గుడ్డిదికార్ లెకెండ మన్నిదెరె అబయా! మిజి ఎసానొ కళ్లమ్కు వానె. ఒరెన్ దేవుణు గుడిః తోడుః ఇజి పరవణం కితిజ, అయ పరవణామ్దాన్ వాండ్రు తప్తె ఆదెజ్ ఆనాద్. గాని దేవుణు గుడిః లోఇ మని బజారం తోడుః ఇజి ప్రమాణం కితిజ వాండ్రు అయ ఒప్పమానమ్దాన్ తప్తె ఆదెజ్ అట్విన్ ఇజి మీరు నెస్సిసినిదెరె. 17 గుడ్డియాతి బుద్ది నీలికిదెరా! ఎమేణిక్ పెరిక్? దేవుణు గుడిఃదు మని బజారమ్నా, నీలిజ బజారమ్దిజ్ దేవుణు వందిజ్ కేట కిత్తక్ ఇజి కిజిని దేవుణుగుడిఃనా? 18 మరి ఎయెరిబా నంద సుర్ని మాలి పీట తోడుః ఇజి ప్రమాణం కితిజ, వాండ్రు అయ ప్రమాణామ్దాన్ తప్తె ఆదెజ్ అట్పూన్. గాని దని ముస్కు మని పూజ సితి వనకాజ్తోడు అసి ప్రమాణం కితిజ వాండ్రు అయ ప్రమాణామ్దాన్ తప్తె ఆదెజ్ అట్విన్ ఇజి మీరు నెస్సిసినిదెరె. 19 యూదురు రూలుజ్ నెస్సిసిని గుడ్డిదికార్ లెకెండ మన్నికిదెరా! ఎమేణిక్ పెరిక్? పూజ సితికాదా? సిల్లిజ పూజ సితిదన్నిజ్ దేవుణు వందిజ్ కేట కిత్తిలెకెండ కిజిని సంత సుర్ని మాలి పీటనా? 20 అందెజె సంత సుర్ని మాలి పీట తోడుః అసి ప్రమాణం కినికాన్ నంద సుర్ని మాలి పీటదిజ్ మరి దని ముస్కు మన్ని విజు వనకాజ్ తోడు అసి ప్రమాణం కిజినాన్. 21 మరి దేవుణు గుడిః తోడు అసి ప్రమాణం కినికాన్, దేవుణు గుడిఃదిజ్ని దని లోఇ మంజిని విజు వనకాజ్ని బాన్మంజిని దేవుణుదిజ్ తోడు అసి ప్రమాణం కిజినాన్. 22 పరలోక తోడు ఇజి ప్రమాణం కినికాన్, దేవుణు బన్ని సింహాసనమ్దిజ్ని దని ముస్కు బని మంజిని దేవుణుదిజ్బా తోడు అసి ప్రమాణం కిజినాన్.

23 వేసం కినికిదెరాతి పరిసయరుజ్ని యూదురి రూలుజ్ నెస్సిస్సికిదెరా, అబయా మిజి ఎసానొ కళ్లమ్కు వానె. మీరు పొదిన కుసాదాన్, సోపుదాన్, జలకారదాన్† దేవుణుదిజ్ దనమ్బాగంకీ సీజినిదెరె. గాని నాయం, కనికారం, దేవుణు ముస్కు మని నమకం నన్ని దేవుణు సిత్తి రూలుదుమన్ని ముకెలమతి మాటెజ్ మీరు నెక్కి పొక్కినిదెరె. రుండిబా ఉండ్రె లెకెండ కిజి మంజినిక్ ఇహిజ ఒది నెగెండ మహాద్ మరి. 24 సరి తోరిస్సి గుడ్డిదికిదెరా! ఉణిదని లోఇ డోమెజ్ అర్తి మహిజ మీరు జాలిస్సిదేరె. గాని ఒంటె ననికెజ్ అర్తిజ అక్క నెస్తెజ్ సిల్లెద్ ఇజి అయాలెకండెనె డిఃజ్నికిదెరె మీరె.

† 23:23 23:23 పొదిన, సాపు, జలకార ఇప్పెజ్ విజు కరిదికెజ్ అఉ ఇక్క తిండిదిజ్ రుసి కూడుఃజ్ ఇజి వంట కినివలె కలప్పికెజ్.

§ 23:23 23:23 అప్రహమునె తొలిత దనమ్బాగం సిత్తిలెకెండ వణాయ్ ఒప్పమానమ్దు రాస్తి మనాద్. ఆది 14:20. వెనుక ఇస్రాయలు లోకుర్ వరిజ్ దోహక్కి వనక లోఇ దనంబాగం నీదిజ్ ఇజి దేవుణు ఆద్ర సిత్తాన్. దనంబాగం ఇహిజ వది లోఇ ఉండ్రి.

25 వేసం కిజినిదెర్ ఆతి, యూదురి రూలుజ్ నెస్సిస్సికిదెరా, పరిసయెరుజాండె, లోకుర్ ముస్సుహోన్ మిడిఃస్తి ఇడ్డిగిన్నెజ్ని కుడుకెజ్ లెకెండ మన్నికిదెర్. మీరు మీరుబా వెల్లిహోన్ సుడిఃతిజ నెగ్గివరిలెకెండ తోర ఆజినిదెర్. గాని మీ మస్సు నిండ్రు సెజ బుద్దిజ్ని సెజ ఉదెసమ్కు, మరి నాను గణస్తికెజ్ విజు నజీనె ఇజి ఒడిఃబిని వరిలెకెండెనె. 26 గుడ్డి ఆతి పరిసయె వాండ్రు ముజాల మీరు మస్సు నెగ్గెండ కిదు, అయావెలె మీరు లోజని వెల్లి మిడిస్తి మని కుడుకెజ్ని గినెజ్లెకండ్ ఆనిదెర్.

27 వేసం కినికిదెరాతి, యూదురి రూలుజ్ నెస్సిస్సికిదెరా, పరిసయెరుజాండె, వెల్లిదాన్ సుడిఃతిజ మీరు గొప్ప సోకుమని సున్దుం డెయ్తి మని దూకి ననికిదెరె! దూకి లోజ సాతి వరి డుమ్ము మరి విజు సెజకెజ్ మన్నిలెకెండ మీరుబా మన్నిదెర్. 28 అయా లెకెండెనె మీరు వెల్లి సుడిఃతిజ నాయం మనికిదెర్ ఇజి తోర ఆజి నిదెర్. గాని లోజ మీరు బక్తి మనికాప్ ఇజి పొజిజి నికిదెర్, సెజ బుద్దిదాన్ నిండ్రీతి మన్నికిదెర్.

29 వేసం కినికిదెరాతి యూదురి రూలుజ్ నెస్సిస్సికిదెరా, పరిసయెరుజాండె, మిజి ఎసోనో కస్టమ్కు వానె. మీరు దేవుణు ప్రవక్తరు దూకిజ ముస్సు సమాది తోప్పి, నీతినిజాయి మన్ని వరి సమాది ముస్సు సోకు కిజినిదెర్. 30 అనిగొగొర్ కాలమ్దు మాపు మంజినిక ఇహిజ, వారు దేవుణు ప్రవక్తరిజ్ సప్తి మహివలె వరివెలె మాపు కూడెఁవతామ్ మరి ఇజి మీరు వెప్పి మంజినిదెర్. 31 అందెజి దేవుణు ప్రవక్తరిజ్ సప్తి మహి వరి మరిసీర్ ఇజి మీ మాటదానె మిజి మీరె సాసెం వెమా ఆజినిదెర్. 32 అందెజి మీ అనిగొగొర్ కితి పాపమ్దు తకు మనిక మీరు పూర్తి కిదు.

33 సరాన్ ననికిదెరా! సరాన్సు కొణ్జొర్నని మీరు ఎలాగ ఎలాకాలం సిసు మంజిని బాడ్డిదాన్ తప్పె ఆనిదెర్. 34 అందెజి నాను, ప్రవక్తరుజ్ని బుద్దిమని వరిజ్, బోద కిని వరిజ్ మీ నడిఁమి పొక్కిన. సెగొండారిజ్ మీరు సప్పిదెర్, మరి సెగొండారిజ్ మీరు సిలువ పొక్కిదెర్, మరి సెగొండారిజ్ యూదురు మీటిజ్ కిని ఇల్కాణిజ్ కొండెజిణిజ్ డెయ్తిజ్ ఉండ్రీ పట్టుమ్దాన్ మరి ఉండ్రీ పట్టుమ్దు ఉల్ప్పిదెర్. 35 నీతి నిజాయి మనికాన్ ఆతి ఏబెలు నలదాన్ మొదోలీసి, దేవుణు గుడిఁదిజ్ని సంత సర్ని మాలి పీటదిజ్ నడిఁమి మీరు సప్తి మహి బెరాకియ మరిసి ఆతి జెకరియదాక, నీతి నిజాయి మన్నికారాతి విజెరిజ్ సప్పివరి నల బూమె కారిస్తి మన్ని వందిజ్ సిక్కు మీ ముస్సునె వానెలె. 36 యా సిక్సెజ్ విజు యా తరమ్ది వరి ముస్సునె వానె ఇజి నాను మిజి నిజం వెప్పిన.

37 ఓ యెరూసలేమా, యెరూసలేమా నీను ప్రవక్తరుజ్ సప్పికి, నీ డగ్రు పొక్కివరిజ్ వణకాణిజ్ డెయ్నికి, ఉండ్రీ కొరు దని పిలెకాజ్ కుడుఁప్పి దని రెకెజి అడ్డి ఇడ్డి లెకెండ, నీ కొణ్జొరిజ్ కుడుఁప్తెజ్ ఇజి నాను ఎసాడు సుట్టునో ఆస్స ఆత మన్సు, గాని నిజి ఇస్టం సిల్లెండ మహాద్. 38 ఇదిలో దేవుణు వన్నిగుడిః డిసి సినాన్లె, అందెజి అక్క కాలి మంజినాద్. 39 ప్రబు సీత్తి అతికారమ్దాన్ ఆనికాన్”^{*} ఇజి నీను వెప్పిదాక నజి నీను మరి సుడిఃజ, ఇజి నాను నిజి నిజం వెప్పిన.”

24

తరమ్దిజ్ ఆక్కరదిజ్ గుర్తు.

1-2 యేసు దేవుణు గుడిఁదాన్ సోతాండ్రె దూరం సొన్ని మహిజ్, సిసూర్ వన్ని డగ్రు వాతారె, దేవుణు గుడిః వందిజ్ కూక్కుసాప్పి గొప్పజి వర్తిజి మహోర్. వాండ్రు వరిజ్, “మీరు యాకెజ్ విజు సుడిఃతిదెర్. గాని ఇక్క ఉండ్రీ వణకు ముస్సు మరి ఉండ్రీ వణకు నిల్చి మన్ఏండ అమా ఆనాద్లె, ఇజి నాను మిజి నిజం వెప్పిన”, ఇజి వెప్టాన్.

3 యేసు ఒలివ మరెక్ మని గొరొన్ముస్సు బస్తి మహివలె, మరి ఎయెర్ డగ్రుసిల్లెండ మహివలె, సిసూర్ వన్ని డగ్రు వాతారె, “యాకెజ్ ఎసెజ్ జర్జినె? నీను మరెజి వానిదనిజ్, మరి యా తరమ్దిజ్ ఆకరదిజ్ గుర్తుజ్ ఇనికెజ్? మజి వెహాల”, ఇజి వెనెబాతారె. 4 యేసు వరిజ్ ఈహు వెప్టాన్. “ఎయెనబా నిజి మోసెం కివిండ జాగర్ల సుడిఃజి మండ్రు. 5 ఎందానిజ్ ఇహిజ నండొండారె వాజి, నా పేరు ఇడెః ఆజి, “నానె క్రీస్తు” ఇజి వెప్పి నండొండారిజ్ మోసెం కినార్. 6 మీరు విదెమ్కు వందిజ్ వెనిదెర్లె. మరి విదెమ్కు వానెలె ఇజి సాటిస్సికబా వనిదెర్లె. అయావలె తియెల్ ఆవిండ మండ్రు.

^{*} 23:39 23:39 కీర్తన 118:26.

యాకెజ్ విజు జర్దిదెజ్ వెలె. గాని యాక ఆక్కర్ ఆవిద్. ⁷ లోకుర్ ముస్సు లోకుర్ని దేసమ్కాజ్ ముస్సు దేసమ్కు పగ ఆజి మంజినె. అబ్బె ఇబ్బె నండో నాహ్కాజ్ కరు, బూమి కర్షినికెజ్ వానెలె. ⁸ యాకెజ్ విజు ఉండ్రె బోదెలి కీదు అస్త్రెజ్ ముజాలె వాని నొప్పి మొదోల్సి లెకెండె. ⁹ నస్త్రెవలె లోకుర్ మిజి అసి తోప్పి హిమ్మెజ్ కిజి సస్త్రెజ్ ఒపజెప్పార్లె. నా ముస్సు నమకం ఇట్టి వందిజ్ లోకామ్దు మన్ని విజు జాతిదికార్ మిజి ఇస్తం కివిండ ఆనార్. ¹⁰ నండోండార్ వరి నమకం డిస్సు సీనార్లె. ఒరెన్ మరి ఒరెన్ వన్నిజ్ మొసం కిసాన్. ఒరెన్ మరి ఒరెన్ వన్నివెట పడివిండ ఆనాన్. ¹¹ నండోండార్ డోజ ప్రవక్తరు వాజి తప్ప బోదెజ్ నెస్సిసి లోకురిజ్ తప్ప సర్దు నడిపిసి, నండోండారిజ్ మొసం కిసార్. ¹² దేసమ్ది రూలుజ్ లోజివిండ బల్లిజనికార్. అజినిజ్ లోకుర్ ప్రేమ సిల్లికార్ ఆనార్. మహివరిజ్ ప్రేమిస్సి ప్రేమ సిల్లెండ్రాజి మంజినార్. ¹³ గాని ఆక్కర్దాక కస్టమ్కు ఒరిసిని వన్నిజ్ దేవుణు రక్కిస్సార్లె. ¹⁴ దేవుణు ఏలుబడిః కిని వందిజ్ సువార్ల బూమి ముస్సు మని లోకాజ్ విజు ఉండ్రె నాకెసిం లెకెండె వెహె అనాదెలె. నస్త్రెవలె యా తరమ్దిజ్ ఆక్కర్ వానాద్.

¹⁵ ప్రవక్త ఆతి దానియేలువెట దేవుణు ముజాలె వర్గితి మహి లెకెండె, “నాసనం కిని సెఇక ఆతిక”^{*} దేవుణు గుడిఃదు నెగ్గి బాడిఃదు నిల్లి మంజనిక సూణివెలె (యాక సద్వినికాన్ నెసి అర్థం కిదెజ్) అయ గడిఃయ వానాదెలె. ¹⁶ నస్త్రెవలె యూదయ దేసమ్దు మంజనికార్ గొరొకాజ్ ఉహ్కెజ్ వలె. ¹⁷ మిదె ముస్సు మంజనికాన్ ఇండ్రెణిజ్ ఇనికబా వెల్లి ఒత్తెజ్ ఇజి డెగ్గెజ్ ఆవిద్. ¹⁸ మండిఃజు మంజనికాన్ వన్ని సాల్వెజ్ ఒత్తెజ్ ఇజి ఇండ్రె వాదెజ్ ఆవిద్. ¹⁹ అయ దినమ్కు కొడోరిజ్ పాలు ఉట్టిస్సి అయసికాజ్, పొటాదు మన్ని బోదెకాజ్ ఎస్సానో కస్టమ్కు మన్నికెజె. ²⁰⁻²¹ అయాకెజ్ ఉండ్రె పినికాలమ్దునో, రోమ్ని దినమ్దునో రెవిండ ఆవిద్ ఇజి పార్లనం కిజి మండ్రు. ఎందానిజ్ ఇపాజ, లోకం మొదోల్సి బాణిజ్ అసి ఏలుదాక రెజ నని కస్టమ్కు వానె. అందెజె అయా కస్టమ్కాణిజ్ తప్ప ఆదెజ్ ఇజి మీరు ఉహ్కీ సానిక ఉండ్రె పిన్నికాలమ్దునో, విస్త్రాంతిదినమ్దునో^{*} ఆవిండ మండ్రెజ్ ఇజి పార్లనం కిజి మండ్రు. ²² అయా కస్టమ్కు మన్ని దినమ్కు తక్కు కిదెజ్ ఇజి దేవుణు ఒడిఃబివిండ మహిజు బూమి ముస్సు మన్సుకాన్ ఎయెన్బా తప్పె ఆదెజ్ అట్ఎన్. గాని దేవుణు ఎర్లిస్సి మన్ని వరి వందిజ్ అయా దినమ్కు తక్కు కిసానెలె. ²³ అయా కాలమ్దు ఎయెన్బా మిజి, “ఇదిలో క్రీస్తు ఇబ్బె మనాన్”, సిల్లిజ, “వాండ్రు అబ్బె మనాన్” ఇజి వెప్తాజి వరి మాటెజ్ అస్సాట్. ²⁴ నస్త్రెవలె డోజక్రిస్తుర్, డోజ ప్రవక్తరు వాజి నండో బమ్మాతి పణిజ్, ముజాలె ఎనెజ్బా తోఇ నని బమ్మాతి పణిజ్ కిజి, అట్టిజ దేవుణు ఎర్లిస్సి మన్నివరిజ్బా మొసం కిదెజ్ సూణార్. ²⁵ జాగర్ల మండ్రు! ఏలె అక్కెజ్ ఇనిక్కెజ్బా జర్గినె ముజాలె నాను మిజి వెప్తా మన.

²⁶ అందెజె ఎయెన్బా, “ఇవిలోన్ వాండ్రు అబ్బె బిడిఃమ్బూమిదు ప్రాంతమ్దు మనాన్” ఇజి వెప్తాజ్బా మీరు సానూట్. సిల్లిజ, “ఇవిలోన్ వాండ్రు ఇబ్బె గొనె మనాన్” ఇజి వెప్తాజ్బా నమ్మిమాట్. ²⁷ ఎందానిజ్ ఇపాజ, మిర్చినిక ఎలాగ తూర్పుదాన్ పడమార దాక తోరె ఆజినాదో, అయలెకెండెనె లోకు మరిసి ఆతి నాను వానివలెబా మంజినాద్, ²⁸ డేగెజ్ వానివలె పినుగుజ్ మంజినె ఇజి గుర్తు కిదెజ్ అట్టిలెకెండె యేసు వానిదన్నిజ్బా టెటాజ్ తోర్చి గుర్తుజ్ మంజినె.

²⁹ అయా కస్టమ్కు మని దినమ్కు వీజితివెటనె, “పొద్దు సీకటి ఆనాద్, నెల జాయ్ సివిద్, ఆగాసమ్దు మని సుక్కెజ్ రాల్పె. ఆగాసమ్దు మన్నిలావరకమ్ది సత్తు మన్నికెజ్ కర్షినె.”^{*} ³⁰ నస్త్రెవలె లోకుమరిసి ఆతి నాను వానిదనిజ్ గుర్తు ఆగాసమ్దు తొర్పాద్. బూమి ముస్సు మని నండో తెగ్గెజాణికార్ గుండె కొత్తె ఆజి అడఃబనార్. నస్త్రెవలె లోకుమరిసి ఆతి నాను గొప్ప సత్తుదాన్ దేవుణు జాయ్దాన్ ఆగాసమ్దు మని మొసాపు ముస్సు వానిక వారు సూణార్లె. ³¹ జోడుబంకెజె జాటుదాన్ నాను నా దూతెజ్ పొక్కు. వారు ఆగాసమ్దు యా కొసాదాన్ అయా కొసాదాక నాలగ్ దిక్కుజాణిజ్ దేవుణు ఎర్లిస్సి మన్ని వరిజ్ ఉండ్రెబాన్ కిసార్.

^{*} 24:15 24:15 దాని 9:27; 11:31; 12:11. ^{*} 24:20-21 24:20-21 పిన్నికాలమ్దు గొప్ప వెరి పిరు వాజి మహాద్. అందెజె విజుబాన్ గడ్డెజ్ నిండ్రెజి మన్నిజ్ పిన్నిదిజ్ వయనం కిదెజ్ గొప్ప కస్టమాజి మంజినాద్ మండ్రెజ్ బాడ్డి దోహ్కెజ్, తిండి దోహ్కెజ్ గొప్ప కస్టమాజినాద్ యూదురి రూలుజ్ వజి విస్త్రాంతిదినమ్దు మూడు నాలగ్ ములుదిజ్ లామ్ దూరం వయనం కిదెజ్ ఆవిద్ ఇజి మహాద్. ^{*} 24:29 24:29 యెసయ 13:10; 34:4.

32 ఇదిలో బోడె మరాన్ దిక్కు సుడోజి యాక మీరు నెస్తు. బోడె మరాన్ ఆకు రాల్లి సిగ్రిస్సివెలె, ఎండ కాలం డగ్గు ఆతాద్ ఇజి మీరు నెసినిదెర్. 33 అయలెకెండెనే మీరు యాకెజ్ విజు జర్గినిక నూణివెలె, నాను దారబంద్రమదునె మన్ను ఇజి మీరు నెస్తు. 34 యాకెజ్ జర్గినిదాక యా తరమదికార్ తవ్వెండ బత్తిజినె మంజినార్ ఇజి నాను మిజి నిజం వెప్పిన. 35 ఆగాసమ్ని బూమిబా సిల్లెండ ఆనె, గాని నా మాటేజ్ ఎస్తిజ్ బా అయలెకెండె సాన్ ఉ. 36 అయ దినం వందెజ్ అయ గడియ వందెజ్ ఎయెర్ బా నెన్ వీర్. పరలోకామదు మన్ను బూబ్బతి దేవుణు అవండ దేవుణు దూతార్ గాని మరిసెబా నెన్ వీన్. 37 నోవాహు కాలమదు ఎలాగ మనెనో, అయలెకెండెనే లోకుమరిసి ఆతి నాను వానికబా మంజినాద్. 38 గడ్డ నిండ్రని ముజాల నోవాహు ఓడః లోఇ డుఃగితిమహి దినమ్ దాక లోకుర్ ఉణిజి, తింజి, పెండ్లి ఆజి, పెండ్లిదిక్ సీజి మహార్. 39 బూమి విజు ముడిఃగ్గిని లెకెండె గడ్డ నిండ్రజి విజెరిక్ పెర్లి ఒతిదాక, ఇనిక జర్గినాద్లె ఇజి వారు నెన్ వండ మహార్. అయా లెకెండెనే లోకుమరిసి ఆతి నాను వానివలెబా మంజినాద్. 40 రిఎర్ మడిఃజ మంజినార్. ఒరెన్ వన్నిజ్ డిఃసి ఒరెన్ వన్నిజ్ కూక్కు ఒనాన్. 41 రుండి బోదెక్ ఉండ్ర జెత్త పణకుదు నూర్తి మంజినె. ఉండ్ర దనిజ్ డిఃసి ఉండ్ర దనిజ్ కూక్కు ఒనాన్.

42 ఎమేణి దినమ్దు మీ ప్రబు వానాండ్రో ఇజి మిజి తెలివెద్. అందెజె మీరు జాగరతదాన్ ఎర్దు సుడోజి మండ్రు. 43 యాక మీరు అర్దం కిజి నెస్తు. ఎమేణి గడియాదు డోజారి వానాన్ ఇజి ఇండ్రోణి ఎజుమాని నెస్తిజు, డోజారి ఇండ్రో డుఃగ్ దెజ్ నరి సీవండ తెలి మంజి సుణాన్. 44 మీరు నా వందెజ్ ఒడఃబిఇ గడియాదు, లోకు మరిసి ఆతి నాను వాన. అందెజె మీరు ఎస్తివలెబా తయార్ ఆజి మండ్రెజ్ వెలె.

45 బుద్దిమని నమిదెజ్ అట్టిమని పణిమన్ను ఎయెన్? ఇండ్రోణి వరిక్ విజెరిక్ నెగెజ్ సుడోజి సరి ఆతి వేలాదు, వరిక్ సరి ఆతి బోజనం సీదెజ్ ఇజి ఇండ్రోణి ఎజుమాని ఒపజెప్పి లెకెండె మన్నుకాండ్రె బుద్ది మన్ను పణిమనిసి. 46 అయ ఎజుమాని మర్జి వానివలె, వన్నిజ్ ఒపజెప్పి లెకెండె అయా పణిమన్ను కిజి మంజినిక ఇహిజ అయ ఎజుమాని సుడోజిజ అయ పణిమన్నుజ్ నెగెద్. 47 అయ ఎజుమాని వన్నిజ్ కల్గితిమని విజు దనిజ్ నూణికాన్ లెకెండె అయ పణిమనిసి కినాన్ ఇజి నాను మిజి నిజం వెప్పిన. 48-49 “గాని అయ పణిమనిసి సెఇకాన్ ఆజి నా ఎజుమాని వాదెజ్ నండో ఆలస్యం ఆనాద్”, ఇజి అయ సెఇ పణిమన్ను వన్ని మన్నుదు ఆలోసనం కిజి వన్నివెట పణికిని వరిక్ డెయెజి, మరి ఉణివరివెట కూడఃజి ఉణిజి తింజి మంజినాన్. 50 వాండ్రు తొక దినమ్దు ఒడఃబిఇ గడియాదు వన్ని ఎజుమాని వానాన్. 51 అయ ఎజుమాని వన్నిజ్ కత్తి, బక్తి మనికాన్ ఇజి పోజిజిని వరివెట వరివందెజ్ తయార్ కిత్తిమన్ను బాడిఃదు పోక్నాన్. అబ్బె పల్కు కొహొక్కి, అడఃబాజి మంజినార్.

25

పదిమణిసి విడిః బోదెక్

1 మరి దేవుణు ఏలుబడిః కినిక ఇహిజ వరి నూనెజాణి దీవెజ్ అసి పెండ్లి దజడః వన్నిజ్ ఎర్దు సుడోదెజ్ సాహిమహి పదిమన్ను విడిః బోదెకాజ్ పోలిత మనాద్. 2 వినకాజ్ లోఇ అయదుగురు బోదెక్ బుద్ది సిలికెజ్, అయదుగురు బోదెక్ బుద్ది మనికెజ్. 3 అయ బుద్ది సిలికెజ్ వనక దీవెజ్ అస్తి గాని నూనెజ్ ఒడఃజె. 4 బుద్ది మనికెజ్ వనక దీవెజెవెట సీసెజు నూనెబా ఒతె. 5 పెండ్లి దజడఃయెన్ వాదెజ్ ఆలస్యం ఆతిజ్ అవిక్ విజు కొహొజి నిద్ర కిజి మహె.

6 మదరెయ్యు, “ఇవిలోన్ పెండ్లి దజడఃయెన్, వన్నిజ్ ఎర్దు సుడోదెజ్ వాతి బోదెకాండె వెల్లి రరు”, ఇజి ఉండ్ర గగోలిదాన్ జాటు వాతాద్. 7 నస్తివలె బోదెక్ విజంండెక్ నిజ్జి వన్నా నూనెజాణి దీవెజ్ సాడిఃతిజ్ ఎకిసి నెగెండె కిత్తె. 8 గాని అయ బుద్ది సిలికెజ్, “మా దీవెజ్ నమజి సాన్సినె. అందెజె మీ నూనె లోఇ కండెక్ మజిబా సిదాట్”, ఇజి బుద్ది మని వనకాజ్ లొస్తా. 9 అయావలె బుద్దిమని బోదెజ్, “సిల్లి, సిత్తిజు మజిని మిజి సాల్ వండ ఆనాద్. అందెజె మీరు పొర్లివరిబాన్ సాన్సి కొండు”, ఇజి వెప్తా. 10 అవి నూనె కొండెజ్ సాన్సి మహిజ్ పెండ్లి దజడః వాతాన్. నస్తివలె తయార్ ఆతి మనికెజ్ వన్నివెట

† 24:38 24:38 దేవుణు బూమి విజు ముడుఃగ్గి సిని లెకెండె పేరు రపిసి గడ్డ నిండ్రని ముజాల ఉండ్ర ఒడ తాయార్ కిదెజ్ ఇజి నోవాహుజ్ వెప్తాన్. అయా ఒడ 300 మూరెజ్ సాంపు 50 మూరెజ్ వెడల్పు 30 మూరెజ్ ఎత్తు మన్నుక. నోవాహుని వన్ని ఇండ్రోణికార్ విజెర్, మరి విజు జంతుజ్ పొట్టిజ్ పొర్లిజ్ అండు పొత్తు జత్తె లెక్కు. ఓడాదు డుఃగ్గి విడు రోస్సు. వెనుక పేరు వాదెజ్ మొదొల్లిదాక లోకుర్ వరిక్ అలవాటుజ్ లెకెండె బత్తిజు మహార్.

వెండ్లి విందుదిజ్ లోజ సాహ. దని వెనుక సేహాలెజ్ కెహాపె ఆతె. 11 దన్నివెనుక, మహి బుద్దిసిల్లి బోదెక్ వాజి, “బాబు, బాబు మజి సెప్లా రెఅ”, ఇజి కూక్తె. 12 వాండ్రు వరిజ్, “నాను మిజి నిజం వెహిన్, నాను మిజి నెన్ఎ”, ఇజి వెహ్లాన్. 13 నాను వాజిని రోజు గాని అయ గడియబా మీరు నెన్ఇతిదిరె, అందెజె మీరు తెలి ఆజి మండ్రు.

మూఎర్ పణిమణిసిర్

14 మరి దేవుణు ఏలుబడిః కినిక ఇహిజ ఒరెన్ దేసం సొండ్రెజ్ ఇజి వన్ని పణిమన్నిరిజ్ కూక్కి, వన్ని ఆస్తి వరిజ్ ఒపజెప్తి వన్ని లెకెండే మనాద్. 15 వండ్రు ఒరెన్ పణిమన్నిజ్ అయ్దు తాలంతుజ్*. మరి ఒరెన్ వన్నిజ్ రుండి, తాలంతుజ్ మరి ఒరెన్ వన్నిజ్ ఉండ్రె తాలంతుజ్ యాలెకెండే ఒరెన్ ఒరెన్ దన్ని వెట పణికిదెజ్ అట్టి లెకెండే వరిజ్ సితాన్. వెనుక వాండ్రు పయనం కిజి దేసం సొహాన్. 16 అయ్దు తాలంతుజ్ లొస్తికాన్ వెటని సొన్సి వనకవెట బేరం కిజి మరి అయ్దు తాలంతుజ్ గణస్తాన్. 17 రుండి తాలంతుజ్ లొస్తికాన్బా అయా లెకెండేని కిజి మరి రుండి గణస్తాన్. 18 గాని ఉండ్రె తాలంతు లొస్తికాన్ సొహండ్రె బూమిదు గాంద కారిసి వన్ని ఎజుమాని డబ్బు మూస్తాన్. 19 లావ్కాలం సొహి వెనుక వరి ఎజుమాని మరజి వాతండ్రె వరి సెత్తి డబ్బుజాణిజ్ వారు ఇనిక కిత్త మనార్ ఇజి సుడఃతాన్. 20 నస్తివలె అయ్దు తాలంతు లొస్తికాన్, మరి అయ్దు తాలంతుజ్ తతాండ్రె, “బాబు నీను నజి అయ్దు తాలంతుజ్ ఒపజెప్తి గదె, ఇదిలో అకెజె ఆవిండ మరి అయ్దుబా నాను కుడుప్త”, ఇజి వెహ్లాన్.

21 వన్ని ఎజుమాని వన్నిజ్, “నమకం ఇడదెజ్ అట్టి నెగ్గి పణిమన్ని, నీను నెగెండే కిత్తి. యా కండెక్బాన్ నిజి నమిదెజ్ అట్టి నని పణి నీను కిత్తి. అందెజె నండో వనకాజ్ నాను నిజి ఒపజెప్పాలె. నీను వాజి నీ ఎజుమానివెట సర్గ ఆజి మన్అ”, ఇజి వెహ్లాన్.

22 రుండి తాలంతుజ్ లొస్తికాన్ వాతాండ్రె, “ఎజుమాని నీను నజి రుండి తాలంతుజ్ ఒపజెప్తి గదె, ఇదిలో అకెజె ఆవిండ మరి రుండి తాలంతుజ్ గణస్త”, ఇజి వన్నిజ్ వెహ్లాన్. 23 ఎజుమాని వన్నిజ్, “నమకం ఇడదెజ్ అట్టి నెగ్గి పణిమనిసి, నీను నెగెండే కిత్తి. యా కండెక్బాన్ నీను నమిదెజ్ అట్టి నని పణి నీను కిత్తి. అందెజె నిజి నండో వన్కాజ్ ఒపజెప్ప. నీను వాజి నీ ఎజుమాని వెట సర్గ ఆజి మన్అ”, ఇజి వెహ్లాన్.

24 నస్తివలె ఉండ్రె తాలంతు లొస్తికాన్ వాతాండ్రె, “బాబు నీను విత్తణ బాడిదాన్ కొయ్నికి, మరి ఉణున్ఇ బాడిదాన్ పంట కొయ్ని మూర్కతం మనికి ఇజి నాను నెస్త. 25 అందెజె నాను తియెల్ ఆజి బూమిదు గాంద కార్జి నీ డబ్బు డాప్త. ఇదిలో నీది, నీను లొన్అ”, ఇజి వెహ్లాన్.

26 అందెజె వన్నిజ్ సుడఃజి అయ ఎజుమాని, “బదకమాతి సెజ పణిమన్ని, నాను విత్తణ బాడిదాన్ కొయ్నికాన్, ఉణున్ఇ బాడిదాన్ పంట కొయ్నికాన్ ఇజి నీను నెస్తి? 27 అహిజ నా డబ్బు వడ్డి సీని సవ్కారిజబాన్ నీను సీని మంజినిక ఇహిజ నాను వాతివెలె వడ్డి కుడుఃప్పి నా డబ్బు నజి దోహ్కాద్ మరి.

28 అయ ఉండ్రె తాలంతు వన్నిబాణిజ్ లాగ్జి పది తాలంతుజ్ మనివన్నిజ్ సెఅ. 29 నమిదెజ్ అట్టికాన్ ఎయెండ్రె, వన్నిజ్ మరి లావ్ దోహ్కె. వరిజ్ మరి నండో కల్లిజి మంజిని. నమ్మిదెజ్ అట్టణ వన్ని బాణిజ్, వన్నిజ్ కల్లితిమన్ని ఇజిరికబా లాగె ఆనాద్. 30 పణికిదెజ్ రెజ యా పణిమన్నిజ్ వెల్లి సీకటుదు విసీర్దు. అబ్బె పల్కు కొహ్క్కిఅడఃబాజి మంజినాద్.

మెండ గొర్రెజ్ని ఎలెటి గొర్రెజ్

31 నస్తివలె యేసు ఈహు వెహ్లాన్. “లోకుమరిసి ఆతి నాను నా గొప్ప గవర్నమాన్, నా విజు దూతెజ తోడుః అసి వన్నివెలె, రాజు వజి ఏలుబడిః కిదెజ్ దేవుణు మంజిని బాడిఃదు మంజిని గొప జాయ్దాన్, విజు దూతారిజ్ నావెట తోడు అసి వానివలె, రాజువజి ఏలుబడిః కిదెజ్ పరలోకమ్దు మంజిని గొప్ప జాయ్ మన్ని నా సింహాసనమ్దు బసి మంజిని. 32 నస్తివలె బూమి ముస్కు మని లోకుర్ విజెరె నా ఎద్రు కూడఃజి వానార్. గొర్రెజ్ మేప్పి గవుడుఃయెన్ ఎలిటి గొర్రెజాణిజ్ మెండ గొర్రెజి ఎర్లిసినిలెకెండ

* 25:15 25:15 ఉండ్రె తాలంతు ఇహిజ దినారముక అయాలెకెండే ఇహిజ ఆరు వెయిజ్ రోస్సు, పణికితిజి దోహ్క్కి కూలిదిజ్ నరియాతి డబ్బుజ్ నేహి లెక్కుదిజ్ సుడఃజి ఇంసు మింసు ఆరు లెక్కుజ్ రూపాయ్ మంజిని.

నాను లోకాజ్ ఒరెన్ ఒరెన్ వన్నిజ్ ఎర్లిస్సాలె. ³³ నాను ఉణెరెపడక మెండ గొర్రెజు, డేబవడక ఎలిటి గొర్రెజు నిల్పాలె.

³⁴ రాజు అతి నాను నా ఉణెరె పడక మని వరిజ్ సుడజి, “నా బుబ్బాతి దేవుణు సిజిని దీవనమకు మంజి వన్నిజ్ సెందితికిదెరా, లోకం పుట్టి బాణిజ్ అసి దేవుణు మీ వందిజ్ తయార కితిమన్ని దేసం మీ సొంత కిజి మండ్లు. ³⁵ ఎందానిజ్ ఇహిజు, నజి బజ కట్టిజ్ మీరు బోజనం సితిదెర్, ఏహ్కా కట్టిజ్ ఏరు సితిదెర్, నాను ఆకాన అతిమహిజ్ నజి డగ్రు కితిదెర్. ³⁶ నాను డుమ్డ అతిమహిజ్ నజి సొక్కజ్ సితిదెర్. జబుదాన్ మహిజ్ నజి నెగెండ్ సుడజితిదెర్, నాను జెలిదు మహివలె సుడజిదెజ్ వాతిదెర్, ఇజి వెహ్సాన్.

³⁷ నస్తివలె దేవుణుదిజ్ లోజితిమహి నీతినిజాయిమన్నికార్ అతి వారు, “ప్రబువా, ఎస్తివలె నిజి బజదాన్ సుడజితిజ్ నిజి బోజనం సితావ్? ఎస్తివలె ఏహ్కా కట్టిజ్ మాపు నిజి ఏరు సితావ్? ³⁸ ఎస్తివలె ఆకాని అతిమహిజ్ సుడజి నిజి డగ్రు కితావ్? ఎస్తివలె డుమ్డ అతి మహిజ్ సుడజి నిజి సొక్కజ్ సితావ్? ³⁹ ఎస్తివలె నీను జబుదాన్ మహిజ్, జెలిదు మహిజ్ సుడజి నీ డగ్రు వాతావ్?”, ఇజి వన్నిజ్ వెన్బానారె. ⁴⁰ నస్తివలె రాజుఅతి నాను, “నా తంబెరిజు అతివరి లోక ఇజిరికాన్ అతి ఒరెన్వన్నిజ్ మీరు ఇనిక కితిదెరో, అయాక మీరు నజి కిత్తిదెర్, ఇజి నాను నిజి నిజం వెహ్సాన్”, ఇజి వరిజ్ వెహ్సా. ⁴¹ నస్తివలె వాండ్లు డేబు పడకాదు మని వరిజ్ సుడజి, “సయెప్ పొందితికిదెరా, నా డగ్రుహాన్ సొండ్లు, సయితానుజ్ నీ వన్ని దూతర్ వందిజ్ తయార కితి మని ఎలాకాలం సిను మంజిని బాడిడు సొండ్లు. ⁴² ఎందనిజ్ ఇహిజు, నాను బజ సాత, గాని మీరు నజి బోజనం సిఇతిదెర్. ఏహ్కా కట్టిజ్ ఉండెజ్ ఇనిక సిఇతిదెర్. ⁴³ ఇకానాతి మహిజ్ మీరు నజి డగ్రు కిఇతిదెర్. డుమ్డ అతిమహిజ్ మీరు నజి సొక్కజ్ సిఇతిదెర్. జబ్బుదాన్ మహివలె జెలిదు మహివలె మీరు నజి సుడజిదెజ్ రెఇతిదెర్”, ఇజి వెహ్సా. ⁴⁴ వారుబా వన్నిజ్, “ప్రబువా ఎస్తివలె నీను బజదాన్ మహిజ్, ఏహ్కా దాన్ మహిజ్, ఆకాని అతి మహిజ్, డుమ్డ మహిజ్, జబుదాన్ మహిజ్, కయెదు మహిజ్ సుడజి నిజి సాయం కివితావ్?”, ఇజి వెన్బానారె. ⁴⁵ నస్తివలె నాను, “యా ఇజిరి వరి లోక ఒరెన్ వన్నిజ్ ఇనిక మీరు కిఇతిదెరో, అయాక నజిబా మీరు కిఇతిదెరో”, ఇజి వరిజ్ వెహ్సా. ⁴⁶ నస్తివలె వారు ఎలాకాలం మంజిని సిక్నాదు సొనారె, గాని దేవుణుదిజ్ లోజితికార్ ఎల్లకాలం మంజిని బత్తుదు సొనారె.”

26

యేసుజ్ వడిఎండ కుట్లు ఆజినారె

¹⁻² యేసు యాకెజ్ విజు వెహ్సా వీజితి వెనుక వన్ని సిసూరిజు సుడజి, “రుండి రోస్సు వెనుక పన్ను పండోయ్* వాజినాద్ ఇజి మీరు నెన్నిదెర్. నస్తివలె లోకు మరిసి అతి నాను సిలువ పొకె ఆదెజ్ ఇజి ఒపజెవె ఆనాలె”, ఇజి వరిజ్ వెహ్సాన్.

³ నస్తివలె పెరి పుజెరిజుని లోకురి పెద్దెల్జ విజెరె, విజెరె విజు పుజెరిజు మున్ను పెరి పుజెరి అతి కయప ఇండ్రో కూడజి వాతారె. ⁴ యేసుజ్ ఎలాగబా ఉపాయ్ కిజి అసి సప్తెజ్ ఇజి అబ్బె వారు ఉండ్రి అలోసనం కితారె. ⁵ “మాపు ఏలు వన్నిజ్ అస్తిజి లోకుర్ వెట గొడజి కినార్లె, అందెజి యా పండోయ్దు పోని”, ఇజి వారు వర్లితారె.

ఉండ్రి బోదెలి యేసు బురాదు వాసనం మన్ని నూనె వక్కినాద్.

⁶⁻⁷ యేసు బెతానియ ఇని నాటో ముజాల కుస్తురోగమ్దాన్ మహి సీమోను ఇండ్రో వాతిజ్, అబ్బె వాండ్లు బోజనమదిజ్ బస్తాన్. నస్తివలె ఉండ్రి బోదెలి నూన్నాజ్ పణుకుదాన్ తయార కిత్తి ఉండ్రి సీసాదు†, నండో విలువమని, నండో వాసనం మని నూనె ఉండ్రి పెరి సీస తత్తాద్ వన్ని బుర్త మున్ను.

* **26:1-2** 26:1-2 యూదురు వరి అని గొగొరిజ్ దేవుణు అయుగుప్పు దేసమ్దు వెటివణి కిజి మహిబాణిజ్ నండో పంటిజ్ ముజాల డిప్పిసి తత్తి దన్నిజ్ ఎత్తు కిజినికాదె పన్ను పండోయ్ పన్ను ఇహిజు డాట్టి సొహిజు సక్కికానాతి దేవుణు దూత, మెండగొరెది నల దారబంద్రమోకాజ్ రాసి అతి మన్ని ఇల్కాజ్ డట్టి సొహి సమయమదిజ్ గుర్తిసినాద్. అయ ఇల్కా పుట్టి పెరి వన్నిజ్ దేవుణు దూత నవ్వితాన్ గాని మెండ గొరెది నల దారబంద్రమోకాజ్ రాసి ఇ అయగుప్పు దేసమ్ది వరి విజు ఇల్కాజ్ పుట్టి పెరి వరిజ్ విజెరిజ్ దేవుణు దూత సప్తాన్. యా పండోయ్ విజు సమయమదిజ్ కినార్ యూదురు విజు దేసమ్కాజ్ పండోయ్ కిదిజ్ ఇజి యెరునల్లమ్దు కూడజి వానార్ నిర్లము 12. † **26:6-7** 26:6-7 యా నూన్నాజ్ పణుకు పేరు అలబాస్టరు ఇజి, యా పణుకు నండోకరిదిక తెల్లాజ్ మంజినాద్ యాక గీసి లోకుర్ పునిజ్ తయారకిజినారె

వాక్యాద్. 8-9 సిసూర్ అక్క సుడఃజి కోపం ఆతారె, “ఎందనిజ్ యా ణిదిజ్ రెఱ ణి? యాక నండ్ డబ్బుదిజ్ పొర్సి, అయ డబ్బు బీదవరిజ్ సీదెజ్ ఆనాద్ గదె?”, ఇజి వెప్తాన్.

10 యేసు అక్క నెస్తాండ్రె, “యా బోదెలి నా వందిజ్ ఉండ్రె నెగ్గి పణి కితాద్ మీరు ఎందనిజ్ దన్నిజ్ అర్ల కిజినిదెర్? 11 బీదాదికార్ మీవెటె ఎన్స్తవలెబా మంజినార్. గాని నాను ఎలాకాలం మీ వెటె మన్ఎ. 12 నజీ మూస్సి వందిజ్ తయార్ కిత్తి లెకెండె యా బోదెలి యా నూనె నా ఒడోల్ ముస్సు వాక్యాద్. 13 యా బూమి ముస్సు ఎంబెబా యా దేవుణు ఏలుబడిః కిని వందిజ్ సువార్ల సాటిస్సివెలె అది కితి యా పణి దన్నిజ్ ఎత్తుకిత్తి లెకెండె సాటిసి మంజినాద్లె”, ఇజి వెప్తాన్. 14-15 నస్తివలె పన్నెండు మణిసిర్ సిసూర్ లొఱ ఒరెన్ ఇస్కరియోతు యూద ఇనికాన్ పెరి పుజెరిజి డగ్రు సాహండ్రె, “నాను యేసుజ్ మిజి ఒపజెప్పిజి నజీ ఇనిక సీనిదెర్?”, ఇజి వెన్బాతాన్. అందెజె వారు ముప్పుయ్ వెండి రూపయజుజు తూస్తారె వన్నిజ్ సిత్రార్. 16 అబ్బెణిజ్ అసి యూద యేసుజ్ వరిజ్ ఒపజెప్పెజ్ ఉండ్రె అవ్కాసం సుడఃజి మహాన్.

ప్రబు ఏర్పాటు కిత్తి బోజనం

17 పులాజ్ సిల్లి రొట్టెజ్ తయార్ కిని పస్సు పండ్రెయ్ ది మొదొహి దినమదు వన్ని సిసూర్ యేసు డగ్రు వాతారె, “పస్సు ఉండెజ్ నీ వందిజ్ మాపు ఎంబె తయార్ కిదెజ్, ఇజి నీను కోరిజిని?”, ఇజి వన్నిజ్ వెన్బాతారె. 18 వాండ్రు వరిజ్, “మీరు పట్టుమదు పలానివన్నిబాన్ సొన్ని, నా సమయం డగ్రు ఆతాద్. నా సిసూర్ వెటె కూడఃజి నీ ఇండ్రె పస్సు పండ్రెయ్ కిదెజ్ ఇజి బోదకినికాన్ వెప్పినాన్, ఇజి వన్నిజ్ వెప్తూ”, ఇజి వరిజ్ వెప్తాన్. 19 వన్ని సిసూర్ సొన్ని యేసు వరిజ్ వెప్తి లెకెండె పస్సు పండ్రెయ్ దిజ్ తయార్ కిత్రార్. 20 పొద్దు ఆతివెలె వన్ని పన్నెండు మన్ని సిసూర్ వెటె బోజనమదిజ్ బస్తాన్. 21 వారు బోజనం కిజి మహివలె వాండ్రు, “మీ లొఱ ఒరెన్ నజీ ఆఱవరి కీదు ఒపజెప్పాన్లె, ఇజి నాను మిజి నిజం వెప్పాన్”, ఇజి వెప్తాన్.

22 వారు విజెరె నండ్ దుకం ఆజి ప్రతి ఒరెన్ ఒరెన్, “ప్రబువా, నిజమె నాను ఆవి గదె?”, ఇజి వన్నిజ్ వెన్బాతారె.

23 యేసు, “నావెటె గినెదు కియు ముడుఃక్కికాన్ ఎయెండ్రె వాండ్రె నజీ ఒపజెప్పికాన్. 24 లోకుమరిసి ఆతి నా వందిజ్ దేవుణు మాటదు రాస్తిమహి లెకెండె నాను సొనాలె, గాని లోకు మరిసి ఆతి నజీ ఎయెన్ ఒపజెప్పాండ్రె వన్నిజ్ కస్టమ్నె. వాండ్రు పుట్టండ మంజనిక ఇహిజి వన్నిజ్ ఎస్సానో బాగ మహాద్ మరి”, ఇజి వెప్తాన్.

25 వన్నిజ్ ఒపజెప్పి యూద, “బోదకినికి నాను ఆవి గదె?”, ఇజి వెన్బాతాన్. యేసు, “ఒఒ నీనె”, ఇజి మరజి వెప్తాన్.

యేసుజ్ ఒపజెప్పెజ్ యూద ఒపు కొడ్డినాన్.

26 వారు బోజనం కిజి మహిజ్ యేసు ఉండ్రె రొట్టె అస్తాండ్రె దేవుణుదిజ్ వందనమ్కు వెప్పి, అయాక రుక్కి, వన్ని సిసూర్ జి సితాండ్రె, “మీరు యాక లొసి తిండ్రు, యాక నా ఒడోల్”, ఇజి వరిజ్ వెప్తాన్.

27 మరి వాండ్రు గిన్న అసి దేవుణుదిజ్ వందనమ్కు వెప్పి, అయాక వరిజ్ సీజి, “దిన్ని లొఱ మనిక విజెరె ఉండు. 28 యా గిన్నాదు మన్నిక నా నల, నండ్రెండారెజ్ వరి పాపమ్కు సెమిస్తెజ్ ఇజి కారిసిని నా నల. ఇక్కడె దేవుణు నా నలదాన్ కిజిని ఒపుమానం. 29 నా బుబ్బాతి దేవుణు కిని ఏలుబడిఃదు మరి మీ వెటె కొత్తాజ్ ఉణిదాక ద్రాక్కు పట్కు రసం మరి ఎనెజ్బా నాను ఉణ్ఎలె, ఇజి నాను మిజి వెప్పాన్”, ఇజి వెప్తాన్ 30 మరి, ఉండ్రె పాట† పార్తారె వారు ఒలివ మరెక్ మని గొరొన్ ముస్సు సాహార్.

పేతురు వన్నిజ్ నెన్వి ఇజి వెప్పాన్లె ఇజి యేసు మూజాల వెప్పినాన్.

31 నస్తివలె యేసు వరిజ్ సుడఃజి, “గొరెజ్ అడినివన్నిజ్ నాను కత్తాలె, గొరెజ్ మంద సెదరినె సొనెలె†, ఇజి దేవుణు మాటదు రాస్తి లెకెండె, యా పొదొయ్నె నా వందిజ్ నిల్దెజ్ అట్విండ మిరు విజెదెరె నజీ డిసి సొనిదెర్లె. 32 గాని దేవుణు నజీ మరజి బత్తుడు నిక్కి వెనుక, మిజి ఇంక ముజాల గలిలయదు సొనాలె”, ఇజి వెప్తాన్. 33 అందెజె పేతురు, “విజెరె మీ వందిజ్ నిల్దెజ్ అట్విండ

† 26:30 26:30 మాములుగ కీర్తన 113-114. పస్సు పండ్రెయ్ దిజ్ బోజనం కిదెజ్ మొదొల్పిని వెలె పార్తారె. 115-118 బోజనం కిత్తి విజెతిజి పొర్సి మహాన్. * 26:31 26:31 జెకరి 13:7.

డిక్సి సాహిజ్బా, నాను ఎసిజ్బా నిజి డిసి సాన్ఎ”, ఇజి వన్నిజ్ వెప్తాన్. 34 యేసు వన్నిజ్, “యా పొదొయ్నె కొర్పు కెరెని ముజాల నీను, నజీ నెన్ఎ ఇజి మూండ్రి సుట్టు, నీను వెప్పాలె, ఇజి నాను నిజి నిజం వెప్పాన్”, ఇజి మరజి వెప్తాన్. 35 పేతురు వన్నిజ్, “నాను నీ వెట సాదెజ్ ఇహిజ్బా గాని నిజి నెన్ఎ ఇజి ఎసిజ్బా వెహ్ఎ”, ఇజి వెప్తాన్. మహి సిసూర్బా అయాలెకెండె వెప్తార్.

గెత్సెమని టోట

36 నస్తివలె యేసు వన్ని సిసూర్వెట గెత్సెమిని ఇని టోటాదు సాహాన్. వాండ్రు వరిజ్, “నాను అబె సొన్ని పార్దనం కిజి మరజి వానిదాక ఇబ్బె బసి మండ్రు”, ఇజి వెప్తాన్. 37 పేతురుని జెబెదయి మరిసిరిజ్వన్నివెట ఒతాన్. వాండ్రు నండో దుకం ఆజి బాద ఆదెజ్ మొదొల్స్తాన్. 38 వాండ్రు వరిజ్, “నాను సాదెజ్ డగ్రు ఆతిలెకెండె మన్ను ఓరిస్తెజ్ అట్ఇ ససా బాద నజి కల్లిజనాద్. మీరు ఇబ్బెని బసి నావెట తెలి మండ్రు”, ఇజి వెప్తాన్. 39 యేసు అబ్బెణిజ్ కండెక్ దూరం సాహండ్రె ముణుకుజ్ ఊరిజి, “నా బుబ్బు, నీను అట్టిజి యా కస్టమ్కు నా బాణిజ్ లాగ్అ. గాని నా ఇస్టం వజి ఆవెద్, నీ ఇస్టం వజినె జర్గిపిద్”, ఇజి పార్దనం కితాన్. 40 వెనుక వాండ్రు సిసూర్ డగ్రు మరజి వాతివెలె వారు నిద్ర కినిక సుడొజి, “ఉండ్రి గంటబా నా వెట తెలి ఆజి మండెజ్ మీరు అట్ఇతిదెరా? ఇజి పేత్రుజ్ వెన్బాతాన్. 41 “సయ్యాను మిజి పరిస కిజి తప్పుదు సాన్ఎండె పార్దనం కిజి తెలి మండ్రు. ఆత్మ తయారినె గాని ఒడొల్ నత్తు సిల్లెండె ఆజినాద్.” 42 మరి రుండి సుట్టు సొన్ని, “నా బుబ్బు, యా కస్టమ్కు నాబాణిజ్ లాగ్డెజ్ ఆవెద్, నాను ఓరిస్తెజ్వలె ఇహిజి నీను ఇస్టం ఆతి లెకెండె, అయావజినె జర్గిపిద్”, ఇజి పార్దనం కితాన్. 43 మరి వాండ్రు మరజి వాతివెలె, పరి కణక రెపెజ్ బరదాన్ మూగ్రి మహిజ్ వారు మరి నిద్ర కిజినిక సుడొజతాన్. 44 వాండ్రు మరజి సాహండ్రె మూండ్రి సుట్టుబ అయా మాటెజ్నె వెప్పా పార్దనం కితాన్. 45 వెనుక వాండ్రు వన్ని సిసూర్ డగ్రు వాత్తాండ్రె వరిజ్ సుడొజి, “ఏలుబా మీరు నిద్ర కిజి రోమ్జనిదెరా? ఇదిలో లోకుమరిసి ఆతి నజి నెఇవరి కియుదు ఒపజెప్పి గడియె డగ్రు ఆతాద్. 46 ఇదిలో నజి ఒపజెప్పికాన్ వాజినాన్, లెదు మాటు పరి వెట దసూల్ ఆదెజ్ సానాట్”, ఇజి వెప్తాన్.

యేసుజ్ అసి తొనాప్పినార్

47 వాండ్రు వరిజి మహివలె, పన్నెండం మణిసి సిసూర్ లొఇ ఒరెన్ యూద వాతాన్. పెరి పుజెరిజు, లోకురి పెదెల్లెజి పొక్తిమని మంద లోకుర్ కూడమ్కు, డుడ్కు అస్సారె వన్ని వెట వాతార్.

48 యేసుజ్ ఒపజెప్పికాన్, “నాను ఎయెరిజ్ముదు కిజిననో, వన్నిజ్అస్తు”, ఇజి ఉండ్రి గుర్తు లెకెండెముజాల వరిజ్ వెప్తా మహాన్. 49 యూద వెటనె యేసు డగ్రు వాతండ్రె, “బొద్కినికి”, ఇజి వెప్తాండ్రె పొమ్జి వన్నిజ్ ముదు కితాన్. 50 యేసు వన్నిజ్, “కూలాయెన్, నీను ఇనిక కిదెజ్ వాతిదొ అక్క కిత”, ఇజి వెప్తాన్. నస్తివలె లోకుర్ ముజాల వాజి వన్ని మున్ను అరిసి వన్నిజ్ అస్సారె తొప్తార్. 51 అయావలెనె యేసు వెట మహికాన్ ఒరెన్ వన్ని కియు సొప్పి కుర్ల లాగితాండ్రె పెరి పుజెరిజ్ పణిమన్ని గిబ్బి తెవు కత్తాన్. 52 యేసు వన్నిజ్, “నీ కూడం మరజి ఒరాదు ఇడొల, కుర్ల అస్సికార్ విజేరె కుర్లదాన్ సానార్. 53 నాను ఏలు నా బుబ్బెజ్ సాయం లొస్తిజి, నా బుబ్బు పన్నెండం గుంపుజ్ సయన్మది వరిజ్ ఇంక లావ్దూతెజి నా వందిజ్ పొక్ఎండ్రా? మీరు ఇనిక ఒడొబిజినిదెర్? 54 గాని నాను అయలెకెండె లొస్తిజి, యాలెకెండెనె ఇకెజ్ జర్గిదెజ్ ఇజి దేవుణు మాటదు రాస్తి మహిక ఎలాగ పూర్తి అనాద్? 55 అయావలె యేసు మంద లోకురిజ్ సుడొజి, “నాను ఒరెన్ డొజి కినికాండ్రె? మీరు కుర్లజాణిజ్, కొణెజాణిజ్ నజి అస్సెజ్ వాతిదెరా? విజి రోస్కు నాను దేవుణు గుడియె బసి బొద్దిసి మహగదె. అయావలె మీరు నజి అన్ఇతిదెర్. 56 ఎండనిజ్ ఇహిజి ముజాల దేవుణు వర్గతి మాటెజ్ ప్రవక్తరు రాస్తి మహికెజ్ అయాలెకెండె పూర్తి ఆదెజ్ యాకెజ్ విజు జర్గితె”, ఇజి వెప్తాన్. నస్తివలె వన్ని సిసూర్ విజేరె వన్నిజ్ డిస్తారె ఉహ్క సాహార్.

యేసు యూదురి కొర్దుదు

57 యేసుజ్ అస్సికార్ వన్నిజ్ విజు పుజెరిజి మున్ను పెరి పుజెరి ఆతి కయప ఇండ్రొ తత్తార్. అబ్బె పెరి పుజెరిజు లోకురి పెదలుజు కూడిత వాత మహార్. 58 దినిజ్ ఆక్కర్ ఇనిక అనాదొ ఇజి నెస్టెజ్, పేతురు కండెక్ దూరమ్దాన్ వన్ని వెనుక సొన్ని విజు పుజెరిజి మున్ను పెరి పుజెరి ఇలు అరబుదు

కావేసిని వరి వెట బస్తాన్. 59 పెరి పుజెరిబు, సన్హాద్రి నజం⁵ ఇజి యూదురి కోర్టుదికార్ విజేరె యేసుజ్ సప్తైజ్ తగితి రుజువ్ వందిజ్ వన్ని ఎద్రు అబద్ధం సాక్యం వెప్పివరిజ్ రెబాజి మహార్. 60 వన్ని ఎద్రు అబద్ధం సాక్యం వెప్పికార్ నండొండార్ వాతార్ గాని వన్నిజ్ సప్తైజ్ తగ్గి ఇనికబా దోహ్కావతాద్. 61 కడెవేరిదు రిఎర్ ముజాల వాజి, “నాను దేవుణు గుడిదిజ్ అర్పి మరి మూండ్రి రోస్కాజ్ లోఇ దనిజ్ మరెజి తొప్తాజ్ అట్టు ఇజి వాండ్రు వెప్తాన్”, ఇజి వారు వెప్తార్. 62 నస్తవలె విజు పుజెరిబు మున్కు పెరి పుజెరి అతికాన్ నిజిత్తాండ్రె యేసుజ్, “నీను ఇనికబా మరెజి వెహ్ ఇదా? వీరు మీ మున్కు వెప్పిని యా మాటెజ్ ఇనికెజ్?”, ఇజి వెప్తాన్. 63 గాని యేసు ఇనికబా వర్గివండ జమన్ మహాన్. అందెజె విజు పుజెరిబు మున్కు పెరి పుజెరి అతికాన్ వన్నిజ్ సుడెజి, “బత్తిజిని దేవుణుదిజ్ తోడు అసి నీ వెట ప్రమాణం కిజి నాను నిజి వెన్ బాజిన, “నీను క్రిస్తు నా, దేవుణు మరిసినా? అహిజ నజి వెహ్ అ”, ఇజి వెప్తాన్.

64 యేసు వన్నిజ్, “నీను వెప్తాక నిజమె. గాని లోకుమరిసి ఆతి నాను, వాని గొప్ప అతికారం మన్ని కాలమ్దు దేవుణు ఉణెర్ పడెకాదు బనిమంజి ఆగాసమ్దాన్ మొసోపు మున్కు వానిక మీరు సూణిదెర్ ఇజి నాను మిజి విజెరిజ్ నిజం వెప్పిన”, ఇజి వెప్తాన్.

65 నస్తవలె విజు పుజెరిబు మున్కు పెరి పుజెరి అతికాన్ నండొ కోపం ఆతండ్రె, వన్ని సాక్కాజ్ కిసి ఆజి, “వాండ్రు దేవుణుదిజ్ దూసిసి వర్గితాన్! మరి ఇంక సాక్కిరిబు అవ్ నరం సిల్లెద్. ఇదిలో వాండ్రు దేవుణుదిజ్ దూసిసి వర్గతిక మీరె వెహిదెర్. 66 మీరు ఇనిక ఒడెజిబినిదెర్?”, ఇజి వరిజ్ వెప్తాన్. అందెజె వారు”, వీండ్రు సావుదిజ్ తగ్గికాన్”, ఇజి వెప్తార్.

67-68 నస్తవలె వారు వన్ని మొకొమ్దు పూసి, ముటి అసి గుదితార్. నెగొండార్ కియుదాన్ డెయ్ జి, “క్రిస్తు నిజి డెయ్ తికాన్ ఎయెండ్రె ఇజి మజి వెహ్ అ, నీను దేవుణు ప్రవక్తగదె?”, ఇజి వెప్తార్.

పేతురు యేసుజ్ నెన్ ఏ ఇజి మూండ్రి సుటు వెప్పినాన్.

69 అయావలె వెల్లి అరబుదు పేతురు బస్తి మహిజ్ పణిమన్ని ఆతి ఉండ్రి బోదెలి వాతాదె, “నీనుబా గలీలయాదికాన్ యేసు వెట మహికి”, ఇజి వెప్తాద్. 70 పేతురు, “నీను ఇనిక వర్గిజినిదో నజి తెలివిద్”, ఇజి బాన్ మహి విజెరె ఎద్రు వెప్తాన్. 71 వాండ్రు అబ్బెణిజ్ వెల్లిమి గవుని డగ్రు సాహిజ్, మరి ఉండ్రి పణిమన్ని ఆతి బోదెలి వన్నిజ్ సుడెజి, “వీండ్రు నజరేతుదికాన్ ఆతి యేసు వెట మహాన్”, ఇజి అబె మహివరిజ్ వెప్తాద్. 72 వాండ్రు నాను వన్నివెట మండ్రెజ్ సిల్లెద్ ఇజి ప్రమాణం కిజి, “నాను వన్నిజ్ నెన్ ఏ”, ఇజి వెప్తాన్. 73 కండెక్టయం ఆతి వెనుక అబ్బె నిహిమహికార్ పేతురు డగ్రు వాజి, “నిజమె, నీనుబా వన్నివెట మహికి. నీను వర్గిని మాట విహిజానె తెలిజినాద్”, ఇజి వెప్తార్. 74 నస్తవలె వన్నిజ్ వాండ్రె నయివ్ సిబె ఆజి ప్రమాణం కిజి, “నాను వన్నిజ్ నెన్ ఏ”, ఇజి వరిజ్ వెప్తాన్. వెటన కొరు కెరెతాద్. 75 నస్తవలె, “కొరు కెరెని ముజాల నజి నెన్ ఏ ఇజి మూండ్రి సుట్టు. నీను వెప్పిలె”, ఇజి యేసు వన్నిజ్ వెప్తా మాట ఎతు కితాండ్రె పేతురు వెల్లి సాహండ్రె గుండె కొతె ఆజి డటం అడెబతాన్.

27

యూద, వన్నిజ్ వాండ్రె ఉరి ఆజినాన్

1 పెందాల, పెరి పుజెరిబుని లోకురి పెద్దెల్జి విజేరె యేసుజ్ సపిస్తైజ్ ఇజి ఉండ్రి నిర్లెం కిబిస్తైజ్ ఇజి ఉండ్రె కుట్ట ఆతార్. 2 వారు వన్నిజ్ తొప్తారె, రోమ అతికారి ఆతి పీలాతు డగ్రు తత్తారె వన్నిజ్ ఒపజెప్తారె. 3 నస్తవలె వన్నిజ్ ఒపజెప్తి యూద, వారు యేసుజ్ సప్తైజ్ ఇజి తీర్పు కితార్ ఇజి నెస్తాండ్రె, మన్నుదు నండొ దుకం ఆజి అయ మువయ్ వెండి రువయెబు పెరి పుజెరిబుని పెద్దెల్జి ఎద్రు ముప్తా తత్తాన్. 4 “ఇని తప్ప సిలివన్నిజ్ ఒపజెప్తానె నాను పాపం కిత”, ఇజి వాండ్రు వెప్తాన్. “దనిజ్ నజి ఇని పొతు సిల్లెద్. అయాక నీ బాజిత”, ఇజి వారు వెప్తార్.

§ 26:59 26:59 సిన్హాద్రిం సజం ఇహిజ 71 లోకుర్ మంజిని యూదురి పెరి కోర్టులెకెండ్ మహాద్ విజెరి పుజెరిబు మున్కు పెరి పుజెరి అతికాన్ మరి పెరి పుజెరి ఇనికాన్ ఇజిరి సజతిజి వందిజ్ తీర్పు తిరిసి మహార్. సన్హాద్రిం సజమేదు అయ సమయమేది పెరి పుజెరి వన్ని ఇండ్రెజి మొగవారు, మహి ముకెలమాతి పుజెరి ఇండ్రెజికార్ దేవుణు గుడికాన్ కినివరి నెయ్యి ముజాల పెరి పుజెరిలెకెండ్ మహికార్ మంజనార్. యెరూసల్లెమేదు మన్ని సిన్హాద్రిం సజమేదిజ్ నె పెరి సజతిజి వందిజ్ తీర్పు తీర్పైజ్ అతికారం మనాద్.

5 అందెజె యూద అయ వెండి రూపయెజ్ దేవుణుగుడిః లోఱ విసిర్తాండ్రె సాహాన్. వెనుక సొన్ని వన్నిజ్ వాండ్రె ఉరి లాగె ఆతాన్.

6 పెరి పుజెరిబు అయ వెండి రూపయేబు పెహూరె, “ఇకెజ్ ఒరెన్ వన్నిజ్ సప్పి వందిజ్ సిత్తి డబ్బుజ్, అందెజె నంద పెటెదు అర్ప్పిక దేవుణు రూలుదిజ్ పడిఃవిద్”, ఇజి వర్గితార్. 7 వారు అయ డబుదాన్ ఆఱ దేసెమ్ది వరిజ్ మూస్తాజ్, కుమెరివన్ని మడిఃజ్ కొణాట్ ఇజి ఉండ్రె నిర్ణెం కితార్. 8 అందెజె ఏలుదాక అయ మడిఃజు, “నల మడిఃజు” ఇజి కూకె ఆజినాద్. 9-10 “దేవుణు నజె ఆడ్ర సిత్తిలెకెండ్ర, ఇస్తాయేలు లోకుర్ వన్ని వందిజ్ విలువ లెకెండ్ర సిత్తి ముప్పుయే వెండి రూపయెజ్ వారు లాగితారె కుమెరి వన్ని బూమి కొండెజ్ సితార్”*. ఇజి దేవుణు ముజాల ప్రవక్త ఆతి యిరిమ్మ్య వెట వర్గితిక యా లెకెండ్ర పూర్తి ఆతాద్.

యేసు పీలాతు ఎద్రు నిల్సినాన్

11 యాకెజ్ జరిగిజి మహివలె యేసు పెరి అతికారి ఆతి పిలాతు ఎద్రు నిల్సి మహాన్. నస్తివలె అతికారి ఆతి పిలాతు, “యూదురిజ్ రాజు ఆతికి నీనెనా?”, ఇజి వన్నిజ్ వెన్బాతాన్. “నిజమె, నీను వెప్తి లెకెండ్రె”, ఇజి యేసు మర్జి వెహ్సాన్. 12 పెరి పుజెరిబు, పెద్దెల్జు వన్ని ముస్సు తపుజ్ మోప్పివెలె వాండ్రు ఇనికబా మర్జి వెహ్ఎతాన్. 13 నస్తివలె పిలాతు, “వీరు నీ ముస్సు ఎసా తపుజ్ మోప్పినార్, యాకెజ్ వినఱతిదా?”, ఇజి వన్నిజ్ వెన్బాతాన్. 14 వాండ్రు వారు వెప్తి మాటెజ్ఉండ్రె దనిజ్బా మర్జి ఇనికబా వెహ్ఎతాన్. అందెజె అతికారి నండ్రె బమ్మ ఆతాన్.

15 పస్సువండ్రెయెదిజ్ జెలిదు మన్నివరి లోఱ, లోకుర్ కోరజిని ఒరెన్ వన్నిజ్ విడుదల కిని అలవాటు అతికారిజ్ మనాద్. 16 అయావలె బరాబ ఇని ఒరెన్ మూర్కతం మన్ని అన్నయ వాండ్రుననికాన్ ఒరెన్ జెలిదు మహాన్. 17 అందెజె లోకుర్ విజెరె కూడఃజి వాతివెలె పిలాతు, “నాను ఎయెరిజ్ విడుదల కిదెజ్ ఇజి మీరు కోరిజినిదెర్? బరబ్బెనా, సిల్లిజ్ క్రీస్తు ఇజి కూకె ఆజిని యేసుజా?”, ఇజి వరిజ్ వెన్బాతార్. 18 వారు యేసు ముస్సు గోస ఆతారె వన్నిజ్ ఒవజెప్త మనార్ ఇజి వాండ్రు నెస్త మనాన్.

19 పిలాతు నాయం తీరిస్సి బాడిఃదు బస్సి మహివలె వన్ని ఆల్సి, “ఇని తప్పబా సిల్లి అయా నెగ్గివన్నిజ్ ఇనికబా కిదెజ్ నీను కూడఃదెజ్ ఆవిద్. వన్ని వందిజ్ నేండ్రు ఉండ్రె కలాదు నాను నండ్రె బాద కల్లిత మన”, ఇజి వన్నిజ్ కబ్బురు పొక్తాద్.

20 పెరి పుజెరిబుని పెద్దెల్జు, బరబ్బెజ్ డిఃసి సీజి యేసుజ్ సప్తెజ్ ఇజి అతికారి ఒప్పిలెకెండ్రె వెహ్సాజ్ ఇజి లోకురిజ్ రేప్పి మహార్. 21 “యా రివెర్ లోఱ ఎయెరిజ్ నాను డిఃస్టెజ్ ఇజి మీరు కోరిజినిదెర్?”, ఇజి అతికారి వరిజ్ వెన్బాతిజ్, “బరబ్బెజ్నె”, ఇజి వారు మర్జి వెహ్సార్. 22 “అహిజు క్రీస్తు ఇజి కూకె ఆజిని యేసుజ్ నాను ఇనిక కిదెజ్?”, ఇజి వరిజ్ వెన్బాతిజ్ “వన్నిజ్ సిలువ పొక్అ”, ఇజి విజెరె వెహ్సార్. 23 “ఎందానిజ్ వన్నిజ్ సిలువ పొక్తెజ్, వాండ్రు ఇని తపు వణి కిత్తాన్?”, ఇజి పిలాతు వరిజ్ వెహ్సాజ్, “వన్నిజ్ సిలువ పొక్అ”, ఇజి మరి ఒదె వారు డేల్సి వెహ్సార్. 24 గగోలిని లావ్ఆజినిక ఆవిండ మరి ఇనికబా కిదెజ్ అట్విన్ ఇజి నెస్తాండ్రె పిలాతు, లోకుర్ విజెరె ఎద్రు ఏరు లోసి వన్ని కికు నొరబజి, “ఇని తప్పసిల్లి వన్ని నలదిజ్ నజె ఇని సమందం సిల్లె, మిజెని సమందం మనాద్”, ఇజి వెహ్సాన్. 25 అందెజె లోకుర్ విజెరె, “వన్ని నల మా ముస్సుని మా కొడోర్ ముస్సు మనీద్*”, ఇజి మర్జి వెహ్సార్. 26 నస్తివలె వారు కోరితి లెకెండ్రె వాండ్రు బరాబెజ్వరి వందిజ్డిఃస్త సితాన్. గాని యేసుజ్ కొరడెఃజాణిజ్ డెయేజి సిలువ పొక్తెజ్ ఒవజెప్తాన్.

సయనమ్దికార్ యేసుజ్ వెక్రిసినార్.

27 నస్తివలె అతికారి సయనమ్దికార్ యేసుజ్ వారు బత్తిజిని ప్రిటోరియం ఇని ఇండ్రొ ఒతారె, సయనమ్దికార్ విజెరె వన్ని సుటులం కూడిఃతార్. 28 వారు వన్ని నీరి సొకెజ్ లాగితారె మరి ఉండ్రె ఎరాని నీరి సొక వన్నిజ్ తొడుఃగిస్తాత్. 29 వారు సాప్పాణిజ్ అటారె ఉండ్రె టోపి తయార్ కిజి వన్ని బురాదు ఇట్టార్. ఉండ్రె డుడు వన్ని ఊణిర్కియుదు అస్సిస్తారె వన్ని ఎద్రు మూణుకుజ్ ఊణిర్జి,

* 27:9-10 27:9-10 జేకరి 11:12,13; యిర్మీయా 19:1-13; 32:6-9. * 27:25 27:25 వన్ని నల మా ముస్సుని మా కొడోర్ ముస్సు రిపిద్ - తెలుగు

“యూదురిజ్ రాజు ఆతికి గెలిసాన”, ఇజి వెహ్ని వన్నిజ్ వెక్రిస్తార. 30 వన్ని ముస్కు పూసి, అయ డుడు లాగ్ని వన్ని బురాదు మరి మరి డెయ్తార. 31 వన్నిజ్ వెక్రిసి వీజితి వెనుక వన్నిజ్ తోడుగిస్తి మహి నీరి సొక్క లాగితారె, వన్ని నీరి సొక్కజ్ తోడిగిస్తారె సిలువ పొక్కజ్ వారు వన్నిజ్ ఒత్తార.

యేసు సిలువ పొక్కె ఆజినాన్

32 వారు సొన్ని మహివలె కురెనియ ఇని పట్టుమదికాన్ సీమోను ఇని ఒరెన్ వన్నిజ్ సుడతారె, సిలువ పిండెదెజ్ వన్నిజ్ బలవంతం కితార. 33 బుర్ర వెణకి ఇని అర్దం అని పేరుమని గొల్గొత్త ఇని బాడిడు వాతార. 34 అబె సేందు కలప్తి ద్రాస కడు వన్నిజ్ ఉండెజ్ సిత్రార గాని వాండ్రు కెపతాన్, 35 వన్నిజ్ సిలువ పొక్తి వెనుక వన్ని సొక్కజ్ ఎయెరిజ్ దోహ్కె ఇజి నెస్టెజ్ సీటిజ్ పొక్కారె వన్ని సొక్కజ్ సీబె ఆతార. 36 దన్ని వెనుక వారు అబ్బె బసి వన్నిజ్ కావ్కిజి మహార. 37 “వీండ్రు యూదురిజ్ రాజు ఆతి యేసు”, ఇజి వాండ్రు కితి తప్ప రాసి వన్ని బురాదిజ్ ముస్కు ఇట్టార. 38 వన్ని ఉణెరె పడకాదు ఒరెన్ వన్నిజ్, వన్ని డేబ్ర పడకాదు ఒరెన్ వన్నిజ్ రివెర్ డొజారిజి వన్ని వెట సిలువ పొక్కారె.

39-40 అయ సర్దు సొనికార విజేరె బుర్ర దుక్కి, “దేవుణు గుడిదిజ్ అరిప్పి మూండ్రీ దినమ్కాజ్ మరజి తొప్పికి, నీను దేవుణు మరిసి ఇహిజి నిజీ నీనె రక్సిన్ అ, సిలువదాన్ డిగిజి ర అ”, ఇజి వన్నిజ్ పడిఎండ సెఇ మటిజ్ వెహ్ని మహార.

41 అయ లెకెండెనెస, పెరి పుజెరిజు, లోకురి పెద్దెల్జ, దేవుణు మోసెజ్ సీతి రూలుజ్ నెస్పిస్సికార విజేరె వన్నిజ్ వెక్రిస్తార. 42 “వీండ్రు మహి వరిజ్ తప్పిస్తాన్, గాని వన్నిజ్ వాండ్రె తప్పె ఆదిజ్ అబ్వితాన్. వాండ్రు ఇస్తాయేలుది రాజు ఇహాన్. ఏలు వాండ్రు సిలువ ముస్కుహాన్ డిగిటిజి వన్నిజ్ మాపు నమినావ్. 43 వాండ్రు దేవుణు ముస్కు నమకం ఇట్టాన్. “నాను దేవుణు మరిసి” ఇజి వెహ్నాన్. అందెజ్ దేవుణుదిజ్ వన్నిజ్ సిలువదాన్ రక్సిస్తాండ్రా, ఇజి మాటు నూణాట్ దేవుణు వన్నిజ్ తప్పిసిన్ ఇజి వారు వెహ్నార. 44 అయా లెకెండెనె వన్నివెట సిలువ పొక్కె ఆతి మని డొజారిజ్ బా వన్నిజ్ వెక్రిస్తార.

యేసు సిలువదాన్ సాజినాన్

45 మదెనమ్దాన్ మూండ్రీ గంటజ్ దాక దేసెం విజు సీకటి ఆతాద్. 46 డగ్రు మూండ్రీ గంటజ్ అతివెలె యేసు, “ఏలి, ఏలి లమ సబక్తాని”, ఇజి నండొ డేల్లివెహ్నాన్. “నా దేవుణు, నా దేవుణు నజీ ఎండనిజ్ కియ డిస్తి?”,* ఇజి యా మాటదిజ్ అర్దం. 47 అబ్బె నిహి మహికార నెగెండారె యా మాట విహారె, “వాండ్రు ఏలియెజ్ కూక్కినాన్”, ఇజి వెహ్నార.

48 వెటనె వరి లొఇ ఒరెన్ ఉహ్కెక్కి సొన్ని దూది తత్తాండ్రె పులాని రసమ్దు ముడుక్కి యేసుజ్ ఉండెజ్ ఉండ్రీ డుడుదాన్ వన్ని వెయ్యెదు అందిస్తాన్. 49 మహికార, “ఇనిక కిమ, ఏలియ వాజి వన్నిజ్ తప్పిస్తాన్ ను, నూణాట్”, ఇజి వెహ్నార. 50 యేసు మరి డటం డేల్లిస్తాండ్రె పాణం డిస్తాన్. 51 అయ గడియారునె దేవుణు గుడిడు మని తెర ముస్కుహాన్ అడ్డి దాక కింజాదె రుండి ముకెజ్ ఆతె. బూమి కద్దితాద్. నటుజ్ బదెజ్ ఆతె. 52 దూకిజ్ రే ఆతెనె ముజాల సాతి మహి నీతి నిజాయితి మనికార నండొండారె ఒడొల్దాన్ మరజి సీజితార. 53 వారు దూకిజాణిజ్ వెల్లి వాజి, యేసు సాతి వరిబాణిజ్ మరజి నిజీతి వెనుక దేవుణు వన్నివందిజ్ కేట కిత్తి పట్టుమదు† సొన్ని నండొండారెజ్ తోరె ఆతార. 54 నదాతిపత్తి‡ వెటయేసుజ్ కావ్కిజి మహికార బూమి కద్దినిక, మరి జర్తితికెజ్ విజు సుడెజి నండొ తియెల్ ఆతార. “వీండ్రు, నిజమె దేవుణు మరిసినె”, ఇజి వెహ్నార. 55 నండొండెక్ బోదెక్ కండెక్ దూరమ్దాన్ సుడెజి మహె. వారు యేసుజ్ అవ్సరం ఆతికెజ్ కిజి గెలిలయదాన్ వన్నివెట వాతికెజ్. 56 వన్కా లొఇ మగ్గలెనె మరియాని, యాకోబు, యోసె ఇని వరి అయేసి ఆతి మరియని జెబెదాయి మరిసిరిజ్ అయేసి బానె మహార.

యేసుజ్ మూస్సిక

57-58 యేసుజ్ లొజిజి మనికానాతి అరిమతా ఇని పట్టుమదికాన్ యోసేపు ఇని ఒరెన్ ఆస్తి మన్నికాన్. పొద్దు ఆతివెలె, వాండ్రు పిలాతు డగ్రు సొహండ్రె యేసు ఒడొల్ లొస్తాన్. యేసు ఒడొల్ వన్నిజ్ సీదెజ్ ఇజి పిలాతు ఆడ్ర సీతాన్. 59 యోసేపు అయ ఒడొల్ లొస్తాండ్రె నెగ్గి తెలాని

* 27:46 27:46 కీర్తన 22:1. † 27:53 27:53 యెరూసలేం. ‡ 27:54 27:54 నయేనమ్ది వంద మణిసిరిజ్ నడిపిసినికాన్.

పాతెజాణిక్స్ సుటిసి, నటుదిజ్ దొల్పిస్తి, వన్ని వందిజ్ తయార్ కితి మహి కొత్త దూకిదు ఇడ్జెతాన్. 60 ఉండ్రీ గుండ్రాని సెప్ప వణకు సడిపిసి దూకిదిజ్ అడు కితాండ్రె సాహాన్. 61 మగ్గలెని మరియాని మరి ఉండ్రీ మరియు అబ్బె దూకిదిజ్ ఎద్దు బన్దెమహె.

దూకిదిజ్ కాప్ కిజినార్.

62-63 మర్గునాండిజ్, ఇహిజ విస్త్రాంతిదినం వందిజ్ తయార్ ఆని దినం వెనుక, పెరి పుజెరిబుని, పరిసయరు పిలాతు డర్గు కూడేజి వాతారె, “బాబు, అయ అబద్దం వెప్పి మొసెం కితికాన్ బల్గితి మహివలె, “మూండ్రీ దినమ్మకు ఆతి వెనుక నాను మర్జి నీజ్నాలె’ ఇజి వెప్పి మహిక మజి ఎతు మనాద్. 64 అందెజె మూండ్రీ దినమ్మకుదాక దూకిదిజ్ నెగెండ సుడేదెజ్ ఆడ్ర సీఅ. సిల్లిజ వన్ని సినూర్ వాజి వన్నిజ్ వెర్జి ఒసి, వాండ్రు సాతి వరి బాణిజ్ మర్జి నిజితాన్, ఇజి లోకురిజ్ వెప్పూర్. అహె కితిజ కడెవెరిదిక మొదొహిదనిజ్ ఇంక మరి ఒదె మోసెం ఆనాద్”, ఇజి వెప్పూర్.

65 అందెజె పిలాతు, “కాప్ కినివరిజ్ ఒసి మీరు కియుదాన్ కిడెజ్ అట్టి లెకెండ దూకిదిజ్ జాగర్ కాప్ కిదు”, ఇజి వరిజ్ వెప్పూన్. 66 వారు సాన్ని అయ దూకిదిజ్ సీలు పొకిస్తారె, జాగర్ సుడేదెజ్ కాప్ కిని వరిజ్ బ ఇడ్జెతాన్.

28

యేసు మర్జి నిజిజినాన్

1 విస్త్రాంతిదినం గడన్సి సాహి వెనుక, వారమ్దిజ్ మొదొహి దినమ్మదు జాయ్ అజి మహివలె, మగ్గలెని మరియాని మరి ఉండ్రీ మరియు దూకిదు సుడేదెజ్ సాహార్. 2 వెటెన బూమి కల్లితాద్. ఎందనిజ్ ఇహిజ పరలోకమ్దాన్ ఒరెన్ దేవుణు దూత డిగిత వాత్రాండ్రె అడు మహి పణకు ఎర్లిసి దని ముస్సు బన్ద మహాన్. 3 అయ దూత ఒడోల్ మిర్సిని జాయ్ లెకెండ మహాద్. వన్ని సాక్కెజ్ గాండులెకెండ తెలాజ్ మహె. 4 వన్నిజ్ సుడేజి కాప్ కినికార్ తియెల్ ఆతారె వణక్కి వరి పాణం సాహి లెకెండ ఆత మహార్. 5 దేవుణు దూత అయ బోదెకాజ్ సుడేజి, “మీరు తియెల్ ఆమాట్. సీలువ పొకె ఆతిమన్ని యేసుజ్ మీరు రెబాజినిదెర్ ఇజి నాను నెసిన. 6 వాండ్రు ఇబ్బె సిల్లెన్. వాండ్రు వెప్పి లెకెండెన మర్జి నిజితాన్. రదు, వాండ్రు గూర్తిమహి బాడిః సుడేదు. 7 మీరు బేగి సాన్ని వాండ్రు సాతి వరిబాణిజ్ మర్జి నిక్తాన్. వాండ్రు మిజి ఇంక ముజాల గలీలయ సాన్నినాన్. మీరు అబ్బె వన్నిజ్ దసూల్ ఆనిదెర్, ఇజి వన్ని సినూరిజ్ వెప్పూ. ఇదిలో యాక ఎలు నాను మిజి వెప్పిన ఇజి వరిజ్ వెప్పూన్. 8 అందెజె అవిక్ తియెల్ ఆజి గొప్ప సర్దదాన్ వన్ని సినూర్జి యా మాటెజ్ వెప్పాజ్ ఉహాక్కి సాహె. 9 వెటెన యేసు వన్యా ఎద్దు తొరె ఆత్రాండ్రె, “మిజి నెగెండ మనిద్”, ఇజి వెప్పూన్. అవిక్ వన్ని డర్గు వాజి పాదమ్మకు అసి వన్నిజ్ పడగ్గి మాడిస్తె. 10 నస్తివలె యేసు, “మీరు తియెల్ ఆమాట్. మీరు సాన్ని నా కూలెజ వెటె గలీలయదు సాండ్రు ఇజి వెప్పూ. వారు అబె నజి దసూల్ ఆనార్లె”, ఇజి వనకాజ్ వెప్పూన్.

11 అవిక్ సాన్నిమహిజ్, దూకిదిజ్ కాప్ కిజి మహికార్ సెగెండార్ పట్టుమ్మదు సాహారె, జర్గితి సజతిజ్ విజు పెరి పుజెరిజ వెటె వెప్పూర్. 12-13 అందెజె వారు లోకురి పెద్దెల్జ వెటె కూడేజి వాతారె ఉండ్రీ ఆలోసనం కితార్. వారు అయ సయనమ్మది వరిజ్ నండో డబ్బుజ్ సితారె, “మాపు నిద్రి కిజి మహివలె వన్ని సినూర్ మదరెతు వాతారె వన్నిజ్ వెప్పా ఒతారె ఇజి మీరు వెప్పూ. 14 యా మాటె అతికారి గిబ్బిదు సాహిజ మాపు వన్నివెటె వర్గిజి మిజి ఇనికబా రెవిండ సూణావ్లె”, ఇజి వరిజ్ వెప్పూర్. 15 అందెజె అయ సయనమ్మదికార్ డబ్బు అస్తారె వరిజ్ వెప్పావజెనె కితార్. యా డోజకత ఎలుబా యూదురి లోఇ సాటి ఆజిని మంజినాద్. 16 పదకొండు మన్ని సినూర్ యేసు వరిజ్ వెప్పా మన్ని గలీలయాది గొరోత్ సాహార్. 17 వారు వన్నిజ్ సుడేతిజ్ వన్నిజ్ పొగ్డిజి మాడిస్తారె. గాని సెగెండార్ అనుమానం ఆతారె. 18 నస్తివలె యేసు వరి డర్గు వాత్రాండ్రె, “పరలోకమ్మదుని బూమి ముస్సు విజు అతికారమ్మకు దేవుణు నజి సిత మనాన్. 19 అందెజె మీరు సాన్ని విజు జాతిజాణి వరిజ్ నా సినూర్ కిదు. బుబ్బె పేరుదాన్, మరిన్ పేరుదాన్, దేవుణు ఆత్మ పేరుదాన్ వరిజ్ బాప్తిసం సీదు. 20 మరి నాను మిజి ఆగ్గు సీతిలెకెండ,

నాను మిజి నెస్పిస్తి విజు వనకాజ్లోజిజి మండ్రెజ్ ఇజి వరిజ్ నెస్పిస్తు. ఇదిలో నాను యా లోకమ్ది ఆక్కుర్ దాక ఎలాకాలం తవ్విండ మీవెట మంజిన”, ఇజి వరిజ్ వెహ్సన్.

మార్కు రాస్తే సువార్త

నెల్ల కిబిసినిక

యా పుస్తకం రాస్తానా మార్కు.. వీండు బర్నబెజ్ దడ్డుదికాన్. విన్నిజ్ మరి ఉండ్రి పేరు యోహాను ఇజిబా కూర్కార్. బర్నబని పప్పులు నెల్లదాన్ పేతురువెట కూడజి క్రీస్తు సేవపణి కిదెజ్ మార్కుజ్ అవ్కాసం దోహ్కాద్. యా సువార్త రాస్తాజ్ పేతురుబాణిజ్ నెస్తాండ్రి రాస్తాన్ ఇజి అర్ధమాజినాద్. రాస్తా కాలం క్రీస్తు యా లోకమ్దు వాజి సాజి మర్రి నిజీతివెనుక సెగం పంటిజ్ గడజివెనుక రాస్తాన్. ముకెలమతిక, క్రీస్తు గొప్ప పెరి బమ్మాతి పణిజ్ కిత్తి దేవుణు మరిసి ఇజి, దేవుణుదిజ్ సేవ కితికాన్ ఇజి, మార్కు రాసి తోరిస్తాన్. క్రీస్తు వెహ్తి బోదదిజ్ ఇంక క్రీస్తు కిత్తి బమ్మాతి గొప్ప పెరి పణిజి వందిజ్ లాపు వెహ్తి రాస్త మనాన్. క్రీస్తు కిత్తి గొప్ప పెరి బమ్మాతి పణిజ్ వద్దెనిమితి రాస్త మనాన్. నాలిగినె కతెజ్పజి రాస్తాన్.

యోహాను దేవుణు మాటసాటిసినాన్

1 దేవుణు మరిసి ఆతి యేసు క్రీస్తు* వందిజ్ సువార్త ఇబ్బె మొదొలసినాద్. 2 పూర్బ దినమ్కాజ్ ముజాల దేవుణు వన్ని మరిసిజ్ వెహ్తి మాటెజ్ యెసయ ప్రవక్త ఈహు రాస్త మహాన్. “ఇదిలో, నాను నా కబ్బు తన్నివన్నిజ్ నీ ముజాల పోక్కిన. లోకు నిజీ ధరు కిదెజ్ ఇజి వాండ్రు నీ ముందల నీ సరి నెగెండ్ కినాన్. 3 బిడిమ్బూమిదాన్ వాండ్రు ఈహు డేల్లి వెహ్తినాన్ ప్రబుజ్ లోకుడగు వాదెజ్ సరి తయర్ కిదు. ప్రబుజ్ లోకుడగు వాదెజ్ సరి తినాజ్ కిదు†”. 4 యెసయ ప్రవక్త వెహ్తిపజి యోహాను బిడిజ్ బూమిదు వాతాన్. “లోకుర్ పాపమ్కు డిసిసీజి బాప్తినం లాగి ఆదు. దేవుణు పాపమ్కు సెమిస్తాన్ ఇజి వెహ్తి యోహాను బానె లోకాజ్ బాప్తినం సీజి మహాన్.

యేసు బాప్తినం లాగె ఆజినాన్

5 యూదయ దేనిమ్దికార్ విజెరె, యెరూసలేం పట్టుమ్దికార్ విజెరె సొత్తారె యోహాను డగు వాతార్. వారు పాపమ్కు ఒప్ప కొటార్. యోహాను వరిజ్ యెర్దాన్ గడ్డాదు బాప్తినం సితాన్. 6 యోహాను ఒంటె బులుస్కాణిజ్ తయర్ కిత్తి సాక్క, పొర్వాజి, నడజుముదు తోలు బెట్టు తోహ్త మహాన్. వాండ్రు మెపెలిక్కి అడివి తేనె తింజి మహాన్. 7 యోహాను లోకాజ్ ఈహు వెహ్తి వెహ్తాన్, “నా వెనుక ఒరెన్ వానాల్లె. వాండ్రు నజీ మిన్తి నండొ పెరికాన్. వన్ని జోడు బెలిటు కూతెజ్బా నాను ఏవటితికాన్ అవి. 8 నాను మిజి ఏరుదు బాప్తినం సీజిన. నా వెనుక వానికాన్ దేవుణు ఆత్మదాన్ బాప్తినం సీనాల్లె”.

9 ఆ దినమ్కాజ్ ఒరెండు యేసు గలీలయదు మన్ని నజరేతుదాన్ యెర్దాన్ గడ్డాదు వాతాన్. అబ్బె యోహాను యేసుజ్ యెర్దాను గడ్డాదు బాప్తినం సితాన్. 10 గడ్డదాన్ వెల్లి వాజిమహిజ్ ఆగాసం రే ఆతాదె దేవుణు ఆత్మ పాపరపొటి లెకెండ్ వన్ని ముస్కు వానిక యేసు నుడతాన్. 11 “నీను నాను ప్రేమిసిని నా మరిన్. నీ వందిజ్ నాను నండొ సర్ద ఆజిన”, ఇజి పరలోకమ్దాన్ ఉండ్రి కంటం వాతాద్.

12 వెటనె దేవుణు ఆత్మ యేసుజ్ బిడిమ్ బూమిదు పోక్కాన్. 13 వాండ్రు అబ్బె నలవయ్ రోస్కు రెయుపొగల్ మహాన్. సయ్యాన్ యేసుజ్ తప్ప కిబిస్తిజ్ పరిస కిజి నుడతాన్. అబ్బె అడివి జంతుజెవెట మహాన్. దేవుణుదూతార్ వన్నిజ్ నెగెండ్ నుడతార్.

యేసు సినూరిజ్ కూక్కినాన్.

14 హీరోదు రాజు యోహానుజ్ జెలిదు ఇడితివెనుక యేసు గలీలయదు సాహండ్రి దేవుణునువార్త బోదిస్తాన్. 15 “దేవుణు ముజాల్లి ఏర్పాటు కిత్తి టయం ఏలు వాతాద్. దేవుణు ఏలుబడి కిని గడియ డగు ఆత మనాద్. మీ పాపమ్కు ఒప్పకొడజి డిసిసీదు, నాను వెహ్తి సువార్త నమ్మిదు”, ఇజి యేసు వరిజ్ బోదిస్తాన్.

* 1:1 1:1 లోకాజ్ రక్తిస్తిజ్ దేవుణు ఏర్పాటు పోక్కికాన్. † 1:2 1:2 మలాకి 3:1. ‡ 1:3 1:3 యెసయ 40:3.

16 యేసు గలీలయ సమ్దరం ఒడ్డుదాన్ సొన్నిమహిజ్ సీమోనుజ్ని వన్నితంబెర్సియాతి అంద్రెయెజ్ నుడతాన్ వారు సమ్దరమ్దు వల పొక్కి మొయేజ్ అసి మహార్. ఎందానిజ్ ఇహిజు వారు జాలెరిజు. 17 “నా వెట రదు. లోకాజ్ ఎలాగ నా సిసూర్ కిదెజ్ ఇజి నెన్నిసొలై”, ఇజి యేసు వరిజ్ వెప్తాన్. 18 వారు వెటనె వలేజ్డిసి వన్నివెట సొహార్. 19 యేసు కండెక్ దూరం నడిజి సొహిజ్ జెబెదెయ మరిసి యాకోబుని, యాకోబు తంబెర్సి యోహాను, వరిణోణిదు బసి వలేజ్ నెగెండే కిజి మహిజ నుడతాన్. 20 యేసు వరిజ్ నుడతెవెటనె కూక్తాన్. వారు అప్పొసిజ్, వన్నివెట కూడేజి పణికినివరిజ్ డోణిదు డిసి యేసువెట సొహార్.

యేసు దెయమ్దిజ్ ఉల్ప్పినాన్

21 యేసుని వన్నిసిసూర్, కపెర్నహము ఇని పట్టుమ్దు సొహార్. విస్తాంతిదినమ్దు యేసు యూదురి మీటిజ్ ఇండ్రొ సొహండ్రె నేర్పిస్తాజ్ మొదొల్స్తాన్. 22 యేసు నెన్నిస్తిక విహారి లోకుర్ నండొ బమ్మ అతార్. ఎందానిజ్ ఇహిజు యూదురి రూలు నెన్నిస్తివరి లెకండే ఆవెండ నండొ అతికారమ్దాన్ మన్ని వన్నిలెకండే నెన్పిస్తాన్. 23 నస్తివలె వరి మీటిజ్ ఇండ్రొ దెయం అస్తి మహికాన్ ఒరెన్ మహాన్. 24 వాండ్రు “నజరేతుదికి యేసు, మా వెట నిజి ఇని పణి? మా పణి విజు అడు కిదెజ్ వాతిదా? నీను ఎయెండ్రొ ఇజి నాను నెసి. నీను దేవుణు బాణిజ్ వాతి నెగ్గి వాండ్రు”, ఇజి డటం గగోలాజి వెప్తాన్. 25 అందెజి యేసు, “అల్లెజి మన్అ. వన్నిజ్ డిసి వెల్లి రఅ”, ఇజి ఆ దెయమ్దిజ్ కోపం దాన్ వెప్తాన్. 26 అయవలె అయ దెయం అది అస్తిమహివన్నిజ్ దూక్కి డట్టం డేల్స్తాదె డిస్త సొహాద్. 27 అబ్బె మనికార్ విజెరె ఇక నుడతారె నండొ బమ్మ అతార్. “ఇక ఇనిక? వీండ్రు కొత్త నజతిజ్ నెర్పినినాన్. దేవుణు సత్తు దాన్ అతికారమ్దాన్ వీండ్రు సొన్అ ఇజి దెయమ్కాజ్ వెప్పినాన్. అవి డిసి సొన్నినె”, ఇజి ఒరెన్ వెట ఒరెన్ వర్గితార్. 28 వన్ని వందిజ్ మాటెజ్ అయా గలీలయ ప్రాంతం సుటుల విజు వెటనె నెద్రితె.

యేసు నండొండారిజ్ నెగెండే కిజినాన్.

29 వారు మీటిజ్ కిని ఇండ్రొణాజ్ సొన్ని యాకోబు, యోహానువెట, కూడితారె సీమోను, అంద్రెయ ఇని వరి ఇండ్రొ సొహార్. 30 సీమోను మీమ్మి నోబు అస్త మహాద్. వారు వెటనె దని వందిజ్ యేసు వెట వెప్తార్. 31 యేసు దని డగ్రు వాజి కిదిజ్అసి దనిజ్నిక్తాన్. నస్తివలె నోబు డిస్తాద్. నోబు డిస్తిజ్ అది వరిజ్ ఉండెజ్ సితాద్. 32 షొద్దు సొహి అతివలె లోకుర్ నండొ నండొ రకమ్కాణిజ్ బాద ఆజి మహివరిజ్ దెయమ్కు అస్తివరిజ్ విజెరిజ్ యేసు డగ్రు తత్తార్. 33 వటనమ్దికార్ విజెరె ఇ అల్లు ముజాలే కూడిత మహార్. 34 యేసు నండొ రకమ్కాణి జబ్బుమహి నండొండారిజ్ నెగెండే కిత్తాన్. దెయం అస్తివరిబాణిజ్ వన్కాజ్ ఉల్ప్తాన్. వీండ్రు దేవుణు మరిసి ఇజి దెయమ్కు నెన్పె మహి అందెజి వాండ్రు వన్కాజ్ వర్గివిండ కిత్తాన్.

యేసు గలీలయదు సాటిసిసూర్

35 మర్చ నాండెజ్ యేసు సీకటి మంబునె నిజ్జి పెందల ఎయెర్ సిల్లి ఉండ్రెబాడ్డిదు సొహండ్రె పార్చనం కిత్తాన్. 36 సీమోను, వన్ని వెట మహికార్, యేసుజ్రెబాజి మహార్. 37-38 యేసుజ్ నుడతారె, “విజెరె నిజి రెబాజినార్”, ఇజి వెప్తాజ్ యేసు, “డగ్రు మని మరి పట్టుమ్కాజ్బా సొనాట్. నాను అబెబా దేవుణు మాటెజ్ సాటిస్తెబ్బలై. దన్ని వందిజ్ నాను వాత మన్ను”, ఇజి వెప్తాన్. 39 యేసు గలీలయ విజు బూలాజి యూదురు మీటిజ్ కిని ఇల్కాజ్ బోదిస్తాన్. దెయం అస్తి వరిబాణిజ్ వన్కాజ్ ఉల్ప్తాన్.

యేసుప కుస్తు రోగం అతివన్నిజ్ నెగెండే కిజినాన్.

40 ఒరెన్ కుస్తు రోగం మనికాన్ యేసు డగ్రు వాజి ముణుకుజ్ ఊరిజి, “నిజి ఇస్తం మహిజ నజి నెగెండే కిదెజ్ అటన్”, ఇజి బతిమాలితాన్. 41 యేసు వన్ని మున్ను కనికారం ఆజి కియు సొప్పి వన్నిజ్ ముట్టి, “నజి ఇస్తమ్నె, నీను నగెండే అఅ”, ఇజి వెప్తాన్. 42 వెటనె వన్నిజ్ మహి జబ్బు డిస్తాద్. వాండ్రు నెగెండే అతాన్.

43-44 అయవలె యేసు, “ఎయెవెటబా ఇనికబా వెప్తా. నీను తినాజ్ సొన్ని నీ ఒడిజ్లయూద పుజెరిజ్ తోరిన్అ. నీను నెగెండేఅతి వందిజ్ మోని ముజాలే ఆడ్ర సితివజి దేవుణుదిజ్సంత సిఅ” అహె నీను నెగెండే అతి ఇజి లోకురిజ్ తోరిన్అ”, ఇజి కనితం వెప్పి షొక్తాన్. 45 గాని ఆ

నెగెండ్ఆతికాన్ సొన్ని వాండ్రు నెగెండ్ఆతిక విజేరిజ్ మరి ఒద్దె వెహ్తాన్. అహిజ్బా విజుబాణీజ్ నండో లోకుర్ యేసుబాన్ వాతార్.

2

యేసు కిక్కు కాల్కు అర్తివన్నిజ్ నెగెండ్ కిజినాన్

1 నెగం రోస్కు ఆతి వెనుక యేసు మరి కపెర్నహముదు వాతాన్. వాండ్రు ఇండ్రో వాతాన్ ఇని విజెరి వెహర్. 2 నండో లోకుర్బాన్ కూడిజి వాతార్. అస్టెజ్ అట్ఇ లోకుర్వాతార్. అందెజె ఇల్లు లోఇబా అర్బుదుబా బాడ్డిః సిల్లెండ ఆతాద్, యేసు వరిజ్ దేవుణు మాటెజ్ బోదిస్తాన్. 3 కికు కాల్కు అర్తి వన్నిజ్* నాల్వర్ పిండిత తతార నెగెండార్ యేసుబాన్ వాతార్. 4 అబ్బె నండో లోకుర్ మహిజ్ వన్నిజ్ యేసు డగ్రు ఒతెజ్ అట్విండ ఆతార్. అందెజె యేసు నిహిమహి జాగముస్కు మెడదిజ్ బోర్కితారె ఆ జబ్బు ఆతివన్నిజ్ సాపదాన్ యేసు నిల్లిమహిబాన్ డిప్టార్†. 5 వన్నిముస్కు మని వరి నమకు నుడఃతాండ్రె, యేసు జబ్బు ఆతివన్నివెట కులయెజ్ నీ పాపమకు సెమి ఆతె మన్నె, ఇజి వెహ్తాన్. 6 అబ్బె నెగెండార్ యూదురి రూలు నేర్పిన్నికార్ బస్త మహార్. వారు మనుస్కుదు. 7 వీండ్రు ఎందానిజ్ ఈహు వెహ్తాన్. వీండ్రు దేవుణువెట సమానం ఆతికాన్ ఇజి దేవుణుదిజ్ దూసిసినాన్. దేవుణు ఒరిండ్రె పాపమకు సెమిన్నికాన్ గదె, ఇజి వారు ఒడిఃబితార్.

8 వారు ఈహు ఒడిఃబిజినిక యేసుజ్ వెటని తెలితాద్. యేసు వరిజ్ వెహ్తాన్, “ఎందానిజ్ మీరు మీ మనుస్కుదు అవా ఒడిఃబిజినెదిర్? 9 యా జబ్బుది వన్నిజ్ నీ పాపమకు సెమి ఆత మన్న ఇజి వెహ్తాన్ కులునా? నీను నిజిజి సాప పెల్లి నడిఃఅ ఇజి వెహ్తాన్ కులునా? 10-11 లోకు మరిసి ఆతి నజి లోకురి పాపమకు సెమిస్టెజ్ బూమి ముస్కు అతికారం మనాద్. ఇజి మీరు నెస్టెజ్వలె ఇజి వెహ్తాండ్రె కిక్కు కాల్కు అర్తి వన్నిజ్ “నాను నిజి వెహ్తాన్, నిజ్అ, నీ సాప అసి ఇండ్రో సాన్అ”, ఇజి వెహ్తాన్. 12 వెటని ఆ కిక్కు కాల్కు అర్తికాన్ నిజిజి వన్ని సాప అసి వారు విజేరి నుడఃజి మహిజ్ నడిఃజి సాహాన్. అక్క నుడిఃతారె వారు విజేరి బమ్మ ఆతార్. “నిన్ని పణి మాట్ ఎసెజ్బా తోవెట్” ఇహార దేవుణుదిజ్ స్తుతి కితార్.

పను పెర్నికాన్ లేవిజ్ యేసు కూక్కినాన్

13 యేసు మరి గలిలయ సమదరం గట్టుదు సాహాన్. లోకుర్ వన్ని డగ్రు వాతిజ్ వరిజ్ దేవుణు మాటెజ్ నెస్తిస్తాన్. 14 యేసు నడిఃజి సొన్ని మహిజ్ అల్పయెఇని వన్ని మరిసి లేవి† ఇని పను పెర్నికాన్ ఒరెన్ వన్ని ఆపినుదు బస్తమహిక నుడఃతాన్. యేసు వన్నిజ్ “నీను నా సినుడు ఆఅ. నా వెట రఅ”, ఇజి వెహ్తాన్. లేవి నిజిత్తాండ్రె యేసువెట సాహాన్. 15 వెనుక యేసు లేవి ఇండ్రో బోజెనమ్దిజ్ బస్తాన్. నెఇ పణి కినికార్ అబ్బె మహార్. పను పెర్నికార్ వారు యూదురు వెహ్తి రూలు వజ నడిఃకార్. ఎసాండారో లోకుర్ యేసువెట మహార్. వారుబా యేసు, వన్ని సిసూరెవెట బోజెనమ్దిజ్ బస్తార్.

16 పరిసయేరు లోఇ మన్ని యూదురి రూలుజ్ నెన్పిన్నికార్ వనిజ్ నుడఃజి “ఎందనిజ్ వీండ్రు పన్నుపెర్నివరివెటని పాపం కినివరివెట ఉణిజినాన్”, ఇజి సిసూరిజ్ వెన్బాతార్. 17 యేసు ఆ మాట వెంజి “నెగెండ్ సిల్లివరిజ్ డాక్టరు కావాలి. నెగెండ్ మన్నివరిజ్ ఎందానిజ్లు మరి డాక్టరు. నీతి నిజమాతి మన్నివరిజ్ అవిద్. పాపం కితివరిజ్ కూక్కెజె నాను వాత మన్న, ఇహాన్.

ఉపాన్ వందిజ్ యేసుజ్ వెన్బాతార్

18 అయవలె బాప్తిసం సీని యోహాను సిసూరని, పరిసయేరు, యూదురి రూలువజ ఉపాన్కిజి మహార్. నెగెండార్ లోకుర్ వాజి యేసుజ్ వెన్బాతార్, “యోహాను సిసూర ఉపాన్కిజినార్, పరిసయేరి సిసూర ఉపాన్కిజినార్, ఎందానిజ్ నీ సిసూర ఉపాన్కిఎర్?”. 19 యేసు ఈహు వెహ్తాన్, “పెండ్లి కూలెజ్ పెండ్లివడఃవెట మన్నివెలె ఉపాన్ మండ్రెజ్ అట్పూరా? పెండ్లివడఃవరివెట మన్నివలె వారు ఉపాన్ మండ్రెజ్ అట్విర్. 20 పెండ్లివడఃవెజ్ వరి నడిఃమిహాన్ ఒని దినం వానాద్లె. అయ రోజు వారు ఉపాన్మంజినార్. 21 యేసు మరి వెహ్తాన్: “ఎయెర్బా పాడాయ్ పాతదు కొత్త ముక్కు కూడఃప్పి

* 2:3 2:3 పక్వవయపు ఇనిజబ్బుదాన్ నడిఃదెజ్ అట్నాన్ † 2:4 2:4 అయ దేసంతు మెడఢెజ్ ఎలార తయార్ కినార్ ఇహిజ పటిజ్ పప్పి దన్నిముస్కు డుల్లిదాన్ పణుకుఢాన్ మెడ పొక్కార్. మెడ ముస్కు ఎక్తెజ్ ఇహిజ పాపన్నుజ్ మన్న ‡ 2:14 2:14 వన్నిజ్ మరి ఉండ్రె పేరు మత్తయి వన్ని పణి పన్నుపెర్నికాదె.

గుత్పిల్. ఆహె కితిజ అయకొత్త పాత ముక్క వడాయి పాతదిజ్ లాగ్నాదె బొరొ ఒద్దె లావు ఆనాద్. 22 “ఎయెన్ బా పడాాయ్ తోలుసన్నిదు కొత్త ద్రాక్కకలు వాక్ ఏన్. అహె కితిజ కొత్త ద్రాక్కకలు పొజు వాజి అయ సన్ని వెడెల్ నాద్. ద్రాక్కకలు విజు వాజ్ న సొనాద్. సన్ని పాడునాద్. అందెజె కొత్త ద్రాక్కకలు కొత్త తోలు సన్నిదునె వాక్తజ్”.

యేసు విజు వన్యాజ్ ముస్సు ప్రబు

23 ఉండ్రీ విస్త్రాంతి దినమ్ దు యేసుని సిసూర్ పంట గుడ్డెదాన్ నడిసి సొన్ని మహార్. అయవలె సిసూర్ సెరెక్ తెప్పి మహార్. 24 పరిసయేరు అయక సుడఃతారె, “ఇదిలో ఎందానిజ్ వారు విస్త్రాంతి దినమ్ దు రూలుదిజ్ తప్పినార్. ఇజి వన్నిజ్ వెప్తార్.

25 అయవలె యేసు వెప్తాన్, “దావీదురాజు, వన్నివెట మహి లోకుర్ బజ కట్టిజ్ వాండ్రు ఇనిక కిత్తాండ్రొ ఇజి మీరు ఎనెజ్ బా నద్ విఇదెరా? 26 అబ్యాతారు ఇనికాన్. విజెరె పుజెరిజ ముస్సు పెరి పుజెరి మహివలె దావీదురాజు సమాజ గుడారమ్ దు డుకితాండ్రె, దేవుణు ఎద్రు ఇడ్డె రొట్టెజ్ లాగితాండ్రె తిహాన్. అక్క పుజెరి తప మరి ఎయరరబా తిండ్రెజ్ ఆవద్ గాని తిహాండ్రె వన్నివెట మహివరెజ్ బా సిత్తాన్.

27 వెనుక యేసు వరిజ్ వెప్తాన్, “ముజాల దేవుణు లోకుదిజ్ విస్త్రాంతిదినం ఏర్పాటు కిత్తాన్. గాని విస్త్రాంతి దినమ్ వందిజ్ లోకుదిజ్ ఏర్పాటు కిఏన్. 28 లోకుమరిసి అతి పిట్టి నజి విజు వన్యాజ్ ముస్సు అతికారం మనాద్. మరి, విస్త్రాంతి దినమ్ దు ఇనిక కిదెజ్ ఇజి లోకాజ్ వెప్తాజ్ బా అతికారం మనాద్.

3

యేసు కియు అర్తివన్నిజ్ నెగిండ్రొ కిజినాన్

1 మరి యేసు యూదురి మీటిజ్ ఇండ్రొ సొహాన్. అబె ఉండ్రీ కియు అర్తికాన్ ఒరెన్ మహాన్. 2 అబ్బె మహికార్ నెగిండ్రొ యేసు యా జబ్బుదివన్నిజ్ విస్త్రాంతిదినమ్ దు నెగిండ్రొ కిసాండ్రొ ఇజి బాగ సుడిజి మహార్. ఎండనిజ్ ఇహిజ విస్త్రాంతిదినమ్ దు ఇని పణిబా కిదెజ్ ఆవద్ కాక యేసుజ్ ఇని దన్నిజ్ బా తప్ప మొప్పెజ్ ఇజి సుడిజి మహార్. 3 యేసు కియు అర్తివన్నిజ్, “విజెరి ముజాల వాజి నిల్ అ”, ఇజి వెప్తాన్.

4 నస్తివలె యేసు, “దేవుణు మోసెజ్ సీతి రూలువజ విస్త్రాంతి దినమ్ దు నెగి పణి కిదెజా, సెఇ పణి కిదెజా? పాణం అర్తిపెజ్ నా? ఇజి వరిజ్ వెన్ బాతాన్. గాని వారు అలెతార్. 5 పరి మన్ను గ్రాజిమహిజ్ యేసు నండ్రొ దుకం ఆతాన్. కోపం దాన్ వరిజ్ సుడఃతాన్. అయ కియు అర్తివన్నివెట, “నీ కియు సవ్ అ”, ఇజి వెప్తాన్. వాండ్రు కియు సాప్టిజ్ ఆ కియు నెగిణ్ ఆతాద్. 6 నస్తివలె పరిసయేరు వెల్లి సొహి వెటనె హెరొది ఇని వరివెట కూడఃజి యేసుజ్ ఎలాగ్ నప్పెజ్ ఇజి ఆలోసనం కితార్.

యేసువెట మంద లోకుర్ సొన్నినార్

7 అందెజె యేసు వన్ని సిసూర్ వెట గలీలయ సమ్ దరంబాన్ సొహాన్. మందలోకుర్ గలీలయదాన్ పరివెనుక సొహార్. 8 యేసు కిత్తి గొప్ప పణిజ వెంజి యూదయ దేనిమ్ దు మన్ని విజు నాహ్ గణికార్, యెరూసలేందాన్, సమ్ దరం పడకాద్ తూరు సీదోను ఇని పట్టుమి ప్రాంతమ్ కాజ్ వాతి నండ్రొ లోకుర్ వన్నిబాన్ వాతార్. 9 నండ్రొ లోకుర్ వాజి మహిజ్ నిల్పిమండ్రెజ్ ఇహ్ వాక ఆజి దన్ని ముస్సు ఆఎండ్రొ మండ్రెజ్ ఉండ్రొ ఇజి డోణి తసి బానె ఇడ్ దు ఇజి సిసూర్ వెట యేసు వెప్తాన్. 10 ఎందానిజ్ ఇహిజ నండ్రొండ్రొజ్ యేసు నెగెణ్ కితాన్. అందెజె జబ్బు అతిమహికార్ విజెరె యేసుజ్ ముట్టిజ్ ఇజి నెక్కె ఆజి సొహార్. 11 దెయం అస్సికార్ యేసుజ్ సుడఃతివెటనె వన్ని ముజాల ముణుకుజ్ ఊరజి, పడగ్ జి మాడిస్తారె “నీను దేవుణు మరిసి”, ఇజి గగోలాతార్. 12 “నాను ఎయెన్ ఇజి ఎయేర్ వెట వెహ్ బాట్”, ఇజి యేసు వరివెట కసితం ఆడ్ర సిత్తాన్.

యేసు పన్నెండు మణిసిరిజ్ అపొస్తరువజ ఏర్పాటు కిజినాన్.

13 వెనుక యేసు ఉండ్రొ గొరొత్ ఏక్సి సొహాండ్రె వన్నివెట ఒతెజ్ వాండ్రు కోరితివరిజ్ వన్ని డగ్రు కూక్తాన్. వారు వన్నిబాన్ సొహార్. 14 యేసు పన్నెండు మనిసిరిజ్ వన్నిబాన్ మండ్రెజ్ ఇజి, దేవుణు మాట విజెరిజ్ వెప్పివందిజ్ పొక్తెజ్ ఇజి ఏర్పాటు కిత్తాన్. (విరిజె అపొస్తరు ఇజి కూక్తాన్)

15 దెయమ్కాజ్ ఉల్పైజ్ అతికారం వరిజ్ సితాన్. 16-19 యా పన్నెండు మణిసిర్ ఎయెర్ ఎయెర్ ఇహిజ సీమోను (యేసు వన్నిజ్ పేతురు ఇని పేరు సితాన్) జెబెదయ మరిసిర్ యాకోబు, వన్ని తంబెర్సి యోహాను ఇనికార్ (యేసు వరిజ్ బోయనర్గసున్ ఇని పేరు సితాన్. దన్ని అర్థం ఇనిక ఇహిజ దీడేజినికార్ ఇజి) అంద్రెయ, పిలిప్ప, బర్తోలోమయ, మత్తయి, తోమా, అల్పయ మరిసి యాకోబు, తద్దయ, యుదయ దేసెంవందిజ్ ఉసారాజిని సీమోను*, యేసుజ్ యూదురు అతికారిజ కీదు ఒపజెప్పికానాతి ఇస్కరియోతు యూదు.

యేసు బయల్జెబ్బులు ఇని దెయం సాయందాన్ దెయమ్కాజ్ ఉల్పేనాన్ ఇహోర్.

20 యేసు ఉండ్రె ఇండ్రె వాతిజ్ మరి నండో లోకుర్ అబ్బె కూడితార్. అందెజె యేసుజ్ ని సినూరిజ్, బోజనం కిదెజ్ బా కాలి సిల్లెతాద్. 21 యేసు ఇండ్రెణికార్ యా సజతి విహార వన్నిజ్ మత్తి సెద్రితాద్ ఇజి వెప్పి వన్నిజ్ అస్తెజ్ సోహోర్.

22 యెరూసలేమ్దాన్ వాతి యూదురి రూలుజ్ నెస్పిస్పికార్ వెప్టోర్, “దెయమ్కాజ్ నెయ్కి ఆతి బయల్జెబ్బులు[†] విన్నిజ్ అస్తాన్. వన్ని సత్తుదాన్ వీండ్రు దెయమ్కాజ్ పేర్జనాన్”, ఇజి వెప్టోర్.

23 సస్తివలె యేసు వరిజ్ కూక్కి వరిజ్ అర్థమాదెజ్ కత వజ ఈహు వెప్టోన్, “సయ్యాన్ సయ్తానుజ్ ఎలాగ ఉల్పాన్. 24 ఉండ్రె దేసెమ్దికార్ వరిజ్ వారి జటిజాజి ఎర్లిజి మహిజ అయ దేసెం పాడాఃనాద్. 25 ఉండ్రె ఇండ్రెణికార్ వరిజ్ వారి జటిజాజి ఎర్లిజి మహిజ ఆ కుటం పాడాఃనాద్. 26 సయ్యాన్ వన్ని గుంపుదు మన్నివరివెట జటిజాజి కేట ఆతిజ నండో కాలం వరిముస్సు ఏలుబడి: కిదెజ్ అటేవన్. 27 ఒరెన్ సత్తుమన్ని వన్నిజ్ ముజాల తోహోవీండ, ఎయెర్బా వన్ని ఇండ్రె డుగ్జి సామనమ్కు ఒత్తెజ్ అటేవర్. ముజాల వన్నిజ్ తోహ్తిజానె డోజి కిదెజ్ అటూర్[‡]. 28 నాను నిజం వెప్పిస, లోకుర్ కినివిజి పాపమ్కాజ్ ని, దూసినిని మాటెజ్ దేవుణు సెమిస్సాన్. 29 గాని దేవుణు ఆత్మదిజ్ దూసిస్తిజి వన్ని పాపం ఎసెజ్ బా సెమిన్వన్. వన్ని పాపం ఎలా కాలం మంజినాద్”. 30 యేసు ఈహు ఎందానిజ్ వెప్టోన్ ఇహిజ సయ్యాన్ సాయమ్దాన్ యేసు దెయమ్కాజ్ ఉల్పేనాన్ ఇజి యూదురి రూలుజ్ నేస్పిసినికార్ వెప్టోర్.

యేసు అయ్సి తంబెర్సిర్

31 యేసు అయ్సిని తంబెర్సిర్ వాండ్రు మన్ని ఇల్లుముజాల వాతార యేసుజ్ కూక్కి తగ్గ అ ఇజి ఒరెన్వన్నిజ్ ఇండ్రె పోక్టార్. 32 అయ ఇండ్రె యేసు సురుల నండో లోకుర్ బస్ మహోర్. వారు వెప్టోర్, “నీ యాయ తంబెర్సిర్ వెల్లి నిహార నిజి కూక్కినార్”. 33-34 దనిజ్ యేసు, “నా యాయ? నా తంబెర్సిర్ ఎయెర్ ఇజి నాను వెప్పా”. అబ్బె సురుల బస్తిమనివరిజ్ సుడేజి యేసు వెప్టోన్, “ఇదిలో నా యాయని, నా తంబెర్సిర్”. 35 “ఎందనిజ్ ఇహిజ దేవుణుదిజ్ ఇస్టమాతివజ కినికాండ్రె నా తంబెరి, నా తజి, నా యాయ ఇజి వెప్టోన్.

4

విత్తు విత్తివన్ని కత

1 యేసు మరి ఒర్పు గలిలయ సమ్దరం పడకాదు నెన్పిస్టెజ్ మొదోల్స్తాన్. మందలోకుర్ వన్ని డగ్రు వాతిజ్ సమ్దరమ్దు ఉండ్రె డోణిదు ఎక్కి బస్తాన్. లోకుర్ విజెరె సమ్దరం పడకాదు నిహోర్.

2 అయవలె వాండ్రు నండో సజతిజి కతవజి వరిజ్ నెస్పిస్తాన్. వాండ్రు ఉండ్రె సజతి కత వజ ఈహు వెప్టోన్. 3 సుడేదు, ఒరెన్ రయ్యు వాండ్రు విత్తు విత్తెజ్ సోహోన్.

4 వాండ్రు విత్తి మహిజ్ సెగం విత్తు సరి పడకాదు అర్తె. ఆ పోటిజ్ వనకాజ్ పెప్టై తిహె. 5-6 మరి సెగం విత్తు సటు ముస్సు లావ్ డుల్లి సిల్లిబాన్ అర్తె. డుల్లి లావు సిల్లితిజ్ అవి వెటెన నేర్తెగాని వెల లోఇ సాన్ఇజ్ పొద్దు సాని ఎండ తాక్తివలె అవి సాతె సోహె. 7 మరి సెగం విత్తు సాప్పు తుపెజ్ లోఇ అర్తె. సాప్పు తుప్పెజ్ పిరిజి వనకాజ్ తిగితె. అందెజె పంట పండవితాద్. 8 మరి సెగం నెగ్గి బూమిదు

* 3:16-19 3:16-19 రోమాది ఏలుబడిదాన్ యూదురు దేసెమ్దిజ్ విడుదల కిదెజ్ ఉసారాదాన్ సుడేజిని యూదురు సజం మనాద్. అయా సజమదికాన్ ఒరెన్ సీమోను † 3:22 3:22 యాక సయ్యానుజ్ మరి ఉండ్రె పేరు ‡ 3:27 3:27 సత్తుమన్నికాన్ ఇజి యేసు సయ్యాన్ పందిజ్ వెప్పిసాన్. సయ్యాన్ ముస్సు యేసుజ్ సత్తు మనాద్ ఇజి వెప్పిసాన్.

అర్చి. అక్కోజ్ నేరీజి పిరితెనె విత్తి విత్తుదిజ్ ముప్పుయ్ వంతుజ్ లెక్క వండితె. ⁹ యేసు మరి వెహ్లాన్, “గిబ్బిజ్ ఒడేజి వెంజి అయవజ నడిజి మండ్రు”.

¹⁰ యేసు ఒరెండ్రె మహిజ్ వన్నెండు మణిసిర్ సిసూర్ని మరి సెగొండార్, “నీను కత వజ నెన్పిస్తి మాటెజ అర్దం ఇనిక?”, ఇజ వన్నెజ్ వెన్బాతార్.

¹¹⁻¹² అందెజ యేసు, “దేవుణు కిని ఏలుబడిః వందిజ్ డాజీతిమహి గొప్ప నజతిజ్ దేవుణు మిజీ తెలివి కిత్త మనాన్. గాని మహివరిజ్ విజుబా కతవజ నెన్పిస్తిజ్ ఎందానిజ్ కతవజ వెహ్లా ఇహిజ “వారు సుడిసూర్ గాని తోవీర్. వెండ్రెజ్ ఇహిజ వెంజినార్ గాని అర్దం కిదెజ్ అట్వీర్. ఎందానిజ్ ఇహిజ వారు అర్దం కిజి వరి పావమ్కు సెమిస్సాన్*” ఇహాన్. ¹³ యేసు వరివెట వెహ్లాన్, “రయ్యువన్ని వందిజ్ నాను కతవజ వెహ్లా కి మిజి అర్దం ఆవదా? అహిజ నాను కతవజ వెహ్లాకెజ్ విజు మిజీ ఎలాగ తెలిసాన్? ¹⁴ విత్తిక్వాన్ దేవుణు మాట వెహ్లాక్వాన్. ¹⁵ సెగొండార్ విత్తు అర్చి సరి పడెకనన్నికార్. వారు వెహివెటనె సయ్యూన్ వాజి ఆ మాటెజ్ లాగ్గి ఒసినాన్. ¹⁶ మరి సెగొండార్ విత్తు అర్చి సటుపణుకు మున్ను మన్ని ఇస్సా నన్నికార్. వారు దేవుణుమాట వెహివెటనె సర్దదాన్ మన్నుదు ఇడ్సార్. ¹⁷ గానివెల లొఇ సొన్ఇలెకెండ దేవుణుమాట వరి మన్ను లొఇ సొన్విద. వారు కండెక కాలం నమ్మిజి మంజినార్. దేవుణుమాట నమ్మితి వందిజ్ కన్దమ్కు మాలెజ్, వానెవెల దేవుణు మున్ను మన్ని వరి నమకం వెటనె డిన్న సీనార్.

¹⁸⁻¹⁹ మరి సెగొండార్ విత్తు అర్చి సాప్పు తుపెజ్ నేర్చి బూమివజ మనార్. గాని ఎలాగ బత్తిదెజ్ ఇని వందిజ్ మన్ని విసారం, డబ్బు గణిసిని వందిజ్ మన్ని ఆన విజు కూడిజి వారు దేవుణుదిజ్ నమ్మివండ కిదెజ్ వారు వెహి మాటదిజ్ అణసు తీగ్జినె. పంట పండవండ ఆతిలెకెండ వారుబా ఆజినార్. ²⁰ సెగొండార్ అర్చి విత్తునెగ్గి బూమిదువజ మనార్. వారు దేవుణుమాట వెంజి అర్దం కిజి దేవుణు మున్ను నమకం ఇడ్సార్. నెగ్గి బూమిదు అర్చి విత్తు బస్సెజిదిజ్ ముప్పుయ్ బస్సెజ్ అర్వయ్ బస్సెజ్ వంద బస్సెజ్ పండ్రివజ వారు మంజినార్.”

దీవ జాయ్ సీనివజ కంతుద్ ఇడ్డెజ్

²¹ యేసు వరివెట ఈహు వెహ్లాన్, “దీవ కసిసి అబల మూక్కినో మన్నం అడిగినో ఎయెరుబా ఇడవీర్. జాయ్ సీనివజ దీవ కంతుదు ఇడ్సార్. ²² ఎందానిజ్ ఇహిజ ఏలు డాజీతి మన్నికెజ్ విజు ఒర్వండ్రె తోరె ఆనె. ²³ మీరు గిబ్బిజ్ ఒడేజి వెంజి అయవజ నడిజి మండ్రు”. ²⁴ యేసు మరి వెహ్లాన్, “మీరు వెహిక జాగర్ అర్దం కిదెజ్వలె. మీరు నెగ్రెండ అర్దం కిజిమహిజ, దేవుణు వన్ని మాటెజ్ అర్దం కిబిస్సాన్లె. ఒబ మరి ఒద్దె అర్దం కిబిస్సాన్లె. ²⁵ నాబాణిజ్ వెంజి అర్దం కిజినివన్నిజ్ దేవుణు మరి తెలివి కిసాన్. గాని వెంజి అర్దం కిఇవన్నిబాణిజ్ వాండ్రు అర్దం కిత్తి మన్నికెజ్బా లాగ్సాన్”.

నేరీజి పిరిసిని విత్తువందిజ్ కత

²⁶ యేసు మరి వెహ్లాన్, “దేవుణు ఏలుబడిః ఈహు మనాద్. ఒరెన్ రయ్యు వాండ్రు విత్తు బూమిదు విత్తిసాన్. ²⁷ వాండ్రు రెయ్యూజ్నిద్ర కిజి పెందల నిజిజ మంజినాన్. వన్నిజ్ తెలివండ ఆ విత్తు నేరీజి పిరిసిసె. ²⁸ ముజాల ఆకు, దన్ను వెనుక సెరెన్, దన్ను వెనుక సెరెన్దు గింజ ఇక విజు బూమినె పుటిసినాద్. ²⁹ పంట పండ్రాద్. కొయ్నికాలం వాతిజ్ వాండ్రు కొడుఃవేలి అసి కొయ్జినాన్”.

సర్గుగింజ వందిజ్ కత

³⁰ మరి యేసు ఈహు వెహ్లాన్, “దేవుణు వన్నిలోకురిజ్ కినిఏలుబడిః ఇని దనివెట పోలిస్తిజ్ ఆనాద్? మాటు ఎమేజి కతవజ అయాక నెన్పిస్తిజ్ అట్సాట్? ³¹ అయాక సర్గు గింజదిజ్ పోలిత మనాద్. అక్క బూమిదు విత్తివలె లోకమ్దు మన్ని విజు విత్తూజ్ లొఇ ఇజరికాద్. ³² ఆహిజ్బా అక్క విత్తివలె నేరీజి పిరిసి విజు కున మొక్కెజ్ లొఇ పెరిక ఆనాద్. దన్ను కొమెజ్ పెరికెజ్ ఆనె. ఆగనమ్దు ఎగ్రిజిని పోటిజ్ వాజి దన్ను నీడెదు గూడుక్ తోహ్సాన్”. ³³ వారు అర్దం కిదెజ్ అట్టి ససా దేవుణు మాటెజ్ ముజాలె వెహ్లా లెకెండ్రె కత వజ యేసు నండ్రె వెహ్లాన్. ³⁴ కత వజ ఆవండ యేసు వరిజ్

* 4:11-12 4:11-12 యెసయ 6:9,10.

ఇనికబా నెన్పిన్వితాన్. అహిజ యేసు వన్ని సిసూర్ వెట ఒరెండ్రె మహివలె విజు వన్యాజ్ అరదం కిజి వెహ్లాన్.

యేసు తుపాన్దిజ్ నిల్ప్పినాన్

35 ఆ పొదొయ్ నమ్దరం అతాహ పడక సొనాట్ ఇజి యేసు సిసూర్ వెట వెహ్లాన్. 36 లోకాజ్ డిసి యేసు మహి డోణిదు ఎక్కి సిసూరు వన్నిజ్ ఒతార్. మరి సెగం డోణిజ్బా వరి వెట మహె. 37 వారు సొన్ని మహిజ్ పెరి తుపాన్ వాతాద్. ఉల్కెణ్ విజు డోణిదు డెయ్తె ఏరుడోణిదు నిండ్రె. 38 యేసు డోణి వెనుకపడక బుర్రగడి మున్సు నిద్ర కిజి మహాన్. సిసూరు వన్నిజ్ నిక్కి, “బోదకినికి, మాటు విజు ముడఃగిజినాట్. నిజి విసారం సిలెదా?”, ఇజి వన్నిజ్ వెహ్లాన్. 39 యేసు నిజ్జి గాలిదిజ్ ఉల్కెజు, పల్లక్ ఆదు ఇజి వెహ్లాన్ పెరి గాలి అణస్తాద్ విజు అలెతాద్. 40 నస్త్రెవలె వాండ్రు, “మీరు ఎండనిజ్ తియెల్ అజినిదెర్? మిజి నా మున్సు నమకం సిలెదా?”, ఇజి సిసూర్ వెట వెహ్లాన్. 41 వారు గొప్ప తియెలాతారె, “వీండ్రు ఎలాగ మహ్తాకాండ్రె గాని, గాలి సమ్దరమ్బా విన్ని మాటదిజ్ లోజిత్రె”, ఇజి ఒరెన్వెట మరి ఒరెన్ వర్గితార్.

5

యేసు దెయం అస్తిమహివన్నిజ్ నెగెన్ కిజినాన్

1 యేసుని సిసూర్ సమ్దరం అతాహ పడక గెరెసిను ఇని లోకురి ప్రాంతమ్దు వాతార్. 2 యేసు డోణి డిగితి వెటనె దెయం అస్తికాన్ ఒరెన్ దూకిజాణ్ ఎద్రు వాతాన్. 3 వాండ్రు దూకిజాణిజ్ బత్కిజి మహాన్* వన్నిజ్ గొల్కుడాన్ బా తొహ్లాజ్ ఎయెర్బా అట్వెర్. 4 నండో సుట్టు వన్ని కాల్యాజ్ కిక్కాజ్ గెల్స్కాణిజ్ తొహ్లాజ్ బా వాండ్రు గెల్స్కు తెప్పి ముక్కెజ్ కిత్తాన్. ఎయెరుబా వన్నిజ్ సాదిస్తజ్ అట్వెత్తార్. 5 వాండ్రు రెయుబా వెడెకబా దూకిజాణ్ గొరొకాణ్ గగోలాజి వన్నిజ్ వాండ్రె పణుకుజాణ్ డెయె ఆజి మహాన్. 6 వాండ్రు దూరమ్దాన్ యేసుజ్ సుడఃతాండ్రె ఉహ్కొప్పివాజి ముణుకుజ్ ఉఠ్రిజి మాడిస్తాన్. 7 విజు దన్నిజ్ అతికారం అతి దేవుణు మరిసియాతి, యేసువా, నా వెట నిజి ఇని పణి? నజి బాద కివి ఇజి దేవుణు పేరు అసి నీను ఒట్టు కిఅ”, ఇజి డేల్లి వెహ్లాన్. 8 ఎందానిజ్ ఇహిజ యేసు, ఓ దెయం, విన్నిజ్ డిసి వెల్లి సొన్అ”, ఇజి వెహ్లాన్ మహాన్.

9 యేసు, “నీ పేరు ఇనిక? ఇజి వెన్బాతాన్. వెన్బాతిజ్, నా పేరు సేన, ఇహిజ మాపు నండొండార్ ఇజి వెహ్లాన్. 10 మజి యా దేసెమ్దాన్ ఉల్వ్పు ఇజి దెయం అస్తికాన్ యేసుజ్ మరి మరి బతిమాలితాన్. 11 అయావలె పండ్రెజ్ మంద గొరొన్ సెల్కుదు మెయెజి మహె. 12 ఆ దెయమ్కు, మజి పండ్రెజ్ లొఇబా పొక్అ. వనకలొఇ సొండ్రెజ్ మజి సెలువ సిదా”, ఇజి యేసుజ్ బతిమాలితె. 13 అందెజి వాండ్రు వన్యాజ్ సెలవ సిత్తాన్ అయావలె దెయమ్కు వన్నిజ్ డిసిని పండ్రెజ్ లొఇ సొహె. అయపండ్రెజ్ మంద విజు గొరొకాణ్ ఉహ్కొప్పి వాజి ఒడ్డుదాన్ సమ్దరమ్దు అర్తిసె సాతె. అక్కెజ్ డగ్రు రుండి వెయిజ్ పండ్రెజ్ మహె.

14 పండ్రెజ్ మేప్పికార్ ఉహ్కొప్పి సొన్ని పట్టుమ్ది వరిజ్ పట్టుమ్ది వల్సెజి మన్నివరిజ్ జర్గితిక్కెజ్ వెహ్లాన్. లోకుర్ జర్తిక సుడఃదెజ్ సొహార్. 15 వారు యేసు డగ్రు వాతిజ్ నండో దెయమ్కు అస్తిమహికాన్ సొక్కెజ్ తోడిగిజి నెగ్గి బుదిదాన్ అబ్బెబస్తిమహికా సుడఃతార్. సుడఃతార్ తియెలాతార్. 16 యాక సుడఃతికార్ దెయమ్కు అస్తివన్నిజ్ ఇనిక జర్గితాద్, పండ్రెజ్ ఇనిక జర్గితాద్ ఇజి విజు లోకాజ్ వెహ్లాన్. 17 అయవలె లోకుర్ యేసుజ్, “మా ప్రాంతం డిసి సొన్అ”, ఇజి బతిమాలితార్. 18 యేసు డోణి ఎక్కిజ్ దెయమ్కు అస్తిమహికాన్ వన్ని డగ్రు వాతాండ్రె, నీ వెట నానుబా వాన్ ఇజి బతిమాలితాన్. 19 గానియేసు సరి సివితాన్, నీను ఇండ్రె సొన్ని ప్రబు నీ వందిజ్ కిత్తి గొప్ప పణివందిజ్ వాండ్రు నీ మున్సు ఎలాగ కనికారం తొరిస్తాన్ ఇనివందిజ్ వరిజ్ వెహ్లా ఇజి వెహ్లాన్. 20 వాండ్రు సొహండ్రె యేసు వన్ని వందిజ్ కిత్తి గొప్ప పణిదెకపొలిదు వెహ్లాజ్ మొదొల్స్తాన్. అక్కె వెంజి విజెర్ బమ్మ అతార్.

యేసు సాతి అయ్లెజ్ నిక్కినాన్, జబ్బు అతిమహి అయ్లొకడెదిజ్ నెగెండ్ కిజినాన్

* 5:3 5:3 అయ దేసెమ్దికార్, సట్టుబొరొకిజి సాలమెలెకెండ్ తయార్ కిజి సాతివరిజ్ సమాది కిజి మహార్. పీసుగు సాలమెలొఇ ఇజ్జి పణుకుదాన్ సాలమెదిజ్ మూసి మహార్. యా దెయం అస్తిమహికాన్ బానె మహాన్.

21 యేసు డోణీదు ఎక్కి సమ్దరం అతాహ పడక మరి సాహాన్. నస్తివలె నండో లోకుర్ వన్ని డర్గు వాతార్. యేసు సమ్దరం ఒడ్డుదు నిహ మహాన్. 22-23 నస్తివెలె ఉండ్రీ యూదురి మీటిజ్ ఇండ్రోణీ అతికారి యాయీరు ఇని ఒరెన్బానె వాతాన్. వాండ్రు యేసు డర్గు వాజి వన్ని పాదమ్వాక్ మాడిస్తాండ్రె, నా ఇజ్జి గాలు సాజినాద్, దయకిజి నీను వాజి అది బల్క్కిని వజి దని ముస్సుక్కి ఇడ్డేజి నెగెణ్ కిత, ఇజి బతిమాలితాన్. 24 యేసు వన్నివెట సాహాన్. సేన లోకుర్ నెక్కె ఆజి యేసువెట సాహాన్. 25 వరిలోఇ ఉండ్రీ అయ్లి కొడోః మహాద్. అది వన్నిండు పండెజాణ్ వెల్లి ఆని జబ్బుదాన్ బాద ఆజి మహాద్. 26 అది సేన డాక్టరుజాహాన్ నెగెణ్ అదెజ్ సాహాద్ గాని ఆ జబ్బు సాన్ ఏతాద్. అకాదె అవిండ దనిజ్ మని డబ్బు విజు కర్ను అతిజ్ బా ఆ జబు సాన్ ఏండ మరి నండో ఆతాద్. 27-28 అది యేసువందిజ్ వెహా మహాద్. యేసు అయ సరిదాన్ వాజినాన్ ఇజి వెంజి యేసు తోడిగితి మన్ని నిర్రి సాక్కా† సెంగుదు ముట్టిజసరి నెగెణ్ ఆన ఇజి ఒడ్డేబితాద్. అది లోకుర్ వెట సాన్ని యేసు వెనుక వాతాద్ వన్ని సీరిసాక్కాద్ సెంగుదిజ్ ముట్టాద్. 29 వెటనె వెల్లి సానిక నిహాద్. దనిజ్ మహి జబు డిస్తాద్ ఇజి అది నెస్తాద్.

30 వన్నిలోఇహాన్ దేవుణు సత్తు వెల్లి సాహాద్ ఇజి యేసుజ్ తెలితాద్. వెటనె వాండ్రు లోకురిజ్ మరజి సుడేజి, ఎయెర్ నా సాక్కుదు ముట్టాన్? ఇజి వెన్బాతాన్. 31 దన్ని సిసూర్, సేన లోకుర్ నెకె ఆజి నిజి ముట్టినార్ గదె. ఆహా అతిజ్ బా నజి ఎయెర్ ముట్టార్ ఇజి ఎండనిజ్ వెహ్ని? ఇజి యేసుజ్ వెహ్నార్. 32 నజి ముట్టికాన్ ఎయెండ్రో ఇజి వరివందిజ్ యేసు సురుల సుడేజి మహాన్. 33 అయవలె అయ బోదెలి అది నెగెణ్ అతిక నెసి నండో తియెల్ ఆజి వన్నిపాదమ్కుజ్ మూడికుజ్ ఊరిజి వజితాద్. దన్నిజ్ జర్గితిక విజు వెహ్నాద్. 34 యేసు దనిజ్, బయి నీను నా ముస్సుక్కి నమకం ఇడ్డీ అందెజి నీను నెగెణ్ అతి. సమదనమ్దాన్ సాన్ అ. నీను నెగెండ్రో అతి ఇహాన్. 35 యేసు వర్జిజి మహిజ్ యాయీరు ఇండ్రోణిజ్ సెగెండ్రో వాజి, నీ గాలు సాతాద్. బోదకిని వన్నిజ్ యేలు బాద కిదెజ్ అక్కర్ సిల్దెద్ ఇజి యాయీరుజ్ వెహ్నార్. 36 వారు వెహ్పిక వెన్ ఇవజి యేసు అయ అతికారిజ్, తియెల్ అమ, నా ముస్సుక్కి నమకం ఉండ్రో ఇడ్డే అ ఇజి వెహ్నాన్. 37 యేసు పేతురు, యాకోబు, యాకోబు తంబెర్ని యోహాను మరి ఎయెజ్ బా వన్నివెట ఒవితాన్. 38 వారు యూదురి మీటిజ్ ఇల్లు అతికారి ఇండ్రో సాహాన్. అయవలె అబ్బె లోకుర్ గగోలాజి అడేబాజి మహిక సుడేతార్. 39 యేసు ఇలు లోఇ సాన్ని వరిజ్ వెహ్నాన్, మీరు ఎండనిజ్ గగోలాజి అడేబాజినిదెర్? యా ఇజ్జికాద్ సావీద్ ఇది నిర్ద కిజినాద్. 40 వారు యేసుజ్ వెక్కిని సికితార్. యేసు అడేబాజి మహి లోకాజ్ విజెరిజ్ వెల్లి పోక్తాన్. వెల్లి పోక్కి, అయెసి అపోసిరిజ్, వన్నివెట మహి సిసూరిజ్ అని యేసు ఆ ఇజ్జికాద్ మహి గదిదు సాహాన్. 41 ఆ ఇజ్జిదన్నిజ్ కీదు అస్తాండ్రె, తలీత కుమి ఇజి వెహ్నాన్. అయ మాటదిజ్ అర్థం ఇనిక ఇహిజి ఇజ్జి అయెలి నిజ్ అ ఇజి నాను నీ వెట వెహ్నిన ఇజి, 42 అయెలి వెటనె నిజ్ జి నడేతాద్. దనిజ్ వన్నిండు పండెజ్ వయసు. అబ్బె జర్గితిక సుడేతార్ అయెసి అపోసీరు, సిసూరు బమ్మ ఆతార్. 43 జర్గితిక ఎయెజ్ బా వెహ్నాట్ ఇజి యేసు వరిజ్ కసితం ఆడ్ర సితాన్. దన్నిజ్ బోజనం సీదు ఇజి అయెసి అపోసిరిజ్ వెహ్నాన్.

6

యేసుజ్ సొంతనాటో గవేరం సిఎతార్

1 యేసు అబ్బెణాన్ వన్ని సొంత పట్టుమాతి నజరేతు సాహాన్. సిసూర్ బా వన్ని వెట సాహాన్. 2-3 విస్త్రాంతి దినమ్దు వాండ్రు యూదురి మీటిజ్ ఇండ్రో నేర్పిస్తెజ్ మొదెల్స్తాన్. అక్క వెహికార్ నండెండ్రో బమ్మ ఆజి, వీండ్రు ఎమెణిజ్ నెస్తాన్? విన్నిజ్ నిన్ని గెణం ఎమెణిజ్ దోహ్కాద్? వీండ్రు బమ్మాని పణిజ్ కిజినాన్. వీండ్రు మాపు నెసిని కంసెల్ వాండ్రు గదె. వీండ్రు మరియమ్మ మరిసిగదె. యాకోబు, యోసె, యూద, సిమోను, విని తంబెర్నిర్ గదె. విన్ని తజ్జిసిక్ మా వెట మన్నెగదె. ఇజి వెహ్నార్. వారు వన్నిముస్సుక్కి కోపమాజి మహాన్. 4 దన్నిజ్ యేసు ఇనిక ఇజి వెహ్నాన్ ఇహిజి, ఒరెన్

† 5:27-28 5:27-28 అయ కాలమ్దు అయ దేసమ్ది మొగవారు సీరి సాక్క తోడిగిజి మహాన్. దన్ని అడిగి మాముల్ సాక్కని బిల్లు తోడిగిజి మహాన్

ప్రవక్తైక్ సొంత పట్టుమీదు, సొంత ఇండ్రో, సొంత కుటుమీదివరిబాన్ గవరం సిల్లెద్. మరి ఎంబె సొహిక్ బా వన్నిక్ గవరం మనాద్.

5 సెగొండార్ జబ్బు ఆతివరిక్ కియుదాన్ ముట్టి నెగెణ్ కిత్తాన్ గాని అబ్బె నండో బమ్మాతి పణికిదెక్ యేసు అట్వితాన్. 6 వన్ని మున్సు వరిక్ నమకం సిల్లిదిక్ వాండ్రు బమ్మ ఆతాన్. యేసు సురుల మన్ని నాహ్కా బూలాజి నేర్పిస్తాన్.

యేసు వన్నెండు మణిసిర్ సిసూరిక్ పోక్కినాన్

7 యేసు వన్నెండు మణిసిర్ సిసూరిక్ వన్ని డగ్రు కూక్తాండ్రె రిఎరిక్ రిఎరిక్ పోక్తాన్. వరిక్ దెయమ్కాక్ పేర్దెక్ అతికారం సిత్తాన్. 8-9 మీరు ప్రయనం కినివెలె కియుదు ఉండ్రె డుడ్డునె ఒత్తెక్. బోజనం గాని సన్ని గాని డబ్బు గాని ఒత్తెక్ ఆవిద్. సొండ్రెక్ కాల్యాక్ జోడ్కు ఒత్తెగొని, పొర్పాదెక్ రుండి సొక్కె ఒమాట్”, ఇజి యేసు వెహ్తాన్. 10 మీరు ఎయె ఇండ్రో సొనిదెరో, అయ పట్టుం డిఃస్సిదాక బానె మండ్రు. 11 ఎంబెబా మిజి లోకుర్ డగ్రు కివిండ మహిజ మీ మాట వెండ్రెక్ కెకతిజ, అబ్బెణిక్ మీరు డిఃసి సొనివెలె మీ పాదమ్క డుల్లి దులుపు. వరిమున్సు వారి దేవుణుబాణిక్ సిక్కి తప్పె ఆజినార్ ఇన్నిదన్నిక్ గుర్తులెకెండ్రె ఆవా డుల్లి దులుపు”. 12 సిసూర్సొన్ని లోకాక్, పాపమ్కు డిఃస్సు ఇజి బోద్దిసార్. 13 లోకురిక్ అన్ని నండో దెయమ్కాక్ పేర్జి, జబ్బు ఆతి నండొండారిక్ నూనె రాసి నెగెండ్రె కిత్తార్.

బాప్తిసం సీని యోహానుక్ రాజు సప్తాన్

14 యేసు పేరు విజుబాన్ సారిత సొహాద్. అందెజె యేసు కిత్తి గొప్పు పణిజవందిక్ హేరోదురాజు వెహ్తాన్. సెగొండార్ ఇనికె వెహ్తార్ ఇహిజ “వీండ్రు సాతివరిబాణిక్ మర్జి నిజితి బాప్తిసం సీని యోహాను అందెజె యా బమ్మాతి పణిక్ కిదెక్ నత్తు వన్నిలోఇ మంజినాద్” ఇహార్. 15 సెగొండార్ వీండ్రు వీలియ ప్రవక్త ఇహార్. మరి సెగొండార్ వీండ్రు ముజల్ తహి దేవుణు ప్రవక్తలోఇ ఒరిన్ ప్రవక్త పజ మనాన్ ఇజి వెహ్తార్. 16 హేరోదురాజు యాక విజు వెంజి నాను బుర డెఃయిస్తి యోహాను నిక్జి బత్తికాండ్రె యేసు ఇజి వెహ్తాన్.

17-18 హేరోదురాజు ఎందానిక్ ఈహు వెహ్తాన్ ఇహిజ, వాండ్రు వన్ని తంబెర్సియాతి పిలిపు ఆల్సి హేరోదియెక్ తతాన్. యోహాను హేరోదుక్, నీ తంబెర్సి ఆల్సిక్ నీవందిక్ ఇడె ఆతిక దేవుణు మోసెక్ సిత్తి రూలుదిక్ పడివిద్ ఇజి వెహ్తాన్. అందెజె దన్ని వందిక్ వాండ్రు యోహానుక్ అసి తొహండ్రె జెలిదు ఇడిస్తాన్. 19 అందెజె హేరోదియె యోహాను మున్సు పగదాన్ మహాద్. వన్నిక్ సపిస్తెక్ నుడతాద్ గాని అట్వితాద్. 20 ఎందానిక్ ఇహిజ హేరోదు యోహానుక్ తియెలాతాన్. వాండ్రు ఒరిన్ నీతి నిజాయితి మన్నికాన్ ఇజి దేవుణు కేటాకాన్ ఇజి, హేరోదు రాజు నెస్తాన్. అందెజె జెలిదు ఇడ్డికాపాడజి మహాన్. యోహాను వెహ్తి మాటెక్ వెహివలె హేరోదురాజు అర్దం కిదెక్ అట్వితాన్ గాని సర్దదాన్ వెంజి మహాన్.

21 అహిజ యోహానుక్ సపిస్తెక్ హేరోదియెక్ ఉండ్రె అవ్కాసం వాతాద్. అక్క ఎలాగ ఇహిజ హేరోదురాజు వాండ్రు పుట్టిరోజు గుర్తు కిదెక్ అయానాండిక్ ఉండ్రె పెరి విందు కిత్తాన్. వాండ్రు గవరంమెంటు అదికారిజ, నయ్యమీది వరిలోఇ పెరి అతికారి గలిలయ దేన్మమీది వెద్దెల్జి విజేరిక్ విందుదిక్ కూక్తాన్. 22-23 సన్నివలె హేరోదియె గాల్సి విందుదిక్ వాతి వరిక్ సర్ద కిబిస్తెక్ వరి ముజాల డాట్టి కరజితాద్. అక్క నుడితారె విజేరె సర్ద ఆతార్. సర్ద ఆతిక్ హేరోదురాజు, నిజి ఇన్సమాతిక ఇనికబా నజి లోన్అ, అక్క నాను నిజి సీన, ఇజి దనివెట ఒట్టు కిత్తాన్. 24 అది సొన్ని అయేసివెట, నాను రాజుక్ ఇనిక లొస్తెక్ ఇజి వెన్బాతాన్. అయేసి, బాప్తిసం సీని యోహాను బుర లోన్అ ఇజి వెహ్తాద్. 25 వెటనె అది రాజు డగ్రు సొన్ని బాప్తిసం సీని యోహాను బుర కత్తి ఉండ్రె వల్లెమీదు ఇడెఃజి ఎలె నజి తసినిదా ఇజి వెహ్తాద్.

26 అక్క వెహండ్రె హేరోదురాజు గొప్పు బాద ఆతాన్ గాని, వాండ్రు కిత్తి ఒట్టువందిక్ వన్నివెట బోజనమ్దిక్ బస్తిమహి కూలెజి వందిక్ దన్నివెట కిత్తి మాట తప్పెక్ కెవిత్తాన్, ఇజి వెహ్తెక్ అట్వితాన్. 27-28 వెటనె రాజు యోహాను బుర కత్తి తగ్గె ఇజి జమానుక్ ఆడ్ర సీజి పోక్తాన్. జమాను జెలిదు

సొన్ని యోహాను బుర కతాండ్రె ఉండ్రె పల్లెమ్మదు ఇడోజి తతాండ్రె అయ్లదిజ్ సిత్తాన్. అది ఆ బుర అయ్నిజ్ సిత్తాద్. 29 జర్గితక వెంజి యోహాను సిసూర్ వాజి ఆ పీనుగుదిజ్ పెరజి ఒసి నమూది కిత్తార్.

యేసు అయ్దు వెయిజ్ మణిసిరిజ్ బోజనం సీజినాన్

30 అపొస్తరు మర్జివాతాజి వారు కిత్తి పణిజ్ విజు, బోద్దిన్తి వన్యాజ్ వందిజ్ విజు యేసుజ్ వెప్తార్. 31 నస్తివలె యేసు “ఎయెరు సిల్లిబాన్ మాటె సొన్ని నణెం రోమ్మాట్, ఇజి సిసూర్ వెట వెప్తాన్. ఎందానిజ్ ఇహిజ నండో లోకుర్ వాదిజ్ సొండ్రెజ్ ఆతార్. బోజనం కిదిజ్ బా కాలి సిల్లెండ ఆతాద్. 32 అందెజె వారు ఉండ్రె డోణి ఎక్కి ఎయెర్ బా మన్ ఇ బాడ్డిదు వారె సొహార్. 33 యేసుని, సిసూర్ సొన్ని మహిజ్ నండో లోకుర్ వరిజ్ సుడోతారె వరిజ్ గుర్తు అసి విజు పట్టుమ్ కాణ్ ఉహ్ క్కి వరిజ్ ఇంక ముజాల బాన్ సొహారె అందితార్. 34 యేసు డోణిదాన్ డిగితివలె మహి నండో లోకాజ్ సుడోజి వన్ని పాణం నొత్తాద్. ఎందానిజ్ ఇహిజ వారు గవ్డుయెన్ సిల్లి సిద్దితి గొరజ్ లెకెండ మహార్. అందెజె యేసు వరిజ్ నండో నజతిజ్ నెన్ పిస్తాన్. 35-36 యేసు నెర్పిసి మహిజ్ పొద్దు అజి మహాద్. సిసూర్ వన్నిడగు వాజి యాక ఎయెరు మన్ ఇ బాడ్డి. ఏలె పొద్దు అజినాద్. పడకాద్ మన్ని నాహ్కాజ్ వలెసిజ సొన్ని బోజనం కొండెజ్ విరిజ్ పొకల. ఇహార్. 37 గాని యేసు సిసూరిజ్ మీరె వరిజ్ తిండ్రెజ్ ఇనికబా సీదు”, ఇజి వెప్తాన్. దన్నిజ్ వారు మాపు సొన్ని రుండి వంద దెనారిదిజ్* రొట్టెజ్ కొండెజి తత్తెజి బా నిస్సా లోకురిజ్ సాలేవిద్ ఇజి వెప్తార్. 38 మీబాన్ ఎస్సాడు రొట్టెజ్ మన్నె? సొన్ని సుడోడు”, ఇజి యేసు సిసూరిజ్ వెప్తాన్. వారు సొన్ని సుడోతారె అయ్దు రొట్టెజ్ రుండి మొయెజ్ మన్నె ఇజి వెప్తార్.

39 విజెరిజ్ పసిగడ్డి మన్నిబాన్ గుంపుజ్ లెకెండ బసికిదు ఇజి యేసు సిసూరిజ్ వెప్తాన్. 40 లోకుర్ యాపయ్ మనిసిర్, గుంపుజ్ వంద మనిసిర్ గుంపుజ్ బస్తార్. 41 అయవలె యేసు అయ్దు రొట్టెజ్, రుండి మొయెజ్ అసి, ఆగనం దరోజ్ సుడోజి వనకవందిజ్ దేవుణుదిజ్ వందనమ్ కు వెప్తాన్. వెప్తాండ్రె రొట్టెజ్ రుక్కి లోకురిజ్ సీబాజి సీదు ఇజి వెప్పి సిసూర్ జ్ సిత్తాన్. అయ మొయెజ్ బా విజెరిజ్ సీబాజి సీదు ఇజి సిత్తాన్. 42 వారు విజెరె పొట పంజు తిహార్. 43 మిగిలిత్తి రొట్టె ముక్కెజ్, మరె మొయెజ్ ముక్కెజ్ వన్నెండు గంపెజ్ సిసూర్ కెప్తార్. 44 రొట్టెజ్ తిహికార్ మొగవారె అయ్దు వెయిజ్ లోకుర్ మహార్.

యేసు సమ్దరం మున్ను నడిజినాన్

45 యేసు లోకాజ్ పొక్కి వెనుక వెటనె సిసూరిజ్ డోణిదు ఎకిసి అతాహాపడక బేత్తుయిద ఇని నాటో వన్నిజ్ ఇంక ముజాలే సొండ్రు ఇజి వెప్పి పొక్తాన్. 46 వరిజ్ పొక్కి యేసు పార్దనం కిదిజ్ గొరొత్ ఒరెండ్రె మహాన్. 47 పార్దు ఆతివలె డోణి సమ్దరం నడిమి మహాద్, యేసు గొరొత్ ఒరెండ్రె మహాన్. 48 గాలి ఎద్దు డెయిజ్ డోణి నడోపిస్తెజ్ సిసూరిజ్ గొప్ప కస్టం ఆతాద్. అక్క యేసు సుడోతాన్. కోడిజం ఆజి మహిజ్ యేసు సమ్దరం మున్ను నడిజి వాతాండ్రె సిసూర్ మన్ని డోణి డాట్టి సొండ్రెజ్ నడిసి వాతాన్. 49 యేసు సమ్దరం మున్ను నడిజినిక సిసూర్ సుడోతారె అక ఉండ్రె దూబ ఇజి ఒడిజి బితార్. వారు డటం గగోల్ ఆతార్. 50 అక్క దూబను ఇజి వారు నండో తియెలాతార్. వెటనె యేసు వరివెట, “సమ్దరమ్ దాన్ మండ్రు ఇక్క నానె తియెలామ”, ఇజి వరిజ్ వెప్తాన్. 51 నస్తివలె యేసు వరివెట డోణిదు ఎక్తాన్. గాలి విజు అణస్తాద్. వారు నండో బమ్మ ఆతార్.

52 యేసు అయ్దు రొట్టెజ్ రుండి మొయెజాణ్ అయ్దు వెయిజ్ లోకాజ్ బోజనం సిత్తిక సుడోతిజ్ బె యేసు కిత్తి అయా బమ్మాతి పణివందిజ్ అర్దం కివితార్. ఎందానిజ్ ఇహిజ వరి మున్ను గట్టిజ్ మహాద్.

యేసు గెనేసెరెతు ఇనిబాన్ లోకాజ్ నెగెండ కిజినాన్

53 వారు సమ్దరం డాట్టి గెనేసెరెతు ఇనిబాన్ వాతారె డోణి అబ్బె తొప్తార్. 54 వారు డోణి డిగితిజ్ సరి లోకుర్ యేసుజ్ గుర్తు అస్తార్. 55 వెటనె ఆ దేసెమది నాహ్కాణికార్ విజెరె సొన్ని జబ్బు ఆతివరిజ్ యేసు మనాన్ ఇజి వెహి బాడిదు సాపాదు పిండ్రి తత్తెజ్ మొదొ ల్స్తార్. 56 యేసు నాహ్కాజ్ పట్టుమ్ కాజ్ ఎంబె సొహిజ్ బా లోకుర్ జబ్బు ఆతివరిజ్ యేసు వాని సద్దు తత్త ఇడోతార్. యా

* 6:37 6:37 రోమది వరి కాలమ్మదు మన్ని డబ్బు ఇక్క అయకాలమ్మదు ఉండ్రె దినారి ఉండ్రె రోజుది కూలి.

జబ్బు అతికార్ నీ సొక్క, సెంగుదుబా ముట్టెజ్ సెల్వ సిదా ఇజి బతిమాలజి యేసుజ్ మరి మరి వెప్తార్. ఎస్సాండార్ వన్ని సొక్కడిజ్ ముట్టితారొ వారు విజేరె నెగెండ ఆతార్.

7

యూదపెదెలుజా రూలుజ్ దేవుణు రూలుదిజ్తేడః వాతాద్

1-2 యెరూసలేమ్దాన్ వాతి పరిసయ్యరుని, యూదురి రూలు నెస్సిసినికార్ సెంగెండార్ యేసుబాన్ కూడఃజి వాతార్. యేసు సిసూర్ యూదురుజ రూలుదు వెప్తిలెకెండ కిక్కు, నొరబవిండ బోజనం ఉణిజి మహిక వారు అబ్బె సుడఃతార్. అక్క పరిసయ్యరు సుడిఃతిజ తప్ప. 3 పరిసయ్యరు, యూదురు, విజేరె, పూర్బమ్దికార్ వెప్తిరూలు వజ కిక్కు, నొరబాతి వెన్కన ఊణార్. 4 వారు సత్తదాన్ వాతిజ, రూలువజ ఏరు లొంజె ఆవిండ ఇనికబా ఉణివర్. ఇక్కాదె ఆవిండ గిన్నెజ్ కుండెజ్ మరి కంసు బిందెజ్ ఎలాగ మిడిఃస్టెజ్ ఇజి నండొ రూలుజ్ వరిజ్ మన్నె. ఆ రూలుజ్ వజ వారు కిజినార్. 5 అందెజె పరిసయ్యరుని, యూదుర్ రూలుజ్ నెస్సిసినికార్, “ఎందానిజ్ నీ సిసూర్ పూర్బమ్దికార్ వెప్తి రూలువజ నడిఃవిండజినార్ ఎందానిజ్ వారు కిక్కు, నొరబవిండ బోజనం కిజినార్”, ఇజి యేసుజ్ వెన్బాతార్. 6-7 యేసు వరిజ్, “వేసం కినికారాతి మీ వందిజ్ యెసయ ప్రవక్త వెప్తిక నిజమె. యా లోకుర్ నజి వెయూదాన్ గవరం సీజినార్ గాని వరి మన్ను నాబాణిజ్ దూరం మనాద్. వారు నజి పొగడిఃజి మాడిఃసినార్ గాని అక్క పణిదిజ్ రెవిద్. ఎందానిజ్ ఇహిజ వారు లోకుర్ వెప్తి రూలు దేవుణు మాట ఇజి లోకాజ్ నెస్సిసినికార్*. 8 దేవుణు వెప్తి రూలు డిఃసిసీజి, మీరు పూర్బమ్దికార్ వెప్తి రూలువజ నడిఃజినిదెర్”, ఇజి వెప్తాన్.

9 యేసు వరిజ్ మరి వెప్తాన్, “పూర్బమ్దికార్ వెప్తివజ నడిఃదెజ్, ఇజి దేవుణు అడ్రెజ్ పడఃకారు నెక్తెజ్ మిజి బాగ తెలినాద్. 10 ఎలాగ ఇహిజ మీ యాయ బుబ్బరిజ్ గవరం సీజి బాగ సుడదెజ్ ఇజి యాయెజ్ గాని బుబ్బెజ్ గాని దూసిస్తిజి వన్నిజ్ సప్తెజ్ ఇజి దేవుణు మోసెజ్ సిత్తి రూలు మనాద్. 11-12 గాని ఒరెన్ వన్ని అయ్సి అపొసిరిజ్, నాను మిజి ఇనికబా ఉండ్రె సాయమ్లెకెండ కిన్ ఇజి ఇడ్డిమన్నిక కొరబాన్ ఇజి వెప్తిజి నాండిజ్ అని వాండ్రు అయ్సి అపొసిరిజ్ ఇనికబా సాయం కిదెజ్ అవ్సరం సిల్లెద్ ఇజి మీరు నెస్సిసినిదెర్. (కొరబాన్ ఇహిజ దేవుణుదిజ్ సీన్ ఇజి ఒట్టు కినిక ఇజి అర్లం) 13 ఈహు మీ పూర్బమ్దికార్ వెప్తివజ నడిఃజి మీరు దేవుణు వెప్తి రూలుదిజి విలువ సిల్లెండ కిజినిదెర్. నిన్ని నజతిజ్ నండొ మీరు కిజినిదెర్”.

14 యేసు లోకాజ్ మరి వన్నిడ్రు కూక్తాండ్రె “నాను వెప్తినిక మీరు విజదెరె జాగర్తవెంజి నెగెండ అరదం కిదు. 15-16 వెయూదాన్ లొఇ సొనికెజ్ ఇనికబా లోకాజ్ మయ్లు కిదెజ్ అట్విద్. గాని మన్ను లొఇహాన్ వెల్లి వానికదె లోకాజ్ సెవిణ్ కిజినాద్”.

17 యేసు లోకాజ్ డిఃసి ఇండ్రొ వాతివెనుక వన్ని సిసూర్, కతవజ వెప్తి దన్నిజ్ అర్లం వెన్బాతార్. 18-19 యేసు వరిజ్ ఈహు వెప్తాన్ “మీరుబా ఆఇవరిలెకెండ అర్లం కిదెజ్ ఆట్ఇదెరా? వెల్లిహాన్ పొటలొఇ సొని ఇని బోజనమ్బా లోకాజ్ మయ్లు కివిద్. ఎందనిజ్ ఇహిజ అక్క మన్నుదు సాన్విండ వన్ని పొటాదునె సొన్నినాద్. అక్క పొటాదాన్ బయలు బస్సివలె వెల్లి సొన్నినాద్. ఇజి మీరు నెస్సిసినిదెర్”. (ఇబ్బె సుడఃతి ఇని బోజనమ్బా ఉండెజ్ ఆనాద్ ఇజి యేసు సెలవ సిత్తాన్) 20 మరి యేసు వెప్తాన్, ఒరెన్ వన్ని మన్నులొఇహాన్ వెల్లి వానికదె వన్నిజ్ మయ్లు కిజినాద్. 21-22 మన్నులొఇహాన్ వానిక ఇనికెజ్ ఇహిజ, సెఇ ఆలోసనమ్కు, కెలార్బూలానిక, లోకాజ్ సప్పికెజ్, రంకు బూలానిక, ఆఇవరిజ్ మన్నికెజ్ దొవ్కెజ్ ఇజి ఆస, సెఇ పణి కినిక, మొసెం కినిక, మన్నుదు అసనె ఆజి మండ్రెజ్ అట్ఇక, గోస దూసిసినిక, నానె పెరికాన్ ఇజి గర్త ఆనిక, అర్లం కిఇ మన్ను మన్నిక. 23 యాక్రెజ్ విజు లోకుర్ మన్నులొఇహాన్ వెల్లి వాజి ఒరెన్ వన్నిజ్ మయ్లు కిన్.

ఉండ్రె కనానియది అయ్లి కొడొః యేసు ముస్సు. ఇడ్డి నమకం

* 7:6-7 7:6-7 యెసయ 29:13

24 యేసు అబెణిజ్ నండ్ దూరం సొన్ని ఉండ్రీ గోరొన్ ఎక్కి డిఃగితాండ్రె తూరు సీదోను ఇని పట్టుమ్కాజ్ డగ్రు మన్ని ముటెజ సాహాన్. బానెఉండ్రీ ఇండ్రో సొన్ని ఎయెజ్బా తెలివండ మంజిన ఇజి మన్నుదు ఒడెబితాన్. గాని వాండ్రు అట్వితాన్.

25-26 యూదురు ఆ ఇ జాతిదు పుట్టి సురోపెకొనియదికాద్ ఉండ్రీ అయిల కొడె: యేసు అబ్బె మనాన్ ఇజి వెంజి వెటనె అబ్బె వాతాదె యేసు పాదమ్కాజ్ అర్తాదె మాడిస్తాద్. దన్ని గాల్పిజ్ దెయం అస్త మహాద్. “నా గాలుజ్ అస్తిమన్ని దెయమ్దిజ్ ఉల్విత”, ఇజి యేసుజ్ బతిమాల్తాద్. 27 దన్నిజ్ యేసు, “ముజాల్ కొడె:రిజ్ పొట పంజు బోజనం తీపిస్తెజ్. కొడె:ర్ తిండ్రెజ్ మన్ని రొట్టెజ్ లాగజి నుకుడిజ్ సీనిక తగ్విద్”, ఇజి వెప్టాన్. 28 అది, “ప్రబు, నీను వెప్టాక నిజమె. గాని నుకుడిజ్బా కొడె:ర్ ఉణిజి బల్ల అడిఃగి అర్పిక ఉణిజినె గదె ఇజి వెప్టాద్. 29 యేసు, నీను బాగ వెప్టా. నీను ఇండ్రో సాన్అ. ఆ దెయం నీ గాలుజ్ డిఃస్త సాహాద్ ఇహాన్. 30 అది ఇండ్రో సొన్ని సుడెతిజ్ గాల్పి మన్నం మున్ను గూర్త మహాద్. దెయెం దనిజ్ డిఃస్త సాహాద్.

యేసు బోయర నతి ఆతివన్నిజ్ నెగెండ కిజినాన్

31 యేసు తూరు ప్రాంతం డిఃసి, సీదోను, దెకపొలి ప్రాంతమ్దాన్ గలిలయ సమ్దరం డగ్రు వాతాన్. 32 నస్తివలె బోయర నతియాలి ఒరెన్వన్నిజ్ నెగెండార్ యేసుబాన్ తత్తార్. “విన్ని మున్ను కియు ఇడెజి నెగెండ కిత”, ఇజి బతిమాల్జ వెప్టార్. 33 యేసు లోకుర్బాణిజ్ వన్నిజ్ అజ ఒసి, డెస్కెజ్ వన్ని గిబ్బిదు ఇడ్తాన్. వన్ని సొంత డెస్కెదు పూస్తాండ్రె గుల్ల వన్నిజ్ నాలికాదు ముట్టాన్. 34 ముట్టాండ్రె ఆగసం దరోట్ దేవుణుదిజ్ సుడెజి ఉసుర్ గొటాండ్రె బాదఅజి ఎపాత ఇజి వెప్టాన్. దని అర్తం ఇనిక ఇహిజ రి ఆదెజ్ ఇజి. 35 వెటనె వన్నిగిబ్బిజ్ వెండ్రెజ్, వన్ని నాలిక వర్దిదెజ్ వాతాద్. వాండ్రు బాగ వర్దిదెజ్ మొదొల్స్తాన్. 36 “ఎయెవెట వెహూట్”, ఇజి యేసువరిజ్ కసితం వెప్టాన్. నా వందిజ్ వెహూట్ ఇజి నండ్ వెప్టాజ్బా అలెవండ వారు యేసువందిజ్ మరి నండ్ వెప్టార్. 37 యేసు విజు బాగ కిత్తాన్. బోయరవన్నిజ్బా వెనివజ, గుల్లవన్నిజ్బా వర్దినివజ కిజినాన్ ఇజి వారు వెప్టారె బమ్మ అతార్.

8

యేసునాల్లివెయిజ్ మణిసిరిజ్ బోజనం సీజినాన్.

1-2 ఆ దినమ్కాజ్ మరి ఒర్పు నండ్ లోకుర్ కూడ్డి వాతార్. వరిజ్ ఉండెజ్ బోజనం ఇనికబా సిలిజ్ యేసు వన్ని సిసూరిజ కూక్తాండ్రె వెప్టాన్, నజి యా లోకుర్ నావెట వాజి మూండ్రీ రొస్సు అతె. వరిజ్ తిండ్రెజ్ ఇనికబా సిల్దెద్. అందెజె విరి వందిజ్ నా పాణం నోజన. 3 విరిజ్ నాను బోజనం సివండ ఇల్కాజ్ పొక్కిజి కణుకు తర్వజి సర్దు అర్నార్. ఎందనిజ్ ఇహిజ వరిలోఇ నెగెండార్ నండ్ దూరమ్దాన్ వాత మనార్”, ఇజి వెప్టాన్. 4 అయవలె వన్ని సిసూర్ వెప్టార్, బిడిఃమ్బూమిదు విరిజ్విజెరిజ్ బోజనం సీదెజ్ ఎమెణిజ్ తతెజ్? 5 మీ బాన్ఎసోడు రొటెజ్ మన్నె? ఇజి యేసు సిసూరిజ్ వెన్బాతాన్. మా బాన్ఎడు మన్నె ఇజి సిసూర్ వెప్టార్. 6 అయవలె యేసు లోకాజ్ బూమిదు బస్సు ఇజి వెప్టాన్. ఆ ఏడు రొట్టెజ్అసి దేవుణుదిజ్ వందనమ్కు కితాండ్రె. వన్నాజ్ రుక్కి లోకాజ్ సీబాజి సీదెజ్ సిసూరిజ్ సిత్తాన్. వారు లోకాజ్ సీబాజి సిత్తార్. 7 వరిబాన్ నెగం ఇజి మొయెజ్బా మహె. యేసు వన్నాజ్బా వందనమ్కు వెప్పి సీబాజి సీదు ఇజి సిసూరిజ్ సిత్తాన్. 8 లోకుర్ విజెరె పొట పంజు తిహార్. వెనుక సిసూర్ మిగ్గితి రొట్టె ముక్కెజ్ ఏడుః గపెజ్ కెప్టార్. 9-10 డగ్రు నాల్లి వెయిజ్లోకుర్ అబ్బె మహార్. లోకాజ్ విజెరిజ్ పొక్కి యేసు సిసూర్వెట ఉండ్రీ డోణి ఎక్తాండ్రె దల్మనుత ఇని ప్రాంతం సాహాన్.

11 నెగెండార్ పరిసయరు వాతారె యేసువెట తర్కిస్తెజ్ మొదొల్స్తార్. దేవుణునె వన్నిజ్ పొక్తాన్ ఇనిదన్నిజ్ రుజువలెకెండ ఆగసమ్దాన్ ఉండ్రీ బమ్మతి పణికిజి మజి తోరిన్అ ఇజి వెప్టార్. 12 యేసు మన్నుదు గొప్ప బాదఅజి ఉసుర్కొటాండ్రె యా లోకుర్ ఎందనిజ్ బమ్మ ఆని పణి తోరిన్అ ఇజి

† 7:27 7:27 యేసు వెప్టె దన్ని అర్దం ఇనిక ఇహిజ ముజాల వన్నిసొంత లోకురాతి యూదురిజ్ వాండ్రు నెగెండ కిదెజ్వలె వరిజ్ వానికెజ్ ఆఇవరిజ్ సీదెజ్ అవిద్ ఇజి

వెప్పినా. యా లోకాజ్ గుర్తులెకెండ్ ఇని బమ్మమాని పణిబా దేవుణు తోరిన్ ఏన్ నిజమెఱజి వెప్తాన్. 13 నస్తవలె యేసు వరిజ్ డిఃస్తాండ్రె డోణి ఎక్కి సమ్దరం డాట్టి అతాహ పడక సూహాన్.

యేసు పరిసయరువందిజ్ హేరోదువందిజ్ వెప్పినాన్

14 అహిజ సిసూర్ రొట్టెజ్ తత్తెజ్ పోస్తా. వరిబాన్ డోణిదు ఉండ్రె రొటె మహాద్. 15 యేసు సిసూరిజ్ వెప్తాన్. పరిసయరుది పులాజ్ కిని దూరు* వందిజ్, మరి హేరోదురాజుది పులాజ్ దూరు వందిజ్ మీరు జాగర్త మండ్రు.

16 మాటు రొట్టెజ్ తెఱతిజ్ యేసు ఈహు వెప్పినాన్, ఇజి వారు ఒరెన్ వెట ఒరెన్ వర్గితార్. 17 వారు వెహాసినిక యేసు నెసి ఎదానిజ్ మీరు రొట్టెజ్ సిల్లితివందిజ్ వర్గిజినిదెర్? ఏలుబా అర్తం కిజి నెన్జెజ్ అట్ ఇదెరా? మీ మన్ను గట్టి ఆత మనాదా? 18 మిజి కణుకు మంజిబ తో ఇదెరా? గిబిజ్ మంజిబా వెన్ ఇదెరా? ఇనికబా ఒడెబి ఇదెరా? 19 అయదు రొట్టెజ్ ముక్కెజ్ కిజి అయదు వెయిజ్ లోకాజ్ సీబాతి సిత్తిజ్ మిగ్గితిక్కెజ్ ఎసాడుః గంపెజ్ మీరు కెప్తాదెర్? ఇజి యేసు సిసూరిజ్ వెన్ బాతాన్. అందెజి సిసూర్ పన్నెండ్ర గంపెజ్ కెప్తా ఇహార్. 20 యేసు మరి వెన్ బాతాన్, ఏడు రొట్టె ముక్కెజ్ కిజి నాల్లి వెయిజ్ లోకాజ్ సీతి వెనుక మిగ్గితికెజ్ ఎసాడు గంపెజ్ కెప్తాదెర్? ఏడు గంపెజ్ ఇజి వారు వెప్తార్. 21 యేసు సిసూరిజ్ వెప్తాన్, మీరు ఏలుబా నాను కితి బమ్మాతి పణిబ వందిజ్ అర్తం కిదెజ్ నెన్ ఇదెరా?

యేసు బేత్ నెయ్య పట్టుమ్ దు ఒరెన్ గుడ్డి వన్నిజ్ నెగెండ్ కిజినాన్

22 యేసుని, వన్ని సిసూర్ బేత్ నెయ్య ఇని నాటో వాతార్. అయవలె నెగెండ్ర ఒరెన్ గుడివన్నిజ్ యేసుబాన్ తత్తార్. యేసు, నీను విన్నిజ్ ముట్ అ”, ఇజి వాండ్రు నెగెండ్ అనివందిజ్ బతిమాలితార్.

23 యేసు అయ గుడివన్నిజ్ కీదు అస్తాండ్రె నారు డాటిసి ఒత్తాన్. అయ గుడివన్ని కణుకాజ్ పూసి డెన్జుణాణ్ ముట్టి “నిజి ఇనికబా తోరిజినాదా”, ఇజి వెన్ బాతాన్. 24 వాండ్రు కణుకు వెర్జి, నడిఃబా తోర్లినాద్, గాని లోకు మరెక్ నడిఃజిని వజ తోరిజినాద్ ఇజి వెప్తాన్. 25 మరి ఒర్పు యేసు వన్ని కణుకెజి ముట్టాన్. నస్తవలె వన్ని కణుకు నెగెండ్ అతిజ్ విజు నెగెండ్ నుడెతాన్. 26 యేసు వన్నిజ్ బేత్ నెయ్య మర్జి సాన్మా ఇజి వెప్పి వన్ని ఇండ్రె పోక్తాన్.

యేసు ఎయెన్ ఇజి పేతురు వెప్పినాన్

27 యేసుని, వన్ని సిసూర్ పిలిపుది అతి కయసరయ పట్టుమ్ దిజ్ డగ్రు మన్ని నాహ్మాజ్ పయనం కిజి మహార్. సాన్సి మహిజ్ సర్దు యేసు వరిజ్ వెన్ బాతాన్, నాను ఎయెన్? ఇజి లోకుర్ వర్గిజినార్?

28 దన్నిజ్ సిసూర్, నెగెండ్ర నీను బాప్తిసం సీని యోహాను ఇజినార్. మరి నెగెండ్ర నీను పూర్ బమ్ దాన్ మహి ఏలియ ప్రవక్త ఇజినార్. మరి నెగెండ్ర నీను పూర్ బమ్ దు మహి ప్రవక్తలో ఇ ఒరెన్ ఇజి వెహాసినార్, ఇహార్.

29 అహిజ మీరు నజి ఎయెన్ ఇజి వెహాసినిదెర్? ఇజి యేసు సిసూరిజ్ వెన్ బాతాన్. నస్తవలె పేతురు, నీను క్రీస్తు ఇహిజ దేవుణు ఏర్పాటు కితి పోక్తాన్”, ఇజి వెప్తాన్. 30 యాక ఎయెర్ వెటబా వెహ్మాట్ ఇజి కనితం వరిజ్ ఆడ్ర సిత్తాన్.

యేసు వన్ని సావువందిజ్ వెప్పినాన్

31 యేసు వరిజ్ నెన్ పిస్టెజ్ మొదెల్ స్తాన్, లోకుమరిసి అతి నాను నండో మాలెజ్ ఒరిస్టెజ్ వలె. యూద పెద్దెల్ జ, పెరి పుజెరిజు, యూదురి రూలుజ్ నెన్ పిస్సికార్ నజి నెక్కు పోక్తాన్ లోకుర్ నజి సప్పార్ లె. సాజి మూండ్రె దినమ్ కాజ్ దేవుణు నజి మర్జి నిక్యాన్ లె. 32 యేసు యాకెజ్ విజు డాప్ వండ్ర వెప్తాజ్ పేతురు యేసుజ్ ఉండ్రె వడకాదు ఒసి, ప్రబువ నిజి యలెకెండ్ జర్గిదెజ్ ఆవిద్ ఇజి గట్టిజ వెహ్మాజ్ మొదెల్ స్తాన్.

33 యేసు సిసూర్ దెరోట్ మర్జి నుడెజి కోవమ్ దాన్ పేతురుజ్ వెప్తాన్. “ఓ సయ్యనా నాబాణిజ్ డిఃసి సాన్ అ. నీ మన్నుదు మన్ని అలోననమ్ కు దేవుణు బాణిజ్ వాతికెజ్ ఆఉ. లోకు బాణిజ్ వాతికెదె నీను అలోననం కిజిని”.

* 8:15 8:15 హేరోదురాజు కితి తప్పు వణిజ్ ని పరిసయరు నెస్సిన్ తప్పు బోదెజ్ పులాజ్ దూరు పులాజ్ కినిలెకెండ్ లోకాజ్ సెజక కిజినాద్ ఇజి యేసు వెప్పినాన్.

34 నన్నీవలె యేసు లోకాజ్ విజేరిజ్, సిసూర్జ వన్నిబాన్ కూక్కి ఈహు వెహ్లాన్. ఎయెన్బా నావెట వాదెజ్ ఇహిజ వాండ్రు వన్ని సొంత ఇస్టమకు నజీ నమ్మితివందిజ్ వన్నిజ్ వాని ఇని మాలెజ్బా ఓరిస్తెజ్ తయారాజి నావెట వాదెజ్. 35 ఎయెరుబా వన్ని పాణదిజ్ కాపాడెదిజ్ సుడెతిజి వన్నిజ్ ఎలాకాలం దేవుణువెట బత్కిని బత్కు దొహ్కావద్. గాని ఎయెన్బా నా వందిజ్, నువార్త వందిజ్ వన్ని పాణం సితిజి వన్నిజ్ ఎలాకాలం దేవుణువెట బత్కిని బత్కు దొహ్కానాద్. 36 ఒరిన్ వాండ్రు కొరితివజి యా లోకమది ఆస్తినుకం విజు దొహ్కాఆజి వన్నిజ్ ఎలాకాలం దేవుణువెట బత్కిని బత్కు దొహ్కావండా మహిజ, ఇని లాబం ఇని లాబంబా సిల్లెద్. 37 ఎందానిజ్ ఇహిజ ఎలాకాలం బత్కిని పాణమ్దిజ్ బదులు ఇనికబా సిదెజ్ లోకఅటవన్. 38 యా తరమ్దికార్ నండొ సెఇకార్ దేవుణువందిజ్ మన్ను సిల్లెండ మన్నికార్. నా బుబ్బు ఆతి దేవుణుజాయ్దాన్ దేవుణు దూతెజి వెట వానివలె, నా వందిజ్ నామాటజవందిజ్ సిగు ఆనివరివందిజ్ లోకుమారిసియాతి నానుబా సిగు ఆన”.

9

1 యేసు వరిజ్ ఈహు వెహ్లాన్, “నాను నిజం వెహ్లాన్. ఇబ్బె నిహిమహి వరిలోఇ సెగెండార్ దేవుణు గొప్పనత్తుదాన్ వన్ని లోకురిజ్ ఏలుబడిః కిజినిక సూణిదాక సావర్”.

యేసుప్రబుజ్ మూర్తి మారిసినాద్.

2 ఆరు రోస్సుసాహివెనుక యేసు పేతురు, యాకోబు, యోహానుజ్ వన్నివెట ఉండ్రె పెరి గొరొత్ కూక్కి ఒత్తాన్. ఆ నాలేవర్తప్ప అబ్బె మరి ఎయెర్బా సిల్లెర్. అబ్బె వరివెత్తు వన్నిమూర్తి మారితాద్. 3 యేసు పొర్పాతి మహి సొక్క జిగిజిగి మెరిసిని తెల్లానిజాయ్ వజి ఆతాద్. యా లోకమదు నసా తెల్లాజ్ నొర్బానికార్ ఎయెర్ సిల్లెర్. 4 మోసని, ఏలియ వరిజ్ తోర్ ఆతార్. వారు యేనువెట వర్గిజ మహార్. 5-6 అక్క సుడెజి సిసూర్ తియెలాతార్. అందెజి పేతురు ఇనిక వెహ్లాజొ నెన్ఏండ, “ప్రబు, మాటు ఇబ్బె మహిజనెగెద్. అందెజి మూండ్రె గుడుఃనెజ్ తొహ్పిట్. నిజి ఉండ్రె, మోసెజ్ ఉండ్రె, ఎలియెజ్ ఉండ్రె” ఇహాన్. 7 అయవలె ఉండ్రె మొసావ్ వరిజ్ పిడెఃగితాద్. అయవలె అయ మొసావ్ లోఇహాన్, “ఏండ్రు నా ఇస్టమాతి నా మరిన్. విన్నిమాట వెండ్రు”, ఇజి ఉండ్రె కంటం వాతాద్. 8 వెటెనె వారు సురుల సుడెఃతిజ్ వరివెట యేసు తప్ప ఎయెర్బా తొర్ఏతార్.

9 వారు గొరొన్ డిగ్జివాజి మహివలె, “లోకుమారిసియాతి నాను సాతివరిబాణిజ్ మర్జి నిజినిదాక మీరు సుడెఃతిక మహిక ఎయెజ్బా వెహ్లాట్”, ఇజి యేసు వరిజ్ కసితం వెహ్లాన్. 10 యేసు వెహ్లావజి వారు ఎయెజ్ వెహ్లావండ్ వరిమన్నుదు ఇడెజి వరిలోఇ వారి వర్గితార్, “సాజి నిజ్నిక ఇహిజ అర్దం ఇనిక?”. 11 నన్నీవలె వారు యేసుజ్ వెన్బాతార్, “ఏలియ ముజ్జాల వాదెజ్వలె ఇజి యూదురి రూలు నెన్పిస్సికార్ ఎందానిజ్ వెహ్లానార్? 12 యేసు ఏలియ ముజ్జాల వానాన్ ఇజి వెహ్లాక నిజమె. వాండ్రు వాజి విజు కొత్తజ్ కినాల్లె*. గాని లోకుమారిసియాతికాన్ నండొ కస్టమకు ఓరిసి మాలెజ్ ఆజి లోకువన్నిజ్ నెక్కిపొక్కారె ఇజి రాస్తి దనిజ్ అర్దం మిజి తెలినాదా? 13 గాని నాను మిజి వెహ్లాన్, ఏలియ వాతాన్. వన్ని వందిజ్ రాస్తి లెకెండ వరిజ్ ఇస్టం ఆతి వజి వారు వన్నిజ్ కితార్. ఇజి వెహ్లాన్.

దెయం అస్తికొడెఃదిజ్ యేసు నెగెండొ కిజినాన్

14 యేసుని, సిసూర్, మహి సిసూర్ మహిబాన్ వాతిజ్ సిసూర్ సురుల నండొ లోకుర్ కూడెతి మహిక సుడెఃతార్. యూదురి రూలు నెన్పిన్నికార్ సిసూర్వెట వాదిసి మహార్. 15 అబ్బె మహి లోకుర్ విజెరి యేసుజ్ సుడెఃతార్ నండొ బమ్మ ఆజి వెటెనె వన్నిబాన్ ఉహ్కావ్వాజి వన్నిజ్ మాడిఃస్తార్.

16 నన్నీవలె యేసు, “మీరు ఇనిదన్నిజ్ సిసూర్వెట వాదిసి మహిదెర్? ఇజి వెన్బాతాన్.

17 ఆ జనమ్లోఇ ఒరిన్ ఈహు వెహ్లాన్, “మేస్టర్, నా మరిసిజ్ నీ డర్సు తత్త. వన్నిజ్ ఉండ్రె దెయం అస్తాదె వన్నిజ్ వర్గివండ్ కితాద్. 18 ఆ దెయం నా మరిన్అస్సి వెడెడు అబ్బెనె వన్నిజ్ అర్పిన్నాద్. నన్నీవలె వాండ్రు వెయూదాన్ పెంపులు కక్కి పల్కు కొహ్సినాన్. వాండ్రు డుడ్డువజి డజ్జెన్ ఆజినాన్. ఆ దెయమ్దిజ్ ఉల్పెత్తు ఇజి నీ సిసూర్ వెట నాను వెహ్లా గాని సిసూర్ అటవతార్. 19 యేసు వెహ్లాన్, “నమకం సిల్లె యా తరమ్దికిదెరా, నాను ఎస్సాకాలం మీవెట మంజిన? మీరు కిజినికెజి ఎస్తా

† 8:34 8:34 * 9:12 9:12 పడాయ్ ప్రమాణమదు మన్ని మలాకి ప్రవక్త రాసి పుస్తకమదు రాస్తిమన్నిలెకెండొ ఇహిజ ఏలియ ముజ్జాల వాదెజ్ ఇజి యూదురి నమ్మిజనార్. మలాకి 3:1; 4:5-6.

ఓరిస్తాజ్? వన్నిజ్ నా డగ్రు తగ్ అ". 20 నస్తవలె వారు ఆ కొడోదిజ్ యేసుడగ్రు తత్తార్. ఆ దెయం యేసుజ్ సుడోతిజ్ నరి వన్నిఒడోల్ విజు వణకిసి బూమిద్ అర్ ప్తాద్. అర్ ప్తాద్ వాండ్రు సుడోబాజి పొజు కక్రాన్.

21 నస్తవలె యేసు, “వన్నిజ్ దెయం అసి ఎస్సా కాలం ఆతాద్?”, ఇజి అసాసిజ్ వెన్ బాతాన్. “ఇజి వెలెహానె”, ఇజి అప్పాసి వెప్తాన్. 22 “ఆ దెయం కొడోదిజ్ సప్తెజ్ ఇజి నండోసుట్టుక్ సిసూద్, సిల్లిజి ఏరుదు అర్ ప్పి మహాద్. నీను ఇనికబా కిదెజ్ అట్టి ఇహిజి మా ముస్సుక్ కనికారం ఆజి మజి సాయం కిత”, ఇజి అప్పాసి యేసుజ్ వెప్తాన్. 23 యేసు వెప్తాన్, “నీను ఇనికబా కిదెజ్ అట్టిజి ఇజి మీరు నజి వెప్పాదెరా? ఎయెన్ బా దేవుణు ముస్సుక్ నమకం ఇడ్డిజి వన్నిజ్ దేవుణు ఇనికబా కిదెజ్ అట్టాన్”. 24 వెటనె ఆ ఇజి వన్ని అప్పాసి, “నాను నమిజిన. అనుమానం సిల్లిండ నమినివజి నాను నిజి నమ్మిదెజ్ సాయం కిత”, ఇజి డటం వెప్తాన్. 25 అబ్బె లోకుకూడోజి ఉహాక్సి వానిక యేసు సుడోజి ఆ దెయం దిజ్ “ఓ గుల్లబోయర్ దెయం, యా కొడోదిజ్ డిసి వెల్లి సాన్ అ ఇజి నాను ఆడ్ర సీజిన. ఎనెజ్ బా మర్ జి వన్ని లోక రమ”, ఇజి డటిసి వెప్తాన్. 26 నస్తవలె ఆ దెయం గగోలాజి వన్నిజ్ గొప్ప వణకిసి డిస్త సాహాద్. ఆ కొడోదిజ్ సుడోతిజి సాతివన్నివజి మహాన్. అక్క సుడోజి నండోండార్ “యా కొడో సాత సాహాన్” ఇహార్. 27 గాని యేసు వన్ని కీదు అసి నిక్తిజ్ వాండ్రు నిహాన్.

28 యేసు ఉండ్రీ ఇండ్రో సాహివెనుక, యేసు అజి మహిజ్ వన్నిసిసూర్, “మాపు ఎందానిజ్ ఆ దెయం దిజ్ ఉల్ ప్తెజ్ అట్ వితావ్? ఇజి వెన్ బాతాన్. 29 అందెజి యేసు, “యా రకం దెయం కు సార్దనం వెలెనె గాని మరి ఇనిదని వెలెబా సాన్ ఉ”, ఇజి వెప్తాన్.

యేసు వన్ని సావువందిజ్ మరి వెప్పానాన్

30 వారు అబెణిజ్ సాన్సి గలిలయదాన్ సాన్సి మహాన్. వారు ఎంబె మంజినారొ ఇజి ఎయెజ్ బా తెలిదెజ్ యేసుజ్ ఇస్టం సిల్లితాద్. 31 ఎందానిజ్ ఇహిజి, యేసు వన్ని సిసూర్ జె నెన్ పిసి మహాన్. ఇనిక ఇహిజి, “లోకుమరిసియాతి నజి లోకాజ్ ఒవజెప్పారెలె. వారు నజి సప్పార్. మూండ్రీ రోస్కాజ్ నాను బత్తిజి నిజ్ నాలె. 32 గాని యేసు వెప్పామాట సిసూర్ అర్దం కివితార్. ఆ మాటజి వందిజ్ వన్నిజ్ వెన్ బాదెజ్ వారు తియాలాతార్.

విజెరిజ్ ముస్సుక్ పెరికాన్ ఎయెన్?

33 వారు కవర్పుహము ఇని పట్టుమదు వాతార్. వారు ఇండ్రో వాతిజ్ యేసు మీరు సర్దు ఒరెన్ వెట ఒరెన్ ఇనిదని వందిజ్ వాదిసి మహిదెర్. ఇజి వెన్ బాతాన్. 34 గాని వారు ఇనిక వర్తివండ అలెతార్. ఎందానిజ్ ఇహిజి వానివలె సర్దు ‘మా లోఇఎయెన్ పెరికాన్’ ఇజి ఒరెన్ వన్నివెట మరి ఒరెన్ వాదిసి మహాన్. 35 నస్తవలె యేసు బస్తాండ్రె పన్నెండం మణిసిర్ సిసూర్ జి కూక్సి ఈహు వెప్తాన్, ఎయెన్ మహి వరిముస్సుక్ పెరికాన్ ఆనాండ్రో, వాండ్రు విజెరి ఇంక అగిజి మండ్రెజ్. వాండ్రు విజెరిజ్ నేవ కిదెజ్. 36-37 వెనుక యేసు ఒరెన్ ఇజి కొడోదిజ్ తసి వరినడిమి నిల్ ప్తాన్. మరి ఆ కొడోదిజ్ ఎతాండ్రె ఈహు వెప్తాన్, “ఒరెన్ ఇజి కొడోదిజ్ ఎయెర్ నా పేరు అసి వరి ఇండ్రో డగ్రు కినారొ వారు నజి డగ్రు కినార్. ఎయెర్ నజి డగ్రు కినారొ నజి ఆవండ నజి పోక్తివన్నిజ్ డగ్రు కినార్.

మా ముస్సుక్ పగసిల్లికాన్ మా పడోకాదు మన్నికాండ్రె

38 యోహూను వెప్తాన్, “మేస్టర్, ఒరెన్ నీ పేరు అసి దెయం మకాజ్ ఉల్ ప్తిక మాప్ సుడోతావ్. వాండ్రు మాలోఇ మనికాన్ అవిన్. అందెజి మాపు వన్నిజ్ అడ్డు కిత్తావ్. 39 యేసు వెప్తాన్, “వన్నిజ్ మీరు అడ్డు కిమాట్. నా పేరు అసి యేలు బమ్మాతి వణకిసికాన్ వెటనె నా వందిజ్ నెఇక వెహావన్. 40 మా ముస్సుక్ పగ సిల్లికాన్ మా పడోకాదు మన్నికాండ్రె. 41 నాను నిజం వెప్పాన, ఎయెర్ బా మీరు క్రిస్తు వారు ఇజి వెప్పా, నా పేరు అసి గినాడు ఏరు ఉండెజ్ మిజి సితిజి దేవుణు వరిజ్ నిజం ఇనాయం నీనాన్.

తప్పకిబిసినివన్నిజ్ నండో సిక్సి వానాద్

42 నాముస్సుక్ నమ్మకం ఇడ్డి యా ఇజిరి కొడోదిజ్ వరిలోఇ ఒరెన్ వన్నిజ్ ఎయెర్ బా తప్పకిదెజ్, సరి తోరిస్తిజి వాండ్రు మెడోదు పెరి జతవణుకు తోహా ఆజి సమ్ దరమ్దు అడోగి ముడిగి సానొక వన్నిజ్ నెగెద్. ఎందానిజ్ ఇహిజి తప్పకిబిస్తివన్నిజ్ ఒద్దె సిక్సి వానాద్. 43 నీ కియు నిజి తప్ప కిబిస్తిజి

దన్నిజ్ కత్తి విసిరీత. 44 రుండి కికు మంజి ఎలాకాలం సిసు మంజినిబాన్ సొన్ ఏండ ఉండ్రె కియు మంజి ఎలాకాలం బత్తిదెజ్ దేవుణుబాన్ సొనిక నెగెద్. 45-46 నీ కాలు తప్పకిబిస్తజి దన్నిజ్ కత్తి విసిరీత. రుండి కాల్యు మంజి ఎలాకాలం సిసు మంజినిబాన్ దేవుణు నిజి అరేవేండ, సొట వాండ్రు ఆజి ఎల్ల కాలం బత్తిదెజ్ దేవుణు బాన్ సొనిక నెగెద్. 47 నీ కణుక తప్పకిబిస్తజి దన్నిజ్ లాగ్గి విసిరీత. రుండి కణుకు మంజి దేవుణు నిజి నరకమేదు అరేవేండ ఉండ్రె కణక మంజి దేవుణు ఏలుబడిఁదు మంజినిక నెగెద్. 48 బానె వరి పిడుఁకు సాఁ. సిసు నమ్ ఏద్. 49 సోరుదాన్ ఇడ్డివజ దేవుణుదిజ్ నమ్మిని వన్నిజ్ సిసు నని కష్టందాన్ ఇడ్డాన్. 50 సోరు, నెగ్గికాదె గాని దన్నిజ్ మని రుసి సొపాజి ఎలాగ మరి దన్నిజ్ రుసి తప్పిజ్ ఆనాద్? మీరుబా సోరు రుసి సీనివజ ఒరెన్ వెట ఒరెన్ నమనం కల్లిజి మండ్రెజ్”.

10

ఆల్లిజ్ డిఁస్తెజ్ నాయమ్ నా ఇజి యేసు నెన్ పిసి నాన్

1 యేసు, వాండ్రు మహిబాణిజ్ డిసిని యూదయ ప్రాంతమేదు వాజి యొర్దాన్ గడ్డ డాట్టాన్. మరి వన్నిబాన్ నంఢో లోకుర వాతార్. ఎనెజ్ బా నెన్ పిసిని లెకెండ యేసు వరిజ్ నెన్ పిస్తాన్. 2 నెగ్గిండాం పరిసయేరు యేసుడగ్గు వాజి వన్నిమాటజి తప్ప అస్తెజ్ సుడఁతార్. వారు యేసుజ్ వెన్ బాతార్, మోసె సితీ రూలువజ ఒరెన్ వన్ని ఆల్లిజ్ డిఁస్తెజ్ తగితి రూలుమనాదా? 3 అందెజి యేసు, మోసె ఇని రూలు మిజి సితాన్? ఇజి వరిజ్ వెన్ బాతాన్. 4 ఒరెన్ వన్ని ఆల్లిజ్ డిఁస్తెజ్ ఇహిజ ఉండ్రె ఆక్క. రాసిసిజి దన్నిజ్ డిఁస్తెజ్ ఆనాద్. ఇజి మోసె సితీ రూలుదు మనాద్, వారు వెప్టార్.

5 యేసు వెప్టాన్, మీ మన్నుజ్ నసా గర్త ఆతిజ్ నె యా ఆడ్ర రాసి సితాన్. 6 గాని దేవుణు లోకాజ్ పుట్టిస్తవలె మొగకొణిఁ అయేలి కొణిఁలెకెండ వరిజ్ పుట్టిస్తాన్. 7 అందెజి మొగవాండ్రు వన్ని అయేసి అపొసిజ్ డిఁసి వన్ని ఆల్లివెట కూడఁజి మంజినాన్. 8 రిఎర్ ఉండ్రె ఒడొల్ వజ ఆజి మంజినార్. అందెజి మరి ఎనెజ్ బా వారు రిఎర్ ఆవండ ఉండ్రె లోకునె. 9 అందెజి దేవుణు జత్తుకొణిఁప్పివరిజ్ లోకు అజ కినిక ఆవిద్. 10 వారు ఇండ్రె మహివలె సిసూర్ యా సజతి వందిజ్ యేసుజ్ మరి వెన్ బాతార్. 11 యేసు వెప్టాన్, “ఒరెన్ ఆల్లిజ్ డిఁసి మరి ఉండ్రె దన్నిజ్ ఇడ్డె ఆతిజి వాండ్రు రంకు బూలాజినాన్. 12 అయ లెకెండ అయేలి కొణిఁ మాసిజ్ డిఁసి మరి ఒరెన్ వన్నిజ్ ఇడ్డె ఆతిజి అది రంకు బూలాజినాద్”.

యేసు ఇజిరి కొణిఁరిజ్ దీవిసి నాన్

13 లోకుర, వరి ఇజిరి కొణిఁరిజ్” వరి మున్ను వన్ని కిక్కు ఇడ్డెదెజ్ ఇజి యేసుబాన్ తత్తార్. అక్క సుడఁతారె సిసూర్ వరిజ్ జట్టిజ్ ఆతార్. 14 గాని యేసు అక్క సుడఁతాండ్రె సిసూర్ మున్ను కోపం ఆతాన్. “యా ఇజిరి కొణిఁరిజ్ నా డగ్గు రపిర్. వరిజ్ అడ్డు కిమాట్. ఎందానిజ్ ఇహిజ యాలెకెండ మన్నికారె దేవుణు ఏలుబడిఁదు మంజినార్. 15 నాను వెప్టిక నిజమె. ఇజిరి కొణిఁరె నమకం ఇడ్డివజ దేవుణు మున్ను. నమకం ఇడ్డికారె దేవుణు ఏలుబడిఁదు మంజినార్. సిల్లికార్ సొన్ ఏర్”, ఇజి యేసు వెప్టాన్. 16 నస్తవలె యేసు అయ ఇజిరి కొణిఁరిజ్ ఎత్తి, వరి మున్ను కిక్కు ఇడ్డిజ్ పొమ్జి దీవిస్తాన్.

ఆస్తి మనికాన్ యేసుడగ్గు వాజినాన్

17 యేసు అబ్బెణాన్ సొండ్రెజ్ సొత్తిజ్ ఒరెన్ ఉవ్ క్వి వాజి వన్ని ముజాల్ ముణుకుజ్ ఊరజి మాడిస్తాన్, “ఓ నెగ్గి బోదకినికి, దేవుణువెట ఎలాకాలం మంజిని బత్తుదు మండ్రెజ్ ఇహిజ నాను ఇనిక కిదెజ్”, ఇజి యేసుజ్ వెన్ బాతాన్. 18 “నీను ఎందానిజ్ నజి నెగ్గికి ఇజి వెహ్ సిని? దేవుణు ఒరెండ్రె నెగ్గికాన్. మరి ఎయేనిబా నెగ్గికాన్ ఆవిన్. 19 దేవుణు వెప్టి రూలువిజి నిజి తెలిసాద్. లోకాజ్ సప్తెజ్ ఆవిద్, రంకు బూలాదెజ్ ఆవిద్, డొజి కిమా, అబద్దమదిజ్ సాస్య వెహ్, ఎయెజ్ బా మోసెం కినిక ఆవిద్, యాయ బుబ్బరిజ్ గవ్ రమ్ దాన్ నెగ్గెండ్రె సుడిదెజ్”, ఇజి యేసు వన్నిజ్ వెప్టాన్. 20 వెప్టెజ్ “బోదకినికి, ఇజిరి వెలెహాన్ అసి యా విజివనకాజ్ లోజిజనె నాను మంజిన”, ఇజి వాండ్రు వెప్టాన్. 21 యేసు వన్నిజ్ సుడఁజి వన్నిజ్ ప్రేమిస్తాన్. “నీను ఉండ్రె కిదెజ్ మనాద్. అక్క ఇనిక ఇహిజ నీను సొన్ని నిజి కల్లితిమనిక విజి పొర్చి అయ డబ్బుజ్ బీదాతివరిజ్ సిత. అయవలె పరలోకమేదు నిజి

ఆస్తి దొహ్కాల్వాద్. వెనుక వాజి నా సిసూ ఆఅ”, ఇజి యేసు వెహ్లాన్. 22 యామాట వెహాండ్రి వాండ్రు మొకొం ఊతాండ్రి మన్సుదు దుకమాజి సాహాన్. ఎండానిజ్ ఇహిజి వాండ్రు నండ్రి ఆస్తి మన్నికాన్. 23 నస్తివలె యేసు సురుల నుడేజి సిసూరిజి వెహ్లాన్. “ఆస్తి మన్నికాన్ దేవుణు ఏలుబడిః అడిగి మండ్రిజ్ ఎస్సానొ కస్టం.

24 యేసు వెహ్లా మాటజ్ సిసూర్ వెహారె బమ్మ ఆతార్. యేసు మరి వెహ్లాన్, “కొణ్ణోరాండ్రి దేవుణు ఏలుబడిః అడిగి మండ్రిజ్ ఎస్సానొ కస్టం. 25 ఆస్తిమన్నికాన్ దేవుణుకిని ఏలుబడిఃదిజ్ లోజిజి మండ్రిజ్ ఇహిజి కస్టం. ఉండ్రి ఒంటె బోబానం బోరొదాన్ డుగ్గినిక దన్నిజ్ ఇంక సులునె”.

26 యాక వెంజి సిసూర్ మరి ఒద్ది బమ్మ ఆతార్. అహిజి దేవుణు రక్కిస్తిలికెండ్రి ఎయెన్ మండ్రిజ్ అట్నాన్? ఇజి వారు ఒరెన్వెట మరి ఒరెన్ వెహ్లాన్. 27 నస్తివలె యేసు వరిజ్ నుడేజి, అయా లోకాజ్ అట్ ఇకాదె గాని దేవుణు విజి కిదెజ్ ట్నాన్”, ఇజి వెహ్లాన్. 28 నస్తివలె పేతురు, మాపు విజి డేస్తాపె నీవెట వాతాప్ ఇజి యేసుజ్ వెహ్లాన్.

29-30 యేసు మరి వెహ్లాన్, నాను వెహ్లాక ఇనిక ఇహిజి, నా వందిజ్, సువార్త వెహ్లా వందిజ్, ఇలుజ్జెల్లు నా దాదతంబేరిజు, తజిబీబికాజ్, కొణ్ణోరిజ్, అయ్సిఅపొసిరిజ్, బూమిజ్ డిస్తివన్నిజ్ యా లోకమదునె వంద వందుజ్ ఇల్లు, దాదతంబేరిజ్, బీబితజికు, కొణ్ణోరిజ్, అయ్సిఅపొసిర్, బూమి, కల్లినాద్. అక్కాదె అవిండ్ దేవుణుదిజ్ నమ్మితివరిజ్ యా లోకమదు కస్టమ్కుబా వానె. గాని దేవుణు రాజువజి వానివలె వాండ్రు ఎలాకాలం దేవుణువెట బత్కినాన్. 31 అయ్లికెండ్రినె కడెవెరిదికార్ ఇజి ఒడిఃబినికార్ మొదొహికార్ ఆనార్. ముందహికార్ ఇజి ఒడిఃబినికార్ కడెవెరిదికార్ ఆనార్.

యేసు మరిఉండ్రి సుటు వన్నిసాపు వందిజ్ వెహ్లానాన్

32 యేసుని, సిసూర్ యెరూసలేమ్దు సొస్సి మహార్. లోకుర్బా వరివెట సొస్సి మహార్. యేసు వరి ముజాల్ నడిఃతాన్. యేసు యెరూసలేమ్దు సొస్సిని వందిజ్ సిసూర్ బమ్మఆతార్. లోకుర్ తియెలాతార్. యేసు పన్నెండు మణిసిర్ సిసూర్ వన్నిడగ్రు కూక్కి, వన్నిజ్ జర్నినిక వరిజ్ వెహ్లాన్. 33 “ఇదిలో మాటు యెరూసలేమ్దు సొస్సినాట్. లోకుమరిసియాతి నాను పెరి పుజెరిజి, యూదురి రూలువెహ్లా వరిజ్ ఒపజెహ్లాల్లె. వారు నజి సాపుదిజ్ సిక్కి సీజి యూదురు ఆఇవరిజ్ నజి ఒపజెహ్లాల్లె. 34 వారు నజి వెక్కిసి, నా మున్సు పూసి, కొర్బదాన్ డెయేజి సహ్లాల్లె. మూండ్రి రోస్కొణిజ్ మరజి నిజనాలె”, ఇజి వెహ్లాన్.

యాకోబుని యోహాను యేసువెట ఉండ్రిమాట వెహ్లాసినార్

35 నస్తివలె జెబెదయ మరిసిరాతి యాకోబు యోహాను ఇనికార్ యేసుడగ్రు వాతారె, “ఒ బోదగినికి, మాపు ఇనికబా లొస్తిజి అక్క మజి సీదెజ్వెలె” ఇహార్. 36 యేసు వరిజ్ “నాను మీ వందిజ్ ఇనిక కిదెజ్?”, ఇజి వెన్బాతాన్. 37 వారు, “నీను రాజువజి ఏలుబడిః కినివలె మజి ఒరెన్వన్నిజ్ నీ ఉణెర్ పడఃకాదు ఒరెన్వన్నిజ్ నీ డేబ్ర పడఃకాదు బనె కిఅ ఇజి కోరిజినాప్”, ఇజి వెహ్లాన్. 38-39 యేసు వరిజ్ “మీరు ఇనిక లోసినిదెరో మీరు నెన్ఇదెర్. నాను ఒరిస్తిజ్ మన్ని నండ్రి బాదెజ్ మీరు ఒరిస్తిజ్ అట్టిదెరా? నాను పొందిని బాప్తిసం పొందిదెజ్ అట్టిదెరా?”, ఇజి వరిజ్ వెన్బాతిజ్ వారు, “మాప్ అట్నాప్ ఇహార్. దనిజ్ యేసు నాను ఒరిస్తి నండ్రిబాదెజ్ మీరు ఒరిస్తిదెర్. నాను పొందిని బాప్తిసం మీరు పొందిదెజ్. 40 గాని నా ఉణెర్ పడఃకాద్ డేబ్ర పడఃకాద్ ఎయెర్ బన్నిజ్ ఇజి తీర్మనం కితిక నాను అవి. దన్ని వందిజ్ దేవుణు తీర్మనం కిత్త మనాన్. వాండ్రు తీర్మనం కితివరిజ్ అక్క సీనాన్.

41 మహి పది మన్ని సిసూర్ యా మాట వెహారె యాకోబుని యోహాను మున్సు కోపమాతార్. 42 యేసు సిసూరిజ్ విజెరిజ్ కూక్కి ఈహు వెహ్లాన్, “యూదురు ఆఇవరిలోఇ ఏలుబడిః కిదెజ్ అతికారం మన్నికార్ వరిమున్సు. అతికారం తోరిస్సార్ వరిలోఇ పెరికార్ వరిజ్ మన్ని అతికారమదాన్ లోకురిజ్ అణను తిగ్జనార్ ఇజి మిరు నెన్సిదెర్. 43 మీరు వరిలికెండ్రి మండ్రిజ్ ఆవిద్. గాని మీ లోఇ ఎయెస్బా పెరికానాదెజ్ ఇహిజి వాండ్రు మిజి పణిమణిసిర్ లెకెండ్రి ఆదెజ్ వలె. 44 మరి ఎయెస్బా మిజి విజెర్ మున్సు. నెయెకి ఆదెజ్ ఇహిజి వాండ్రు మిజి విజెరిజ్ వెటిపణిమణిసిల్లెకెండ్రి ఆదెజ్ వలె. 45 ఎండానిజ్ ఇహిజి లోకు మరిసిఆతి నానుబా లోకాజ్ సేవ కిదెజ్ వాత గాని సేవ కిదె ఆదెజ్ రెవత. మరి నండ్రిండారిజ్ వరి పాపమ్కాణ్ విడఃదల కిదెజ్ నా పాణం సిదెజ్ వాత మన్న”.

యేసు గుడ్డిఆతి బర్తిమయిజ్ నెగెండ్ కిజినాన్

46 యేసుని సిసూర్ యెరికొపట్టుమీదు వాతార్. వారు నండొ లోకుర్వెట పట్టుమీదాన్ సొన్ని మహిజ్ తిమాయి మరిసి ఆతి బర్తిమయి ఇని గుడ్డివాండ్రు సరి పడెకాదు లొన్పాదెజ్ బస్త మహాన్.

47 సరి దాన్ వాజనికాన్ నజరెతువాండ్రు యేసు ఇజి వెంజి, “ఓ యేసు, దావీదుమరిసి నా ముస్కు కనికరం తోరిన్త”, ఇజి డటం గగోల్ఆతాన్.

48 సేన లోకువన్నిజ్ “పలాక్ మండ్రు ఇజి గోల కిత్తార్. గాని వాండ్రు “ఓ “దావీదుమరిసి, నా ముస్కు కనికారం తోరిన్త”. మరి ఒద్దె డట్టం డేల్స్తాన్. 49 యేసు నిహండ్రె, “వన్నిజ్ కూక్త”, ఇజి వెప్తాన్. వెప్తాజ్ వారు ఆ గుడ్డివన్నిజ్ కూక్తి, “దయరం మన్త, యేసు నిజి కూక్తినాన్, నిజ్త”, ఇజి వెప్తార్. 50 వెటనె వాండ్రు వన్ని నీరి సొక్కు విసీరాండ్రె నిజ్జి యేసు బాన్వాతాన్.

51 యేసు వన్నివెట, “నాను నిజి ఇనిక కిదెజ్ఇజి నీను కోరిజిని?”, ఇజి వెన్బాతాన్. నస్తివలె వాండ్రు, “యేసు, నాను బేస్తెజ్ ఆపిద్”, ఇజి వెప్తాన్. 52 యేసు, “నీను నా ముస్కు నమకం ఇడ్డి అందెజి నీను నెగెండ్ ఆతి నీను ఇండ్రొ సొన్త” ఇహాన్. వెటనె సుడుఃదెజ్ అట్టాన్. వాండ్రు యేసువెట సొహాన్.

11

యేసుజ్ రాజువజ మర్యాద సీజినార్

1-2 యేసుని, వన్నిసిసూర్ యెరూసలేం డ్రుమన్ని బెత్పాగె బేతానియ ఇని నాహ్మజ్ వాతార్. యా నాహ్మ్య ఒలివ గొరొన్డ్రు మన్నె. అబ్బె వాతిజ్ యేసు సిసూర్ రివిరిజ్ కూక్తి, “మీరు ఎద్రు మని నాటో సొండ్రు. అబ్బె సొహిజసరి తొప్తి మని ఉండ్రె పెరి గాడెది పిల్ల మీరు నూణిదెర్ దని ముస్కు ఎయెర్బా ఎనెజ్బా బన్వేతారె. దనిజ్ కుత్తి నాబాన్ పేర్జి తగాట్”. 3 “మీరు ఎండా కుత్తినిదెర్ ఇజి ఎయెర్బా వెప్తాజి, యాక ప్రబుజ్ కావాలి. మరి వెటనె దన్నిజ్ మరజి పొక్వాన్ ఇజి వెప్తా” ఇహాన్. 4-5 వారు సొన్ని ఇల్లుముజాలే వీదిదు తొప్తి మని ఉండ్రె గాడెది పిల్లదిజ్ సుడతార. వారు దనిజ్కుత్తి మహిజ్, అబ్బె మనికార్, “ఎందానిజ్ మీరు యా గాడెది పిల్లదిజ్ కుత్తినిదెర్”, ఇజి వెన్బాతార. 6 యేసు వరిజ్ వెప్తి వజనె సిసూర్ వెప్తార్. అబ్బె మహికార్ వరిజ్ సరిసెత్తార్. 7 వారు గాడెది పిల్లదిజ్ యేసుబాన్ తత్తార్. దన్నిముస్కు బస్తెజ్ వరి పాతెజ్ పప్తిజ్ యేసు దన్నిముస్కు ఎక్కి యెరూసలేమీదు సొండ్రెజ్ సొతాన్. 8 సొహిజ్ సేన లోకు వరి నీరి సొక్కిజ్ సర్దు పప్తార్. మరి సెగొండార్గుడ్డెదు మని మరికాణి కొమ్మెజ్ తతారె సర్దు పప్తార్. ఆపా కిజి వారు యేసుజ్ మర్యాద కిత్తార్. 9-10 ముజాలే సొన్ని మహికార్, వెనుక వాజి మహికార్, “ఓనన్న! ప్రబు సిత్తి అతికారమదాన్ వాజనికాన్ పొగడె ఆనికాన్*. మా అని గొగొఆతి దావీదు రాజువజి ఎలుబడి కిదెజ్ వాని ప్రబు గొప్పు వాండ్రు పరలోకమీదు మన్ని దేవుణుదిజ్ ఓనన్న!”, ఇజి డేల్స్తార. 11 యేసు యెరూసలేమీదు వాజి దేవుణు గుడిఃదు సొహాన్. అబ్బె మహి విజుదనిజ్ యేసు సుడతాన్. గాని పొద్దు ఆతిజ్ పన్నెండు మణిసిర్ సిసూర్వెట బేతానియ నాటో సొహాన్.

పట్టు సిల్లి బోడెమరాన్

12 మర్చ నాండెజ్ యేసు, వన్ని సిసూరు బేతానియదాన్ సొన్నిమహిజ్ యేసుజ్ బజి కట్టాద్. 13 యేసు దూరమదాన్ ఉండ్రె బోడెమరాన్ సుడతాన్. పట్టు కాలం ఆకణిబా మరాతు ఆకుజ్ మహె. మరాత్పట్టు మంజినె ఇజి డ్రు సొహండ్రె సుడతాన్. గాని ఆకు తప పట్టు సిల్లి. 14 యేసు ఆ మరాతిజ్ నీ పట్టు మరి ఎనెజ్బా లోకుర్తిన్విండ ఆపిర్ ఇజి వెప్తాన్. వాండ్రు వెప్తిక సిసూర్ విహర్.

యేసు యెరూసలేమీదు మన్ని పెరిదేవుణుగుడిఃదు సొహాన్

15 యేసుని వన్ని సిసూర్ యెరూసలేమీదు వాతిజ్, యేసు అబ్బెమహి యూదురి దేవుణు గుడిఃదు సొహాన్. అబ్బెగుడిః అర్బుదు మహి కొణి వరిజ్ పొర్నివరిజ్ విజెరిజ్ వెల్లి పొక్తాన్. డబ్బు మారిస్సి వరి బల్లెజ్ని పావురపొటిజి పొర్నిని వరి పిటెజ్ మప్తా విసీర్తాన్. 16 ఇని సామానమబా ఎయెర్బా దేవుణు గుడిః బాడిఃదాన్ బరు మోస్తాజ్ యేసు సరి సివితాన్. 17 యేసు వరిజ్ నెన్పినివెలె ఈహు వెప్తాన్,

* 11:9-10 11:9-10 కీర్తన 118:26.

“నా గుడిః విజెరి లోకాజ్ పార్దనం కిని గుడిః ఇజి కూకె ఆనాద్లో, ఇజి దేవుణు మాటదు రాస్త మనాద్. గాని మీరు దన్నిజ్ డోజారిజ సాలం† లెకెండ్ కిత్తి మన్నిదెర్”.

18 యేసు వెహ్తాక లోకర్ విజెరి వెంజి బమ్మ అతార్. అబ్బె మహి పెరిపుజెరిజు, యూదురి రూలుజ్ నెన్పిసినికార్ అక్క సుడఃజి తియెలాతార్. యేసుజ్ ఎలాగ సహ్తజ్ ఇజి అలోననం కితార్. 19 పొద్దు అతివలె యేసుని, వన్ని సిసూర్ ఆ పట్టుమ్దాన్ సాహార్.

పట్టు సిల్లి బొడెమరాన్ వందిజ్ యేసు వెహ్సినాన్

20 పెందాల్పా వారు సొన్నిమహిజ్ యేసు పట్టు రెబాతి బొడెమరాన్ వెలెజాణిజ్ మరాన్ విజు సాతిక వారు సుడుఃతార్. 21 పేతురు యేసు వెహ్తాక గుర్తు కితాన్. “ప్రబు నీను సయవ్ సిత్తి బొడెమరాన్ సాత మనాద్”, ఇజి వెహ్సాన్.

22-23 యేసు వరివెటె ఈహు వెహ్సాన్, “మీరు దేవుణు ముస్సు నమకం ఇడుఃదు. నాను నిజం వెహ్సిన. ఎయెర్బా యా గొరోణ్దిజ్” పెర ఆజి నమదరమ్దు అర్అ’ ఇజి వన్ని ముస్సుదు అనుమానం సిల్లెండ నమిజి వెహ్తాజి ఆ వజనె జగ్గినాద్”. 24 అందెజి నాను వెహ్సిన, మీరు పార్దనం కినివెలె మీరు ఇనికెజ్ లోసినిదెరో అక్కెజ్ డోహ్కెంండ ముజాలె అక్కెజ్ డోహ్కాద్ ఇజి నమ్మిదు. నస్తవలె అక్కెజ్ విజు మిజి కల్లినె. 25 మీరు ఎసెజ్బా పార్దనం కినివెలె ఎయెన్బా మీ ముస్సు తప్పకెత్త మనాన్ ఇహిజి వన్నిజ్ సెమిస్సెజ్. 26 నస్తవలె పరలోకమ్దు మన్ని నీ బుబ్బాతి దేవుణు మీ తప్పజ్బా సెమిస్సాన్.

యేసుజ్ ఎయెన్ అతికారం సితాన్ఇజి వెన్బాజినార్

27 యేసుని, వన్నిసిసూర్, మరి యెరూసలెమ్దు వాతార్. యేసు అబ్బె దేవుణుగుడిః నడిఃజి మహిజ్ పెరిపుజెరిజు యూదురి రూలుజ్ నెన్పిసినికార్ యూదవెద్దెల్లెజి వన్నిబాన్ వాతార్. 28 వారు యేసుజ్ వెన్బాతార్, “నీను ఇని అతికారమ్దాన్ యా పణిజ్కిజిని? యాపణిజ్ విజుకిదెజ్ ఎయెన్ నిజి అతికారం సితాన్?”. 29 యేసు వెహ్సాన్, “నాను మిజి ఉండ్రిమాట వెన్బాన. నజి జబాబ్ వెహ్సా. అయవలె యా పణిజ్ ఎమేణి అతికారమ్దాన్ కిజిన ఇజి నాను మిజి వెహ్సా. 30 యోహానుజ్ బాప్తీసం సిదెజ్ అతికారం ఎంబెణిజ్ వాతాద్? దేవుణు బాణిజ్నా, లోకర్బాణిజ్నా? నజి వెహ్సా.

31-32 యేసు వెహ్తామాట వెంజి వరిలోఇ వారె ఒడిఃబితార్. దేవుణుబాణిజ్ వాతాద్ ఇజి వెహ్తాజి అయవలె ఎందనిజ్ మీరు వన్నిజ్ నమ్మిఇతిదెర్ ఇజి వెన్బానాన్. లోకర్ బాణిజ్ వాతాద్ ఇజి వెహ్తాజి వారు లోకాజ్ తియెలె ఆతార్. ఎందానిజ్ ఇహిజి యోహాను దేవుణు మాట వెహ్సా ప్రవక్త ఇజి లోకర్ నమ్మితార్. 33 అందెజి వారు, “మజి తెలివద్”, ఇజి మర్జి వెహ్సార్. అయవలె యేసు, “అహిజి, యా ఎంమేణి అతికారమ్దాన్ యా పణిజ్ కిజిన ఇజి మిజి నానుబా వెహ్సా”, ఇజి వెహ్సాన్.

12

పాలిసిత్తి బోటకత

1 యేసు వరిజ్ కతవజి ఈహు వెహ్సాన్. “ఒరెన్వన్నిజ్ కండెక్ బూమి మహాద్. వాండ్రు ఆ బూమిదు ద్రాసమెకెజ్ ఉణుస్తాన్. దన్ని సురుల కోటి తోహిస్తాన్. దన్నిలోఇ ద్రాక్కుపట్కురసం పీర్డెజ్ పణుకుదు ఉండ్రి గనుగు తయార్ కిబిస్తాన్. బోట కావ్కిదెజ్ ఉండ్రి ఎత్తుమన్ని ఇల్లుబా తయార్ కితాన్. వెనుక ద్రాసబోట సెగెండార్ రెయ్యుతురిజ్ పాలిదిజ్ సితాండ్రి పయనం కిజి మరి ఉండ్రి దేసెం సాహాన్. 2 పట్టు పంటీని కాలమ్దు ఆ బోట ఎజిమాని వన్నిజ్ వానివంతు లోసి తగ్అ ఇజి ఒరెన్ పణిమన్నిజ్ పాలి అస్తిమన్నివరిడగ్గు పోక్తాన్. 3 గాని పాలి అస్తిమన్నికార్ వన్నిజ్ డెయ్యార్ వహి కిదాన్ మర్రి పోక్తార్. 4 అయవలె ఆ బోట ఎజిమాని మరి ఒరెన్ పణిమణినిజ్ వరిడగ్గు పోక్తాన్. వారు వన్నిజ్బురారు గాయం ఆనివజి డెయ్యేజి సిగు కిజి పోక్తార్. 5 యజుమాని, వెనుక, మరి ఒరెన్వన్నిజ్ వరిబాన్ పోక్తాన్. వన్నిజ్ వారు డెయ్యే సహ్తార్. అయవజినె ఎజుమాని వన్ని పణిమణిసిర్ సేన లోకరిజ్ పోక్తాన్. సెగెండార్జి వారు డెయ్యేతార్. మహివరిజ్ సహ్తార్. 6 ఆక్కర్దిజ్ అయ ఎజుమానిజ్ వాండ్రు ప్రేమ కిత్తి ఒరెండ్రిమహి మరిసి మిగిలిత్తాన్. అందెజి వన్నిజ్ పోక్తాన్. ఆ పాలి అస్తిమన్నికార్ నా మరిసిజ్ గవ్ రం సిసూర్లె ఇజి వరిబాన్ పోక్తాన్.

† 11:17 11:17 యెసయ 56:7. ‡ 11:17 11:17 యిర్మీయ 7:11

7 ఆ పాలి అస్తిమన్నికార్ ఎజుమాని మరిసిజ్ సుడేతారె వీండ్లు యా టోటదిజ్ అక్కుమన్నకాన్ రద్దు మాటు విన్నిజ్ నప్పి యా టోట మాది కినాట్”, ఇజి వారు కూడిజి వర్గితార్. 8 అందెజి వారు మున్ను అర్తాండ్రె వన్నుజ్ నప్తార్. నప్తార్ టోట వెల్లి విసీర్తార్. 9 ఆ టోట ఎజుమాని వరిజ్ ఇనిక కినాన్? వాండ్రు వాజి ఆ అస్తిమహిపరిజ్ నప్పాండ్రె ఆ టోట ఆఇ రెయ్యురిజ్ పాలిదిజ్ సీనాన్.

10-11 యేసు మరి వెప్తాన్. “ఇల్లు తొప్పికార్ నెక్కిపోక్కి పణుకునె మూలదిజ్ ములపణుకు ఆతాద్. యాక దేవుణు కియుదాన్ జర్గితక. యక మా కణుకెజి బమ్మాతిక* ఇజి దేవుణు మాట రాస్తి మన్నిక మీరు న్దదవిఇదెరా?

12 యేసు యా కతవజి నెన్పిస్తిక వెహారె ‘మా వందిజ్ వెప్తాన్’ ఇజి పెద్దెలుజు నెస్తారె యేసుజ్ అస్తెజ్ ఇజి సుడేతారె. గాని మందలోకురిజ్ తియెలాతారె వన్నిజ్ డిస్తారె సాహారె.

పన్ను సీదెజా పోనినా ఇజి వెన్బాజినార్

13 వెనుక వారు పరిసయరుజ్ని హెరోదురాజు పార్థిలోఇ సెగొండారిజ్ యేసుమాటదు తపు అస్తెజ్ వన్నిబాన్ పోక్తార్. 14 వారు వన్ని డర్గు వాజి, ఓ బోదకినికి, నీసు నిజం వెప్పికి ఇజి మాప్నెస్నాప్. నీసు ఇజిరికార్ ఇజి పెరికార్ ఇజి తేడ తోఇకి వరిజ్ ఇన్దమాతిలెకెండ వర్గినికి ఆఇ దేవుణు సరి వందిజ్ నిజమ్దాన్ నెన్పిసినికి. కయ్సరుజ్ పన్ను సీనిక నాయమ్నా ఆవిదా? 15 యూదురు ఆతి మాపు అక్కసీదెజా పోనినా? ఇజి యేసుజ్ వెన్బాతారె. వారు వేసం కినికార్ ఇజి నెసి “వీరు నా మాటదు ఎందానిజ్ తపు అస్తెజ్ సుడేజినిదెర్? ఇజి యేసు వెన్బాతాన్. యేసు మరి వెప్తాన్, ఉండ్రె దినారి కాసు తసి నజి తోరిస్తూ”. 16 వారు తసి వన్నిజ్ తోరిస్తారె. నన్పివలె వాండ్రు, దిన్పిమున్ను మన్ని బొమ్మ ఎయెది, దని మున్ను రాస్తి రాంత ఎయెది? ఇజి వెన్బాతాన్. “కయ్సరుది”, ఇజి వారు వెప్తారె. 17 అయవలె యేసు కయ్సరుజ్ సెందితికెజ్ కయ్సరుజ్ సీదు. దేవుణుదిజ్ సెందితికెజ్ దేవుణుదిజ్ సీదు ఇజి వెప్తాన్. యేసు వెప్తాక వారు వెంజి బమ్మ ఆతారె.

సాతి వెనుక బత్తిఎరెఇజి సెగొండారె వెహాసినార్

18 నన్పివలె సాతివెనుక మరజి నిజినిక సిల్లెద్ ఇజి నెన్పిసిని సదుకయరు ఇనివరి లోఇ సెగొండారె యేసుడర్గు వాతారె. వారు యేసుజ్ ఉండ్రెప్తన్న వెన్బాతారె. 19 “ఓ బోదకినికి, ఒరెన్ పెండ్లి ఆతి వెనుక కొడోరె సిల్లెండ సాతిజి వన్ని తంబెరెసి ఒన్నిసిజ్ ఇడె ఆజి కొడోరె ఇడిదెజ్. అహె సాతివరి వందిజ్ కొడోరె పుట్టిస్తెజ్వలె ఇజి మోసె స్తిత్తి రూలుదు మనాద్. 20 ఏలు సుడేత ఆ ఉండ్రె కాలమ్దు ఏడుగురు తంబెరిజు మహారె. తోలీసురెదికాన్ ఉండ్రె బోదెలిదిజ్ పెండ్లి ఆతాన్. కొడోరె సిల్లెండ సాతాన్. 21 సాతిజ్ నడిపి వాండ్రు ఒనిసిజ్ పెండ్లి ఆతాన్. వాండ్రుబా కొడోరె సిల్లెండ సాతాన్. వెనుక కొగ్రి నడిపి దన్నిజ్ ఇడె ఆతాన్. 22 అహె ఏడుగురుబా దన్నిజ్ పెండ్లి ఆజి కొడోరె సిల్లెండ సాత సాహారె. కడెవెరిదు అయ బోదెలిబా సాతాద్. 23 అహెజి సాతివరిబాణిజ్ మరజి నిజివెలె ఆ బోదెలి అయ్యా ఏడు గురు లోఇ ఎయెజ్ ఆల్పి ఆనాద్? ఏడుగురుదిజ్బా ఆది ఆల్పి ఆత మహాద్గదె? 24 యేసు వరిజ్ ఈహు వెప్తాన్. “దేవుణు మాటిజ్ మీరు నెన్ఇదెర్. దేవుణునత్తు ఎస్సా ఇజి మిజి నెన్ఇదెర్. అందెజి మీరు తపు వెప్పినిదెర్. 25 సాతి వరిబాణిజ్ మరజి నిజివలె ఎయెర్బా పెండ్లి ఆవిర్. పెండ్లిదిజ్ సివెర్ వారు పరలోకమ్దు మన్ని దేవుణు దూతెజలెకెండ మంజినార్. 26 నతి వరిజ్ దేవుణు మరజి నిక్కివందిజ్ మోసె రాస్తి పున్దకమ్దు, వెయ్జి మహి తుపెజా డర్గుహాన్ దేవుణు మోసెజ్ వర్గితి మాట మీరు న్దదవిఇదెరా? నాను, అబ్రాహం దేవుణు, ఇస్సాకు దేవుణు, యాకోబురెదేవుణు, ఇజి దేవుణు అయవలె వెప్తాన్ 27 అందెజి వాండ్రు సాతిసాహికార్ మాడిసిని దేవుణు ఆవిన్ బత్తిజి మన్నికార్ మాడిసిని దేవుణునె ఇజిమాటు సుడేజినాట్. సాతికారెబత్తిఎరె ఇజి మీరు వెప్తాక గొప్ప తప్ప†.

విజు రూలుద్దు లోఇ ముక్తెలమాతి రూలు ఎమేణిక?

28 యూదురిజ్ రూలు నెన్పిస్తివరి లోఇ ఒరెన్బానె వాజి యేసు సదుకయరుజవెటె వాదిసినిక వెహాన్. వారు మరజి వెప్తాజ్ అల్లెవజి యేసువరిజ్ జబాబ్ నిస్తాన్ ఇజి సుడేజి వాండ్రు వెన్బాతాన్

* 12:10-11 12:10-11 కీర్తన 118:22,23. † 12:27 12:27 అబ్రహాము, ఇస్సాకు, యాకోబు ఇనికార్ యూదురు పెరి అనిగొగు వారు నండో పంటిజి ముందాల సాతసాహారె. గాని వారు ఏలు దేవుణుబాణిజ్ బత్తిజి వన్నిజ్ మాడిసి మంజినార్.

దేవుణు సొత్తి విజు రూలుజలోఇ ముకెలమాతిక ఎమేణిక?”. 29 దన్నిజ్క్ యేసు వెప్తాన్, “విజు వన్యాజ్ లోఇ ముకెలమాతిక యాకదె, “ఓ ఇస్త్రాయేలుదికిదెరా, మీరు వెండ్రు. ప్రబువాలి మా దేవుణు ఒరెండ్రె. 30 నీను నీ పూర్తి మన్సుదాన్, పూర్తి పాణమ్దాన్, పూర్తి బుద్దిదాన్, పూర్తి సత్తుదాన్ ప్రబువాలి దేవుణుదిజ్క్ ప్రేమిస్తెజ్క్”. † 31 దిన్ని వెనుక ముకెలమాతి రూలు ఇనిక ఇహిజ, “నీను నిజీనె ప్రేమిస్మిలెకెండ్ మహివరిజ్క్ విజేరిజ్క్ ప్రేమిన్అ”, ‡ యా రుండి రూలుజ మిస్తిక రూలుజ్ మరి ఎమేణికబా సిల్లెద్. 32 నస్తివలె అయ మణిని వెప్తాన్. ఓ బోదకినికి నీను బాగ వెప్తా. “దేవుణు ఒరెండ్రె. వాండ్రు తప్ప మరి ఎయెన్ దేవుణు సెలెన్”, ఇజి నీను వెప్తాక నిజమె. 33 నీ పూర్తి పాణమ్దాన్, పూర్తి బుద్దిదాన్ పూర్తి సత్తుదాన్ నీ దేవుణుఅతి ప్రబుజ్క్ ప్రేమిస్తెజ్క్, నిజి నీనె ప్రేమిస్మివజ మహివరిజ్క్ ప్రేమిస్తిక, దేవుణుదిజ్క్ సీజని విజు పూజెజ ముస్సు, దేవుణుదిజ్క్ కిజిని దూపమ్కాజ్ ముస్సు, నండొ ముకెలమాతిక”. 34 యేసు వెప్తాక వాండ్రు నెగ్రెండ అర్దం కిజి జబాబ్ వెప్తాన్ ఇజి సుడేజి యేసు ఈహు వెప్తాన్. “నీను దేవుణుదిజ్క్ ఏలుబడిః అడిగి మండ్రెజ్క్ డగ్రు ఆతి. అబ్బెణాన్ ఎయెన్బా యేసుజ్క్ ఇనికబా వెన్బాదెజ్క్ దయరం సిల్లెద్.

35 ఒర్పు యేసు దేవుణుగుడిఃదు నెన్పిసి మహిజ్క్ ఈహు వెన్బాతాన్. రాజువజ వాని క్రీస్తు పూర్వమ్దు మహి దావీదురాజు కుటుమ్దు పుట్టాన్ ఇజి యూదురిజ్క్ రూలుజ్ నెన్పినికార్ ఎందనిజ్క్ వెప్సినార్? 36 దావీదురాజు దేవుణుఅత్తుదాన్ ఈహు వెప్తాన్: “నాను నీ పగ వరిజ్క్ నీ పాదం అడ్డి ఇడ్డిదాక నీను నా ఉఱెర్ పడక బసి మన్అ ఇజి ప్రబు నా ప్రబువెట వెప్తాన్*. 37 దావీదురాజు క్రీస్తుజ్క్ ప్రబుఇజి కూక్సినాన్. అహిజ ఎలాగ క్రీస్తు వన్ని మరిసి ఆనాన్?”. యేసు వెప్తాక వెంజి లోకురవిజేరె నండొ సర్ద ఆతార్.

38 యేసు లోకాజ్ నెన్పిసినివెలె ఈహు వెప్తాన్. “యూదురి రూలుజ్ నెన్పిసినివరి వందిజ్క్ జాగర్ద మండ్రు. వారు నండొ దరది నీరి సొక్క † తోడెగిజి బూలాదెజ్క్ కొరిజినార్. సత్తెజి నడిఃమి పెరికార్ ఇజి మాడిఃసి ఆదెజ్క్ కొరిజినార్. 39 యూదురి మీటిజ్క్ ఇండ్రొ సొహిజ ముకెలమాతి బాడ్డిదు బన్జెజ్క్, విందుదు సొహిజ బన్జెజ్క్ ముకెలమతి బాడ్డిదు వారు కోర్జినార్. 40 ఇనిక సెల్లి ముండమణిసిజ్క్ మొసెం కిజి వన్యాజ్ కల్లితిక వారు ఒనార్. లోకుర విజేరె విరిజ్కుడేజి గొప్ప నెగ్గికార్ ఇజి వెప్సావజి వారు నండొ పార్దనం కిజినార్. నిని లోకాజ్ గొప్ప సిక్కు వానాద్”.

ముండ మన్ని అరప్తినంద

41 యేసు దేవుణుగుడిఃదు సంత సీనివెటె ఎద్దుబస్తాన్. దేవుణుగుడిఃదు వాతికార్ సంత వెటెదు డబ్బు అరప్తిమహిక వాండ్రు సుడేజి మహాన్. ఆస్తిమన్సుకార్ నండొండొర నండొ డబ్బుజ్క్ ఆ వెటెదు అరప్తార్. 42 నస్తివలె ఉండ్రె బీద ముండ మన్ని వాజి రుండి కాణిజ్క్ అరప్తార్. 43 యేసు సిసూరిజ్క్ వన్నిడగ్రు కూక్సి, “నాను నిజం వెప్సిన, దేవుణు సుడతిజ్క్ యా ఇనిక సెల్లి రాండి బోదెలి మహివిజేరిజ్క్ ముస్సు, లావు అరప్తార్. 44 ఆస్తిమన్నికార్ వరిజ్క్ కల్లితి ఆస్తిబాణిజ్క్ అరప్తార్. గాని అది దన్నిజ్క్ సెల్లిబాణిజ్క్ దన్నిజ్క్ బత్తిదెజ్క్ మన్నికెజ్క్ విజు సంత పెట్టెదు అరప్తార్”, ఇజి వెప్తాన్.

13

యేసు గుడిఃవందిజ్క్ వెప్సినాన్

1 యేసు దేవుణుగుడిఃదాన్ సొన్ని మహిజ్క్ వన్ని సిసూర్ లోఇ ఒరెన్, “ప్రబు యా పణుకుజ్క్ ఎస్సా గొప్పవి యా మేడెజ్క్ ఎస్సా గొప్పవి”, ఇజి వెప్తాన్. 2 వన్నిజ్క్ యేసు వెప్తాన్, “మీరు ఏలు సుడేజిని యా గొప్ప నెగెండ్ తోర్జిని మేడెజ్క్ ఉండ్రె పణుకు ముస్సు, మరి ఉండ్రె పణుకు నిల్పిమన్ఏండ లోకుర వనకాజ్ లాగ్గు అరప్పూర్తి పూర్తి నాననం కినార్లె”. 3 యేసు దేవుణుగుడిః ఎద్దు ఒలివ గొరోత్, బస్తి మహిజ్క్ పేతురు, యాకోబు, యోహాను, అంద్రెయ ఇనికార్ మరి ఎయెర్బా వెన్ఎండ యేసుజ్క్ వెన్బాతార్. 4 “యాకెజ్ ఎనిజ్క్ జర్గినెలి? ఇక్కెజ్క్ విజు జర్గిదెజ్క్ డగ్రు ఆతాద్. ఇజి తోరిసిని గుర్తు ఇనిక? మజి వెహాల.

† 12:30 12:30 ద్వితీ 6:4,5. § 12:31 12:31 తపి 19:18. * 12:36 12:36 క్షిప్ర 110:1. † 12:38 12:38 యా నండొ దరది నీరి సిక్కు పెరి లోకు తోడెగిజి మహాన్.

5 యేసు వరిజ్ వెహ్సాన్, “ఎయెరబా మిజి మోసెం కిఎండ జాగర్త సుడేడు ముండ్రు. 6 నండో లోకుర్ నా పేరు ఇడెఱజి వానారెలె. “దేవుణు ఏర్పాటు కిత్తి పొక్తి క్రిస్తు నానె”, ఇజి వెహ్సా నండోదారిజ్ మోసెం కినారెలె. 7 మీరు విద్దెమకు వందిజ్ వినిదెర్లె. మురి విద్దెమకు వానెలె ఇజి సాటిసినిక వెనిదెర్లె. అయవలె తియెలాము. అక్కెజ్ విజు జగ్గిదెజ్వెలె. గాని యాక ఆక్కర్ అవద్. 8 లోకుర్ముస్సు లోకుర్ని దేసమ్కాజ్ ముస్సు దేసమ్కు విద్దెం ఆనాలె. అబ్బె ఇబ్బె నండోబాన్ బూమి కద్దినాద్లె. కరు వానాద్లె. యాక్కెజ్ విజు ఉండ్రె బోదెలి కియుదు అస్సెజ్ ముజల వానిసోపిజ్ మొదోల్సెలెకెమడ ఇక్కెజ్ విజు జగ్గిజి మహిజ ఆక్కర్ దినమ్కు వాజినాద్ ఇజి నెస్తిజానాద్.

9 మీరు జాగర్త మండ్రెజ్. లోకుర్ మిజి కొర్టుదు ఒపజెప్పార్లె. యూదురి మీటిజ్ ఇల్కాజ్ మిజి కొరెడెజాణిజ్ డెయ్నార్లె. రాజురిజ ముందాల అదికారిజ ముందాల, నా ముస్సు నమకం ఇట్టివందిజ్ మిజి నిల్పారెలె. అయవెలె నా వందిజ్ సువార్త వెహ్సాదెర్లె. 10 దేవుణు సువార్త బూమిముస్సు మని విజెరిజ్ ఆక్కర్ దినమ్కాజ్ ముజల వెహ్సాజ్వలె. 11 వారు మిజి తోహ్సా ఒసి కొర్టుదు ఒప్పజెప్పెవలె మీరు అబ్బె ఇనిక వెహ్సాజ్ ఇజి బెజ ఆమాట్. అయవలె దోహ్సాల్. వెహ్సాకిదెర్ మీరు ఆజదెర్ దేవుణు ఆత్మ మిజి వెహ్సాకాదె మీరు వెహ్సాదెర్”.

12 యేసు మరి వెహ్సాన్. “దాద్ని తంబేర్నిజ్ తంబెర్సి దాద్నిజ్ అప్పొసి మరిసిజ్ సప్తెజ్ ఒపజెప్పారెలె. కొడెర్ అయ్సి అపాసిర్ ముస్సు గొడెబఅజి వరిజ్ సప్పారెలె. 13 మీరు నా ముస్సు నమకం ఇట్టివందిజ్ విజెరె మీ ముస్సు పగదాన్ మంజినారెలె. ఆక్కర్దాక ఓరిస్సి వన్నిజ్ దేవుణు రక్సినార్లె.

దేవుణుగుడిః లోఇ నండోతియెల్అనిక ఉండ్రె వానాద్లె

14 దేవుణుగుడిః లోఇ మండ్రెజ్ ఆఇ నాసనం కిని సెఇక అతిక ఉండ్రె* దేవుణు గుడిఃదు నెగ్గి బాడ్డిదు నిల్పి మంజినిక సూణివలె (యాక నద్వినికాన్ అర్దం కిదెజ్వలె) యూదరు దేసమ్దు మంజినికార్ గొరొకాజ్ ఉహ్సాజ్ వెలె. 15 ఇల్లు ముస్సు మన్నికార్ ఇనికబా సామానం తత్తెజ్ ఇజి మర్జి ఇండ్రె సొన్కాట్. 16 గుడెదు పణి కిజి మహికార్ వరి పాత తత్తెజ్ ఇజి మర్జి ఇండ్రె సొనిక అవద్. 17 ఆ దినమ్కాజ్ పోటద్ మన్ని వన్కాజ్ పాలు ఊట్పిసిని వనకాజ్ గొప్ప కన్టం. 18 ఇక పినికాలమ్దు రెవిండ పార్దనం కిదు. 19 ఎందానిజ్ ఇహిజ దేవుణు యా లోకం పుటిస్సిబాణిజ్ అసి ఏలుదాక రెఇనిన్ని గొప్ప కన్టమ్కు వానె. నిన్నికెజ్ మరి ఎనెజ్బా రెఉ. 20 దేవుణు ఆ కన్టం ఆతి రోస్సుతకు కివిండ మహిజ ఎయెసబా తప్తె ఆదెజ్ అఅట్విన్. గాని దేవుణు ఎర్రిస్సివరి వందిజ్ ఆ రోస్సుకు దేవుణు తక్కు కిత్తాన్. 21 ఆ రోస్సాజ్ ఎయెరబా ఇదిలోక్రిస్తు అబ్బె మనాన్, సిల్లిజి క్రిస్తు ఇబ్బె మనాన్, ఇజి వెహ్సాజి వరి మాట నమ్మిమాట్. 22 ఆ కాలమ్దు నానె క్రిస్తు ఇజి అబద్దం వెహ్సాకార్, నానె దేవుణు పోక్తి ప్రవక్త ఇజి అబద్దం వెహ్సాకార్ వానార్. వారు నండో బమ్మాతి పణిజ్ ముజాల ఎనెజ్బా తోఇ నన్ని బమ్మాతి పణిజ్ కిజి మోసెం కిదెజ్ సూణార్. అట్టిజి దేవుణు ఎర్లిస్సి మన్ని వరిజ్బా మొసెం కిదెజ్ సూణార్. 23 అందెజె మీరు జాగర్త మండ్రెజ్. నాను ముజాలె విజు మిజి వెహ్సా మన్ను.

లోకుమరిసి దేవుణుజాయ్దాన్ వానిరోజు

24-25 ఆ కన్టమాతి రోస్సుసాహి వెనుక పొదు సీకటి ఆనాద్. నెల జాయ్ సివిద్. సుక్కెజ్ ఆగసమ్దాన్ రాల్పె. ఆగాసమ్దు మన్నికెజ్ కద్దినె. 26 నస్తివలె లోకు మరినియాతి నండో సత్తుదాన్ గొప్ప జాయ్దాన్ కూడిఱి సొకుదాన్ మొసాప్ ముస్సువానిక లోకుర్ సూణార్లె. 27 నాను నా దూతరిజ్ పొక్తానె యా లోకమ్ది కొసెజదాన్ ఆగసమ్ది కొసెజదాక నాల్లి మూలెజాణిజ్ దేవుణు ఎర్లిస్సి వరిజ్ ఉండ్రెబాన్ తపిస్సు.

బోడెమరాన్ది సజతి

28 బోడెమరాన్దిజ్ సుడెఱజి యాక మీరు నెస్సు. దన్ని అక్కెజ్ రాలజ్ సిగ్రిసినివలె ఎండకాలం డగ్గు ఆతాద్ ఇజి మీరు నెస్సిదెర్. 29 ఆయలెకెండెనె మీరు యాక్కెజ్ విజు జగ్గిజినిక సుణివలె నాను మర్జి

* 13:14 13:14 యా సెఇక ఇనికిజి వెహ్సాజ్ సిల్లెద్ ఆఇ దేయమ్క మాలిపిట వందిజ్ నో క్రిస్తుజ్ ఎర్రిసిని వన్ని వందినో వెహ్సానాన్. దిన్ని వందిజ్ దానియెల్ ప్రవక్త రాస్త మహాన్ 9:27; 11:31; 12:11.

వాదెజ్ డగ్రు ఆతాద్ ఇజి నెన్సినిదెరెల్. 30 యా సజతిజ్ విజు జాగ్గిని ముండాల య తరమ్దికార్ సావీర్ ఇజి నాను మిజి నిజం వెహ్సిన. 31 ఆగసం బూమి సిల్లెండ ఆనె. గాని నా మాటెజ్ ఎలాకాలం మంజినె.

ఎయెన్ నెన్ఇ రోజు, ఎయెన్ నెన్ఇ గడియ

32 నాను మరీజి వాని రోజువమదిజ్, గడియవందిజ్ ఎయెజ్ నెన్వీర్. బుబ్బునె ఆవండ పరలోకమ్దు మన్ని దూతారబా మరిసిబా నెన్వీర్. 33 యేసు మరి వెహ్సాన్, “మీరు పార్లనం కిజి జాగర్ల మండ్రు. ఆ రోజు ఎనెజ్ వానాదొ మిజి తెలివీర్. 34 ఎలాగ ఇహిజ ఒరెన్, ఎజుమాని వన్ని ఇల్లు వన్ని పణిమన్నిరిజ్ ఒపజెప్పి, వరివరిపణిజ్ వరి వరిజ్ తోరిసి, ఇల్లు కాపుదిజ్ ఒరెన్ వన్నిజ్ ఇడ్డి దేసం సాండ్రెజ్ సాహి వజనె.

35 అందెజి మీరు జాగర్ల ఎర్దుసుడిజి మండ్రు. ఎందనిజ్ ఇహిజ ఇల్లు ఎజుమాని పొద్దు ఆతివెలె వానానొ, మదరెయ్యు వానానొ, కొరు కెరిని వెలె వానానొ, సిల్లిజి జాయ్ ఆతిజి వానానొ మిజి తెలివీర్. 36 ఎజుమాని వందిజ్ ఎర్దు సుడిజి గడియదు వెటనె వాతిజి మీరు నిద్ర కిజి మనికవాండ్రు సుడుజెజ్ ఆవీర్. 37 నాను మిజి వెహ్సాకదె విజేరిజ్ బా వెహ్సిన. జాగర్ల కాప్ కిదు”.

14

1 పస్కు పండోయ్ని, పులాజ్ ఆఇ రోట్టెజ్* పండోయ్ వాదెజ్ రుండి రోస్కు మనాద్. పెరిపుజెరిబుని, యూదుర్ రూలు నెన్పిసినికార్ యేసుజ్ ఎలాగబా ఉపాయ్ కిజి అసి సప్తెజ్ సుడిజినార్. 2 “పండోయ్ లోఇ వన్నిజ్ తోహ్తాజి లోకు గొడజెబ కికార్ అందెజె పండోయచ లోఇ పోని ఇజి వారు వెహ్సార్.

ఉండ్రి అయ్ లోకొడోః యేసు బురాదు వాసనం నూనె వాక్తాద్

3 యేసు బేతనియ ఇనినాటో సీమోను ఇన్ని వన్ని ఇండ్రో బోజనమ్దిజ్ బస్తాన్. విండ్రు కుస్తురోగం అస్తిమహిజి యేసు నెగెండ కిత్త మహాన్ నస్తివలె ఉండ్రి బోదెలి నూనజ్ పణుకుదాన్ తయార్ కిత్తి ఉండ్రి సీసాదు† నండో విలువమన్ని జటమామ్మి ఇని నెగ్గి వాసనం మన్ని నూనె తత్తాదె మూతడగ్రు రెక్కి యేసు బురాదు వాక్తాద్. 4-5 అబ్బె మహికార్ నెగెండార్ యాక సుడిజి కోపమాజి వరిలోఇ వారి వెహ్సార్, “ఎందానిజ్ యా నూనె పాడు కిజినాద్? యా నూనె మూండ్రి వందెజ్ దినారమ్జ్ ముస్కు డబ్బుదిజ్ పొర్చి అయ డబ్బు బీదది వరిజ్ సిదెజ్ ఆనాద్ గదె”, ఇజి దన్నిజ్ గోల† కిత్తార్. 6 నస్తివలె యేసు, “దన్నిజ్ ఉండ్రి డిఃస్తు ఎందనిజ్ దన్నిజ్ అర్ల కిబిసినిదెరె? అది నజి నెగ్గి పణి కిత్తాద్. 7 బీదదికార్ ఎస్తివలెబా మీవెట మంజినార్. వరిజ్ ఎనెజ్ బా మీరు సాయం కిదెజానాద్. గాని నాను ఎలాకాలం మీవెట మన్వీ. 8 అది కిదెజ్ అట్టిపణి విజు కిత్తాద్. నజి సమాది కిని ముజాల పీనుగు తయార్ కిని అలవాటువజి నా ఒడోలదిజ్ వాసనం నూనె వాక్కి అది నజి తయార్ కిత్తాద్. 9 నాను మీవెట నిజం వెహ్సిన, యా బూమి ముస్కు ఎంబెబా దేవుణు సువార్ల అది ఏలుబడిః వందిజ్ సువార్ల సాటిసినివలె అది కిత్తి యా నెగ్గిపణి దన్నిజ్ ఎత్తు కినిలెకెండో సాటిసి మంజినాదెలె”.

10 నస్తివలె పన్నెండు మణిసిర్ సిసూర్ లోఇ ఒరెన్ ఇస్కరియోతు యూద ఇనికాన్ యూదురి పెరిపుజెరిబుజాన్ సొన్ని యేసుజ్ ఒపజెప్తెజ్ తోడుః కిన ఇజి వెహ్సాన్. 11 యూదవెహ్సాక వెంజి పెరిపుజెరిబు సర్ల ఆతార్. వన్నిజ్ డబ్బుజ్ సీసాప్ ఇజి వారు ఒట్టు కిత్తార్. అందెజె యేసుజ్ ఒపజెప్తెజ్ యూద ఉండ్రి అవ్ కాసం సుడిజి మహాన్.

యేసు సిసూర్ వెట పస్కు బోజనం ఉణిజినాన్

12 పులాజ్ సిల్లి రోట్టెజ్ తయార్ కిని పస్కు పండోయ్ ది మొదోహి దినం వాతాద్. అయ దినం దేవుణుదిజ్ మెండ గొరె పిల్లాదిజ్ పూజ కినిక యూదురి అలవాట్. యేసు సిసూర్ వన్ని డగ్రు వాజి, పస్కు బోజనం ఉండెజ్ నీవందిజ్ మాపుఎంబె సొన్ని తయార్ కిదెజ్ నీను కొరిజని? ఇజి వెన్బ్ తార్. 13 యేసు రివెర్ సిసూర్ కిజి కూక్కి, “మీరు పట్టుమ్దు సొండ్రు. అబ్బె ఒరెన్, కుండారు ఏరు పిండెజి

* 14:1 14:1 వినకవందిజ్ ముకెలమాతి మాటిజి అర్లం వెహ్సాని బుకుదు పండోయ్ మాట రాస్తిబాన్ సుడుజు † 14:3 14:3 యా నూనాజ్ పణుకు పేరు అలబాస్టరు ఇజి యా పణుకు పండో కరిదితిక తెహ్తాజ్ మంజినాద్. యక గీసి లోకుర్ పునిజ్ తయార్ కిజినార్

† 14:4-5 14:4-5 అయాకాలమ్దు ఉండ్రి దినారి ఉండ్రి రోజుది కూలి

మీ ఎద్దు వానాన్. మీరు వన్నివెట సొండ్రు. 14 వాండ్రు సొహి ఇండ్రోణి ఎజుమానిజ్, “నా సిసూర్ వెట పస్కు బోజనం కిడెజ్ఎంబె గది మనాద్ ఇజ బోదకినికాన్ నిజి వెన్బాజినాన్”, ఇజ వెప్తు. 15 నస్తివలె ఆ ఇల్లు ఎజుమాని విజు తయార్ఆతి మేడముస్కు మని పెరి గది ఉండ్రి తోరిస్నాన్. అబ్బె మజి పస్కు బోజనం తయార్కిదు”, ఇజ వెప్తుండ్రె పొక్తాన్. 16 సిసూర్పట్టుమ్దు సొహారె యేసు వెప్తిలెకెండెనె విజు సుడేతార్. వారు పస్కు బోజనం తయార్ కితార్. 17 పొద్దు ఆతిజయేసు పస్నెండు మంది సిసూర్వెట అబ్బె వాతాన్. 18 వారు బోజనం కినివెలె యేసు వెప్తున్, “మీ లోఇ ఒరెన్ నజి వగతివరి కియుదు ఒపజిప్పాన్లె ఇజ నాను నిజం వెప్పిన”. 19 అక్క వెంజి వారు నండ్డుకం ఆజి ఒరెన్ వెనుక ఒరెన్ “నాను ఆవిగదె? ఇజ వన్నిజ్ వెన్బాతార్. 20 యేసు వెప్తున్, “మీరు పనెండు మనిసిరిలోఇ ఒరెన్, నావెట గినెదు రొట్టె ముడేక్కికాండ్రెక్. 21 లోకుమరిసి నా వందిజ్ దేవుణు మాటదు రాస్తి మహిలెకెండె నాను సానాన్లె. గాని లోకు మరిసియాతి నజి ఒపజిప్పి వన్నిజ్ గొప్ప కస్టం. వాండ్రు పుట్వండ మంజినిక ఇహిజ వన్నిజ్ ఎస్సానో బాగ మహాద్ మరి”.

యేసుజ్ గుర్తుకిని బోజనం

22 వారు బోజనం కిజమహిజ్యేసు ఉండ్రిరొట్టె అస్తాండ్రె దేవుణుదిజ్ వందనమ్కు వెప్పి ముకెజ్ కిజి సిసూరిజ్ సితాన్. “మీరు యక లొనితిండ్రు, ఇక నా ఒడోల”, ఇజ వరిజ్ వెప్తున్. 23 వెనుక యేసు ద్రాక్కు కల్లు మన్ను గిన అసి దేవుణుదిజ్వందనమ్కు కిజి వరిజ్ సితాన్. వారు విజేరె ఆ గినదిక ఉటార్. 24 యేసు మరి వెప్తున్. “ఇక్క నా నల, నండ్ండారిజ్ వరి పాపమ్కు సెమిస్తిజ్ ఇజి కారిసిని. నా నల ఇక్కాదె దేవుణు నా నలదాన్ కిజిని ఒవుమానం. 25 నాను నిజం వెప్పిన, దేవుణు కినిఎలుబిజెదు నాను కొతాజ్ ఉణి దినం దాక మరి ఎనెజ్బా ద్రాక్కు కల్లు ఉణెవి”. 26 మరి ఉండ్రి పాట* పార్తారె ఒలివ మరిక మన్ని గొరొన్ ముస్కు సొతార్.

పేతురు యేసుజ్ నెన్ఎ ఇజి వెప్తున్లె ఇజి ముజాల వెప్పినాన్

27 వారు సొనివెలె యేసు వరిజ్ వెప్తున్. మీరు విజిదెరె నజి డిసి సొనిదెల్లె. ఎందనిజ్ఇహిజ దేవుణు మాటదు యాలెకెండె రాప్త మనాద్. “గొరెజ్ అడినివన్నిజ్ నాను కత్తులె. గొరెజ్ మంద సెద్రినె సొనెలె”.† 28 గాని దేవుణు నజి మరజి బత్తుదు నిక్తివెనుక మిజి ఇంక ముజల గలిలయదు సొనాలె. ఇహాన్. 29 నస్తివలె పేతురు, “విజేరె మీ వందిజ్ నిల్లెజ్ అట్వండ డిసి సొహిజ్బా నాను నిజి డిసి సొన్వ”. 30 యేసు వెప్తున్, “ఓ పేతురు, నాను నిజి నిజం వెప్పిన, యా పొదోయ్ కొరు రిజెరెని ముజల నీను నజి నెన్ఎ ఇజి ముసార్ వెప్పాలె”. 31 గాని పేతురు ఒవుకొడేవండ ఒద్దె డట్టం వెప్తున్, “నాను నీ వెట సాతిజ సాన. నాను నిజి నెన్ఎ ఇజి వెహోవ”. అయ వజనె వారు విజేరె వెప్తుర్.

యేసు గెత్తేమనె టోటదు పార్దనం కిజినాన్

32 నస్తివలె యేసు, వన్నిసిసూర్వెట గెత్తేమనె ఇని టోటదు సొహార్. యేసు సిసూరిజ్, “నాను సొన్ని పార్దనం కిజి మరజివాని దాక మీరు ఇబ్బె మండ్రు”, ఇజ వెప్తున్. 33 యేసు పేత్తుజ్, యాకోబుజ్, యోహానుజ్ వన్ని వెట ఒతాన్. వాండ్రు నండ్ దుకం ఆజి బాద ఆదెజ్ మొదోల్స్తాన్. 34 వాండ్రు వరిజ్ వెప్తున్, “సాదెజ్ డగ్రు ఆతిలెకెండె మన్ను బరిస్తిజ్ అట్ఇ నస్సా బాదనజి కల్లిజినాద్. మీరు ఇబ్బెనె బసి నా వెట తెల్లె మండ్రు.

35 యేసు అబ్బెజిజ్ నెగం దూరం సొహండ్రె వడిగజి అర్తాండ్రె “ఓబా, నిజి ఇస్టమాతివజి యా కస్టమ్కాణ్ నజి తప్పిన్అ”, ఇజి పార్దనం కితాన్. 36 యేసు దేవుణుదిజ్ ఈపం వెప్తున్, “ఓ బా నీను విజు కిడెజ్అట్టి. యా కస్టమ్కు నా బాణిజ్లాగ్అ. గాని నా ఇస్టమ్వజి ఆవద్, నీ ఇస్టంవజనె ఆవిద్”. 37 పార్దనం కితివెనుక యేసు సిసూర్డగ్రు సొహిజ్ వారు నిద్ర కిజి మహార్, “ఓ సీమోను, నీను నిద్ర కిజినిదా? ఉండ్రి గంటబా తెలి ఆజి మండ్రెజ్ మీరు అట్ఇదెదా?”, ఇజి పేతురుజ్ వెన్బాతాన్. 38 నయ్యును మిజి పరిస కిజి తప్పదు అన్వండ ఇహిజ పార్దనం కిజి తెలి ఆజి మండ్రు అత్తు తయారెనె, గాని ఒడోలదిజ్ నత్తు సిల్లెండ ఆజినాద్.

§ 14:20 14:20 యేసుని వన్ని సిసూర్ బోజనం కితివెలె ఉండ్రె గినాది పట్టుదనమ్ము రొట్టె ముడుక్కార్ డగ్రుమన్ని కులెజ్నె ఈహు గిన్నదాన్ తినార్ * 14:26 14:26 కీద్రన 115-118 బోజనం కిత్తి వీజిత్తిజి పారజి మహార్ † 14:27 14:27 జకరియ 13:7.

39 యేసు మరి ఒర్పు సొన్ని ముజాల్ వెప్తా మాటెజ్ నె వెప్పి పార్లనం కితాన్. 40 యేసు మరజివాజి నుడఃతిజ్ సిసూర్ మరి నిద్ర కిజి మహార్. ఎందానిజ్ ఇహిజ వరి కణుకు రెప్పెజ్ బరుదాన్ ముగజి మహా. నస్తివలె వారు యేసుజ్ ఇనిక వెప్తాజో తెలివితాద్. 41 యేసు ముసారి వాజి సిసూర్ నిద్ర కిజి మహిక నుడఃజి వరిజ్ వెప్తాన్, “ఏలుబ మీరు నిద్ర కిజి రోమ్ జనిదెరా? ఏలు ఆనాద్. ఇదిలో, లోకుమరిసియాతి నజీ సెఇవరికియదు ఒవజెప్పి గడియ డగ్రు వాతాద్. 42 తెదు, ఏలు మాట్ వరివెట. దసూలాదెజ్ సొనాట్ ఇదిలో నజీ ఒవజెప్పికాన్ వాజినాన్”.

యేసుజ్ అరెస్టి కిజినార్

43 యేసు యా మాటెజ్ వెప్పి మహిజ్ పన్నెండు మనిసిర్ సిసూర్ లోఇ ఒరెనాతి ఇస్కరి యోతు యూద ఇనికాన్ అబ్బె వాతాన్. పెరిపుజెరిజు లోకురి పెద్దలుజు పోక్తి మన్ని మందలోకుర్ కూర్తెజ్, కోణెజ్ అస్తారె వన్నివెట వాతర్. 44 యేసుజ్ ఒవజెప్పికాన్, “నాను ఎయెరిజ్ ముద్దు కినానో వన్నిజ్ మీరు తోహాసి జాగర్ల ఒతు”, ఇజి ముజల వరిజ్ ఉండ్రీ గుర్తులెకెండ్ వెప్తా మహాన్. 45 యూద వెటనె యేసుడగ్రు వాతాండ్రె, “ఒ బోదకినికి” ఇజి వెప్పి వన్నిజ్ పొంబితాండ్రె ముదు కితాన్. 46 నస్తివలె వన్నివెట వతిమహిలోకుర్ యేసుజ్ అస్తారె తోహార్. 47 వెటనె యేసుడగ్రు మహిసిసూర్ లోఇ ఒరెన్, వన్ని కూర్ల లాగ్లి విజెరి ముస్సు పెరిపుజెరిజ ముస్సు మన్ని పణిమనిసి ఆతి వని గిబ్బి తెవు కత్తాన్. 48 యేసు వెప్తాన్, “నాను డోజావండ్రునా? నజీ అస్తెజ్ కూర్తెజ్ కోణెజ్ అసి ఎందనిజ్ మీరు వాతిదెర్? 49 రోజు నాను మీ వెటనె మంజి దేవుణుగుడిదు నెన్ పిస్త గదె. అయవలె మీరు నజీ ఎందనిజ్ అన్ ఇతిదెర్? గాని దేవుణు మాటదు రాసివజ ఇక విజు ఈహు జగ్గిదెజ్ వెలె”. 50 నస్తివలె వన్ని సిసూర్ విజెరి వన్నిజ్ డిఃస్తారె ఉహ్కా సాహార్. 51-52 ఒరెన్ దజడాయెన్, యేసు వెనుక, లోకుర్ వెట సొన్ని మహాన్. వాండ్రు సొక్క తోడగివండ ఉండ్రీ పాతనె పిడగిత మహాన్. వారు వన్నిజ్ అస్తెజ్ వాండ్రు పిడిగితి మన్ని పాతడిసి డుమ్డ ఆతాండ్రె ఉహ్కాన్.

యేసుజ్ నన్ హద్రి సజం ఇని యూదురి కొర్టునడిఃమి నిల్ హార్.

53 యేసుజ్ తోప్పి ఒతికారె వన్నిజ్ విజెరిపుజెరిజ ముస్సు పెరిపుజెరిబాన్ తత్తార్. పెరిపుజెరిజ్ విజెరి, పెద్దెల్ జు, యూదురి రూలుజ్ నెన్ పిసినికార్ అబ్బె కూడ్డి వాత మహార్. 54 యేసుజ్ విజెరి ముస్సు పెరిపుజెరిజ ఇండ్రె ఒసి మహిజ్, పేతురు వెనుక దూరమ్ దాన్ సొన్ని డేవ దాక వాతాన్. వాండ్రు అబ్బె కావకినివరివెట బస్తాండ్రె సిసు కాయ్ జి మహాన్. 55 పెరిపుజెరిజు విజెరి, అబ్బె కూడ్డి వాతి నన్ హద్రిం సజం విజు యేసుజ్ నప్తెజ్ తగితి రుజుప్ వందెజ్ వన్ని ఎద్రు అబద్దం వెప్పివరిజ్ రెబాజి మహార్. గాని వన్నిజ్ నప్తెజ్ అగితి రుజుప్ వెప్పి ఎయెర్ బా దోహ్ కవితార్. 56 నండెండార్ వన్నిముస్సు అబద్దం సాసెమ్ కు వెప్తార్. గాని ఒరెన్ వెప్తాక మరి ఒరెన్ వెప్తా దనిజ్ తేడః మహాద్.

57 నస్తివలె సెగెండార్ వన్నిముస్సు ఈహు అబద్దం సాసెమ్ కు వెప్తార్. 58 “లోకు తోప్తా యా దేవుణుగుడిదిజ్ నాను అరెప్పి విసిరెజ, మూండ్రీ రోస్కాజ్ లోకు కీదు పణి ఆఎండ మరి ఉండ్రీ దేవుణుగుడిః తోహ్న ఇజి వాండ్రు వెప్తాక మాప్ వెహాప్”, ఇజి వారు వెప్తార్. 59 గాని వారు వెప్తా సాస్యంబా ఒరెన్ వెప్తాక మరి ఒరెన్ వెప్తా దనిజ్ తేడః ఆతాద్. 60 నస్తివలె విజెరి ముస్సు పెరిపుజెరి నిజితాండ్రె యేసుజ్ వెన్ బాతాన్, “నీను ఇనికబా మరజి వెహా ఇదా? వీరు నీ ముస్సు వెప్పిని యా మాటెజ్ ఇనికెజ్?”. 61 గాని యేసు ఇనికబా మరజి వెహావిండ అలెతాన్. విజెరి పుజెరిజ ముస్సు పెరిపుజెరి యేసుజ్ మరి వెన్ బాతాన్, “నీను దేవుణు మరిసి ఆతి క్రీస్తునా?”.

62 యేసు వెప్తాన్, “నానె, లోకుమరిసియాతి నాను గొప్ప అతికారం మన్ని దేవుణు ఉణెర్ పడఃకాదు బసిమంజనిక, నయణెదెర్ మరి ఆగనమ్ దాన్ మొసాప్ ముస్సు నాను వానిక మీరు సూణెదెల్లె”. 63-64 విజెరి పెరిపుజెరి ముస్సు పెరి పుజెరి యేసు వెప్తాక వెంజి వన్ని సొక వాండ్రె కిసె ఆతాండ్రె. వెప్తాన్, “మరి ఇంక సాసిరిజ్ అవ్ నరం సిల్లెద్. వాండ్రు వెప్తాక మీరు వెహెదెర్. వాండ్రు దేవుణు దూసిసి వర్గెతిక మీరు వెహెదెర్ దన్నివందెజ్ మీరు ఇనిక వెప్పినిదెర్? యేసు దేవుణుదిజ్ దూసిస్తి వందెజ్ సిక్క కిజి నప్తెజ్ ఇజి విజెరి ఒప్పుకోటార్. 65 నస్తివలె సెగెండార్ యేసు ముస్సు పూస్తార్. వారు

† 14:63-64 14:63-64 నండెండో కేపం ఆతాద్ ఇజి తోరెన్తెజ్ సొక్క కిస్తార్. గాని విజెరి పుజెరి ముస్సు మన్ని పెరి పుజెరి వన్ని సొక్క కిస్తెజ్ ఆవిద్ ఇజి లేవి. 21:10 దు రాస్త మనాద్.

గరండదాన్ వన్ని కణుకేజ తోప్పి కణుకేజ్ మూక్తారె వన్నిజ్ గుతార్. నిజి ఎయెర్ గుతార్ ఇజి తొవండ వెహాఅ”, ఇజి వన్నివెట వెహ్తార్. జమానుబుబా యేసుజ్ కికాణిజ్ డెయేతారె ఒత్తార్.

యేసుజ్ నానునెన్ఎ ఇజి పేతురు వెప్పినాన్

66 పేతురు విజెరి ముస్సు పెరి పుజెరి అర్బుదు మహివలె అయ ఇండ్రోణి పణి మన్ని ఉండ్రీ అబ్బె వాతాద్. 67 పేతురు సిను కాయ్జమహికా సుడేజి వాండ్రు ఎయెస్ ఇజి నెస్తెజ్ అది నెగ్రెండ సుడేతాద్. “నీనుబా నజరేతు వాండ్రు ఆతి యేసువెట మహికి”, ఇజి అది వెహ్తార్.

68 అందెజె పేతురు, “నీను ఇనిక వర్గిజనిదో నజీ తెలివద్”, ఇజి వెప్పి వెల్లి గవునిడగ్రు సాహాన్. నస్తవలె కొరు కెరెతాద్. 69 అయ పణికినికాద్ పేతుజ్ గవునిడగ్రు సుడేజి అబ్బె నిహిమహి వరివెట మరి వెహ్తాద్, “పిండ్రు వరిలోఇమహాకాన్ ఒరేన్”. 70 గాని పేతురు మరి, “నాను ఆవి ఇజి వెహ్తాన్. సణెం సాహివెనుక పేతురు డగ్రు నిహిమహికార్, “నీను గలీలయదికి, నిజం నీనుబా వరిలోఇ ఒరేన్”, ఇజి వెహ్తార్. 71 నస్తవలె పేతురు, “మీరు వెహిసిని వన్నిజ్ నజీ నెన్ఎ ఇజి వెప్పి వన్నిజ్ వాండ్రె నయివ్ సీబెఆజి ఒట్టు కితాన్.

72 వెటనె రిజి ఒర్పు కొరు కెరెతాద్. నస్తవలె పేతురు, యేసు వన్నివెట, “కొరు రిజి కెరెని ముజల నీను నజీ నెన్ఎ ఇజి ముసారె వెప్పాలె”, ఇజి వెహ్తామాట ఎత్తు కితాండ్రె నండె దుకమాజి అడేబతాన్.

15

యేసుజ్ తొప్పిపిలాతుజ్ ఒపజెప్పినార్

1 పెందాల సీకటి మన్బునె, పెరిపుజెరిబు, యూదపెదెలుబు, యూదురి రూబుజ్ నెన్పిసినికార్, నన్హద్రిం సజమదికార్ విజెరి కూడ్డి యేసుజ్ ఎలాగ సప్తెజ్ ఇజి ఆలోసనం కితార్. వారు వన్నిజ్ తొప్పి ఒత్తారె రోమ దేనెమ్ది అతికారిఆతి పిలాతుజ్ ఒపజెప్తార్. 2 “నీను యూదురి రాజునా?”, ఇజి పిలాతు యేసుజ్ వెన్బాతాన్. నస్తవలె యేసు, “ఒఒ నీను వెహ్తాలెకండెన”, ఇజి వెహ్తాన్. 3 పెరిపుజెరిబు యేసుముస్సు నండె తప్పజ్ మొప్తార్. 4 నస్తవలె పిలాతు యేసుజ్ మరి వెన్బాతాన్, “నీను మరేజి ఇనికబా వెప్పిదా? వీరు నీ ముస్సు ఎస్సా తప్పజ్ మొప్పినార్ గదె”. 5 అహె వెహ్తాతిజ్బా యేసు ఇని మాటబా మరేజి వెహ్ఎతాన్. అక్క సుడేజి పిలాతు బమ్మ ఆతాన్.

6 ఏంటు ఏంటు కిని పస్కు పండ్రొల్లిజ్ లోకుర్ కొరిజిని ఒరెన్ కయ్దువన్నిజ్ విడుదల సీదేజ్ పిలాతుజ్ అలవాటు. 7 అయవలె బరబ్బుఇనికాన్ ఒరెన్ అన్నయవాండ్రు నన్నికాన్ జెలిదు మహాన్. వాండ్రు, వన్నివెట మహికార్, ఏలుబడిః కినివరిజ్ ఎద్రిస్తారె నెడెండారిజ్ సప్త మహార్. అందెజె వరిజ్జెలిదు ఇట్త మహార్. 8 లోకుర్ పిలాతుబాన్ వాజి, “నీను కిని ఆలవాటువజి ఒరెన్వన్నిజ్ డిసిసిఅ”, ఇజి వెహ్తార్. 9-10 పెరిపుజెరిబు గోస ఆతారె యేసుజ్ నజీ ఒపజెప్తార్ ఇజి పిలాతు నెస్తాన్. అందెజె వాండ్రు “యూదురిరాజుజ్ నాను మిజి డిసి సిదేజ్ కొరిజినిదెరా? ఇజి వెన్బాతాన్. 11 గాని పెరిపుజెరిబు బరబ్బేజ్ డిసి సీజి యేసుజ్ సప్తెజ్ ఇజి అతికారి ఒప్పిలెకండె వెహ్తాన్ ఇజి లోకురిజ్ రేప్పి మహార్.

12 నస్తవలె పిలాతు, “యూదురిరాజు ఇని మీరు వెహిసినివన్నిజ్ నాను ఇనిక కిదెజ్?”, ఇజి వెన్బాతాన్. 13 వారు, “వన్నిజ్ సిలువ పొకెఅ”, ఇజి నండె డెల్స్తార్. 14 అందెజె పిలాతు, “ఎందనిజ్ వన్నిజ్ సిలువ పొకెజ్? వాండ్రు ఇని తప్పపణి కివన్”, ఇజి వెహ్తాన్. గాని వారు, “వన్నిజ్ సిలువ డెయేజి సవఅ”, ఇజి నండె డెల్స్తార్. 15 పిలాతు లోకాజ్నర్ద కిబిస్తేజ్ బరబ్బేజ్ విడుదల కితాన్, యేసుజ్ కొర్డజాణిజ్ డెయేబిసి. సిలువ పొకెజ్ ఒపజెప్తాన్.

సయ్నమ్దికార్యేసుజ్ వెక్రిస్తార్

16 నస్తవలె సయ్నమ్దికార్ యేసుజ్ ప్రెటోరియం ఇని పిలాతుని పెరిఇండ్రో ఒతారె అబ్బె మహి సయ్నమ్ది వరిజ్ విజెరిజ్ కూడుప్తార్. 17 వారు యేసుజ్ ఎరాని రంగుది నీరి సొక్క పొర్చిసి సాప్పాణిజ్ అటారె ఉండ్రీ టోపి తయారె కిజి బురాదు ఇడేతారె. 18 “యూదురి రాజు గెల్తుఅ? ఇజి వెప్పి వారు యేసుజ్ వెక్రిస్తార్. 19 వారు మరి మరి డుడుదాన్ వన్ని బురాదు డెయ్యారె వన్నిముస్సు.

వూస్తారే. వెనుక ముణుకుకుడే ఊర్జి వన్నిజ్ మాడిసి వెక్కిస్తారే. ²⁰ వారు వెక్కిసి విజితి వెనుక వన్నిజ్ తోడిగిసి మహి ఎరాని సొక్క లాగ్గి వన్ని నీరి సొక్క తోడిగిస్తారే సిలువ పొక్కెజ్ వన్నిజ్ ఒత్తారే.

యేసుజ్ సిలువద్దు డెయ్జినారే
²¹ కురెనియోదికాన్ సీమోను ఇని ఒరెన్ ఉండ్రీ నాటోహాన్ అయసరి వాజి మహాన్. నస్తివలె యేసువందిజ్ సిలువ పిండెదెజ్ సయనమ్దికార్ సీమోనుజ్ బలవంతం కిత్తారే. సీమోను, అలెక్సందరుని, రూపుఇని వరి అప్పొసి. ²² వారు గొల్లొతఇని బాడ్డిదు యేసుజ్ తత్తారే. గొల్లొత ఇహిజ బుర్ర పిణికి బాడ్డిఇజ అర్లం. ²³ అబె యేసుజ్ ఉండెజ్ ద్రాక్కలదు బోల* ఇని సేందుమాయం కల్పి సత్తారే. గాని వాండ్రు కెవతాన్. ²⁴ సయనమ్దికార్ యేసుజ్ సిలువదు డెయ్జారే. వెనుక వన్ని సొక్కెజ్ ఎయెజ్ దోహొక్కె ఇజ నెస్టెజ్ సీటిజ్ పొక్కారె వని సొక్కెజ్ సీబె ఆతారే. ²⁵ పెందాల తొమ్మిది గంటెజ్ యేసుజ్ సిలువ డెయ్జారే. ²⁶ “యూదురిజ్ రాజు”, ఇజ యేసుముస్సు మొప్తి నేరం బోర్డుదు రాసి సిలువారు ఇత్తారే. ²⁷⁻²⁸ యేసువెట రిఎర్ డోజారిజ్ సిలువారు పొక్కారే. ఒరెన్వన్నిజ్ ఉణెర్ పడెకాదు ఉండ్రీ సిలువారు, మరి ఒరెన్ వన్నిజ్ డేబ్ర పడెకాదు ఉండ్రీ సిలువారు. ²⁹⁻³⁰ నస్తివలె అయ సరిదాన్ సొన్నిమహికార్ వరి బురదూక్కి యేసుజ్ దూసిస్తారే, “ఒహో దేవుణుగుడిదిజ్ అరప్పి విసీరజి మూండ్రీ రోస్కొజ్ నాను తొహ్పొక్కి నిజి నీనె రక్కిసి. సిలువదాన్ డిగజి రఅ” ఇహారే.

³¹⁻³² అయవజనె పెరిపుజెరిబుని యూదురి రూలునెన్పినిసికార్, “వీండ్రు మహివరిజ్ రక్కిస్తారే. గాని వీండ్రు వినిజె రక్కిస్తెజ్ అటెవన్. ఇస్తాయేలురాజు ఆతి క్రిస్తు ఏలు సిలువదాన్ డిగజి వాతిజి అక్క సూణాపె మాపు నమివాన్”, ఇజ ఒరెన్ వెట ఒరెన్ వెహ్సి వన్నిజ్ వెక్కిస్తారే. యేసువెట సిలువ డెయెఆతి డోజారుబుబా వన్నిజ్ వెక్కిస్తారే.

యేసు సిలువముస్సు పాణం డిస్తారే

³³ వేడె: పన్నెండ్రు గంటెజిజ్ మూండ్రీ గంటెజ్ దాక దేసం విజు సికటి ఆతారే. ³⁴ మూండ్రీ గంటెజ్ యేసు, “ఎలోయ, ఎలోయ లమ నబత్తాని”, ఇజ డటం డేల్ని వెహ్జాన్. దని అర్లం ఇనిక ఇహిజ, “నా దేవుణు, నా దేవుణు నజి ఎందనిజ్ నీను డిస్సి” ఇజి. ³⁵ బానె నిహికార్ సెగెండార్ యామాట వెహారె, “ఇదిలో వీండ్రు ఎలియెజ్ కూక్కినాన్” ఇహారే. ³⁶ ఒరెన్ ఉహొక్కి సొన్ని దూతి తత్తాండ్రె సెందు ద్రాక్క కలుదు ముడెక్కి ఉండ్రీ డుడ్డుదాన్ యేసుజ్ ఉండెజ్ వెయ్లు అందిస్తారే. “నణెం మండ్రు. ఏలియ వాజి వినిజ్ డిప్పాండ్రొ సెలేనో సూణాట్”, ఇజి వాండ్రు వెహ్జాన్. ³⁷ నస్తివలె యేసు డటం డేల్స్తాండ్రె పాణం డిస్తారే. ³⁸ అయవలె యెరూసలేమ్దు మహి దేవుణు గుడిదు మహి తెర ముస్సుహాన్ అడిగిదాక కింజాదె రుండి ముక్కెజ్ ఆతె. ³⁹ సిలువ డెయ్జుబాన్ నిహిమహి సయనమ్ది మంద మణిసిరిజ్, యేసు ఈహు డేల్స్తాండ్రె పాణం డిస్తిక సుడెజి, “వీండ్రు నిజం దేవుణు మరిసెనె”, ఇజి వెహ్జాన్. ⁴⁰ సెగెండెక్ అయ్లొకొణెక్ దూరం నిల్చి సుడెజిమహి. వన్యాజ్ లొఇ మగ్గలేనె మరియ, ఇజిరి యాకోబు, యోసె ఇనివరి అయ్సెఆతి మరియ, సలోమి ఇనికెజ్మహి. ⁴¹ యేసు గలీలయదు మహివలె ఇవిక్వన్నివెట సొన్ని వన్నిజ్ అవ్సరమాతికెజ్ కిజిమహి. ఇవిక్ఆవండె యెరూసలేమ్దు యేసువెట వాతి నండె అయ్లొకొణెక్హా అబ్బె మహి.

యేసు పినుగు సమాదిదు ఇత్తారే

⁴²⁻⁴³ అరిమతయ ఇని పట్టుమ్దికాన్ యోసేపుఇని ఒరెన్ అబ్బె మహాన్. వాండ్రు సన్హద్రిం సజమ్దు మన్నివరిలొఇ పెరికాన్ ఒరెన్. దేవుణు ఏలుబడి: వందిజ్ వాండ్రు ఎద్రు సుడెజి మహాన్. వీండ్రు సొన్ని, దయరమాదాన్, యేసు పినుగు సిలువ ముస్సుహాన్ జాయ్ మనుబునె డిప్టెజ్ పిలాతుబాన్ సెలవలొస్తాన్. అయ దినం విస్త్రాంతిదినం ముజాల మహి తయారే కినిదినం. అందెజి అయ తయారే కినిదినం పొదొయ్నె యోసేపు పిలాతుబాన్ సెలవ లొస్తెజ్ సాహాన్. ⁴⁴ యేసు ఎస్కాండె సాతాన్ ఇజి వెంజి పిలాతు బమ్మ ఆతాన్. సయనమ్ది వరిఅతికారిజ్ కూక్కి వెన్బాతిజ్ యేసు ఎస్కాండె సాతాన్ ఇజి నెస్తాన్. ⁴⁵ యేసు సాతాన్ ఇజి సయనమ్ది వరిఅతికారి వెహి మాట పిలాతు వెంజి యోసేపుజ్ యేసుజ్ పినుగు ఒపజెహ్జాన్. ⁴⁶ యోసేపు నెగ్గె తెల్లాని పాత కొడెజిజతని, పినుగు సిలువదాన్ డిస్సి అయ పాతెజాణె పినుగుదిజ్ సుటిసి నటుదిజ్ దోల్సె దూకిదు ఇత్తారే. ఉండ్రీ

* 15:23 15:23 బోలం కల్పతిజ నొప్పి నెన్విండె ఆనాద

గుండ్రని సెప్ట పణుకు సడిపిసి దూకిదిజ్ అడ్డు కిత్రాండ్రె మూక్తాన్. 47 మగ్దలేనె మరియ, యోసె అయ్సెఆతి మరియ యేసు పినుగుదిజ్ ఇడ్డిబాడ్డి సుడేతె.

16

యేసు మర్రి నిజితాన్

1 విస్త్రాంతిదినం గడిసెసాహివెనుక, మగ్దలేని మరియ, యాకోబు అయ్సె మరియ, సలోమి, ఇనికెజ్ యేసు పినుగుదిజ్ రాస్తెజ్ వాసనం నూనె కొడిజె తత్తె. 2 వారమ్దిజ్ మొదోహి దినమ్దు పెందాల్పా నిజ్జె పొద్దు సోసి మహివలె అవిక్సమాది డగ్గు సాహ. 3 సమాది డగ్గు సొన్ని మహిజ్ అవిక్ “సమాది మూక్తి పణుకు మా వందిజ్ ఎయెర్ గూర్ప్పార్?”; ఇహె.

4 నస్తివలె అవిక్ సుడేతిజ్ ఎయెరో అయ పెరిపణుకు సమాదిదాన్ గూర్ప్పిలెకెండ్ తోరితాద్. అది ఒద్దె పెరిక 5 నస్తివలె అవిక్అయ సమాది లోఇ వజ్జె సాహిజ్ నీరి తెల్లాని సొక్క పొర్పాజి ఉణెర్ పడజ్కాద్ బస్తి మహి ఒరెన్ దజ్డాఱయెనుజ్ సుడేతె. వన్నిజ్ సుడేజి అవిక్నండో తియెల్ఆతె. 6 అయ దజ్డాఱయెన్ వరివెట, “తియెల్ ఆమాట్, సిలువ పొకె ఆతి మన్ని నజరేతు వాండ్రు ఆతి యేసుజ్ మీరు రెబాజినిదెరా? వాండ్రు ఇబ్బె సిల్లెన్. వాండ్రు బత్తిజి నిజిత మనాన్. వన్నిజ్ ఇడ్డి బాడ్డి సుడేదు.

7 వాండ్రు మిజె ఇంక ముజాల గలీలయ మీరు సొన్నినాన్ వాండ్రు మిజె వెప్తాపజ మీరు అబ్బెవన్నిజ్ సూణిదెర్లె ఇజి సిసురిజ్ మరి పేతురుజ్ వెప్తు”, ఇజి వెప్తాన్. 8 అక్క వెసానె అవిక్ వణెక్కి బమ్మ ఆజి సమాదిదాన్ వెల్లి వాజి బాణిజ్ ఉహ్క్కి సాహ. అవిక్ తియెల్ ఆతెనె ఎయెర్వెటబా ఇనికబా వెహ్ఉతె.

యేసు మగ్దలేని మరియెజ్ తోరె ఆతాన్

9 యేసు ఆదివారం పెందాల్పా సమాదిదాన్ బత్తిజినిజ్జె మగ్దలేనె మరియెజ్ తోరె ఆతాన్. యా మరియ ఎయెర్ ఇహిజ యేసు ఏడు దెయమ్కాజ్ ఉల్పిస్తె నెగెండ్ కిత్తి అయ్లి కొణ్ణె. 10 యేసువెట మహికార్ యేసు సాతిజ్ దుకమ్దాన్ ఒడేబిజి అడేబాజి మహిజ్, అది సాహదె విజు సజతిజ్ వరిజ్ వెప్తాద్. 11 యేసు బత్తిజి నిజితాండ్రె నజి తోరె ఆతాన్ ఇజి అది వెప్తా మాట వారు నమ్మివతార్.

యేసు రివెర్ సిసూరిజ్ తోరెఆతాన్

12 వెనుక రివెర్ సిసుర్ ఉండ్రె నాటో నడిసి సొన్నిమహిజ్ యేసు వరిజ్ తోరె ఆతాన్. గాని ఆఇ మూర్తి వజ తోరెఆతాన్. 13 వారు సొన్ని, మహి సిసూరిజ్ యా సజతి వెప్తార్. గాని వారు యా రివెరి మాటేజబా నమ్మివతార్.

యేసు పదకొండు మణిసి సిసూరిజ్ తోరెఆతాన్

14 మరి ఒర్పుపదకొండు మణిసి సిసూర్ బోజనం కిజిమహివలె యేసువరిజ్ తోరె ఆతాన్. యేసు నిజితి వెనుక వన్నిజ్ సుడేతివరి మాట నమివిండాతివందిజ్, వరి అనుమానమ్దిజ్ యేసు వరిజ్గటిజ వెప్తాన్. 15 యేసు వరివెట, “మీరు లోకం ముస్సు మని విజు దేసమ్కాజ్ సొన్ని దేవుణు సువార్త విజేరిజ్ వెప్తు. 16 ఎయెర్బా నా ముస్సు నమకం ఇడేజి బాప్తినం లాగెఆతిజ వరిజ్ దేవుణు రక్కిస్సాన్. గాని నా ముస్సు నమకం ఇడేఇతి వరిజ్ సిక్కు వానాద్.

17 ఎయెర్ నజి నమ్మిసారో వారు యా బమ్మాతి పణిజ్కెదెజ్ అట్పార్. అక్కెజ్ ఇనికెజ్ ఇహిజ నా పేరుదాన్ వారు దెయమ్కాజ్ ఉల్పెప్పార్. వారు కొత్తబాసిజ్ వర్గినార్. 18 సారాస్కాజ్ అన్తిజబా అవిక్ కట్టిజ్బా సావెర్. ఇనికబా గొప్ప విసమాతిక ఉటిజ్బా సావెర్. జబ్బు ఆతివరి ముస్సు కికు ఇట్టిజ వారు నెగెండ్ ఆనార్”, ఇజి వెప్తాన్.

దేవుణు యేసుజ్ పరలోకమ్దు ఒత్తాన్

19 యేసు యాకెజ్ విజు వెప్తావెనుక దేవుణు యేసుజ్ పరలోకమ్దు ఒత్తాన్. యేసు అబ్బె దేవుణు ఉణెర్ పడజ్కాద్ బస్తాన్. 20 యేసు సిసూర్ విజుబాన్ సొన్ని దేవుణు సువార్త వెప్తార్. వారు కిత్తి విజు పణిదిజ్ దేవుణు సాయం కితాన్. వారు కిత్తి బమ్మాతి పణిజాణి వారువెప్తా మాట నిజం ఇజి దేవుణు తోరిస్తాన్.

లూక రాస్తి సువార్త

నెల్వ కిబిసినిక

యా సువార్త లూక ఇని ఒరెన్ డాక్టరు, దెయెపిలెజ్ రాస్తికాదె. యేసు యా లోకమ్దు బత్కిత్తివలె జర్గితి దన్నివందిజ్ కత వజ రాస్త మనాన్. యేసు పుడుగు వందిజ్ మహి సువార్త ఇంక లావు వెప్తా మనాన్. మరి యేసు కిత్తి నండో బమ్మాని పణిజ వందిజ్, నండోడార్ జబ్బుదాన్ మహి వరిజ్ నెగెణ్ కిత్తిదన్ని వందిజ్ వెప్పినాన్. యేసు దేవుణు మరిసి ఇహిజ్బా లోకు వజ పుట్టి, లోకురి పాపమ్కాజ్ వందిజ్ సాజి, మరి దేవుణువెట ఎలాకాలం బత్కిని బత్కుదు నడిపిసినిన్ ఇజి యా సువార్తదు వెప్పినాన్.

1-4 లూక తియెపిలెజ్ రాసినిన్. మా నడిమి జర్గితి సజతిజ వందిజ్ కతవజ రాస్తిజ్ నండోడార్ సుడజ్తార్. మొదోహనె, యా సజతిజ సుడజ్తి సాసిర్, మరి, సువార్త బోదిస్తికార్ మజి వెప్తార్. వారు మజి వెప్తి వజనె, వీరు రాస్తార్. నాను యా సజతిజ్ విజు మొదోహనె బాగ నెస్త మహ. అందెజె అయాకెజ్ నీ వందిజ్ వరస రాస్తిజ బాగ మంజినాద్ ఇజి నాను ఒడజిబిత. ఎందానిజ్ ఇహిజ, అయావలె నిజి నెన్పిస్తి విజు వన్కాజ్ పూర్తి అర్థం నిజి నెస్తిజానాద్.

బాప్తిసం సీని యోహాను పుడ్గు వందిజ్ వెప్పినాన్.

5 హారోదరాజు యూదయ దేసెం ఏలుబడిః కిజి మహివలె, జెకరియ ఇని ఒరెన్ పుజెరి మహాన్. వీండ్రు అబియ పుజెరి జట్టుదు మహికాన్. విన్ని ఆల్పి ఎలిసబెతు. అది అహారోను పుజెరి కుటుమ్దికాద్నె. 6 వీరు రివర్బా, నింద సిల్లెండ ప్రబు సితీ ఆడ్రెజ, రూలుజ విజు లోజిజి, దేవుణు ముందాల సీతినిజాయ్తిదాన్ మహార్. 7 ఎలిసబెతు గొడ్డు బోదెలి. అందెజె వరిజ్ కొడోః సిల్లెర్. వారు రివర్బా నండో డొక్క ఆతార్. 8 ఉండ్రీ సట్టు జెకరియ జట్టుజ్ పుజెరి పణికిదెజ్ వంతు వాతాద్. అయావలె జెకరియ దేవుణు ముందాల పుజెరి పణి కిజినాన్. 9 పుజెరిజ మన్ని అలవాటు లెకెండ, సీటి పోక్తారె, జెక్యెజ్ ఏర్పాటు కితార్. దేవుణు గుడిఃదు సొన్ని దూపం సురుదెజ్ వన్నిజ్ ఏర్పాటు కితార్. 10 దూపం సురుదెజ్ వేల ఆతాద్. నస్తివలె అబ్బె కూడిఃతిమహి మందలోకుర్ విజెరె వెల్లి మంజి పార్లనం కిజి మహార్. 11 నస్తివలె, దేవుణుదిజ్ దూపం సుర్పి మాలి పిటి ఉణెరెపడఃకాద్ దేవుణు దూత నిహాన్. నిహండ్రె వన్నిజ్ తోరె ఆతాన్. 12 జెకరియ, దేవుణు దూతెజ్ సుడఃతాండ్రె, గజిబిజి ఆజి నండో తియెల్ ఆతాన్. 13 అయావలె దేవుణు దూత వన్నిజ్, “జెకరియ, సీను తియెల్ ఆమ. నీ పార్లనం దేవుణు వెహాన్. నీ ఆలు ఎలిసబెతు ఒరెన్ కొడోః ఇడ్పాద్దె. వన్నిజ్ యోహాను ఇజి పేరు ఇడ్దెజ్. 14-17 వాండ్రు ప్రబు ఎర్దు పెరికాన్ ఆనాన్. ద్రాక్కు కలుని మరి సొస్సిక ఇనికబా వాండ్రు ఉణెంవెన్. అయిసి పొటలోఇ పిండం ఆతి బాణిజ్ మొదోల్పి దేవుణు ఆత్మ వన్నిజ్ నడిపిస్సాన్. ఇన్నాయెలు దేసెమ్ది లోకురిజ్ నండోడారిజ్ వరి దేవుణు ఆతి ప్రబు దరోట్ మప్పి తనాన్. ఏలియ ప్రవక్త లెకెండ నండో గొప్ప సత్తుదాన్ వాండ్రు ప్రబు ముజాల సొనాన్. ఎందానిజ్ ఇహిజ, అప్పొసి మరిసిరిజ్ కూడుఃప్తెజ్. నాయం మన్నికార్ బుద్దిదాన్ నడిపివజ, విరి సరిదు దేవుణుమాట వెన్ఇవరిజ్, నడిపిస్సెజ్ ప్రబు వానివలె, వన్నిజ్ ఎర్దు సుడఃదెజ్ లోకాజ్ తయార్ కినివందిజ్ యా లెకెండ కినిన్లె. అందెజె వాండ్రు పుట్టివెలె మిజి గొప్ప సర్ద కినిన్లె. మరి, నండోడారిజ్ సర్ద కిబిస్సాన్లె”, ఇజి వెప్తాన్. 18 నస్తివలె జెకరియ దేవుణు దూతెజ్ వెన్బాతాన్, “యాక ఎలాగ నాను నెస్తిజ్? నాను డొక్క. నా బోదెల్బా డొక్కి ఆతాద్”, ఇజి. 19 అందెజె దేవుణు దూత, “నాను గల్లియెలు. దేవుణు పడఃకాద్ నిల్పి మంజనికాన్. నీ వెట వర్గిజ, నిజి యా నెగ్గి కబ్బు వెప్తాజ్ దేవుణు నజి పొక్త మనాన్. 20 గాని నాను వెప్తి మాటెజ్ నీను నవిఃజతి. అందెజె యాకెజ్ జర్గినిదాక, నీను గుల్ల ఆజి మంజనిలె. నాను వెప్తికెజ్ జర్గిదెజ్ దేవుణు ఏర్పాటు కితి కాలమ్దు, పూర్తి ఆనెలె”, ఇజి వెప్తాన్.

21 నన్నీవలె లోకుర్ జెక్రయోజ్ కావ్ కిజి మహార్. వీండ్లు ఎందనిజ్ దేవుణు గుడిఁదు నిసొ ఆల్సెం ఆతాన్ ఇజి బమ్మ ఆజి మహార్. 22 వాండ్లు వెల్లి వాతివెలె, వరి వెట పర్గిదెజ్ అట్ఎతాన్. అయావలె దేవుణు గుడిఁదు వినీజ్ దేవుణు ఇనికదో ఉండ్రీ దర్సనం* తోరిస్తాన్ ఇజి నెస్తార్. వెయు రజతిజ్, వాండ్లు వరిజ్ కియు నయ్న కితాన్. వాండ్లు గుల్ల ఆజి మహాన్. 23 వన్నీ పణి కాలం వీజితిజ్ వాండ్లు వన్నీ ఇండ్రో సొహాన్. 24 సెగం రోస్కు సొహి వెన్కా, వన్నీ అల్ని ఎలిసబెతు పాత డిఁస్తాద్. అయ్దు నెలదాక అది ఇండ్రోనె మహాద్. 25 “ప్రబునె నా వందిజ్ యాక కితాన్. ఏలు నా ముస్కు కణక పెహ్తా బస్తాండ్రో లోకుర్ ఎర్దు నజి మహి సిగుసేట్టు లాగితాన్”, ఇజి వెహ్తాన్.

యేసు పుడుఁగు వందిజ్ వెప్పినాన్

26 ఎలిసబెతు పాత డిఁసి ఆరునెలాదు, దేవుణు గబ్రియెలు దూతెజ్, గలిలయ ప్రాంతమ్దు మన్ని నజరేతు ఇని పట్టుమ్దు పొక్తాన్. 27 యోసేపు ఇన్ని ఒరెన్ వన్నీజ్ వెన్బాతి ఉండ్రీ విడ్డి బోదెలిబాన్ దేవుణు దూత సొహాన్. అయ విడ్డి బోదెలి పేరు మరియ. యోసేపు దావీదు కుటుమ్దికాన్. 28 దేవుణు దూత లోఇసాహండ్రె, మరియామ్మెజ్ సుడేజి, “వందనం, ప్రబు నీ వెట మనాన్. నిజి నెగెండ దీవిస్త మనాన్”, ఇజి వెహ్తాన్. 29 అయ మాటెజ్ వెహదె, మరియ నండో బాద ఆతాద్. వన్నీ మాటెజిదిజ్ అర్లం ఇనికదో ఇజి దన్నీ గర్బమ్దు బమ్మ ఆతాద్. 30 అయావలె దేవుణు దూత దన్నీజ్, “మరియ నీను తియెల్ ఆమ. దేవుణు నీ ముస్కు కనికారం తోరిస్త మనాన్. 31 నీను పాత డిఁసిద్ది, ఒరెన్ కొడోదిజ్ ఇడ్డిలె. వన్నీజ్ యేసు ఇజి పేరు ఇడేఁఆ. 32 వాండ్లు పెరికాన్ ఆనాన్. విజుదనిజ్ అతికారం మని దేవుణు మరిసి ఇజి కూకె ఆనాన్లె. వన్నీ అనిగోగోర్ ఆతి దావీదు రాజు ఆతివజి, దేవుణుఆతి ప్రబు వన్నీజ్ రాజు కినాన్లె. 33 వాండ్లు, యాకోబుజ్ తెగ్గతివరిజ్ ఎలాకాలం ఏలుబడిఁ కినాన్లె. ఏలుబడిఁ కిదెజ్ అతికారం వన్నీజ్ ఎలాకాలం మంజినాద్లె”, ఇజి వెహ్తాన్. 34 అయావలె అది, “నాను ఎనెజిబా మొగకొడోఁ వెట కూడేఁఎనె. యాక ఎలాగ జర్గినాద్?”, ఇజి దేవుణు దూతెజ్ వెన్బాతాన్. 35 అందెజి దేవుణు దూత, “దేవుణు ఆత్మ నీ ముస్కు వానాన్లె. మొసొవ్ కితిజి నీడ పిడేఁక్కాద్. అయలెకెండ, విజు దన్నీజ్ అతికారం మన్ని దేవుణు సత్తు నిజి పిడేఁక్కాద్. అందెజి పుట్టికాన్ దేవుణు బాణిజ్ వానికాన్. వాండ్లు దేవుణు మరిసి ఇజి కూకె ఆనాన్లె. 36 నీ డగ్రుహి లోకుఆతి ఎలిసబెతు డోక్రి కాలమ్దు ఒరెన్ బయిజ్ పాత డిఁస్త మనాద్. గొడ్డు బోదెలి ఇజి కూకె ఆతిదనిజ్ ఏలు ఆరు నెలెజ్. 37 విజు కిదెజ్ దేవుణు అట్టికాన్”, ఇజి వెహ్తాన్.

38 అయావలె మరియ, “ఇదిలో, నాను దేవుణు పణిమణిసి. నీను వెహ్తా లెకెండె నజి జర్గిపిద్”, ఇజి వెహ్తాద్. అకవెహండ్రె దేవుణు దూత దని బాణిజ్ సొహాన్.

మరియ ఎలిసబెతుబాన్ ససొన్సినాద్

39 అయావలెనె, మరియ తయార్ ఆతాద్. ఆతాదె, యూదయ దేసెమ్ది గొరోణ్ ప్రాంతమ్దు మని ఉండ్రీ పట్టుమ్దు బేగి సొహాద్. 40 అబ్బె మని జెకరియ ఇండ్రో సొహాదె, ఎలిసబెతుజ్ దసూల్ఆతాదె, నమొస్తె వెహ్తాద్. 41-42 మరియ వెహ్తా వందనం ఎలిసబెతు వెహివెలె, దన్నీ పొటాద్ మన్ని పిండం సర్దదాన్ కర్లితాద్. ఎలిసబెతు దేవుణు ఆత్మ దాన్ నిండ్రీజి సర్దద ఆజి ఈహు డటం వెహ్తాద్. “అబ! బోదెకా లోఇ, దేవుణు నిజి నెగెండ దీవిస్తాన్. నీ పొటాద్ మన్ని కొడోదిజ్ బా దీవిస్తాన్. 43 నా ప్రబుజ్ అయ్నె నా డగ్రు వాదెజ్ నాను ఏపటిదిక ఆవి. 44 ఇదిలో నీ వందనం నా గిబ్బిదు అర్దిజ్, నా పొటాద్ మన్ని పిండం సర్దదాన్ కర్లితాద్. 45 ప్రబు దనిజ్ వెహ్తా మాటెజ్ జర్గినాద్ ఇజి నమకం ఇట్టికాద్ గొప్పది.

మరియ దేవుణుదిజ్ పొగిడిఁజి పార్జినాద్.

46 అయావలె మరియ ఈహు వెహ్తాద్. “నా పాణం ప్రబు గొప్ప పెరికాన్ ఇజి వెప్పినాద్. 47-49 వాండ్లు వన్నీ పణిమణిసిఆతి నా ఇజ్జి బత్తుదిజ్ సుడేఁతాన్. అందెజి నా పాణం నజి రక్కిన్నీ దేవుణు బానె సర్దద ఆజినాద్. గొప్ప సత్తు మన్ని దేవుణు నా వందిజ్ గొప్ప పణిజ్ కితాన్. అందెజి ఏలుదాన్ లోకుర్ విజేరె నా వందిజ్, దేవుణు దీవిస్తికాద్ ఇజి వెహ్పార్లె. వాండ్రె నెగ్గి దేవుణు. 50 వన్నీజ్

* 1:22 1:22 దర్సనం ఇహిజ ఇనికాదో ఉండ్రీ నజతి కల లెకెండ బిటాజ్ తోరె అనికాదె అయాక దేవుణు సత్ఉదాన్ తోరె ఆజినాద్

తియెల్ అనివరి మున్ను వన్ని కనికారం తర తరం మంజినాద్. 51 వాండ్రు వన్ని సత్తుదాన్ గొప్పు పణిజ్ కితాండ్రె తోరిస్తాన్. నానె పెరికాన్ ఇజి వరి లోఇ ఒడేబిజి గర్ర ఆతి వరిజ్ వాండ్రు సెద్దిస్తాన్. 52 గర్ర మని అతికారిబ, అతికారం దాన్ డిఃప్రాండ్రె ఇజిరి వరిజ్ పెరికార్ కితాన్. 53 బజాతివరిజ్ నెగ్గి టిండి సీజి సరద కిబిస్తాన్. మని వరిజ్ వహి కీదానె పోక్తాన్. 54-55 మా అనిరిజ్ 'కనికారం తోరిస్తా' ఇజి ఒట్టు కితి వజి వాండ్రు కితాన్. వన్నిజ్ సేవ కిని ఇస్తాయేలు లోకాజ్ కనికారం ఆజి సాయం కితాన్. అబహముజ్ వన్ని కుటుమేది వరిజ్ విజేరిజ్ ఎలాకాలం కనికారం తోరిస్తా ఇజి ఒట్టు కితాన్. అయాక వాండ్రు ఒడేబితాన్", ఇజి మరియ వెప్తాద్. 56 అది డగ్రు మూండ్రె నెలెజ్ దాక ఎలిసబెతు బాన్ మహదె దని ఇండ్రె మరజి సాహద్.

బాప్తీసం సీని యోహాను పుట్టినాన్.

57 నెలెజ్ నిండ్రెతివలె, ఎలిసబెతుజ్ ఒరెన్ కొడెః పుట్టాన్. 58 ప్రబు దన్నిమున్ను కణక పెప్తా బేస్తాన్ ఇజి పడకాదికార్ని కాలెజ్ వెవారె, దన్నివెట నండో సరద ఆతార్. 59 కొడెః పుట్టి ఎనిమిది దినమ్దు వన్నిజ్ సునతి కిదెజ్ కూడిఃతార్. కొడెఃదిజ్ అప్పాసి పేరు నన్నిక ఇడెదెజ్ వారు ఒడేబితార్. 60 నస్తివలె అయేసి, "అహు పోని! వన్నిజ్ యోహాను ఇజి పేరు ఇడేదెజ్", ఇజి వెప్తాద్. 61 అందెజె వారు, "మీ కులెజి లోఇ ఎయెరిజ్ బా నిన్ని పేరు సిల్లెద్", ఇజి దనిజ్ వెప్తార్. 62 వనిజ్ ఇన్ని పేరు ఇడెదెజ్ అప్పాసి కొరిజినాన్ ఇజి నెస్టెజ్ వారు కియు సయన కిజి జెక్కయెజ్ వెన్బాతాన్. 63 నస్తివలె వాండ్రు ఉండ్రె రాసిని బల్ల లోస్తాండ్రె, "వన్ని పేరు యోహాను", ఇజి రాస్తాన్. వారు విజెరి నండో బమ్మ ఆతార్. 64 వెటనె, వన్నిజ్ వరగిదెజ్ వెయు వాతాద్. దేవుణుదిజ్ పొగిడిఃజి వర్గిదెజ్ మొదోల్స్తాన్. 65 పడకాదికార్ విజేరి గొప్పు తియెల్ ఆతార్. యూదయ దేసెమేది గొరోజ్ ప్రాంతం విజి లోకుర విజేరి యా జర్గితి సజతిజి వందిజ్ వర్గిజి మహార్. 66 యాక వెహికార్ విజెరిబా దని వందిజ్ ఒడేబిజి, "యా కొడెః ఎలాగ మహికాన్ ఆనాన్లెన", ఇజి వెప్తాన్. ప్రబు సత్తు వన్నివెట మహద్ ఇజి వారు నెస్తార్.

జెకరియ పొగిడిఃజి పార్జినాన్

67 నస్తివలె వన్ని అప్పాసి జెకరియ, దేవుణు ఆత్మదాన్ నిండ్రెజి, దేవుణు వెప్తాజ్ మని సజతిజి వందిజ్ ఈహు వెప్తాన్. 68 "ఇస్తాయేలు లోకురి దేవుణుదిజ్ పొగిడిఃజినాట్. ఎందనిజ్ ఇహిజ, వాండ్రు వన్ని లోకురిజ్ డిఃబిస్సి వందిజ్ వాత మనాన్. 69 ఒరెన్ సత్తు మని మజి గొప్పుజి రక్కిస్సివన్నిజ్ మా వందిజ్ సిత మనాన్. అయ వాండ్రు వన్ని పణి మణిసి ఆతి దావీదు కుటుమేదు మనికాండ్రె. 70-71 సేన దినమ్కాజ్ ముజాలె, దేవుణు వన్ని బాణిజ్ వాతి ప్రవక్తెజివెట ఒట్టు కిత మనాన్. ఒట్టు ఇనిక ఇహిజ, "మా పగాతివరి బాణిజ్ మజి రక్కిస్సుఇజి. "మజి దూసిస్సి వరిబాణిజ్ రక్కిస్సు", ఇజి. అయా ఒట్టువజనె, మజి రక్కిస్సి వన్నిజ్ సితాన్. 72 మరి వాండ్రు వెప్తాన్, "మా అనిరిజ్ ఒట్టు కితి వజి కనికారం తోరిస్తా ఇజి. వన్ని వందిజ్ కేట ఆతి ఒపుమానం ఒడేబిస ఇజి. 73-74 మా బుబ్బు ఆతి అబ్రాహము వెట ఒట్టు కితాన్, మా పగ ఆతివరి బాణిజ్ మజి తప్పిస్తా ఇజి, తియెల్ సిల్లెండ వన్నిజ్ సేవ కిదెజ్ మజి సాయం కిన ఇజి. 75 మరి, మాటు దేవుణుదిజ్ కేట ఆతి లోకుర వజి నీతి నిజాయితిదాన్ మా బత్తు విజి వన్ని ఎద్దు మండ్రెజ్ మజి తయార్ కిన ఇజి", వెప్తాన్. 76 మరి, నా కొడెః నీను విజి దన్నిజ్ అతికారం మన్ని దేవుణు ప్రవక్త ఇజి కూకెఆనిలె. ఎందానిజ్ ఇహిజ, నీను ముజాలె సాన్సి ప్రబుజ్ లోకుడగ్రు వాదెజ్ సరి నెగెజ్ కినిలె. 77 నీ వన్ని లోకాజ్ వెప్పాలె, "దేవుణు వరి పాపమ్కు నెమిసి వరిజ్ రక్కిస్సాన్లె", ఇజి. 78 మా దేవుణు నండో కనికారం మనికాన్. వాండ్రు దేవుణు మంజిని బాడ్డిదాన్ పొద్దు సాని లెకెండ రక్కిస్సి వన్నిజ్ తపిస్సాన్లె. 79 ఎందానిజ్ ఇహిజ, సీకటిదు మని వరిజ్ సాపు బత్తుదు మని వరిజ్ జాయ్ సిదెజ్. మజి సమాదనం దాన్ నడిఃపిస్తెజ్. దిని వందిజె వాండ్రు రక్కిస్సి వన్నిజ్ తపిస్సాన్లె", ఇజి జెకరియ వెప్తాన్. 80 కొడెః పిరితాన్. దేవుణు ఆత్మ సత్తు దాన్ పిరితాన్. వాండ్రు ఇస్తాయేలు లోకురిజ్ తోర్ని దాక యెరూసలేమేదిజ్ వెల్లి బీడిఃమ్ బూమిదు ఒరెండ్రె బత్తితాన్.

2

1 అయ కాలమ్దు రోమ గవర్నమెంటు అడిఃగి మన్నివిజి లోకురిజ్ జుమబంది లెకెజ్ రాస్టెజ్ ఇజి కయిసరు అయుగుస్తూ ఉండ్రె ఆడ్రె సితాన్. 2 కురెనియ ఇని ఒరెన్ సిరియ రాస్ట్రందిజ్ సుడేఃజి

మహివలె యా మొదోహి జమబంది లెకెక్ రాస్తార. ³ విజేరె వరి వరి పట్టుమ్కాక్ పేర్కు రాసె ఆదెక్ సొహార్. ⁴ అయలెకెండ్ యోసేపు ఇనికాన్ ఒరెన్బా సొహాన్. వీండ్రు దావీదు కుటుమ్దికాన్. దావీదు పట్టుం బేత్లెహేము. అందెజె వాండ్రు గలిలయ ఇని ప్రాంతమ్ది నజరేతు ఇని పట్టుం దాన్, యూదయ ప్రాంతమ్దు మని బేత్లెహేము ఇని పట్టుమ్దు సొహాన్. ⁵ వన్నుక్ వెన్బాతి మహి మరియు వెట జమబంది రాసె ఆదెక్ సొహాన్. అయావలె దన్నుక్ నెలెక్ నిండ్రితె మహె. ⁶ వారు అబె మహివలె దనిక్ సొబిక్ వాతె. ⁷ అది దని తోల్సురె కొడొడిక్ ఏరుకాబాతాద్. వరిక్ మండ్రెక్ లార్జె ఇలు దొహెకెతాద్. దొహ్పిఇతిక్ పుట్టి కొడొడిక్ కసెలిజాణిక్ సుటిస్తారె, కొడ్డిజ సాలాది డోణిద్ త్రెప్తారె.

గొరెక్ గవుడుజ దేవుణు దూత నెగ్గకల్లు వెహ్సినాన్

⁸ నస్సివలె, అయ ప్రాంతమ్దు సెగొండార్ గొరెక్ గవ్డుజ్ వరి గొరెజ, మడిజ మంద కితారె రెయ్తు కాపుకిజ మహార్. ⁹ అయావలె ఒరెన్ దేవుణు దూత వరిక్ తోరె ఆతాన్. ప్రబు జాయ్ వరి సుటులం వాతాద్. వారు నండ్రితెయెల్ ఆతార. ¹⁰ అయావలె దూత వరిక్, “మీరు తియెల్ ఆమాట్. లోకురిక్ విజేరిక్ నండ్రి సరద్ కిబిన్సి నెగ్గి కల్లు నాను వెహ్సా. ¹¹ నేండ్రు దావీదు పట్టుమ్దు మిజి రక్కిస్సికాన్ ఒరెన్ పుట్ట మనాన్. వాండ్రు ప్రబు ఆతి క్రీస్తు. ¹² యాకది నాను మిజి వెహ్సెదనిక్ గుర్తు “ఒరెన్ బయిదిక్ కసెలిజాణిక్ సుటిస్తారె, సాలాది డోణిద్ త్రెప్తి మనిక సూణిదెర్”, ఇజి వెహ్సాన్. ¹³⁻¹⁴ వెటనె, దేవుణు మంజిని బాడిది నండ్రి దూతెక్ అయ దూతవెట కూడితె. కూడితారె, “విజు దన్నుక్ అతికారం మన్ని దేవుణుదిక్ పొగడిజినాట్. యా లోకమ్దు వాండ్రు ఇన్టం కిని లోకురిక్ నమాదనం మనిద్” ఇజి దేవుణుదిక్ పొగడిజి మహార్. ¹⁵ దూతెక్ వరిక్ డిస్తారె, దేవుణు మంజిని బాడిదు సొహార్. సాహి వెనుక గొరెక్ గవ్డుజ్, “మాటు బేత్లెహేముదు సొన్సి, ప్రబు మజి వెహ్సెప్పి యా జర్గితి సజతిజ సూణాట్”, ఇజి ఒరెన్దిక్ ఒరెన్ వర్తారె.

¹⁶ వారు బేగి సొహారె, మరియుమ్మెక్, యోసేపుక్, డోణిదు త్రెప్తి మని కొడొడిక్ సుడ్డెతారె. ¹⁷ వారు వన్నుక్ సుడ్డెతారె, యా కొడొడి వందిక్ వరిక్ వెహ్సె మాటెక్ విజేరిక్ వెహ్సారె. ¹⁸ గొరెక్ గవుడుజ్ వెహ్సెకెక్ వెహికార్ విజేరె నండ్రి బమ్మ ఆతార. ¹⁹ గాని మరియు జర్గితి సజతిజ విజు గర్బమ్దు ఇడ్డి దన్నువందిక్ ఎత్తుకిజి మహాద్. ²⁰ గవుడుజ్ వరిక్ వెహ్సెకెక్, వారు సుడ్డెతికెక్ విజు వన్నా. వందిక్ దేవుణుదిక్ గవ్డెం సీజి వన్నుక్ నండ్రి పొగడిజి మహ్తా సొహార్. దేవుణు దూత వరిక్ వెహ్సె వజనె విజు జర్గితె.

²¹ పుట్టి ఎనిమిది రోస్కు ఆతిక్, బయిక్ సునతి కితారె. అయావలె వారు వన్నుక్ యేసు ఇజి పేరు ఇట్టారె. పాత డిసెండ్ ముజాలె దేవుణు దూత వెహ్సె పేరునె ఇట్టారె. ²² దేవుణు మోసెక్ సీతి రూలుక్దు మన్నివజ సుబ్రమ్వందిక్ పూజెక్ కిదెక్ దినం ఆతాద్. అయావలె యోసేపుని మరియు బయిక్ దేవుణుదిక్ ఒవజెహ్సెక్, యెరూసలేమ్దు ఒత్తారె. ²³ ఎందానిక్ ఇహిజ, మోసె రాస్టెక్ ప్రబు వెహ్సె రూలుదు మనాద్, “విజు తొలిత పుట్టి కొడొడిక్ దేవుణు వందిక్ కెట ఇడ్డెదెక్”. ²⁴ మరి, మోసె రాస్టెక్ ప్రబు వెహ్సె రూలుదు మని వజ, “జత గువండ్రెన్ రుండి పార పొటి పిలెకుజ్నో పూజ సీదెక్!”, ఇజి. అయావజ ఒత్తారె. ²⁵ అయావలె, సుమెయోను ఇనికాన్ ఒరెన్ యెరూసలేమ్దు మహాన్. వీండ్రు సీతి నిజయ్తి మనికాన్. దేవుణుదిక్ తియెల్ అతికాన్. ఇస్రాయేలు లోకాక్ రక్కిస్సి వన్ని వందిక్ ఎద్దు సుడ్డెజి మహాన్. దేవుణు ఆత్మ వన్ని వెట మహాన్. ²⁶ ప్రబు ఏరపాటు కితి పొక్కి క్రీస్తుక్ తొవండ్, నీను సాఇలె”, ఇజి దేవుణు ఆత్మ వన్నుక్ వెహ్సె మహాన్. ²⁷ దేవుణు వన్నుక్ నడిపిస్తవజ వీండ్రు దేవుణు గుడిదు సొహాన్. నస్సివలె, దేవుణు మోసెక్ సీతి రూలుదు మని లెకెండ్ కిదెక్ అయ్సె అహిసెర్ కొడొడి ఆతి యేసుక్ తత్తారె. ²⁸ అయావలె సుమెయోను కొడొడిక్ కికాణిక్ పెహ్తండ్రె దేవుణుదిక్ పొగడిజి ఈహు వెహ్సాన్. ²⁹ “ప్రబువా, నీను వెహ్సె మాటెక్ వజ నాను వన్నుక్ సుడ్డెత. అందెజె నీ పణి మణిని ఆతి నజి ఏలు సమాదనం దాన్ కూక్కి ఒఅ. ³⁰⁻³¹ ఎందానిక్ ఇహిజ, లోకురె విజేరె సుడ్డెదెక్ నీను తయారె కితి రక్కిస్సివన్నుక్నా కణకాణిక్ నాను సుడ్డెత మన్ను. ³² వాండ్రు ఇస్రాయేలు ఆఇ వరిక్ దేవుణు సరిదు నడ్డెప్పిక్ జాయ్లెకెండ్ ఆనాన్లె. నీ ఇస్రాయేలు లోకాక్ గొప్ప గవ్డెం వాండ్రు కల్గిస్సాలె.

* 2:23 2:23 నిర్గమ 13:2,12. † 2:24 2:24 లెవి 12:8.

33 అయావలె వాండ్రు కొడోఁ వందిజ్ వెహ్తా మాటెజ్ వెహారె అయ్సె అపొసిర్ నండో బమ్మ అతార్. 34-35 సుమెయోను వరిజ్ దీవిస్తాండ్రె, వన్ని అయ్సె అతి మరియెజ్, “ఇస్తాయేలు లోకుర్ నండొండార్ నాననం ఆనివందిజ్, నండొండార్ బత్కిని వందిజ్ దేవుణు వినిజె ఏర్పాటు కితాన్. వీండ్రు దేవుణు ఏర్పాటు కితి ఉండ్రీ గుర్తు. లోకుర్ అయాక నెక్కు పొక్కార్. ఆహె, వారు మన్నుదు విని వందిజ్ ఒడోబితికెజ్ వెల్లి ఆనె. అయాక నీను సూణివెలె కూడం గుత్తి సొహి లెకెండో నీ మన్నుదు దుకం వానాద్లె”, ఇజ వెహ్తాన్. 36-37 నస్తవలె పసుయెలు గాడ్చి అతి అన్న ఇని ఉండ్రీ ప్రవక్త మహాద్. అది ఆసిరు ఇని జాతిదు మనికాద్. అది పెండ్రీ ఆజి ఏడు పంటెజ్ మాసి వెట బత్కితాద్. ఎనబయ్నాల్లి పంటెజ్ దాక ముండ మొప్ప మహాద్. అది నండో డొక్క అతాద్. దేవుణు గుడిఁ దాన్ ఎనెజ్ బా డిసేవండ, రెయు పొగాల్ ఉపాసాదాన్ పార్లనమ్ దాన్ దేవుణుదిజ్ పొగిడిఁజి మాడిసి మహాద్. 38 ఆ గడిఁయదునె, అది దేవుణు గుడిఁదు యోసేపు, మరియ, యేసుబాస్ సొహాదె దేవుణుదిజ్ పొగిడిఁతాద్. యెరూసలేమ్ ది లోకుర్ రోమ అతికారిజ అడిఁగి మహార్. వారు వరిజ్ డిఁబిన్నీ ఒరెన్ వన్నిజ్ ఎర్దు సుడోఁజి మహార్. ఆహె ఎర్దు సుడోఁజి మహి వరివెట కొడోఁవందిజ్ వెహ్తాద్. 39 యోసేపుని మరియ మోసె రాస్తెజ్ ప్రణు వెహ్తా రూలుజ్ దు కిదెజ్ వెహ్తా మనికెజ్ విజు కితార్. కితి వెనుక, మహారె గలిలయదు మని నజరేతు ఇని వరి పట్టుమ్ దు సొహార్. 40 కొడోఁ సత్తు దాన్ పిరితాన్. వన్నిజ్ నండో బుద్ది మనాద్. దేవుణు వన్నిజ్ దీవిసినె మహాన్.

యేసు పెద్దలిజవెట వర్గిజనాన్.

41 ఏంటు ఏంటు యేసు అయ్సె అపొసిర్ యెరూసలేమ్ దు పస్కు, పండోయ్ దిజ్ సొన్ని మహార్. 42 వారు ఏంటు సొన్ని మహి అలవాటువజ, యేసుజ్ పన్నెండు పంటెజ్ మహివలె పండోయ్ దిజ్ సొహార్. 43 పండోయ్ వీజితిజ్, వారు మర్జి వాజి మహార్. గాని కొడోఁ అతి యేసు యెరూసలేమ్ దు నిహాన్. వన్ని అయ్సె అపొసిర్ అయాక నెసేవతార్. 44 వీండ్రు మంద లోఇ మనాన్ ఇజ ఒడోబిజి, ఉండ్రీ రోజు వారు నడిఁజి వాతార్. వెనుక వారు వరి కూలెజబాన్ నెల్ల ఆతి వరిబాన్ వన్నిజ్ రెబాజనార్. 45 వాండ్రు తోరెఇతిజ్, వన్నిజ్ రెబాజి యెరూసలేమ్ దు మర్జి వాతార్. 46 మూండ్రీ దినమ్ కు వెనుక, వాండ్రు, దేవుణు గుడిఁదు బోద కినివరి నడిఁమి బస్తిక సుడోఁతార్. వాండ్రు వరి మాటెజ్ వెంజి, వరిజ్ మరి వెసబాజి మహాన్. 47 వన్ని మాటెజ్ వెహికార్ విజెరె, వాండ్రు మహి వెహ్తా మాటెజ్ వందిజ్, వన్ని బుద్ది వందిజ్ నండో బమ్మ అతార్. 48 వన్ని అయ్సె అపొసిర్ వన్నిజ్ సుడోఁతిజ్ నండో బమ్మ అతార్. వన్ని అయ్సె ఈహు వెహ్తాద్ “నా మరిన్, నీను ఎందనిజ్ మజి ఈహు కితి? ఇదిలో నీ బుబ్బని నాను నండో బాద ఆజి నిజి రెబాజి వాతాన్”, ఇజ వెహ్తాద్.

49 దనిజ్ వాండ్రు, “మీరు నజి ఎందనిజ్ రెబాతిదెర్. నాను నా బుబ్బు పణిదు మండ్రెజ్ వలె ఇజి మీరు నెసేఇదరా?”, ఇజ వెహ్తాన్. 50 గాని వాండ్రు వరిజ్ వెహ్తా మాటెజ్ వారు అర్దం కివెతార్. 51 వెనుక వాండ్రు వరివెట సోతాండ్రె నజరేతు వాతాన్. అబ్బె వరిజ్ లోజేజి మహాన్. వన్ని అయ్సె యా జర్గిజని విజు సజతిజ్ దని మన్నుదు ఇడ్డి మహాద్. 52 యేసు బుద్దిదు, వయుసుదు పిరితాన్. దేవుణు, లోకుర్ మరి మరి వన్నిజ్ ప్రేమిసి మహార్. వన్ని మున్ను సర్ద ఆజి మహార్.

3

1 పొంతి పిలాతు ఇనికాన్ యూదయ రాస్త్తం ఏలుబడిఁ కిజి మహాన్. హేరోదు గలిలయ రాస్త్తం వందిజ్ అతికారి. హేరోదుజ్ తంబెర్సె అతి పిలుపు ఇతూరియని త్రకోసీతి రాస్త్తం మ్కాజ్ అతికారి. అబిలేనే రాస్త్తం మ్కాజ్ లుసానియ అతికారి. అయావలె తిబెరియ కయిసరు ఇనికానె విరిజ్ విజెరె మున్ను రాజు. వాండ్రు పదిహేను పంటెజాణిజ్ విరిజ్ ఏలుబడిఁ కిజినె వాజినాన్. 2 అయావలె, అన్నని కయప పుజెరిజి మున్ను పెరి పుజెరి. అయావలె బీడిమ్ బూమిదు, జెకరియ మరిసి అతి యోహాను వెట దేవుణు వర్గితాన్. 3 అందెజె వాండ్రు, “మీరు పాపమ్ కు డిఁసి బాప్తినం లాగి ఆదు. దేవుణు మీ పాపమ్ కు సెమిస్తాన్”, ఇజ యొర్దాను గడ్డ పడఁకాదు మన్ని ప్రాంతం విజు సొన్నిబోదిసి మహాన్. 4 యెసయ ప్రవక్త రాస్తెవెలె విన్నివందిజ్ ఈహు వెహ్తాన్. “బీడిమ్ బూమిదు ఒరెన్ ఈహు డేల్లి

† 2:41 2:41 పులాజ్ సిల్లి రొట్టెతయార్ కిజి తిని పండోయ్ నె పస్కు పండోయ్

వెప్పానా. “ప్రబుజ్ లోకుడగు వాడెజ్ సరినెగెణ్ కిఅ. వన్నిజ్ నడిదెజ్ సరితినాజ్ కిదు. ⁵ విజు గాతెజ్ నిండ్రినఅ. విజు గొరొకని మెటెజ్ బయలు కిఅ. వెకొ సరిజ్ తినానికెజ్ కిఅ. కరుకు సరిజ్ నున్నజ్తికెజ్ కిఅ. ⁶ అయావలె విజెరె, దేవుణు వరిజ్రక్కిన్ని దన్నివందిజ్ నూణార్లె*”, ఇజి. ఆహె రాస్తిమహి లెకెండ్ యోహాను బోదిస్తాన్. ⁷ యోహాను వన్నిడగు బాప్తిసం లాగెఅదెజ్ వాజిని మంద లోకురిజ్ ఈహు వెప్తాన్ “మీరు వినం మన్నిసరాన్ లెకెండ్ మన్నికిదెర్, దేవుణుబాణిజ్ కోపం వాజినాద్ ఇజి నమ్మిజు మీరు వాతిదెరా? సిల్లెద్. వన్ని కొపమ్దాన్ తప్తెఅదెజ్ ఇజి మీరువాతిదెరా? నిజమే అయలెకెండ్ ఇజి నాను ఒడిబిదెజ్ సిల్లెద్. ⁸ మీ పాపముకు ఒప్పుకొడొజి డిసి సీజి దన్నిజ్ తగితి పణిజ్ కిజి తోరెస్తు. “మాపు అబ్రాహము తెగ్గాతికావ్”, ఇజి మీరు మీ మన్నుదు వర్తిమాట్. ఎందానిజ్ ఇహిజ, యా పణుకుబాణిజ్ అబహమ్ముజ్ కొడొజెరిజ్ తయార్ కిదెజ్ దేవుణు అట్వాన్”, ఇజి నాను మిజి వెప్పిన. ⁹ దేవుణు మరెక మొదొలకత్తి విసిరెదెజ్ కియుదు గొడెలి అస్తి వన్నిజ్ పొలిత మనాన్. నెగ్గి పట్టు అన్ఇ మరెకాజ్ విజు కత్తి సినుద్ విసిరెనాన్”, ఇజి వెప్తాన్.

¹⁰ అయావలె లోకుర్ విజెరె, “అహిజ మాపు ఇనిక కిదెజ్?”, ఇజి వెన్బాతార్. ¹¹ యోహాను వెప్తాన్, “రుండి సొకెజ్ మన్నికాన్ ఉండ్రి సిలివన్నిజ్ సిదెజ్. అయలెకెండ్ టిండి మన్నికాన్ సిల్లివన్నిజ్ సిదెజ్”, ఇజి. ¹² పన్ను వెర్నికార్బా బాప్తిసం లాగె అదెజ్ వాతార్. వారు, “ఓ బొదకినికి, మాపు ఇనిక కిదెజ్?”, ఇజి వెన్బాతార్. ¹³ దనిజ్ వాండ్రు, “మిజి ఎసా లొస్తెజ్ ఆడ్ర సిత మనాదొ, నసా లొస్తు. నండ్ లొస్తాట్”, ఇజి వెప్తాన్. ¹⁴ నస్తవలె నెగ్గెండ్ అ ఉడ్డుం కినికార్, “మాపు ఇనిక కిదెజ్?”, ఇజి వెన్బాతార్. అందెజి వాండ్రు, “బెద్రిసి ఎయెబాన్ డబ్బు డిలిస్తాట్. అనయం వెప్పి డబ్బు లొస్తాట్. మీ జితం దానె సర్దు ఆదు”, ఇజి వెప్తాన్.

¹⁵ వీండ్రు క్రీస్తును ఇజి యోహాను వందిజ్ లోకుర్ విజెరె వరి మన్నుదు ఒడొబితార్. వారు ఆన దాన్ క్రీస్తుజ్ ఎర్దు నుడొజి మహార్. ¹⁶ అయావలె యోహాను వరిజ్ విజెరిజ్ వెప్తాన్, “నాను మిజి ఏరుదాన్ బాప్తిసం సీజిన. నజి మిస్తి నండ్ పెరికాన్ మరి ఒరెన్ వాజినాన్. వన్ని జొడ్డు బేల్లు కుతెజ్ నాను ఏపటికాన్ ఆఎ. వాండ్రు మిజి దేవుణు ఆత్మదాన్ సినుదాన్ బాప్తిసం సీనాన్లె. ¹⁷ వాండ్రు గాలి ఇడ్ని సేహి కిదు అస్త మనాద్. వాండ్రు వన్నికలమందిజ్ నుబ్బరం కిజి, గింజెజ్ కొటు కిజి గాలి ఇడొజినాన్. గింజెజ్ గాదిద్ ఇడ్వాన్. పొటుదిజ్ నమ్మె ఇ సినుదు సురెనాన్. ¹⁸ యా మాటెజ్ అవిండ, మరి నండ్ సజతిజ్ వెప్పి లోకురిజ్ పణిసి వెప్తాన్. నువార్ బొదిసి వెప్తాన్. ¹⁹ వాండ్రు హేరోదు ఇని అతికారిజ్ వెప్తాన్, వన్ని కొడొసి హేరోదియవెట హేరోదు పాపం కిత్తాన్ ఇజి. మరి, హేరోదు కితి విజు తప్పుజబా వెప్తాన్. ²⁰ అందెజి వాండ్రు యోహానుజ్ జెలిదు ఇట్టాన్. ఆహె హేరోదు కిత్తి విజు తప్పుజవెట యోహానుజ్ జెలిదు ఇడ్రిసి తవుబా కూడితాద్.

యేసు బాప్తిసం లాగెఅజినాన్

²¹ యోహానుజ్ జెలిదు ఇడ్డి ముజాల, ఉండ్రి రోజు లోకుర్ విజెరె బాప్తిసం లాగె ఆతార్. అయావలె యేసు బా బాప్తిసం లాగె ఆతాన్. ²² వాండ్రు పార్దనం కిజి మహివలె, ఆగానం రెయె ఆతాదె దేవుణు ఆత్మ ఉండ్రి పొర పొటిజ్ మూర్తి లెకెండ్ డిగెజి వన్ని మున్ను వాతాద్. అయావలె, “నినె నాను ప్రేమిన్ని నా మరిన్. నీ వందిజ్ నాను నండ్ సరెద ఆజిన”, ఇజి పరలొమ్దాన్ ఉండ్రి జాటు వాతాద్.

²³ యేసు వన్ని సేవపణి మొదొల్లివెలె వన్నిజ్ డగ్రుదిజ్ ముప్పుయె వంటెజ్ వయెను మహాన్. వీండ్రు యోసేపు మరీనె ఇజి ఒడిబిజి మహార్. యోసేపు హెలి మరిసి ²⁴ హెలి మత్తతు మరిసి మత్తతు లేవి మరిసి లేవి మెల్కి మరిసి మెల్కి యన్న మరిసి యన్న యోసేపు మరిసి ²⁵ యోసేపు మత్తతియ మరిసి మత్తతియ ఆమోసు మరిసి ఆమోసు నాహోము మరిసి నాహోము ఎస్తికి మరిసి ఎస్తికి నగ్గయ మరిసి ²⁶ నగ్గయ మయతు మరిసి మయతు మత్తతియ మరిసి మత్తతియ సిమియ మరిసి సిమియ యేసెక మరిసి యేసెక యోదా మరిసి ²⁷ యోదా యోహాన మ్మరిసి యోహాన రేపా మరిసి రేపా జెరుబాబెలు మరిసి జెరుబాబెలు నయిల్లియెలు మరిసి నయిల్లియెలు నేరి మరిసి ²⁸ నేరి మెల్కి మరిసి మెల్కి అది మరిసి అది కోసాము మరిసి కోసాము ఎల్కదాము మరిసి ఎల్కదాము ఏరు మరిసి ²⁹ ఏరు యోహానవ మరిసి యోహానవ ఎలియెజెరు మరిసి ఎలియెజెరు

* 3:6 3:6 యెనయ 40:3-5.

యోరియ మరిసి యోరియ మత్తతు మరిసి మత్తతు లేవి మరిసి 30 లేవి సిమొను మరిసి సిమొను యూద మరిసి యూద యోసేపు మరిసి యోసేపు యోనాము మరిసి యోనాము ఎల్యాకిము మరిసి 31 ఎల్యాకిము మెలెయా మరిసి మెలెయా మేన్నా మరిసి మేన్నా మత్తత మరిసి మత్తత నాతాను మరిసి నాతాను డావీదు మరిసి 32 డావీదు, యెసయ మరిసి. యెసయ ఓబెదు మరిసి ఓబెదు బోయసు మరిసి బోయసు సల్మాను మరిసి సల్మాను నయస్సోసు మరిసి 33 నయస్సోసు అమ్మినాదబు మరిసి అమ్మినదాబు అరాము మరిసి అరాము ఎస్రోము మరిసి ఎస్రోము పెరెసు మరిసి పెరెసు యూదా మరిసి 34 యూదా యాకోబు మరిసి యాకోబు ఇసాకు మరిసి ఇసాకు అబ్రాహాము మరిసి అబ్రాహాము తేరహు మరిసి తేరహు నాహోరు మరిసి 35 నాహోరు సేరుగు మరిసి సేరుగు రయూకు మరిసి రయూకు ఫెలిగు మరిసి ఫెలిగు హెబెరు మరిసి హెబెరు సేలహు మరిసి 36 సేలహు కెయినాను మరిసి కెయినాను అర్దుక్కుదు మరిసి అర్దుక్కుదు సేము మరిసి సేము నోవహు మరిసి నోవపు లెమెకు మరిసి 37 లెమెకు మెతుసెలె మరిసి మెతుసెలె హానోకు మరిసి హానోకు యెరుదు మరిసి యెరుదు మహాలెలు మరిసి మహాలెలు కెయినాను మరిసి 38 కెయినాను ఎసోసు మరిసి ఎసోసు సేతు మరిసి సేతు ఆదాము మరిసి ఆదాము దేవుణు మరిసి.

4

యేసుజ్ పరిస కిజినాన్

1 యేసు దేవుణు ఆత్మదాన్ పూర్తి నిండితాండ్రె, యోర్దాన్ గడ్డదాన్ మర్జి వాతాన్. 2 నలపయ్ రోస్సు దేవుణు ఆత్మ వన్నిజ్ బీడిఃమ్ బూమిదు నడిఃపిస్తాన్. అబె, సయతాను వన్నిజ్ పరీస కిదెజ్ సుడఃతాన్. వాండ్రు అయా రోస్కాజ్ ఇనికబా ఉణెఎండ మహాన్, కడఃవెరిదు వన్నిజ్ బజ కట్టాద్. 3 అయావలె నయ్దాన్, “నీను దేవుణు మరిసి ఇహిజ, యా పణుకు టిండి ఆని లెకండ వెహాఅ”, ఇజి వెహ్తాన్. 4 అందెజె యేసు, “లోకు బత్తిజినిక టిండిదానె ఆవిద్*”, ఇజి దేవుణు మాటదు రాస్త మనాద్”, ఇహాన్. 5-6 అయావలె సయతాన్ వన్నిజ్ ఎత్తు మని బాన్ ఒతండ్రె, లోకమ్దు మని విజు దేసెమ్కు జామె తోరిస్తాన్. “యా లోకమ్ది అతికారం సంసారం, విజు నాను నిజి సీన. ఎందనిజ్ ఇహిజ అయాకెజ్ విజు నజి నె దేవుణు ఒపజెప్త మనాన్. నజి ఇన్దం ఆతి ఎయెరిజ్బా సీదెజ్ నజి అక్కు మనాద్. 7 అందెజె నీను నజి పొగిడిఃజి మాడిఃస్తిజ, యాకెజ్ విజు నీవి ఆన”, ఇహాన్. 8 నస్తివలె యేసు, “నీను నీ దేవుణు ఆతి ప్రబుజ్ నె పొగిడిఃజి మాడిఃసి, వన్నిజ్ సేవకిదెజ్ ఇజి దేవుణు మాటదు రాస్త మనాద్”, ఇజి మర్జి వెహ్తాన్.

9 వెన్కా వన్నిజ్ యెరూసలెమ్దు కూక్ ఒత్తాండ్రె, దేవుణుగుడిః కోసాదు నిల్వ్తాండ్రె, “నీను దేవుణు మరిసి ఇహిజ ఇబ్బెణిజ్ అడిఃగి డాల్అ. 10-11 ఎందానిజ్ ఇహిజ, “నిజి నెగ్రెండ కాపాడఃదెజ్ నీ వందెజ్ వన్ని దూతారిజ్ దేవుణు ఆడ్ర సీనాన్. నీ పాదం పణుకుదు తగ్గిఎండ వారు నిజి వరి కికాణిజ్ పెర్న అస్సార్†, ఇజి దేవుణు మాటదు రాస్త మనాద్”, ఇజి వన్నిజ్ వెహ్తాన్ 12 అందెజె యేసు, “నీ దేవుణు ఆతి ప్రబుజ్, పరిస కిదెజ్ ఆవిద్‡”, ఇజి దేవుణు మాటదు రాస్త మనాద్”, ఇజి మర్జి వెహ్తాన్. 13 సయతాన్ విజు పరిసెజ్ వీస్తాండ్రె నెగం కాలం వన్నిజ్ డిఃస్తసాహ మహాన్.

యేసు గలీలయదు వన్ని సేవపణి మొదొల్సినాన్

14 యేసు దేవుణు ఆత్మ నత్తుదాన్ గలీలయ ప్రాంతమ్దు మర్జి సాహాన్. అయా ప్రాంతం విజు వన్ని వందెజ్ మాటెజ్ సెద్రితె. 15 వాండ్రు యూదురి మీటిజ్ ఇల్కాజ్ నేరపిస్తాన్. విజెరె వన్నిజ్ పొగిడిఃతార్.

యేసుజ్ నజరేతుదాన్ పేర్జినార్

16 వెనుక, వాండ్రు పిరితి వన్ని పట్టమ్దు సాహాన్. అయాక నజరెతు. వన్ని అలవాటు వజ విస్తాంతి దినమ్దు యూదురి మీటిజ్ ఇండ్రో సాహాండ్రె దేవుణు మాట నద్విదెజ్ ఇజి నిహాన్. 17 మీటిజ్ ఇండ్రోణి పణిమణిసి వన్నిజ్ యెసయ ప్రవక్త రాస్తి పున్తకం సితాన్. వాండ్రు అయాక రెక్కిజ్ ఈహు రాస్తి మనికెజ్ వన్నిజ్ దొహ్కాద్.

* 4:4 4:4 ద్వీతి 8:3. † 4:8 4:8 ద్వీతి 6:13. ‡ 4:10-11 4:10-11 కీర్తన 91:11-12. § 4:12 4:12 ద్వీతి 6:16.

18-19 “ప్రబు పోక్తి దేవుణు ఆత్మ నావెట మనాన్. అందెజి వాండ్రు బీద ఆతి వరిజ్ నువార్ల వెహైజ్ నజీ ఏరపాటు కితాన్. తోహా ఆతి వరిజ్, “మిజీ విడుదల వాతాద్”, ఇజి వెహైజ్, గుడ్డి వరిజ్, “మీ కలుకుజ్ తోరెనె”, ఇజి వెహైజ్, నల్లితి వరిజ్ డిసెప్పిన్జి, దేవుణు వన్ని లోకురిజ్ రక్సిన్సికాలం వాతాద్ ఇజి వెహైజ్ వాండ్రు నజీ పోక్త మనాన్*”, ఇజి రాస్తి మనికెజ్ వన్నిజ్ దొహ్లాద్. 20 యాకెజ్ సద్విజి, పుస్తకం మూక్తాండ్రె పణిమణిసిజ్ మహ్తా సితండ్రె బస్తాన్. మీటిజ్ ఇండ్రొ మహికార్ విజెరె వన్నిజ్ డిట బేస్తార్. 21 వాండ్రు వరిజ్, “ఏలు నాను సద్వితి దేవుణు మాటెజ్ మీరు వెహివెలెనె అయాక పూర్తి ఆతె”, ఇజి వెహైజ్. 22 వారు విజెరె వన్ని వందిజ్ నెగ్గికెజ్ వెహైజ్. వన్ని వెయదాన్ వాతి నెగ్గి మాటెజి బమ్మ ఆజి, “ఏండ్రు యోసేపు మరిసి గదె?”, ఇజి వెహైజ్.

23 యేసు వరిజ్ వెహైజ్, “ఓ గురు, నిజీ నీనె నెగెణ్ కిబ్బె ఆల’, ఇని బుద్ధి మాట మీరు తవ్వెండ నజీ వెహైజెర్. మరి, మీరు నజీ, ‘నీను కపర్నహోము ఇని పట్టుమదు కిత్తి పణిజ్ మాపు వెహావ్. అయా పణిజ్ ఇబ్బె నీ సొంత పట్టుమదుబా కిత’, ఇజి వెహైజెర్. 24 ఎమేణి ప్రవక్తెజ్ బా సొంత పట్టుమదు లోకుర్ గవరం సిఎర్, ఇజి నిజం నాను మీ వెట వెహ్సిన. 25 వెండ్రు, ఏలియ దినమ్కాజ్, ఇస్తాయేలు దేసమ్దు మూండ్రీ పంటెజ్ ఆరు నెలెజ్ దాక పిరు రవెండ మహాద్. గొప్ప కరు వాతివలె, అబె నండొ రాండి బోదెక్ మహా ఇనిక నిజమనె. 26 గాని, దేవుణు ఏలియెజ్ వరి ఎయెర్బానెబా పోక్వితాన్. సీదోను ప్రాంతమది సారెపాతు ఇని నాటోణి రాండి బోదెలిబానె పోక్తాన్. 27 అయాలెకండ, ఏలీసా ప్రవక్త కాలమ్దు, ఇస్తాయేలు దేసమ్దు నండెండార్ పెరికస్తం దాన్ మహార్. గాని వారు ఎయెర్బా నెగెణ్ ఆవతార్. సిరియ దేసమ్దు మని నయమాన్ ఒండ్రె నెగెణ్ ఆతాన్”, ఇజి నాను మిజీ వెహ్సిన. ఇజి యేసు వెహైజ్.

28 యా మాటెజ్ వెహివలె, యూదురి మీటిజ్ ఇండ్రొ మహికార్ విజెరె వెరి కోపం ఆతార్ 29 వారు నిహారె, పట్టుమదాన్ వన్నిజ్ పేర్తార్. వారు వన్నిజ్ మెటుదు ఒతార్. వరి పట్టుం అయా మెటుద్నె తయార్ కిత మనాద్. గడియ బుర్త కిజి వన్నిజ్ అర్పైజె ఇజి ఒతార్. 30 గాని మంది నడిమిజానె, వన్నిసరి వాండ్రు సోహాన్.

యేసు దెయమ్దిజ్ పేర్జినాన్

31 వెహ్సా వాండ్రు గలిలియతి కపెర్నహుము ఇని పట్టుమదు వాతాన్. ఏస్తాంతి దినమ్దు యూదురి మీటిజ్ ఇండ్రొ బస్తాండ్రె లోకురిజ్ నేరెపిసి మహాన్. 32 వాండ్రు నెన్పిన్సి మాటెజ్ వెహారె, లోకుర్ నండొ బమ్మ ఆతార్. ఎందనిజ్ ఇహిజ, నండొ అతికారం దాన్ వాండ్రు వెహైజ్. 33-34 యూదురి మీటిజ్ ఇండ్రొ, ఒరెన్ దెయం అస్తికాన్ మహాన్. వాండ్రు, “నజరెతు వాండ్రు ఆతి యేసువా, మా వెట నిజీ ఇని పణి? మజి నాసనం కిడెజ్ వాతిదా? నీను ఎయిదొ ఇజి నాను నెన్ను. నీను దేవుణు బాణిజ్ వాతి నెగ్గి వాండ్రు”, ఇజి డటం గగోల్ ఆజి వెహైజ్. 35 అందెజి యేసు, “అలెజి మనెల. వినిజ్ డిసెప్పి రల”, ఇజి డటం అయా దెయమ్దిజ్ వెహైజ్. నస్తివలె అయా దెయం, అది అస్తి వన్నిజ్, వరి విజెరె నడిమి అర్ప్తాదె వన్నిజ్ ఇని నస్తం కిఎండ డిస్త సోహాద్. 36 అయావలె లోకుర్ విజెరె నండొ బమ్మ ఆతార్. “అబ్బ, యాక ఎసోహి మాట. మీండ్రు దేవుణు సత్తుదాన్, అతికారమ్దాన్ సోనెల ఇజి దెయమ్కాజ్ వెహ్సినాన్. అవి డిసెప్పి సోసినె”, ఇజి ఒరెన్దిజ్ ఒరెన్ వర్గితార్. 37 వన్ని వందిజ్ మాటెజ్ అయా ప్రాంతమదు విజు సెద్రితె.

యేసు నండెండార్జె నెగెండొ కిజినాన్

38 యేసు యూదురి మీటిజ్ ఇండ్రొణాజ్ నిజితండ్రె, సిమెను వన్ని ఇండ్రొ సోహాన్. అయావలె వన్ని మీమ్సి నండొ నోబు దాన్ మహాద్. దనిజ్ నెగెణ్ కిత ఇజి వారు బతిమాల్తార్. 39 అందెజి వాండ్రు దని డగ్రు సోహాండ్రె, “నోబు సోనెల”, ఇజి డటం వెహైజ్. డటం వెహైజ్ నోబు దనిజ్ డిస్త సోహాద్. వెటనె అది నిజితాదె, వరిజ్ మర్యాద కితాద్.

40 పొదు అర్పి మహాద్. అయావలె లోకుర్ నండొ రకమ్కాణిజ్ బాద ఆజి మహి వరిజ్ విజెరిజ్ వన్ని డగ్రు తతార్. కస్టమ్దాన్ మహి వరి విజెరె మున్ను. కిమ ఇడ్డి వరిజ్ నెగెణ్ కితాన్. 41 యాకదె అవిండ, నండొ దెయమ్కు, నీనె దేవుణు మరిసి, ఇజి గగోల్ ఆజి నండెండార్జె డిస్త సోహా. వాండ్రు

* 4:18-19 4:18-19 యెసయ 61:1-2.

అలెజి మండ్రు ఇజి వన్కాజ్ డటం వెహ్తాన్. వాండ్రు క్రీస్తు ఇజి దెయమ్కు నెస్త మహా. అందెజె వాండ్రు వన్కాజ్ వర్గింపండ కిత్తాన్.

42 పెందాల్నె వాండ్రు సోతాండ్రె బీడిఃమ్ బూమిదు సాహాన్. లోకుర్ వన్నిజ్ రెబాజి వాతార్. వన్నిజ్ సుడఃతిజ్ వాండ్రు వరిజ్ డిసి సోన్ఎండ, వన్నిజ్ ఆప్ కిదెజ్ సుడఃతార్. 43 గాని వాండ్రు, “నాను మహి పట్టమ్కాజ్ బా దేవుణు ఏలుబడిః కిని కాలం వందిజ్ సువార్త వెహ్తాజ్వలె. దిని వందిజ్ దేవుణు నజీ పోక్తాన్”, ఇజి వరిజ్ వెహ్తాన్. 44 వెన్కా వాండ్రు యూదయ దేసమ్దు మని యూదురి మీటిజ్ ఇల్కాజ్ బోదిసి మహాన్.

5

యేసు సిసూరిజ్ కూక్కినాన్

1 ఉండ్రె రోజు, యేసు గనెసరెతు సెరుడగ్రు నిహమహాన్. నండో లోకుర్ దేవుణు మాటెజ్ వెండ్రెజ్ నెకెఆజి వన్ని మున్ను అర్చి మహార్. 2 నస్తవలె జాలెరిజు సెరు దరీద్ డిఃస్తి మహి రుండి డోణిజ్ వాండ్రు సుడఃతాన్. అయా జాలెరిజు వరి వల్లెజ్ నోరిజి మహార్. 3 వాండ్రు దని లోఇ ఉండ్రె డోణిద్ ఎక్తాన్. ఆక సిమెనుతి. ఎక్తాండ్రె దరిదాన్ కండెక్ నెక్తు ఇజి వన్నిజ్ వెహ్తాన్. వాండ్రు డోణిద్ బస్తాండ్రె నండో లోకాజ్ నెస్తిసి మహాన్. 4 వాండ్రు వెహ్సి వీజితివలె, సిమోనుజ్, “ఏరు నిరీ మని బాన్ డోణి నడిఃపిన్అ. మెయెజ్ అస్తెజ్ మీ వల్లెజ్ విస్సీరు”, ఇహాన్. 5 అందెజె సిమెను, “ఓ బోదకినికి, రెయు విజు మాపు అరల ఆతాప్. గాని మజీ ఇనికబా దోహ్కుతె. అహిజ్బా నీను వెహ్సిని మాట వజి వల్లెజ్ పొక్తా”, ఇజి వన్నిజ్ వెహ్తాన్. 6 వారు అయాలెకెండ కిత్తార్. నండో మెయెజ్ అస్తార్. వరివల్లెజ్ కింజిని వజి ఆతె. 7 అయాలె వారు వేరె డోణిద్ మని, వరి జత్త కూడఃజి పణికిని వరిజ్, “వాజి మజీ తోడుః కిదు”, ఇజి కియు నయన్ కితార్. వారు వాతారె, రుండి డోణిజ్ మెయెజ్ నిహ్తార్. డోణిజ్ ముడుగ్గిలెకెండ ఆతె. 8 సీమోను ఇని పేతురు యాక సుడఃతాండ్రె, యేసు కాల్యు ఎర్తు ముణుకుజ్ ఊరితండ్రె, “ప్రబువా, నజీ డిఃసి సోన్అ, నాను పాపం కితికాన్”, ఇజి వెహ్తాన్. 9 ఎందానిజ్ ఇహాజు, వాండ్రుని వన్నివెట మనికార్ విజెరె వారు అస్తి యా మెయెజ్ కొట్టు సుడఃతారె నండో బమ్మ ఆతార్. 10 అయాలెకెండెన్, సీమోనువెట కూడఃజి పణి కిని యాకోబు ని యోహానుబా బమ్మ ఆతార్. వారు జెబదయి మరిసిర్. అందెజె యేసు, “తియెల్అమా. నిసా కాలం నీను మెయెజ్ అస్తి పణికితి. ఏలు లోకాజ్ నా సిసూరికిదెజ్ నెన్పిస్తాలె”, ఇజి సిమోనుజ్ వెహ్తాన్. 11 వారు వరి డోణిజ్ సెరు ఒడ్డుదు తత్తారె, విజు డిఃస్తార్. వన్నివెట సాహార్.

కుస్తురోగం ఆతివన్నిజ్ నెగెండ కిజినాన్

12 యేసు ఉండ్రె పట్టమ్దు మహివలె కస్తురోగం* ఇనిపెరి జబ్బు లాపుఆతి ఒరెన్ అబ్బె మహాన్. వాండ్రు యేసుజ్ సుడఃతివెలె ముణుకుజ్ ఊరిజి మాడిఃస్తాండ్రె, “ప్రబువా, నాను నెగెండ ఆదెజ్ ఇజి నిజీ మన్ను మహిజు నజీ నెగెణ్ కిదెజ్ అట్టి”, ఇజి బతిమాల్తాన్. 13 అందెజె యేసు వన్నిక్రియు సాప్పి వన్నిజ్ ముట్టి, “నజీ మన్ను మనాద్, నీను నెగెణ్ ఆఅ”, ఇజి వెహ్తాన్. వెటనె వన్నిజ్ మహి అయా కస్తురోగం వన్నిజ్ డిఃస్తాద్. 14 యేసు వన్నిజ్, “ఎయె వెటబా ఇనికబా వెహ్తా. గాని నీను తినాజ్ సాన్సి నీ ఒడోల్ పుజెరిజ్ తోరిన్అ. నీను నెగెణ్ ఆతి వందిజ్ మోసి ముజాలె ఆడ్రసితి వజి దేవుణుదిజ్ సంత సిఅ. ఆహె నీను నెగెణ్ ఆతి ఇజి లోకురిజ్ తోరిన్అ”, ఇజి కనితం వెహ్తా పోక్తాన్. 15 గాని వన్ని వందిజ్ మాటెజ్ మరి ఒదె, నాహ్కాజ్ విజు సెద్రితె. అందెజె నండో లోకుర్ వన్నిమాటెజ్ వెండ్రెజ్, వరి కస్తుమ్కాణిజ్ నెగెణ్ ఆదెజ్ ఇజి వన్నిడగ్రు కూడఃజి వాజి మహార్. 16 గాని వాండ్రు, నడిఃమి నడిఃమి పార్దనం కిదెజ్ ఇజి ఎయెర్ సిల్లి బాడిఃదు సాన్సి మనాన్.

కిక్కు కాల్యు అర్చివన్నిజ్ నెగెండ కిజినాన్.

* 5:12 5:12 కిక్కు పాదమ్కాజ్ డెస్కెజ్ తెవ్వి సాని పెరిజబ్బునె ముజాల కుస్తురోగం జబ్బు వాతిబాన్ ముట్టిజు వారు నెన్విర్ ముజాల కుస్తురోగం మన్సికార్ నాటో మండ్రెజ్ అక్కుసిల్లెద్ వారు పట్టుం వెల్లి మండ్రెజ్ వారు సుబ్బుం ఆఇకార్ మటిల ఆతికార్ ఇజినె ఒడిబిసాన్ అందెజె, వారుపుజేరిజు డగ్రు సాన్సి నెగెండ ఆతార్ ఇజి పుజేరిజు వెహ్తానె నాటో వాడిజ్ అనాద్. అయవలె వారు సుబ్బుం ఆతమనార్ ఇజినె నమకం

17 ఉండ్రీ నాండేజ్, యేసు ఉండ్రీ ఇండ్రోబసి బోదిసి మహాన్. గలీలయ, యూద దేసమ్దు మన్ని విజు నాహ్మణిజ్, యెరూసలెమేదాన్ వాతి పరిసయరుని యూదురి రూలు నెస్పిస్పికార్ అబ్బె బసి వెంజి మహార్. కష్టమ్దు మన్నివరిజ్ నెగెణ్ కిదెజ్ దేవుణునిత్తి నత్తు వన్నివెట మనాద్. 18 నస్తవలె, కిక్కు కాల్కు అర్తి పక్కువాయు ఇని జబ్బుది వన్నిజ్, సెగెండార్ ఉండ్రీ సాపాద్ పిండిత తత్తార్. లోఇబసి యేసు ఎద్దు ఇడెదెజ్ నండో అరల ఆజి మహార్. 19 అబ్బె మందలోకురి మహిజ్, వన్నిజ్ యేసు డగ్గు ఒతెజ్ అబ్బెతార్. అందెజె వారు వన్నిజ్ ఇల్లు ముస్సు ఒతార్. ఒతార్, రేకు బోరో కితారె సాపదాన్ మంద నడిమి యేసు ఎద్దు డిప్తార్. 20 యేసు వన్నిముస్సు మన్నివరి నమకం సుడఃతాండ్రె, “కూలాయెన్, నీ పాపమ్కు నాను సెమిస్త మన్ను”, ఇజి వన్నిజ్ వెహ్హన్. 21 అయావలె పరిసయరు ని యూదురి రూలుజ్ నెస్పిస్పికార్ పరి లోఇ ఈహు వర్గితార్. “పీండ్రు ఎయెన్? నాను నీ పాపమ్కు సెమిస్త మన్ను ఇజి వెహ్హి దేవుణు వెట సమాసం ఆజి దేవుణుదిజ్ దూసిస్సాన్. దేవుణు ఒరెండ్రె పాపమ్కు సెమిస్పికార్ గదె”, ఇజి.

22 వారు ఒడఃబితిక యేసుజ్ తెలితాద్. వాండ్రు వరిజ్, “ఎందనిజ్ మీరు అహు మీ మన్నుదు ఒడఃబిజినిదెర్? 23 యా జబ్బుది వన్నిజ్ నీ పాపమ్కు నాను సెమిస్త మన్ను ఇజి వెహ్హిక్కు సులునా? నీను నిజ్జి నడియ ఇజి వెహ్హిక్కు సులునా? 24 లోకు మరిసి ఆతి నజి లోకు పాపమ్కు సెమిస్తెజ్ బూమి ముస్సు అతికారం మనాద్ ఇజి మీరు నెస్తెజ్వలె ఇజి వెహ్హండ్రె, అయా కికు కాల్కు అర్తి పక్కువాయు వన్నిజ్, “నాను నిజి వెహ్హిన, నిజ్జి సాప అసి ఇండ్రో సోన్అ”, ఇజి వెహ్హన్. 25 వెటనె వాండ్రు విజెరె ముజాలె నిజితండ్రె, వాండ్రు గూర్తి మని సాప నిక్తాండ్రె దేవుణుదిజ్ పొగ్గడిజి ఇండ్రో సోహాన్. 26 వారు విజెరె నండో బమ్మ ఆతార్, దేవుణుదిజ్ పొగ్గడిజెతార్. వారు దేవుణుదిజ్ నండో తియెల్ ఆజి, “అబ్బ! మాటు నేండ్రు నండో బమ్మఆతి పణిజ్ సుడఃతాట్”, ఇజి వెహ్హర్.

లేవి ఇన్ని ఒరెన్ వన్నిజ్ కూక్కినాన్

27 యాక కిత్తి వెన్నా, యేసు సోతాండ్రె, లేవి ఇని ఒరెన్ వన్ను పెర్తివన్నిజ్ సుడఃతాన్. వాండ్రు పన్ను పెర్తి వరి అపిసుదు బస్త మహాన్. యేసు వన్నిజ్, “నీను నా సిసూడు ఆఅ. నా వెట రఅ”, ఇజి వెహ్హన్. 28 లేవి విజు డిస్తాండ్రె, నిజ్జి వన్ని వెట సోహాన్. 29 వెనుక లేవి యేసు వందిజ్ వన్ని ఇండ్రో ఉండ్రీ పెరి విందు కితాన్. వన్ను పెర్తికార్ని మరి నండోండార్ వరి వెట ఉండెజ్బస్తార్. 30 అయావలె పరిసయరు ని వరి జటుద్ మని యూదురి రూలుజ్ నెస్పిస్పికార్ యేసు సిసూరిజ్, “ఎందనిజ్ మీరు పన్నుపెర్తివరివెట, మరి సెజ వరివెట ఉణిజి తింజినిదెర్”, ఇజి మొరో ఆతార్.

31 అందెజె యేసు వరిజ్, “నెగెండ నిల్లి వరిజె డాక్టరు కావాలి. నెగెండ మన్నివరిజ్ ఎందనిజ్లు మరి డాక్టరు. 32 నాను పాపం కిజిని వరిజ్ కూక్కి, వరి పాపమ్కు వారు ఒప్పుకోడిజి డిన్పిసిని వందిజ్ వాత మన్ను. మాపు నీతినిజాయితి మనికాప్ ఇజి ఒడఃబిని వరిజ్ కూక్కె రవ్”, ఇజి వెహ్హన్.

ఉపాన్ వందిజ్ యేసుజ్ వెన్బాజినార్

33 అయావలె, పరిసయరుని వరి జటుద్మని యూదురి రూలు నెస్పిస్పికార్ వన్నిజ్, “యూహాను సిసూర్ డిసిడిస్ఎండ ఉపాన్ కిజి పార్దసం కిజినార్. అయలెకెండెన్ పరిసయురు సిసూర్బా. గాని నీ సిసూర్ ఉణిజి తింజి మంజినార్”, ఇజి వెహ్హర్. 34 అందెజె యేసు, “పెండ్లి దజడః పెండ్లి కాలెజవెట మన్నివెలె వారు ఉపాన్ కిజినారా? 35 పెండ్లి దజడఃజ్ వరి నడిమిహాన్ ఒని రోస్సు వానెలె. అయావలె వారు ఉపాన్ అయా రోస్సాజ్ మంజినార్”, ఇజి వెహ్హన్.

36 వాండ్రు వరిజ్ కతవజ ఉండ్రీ నెస్పిస్సాన్. “ఎయెన్బా కొత్త సొక్కుదాన్ ఉండ్రీ ముక్కు కిసి పడాఃయి దనిజ్ పొక్ఎన్. అయలెకెండె కితిజ, వాండ్రు కొత్త సొక్కు కిన్పిస్సాన్. కింజితి కొత్త ముక్కు పడాఃయి దనిజ్ తగ్విద్. 37 మరి, ఎయెన్బా కొత్త ద్రాక్కుకల్లు పడాఃయి తోలు సన్నిదు వాక్ఎన్. అయలెకెండె వాండ్రు వాక్కి కొత్త ద్రాక్కుకల్లు పొజువాజి అయా తోలుసన్ని పెడెల్నాద్. ద్రాక్కుకల్లు విజు వాజ్న సానాద్. సన్నిపాడానాద్. 38 అందెజె కొత్త ద్రాక్కుకల్లు కొత్త తోలు సన్నిదు వాక్కెవెలె. 39 ఎయెన్బా పడాఃయి ద్రాక్కుకల్లు ఉటివెనుక కొత్తక కోరిఎన్. ఎందనిజ్ ఇహిజ, “పడాఃయిక నెగ్గిక్, ఇజి వెహ్హన్”.

6

1 ఉండ్రీ విస్త్రాంతి దినమ్మదు యేసుని వన్ని సిసూర్పంట గుడ్డెదాన్ సొన్ని మహార్. అయావల వన్ని సిసూర్ నెరెక్ తెప్తారె, వరికిదాన్ నులుసి, తింజి మహార్. 2 నస్తివల నెగొండార్ పరిసయరు, “ఎందనిజ్ మీరు దేవుణు మోసెజ్ సీతి రూలుజ్ తప్పినిపణి విస్త్రాంతి దినమ్మదు కిజినిదెర్?” ఇజి వెన్బాతార్. 3 అయావల యేసు, “దావీదురాజుని వన్నివెట మహికార్, బజ కట్టివెలె, ఇనిక కితాండ్రో ఇజి మీరు దేవుణుమాటదు ఎసెజిబా సద్విఇతిదెరా? 4 వాండ్రు ఇనిక కితాన్ ఇహిజ, దేవుణుగుడిఁదు డుగితాండ్రె దేవుణు ఎద్దు ఇడ్డి రొట్టెజ్ లాగితండ్రె తిహాన్. వుజెరిజ్ తప్ప మరి ఎయెర్బా అయాకెజ్ తిండ్రెజ్ ఆవద్. గాని వాండ్రు తిహండ్రె వన్నివెట మన్నివరిజ్బా సిత్తాన్. 5 అందెజె లోకుమరిసి ఆతి నజి విజి వన్కాజ్ మున్సు అతికారం మనాద్. మరి, విస్త్రాంతి దినమ్మదు ఇనిక కిదెజ్ ఇజి లోకాజ్ వెప్తాజ్బా అతికారం మనాద్”, ఇజి వరిజ్ వెప్తాన్. 6 ఉండ్రీ నాండిజ్ విస్త్రాంతి దినమ్మదు, యూదురి మీటిజ్ కిని ఇండ్రో సొహండ్రె, నెస్సిసి మహాన్. అబ్బె ఉణెర్ కియు అర్కికాన్ ఒరెన్ మహాన్. 7 పరిసయరు ని యూదురి రూలుజ్ నెస్సిస్సికార్, యేసుజ్ ఇన్ని దనిజ్బా నేరం మొప్పెజ్ ఇజి సుడఁజి మహార్. అందెజె, యేసు యా జబుది వన్నిజ్ విస్త్రాంతి దినమ్మదు నెగెజ్ కినాండ్రో ఇజి బాగ సుడఁజి మహార్. 8 అహిజ, యేసు వారు ఒడఁబిజెనిక నెస్తాండ్రె, కియు అర్ది వన్నిజ్, “నీను వాజి విజెరె నడిఁమి నిల్అ”, ఇజి వెప్తాన్. అయావలె వాండ్రు నిజితండ్రె అబ్బెసిహాన్. 9 అయావలె యేసు వరిజ్”, నాసు మిజి వెన్బాజిని, దేవుణు మోసెజ్ సీతి రూలుజ్ వజి, విస్త్రాంతి దినమ్మదు నెగ్గి పణిజ్ కిదెజా, సెఇ పణిజ్పణి కిదెజా? పాణమదిజ్ నిల్పెజా, పాణమదిజ్ అర్పెజా?”, ఇజి వెన్బాతాన్. 10 వెన్బాతాండ్రె వరిజ్ విజెరిజ్ బస్తాండ్రె, అయా కియు అర్ది వన్నిజ్, “నీ కియు నవ్అ”, ఇజి వెప్తాన్. వాండ్రు ఆహె కితాన్. వన్ని కియు నెగెజ్ ఆతాద్. 11 అయావలె వారు వెర్రి కోపమదాన్ నిండ్రెతారె, యేసుజ్ ఇనిక కిదెజ్ ఆనాద్ ఇజి ఒరెన్దిజ్ ఒరెన్ వర్రితారె.

పన్నెండు మణిసిర్ సిసూర్

12 ఆ దినమ్కాజ్ ఉండ్రీ నాండిజ్ యేసు పార్లనం కిదెజ్ ఇజి గొరెత్ సొహాన్. సొహండ్రె ఆ రెయ్యూ విజి దేవుణుదిజ్ పార్లనం కితాన్. 13 పెందాలె ఆతివెలె వాండ్రు వన్ని సిసూర్జి కుక్తాండ్రె, వరిలోఇ పన్నెండు మణిసిర్ ఏర్పాటు కితాన్. వరిజ్ అపొస్తుడు ఇజి కుక్తాన్. 14-16 వీరు ఎయెర్ ఇహిజ, పేతురు ఇజి వాండ్రు పేరు ఇడ్డి సిమొను, వన్ని తంబెర్ని ఆతి ఆంద్రెయ, యాకోబు, యోహాను, పిలిపు, బర్తలోమాయి, మత్తాయి, తోమా, అల్పాయి మరిసి ఆతి యాకోబు, యూదయ దేసెం వందిజ్ ఉసార్ ఆజిని సిమోను*, యాకోబుజ్ మరిసి ఆతి యూద, ఇస్కరియొతు యూద. యా ఇస్కరియొతు యుదనె, వెన్కా యేసుజ్ యూదురు అతికారిజి కీదు ఒపజెప్పికాన్.

17 వాండ్రు యా పన్నెండు మణిసిర్ సిసూర్వెట డిఁగిజి వాతండ్రె, ఉండ్రీ బయలుదు నిహాన్. వన్ని సిసూరు నండెండార్, యూదయ దేసెమ్మదు మని విజి నాహ్యణికార్, యెరూసలెమ్దాన్, సమదరం పడఁకాద్మని తూరు, సీదోను పట్టుమ ప్రాంతమ్కాజ్వాతి నండ్రె లోకుర్ అబె మహార్. వారు వన్ని మాటజ్ వెండ్రెజ్, వరిజ్ మన్ని కష్టమకు సొన్పె ఆదెజ్ ఇజి వాతార్. 18 దెయమకు అస్తి నండ్రె బాద ఆజి మహికార్ నెగెజ్ ఆతార్. 19 దేవుణు సత్తు వన్నిబాణిజ్ వాజి విజెరె నెగెజ్ ఆజి మహార్. అందెజె లోకు విజెరె వన్నిజ్ ముట్టెజ్ ఇజి ఆస ఆతార్. 20 అయావలె వాండ్రు వన్ని సిసూర్జి సుడఁతాండ్రె, ఈహు వెప్పిన్నాన్. “బీదదికార్ ఆతి మీరు గొప్ప వారు. ఎందనిజ్ ఇహిజ, దేవుణు మిజి ఏలుబడిఁ కిజినాన్. 21 ఏలు బజ సాజిని మీరు గొప్ప వారు. ఎందానిజ్ ఇహిజ, దేవుణు మిజి కావాలస్తికెజ్ మీ మన్సు నిండ్రు సీనాన్. యేలు అడఁబాజిని మీరు గొప్ప వారు. ఎందనిజ్ ఇహిజ, మీరు సిక్కిదెర్లె. 22 లోకు మరిసి ఆతి నజి నమ్మితి వందిజ్ లోకుర్ మిజి దూసిసి కేట కిసార్. నిండెజ్మొప్పి నీను సెఇక ఇజి వెప్పి నెక్కు పొక్కార్. అయావలె మీరు గొప్ప వారు. 23 నిన్ని కష్టమకు వానివలె సర్ద ఆజి డాట్తు. ఎందనిజ్ ఇహిజ, దేవుణు మంజిని బాడిఁదు మిజి మన్ని పలితమకు గొప్ప నండ్రె మని. యా లెకెండె, మిజి బాద కిజిని విరి అనిసిర్, వరి కాలమ్మదు మహి ప్రవక్తెజి బాద్ధ కితార్. 24 గాని,

* 6:14-16 6:14-16 రోమది ఏలుబడిదాన్ యూదయ దేసెమ్మదిజ్ విడుదల కిదెజ్ ఉసార్దాన్ సుడిఁజిని యూదయ సజం మనాద్. అయాసజమదికాన్ ఒరెన్ సిమోను

ఓ ఆస్తిమనికెదెరా, అబాయా మిజి ఎసా గొప్పు బాదెజ్ వానెలె. ఎందానిజ్ ఇహిజు, మిజి విజు నుకం దోహక్త మనాద్.

25 ఏలు పొట పంజు ఉణిజినికిదెరె, అబాయా మిజి ఎసా గొప్పు బాదెజ్ వానెలె. మీరు బజ సానిదెరెలె. యేలు సిక్కినికిదెరె. అబాయా మిజి ఎసా గొప్పు బాదెజ్ వానెలె. మీరు దుకం కిజి అడఃబానిదెరెలె.

26 లోకు విజెరె మీ వందిజ్ నెగ్గెకెజ్ వెప్పి వెలె, అబాయా మిజి ఎసా గొప్పు బాదెజ్ వానెలె. ఎందానిజ్ అయలెకెండెన్ వరి అనిసిర్ అబద్ధం వర్గిని ప్రవక్తెజుబా కిత్తార్.

ప్రేమ వందిజ్ వెప్పిసాన్

27 నా మాటెజ్ వెంజిని మిజి నాను వెప్పిసాన్, మీ పగాతివరిజ్ ప్రేమిస్తు. మిజి దూసిస్సివరిజ్ నెగ్గెకెజ్ కిదు. 28 మిజి సాయెవ్ సీని వరిజ్, “దేవుణు మిజి నెగ్గెకెజ్ సిపిన్”, ఇజ దీవిస్తు. మిజి బాదెజ్ కిని వరి వందిజ్ పార్దనం కిదు. 29 ఎయెన్బా మిజి ఉండ్రె లెపాద్ డెయితిజు, మరి ఉండ్రె లెప బా తోరిస్తు. ఎయెన్బా మీరు వ్డెఃగితి మని సాల్యు ఒతిజు, వన్నిజ్ మీ సాక్కూ సా అ. 30 మిజి లోస్సివరిజ్ విజెరిజ్ సీదు. మీ సొంతతిక పెర్రి ఒసిని వరిజ్ ఆక మరి లోస్సాట్. 31 లోకుర్ మిజి ఎలాగ కిదెజ్ ఇజ మీరు కోరిజినిదెరె అయాలెకెండె మీరు వరిజ్ కిదు.

32 మిజి ప్రేమిస్సివరిజె మీరు ప్రేమిస్తిజు, దేవుణు మిజి ఇనాయం సీనాన్ ఇజి ఒడిఃబిజినిదెరా?. పాపం కినికార్బా వరిజ్ ప్రేమిస్సి వరిజ్ ప్రేమిస్సార్. 33 మిజి నెగ్గెకెజ్ కినివరిజె మీరు నెగ్గెకెజ్ కితిజు, దేవుణు మిజి ఇనాయం సీనాన్ ఇజి ఒడిఃబిజినిదెరా? పాపం కినికార్బా ఆహా కిజినార్. 34 అప్పు మరజి సీనార్ ఇజి నెస్సివరిజె మీరు సితిజు, దేవుణు మిజి ఇనాయం సీనాన్ ఇజి ఒడిఃబిజినిదెరా? పాపం కినికార్బా ఆహా కిజినార్. వారు సితికెజ్ విజు మరజి సీనార్ ఇజి ఒడిఃబిజి పాపం కిజిని వరిజ్ సీజినార్. 35 గాని మీరు మీ పగ్ ఆతి వరిజ్ ప్రేమిస్తు. వరిజ్ నెగ్గెకెజ్ కిదు. మరజి సీనార్ ఇజి ఆస సిల్లెండ, అప్పు సీదు. అయావలె మిజి నండో ఇనాయమ్కు ఆనెలె. మీరు విజు దనిజ్ అతికారం మని దేవుణు మరిసిర్ అనిదెరె. ఇహిజు, మీరు వాండ్రు కినిలెకెండె కినిదెరె. ఎందనిజ్ ఇహిజు, దేవుణు మేలుదిజ్ నెన్ఇవరిజ్బా సెఇ పణిజ్ కిని వరిజ్బా దయ తోరిస్సాన్. 36 మీ బుబ్బు ఆతి దేవుణు ఎలాగ కనికారం అతికాండ్రె అయావజు మీరుబా మండ్రు.

తీర్పు కిదెజ్ ఆవీద్

37 ఒరెన్ వన్ని మున్సు వెహ్లాట్. అయ లెకెండె దేవుణు మీ మున్సు వెహ్లాట్. లోకు కిని వన్యాజ్ మీరు తీర్పు కిమాట్. అయాలెకెండె మీ మున్సు దేవుణు తీర్పు కివెన్. లోకుర్ మిజి బాదెజ్ కితిజు, మీరు మరజి కివీండ వరిజ్ డిఃస్తు. అయాలెకెండె దేవుణు మిజి డిఃస్సాన్లె. 38 మహి వరిజ్ సీదు. దేవుణు మిజి సీనాన్లె. మిజి నండో సీనాన్లె. తిగ్జి, కుదిలిసి, వజ్జి సాని లెకెండె మీ ఒడిఃద్ సీనాన్లె. మీరు కొలిజి సితివజనె మిజి దోహక్తాద్లె.

39 నస్తివలె వాండ్రు కత వజు యాక నెన్పిస్తాన్. అయాక ఇనిక ఇహిజు, “ఒరెన్ గుడ్డి వన్నిజ్ మరి ఒరెన్ గుడ్డి వాండ్రు సరి తోరిస్తిజ్ అట్నాండ్రా? తోరిస్తిజు, వారు రిఎరెబా గాతదు అర్నార్గదె? 40 సద్దినికాన్ నెన్పిన్ వన్నిమున్సు పెరికాన్ ఆవీన్. గాని సదు పూర్తి నెస్సికాన్ ఎయెన్బా వన్నిజ్ నెన్పిన్ వన్నివజు మంజినాన్. 41 మీ కణకాదు మన్నితూలం నన్నిక సుడఃఎండ మీ తంబెరిజు కణకాద్ మన్ని కాసరాదిజ్ ఎందానిజ్ బేసిని? 42 నీ కణకాదు మన్ని తూలం నన్నిక లాగ్ఎండ, మీ తంబెరిజ్, ‘ఓ తంబెరి నీ కణకాదు మన్ని కసరాదిజ్ లాగ్న’, ఇజి ఎలాగ వెహ్లాజ్ ఆనాద్. వేసం కినికిదెరె, మీ సొంత కణకాదు మన్ని తూలం ననిక ముజాలె లాగ్దు. అయావలె మీ తంబెరిజు కణకాద్ మన్ని ఇజిరి కసరాదిజ్ నెగెండె సుడఃజి లాగ్దెజ్ అట్టి. 43 నెగ్గె మరాత్ సెఇ పట్టు అన్ఉ. అయాలెకెండె సెఇ మరాత్ నెగ్గె పట్టు అన్ఉ. 44 విజు మరెకాజ్బా పట్టు సుడఃజి నెస్తిజ్ ఆనాద్. ఎయెరెబా బొడః పట్టు సాప్పు తుపెజాణిజ్కొయిఎరె. అయాలెకెండె ద్రాక్కు పట్టు బా సాప్పు లటదాన్ కొయిఎరె. 45 నెగ్గె మన్సు మన్నివన్నిజ్ కూలిజ్ కొట్టు కిత్తి మన్నిలెకెండె వన్ని మున్సుదు నెగ్గెకెజె మంజినె. అందెజె వన్ని వెయూదాన్ నెగ్గె మాటెజ్ వానె. సెఇ మన్సు మన్నివన్నిజ్ సెఇకెజె మంజినె. అందెజె వన్ని వెయూదాన్ సెఇ మాటెజ్ వానె.

46 నాను వెళ్ళి మాటోజ్‌వజ మీరు కివిండ మరి మీరు ఎందనిజ్ ప్రబువా, ప్రబువా ఇజి నజీ కూక్కినిదెర్? 47 నా డగ్రువాజి నా మాటోజ్ వెంజి అయావజి కినికాన్ ఎయెరిజ్ పోలిత మనాండ్రొ ఇజి నాను నెన్‌పిసిస.

48 వాండ్రు పునాది నిరీడ్ కారసి సట్టుముస్సు పునాది కితాండ్రె ఇల్లు తోప్పి వన్ని లెకెండ మనాన్. పెరి గడ్డ వాతాద్. ఇల్లుదిజ్ పెరి గడ్డ డెయితిజ్‌బా అది అరెవతాద్. ఎందనిజ్ ఇహిజ, అది నెగ్రెండ తోహా ఆత మనాద్. 49 గాని నా మాటోజ్ వెంజిబా అయావజి కిఇకాన్, బూమి ముస్సు పునాది పోక్‌విండ ఇల్లు తోప్పి వన్ని లెకెండ మనాన్. పెరిగడ్డ డెయితిజ్ నణమె అయా ఇల్లు అర్తాద్. ఇల్లు పూర్తి పాడాతాద్.

7

1 వాండ్రు వెప్తాజ్ మన్నిమాటోజ్ విజి లోకురిజ్ వెన్‌పిసి వీస్తాండ్రె, కపర్నూహుము ఇన్ని పట్టుమ్దు వాతాన్. 2 అబ్బె రోమ సయినమ్దిజ్ సదాతిపతి* ఒరెన్ మహాన్. అతికారిజ్ నండొ ఇస్టం ఆతి ఒరెన్ వెట్టిపణి కినికాన్ వన్నిజ్ మహాన్. వాండ్రు జబు లావు ఆతాదె సాదెజ్ డగ్రు ఆత మహాన్. 3 అయా అతికారి యేసు వందిజ్ వెహండ్రె, సెగెండార్ యూదుర్ పెద్దెల్‌జి వన్ని డగ్రు పోక్తార్. ఎందనిజ్ ఇహిజ, వాండ్రు వాజి వన్ని వెటి పణి కిని వన్నిజ్ నెగెణ్ కిదెజ్ ఇజి. 4-5 వారు వన్ని డగ్రు వాతారె, “యా అతికారి మా లోకాజ్ నండొ ప్రేయిస్తాండ్రె ముజి మీటిజ్ కిదెజ్ ఇజి ఇల్లు తోహిస్త సితాన్. అందెజి నీను వాజి వన్ని వెటి పణిమణిసిజ్ నెగెణ్ కిదెజ్ వాండ్రు తగ్గికాన్”, ఇజి మరి మరి బతిమాల్‌తారె. 6 అందెజి యేసు వరివెట సాహాన్. వాండ్రు ఇల్లు డగ్రు వాతాన్. అయావలె సతాదిప కూలెజి, “మీరు యేసు బాన్ సొన్ని ఈహు వెప్తాబు, “ప్రబువా, నీను వందమా. నా ఇండ్రొ నీను వాదెజ్ నాను ఏపటితికాన్ ఆవి. 7 గాని నెగెణ్ ఆల ఇన్ని నీ మాటదాన్ నా వెట్టిపణి మణిసి నెగెండొ ఆనాన్‌లె, ఇజి నాను నెసిస. 8 ఎందనిజ్ ఇహిజ, నా ముస్సు అతికారం మనికార్ మనార్. నా అడిగి ఉద్దం కినికార్ మనార్. నాను ఒరెన్ వన్నిజ్ సొన్‌అ ఇహిజ సొనాన్. మరి ఒరెన్ వన్నిజ్ రఅ ఇహిజ, వానాన్. నా పణిమణిసిజ్ యాక కిఅ ఇహిజ కినాన్”, ఇజి వెప్తాండ్రె పోక్తాన్. 9 యేసు యా మాటోజ్ వెహండ్రె, వన్ని వందిజ్ బమ్మ ఆతాన్. వాండ్రు వన్ని వెట వాతిమన్ని లోకుదరిజ్ మహ్తాండ్రె, “అబ్బు, ఇస్తాయేలు లోకుర్ లోఇబా విన్నిజ్ మన్ని నమకం లెకెండ, నమకం మని ఒరెన్ వన్నిజ్‌బా నాను సుడెఎత ఇజి మీ వెట నాను వెహిన్”, ఇజి వెప్తాన్. 10 వన్నిబాన్ వాతివరిజ్ యేసు మహ్తా పోక్తాన్. వారు ఇండ్రొ సాహారె, నెగెణ్ ఆతి వెటిపణి మణిసిజ్ సుడెతారె.

సాతి వన్నిజ్ బత్కిస్సాన్

11 యాక కితి వెన్యా, యేసు నాయి ఇని పట్టుమ్దు సొన్ని మహాన్. వన్ని సిసూర్‌ని మంద లోకు వన్నివెట కూడెజి సొన్ని మహాన్. 12 వాండ్రు పట్టుం వెల్‌గు డగ్రు వాతివెలె సాతికాన్ ఒరెన్ వన్నిజ్ సోపతారె, సెగెండార్ పిండిజి ఒసి మహాన్. సాతికాన్ అయెసిజ్ ఒరెండ్రె మరిసి. అది ముండ బోదెలి. పట్టుమ్ది మంద లోకుర్ దన్నివెట మహాన్. 13 ప్రబు ముండ బోదెల్‌దిజ్ సుడెతివెలె, వన్ని పాణం నొతాద్. అడెబామా, ఇజి దన్నిజ్ వెప్తాన్.

14 వాండ్రు డగ్రు వాతండ్రె, జబుద్ ముట్టిజ్, పిండిజి ఒసి మహికార్ నిహార్. యేసు సాతి వన్నిజ్, “ఒ దజడెజ, నాను నిజి వెహిన్, నిజ్‌అ ఇజి”, ఇజి వెప్తాన్. 15 అయావలె సాతికాన్ నిజిజ బస్తాండ్రె, వర్గిదెజ్ మొదెల్‌స్తాన్. యేసు, వన్నిజ్ అయెసిజ్ ఒపజెస్తాన్. 16 వారు విజెరి బమ్మ ఆజి తియెల్ ఆతారె. “ఒరెన్ పెరి ప్రవక్త మా నడిమి వాతాన్. వన్ని లోకురిజ్ సాయం కిదెజ్ దేవుణు వాతాన్”, ఇజి వెప్తారె దేవుణుదిజ్ పొగిడితారె. 17 యేసు వందిజ్ యా మాటోజ్ యూదయ దేసెం ని డగ్రు మని ప్రాంతమ్‌కాజ్ విజు సెద్రితె.

యేసుని యోహాను సిసూరు వర్గిజనార్.

18-19 బాప్తిసం సీని యోహానుజ్ సిసూర్ యా జర్గితి పణిజి వందిజ్ యోహానుజ్ వెప్తారె. నస్తవలె వాండ్రు వరి లోఇహాన్ రివిర్ సిసూర్‌జి కూక్తాండ్రె, “వానికి నీనెనా? సిలిజ, మాపు మరి ఒరెన్ వందిజ్ ఎద్దు సుడెదెజా?”, ఇజి ప్రబుజ్ వెన్‌బాదెజ్ యేసుడగ్రు పోక్తాన్.

* 7:2 7:2 వంద విద్దెం కినివరిజ్ నడిపిసికాన్.

20 వారు యేసుడగ్గు వాతారె, “నీనెనా వాజినికి? సిలిజ మాపు మరి ఒరెన్ వన్నిజ్ ఎగ్గు సుడెదెజా? ఇజి వెన్బాదెజ్ బాప్టిసం సీని యోహాను ముజి నీ డగ్గు పోక్తాన్”, ఇహార్. 21 అయావలెనె, యేసు జబ్బుదివరిజ్ బాదదాన్ మన్నివరిజ్, దెయమకు అస్తి వరిజ్ నంఠెండారిజ్ నెగెణ్ కితాన్. నంఠె గుడ్డిది వరిజ్ సూణిలెకెండ్ కితాన్. 22 అందెజె వాండ్రు వన్నిడగ్గు వాతివరిజ్, “గుడ్డిదికార్ సుడె ఆజినార్. సొటదికార్ నడిజినార్. కస్టమ్దికార్ ఇని పెరిజబ్బు మన్నికార్ నెగెణ్ ఆజినార్. బొయిరదికార్ వెంజినార్. సాతికార్ నికెఆజినార్. బీదాతివరిజ్ సువార్త వెహెఅజినాద్. ఇజి యాలెకిండ్ మీరు సుడెతికెజ్, వెంజినికెజ్ మర్తి సొన్ని యోహానుజ్ వెచ్చు. 23 నా ముస్సు నమకం డిన్ఎండ మంజినికాన్ దేవుణు సీని దీవనమ్కు మంజినికాన్ఆనాలె”, ఇజి వరిజ్ వెచ్చాన్.

24 యోహాను సిసూర్ సొహి వెనుక, యేసు యోహాను వందిజ్ మంద లోకు వెట ఈహు వెప్తాజ్ మొదోల్స్తాన్. “ఇనిక సుడెదెజ్ మీరు బీడిమ్బూమి ప్రాంతమ్దు సొహిదెర్? గాలిదిజ్ కడ్డిజిని గడ్డిదిజ్ సుడెదెజా? 25 సిల్లిజ, మరి ఇనిక సుడెదెజ్ సొహిదెర్? మెతాని సొక్కెజ్ తోడిగితి మని ఒరెన్ వన్నిజ్ సుడెదెజా? సిల్లి, నంఠె దర మన్ని సొక్కెజ్ తోడిగిజి, సుకం బత్కినికార్ రాజురి ఇల్కాజ్ మంజినార్. 26 అహిజ, మీరు ఇనిక సుడెదెజ్ సొహిదెర్? ఒరెన్ ప్రవక్తెనా? ఒబ, ఒరెన్ ప్రవక్త ముస్సు పెరివన్నిజ్ సుడెదెజ్ సొహిదెర్ ఇజి నాను మిజి వెప్పొన 27 విన్నివందిజ్ దేవుణు మాటదు ఈహు రాస్త మనాద్, “ఇదిలో, నాను నా కబ్రుతనివన్నిజ్ నీ ముజాల పోక్కిన వాండ్రు నీ ముజాల నీ సరి నెగెణ్ కినాన్”.

28 బోదెకాజ్ పుట్టి వరిలోఇ యోహాను ఇంక పెరికాన్మరి ఎయెన్బా సిలెన్. గాని దేవుణు ఏలుబడి: కిని లోకుర్ లోఇ తగిని కొటికాన్ యోహాను ముస్సు పెరికాన్ ఇజి నాను మిజి వెప్పొన”. 29 యేసు వెప్తికెజ్ వెహార్ లోకుర్ విజెర్ పన్ను పెర్సికార్బా దేవుణు కిజినిక విజు నాయమ్దానె కిజినాన్ ఇజి లోకుర్ ఎగ్గు ఒప్పుకొటార్. ఎందనిజ్ ఇహిజ, వారు యోహాను బాణిజ్ బాప్టిసం లాగె ఆత మహార్. 30 గాని పరిసయేరుని యూదురి రూలు నెస్పిస్సికార్ యోహాను సీని బాప్టిసం లాగె ఆవతార్. వారు వరి వందిజ్ దేవుణు ఎత్తు కితి సజతి నెక్త పొక్తార్.

31 యా తరమ్ది లోకాజ్ నాను ఇన్ని దని దనటాన్ పోల్స్ని వెప్తాజ్? వారు ఇని దనిజ్ పోలిత మనార్? 32 వారు, సతాదు బని మంజి పెండ్లి ఇంఠ్రొ ని సాతి ఇంఠ్రొ జగ్గిజిని దని వందిజ్ఎత్తు కిజి కర్జిజిని కొడోరిజ్ప్రోలిత్త మనాద్. అయా కొడోరిజ్ ఒరెన్దిజ్ ఒరెన్ కూకె ఆజి ఈహు కర్జిజినార్. “మాపు పిరుడి: ఊహాక్తావ్ గాని మీరు కర్జిజితిదెర్. మాపు సాతి ఇంఠ్రొణి పోటిజ్పొర్తావ్ గాని మీరు అడజ్బాఇతిదెర్”.

33 ఎందానిజ్ ఇహిజ, బాప్టిసం సీని యోహాను మాముల్ బోజనం ఉణిజి, ద్రాక్కు కడు ఉణెఎండ వాతాన్. అందెజి మీరు, “వినిజ్ దెయం అస్తాద్”, ఇజి వెప్పొనిదెర్. 34 లోకు మరిసిఆతి నాను ఉణిజి తింజి వాజినాన్. అందెజి మీరు ఇదిలో వీండ్రు టిండి కకుర్తికాన్, సొస్సికాన్, పన్ను పెర్సివరిజ్ పాపం కినివరిజ్ కూలాయెన్ ఇజి వెప్పొనిదెర్. 35 గాని దేవుణుబాణిజ్ వాతి గెణం మనికార్ అయా గెణం నిజమాతిక ఇజి వరి విజు నెగ్గి పణిజాణిజ్ రుజుప్ కిజినార్.

పాపం కితి బోదెల్దిజ్ సెమిసినాన్

36 పరిసయేరు లోఇ ఒరెన్ వన్నివెట బోజనం కిదెజ్ యేసుజ్ కూక్తాన్. అందెజె యేసు పరిసయేరు ఇంఠ్రొ సొహంఠ్రె, వన్ని వెట బోజెనమ్దిజ్ బస్త మహాన్. 37 ఆ నాటో పాపం కిజి మహి ఉంఠ్రె బోదెలి మహాద్. యేసు పరిసయేరు ఇంఠ్రొ బోజెనమ్దిజ్ బస్త మహాన్ ఇజి నెస్తాదె, నూనాజ్ పణుకుదాన్† తయారో కితి ఉంఠ్రె సీసాదు నెగ్గి వాసనం సీని నూనె తత్తాద్. 38 యేసు, కాల్యు వెన్కా మహంఠ్రె బస్త మహాన్కాక అది వెనక వన్ని పాదమ్క డగ్గు నిహాద్. నిహాద్ అడజ్బాజి మహాద్. అది దన్ని కళెర్దాన్ వన్ని పాదమ్కాజ్ ఊత్తతాద్ దని కొప్పుదాన్ తెల్తాద్. వన్ని పాదమ్కాజ్ ముదు కితాదె వాసనం సీని జటమామ్సి నూనె రాస్తాద్.

39 వన్నిజ్ కూక్కి పరీసయి వాండ్రు యాక సుడెతాండ్రె, వీండ్రు నిజం ఇక ఒరెన్ ప్రవక్త ఇహిజ, వినిజ్ ముట్టి బోదెలి ఎయెదో ఎలాగ మర్తికాదో ఇజి నెస్తాన్ మరి. ఎందనిజ్ ఇహిజ, ఇది పాపం కినికాద్, ఇజి

† 7:27 7:27 మలాకి 3:1. ‡ 7:37 7:37 యా నూనాజ్ పణుకు పేరు అలబాస్తరు ఇజి యా పణుకు నంఠె కరిదితిక తెల్లాజ్ మంజినాద్ యాక గీని లోకుర్ పునెజ్ తయారో కిజినార్.

మన్నుడు ఒడిబితాన్. 40 అందెజె యేసు, “ఓ సిమోను నీవెట ఉండ్రీ మాట వెహ్తాజ్ మనాద్”, ఇజి వన్ని వెట వెహ్తాజ్, “బోదకినికి వెహ్తా”, ఇహాన్.

41 అయావలె యేసు”, ఒరెన్ అప్పు సీతి వన్నిజ్ రిఎర్ అప్పు లొస్తికార్ మహార్. వరి లొజ ఒరెన్ అయదు వందెజ్ వెండి రుపాయిజు మరి ఒరెన్ యాబయి వెండి రుపాయిజు సీదెజ్ మనాద్. 42 అప్పు తిరిస్తెజ్ వరిజ్ డబ్బు సీల్లెద్. అందెజె వరిజ్ రిఎరిజ్బా డబ్బు లొన్ఎండ డిస్తాన్. ఏలు, విరి లొజ ఎయెన్ వన్నిజ్ నండొ ప్రేమిస్తాన్? ఇజి వెన్బాతాన్. 43 అందెజె సిమోను, “వాండ్రు ఎయెరిజ్ నండొ సితండ్రె, లొన్ఎండ డిస్తాన్ సితండ్రె వాండ్రు నండొ ప్రేమిస్తాన్, ఇజి నాను ఒడిబితాన్”, ఇహాన్. అందెజె యేసు, “నీను నెగెండ ఎత్తు కితిదె వెహ్తా”, ఇహాన్.

44 ఇహండ్రె, ఆ బోదెల్ దరోల్ సుడొజి సిమోనుజ్ ఈహు వెహ్తాన్. “యా బోదెల్దిజ్ నీను సుడొజిని గదె. నాను నీ ఇండ్రె వాత. నీను నా పాదమకు ఊర్పాదెజ్ ఏరు సిజతి. గాని ఇది దని కళెర్దాన్ నా పాదమకు ఊత్తాదె, దని కొప్పుదాన్ తేలితాద్. 45 నీను నజి ముదు కిజి డర్బు కిజతి. గాని ఇది నాను వాతి బాణిజ్ అసి నా పాదమకు ముదు కిజినె మనాద్. 46 నీను నా బురాదు నూనె రాన్ఇతి. గాని ఇది నా పాదమకాజ్వాసనం సీని నూనె రాస్తాద్. 47 అది నండొ ప్రేమిస్తాద్. అందెజె దని నండొ పాపమకు దేవుణు సెమిస్తాన్, ఇజి నాను నీ వెట వెహ్తాన్. ఎయెరిజ్ దేవుణు తక్కు సెమిస్త మనాండ్రె, వాండ్రు తక్కునె ప్రేమిస్తాన్”.

48 మరి యేసుదనిజ్, “దేవుణు నీ పాపమకు సెమిస్త మనాన్”, ఇజి వెహ్తాన్. 49 వన్ని వెట ఉండెజ్ బస్తి మహికార్, “పాపమకు సెమిస్త మన్ను ఇజి వెహ్తాజ్ వీండ్రు ఎయెన్?””, ఇజి ఒరెన్దిజ్ ఒరెన్ వర్గిజి మహార్. 50 అందెజె యేసు, “నీను నా మున్ను నమకం ఇడ్డి. అందెజె నీ పాపమకాణిజ్ దేవుణు రక్కిస్తాన్ ఇజి ఆ బోదెల్దిజ్ వెహ్తాన్.

8

యేసు విత్తు వందిజ్ వెహ్తాని కత

1 సెగం లొస్సు. సొహి వెనుక, యేసు, దేవుణు కిని ఏలుబడి: వందిజ్ సువార్త పట్టుమకాజ్ నాహ్కజ్ బోదసి వెహ్తా వాజి మహాన్. 2-3 వస్సొండ్రు మణిసి సిసూరు వన్ని వెట మహార్. దెయం బాణిజ్, కస్టమ్కాణిజ్ నెగెల్ అతి నెగెండెక్ బోదెక్బా వన్ని వెట మహా. వన్కా లొజ ఏడు దెయమ్కాణిజ్ యేసు డిన్పిస్తి మగ్దలనె ఇని మరియ, హెలోద్ ఇండ్రె ఎజమాని పణి కిజి మహి కూజ ఇని వన్ని ఆల్ని యొహన, సుననయ, మరి నండొ బోదెక్బా మహా. వన్కాజ్ కల్గితి మన్ని లొజ అవిక, యేసువన్ని సిసూర్ వందిజ్ కర్బు కిజి మహార్.

4 విజు పట్టుమకాణిజ్ లొకర్ యేసుడర్బు వాజి మంద ఆతివెలె, వాండ్రు ఉండ్రీ కత వజి ఈహు నెన్పిస్తాన్. 5 “ఒరెన్ రయెతు వాండ్రు విత్తు వితెజ్ సొహాన్. వాండ్రు విత్తు విత్తి మహిజ్ సెగం సరి పడెకాద్ అర్తె. అర్తి విత్తాజ్ మట్టి సొన్ని మహార్. ఆగాసమది పొటిజ్బా వాతెనె పెహ్తా తిహా. 6 మరి సెగం సటు మున్ను మన్ని డులిదు అర్తె. నేరితె గాని తడి: సీల్లెండ ఆతిజ్ సాతె. 7 మరి సెగం సొప్పు తప్పుజ్ నడిమి అర్తె. సొప్పు తువెజ్వెటె పిరితె గాని వన్కాజ్ తిగితె. 8 మరి సెగం నెగ్గి బూమిదు అర్తె. ఆకెజ్ పిరితెనె వంట నెగెండ పండితాద్. నండొ జణి ఆతాద్. విత్తి విత్తుదిజ్ వంత వంతుజ్ లెకెండ ఆతె. యేసు యా మాటెజ్ వెహ్తా, ‘రుండి గిబిజాణిజ్ వెంజి అయావజ నడిదు’”, ఇజి వెహ్తాన్.

9 వెనుక వన్నిసిసూర్ యా కతవజి నెన్పిస్తి దనిజ్ అర్దం ఇనిక ఇజి వెన్బాతార్. 10 వెన్బాతిజ్ వాండ్రు, “దేవుణు కిని ఏలుబడి: వందిజ్ డాజితి మహి సజతిజ్ దేవుణు మిజి తెలివి కిత మనాన్. గాని మహికార్ దేవుణు మాటదు వెహ్తా లెకెండ, ‘సుడొజినార్ గాని తొవెర్, వెంజినార్ గాని అర్దం కివర్*’. అందెజె వరిజ్ కతవజి నాను నెన్పిసిన. 11 యా కతవజి నెన్పిస్తి దనిజ్ అర్దం ఇనిక ఇహిజ, విత్తు ఇహిజ దేవుణు మాట. 12 విత్తు అర్దిసరి పడెకాద్ పొలితికార్ ఎయెర్ ఇహిజ, దేవుణు మాట వెనికార్. గాని వారు దేవుణుదిజ్ నమిజి, వాండ్రు వరిజ్ రక్కిన్ఎండ మంజిని వందిజ్ సయెతాను వాజి వరి మన్నుడు మన్ని దేవుణు మాట పెర్రి ఒనాన్. 13 విత్తు అర్ది సట్టుమున్ను మని డుల్లిదిజ్ పొలితికార్ ఎయెర్ ఇహిజ, దేవుణు మాట వెనివెలె సర్దదాన్ మన్నుడు ఇడ్డికార్. గాని వెల్లె లొజ సొని లెకెండ

* 8:10 8:10 యెసయ 6:9.

దేవుణు మాట వరి మన్ను లోక సాన్ ఎద్. వారు సెగం కాలం నమినార్ గాని కష్టం వానివలె డిఃస్వార్. 14 విత్తు అర్థి సాప్పు తప్పజ్ నడిపిమి పోలితికార్ ఎయెర్ ఇహిజ, దేవుణు మాట వెంజి నమకం బా ఇడ్వార్. గాని వారు ఆహా బత్తిజి సానివలె బత్తువందిజ్ మన్ని విసారం, సంసారం, సుకం వందిజ్ ఒడఃబినార్. యాకెజ్ వరి నమకం తిగిజి పొక్కినె. వరి బత్తుదాన్ ఇన్ని లాబంబా సిల్లెద్. 15 విత్తు అర్థి నెగ్గి బూమిదిజ్ పోలితికార్ ఎయెర్ ఇహిజ, దేవుణు మాట వెనికార్. వారు వరిజ్ తగ్గి నెగ్గి మన్నుదు దేవుణు మాట ఇడ్వార్. కష్టమకు వాతిజ, వారు అయాకెజ్ ఒరిసి నమకమ్దాన్ పిరినార్.

దీవ వందిజ్ వెప్పినాన్.

16 ఎయెన్బా దీవ కసిసి వెన్కా తబల మూక్కినో, మంసం అడ్డినో ఇడ్ ఎవ్. గాని లోక వానివరిజ్ జాయి తోర్దిజ్ ఇజి దీవ కంతుదునె ఇడ్వార్. 17 డాఃజితిక ఇనికబా వెల్లి ఆనాద్. ముస్తిక ఇనికబా తోర్ఆజి వెల్లితనె. 18 అందెజె మీరు వెంజినికెజ్ అర్థం కిజి మండ్రు. ఎందనిజ్ ఇహిజ, నా బాణిజ్ వెంజి అర్థం కిజిని వన్నిజ్ దేవుణు మరి తెలివి కినాన్. గాని వెంజి అర్థం కిజివన్నిజ్ వాండ్రు అర్థం కిత మన ఇజి ఒడఃబితికెజ్ బా లాగ్నాన్.

19 నస్తివలె యేసు అయెసిని తంబెరిసిర్ వన్నిజ్ సుడఃదెజ్ వాతార్. గాని లోకుర్ నండ్రో మహిజ్ వన్ని డర్గు సాండ్రెజ్ అబ్ వితార్. 20 అయావలె ఒరెన్, “నీ యాయ ని తంబెరిజు నిజి సుడఃదెజ్ కోరిజి వెల్లి నిహ మనార”, ఇజి వన్నిజ్ వెప్తాన్. 21 వెప్తాజ్ యేసు, “దేవుణు మాటెజ్ వెంజి అయావజి నడిఃనికారె నా యాయ నా తంబెరిజు”, ఇజి వెప్తాన్.

యేసు పెరిగాలి తుపాన్ దిజ్ ఆవ్ కిజినాన్

22 నస్తివలె ఉండ్రి నాండ్డిజ్ యేసు వన్నిసిసూర్జ, “గనెసరెతు ఇన్ని నెరు అతాహ పడఃక సానాబ్”, ఇజి వెప్తాన్. అందెజె వారు ఉండ్రి డోణిదు ఎక్తారె సాహార్. 23 వారు సాన్ని మహిజ్, యేసు నిద్ర కితాన్. అయావలె పెరి గాలి తుపాన్ సెర్దు ముస్సు వాతాదె, డోణిదు ఏరు నిండ్రిజినాద్. వారు పెరి ప్రమాదమ్దు మనార్.

24 అయావలె సిసూరు వన్ని డర్గు సాహారె, “ప్రబువా, ప్రబువా మాపు సానా సానావ్ లె”, ఇజి వన్నిజ్ నిక్తార్. వాండ్రు నిజితండ్రె పెరిగాలి ఉల్లాలుజుదిజ్, “పలక్ ఆదు”, ఇజి డటం వెప్తాన్. పెరిగాలి అణస్తాద్. విజు అలితె. 25 అయావలె వాండ్రు, “ఎందనిజ్ మిజి నా ముస్సు నమకం సిల్లెద్?”, ఇజి వరిజ్ వెన్బాతాన్. వారు బమ్మజి తియెల్దాన్, “వీండ్రు గాలిదిజ్ ఏరుదిజ్ అణస్త మిజి ఆడ్ర వెప్తాజ్ అవి లోజిజినె. వీండ్రు ఎయెండ్రో”, ఇజి ఒరెన్ వెట ఒరెన్ వర్గితార్.

దెయమ్కు అస్తివన్నిజ్ నెగెండ్ కిజినాన్.

26 వారు గరసినియ ఇని లోకురి ప్రాంతమ్దు వాతార్. అయా ప్రాంతం గలిలయ ప్రాంతమ్దిజ్ ఎర్దు మనాద్. 27 వాండ్రు సెరుగటుద్ డిగితివెలె, ఆ పట్టుమిదికాన్ ఒరెన్ యేసుడర్గు వాతాన్. వాండ్రు దెయమ్కు అస్తికాన్. నండ్రో కాలమ్కాణిజ్ సాక్కెజ్ తోడిఃగిఎండ, ఇండ్రో మన్ ఎండ, దూకిజాజ్ మహాన్. 28 వాండ్రు యేసుజ్ సుడఃతాండ్రె డటం డేల్ని వన్ని పాదమ్క ఎర్దు ముణుకుజ్ ఊరితాన్. ఊరితండ్రె, “విజు దనిజ్ అతికారం మన్ని దేవుణు మరిసి అతి యేసు, నా వెట నిజి ఇన్ని పణి, నజి బాద కిమ ఇజి నిజి బతిమాల్లిన”, ఇజి డేల్ని వెప్తాన్. 29 ఎందానిజ్ ఇహిజ, యేసు, వనిజ్ డిసి వెల్లి సాన్ అ ఇజి ఆ దెయమ్దిజ్ ఆడ్ర సిత మహాన్. అది వన్నిజ్ నండ్రో సుట్టు అసి మహాద్. అందెజె వన్నిజ్ గొలుస్కాణిజ్ కాల్యాజ్ కికాజ్ తోప్పి కావ్ కిని వరిజ్ ఇడ్వార్. గాని వాండ్రు గొలుస్కాజ్ తెప్పి, దెయమ్కు వన్నిజ్ బీడిమ్బూమిదు ఉలుప్పి మహా. 30 యేసు వన్నిజ్, “నీ పేరు ఇనిక?”, ఇజి వెన్బాతాన్. నండ్రో దెయమ్కు వన్ని లోక మహిజ్ వాండ్రు, “సీన”, ఇజి వెప్తాన్. 31 మజి దర్గిదు పోక్తమా ఇజి మరి మరి బతిమాల్తె.

32 నస్తివలె నండ్రో పండ్రిజ్ మంద గొరోణ్ సెల్కాదు మెయిజి మహా. అందెజె వన్కా లోక సాండ్రెజ్ మజి నెల్వ సిదా”, ఇజి వన్నిజ్ బతిమాల్తె. అందెజె వాండ్రు సెల్వ సితాన్. 33 అయావలె దెయమ్కు వన్నిజ్ డిఃసెనె పండ్రిజ్ లోక సాహా. ఆ పండ్రిజ్ మంద గొరోతదాన్ ఉహ్ కి వాజి సెర్దుదు అర్దెనె సాతె. 34 పండ్రిజ్ మేప్పి మహికార్ జర్గితి దనిజ్ సుడఃతారె ఉహ్ కి సాన్ని ఆ పట్టుమిది వరిజ్, పట్టుమిది

† 8:27 8:27 అయ కాలమ్దు మొడః సట్టు పణుకుదు దొలున్సి సాలమ్దు ఇడ్జి పెరి పణుకయదాన్ మూక్కి మహార్.

వల్సెజ మని వరిజ్ జర్గితెకెక్ వెహ్సార్. 35 లోకుర్ యా జర్గితెకెక్ సుడెడెజ్ సాహార్. వారు యేసు డగ్రు వాతిజ్ దెయమ్కు డిసిస్తి సాహికాన్ సాక్కెజ్ తోడిగిజి నెగ్గి బుద్దిదాన్ యేసు పాదమ్కు అడిగి బస్తి మహి సుడెతార్. సుడెతారె తియెల్ ఆతార్. 36 యాక సుడెతికార్ దెయం అస్తికాన్ ఎలాగ నెగెణ్ ఆతాన్ ఇజి మరి లోకురిజ్ వెహ్సార్. 37-38 అయావలె గరసినియ లోకురి ప్రాంతమ్దు మన్ని లోకుర్ విజెరె, నండో తియెల్ ఆతార్. అందెజె, “మజి డిసి సాన్అ”, ఇజి యేసుజ్ వెహ్సార్. అందెజె యేసు డోణి ఎక్తాండ్రె మరజి సాన్సి మహిజ్, దెయమ్కు డిసిస్తి సాహికాన్, “నాను బా నీ వెట వానా”, ఇజి బతిమాళితాన్. 39 గాని యేసు, “నీను మరజి ఇండ్రె సాన్అ. దేవుణు నీ వందిజ్ కిత్తి గొప్పు పణి విజు వెహ్అ”, ఇజి వెహ్తాండ్రె పోక్తాన్. వాండ్రు సాహాండ్రె యేసు వన్నివందిజ్ కిత్తి గొప్పు పణి పట్టుం విజు వెహ్సాన్.

యేసు సాతి అయిలిజ్ నిక్కినాన్, జబ్బుఅతి మహిబోదెల్దెజ్ నెగెణ్ కిజినాన్

40 యేసు మరజి వాతివెలె, నండో లోకుర్ వన్నిజ్ ఎద్రు సుడెజి మహార్. అందెజె వారు వన్నిజ్ డగ్రు కిత్తార్. 41-42 నస్తివలె, యూదురి మీటిజ్ ఇండ్రెణి అతికారి యాయిరు ఇనికాన్ యేసు పాదం ముస్సు అర్తాండ్రె, “నజీ ఒరెదె గాలు. అది సాదెజ్ డగ్రు ఆత మనాద్. దనిజ్ డగ్రు పనెండు పంటెజ్. అందెజె నీను నా ఇండ్రె రఅ”, ఇజి బతిమాళితాన్. వాండ్రు సాన్సి మహిజ్ నండో లోకుర్ వన్ని ముస్సు నెకె ఆజి అర్సి మహార్. 43 అయావలె ఉండ్రె బోదెలి పనెండు పంటెజాణిజ్ వెల్లి ఆని జబుదాన్ బాద ఆజి మహాద్. ఎయెరబా దనిజ్ నెగెణ్ కిదెజ్ అట్ఎతార్. 44 యేసు వెన్యాజ్ వాతాదె, వాండ్రు తోడిగితిమన్ని వన్నినిరి సాక్కెది సెంగుదిజ్ ముట్టాద్. ముట్టి వెటనె దనిజ్ వాజి మహి నల అణస్తాద్. 45 యేసు, “నజీ ముట్టికాన్ ఎయెన?” ఇజి వెన్బాతాన్. విజెరె, “మాపు నెన్ఎవ్”, ఇజి వెహ్సార్. అయావలె పేతురు, “బోదకినికిదా, నండో లోకుర్ కూడితారె నీ ముస్సు అర్సినార్ గదె”, ఇజి వెహ్సాన్. 46 గాని యేసు, “నజీ ఎయెండ్రె ముట్టాన్. నా లోకదాన్ దేవుణు సత్తు వెల్లి సాసి సాని లెకెండ్ నజీ తెలిజినాద్”, ఇజి వెహ్సాన్. 47 అయావలె అది యేసుజ్ డాజ్జి సాండ్రెజ్ అట్ఎ ఇజి నెస్తాదె వణక్కి వాతాదె వన్ని పాదం ఎద్రు ముణుకుజ్ ఊరిజి వజితాద్. నాను ఎందనిజ్ వన్నిజ్ ముట్ట ఎలాగ వెటనె నెగెణ్ ఆత ఇనిక విజెరె ఎద్రు అది వెహ్సాద్. 48 అందెజె యేసు”, గాలు, నీను నా ముస్సు నమకం ఇడ్డి. అందెజె నీను నెగెన్అతి. సమాదనమ్దాన్ సాన్అ”, ఇజి దనిజ్ వెహ్సాన్. 49 యేసువర్గిజి మహివలెనె, యాయెరు ఇండ్రెణికాన్ ఒరెన్ వాతండ్రె, “నీ గాలు సాతాద్. బోదకినివన్నిజ్ మరి వందిన్సు”, ఇజి వన్నిజ్ వెహ్సాన్. 50 యేసు అయా మాట వెహ్ండ్రె, “తియెల్ ఆమ. నా ముస్సు నమకం ఉండ్రె ఇడెఅ. అది నెగెణ్ ఆనాద్”, ఇజి యాయిరుజ్ వెహ్సాన్. 51 యాయిరు ఇండ్రె వాతివెలె, పేతురు, యాకోబు, యోహాను ఇని వరిజ్ ని ఇజి దని అయిని అప్పొసిరిజ్బా లోక ఒతాన్. గాని మహివరిజ్ లోక సాండ్రెజ్ సరి సివితాన్. 52 విజెరె దన్ని వందిజ్ గుండెజు డెయ్ఎ ఆజి, అడెబాజి మహార్. యేసు వరిజ్, “అడెబామాట్, అది నిద్ర కిజినాద్ గాని సావద్”, ఇజి వెహ్సాన్. 53 అది సాతాద్ ఇజి వారు నెస్త్ మహార్. అందెజె యేసుజ్ సెకాల్ కిత్తార్. 54 అహిజు, యేసు దన్నికిదు అస్తాండ్రె, “ఇజి బయి నిజ్అ”, ఇజి వెహ్సాన్. 55 దనిజ్ పాణం మరజి వాతిజ్ అది నిజితాద్. అయావలె వాండ్రు దనిజ్ బోజనం సీదు ఇజి అడ్ర సితాన్. 56 దని అయెసి అపొసిర్ నండో బమ్మ ఆతార్. గాని వాండ్రు యాక ఎయెరిజ్బా వెహ్సాట్ ఇజి వరిజ్ అడ్ర సితాన్.

9

సిసూరిజ్ పణి ఒపజెప్పినాన్

1 యేసు పన్నెండు మణిని సిసూరిజ్ కూక్కి కుడుఃప్తాండ్రె విజు దెయమ్కాజ్ పేర్దెజ్, కస్టమ్కాజ్ నెగెణ్ కిదెజ్ వరిజ్ సత్తుని అతికారం సిత్తాన్. 2 వాండ్రు, “దేవుణు ఏలుబడిః కిసాన్ ఇజి సువార్త బోదెన్జెజ్, కస్టమ్కాణిజ్ మహి వరిజ్ నెగెణ్ కిదెజ్”, ఇజి వరిజ్ పోక్తాన్. 3 మరి వాండ్రు వెహ్సాన్, “మీరు పయాణం వందిజ్ కిదు డుడ్డు గాని, సన్ని గాని రొట్టె గాని, డబ్బు గాని రుండి సాక్కెజ్ గాని ఇనికబా ఒత్తెజ్ ఆవద్. 4 మీరు ఎయె ఇండ్రె సానిదెరొ, అయా పట్టుం డిసిస్తిదాక బానె మండ్రు. 5 మీజి ఎయెర్ డగ్రు కివండ మహిజు ఆ పట్టుమ్దాన్ డిసిసి సానివలె మీ పాదమ్కాణి డుల్లిబాన్ దుల్తప్పు. దేవుణు మాట వారు నెక్త పోక్తిజ్ దేవుణు వరిజ్ కోపం ఆతాన్ ఇజి తోరిన్జెజ్ ఆహె డుల్లి దులుప్పు”, ఇజి వరిజ్

వెళ్తాను. 6 అందెజె వారు సోతారె, నాహ్యజ్ విజు బూలాజి, సువార్ బోదీసి, ఎంబెబా కస్టమ్దాన్ మహి వరిజ్ నెగెన్ కిజి మహార్.

7-8 గలీలయ ముటదిజ్ రాజు ఆతి హేరోదు యేసుని వన్నిసినూరు కిత్తి పణిజ్ వందిజ్ వెహివెలె అనల అర్థం ఆవండ మహాన్. ఎందనిజ్ ఇహిజు, సెగెండార్ యోహాను సాతండ్రె మరజి నిజీతాన్ ఇజి, సెగెండార్ ఏలియ ప్రవక్త తోరె ఆతాన్ ఇజి మరి సెగెండార్ పూర్బా కాలమ్దు మహి ఒరెన్ ప్రవక్త నిజీత వాతాన్ ఇజి యేసు వందిజ్ వర్ణిజి మహార్. 9 అయావలె హేరోదు, “నాను యోహాను బుర్ డెయిస్త గదె. మరి ఎయి వందిజ్ యా సజతిజ్ నాను వెంజిన? వాండ్రు ఎయెన్?”, ఇజి వన్నిజ్ సుడెడెజ్ ఆస ఆతాన్.

అయ్దు వేలు లోకాజ్ బజ తిర్నినాన్.

10 అపొస్తుడు మరజి వాతారె, వారు కితి పణిజ్ విజు యేసుజ్ వెళ్తారె. వాండ్రు వరిజ్ వెట కూక్తాండ్రె, బత్సయదు ఇని పట్టుమ్దు కేట సాహార్. 11 గాని మంద లోకుర్ ఆక నెస్తారె, వన్ని వెన్కా వాజి మహార్. వాండ్రు వరిజ్ డగ్రు కితాండ్రె దేవుణు ఏలుబడిః వందిజ్ వరిజ్ వెళ్తారె. కస్టమ్దు మహి వరిజ్ నెగెన్ కిత్తాన్.

12 పొద్దు డిగజి మహివలె, పన్నెండు మణిసి సినూర్ వాతారె, “మాటు ఎయెర్ మన్ ఇ బాడిడి మనాల్. అందెజె యా లోకురిజ్ మండ్రెజ్ బాడిః, ఉండెజ్ టిండి, దొహ్కొని వజ పడఃకాద్ మన్ని నాహ్యజ్ వల్సెజు పోక్త”, ఇహార్.

13 యాక వెహండ్రె, యేసు, “మీరె వరిజ్ తిండ్రెజ్ ఇనికబా సీదు”, ఇజి వెళ్తాన్. వెహిజ్ వారు, “మాబాన్ అయ్దు రొట్టెజ్, రుండి మొయెజ్ మనె. నిసా మంద లోకుదిజ్ బోజనం కొండ్రెజ్ మాపు అట్నాపా?”, ఇజి వెళ్తారె. 14 (వాతి మని లోకుర్ లోక మొగకొండ్రెనె డగ్రు అయ్దు వేలుజ్ మనార్) వాండ్రు, “యాబయి మణిసిర్ యాబయి మణిసిర్ వరస బసె కిదు”, ఇజి వన్ని సినూర్జు వెళ్తాన్. 15 వారు ఆహా కిజి విజెరిజ్ బసె కిత్తారె. 16 నస్తివలె వాండ్రు అయ్దు రొట్టెజ్ని రుండి మొయెజ్ అస్తాండ్రె, ఆగసం దరోట్ బేసి, వన్కాజ్ వందిజ్ దేవుణుదిజ్ వందనం వెళ్తాన్. అయాకెజ్ ముకెజ్ కితాండ్రె లోకురిజ్ సీబాజి సీదు ఇజి వన్ని సినూర్జు సిత్తాన్. 17 వారు విజెరె పొట పంజు తిహార్. తిహి వెనుక మిగిలితి ముకెజ్ వనెండు గంపెజ్ సినూరు కెప్తారె. 18 ఉండ్రె నాండిజ్ యేసు ఒరెండ్రె పార్లనం కిజి మహాన్. వన్ని సినూర్ వన్ని డగ్రు మహార్. అయావలె వాండ్రు, “నాను ఎయెన్ ఇజి లోకుర్ వర్ణిజనార్?”, ఇజి వరిజ్ వెన్బాతాన్. 19 వారు, “బాప్తినం సీని యోహాను ఇజి సెగెండార్ వెహిసినార్. సెగెండార్ ఏలియ ప్రవక్త ఇజినార్. మరి సెగెండార్ పూర్బా కాలమ్దు సాతి ప్రవక్తె లోక ఒరెన్ మరజి నిజీతాన్ ఇజి వర్ణిజనార్”, ఇజి వన్నిజ్ వెళ్తారె. 20 “అహిజు, మీరు నాను ఎయెన్ ఇజి వెహిసినెదె?”, ఇజి వరిజ్ వెన్బాతిజ్, పేతురు, “దేవుణు ఏర్పాటు కితి పోక్తి క్రిస్తు”, ఇజి వెళ్తాన్. 21 యాక ఎయెవెట వెహ్యట్ ఇజి కసితం వరిజ్ ఆడ్ర సిత్తాన్. 22 మరి, “లోకు మరిసి ఆతి నాను నండొ కస్టమ్కు ఓరిస్సెజ్ వలె. యూద పెద్దెల్జు, పెరి పుజెరిజు, యూదురి రూలు నెస్సిన్సికార్ నజీ వెల్లి కినార్. లోకుర్ నజీ సహ్యారె. సాజి మూండ్రె దినమ్కాజ్ దేవుణు నజీ నికనాన్”, ఇజి వెళ్తాన్. 23 మరి వాండ్రు వరిజ్ విజెరిజ్ ఈహు వెళ్తాన్. “ఎయెన్బా నా వెట వాదిజ్ ఇహిజు, వాండ్రు వన్ని సాంత ఇస్టమ్కు డిసి, వన్నిజ్ వాని కస్టమ్కు రోజు ఓరిసి సాదెజ్బా తయార్ ఆజి నా వెట వాదిజ్. 24 ఎయెన్బా వన్ని సాంత పాణమ్దిజ్ కాపాడెజ్ సుడెఃతిజు, వన్నిజ్ ఎల్లకాలం దేవుణు వెట బత్తిని బత్తు దొహ్కొవెద్. గాని ఎయెన్బా నా వందిజ్ వన్ని పాణం సితిజు, వన్నిజ్ ఎల్లకాలం దేవుణు వెట బత్తిని బత్తు దొహ్కొవెద్. 25 ఒరెన్ వాండ్రు, వాండ్రు కోరితి విజు, యా లోకమ్ది సంసారం నుకం విజు దొహ్కొ ఆజి, వన్నిజ్ ఎలాకాలం దేవుణు వెట బత్తిని బత్తు దొహ్కొవెండ మహిజు, ఇన్ని లాబం? 26 నా వందిజ్ నా మాట వందిజ్ సిగు ఆని ఎంబె వన్నిజ్బా నాను నెన్న ఇజి వెహిజ్ లోకు మరిసి ఆతి నానుబా సిగు ఆస. నాను దేవుణు జాయ్దు ఒడెబిదెజ్ అల్తెన నని సోకుదాన్ వానా. అయావలె నా బుబ్బుదిని, దూతెజుది జాయ్ ఒడెబిదెజ్ అల్తెన సోకుబా నా వెట మంజినాద్. అయావలె నా వందిజ్ నా మాట వందిజ్ సిగు ఆతి వన్ని వందిజ్ నానుబా సిగు ఆస. 27 నాను మిజి నిజం వెహిసిన, “ఇబ్బె నిహి మన్ని వరి లోక సెగెండార్, దేవుణు వన్ని లోకురిజ్ ఏలుబడిః కిజినిక సూణిదాక సావెర్”.

యేసుజ్జ మూర్తి మారిసినాద్.

28 యా మాటెజ్జ వెహ్తి డగ్గు ఉండ్రీ వారం వెన్కా వాండ్రు, పేతురు, యాకోబు, యోహాను ఇన్ని వరిజ్జ వెట్ట కూక్తాండ్రె, పార్లనం కిదెజ్జ ఉండ్రీ గొరొత్ ఎక్తార్. 29 వాండ్రు పార్లనం కిజి మహివలె వన్ని మొకమ్ది మూర్తి మారితాద్. వన్ని సొకెజ్జ తెలాజ్జ ఆతె, జిగి జిగి మెరిసి మహె. 30-31 అయావలె, దేవుణు మంజిని బాడ్డిదాన్ రిఎర్ వన్ని వెట వర్గిజి మహార్. దేవుణు బాణిజ్జ వాతి జాయ్ వరి నుటులం మహాద్. వారు మోసె, ఏలియం ఇనికార్. యేసు యెరూసలెమ్దు సాజి, ఆహె దేవుణు ఎత్తు కితిక బేగి పూర్తి కిని వందిజ్జ వర్గితార్.

32 పేతురు ని వన్ని వెట మహికార్ బాగ నిద్రి కితార్. తెలి ఆతి మహిజ్జ వారు యేసుజ్జ మని దేవుణు జాయ్దిజ్జ వన్ని వెట నిహి మని రిఎరిజ్జబా సుడెతార్. 33 ఆ రిఎర్ వన్ని బణిజ్జ సొన్ని మహిజ్జ, పేతురు యేసుజ్జ, “బాబు, మాటు ఇబ్బె మనిక గొప్ప నెగిద్. అందెజి నిజి ఉండ్రీ మోసెజ్జ ఉండ్రీ ఏలియెజ్జ ఉండ్రీ మండ్రెజ్జ మూండ్రీ గుడుసెజ్జ తోహనావ్.*

34 వాండ్రు ఆహె వర్గిజి మహిజ్జ మొసాప్ వాతాదె వరిజ్జ పిడెగితాద్. వారు మొసాప్ లొఇ సాహివలె సిసూరు తియెల్ ఆతార్. 35 అయావలె, “పిండ్రు నాను ఏర్పాటు కితి నా మరిను. విని మాటెజ్జ వెండ్రు”, ఇజి ఉండ్రీ జాటు మొసాప్దాన్ వాతాద్. 36 అయా జాటు వాతి వెనుక యేసుజ్జనె తోరితాద్. సిసూరు సుడెతి వన్కాజ్జ ఉండ్రీ దనిజ్జబా అయా దినమ్కాజ్జ మహి ఎయెరిజ్జబా వెహెండ అల్లెత మహార్.

దెయం అస్సి ఒరెన్ కొడెదిజ్జ నెగెన్ కిజినాన్

37 మహ్సా నాండిజ్జ, వారు ఆ గొరొన్ డిగెజి వాతివలె నండో లోకుర్ వన్నిజ్జ ఎద్దు వాతార్. 38 అయావలె ఆ మంద లోకు లొఇ ఒరెన్, “ఓ బోదకినికి, నా మరిసిజ్ కనికారం తోరిన్ అ ఇజి నాను నిజి బతిమాల్లిన్. వాండ్రు నజి ఒరెండ్రె మరిసి. 39 ఉండ్రీ దెయం వన్నిజ్జ అస్సాద్. వెటనె వాండ్రు డెడిస్సాన్. వెయ్దాన్ పంపుల్ వాజి అది వన్నిజ్జ గజగజి వణికిసి అర్పాద్. వన్నిజ్జ నండో బాద కిజి వందిసిన్ డెడిస్సాద్. 40 దనిజ్జ సాన్పిస్సెజ్జ ని సిసూర్జి బతిమాల్త గాని వారు కిదెజ్జ అబ్బెతార్”, ఇజి మొరో కితాన్.

41 అందెజి యేసు, “యా తరమ్దు మనికిదెరా, మీరు తప్పు సరిదు నడపె ఆజినికిదెర్. నమకం సిలికిదెర్. ఎసోడ రొస్సు మీవెట మంజిన్? మీరు కినికెజ్ ఎసా ఒరిస్సెజ్?”, ఇజి వెహ్తాండ్రె, “నీ మరినిజ్జ ఇబ్బె తగ్ అ”, ఇజి వన్నిజ్జ వెహ్తాన్.

42 ఆ కొడెజి వాజిమహివలె వన్నిజ్జ అసి మహి దెయం వన్నిజ్జ అర్పాదె గజి గజి వణికిస్సాద్. అయావలె యేసు ఆ దెయమ్దిజ్జ సాన్ అ ఇజి డటిసి వెహ్తాన్. కొడెదిజ్జ నెగెన్ కితాండ్రె అపొసిజ్జ ఒపజెప్తాన్. 43 లోకుర్ యా జర్గితిక సుడెతారి, దేవుణు గొప్ప సత్తు మనికాన్ ఇజి నండో బమ్మ అతార్. 44 యేసు కితి వణి వందిజ్ లోకుర్ విజెర్ బమ్మ అజి మహివలె, వాండ్రు ఈహు వన్ని సిసూరిజ్ వెహ్తాన్. “నాను యేలు వెహ్సిని మాటెజ్ బాగ వెంజి పోన్ ఎండ మండ్రు. లోకు మరిసి ఆతి నాను లోకు కీదు ఒపజెపె ఆనాలె”, ఇజి. 45 గాని వాండ్రు వెహ్తి మాటెజ్ వరిజ్ అర్లం ఆవతాద్. దేవుణు ఆక డాప్తాన్. ఎందనిజ్ ఇహిజి వారు అర్లం కిఎండ మండ్రెజ్. ఆ మాట వందిజ్ వన్నిజ్ వెన్బాదెజ్ వారు తియెల్ ఆతార్.

పెరికాన్ ఎయెన్ ఇజి గొడెబ రేప్పినార్

46 సిసూరు లొఇ ఎయెన్ పెరికాండ్రె ఇజి ఉండ్రీ ఇజ్జి గొడెబ వాతాద్. 47 యేసు వరి మన్నుదు మన్ని ఆలోసన నెస్తాండ్రె ఒరెన్ ఇజ్జి కొడెదిజ్ అస్తాండ్రె వన్ని వడెకాద్ నిల్పాన్. 48 నిల్పి వెన్కా వాండ్రు వరిజ్, “ఎయెన్బా యా ఇజ్జి కొడెదిజ్ నా ముస్సు, నమకం ఇజ్జికాన్ ఇజి ఒడిబిజి డగ్గు కితిజి, నజి డగ్గు కితి వజి. నజి డగ్గు కితికాన్ నజి పొక్తి దేవుణు డగ్గు కితి వజి. మీ లొఇ ఎయెన్ తగిజి మంజి నాండ్రె వాండ్రె పెరికాన్”, ఇజి వెహ్తాన్. 49 అయావలె యోహాను, “బోదకినికి, నీ సత్తుదాన్ దెయమ్కాజ్ పొక్తి మహి ఒరెన్ వన్నిజ్ మాపు సుడెతావ్. వాండ్రు మా వెట మనికాన్ ఆవెన్. అందెజి మాపు వన్నిజ్ అడ్డు కితావ్”, ఇజి వెహ్తాన్. 50 అందెజి యేసు, “వన్నిజ్ అడ్డు కిమాల్. ఎందనిజ్ ఇహిజి, మీ ముస్సు పగ సిలికాన్ మీ దరిజ్ మనికానె”, ఇజి వన్నిజ్ వెహ్తాన్.

* 9:33 9:33 వాండ్రు వెహ్తిక ఇనికబొ వన్నిజ్ తెలివిద్

యెరూసలెమ్మదు ప్రయాణం కిజినాన్

51 యేసు పరలోకముడు సొండ్రెజ్ దినమ్కుడగు ఆతివెలె వాండ్రు మున్ను పూర్తి నమకం కిజి యెరూసలెమ్మదు సొండ్రెజ్ సోతాన్. 52 వాండ్రు వన్నిజ్ మండ్రెజ్ బాడ్డిః తయార్ కిదెజ్ ఇజి సెగొండారిజ్ ముజాలే పోక్తాన్. వారు దని వందిజ్ సమరియ ఇనన్ని దేసెమ్ది ఉండ్రీ నాటో వాతార్. 53 గాని నాటోనికార్ వన్నిజ్ డగు కివతార్. ఎందనిజ్ ఇహిజ వాండ్రు యెరూసలెమ్మదు మన్ని దేవుణు గుడిఃదు సొని ఒరెన్ యూద వాండ్రు. 54 సిసూర్జ లోఇ యాకోబు, యోహాను ఇనికార్ యాక నుడఃతారె, “ప్రబువా, యా లోకురిజ్ నానసం కిదెజ్ ఆగాసం దాన్ మాపు సిను తపిస్తెజ్ నిజి ఇస్తమ్నెనా?” ఇజి వెన్బాతార్. 55 యేసు వరి దరోట్ మహూండ్రె వరిజ్ గటిజ వెప్తాన్. 56 నస్తివలె వారు మరి ఉండ్రీ నాటో సొహార్. 57 వారు సరిదాన్ సొన్ని మహివలె, ఒరెన్, “నీను ఎంబె సొహిజ్బా నాను నీ వెట వానా”, ఇజి వన్ని వెట వెప్తాన్. 58 అందెజె యేసు, “నక్కెజ మండ్రెజ్ బొరోజ్మన్నె. ఆగాసమ్ది పొటిజ మండ్రెజ్ గూడుఃకు మనె. గాని లోకు మరిసి ఆతి నజీ బుర్ర అడ్డు కిదెజ్బాడి సిల్లెద్”, ఇజి మరజి వెప్తాన్. 59 వాండ్రు మరి ఒరెన్ వన్నిజ్, “నా వెట రత”, ఇజి వెప్తాన్. అయావలె అయా వాండ్రు, “ప్రబువా, ముజాల నాను సొన్ని నా బుబ్బాజ్ ముసి వానా”, ఇజి వెప్తాన్. 60 అందెజె యేసు, “సాతికారి వరి సాతివరిజ్ముస్తెజ్. గాని నీను సొన్ని దేవుణు ఏలుబడిః వందిజ్ బోదినెత”, ఇజి వెప్తాన్. 61 మరి ఒరెన్, “ప్రబువా, నీ వెట నాను వానా. గాని నాను ముజాల మరజి సొన్ని నా ఇండ్రొణి వరిజ్ వెప్పి వాన”, ఇజి వెప్తాన్. 62 అందెజె యేసు, “మేడిః మున్ను కియు ఇడ్డి వెన్నా, మరజి బేస్సికాన్ ఎయెన్బా దేవుణు ఏలుబడిః కినివరి లోఇ ఎందనిజ్ పణిదిజ్ రఇకాన్”, ఇజి వెప్తాన్.

10

డబయ్ మణిసి సిసూరిజ్ సువార్త వందిజ్ పొక్కినాన్.

1 యాక జర్రితి వెనుక, ప్రబు మరి డబయ్ మణిసి సిసూరిజ్ ఏరెపాటు కితాన్. వాండ్రు సొని విజు పట్టుమ్కాజ్ విజు బాడిఃదు వన్ని ముజల రిఎరిజ్ రిఎరిజ్ పోక్తాన్. 2 పోక్కి, వాండ్రు వరిజ్ ఈహు వెప్తాన్, “కొయెదెజ్ మన్నిపంట లెకెండ లోకుర నండెండార్ మన్నె. గాని తక్కునె కొయెనికార్ తక్కునె అందెజె వన్ని పంట కొయెనివందిజ్ పణికిని వరిజ్ పోక్తె, ఇజి కోత్తె ఏజుమానిజ్ బతిమాల్దు ఇజి వెప్తాన్. 3 మీరు సొండ్రు! ఇదిలో, కార్నుకుడిఃజ నడిఃమి గొరె పిల్లెకాజ్ పోక్తిలెకెండ నాను మిజి పోక్కిన. 4 మీరు సన్ని గాని, డబ్బుజ్ ఇడ్డి సన్ని గాని, సన్నిదు మరి ఉండ్రీ జత జోడఃకు గాని ఒతెజ్ ఆవెద్. మీరు సర్లు ఎయెరిజ్ నెగెణ్ మనిదా ఇజి నిల్లి వర్రిజ, సమయం పాడు కిమ. 5 మీరు ఎయె ఇండ్రొ బా సొనివలె, “యా ఇండ్రొ మంజిని వరిజ్ సమాదనం కల్లిపిద్ ఇజి ముజాల వెప్తూ. 6 సమాదనం కోరిజినికాన్ ఒరెన్ బాన్ మహిజ, మీ సమాదనం వన్ని మున్ను, మంజినాద్. సీలిజ, మరజి మీ బానె వానాద్. 7 వారు ఇనిక సీతిజ్బా ఉణిజి తింజి బానె మండ్రు. ఎందనిజ్ ఇహిజ, పణి కిని వన్నిజ్పన్నిజ్కావాలస్తికెజ్దోహ్కెజ్తగ్గికాన్. ఇల్లు, ఇల్లు, బూలమాట్.

8 మరి మీరు ఎమేణి పట్టుమ్దు సొనివలె వారు మిజి డగు కిజి ఇనిక సీతిజ ఆకదె ఉండు. 9 బాన్ మని కస్తమ్ది వరిజ్ నెగెణ్ కిదు. దేవుణు ఏలుబడిః కిని కాలం మీ డగు వాత మనాద్ ఇజి వరిజ్ వెప్తూ. 10-11 గాని మీరు ఎమేణి పట్టుమ్దుబా సొనివెలె వారు మిజి డగు కివిండ మహిజ, అయా పట్టుమ్ది వీదిజ సొన్ని, “మా పాదమ్కాజ్ కస్తి మన్ని మీ పట్టుమ్ది డుల్లిబా ఇట్టె దులెప్పి సొన్సినావ్. ఎందనిజ్ ఇహిజ, దేవుణు మీ మున్ను, కోపం ఆత మనాన్ ఇజి తోరిస్తెజ్. గాని ఒడఃబిదు ఏలుబడిః కిని కాలం డగు ఆత మనాద్ ఇజి తవ్విండ నెస్తు”, ఇజి వెప్తూ. 12 నాను మిజి వెప్పిన, దేవుణు తీర్పు కిని దినమ్దు యా పట్టుమ్ది వరిజ్ సిక్కు మరి నండో మంజినాద్. సాదోమ పట్టుమ్దు మహి లోకురిజ్ ససా మన్వెద్. 13 ఓ కొరాజి పట్టుమ్దు మనికిదెరా, అబాయా మిజి ఎసొ పెరి కస్తమ్కు వాలె. ఓ బెత్సెయెదు పట్టుమ్దు మనికిదెరా, అబయా మిజి ఎసొ గొప్పు పెరి కస్తమ్కు వాలె. ఎందనిజ్ ఇహిజ, మీ నడిఃమి కితి బమ్మాతి గొప్పు పణిజ్ తూరు సీదోను ఇని పట్టుమ్కాజ్ కినిక ఇహిజ, వారు పూర్బమ్మదునె బస్త గరండెజ్ తోహా ఆజి, నీరు వాకె అజి, పాపమ్కు డిస్తావ్ ఇజి తోరిస్తార్ మరి. 14 దేవుణు తీర్పు కినివలె మీ పట్టుమ్కాజ్ సిక్కు, తూరు సీదోను పట్టుమ్కాజ్ నండో మంజినాద్లె. 15 కపర్నహొము పట్టుమ్దు మనికిదెరా, ఆగాసం దాక గొప్పు పెరికావ్ ఇజి ఒడిఃబిజినిదెరా? సిల్లె,

దేవుణు మిజి వాండ్లు మంజిని బాడిఁదాన్ అర్పాన్లె. ఇహిజు, దేవుణు మిజి నాసనం కిసాన్లె. 16 మరి యేసు వన్ని సిసూరిజ్, “మీ మాట వెనికాన్ నా మాట వెనాన్. మీ మాటదిజ్ నెక్కు పొక్కికాన్, నా మాటదిజ్ నెక్కు పొక్కికాన్. నా మాటదిజ్ నెక్కి పొక్కికాన్, నజి పొక్కి వన్నిజ్ నెక్కు పొక్కికాన్”, ఇజి వెప్తాన్. 17 డబయ్ మణిసి సిసూరు సర్దాన్ మర్జి వాతారె, “ప్రబువా, దెయమ్కుబా, నీ అతికారం దాన్ సొండ్లు ఇజి మాపు ఆడ్ర సీజినివలె మజి లోబడిఁజినె”, ఇజి వెప్తాన్. 18 నస్త్రీవలె యేసు, “ఓఓ, సయ్తాను మిరిస్త్రీ లెకెండ వన్ని అతికారం సిల్లెండ ఆగాసమ్దాన్ అర్తిక నాను సుడఁత 19 సారన్కాజ్ సోర్కుపిజ మట్టెజ్ మిజి అతికారం సిత్త మన్ను. సయ్తాను సత్తుదిజ్ గెల్లిన్జ్ మిజి అతికారం సిత్త మన్ను. సయ్తాను మిజి ఇనికబా కిదెజ్ అట్ఎన్. 20 దెయమ్కు మిజి లోబడిఁజినె ఇజి సర్ద లాపు ఆము. గాని దేవుణు మీ పేరు వాండ్లు మంజిని బాడిఁదు రాస్త మనాన్ ఇజి నండో సర్ద ఆదు”, ఇజి వెప్తాన్ 21 అయావలె యేసు, దేవుణు ఆత్మదాన్ నండో సర్ద ఆజి, “ఓ బా, నీనె ఆగాసమ్దిజ్ బూమిదిజ్ ప్రబు. నాను నిజి పొగిడిఁజిన. ఎందనిజ్ ఇహిజు, గెణం మని వరిజ్, నదు మని వరిజ్, యా నిజమాతి సజతి డాఁప్పిదె, ఇజ్రి కొడఁకె లెకెండ మని వరిజ్ తోరిస్త్రీ. ఓబ బా, అయ లెకెండ కిదెజి నిజి ఇస్టం ఆతాద్. 22 నా బుబ్బు నజి విజు సజతిజ్ నా కీదు ఒపజెప్త మనాన్. మరిసి ఎయెండ్రో ఇజి అప్పొసి నెస్సాన్. మరి ఎయెన్బా నెన్ఎన్. అప్పొసి ఎయెండ్రో ఇజి మరిసి ని అప్పొసిజ్ తెలివి కిదెజ్ మరిసి ఎర్లితికారె నెస్సార్. మరి ఎయెన్బా నెన్ఎన్”, ఇజి వెప్తాన్.

23-24 వాండ్లు సిసూర్ దరోట్ మహ్లాండ్రె, “దేవుణు వందిజ్ వాండ్లు కిని ఏలుబడిఁ వందిజ్ మీరు సుడఁతి గొప్ప సజతిజ్ సుడఁదెజ్ అట్టి మీరు అంతు సిల్లి సర్ద మంజినికార్. ఎందనిజ్ ఇహిజు, నండో ప్రవక్తరు, రాజురుబు మీరు సుడఁజినికెజ్, సుడఁదెజ్ ఇజి ఆస ఆతార్ గాని సుడఁదెజ్ అట్ఎతార్. మీరు వెహికెజ్ వెండ్రెజ్ ఇజి ఆస ఆతార్ గాని అట్ఎతార్”, ఇజి వన్ని సిసూరిజ్ నె వెప్తాన్.

పడఁకాదికాన్ ఎయెన్ ఇనివందిజ్ యేసు వెప్పినాన్

25 ఉండ్రీ నాండిజ్, యూదురు రూలు నెన్పిస్సాన్ ఒరెన్ నిజిజ, “ఓ బోదకినికి, ఎలకాలం దేవుణు వెలు బత్తిని బత్తు దోవొక నాను ఇనిక కిదెజ్?”, ఇజి యేసుజ్ పరిక్కు కిజి వెన్బాతాన్. 26 అందెజె వాండ్లు, యూదురి రూలుదు ఇనిక రాస్త మనాద్. బాన్ ఇనిక సద్విజిని?”, ఇజి వెప్తాన్. 27 వాండ్లు, “నీ ప్రబుఆతి దేవుణుదిజ్ నీ పూర్తి మన్నుదాన్, నీ పూర్తి పాణమ్దాన్, నీ పూర్తి సత్తుదాన్, నీ పూర్తి బుద్దిదాన్ ప్రేమిస్త్రెజ్”. మరి, “నిజి నీను ప్రేమిసిని లెకెండ మహివరిజ్ ప్రేమిన్ అ ఇజి రాస్త మనాద్”, ఇజి వెప్తాన్. 28 అందెజె యేసు, “నీను నెగెణ్ వెప్తి. ఆహె కిఅ. అయావలె నీను ఎలకాలం దేవుణు వెలు బత్తినిలె”, ఇజి వన్ని వెలు వెప్తాన్. 29 అయావలె అయా యూదురి రూలు నెన్పిస్సాన్ నీతి నిజాయితి మనికాన్ నాను ఇజి తోర్ ఆదెజ్ ఈహు వెన్బాతాన్, “నా పడఁకాదికాన్ ఎయెన్?”, ఇజి. 30 అందెజె యేసు ఈహు మహ్సి వెప్తాన్. “ఒరెన్ యెరూసలెమ్దాన్ డిఁగిజి యెరికొ పట్టుమ్దు సొనివెలె నెగెండార్ డొజారి వన్నిజ్ అస్తార్. అస్తారె, వాండ్లు తొడిగితి మహికెజ్ లాగితార్. వన్నిజ్ ఇజ్రి పాణం ఇట్టారె డెయితారె డిఁస్త్ర సొహార్. 31 యావలె ఒరెన్ యూదురి పుజెరి ఆ సరిదాన్ సొండ్రెజ్ పణి తాక్తాద్. వాండ్లు వన్నిజ్ సుడఁతాండ్రె పడఁకదాన్ సొహాన్. 32 అయా లెకెండెనె, లేవి* ఒరెన్ ఆ సరిదాన్ సొహాన్. గాని వాండ్లుబా సుడఁతాండ్రె పడఁకదాన్ ఎర్లిజి సొహాన్. 33-34 అయా సరిదాన్ నె ఒరెన్ సమరియ వాండ్లు పయాణం కిజి మహాన్. వాండ్లు అర్తి మని వన్నిజ్ సుడఁతాండ్రె వన్ని పాణం నొతాద్. వన్ని డగ్రు సొహండ్రె ఒలివ ఇని నూనె, ద్రాక్కుకల్లు వాక్తాండ్రె వన్ని గాయమ్కాజ్ తొహ్కాన్. వాండ్లు వన్ని సొంత గాడఁదె మున్ను ఎకిస్తాండ్రె ఉండ్రీ లార్జి ఇండ్రో సొహాన్. వన్నిజ్ నెగెణ్ సుడఁతాన్. 35 మహ్సి నాండిజ్ వాండ్లు రుండి వెండి రుపాయుజ్ లాగితండ్రె లార్జి సవకారిజ్ సితాన్. సితండ్రె, “వినిజ్ నెగ్రెండ సుడఁత. వినివందిజ్ మరి కర్ను ఆతి మహిజు నాను మర్జి వానివలె అయా డబ్బు నిజి సీన”, ఇజి వన్ని వెలు వెప్తాండ్రె సొహాన్. 36 యా కత వెప్తి వీస్తి వెనుక, యేసు వన్నిజ్, “డొజారి అస్తి వన్నిజ్ యా మువెర్ లొఇ ఎయెన్ పడఁకాదికాన్ ఆనాన్, ఇజి నీను వెహాల”, ఇజి వెన్బాతాన్. 37 యూదురి రూలు నెన్పిస్సాన్, “వన్ని మున్ను పాణం నొత్తికాండ్రె, వన్ని పడఁకాదికాన్”, ఇహాన్. అందెజె యేసు, “నీను సొన్ని యా లెకెండెనె కిఅ”, ఇజి వెప్తాన్.

* 10:32 10:32 దేవుణుగుడిఁదు రోజు సేవ కిని లేవి జాతిదు మన్నికాండ్రె లేవి ఇనికాన్.

మార్త మరియ

38 యేసు నీ వన్ని సీనురు పయనం కిజి సొన్ని మహార్. ఉండ్రి నాటొ సొహార్. అబ్బె మార్త ఇన్ని ఉండ్రి బోదెలి దన్ని ఇండ్రి వన్నిజ్ డర్పు కిత్తాద్. 39 దనిజ్ మరియ ఇన్ని ఉండ్రి తజిసి మనాద్. అది ప్రబు పాదమక డర్పు బస్తాదె వన్ని బోద వెంజి మహాద్.

40 మార్త విజు పణి వందిజ్ నండో బాద ఆజి వన్ని డర్పు వాతాద్. వాతాద్, “ప్రబువా, నాను ఒరెనె పణి కిదెజ్ నా తజి డింస్త మనాద్. నిజి బాద సిల్లెదా? నజి తోడుః కిల ఇజి దనిజ్ వెహాఅ”, ఇజి వెహాద్. 41-42 అందెజె యేసు, “మార్త, నీను నండో పణిజ వందిజ్ విసారిసి బాద ఆజిని. గాని ముకెలమతిక ఉండ్రె. మరియ అయా నెగ్గి దనిజ్ కోరితాద్. దన్నిబాణిజ్ ఎయెన్బా అయాక లాగ్గి ఒతెజ్ అట్ఎన్”, ఇజి వెహాన్.

11

యేసు పార్లనం నెన్పిస్తాన్

1 ఉండ్రి నాండిజ్ యేసు ఉండ్రి బాడిఃదు పార్లనం కిజి మహాన్. వాండ్రు పార్లనం వీస్తి వెన్యా వన్ని సీసూర్ లొఇ ఒరెన్, “ప్రబువా, యోహూను వన్ని సీసూరిజ్ పార్లనం నెన్పిస్తాన్. అయాలెకెండ్ మజిబా పార్లనం నెస్సినఅ”, ఇజి వన్నిజ్ వెహాన్. 2 అందెజె యేసు వరిజ్, మీరు పార్లనం కినివెలె ఈహు వెహు. “ముస్కు మన్ని మా బుబ్బు, లోకుర్ విజెరె నీ పేరు గొప్ప నెగ్గక ఇజి గవరం సిపిర్. నీను లోకుర్ విజెరిజ్ ఏలుబడిః కిపిన్. 3 రోజు రోజు కావాలిస్తి టిండి మజి సిదా. 4 మజి పాపమకు కితి వరిజ్ మాపు సెమిస్తి వజ నీను మా పాపం సెమిన్అ. తప్పు కిబిస్తిసెఇ అసెజ్ మాలోఇ రెవండ మజి ఇడోఃఅ”, ఇజి వెహాన్. 5-6 మరి యేసు వరివెలె ఈహు వెహాన్. “మీ లొఇ ఒరెన్ వన్నిజ్ ఒరెన్ కూలాయెన్ మనాన్. నీను మదరెయితు వన్నిబాన్ సొన్ని, ‘ఓ కులవాండ్రు, నజి మూండ్రి రొట్టెజ్ బదలు సిదా. ఎందనిజ్ ఇహిజ, మరి ఒరెన్ కూలాయెన్ పయాణం కిజిని సరిదాన్ నా బాన్ వాత మనాన్. వన్నిజ్ సీదెజ్ నాబాన్ ఇనికబా సిల్లెద్”, ఇజి వెహిని.

7 అయావలె వాండ్రు లొఇహాన్, “నజి బాద కిమ. సెహాల కెహ్తా మనాద్. నా ఇజి కొడోఃర్ నా వెటె నిద్ర కిజినార్. నిజ్జి సీదెజ్ నాను అట్ఎ”, ఇజి వెహానండ్రా? 8 నాను మిజి వెహిన్, వన్నిజ్ నిజ్జి సీదెజ్ ఇష్టం సిలిజ్బా వాండ్రు నిజ్జి సీనాన్. ఎందనిజ్ ఇహిజ, వాండ్రు కూలాయెన్ ఇజి ఒడిఃబిజి అహు కిపిన్. గాని సిగు డిస్తాండ్రె ఏక ఏక లొసినాన్ ఇజి ఒడిఃబిజి నిజి కావలస్తిక విజు సీనాన్. 9 అందెజె నాను మిజి వెహిన్, మీరు ఇనిక లొస్సిదెరో, అక్క దేవుణు మిజి సీనాన్. ఇనిక మీరు రెబాజినిదెరో అక దేవుణు మిజి సీనాన్. కొత్తు, మీ వందిజ్ దేవుణు సేహ్లా రెనాన్లె. 10 ఎందనిజ్ ఇహిజ, లొస్సి విజెరిజ్ దోహాకె. రెబాని వన్నిజ్ తోరె ఆజినాద్, కొత్తిని వన్నివందిజ్ సేహ్లా రే ఆనాద్.

11 మీ లొఇ అప్పొసి ఆతికాన్ ఎయెన్బా, వన్ని మరిసి మెయ లొస్తిజ, సరాన్ సీనాండ్రా? 12 కొరు గుడ్డు లొస్తిజ, సొర్కుప్పి సీనాండ్రా? 13 అహిజ, మీరు సెఇకిదెర్ ఆతిజ్బా, మీ కొడోఃరిజ్ నెగ్గి ఇనాయమకు సీదెజ్ నెస్సిదెర్. అహిజ, ముస్కు మన్ని మీ బుబ్బు వన్నిజ్ లొస్సి వరిజ్ ఎసానో దేవుణు ఆత్మ సీనాన్”.

యేసు బయిల్జెబెలు

14 యేసు ఒరెన్ వన్ని బాణిజ్ గుల్ల దెయమదిజ్ పేరిజి మహాన్. ఆ దెయం డింస్తి సొహి వెన్యా గుల్ల ఆతి మహికాన్ వర్గితాన్. ఆక నుడోఃతారె లోకుర్ విజెరె బమ్మ ఆతారె. 15 గాని వరి లొఇ సెగొండారె, “దెయమకాజ్ నెయెకి ఆతి బయిల్జెబెలు సత్తుదాన్ వీండ్రు దెయమకాజ్ పేరిజినాన్ ఇజి వర్గితారె. 16 మరి సెగొండారె వన్నిజ్ వరిన కిదెజ్ నుడోఃతారె. దేవుణుని వినిజ్పోక్త మనాన్ ఇజి రుజువ్ కిదెజ్ ఉండ్రి గుర్పు లెకెండ్ ఉండ్రి బమ్మ అని పణికిజి తోరిన్అ ఇజి వెహాన్. 17 వాండ్రు వరి ఆలోసన సెస్తాండ్రె వరి వెటె ఈహు వెహాన్, “ఎమేణి దేసెమదికారబా వరిజ్ వారె జటిజ్ ఆజి కేట ఆతిజ పాడాఃనాద్. ఆహె, ఉండ్రి కుటుంమదికారబా వరిజ్ వారె జటిజ్ ఆజి కేటఆతిజ, ఆ కుటుం నిల్విద్. 18 అయాలెకెండ్ సయ్యాను దెయమకుబా వరిజ్ వారె జటిజ్ఆజి కేట ఆతిజ, సయతాను వరి ముస్కు కిని ఏలుబడిః ఎలాగ నిల్నాద్? సయ్యాను సత్తుదాన్ నాను దెయమకాజ్ పేరిజిన ఇజి మీరు

వెప్పినది గదె. 19 అపొజు, మీ సొంత లోకుర్ ఇన్ని దని దనటాన్ దెయమ్కాజ్ పేర్జినార్. అందెజె మీ సొంత లోకుర్నె మీరు తప్పిదెర్ ఇజి రుజువ్ కిజినార్. 20 నాను దేవుణు సత్తుదాన్ దెయమ్కాజ్ పేర్ మన్నుఇహిజ దేవుణు ఏలుబడిః కినిక మీడర్లు వాతమనాన్ ఇజి రుజువ్ అజినాద్.

21 విజు అయుదమకు తోడిఃగిజి ఒరెన్ సత్తుమనికాన్ వన్నిఇల్లు అస్తి విజు కావ్ కితిజ, ఇనికబా సొరిసాన్ ఎద్. 22 గాని వినిజ్ మిస్తి నండొ సత్తు మనికాన్ ఒరెన్ వినిజ్ అస్తాండ్రె విని మున్ను గెలిస్తెజ, వీండ్రు నమ్మితి అయుదమకు విజు వాండ్రు లాగ్గి, విని అస్తి సీబాన సీనాన్. 23 నా దరిజ్ మన్ ఇకాన్ నజి పగాతికాన్. నా వెట మంద కిఇకాన్, సెద్రిస్సాన్. 24 ఉండ్రె దెయం ఒరెన్ వన్నిజ్ డిఃస్తి సొహి వెనుక, దనిజ్ మండ్రెజి బాడ్డి రెబాజి బయిలుదు బూలాజినాద్. గాని ఎంబెబా దనిజ్ బాడ్డి దోహ్క ఇతిజ్, “నాను డిఃస్తి వాతి నా ఇండ్రె మర్జి సానాలె”, ఇజి వెహ్సాద్. 25 మర్జి వాతిజ్ అది డిఃస్తి వాతికాన్ నెగెండొ సిపాజి సుబ్బరం కిజి ఇల్లు లెకెండొ, నెగెణ్ మనాన్ ఇజి నెస్తాద్.

26 నస్తివలె అది మర్రి సొన్ని దనిజ్ ఇంక సెఇకెజ్ ఆతి మరి ఏడు దెయమ్కాజ్ కూక్కు తనాద్, అవిక్ వన్ని లోఇ సొన్ని అబ్బి కినె. అయవలె వన్ని గతి ముందాహి దన్నిజ్ మున్ను క్షమ్మ నానాద్. 27 యేసు యా మాటెజ్ వెప్పి మహివలె, ఆ మంద లోఇ మన్ని ఉండ్రె బోదెలి, “నిజి కాన్సి పోసకితి నీ యాయ అంతు సిల్లి సర్ద మంజినికాద్”, ఇజి డటం వెహ్సాద్. 28 అయావలె వాండ్రు, “నిజమనె, గాని దేవుణు మాట వెంజి అయావజ నడిఃని విజెరెబా అంతు సిల్లి సర్ద మంజినికార్”, ఇజి వెహ్సాన్.

29 లోకుర్ మరి నండొ కూడిఃతి మహివలె, వాండ్రు ఈహు వెహ్సాన్. “యా తరమ్దికార్ నండొ సెఇకార్. వారు ఉండ్రె గుర్తు లెకెండొ ఉండ్రె బమ్మ అని పణి కిల ఇజి వెన్ బాజినార్. గాని దేవుణు ప్రవక్త ఆతి ఓనెజ్ ఇద్దిక అఎండ, మరి ఇన్ని గుర్తుబా వరిజ్ తోర్ ఎద్. 30 నినవె పట్టుమదివరిజ్ ఓన ఎలాగ ఉండ్రె గుర్తు మహండ్రె అయాలెకెండొ లోకు మరిసెఆతి నాను యా తరమ్దివరిజ్ ఉండ్రె గుర్తు మనాన్. 31 అక్కరి దినమది తీర్పుదు, దనిణ్ దేసెమది రాణి యా తరమ్ది లోకుర్ వెట నిజ్ నాదె వరి మున్ను నేరం మొప్పాద్. ఎండనిజ్ ఇహిజ, సొలోమోను వెప్పిని గెణం మన్ని మాటెజ్ వెండ్రెజ్ బూమి కొసాదు మన్ని దని దేసెమదాన్ అది వాతాద్. ఏలు సొలోమొనుజ్ మిస్తి పెరికాన్ ఇబ్బె మనాన్. 32 కడెవేరి దినమది తీర్పు, నినివె పట్టుమది లోకుర్ యా తరమ్ది లోకుర్ వెట నిల్ నారె, వరి మున్ను నేరం మొప్పార్. ఎండనిజ్ ఇహిజ, ఓన వెహ్సా బోద వెహరె, వారు పాపమకు డిఃసి ఒప్పుకొటార్. ఏలు ఓనెజ్ మిస్తి పెరికాన్ ఇబ్బె మనాన్.

ఒడొలొది దీవవందిజ్ వెప్పినాన్

33 ఎయెర్బా దీవ కనిసి వెనుక డాప్పినొ, తూము మునినొ ఇడెవెర్. గాని లోఇ వానివరిజ్ జాయి తోర్దెజ్ ఇజి దీవ కంతూదుదనె మున్నునె ఇడ్వార్. 34 నీ ఒడొలొది దీవ లెకెండొ నీ కణుకు. నీ కణుకు నెగెండొ మనివలె, నిజి విజు సుడెఃదెజ్ ఆనాద్. అయారెజ్ సెఇకెజ్ ఆతిజ, నిజి సుడెఃదెజ్ అల్ ఓ. 35 అందెజె సీకటు మన్ ఎండ, నాను నెస్పిన్సి నిజమాతి సజతిజ్ ఆతి జాయి మీ మన్నుదు మండ్రెజ్ సుడెఃదు. 36 అందెజె మన్ను పూర్తి అయా జాయిదాన్ నిడ్రెంతి మహిజ, అయారె నాను నెన్ పిస్తి వజ, నెగెండొ మీరు బత్తిజనిదెర్ ఇజి తోర్వార్. ఉండ్రె పెరి జాయి నీ మున్ను డెఃయితిజ ఎలాగ మంజినాదొ, అయాలెకెండొ అయా జాయి నాను నెన్ పిస్తి వజ మీరు బత్తిజనిదెర్ ఇజి తోర్వార్. 37 యేసు వర్గిజి వీస్తి వెనుక ఒరెన్ పరిసయు వాండ్రు, వన్ని వెట ఉండ్రెజ్ రల, ఇజి కూక్కాన్. అందెజె వాండ్రు లోఇ సొహండ్రె ఉండ్రెజ్ బస్తాన్. 38 ఉణి ముజాల వాండ్రు యూదురిజ్ మన్ని అలవాటు వజ కియు నొర్బావితాన్ ఇజి నెస్తాండ్రె, ఆ పరిసయు వాండ్రు బమ్మ ఆతాన్. 39 అందెజె ప్రబు ఈహు వెహ్సాన్, “పరిసయురుజాండె, లోకుర్ మున్నుహాన్ మిడిఃస్తి ఇడ్డి గెన్నిజ్ నీ సొడువెజ్ లెకెండొ మన్నికిదెర్? మీరు మిజిబా వెల్లిహాన్ సుడిఃజ నెగ్గవరి లెకెండొ తోర్ ఆజనిదెర్. గాని మీ మన్ను సెఇ బుద్దిజాణిజ్, కకుర్తిదాన్ కూడిఃతి ఆసదాన్ నిండ్రెతె మన్నె. 40 బుద్ది నిలికిదెరా, ఒడొలొ తయార్ కిత్తి దేవుణునె మీ మన్నుదు మన్ని ఆలోసనమకు నెనినికాన్ 41 మీరు కనికారం ఆజి, మిజి కల్గితి మన్ని లోఇహాన్ సిల్లి వరిజ్ దాన సీదు. అయావలె దేవుణు ఎద్రు నెగ్గికిదెర్ ఆనిదెర్. 42 పరిసయురుజాండె, అబాయా, మిజి ఎసొనొ క్షమ్మకు వాలెలి. ఎందానిజ్ ఇహిజ, పుదిన, నదాప, విజు కుసెజ్, విజు దనిజ్ బా దసం బాగం సీజనిదెర్. గాని మీరు లోకురిజ్ నాయం కిఇదెర్. దేవుణుదిజ్ ప్రేమిసెఇదెర్. రుండిబా ఉండ్రెలెకెండొ కిజి మంజినిక

ఇహిజ ఒద్దె నెగ్గెండ్ మహాద్ మరి. 43 పరిసయురుజాండె, అబాయా మిజి ఎసానొ కష్టమ్కు వానెలె. ఎందానిజ్ ఇహిజ, యూదురి మీటిజ్ ఇల్కాజ్ ముకెలమాతి బాడిడు బస్తెజ్ మీరు ఆస ఆనిదెర్. సతెజ నడిమి పెరికార్ ఇజి మాడెనె ఆదెజ్ కోరిజనిదెర్. 44 పరిసయురుజాండె, అబాయా, మిజి ఎసానొ కష్టమ్కు వానెలె. ఎందానిజ్ ఇహిజ, మీరు తోరెఇ దూకిలెకెండ్ మంజినిదెర్. లోకుర్ దూకి ఇజి నెన్ఎండ వన్కా ముస్సు నడిజినార్. 45 అయావలె యూదురి రూలు నెన్పిస్సాన్ ఒరెన్, “బోదకినికి, నీను యా లెకెండ్ వెప్పి మజిబా దుసలాడిజని”, ఇజి వెప్తాన్. 46 అందెజె యేసు, యూదురు రూలు నెస్సిస్సికిదెరా, అబాయా మిజి ఎసానొ కష్టమ్కు వానెలె. ఎందానిజ్ ఇహిజ, లోకుర్ కిదెజ్ నసా కష్టం మన్ని యూదురి రూలుజ్, అలవాటుజ్ వారు కిదెజ్ ఇజి వెప్పినిదెర్. గాని మీరు వరిజ్ ఉండ్రె డెడెస్సు దాన్బా తోడు: కిఇదెర్. 47 యూదురి రూలు నెస్సిస్సికిదెరా, అబాయా మిజి ఎసానొ కష్టమ్కు వానెలె. ఎందానిజ్ ఇహిజ, మీ అనిరిజ్ సప్తి ప్రవక్తరి, దూకిజ్ ముస్సు మీరు గుండమ్కు పెర్జిన్దెర్. 48 అయావలె వారు కితిపణివెట మీరు కూడితి మనిదెర్ ఇజి రుజుమ్ కిజినిదెర్. సాక్సిరిలెకెండ్ మనిదెర్ వారు ప్రవక్తరిజ్ సప్తార్. మీరు వరి గుండమ్కు పెర్జినిదెర్. 49 అందెజె, దేవుణు వన్ని గెణమ్దాన్, ‘నాను వరి నడిమి ప్రవక్తెజ, అపొస్తుడుజ పొక్కు. వరి లోఇ నెగెండారిజ్ వారు సప్తార్లె. మరి నెగెండారిజ్ మాతెజ్ కినార్లె. 50-51 యా లోకం పుట్టి బాణిజ్ మొదొల్ని లోకుర్ సప్తి విజు ప్రవక్తరి నల్ల వందిజ్ యా తరమ్ది లోకురిజ్ సిక్కు వానాద్. ఇహిజ, ఏబేలు నల దాన్ మొదొల్ని జెకరియ నల దాక. జెక్యెజ్ నంద సుర్మి మాళి పీటని దేవుణు వందిజ్ కేటఆతి గది, దినిజ్ నడిమెనె సప్తార్. వరిజ్ విజెరిజ్ సప్తికెజ్ విజు యా తరమ్దివరి పణినె ఇజి నాను నిజం మీవెట వెప్పాన్.

52 యూదురి రూలు నెస్సిస్సికిదెరా, అబాయా, మిజి ఎసానొ కష్టమ్కు వానెలె. ఎందానిజ్ ఇహిజ, దేవుణు వందిజ్ మన్ని గెణమ్దాన్ నడిపిసిని సేహాలది తాలం మీరు అసినిదెర్. మీరు దేవుణుదిజ్ టెటాజ్ నెన్ఇదెర్. దేవుణుదిజ్ నెస్సెజ్ ఆస మన్ని వరిజ్ మీరు అడ్డు కిజినిదెర్. 53-54 వాండ్రు అబెదాన్ సాహి వెనుక, పరిసయురు యూదురి రూలు నెస్సిస్సికార్ నండొ కోపమ్దాన్ వన్నిముస్సు నేరం మొప్తార్. వన్ని వెయ్దాన్ వాని మాటెజ లోఇ తప్పజ్ అస్తెజ్ ఇజి నండొ సజతిజ వందిజ్ ప్రస్సెజ్ వెనబాజి మహార్.

12

1 సస్తివలె వెయుజ్వెయుజ్ లోకుర్ కూడిజి వాతార్. ఒరెన్దిజ్ ఒరెన్ మట్టె ఆజి మహార్. అయావలె యేసు ముజాలె వన్ని సిసూర్ వెట ఈహు వర్గిదెజ్ మొదొల్స్తాన్. “మాపు నెగ్గెండ్ ఇజి పరిసయురు తోరి ఆని వేసం, పులాని దూరు లెకెండ్ మనాద్. అందెజె జాగర్త మండ్రు. 2 డాప్తిక మన్నికెజ్ విజు తోరిఆనెలె. నెన్ఎండ ముస్సు మన్నికెజ్ విజు నెనె ఆనెలె. 3 అందెజె మీరు సికటుదు వర్గితికెజ్ జాయిదు వెనార్. ఇహిజ, డాజ్జి వర్గితికెజ్ విజెరి వెనార్లె. మీరు గదిజ, గిబ్బిదు వర్గితిక మెడిజి ముస్సు సాట్నార్లె.

4 నా కూలెజాతి మీ వెట వెప్పాన్, ఒడెల్దిజ్ సప్తి వెనుక మరి ఇనికబా కిదెజ్ అట్ఇ వరిజ్ తియెల్ ఆమాట్. 5 గాని మీరు ఎయెరిజ్ తియెల్ ఆదెజ్ ఇజి నాను నెన్పిస్సు. ఒడెల్దిజ్ సప్తి వెనుక, ఎలాకాలం మంజిని బాడిడు పొక్తెజ్ అతికారం మన్ని వన్నిజ్ తియెల్ ఆదు. నిజమె నాను వెప్పాన్, వన్నిజ్ తియెలాదు. 6 అయ్దు పంట పొటిజ రుండి కాసుదిజ్ పొర్నార్ గదె? గాని వన్కాలోఇ ఉండ్రె దనిజ్బా దేవుణు పోన్ఎన్. 7 మీ బురాది కొప్పు విజుబా దేవుణు లెకిస్త మనాన్. తియెలామాట్. మీరు నండొ పంట పొటిజ మిస్సి విలువ మన్నికిదెర్.

8 నాను మిజి వెప్పాన్, లోకుర్ ముజాలెనజి ఒప్పకొణి ఎయెవన్నిజ్బా లోకుమరిసి ఆతి నాను దేవుణు దూతెజ ఎద్దు ఒప్పకొణా. 9 గాని లోకుర్ ఎద్దు నజి నెన్ఎ ఇన్ని వన్నిజ్ దేవుణు దూతెజ్ ఎద్దు నాను బా నెన్ఎ ఇజి వెప్తా. 10 లోకుమరిసిఆతి నా ముస్సు ఎయెన్బా పడిఃఇ మాటల వర్గితిజ, దేవుణు వన్నిజ్ నెమిస్సాన్. గాని దేవుణు ఆత్మదిజ్ దూసిస్సి ఎయెరిజ్బా దేవుణు నెమిస్సాన్.

11 వారు మిజి యూదురి మీటిజ్ ఇల్కాణిజ్ యూదురి అతికారిజ ఎద్దునొ, పెద్దల్జ ఎద్దునొ ఒనార్. అయావలె ఎలాగ మరెజ వెప్తాజ్, ఇనిక వెప్తాజ్, ఇనిక వర్గిదెజ్ ఇజి బెజఆమాట్. 12 ఎందానిజ్ ఇహిజ, మీరు వర్గిదెజ్ మనిక అయ్యా గడిఃయద్నె దేవుణు ఆత్మ మిజి నెన్పిస్సాన్.

అస్త్రీవన్నీ బుద్ధిసిల్లి వన్నీవందిజ్ నెన్ పిసిని కత

13 అయావలె ఆ మందలో ఇ ఒరెన్, “బోదకినికిదా, నా బుబ్బు గణస్తి దనిజ్ నజీ వానివంతు సీబాజి సీఅ ఇజ నా అన్నెజ్ వెవోఅ”, ఇజి వెవ్తాన్. 14 అయావలె యేసు, “ఒరె, మీ మున్ను తీర్పు కిని వన్నీ వజనో, సీబాజి సీని వన్నీ వజనో నజీ ఎయెన్ నిల్ ప్తాన్?”, ఇజి వెవ్తాన్. 15 మరి వరిజ్ వెవ్తాన్, “జాగర్త మండ్రు. ఇని దనిజ్ బా లావుఅనెజ్ ఆమాట్. ఎందనిజ్ ఇహిజ, ఎసా ఆస్త్రీమన్నీకాన్ ఆతిజ్ బా, వన్నీ ఆస్త్రీలో ఇ వన్నీ బత్తు ఆవిద్. ఇహిజ ఆస్త్రీవన్నీజ్ నిజమాతి బత్తు సివిద్. 16 మరి వాండ్రు వరిజ్ కతవజ ఈహు నెన్ పిస్తాన్. “ఒరెన్ ఆస్త్రీ మనివన్నీజ్ బూమిదు నండో పంట పంటితాద్. 17 అయావలె వాండ్రు, ‘నా గింజ ఇడెదెజ్ నజీ బాడ్డి సాల్ ఎద్. అందెజె ఇనిక కిదెజ్?”, ఇజి వన్నీమన్నుదు వాండ్రు ఒడిజి తాన్.

18 ఒడెబితాండ్రె, ‘నాను ఈహుకిన. నా గాదిజ్ లాగ్గి పెరికెజ్ కిన్. అబె నా గింజెజ్, మహి సామానమ్ కుజ్ విజు ఇడ్చు’, ఇజి వెవ్తాన్. 19 మరి నాను, నా వెట ఈహు వెప్పా, ‘నజీ నండో పంటిజ్ వందిజ్ నండో ఆస్త్రీ కుడుజ్ ప్త మన్ను. నుకం ఆఅ. ఉణఅ, తిన్ అ, నరద్ ఆజి మన్ అ’, ఇజి.

20 గాని దేవుణు వన్నీజ్, ఒ బుద్ధి సిలికి, యా రెయునె నీ పాణం లొసిన. అయావలె నీ వందిజ్ ఇడ్డి మనికెజ్ ఎయెరిజ్ ఆనెలె? ఇజి 21 సొంత బత్తు వందిజ్ ఆస్త్రీ కుడుజ్ ప్తి ఎయెరిజ్ బా యా లెకెండ్ వానాద్. గాని, దేవుణు ఎద్రు, దేవుణుదిజ్ ఇష్టం ఆనివజ వాండ్రు ఆస్త్రీమనికాన్ ఆవిన్”.

ఇని దనిజ్ బా విసారిస్మాట్.

22 మరి, యేసు వన్నీ సిసూర్ వెట ఈహు వెప్పొనాన్, “అందెజె, నాను మిజి వెప్పొన, మీరు ఇనిక ఉండెజ్ ఇజి పాణం వందిజ్ విసారిస్మాట్. ఇనిక తోడెగిదెజ్ ఇజి ఒడిజెల్ వందిజ్ విసారిస్మాట్. 23 ఎందానిజ్ ఇహిజ, టిండి మున్ను పాణం ముకెలమతిక. సొక్కెజ్ మున్ను ఒడెల్ ముకెలమతిక. 24 కాకిజ వందిజ్ సుడెదు. అవి విత్ ఉ, కొయి ఉ, వన్నాజ్ గాదిసో గప్పెజ్ నో సిల్లు. గాని దేవుణు వన్నాజ్ తిండి సీజినాన్. అహిజ పొటిజ మున్ను మీరు ఎసా విలువ మనికిదెర్. 25-26 మీ లో ఇ ఎయెన్ బా విసారిసి వన్నీ బత్తుదిజ్ ఉండ్రె గంటబా కుడుజ్ ప్తి మీ వయ్ ను పిరిస్తెజ్ అట్ నిదెరా? అట్ ఇదెర్. యా ఇజ్రి పణికిదెజ్ మీరు అట్ ఇదెర్ ఇహిజ మరి ఎందనిజ్ మహి పెరి సజతిజ వందిజ్ విసారిస్మిదెర్. 27 పూజదిజ్ సుడెదు. అవి కష్టబడిఉ. సొక కిదెజ్ నూలుజ్ తయార్ కిఉ. ఆజ్ బ విజు ఆస్త్రీ కలిగితి మన్నీ సొలో మొన్ రాజు యా ఉండ్రె పూజలెకెండ్ సొకు మన్నీ ఉండ్రె సొక్కె తోడిగివితాన్ ఇజి నాను మిజి వెప్పొన. 28 నేండ్రు మంజి విగిహిజ్ సిసూదు వినిర్ని మడిజు మంజిని గడ్డిదిజ్ యా లెకెండ్ దేవుణు సొకు సితాన్, ఇహిజ ఇజిరి నమకం మన్నీకిదెరా మరి ఒద్దె నెగెండ్ సొకెజ్ మిజి సొక్కెజ్ తోడిగిన్ పింద్రా? 29 ఇనిక ఉండెజ్, ఇనిక తిండ్రెజ్ ఇన్నీ దనిజ్ ఎత్తు కిజి విసారిస్మాట్. 30 ఎందనిజ్ ఇహిజ, దేవుణుదిజ్ నెన్ ఇకారెన్ విన్ను వందిజ్ రెబాజినార్. మిజి యాకెజ్ కావాలె ఇజి మీ బుబ్బాతి దేవుణు నెస్తాన్. 31 గాని దేవుణు మిజి ఏలుబడి: కిసాన్ ఇజి ఆసఆదు. అయావలె దేవుణు మిజి కావాలిస్తెకెజ్ విజు సీనాన్. 32 ఇజిరిమంద తియెల్ ఆమాట్. దేవుణు, వన్నీబత్తుదు రాజులెకెండ్ ఇట్టి వరిజ్ నెగ్గికెజ్ సీదెజ్ మీ బుబ్బు ఇష్టం ఆత మనాన్. 33 మిజి కలిగితి మనికెజ్ పొర్ని బీదవరిజ్ సీదు. అయావలె మీరు దేవుణు మంజిని బాడి:దు మీ వందిజ్ ఆస్త్రీ గణస్మిదెర్. అబ్బె డోజారి రవన్. కరి తిన్ విద్. అందెజె మీ ఆస్త్రీతకు ఆవిద్. 34 ఎందనిజ్ ఇహిజ, మీ ఆస్త్రీఎంబె మనాదో, అబెనె మీ మన్నుబా మంజినాద్. 35-36 ఎస్త్రీవలెబా పణికిదెజ్ నడు:ము తోహె ఆజి, తయార్ ఆజి మండ్రు. మీ దీవెజ్ ఎస్త్రీవలెబా కసిని మండ్రు. పెండ్లి విందుదాన్ ఇండ్రో వాజిని ఎజుమానిజ్ ఎద్రు సుడె:జి మంజిని పణిమణిసిర్ పొలిసి మండ్రు. ఎజుమాని విందుదాన్ వాజి సేళ్ళ కొత్తివెలె వెటనె సేళ్ళ వాండ్రు రేనాన్. నన్నీవరిజ్ పొలిసి మండ్రు. 37 ఎజుమాని వాతివెలె, వన్నీ వందిజ్ తెలి మంజి ఎద్రు సుడె:జి మంజిని పణిమణిసిర్ కెగెద్. నిజమె నాను వెప్పొన, ఎజుమాని, నడు:ము తోహె ఆజి, బోజనమ్ దిజ్ వాతి వరిజ్ బనె కిజ్రి వరిజ్ తిండి సీనాన్. 38 ముదరెయెత్తునో కోడి:జామనో ఎజుమాని వాతివెలె, వన్నీవందిజ్ ఎద్రు సుడె:జి తెలి మంజిని వన్నీజ్ నెగెద్. 39 ఎమేణి గడి:యదు డోజారి వానాన్ ఇజి ఇండ్రోణి ఏజుమాని నెస్తెజు వాండ్రు తెలిమంజి వన్నీ ఇల్లు బోరో కివీండ సుణాన్ ఇజి మీరు

నెస్తు. 40 మీరు నా వందిజ్ ఎద్రు సుడఃఱ గడ్డిఃయాదు, లోకు మరిసి ఆతి నాను వాన. అందెజె మీరు బా తయార్ ఆజి మండ్రెజ్ వెలె.

41 అయావలె పేతురు, “ప్రబువా, యా కతవజ మజినె నెన్పిన్నిదా, విజెరిజ్ నెన్పిన్నిదా?”, ఇజి యేసుజ్ వెన్బాతాన్.

42 అందెజె యేసు, “నమకుం మని, బుద్దిమని గొత్తి మణిసి ఎయెన్? ఎయెన్ ఇహిజు, ఇండ్రోణి మహి గొత్తియారిజ్ సరిఆతి గడ్డిఃయా సుడఃజి వరి కార్డువజ వరిజ్ దోహక మన్ని తిండి సామనమ్కు సీదెజ్ ఇజి ఎజుమాని వరిముస్సు వీరపాటు కిత్తికాండ్రె. 43 ఎజుమాని మరజి వానివలె వెహ్తివజ పణికితి వన్నిజ్ నెగెద్. 44 అయ ఎజుమాని వన్నిజ్ కల్గితి మన్ని విజు దనిముస్సు అతికారం మని వన్నిలెకెండ్ వన్నిజ్ కిసాన్, ఇజి నాను నిజం వెహ్సిన. 45-46 గాని, ఉండ్రె వేల యా గొతియయెన్, ‘నా ఎజుమాని వాదెజ్ అల్ నం ఆజినాన్’ ఇజి వన్నిముస్సుదు ఒడిబిజి, మహి గొతియారిజ్ గొతియాణికాజ్ డెయిజినాన్. వాండ్రు ఉణిజి, తింజి సోస్త మహాన్. ఆహె మహిజ్, వాండ్రు ఎద్రు సుడఃఱ దినమ్దు నెన్ ఇ గడియాదు వన్ని ఎజుమాని వానాన్. అయావలె వాండ్రు వన్నిజ్ కత్తి దేవుణుదిజ్ నమ్ ఇ వరివెలె వరి వందిజ్ తయార్ కిత్తిమన్ని బాడ్డిదు పొక్కాన్.

47 ఎజుమాని ఇస్టమ్కు నెసిబా అయావజ కిండ్ తయారాజి మన్ ఎండ మన్ని గొతియ వన్నిజ్ నండో సిక్సినాన్. 48 ఎజుమాని ఇస్టమ్కు నెన్ ఎండ, సిక్సదిజ్ తగితి పణిజ్ కితి వరిజ్ కండెక్ సిక్సనె సినాన్. ఎయెరిజ్ దేవుణు నండో సిత్త మనాండ్రో వన్నిబాణిజ్ నండో లొస్సాన్. ఎయెన్ బాన్ దేవుణు మరి నండో ఒపజెప్త మనాండ్రో, వన్నిబాణిజ్ నండోనె లొస్సాన్. 49 సిసు లెకెండ్ మన్ని దేవుణు సీని సిక్స యా లోకమ్దు తత్తెజ్ నాను వాతమన. ఆక విజెరిజ్ సురనాద్. ఏలునె సురుదెజ్ మొదొల్స్తిజి బాగ మంజినాద్, ఇజి ఆస ఆజిన. 50 కస్తం ఇని ఉండ్రె బాప్తిసంబా లాగెఆదెజ్ మనాద్. ఆక్కు పూర్తి కినిదాక నజి నండో విసారం మంజినాద్. 51 యా లోకమ్దు సమాదనం తత్తెజ్ నాను వాతమన్న ఇజి మీరు ఒడిబిజినిదెరా? సిల్లె, కేటకిదెజ్ నె వాత మన్న. 52 ఏలుదాన్ అయదుగురు మంజిని ఉండ్రె కుటుం వరిజ్ వారి కేట ఆనార్లె. మువీర్ ఉండ్రె పడఃకాద్ రివీర్ మరి ఉండ్రె పడఃకాద్. 53 వారు కేట ఆనార్లె. అప్సాసి మరిసిజ్ ని, మరిసి అప్సాసి జ్ ని, అయిసి గాల్పిజ్ ని, గాడ్ఫి దని అయిసిజ్ ని, మీమ్ సి దన్ని కొడెసిజ్ ని, కొడెసి దన్ని మీమ్ సిజ్ ని పడిఎండ మంజినాద్.

54 అయావలె వాండ్రు మందలొకుదిజ్ ఈహు వెహ్సాన్, “పడఃమటదాన్ మొసావ్ వాతిక సుడఃతిజి పిర్తు వానాద్, ఇజి మీరు వెహ్సాద్. ఆహె జర్గినాద్. 55 దసిణదాన్ గాలి వాతిజి గొప్పుఎండ కినాద్ ఇజి వెహ్సాద్. ఆహె జర్గినాద్. 56 వేసం కినికిదెరా, మీరు బూమిదు ఆగసమ్దు జర్గినికెజ్ సుడఃజి గుర్తు అస్తెజ్ నెస్సిదెర్. మరి ఎందానిజ్ యా కాలమ్దు జర్గినికెజ్ గుర్తు అస్తెజ్ మీరు అట్ ఏండ మంజినిదెర్? 57 ఎమేణిక నాయం ఇజి మిజి మీరె తర్పు కిదెజ్ అట్ ఇదెరా? 58 మీ ముస్సు నేరం మొప్పివన్నివెటె లాయిరి కోర్టుదు సొన్ని మహివలె సర్దు వన్ని వెటె రాజనం ఆదెజ్ సుడఃదు. సిలిజ, వాండ్రు మిజి తీర్పు కిని వన్ని డగ్రు ఈడిసి ఒనాన్. తీర్పు కినికాన్ జమాన్ జి ఒపజెప్సాన్. వాండ్రు మిజి జెలిదు ఇడ్సాన్. 59 తీర్పు కినికాన్ లొస్సి డబ్బు విజు సీనిదాక జెలిదాన్ వెల్లి వాదెజ్ అట్ ఇదెర్ ఇజి నాను మిజి వెహ్సిన.

13

పాపం డిఃసిసిదు, సిల్లిజి నానసం వానాద్

1 అయావలె బాన్ మహికార్ సెగొండార్ యేసుజ్, గలిలియాతి సెగొండార్ వరిజ్ వెహ్సార్. ఇనిక వెహ్సార్ ఇహిజు, గలిలియాతికార్ పూజి కిజి మహివలె, పిలాతు వరిజ్ సపిస్తాన్. అయావలె పూజిసత్తి నలని లోకురనల కూడితాద్. 2 అందెజె యేసు వరిజ్, “వరిజ్ సప్తారె యా లెకెండ్ నండో బాదెజ్ కితార్. అందెజె వారు మహి గలిలియాతి వరి విజెరి ఇంక నండో పాపం కితికార్ ఇజి మీరు ఒడిబిజినిదెరా? 3 సిల్లెద్ ఇజి మీవెటె వెహ్సిన. గాని మీరు పాపమ్కు డిఃసిసిదు. సిల్లిజి, మీరు విజెరెబా అయాలెకెండ్ నానసం ఆనిదెర్. 4 మరి సుడఃదు, సిలొయెము ఇని పట్టుమ్దు నిరిండ్ తొహ్తిమన్ని గుడిః అర్దిజ్, యెరూసలెమ్దు బత్తిజి మహికార్ పద్ ఎనిమితి మణిసి సాతార్. వారు బత్తిజిని వరి ఇంక నండో సెకార్ ఇజి మీరు ఒడిబిజినిదెరా? 5 సిల్లె ఇజి నాను మీ వెటె వెహ్సిన. గాని మీరు పాపం డిఃసి

సీదు. సిలిజ, మీరుబా అయాలెకెండ్ నాసనం అనిదెర్. 6 మరి వాండ్రు కతవజ ఈహు నెన్పిస్తాన్. ఒరెన్ వన్నిజ్ ద్రాక్కు టోట మనాద్. అబ్బె వాండ్రు బోడెమరాన్ ఉండ్రి ఉణుస్తాన్. వాండ్రు దన్నిపట్టు రెబాతివెలె ఇనికబా దోహ్కవతాద్. 7 అందెజె వాండ్రు, ‘ఇదిలో నాను మూండ్రి పంటకాణిజ్ యా మరాతి పట్టుజ్ రెబాజి వాజిన. గాని ఇనిక బా దోహ్కవతాద్. దినిజ్ కత్తి విసీర్అ. దిన్నిదనాట్ యా బూమి ఎందనిజ్ పాడాడెజ్?’, ఇజి టోట కావ్కిని వన్నివెట వెప్తాన్. 8 అందెజె వాండ్రు, “బాబు యా ఉండ్రి ఏంటు మనిద్. నాను సుటులం కార్సి గతం పొక్కి సూణాట్. 9 అక్కపట్టు అస్తజి నెగెద్, అన్ఇజి కత్తి విసీర్అ”, ఇజి వెప్తాన్.

విస్తాంతిదినమ్దు నడుము వజీతి ఉండ్రి బోదెలిదిజ్నెగెణ్కిజినాన్

10 ఉండ్రి విస్తాంతిదినమ్దు, యేసు ఉండ్రి యూదురి మీటిజ్ ఇండ్రో బోదె కిజి మహాన్. 11 అబె పద్ఎనిమితి పంటకాణిజ్ నడుము వక్కి దెయం అస్తి ఉండ్రి బోదెలి మహాద్. దన్ని నడుము వజీతిజ్, అనల నెగెణ్ నిల్దెజ్ అట్ఎద్. 12 యేసు దనిజ్ సుడేశాండ్రె, “రఅ”, ఇజి డర్సు కూక్తాన్. మరి, “బీబి, నిజి మన్ని కస్తమ్కాణిజ్ నాను డిస్పిన్న”, ఇజి దనిజ్ వెప్తాన్. 13 మరి దనిమున్ను వన్ని కికు ఇట్టాన్. వెటనె అది నెగెణ్ నిహదె, దేవుణుదిజ్ పొగిడితాద్.

14 విస్తాంతి దినమ్దు యేసు నెగెణ్ కితిజ్, యూదురి మీటిజ్ఇండ్రోణి అతికారి నండ్రోకోపం ఆతాన్. ఆతాండ్రె, లోకురిజ్పణి కిదిజ్ ఆరు దినమ్కు మనె. అందెజె మీరు ఆ దినమ్క లోఇ వాజి నెగెణ్ అదు. విస్తాంతి దినమ్దు రమాట్”, ఇజి వెప్తాన్. 15 అందెజె యేసు, “ఓ వేసం కినికిదెరా, మీ లోఇ విజిదెరెబా మీ డాసుదిజ్, మీ గాడెదెదిజ్ విస్తాంతి దినమ్దు సాలాదాన్, డిసి ఒసి ఏరు సీజినిదెర్ గదె? 16 అహిజ, అబ్రాహముజ్ తెగ్గతి యా బోదెల్దిజ్ పద్ఎనిమితి పంటకా సయతాను తోప్తా ఇట్టా మనాన్. విస్తాంతి దినమ్దు దనిజ్ తోహ్క కి బాణిజ్ డిస్పిస్తెజ్ కూడెఎదా?”, ఇజి వరిజ్ వెప్తాన్. 17 వాండ్రు యా మాటెజ్ వెప్తివలె వన్ని పగాతికార్ విజెరె సిగు ఆతారె, మొకొం డిప్టారె. గాని లోకురి విజెరె వాండ్రు కితి గొప్ప పెరిపణిజి వందిజ్ సర్ద ఆతారె.

18 మరి యేసు వన్ని లోకురిజ్, “దేవుణు వన్ని లోకురిజ్ కిని ఏలుబడిః ఇన్ని దనిజ్ పోలిత మనాద్. ఇనిదనివెట నాను పోలిస్స? 19 అక్కసర్ను గింజదిజ్ పోలిత మనాద్. ఒరెన్ ఆక ఒతండ్రె వన్ని టోటాదు ఉణుస్తాన్. ఆక పిరిసి మరాన్ ఆతాద్. ఆగాసం మున్ను ఎగ్గిజిని పోటిజ్ దనికొమెజి మున్ను గూడుక్ తోహ్కె”, ఇజి వెప్తాన్. 20 మరి వెప్సిానాన్, “దేవుణు వన్ని లోకురిజ్ కిని ఏలుబడిః ఇని దని వెట పోలిత మనాద్? 21 అక్క పులాని దూరుదిజ్ పోలిత మనాద్. ఉండ్రి బోదెలి అక్కబతాదె మరి నండ్రో దూరు వెట కలప్తాద్. వాక్తి దూరుదిజ్బా పులాజ్ కితాద్.

ఇహ్కూ సరి

22 యేసు యెరూసలెమ్దు సాండ్రెజ్ ఇజి పయాణం కిజి మహివలె సరి పడకాద్ మన్ని నాహ్కజ్ పట్టుమ్కాజ్ బోదిసి మహాన్. 23 అయావలె ఒరెన్, “ప్రబువా, సెగొండాం దేవుణు సిక్కుదాన్ తప్రె ఆనారా?”, ఇజి వెన్బాతాన్. 24 అందెజె వాండ్రు వరిజ్, “ఇహ్కూ దార్బందరం దాన్ డుగ్గిదెజ్ నండ్రో కస్తబడిఃదు. ఎందనిజ్ ఇహిజ, నండ్రోడాం సాండ్రెజ్ సుడేశానారె. గాని వారు సాండ్రెజ్ అట్ఎర్ ఇజి మీ వెట వెప్సిాన. 25 ఇండ్రోణి ఎజుమానినిజ్జి సేప్టా కెహ్తి వెన్కా మీరు వెల్లినిల్లి, సేప్టా కొత్తి “బాబు, మజి సేప్టా రేఅ”, ఇజి వెప్సిానిదెర్. అయావలె వాండ్రు, “మీరు ఎమేణికిదెరో నాను మిజి నెన్ఎ”, ఇజి వెప్సిాన్.

26 అందెజె మీరు, “ని వెట మాపు ఉణిజి, తింజి మహాప్. నీను మా వీదిజి బోదిస్తిగదె”, ఇజి వెప్సిానిదెర్. 27 గాని వాండ్రు, “మీరు ఎమేణికిదెరో, మిజి నాను నెన్ఎ. సెఇపణి కిని మీరు విజిదెరె, నా బాణిజ్డిసి సాండ్రు”, ఇజి వెప్సిాన్”, ఇజి వెప్తాన్.

28 మరి వాండ్రు, “అబ్రాహము, ఇస్సాకు, యాకొబురిజ్ విజెరె ప్రవక్తరు దేవుణు మంజిని బాడిఃదు వాండ్రు ఏలుబడిః కినివెలె మంజినిక సుడేశానిదెర్. గాని వాండ్రు మిజి వెల్లి కినాన్. అయావలె, మీరు అడఃబాజి, పల్కు కొహ్కె ఎలాకాలం సిను మంజిని బాడ్డిదు మంజినిదెర్. 29 మరి, దేవుణు మంజిని బాడిఃదు వాండ్రు ఏలుబడిః కినివలె, తూర్పుదాన్ పడఃమటదాన్, ఉస్సన్దాన్, దసిణదాన్

నండో యూదురు ఆఇకార్ వాజి వింతుదు బస్సార్. 30 ఇదిలో, పెరికావ్ ఇజి ఒడేబితికార్ ఇజ్జికార్ ఆనార్. తగిజి మహికార్ ముజాల్ ఆనార్”, ఇజి వెహ్సాన్.

యేసుయెరునలెంవందిళ్ దూకమాజినాన్
 31 అయావలెనె, సిగెండార్ పరిసయరు వాతారె, “నీను ఇబ్బెణిజ్ సోసి సాన్అ. హెరోదు నిజి నప్పెజ్ సుడేజినాన్”, ఇజి యేసుజ్ వెహ్సార్. 32 అందెజె వాండ్రు, “మీరు సొన్ని ఆ వాడు కిని నక్కవెట ఈహు వెహ్సూ. “నాను నేండ్రు, విగెహిజ్, దెయమ్కాజ్ పేరజి, కస్టమిదివరిజ్ నెగెణ్ కిజి, ముఎహి, దినమ్దు పూర్తి కిన్. 33 గాని నాను నేండ్రు, విగెహిజ్, ముఎహిజ్ నా సరిదు నాను సొండ్రెజ్వెలె. ఎందానిజ్ ఇహిజ, ప్రవక్త యెరునలెమ్దిజ్ వెల్లి సాదెజ్ ఆఎన్. 34 ఓ యెరునలెమ్దు మనికిదెరా, మీరు ప్రవక్తరిజ్ నప్పిదెర్. మీ డగ్రు దేవుణు షోక్తి వరిజ్ పణకాణిజ్ డెయితిదెర్. కొరు దన్నిపిల్లెకాజ్ దన్నిరెక్కెజ్ అడిగె ఎలెగ ఇడ్నాదో, అయావజ మిజి డగ్రు కిదెజ్ ఎసాడ్ సుట్టు. నాను ఆన ఆత, గాని నిజి ఇస్టం సిల్లెండ మహద్. 35 ఇదిలో, దేవుణు వన్ని గుడిడిసి సానాలె. ప్రబు సిత్తి అతికారమ్దాన్ వాతికాన్ షోగడెఆనికాన్* ఇజి మీరు వెహ్సాదాక మీరు నజి తోఇదెర్ ఇజి మీ వెట వెహ్సాన్.

14

యేసు పరిసయ ఇండ్రో బోజెనమ్దిజ్ సొన్సినాన్

1 ఉండ్రీ విస్తాంతి దినమ్దు, యేసు పరిసయరు అతికారిజ ఒరెన్ వన్ని ఇండ్రో బోజెనమ్దిజ్ సోహాన్. అయావలె యేసు ఇనిక కినాండ్రో ఇజి వారు బాగసుడేజి మహార్. 2 నస్తివలె కిక్కుకాల్కు వాస్తికాన్ ఒరెన్ వన్ని ఎద్రు మహాన్. 3 యేసు”, విస్తాంతి దినమ్దు నెగెణ్ కినిక మీ యూదురిజ్ రూలుజ్ తప్పికాదా సిలికాదా?”, ఇజి పరిసయరుజని యూదురి రూలు నెన్పిస్సివరిజ్ వెన్బాతాన్. 4 గాని వారు అలెత మహార్. అందెజె యేసు అయా జబుది వన్నిజ్ డగ్రు కూక్తాండ్రె, నెగెణ్ కితాండ్రె షోక్తాన్. 5 వెనుక వాండ్రు వరిజ్, “మీ లోఇ ఎయెది బా గాడెదె గాని కోడి: గాని విస్తాంతి దినమ్దు గుటోద్అర్తిజ, దన్నిజ్ వెటన వెల్లి లాగెదెరా?”, ఇజి వెన్బాతాన్. 6 యా మాటెజ్ వారు మరజి వెహ్సాజ్ అట్టవతార్.

7 వాతి కూలెజ్, విందుదు ముకెలమాతి బాడిజ్ సుడేజి బాన్ బస్తిక సుడేతాన్. సుడేతాండ్రె కతవజ ఈహు నెన్పిస్తాన్. 8-9 ఎయెన్బా పెండ్లి విందుదిజ్ మిజి కూక్తివెలె, పెరికార్బస్సిబాడిదు బస్సాల్. ఉండ్రీ వేలా మిజి ఇంక పెరివన్నిజ్ వాండ్రు కూక్తాన్సు. వాండ్రు వాతిజ, మీ రిఎరిజ్ కూక్తికాన్ వాజి నిజి, “ఇదిలో, నీ బాడ్డి: వినిజ్ సిఅ”, ఇజి వెహ్సాన్. నస్తివలె మీరు సిగు ఆజి వెస్సాహి బాడిదు బస్సెజ్ సొనిదెర్. 10 అందెజె మిజి ఎయెన్బా కూక్తిజ, మీరు సొన్ని వెస్సాహి బాడిదు బస్సు. అయావలె మిజి కూక్తికాన్ వాజి, “కూలాయెన్ నీను పెరికార్బస్సి బాడిదు సొన్ని బన్అ”, ఇజి వెహ్సాన్. అయావలె నీ వెట బస్సివరి ఎద్రు నిజి గొప్పు గవరం వానాద్. 11 వన్నిజ్ వాండ్రె పెరికాన్ ఇజి ఒడేబిని ఎయె వన్నిజ్బా దేవుణు ఇజ్జికాన్ కినాన్. వన్నిజ్ వాండ్రె ఇజ్జికాన్ ఇజి తగిజి ఒడేబిని ఎయె వన్నిజ్బా దేవుణు పెరికాన్ కినాన్. 12 మరి, యేసు వన్నిజ్ విందుదిజ్ కూక్తి వన్నివెట, “నీను విందు కిదెజ్ ఇహిజ, నీ కూలెజెనో, నీ అన్నారిజెనో, నీ నేస్తమ్కాజ్నో, నీ పడకాద్ మన్ని సంసారిజెనో కూక్తు. ఎందనిజ్ ఇహిజ, ఉండ్రీ వేలా వారు నిజి మరజి కూక్సార్. అయావలె నీను కిత్తిదన్నిజ్ వారు మరజి కిజినార్. 13 అందెజె నీను విందు కినివెలె, బీదాతి వరిజ్, సీరనమ్దివరిజ్, సొటవరిజ్, గుడ్డివరిజ్ కూక్తె. 14 ఎందనిజ్ ఇహిజ, మిజి మరజి సిదెజ్ వారు అట్ఎర్. అందెజె దేవుణు మిజి దివిస్సాలె. దేవుణు తీర్పు కిని దినమ్దు నీతి మన్ని విజు లోకురివెట నీను సాజి మరజి నిజెని వెలె, నీను కితి నెగ్గి పణి వందిజ్ దేవుణు మిజి మరజి సీనాన్.

పెరివిందు వందిజ్ వెహ్సానాన్

15 వన్ని వెట ఉండెజ్ బస్సిమహి వరిలోఇ ఒరెన్ యాక విహండ్రె, యేసుజ్, “దేవుణు ఎలుబడి: కినిక టెటాజ్ సూణివెలె, విందుద్ ఉణికాన్ అంతు సిల్లి నరద్ మంజినికాన్ ఆనాలె”, ఇజి వెహ్సాన్. 16-17 అందెజె యేసు ఈహు వెహ్సాన్. “ఒరెన్ విందు కిదెజ్ ఇజి వన్ని నండో కూలెజ కల్బుజ్ షోక్తార్. విందు తయార్ ఆతిజ్, వన్ని పణిమణిసిజ్ కూక్తాండ్రె, “ఉండెజ్ రదు. విజు తయార్ ఆతె ఇజి కల్బు

* 13:35 13:35 కీర్తన 118:26.

క్రిత్తివరిజ్ సొన్ని వెహాఅ”, ఇజి పోహ్లాన్. 18 గాని కూలెజ్ ఉండ్రె లెకెండ్ పణిజ్ వెహ్ని తప్రె ఆతార్. మొదోహికాన్, “నాను ఉండ్రె మడిజ్ కొట మన్ను, నాను అయక సొన్ని నుడెదెజ్వెలె, నజీ నెమిన్అ ఇజి బతిమాలజన”, ఇజి వెహ్లాన్. 19 మరి ఒరెన్, “నాను అయదు సెర్కు డాను కొట మన్ను. ఆకెజ్ నెగెణ్ మనెనో సిలెనో ఇజి నుడెదెజ్ సొన్నిన. నజీ నెమిన్అ, ఇజి బతిమాలజన”, ఇజి వెహ్లాన్. 20 మరి ఒరెన్, “నాను ఏలు పెండ్రె ఆత మన్ను. అందెజి వాదెజ్ అటవ”, ఇజి వెహ్లాన్. 21-22 పణిమణిసి మరజి వాతండ్రె, యా మాటెజ్ వన్నె ఎజుమానిజ్ వెహ్లాన్. అయావలె అయా ఇండ్రో ఎజుమాని కొపం ఆతండ్రె, “నీను పట్టమక వీదిజు, నందిజు బేగి సొన్ని బీదాతి వరిజ్, నీరసమది వరిజ్, సొటాది వరిజ్, గుడ్డి వరిజ్ కూక్కి తగల”, ఇజి పణి మణిసిజ్ వెహ్లాన్. వాండ్రు, “బాబు నీను వెహ్ని లెకెండ్ కిత. గాని మరి నండో బాడ్డి మనాద్”, ఇజి వెహ్లాన్. 23 అయావలె ఎజుమాని, “నా ఇల్లు నిండ్రెదెజ్, నీను నాహ్కా వీదిజు నందిజు సొన్ని లోకురిజ్ ఈడిసి తగల”, ఇజి వన్నె పణిమణిసిజ్ వెహ్లాన్. 24 ఎందానిజ్ ఇహిజు, కూక్కి అయా కూలెజు లోఇ ఒరెన్బా ఆ టిండి రుసి నెన్ఎన్”, ఇజి మీ వెట వెహ్నిన.

సినుడుఆనికాన్ ఎలాగమండ్రెజ్ ఇజి వెహ్నినాన్

25 మంద లోకు వన్నె వెట సొన్ని మహివలె వరిదరిజ్ సుడెజి వాండ్రు ఈహు వెహ్లాన్. 26 “ఎయెన్బా నా సినుడు: ఆదెజ్ ఇహిజు, నజీ ఇంక, వన్నె అయిసి అపొసిజ్ వన్నె ఆలు ని కొడెరిజ్, వన్నె అన్న తంబెరిజ్, వన్నె తజి బీబిజ్ మరి వన్నె సొంత పాణమదిజ్బా నండో ప్రేమిస్తెజ్ ఆవద్. వాండ్రు నండో ప్రేమిస్తెజు, నా సినుడు: ఆదెజ్ అటవెన్. 27 ఎయెన్బా కస్టమకు ఓరిసి సాదెజ్బా ఇస్టం ఆజి నా వెట వాతిజనె నా సినుడు: ఆనాన్.

28 మీ లోఇ ఎయెన్బా ఉండ్రె నీరి గుడి: తోహ్తెజ్ఆస వాతిజు, వాండ్రు ముజాల బసి, దనిజ్ కర్కు ఎసా ఆనాద్ ఇజి లెక్కునుణాన్. పణి పూర్తి కిదెజ్ వన్నె కీదు మనిక ఆనాదో, సాల్ఎదో ఇజి సూణాన్ గదె? 29-30 అయక తోవిండ వాండ్రు పునాది పొక్కి, పూర్తి తోహ్తెజ్ అటెఇతిజు, అక్కుసూణికార్ విజెరి, “వీండ్రు తోహ్తెజ్ మొదోల్స్తాన్ గాని పూర్తి కిదెజ్ అటెవతాన్”, ఇజి వన్నెజ్ కరాయి ఇనార్. 31 ఒరెన్ రాజు మరి ఒరెన్ రాజువెట ఉద్దం కిదెజ్ సొండ్రెజ్ ఇహిజు, వాండ్రు ముజాలె బస్తాండ్రె సూణాన్, ఇరువయ వేలుజ్ లోకురెవెట అయా రాజు వాజనాన్. వన్నె మున్ను ఉద్దం కిదెజ్ నా పది వెయుజ్లోకురె వెట నాను అట్టానా, సిలెనా ఇజి. 32 అటెఇజు, అయా రాజు దూరం మనివెలెనె సల్వాజిజ్ పోక్కి సమాదనం కిదెజ్ వాండ్రు సుణాన్. 33 అయలెకెండెనె, మీ లోఇ ఎయెన్బా వన్నెజ్ కల్లితికెజ్ డిసిఎండ మహిజు, నా సినుడు: ఆవెన్. 34 సోరు నెగ్గకదె, గాని దనిజ్ మన్నె రుసి సొహిజు, ఎలాగ మరి రుసి తప్పిస్తెజ్ ఆనాద్? 35 అయాక బూమిదిజ్బా గాని గత్తమదిజ్బా గాని పణిదిజ్ రవెద్. అందెజి అయాక వెల్లి విసిర్పార్. గిబ్బిజ్ ఒడెజి వెండ్రు. అయావజు నడిజి మండ్రు”, ఇజి వెహ్లాన్.

15

మురుతి గొరె దోహ్కీనాద్

1 ఉండ్రె నాండిజ్ వన్ను పెర్నికార్ని పాపం కిజినికార్ ఇజి యూదురు సుడెతికార్ విజెరి వన్నె బోద వెండ్రెజ్ వన్నె డగ్గు కూడిత మహార్. 2 పరిసయరు ని యూదురి రూలుజ్ నెస్సిస్కార్, “వీండ్రు పాపం కిజిని వరిజ్ డగ్గు కిజి వరివెట కూడెజి బోజనం కిజినాన్”, ఇజి సణిజెతార్. 3 అందెజి వాండ్రు వరిజ్ కతవజు నెన్పిస్తాన్. 4 “ఉండ్రె వేల మీ లోఇ ఒరెన్వన్నెజ్ వంద గొరెజ్ మనె. వన్నెలోఇ ఉండ్రె గొరె మురుతిజు, వాండ్రు అయా తోమ్బయి తోమెది గొరెజు, అడివిదు డిసి మురుతి మని గొరెదోహ్కీదాక రెబానాన్గదె? 5-6 అది దోహ్కీవలె సరద ఆజి వన్నె గుంజమదు పిండిజు ఇండ్రో తనాన్. మరి వన్నె కూలెజు పడకాతి వరిజ్ కూక్కి, “మురుతి మహి నా గొరె దోహ్కీ. అందెజి నా వెట సరద ఆదు”, ఇజి వెహ్లాన్. 7 అయా వజనె, తోమ్బయి తోమెది మణిసిర్ పాపం ఒప్పుకొండెజ్ అవుసరం సిలి నీతి నిజాయితిదికార్ మనార్. పరి వందిజ్ కల్లిని సరద మున్ను పాపమకు డిసి నీతి వన్నె వందిజ్ దేవుణు మంజిని బాడిదు నండో సరద కల్లినాద్, ఇజి నాను మీ వెట వెహ్నిన”.

మురుతి రుపయ దోహ్కీనాద్.

8 “మరి, ఉండ్రీ బోదెల్దిజ్ వది వెండి రుపాయి మహా. వన్నాలో ఇ ఉండ్రీ రుపాయి మురుతిజ, అది దీవ కసిసి, ఇల్లు సిపాజి, అది దోహాక్కిదాక నెగెండ రెబావిదా? 9 అక్కదోహాక్కివెలె దన్ని కూలెజాణిజ్, పడఃకాతి వన్నాజ్ కూక్కి, “నా మురుతి మహి రుపాయి దోహాక్వాద్. అందెజె నా వెట సర్ల ఆదు”, ఇజి వెహ్వాద్. 10 అయావజనె పాపమకు డిఃసి సీతి వన్ని వందిజ్ దేవుణు వన్ని దూతెజ ఎద్రు సర్ల ఆజినానఇజి నాను మీ వెట వెహ్సిన”.

తప్పి సాహి మరిసి మరజి వాజినాన్

11 మరి వాండ్రు ఉండ్రీ వెహ్వాన్, “ఒరెన్ వన్నిజ్ రిఎర్ మరిసిర్ మహార్. 12 కొగ్రి మరిసి, “ఓ బా, నీను గణస్తి దన్నిలో ఇ నజీ వానివంతు సిదా”, ఇజి అపొసిజ్ లోస్తాన్. అందెజె అపొసి వన్ని ఆస్తి వరిజ్ నీబాత సిత్తాన్.

13 నెగం రోస్సు, సాహి వెనుక, కొగ్రి మరిసి వన్నిజ్ కల్లితికెజ్ విజు కుడుఃప్పి, నండో దూరం మన్ని దేసమ్దు సాహాన్. అబ్బె వాండ్రు సె ఇ అలవాటుజ ఆతాండ్రె వన్ని ఆస్తివిజు పాడు కిత్తాన్. 14 విజు కర్పు కిత్తివెనుక, ఆ దేసమ్దు గొప్ప కరు వాతాద్. వన్నిజ్ ఇనిక బా దోహాక్వెతాద్. 15 అందెజె వాండ్రు ఆ దేసమ్ది ఒరెన్ వన్ని డగ్రు పణికిదెజ్ సాహాన్. వాండ్రు పండ్రీజ్ మెప్పెజ్ వన్ని మడిఃజు వన్నిజ్ పోక్తాన్. 16 పండ్రీజ్ తిని పొడుః తింజి బజ సాన్పిస్తెజ్ ఇజి ఆస ఆతాన్. గాని ఎయెర్బా వన్నిజ్ ఇనికబా సివెతార్. 17 వన్నిజ్ బుద్ది వాతివెలె వాండ్రు ఈహు ఒడిఃబితాన్, “నా బుబ్బు డగ్రు ఎసాండారో పణిమణిసిర్ మనార్. వరిజ్ ఉండెజ్ అల్ః ఇ నసాన్ జావ దోహాక్కినాద్. ఇబ్బె నాను బజ సాజిన.

18 నాను ఇబ్బె డిఃసి నా బుబ్బు డగ్రు సాన్సి, ‘ఓ బా, నాను దేవుణుదిజ్ వడఃః పణి కిత. నీ ఎద్రు పాపం కిత. 19 నీ మరిన్ ఇజి కూకె ఆదెజ్ నాను ఏవటితికాన్ ఆవి. నీ పణిమణిసి ఒరెన్ వన్నిలెకెండ నజీ సుడఃఅ’, ఇజి నాను వెహ్వా”, ఇజి ఒడిఃబితాండ్రె అబెణిజ్ డిస్తాండ్రె వాజినాన్.

20 వాండ్రు దూరం మహివలెనె అప్పొసి వన్నిజ్ సుడఃతాన్. వన్ని పాణం నొతాండ్రె ఉహాక్కి సాన్సి పొంబితాండ్రె ముదు కిత్తాన్. 21 నస్తివలె వాండ్రు అప్పొసిజ్, “ఓ బా, నాను దేవుణుదిజ్ వడఃః పణి కిత. నీ ఎద్రు పాపం కిత. నీ మరిన్ ఇజి కూకె ఆదెజ్ నాను ఏవటితికాన్ ఆవి”, ఇజి వెహ్వాన్. 22 గాని అప్పొసి వన్ని పణిమణిసిర్ కూక్తాండ్రె, “సాక్క బేగి తగ్అ. వినిజ్ తోడిఃగిస్తు. బొందు ఇడఃకిస్తు. పాదమ్కాజ్జోడిఃకు తోడిఃగిస్తు. 23 బలిస్తి దూడః తసి ఓహాక్కు. మాటు తింజి సర్ల ఆనాల్. 24 ఎందానిజ్ ఇహిజ, యా నా మరిన్ సాతి లెకెండ మహాన్. మరి ఏలు బల్కితాన్. మురుతి లెకెండ మహాన్. మరి యేలు దోహాక్తాన్”, ఇజి వెహ్వాన్. వారు సర్ల ఆజి మహార్. 25 అయావలె పెరిమరిసి మడిఃజు సాహ మహాన్. వాండ్రు మడిఃజాణిజ్ వాజి ఇల్లు డగ్రు వాతివెలె, బాజెజ్ డెయిజినిక, కరజిజనిక వెహాన్. 26 అందెజె వాండ్రు పణిమణిసిర్ లో ఇ ఒరెన్ వన్నిజ్ కూక్తాండ్రె, ఇనిక జరిగిజినాద్, ఇజి వెన్బాతాన్.

27 అయా పణిమణిసి, “నీ తంబెరి వాతాన్. వాండ్రు నెగ్రిండ మరజి వాతివందిజ్ నీ బుబ్బు బలస్తి దూడః ఓహాక్తాన్”, ఇజి వెహ్వాన్.

28 పెరి మరిసి కోపం ఆతండ్రె, లో ఇ సాండ్రెజ్ కెవతాన్. అందెజె అప్పొసి వెల్లి వాతండ్రె, లో ఇ రత, ఇజి వన్నిజ్ బతిమాలతాన్. 29 అయావలె వాండ్రు వన్ని అప్పొసి వెట, “ఇదిలో నిసాడు పంటిజాణిజ్ ఒరెన్ గొతియయెన్ లెకెండ పణి కిత. ఎనెజ్బా, నీ మాటెజ్ నాను లోజివండ మన్ఏత. నా కూలెజ్వెట సర్ల ఆదెజ్ నీను నజీ ఉండ్రీ గొరె పిల్లబా సిఇతి. 30 గాని సాని బూలాలని వరిజ్ సీజి నీ ఆస్తి విజు పాడు కిత్తి యా మరిసి వాతిజ్ బలస్తి దూడః ఓహాక్కి”, ఇజి వెహ్వాన్. 31 అందెజె అప్పొసి, “నా మర్రిన్, నీను ఎస్తివలెబా నా వెటనె మన్ని. నజీ మనికెజ్ విజు నీవి. 32 మాటు విందు కిజి సరద ఆనిక నెగద్. ఎందానిజ్ ఇహిజ, నీ యా తంబెరి సాతి లెకెండ మహాండ్రె, మరజి నిజీతాన్. మురుతి లెకెండ మహాండ్రె దోహాక్తాన్”, ఇజి వన్ని వెట వెహ్వాన్.

16

తెలివి మన్ని పెరిగొత్తియవన్ని కత

1 మరి, యేసు వన్ని సిసూర్జి ఈహు వెహ్వాన్. ఒరెన్ సంసారం మన్ని వన్ని ఇండ్రొణి నజతిజ నూణి పెరి గొతియయెన్ ఒరెన్ మహాన్. యా గొతియయెన్ సామనమ్కు పాడు కిజినాన్ ఇజి నేరం మొప్పిక

వెహాన్. ² అందెజె వన్నిజ్ కూక్పిస్తాండ్రె, “నీ వందిజ్ నాను వెంజిని యా మాట ఇనిక? ఇండ్రోణి పణిజ లెక్క తోరిన్అ. ఎందానిజ్ ఇహొజ, నీను ఏలుదాన్ నా గొతియయెన్ అఇ”, ఇజి వన్నిజ్ వెహ్లాన్. ³ యాక వెహండ్రె వాండ్రు ఈహు ఒండెబితాన్. “నా ఎజుమాని యా పణిదాన్ నజీ లాగ్జినాన్. అందెజె నాను ఇనిక కిదెజ్? కార్తెజ్ అట్ఎ. లోని ఉండెజ్ సిగు వాజినాద్. ⁴ యా పణిదాన్ లాగ్గివెలె, లోకుర్ నజీ డగ్రు కినిలెకెండ ఇనిక కిదెజ్ ఇజి నాను నెసిన. ⁵ అందెజె వాండ్రు వన్ని ఎజుమాని బాన్ అప్పు ఒతివరిజ్ ఒరెన్ ఒరెన్ వన్నిజ్ కూక్పిస్తాన్. “నీను నా ఎజుమాని బాణిజ్ ఎసా ఒతిమన్ని?”, ఇజి మొదోహి వన్నిజ్ వెన్బాతాన్. ⁶ వాండ్రు, “వంద కాయెజ్ నూనె”, ఇజి వెహ్లాన్. అందెజె వాండ్రు, “ఇదిలో నీ సీటి. బేగి బని యాబయి కాయెజ్ ఇజి రాన్అ”, ఇజి వెహ్లాన్. ⁷ వెన్యాహివన్నిజ్, “నీను ఎసా ఒతిమన్ని?”, ఇజి వెన్బాతాన్. వాండ్రు, “వంద తూముజ్ గోదము”, ఇజి వెహ్లాన్. అయావలె వాండ్రు, “ఇదిలో నీ సీటి. ఎనబయి తూముజ్ ఇజి రాన్అ”, ఇజి వెహ్లాన్. ⁸ అనెయం కిత్తి యా పెరి గొత్తియయెన్ తెలివందిజ్ ఎజుమాని పొగిడితాన్. ఎందానిజ్ ఇహొజ, వానికాలమ్ది వన్ని బత్తు, వందిజ్ వాండ్రు యా లెకెండ కితాన్. అందెజె యేసు, వెహ్లాన్, “దేవుణుదిజ్ నమిజి వాండ్రు వెహ్లా పజ నడినివరి మున్యు, అయా పెరి గొత్తియయెన్ లెకెండ, యా లోకమ్ది సజతిజి వందిజి ఒండెబినికార తెలిమనికార్. వారు వరిలెకెండ మన్ని వరివెలె కూడెజి పాడిజి మండ్రెజ్ తెలిమనికార్. ⁹ మీరు యా లోకమ్దు బత్తిజిని మనివలె ఇబ్బి మిజి మనికెజ్ విజా దని వెలె మీరు నెగ్రెండ తెలిదాన్ మండ్రెజ్ సుండెదు. ఎందనిజ్ ఇహొజ, మీరు మీ బత్తు ఇబ్బి డిస్సివలె దేవుణు మిజి వాండ్రు మంజిని బాడిండు ఎలాకాలం మండ్రెజ్ డగ్రు కినాన్లె. ¹⁰ తక్కు దన్నిమున్యు నమకం మంజినికాన్ లావు దన్నిమున్యుబా నమకమ్దాన్ మంజినాన్. తక్కు దన్నిమున్యు నమకం సిలికాన్, లావు దన్నిమున్యుబా నమకం మన్ఎన్.

¹¹ అందెజె, మిజి మన్ని ఆస్తి నమకమ్దాన్ తోఎండ మహిజ, నిజమాతి ఆస్తి ఎయెర్ మిజి ఒపజెహ్లాన్. ¹² పడెకాతి వరి దన్నిమున్యు నమకమ్దాన్ తోఎండ మహిజ, నీ సొంతదిక ఆతి నిజమాతి ఆస్తి ఎయెన్ మిజి సీనాన్. ¹³ ఎమేణి గొత్తియయెన్బా రివర్ యజుమానరిజి వందిజ్ఉండ్రె లెకెండవణి కిదెజ్ అట్ఎన్. వాండ్రు ఒరెన్ వన్నిజ్ ఇన్ఘం కిఎండ మరి ఒరెన్ వన్నిజ్ ప్రేమిస్తాన్. సిలిజ, ఒరెన్ వన్ని మాట వెంజి నమకమ్దాన్ మంజినాన్. మరి ఒరెన్ వన్నిజ్ దుసలాడెనాన్. అయలెకెండెన్ దేవుణుదిజ్ న డబ్బుదిజ్ ఉండ్రె లెకెండెన్ సేవకిదెజ్ మీరు అట్ఇదెర్”, ఇజి వెహ్లాన్.

¹⁴ డబ్బు ఆస మన్ని పరిసయేరు యా మాటెజ్ విజా వెహారె, వన్నిజ్ వెక్కిస్తార్. ¹⁵ వాండ్రు వరిజ్ ఈహు వెహ్లాన్, “లోకుర్ ముజాల మీరు సీతి నిజాయితి మనికిదెర్ ఇజి తోరిస్సిదెర్. గాని దేవుణు మీ మన్సుదికెజ్ నెస్తాన్. లోకుర్ ఎద్రు గొప్ప విలువ మనిక దేవుణుదిజ్ ఇన్ఘం సిల్లికాది. ¹⁶ దేవుణు మోసజ్ సిత్తి రూలుజ్ న ప్రవక్తరు రాస్తికెజ్ బాప్తినం సీని యోహాను కాలం దాక బోదిసి మహార్. అబెణిజ్ అసి దేవుణు, వన్నిలోకురిజ్ కిని ఏలుబడి: వందిజ్ సువార్త వెహా ఆజి మహాద్. దేవుణు కిని ఏలుబడి:దు మండ్రెజ్లోకుర్నండొ కన్ఘబడి:జినార్. ¹⁷ ఆగసం బూమి సిల్లెండ ఆదెజ్సులునె, గాని దేవుణు సీతి రూలుజది ఉండ్రె గీతబా తప్పి సొన్ఎద్. ¹⁸ ఎయెన్బా వన్ని అల్లిజ్ డి:సి మరి ఉండ్రె బోదెల్దిజ్ ఇడ్డె: ఆతిజ, దని వెలె వాండ్రు రంకు బూలాజినాన్. మానిజ్ డి:స్తి దనిజ్ ఒరెన్ఇడె: ఆతిజ, వాండ్రు రంకు బూలాజినాన్.

ఆస్తిమన్నికాన్ని లొనిఉణి లాజరు

¹⁹ ఒరెన్ ఆస్తిమన్నికాన్ మహాన్. వాండ్రు నండొ కరీది సొక్కెజ్ తోడెగిజి విజా దినమ్కు సుకం మున్యు మహాన్. ²⁰ లాజరు ఇని లొనిఉణికాన్ ఒరెన్ మహాన్. వన్ని ఒడి:ల్కండి విజా పుట్టు మహా. ఆస్తిమన్ని వన్ని ఇండ్రోణి డేవార్ద వన్నిజ్ ఇట్టా మహార్. ²¹ వన్ని బల్లదాన్ అద్రి జావ పరిజ్ ఉణిజి బజి సొన్పిన్డెజ్ ఆసఆజి మహాన్. సుకుడి:జిబా వాజి వన్ని పుట్టు నాక్కి మహా.

²² లొన్యు ఉణికాన్ సాతాన్. దేవుణు దూతెజ్ వన్నిజ్ దేవుణు మంజిని బాడి:దు అబ్రాహం పడె:కాదు ఒతాన్. ఆస్తిమన్నికాన్బా సాతాన్. వన్నిజ్ ముస్తార్. ²³ వాండ్రు అయా లోకమ్దు బాదఆజినె, బుర్ పెర్లి మున్యు బేస్తాన్. దూరం మన్ని అబ్రాహముజ్ని వన్నిపడె:కాద్ మన్ని లాజరుజ్ సుండె:తాన్. ²⁴ అందెజె వాండ్రు, “బుబ్బు ఆతి అబ్రాహము, నా మున్యు కనికారం తోరిన్అ. నాను యా

సినుదు నండో బాద ఆజిన. అందెజె లాజరు వాజి వన్ని డెన్సు, ఏరుదు ముడుక్కి నా నాలిక నలెజ్ కిదెజ్ వన్నిజ్ పోక్త", ఇజి డేల్ని వెహ్సన్. ²⁵ అందెజె అబ్రాహము, "మరిన్ నీను బల్బెతి కాలమ్దు సుకం ముస్సు. మహి. గాని లాజరు కస్టమ్దు మహాన్. ఏలు వాండ్రు ఇబ్బె సుకం దాన్ మనాన్. నీను కస్టమ్దు మస్సి. ²⁶ యాకదె ఆవండ, ఇబ్బెణికార్ అబ్బె వాదెజ్ అట్వండ, అబెణికార్ ఇబ్బె వాదెజ్ అట్వండ మజి నిజి నడిమి పెరిజోర ఇట్టా మనాద్", ఇజి వెహ్సన్.

²⁷⁻²⁸ అయావలె వాండ్రు, "అహిజ, ఓ బా, నజి అయదుగురు దాదార్ మనార్. వారు బా యా కస్టమ్కు మన్నిబాడిదు రవండ మండ్రెజ్ నా బుబ్బ ఇండ్రో లాజరుజ్ పోక్త. వాండ్రు సొన్ని వరిజ్ వెహ్సన్, ఇజి నాను నిజి బతిమాలజిన", ఇహాన్. ²⁹ అందెజె అబ్రాహము, "వరి డగ్రు మోసె రాస్తికెజ్, ప్రవక్తరు రాస్తికెజ్ మనె. వారు అయాకెజ్ వెంజి మండ్రెజ్", ఇజి వన్నిజ్ వెహ్సన్. ³⁰ వాండ్రు, "బుబ్బాతి అబ్రాహము, ఆహా వారు కివెర. సాతికాన్ ఒరెన్ వరి డగ్రు సొన్ని వెహ్సెజనె, వారు పాపమ్కు డిసి సీనార్", ఇజి వెహ్సన్. ³¹ అందెజె వాండ్రు, "మోసె రాస్తి మనికెజ్ ప్రవక్తరు రాస్తికెజ్ వారు వెన్వండ మహిజ, సాతికాన్ మరజి నిజ్జె సొన్ని వెహ్సెజబా వారు నమ్మివెర", ఇజి వెహ్సన్.

17

¹ యేసు వన్ని సిసూర్జ ఈహు వెహ్సన్. "తప్పజ్ కిబిన్ని సజతిజ్ తవ్వండ వానెలె. గాని యా సజతిజ్ ఎయెవెలె వానెనో వన్నిజ్ అబాయా, నండో బాద. ² ఎయెన్బా నా ముస్సు. నమకం ఇడ్డి మన్ని యా కొడో: నన్ని ఒరెన్వన్నిజ్ తప్పకిబిస్తెజ్ సుడెతిజ పెరిసిక్కు వానాద్. దిన్నిముస్సు ఇజిరిసిక్కునె వన్ని మెడెదు జత్త పణుకు తొప్పి సందారమ్దు విసిర్నిక. ఆకదె వన్నిజ్ నెగెద్. ³ అందెజె మీ వందిజ్ మీరె జాగర్త మండ్రు. నీ తంబెరినో, ఎయెన్బా నిజి తప్పు కితిజ, వన్నిజ్ డటం బుద్ది వెహ్త. వాండ్రు తప్పడిసి ఒప్పకొటిజ వన్నిజ్ సెమిన్త. ⁴ ఉండ్రె దినమ్దు ఏడు సుట్టు. వాండ్రు నిజి తప్పజ్ కిజి, ఏడు సుట్టు. నీ డగ్రు వాజి 'నాను తప్పడిసి ఒప్పకొడిజిన', ఇజి వెహ్సెజ నీను వన్నిజ్ సెమిన్త". ⁵ నస్తివలె పన్నెండు మణిసి అపొస్తుడుజ, మజి నండో నమకం సిదా", ఇజి ప్రబుజ్ లొస్తార్. ⁶ అందెజె వాండ్రు, "మిజి సర్కుగింజ నస్తు నమకం మహిజ, యా మలబరి మరాతిజ్ సుడెజి, "వెలెజాణిజ్ పెరె ఆజి సందారమ్దు ఉణుసె ఆత", ఇజి వెహ్సెజ వెలె అది మిజి లొజినాద్. ⁷⁻⁸ ఉండ్రె వేల, మీలొఇ ఒరెన్వన్నిజ్ డూదెజ్నో గొర్రెజ మేప్తెజ్నో వెట్టిపణి కినికాన్ ఒరెన్ మనాన్. వాండ్రు మడిజెదాన్ వాతిజ, "బేగి రత, వాజి ఉణత", ఇజి వెహ్సెజెరా? సిల్లె, గాని, 'సుబ్బరం ఆజి వరెత, నజి బాట సీజ ఉణితిని దాక మన్త. వెనుక నీను ఉణత', ఇజి వెహ్సెజెరె. ⁹ వన్నిజ్ ఒపజెప్తి పణి కితిజ్ ఎజుమాని వన్నిజ్ వందనమ్కు వెహ్సాండ్రా? ¹⁰ అందెజె మీరు బా మిజి ఒపజెప్తి పణిజ్ విజు కితి వెనుక, "మాటు పణిమణిసిర్. వందనమ్కు వెహె ఆదెజ్ అవ్వనరం సిల్లెద్. మాటు కిదెజ్ మన్ని పణిసె కితాట్", ఇజి వెహ్సెజ్.

పది మణిసిర్ కుస్తురోగం మన్నికార్ నెగెణ్ ఆజినార్

¹¹ యేసు యెరూసలెమ్దు సొన్ని మహివలె, సమరియ గలిలయ ముట్ట సరిఅద్దుదాన్ సొన్ని మహాన్. ¹²⁻¹³ వాండ్రు ఉండ్రె నాటి సొన్ని మహివలె పది మణిసి కుస్తురోగం మనికార్ వన్నిజ్ ఎద్రు వాతార్. వారు దూరం నిహరె, "యేసు ఎజుమాని, మా ముస్సు. కనికారం తోరిన్త", ఇజి డెడిస్తార్. ¹⁴ వాండ్రు వరిజ్ సుడెతాండ్రె, "సొన్ని, మీరు నెగెణ్ అతిదెరె ఇజి పుజెరిజ తోరె ఆదు", ఇజి వెహ్సన్. వారు సొన్ని మహిజ్ నెగెణ్ ఆతార్. ¹⁵ వరిలొఇ ఒరెన్, నెగెణ్ ఆత ఇజి నెస్తాన్. వాండ్రు డటం దేవుణుదిజ్ పొగడిజి మరజి వాతాన్. ¹⁶ వాతాండ్రె యేసుజ్ పాదమ్కు ముస్సు. ముణుకుజ్ ఉఱిజి మాడిస్తాండ్రె, వందనమ్కు వెహ్సన్. వాండ్రు సమరియదికాన్. ¹⁷ అందెజె యేసు, "పది మణిసిర్ నెగెణ్ ఆతార్ గదె. ఆ తొమెది మణిసిర్ ఎంబె మనార్? ¹⁸⁻¹⁹ ఎండానిజ్ వీండ్రు ఒరెండ్రె దేవుణుదిజ్ పొగడిజెజ్ మరజి వాతాన్. వీండ్రు యూదురిజ్ సెంద్ ఇకాన్. ఇస్రాయెలుదికార్ ఎందనిజ్ తోరె ఆవతార్?", ఇజి వెహ్సన్. వెహ్సాండ్రె, "నీను నిజ్జె సొన్త. నీను నా ముస్సు. నమకం ఇడ్డి అందెజె నెగెణ్ ఆతి", ఇజి వన్నిజ్ వెహ్సన్.

దేవుణు రాజువజి వానివందిజ్ వెహ్సినాన్

20 ఒద్నొండు, దేవుణు ఎలుబడిః కినిక లోకుర్ ఎసెజ్ నూణార్ ఇజి వరిసయిరు వన్నిజ్ వెన్బాతార్. అందెజె వాండ్రు, “దేవుణు రాజువజ వాని ముజుల్ తోర్ని గుర్తు ఇనిక సిల్లెద్. 21 దేవుణు మిజి ఎలుబడిః కిజినిక ఇయెలె మొదొల్స్త మనాన్. అందెజె, ఇదిలో ఇబ్బె మనాద్, అదిలో అబ్బె మనాద్ ఇజి లోకుర్ వెప్పి గుర్తు ఇనిక సిల్లెద్”, ఇజి వరిజ్ వెప్తాన్. 22 మరి వాండ్రు వన్ని సిసూరిజ వెప్తాన్, “లోకు మరిసి ఆతి నాను గొప్ప అతికారం దాన్ సోకుదాన్ మంజినిక కండెక్ టయం బా నుండెదెజ్ ఇజి మీరు కోరిజిన రోస్సు వానెలె. గాని ఆ రోస్సు లొఇ ఉండ్రి రోజుబా మీరు తొఇదెర్. 23 లోకుర్ మిజి, “ఇదిలో ఇబ్బె మనాన్, అదిలో అబ్బె మనాన్”, ఇజి వెప్పార్. గాని వరి వెట సొన్యాట్. వరి మాట అస్యాట్. 24 ఎందానిజ్ ఇహిజ, ఆగసమ్దు మెరిస్సివెలె ఉండ్రి పడెకదాన్ మరి ఉండ్రి పడెకాద్ జాయి తోర్నివజనె లోకు మరిసి ఆతి నాను వానివలె మంజినాద్. 25 గాని ముజుల యా తరమ్దికార్ నజి నెక్కిపోక్కినార్. వాండ్రు నండొ ఇమ్సెజ్ ఓరిస్టెజ్ వెలె.

26 నోవహు కాలమ్దు మహిలెకెండెన్ లోకు మరిసిఆతి నాను వాని ముజుల మంజినాద్. 27 నోవహు ఓడెదు సొనిదాక లోకుర్ ఉణిజి తింజి మహూర్. పెండ్లి ఆజి పెండ్లిదిజ్ నీజి మహూర్. నస్తివలె గడ్డ నిండ్రిజి, వరిజ్ విజెరిజ్ నాననం కిత్తాద్. 28 లోతు కాలమ్దు మహిలెకెండెనె, నాను వాని ముజుల మంజినాద్. లోకుర్ ఉణిజి, తింజి, కొడుజి పొర్ని మహూర్. పల వాక్కి, ఉణుని, ఇల్లు తొప్పి మహూర్. 29 లోతు సొదొమ డిస్సి సొహి నాండిజ్, ఆగసమ్దాన్ సిసు రంజికం పేరు లెకెండె వాజి వరిజ్ విజెరిజ్ నాననం కిత్తాద్.

30 యా లెకెండెనె, లోకు మరిసి ఆతి నాను వాని దినమ్దు జర్గిజి మంజినాద్. 31 నాను వాని దినమ్దు, మీద్దె ముస్సు మంజినికాన్ ఇండ్రి మన్ని వన్ని సామనమ్కు ఒతెజ్ డిగ్దెజ్ అవెద్. అయ్లెకెండెన్ ముడిజు మంజినికాన్ ఇనికబా ఒతెజ్ ముర్జి వాదెజ్ అవెద్. 32 లోతు ఆల్సెజ్ ఒడెబిదు. అది దేవుణు వెప్తి మాట వెన్ఇతిజ్ సాతాద్. 33 ఎయెన్బా వన్ని సొంత పాణమ్దిజి కాపాడెదెజ్ నుండెతిజి వన్నిజ్ ఎలాకాలం దేవుణు వెట బత్కిని బత్తు దొహొక్ అవెద్. ఎయెన్బా నా వందిజ్ వన్ని పాణం సెతిజ, వాండ్రు ఎలాకాలం దేవుణు వెట బత్కిని బత్తు దొహొక్ అవెద్. 34 నాను మీ వెట వెప్పిన, అయా పొదొయి రిఎర్ ఉండ్రి మన్నుమ్దు గూర్పార్. ఒరెన్ వన్నిజ్ దేవుణు ఒనాన్. ఒరెన్ వన్నిజ్ డిఃస్సు సొనాన్. 35 రుండి బొదెక్ కూడెజి నూర్జి మంజినె. ఉండ్రి దనిజ్ దేవుణు ఒనాన్. ఉండ్రి దనిజ్ డిఃస్సు సొనాన్. 36 రిఎర్ ముడిజు మంజినార్. ఒరెన్ వన్నిజ్ దేవుణు ఒనాన్. ఒరెన్ వన్నిజ్ డిఃస్సు సొనాన్. 37 అయావలె సిసూరు, “ప్రబువా, ఎంబె యాక జర్గినాద్?”, ఇజి వెన్బాతార్. వెన్బాతిజ్ వాండ్రు, “పీనుగు ఎంబె మంజినాద్ ఇజి నెస్టెజ్ డేగెజ్ ఉండ్రి గుర్తు అనిలెకెండె, యేను వానిక నెస్టెజ్ టెటాజ్ గుర్తుజ్ మన్నె.

18

డిఃన్ ఎండ వాతి రాండిబొదెలి కత

1 వన్నిసిసూర్ డిఃన్ ఎండ ఎస్తివలెబా పార్లన కిజి మండ్రెజ్ ఇజి నేర్పిస్టెజ్ యేసు వరిజ్ కతవజి ఈహు నెన్పిస్తాన్. 2 అక్క ఇనిక ఇహిజ, ఉండ్రి పట్టుమ్దు ఒరెన్ నాయం కినికాన్ మహూన్. వాండ్రు దేవుణుదిజ్ తియెల్ ఆఇకాన్. లోకాజ్ లసెం కిఇకాన్. 3 ఆ పట్టుమ్దు ఉండ్రి రాండి బొదెల్ మహూద్. అది వన్ని డగ్రు డిఃన్ ఎండ వాజి, “నా ముస్సు పగ అతికాన్ ఒరెన్ మనాన్. వాండ్రు నజి సిదెజ్ మనిక సినిలెకెండె నీను నాయం తీరిన్ అ”, ఇజి బతిమాలజి మహూద్. 4-5 వాండ్రు సెగం కాలం కెవతాన్. వెనుక వాండ్రు, “నాను దేవుణుదిజ్ తియెల్ ఆఇకాన్. లోకాజ్ లసెం కిఇకాన్. గాని యా ముండ బొదెలి డిఃన్ ఎండ వాజి నజి ఏక ఏక లొసినాద్. అందెజె అది మరి మరి వాజి బాద కల్గిన్ ఎండ దన్నిజ్ నాయం తీర్పన్న”, ఇజి వన్నిజ్ వాండ్రె వెప్తాన్. 6 మరి యేసు వెప్తాన్, “విండ్రు, యా నీతి నిజాయితి సీలి నాయం కినికాన్ ఇనిక వెప్తాన్ ఇజి. 7 అహిజ, నీతి నిజాయితి మన్ని దేవుణు, వాండ్రు ఏర్పాటు కితి వన్ని లోకుర్ రెయు పొకాల్ వన్నిజ్ పార్లనం కితిజ, వాండ్రు వరిజ్ నాయం తీర్పెండె మంజినాండ్రా? వాండ్రు అల్సెం కినికాండ్రా? 8 నాను మీ వెట వెప్పిన, వాండ్రు బేగి నాయం తీర్పిస్తాన్. గాని లోకు మరిసి ఆతి నాను మరజి వానివలె, నా ముస్సు నమకం దాన్ మన్ని వరిజ్ నూణానా?

వరిసయిని పన్నుపెర్ని వన్ని కత

9 సెగెండాల్ మాపు నీతి మనికావ్ ఇజి వరిజ్ వారె గర్ర ఆజి మహివరిజ్ దుసలాడేతికార్ మహార్. నన్నివరిజ్ వాండ్రు కతవజ నెసపిస్తాన్. 10 “రిఎర్ లోకుర్ పార్దనం కిదెజ్ ఇజి దేవుణు గుడిడు సాహార్. ఒరెన్ పరిసయు వాండ్రు ఒరెన్ పన్ను పెర్నికాన్. 11 పరిసయు వాండ్రు సాహండ్రె, వన్నిలోఇ వాండ్రు ఈహు పార్దనం కితాన్, “ఓ దేవుణు, నాను మహి లోకుర్ లెకెండ్ర్ ఆవి. ఆసగొటుజు లెకెండ్ర్, అనయం కిని వరిలెకెండ్ర్, రంకు బూలాని వరి లెకెండ్ర్ ఆవి. యా పన్ను పెర్ని వన్ని లెకెండ్ర్ బా ఆవి. అందెజె నిజి వందనమ్కు.

12 నాను వారమ్దిజ్ రుండి సుట్టు, ఉపాన్ మంజిన. నజి వాజిని విజు దన్నిలోఇబా నిజి దెసం బాగం సీజిన”, ఇజి పార్దనం కితాన్. 13 గాని పన్ను పెర్నికాన్ దూరం నిహాన్. వాండ్రు ఆగాసం దరొబ్ బా బేసెంండ్ర్, వన్ని గుండ్రె కొత్త్ర్ ఆజి, “ఓ దేవుణు, నాను పాపం కితిక. నజి కనికారం తోరిన్ ఆ”, ఇజి వెప్టాన్.

14 నాను మీ వెట వెప్టాన, పరిసయు వన్ని ముస్సు. విని పాపమ్కునె దేవుణు సెమిస్తాన్. వీండ్రు దేవుణు ముజాల నీతి నిజాయితి మనికాన్ ఇజి తీరెనె ఆతండ్ర్ ఇండ్ర్ సాహాన్. వన్నిజ్ వాండ్రె పెరికాన్ ఇజి ఒడేబినికాన్ ఎయెనబా ఇజ్రికాన్ ఆనాన్. వన్నిజ్ వాండ్రె తగిజి ఇజ్రికాన్ ఇజి ఒడేబినికాన్ ఎయెనబా పెరికాన్ ఆనాన్.

ఇజిరికొడోరిజ్ యేసుడగ్రు కిజినాన్

15 సెగెండాల్, యేసుడగ్రు ఇజిరి బయిరిజ్ బా తసి మహార్. వరిముస్సు వన్నికికు ఇడెడెజ్ ఇజి తత్తార్. అక్క సుడేతారె సిసూర్ వరిజ్ జటిజ్ ఆతార్. 16 గాని యేసు, కొడోరిజ్ వన్ని డగ్రు కూక్తాన్. కూక్తాండ్రె, “యా ఇజ్రి కొడోరిజ్ నా డగ్రు రపీర్. వరిజ్ అడు కిమాట్. ఎందానిజ్ ఇహిజు, యా కొడోరి లెకెండ్ర్ మనికార దేవుణు ఏలుబడి కినివెలె మంజినార్. 17 నిజమె, మీ వెట వెప్టాన, ఇజ్రి కొడోరి నమ్మిని వజ, దేవుణుదిజ్ నమినికార దేవుణు ఏలుబడిడు మజినార్. నమ్మిఇకార్ మండ్రెజ్ అట్వెర్”.

ఒరెన్ అస్తిమన్నికాన్ యేసువెట వరిజినాన్

18 ఒరెన్ అతికారి యేసుజ్ సుడేజి, “ఓ నెగ్గి బోదకినికి, ఎలాకాలం దేవుణువెట బత్కిని బత్తు దోహోకేఇహిజు, నాను ఇనిక కిదెజ్?”, ఇజి వెన్ బాతాన్.

19 అందెజె యేసు, “నాను నెగ్గికాన్ ఇజి ఎందనిజ్ నీను వెప్టాని దేవుణు ఒరెండ్రె నెగ్గికాన్. మరి ఎయెనబా నెగ్గికాన్ అవెన్”, ఇజి వెప్టాన్. 20 మరి వన్నిజ్, “రంకు బూలామా. లోకుదిజ్ నవ్మా. డోజు కిమ. అబద సాక్కి వెహమా. నీ యాయ బుబ్బెజ్ గవర్మ్వద్వాన్ నెగెండ్ర్ సుడేఅ* ఇని మోసె సిత్తి ఆడ్రెజ్ నెసినిగదె”, ఇజి వెప్టాన్. 21 వెప్టాజ్ వాండ్రు, “ఇజ్రివెలెహాన్ అని యా విజు వన్నాజ్ లోజిజిన వాజిన”, ఇజి వెప్టాన్.

22 యేసు యాక వెహండ్రె వన్నిజ్, “మరి ఉండ్రె బా నీన్ కిదెజ్ మనాద్. నిజి కల్లితిమనికెజ్ విజు పొర్ని అయా డబ్బుజ్ బీద వరిజ్ సీఅ. అయావలె దేవుణు మంజిని బాడిడు నిజి సంసారం మంజినాద్. మరి, నీను వాజి నా సిసూడుః ఆఅ”, ఇజి వెప్టాన్. 23 యా మాటేజ్ వెహిజ్, వన్ని మొకొం ఇజ్రిక ఆతాద్. ఎందనిజ్ ఇహిజు, వాండ్రు నండ్రె అస్తిమనికాన్. 24 యేసు వన్నిజ్ సుడేజి, “అస్తిమనికార్ దేవుణు కిని ఏలుబడిదిజ్ అడిగి మండ్రెజ్ ఎసొసా కస్టం. 25 ఒరెన్ సంసారం మనికాన్ దేవుణు కిని ఏలుబడిదిజ్ అడిగి మన్ని దని ముస్సు. ఉండ్రె ఒంటె దొబాసం బోరొదాన్ డుఃగదెజ్ సూలు ఆనాద్”, ఇజి వెప్టాన్. 26 అయావలె యా మాటేజ్ వెహికార్, “అహిజు, దేవుణు రక్కిన్సి లెకెండ్ర్ ఎయెర్ మండ్రెజ్ అట్పార్?”, ఇజి వెన్ బాతార్. 27 అందెజె యేసు, “లోకు కిదెజ్ అట్ఇక దేవుణు కిదెజ్ అట్పాన్”, ఇజి వెప్టాన్. 28 నస్తివలె పేతురు, “ఇదిలో, మాపు మజి కల్లితి మనికెజ్ విజు డిస్తాపె నీ వెట వాతావ్”, ఇజి వెప్టాన్. 29-30 అందెజె యేసు, “ఒరెన్ వన్ని ముస్సు, దేవుణు ఏలుబడి కిదెజ్ ఇజి ఇల్లుదిజ్ బా అల్లిజ్ బా, దాద తంబెరిజ్ బా అయిసి అప్పొసిరిజ్ బా కొడోరికొదెజ్ బా, డిస్తాకాన్ ఎయెండ్రె వన్నిజ్ యేలు మరి నండ్రె కల్లినాద్. వాని కాలమ్దు వన్నిజ్ ఎలాకాలం దేవుణు వెట బత్కిని బత్తుదు బా మంజినాద్, ఇజి కనీతం నాను మీ వెట వెప్టాన్”, ఇజి వెప్టాన్.

* 18:20 18:20 నిర్గమ 20:12-16, ద్విత్తి 5:16-20.

యేసు వన్నీ సావువందిజ్ సిసూరిజ్ వెప్పినాన్

31 యేసు వన్నీ పన్నెండు మణిసిర్ సిసూరిజ్ కూక్కి వరిజ్ ఈహు వెహ్లాన్. “ఇదిలో మాటు యెరూసలెమ్దు సొన్నినాట్. లోకు మరిసి ఆతి నా వందిజ్ ప్రవక్తరు రాస్తి విజు మాటిజ్ అబ్బె పూర్తి ఆనాద్. 32-33 యూదురు ఆజ వరి కీదు నాను ఒపజెపె ఆన. వారు నజి వెక్కిసి సిగు లాగ్గి, నా ముస్సు పూసి కొరెడెజాణిజ్ డెయిజి నప్పార్. మూండ్రి దినమ్కాజ్ నాను మర్జి నిక్పె ఆనాలె. 34 గాని సిసూరిజ్ యా మాటిజు లోఇ ఉండ్రిబా అర్దం అవెతార్. దిన్ని అర్దం వరిజ్ డాజెతాద్. వాండ్రు వెహ్లా సజతిజ్ వారు నెన్వెతార్.

గుడ్డి వాండ్రు బేస్తెజ్ అట్సినాన్

35 యేసు యెరికొ పట్టుమ్దిజ్ డగ్రు వాతివెలె, ఒరెన్ గుడ్డి వాండ్రు సరి పడెకాద్ బని లొసి మహాన్. 36 సేన లోకుర్ అయా సరిదాన్ సొన్ని మహిక, వెహొండ్రి, ఇనిక జర్గిజినాద్ ఇజి వెనబాతాన్. 37 వారు వన్నెజ్, “నజరెతు వాండ్రు ఆతి యేసు, సొన్సినాన్”, ఇజి వెహ్లాన్. 38 వాండ్రు, “ఓ దావీదు మరిసి ఆతి యేసువా, నా ముస్సు కనికారం తోరిన్వె”, ఇజి డటం డేల్స్తాన్.

39 ముజాలె సొన్ని మహికార్, “అలెఅ”, ఇజి వన్నెజ్ కసితం వెహ్లాన్. గాని వాండ్రు మరి నండ్రి దావీదు మరిసి, నా ముస్సు కనికారం ఆఅ”, ఇజి మరి ఒదె డటం డేల్స్తాన్. 40-41 యాక వెహొండ్రి యేసు అబ్బె నిహాన్. “అయా గుడ్డి వన్నెజ్ నా డగ్రు తగ్అ”, ఇజి వరిజ్ డటం వెహ్లాన్. వాండ్రు వాతిజ్, నాను నిజి ఇనిక కిదెజ్ ఇజి కోరిజిని?”, ఇజి వన్నెజ్ వెన్బాతాన్. దనిజ్ వాండ్రు, “ప్రబువా, నాను బేస్తెజ్ ఇజి ఆన ఆజిన”, ఇజి వెహ్లాన్. 42 అందెజె యేసు, “ఇదిలో నీను సూణిలె. నీను నా ముస్సు నమకం ఇడ్డి. అందెజె నెగెణ్ ఆతి”, ఇజి వెహ్లాన్. 43 వెటనె వాండ్రు బేస్తెజ్ అట్టాన్. వాండ్రు దేవుణుదిజ్ పొగిడిజి యేసువెట సాహాన్. యాక సుడెతిజ్ లోకుర్ విజెరెబా దేవుణుదిజ్ పొగిడితార్.

19

జెకయ ఇని పన్ను పెర్ని వన్నెజ్కూక్కినాన్

1 యేసు నడిజె యెరికొ పట్టుమ్దు వాతండ్రి అయా సరిదాన్ సొన్ని మహాన్. 2 జెకయ ఇన్ని ఒరెన్ అబ్బె మహాన్. వాండ్రు పన్ను పెర్ని వరిజ్ నెయ్కి. వాండ్రు గొప్ప ఆస్తిమన్నెకాన్. 3 యేసుజ్ సుడెదెజ్ ఇజి వాండ్రు కోరితాన్. గాని నండ్రి లోకుర్ మహిజ్ వన్నెజ్ సుడెదెజ్ అట్వెతాన్. ఎందనిజ్ ఇహెజు, వాండ్రు కురికాన్. 4 యేసు అయా సరిదాన్వె వాజి మహిజ్, వాండ్రు ముజాలె ఉహొక్కి సొన్ని ఉండ్రి బొడ్డి మరాత్ వత్తాన్. 5 యేసు మరాన్ అడిజి వాతివెలె, ముస్సు బేసి, “జెకయ, బేగి డిజిగెజ రఅ. నేండ్రు నాను నీ ఇండ్రి మండ్రిజ్ వెలె”, ఇజి వన్నెజ్ వెహ్లాన్.

6 అందెజె వాండ్రు గజిబిజి డిగితాండ్రి వన్నె ఇండ్రి కూక్ ఒతండ్రి సర్లదాన్ డగ్రు కిత్తాన్. 7 యాక సుడెతార్, లోకుర్ విజెరె సణిజెతార్. “వీండ్రు, పాపం కిని వన్నె ఇండ్రి కూల సాహాన్”, ఇజి. 8 అయావలె జెకయ నిజెతండ్రి, యేసుజ్ ఈహు వెహ్లాన్. “ఇదిలో ప్రబువా, యేలు నా ఆస్తి లొఇ నగం బీదవరిజ్ సీజిన. అనయమ్దాన్ ఎయె బాన్బా ఇనిక లొస్తిజు, నాను దని నాల్లి వంతు మర్జి సీన”, ఇజి వెహ్లాన్.

9 యేసు వన్నెజ్, “నేండ్రు యా ఇండ్రిజి వరి పాపమ్కు దేవుణు సెమిస్త మనాన్. ఎందనిజ్ ఇహెజు, విన్ని అనిసిఆతి అబ్రాహాము దేవుణు ముస్సు నమకం ఇడ్డి వజు, వీండ్రుబా నమకం ఇట్టాన్. 10 లోకు మరిసి ఆతి నాను పాడాజి సొని వరిజ్ రెబాజి రక్కినెజ్ వాత”, ఇజి వెహ్లాన్.

పణిమణిసిర్ కత్త

11 లోకుర్ యాకెజి వెంజి మహార్. వాండ్రు యెరూసలెం డగ్రు ఆతాన్. దేవుణు రాజు వజు వెటనె వానాన్లె ఇజి లోకుర్బా ఒడెబితార్. అందెజె వాండ్రు కత వజు వరిజ్ ఈహు నెన్పిస్తాన్. 12 ఒరెన్ రాజు వజు కుటుమ్దికాన్ వన్నె దేనమ్దు రాజు ఆదెజ్ ఇజి ఉండ్రి దూరం మని దేనం సాహాన్. మరి, మర్జి వాదెజ్ ఇజి సాహాన్. 13 సొని ముజాలె, వన్నె పణిమణిసిర్ లొఇ పది మణిసిర్ కూక్కి ఒరెన్ ఒరెన్ వన్నెజ్ ఉండ్రి మీనా* సిత్తాన్. సిత్తాండ్రి, “నాను మర్జి వాని దాక బేరం కిజి మండ్రు”, ఇజి వరిజ్ వెహ్లాన్.

* 19:13 19:13 ఉండ్రి మీనా మూండ్రి నెలెజు పణిదిజ్ కూలి

14 గాని వన్ని పట్నమ్మదికార్ వన్నిజ్ ఇన్ఱం సిలెతాద్. అందెజె వారు, “వీండ్రు మజి ఏలుబడిః కిదెజ్ మజి ఇన్ఱం సిల్లెద్”, ఇజి వన్ని వెనుక పెరి రాజుజ్ కల్లు పోక్తార్. 15 అహిజ్ బా, వాండ్రు రాజు ఆతాన్. మరజి వాతివెలె, వాండ్రు డబ్బు సొత్తి మణిసిర్, అయా డబ్బుదాన్ బేరం కిజి ఇనిక గణస్తార్ ఇజి నెన్ఱెజ్ వరిజ్ కూక్పిన్ఱాన్. 16 వరిలోఇ మొదోహికాన్ వన్ని డర్ఱు వాజి, “బాబు, నీను సీతి యాబయి రుపాయుజాణిజ్, అయదు వందెజ్ రుపయిజు వాతె”, ఇజి వెప్తాన్. 17 వాండ్రు, “నెగ్గి పణిమణిసి నీను నెగెండ కితి. నీను ఇజి పణిదు నమకం దాన్ మహి. అందెజె పది పట్నమ్క మున్ఱు అతికారి ఆఅ”, ఇజి వెప్తాన్. 18 అయావలె మరి ఒరెన్ వాజి, “బాబు, నీను సీతి యాబయి రుపాయుజాణిజ్ రుండి వందెజ్ యాబయి రుపాయుజు వాతె”, ఇజి వెప్తాన్. 19 నీను బా అయదు పట్నమ్క మున్ఱు అతికారి ఆఅ”, ఇజి వెప్తాన్.

20-21 అయావలె మరి ఒరెన్ వాజి, “బాబు, ఇదిలో నీ డబ్బు. నీను నీది ఆఇక ఒనికి. నీను విత్తెకెజ్ కొయ్జి ఒనికి. నీను గటి పాణం మనికి. అందెజె నిజి తియెల్ ఆజి యా డబ్బు రుమాలదు మూట తోవ్క ఇల్లా మహ”, ఇజి వెప్తాన్. 22-23 అందెజె వాండ్రు వన్నిజ్ వెప్తాన్, “పణిదిజ్ రణ పణిమణిసి, నీ వెయిది సొంత మాటదిజ్ నె, నాను నిజి తీర్పు తిర్సిన. నాను నాది ఆఇదనిజ్ పెర్ని ఒనికాన్ ఇజి, నాను విత్తెకెజ్ కొయ్జి ఒనికాన్ ఇజి నీను నెన్ఱి గదె. నాను గటి పణం మనికాన్ ఇజి నీను నెన్ఱి మరి ఎందనిజ్ నా డబ్బు బెంకుదు ఇణ్ణెతి? అహు ఇణ్ణిక ఇహిజు, నాను మరజి వాతివెలె వణ్ణిదాన్ దోహక్తాద్ మరి. 24 విన్నిబాన్ మన్నిడబ్బు లాగ్గి పది పట్నమ్కాజ్ అతికారి ఆతి మొదోహివన్నిజ్ నీదు”, ఇజి పడెకాద్ నిహి మహి వరిజ్ వెప్తాన్. 25 వారు, “బాబు, వన్నిజ్ అయదు వందెజ్ రుపాయుజు మనె గదె”, ఇజి వెప్తాన్. 26 వెప్తాజ్ వాండ్రు, “నమిదెజ్ తగ్గి వన్నిజ్ మరి నండో కల్గినాద్లె. గాని నమిదెజ్ తగ్గి వన్నిజ్ కల్గితి మన్ని కండెకెల గాన్ఱాన్, ఇజి నాను మీ వెట వెప్పిన. 27 మరి, నాను వరి మున్ఱు ఏలుబడిః కిదెజ్ ఇన్ఱం సిల్లి నా పగ ఆతి వరిజ్ ఇబ్బె తగ్గి. వరిజ్ నా ఎర్దు కత్తు”, ఇజి వెప్తాన్.

28 యేసు యా మాటిజ్ వెప్తా వెనుక, యెరుసలం సొండ్రెజ్ వరి ముజాల సొన్ఱినాన్. 29-30 ఒలివ గొరోణ్ డర్ఱు మన్ని బెత్సెగె, బెతానియ ఇని నాహ్కాజ్ డర్ఱు వాతాన్. వాతివెలె వన్ని సిసూర్ లొఇ రిఎరిజ్ కూక్కి, “మీ ఎర్దు మన్ని నాటో సొండ్రు. అబె సొహిజు సరి, తోహక్కి మని గాడెది పిల్ల తోర్నాద్. దన్నిమున్ఱు ఎనెజ్ బా ఎయెరెబా బన్ ఎరె. దనిజ్ కుత్తి పేరిజి తగ్గి. 31 ఎయెనెబా, “మీరు ఎందనిజ్ దనిజ్ కుత్తెనీదెర్, ఇజి వెనెబాతిజు, యాకెజ్ ప్రబుజ్ కావాలి, ఇజి వరిజ్ వెప్తు”, ఇజి వెప్తాండ్రె పోక్తాన్. 32 పోక్కి మనికార్ సొన్ఱి వాండ్రు వరిజ్ వెప్తా లెకెండె నుడెతార్. 33 వారు ఆ గాడెది పిల్లదిజ్ కుత్తి మహిజ్, దన్ని ఎజుమానుర్, “మీరు ఎందానిజ్ గాడెది పిల్లదిజ్ కుత్తెనీదెర్”, ఇజి వెనెబాతార్. 34 అందెజె వారు, “యాక ప్రబుజ్ కావాలి”, ఇజి వెప్తాన్. 35 వారు యేసుడర్ఱు తత్తార్. తత్తార్, దన్నిమున్ఱు వరి పాతెజ్ పప్తార్. యేసుజ్ దని మున్ఱు ఎక్కిస్తార్. 36 వాండ్రు సొన్ఱి మహిజ్, వరి పాతెజ్ సొన్ఱిని సర్ఱు పప్తార్. 37 ఒలివ గొరోణ్ డిగ్గి వాని సర్ఱు వాతివెలె, వన్ని సిసూర్ ని వన్ని వెట మన్ని మంద లోకుర్ విజెరె దేవుణుదిజ్ పొగిడితార్. వారు నుడెతి విజు గొప్ప పణిజు వందెజ్ సర్ఱదాన్ దేవుణుదిజ్ డటం పొగిడితార్. వారు ఈహు పొగిడితార్.

38 “దేవుణు సీతి అతికారమ్దాన్ వాజిని రాజుజ్ పొగిడెః ఆనికాన్†. పరిలోమ్దు సమాదనం మనాద్. మున్ఱు మన్ని దేవుణు గొప్ప వెరికాన్”, 39 సన్ఱవలె ఆ మంద లొఇ మన్ని నెగెండార్ పరిసయ్ రుజు, “ఓ బోదకినికి, నీ మంద సిసూర్ విజెరిజ్ అలెజి మండ్రు ఇజి డటం వెహ్ ఆ”, ఇజి వెప్తాన్. 40 అందెజె వాండ్రు, “వీరు అల్లెత మహిజు, యా పణుకుజ్ డటం డేల్లి పొగిడిజెని ఇజి నాను మీ వెట వెప్పిన”, ఇజి వెప్తాన్. 41-42 వాండ్రు యెరూసలం పట్నం డర్ఱు వాతండ్రె, పట్నమ్మదిజ్ నుడెజి అబ్బె మన్ని లోకుర్ వందెజ్ అడెబతాన్. అడెబతాండ్రె ఈహు వెప్తాన్, “మీరు యా దినమ్దు బా సమాదనం ఆని సజతిజు నెన్ఱిజు మిజి ఎసొనో మేలు మంజినాద్. గాని యేలు యాకెజ్ మీ కణకాజ్ తోరెండ డాజెత్ మనె. 43-44 దేవుణు మిజి రక్కిన్ఱెజ్ మీ డర్ఱు వాతి కాలం మీరు నెన్ఱెదెర్. అందెజె మీ పగ్గతికార్ మీ నుటులం కోట తోహక్కి వెల్లి సొన్ఱెండ, లావు అడ్డుజ్ కినార్. వారు మిజి, మీ పట్నమ్మదిజ్ పూర్తి నాసనం కినార్. వారు పణుకు మున్ఱు పణుకు మన్ఱెండ పట్నం పూర్తి నాసనం కిని కాలం వనాద్లె.

† 19:38 19:38 కీర్తన 118:26.

యేసు గుడిఃదాన్ సవకారిజ పేర్జినాన్
 45-46 యాకెజ్ వెహ్తాండ్రె, వాండ్రు దేవుణు గుడిఃదు సాహాన్. అయావలె అబ్బె సవకారిజు పొర్ని మహార్. వరిజ్, “నా గుడిః పార్లనం కిదెజ్ ఇడ్డి గుడిః[†] ఇజి దేవుణు మటదు రాస్త్ర మనాద్. గాని మీరు డొజారి మంజని సాలంసీ లెకెండ దనిజ్ కితిదెర్”, ఇజి వెహ్తాండ్రె వరిజ్ పేర్లాన్. 47 యేసు లోజు, గుడిఃదు బోదకిజి మహాన్. పెరిపుజెరిజు, యూదురి రూలుజ్ నెస్సిస్సికార్, లోకుర్ లోఇ మన్ని పెద్దెల్జు వన్నిజ్ సప్తెజ్ సుడఃజి మహార్. 48 గాని లోకుర్ విజెరి వన్ని మాటెజ్ బాగ వెంజి వన్ని సుటులం మహిజ్, వన్నిజ్ సప్తెజ్ అట్వెతార్.

20

యేసు అతికారం వందిజ్ వెన్బాజినార్
 1 అయా దినమకలోఇ ఉండ్రె నాండిజ్, వాండ్రు దేవుణు గుడిఃదు లోకాజ్ నేర్పిసి, సువార్ బోదిసి మహాన్. అయావలె పెరి పుజెరిజు ని యూదురి రూలుజ్ నెస్సిస్సికార్, పెద్దెల్జు వెట కూడఃజి వన్ని ముస్సు వాతాద్. 2 నీను ఇనిఅతికారమదాన్ యా పణిజ్ కిజిని? ఎయెన్ నిజి యా అతికారం సితాన్? మజి వెహ్తా”, ఇజి వన్నిజ్ వెన్బాతార్. 3 అందెజె వాండ్రు, “నాను బా మిజి ఉండ్రె మాట వెన్బానా. 4 బాప్తినం సేదిజ్ అతికారం యోహానుజ్ ఎయె బాణిజ్ వాతాద్ దేవుణు బాణిజ్నా లోకు బాణిజ్నా నజి యేలు వెహ్తా? ఇజి వెహ్తాన్. 5 వరిలోఇ వారు ఈహు వర్గితార్. దేవుణు బాణిజ్ వాతాద్ ఇజి మాటు వెహ్తాజ, ఎందనిజ్ మీరు వన్నిజ్ నమఇతిదెర్ ఇజి వాండ్రు వెన్బానాన్. 6 లోకురి బాణిజ్ ఇజి మాటు వెహ్తాజ, లోకుర్ విజెరి మజి పణకాణిజ్ డెయినార్. ఎందనిజ్ ఇహిజ, యోహాను, ఒరెన్ దేవుణు ప్రవక్త ఇజి విజెరి పూర్తి నమ్మిజినార్. 7 అందెజె వారు, “అయాక ఎంబెణిజ్ వాతాద్ మజి తెలిఎద్”, ఇజి వారు మర్జి వెహ్తార్. 8 అహిజ, ఎంబెణి అతికారమదాన్ నాను యా పణిజ్ కిజిన ఇజి నాను బా వెహ్తా”, ఇజి యేసు వరిజ్ వెహ్తాన్.

రయుజ కత

9 మరి, వాండ్రు ఉండ్రె కత వజి లోకురిజ్ నెన్పిస్తాన్. “ఒరెన్ లోకు ద్రాక్కు టోట ఉణుస్తాన్. ఆ టోట సెగెండార్ రయతూజ తనక సితాన్. సితండ్రె నండో కాలం మండ్రెజ్ ఉండ్రె దూరం దేసం సాహాన్. 10 పంట కొయెని కాలమదు వన్నిజ్ వాని పట్టుజ వంతు లోసి తగఅ ఇజి ఒరెన్ గొతియ వన్నిజ్ రయతూజ డర్లు పొక్తాన్. అయా రయతూజ వన్నిజ్ డెయితారె వహి కీదాన్ మర్జి పొక్తార్. 11 వాండ్రు మరి ఒరెన్ గొతియవన్నిజ్ పొక్తాన్. వారు వన్నిజ్ బా డెయిజి, సిగు కితారె వహి కీదాన్ పొక్తార్. 12 మరి బా, ఒరెన్ వన్నిజ్ పొక్తాన్. వారు వన్నిజ్ గాయమకు అని లెకెండ డెయితారె వెల్లి విసీర్తార్. 13 అయావలె ద్రాక్కు టోట ఎజుమాని, “నాను ఇనిక కిదెజ్? నాను లాపు ప్రేమ్మిని నా సొంత మరిసిజ్ పొక్కు. వారు వన్నిజ్ గవరం సినార్లెను”, ఇజి ఒడఃబితాండ్రె పొక్తాన్. 14 గాని పాలి అప్తి మన్నికార్ వన్నిజ్ సుడఃతారె, “విండ్రు యా టోటాదిజ్ అక్కు మనికాన్. యా టోట మాది ఆదెజ్ వన్నిజ్ నప్పాట్. రదు”, ఇజి వరి లోఇ వారు వర్గితార్. 15 అందెజె వారు వన్నిజ్ ద్రాక్కు టోటదాన్ వెల్లి పొక్తారె సప్తార్. అహిజ, ద్రాక్కు టోట ఎజుమాని వరిజ్ ఇనిక కినాన్? 16 వాండ్రు వాజి, అయా రయతూజ నప్పి మహి వరిజ్ టోట ఒపజెప్పాన్. లోకుర్ యాక వెహారె, “ఆ లెకెండ కిదెజ్ ఆఎద్”, ఇజి వెహ్తార్.

17 యేసు వరిజ్ డిటం బేసి ఈహు వెన్బాతాన్, “అహిజ, ఇల్లు తోహ్పికార్ నెక్తి పొక్తి పణుకు మూలదిజ్ మూల పణుకు ఆతాద్* ఇజి దేవుణు మాటదు రాస్తి మన్ని దన్ని అర్దం ఇనిక?

18 అయా పణుకు ముస్సు అర్ని విజెరి ముకెజ్ ఆనార్. అయా పణుకు ఎయెన్ ముస్సు అర్నిజ, వాండ్రు సింద్సింద ఆనాన్”. 19 యూదురి రూలుజ్ నెస్సిస్సికార్, పెరి పుజెరిజు, మా వందిజెనె విండ్రు కత వజి వెహ్తాన్ ఇజి నెస్తారె, వెటనె వన్నిజ్ అస్తెజ్ సుడఃతారె. గాని లోకురిజ్ తియెల్ ఆతారె, అన్వెతార్.

20 అందెజె వారు వన్నిజ్ బాగ గురి కిజి మహార్. ఎందానిజ్ ఇహిజ, వాండ్రు వెహ్పిని మాట లోఇ ఇని దనిజ్ బా తపు అసి వన్నిజ్ తోహ్పి అతికారిజ బాన్ ఒపజెప్పెజ్. దిని వందిజ్ వారు నండెండారిజ్ పొక్కినార్. యా సెగెండార్ మాపు సీతి నిజాయతి మనికామ్ ఇజి వేసం కినికార్. నని వరిజ్ వన్ని డర్లు

† 19:45-46 19:45-46 యెసయ 56:7. § 19:45-46 19:45-46 యిర్మీయ 7:11. * 20:17 20:17 క్రిస్త 118:22.

పోకూర్. వీరు సొన్ని వన్ను మాటజలోత తప్పు అస్తైజ్ ఇజి. 21 వారు వాతారె వన్నుజ్, “ఓ బోదకినికి, నీను నిజమతిక వెప్పి బోదకిని ఇజి మాపు నెస్సాప్. నీను ఇజ్జికార్ పెరికార్ ఇజి తోడ తోఇకి. దేవుణుదిజ్ ఇస్టం ఆతి నిజమాతి బత్తు వందిజ్ నీను నిజం నెస్సిన్సి ఇజి మాపు నెస్సాప్. 22 మాపు కయ్సరుజ్ పన్ను సీనికెజ్ నాయమ్నా? అనయమ్నా?”, ఇజి వన్నుజ్ వెన్బాతార్. 23-24 వాండ్రు వరి సెఇ బుద్దిదిజ్ నెస్టాండ్రె వరిజ్, “ఉండ్రీ దినారి కాసు తోరిస్తు. దిని మున్ను మన్ను బొమ్మ ఎయెది? రాస్తి మన్ను రాంత ఎయెది?”, ఇజి వెన్బాతాన్. “కయిసర్వి”, ఇహో వారు. 25 అందెజె వాండ్రు, “కయిసరుది, కయ్సరుజ్ సీదు. దేవుణుది దేవుణుదిజ్ సీదు”, ఇజి వెప్టాన్. 26 వారు అబ్బె మంద ఎద్రు వాండ్రు వెప్టా మాటదు తపు అస్తైజ్ అబ్ఎతార్. వాండ్రు మర్జి వెప్టా మాటదిజ్ నండో బమ్మ ఆతారె అలెతార్.

27 నస్తైవలె సెగొండార్ సదుకయ్రు యేసు డగ్రు వాతార్. సాతి వెనుక మర్జి నిజ్నిక సిల్లెద్ ఇజి వారు వెప్పినార్. వారు వాతారె ఈహు వెన్బాతార్. 28 ఓ బోదకినికి, ఒరెన్ కొడొరె సిల్లెండ్రె సాతిజ. వన్ను తంబెర్ని ఒన్నుజ్ ఇడ్డె; ఆజి కొడొరె ఇడ్డెదెజ్. ఆహె సాతి వన్ను వందిజ్ కుటుం నిల్వైజ్, ఇజి మోసె మజి రాస్తై సిత్రమనాన్. 29-31 యేలు సుడెఱ, ఉండ్రీ కాలమ్దు, దాదతంబెరెసిర్, ఏడు గురు మహార్. తోల్సరుదికాన్ ఉండ్రీ బోదెల్దిజ్ పెండ్లి ఆతాన్. కొడొరె సిల్లెండ్రె సాతాన్. సాతిజ్, నడిపి వాండ్రు దనిజ్ ఇడ్డె; ఆతాన్. కొడొరె సిల్లెండ్రె సాతాన్. వెనుక కొర్ని నడిపి దనిజ్ ఇడ్డె; ఆతాన్. కొడొరె సిల్లెండ్రె వాండ్రుబ సాతాన్. ఆహె ఏడు గురు బా కొడొరె సిల్లెండ్రె సాతార్. 32 కడివేరిదు ఆ బోదెల్బా సాతాద్. 33 అందెజె సాతి వరిబాణిజ్ మర్జి నిజ్ని వెలె, ఆ బోదెల్ ఎయెరిజ్ ఆల్ని ఆనాద్? ఆ ఏడు గురుదిజ్బా అది ఆల్ని ఆత మహద్ గదె?”, ఇజి వెన్బాతార్.

34 అందెజె యేసు వరిజ్ ఈహు వెప్టాన్, “యా లోకమ్ది లోకుర్ పెండ్లి ఆజినార్. పెండ్లిదిజ్ సీజినార్. 35 గాని సాతి వరిబాణిజ్ మర్జి నిజ్జి పరలోకమ్దు మండ్రెజ్ తగ్గికార్ పెండ్లి ఆవిర్. పెండ్లిదిజ్ సీవిర్. 36 ఎంఆనిజ్ ఇహిజ, వారు మరి సావిర్. వారు దేవుణు దూతెజి పోలితికార్. వారు సాపుదాన్ మర్జి నిజ్నార్. అందెజె వారు దేవుణు కొడొరె. 37-38 సాతికార్ నిజ్నార్ ఇజి మోసె నెగ్రెండ్రె రుజుప్ కిజినాన్. లట కన్ను బాన్ మోసె సొహాన్. అబ్బె, ‘అబ్రాహము దేవుణు, ఇస్సాకు దేవుణు, యాకోబు దేవుణు ఇజి వాండ్రు దేవుణు ఆతి ప్రబు వందిజ్ వెప్పినాన్. అయావలె అబ్రాహము, ఇస్సాకు, యాకోబు బత్తిజినార్ ఇజి తోర్వాద్. వాండ్రు బత్తితి మన్ను వరిజ్నె దేవుణు. సాతి వరిజ్ దేవుణు ఆవెన్. ఎండనిజ్ ఇహిజ, వన్ను వెట కూడిఱి మనికార్ విజెరె బత్తిజినార్.

39 సెగొండార్, యూదురి రూలుజ్ నెస్సిన్సికార్, “బోదకినికి, నీను నెగెండ్రె వెప్టా”, ఇజి వన్నుజ్ వెప్టార్. 40 వెనుక వారు వన్నుజ్ ఇనికబా వెన్బాదెజ్ ఎయెరిజ్బా దయెరం సాల్వితార్.

41 యేసు వరివెట ఈహు వెప్టాన్. “క్రీస్తు దావీదు తెగ్గాతికాన్ ఇజి ఎలాగ వారు వెప్పినార్? 42-43 ‘నాను నీ పగాతి వరిజ్ నీ పాదమ్క అడిఱి ఇడ్డిదాక, నీను నా ఉణెరె పడెకాదు బస్అ”, ఇజి ప్రబు నా ప్రబు వెట వెప్టాన్”, ఇజి కిర్తన పుస్తకమ్దు దావిదునె వెప్పినాన్. 44 దావిదునె వన్నుజ్, “ప్రబు” ఇజి కూక్కినాన్. అయావలె వాండ్రు ఎలాగ దావీదు మరిసి ఆనాన్.

45-46 లోకుర్ విజెరె వెంజి మహివలె, యేసు వన్ను సిసూరిజ్ వెప్టాన్, “మీరు యూదురి రూలుజ్ నెస్సిన్సివరి వందిజ్ జాగర్ల మండ్రు వారు నిరీ సొక తోడెగిజి బూలాదెజ్ ఇస్టం ఆతికార్. సత నడిపి పెరికార్ ఇజి మాడె; ఆదెజ్ కోరిజినార్. యూదురి మీటిజ్ ఇండ్రె పెరికార్ బన్ను బాడిఱు బన్నుజ్, విందుద్ నెగ్గి బాడిఱు బస్తైజ్ కోరిజినార్. 47 వారు రాండి బోదెక్ ఇల్కాణికిజ్ అనయమ్దాన్ లాగిజినార్. మహి వరి ఇంక నెగ్గికాప్ ఇజి తోరె ఆదెజ్ నిరీ పార్దనం కిజినార్. దేవుణు వరిజ్ నండో సిక్కు సీనాన్”.

21

1 యేసు దేవుణు గుడిఱు బస్తాండ్రె, నుటులం బేస్తాన్. అయావలె ఆస్తిమన్నుకార్ సంత పెట్టెదు పెరి సంత అర్పెసినిక సుడెఱాన్. 2 ఇనిక సిల్లి ఉండ్రీ రాండి బోదెలి సంత అర్పెస్సిక బా సుడెఱాన్. అది రుండి వయిసెజ్ అర్పెత్తాద్. 3 వాండ్రు వరిజ్, “నాను నిజం మీ వెట వెప్పిన, యా ఇనిక సిలి రాండి

బోదెలి మహి విజెరె ముస్సు లావు అర్హ్వాద్. 4 వారు విజెరె వరిజ్ కల్లితి మన్ని సంసారం బాణిజ్ అర్హ్వాద్. గాని అది దనిజ్ సిల్లి బాణిజ్ దనిజ్ బత్తిదెజ్ మనికెజ్ అర్హ్వాద్”, ఇజ వెహ్వాన్.

5 అయావలె వన్ని సిసూరలోఇ సెగిండార్, అయా దేవుణు గుడి: వందిజ్ వర్గిజి మహార్. నెగ్గి పణుకుదాన్ తోహ్కొకకె యా గుడి: ఇజ వర్గితార్. సంద సిత్తి నెగ్గి ఇనాయమ్కు ఇబ్బె ఇడ్డె మనె. గొప్ప సోకు మూద్”, ఇజ వర్గితార్. 6 అయావలె యేసు, “మీరు సుడెతికెజ్ పణుకు ముస్సు పణుకు మన్విండ అరె ఆని దినమ్కు వానెలె”, ఇజ వెహ్వాన్. 7 అయావలె వారు, “ఓ బోదకినికి, యాకెజ్ ఎసెజ్ జర్గిజెనె? యాక జర్గిని కాలం డర్దు ఆతాద్ ఇజి తోరిస్సి గుర్తు ఇనిక?””, ఇజ వెన్బాతార్.

8 అందెజె వాండ్రు వెహ్వాన్, “మీరు మొసెం కిబె ఆవండ జాగర్త మండ్రు. ఎందనిజ్ ఇహిజ నండొడార్ నా పేరు అసి వానారలె. వారు, “నానె దేవుణు షొక్తి క్రిస్తూ ఇజి, కాలం డర్దు ఆతాద్ ఇజి వెహ్వి వానార్. వరి వెట సొన్యాట్. 9 మీరు విదెమ్కు వందిజ్, జటిజ్ వందిజ్ వెనివెలె తియెల్ ఆమాట్. యాక ముజాలె జర్గిదెజ్ వెలె. గాని ఆక్కుర్ రోజు వెటనె రెఉ.

10 మరి వాండ్రు వరిజ్ వెహ్వాన్, “లోకుర్ ముస్సు లోకుర్, రాజెం ముస్సు రాజెం జటిజ్ దిజ్ నిజ్ నార్దె. 11 అబ్బె ఇబ్బె బూమి గొప్ప కర్ణినికెజ్ వానెలె. నండొ దేసమ్దు కర్డుజ్, నండొ లోకురిజ్ సెద్రిజి అస్సి కన్జమ్కు వానెలె. గొప్ప తియెల్ కల్లిస్సి గుర్తుజ్ ఆగాసమ్దు పుట్టెలె.

12 గాని యాకెజ్ జర్గిని ముజాల, వారు మిజి అస్సారె, ఇమ్సెజ్ కిసార్. వారు మిజి యూదురి మీటిజ్ ఇండ్రెని, జెలిదు ఒపజెస్సార్. రాజుజ ముజాల, మహి అతికారిజ ముజాల మిజి తనార్. యాకెజ్ విజు నా ముస్సు నమకం ఇడ్డి వందిజె జర్గిసె. 13 అయావలె, యాకదె మీరు నా వందిజ్ సువార్త వెహ్వాజె నెగ్గి సమయం. 14 వారు వెన్బానివెలె, వరిజ్ ఎలాగ మర్జి వెహ్వాజ్ ఇజి ఒడె:బిజి ముజాల బాద ఆవ్ ఇజి తిరుమాసం కిజి మన్ఆ.

15 ఎందానిజ్ ఇహిజ, మీ పగాతికార్ ఎయెర్బా మిజి ఎద్రిన్ఎండ మంజిని పజ మీరు వెహ్వాజ్ మాటెజ్, గెణం నాను మిజి సిన. 16 మిజి మీ అయిసి అపోసిర్బా దాదతంబెర్సిర్బా కూలెజ్బా అతికారిజబాన్ సిక్కు సిబిన్జెజ్ ఒపజెస్సార్. మీ లోఇ సెగిండారిజ్ వారు సప్సార్. 17 నా ముస్సు నమకం ఇడ్డి వందిజ్ విజెరె మీ ముస్సు పగదాన్ మంజినార్. 18 గాని మీరు ఎలాకాలం బత్తిసార్. 19 కన్జమ్కు ఓరిసి మండ్రు. అయావలె మీజి ఎలాకాలం దేవుణు వెట బత్తిసి బత్తు దొహ్క్కిదెర్. 20 యెరూసలెం పట్టుం సుటలుం ఉద్దం కినికార్ కూడె:జి మహిక, మీరు సుడె:తిజి, దన్ని నాసనం డర్దు ఆతాద్ ఇజి మీరు నెస్జెవెలె. 21 అయావలె నాసనం ఆవండ మండ్రెజ్ యూదయ దేసమ్దు మన్నికార్ గొరోకాజ్ ఉహ్కెజ్ వెలె. యెరూసలెం పట్టుం నడి:మి మనికార్ వెల్లి ఉహ్కెజ్ వెలె. యెరూసలెం పట్టుం వెల్లి మనికార్ లోఇ సొండ్రెజ్ ఆవిద్. 22 ముజాలె రాస్తి మనికెజ్ పూర్తి అదెజె యా సిక్కు దినమ్కు. 23 ఆ దినమ్కాజ్ పొటాద్ మన్ని వన్యాజ్, పాలు ఉట్పిస్సి వన్యాజ్ గొప్ప కన్సం. ఎందనిజ్ ఇహిజ, యూదయ దేసెం ముస్సు నండొ కన్జమ్కు వానెలె. దేవుణు కోపం యా లోకుర్ ముస్సు వానాద్లె. 24 వారు కూర్దెజాణిజ్ సానార్లె. సెగిండారిజ్ తోహ్క్కి పయ దేసమ్కాజ్ విజు ఒనార్లె. దేవుణుదిజ్ నెన్ఇకార్ యెరుసలెమ్దిజ్ ఏలుబడి: కిసార్లె. వరి ఏలుబడి: అబ్బె పూర్తి ఆని కాలమ్దాక యెరూసలెం వరి అడి:గి ఆనాద్.

25 పొద్దుదు, నెలదు, సుక్కెజుదు బమ్మకిని గుర్తుజ్ తోర్నెలె. సమ్దరమ్ది ఉల్కెజ్ గొప్ప గగల్ కిజి వరిజ్ తియెల్ కల్లిస్సి. ఆహె బూమిద్ మన్ని లోకుర్ విజెరె ఇనిక కిదెజ్ ఇజి అర్దం కివిండ మంజినార్. 26 ఆగసమ్దు మన్ని నండొ రకమ్కాణికెజ్ కద్లిసె. అందెజె లోకమ్దు జర్గిని వన్యాజ్ వందిజ్ ఎత్తు కిజి తియెల్ ఆజి లోకుర్ సానార్. 27 అయావలె లోకు మరిసి ఆతి నాను మొసొపుదు వానిక వారు సూణార్. గొప్ప అతికారం దాన్ గొప్ప జాయ్దాన్ కూడి:తి సోకుదాన్ మొసొపుదు వానిక వారు సూణార్. 28 యాకెజ్ జర్గిదెజ్ మొదొల్స్సివెలె నిల్సి బుర్తె పెర్దు. ఎందానిజ్ ఇహిజ, మీ కన్జమ్కాణిజ్ విడు:దల డర్దు ఆజినాద్.

29 వాండ్రు వరిజ్ కతవజ నెన్పిస్సాన్. బొడెమరాతిజ్ ని విజు మరకాజ్ సుడె:దు. 30 ఆకెజ్ సెగ్రిసినివెలె, జేట కాలం డర్దు ఆతాద్ ఇజి మీరె సుడె:జి నెసినిదెర్. 31 అయా లెకిండెన్, మీరు యా సజతిజ్ జర్గినిక సూణివెలె, దేవుణు యా లోకమ్దిజ్ ఏలుబడి: కిజినిక డర్దు ఆతాద్ ఇజి నెసినిదెర్. 32 యా సజతిజ్ జర్గినిదాక, యా తరమ్దికార్ సావిర్, ఇజి నాను మీ వెట కనితం వెహ్సిన.

33 ఆగానం బూమి సిల్లెండ ఆనాద్. గాని నా మాటెజ్ ఎనెజ్ బా అయాలెకెండ్ సొన్ ఉ. 34 మీరు ఉణిజి తింజి మత్తుదాన్ మన్ ఏండ యా లోకమ్ ది బత్తు. వందిజ్ విసారిన్ ఏండ జాగర్ల మండ్రు. సిల్లిజ, లోకుమరిసి ఆతి నాను వాని దినం ఉరి వాతి లెకెండ్ వెటన వానాద్. అందెజె జాగర్ల మండ్రు. 35 యా లోకమ్ దు బత్తుజిని లోకుర్ విజెరె ముస్సు. అయా దినం నెన్ ఏండ వానాద్. 36 యా జర్గిడెజ్ మన్ని విజు వన్మాజ్ ఓరిసి మంజిని సత్తు వందిజ్, లోకుమరిసి ఆతి నా ముజాలె నిల్ న సత్తు వందిజ్ ఎస్తివలె బా పార్లనం కిజి జగర్త మండ్రు. 37 యేసు రోజు దేవుణు గుడిఁదు వేడెక నెస్సిసి మహాన్. రెయ్ క బలివ గొరొత్ మండ్రెజ్ సొన్ని మహాన్. 38 లోకుర్ విజెరె పెందాలెన్, వన్ని మాటెజ్ వెండ్రెజ్ దేవుణు గుడిఁదు వాజి మహార్.

22

యేసుజ్ ఒపజెప్తెజ్ యూద ఒప్పుకొటాన్

1 వస్సు ఇని పులాజ్ సిల్లి రొట్టెజ్ తయారీకిని పండోయి డగ్రు ఆతాద్. 2 నస్తివలె పెరిపుజెరిబు, యూదురి రూలుజ్ నెస్సిస్సికార్ యేసుజ్ ఎలాగ సప్తెజ్ ఇజి ఉపాయి సుడెఁజి మహార్. ఎందానిజ్ ఇహిజ, వారు లోకురిజ్ తియెల్ ఆజి మహార్. 3 అయావలె, పన్నెండు మణిసి సిసూర్ లోక మన్ని ఇస్కరియెతు ఇని యూదెజ్ సయ్యూసు అస్తాన్.

4 వాండ్రు పెరి పుజెరిబ, అతికారిబ జాన్ సొహాండ్రె ఎలాగ వన్నిజ్ వరికిదు ఒపజెప్తెజ్, ఇజి వరివెట వర్గితార్. 5 అందెజె వారు సరద్ ఆతారె, వన్నిజ్ డబ్బు సీనాప్ ఇజి ఒప్పుకొటార్. 6 వాండ్రు దనిజ్ ఒప్పుకొటాన్. మంద లోకుర్ సిల్లివెలె వన్నిజ్ వరిజ్ ఒపజెప్తెజ్ తవ్కానం సుడెఁజి మహాన్. 7 పులాజ్ సిల్లి రొట్టెజ్ తయారీకిని పండోయి కిని దినం వాతాద్. ఆ దినమ్ దు మెండ గొరె పిల్లెజ్ పూజి సీజి వస్సు, బోజనం కిడెజ్. 8 అందెజె యేసు పేతురుజ్, యోహానుజ్, “మీరు సొన్ని, మాటు వస్సు బోజనం ఉండెజ్ తయారీ కిదు”, ఇజి వెప్తాండ్రె వరిజ్ పోక్కినాన్.

9 వారు, “మాపు ఎంబె తయారీ కిడెజ్ ఇజి నీను కోరిజిని?”, ఇజి వన్నిజ్ వెన్ బాతార్. 10-11 అందెజె యేసు వరిజ్ ఈహు వెప్తాన్. “మీరు పట్టుమ్ దు సొనివెలె, కుండాదు ఏరు పిణ్ జి ఒరెన్ మీ ఎద్రు వానాన్. వాండ్రు సొని ఇండ్రొ వన్ని వెట సొండ్రు. సొన్ని ఆ ఇండ్రొణి యజమానిజ్, ఈహు వెప్తూ, ‘నాను నా సిసూర్ వెట వస్సు బోజనం కిడెజ్ గది ఎంబె మనాద్ ఇజి బోదిస్సికాన్ నిజి వెన్ బాజినాన్’, ఇజి. 12 అయావలె ఆ ఎజుమాని విజు తయారీ కితి మేడఁ ముస్సు, మన్ని పెరి గది ఉండ్రొ తోరిస్సాన్. అబ్బె మీరు తయారీ కిదు”, ఇజి వెప్తాన్. 13 వారు పట్టుమ్ దు సొహారె, యేసు వరిజ్ వెప్తావజి విజు సుడెఁజితార్. వారు వస్సు బోజనం తయారీ కితార్.

14 వస్సు బోజనం కిడెజ్ టయం ఆతివెలె, వాండ్రు వన్ని పన్నెండు మణిసిర్ అపొస్తులు వెట బోజనమ్ దిజ్ బస్తార్. 15 అయావలె వాండ్రు వరిజ్, “నజి సప్పి ముజాల మీ వెట కూడెఁజి యా వస్సు బోజనం ఉండెజ్ నండో ఆన ఆత. 16 ఎందానిజ్ ఇహిజ, యా వస్సు బోజనమ్ దిజ్ గుర్తు దేవుణు రాజెమ్ దు పూర్తి ఆనిదాక నాను మరి ఎనెజ్ బా ఉణెవి. 17 యేసు ద్రాక్కుకల్లు మన్ని గిన్న అసి దేవుణుదిజ్ వందనం కితాన్. కితాండ్రె, “లోసి, మీరు సీబాజి ఉండ. 18 ఎందానిజ్ ఇహిజ, ఏలుదాన్ దేవుణు లోకురిజ్ ఏలుబడిఁ కినిక సూణిదాక నాను మరి ద్రాక్కు పట్టు. రసం ఉణెవి ఇజి నాను మీ వెట వెస్సినాన్”, ఇజి వెప్తాన్. 19 మరి వాండ్రు రొట్టె అసి దేవుణుదిజ్ వందనం వెస్సినా దనిజ్ ముకెజ్ కిజి వరిజ్ సితాన్. “ఇక మీ వందిజ్ సీజిని నా ఒడెఁలదిజ్ గుర్తు. నజి ఎత్తు కిడెజ్ యాక కిజి మండ్రు”, ఇజి వెప్తాన్.

20 అయాలెకెండ్ న, బోజనం ఆతి వెన్మా వాండ్రు వరిజ్ ద్రాక్కుకల్లు మన్ని గిన్న సితాన్. ‘యా గినెదు మనికెజ్ మీ పాపమ్ క వందిజ్ వాక్కిని నా నలదిజ్ గుర్తు. యాకెద నా నలదాన్ దేవుణు ఇడ్డి కొత్త ఒప్పుమానం. 21 గాని నజి ఒపజెప్తికాన్ నావెట బోజనమ్ దిజ్ బస్సు మనాన్. 22 దేవుణు ఏర్ పాటు కితి వజి, లోకుమరిసి ఆతి నాను సొనాలె. గాని నజి ఒపజెప్తి వన్నిజ్ అబాయా గొప్ప కస్టం”, ఇజి వెప్తాన్. 23 వారు యా పణిజ్ వరి లోక ఎయెన్ కినాన్ ఇజి వరి లోక వారె వర్గితార్. 24 మరి, వరిలోక ఎయెన్ పెరికాన్ ఇజి ఉండ్రొ ఇజి గొడఁబ వాతాద్. 25 అందెజె యేసు వరిజ్, “దేవుణుదిజ్ నెన్ ఇ వరి రాజూర్ వరి ముస్సు నండో అతికారం కిజినార్. వరి ముస్సు అతికారమ్ దు మనికార్, ‘మాపు లోకురిజ్ కూలెజ్’,

ఇజి అనుపె అజినార్. 26 గాని మీరు అయ లెకెండ్ మన్మాట్. మీలో ఇ పెరికాన్ ఆతికాన్తగిసి ఇజ్జి వన్నిలెకెండ్ అదెజ్. నెయ్కి సేవ కిని వన్ని లెకెండ్ అదెజ్. 27 నుడెడు, ఎయెన్ పెరికాన్. విందుదు బన్నికాండ్రా, బాట కిజి సీనికాండ్రా? విందుదు బన్నికాండ్రె గదె? గాని నాను మీ నడిమి, సేవ కిని వన్ని లెకెండ్ మన్న. 28 నా కస్టమదు మీరె నా వెట నమ్మకమదాన్ నిహి మహికిదెర్. 29 నా బుబ్బు వన్ని లోకురిజ్ ఏలుబడి: కిదెజ్ అతికారం నజీ ఒపజెప్పి వజ, నాను మిజి అయా అతికారం ఒపజెప్పిన. 30 అందెజి నాను ఏలుబడి: కినివెలె నా విందుదు నా వెట ఉణిజి తినిదెర్. మీరు రాజార్ బని మంజిని సింహసనమ్కాజ్ బని ఇస్రాయెలురి వన్నెండు తెగ్గాతి వరిజ్ ఏలుబడి: కినిదెర్.

పేతురు యేసుజ్ నెన్ఎఇజి వెహ్సాన్ ఇజి యేసు వెహ్సినాన్.

31 “ఓ సిమోన్, సిమోన్, ఇదిలో రయ్యు వాండ్రు గింజెజ జలిస్సి వజ, నీ లో ఇ మన్ని నెగ్గెకెజ్ నెస్టెజ్ సయ్యూను నిజి పరిస కినాన్. దిన్నివందిజ్ సెల్వ డొహ్క మనాద్. 32 గాని సిమోన్, నీను నమకం డి:నెంండ మండ్రెజ్ నాను నీ వందిజ్ పార్దనం కిత మన్న. నీను మర్జి నా దరిజ్ వానివలె, మహి సిసూరిజ్ వరి నమకం పిరివ్అ”, ఇజి వెహ్సాన్. 33 అయావలె సిమోను, “ప్రబువా, నీ వెట జెలిదు వాదెజ్, నీ వెట సాదెజ్బా నాను తయారనె”, ఇజి వెహ్సాన్. 34 దన్నిజ్ యేసు, “పేతురు నాను వెహ్సిన, నేండ్రు కొరె కెరెయెండ ముజాల నీను నజి నెన్ఎ ఇజి ముసార్ వెహ్సాలె”, ఇజి వెహ్సాన్. 35 మరి, వాండ్రు వరిజ్ వెన్బాతాన్, “డబ్బు ఇడ్డి ససి, మరి ఉండ్రీ ససి, జోడ్కు సిల్లెండ నాను మిజి పోక్తివెలె, మిజి ఇనికబా తక్కు ఆతాదా?”, “సిల్లె”, ఇజి వారు వెహ్సార్.

36 “అహిజ, ఏలు, మిజి డబ్బు ఇడ్డి ససి మహిజ, ఆక ఒతెజ్. అయలెకెండ్నె, మరి ఉండ్రీ ససి బా ఒతెజ్. మిజి ఉండ్రీ కూడం సలిజ, మీ సొక పొర్ని ఉండ్రీ కూడం కొండెజ్. 37 ఎందానిజ్ ఇహిజ, ‘జెలిదు మన్ని వరి వెట వన్నిజ్ కుడు:స్తార్*’, ఇజి దేవుణు మాటదు రాస్త మనాద్. నాను వెహ్సిన, అయా మాట నావెట పూర్తి అదెజెవెలె. నిజమె నా వందిజ్ రాస్తి మనికెజ్ పూర్తి ఆజినాద్”, ఇజి వరిజ్ వెహ్సాన్.

38 అయావలె సిసూర్, “ప్రబువా, ఇదిలో ఇబ్బె రుండి కూణమ్కు మనె”, ఇజి వెహ్సాన్. దనిజ్ వాండ్రు, “ఆకెజ్ ఆనె”, ఇజి వెహ్సాన్.

యేసు ఒలివ గొరొత్ పార్దనం కిజినాన్

39 యేసు పట్టుం డి:స్తాండ్రె వన్నిజ్ మన్ని అలవాటు లెకెండ్ ఒలివ గొరొత్ సొహాన్. వన్ని సిసూర్ వన్ని వెట సొహార్. 40 అబ్బె సొహిజ్, వాండ్రు వరిజ్, “సయ్తాన్ సికుదు అర్పెంండ పార్దనం కిదు”, ఇజి వెహ్సాన్. 41 వాండ్రు వరి బాణిజ్ పణుకు విసీర్ని ససా దూరం సొహాండ్రె, ముణుకుజ్ ఊర్జి పార్దనం కిజినాన్. 42 “ఓ బా, నిజి ఇస్టం ఆతిజ యా కస్టమకు నా బణిజ్ లాగ్అ. అహిజ్బా నా ఇస్టం ఆఎద్, నీ ఇస్టమ్నె ఆపిద్”, ఇజి. 43 అయావలె దేవుణు మంజిని బాడ్డి: దాన్ ఉండ్రీ దేవుణు దూత వన్నిజ్ తోరె ఆతండ్రె, వన్నిజ్ ఓదరిస్తాన్. 44 వాండ్రు ఓరిస్తెజ్ అట్ ఇ గొప్ప దుకమదు మహిజ్, మరి నండో పార్దనం కితాన్. వన్ని రూణు నల బొట్టెజ్ లెకెండ్ బూమిదు అరై.

45 వాండ్రు పార్దనం కితి నిజితండ్రె, వెనుక సిసూర్ డగ్గు సొహాన్. సొహిజ్ వారు దుకం దాన్ నిద్ర కిజినిక సుడె:తాన్. 46 అందెజి వాండ్రు వరిజ్, “ఎందనిజ్ మీరు నిద్ర కిజినిదెర్? నిజెజ, సయ్యూను మిజి పరిస కిజి తప్పదు అర్పెంండ పార్దనం కిదు”, ఇజి వెహ్సాన్.

యేసుజ్ అరెష్టు కిజినార్

47 యేసు యా మాటెజ్ వెహ్సి మహిజ్, నండో జెనం వాతాద్. వనెండు సిసూర్ లో ఇ మన్ని యూద ఇనికాన్ వరి ముజాల సొహాన్. వాండ్రు యేసుజ్ ముదు కిదెజ్ వన్ని డగ్గు వాతాన్. 48 అయావలె యేసు, “ఓ యూద, ముదు కిజినె, నీను లోకు మరిసి ఆతి నజీ ఒపజెప్పిదా?”, ఇజి వన్నిజ్ వెన్బాతాన్. 49 యేసు వెట మహి సిసూర్ జర్గినికెజ్ సుడె:తిజ్, వారు, “ప్రబువా, మాపు కూర్దదాన్ వరిజ్ కత్తెజ్?”, ఇజి వెన్బాతార్. 50 వరి లో ఇ ఒరెన్ విజు పుజెరిజ మున్ను వెరి పుజెరి పణిమణిసిజ్ ఉణెర్ గిబ్బె తవు కత్తాన్.

* 22:37 22:37 యెసయ 53:12.

51 గాని యేసు, “అలె కిదు”, ఇజి వెప్తాండ్రె, అయా పణిమణిసిజ్ గిబ్బిదిజ్ ముట్టాండ్రె వన్నిజ్ నెగెండే కిత్తాన్. 52 యేసు వన్నిజ్ అస్టెజ్ వాతి పెరి పుజెరిజు, దేవుణు గుడిః అతికారిజు పెద్దెల్జ వెట, “నాను డొజి వాండ్రునా? నజీ అస్టెజ్ పెరి కూడఃమకు కొణెజ్ అసి మీరు వాతిదెర్? 53 రోజు నాను మీ వెటనె మంజి గుడిఃదు నేరేపిస్త గదె. అయావలె మీరు నజీ తోహాఇతిదెర్. యాకదె నజీ తోహాకెజ్ దేవుణు మిజీ సిత్తి సమయం. ఏలు సర్హూన్ అతికారమ్దు మనాన్”, ఇజి వరిజ్ వెప్తాన్.

యేసుజ్ నెన్వి ఇజి పేతురు వెహ్సినాన్

54 వారు వన్నిజ్ తోహాకారె, విజి పుజెరిజు ముస్సు మన్ని పెరి పుజెరి ఆతి వన్ని ఇండ్రో ఒతాన్. పేతురు దూరం దాన్ వెన్నా సొన్ని మహాన్. 55 వారు డేవ నడిఃమి, సిను ఎరసి కూడఃజి బసి మహివలె, పేతురు వరి వెట బస్తాన్.

56 అయా ఇండ్రోణి పణిమణిసి ఉండ్రె, పేతురు సిను డగ్ర బస్తిక సుడఃతాద్. వాండ్రు ఎయెన్ ఇజి నెస్టెజ్ వన్నిజ్ డిటాజ్ బేస్తాద్. బేస్తాద్, “వీండ్రు బా వన్ని వెట మహాన్”, ఇజి అది వెప్తాద్. 57 అందెజె పేతురు, “ఓ బీ, నాను వన్నిజ్ నెన్వి”, ఇజి వెప్తాన్. 58 నణెం వెనుక మురి ఒరెన్ వన్నిజ్ సుడఃతాన్. “సిను బా వరి వెట మహికిదె”, ఇజి వెప్తాజ్, “బాబు, నాను వన్నిజ్ నెన్వి”, ఇహాన్. 59 డగ్రు ఉండ్రె గంట వెన్నా మురి ఒరెన్ కసితం వెప్తాన్, “నిజమె, వీండ్రు బా వన్ని వెట మహాన్. ఎందనిజ్ ఇహిజు, వీండ్రు గలిలియదికానె”, ఇజి. 60 దన్నిజ్ పేతురు, “ఓ బాబు, సిను వెహ్సెక నజీ తెలిఎద్”, ఇజి వెప్తాన్. వాండ్రు వెహ్సెమహివలె వెటనె కొరు కెరెతాద్. 61 యేసు వెనుక మహ్తాండ్రె పేతురుజ్ డిఃటాజ్ బేస్తాన్. అయావలె ప్రబు వన్నిజ్, నేండ్రు కొరు కెరెని ముజాల నీను నజీ నెన్వి ఇజి ముసారే వెహ్సెలె ఇజి”, వెహ్సె మాట పేతురు ఒడఃబితాన్. 62 వీండ్రు వెల్లి సొహండ్రె నండో దుకం ఆజి అడఃబతాన్.

కాప్ కినికార్ యేసుజ్ వెక్రిసినార్

63 యేసుజ్ కాప్ కిజి మహికార్ వన్నిజ్ వెక్రిసి డెయిదెజ్ మొదోల్స్తార్. 64 వారు ని కణకెజు కనెల్దాన్ తోహాకారె, “ఓ ప్రవక్త వెహ్సె, ఎయెన్ నిజి డెయితాన్ ఇజి”, ఇజి వెన్బాతార్. 65 వారు వన్నిజ్ దూసిన్ని మురి నండో మాటెజ్ వన్నిజ్ వెప్తార్.

యేసుజ్ పిలాతుని హెరోదుజ్ ముజాల నిల్స్తార్.

66 పెందాలే ఆతివెలె, యూదురి పెద్దలుజ్, పెరి పుజెరిజు, యూదురి రూలుజ్ నెస్సిస్సికార్ విజెరె కూడిఃతార్. యేసుజ్ వరి ముజాల నిల్స్తార్. 67-68 వారు వన్నిజ్, “సిను క్రీస్తు నా, మజి వెహ్సె”, ఇజి వెన్బాతార్. అందెజె యేసు వరిజ్, “క్రీస్తు ఇజి నాను వెహ్సెజు, మీరు నమిఇదెర్. నాను మిజి వెన్బాతిజు మీరు మరెజి వెహ్సెదెర్. 69 గాని ఏలుదాన్, లోకుమరిసిఆతి నాను గొప్ప అతికారం మని దేవుణు ఉణెర్ పడఃకారు బస్తలె”, ఇజి వెప్తాన్. 70 అయావలె వారు విజెరె, “అహిజు, సిను దేవుణు మరిసినా?”, ఇజి వన్నిజ్ వెన్బాతార్. వెన్బాతిజ్ వాండ్రు, “మీరు వెహ్సె లెకెండెనె, నానె దేవుణు మరిసి”, ఇజి వెప్తాన్. 71 అందెజె వారు, “ఎందానిజ్ మజి మురి రుజుజ్ వెహ్సెకార్. వన్ని వెయదానె మాట వెహ్సె”, ఇజి వెప్తార్.

23

1 అయావలె, యూదురు అతికారిజు విజెరె నిహరె, యూదయ దేసెం సుడఃజిని రోమ అతికారి ఆతి పిలాతు బాన్ వన్నిజ్ ఒత్తార్. 2 వారు, “వీండ్రు మా లోకుర్ నడిఃమి గొడబె రేప్పినాన్. రోమ రాజు ఆతి కయెనరుజ్ పన్ను సీమాట్ ఇజి వెహ్సెనాన్. నానె క్రీస్తు అహిజు రాజు ఇజి వెహ్సెనాన్”, ఇజి వన్ని ముస్సు నేరం మొప్తార్. 3 అందెజె పిలాతు యేసుజ్, “సిను యూదురిజ్ రాజునా?”, ఇజి వెన్బాతాన్. వెన్బాతిజ్, “ఒబ, సిను వెహ్సె వజనె”, ఇజి మరెజి వెప్తాన్. 4 పిలాతు పెరి పుజెరిజు వెట మంద లోకుర్ వెట, “విని ముస్సు నజీ, ఇని తప్పు బా తోరెఎద్”, ఇజి వెప్తాన్. 5 గాని వారు, “ఏక ఏక వెప్తార్, “వీండ్రు యూదయ దేసెమ్ది లోకుర్ విజెరిజ్ వన్ని మాట నెస్సిసి గొడబె రేప్పినాన్. యా పణి గలిలియదు మొదోల్లి ఇబ్బె దాక వాతాన్”, ఇజి. 6 యాక వెంజి, “వీండ్రు గలిలియదికాండ్రా”, ఇజి పిలాతు వెన్బాతాన్. 7 యేసు హెరోదు ఏలుబడిః కిని గలిలియ ముటదికాన్ ఇజి పిలాతు నెస్తాన్. అందెజె వాండ్రు వన్నిజ్ హెరోద్బాన్ షొక్తాన్. అయావలె హెరోదు బా యెరూసలెమ్దు మహాన్.

8 హేరోదు యేసుజ్ నుడేతివెలె నండొ సరద అతాన్. ఎందనిజ్ ఇహిజ, యేసు వందిజ్ నండొ వెహ మహాన్. నండొ కాలమ్దాన్ వన్నిజ్ నుడేదెజ్ అస అజి మహాన్. యేసు కిని బమ్మ అని పణిజ నుడేదెజ్ కోరితాన్. 9 అందెజి వాండ్రు నండొ మాటెజ్ వెన్బాతాన్. గాని యేసు ఇనికబా మరజి వెహవితాన్. 10 పెరి పుజెరిజు, యూదురి రూలుజ్ నెస్సిస్సికార్ బాన్ నిల్చి, వన్ని మున్సు, డటిసి నేరం మొప్పి మహార్. 11 హేరోదుని వన్ని సయనమ్దికార్ వన్నిజ్ వెక్రిసి సెకాల్ కితార్. నండొ దర మన్ని గొప్పు ఉండ్రె సొక తొడేగిన్పిస్తాండ్రె పిలాతు డగ్రు మరజి పోక్తాన్. 12 అయా రోజునె పిలాతుని హేరోదు కూలెజ్ అతార్. దిని ముజాలె వారు పగ్దాన్ మహార్.

13-14 అయావలె పిలాతు, పెరి పుజెరిజ, అతికారిజ, లోకాజ్ కూక్పిస్తాండ్రె వరిజ్, “లోకుర్ నడిమి గొడబ రేప్పి నాన్ ఇజి వెప్పి వినిజ్ మీరు నా బాన్ తతిదెర్. మీ ఎద్రు నాను వినిజ్ వెన్బాత. గాని మీరు వెప్తి నేరం ఇనికబా విని లోఇ నజి తోరివిత. 15 అయలెకెండెన్, హెరోదుజ్బా తోరివతాన్. వాండ్రు వినిజ్ మా డగ్రు మరజి పోక్తాన్. ఇదిలో వీండ్రు సాపుదిజ్ తగితి ఇన్ని పణి బా కివన్. 16 అందెజి నాను వినిజ్ సిక్కి సీజి డిన్ను సీన”, ఇజి వెప్తాన్. 17 (ఏంటు ఏంటు కిని పన్సు, పండొయిదిజ్ లోకు కోరిపాతి ఒరెన్ జెలిదు మన్ని వన్నిజ్ డిసి సిదెజ్ పిలాతుజ్ అలవాటు).

18 గాని లోకుర్ విజెరె, “సవ్ అ వన్నిజ్ బరబెజ్ మజి డిసి సిదా”, ఇజి ఉండ్రె లెకెండె డటం డేడిస్తార్. 19 బరబ్బు పట్టమదు గొడబ రేపిస్తాండ్రె, సెగొండారిజ్ నస్తాన్. అందెజి వన్నిజ్ జెలిదు ఇట్టా మహార్. 20 యేసుజ్ డిస్సెజ్ కోరిజి పిలాతు మరి లోకురిజ్ నాను వన్నిజ్ డిస్సెజా? ఇజి వెన్బాజి నాన్. 21 గాని వారు, “వినిజ్ సిలువాదు కుటిజాణిజ్ డెయిజి సవ్ అ, సిలువాదు కుటిజాణిజ్ డెయిజి సవ్ అ”, ఇజి నండొ గగోల్ అతార్.

22 ముసారెదిజ్ వాండ్రు వరిజ్, “ఎందానిజ్? ఇన్ని తప్పు వీండ్రు కితాన్? సాపుదిజ్ తగితి ఇన్ని తప్పు బా నాను విని లోఇ తోవిత. అందెజి నాను వినిజ్ సిక్కి సీజి డిన్ను సీన”, ఇజి వెప్తాన్ 23 గాని వారు, “వినిజ్ నప్పెజ్ వెలె”, ఇజి మరి మరి డటం డేడిస్తార్”. ఆహె వరి గగోల్ గెలిస్తాద్. 24 అందెజి పిలాతు వారు వెప్తి వజి జర్దివిద్ ఇజి తీర్పు సిత్తాన్. 25 పిలాతు వారు లొస్తి వన్నిజ్ డిస్సె సితాన్. అయా వాండ్రు పట్టమదు గొడబ రేపితి వందిజ్ సెగొండారిజ్ సప్తి వందిజ్ జెలిదు మహాన్. యేసుజ్ వారు కోరితివజ కిదెజ్ వరి కీదు ఒపజెప్తాన్.

యేసుజ్ సిలువాదు కుటిజాణిజ్ డెయిజి నార్

26 వారు వన్నిజ్ ఒసి మహార్. అయావలె, మరి ఉండ్రె దేసిమ్ది కురెనియ పట్టమదికాన్ ఆతి సిమోన్ ఇనికాన్ ఒరెన్ యెరూసలెం పట్టు వెల్లిదాన్ అయా సరి యెరూసలెం పట్టమదు వాజి మహాన్. వారు వన్నిజ్ అస్తారె, యేసువెట, వన్ని వందిజ్ సిలువ పిండిదెజ్ వన్నిజ్ సితార్. 27 మంద లోకుర్ వన్ని వెన్కా వాజి మహార్. వరిలోఇ బోదెక్ వన్ని వందిజ్ గుండె కొత్తె అజి అడబబాజి వాజి మహె. 28 యేసు వరిదరిజ్ మరజి, “యెరుసలెమ్ది బీబికండె, మీరు నా వందిజ్ అడబబాహాల్. మీ వందిజ్ ని మీ కొడోర్ వందిజ్ అడబబాదు. 29 ఎందానిజ్ ఇహిజ వారు, “గొడ్డు బోదెకాజ్ బా పాలు ఉట్పిన్ ఇ వన్నాజ్ గొప్పు నెగెద్”, ఇజి వెప్పి దినమ్కు వాలెలె. 30 అయావలె వారు, “మా మున్సు అర్ అ”, ఇజి గొరొకాజ్ వెట, మజి పడేగ్ అ”, ఇజి మెటిజ వెట వెహ్యర్లె.

31 ఎందానిజ్ ఇహిజ, “మరాన్* వసిజ్ మనివెలె నిసా బాదెజ్ కితిజ మరాన్ వప్తిజ మరి ఎసా బాద్ కినారొ”, ఇజి వెప్తాన్. 32 మరి రివిర్ డొజారిజబా వన్నివెట నప్పెజ్ ఒసి మహార్. 33 వారు బుర్ర పిణికి ఇజి కూక్కి బాడిడు వాతార్. అబ్బి యేసుజ్ సిలువాదు కుటిజాణిజ్ డెయితార్. ఒరెన్ వన్నిజ్ ఉణెర్ వడకాద్, మహి వన్నిజ్ డేబర పడకాద్. సిలువ పొక్తార్. 34 అయావలె యేసు, “ఓ బా, వీరు కిజనిక ఇనిక ఇజి విరిజ్ తెలివిద్. అందెజి విరిజ్ సెమిన్ అ”, ఇజి పార్దనం కితాన్. వారు వన్ని సొక్కెజ్ సీబె ఆదెజ్ సీటిజ్ పోక్తార్.

35 లోకుర్ నిహారె నుడేజి మహివలె, అతికారమ్దు మనికార్, “వీండ్రు మహి వరిజ్ రక్కిస్తాన్. వీండ్రు క్రీస్తు ఇహిజ, వినిజ్ వీండ్రె రక్కిసె ఆపిన్”, ఇజి వెప్పి వెక్రిస్తార్. 36-37 సయనమ్దికార్ బా వాతార్, వన్నిజ్ సెకాల్ కితార్. వారు వన్నిజ్ సేందుదిక ఉండ్రె ఉండెజ్ సితారె, “సీసు యూదురి రాజు ఇహిజ, నిజి సీనె రక్కిసె ఆఅ”, ఇజి వెప్పి సెకాల్ కితార్. 38 “వీండ్రు యూదురిజ్ రాజు’ ఇజి వన్ని

* 23:31 23:31 యాక యూదురి ఉండ్రె మాట. దిని అర్దం ఇనిక ఇహిజ తప్పుకిఇతి నజి వారు సిక్కి సీతిజ నండొ సెఇవరిజ్ దేవుణు ఎసొన్ సిక్కి సీనాన్.

మున్ను మొట్టి నేరం బోర్డుడు రాసి సిలువాదు ఇట్టార్. 39 సిలువాదు డెయితి డొజారిజ లొక ఒరెన్, “నీను క్రీస్తుగదె. నిజి నీన రక్కిసె ఆపిన్. మజి బా రక్కిసెఅ”, ఇజి వన్నిజ్ దూసిస్తాన్. 40-41 గాని మహికాన్, “నీను దేవుణుదిజ్ తియెల్ ఆకదా? వన్నిజ్ దొహక్తి సిక్కినె నిజి బా దొహక్తి మనాద్. నాయం దానె మజి సిక్కిస్తార్. ఎందనిజ్ ఇహిజ, మాటు కితి మని పణిదిజ్ తగితి సిక్కి సెత్తార్. గాని వీండ్రు ఇని తప్పు బా కిఎన్”, ఇజి వన్నిజ్ గోల కిత్తాన్. 42 మరి, “యేసు, నీను రాజు ఆజి మరజి వానివలె, నజి ఒడేబిత”, ఇజి వెప్తాన్. 43 అందెజె యేసు, “నిజమె నాను నీ వెట వెప్పిన, నేండ్రు నీను నా వెట పరలోకమదు మంజినిలె”, ఇజి వెప్తాన్.

యేసుసిలువ మున్ను పాణం డిస్తాన్.

44-45 అయావలె సమయం వేడె పన్నెండు గంటెజ ఆతాద్. మూండ్రు గంటెజదాక లోకం విజు సీకటి వాతాద్. పొదు జాయి సిఎతాద్. యెరూసలెం గుడిః తెర మహి పాత మున్నుహాన్ అడ్డి దాక నడిఃమిహాన్ రుండి ముకెజ్ కింజితాద్. 46 యేసు, “ఓ బా, నా పాణం నీ కీదు ఒపజెప్పిన”, ఇజి వెప్తాన్. యా లెకెండ్ వెప్తాండ్రె వాండ్రు పాణం డిస్తాన్. 47 అయావలె సయిసమదివరి అతికారి, జర్గితక సుడేతండ్రె, “నిజమె వీండ్రు నీతినిజయదికాండ్రె”, ఇజి వెప్పి దేవుణుదిజ్ పొగిడిఃతాన్. 48 సుడేదెజ్ కూడిఃతి వాతి లోకుర విజెరె జర్గితకెజ్ సుడేఃజి, గుండె కొత్తె ఆజి మరజి ఇండ్రో సాహాన్. 49 గాని వన్నిజ్ నెల్లు అతికార్ విజెరె, నెలవాతివరి లొక గలిలయదాన్ వన్ని వెట వాతి బోదెకు, దూరం నిల్చి యాకెజ్ సుడేఃజి మహార్.

యేసుజ్ సమాది కిజినార్

50-51 అయావలె యోసేపు ఇనికాన్ ఒరెన్ మహాన్. వాండ్రు యూదయ దేసెమది అరిమతియ ఇన్ని పట్టమదికాన్ వాండ్రు సన్హద్రి నజమదు మన్ని వరిలోక పెరికాన్ ఒరెన్. వాండ్రు నీతి నిజాయితి మనికాన్. యేసుజ్ సిలువాదు డెయిజి సప్తజ్ యూద పెద్దలజ్ కితి తిరుమానం ఒప్పకొడేఃవితాన్. దేవుణు ఏలుబడిః తోరె ఆనివందిజ్ వాండ్రు ఎద్దు సుడేఃజి మహాన్. 52 వాండ్రు పిలాతు డగ్రు సాహాండ్రె యేసు పీనుగు లొస్తాన్. 53 వాండ్రు, అయా పీనుగు సిలువ మున్నుహాన్ డిస్తాండ్రె తెల్లాని పాతదాన్ సుటిసీ నటు పణకుదిజ్ దొలెస్తి దూకిదు ఇట్టాన్. అయా దూకిదు, ముజాలె ఎయెరిజ్ బా ఇడ్ఎరె. 54 అయా రోజు, విస్త్రాంతి దినం ముజాలె మన్ని తయార్ కిని రోజు. విస్త్రాంతిదినం మొదొల్స్తెజ్ టయం డగ్రు ఆజినాద్.

55 యేసు వెట గలిలయదాన్ వాతి బోదెకు యోసేపు వెట సాహెనె, దూకి ని వన్నిజ్ ఇట్టిక సుడేఃతె. 56 వాండ్రు ఇండ్రో మహారె, పీనుగుదిజ్ రాస్తెజ్ వాసనం నూనె తయార్ కితార్. విస్త్రాంతి దినం మొదొల్స్తెజ్ యూదురి రూలుజ్ నమ్మిజి అవిక్ రెంబితార్.

24

యేసు మరజి నిజ్జినాన్

1 వారమదిజ్ మొదొహి రోజు కోడిఃజామ్సెన్, బోదెకు అవి తయార్ కితి వాసనం నూనెజ్ అస్తెనె దూకిదు సాహె. 2-3 అవిక్ అబ్బె వాతిజ్, దూకి మూక్తి పెరిపణుకు గూర్బాతి మహిక సుడేఃతె. అవిక్ లొక డుగితిజ్ యేసు పీనుగు తోరెవితాద్. 4 దిన్ని వందిజ్ బమ్మ ఆజి నిహి మహివలె, మిరిస్సివజ తెలాని సాక్కెజ్ తొడిఃగితి రివెర్ మొగవారు వన్నా డగ్రు నిహార్. 5 అవిక్ నండ్రె తియెల్ ఆజి ముణుకుజ్ ఊరిజి మాడిఃస్సి. 6 అయావలె అయా మొగవారు వన్నాజ్, “ఎందనిజ్ మీరు బత్తితి మన్నివన్నిజ్ సాతివరిబాన్ రెబాజిన్ దెర్? వాండ్రు ఇబ్బె సెలెన్. నిజిత మనాన్. మీ వెట గలిలయదు మహివలె వాండ్రు ఇనిక వెప్తాన్ ఇజి ఎత్తు కిదు. 7 ఇనిక వెప్తాన్ ఇహిజ, ‘లోకుమరిసి సెకవరి కిదు ఒపజెవె ఆదెజెవెలె. సిలువాదు పొకె ఆజి, వాండ్రు సాజి మూండ్రి రోస్కాజ్ నిజ్నాన్లె’, ఇజి”, ఇజి వెప్తార్. 8 అయావలె అవిక్ యేసువెప్తా మాట ఒడేఃబితె.

9 దూకిదాన్ మహైనె, అబె సుడేతికెజ్ విజు వదకొండు మణిసి సిసూరిజ్ న మహి వరిజ్ విజెరిజ్ వెహ్తా*. 10 అవిక్ ఎయెక్ ఇహిజ, మగ్దలెనె మరి, యోసన, యాకోబుజ్ అయిసి ఆతి మరియ, వన్నావరివెట మహి మరి సెగొండెక్ బోదెక్ ఇవిన్ నె జర్గితికెజ్ అహొస్తుడురిజ్ వెహ్తాకెజ్†. 11 గాని వారు బోదెక్ వెహ్తా మాటెజ్ నమిఎతార్. ఎందానిజ్ ఇహిజ, ఆకెజ్ పంబర మాటెజ్ లెకెండె వారు ఒడేజిబితార్. 12 అహిజ్ బా, పేతురు నిజితండ్రె, దూకిదు ఊహొక్కి సాహాన్. వజితి సుడేతిజ్ పీన్ గు సుట్టిన్ తెల్లాని పాతెజ్ అర్ది మహికదె సుడేతాన్. వాండ్రు జర్గితికెజ్ వందిజ్ బమ్మ అజి ఇండ్రో మరజి సాహాన్.

యేసు రిఎర్ సిసూరిజ్ తోరె ఆజినాన్
13 అయూ రోజునె, సిసూర్ లొఇ రిఎర్ ఎమాయుఇని ఉండ్రీ నాటో సొన్ని మహార్. ఎమాయు యెరూసలెమ్ దాన్ పదకొండు కిలో మీటర్ దూరం మనాద్. 14 వారు రిఎర్ జర్గితి విజు వందిజ్ వర్గిజి మహార్. 15-16 వారు ఆహె వర్గిజి మహిజ్ యేసు వాండ్రె వాజి వరి వెట నడితాన్. వారు వన్నిజ్ సుడేతార్, గాని వన్నిజ్ గుర్తు అస్తజ్ అట్ ఏతార్. 17 నస్తవలె యేసు, “మీరు నడిజి వర్గిజిని యా మాటెజ్ ఇనికెజ్”, ఇజి వరిజ్ వెన్ బాతాన్. వారు దుకందాన్ మొకొం డిస్తారె, కద్దిఎండ నిహార్. 18 వెనుక వరిలొఇ క్లెయిపా ఇనికాన్ ఒరెన్ యేసుజ్, “యెరూసలెమ్ దు కూల వాతి వరి లొఇ మంజి, సాహి రోస్నాజ్ జర్గితికెజ్ నెన్ ఇతికి నీను ఒరిదె”, ఇజి వెహ్తాన్. 19 “ఇనికెజ్ జర్గితె?”, ఇజి వాండ్రు వెన్ బాతాన్. దనిజ్ వారు ఈహు వెహ్తార్. “నజరెతుదికాన్ యేసుజ్ జర్గితి నజతిజి వందిజ్ వర్గిజినావ్. వాండ్రు ఒరెన్ ప్రవక్త. వాండ్రు కితి గొప్ప పణిజాణిజ్ వెహ్తా గొప్ప సజతిజాణిజ్ దేవుణు వన్నిజ్ ఇస్తం ఆతాన్. లోకుర్ విజెరె బా వన్నిజ్ ఇస్తం ఆతారె నమ్మితార్. 20 మా పెరి పుజెరిజు, అతికారిజు, రోమ అతికారి కిదు సాపుదిజ్ సిక్స సిదెజ్ వన్నిజ్ ఒపజెహ్తార్. వారు వన్నిజ్ సిలువాదు కుటిజాణిజ్ డెయిజి నస్తారె. 21 వీండ్రునె ఇస్తాయేలు లోకాజ్ డిన్ పిస్సికాన్ ఇజి మాపు ఎర్దు సుడేజి మహావ్. యాకదె ఆఎండ, యా సజతి జర్గిజి నేహాన్ మూండ్రీ దినమ్ కు ఆతె.

22-23 మరి. మా లొఇ మన్ని సెగొండెక్ బోదెక్ మజి నండో బమ్మ కిబిస్తె. ఎలాగ ఇహిజ, కోడిజామ్ నె దూకిదు సాహి గాని వన్నాజ్ వన్ని పీన్ గు తోరె ఎతాద్. అవీకు మరజి వాతెనె మజి ఈహు వెహ్తా. దూతార్ వన్నాజ్ తోరె ఆతారె, యేసు బత్రిత మనాన్ ఇజి వెహ్తార్ ఇజి. 24 మా వెట మనికార్ సెగొండార్ దూకిదు సాహారె, బోదెక్ వెహ్తా వజనె సుడేతార్. వన్నిజ్ వారు సుడేతివతార్.

25-26 అయావలె వాండ్రు వరిజ్, “బుద్ది సిలికిదెర్, ప్రవక్తరు వెహ్తా మాటెజ్ విజు నమిదెజ్ మిజి నండో కస్తం ఆజినాద్. క్రీస్తు యా లెకెండ మా లెజ్ ఒరిసి, దేవుణు మంజిని బాడిదు వన్నివెట అతికారమ్ దు మండ్రెజ్ గదె?”, ఇజి వెహ్తాన్. 27 వాండ్రు దేవుణు మాటదు వన్ని వందిజ్ రాస్తీ మన్ని దని అర్దం వరిజ్ వెహ్తాన్. మోసె రాస్తీ పుస్తకమ్ దాన్ మొదొల్లి ప్రవక్తరు విజెరె రాస్తీ పుస్తకమ్ దాక మన్ని మటెజు వెహ్తా వాతాన్.

28 వారు సొన్నిని నారు డగ్గు ఆతిజ్, వాండ్రు వరిజ్ డిసి మరి దూరం సొన్నిని లెకెండె నడితాన్. 29 గాని వారు, “మా వెట మన్ అ. పొద్దు ఆజినాద్. సీకాట్ ఆతాద్”, ఇజి వెహ్తా వన్నిజ్ మరి మరి వెహ్తాన్. అందెజె వాండ్రు వరి వెట మండ్రెజ్ సాహాన్. 30 వాండ్రు వరి వెట ఉండెజ్ బస్తివెలె, రొటె అస్తాండ్రె దేవుణుదిజ్ వందనమ్ కు వెహ్తా దనిజ్ రుక్కి వరిజ్ సితాన్ 31 వెటనె వారు వీండ్రు యేసు ఇజి గుర్తు అస్తారె. గాని వాండ్రు వరిజ్ తోరె ఎండ ఆతాన్. 32 అయావలె వారు రిఎర్, “వాండ్రు సర్దు, మా వెట వర్గిజి, దేవుణు మాటెజ్ మజి నెన్ పిస్తివెలె, మా మన్నుదు నండో సరద వాతి లెకెండె ఆతాద్ గదె”, ఇజి ఒరెన్ వెట ఒరెన్ వర్గితాన్. 33-34 వెటనె వారు నిజితారె, యెరూసలెమ్ దు సాహార్. అబె, వారు పదకొండు మణిసిర్ సిసూర్ ని వరి వెట మహికార్ కూడేజి, “నిజమె, యేసు మరజి నిజితాన్. సిమొసుజ్ తోరె ఆతాన్ ఇజి వర్గిజి మహిక సుడేతాన్. 35 అయావలె వారు రిఎర్, సర్దు జర్గితికెజ్ యేసు రొటె రుక్కివెలె వారు ఎలాగ గుర్తు అస్తారె దన్నివందిజ్ వెహ్తార్.

* 24:9 24:9 యా పన్నువెర్కార్ యూదురి దెనమ్ దిజ్ బాదకిజిని రోమ ప్రబుత్తం వందిజ్ పణికినికార్ విరు యూదురిజ్ పడేఇకార్ ఆకాదె ఆవిండ వీరు నండో పన్ను లొని యూదురిజ్ బాద కినార్. ఆహె అనయమ్ దానిబా వారు ఆస్తి గణిస్తానార్. వారు యూదురి రూలుజ్ లోజిఎర్ అందెజె యూదురు వరిజ్ పాపం కినికార్ ఇజి వెహ్తార్. † 24:10 24:10 యాక యూదురి ఉండ్రీ మాట దిన్ని అరదం ఇనిక ఇహిజ తప్పకితి వరిజ్ వారు సిక్సతిజి నండో సెఇవరిజ్ దేవుణు ఎస్సా సిక్స సీసాన్ ఇజి.

సినూర్ కూడితివెలె వరిజ్ తోరె ఆజినాన్

36 వారు వర్రిజి మహివలెనె యెసు వాండ్రె వరి నడిమి నిహండ్రె, “సమాదనం కల్లిపిద్”, ఇజి వెహ్లాన్.
 37 దూబ తోరితాద్ ఇజి ఒడిబిజి వారు నండొ తియెల్ అతార్. 38 నస్త్రవలె వాండ్రు, “ఎందానిజ్ మీరు తియెల్ ఆజిన్దెర్? ఎందనిజ్ అనుమానమ్కు మీ మన్నుద్ వాజినె? 39 నానె వాండ్రు ఇజి నమిదెజ్ నా కిక్కాజ్ కాల్యాజ్ సుడోదు. ఎందానిజ్ ఇహిజ, నజీ మన్ని లెకెండ్ర దూబదిజ్ ఒడోల్ మన్ఉ.
 40 యా మటెజ్ వెహ్లాన్ వాండ్రు వరిజ్ వన్ని కిక్కు కాల్యు తోరిస్తాన్.

41-43 అహిజ్బా వారు సర్దదాన్ బమ్మదాన్ ఇంక నమ్మిఎండ్ర మహార్. అందెజె వాండ్రు వరిజ్, “తిండ్రెజ్ ఇనికబా మనాదా?”, ఇజి వెన్బాతిజ్, వారు ఉండ్రీ సుహ్తి మొయ ముకెజ్ సితార్. వాండ్రు లోస్తాండ్రె వరి ఎద్రు తిహాన్. 44 మరి వాండ్రు వరిజ్, “నాను మీ వెట మహివలె యాకెజ్నె మీ వెట వెహ్లా. ఇనిక ఇహిజ, మోసె రాస్తి పుస్తకమ్దు, ప్రవక్తరు రాస్తి పుస్తకమ్దు, కీర్తన పుస్తకమ్దు నా వందిజ్ రాస్తి మనికెజ్ విజు పూర్తి ఆదెజ్వెలె”, ఇజి. 45 వాండ్రు దేవుణు మాటెజ్ అర్దం కిదెజ్ వరిజ్ సాయం కిత్తాన్.
 46-47 వాండ్రు వరిజ్ ఈహు వెహ్లాన్. “యా మాటెజ్ రాస్త మనాద్. అయాక ఇనిక ఇహిజ, క్రీస్తు మాలెజ్ ఓరిసి, సాజి మూండ్రీ రోస్కాణిజ్ సాపుదాన్ నిజ్నాన్లె. యెరూసలెమ్దు మొదొల్ని లోకాజ్ విజెరిజ్ వన్ని అతికారమ్దాన్ ‘పాపమ్కు ఒప్పుకోడోఅ’, దేవుణు సెమిస్తాన్”, ఇని మాట వెహె ఆనాద్లె.
 48 మీరు సుడోతికెజ్ లోకాజ్ వెహ్లాజ్. 49 నా బుబ్బ ఒట్టు కితి దేవుణు అత్మదిజ్ నాను మిజీ పోక్కు. గాని మున్నుహాన్ సత్తు మీ మున్ను వానిదాక మీరు యెరూసలెం పట్టమ్దునె మండ్రు.

దేవుణు యేసుజ్ వలొకమ్దు ఒసినాన్

50 పట్టుం వెల్లి బెతానియ నారు డగ్రు దాక వాండ్రు వరిజ్ ఒతాన్. వాండ్రు కికు పెహ్లాండ్రె, వరిజ్ దీవిస్తాన్. 51 దీవిసి మహివలె వాండ్రు వరిజ్ డిస్తాన్. దేవుణు వన్నిజ్ వాండ్రు మంజిని బాడిదు ఒత్తాన్. 52-53 వారు వన్నిజ్ మాడిస్తారె, నండొ సర్దదాన్ యెరూసలెమ్దు మర్జి వాతార్. వారు డిన్విండ్ర గుడిదు మంజి, దేవుణుదిజ్ పొగిడిజి మహార్.

యోహాను రాస్తీ సువార్త

నెల్లొ కిబిసినిక

వన్నెండు మణిసిర్ సిసూర్ లోక ఒరెనాతి యోహాను రాస్తీ పుస్తకమ్ నె యాక. యేసు యా లోకమ్ దు బత్తిజి మహివలె జగ్గితి దన్నివందిజ్ కతవజ వాండ్రు వహ్సినాన్. యేసు ఎయెన్? వాండ్రు దేవుణు మరిసి, దేవుణు వెట మహికాన్, గాని వాండ్రు దేవుణునె. తయార్ కితిక ఇనికబా వాండ్రు సిల్లెండ కల్లివితాద్. వాండ్రె దేవుణు మాట, లోకురి విజెరి పాపమ్ కు సాన్ పిస్తాజ్ పూజ ఆతి మెండ గొరై పిల్ల లెకెండె వాండ్రు. ఎలాకాలం బత్తిని బత్తు సీని టిండి లెకెండె వాండ్రు. లోకమ్ దిజ్ జాయి లెకెండె మనాన్. నెగ్గి గవుడుఎన్ లెకెండె మనాన్, సాపుదాన్ మరజి నిజిత్తి బత్తు సీనికానె వాండ్రు ఇజి యేసు వందిజ్ యా పుస్తకమ్ దు వెహ్సినాన్. యా సువార్త రాసి మహివలె, రోమ గవర్ మెంటుదు మన్నికార్ దేవుణుదిజ్ నమ్మితి వరిజ్ నండో మాలెజ్ కిజి మహర్. అందెజె నమ్మితి వరిజ్ దయిరం సీదెజ్ యోహాను రాస్తీకాదె యా పుస్తకం.

యేసు క్రీస్తు దేవుణు వాక్యం

1 లోకం పుటిన్ ఏండ ముజాలె, దేవుణు వందిజ్ వెహ్సినాని వాక్యం ఇనికాన్ ఒరెన్ మహాన్. వాండ్రు దేవుణు వెట మహాన్. వాండ్రె దేవుణు. 2 వాండ్రు లోకం పుటిన్ ఏండ ముజాలె, దేవుణు వెట మహాన్. 3 విజు వన్నివెట దేవుణు తయార్ కితాన్. కల్లితిమన్నిక ఇనికబా వాండ్రు సిల్లెండ కల్లివితాద్. 4 జివు వన్నిబాన్ మనాద్. అయా జివు లోకురిజ్ జాయి ఆత మనాద్. 5 జాయ్ సీకటిదు జాయ్ సీజనాద్. గాని సీకటిదు మన్నికార్ జాయ్ దిజ్ నెన్ ఏతార్. 6 దేవుణు బాణిజ్ పొక్తి ఒరెన్ మణిసి వాతాన్. వన్ని పేరు యోహాను. 7 వాండ్రు అయా జాయ్ వందిజ్ సాస్యం వెహ్సాజ్ ఒరెన్ సానిలెకెండె వాతాన్. ఎందానిజ్ ఇహిజు, విన్నిబోద వెంజి లోకుర్ విజెరి అయా జాయ్ దిజ్ నమ్మిదెజ్ వాతాన్. 8 యోహాను అయా జాయ్ ఆవన్. గాని అయా జాయ్ వందిజ్ సాక్సం వెహ్సాజ్ వాతాన్. 9 అయా జాయ్ నె నిజమాతి జాయ్. నిజమాతి జాయ్ లోకమ్ దు వాజి లోకురిజ్ విజెరిజ్ జాయ్ సీజనాన్. వాక్యం నె నిజమాతి జాయ్. 10 వాండ్రు లోకమ్ దు మహాన్. లోకమ్ దు మనికెజ్ విజు వన్నివెటనె దేవుణు తయార్ కితాన్. గాని లోకుర్ వన్నిజ్ పొలిస్తాజ్ అటేవితార్. 11 వాండ్రు వన్ని సొంత దేసమ్ దు సాహాన్. గాని వన్ని సొంత యూదురి లోకుర్ వన్నిజ్ డర్సు కివితార్. 12 వన్నిజ్ ఎసాండార్ డర్సు కితార్, వారి వన్నిముస్సు. నమకం ఇట్టికార్. నన్నివరిజ్ వన్నికొణెర్ ఆదెజ్ వాండ్రు అతికారం సిత్తాన్. 13 వారు అప్పొసి వెట పుట్టికార్ ఆవర్. ఒణెలె ఆసదాన్ పుట్టికార్ ఆవర్. వారు ఎత్తు కితివజ పుట్టికార్ ఆవర్. దేవుణునె వరిజ్ వన్ని కొణెర్ ఇజి ఇట్టాన్. 14 వాక్యం ఇనికాన్ లోకు ఆతాండ్రె మా నడిమి బత్తితాన్. వాండ్రు మా ముస్సు వన్నిదయాదర్థం పూర్తి తోరిస్తాన్. వాండ్రు దేవుణు వందిజ్ నిజమాతికెజ్ పూర్తి తోరిస్తాన్. వాండ్రు ఎసా గొప్పపెరికాన్ ఇజి మాపు సుండెతావ్. బుబ్బ బాణిజ్ వాతి ఒరెండ్రె మరిసి ఆతి గొప్ప పెరివన్నిజ్ సుండెతావ్. 15 యోహాను వన్నివందిజ్ సాక్సం వెహ్సినాన్. వాండ్రు లోకురిజ్, “నా వెన్యా వానికాన్ నజి మిస్తికాన్. ఎందానిజ్ ఇహిజు, వాండ్రు నాను పుట్ ఏండ ముజాలె మన్నికాన్ ఇజి నాను వెహ్సాకాన్ వీండ్రె”, ఇజి డటం డేల్లి వెహ్సాన్. 16 వన్ని పూర్తి దయాదర్థం ఎందాన్ వాండ్రు మజి విజెరిజ్ దీవిస్తాన్. కాలమ్ కు గడఱి మహిజ్ బా వాండ్రు మజి దీవినె మంజినాన్. 17 యూదురిజ్, రూలుజ్ మోనెవెట దేవుణు సితాన్. వన్ని దయా దర్థం ని వన్ని వందిజ్ నిజమాతి సజతిజ్ యేసు క్రీస్తు వెట వాతె. 18 ఎయెన్ బా ఎనెజ్ బా దేవుణుదిజ్ తోవెన్. గాని అప్పొసి పడకాద్ మన్ని, దేవుణు వెట సమానం ఆతి, ఒరెండ్రె మరిసినె దేవుణు ఎయెన్ ఇజి మజి తెలివి కిబిస్తాన్.

యోహాను యేసు వందిజ్ వెహ్సినాని సాస్యం

19-20 యెరూసలెమ్ దాన్ యూదురి పెద్దలిజు, యోహాను డర్సు పుజెరిబు ని లేవి జాతిదు మన్ని వరిజ్ పొక్తార్. “నీను ఎయెన్ ఇజి వెహ్ ఆజిని?”, ఇజి వెన్ బాదెజ్ వరిజ్ పొక్తార్. నస్తివలె యోహాను ఈహు వరిజ్ సాక్సి వెహ్సాన్. “నాను క్రీస్తు ఆవి”, ఇజి నెగ్గెండ వెహ్సాన్. 21 అయావలె వారు, మరి

నీను ఎయి? నీను ఏలియ ప్రవక్తనా? ఇజి వెన్బాతార్. “ఆఏ”, ఇహాన్. “నీను మాపు ఎర్దు సూణి ప్రవక్తనా?”, ఇజి వెన్బాతిజ్, “ఆఏ”, ఇహాన్. ²² అందెజి వారు, “నీను ఎయెన్? మజి పోక్తివరిజ్ మర్జి వెప్తాజ్ నీను ఉండ్రె జబాబు సిదా. నీ వందిజ్ నీను ఇన్నిక ఇజి వెమె ఆజిని?”, ఇజి వెన్బాతార్. ²³ దన్నిజ్ యోహాను యెసయ ప్రవక్త వెప్తావజి వెప్తాన్. “ప్రబు వందిజ్ సరితినాజ్ కిదు, ఇజి బిడిఃమ్ బూమిదు డేల్సినివన్ని లెకెండ్* మన్న నాను”. ²⁴⁻²⁵ వన్ని డగ్రు వాతికార్ పరిసయేరు పోక్తికార్. అయావలె, అయా పరిసయురుజి లోఇ సెగొండార్ వన్నిజ్, “నీను క్రిస్తు ఆఇజి, ఏలియ ప్రవక్త ఆఇజి, మాపు ఎర్దు సూణి ప్రవక్త ఆఇజి, మరి ఎందనిజ్ నీను బాప్తీసం సీజిని?”, ఇజి వెన్బాతార్.

²⁶ దన్నిజ్ వాండ్రు, “నాను ఏరుదాన్ బాప్తీసం సీజిన. గాని మరి ఒరెన్ మనాన్. వాండ్రు మీ నడిఃమి మనాన్. వన్నిజ్ మీరు పోలిన్ ఇదెర్. ²⁷ వాండ్రె నా వెన్యా వాజినికాన్. వన్ని జోడెకు బేల్లు కూతెజ్ బా నాను ఏవటితికాన్ ఆఏ”, ఇజి వెప్తాన్. ²⁸ యెర్దాను ఇన్ని గడ్డ అతాహా పడెకాద్ మన్ని బెతానియ ఇన్ని పట్టుమ్దు యాకెజ్ విజి జర్గితె. బానె యోహాను బాప్తీసం సీజి మహాన్.

²⁹ మర్సనాండిజ్, యేసు వన్నిడగ్రు వాజినిక యోహాను సుడెఃతాన్. సుడెఃతండ్రె వాండ్రు, “ఇదిలో లోకురి పాపమక వందిజ్ పూజి ఆదెజ్ దేవుణు పోక్తి వన్ని మెండ గొరె పిల్ల. వాండ్రు లోకురి పాపమక సొన్నిస్నాన్”, ఇజి వెప్తాన్. ³⁰ “నా వెన్యా ఒరెన్ వాజినాన్, వాండ్రు నజి ఇంక మిస్సికాన్. ఎందనిజ్ ఇహిజి, వాండ్రు నాను పుటేండ ముజాల మన్నికాన్ ఇజి నాను ఎయె వందిజ్ వెప్తానో వాండ్రె వీండ్రు! ³¹ వీండ్రు ఎయెన్ ఇజి నానె నెన్ ఎవత. గాని ఇస్రాయేలు లోకురిజ్ వీండ్రు ఎయెన్ ఇజి తెలివి కిని వందిజి నాను ఏరుదాన్ బాప్తీసం సీజి వాత”, ఇజి వెప్తాన్.

³² మరి వాండ్రు నెస్తిక ఈమా సాక్సి వెప్తాన్: “దేవుణు ఆత్మ ఉండ్రె పారపొటి లెకెండ్ ఆగాసమ్దాన్ డిఃగిజి వాజి వన్నిముస్సు. మంజినిక నాను సుడెఃత. ³³ నానుబా వన్నిజ్ నెన్ ఎండ మహా. గాని ఏరుదాన్ బాప్తీసం సిఅ ఇజి నజి వెప్తా పోక్తి దేవుణునె నజి వెప్తాన్, ‘దేవుణు ఆత్మ డిఃగిజి ఎయెర్ ముస్సు. మంజినిక నీను సూణిదో వాండ్రె దేవుణు ఆత్మదాన్ బాప్తీసం సీనాన్’, ఇజి. ³⁴ వెప్తా లెకెండ్ వినిజ్ జర్గితక నాను సుడెఃత. అందెజె నాను వెప్పిన, ‘వీండ్రె దేవుణు మరిసి ఇజి’.

యేసు మొదోహి సిసూర్

³⁵ మర్సనాండిజ్, మరి, యోహాను వన్ని రిఎర్ సిసూర్ వెట నిహా మహాన్. ³⁶ అయావలె యేసు అయా సరి సొన్ని మహిజ్, వన్నిజ్ డిటం సుడెఃజి, ‘ఇదిలో, పూజి ఆదెజ్ దేవుణు పోక్తి వన్ని మెండ గొరె పిల్ల’, ఇజి వెప్తాన్. ³⁷ అయా రిఎర్ సిసూర్ వాండ్రు వెప్తాక వెహారె, యేసు వెన్యా సాహారె. ³⁸ యేసు మహ్తండ్రె, వారు వెన్యా వాజినిక సుడెఃతాన్. సుడెఃతాండ్రె వరిజ్, “మీరు ఇనిక రెబాజినిదెర్?”, ఇజి వెన్బాతాన్. వారు వన్నిజ్, “రబ్బి, ఇహిజి బోదిస్సికాన్, నీను ఎంబె మంజిని?”, ఇజి వెన్బాతార్. ³⁹ వాండ్రు, “రదు, వాజి సుడెఃదు”, ఇహాన్. అందెజె వారు సాహారె, వాండ్రు మంజినిబాన్ సుడెఃతాన్. అయా రోజు వారు వన్నివెట మహారె. అయావలె రమారమి పొగల్ నాల్గొ గంటెజ్ ఆత మహాద్. ⁴⁰ సిమోన్ పేతురు తంబెర్ని ఆతి ఆంద్రెయ ఇన్నికానె యోహాను వెప్తాక వెంజి యేసువెట సొహి రిఏర్ లోఇ ఒరెన్. ⁴¹ వాండ్రు వెటనె, వన్ని అన్నసి సిమోనుజ్ రెబాతాండ్రె, “మాపు మెసయెజ్† సుడెఃతాప్”, ఇజి వెప్తాన్. ⁴² వెప్తాండ్రె వన్నిజ్ యేసు డగ్రు తతాన్. యేసు సిమోనుజ్ సుడెఃజి, “నీను యోహాను మరిసి ఆతి సిమెను. నీను కేప ఇజి కూకె ఆనిలె”, ఇజి వెప్తాన్. (గ్రీకు బాసదు అయా మాట పేతురు ఇజి రాస్త మనాద్. దని అర్ధం ఇన్నిక ఇహిజి నటు ఇజి).

యేసుపిలిపుజ్ నతనయేలుజ్ కూక్సి నాన్

⁴³ మహ్సా నాండిజ్, గలిలయ ముటదు సొండ్రెజ్ ఇజి యేసు ఒడెఃబితాన్. అయావలె, వాండ్రు పిలిపుజ్ దసూల్ ఆతాతాండ్రె వన్నిజ్, “నా వెట వాజి నా సిసూడుః ఆఅ”, ఇజి వెప్తాన్. ⁴⁴ పిలిపు బెత్సెయ్దు ఇని పట్టుమ్దికాన్. పిలిపు, ఆంద్రెయ, పేతురు వీరు ఉండ్రె పట్టుమ్దికార్. ⁴⁵ పిలిపు నతనయేలు ఇని వన్నిజ్ రెబాతాండ్రె వన్నిజ్, “మోసె రాస్తి సీతి రూలుదు వాండ్రు రాస్తి మన్ని వన్నిజ్, ప్రవక్తరు బా రాస్తి మన్ని వన్నిజ్ మాపు దసూల్ ఆతాప్. వాండ్రు నజిరతుదికాన్ ఆతి యేసు.

* 1:23 1:23 యెసయ 40:3. † 1:41 1:41 మోసయ ఇహిజి దేవుణు వన్ని లోకురిజ్ రక్సిస్టెజ్ ఏర్పాటు కిత్తి పోక్తికాన్. ఇది ఏల్లి బాస

యోసేపు మరిసి”, ఇజి వెహ్లాన్. 46 అందెజె నతనియేలు వన్నిజ్, “నెగ్గికెజ్ ఇనికబా నజరేతుదాన్ వానాదా?”, ఇజి వెన్బాతాన్. వన్నిజ్ పిలిపు, “వాజి సుడఃఅ”, ఇహాన్. 47 యేసు నతనియేలు వన్ని డగ్రు వాజినిక సుడఃతండ్రె, “ఇవిలోన్ నిజమాతి ఇస్రాయేలుదికాన్ వాజినాన్. విని లోఇ ఇన్ని సెఇకెజ్బా సిల్లు”, ఇజి వన్ని వందిజ్ వెహ్లాన్. 48 అయావలె నతనియేలు వన్నిజ్, “నీను ఎలాగ నజి నెస్సి?”, ఇజి వెన్బాతిజ్ యేసు, “పిలిపు నిజి కూక్ ఏండ ముజాలె, నీను బొడెమరాన్ అడిఃగి మనిక నాను సుడఃత”, ఇహాన్. 49 నతనియేలు, “బోదిస్సికి, నీను దేవుణు మరిసి. నీను ఇస్రాయేలు లోకురి రాజు”, ఇహాన్. 50 అందెజె యేసు వన్నిజ్, “నీను బొడెమరాన్ అడిఃగి మంజినిక నాను సుడఃత ఇజి నాను వెహ్లాజ్ నె నీను నమిజిని. దినిజ్ ఇంక మిస్తి నండె పెరి పణిజ్ నీను సూణిలె”, ఇజి వెహ్లాన్. 51 వాండ్రు వన్నిజ్, “నాను నిజం వెహ్లాన, ఆగానం రెయ్ ఆజి దేవుణు దూతెజ్ లోకుమరిసిఅతి నా డగ్రు ఎక్సి సానిక డిగ్జి వానిక నీను సూణిలె”, ఇజి వెహ్లాన్.

2

యేసు కితి మొదోహి బమ్మ అతి పణి

1 రుండి దినమ్కు సాహి వెన్నా, గలీలయ ముటది కానా ఇని పట్టుమ్దు ఉండ్రె పెండ్రె జర్జితాద్. 2 యేసు అయ్సిబాన్ మహాద్. యేసుజ్ని వన్ని సిసూర్జబా ఆ పెండ్రెదు కూక్తార్. 3 ద్రాక్కుకల్లు వీజితివెలె, యేసు అయ్సి వన్నిజ్, “ద్రాక్కుకల్లు వీజితాద్”, ఇజి వెహ్లాద్. 4 అయావలె యేసు, “ఓ యా, దిని వందిజ్ నీను నజి ఎందనిజ్ పణిసిని? నాను ఎయెన్ ఇజి తోరె అదెజ్ దేవుణు నా వందిజ్ ఏర్పాటు కితి వేలా ఇంక రవెదె”, ఇజి వెహ్లాన్. 5 యేసు అయ్సి పణికినివరిజ్, “వాండ్రు మిజి ఇన్నిక వెహ్లాజ్బా మీరు కిదు”, ఇజి వెహ్లాద్. 6 దేవుణుదిజ్ ఇస్టం ఆత్తివజ మండ్రెజ్ యూదురు సుబ్బురం ఆనార్. సుబ్బురం ఆనివందిజ్ వారు నోరబానార్. అయాక వరి ఉండ్రె ఆసారం. ఆహె నోరబాని దన్నివందిజ్ పణుకుదాన్ తయార్ కితి గోలమ్కు మహె. డగ్రు తొబయ్దాన్ నూటి ముపయ్ లీటర్ ఏరు అన్నె. నన్ని గోలమ్కు ఆరుబాన్ మహె. 7 యేసు, “అయా గోలెమ్కాజ్ ఏరు నిహోతు”, ఇజి పణికిని వరిజ్ వెహ్లాన్. వారు నిండ్రు నిహ్తార్. 8 అయావలె వాండ్రు వరిజ్, “ముడుక్సి నవ్దెరి బాన్ ఒతు”, ఇజి వెహ్లాన్. వారు అయా లెకెండె కితార్. 9 నవ్దెరి యెలు ద్రాక్కు కడమ అతి ఏరు రుసి సుడఃతాన్. అయా ద్రాక్కుకల్లు ఎమేణిజ్ వాతాదొ ఇజి ఆ ఏరు ముడుక్తి ఒతి పణికిని వరిజె తెలినా ద్గిని నవ్దెరిజ్ తెలివెద్. వాండ్రు పెండ్రె మరిసిజ్ కూక్తాన్. 10 కూక్తాండ్రె వన్నిజ్, “విజెరె కూలెజ నెగ్గి ద్రాక్కుకల్లు ముందాలె సీనార్. లావు ఉటి వెన్నా అడ్డెబెడ్డిదిక సీనార్. గాని నీను ఏలుదాక నెగ్గి ద్రాక్కుకల్లుని ఇడ్డి మన్ని”, ఇజి వెహ్లాన్. 11 యాకాదె యేసు కితి మొదోహి బమ్మ అతి పణి. యాక గలీలయ ముటది కానా ఇన్ని పట్టుమ్దు జర్జితాద్. అయా లెకెండె కిజి, యేసు వాండ్రు గొప్పపెరికాన్ ఇజి తోరిస్తాన్. వన్ని సిసూర్ వన్ని ముస్కు నమకం ఇట్టార్. 12 దిని వెన్నా వాండ్రు వన్ని అయిసి, తంబెరిసిరి, సిసూర్ వెట కపరనహోముదు సాహాన్. అబ్బె సెగం దినమ్కు మహార్.

యేసు దేవుణుగుడిదాన్ బేరం కినివరిజ్ వెల్లి పొక్సినాన్

13 యూదురి పన్ను వండెయి కిడెజ్ కాలం డగ్రు ఆతాద్. అందెజె యేసు యెరూసలెమ్దు సాహాన్. 14 బాన్ దేవుణుగుడిది అరుజుదు బేరం కిజిని వరిజ్ వాండ్రు సుడఃతాన్. కోడ్డిజ్, గొరెజ్, పూజ కిని వందిజ్ పారపొటిజ్ పొర్ని వరిజ్ సుడఃతాన్. పయు దేనిమ్ది డబ్బుజ్ మరిసి యూదురి కాసుజ్ సీజిని బేరం కిని వరిజ్బా సుడఃతాన్. 15 అయావలె వాండ్రు నానుదాన్ కొరడె కితాండ్రె, కొడ్డిజు, గొరెజు వెట వరిజ్ విజెరిజ్ అరుజుదాన్ పేర్తాన్. డబ్బుమరిసి బేరం కినివరి డబ్బు విజు సెద్రిస్తాండ్రె, వరిబల్లెజ్ మహ్లాన్. 16 పార పొటిజ్ పొర్ని వరివెట, “విన్నాజ్ ఇబ్బెణిజ్ ఒతు. నా బుబ్బు ఇల్లు సత్తలెకెండె కిమాట్”, ఇజి వెహ్లాన్. 17 నస్తివలె వన్నిసిసూర్, “ఓ దేవుణు, నీ ఇల్లువందిజ్ నజిమన్ని గొప్ప ఆస, ఉండ్రె సిసులెకెండె నా లోఇ కన్నాద్*”, ఇజి దేవుణు మాటదు రాస్తి మనిక వారు ఒడఃబితార్. 18 అయావలె యూదురు, యా పణిజ్ కిడెజ్ నిజి ఇని అతికారం మనాద్? ఉండ్రె బమ్మ ఆని పణికిజి మజి తోరిసి అయాక రుజుజ్ కిత, ఇజి వన్నిజ్ వెహ్లాన్. 19 “యా గుడిః డెయిజి అర్వు. మూండ్రె

* 2:17 2:17 కీర్తన 69:9.

రోస్కాజ్ నాను మరి తోహ్నా”, ఇజి యేసు వరిజ్ వెహ్నాన్. 20 దన్నిజ్ యూదురు, “యా గుడిః తోహ్నాజ్ నలవయ్ ఆరు పంటిజ్ ఆతాద్. నీను మూండ్రి రోస్కాజిజ్ తోహ్నిదా?”, ఇహార్. 21 గాని దేవుణుగుడిః వందిజ్ వెహ్నివలె వన్ని ఒడోఃల్ వందిజె వెహ్నాన్. 22 వాండ్రు సాతాండ్రె మరజి నిజితివెనుక, యా లెకెండ్ మాట వాండ్రు వెహ్నాన్ ఇజి సిసూరు ఒడిఃబితార్. అందెజె దేవుణు మాట వారు నమ్మితార్. యేసు వెహ్ని మాటబా నమ్మితార్. 23 యేసు పస్సుపండ్రియదిజ్ యెరూసలెమ్దు మహివలె, వాండ్రు కితి బమ్మ అతి పణిజ్ సుడోఃతార, సంఠోంఠార్ వన్నిజ్ నమ్మితార్. 24 గాని వాండ్రు వరిజ్ వన్నిజె ఒపజెవ్ఎతాన్. ఎందనిజ్ ఇహోజ, వాండ్రు విజెరిజ్ నెస్సాన్. 25 ఎయెర్బా వన్నిజ్ లోకుర్ వందిజ్ వెహ్నాజ్ అవ్సరం సిల్లెద్. ఎందానిజ్ ఇహోజ, వరి మన్సుదు మన్ని ఆలోసనమక వాండ్రు నెసినాన్.

3

యేసు నికొదిముజ్ నెన్పిస్సాన్

1 యెదురిజ్ అతికారి అతి నికొదిము ఇనికాన్ ఒరెన్ మహాన్. వాండ్రు పరిసయిరుజు లోఇ ఒరెన్. 2 వాండ్రు ఉండ్రి పొదోయ్, యేసుడగ్గు వాతాన్. వాతాండ్రె, “ఒ బోదకినికి, నీను దేవుణు పోక్తి ఒరెన్ నెన్పిస్సాన్ ఇజి మాపు నెసినావ్. దేవుణు ఒరెన్ వన్నివెటె సిల్లెండ్ మహిజ, నీను కిజిని బమ్మఅతి పణిజ్ కిదెజ్ ఎయెన్బా అట్ఎన్”, ఇజి వెహ్నాన్. 3 అందెజె యేసు వన్నివెటె ఈహు వెహ్నాన్: “నాను నిజమ్నె వెహ్నిన, ఒరెన్ మరి కొతాజ్ పుట్టిజనె, దేవుణు ఏలుబడిఃదు మంజినాన్”. 4 అయావలె నికొదిము, “పిరితిలోకు ఒరెన్ ఎలాగ మరి కొతాజ్ పుట్టాన్. వాండ్రు అయిసి పొటాద్ సొన్ని మరి ఉండ్రి సుట్టు పుట్టిజ్ అట్ఎన్”, ఇజి వెహ్నాన్. 5 యేసు వెహ్నాన్, “నాను నిజ్నె వెహ్నిన, ఒరెన్ బాప్తిసం లాగి ఆవండ మహిజ, దేవుణు ఆత్మ బాణిజ్ కొత్త బత్తు దోహ్కెవండ మహిజ, వాండ్రు దేవుణు ఏలుబడిఃదు మన్ఎన్. 6 యాయ బుబ్బర్వెటెనె కొడోఃర్ కాసినార్. గాని దేవుణు ఆత్మ వెటెనె దేవుణు కొడోఃర్ ఆనార్. 7 “నీను మరి కొతాజ్ పుట్టిజవెలె”, ఇజి నాను వెహ్ని మాటదిజ్ నీను బమ్మ ఆమా. 8 “గాలి దన్నిజ్ ఇస్టమాతి బాడిద్ డెయ్యాద్. నీను దన్నిజాటు వెని గాని అది ఎంబెణిజ్ వాజినాద్, ఎంబె సొన్నినాద్, ఇజి నిజి తెలిఎద్. అయలెకెండ్నె, దేవుణు ఆత్మ ఒరెన్ వన్నిజ్ కొత్త బత్తు సిదెజ్ వన్నిజ్ ఇస్టమాతివజ విజు కినాన్. వాండ్రు అయాక ఎలాగ కినాన్ ఇజి తెలిఎద్”. 9 “యాక ఎలాగ జగ్గినాద్?”, ఇజి నికొదిము యేసుజ్ వెన్బాతాన్.

10 దన్నిజ్ యేసు, “ఇస్రాయేలుదు మన్ని బోదిసిని వరిలోఇ తగమాతికి ఒరెన్నీను గదె? యాకెజ్ నీను నెన్ఇదా? 11 నాను నిజం వెహ్నిన, మాపు నెస్తికెజె వెహ్నినావ్, సుడోఃతికెజె వెహ్నినావ్. గాని మీరు అయాకెజ్ నమ్మిడెర్. 12 యా బామిదు జగ్గిని దన్నివందిజ్ నాను మిజి వెహ్ని మన్సు. గాని మీరు నమిఇ. అహిజ, నాను దేవుణు మంజిని బాడిఃదు మన్ని సజతిజ వందిజ్ వెహ్నిజ, మరి మీరు ఎలాగ నమ్మినిదెర్? 13 ఎయెన్బా ఎసెజ్బా దేవుణు మంజిని బాడిఃదు సాన్ఎతార్. దేవుణు మంజిని బాడిః దాన్ డిఃగితి వాతి లోకుమరిసి అతి నాను ఆవండ మరి ఎయెన్బా దేవుణు మంజిని బాడిఃదు సాన్ఎతాన్. 14-15 బీడిమ్బూమిదు మోసె కంసుదాన్ తయార్ కితి సరాన్దిజ్ పెహ్ని లెకెండ్, లోకు మరిసి అతి నాను వెరె ఆనాలె. నా మున్సు నమకం ఇడ్పి వరిజ్ విజెరిజ్ ఎలాకాలం బత్తుని బత్తు దోహ్కెవందిజె నాను వెరె ఆదెజ్వెలె.

16 దేవుణు లోకుర్ విజెరిజ్ ఎసానో ప్రేమిస్తాన్. అందెజె వాండ్రు వన్ని ఒరెండ్రి ఒరెన్ మరిసిజ్ సాదెజ్ సితాన్. వన్నిజ్ నమినికార్ ఎలాకాలం సిసుదు మన్ఎండ, ఎలాకాలం దేవుణు వెటె మంజిని వందిజ్ వాండ్రు మరిసిజ్ సితాన్. 17 దేవుణు లోకురిజ్ తీర్పు సీజి సిక్కు సీని వందిజ్ ఆవద్, వాండ్రు వన్ని మరిసిజ్ లోకమ్దు పోక్తిక. గాని వాండ్రు వరిజ్ ఎల్లకాలం మన్ని సిక్కుదాన్ గెల్పెస్సివందిజె పోక్తాన్. 18 మరిసిజ్ నమ్మిని ఎయెరిజ్బా తీర్పు సీజి సిక్కు సీనిక సిల్లెద్. గాని వన్నిజ్ నమిఇ వరిజ్ ఏలునె దేవుణు తీర్పు సీజి సిక్కు సిత మనాద్. ఎందనిజ్ ఇహోజ, దేవుణు ఒరెండ్రి మరిసిజ్ వారు నమ్మివితార్. 19 జాయ్ లోకమ్దు వాతమనాద్. గాని లోకుర్ జాయ్దిజ్ ప్రేమిన్ఎండ సికట్దిజ్ ప్రేమిస్సార్. ఎందనిజ్ ఇహోజ, వారు సెఇ పణిజ్ కిజినార్. యాక సుడోఃజనె, లోకురిజ్ దేవుణు తీర్పు సీజి సిక్కు సీనాన్. 20 సెఇ పణిజ్ కిజినికార్ విజెరె జాయ్దిజ్ ఇస్టం కిఎర్. వారు జాయ్దు

రెవర్. ఎందనిజ్ ఇహిజ, వరి సెజ వణిజ్ విజు జాయ్దు తోర్నె ఇజి తియెల్ అజినార్. 21 గాని నిజమాతి వణిజ్ కినికాన్ ఎయెన్బా జాయ్దు వాజినాన్. ఎందనిజ్ ఇహిజ, వారు కిజిని వణిజ్ విజు దేవుణుదిజ్ లోజిజి కిజినార్ ఇజి జాయ్వెల్లి తోర్నాద్”, ఇజి వెప్తాన్.

బాప్తిసం సీని యోహాను యేసువందిజ్ సాని వెప్పినాన్.

22 వెనుక, యేసుని, వన్నిసిసూర్ యూదయప్రాతమ్దు సాహార్. బాన్ వాండ్రు వరివెట సగం కాలం గడప్పి, లోకురిజ్ బాప్తిసం సీబిసి మహాన్. 23 సలిముడగ్రు అయినో ఇన్ని బాడిడు యోహాను బాప్తిసం సీజి మహాన్. ఎందనిజ్ ఇహిజ, బాన్ నండో ఏరు మహె. లోకుర్ వన్ని డగ్రు సాన్ని బాప్తిసం లాగెఅజి మహార్. 24 యాక యోహానుజ్ జెలిదు ఒజ ముజాల జగ్గితాద్. 25 యోహాను సిసూర్ని ఒరెన్ యూద వాండ్రు సుబ్రం అని యూదురు రూలు వందిజ్ వెప్పి గొడజె అతార్. 26 వారు యోహానుడగ్రు వాతార్, “బోదకినికి, యొర్దాను గడ్డ అతాల్ని వెట ఒరెన్ మహాన్ గదె. నీను వన్ని వందిజ్ వెప్తి మన్ని. ఇవిలోన్ వాండ్రు ఏలు బాప్తిసం సీజినాన్. లోకుర్ విజెరె వన్నిడగ్రు సాన్సిసూర్”, ఇజి వెప్తాన్. 27 అందెజి యోహాను వెప్తాన్, “దేవుణు ఇస్తం కితివజనె ఒరెన్ వన్నిబత్తుదు విజు జగ్గిజినాద్. 28 “నాను క్రీస్తు అవి. గాని వన్నిజ్ ఇంక ముజాల దేవుణు నజీ పోక్తాన్”, ఇజి నాను వెప్తిక మీరు వెహిదెర్. 29 పెండ్లి అని వన్నిదినె పెండ్లి బోదలి. పెండ్లి దజడజ్ కూలయెన్ వన్నిడగ్రు మంజి వాండ్రు వెప్తికెజ్ వెంజినాన్. వెప్పినికెజ్ వెంజినికాదె కూలయెన్ వన్ని సర్ద. పెండ్లి దజడజ్ కూలయెన్ పెండ్లి దజడజ్వెట సర్ద అని లెకెండ్ నా సర్ద క్రీస్తువెట పూర్తి అజినాద్. 30 వాండ్రు పెరికాన్ అదెజ్వలె. నాను ఇజ్జికాన్ అదెజ్. 31 పరలోకమ్దాన్ వాజినికాన్ విజెరి ముస్సు పెరికాన్. యా లోకమ్దాన్ వాజినికాన్ యా లోకమ్దికానె. వాండ్రు లోకమ్ది సజతిజ వందిజ్ వెప్పినాన్. పరలోకమ్దాన్ వాజినికాన్ విజెరి ముస్సు పెరికాన్. 32 వాండ్రు సుడజెతి వనకవందిజ్ వెహి వన్యా వందిజ్ వెప్పినాన్. గాని సెగెండారె వాండ్రు వెప్పినికెజ్ డగ్రు కినార్. 33 వన్నిమాట వెంజినికాన్ దేవుణు వెప్పినికెజ్ నిజం ఇజి ముద్ర పొకె అజినాన్. 34 దేవుణు పోక్తాన్ దేవుణు మాటనె వర్గిజినాన్. ఎందనిజ్ ఇహిజ, దేవుణు వన్ని అత్తు అంతు సిల్లెండ వన్నిజ్ సీజినాన్. 35 అప్పొని మరిసిజ్ ప్రేమిస్సాన్. అందెజి వాండ్రు వన్నిజ్ విజుదనిజ్ అతికారం సిత్త మనాన్. 36 మరిసి ముస్సు నమకం ఇడ్డి మన్నివన్నిజ్ ఎలాకాలం దేవుణువెట బత్తిని బత్తు మనాద్. గాని వన్నిజ్ లోజె ఇ వన్నిజ్ ఎలాకాలం బత్తిని బత్తు సిల్లెద్. గాని దేవుణు సిక్కు వన్ని ముస్సు ఎలాకాలం మనాద్.

4

యేసు సమరియ దేసెమ్ది బోదెలివెట వర్గిజినాన్

1-2 యోహాను ఇంక యేసు నండెండారిజ్ వన్ని వెట కుడుఃప్పినాన్, వరిజ్ బాప్తిసం సీజినాన్ ఇజి పరిసయరు వెహార్. (నిజం ఇన్నిక ఇహిజ, యేసు ఎయెరిజ్బా బాప్తిసం సివితాన్. వన్ని సిసూర్నె సితార్) 3 అహా పరిసయరు వర్గిజినార్ ఇజి యేసునెస్తాండ్రె, వాండ్రు యూదయ ప్రాంతం డిస్తాండ్రె గలీలయ ముటదు మరి మప్తా సాహాన్. 4 వాండ్రు సమరియ దేసెమ్దాజె సాండ్రెజ్ సరి మనాద్. 5 అందెజి వాండ్రు సమరియ దేసెమ్దు మన్ని సుకారు ఇన్ని పట్టుమ్దు వాతాన్. అయా పట్టుం, పూర్బమ్దు బత్తిజి మహి యాకోబు వన్ని మరిసి యొసెపుజ్ సిత్తి మన్ని బూమిడగ్రు మన్నికాద్. 6 యాకోబు కారిస్తి నూతి బాన్ మహాద్. యేసు పయిణం కిజి వందితాండ్రె అయా నూతి డగ్రు బస్తాన్. నస్తివలె, మదెనం.

7 అయావలె సమరియాతి బోదెలి ఉండ్రె ఏరు ఒతెజ్ బాన్ వాతాద్. యేసు దని వెట, “ఏహా కట్టినాద్. ఏరు బుకెండ్ సిదా”, ఇహాన్. 8 (వన్ని సిసూర్ టిండి కొండెజ్ పట్టుమ్దు సాహా మహార్) 9 అయా బోదెలి వన్నిజ్, “నీను యూద వాండ్రు. నాను సమరియ బోదెలి. అబాయా, నీను నజీ ఏరు లొస్సిదా”, ఇహాద్. (ఎందనిజ్ ఇహిజ, యూదురు సమరియతి వరి వెట కూడజి మన్ఏర్) 10 అందెజి యేసు, “నీను దేవుణు సీనికె నెప్పి మంజినిక ఇహిజ, నిజి ఏరు లొస్సికాన్ ఎయెన్ ఇజి నెప్పిమంజినికెహిజ, నీను వన్నిజ్ దేవుణు సీనికె వెన్బాతి మరి. వాండ్రు నిజి ఎలాకాలం బత్తినిపిస్సి ఏరు సితాన్ మరి”, ఇజి వెప్తాన్. 11 అయా బోదెలి వన్నిజ్, “బాబు నూతి నిరీక మనాద్. ఏరు లాగ్దెజ్ నిజి డొక్కు ఇన్నిక సిల్లెద్. మరి ఎలాగ నీను బత్తినిపిస్సి ఏరు లాగ్గి? 12 మా అనిగొగొ యాకోబు

యా నూతి మజి సితాన్. వాండ్రు, వన్ని మరిసిర్, వన్ని కోడ్డిజ్, గొర్రెజ్ విజు యా నూతిది ఏరు ఉణిజి మహార్. నీను వన్నిజ్ మిస్తికిదా?”, ఇజి వెహ్లాద్.

13-14 అందెజి యేసు, “యా ఏరు ఉణి విజెరిజ్బా మరి ఏహ్ని కట్టాద్. గాని నాను సీని ఏరు ఉణివరిజ్ఎసెజ్బా ఏహ్ కట్టెద్. నాను సీని ఏరు బూమిదాన్ సోసిని ఉటా ఏరు లెకెండ వన్ని లొఇ మంజినె. అయాక వన్నిజ్ ఎలాకాలం దేవుణు వెట బత్తిని బత్తు సీజినాద్”, ఇజి వెహ్లాన్. 15 నస్తివలె అది, “బాబు యా ఏరు నజి సిదా. అయావలె ఎసెజ్బా ఏహ్ కట్టెద్. ఇబ్బె వాజి ఏరు లాగ్గి ఒతెజ్ నజి అవ్సరం సిల్లెద్”, ఇజి వెహ్లాద్. 16 యేసు దనిజ్, “సాన్ని నీ మాసిజ్ ఇబ్బె కూక్కి తగ్గిత”, ఇజి వెహ్లాన్. 17 దన్నిజ్ అది, “నజి మాసి సెలెన్”, ఇహ్లాద్. అందెజి యేసు, “నజి మాసి సెలెన్ ఇజి నీను వెహ్లామాట నిజమనె. 18 నిజి అయదుగురు మాసిర్ మహార్. ఏలు నీ వెట మంజనికాన్ నీ మాసి అవ్న. నీను నిజమనె వెహ్లా”, ఇహ్లాన్. 19 అయావలె అది వెహ్లాద్, “బాబు నీను ఒరెన్ ప్రవక్త ఇజి నాను నెస్సా. 20 మా సమరియది అనిగొగార్ యా గొర్రెజ్ దేవుణుదిజ్ పొగిడిజి మాడిసెన్. గాని యూదురు ఆతి మీరు, దేవుణుదిజ్ పొగిడిజి మాడిసెజ్ మన్ని బాడ్డి యెరూసలెం ఇజి వెహ్లానిదెర్”.

21 అందెజి యేసు, “బీబి, యెరుసలెమ్దుబా, యా గొర్రెజ్ బుబ్బు ఆతి దేవుణుదిజ్ మీరు పొగిడిజి మాడిసెన్ ఇ ఉండ్రీ కాలం వాజినాద్. నీను నా మాట నమ్మి. 22 ఎలాగ మర్తి వన్నిజ్ పొగిడిజి మాడిసెనిదెర్ ఇజి మిజి తెలివెద్. గాని యూదురు ఆతి మజి తెలినాద్, ఎలాగ మర్తి వన్నిజ్ మాపు పొగిడిజి మాడిసెన్ ఇజి. ఎందానిజ్ ఇహ్లా, యూదురు బాణిజె, లోకురిజ్ రక్కిస్తికాన్ వాజినాన్. 23 దేవుణు ఆత్మసత్తుదాన్ లోకుర్ బుబ్బెజ్, వరి మన్ను పూర్తి నిజం పొగిడిజి మాడిసెని ఉండ్రీ కాలం వాజినాద్. అయాక ఏలునె మనాద్. ఆహె పొగిడిజి మాడిసెని వరిజె దేవుణుదిజ్ ఇస్టం. 24 దేవుణు, ఆత్మనె. అందెజి వన్నిజ్ పొగిడిజి మాడిసెన్ వన్ని ఆత్మ సత్తుదాన్, నిజం ఇక వన్నిజ్ పొగిడిజి మాడిసెన్ వెలె”, ఇజి వెహ్లాన్.

25 అయా బోదెల్ వన్నిజ్, “క్రీస్తు ఇజి కూకె ఆని మిసియ వానాన్ ఇజి నాను నెస్సు. వాండ్రు వానివలె మజి విజు వన్కా వందిజ్ టెటాజ్ వెహ్లాన్”, ఇజి వెహ్లాద్. 26 అయావలె యేసు, “నీవెట వర్గిజి నాను వాండ్రె”, ఇజి వెహ్లాన్.

27 అయావలెనె వన్ని సిసూర్ మర్జి వాతార్. వాండ్రు అయా బోదెల్ వెట వర్గిజినిక సుడెతారె నండో బమ్మ ఆతార్. గాని నిజి ఇన్నిక కావాలి ఇజి బా, నీను ఎందనిజ్ దన్నివెట వర్గిజిని ఇజిబా ఎయెర్బా వెన్బావితార్. 28-29 అయా బోదెల్ దని కుండ డిసెన్దా దెపట్టుం సాహ్లాద్. సాహ్లాద్, బాన్ మహి లోకురిజ్, “నాను కితి విజు వన్కా వందిజ్ నజి వెహ్లా ఒరెన్ వన్నిజ్ మీరు వాజి సుడెదు. వీండ్రు క్రీస్తు ఆవిండ్రా?”, ఇజి వెహ్లాద్. 30 వారు పట్టుమ్దాన్ సోతారె వన్నిడగ్గు వాజి మహార్. 31-32 అయావలె వన్ని సిసూరు, “మెస్టరు ఇనికబా ఉణామె”, ఇజి వన్నిజ్ బతిమాతార్. ‘మిజి తెలిఇ బోజనం నజి ఉండెజ్ మనాద్”, ఇజి వాండ్రు వరిజ్ వెహ్లాన్. 33 “వన్నిజ్ బోజనం ఎయెన్బా తతాండ్రా?”, ఇజి ఒరెన్దిజ్ ఒరెన్ సిసూర్ వర్గితార్.

34 యేసు వరిజ్, “నజి పొక్తాన్ నజి వెహ్లా పణి పూర్తి కినికాదె నా బోజనం లెకెండ మనాద్. 35 ‘నాల్లి నెల్లెజ్ మనాద్ పంట కొయ్యెని కాలం’, ఇజి మీరు వెహ్లానిదెర్గదె. నాను మిజి వెహ్లాన్, మీ కణుకు పెర్తి మడిజు సుడెదు. ఆకెజ్ సోపాతెనె పండితె మన్నె. 36 నా మాటెజ్ వెండ్రెజ్ తయార్ ఆతి మన్ని యా లోకురిజ్ సుడెఅ. కొయిదెజ్ సోపాతి మన్ని మడిజు లెకెండ మనార్. వరిజ్ ఎలాకాలం దేవుణు వెట బత్తిని బత్తు దోహ్కాన్ ఇజి నా డగ్గు తని వన్నిజ్ లాబం మనాద్. విత్తికాన్ని కొయినికాన్ రిఎర్ కూడిజి సర్ద ఆని లెకెండ వీండ్రు ని విని ముజాల లోకురిజ్ సువార్త వెహ్లాకార్ రిఎర్ కూడిజి సర్ద ఆనార్. 37 ‘విత్తికాన్ ఒరెన్. కొయినికాన్ మరి ఒరెన్’, ఇజి వెహ్లాన్ నిజమనె. 38 మహికార్ కన్బడిజి పణి కితార్. మీరు కిఇతిదెర్. వారు కన్బడిజి కితి పణిది లాబం లాగిదెజ్ నాను మిజి పొక్కిన్.

నండో సమరియదికార్ యేసుజ్ నమిజినార్.

39 “నాను కితి విజు వన్కా వందిజ్ వాండ్రు నజి వెహ్లాన్”, ఇజి అయా బోదెలి మాట వెహ్లా, అయా పట్టుమ్ది నండో సమరియదికార్ యేసుజ్ నమ్మితార్. 40 అందెజి సమరియదికార్ వన్ని డగ్గు వాతారె,

“మా డగ్గు మన్అ ఇజి వన్నిజ్ బతిమాలితార్. అందెజె వాండ్రు అబె రుండి రోస్సు మహాన్. 41 వన్ని మాట వెహారె, మరి నండొండార్ వన్నిజ్ నమ్మితార్.

42 వారు అయా బోదెల్దిజ్, “నీను వెహ్తా దనిదాన్ ఆవెద్ మాపు యేలు నమిజినిక. గాని విని మాటెజ్ మాపు వెహాప్. నిజమె, వీండ్రు లోకురిజ్ పాపమకాజ్ రక్కిస్సికాన్ ఇజి మాపు నెసినాప్. అందెజె మాపు వినిజ్ నమ్మిజినాప్”, ఇహార్.

యేసు అతికారి మరిసిజ్ నెగెణ్ కిజినాన్

43 రుండి రోస్సు బాన్ మహి వెన్యా, యేసు నమరియదాన్ గలీలయ ప్రాంతమదు సాహాన్.

44 (యేసునె వెహ్తా మహాన్, “ఒరెన్ ప్రవక్తెజ్ వన్నిసొంత ప్రాంతమదు ఎయెర్బా గవరం సిఎర్”, ఇజి)

45 వాండ్రు గలీలయదు వాతివలె, గలీలయదికార్ వన్నిజ్ డగ్గు కితార్. ఎందనిజ్ ఇహిజ, వారుబా వస్సు పండొయిదిజ్ యెరూసలెమదు సాహ మహారె, వాండ్రు అబ్బె కితి విజు పణిజ్ సుడొత మహార్.

46 వాండ్రు గలీలయది కానా ఇన్ని పట్టుమదు మరి వాతాన్. బానె వాండ్రు ఏరుదిజ్ ద్రాక్కు కడు కితాన్. అబ్బె ఒరెన్ గవరంమెంటు అతికారి మహాన్. వన్ని మరిసి కవరంనహొముదు కస్టం అర్త మహాన్.

47 యేసు యుదయదాన్ గలీలయదు వాతాన్ ఇజి వెహివెలె వాండ్రు యేసు డగ్గు వాతాన్.

వాతండ్రె, “నా మరిన్ సాదెజ్ డగ్గు ఆత మనాన్. అందెజె నీను వాజి వన్నిజ్ నెగెణ్ కిఅ”, ఇజి

వన్నిజ్ బతిమాలితాన్. 48 యేనువన్నిజ్, “నండొ బమ్మాని గుర్తుజ్ సుడొతిజన మీరు నమినిదెర్”,

ఇజి వెహ్తాన్. 49 అయా అతికారి, “బాబు, నా మరిన్ సాని ముజాల రఅ”, ఇజి వెహ్తాన్. 50 దన్నిజ్

యేసు వన్నిజ్, “సాన్అ. నీ మరిన్ బత్రినాన్”, ఇజి వెహ్తాన్. వాండ్రు యేసు వెహ్తామాట నమితాండ్రె

సాహాన్. 51 వాండ్రు సాన్ని మహివలె వన్ని ఇండ్రొణి పణి మణిసీర్ వన్ని ఎర్దు వాతారె, “నీ మరిన్

బత్రిత మనాన్”, ఇహార్. 52 ఎసాడు గంటెజ్ వన్నిమరిసి నెగెణ్ ఆతాన్ ఇజి వరిజ్ వెన్బాతిజ్ వారు,

“ఇవీన్ ఒంటి గంటదిజ్ నోబు డిస్తాద్”, ఇజి వెహ్తాన్. 53 నీ మరిన్ బత్రినాన్ ఇజి యేసు వెహ్తా ఆ

టయిమదునె, వన్నిమరిసి నెగెణ్ ఆతాన్ ఇజి బుబ్బె నెస్తాన్. అందెజె వాండ్రు వన్ని కుటుమదికార్

యేసుజ్ నమ్మితార్. 54 యాకదె యేసు యుదయదాన్ గలీలయదు వాతి వెనుక కిత్తి మరి ఉండ్రె

బమ్మాతి పణి.

5

1 వెన్యా యూదుర్జ పండొయ్ ఉండ్రె వాతాద్. అందెజె యేసు యెరూసలెమదు సాహాన్.

2 యెరూసలెం సుటులం తొహ్కొ క్కోటదు గొరెజ్ సాని గోర్జె ఉండ్రె మనాద్. దన్నిడగ్గు ఉండ్రె సెరు

మనాద్. దన్ని పేరు ఎల్లి బానదు బెద్దెస్ ఇజి. దన్నిజ్ అయదు అరుజుజ్ సురులం మన్న్య. 3-4 అయా

అరుజుజ ముందెజ్ ముందెజ్ కస్టమ్కాణికార్ గూర్త మహార్. గుడ్డిదికార్, సొటాదికార్, కిక్కుకాలు

అర్తికార్ బాన్ మహార్. ఎస్తివలెనె ఉండ్రె సుటు దేవుణు దూత ఒరెన్ అయా సెర్దుడు డిగ్గెజి ఏరుదిజ్

కర్ణిసినాన్. అయావలె ఎయెన్ ముజాల ఏరుదు డిగ్గెనాండ్రె, వాండ్రు ఎలాగ మర్తి జబ్బు ఆతికాన్

ఆతిజ్బా నెగెణ్ ఆనాన్. యా కస్టమ్కాణికార్ ఏరు కర్ణిని దన్నిజ్ ఎర్దుసుడొజి మహార్.

5 వరి లోఇ ఒరెన్ మహాన్. వాండ్రు ముప్పుయెనిమిది పంటెజాణిజ్ కస్టమ్దాన్ మహాన్. 6 యేసు

వన్నిజ్ సుడొతాన్. వాండ్రు నండొ పంటెజాణిజ్ కస్టమ్దాన్ మనాన్ ఇజి నెస్తాండ్రె, వన్నిజ్, “నీను

నెగెణ్ ఆదెజ్ క్కోరిజినిదా?”, ఇజి వెన్బాతాన్.

7 వెన్బాతిజ్ అయా కస్టమ్దికాన్, “బాబు, ఏరు కర్ణినివలె నజి సెరుదు డిప్పెజ్, ఎయెన్బా నజి

సిల్లెన్. నాను డిగ్గెన ఇనిజ్, నజి ఇంక ముజాలా మరి ఒరెన్ డిగ్గెజినాన్”, ఇజి వెహ్తాన్.

8 యేసు వన్నిజ్, “నీను నిజిజి నీ సాప అసి నడిఅ”, ఇజి వెహ్తాన్. 9 వెటనె వాండ్రు నెగెణ్ ఆతండ్రె

వన్ని సాప నికాండ్రె నడితాన్. యాక విస్తాంతి దినమదు జర్గితాద్. 10 అందెజె యూదురు నెగెణ్ఆతి

వన్నిజ్, “నెండ్రు విస్తాంతి దినం గదె. నీను సాపెజ్ నిక్కి ఒతెజ్ ఆవెద్. ఎందనిజ్ ఇహిజ, మోనె సెతి

రూలుజ్దు వెహ్తాన్, ఇన్ని పణిబా విస్తాంతి దినమదు కిదెజ్ ఆవెద్ ఇజి”, ఇజి వెహ్తాన్. 11 దన్నిజ్

వాండ్రు, “నజి నెగెణ్ కితికాన్, ‘నీ సాప నిక్కి నిడిఅ’, ఇజి నజి వెహ్తాన్”, ఇహాన్. 12 అందెజె వారు, “నీ

సాపెజ్ నిక్కి నడిఅ ఇజి నజి వెహ్తాన్ ఎయెన్?”, ఇజి వెన్బాతాన్. 13 నెగెణ్ కిత్తికాన్ ఎయెన్ ఇజి

వన్నిజ్ తెలివతాద్. ఎందనిజ్ ఇహిజ, అబ్బె మందలోకుర్ కూడిత మహార్. యేసు పరి లోఇహాన్

తప్పై ఆతండ్రి సాహాన్. 14 వెనుక యేసు వన్నిజ్ దేవుణు గుడిఁదు నుడఁతాన్. నుడఁతండ్రి వన్నిజ్, “నుడఁత, నీను ఏలు నెగెణ్ ఆతి. ఏలుదాన్ పాపముకు కిము. నీలిజ నిజీ మరి బాదెజ్ లావు వాన్”, ఇహాన్. 15 వాండ్రు సాహాండ్రి వన్నిజ్ నెగెణ్ కితికాన్ యేసు ఇజి యూదురిజ్ వెహ్లాన్.

16 అందెజె యా పణిజ్ యేసు విస్త్రాంతిదినమ్దు కితిజ్ యూదురు వన్నిజ్ నండ్రి మాలెజ్ కిత్తార్. 17 గాని యేసు వరిజ్, “నా బుబ్బు ఎస్తివలెబా నెగ్గి పణిజ్ మహి వరి వందిజ్ కిజినె మంజినాన్. నానుబా కిజిన”, ఇజి వెహ్లాన్. 18 యా లెకెండ్ యేసు వెహ్లాజ్, యూదురు వన్నిజ్ సప్తజ్ మరి నండ్రి నుడఁతార్. ఎందానిజ్ ఇహిజ, వాండ్రు విస్త్రాంతిదినమ్ది రూలుజ్ తప్తికాదె ఆవండ్, దేవుణు వన్ని సొంత బుబ్బు ఇజిబా వెహ్లానాన్. అయాలెకెండ్, వాండ్రు దేవుణు వెట సమానం ఆతికాన్ ఇజి వెహ్లా ఆజినాన్. అందెజె యేసుజ్ సప్తజ్ మరి నండ్రి నుడఁతార్.

19 యేసు వరిజ్ ఈహు మరజి వెహ్లాన్. “నాను మిజి నిజం వెహ్లాన, మరిసి ఆతి నాను ఇనికబా నా సొంత సత్తుదాన్ కిదెజ్ అటవన్. నా బుబ్బు ఇన్ని ఇనికెజ్ కిజినె నుడఁజినానో, అయాలెకె నాను బా కిజిన. బుబ్బు కిజినెకెజ్ మరిసి బా కిజినాన్. 20 ఎందానిజ్ ఇహిజ, అహిసి మరిసిజ్ ప్రేమిస్తాన్. వాండ్రు కిజినెకెజ్ విజు మరిసిజ్ తోరిస్తాన్. వాండ్రు వన్నిజ్ దినిజ్ మిస్తి మరి నండ్రి పెరి పణిజ్ తోరిస్తాన్. అయాలెకె నుడఁజి మీరు విజెరె నండ్రి బమ్మ ఆనిదెరె. 21 అహ్లాసి ఎలాగా సాతివరిజ్ నిక్కి, వరిజ్ బత్కిసినాండ్రి అయ లెకెండ్, మరిసిబా బత్కిసినాన్. వన్నిజ్ ఇస్టం మన్ని వరిజ్ బత్కిస్తాన్. 22-23 అహ్లాసి ఎయెరిజ్బా, వారు తీర్పు కిఎన్. గాని విజెరిజ్ తీర్పు కిదెజ్ మరిసిజ్ అతికారం విజు ఒవజెప్త మనాన్. అహిసిజ్ గవరం సీనిలెకెండ్ విజెరె మరిసిజ్ గవరం సీదెజ్ నె యా అతికారం ఒవజెప్త మనాన్. మరిసిజ్ గవరం సిఇకాన్ ఎయెన్బా, వన్నిజ్ పోక్తి అహిసిజ్ గవరం సిఎన్.

24 నాను మిజి నిజం వెహ్లాన, నా మాట వెంజి, నజీ పోక్తి వన్నిజ్ నమ్మిజినెవన్నిజ్ ఎలాకాలం దేవుణు వెట బత్కిని బత్కు మనాద్. వన్నిజ్ నాను తీర్పుసివి. వన్నిజ్ ఎలాకాలం మన్ని నిక్కు సిల్లెద్. గాని వాండ్రు ఎలాకాలం దేవుణు వెట బత్కినాన్. 25 సాతి లెకెండ్ మనికార్ దేవుణు మరిసి ఆతి నాను వెహ్లా మాటెజ్ వెని కాలం వాజినాద్. అయాలెకె ఏలునె వాత మనాద్. నా మాటెజ్ వెంజి, అయ లెకెండ్ కినికార్ బత్కినార్, ఇజి నాను మిజి నిజమ్నె వెహ్లాన. 26 ఎందానిజ్ ఇహిజ, నా బుబ్బు బాణిజ్ బత్కు వానాద్. వాండ్రు విజెరె బత్కిసిని లెకెండ్, నాను లోకురిజ్ బత్కిస్తెజ్ నజీ అతికారం సిత మనాన్. 27 మరి లోకురిజ్ తీర్పు సీదెజ్ వాండ్రు నజీ అతికారం సిత మనాన్. ఎందనిజ్ ఇహిజ, నాను లోకు మరిసి.

28 దిన్నివందిజ్ బమ్మ ఆమాట్. ఎందానిజ్ ఇహిజ, దూకిదు మనికార్ విజెరె నా మాటెజ్ వెని కాలం ఉండ్రి వాజినాద్. 29 వారు దూకిదాన్ వెల్లి వానార్. నెగ్గి పణిజ్ కితికార్ నిజ్జి మరి ఎల్లకాలం దేవుణు వెట బత్కినార్. సెఇ పణిజ్ కితికార్ నిజ్జి సిక్కు పొందినార్. 30 నా సొంత సత్తుదాన్ ఇనికబా కిదెజ్ నాను అటవన్. దేవుణు వెహ్లా వజినె నాను తీర్పు సీజిన. అందెజె నాను తీర్పు సీజి సిక్కు సీనిక నాయం ఆత్తిక. ఎందానిజ్ ఇహిజ, నాను నజీ ఇస్టం ఆతి వజి కిఎ, నజీ పోక్తి వన్నిజ్ ఇస్టం ఆతివజినె కిజిన.

31 నా వందిజ్ నానె వెహ్లాజ, నాను వెహ్లాని వన్యాజ్ పేరు సిల్లెద్. 32 గాని నా వందిజ్ మరి ఒరెన్ సాక్కి వెహ్లానాన్. వాండ్రు నా బుబ్బు. వాండ్రు నా వందిజ్ వెహ్లాని సాక్కి నిజం ఇజి నాను నెసిన.

33 మీరు యోహాను డగ్రు సెగెండాండ్రి పోక్తిదెరె. వాండ్రు నా వందిజ్ నిజమాతి సాక్కి వెహ్లాన్ 34 లోకురె నా వందిజ్ వెహ్లాని సాక్కి నజీ అవునరం సిల్లెద్. గాని మీరు యోహాను వెహ్లా మాటెజ్ నమ్మిజి దేవుణు మిజి రక్తిస్తెజ్, నాను వాండ్రు వెహ్లా దని వందిజ్ వెహ్లాన. 35 ఉండ్రి దీవ కసి జాయ్ సీజినెలెకెండ్ యోహాను నిజమాతికెజ్ నెన్పిస్తాన్. సెగం కాలం వన్ని మాటెజ్ వెంజి మీరు సరెద ఆతిదెరె. 36 నాను కిజినె పణిజ్ యోహాను వెహ్లా సాక్కి ఇంక గొప్ప పెరి సాక్కినె. ఎందనిజ్ ఇహిజ, నాను పూర్తి కిదెజ్ బుబ్బు నజీ ఒవజెప్తికెజె నాను కిజినె పణిజ్. అయాలెకె బుబ్బు నజీ పోక్త మనాన్ ఇజి రుజువ్ కిజినె. 37-38 మరి, నజీ పోక్తి బుబ్బునె నా వందిజ్ నిజమాతికెజ్ వెహ్లానాన్. మీరు వన్నిజ్ ఎనెజ్బా వెన్ఇతిదెరె. వన్ని రూపు ఎనెజ్బా తోఇతిదెరె. వన్ని మాటెజ్ మీ మన్ముదు ఇడెఇతిదెరె. ఎందనిజ్ ఇహిజ, వాండ్రు పోక్తి నజీ మీరు నమ్మిఇదెరె. 39-40 మీరు దేవుణు మాట బాగ సదవిజినెదెరె. ఎందనిజ్ ఇహిజ, అయాలెకె మిజి ఎలాకాలం దేవుణు వెట బత్కిని బత్కు సీనాద్ ఇజి ఒడఁబిజినెదెరె. అయాలెకె నా వందిజె వెహ్లానె. గాని దేవుణు వెట ఎలాకాలం బత్కిని బత్కు వందిజ్ నా డగ్రు

రెజదెర్. 41 లోకుర్ పొగడిజనికెజ్ నాను కోరివి. 42 గాని మీరు ఎలాగ మర్రికిదెర్ ఇజ నాను నెన్ను మీరు దేవుణుడిజ్ నిజం ప్రేమిసెకెదెర్ ఇజ నాను నెన్ను. 43 నా బుబ్బు సీత్తి అతికారమ్దాన్ నాను వాత మన్ను. గాని మీరు నజీ డగ్గు కిజదెర్. మరి ఒరెన్, వన్ని సొంత అతికారమ్దాన్ వాతిజ, మీరు వన్నిజ్ డగ్గు కినిదెర్. 44 లోకుర్ పొగడిజెడెజ్ ఇజ మీరు కోరిజనిదెర్. ఒరెండ్రె దేవుణు అతికాన్ మిజీ పొగడిజెడెజ్ మీరు కోరిజదెర్. మరి మీరు ఎలాగ నజీ నమ్మినిదెర్? 45 నాను బుబ్బు డగ్గు నేరం మోప్పాన్ ఇజ మీరు ఒడెజిమాట్. మీరు ఆన దాన్ ఎద్రు సుడెతి మోసినె మీ మున్ను నేరం మోప్పాన్. 46 మీరు మోసెజ్ నమ్మినికిదెర్, నజీబా నమ్మితార్ మరి. ఎదానిజ్ ఇహిజ, మోసె నా వందిజ్ రాస్త మనాన్. 47 మీరు వాండ్రు రాస్త మనికెజ్ నమ్మిఇదెర్. మరి ఎలాగ నాను వెప్పినిక నమ్మినిదెర్?”.

6

యేసు అయ్దు వేయు మొగ్గకొడోరిజ్ బోజనం సీజినాన్

1 దన్నివెనుక యేసు గలీలయ సమదరం డాట్టి అతాహ ఒడ్డుద్ సొహాన్. తిబెరియ సమదరం ఇజబా ఇనార్. 2 కస్తమ్దాన్ మహి వరిజ్ వాండ్రు నెగెణ్ కితి బమ్మ అతి పణిజ లోకుర్ సుడెతార్. అందెజె మంద లోకుర్ వన్ని వెట వాతార్. 3 యేసు అబెణి గొరెణ్ సెల్కాదు ఎక్రాండ్రె వన్ని సిసూర్ వెట బస్త మహాన్. 4 నస్తవలె యూదురు కిని పన్ను ఇని పండెయ్ డగ్గు అత మహాద్. 5 యేసు కణక పెహ్లా బేస్టిజ్, మంద లోకుర్ వన్ని డగ్గు వాజినిక సుడెతాన్. “వీరు ఉండెజ్ బోజనం ఎలాగ కొండెజ్ ఆనాప్?”, ఇజ పిలిపుజ్ వెనబాతాన్. 6 ఇనిక కిదెజ్ ఇజ యేసు నెస్సాన్ గాని పిలిపుజ్ వన్నిమున్ను నమకం మనాదా ఇజ సుడెదెజె వాండ్రు అయా లెకెండె వెనబాతాన్. 7 అందెజె పిలిపు, “వరి లొఇ ఒరెన్ ఒరెన్ కండెక్ కండెక్ ఉండెజ్బా రుండి వందెజ్ వెండి రుపాయుజాణి బోజనం కొటిజ్బా సాలెద్”, ఇజ వన్నిజ్ వెప్తాన్. 8 అయావలె వన్ని సిసూర్ లొఇ ఒరెన్ అతి అంద్రెయ ఇనికాన్ యేసుజ్ వెప్తాన్. వీండ్రు సిమోన్ పేతురుజ్ తంబెర్ని. 9 వాండ్రు ఇన్నిక వెప్తాన్ ఇహిజ, ‘ఇబ్బె ఒరెన్ ఇజ్జి కొడోజ్ మనాన్. వన్నిబాన్ అయ్దు యావల రొట్టెజ్, రుండి మొయెజ్ మనె. గాని నిసా మందదిజ్ యాకెజ్ సాలెఉ”, ఇజ వెప్తాన్. 10 అయావలె యేసు, “యా లోకాజ్ బనె కిదు”, ఇజ వెప్తాన్. అయా బాడిడు నండో గడ్డి మనాద్. అందెజె మొగ్గకొడోర్ బస్తార్. వారె డగ్గు అయ్దు వెయ్యుజ్ మహార్. 11 యేసు అయా రొట్టెజ్ అస్తాండ్రె, దేవుణుడిజ్ వందనమకు వెప్తాండ్రె, బస్తి వరిజ్ సీబాజి సితాన్. అయాలెకెండె మొయెజ్బా. వరిజ్ కావాలస్తి నసా సీబాత సిత్తాన్. 12 వారు పొటపంజా తిహి వెనుక, “ఇన్నిక పాడు ఆవిండ, మిగిలితికెజ్ కొటు కిదు”, ఇజ సిసూర్జ వెప్తాన్. 13 అందెజె మిగిలితికెజ్ సిసూర్ కెప్తార్. లోకుర్ తిహి వెన్కా. మన్ని అయ్దు యావల రొట్టెజాణి ముకెజ్ కొటు కితార్, వన్నెండు గప్పెజ్ నిస్తార్. 14 యేసు కిత్తి యా బమ్మాతి పణి సుడెతారె, “నిజమె, లోకమదు వాని ప్రవక్త వీండ్రె”, ఇజ వెప్తార్. 15 యా లోకుర్ వాజి, కెజ కెజ నజీ రాజు కినార్ ఇజ యేసు నెస్సాన్. అందెజె వాండ్రు బాణిజ్ డిస్తాండ్రె ఒరెండ్రె మరి గొరెణ్ సొహాన్.

యేసు సమదరం మున్ను నడిజినాన్

16-17 పొద్దు అతివెలె, వన్ని సిసూర్ డిగితారె, సమదరం ఒడ్డుదు వాతార్. అబ్బె వారు ఉండ్రె డోణిదు ఎక్కారె, సమదరం డాట్టి, కపర్నహొముదు సొండ్రెజ్ ఇజ సోతార్. అయావలె సీకాట్ అతాద్. యేసు వరి డగ్గు ఇంక రెండ మహాన్. 18 నస్తవలె పెరి గాలి ఉండ్రె వాతాద్. నందారమ్దు లాపు ఉల్కెజ్ నిజెతి. 19 వారు రమారమి మూండ్రె నాల్లి మయ్యలు నడిసెస్తార్. అయావలె యేసు నందారం ఏరు మున్ను నడిజి డోణి డగ్గు వాజినిక సుడెతారె. అయాక సుడెతారె, వారు నండో తియెల్ అతారె.

20 గాని వాండ్రు, “నానె, తియెల్ అమాట్”, ఇజ వరిజ్ వెప్తాన్. 21 అందెజె వారు వన్నిజ్ డోణిదు ఎక్కిస్తెజ్ ఇస్టం అతారె గాని వెటనె వారు సొండ్రెజ్ సరి సోతి మన్ని గటుదు అందితారె. 22 సిసూరు డోణి ఎక్కి సొని ముజాల నిహి మహి సమదరం ఒడ్డుదు మంద లోకుర్ మహార్. మహ్నా నాండిజ్ వారు నెస్తార్, అబ్బె ఉండ్రె డోణిని మహాద్. యేసు వన్ని సిసూర్ వెట అయా డోణి ఎక్కి సొన్ అతాన్. సిసూర్ నె ఎక్కి సొహార్ ఇజ. 23 నస్తవలె, తిబెరియదాన్ మరి డోణిజ్ వాతె. యేసు రొట్టెజ్ వందిజ్ దేవుణుడిజ్ వందనమకు వెప్తాన్. వెహ్లా వెన్కా లోకుర్ అయాక తిహార్. వారు రొట్టెజ్ తిహి బాడ్డి:

డగ్రు అయా డోణిక్ వాతె. ²⁴ యేసుని వన్ని సీసూర్ బాన్ సిల్లెర్ ఇజి మంద నెస్తార్. ఆమె నెస్తివెలె, వారు డోణిక్ ఎక్టారె, వన్నిజ్ రెబాజి కపర్ నహాముదు సాహార్. ²⁵ వారు యేసుజ్ అతాహా ఒడ్డుదు సుడెతారె, “బోదకినికిదా, నీను ఎన్కాండె ఇబ్బె వాతి?”, ఇజి వన్నిజ్ వెన్బాతార్. ²⁶ దన్నిజ్ యేసు వెప్టాన్, “నాను మీ వెట నిజం వెప్పొన, మీరు పొట వంజు రొటెజ్ తిహిదెర్. అందెజె మీరు నజి రెబానిదెర్. గాని నాను కితి బమ్మ ఆతి పణి అర్థం నెస్తి వందిజ్ ఆఎద్ రెబాజినిక. ²⁷ పాడాజి సాని టిండి వందిజ్ కన్బడెమాట్. గాని ఎలాకాలం దేవుణు వెట బత్కిని బత్కు సీని నిజమాతి టిండి వందిజ్ కన్బడెమాట్. లోకు మరిసి అయా టిండి మిజి సీనాన్. ఎందనిజ్ ఇహిజ అయా టిండి సీదెజ్ వన్నిజ్ బుబ్బు ఆతి దేవుణు అతికారం సిత మనాన్. ²⁸ వారు వన్నిజ్, “మాపు దేవుణు పణికిదెజ్ ఇహిజ, ఇన్నిక కిదెజ్వెలె?”, ఇజి వెన్బాతార్. ²⁹ యేసు వరిజ్, “దేవుణు పొక్తి వన్నిమున్కు నమకం ఇడాజి మంజినికాదె దేవుణు సేవ పణి”, ఇజి వెప్టాన్. ³⁰ అందెజె వారు, “అహిజ, నీను ఇని బమ్మాని పణికినిలె? అయాక సుడెజి నీ మున్కు నమకం ఇదెదెజ్ నీను ఇనిక కినిలె? ³¹ మోసె వెట మహి మా అనిగోగోర్ బీడిమ్బూమిద్ మన్పు ఇని బోజనం ఉటార్. దేవుణు మాటదు రాస్త మనాద్, ‘వారు ఉండెజ్ దేవుణు మంజిని బాడ్డిదాన్ వాండ్రు బోజనం సితాన్ ఇజి’, ఇజి వెప్టాన్. ³² అందెజె యేసు వరిజ్ వెప్టాన్, “నాను మిజి నిజం వెప్పొన, దేవుణు మంజిని బాడ్డిదాన్ బోజనం మిజి సితాన్ మోసె ఆఎన్, గాని నా బుబ్బునె సితాన్. వాండ్రె మిజి దేవుణు మంజిని బాడ్డిదాన్ నిజమాతి బోజనం సీజినికాన్. ³³ దేవుణు సీజిని బోజనం ఇన్నిక ఇహిజ, వాండ్రు మంజిని బాడిదాన్ డిగితి వాతి, యా లోకమది లోకురిక్ ఎలాకాలం దేవుణు వెట బత్కిజిని బత్కు సీజినికాన్”. ³⁴ అహిజ, ప్రబువా, యా బోజనం ఎలాకాలం మిజి సీజి మన్అ”, ఇజి వారు వన్నిజ్ వెప్టార్.

³⁵ అందెజె యేసు వరిజ్ ఈహు వెప్టాన్, “ఎలాకాలం దేవుణు వెట బత్కిదెజ్ లోకురిక్ బత్కిన్పిస్సి టిండి నానె. నా డగ్రు వాజినికాన్ ఎనెజ్బా బజ సాఎన్, నజి నమ్మినికాన్ ఎనెజ్బా ఏహ్కా సాఎన్. ³⁶ నాను మిజి వెప్టా లెకెండ, మీరు నజి సుడెతి మనిదెర్, గాని నజి నమిఇదెర్. ³⁷ బుబ్బు నజి ఒపజెప్టి లోకుర్ విజెరె నా డగ్రు వానార్. నా డగ్రు వాని ఎయెరిజ్బా నాను వెల్లి నెక్కి పొక్వె. ³⁸ ఎందనిజ్ ఇహిజ, నాను నజి ఇన్టం వాతి లెకెండ కిదెజ్ ఆఎద్, దేవుణు మంజిని బాడ్డిదాన్ డిగితి వాతిక. గాని నజి పొక్తి వన్నిజ్ ఇన్టం వాతి లెకెండ కిదెజె డిగిత వాత. ³⁹ నజి పొక్తి దేవుణు, నా బాణిజ్ ఇన్నిక కోరిజినాన్ ఇహిజ, వాండ్రు నజి ఒపజెప్టి వరి లోక ఎయెరిజ్బా నాను డిస్టెజ్ ఆఎద్. గాని వరిజ్ నాను మరి వాని కడెవెరి దినమ్దు ఎలాకాలం బత్కినైజె. యాకదె వాండ్రు నా బాణిజ్ కోరిజినాన్. ⁴⁰ నా బుబ్బు కోరిజినిక ఇన్నిక ఇహిజ, నాను దేవుణు మరిసి ఇజి నెసి నజి నమ్మిని ఎయెరిజ్బా ఎలాకాలం దేవుణు వెట బత్కిని బత్కు మండ్రెజ్ ఇజి. మరి నాను మర్జి వానివలె నాను వరిజ్ సాపుదాన్ బత్కినైజె ఇజి. యాకదె నా బుబ్బు నా బాణిజ్ కోరిజినాన్. ⁴¹ యూదురు యేసువందిజ్ మొరొ ఆతార్. దేవుణు మంజిని బాడ్డిదాన్ డిగితి వాతి టిండి నానె, ఇజి వాండ్రు వెప్టాన్. దిని వందిజ్ వారు మొరొ ఆతార్. ⁴² వారు, “వీండ్రు యోసేపు మరిన్ ఆతి యేసు గదె? విని అయిసి అప్పొసిరిక్ మాటు నెస్సాట్గదె? మరి ‘నాను దేవుణు మంజిని బాడ్డిదాన్ డిగిత వాత’, ఇజి వీండ్రు ఎలాగ వెప్పొనాన్”, ఇజి వర్గిజినార్.

⁴³ అందెజె యేసు, “మీ లోక మీరు మొరొ ఆమాట్. ⁴⁴ నజి పొక్తి బుబ్బు ఎయెరిజ్బా నా డగ్రు నడిపిన్ఎండ మహిజ, వారు నా డగ్రు వాదెజ్ అట్ఎర్. నాను వన్నిజ్ కడెవెరి దినమ్దు నాను వానివలె సాపుదాన్ బత్కిస్సాలె. ⁴⁵ ప్రవక్తరు దేవుణు మాటదు ముజాలె రాస్త మనాద్, ‘దేవుణునె లోకురిక్ విజెరిక్ నెన్పిస్సాన్’, ఇజి. బుబ్బు వెప్టా మాట వెంజె, అయాకెజ్ వన్ని బాణిజ్ నెస్తికార్ నాడగ్రు వానార్. ⁴⁶ దేవుణు బాణిజ్ వాతికానె ఆఎండ మరి ఎయెన్బా బుబ్బుజ్ తోపిన్. వాండ్రు ఒరెండ్రె బుబ్బుజ్ సుడెత మనాన్. ⁴⁷ నాను మీ వెట నిజమనె వెప్పొన, నా మున్కు నమకం ఇడ్డివన్నిజ్ ఎలాకాలం దేవుణు వెట బత్కిని బత్కు మనాద్. ⁴⁸ ఎలాకాలం దేవుణు వెట బత్కిదెజ్ లోకురిక్ బత్కిన్పిస్సి టిండి నానె. ⁴⁹ మీ అనిరు బీడిమ్బూమిదు మన్పు ఇన్ని బోజనం ఉటార్. గాని వారు సాతార్. ⁵⁰ గాని యా టిండి ఎయెర్ ఉటిజ్బా వారు సాఎర్. సాక నసి టిండినె దేవుణు మంజిని బాడ్డిదాన్ డిగితి వాతిక. ⁵¹ నానె దేవుణు మంజిని బాడ్డిదాన్ డిగితి వాతి ఎలాకాలం దేవుణు వెట బత్కిని బత్కు సీని టిండి. ఎయెన్బా యా టిండి తిహిజ, వాండ్రు ఎలాకాలం బత్కినాన్. నా సొంత

ఒడోల్నె నాను సీని టిండి. యా లోకమ్దికార్ ఎలాకాలం బత్తిదెజె నాను అయక సీజన". 52 యేసు వెప్తిక వెహారె, అయావలె యూదురు వారె వరి లొఇ ఉండ్రీ గొడెబ రేజీతాద్. "ఏని ఒడోల్ ఎలాగ మాటు తిండ్రెజ్ మజి సీనాన్", ఇజి వర్గితార్. 53 అందెజె యేసు వరిజ్ వెప్తాన్, "నిజమె నాను మీ వెట వెహిస్సాన, లోకుమరిసి ఆతి నా ఒడోల్ మీరు తిన్ఎండ మహిజ, నా నల మీరు ఉణెఎండ మహిజ, మీరు ఎలాకాలం బత్తిఇదెర్. 54 నా ఒడోల్ తిని ఎయెరిజ్బా, నా నల ఉణి ఎయెరిజ్బా ఎలాకాలం దేవుణు వెట బత్తిని బత్తు మనాద్. నాను వన్నిజ్ కడెవెరి దినమ్దు నాను వానివలె సాపుదాన్ ఎలాకాలం బత్తిస్సాలె. 55 ఎందానిజ్ ఇహిజ, నా ఒడోల్, నా నల యాకెజె తిండ్రెజ్ ఉండ్రెజ్ మనికెజ్. యాకెజె నిజమాతి టిండి. 56 నా ఒడోల్ తినికాన్, నా నల ఉణికాన్, నా వెట కూడెజి మంజినాన్. నాను వన్ని వెట కూడెజి మంజిన. 57 లోకుర్ విజెరిజ్ బత్తిదెజె పాణం సీజని బుబ్బు నజి పోక్త మనాన్. వాండ్రు నజి బత్తు సీజినాన్. అయాలెకెండె ఎయెన్బా నా ఒడోల్ తిహిజ, నాను వన్నిజ్ ఎలాకాలం దేవుణు వెట బత్తిని బత్తు సీన. 58 నానె దేవుణు మంజని బాడ్డిదాన్ డిగితి వాతి టిండి. మీ అనిరిజ్ ఉటి మన్ను ఇన్ని బోజనంలెకెండె ఆవద్ యాక. వారు ఉటారె సాతార్. గాని యా టిండి తినికాన్ ఎయెన్బా ఎలాకాలం బత్తినాన్. 59 కపెర్నహుముదు మన్ని యూదురి మీటిజ్ ఇండ్రె నేర్పిసి మహివలె వాండ్రు యా మాటెజ్ వెప్తాన్.

60 వన్ని సినూర్ నండొండార్ యా మాటెజ్ వెహారె, "యా మాటెజ్ గొప్ప కర్ణం ఆతికెజ్. ఎయెన్దనిజ్ అర్థం కిసాన్?", ఇజి వర్గితార్. 61 వన్ని మాటెజ్ వందిజ్ వన్ని సినూర్ మొరొ ఆజినార్ ఇజి యేసు నెస్సాండ్రె వరిజ్, "యా మాటెజ్ మిజి బాద కిజినెనా?", ఇజి వెన్బాతాన్. 62 "అహిజ, లోకు మరిసి ఆతి నాను, ముజాల నాను మహి బాడిడు ఎక్కి సొనిక మీరు నూణివలె, మీరు ఇన్నిక ఒడెబినిదెరో? 63 దేవుణు ఆత్మనె, ఎలాకాలం దేవుణు వెట బత్తిని బత్తు సీజినాన్. లోకుర్ అయాక సీదెజ్ అట్వెర్. నాను మిజి వెహిస్సాని మాటెజ్వెట, దేవుణు ఆత్మ మీ ముస్సు వాజినాన్. దేవుణు ఆత్మ మిజి బత్తు సీజినాన్", ఇజి వెప్తాన్. 64 "గాని మీ లొఇ సెగొండార్ నాను వెప్తి మాటెజ్ నమ్మిఇకార్ మనార్". సినూర్ లొఇ ఎయెన్ వాండ్రు వెప్తి మాటెజ్ నమ్మివెర్, ఎయెన్ వన్నిజ్ ఒపజెప్సాన్ ఇజి యేసు మొదొహనె నెస్త మహాన్. అందెజె వాండ్రు అహె వెప్తాన్. 65 యేసు మరి వెహిస్సాన్, "మీ లొఇ సెగొండార్ నమ్మిఇదెర్. అందెజె నాను మీ వెట వెప్తా మన్ను, బుబ్బు సరి సిఎండ మహిజ, ఎయెన్బా నా డగ్రు వాదెజ్ అట్వెన్", ఇజి. 66 దిన్ని వెనుక, వన్ని సినూర్ లొఇ నండొండార్ వన్నిజ్ డిస్సారె వన్నివెట మరి సొన్వెతార్. 67 నస్తివలె యేసు వన్నెండ్రు మణిసి సినూరిజ్, "మీరు బా నజి డిసి సొండ్రెజ్ కోరిజనిదెరా?", ఇజి వెన్బాతాన్. 68 అందెజె సిమోన్ వేతురు, "ప్రబువా, ఎయెర్బాన్ మాపు సొండ్రెజ్? నీ మాటెజ్నె ఎలాకాలం దేవుణు వెట బత్తిని బత్తు వందిజ్ వెహిస్సానె. 69 మాపు ఏలు నమ్మిజినామ్, మాపు నెస్సాప్, నీనె దేవుణు బాణిజ్ వాతికాన్ ఇజి", ఇజి వెప్తాన్.

70 అందెజె యేసు, మిజి వన్నెండ్రు మణిసీర్ సినూరిజ్ ఏర్పాటు కితిక నానె గదె. గాని మీ లొఇ ఒరెన్, సయ్యూనుజ్ మన్ని బుద్ధి ననికాన్ మనాన్", ఇజి వెప్తాన్. 71 వాండ్రు ఇస్కరియెతు సిమోన్ మరిసి యూద వందిజ్ వెప్తాన్. యూద సినూర్ లొఇ ఒరెన్ ఆతిజ్బా వాండ్రు యేసుజ్ వెన్కా ఒపజెప్సాలె.

7

యేసు తంబెర్సీర్ వన్నిజ్ నమ్మివెర్

1 వెనుక, యేసు గలీలయ దేసమ్దునె మంజి నాహ్కాజ్ బూలాజి మహాన్. వాండ్రు యూదయ దేసమ్దు మండ్రెజ్ కెవెతాన్. ఎందానిజ్ ఇహిజ, యూదురు వన్నిజ్ సప్తెజ్ సుడెజి మహార్. 2 నస్తివలె, యూదురి ఉండ్రీ పండ్రెయ్ డగ్రు ఆతాద్. అయా పండ్రెయ్ పేరునె గుడుస పండ్రెయ్* ఇజి. 3 పండ్రెయ్ డగ్రు ఆతిజ్, యేసు తంబెర్సీర్ వన్నిజ్, "ఇబ్బెణిజ్ నీను యూదయ దేసమ్దు సొన్అ. ఎందానిజ్ ఇహిజ, నీ సినూర్ ఆతికార్ నీను కిజని బమ్మ ఆతి పణిజ్ సుడెడెజ్", ఇజి వెప్తాన్. 4 "పెరికాన్ అదెజ్

* 7:2 7:2 అయా పండ్రెయ్ కాలమ్దు రొడ్డెజాణిజ్ గుడిస తొహ్కారెనె మంజినార్. వరి అన్నిసీర్ ఇస్రయేలు లోకుర్ నలపయ్ పంటెజ్ పయనం కిజి మహివలె గుడుసాదు మహిదన్నువందిజ్ ఎత్తుకిజి యూదురు యా పండ్రెయ్ కిజినార్.

కోరిజినికాన్ ఎయెన్బా డాఫ్ఫి వన్ని పణి కిఎన్. విజెరె ఎద్రునె కినాన్. నీను యా బమ్మాని పణిక్ కిజిని ఇహిజ, నిజి నీనె లోకమ్ది లోకుర్ ఎద్రు తోరె ఆదెజ్ మరి. యా గలీలయదికార్ ఉండ్రె అవొండ్ర”, ఇజి వెహ్హార్. ⁵ వన్ని తంబెరసిర్బా వన్నిజ్ నమిఎతార్. ⁶ అందెజె యేసు పరిజ్, “నాను పండొయిదిజ్ సొండ్రెజ్ నమయం ఇంక రవది. గాని మిజి ఎస్తివలెబా సొండ్రెజ్ ఆనాద్. ⁷ యా లోకమ్దు మన్ని దేవుణుదిజ్ దూసిస్సికార్ మిజి దూసిస్ఎర్. ఎందానిజ్ ఇహిజ, మీరు బా పరి వెట మనిదెర్. గాని వారు నజి దూసిస్సార్. ఎందానిజ్ ఇహిజ, వారు సెఇకెజ్ కిజినార్ ఇజి నాను వెహ్హెన్. ⁸ మీరు పండొయిదిజ్ సొండ్రు. నాను ఏలు సొన్వి. ఎందానిజ్ ఇహిజ, నాను సొండ్రెజ్ నమయం పూర్తి రవిద్”, ఇజి వెహ్హెన్. ⁹ యాక వెహ్హండ్రె వాండ్రు గలీలయదు మహాన్.

యేసు గుడుజన పండొయిదిజ్ సొన్సినాన్

¹⁰ వన్ని తంబెరసిర్ పండొయిదిజ్ సొహి వెన్కా, వాండ్రు బా సొహాన్. లోకుర్ విజెరె వన్నిజ్ నెన్ఇ లెకెండ్రె వాండ్రు డాజ్జి సొహాన్. ¹¹ గాని పండొయిదు, యూదురు వన్నిజ్ రెబాజి, “అయా వాండ్రు ఒంబొవీన్”, ఇజి వెన్బాజి మహార్. ¹² లోకుర్ లొఇ వన్ని వందిజ్ నండొ మొరొ ఆతార్. నెగొండ్రార్ వాండ్రు నెగ్గికాన్ ఇజి, మరి నెగొండ్రార్, సిల్లె వాండ్రు లోకురిజ్ మోసెం కిజినికాన్ ఇజి మొరొ ఆతార్. ¹³ గాని యూదురిజ్ తియొలాజి, ఎయెర్బా వన్ని వందిజ్ డటం వెహొవితార్.

యేసు పండొయిదు నెన్పిస్సాన్

¹⁴ పండొయి దినమ్కు సెగం ఆతాద్. అయావలె వాండ్రు దేవుణు గుడిడి అరుజుదు సొహొండ్రె అబె మన్ని లోకురిజ్ నెర్పొసినాన్. ¹⁵ అందెజె యూదురు నండొ బమ్మ ఆతారె, “వీండ్రు బడిడు సొన్సి సద్విఇతికాన్ గదె? మరి ఎలాగ వీండ్రు నిసొ నెస్త మనాన్?”, ఇజి వర్గితార్.

¹⁶ నస్తివలె యేసు వెహ్హెన్, “నాను నేరీపిస్సి మాట నా సొంత మాట అఎద్. గాని అయాక నజి పొక్తి వన్ని బాణిజ్ వాజినాద్. ¹⁷ దేవుణు ఇస్టం కిదెజ్ కోరిజినికాన్ ఎయెన్బా, నాను నేరీపిస్సి మాట దేవుణు బాణిజ్ వాజినాద్, నా సొంత అతికారం దాన్ నాను నేరీపిస్సికాద్ ఇజి నెస్సాన్. ¹⁸ సొంత అతికారమ్దాన్ నెన్పిస్సికాన్ ఎయెన్బా వన్నిజ్ గవరం వాదెజె నెన్పిస్సాన్. గాని వన్నిజ్ పొక్తి వన్నిజ్ గవరం వాదెజ్ ఇజి కోరిజినికాన్ నిజామాతికాన్. వన్ని లొఇ ఇనితప్పూ సిల్లెద్. ¹⁹ దేవుణు మోసెజ్ సిత్తి రూలుజ్ వాండ్రు మిజి సితాన్ గదె? గాని మీ లొఇ ఒరెన్బా ఆ రూలుజ్ పజ నడఃఇదెర్. మీరు ఎందానిజ్ నజి సప్తెజ్ సుడఃజనిదెర్?”, ఇజి వెహ్హెన్. ²⁰ అయావలె మందలోకుర్, “నిజి దెయం అస్సాద్. ఎయెర్ నిజి సప్తెజ్ సుడఃజనార్?”, ఇజి మర్రిజి వెహ్హెన్. ²¹ యేసు పరిజ్ వెహ్హెన్, “నాను బమ్మాతి ఉండ్రె పణి కిత. మీరు విజిదెరె నండొ బమ్మ ఆతిదెర్. ²² మీరు సునతి కిదెజ్ ఇజి మోసె మిజి రూలు సిత మనాన్. అందెజె మీరు కొడొదిజ్ విస్త్రాంతి దినమ్దు సునతి కిజినిదెర్. సుడఃదు, మోసె అవీన్ సునతి మొదొల్స్సికాన్, మీ అనిరెనె అయాక మొదొల్స్సార్. ²³ విస్త్రాంతిదినమ్దు ఒరెన్ కొడొదిజ్ సునతి కిజినిదెర్. ఎందానిజ్ ఇహిజ, మోసెజ్ దేవుణు సిత్తి రూలుజ్ తప్పెజ్ అఎద్ఇజి. అహిజ, నాను ఒరెన్ లోకుదిజ్ విస్త్రాంతి దినమ్దు పూర్తి నెగెణ్ కితి వందిజ్ మీరు ఎందానిజ్నా మున్సు, కోపం ఆజినిదెర్? ²⁴ మీరు మున్సు తోరీజిని దన్నివందిజ్ సుడఃజి తీర్పు కిమాట్. గాని నిజమాతికెజ్ సుడఃజి తీర్పు కిదు.

యేసు నిజం క్రీస్తునా ఇజి వెన్బాజినార్

²⁵ నస్తివలె నెగొండ్రార్ యెరుసలెమ్దికార్, “వినిజె గదె అతికారిజు సప్తెజ్ సుడఃజినార్. ²⁶ ఇవిలోన్ వీండ్రు దయరమ్దాన్ విజెరె ఎద్రు వర్గిజనాన్. గాని వారు వన్నిజ్ ఇనికబా ఇన్ఎర్. వీండ్రు క్రీస్తు ఇజి అతికారిజు నిజమె ఒప్పకొటారా? ²⁷ క్రీస్తు వానివలె, వాండ్రు ఎమేణికాన్ ఇజి ఎయెర్బా నెన్ఎర్. గాని వీండ్రు ఎంబెణికాన్ ఇజి మాపు నెస్సాప్”, ఇజి వర్గితార్. ²⁸⁻²⁹ అందెజె యేసు గుడిడి అరుజుదు నేరీపిస్ మహివలె, ఈహు డటం వెహ్హెన్. “నాను ఎయెన్, ఎమేణికాన్ ఇజి మీరు నిజం నెస్సిదెరా? నాను నా సొంత ఇస్టందాన్ వాతికాన్ అఎ. గాని నజి పొక్తాన్ ఒరెన్ మనాన్. వాండ్రు నిజమాతి దేవుణు. మీరు వన్నిజ్ నెన్ఇదెర్. గాని నాను వన్నిజ్ నెస్సు. ఎందనిజ్ ఇహిజ, నాను వన్నిబాణిజ్ వాత మన్సు. వాండ్రె నజి పొక్తాన్”, ఇజి. ³⁰ యాకెజ్ వెహ్హెర్, వారు వన్నిజ్ అస్సెజ్ సుడఃతార్. గాని ఎయెన్బా వన్నిజ్ అన్ఎతార్. ఎందానిజ్ ఇహిజ, వాండ్రు అస్సె ఆదెజ్ దేవుణు ఏర్పాటు కితి నమయం రెవిద్.

31 అహీజ్ బా లోకుర్ లొఇ నంఠెండార్ వన్ని ముస్సు, నమకం ఇట్టార్. వారు, “వీండ్రు నంఠో బమ్మాని పణిజ్ కిత్తాన్. లోకురిజ్ రక్కిన్దెజ్ దేవుణు ఏర్పాటు కితి పోక్కి క్రిస్తు వానివలె, విని ముస్సు. మరి నంఠో బమ్మాని పణిజ్ వాండ్రు కినాండ్రా?”, ఇజి వెప్తార్. 32 లోకుర్ యేసు వందిజ్ అయాకెజ్ మొరొ ఆజినికెజ్ పరిసయిరు వెహర్. నస్తివలె పెరి పుజెరిజు ని పరిసయేరు వన్నిజ్ తోప్పి ఒతెజ్ దేవుణు గుడిడి జమాన్జ పోక్తార్. 33 అందెజె యేసు, “నాను మీ వెట సెగం కాలమ్నె మంజినె. వెన్కా, నాను నజీ పోక్కి వన్ని డగ్గు సాన్సిన. 34 మీరు నజీ రెబానిదెర్. గాని తొఇదెర్. నాను మన్ని బాన్ మీరు వాదెజ్ అల్లెదెర్”, ఇజి వెప్తార్.

35-36 నస్తివలె యూదురు అతికారుజు, ఒరెన్వెట ఒరెన్, “వీండ్రు మజీ తోర్ఎండ ఎంబె సాండ్రెజ్ సుడెజినాన్? వాండ్రు, సెగెండార్ యూదురు మా బాణిజ్ సెద్రిజి బత్తిజిని గ్రికు పట్టుమ్కాజ్ సానాండ్రా? వాండ్రు యూదురు ఆఇ వరిజ్ నేర్పిస్తాండ్రా? వాండ్రు వెప్పినాన్, “మీరు నజీ రెబానిదెర్. గాని తొఇదెర్. నాను మన్ని బాన్ మీరు వాదెజ్ అల్లెదెర్” ఇజి. ఎందానిజ్ వాండ్రు ఆహె వెప్పినాన్?”, ఇజి వర్గితార్.

37 పండ్రోయి కడెవెరి రోజు వాతాద్. కడెవెరి రోజునె ముకెలమాతి దినం. అయా నాండ్రిజ్ యేసు నిహండ్రె ఈహు డటం వెప్తాన్. “ఎప్పి కట్టికాన్ ఎయెన్బా నా డగ్గు రఅ. నాను వన్నిజ్ ఉండెజ్ సీన. 38 దేవుణు మాటదు వెప్తాపజ, “నా ముస్సు, నమకం ఇడ్డి ఎయెర్ గర్బం దాన్బా, నిజమాతి బత్తు, సీని ఏరు సోసి సానెలె. అయాక ఉండ్రె ఊట సోసి సాని లెకెండ సానెలె. 39 ఇబ్బె యేసు నిజమాతి బత్తు, సీని ఏరు ఇజి వెప్తాక దేవుణు ఆత్మ వందిజె. యా దేవుణు ఆత్మ, యేసు ముస్సు, నమకం ఇడ్డి వరిజ్, యేసుజ్ దేవుణు మంజిని బాడిడు ఒతి వెన్కా దోహ్కాన్లె. గాని యేసు యాక వెప్తావలె, దేవుణు వన్ని ఆత్మ వన్నిజ్ నమ్మితి వరిజ్ సివిండ్రె. ఎందానిజ్ ఇహిజ, దేవుణు యేసుజ్ వన్ని వెట వన్ని గొప్ప జాయ్దు మండ్రెజ్ దేవుణు మంజిని బాడిడు ఒవిండ్రె.

40 వన్ని మాటెజ్ వెహె, లోకుర్ లొఇ సెగెండార్, “నిజమె, వీండ్రె మాపు ఎద్రు సుడెజి మహి ప్రవక్త”, ఇజి వెప్తార్. 41 మరి సెగెండార్, “సిల్లె వీండ్రె క్రిస్తు”, ఇహార్. గాని సెగెండార్, “క్రిస్తు ఎలాగ గలీలయదాన్ వానాన్? 42 క్రిస్తు దావీదు రాజు కుటుమ్దాన్, దావీదు బత్తిజి మహి పట్టుమాతి బెత్తెహమ్దాన్ వానాన్, ఇజి దేవుణు మాటదు మనాద్ గదె”, ఇహార్. 43 ఆహె వన్ని వందిజ్ లోకుర్ ఎర్లితార్. 44 సెగెండార్ వన్నిజ్ అస్సెజ్ కోరితార్. గాని ఎయెర్బా వన్నిజ్ అన్వితార్.

45 అందెజె యేసుజ్ అస్సెజ్ వాతి దేవుణు గుడిడి జమానుజు మర్జి పెరి పుజెరిజు ని పరిసయిరుజ బాన్ సాహర్. వారు జమాన్జ, “మీరు ఎందానిజ్ వన్నిజ్ అసి తెఇదెర్?”, ఇజి వెన్బాతార్. 46 దన్నిజ్ వారు, “వీండ్రు వెప్తా మాటెజ్ లెకెండ ఎయెర్బా ఎసెజబా వెహ్విర్”, ఇహార్. 47 పరిసయిరుజు, “మీరు బా మొసం ఆత్తిదెరా? 48 అతికారిజి లొఇనొ పరిసయిరుజి లొఇనొ ఎయెన్బా వన్నిజ్ నమితాండ్రా? 49 గాని యా మంద లోకుర్ దేవుణు మోసెజ్ సిత్తి రూలుజ్ నెన్వెర్. అందెజె వరిజ్ దేవుణు సాయెప్ సీనాన్”, ఇజి వెప్తార్. 50 నికొదిమొన్ ఇనికాన్ ఒరెన్ ముజాలె యేసు డగ్గు సాహ మహాన్. వాండ్రు పరిసయిరుజి లొఇ మన్నికాన్. 51 నస్తివలె నికొదెము, “మా యూదురి రూలుజు వజ, ఒరెన్ వాండ్రు వెప్పినికెజ్ మాపు ముజాల వెంజి, వాండ్రు కితికెజ్ నెస్తి వెన్కనె వన్ని ముస్సు తిర్పు కిదెజ్ ఆనాద్”, ఇజి వెప్తాన్. 52 అందెజె వారు, “నీను బా గలీలయదాన్ వాతికాండ్రా? నీను దేవుణు మాట బాగ నద్విఅ. ఒరెన్ ప్రవక్తబా గలీలయదాన్ సోవిన్, ఇజి నీను నస్తివలె నెస్తిలె”, ఇజి వెప్తార్. 53 వెనుక వారు విజెరె వరివరి ఇల్కాజ్ సాహర్.

8

రంకు బూలాజి మహి బోదెల్దిజ్ యేసుడగ్గు తనినార్

1 గాని యేసు ఒలివ గొరొత్* సాహాన్. 2 జాయ్ ఆతివెలె మరి వాండ్రు దేవుణు గుడిడి అరుజుదు వాతాన్. లోకుర్ విజెరె వాజి వన్నిడగ్గు కూడితార్. వాండ్రు బస్తాండ్రె వరిజ్ నెన్పిసినాన్. 3-4 నస్తివలె పరిసయిరుని యూదురి రూలుజ్ నెస్తిన్సికార్ ఉండ్రె బోదెల్దిజ్ తతార్. అది, రంకు బూలాజి మహివలె వారు దన్నిజ్ అస్తార్. వారు దన్నిజ్ మంద ఎద్రు నిల్వెరె యేసుజ్, “బోదెకినికీదా,

* 8:1 8:1 అయా గొరొత్ ఒలివ మరెక్ నంఠో మన్నె అందెజె ఒలివ గొరొన్ ఇనార్

యా బోదెల్ రంకు బూలాజి మహివలె, మాపు అస్తావ్. ⁵ మోసె మజి రూలు సితెవెలె మజి ఆడ్ర వెహ్లాన్, “ఆహె బూలాని వన్యాజ్ పణకాణిజ్ డెయిజి సప్టజ్ ఇజి. గాని నీను ఇనిక వెహ్లాన్”, ఇజి వెన్బాతార్. ⁶ వన్ని మున్సు, నేరం మోహ్లాజ్ ఇజి వన్నిజ్ నీకుదు అర్పెజ్ అహు వెన్బాతార్. గాని యేసువజితాండ్రె బూమిదు వన్ని డెస్కూదాన్ రాసి మహాన్. ⁷ వారు మరిమరి వెన్బాజి మహిజ్, వాండ్రు బుర్రెపెహ్లాండ్రె వరిజ్, “మీ లోక పాపం కిఇకాన్ ముజాల దన్నిజ్ పణకుదాన్ డెయేదు”, ఇజి వెహ్లాన్. ⁸ వెహ్లాండ్రె వాండ్రు మరి వజ్జి, బూమిదు రాసి మహాన్. ⁹ గాని వారు యా మాటజ్ వెహ్లాం, ఒరెన్ వెన్యా ఒరెన్ డెస్కూ సాహార్. ముజాల పెరికార్ సాహార్. వెన్యా ఇజ్జికార్. ఆహె విజెరె సాహార్. యేసుని అయా బోదెల్ని బాన్ మహార్. అది నిహిమహిబానె మహాద్. ¹⁰ యేసు బుర్రెపెహ్లాండ్రె, దనిజ్, “వారు ఎంబె మనార్? ఎయెరబా, నిజి తీర్పు సీజి సిక్కు సిఎరా?”, ఇజి వెన్బాతాన్. ¹¹ “సిల్లె బాబు”, ఇహాద్ అది. అందెజె యేసు, “అహిజ, నానుబా, నిజి తీర్పు సీజి సిక్కు సివి. సాన్అ. ఎలుదాన్ మరి పాపం కిమా”, ఇహాన్.

యేసు లోకమేది లోకురిజ్ జాయ్

¹² మరి, యేసు లోకురిజ్ వెహ్లాన్, “నానె లోకమేది లోకురిజ్ జాయ్. నా సిసూ ఆనికాన్ ఎయెన్బా సీకటుదు మన్ఎన్. గాని వన్నిజ్ బత్తు, సిని జాయ్ మంజినాద్. ¹³ నన్వలె పరిసయేరు వన్నిజ్, “నీనె నీ వందిజ్ సాక్కి వెహ్లాని, మరి ఎయెరబా అయాక నిజం ఇజి వెహ్లాండ. అందెజె నీ సాక్కిమేదిజ్ నిజం సిల్లెద్”, ఇజి వెహ్లాన్. ¹⁴ అందెజె యేసు వెహ్లాన్, “నానె నా వందిజ్ సాక్కి వెహ్లాన్. అహిజబా నాను వెహ్లా సాక్కి నిజమనె. ఎందానిజ్ ఇహిజ, నాను ఎమెణాజ్ వాత, ఎంబె సాన్సిన ఇజి నాను నెన్ను. గాని మీరు నెన్ఇదెర్ నాను ఎమెణాజ్ వాత ఎంబె సాన్సిన ఇజి. ¹⁵ మీరు లోకుర్ సుడెజినికెజ్ సుడెజి తీర్పు సీజినిదెర్. గాని నాను అయాలెకెండె ఎయెరిజ్బా తీర్పు సివి. ¹⁶ నాను తీర్పు సీజిజ్బా నాను సీత్తి తీర్పు నిజమనె. ఎందానిజ్ ఇహిజ, నాను ఒరెన్ అవి తీర్పు సీజిన. నజి పోక్కి బుబ్బు నా వెట మనాన్. ¹⁷ దేవుణు మోసెజ్ సీత్తి మీ రూలుజ్దు రాస్త మనాద్, ‘రివెర్ వెహ్లాని సాసి ఉండ్రె లెకెండె మహిజ, అయాక నిజం ఇజి’. ¹⁸ నానె నా వందిజ్ సాక్కి వెహ్లాన్. మరి నజి పోక్కి నా బుబ్బు బా నా వందిజ్ సాసి వెహ్లానాన్”. ¹⁹ నన్వలె వారు వన్నిజ్, “ఎంబె నీ బుబ్బు మనాన్?”, ఇజి వెన్బాతార్. దన్నిజ్ యేసు”, మీరు నజి నెన్ఇదెర్. నా బుబ్బెజ్ నెన్ఇదెర్. మీరు నజి నెన్సికిహిజ, నా బుబ్బెజ్బా నెన్సిదెర్ మరి”, ఇజి వెహ్లాన్. ²⁰ వాండ్రు యా మాటజ్ దేవుణు గుడిడు సంత అర్పి పెటెజ్ ఇడ్డిబాన్ మంజి నెన్పిసి మహివలె వెహ్లాన్. గాని ఎయెన్బా వన్నిజ్ అన్ఏతార్. ఎందానిజ్ ఇహిజ, వన్నిజ్ అన్జె దేవుణు ఎత్తు కిత్తి సమయం రెవిదె. ²¹ మరి యేసు వరిజ్, “నాను సానాలె. మీరు నజి రెబానిదెర్. మీరు పాపమకు కిజి మంజినె సానిదెర్. నాను సాని బాడిడు మీరు వాదెజ్ అట్ఇదెర్”, ఇజి వెహ్లాన్. ²² అందెజె యూదురు ఒరెన్ వెట ఒరెన్, “వన్నిజ్ వాండ్రె సపె ఆనాండ్రా? వాండ్రు వెహ్లానాన్ గదె నాను సాని బాడిడు మీరు వాదెజ్ అట్ఇదెర్ ఇజి”, ఇజి వర్గిత్. ²³ యేసు వరిజ్ ఈహు వెహ్లాన్: “మీరు ఇబ్బె యా లోకమేదికిదెర్. గాని నాను మున్సు దేవుణు మంజిని బాడిదికాన్. మీరు యా లోకమేదికిదెర్. నాను ఇబ్బెణికాన్ ఆఎ. ²⁴ నాను మిజి వెహ్లా మన్ను మీరు పాపం కిజి మంజినె సానిదెర్ ఇజి. నాను ఎయెన్ ఇజి వెహ్లానానో, నానె వాండ్రు ఇజి మీరు నమ్మిండ మహిజ, మీరు నిజమనె పాపమేదు మంజినె సానిదెర్”. ²⁵ వారు వన్నిజ్, “నీను ఎయెన్?”, ఇజి వెన్బాతార్. ‘నాను ఎయెన్ ఇజి మొదోహనె వెహ్లా మనానో, నానె వాండ్రు’, ఇహాన్. ²⁶ యేసు మరి వెహ్లాన్ “మీ వందిజ్ నండ్రె వెహ్లాజ్ నజి మనాద్. మీ మున్సు, నండ్రె తీర్పుజ్బా మనాద్. గాని నజి పోక్కాన్ నిజామాతికాన్. వాండ్రు నజి వెహ్లా సజతిజ్నె నాను లోకమేది లోకురిజ్ వెహ్లాన్. ²⁷ వాండ్రు దేవుణు మంజిని బాడిడు మన్ని వన్ని బుబ్బు వందిజె వరిజ్ వెహ్లానాన్ ఇజి వారు అర్థం కివెత్. ²⁸ అందెజె యేసు వరిజ్, “మీరు లోకు మరిసి అతి నజి సిలువాదు సప్పివెలె, మీరు నన్సిదెర్, నాను ఎయెన్ ఇజి. మరి, నాను నా సాంత అతికారం దాన్ ఇనికబా కివి. గాని నా బుబ్బు నజి నెన్పిన్వపజినె నాను వెహ్లాన్, ఇజి మీరు నెన్సిదెర్. ²⁹ నజి పోక్కాన్ నజి తోడు; మంజినాన్. వాండ్రు నజి ఒరెన్ వన్నిజె డెస్కూనెత్. ఎందానిజ్ ఇహిజ వన్నిజె ఇన్వం వాతికెజె నాను ఎన్వెలెబా కిజిన”, ఇజి వెహ్లాన్. ³⁰ వాండ్రు యా మాటజ్ వెహ్లావలె నండ్రెండ్రె వన్ని మున్సు, నమకం ఇహ్లాన్.

అబ్రాహాము కొడోర్

31 వన్ని మున్ను నమకం ఇడ్డి యూదురిజ్ వాండ్రు వెహ్లాన్, “నాను వెహ్లా మాటెజ్ లోజీజి మహిజ, మీరు నిజమనె నా సిసూర్ అనిదెర్. 32 నస్తవలె మీరు దేవుణు వందిజ్ నిజమాతికెజ్ నెస్సిదెర్. అయక మిజి పాపమకాణిజ్ డిఁసపిస్సాద్”. 33 వారు వన్నిజ్, “మాపు అబ్రాహాము తెగ్గదు పుట్టికావ్. మాపు ఎసెజ్బా ఎయె అడిగి వెట్టివణి మణిసిర్ లెకెండ్ మన్ఎపె. నస్తవలె ‘మీరు డిఁబె అనిదెర్’, ఇజి ఎలాగ వెహ్లాన్”, ఇజి వెహ్లాన్. 34 అందెజె యేసు, “ఒరెన్ వెట్టివణి కినికాన్, ఎలాగ తోహా ఆతి మన్ని వజి ఎజిమాని అడిగి మంజి నాండ్రో, అయాలెకెండ్ పాపం కిని విజెరె పాపమదిజ్ అడిగి తోహా ఆతి లెకెండ్ మంజినాన్. 35 ఒరెన్ వెట్టివణి కినికాన్ అక్క మన్ని వన్ని లెకెండ్ ఎలాకాలం అయాల ఇండ్రో మండ్రెజ్ అట్ఎవ్. గాని అయాల ఇండ్రోణి మరిసిజ్ ఎలాకాలం అయాల ఇండ్రో అక్క మంజినాద్. 36 అందెజె దేవుణు మరిసి మిజి తోహా ఆతి బాణిజ్ డిఁసపిస్సిజ, మీరు నిజమనె డిఁబెఅనిదెర్. 37 నాను నెస్సు మీరు అబ్రాహాము తెగ్గతికిదెర్ ఇజి. గాని మీరు నజి సహెజ్ సుడెఁజినిదెర్. ఎందానిజ్ ఇహిజ నాను వెహ్లాన్ మాటెజ్ మిజి వడిఁజ. 38 నా బుబ్బు నజి తోరెస్తికెజ్ నాను వెహ్లాన్. గాని మీరు మీ బుబ్బు వెహ్లాన్ కిజినిదెర్”, ఇజి వెహ్లాన్. 39 నస్తవలె వారు, “అబ్రాహామునె మా బుబ్బు”, ఇజి వెహ్లాన్. 40 “మీరు అబ్రాహాము కొడోర్ ఇహిజ, మీరు అబ్రాహాము కితి వణిజ్ నె కితిదెర్ మరి. దేవుణు బాణిజ్ నాను వెహ్లాకెజ్ మిజి వెహ్లాజ్ నాను ఎసెజ్బా సుడెఁజ. గాని మీరు నజి సహెజ్ సుడెఁజినిదెర్. అబ్రాహాము యాల లెకెండ్ ఇనికబా కిఎన్. 41 మీ బుబ్బు కిజినికెజ్ మీరు బా కిజినిదెర్”, ఇజి వెహ్లాన్. అయాలలె వారు, “మాపు అప్పొసి వెట పుట్టికావె. దేవుణు ఒరెండ్రె మా బుబ్బు”, ఇహోర్. 42 అందెజె యేసు వరిజ్ ఈహు వెహ్లాన్: “దేవుణునె మీ బుబ్బు ఇహిజ, మీరు నజి ప్రేమిస్సిదెర్ మరి. ఎందానిజ్ ఇహిజ, నాను దేవుణు బాణిజ్ వాత. నాను యేలు ఇబ్బె మన్ను. నాను నా సొంత ఇస్టమదాన్ రెవెత. గాని వాండ్రు నజి పోక్తాన్. 43 ఎందానిజ్ నాను వెహ్లాన్ మాటెజ్ మీరు అర్దం కిజిదెర్? ఎందానిజ్ ఇహిజ, నాను వెహ్లాన్ మాటెజ్ వెండ్రెజ్ మీరు కెజదెర్. 44 మీ బుబ్బు సయ్తాన్. మీరు వన్ని కొడోర్. మీరు వన్నిజ్ ఇస్టం ఆతికెజ్ కిదెజ్ కోరిజినిదెర్. మొదోహాన్ అసి వాండ్రు సప్పికాన్. వాండ్రు నిజమాతి బాడిదు నెల్ఎన్. ఎందానిజ్ ఇహిజ, వన్ని లోఇ నిజమాతికెజ్ సిల్లు. వాండ్రు అబద్దం వర్గినివలె, వన్ని సొంత బుద్దిదాజె వర్గిజనాన్. ఎందానిజ్ ఇహిజ, వాండ్రు అబద్దం వర్గినికాన్. అబద్దం వర్గిని వరి అపొసి. 45 గాని నాను దేవుణు వందిజ్ నిజమాతికెజ్ వెహ్లాన్. అందెజె మీరు నజి నెన్ఇదెర్. 46 మీ లోఇ ఎయెన్బా నాను తపు కితికాన్ ఇజి రుజువ్ కిదెజ్ అట్నాండ్రా? నాను నిజమాతికెజ్ వెహ్లాజ, ఎందానిజ్ మీరు నజి నమిఇదెర్. 47 దేవుణు కొడోర్ అతికార్ వన్ని మాటెజ్ వెనార్. మీరు దేవుణు కొడోర్ ఆఇదెర్. అందెజె నా మాటెజ్ వెన్ఇదెర్”.

48 నస్తవలె యూదురు వన్నిజ్, “నీను సమరియదికి, నిజి దెయం అస్తాద్ ఇజి మాపు వెహ్లాన్ మాటదు తపు ఇనికబా మనాదా?”, ఇహోర్. 49 నజి దెయం అన్ఎద్. నాను నా బుబ్బెజ్ గవరం సీజిన. గాని మీరు నజి కరాయి ఇజినిదెర్. 50 నాను నా వందిజ్ గవరం అన్ఎ అదెజ్ సుడెఁజ. గాని అయాలకెజ్ సుడెఁజినాన్ ఒరెన్ మనాన్. వాండ్రె నా వందిజ్ నాయమదాన్ తీర్పు సీజినికాన్. 51 నా మాటెజ్ వజి బత్తినికాన్ ఎయెన్బా సాఎన్, ఇజి నాను నిజం మీ వెట వెహ్లాన్”, ఇజి మరజి వెహ్లాన్. 52 అయాలలె యూదురు, “ఏలు మాపు నెస్సాప్ నీను దెయం అస్తికి ఇజి. అబ్రాహాము సాతాన్. అయాల లెకెండ్ ప్రవక్తరుబా సాతార్. గాని నీను వెహ్లాన్, ‘నా మాటెజ్ వజి బత్తిజినికాన్ ఎయెన్బా సాఎన్’, ఇజి.

53 నీను మా బుబ్బు ఆతి అబ్రాహాము ఇంక పెరికిదా? వాండ్రు సాతాన్. అయాల లెకెండ్ ప్రవక్తరు బా సాతార్. నీను ఎయెన్ ఇజి నీను ఒడెబిజిని?”, ఇజి వెహ్లాన్.

54 అందెజె యేసు, “నానె నజి పొగడిఁతిజి దనిజ్ విలువ సిల్లెద్. గాని నజి పొగడిఁనికాన్ నా బుబ్బునె. వన్నిజె మీరు, మా దేవుణు ఇజి వెహ్లానిదెర్. 55 మీరు వన్నిజ్ నెన్ఇదెర్. గాని నాను వన్నిజ్ నెస్సు. నాను వన్నిజ్ నెన్ఎ ఇజి వెహ్లాజ, మీ లెకెండ్ ఒరెన్ అబద్దం వర్గినికాన్ అత మరి. గాని నాను వన్నిజ్ నెస్సు. వన్నిమాటెజ్ వజి బత్తిజిన. 56 మీ బుబ్బుతి అబ్రాహాము, నాను వాని దినం సుడెఁదెజ్ అట్లు ఇజి సరద్ ఆతాన్. వాండ్రు అయాల దినం సుడెఁతాండ్రె సరద్ ఆతాన్”, ఇజి వెహ్లాన్. 57 నిజి ఏలు యాబయ్ పంటెజ్బా సిల్లు. నీను అబహాముజ్ సుడెఁతిదా?”, ఇజి యూదురు వన్నిజ్ వెహ్లాన్.

58 అందెజె యేసు, “అబ్రాహము పుట్టేవండ ముజాలె నాను మన్న ఇజి నిజం మీ వెట వెప్పిన”, ఇజి వెహ్హన్. 59 యాక వెహిజ్, వారు వన్నిజ్ డెయ్దెజ్ పణుకు పెహ్హర్. గాని వాండ్రు డాఃజెతాండ్రె గుడిదాన్ సాహాన్.

9

పుట్టివలెహాన్ అసి గుడ్డి ఆతివన్నిజ్ నెగెండ కిజినాన్

1 యేసు సొన్ని మహివలె, పుట్టిబాణిజ్ అసి గుడ్డి ఆతి ఒరెన్వన్నిజ్ నుడెతాన్. 2 నస్తవలె వన్నిసిసూర్ వన్నిజ్, “బోదకినికి, ఎయెర్ పాపం కితిజ్ వీండ్రు గుడ్డిదాన్ పుట్టాన్? వీండ్రునా విన్ని అయేసి అప్పొసిర్నా?”, ఇజి వెన్బాతార్. 3 అందెజె యేసు, “వీండ్రు పాపం కితిజ్ ఆవద్, విన్ని అయేసి అప్పొసిర్ పాపం కితిజ్ ఆవద్. గాని దేవుణు ఒరెండ్రె కిదెజ్ అట్టి పణి వినిలోఇ నుడెదెజె వీండ్రు గుడ్డి ఆతాండ్రె పుట్టాన్. 4 వేడె మనివలె, మాటు నజి పొక్తివన్ని పణి కిదెజ్వలె. సీకట్ బేగి ఆనాద్. అయావలె ఎయెర్బా ఇనికబా కిదెజ్ అట్వర్. 5 నాను యా లోకమ్దు మనివలె, యా లోకమ్దవిదవిజ్ జాయ్లెకెండ మన”, ఇజి వెహ్హన్. 6 వెహ్హండ్రె, వాండ్రు బూమిదు పూస్తాన్. వన్ని పూసవలిదాన్ కండెక్ బుర్ద కితాండ్రె, అయా బుర్ద గుడిః వన్ని కణకెజి మున్ను రాస్తాన్. 7 రాస్తాండ్రె, “నీను సొన్ని సిలోయెము ఇన్ని గుమ్మిదు కణుకు నొరె ఆఅ”, ఇజి వెహ్హన్. (సిలోయెము ఇన్ని మాటదిజ్ పొక్తికాన్ ఇజినె అర్దం) వాండ్రు సాహాండ్రె నొరె ఆతాన్. వన్ని కణుకు నెగెణ్ఆతె. వాండ్రు మరజి వాతాన్. 8 అయావలె వన్ని పడఃకాదికార్ని వాండ్రు ముజాలె లొన్పానిక నుడిఃతి మహికార్ వెన్బాతార్, “వీండ్రు అబ్బె బసి లొసి మహికాన్గదె”, ఇజి. 9 నెగెండార్, “వీండ్రె”, ఇజి. మరి నెగెండార్, “సీలె, వినిలెకెండ మన్ని మరి ఒరెనె”, ఇహార్. గాని వాండ్రు, “నానె లొన్పాజి మహికాన్”, ఇజి వెహ్హన్. 10 అయావలె వారు, “నీ కణుకు ఎలాగ రెకె ఆతె?”, ఇజి వెన్బాతార్. 11 అందెజె వాండ్రు, “యేసు ఇజి కూక్కి ఒరెన్బుర్ద కితాండ్రె నా కణకెజి మున్ను రాస్తాన్. సిలోయెము ఇన్ని గుమ్మిదు సొన్ని నొరె ఆఅ, ఇహాన్. అందెజె నాను సొన్ని నొరె ఆత్తిజ్నాను నుడెదెజ్ అట్ట”, ఇహాన్. 12 “ఎంబె మనాన్ అయా వాండ్రు”, ఇజి వారు వెన్బాతార్. “విమె నాను నెన్వ”, ఇహాన్ వాండ్రు. 13 ముజాల గుడ్డిదాన్ మహివన్నిజ్ వారు పరిసయ్యరుజు డగ్రు తత్తార్. 14 ఉండ్రె విస్తాంతి నాండిజె, యేసు బుర్ద కితాండ్రె అయా వన్ని కణుకు నెగెణ్ కితాన్. 15 పరిసయ్యరు బా నీను ఎలాగ బేస్సెజ్ అట్టి ఇజి వెన్బాతార్. వాండ్రు, “అయా వాండ్రు నా కణుకు మున్ను బుర్ద రాస్తాన్. నాను నొరెబాత. ఏలు నాను బేసిన”, ఇహాన్. 16 అందెజె నెగెండార్ పరిసయ్యరు, “యా వాండ్రు దేవుణు బాణిజ్వాతికాన్ఆవెన్. ఎందానిజ్ ఇహిజ, విస్తాంతిదినమ్దు అహు కిజి వాండ్రు రూలుజ్ తప్పినాన్”, ఇహార్. గాని మరి నెగెండార్, “ఒరెన్పాపం కిజినాన్ ఎలాగ నిసా బమ్మాని పణిజ్ కిదెజ్ అట్టాన్”, ఇహార్. ఆహె వారు కేటెజ్ ఆతార్. 17 అందెజె పరిసయ్యరు మరి అయా గుడిఃదాన్ మహి వన్నిజ్, “వాండ్రు నీ కణుకునె రేక్తాన్. అందెజె నీను వన్ని వందెజ్ ఇన్నిక వెప్పొని”, ఇజి వెన్బాతార్. దనిజ్ వాండ్రు, “వాండ్రు ఒరెన్ ప్రవక్త”, ఇహాన్. 18 యా యూదురు అదికారిజు, వీండ్రు గుడిఃదాన్ మహాన్. వీండ్రు ఏలు రెకె ఆతండ్రె బేసినాన్ ఇజి నమ్మివితార్. అందెజె వారు వన్ని అయిసి అపొనిజ్ రప్పిస్తార్. 19 రప్పిస్తారె పరిజ్, “వీండ్రు మీ మరినా? వీండ్రునా గుడిదాన్పుట్టాన్ఇజి మీరు వెప్పొనిదెర్. అహిజ, ఏలు వాండ్రు ఎలాగ బేసినాన్?”, ఇజి పరిజ్ వెన్బాతార్. అహు వెన్బాని దాక, వాండ్రు గుడిదాన్ మహాన్. వాండ్రు నెగెణ్ఆతాండ్రె బేసినాన్ ఇజి నమ్మివితార్.

20 వన్ని అయిసి అప్పొసిర్ వెహ్హర్, “వీండ్రు మా మరెన్, ఇజి మాపు నెస్తావ్. వీండ్రు గుడిః దాన్పుట్టాన్ఇజి బా నెస్తావ్. 21 గాని ఏలు వాండ్రు ఎలాగ బేసినాన్ ఎయెన్వన్ని కణుకు రెక్తాన్ఇన్నిక మాపు నెన్వెవ్. వాండ్రు బుద్ది వాతికాన్గదె. వన్నిజ్వెన్బాదు. వాండ్రు వన్నిజ్జుర్గితిక వెహ్హన్”, ఇజి వెహ్హర్. 22 వన్ని అయిసి అపొసిర్ ఆహె వెహ్హర్. ఎందానిజ్ ఇహిజ వారు యూదురి అదికారిజి తియెల్ ఆతార్. యా యూదురు ఉండ్రె తిరుమానం కిత మహార్. ఎయెన్బా యేసు క్రీస్తు ఇజి ఒప్పుకోటిజి వన్నిజ్యుదురి మీటిజి ఇండ్రెదాన్ వెల్లి కిదెజ్ ఇజి. 23 అందెజె వన్ని అయేసి అప్పొసిర్, వాండ్రు బుద్ది వాతికాన్గదె, వన్నిజ్వెన్బాదు”, ఇజి వెహ్హర్. 24 అందెజె యూదురు అతికారిజు మరిబా గుడిదాన్మహి వన్నిజ్ కూకప్పిస్తారె. కూకప్పిస్తారె, “నీను దేవుణుదిజ్ పొగిడిఃజి వెహ్హె. నిజె నెగెణ్

కితాన్ ఇజి నీను వెప్పొని యా వాండ్రు పాపం కిజినికాన్ ఇజి మాపు నెసినాప్”, ఇహార్. 25 నస్తవలె వాండ్రు, “వాండ్రు పాపం కిజినికానో సీలెనో ఇజి నాను నెన్వ. ఉండ్రీ నాను నెన్పు. నాను గుడిదాన్ మహ. ఏలు నాను బేసిన”, ఇజి వెప్టాన్. 26 వారు వన్నిజ్, “వాండ్రు నిజి ఇనిక కిత్తాన్? వాండ్రు ఎలాగ నీ కణుకు రెక్కాన్?”, ఇజి వెన్బాతార్. 27 అందెజె వాండ్రు, నాను ముజాల మిజి వెప్టా మన. గాని మీరు వినెఇదెర్. ఎందానిజ్ మీరు మరిబా విండ్రెజ్? మీరుబా వన్ని సిసూర్అదెజ్ కోరిజినిదెరా?”, ఇజి వెప్టాన్. 28 “నీను బా వన్ని సిసూనె. మాపు మోసె సిసూర్జ. 29 దేవుణు మోసెవెట వర్గితాన్ ఇజి మాపు నెసినాప్. గాని అయా వాండ్రు ఎమేణికాన్ ఇజి మాపు నెన్వప్”, ఇజి వారు వన్నిజ్నండో దూసిస్తార్. 30 అందెజె వాండ్రు ఈహు వెప్టాన్, “అబ్బ గొప్ప పణి యాక! వాండ్రు ఎమేణికాన్ ఇజి మీరు నెన్ఇదెర్ గాని వాండ్రు నా కణుకు రెక్కాన్. 31 దేవుణు పాపం కినివరి మొరొ వినెవన్ ఇజి మాటు నెస్పాట్. వన్నిజ్ గవేరం సీజి వన్నిజ్ ఇన్టం ఆతి పణిజ్కెని పరి మొరొ వాండ్రు వినాన్. 32 యాయ పొటలొఇహనె గుడిదాన్ మహివన్ని కణుకు ఎయెన్బా ఎసెజ్బా రెక్కి వినెవర్. 33 నా కణుకు రేక్కి యా వాండ్రు దేవుణు బాణిజ్వాతికాన్ ఆవెన్ఇహిజ నజి నెగెణ్కిదెజ్అట్వతాన్మరి”. 34 దన్నిజ్ వారు, “నీను పాపమదానె పుట్టికి. ఏలు మజి నెన్పిస్తెజ్ వాజినిదా?”, ఇజి వెప్టారె వన్నిజ్వెల్లి కితార్.

35 అయా గుడ్డిదాన్ మహివన్నిజ్ పరిసయరు వెల్లి కితార్ ఇజి యేసు విహాన్. వాండ్రు వన్నిజ్ సుడెతివెలె, “నీను లోకు మరిసిజ్ నమిజినిదా?”, ఇజి వెన్బాతాన్. 36 వెన్బాతిజ్ వాండ్రు, “బాబు నాను వన్నిజ్ నమిదెజ్ వాండ్రు ఎయెన్ ఇజి నజి వెహ్అ”, ఇహాన్. 37 అయావలె ఏలు, “నీను యేలు వన్నిజ్నుడెతి మన్ని. వాండ్రె నీ వెట వర్గిజినికాన్”, ఇజి వెప్టాన్. 38 నస్తవలె వాండ్రు, “ప్రబువా, నాను నిజి నమిజిన”, ఇహండ్రె యేసు పాడమకాజ్ ముణుకుజ్ ఉఱరిజి మాడిస్తాన్. 39 అందెజె యేసు, “నాను లోకురికేటి కిదెజె వాత మన. గుడివారు బేస్తెజ్ బేస్సికార్ గుడిః ఆదెజ్ నాను వాత మన”, ఇహాన్. 40 నస్తవలె వన్నిడగ్రు నిహి మహి సెగొండార్ పరిసయరు వాండ్రు వెప్పొనిక విహార్. విహారె, “ఇనిక? మాపు బా గుడిదికాసా?”, ఇజి వెన్బాతార్. 41 అందెజె యేసు, “మీరు గుడిఃదికిదెర్ ఇహిజ, దేవుణు మీ పాపమకు లెక్క కివెతాన్ మరి. గాని ‘మాపు సుడెజినాప్’ ఇజి మీరు వెప్పొనిదెర్. అందెజె మీ లొఇ పాపమకు నిహె మనె”, ఇజి వెప్టాన్.

10

1 “గొరెజి సాలదు, సరిదాన్ డుగ్విండ, ఆఇ సరిదాన్ డుగ్వికాన్ డొజారి కజరి ఆత మనాన్. 2 గాని సరిదాన్ డుగ్వికాన్ గొరెజ్ గపుడుఱయెన్. 3 సాలదిజ్ రెయక కాప్కెనికాన్, వన్నివందిజ్ సేప్టా రేనాన్. గొరెజ్ వన్నికంటం వెన్పె. వాండ్రు వన్నిసొంత గొరెజి పేరు అసి కూక్కి వన్కాజ్ వెల్లి సోప్పాన్. 4 వన్ని సొంతవనకాజ్ విజు వెల్లి సోప్టి వెనుక, గొరెజి ముజాల వాండ్రు నడిఱనాన్. గొరెజ్ వన్ని కంటం నెన్పె. అందెజె అవి వన్నివెట సొనె. 5 గాని నెన్ఇవన్ని కంటం అవి నెన్ఉ. అందెజె వన్నివెట సొన్విండ, అవి వన్నిబాణిజ్ ఉహ్కె, ఇజి నాను నిజం మీవెట వెప్పొన. 6 యేసు అబ్బె నిహిమహివరిజ్ కతవజ యాక నెన్పిస్తాన్. గాని వారు వాండ్రు వెప్పొనిదనిజ్ అర్దం కివెతార్.

7 అందెజె వాండ్రు మరి పరివెట ఈహు వెప్టాన్: “నాను నిజం మీవెట వెప్పొన, నానె గొరెజ్ సరిలెకెండ మన్న. 8 నా ముజాల వాతికార్ విజెరెబా డొజారి కజరి ఆత మనార్. గాని గొరెజ్ వరిజ్ వినెఉతె. 9 నాను దేవుణుడగ్రు సొండ్రెజ్ సరిలెకెండ మన్న. నా వెట డుగ్వికాన్ ఎయెన్బా నెగెండ మంజినాన్. వాండ్రు లొఇ సొన్ని వెల్లి వాజి మేత మేజి మంజినాన్. 10 డొజారి డొజి కిదెజ్నో, సప్టెజ్నో పాడు కిదెజ్నో వానాన్. మరి ఇన్నిదనిజ్బా రెవెన్. నాను నజి వెనివరిజ్ దేవుణువెట ఎలాకాలం బత్కిని బత్కు సీని వందిజె వాత మన్న. అయాక పూర్తి సీని వందిజె వాత మన్. 11 నాను గొరెజి నెగ్గి గపుడుయెన్. నెగ్గి గపుడుయెన్ గొరెజి వందిజ్ వన్ని పాణం సీనాన్. 12 జితం వందిజ్ గొరెజ్ అడిజినికాన్ గపుడుయెన్ అవెన్. అక్కజ్ వన్ని సొంతగొరెజ్ ఆఉ.అందెజె దుమాల్గొండి వాజనిక సుడెజి గొరెజిడిఱి ఉహ్కాన్. అయావలె దుమాల్గొండి వన్కాజ్ అసి నెద్దిస్తాద్. 13 వాండ్రు జితం వందిజ్ అడిజినాన్. గొరెజి మున్ను వన్నిజ్ బాజిత సిల్దెద్. అందెజె వాండ్రు డిఱి ఉహ్కాన్.

14-15 నాను గొరెజి నెగ్గి గపుడుఱయెన్. బుబ్బు నజి ఎలాగ నెసినాండ్రె, నాను బుబ్బెజ్ ఎలాగ నెసినానో, అయావజి నాను గొరెజి నెసిన. నా గొరెజ్ నజి నెసినె. నాను గొరెజివందిజ్ నా పాణం

సీజిన. 16 యా మందదు మనికెళ్ల ఆవిండ, మరి సెగం గొర్రెజ నజీ మన్నె. వన్యూజ్ బా నాను పేర్ జి త్తైజ్ వెలె. అవి నా కంటం వినె. అయావలె మంద ఉండ్రె ఆనాద్. గప్పడూయెన్ ఒరెన్ ఆనాన్. 17 నాను మర్ జి బత్తినివందిజె, నా పాణం సీజిన. అందెజె నా బుబ్బు నజీ ప్రేమిన్నాన్. 18 ఎయెన్ బా నా పాణం నా బాణిజ్ లాగ్ వన్. నా సొంత ఇస్టమ్ దానె నా పాణం సీజిన. నా పాణం సీదెజ్ నజీ అతికారం మనాద్. మర్ జి లాగె ఆదెజ్ బా నజీ అతికారం మనాద్. యా లెకెండ్ కిదెజ్ ఇజినె నా బుబ్బు నజీ ఆడ్ర సిత్తమనాన్*.

19 వాండ్రు వెప్తై యా మాటెజవందిజె, యూదురు లోఇ ఉండ్రె ఇజ్జి గొడెబ పుట్టాద్ 20 వరి లోఇ నండెండార్, “వీండ్రు దెయం అస్తికాన్, వెరి వాండ్రు, విన్నిమాట ఎందానిజ్ వెంజినెదెర్”, ఇజి వెప్టార్. 21 మరి సెగెండార్, “దెయం అస్తికాన్ ఒరెన్ యాలెకెండ్ వర్గివన్. దెయం గుడిడివరిజ్ నెగెండ్ కిదెజ్ అట్నాదా?”, ఇజి వెప్టార్.

యూదురు యేసుజ్ నమ్మివెర్.

22 అయావలె పిన్నికాలం. యెరూసలెమ్ దు యూదురు దేవుణుగుడిదు బసె ఆతి దినంవందిజ్ ఎత్తుకిని పండెయ్ కిజినార్*.

23 నస్తివలె యేసు, దేవుణుగుడిదు మన్ని సొలొమోను అరుజు ఇజి కూకె ఆని అరుజుదు బూలాజి మహాన్. 24 అయావలె యూదురు వన్ని సుటులం ఆతారె, “ఎసోడ్ రోస్కు నీను మజీ టెటాజ్ వెహావిండ, అనుమానమ్ కు ఇడెజినె? నీను క్రీస్తు ఇహిజ, మజీ తినాజ్ వెహాఅ”, ఇహార్. 25 అందెజె యేసు, నాను మీవెట వెప్టా. గాని మీరు నమ్మిఇదెర్. నా బుబ్బు సత్తుదాన్ నాను బమ్మాని పణిజ్ కిజిన. అయా పణిజ్ నావందిజ్ సాని వెప్పినె. 26 గాని మీరు నమ్మిఇదెర్. ఎందానిజ్ ఇహిజ, మీరు నా గొర్రెజ్ ఆఇదెర్. 27 నా గొర్రెజ్ నా కంటం వెంజినె. నాను వన్యూజ్ నెసిన. అవి నావెట వాజినె. 28 నాను వన్యూజ్ ఎలాకాలం దేవుణువెట బత్తిజినె బత్తు సీజిన. అవి ఎనెజ్ బా నానం ఆఉ. వన్యూజ్ ఎయెన్ బా నా కిదాన్ ఒత్తెజ్ అట్ వన్. 29 వనకాజ్ నజీ సిత్తి నా బుబ్బు విజెరిజ్ ఇంక పెరికాన్. అందెజె ఎయెన్ బా వనకాజ్ బుబ్బు కిదాన్ డొజి కిజి ఒత్తెజ్ అట్ వన్. 30 నానుని నా బుబ్బు, ఉండ్రె ఆత మనావ్”, ఇజి వెప్టాన్. 31 నస్తివలె, యూదురు వన్నిజ్ మరి డెయిదెజ్ ఇజి పణుకు పెప్టార్. 32 గాని యేసు వరిజ్, “నా బుబ్బు సత్తుదాన్ నండె బమ్మ ఆని పణిజ్ కిజి మిజి తోరిస్త మన్ను. వనకలోఇ ఎమేణి పణి వందిజ్ నజీ మీరు పణుకుజాణిజ్ డెయినిదెర్?”, ఇజి వెప్టాన్. 33 అందెజె యూదురు, “మాపు పణుకుజాణిజ్ డెయిజినె కి నీను కిత్తి ఇని నెగ్గి పణిజవందిజ్ ఆవిద్. గాని నీను ఒరెన్ లోక ఆజి మంజి, నాను దేవుణు ఇజి వెహా ఆజి దేవుణుదిజ్ దూసిన్నవందిజె మాపు పణుకుజాణిజ్ డెయినావ్”, ఇజి వెప్టార్.

34 అందెజె వాండ్రు వరిజ్ ఈహు వెప్టాన్, “మీరు దేవుణుబు’ ఇజి దేవుణునె వెప్టాన్†, ఇజి దేవుణు మాటదు రాస్త మనాద్ గదె? 35 దేవుణు మాటదు వెప్పినికెళ్ల ఎనెజ్ బా తవ్ ఉ. దేవుణు మాట సిత్తి లోకురిజ్, ‘దేవుణుబు’, ఇజి దేవుణు కూక్కినాన్. 36 బుబ్బుతి దేవుణునె నజీ వన్ని వందిజ్ కేట కితాండ్రె యా లోకమ్ దు పొక్తాన్. అహిజ, ‘నానె దేవుణుమరిసి’ ఇజి నాను వెప్పివలె దేవుణుదిజ్ దూసిన్నాన్ ఇజి మీరు ఎలాగ వెప్పినిదెర్. 37 నాను నా బుబ్బు వెప్తై పణికివిండ మహిజ, నజీ నమ్మిమాట్. 38 గాని నాను కిత్తి అయా పణిజ నమ్మిదు. నజీ నమ్మెజ్ బా అయా పణిజ నమ్మిదు. ఎందానిజ్ ఇహిజ, బుబ్బు నావెట కూడెజి మంజినాన్. నాను బుబ్బువెట కూడెజి మంజిన, ఇజి మీరు నెసి అర్లం కిజి మండ్రెజ్”. 39 యాకెజ్ విహారె, మరి వారు వన్నిజ్ అస్తెజ్ సుడెతార్. గాని వాండ్రు వరి కిదాన్ తప్పె ఆతాండ్రె సొహాన్.

40 వాండ్రు యెయెర్ ను గడ్డ అతాహా పడెకాద్ మన్ని ఉండ్రె బాడిదు మరిబా సొహాన్. బానె యోహాను బాప్తిసం సీజి మహాన్. వాండ్రు బాన్ మహాన్. 41 నండెండార్ వన్నిడగ్రు వాతార్. వారు, “యోహాను ఇని

* 10:22 10:22 యెరుసలెం గుడి: ముజాల నానం కిత్తార్ అయాక మరి తొవ్తారె గుడిదు పార్లనం కిదెజ్ పూజెజ్ కిదెజ్ మొదెల్ సారె. అయాకాలం ఒడెబిజి యూదురు కిని పండెయ్ నె యా గుడిదు బసె ఆతి దినం వందిజ్ ఎత్తుకిని పండెయ్. † 10:34 10:34 కీర్తన 82:6.

బమ్మాని పణిబాన్ కివితాన్. గాని విని వందిజ్ యోహాను వెప్తొ నజతిజ్ విజా నిజమ్నె”, ఇజి వెప్తార్. 42 అబ్బె నండోడార్ యేసుమున్సు. నమకం ఇడ్తార్.

11

సాతి లాజరుజ్నిక్కినాన్

1-3 బెతానియ ఇన్ని నాటో లాజరు ఇన్నికాన్ ఒరెన్మనాన్. వన్ని బీబిక్నె మార్త మరియు ఇనికెజ్. యా మరియునె యేసు పాదమ్కాజ్ అతరు ఇన్ని వాసన నూనె వాక్తాదె, దన్నికొప్పుదాన్ తెలతాద్. ఉండ్రీ నాండిజ్ లాజరుజ్ జబ్బు వాతాద్. నీరసం లావు ఆతిజ్, వన్ని బీబిసిక్ యేసుడగ్గు కబ్బు పోక్తె, ‘ప్రబువా, నీను లావు ప్రేమ కిజిని నీకూలాయెన్ నీరసం ఆత మనాన్’, ఇజి. 4 యేసు యా కబ్బు విహండ్రె, “వాండ్రు సావన్. సానివందిజ్ వాతిక ఆవద్ యా నీరసం. గాని దేవుణు గొప్పు పెరికాన్ ఇజి లోకురిజ్ తోరిస్తెజ్. ఎందానిజ్ ఇహిజు, దిన్నిదటాన్ దేవుణు మరిసి గొప్పుపెరికాన్ ఇజి తోరె ఆదెజ్”, ఇజి వెప్తాన్. 5 యేసు మార్తెజ్, దన్నితజిసి మరియెజ్, లాజరుజ్ లావు ప్రేమిస్తాన్. 6 గాని లాజరు నీరసం లావు ఆతాన్ ఇజి కబ్బు విహిజ్బా వాండ్రు బేగి సాన్వితాన్. వాండ్రు మహి బాన్మరి రుండి రోస్సుబా మహాన్. 7 వెనుక వాండ్రు వన్ని సిసూరజు, “రదు, మాటు యూదుయ దేనమ్దు మరజి సానాట్”, ఇజి వెప్తాన్. 8 అయావలె వారు, “బోదకిసికి, యూదురు నిజి పణకాణిజ్ డెయ్దెజ్ నెగం రోస్సు. ముజాలె సుడెజ్తార్ గదె. మరిబా నీను అబ్బె సాండ్రెజ్ సుడెజినిదా?”, ఇహార్. 9 అందెజె యేసు, “వేడకాజ్ పన్నెండు గంటెజ్ మనె. సిలె? అందెజె ఒరెన్ వేడె బూలాతిజు, వాండ్రు తోరె ఇడెజి అరెన్. ఎందానిజ్ ఇహిజు, వాండ్రు యా లోకమ్ది జాయి సుడెజినాన్. 10 గాని వాండ్రు రెయితు బూలాతిజు, వాండ్రు తోరె ఇడెజి అర్నాన్. ఎందనిజ్ ఇహిజు, వన్ని లోఇ జాయి సిల్లెద్”, ఇజి వెప్తాన్. 11 యాక వెప్తండ్రె, మరి సిసూరిజ్ వెప్సినాన్, “మా కూలాయెన్ ఆతి లాజరు నిద్రకిజినాన్. వన్నిజ్ నిక్కెజ్ నాను బాన్ సాస్సిన. 12 వన్ని సిసూరు, “ప్రబువా, వాండ్రు నిద్రకిజినాన్ ఇహిజు, వాండ్రు నెగిణ్ అనాన్లె”, ఇహార్. 13 లాజరు సాత మనాన్ ఇజి యేసు వెప్తాన్. గాని వన్నిసిసూర్ మాముల్ నిద్రవందిజె వాండ్రు వెప్సినాన్ ఇజి ఒడిబితార్. 14-15 అందెజె వాండ్రు వరిజ్ తినాజ్ వెప్తాన్, “లాజరు సాతాన్. అయావలె నాను వన్నివెట మన్విత. అందెజె నాను మీ వందిజ్ సర్త ఆజిన. ఎందానిజ్ ఇహిజు, మీరు నజి నమ్మినిదెరై. అందెజె రదు, వన్ని బాన్సానాట్”, ఇజి వెప్తాన్. 16 నన్దివలె దిదుము ఇజి కూకె ఆని తోమా మహి సిసూరిజ్, “రదు మాటు బా సానాట్. వన్నివెట సాదెజ్సానాట్”, ఇహాన్.

17 యేసు వాతివలె, లాజరుజ్ నమాది కిజి నాల్లి దినమ్కు ఆత ఇజి నెస్తాన్. 18-19 బెతానియ యెరూసలెమ్దాన్ ఎంజు ఇంసుమింసు రుండి మయ్లుజ్ దూరం మన్నె. నండోడార్ మార్తెజ్ మరియెజ్ ఒదిస్తెజ్ వాత మహార్. వరి తంబెర్ని సాతి వందిజ్, వారు ఒదిస్తెజ్ వాతార్. 20 యేసువాజినాన్ ఇజి వెప్తొ మాట విహదె, మార్త ఎద్దు సాహద్. వన్నిజ్ సుడెదెజ్ అది సాహద్. గాని మరియు ఇండ్రొ బస్త మహద్. 21 నన్దివలె మార్త యేసుజ్, “ప్రబువా, నీను ఇబ్బె మంజినిక ఇహిజు, నా తంబెరి సావతాన్మరి. 22 గాని ఏలుబా నీను దేవుణుదిజ్ ఇనిక లొస్తిజ్బా వాండ్రు నిజి సీనాన్ ఇజి నాను నెన్న”, ఇజి వెప్తాద్. 23 అందెజె యేసు, “నీ తంబెర్ని మరజి నిజ్నాన్లె”, ఇజి వెప్తాన్. 24 అయావలె అది, “యా లోకమ్దిజ్ కడెవెరి దినమ్దు, వాండ్రు మరి బత్కినాన్లె ఇజి నాను నెన్న”, ఇహద్. 25-26 అందెజె యేసు దనిజ్ ఈహు వెప్తాన్, “నానె సాతి వరిజ్ నిక్కికాన్. వరిజ్ మరి బత్కు సినికాన్ నానె. నజి నమ్మినికాన్ ఎయెన్బా వాండ్రు సాతిజ్బా మరి బత్కినాన్. నజి నమ్మిజు బత్కిజిని ఎయెన్బా ఎనెజ్బా సావన్. నీను యాకెజ్ నమిజినిదా?”. 27 అయావలె అది, “ఒబ, నాను నమిజిన, నీనె దేవుణు మరిసి ఆతి క్రిస్తు ఇజి. నీనె యా లోకమ్దు వాదెజ్మున్నికాన్ఇజి దేవుణు వెప్తాకి”, ఇజి వెప్తాద్.

28 యాకెజ్ వెప్తాదె, అది మరజి సాహదె, దన్నితజి మరియెజ్కూక్తాదె, “బోదిస్సికాన్ఇబ్బె మనాన్. నిజి కూక్కినాన్”, ఇజి గిబ్బి డగ్గు వెప్తాద్. 29 మరియు యాక విహిజ్, అది గజిబిజి నిజెతాదె, వన్ని డగ్గు సాహద్. 30 అయావలె యేసు ఇంక ఆ నాటో రెవండ్రె. మార్త వన్నిజ్ దసూల్ఆతి బూడిద్నె మహాన్. 31 మార్తెజ్ ఒదరిసి దనివెట ఇండ్రొ మహి యూదురు అది గజిబిజి నిజెజి సాస్సినక సుడెతివలె, అది అడెబదెజ్ దూకిదు సాస్సినాన్సు ఇజి దన్నివెనుక సాహార్.

32 యేసు మన్ని బాడిడు మరియు వాతాదె, వన్నిజ్సుండేతాదె, వన్ని పాదమ్కాజ్ అర్తాద్. అర్తాదె, “ప్రబువా, నీను ఇబ్బె మంజినిక ఇహిజ, నా తంబెరి సాఎతాన్మరి”, ఇహాద్. 33 అది అడఃబాజినిక యేసు సుండేతాన్. దని వెట వాతి యూదురు బా అడఃబాజినిక సుండేతాన్. అయావలె వాండ్రు మన్నుదు బాద ఆతాండ్రె మొకొం డిష్టాన్. 34 “వన్నిజ్మంబె ఇడ్డి మన్నిదెర్?” ఇజి వరిజ్ వెన్బాతాన్. “వాజి సుండే అప్రబువా”, ఇహాద్ వారు. 35 యేసు కనీర్డిష్టాన్ 36 అయావలె యూదురు, “సుండేదు వాండ్రు ఎసా వన్నిజ్మేమిస్తాన్”, ఇజి వెప్టార్. 37 గాని వరి లొఇ సెగొండార్, “వీండ్రు గుడిః వరిజ్ నెగెణ్కీతాన్. మరి ఎండనిజ్లాజరు సావిండ కిదెజ్అట్ఎతాన్”, ఇజి వర్గితార్. 38 అయావలె యేసు నండో బాద ఆతాండ్రె దూకిదు వాతాన్. అయాక ఉండ్రీ సాలం. దన్నిముజాల ఉండ్రీ పెరి పణుకు ఇడ్డ మహార్. 39 యేసు, “అయా పణుకు లాగ్దు”, ఇజి వెప్టాన్. నస్తివలె సాతివన్ని బీబ్సి మార్త వన్నిజ్, “ప్రబువా, వినిజ్ముసి నాల్లి రొస్సు ఆజినాద్. అందెజె గొప్ప కంపు ఏలు మంజినాదల్”, ఇజి వెప్టాద్ 40 అందెజె యేసు దనిజ్, “నీను నమ్మితిజ, దేవుణు గొప్ప పెరికాన్ ఇజి నీను సూణిలె ఇజి నాను నిజి వెప్టా గదె?”, ఇజి వెప్టాన్. 41 అందెజె వారు పణుకు లాగితార్. యేసు కణుకు మున్ను బస్తాండ్రె, “ఓ బా నీను నా పార్లనం వెంజినిజ్నిజి వందనమ్కు. 42 నీను ఎస్తివలె బా నజి వెంజినిలె ఇజి నాను నెస్సు. గాని ఇబ్బె నిల్లి మంజిని యా లోకుర్వందిజ్ నాను నిజి వందనమ్కు వెప్టా మన. ఎందానిజ్ ఇహిజ, నీనె నజి పోక్తి మన్నికాన్ఇజి వారు నమిదెజ్”, ఇజి పార్లనం కీతాన్. 43 పార్లనం కీతాండ్రె, వాండ్రు, “లాజరు వెల్లి రఅ”, ఇజి డేల్లి డటం వెప్టాన్. 44 అయావలె లాజరు వెల్లి వాతాన్. వన్ని కికు కాల్యు పాతిజాణిజ్నుటిస్త మహార్. వన్ని మొకొం రూమాల్దాన్ తొమ్కాత మహాద్. యేసు వరిజ్, “వన్నిజ్నుటిస్త మన్నికెజ్లాగదు. వన్నిజ్ నడఃనిలెకెండ కిదు”, ఇహాన్.

యేసుజ్నప్తెజ్ సుండేజినార్

45 అందెజె మరియెజ్ సుండేదెజ్ వాతి యూదురు లొఇ నండొండార్, యేసు కితిక సుండేతారె, వన్ని మున్ను నమకం ఇట్టార్. 46 గాని వరి లొఇ సెగొండార్ పరిసయురుజ డగ్రు సొన్ని, యేసు కితిక వరిజ్ వెప్టార్. 47 నస్తివలె పెరి పుజెరిజు నీ పరిసయురు, పెద్దల్జ కూక్పిస్తారె, “వాండ్రు గొప్ప బమ్మ అని పణిజ్ కిజినాన్? అందెజె మాటు ఇన్నిక కిదెజ్? 48 మాటు వన్నిజ్ యా లెకెండ పణి కిదెజ్ సరి సితిజ, లోకుర్ విజెరె వన్నిజ్ నమినార్. రోమాదికార్ వానారె, మా గుడిః, యూదురు ఆతి మజి విజు నాననం కినార్”, ఇజి వర్గితార్.

49-50 నస్తివలె వరి లొఇ కయపా ఇన్నికాన్ ఒరెన్ మహాన్. వాండ్రు అయా ఏంటు విజు పుజెరిజ మున్ను పెరి పుజెరి. వాండ్రు వరిజ్, “మీరు ఇనికబా నెన్ఇతిదెర్. రోమాదికార్ మా గుడిః, యూదురు ఆతి మజి పూర్తి నాననం కినిదని మున్ను లోకుర్ వందిజ్ ఒరెన్ వాండ్రు సానికాదె మిజి నెగెద్ ఇజి మీరు నెన్ఇదెరా?”, ఇహాన్.

51-52 వాండ్రు వెప్టాన్ దని అర్లం వాండ్రె నెన్ఎతాన్. గాని వాండ్రు ఆ ఏంటు విజు పుజెరిజ మున్ను పెరి పుజెరి. అందెజె యేసు యూదురు వందిజ్ సానాన్లె ఇజి, యూదురు వందిజె ఆవిండ, నెత్తితి మన్ని దేవుణు కొడొరిజ్ కుడుఃప్పి తసి వరిజ్ ఉండ్రె లోకుర్కిదెజ్. దినివందిజ్ యేసు సానాన్లె ఇజి వాండ్రు ఎతు కిజి జర్గిజ ముజాలె వెప్టాన్. 53 అందెజె అయా నాండిజ్అసి వన్నిజ్నప్తెజ్ వారు సుండేజి మహార్. 54 అందెజె యేసు విజెరె వన్నిజ్ నెస్తిలెకెండ బూలాఎతాన్. గాని వాండ్రు ఎయెర్ మనెఇ బాడిః డగ్రు మన్ని ఉండ్రీ ప్రాంతమ్దు సాహాన్. అయా ప్రాంతమ్దు మన్ని ఎప్రయెం ఇన్ని ఉండ్రీ పట్టుమ్దు వన్ని సినూర్ వెట వాండ్రు మహాన్.

55 యూదురి పస్సువండొయ్ డగ్రు వాతివలె, నండో ప్రాంతమ్కాణిజ్ నండొండార్ యెరూసలెమ్దు సాహార్. పండొయ్ ముజాలె విజెరె సుబ్బరం మనిక ఉండ్రీ ఆసారం. అందెజె, వారు సుబ్బరం మన్నివందిజ్ వారు యెరూసలెమ్దు వాతార్. 56 వారు యేసుజ్ రెబాజినె మహార్. వారు దేవుణు గుడిః అరుజుదు నిహి మహివలె, ఒరెన్ వెట ఒరెన్, “ఇన్నిక ఒడఃబిజిని? వాండ్రు పండొయ్దిజ్ వానాండ్రా, సిలెనా?”, ఇజి వర్గితార్. 57 గాని పెరి పుజెరిజు ని పరిసయురు ఉండ్రీ ఆడ్డ సిత మనార్. ఎయెన్బా యేసు ఎంబె మనాన్ ఇజి నెస్తిజ, వాండ్రు వరిజ్వెప్టాజ్. ఎందానిజ్ ఇహిజ, వన్నిజ్ అరిస్టు కిదెజ్.

12

1 పస్కపండోయ్ మొదొల్స్తాజ్ ఆరు దినముకు మనె. అయావలె, యేసు లాజరు మన్ని బెతానియ ఇని పట్టమదు సోహాన్. యా లాజరుజ్ నె యేసుసాపుదాన్ బత్తిస్తాన్. 2 అబ్బి వారు యేసువందిజ్ ఉండ్రి వింతు తయార్ కిత్తార్. మార్తనె వింతుదు నవ్దరణి. బోజనముదిజ్ బన్ని మహిపరివెట లాజరుబా యేసువెట బస్తాన్. 3 నస్తవలె, మరియు ఉండ్రి సీసాదు మన్ని వాసన నూనె లాగితాదె, యేసు పాదముకాజ్ వాక్తాదె దనికొప్పుదాన్ వన్ని పాదముకు తెలితాద్. యా వాసన నూనె, నండొ కరీద్తిక. యాక జటమాంసి ఇని ఉండ్రి మొకదానె, తయార్ కిత్తిక. అది వాసన నూనె వాక్తివెలె, అయా ఇల్లు విజు నెగ్గి వాసనందాన్ నిండ్రితాద్.

4-5 అయావలె వన్ని సీసూర్ లోఇ ఒరెన్ఆతి ఇస్కరియొతు యూద, “ఎందానిజ్ యా వాసనం నూనె మూండ్రి వందిజ్ వెండి రుపాయ్జు పొర్చి అయా డబ్బు బీదాతి వరిజ్ సిఇతి?”, ఇజి వెచ్చాన్. యా ఇస్కరియొతు యుదనె, వెన్కా యేసుజ్ యుదురి అదికారిజ కీదు ఒపజెప్పికాన్. 6 ఏలు వాండ్రు యా లెకెండ్ వెప్తాక, బీదాతివరిజ్ నెగెండ సుడొజిన ఇజి ఆవిద్ గాని వాండ్రు డొజ వాండ్రు. వరి సేవపణి వందిజ్ లోకుర్ సీజని డబ్బు ఇడ్చి నన్ని వీండ్రి అస్త మనాన్. వాండ్రు వన్కాలోఇహాన్ వన్ని సొంత కర్చు వందిజ్ డొజ కిజి మహాన్. అందెజె వాండ్రు ఆహె వెచ్చాన్. 7 అందెజె యేసు, “దనిజ్బాద కిమాట్. నజి నమాది కిని దినమదాక అయాక దని బాన్మన్నిద్. 8 బీదదికార్ ఎన్సివలెబా మీ వెట మంజినార్. గాని నాను ఎలకాలం మీ వెట మన్ఎ”, ఇజి వెచ్చాన్. 9 అహిజ, యూదుర్జ లోఇ మంద లోకుర్, యేసు బెతానియదు మనాన్ ఇజి నెస్తారె అబె వాతార్. వారు యేసుజ్ సుడొదెజ్ఇజినె ఆవండ, వాండ్రు సాపుదాన్బత్తిస్తా లాజరుజ్ సుడొదెజ్బా వాతార్. 10-11 అందెజె వెరి పుజెరిజు, లాజరుజ్బా సప్తజ్ ఇజి ఆలోసనం కితార్. ఎందానిజ్ ఇహిజ, వన్నిజ్ జర్గితి దనివందిజ్ సుడొజి యూదురు నండొండార్, వరి పెద్దల్జ డిసి యేసుముస్సు. నమకం ఇడొజి మహార్. 12 మర్ననాండిజ్, పస్కపండోయ్దిజ్ యెరుసలెం పట్టమదు వాతి మందలోకుర్ యేసు యెరుసలెమదు వాజినాన్ ఇజి వెహార్. 13 అందెజె వారు ఈత మటజ్ అస్తారె, పట్టమదాన్ వెల్లి సోహార్. వన్నిజ్ ఎర్చు సొన్ని, “ఓనన్న ప్రబు సిత్తి అతికారమదాన్ వాజని వన్నిజ్ పొగిడిపిద్. ఇస్తాయేలు లోకురిజ్ ఏలుబడిః కినిరాజ్జ్ పొగిడిపిద్”, ఇజి డటం డేల్చి వెచ్చాన్.

14-15 “ఓ నీయోను గాల్సీ*, తియోలామాట్. ఇవిలోన్ మీ రాజు గాడొదె పిల్ల ముస్సు ఎక్క బస్తాండ్రి వాజినాన్†”, ఇజి దేవుణు మాటదు రాస్తి మన్నిలెకెండ్రి, యేసు ఉండ్రి గాడొదె పిల్లదిజ్ సుడొతాండ్రి దనిముస్సు బస్తాండ్రి వాజినాన్. 16 అయావలె వన్నిసీసూర్ యా జర్గితి వన్కాజ్ అర్దం కివితార్. గాని వెనుకయేసు సాజి, మరి బత్తిజి, దేవుణు మంజిని బాడిఃదు వన్ని వెట గొప్పు జాయదు మండ్రెజ్ దేవుణు వన్నిజ్ ఒతివెలెనె, యా జర్గితి నజతిజ్ వన్నివందిజ్ దేవుణు మాటదు ముజాలె రాస్త మనాద్ ఇజి అయాక వన్నిజ్ జర్గితాద్ ఇజి వారు అర్దం కితార్. 17 అహిజ, యేసు లాజరుజ్ దూకిదాన్ కూక్చి సాపుదాన్ మరి బత్తిస్తవలె వన్ని వెట మహి లోకుర్నె, లాజరుజ్ జర్గితిక సాటిసినార్. 18 యా లోకుర్ వెప్తా మాట విహారె, మంద లోకుర్వన్నిజ్ ఎర్చు సొన్సినార్. ఎందానిజ్ఇహిజ, వాండ్రు బమ్మాతి గొప్పు పణిజ్ కిత్రాన్ ఇజి వెహార్. 19 అయావలె పరిసయరుజు వరిజ్ వారె, “ఇదిలో, నండొ లోకుర్ వన్ని వెన్కా సొన్సినార్. మాటు కిజినికెజ్ ఇనికబా, వన్ని వెట సొన్ఎండ వరిజ్ ఆవీకిఉ”, ఇజి వర్గితార్.

యేసు వన్నిసాపు వందిజ్ వర్గిజినాన్

20 నస్తవలె, పస్క పండోయ్ కినివలె దేవుణుదిజ్ పొగిడిఃజి మాడిఃస్తాజ్ యెరుసలెమదు వాతి వరి లోఇ నెగెండార్ యూదురు ఆఇకార్ మహార్. 21 వారు గలిలయ ప్రాంతమది బెత్సయిదు పట్టమది పిలిపు డగ్రు వాతారె, “బాబు మాపు యేసుజ్ సుడొదెజ్ ఆస ఆజినామ్”, ఇజి వెచ్చార్. 22 పిలిపుజ్వెప్తాజ్, వాండ్రు ఆంద్రెయెజ్ వెచ్చాన్. వీరు రిపెర్ కూడ్చి యేసుజ్ వరి ఆస వెచ్చార్.

23-24 అందెజె యేసు వరివెట ఈహు వెప్తానాన్. “లోకు మరిసి ఆతి నజి దేవుణు వన్ని వెట వన్ని జాయిదు మండ్రెజ్ వాండ్రు మంజిని బాడిఃదు ఒని దినముకు డగ్రు ఆతె మనె. నాను నిజం వెప్తాన ‘ఉండ్రి గొదము గిడ బూమిదు అర్చి సాఎండ మహిజ, అది అయ లెకెండ్ మంజినాద్. గాని ఆ గిడ

* 12:14-15 12:14-15 జీకెరి 9:9 † 12:14-15 12:14-15 నీయోను గాల్సీ ఇజి ఇచ్చి వెప్తానిక యెరుసల్లెమదు మన్ని వరిజె.

సాతిజ నండ్ గిడెజ్ ఆనె. ²⁵ ఎయెన్ బా వన్ని సొంత పాణమ్ దిజ్ లావు ప్రేమిన్ జి, వాండ్రు వన్ని పాణం ఎలాకాలం దేవుణు వెట బత్కిని బత్కుదు మన్ ఎండ అయూక పాడు కిజినాన్. గాని ఎయెన్ బా యా లోకమ్ దు బత్కినివలె, వన్ని సొంత పాణమ్ దిజ్ లావు ప్రేమిన్ ఏండ మహిజ, వాండ్రు ఎలాకాలం బత్కిని బత్కు వందిజ్ వన్ని పాణం కాపాడిజినాన్. ²⁶ ఎయెన్ బా నజీ సేవ కితిజ, వాండ్రు నా సిసూ ఆదెజ్ వలె. నాను ఎంబె మంజినాన్, అబె నజీ సేవ కినికాన్ బా మంజినాన్. నజీ సేవ కిని వన్నిజ్ నా బుబ్బ గవ్వరం సీనాన్. ²⁷ మరిబా వాండ్రు వెప్పినాన్, “ఏలు నా పాణం బాద ఆజిన. నాను ఇన్నిక ఇండ్రెజ్? ఓ బా, నజీ వాని కన్టమ్ దాన్ నజీ తప్పిన అ, ఇజి వెవ్తాజా? సిలె. ఎందానిజ్ ఇహిజ, యా కన్టమ్ కు ఓరిస్సి వందిజె నాను వాత మన. ²⁸ ఓ బా, నీను గొప్ప పెరికి ఇజి లోకురిజ్ తోరె ఆ అ”, ఇజి వెవ్తాన్. అయావలె ఆగానమ్ దాన్ ఉండ్రీ జాటు వాతాద్. “నాను గొప్ప పెరికాన్ ఇజి నీను కితి పణిజాణిజ్ తోరె ఆత మన. నీను సాజి మరి బత్కినివలె నాను మరి అయూక తోరె ఆన”, ఇజి జాటుదు దేవుణు వర్గితాన్. ²⁹ నస్తవలె అబె నిహి మహి లోకుర్ అయూక విహారె, అయా జాటు ఆగానమ్ దు దీడితిక ఇజి వెవ్తార్. గాని మరి సెగెండార్, “దేవుణు మంజిని బాడిదాన్ దేవుణు దూత ఒరెన్ వన్ని వెట వర్గితాన్”, ఇహార్.

³⁰ అందెజె యేసు, “ఏలు మీరు జాటుదాన్ విహి మాటెజ్ నజీ దేవుణు పోక్తాన్ ఇజి మీరు నెస్తెజ్ మీ వందిజె వాతె. నా వందిజ్ ఆవద్. ³¹ ఇయేలె, దేవుణు యా లోకమ్ ది లోకురిజ్ తీర్పు సీని సమయం. ఇయేలె లోకమ్ ది అతికారి ఆతి సయ్యానుజ్ వన్ని అతికారమ్ దాన్ దేవుణు వెల్లి నెక్కి సమయం. ³² నజీ బూమి ముస్సుహాన్ సిలువాదు ఎకిస్సివలె, విజు దేసెమ్ కాణి లోకురిజ్, నాను నా డగ్గు తప్పిస్తాలె”, ఇజి వెవ్తాన్. ³³ వన్నిజ్ ఎలాగ నప్పార్లె ఇజి లోకురిజ్ తోరిస్తెజ్ వాండ్రు యా మాటెజ్ జర్గిని ముజాలె వెవ్తాన్.

³⁴ అయావలె మంద లోకుర్ వన్నిజ్, “దేవుణు మాటదు మాపు నద్ విజినాన్ గెద్ క్రీస్తు ఎలాకాలం బత్కినాన్లె ఇజి. మరి నీను ఎలాగ వెప్పిని, లోకు మరిసి ఆతి నిజి సిలువాదు ఎకిస్టెజ్ వలె ఇజి. అహిజ, నీను వెప్పిని లోకు మరిసి ఎలాగ మర్తికాన్.

³⁵ అందెజె యేసు, “వాండ్రె జాయి ఇజి వన్ని వందిజె వరిజ్ ఈహు వెప్పినాన్: “జాయి ఆతి నాను మీ వెట సెగం కాలమ్ నె మంజినలె. అందెజె సీకట్ వాని ముజాలె, జాయ్ ఆతి నాను మనివలె మీరు నజీ ఇన్టం ఆని వజ నడిచు. సీకట్ దు నడినికాన్ వాండ్రు ఎంబె సాన్ సిసాండ్రొ ఇజి వాండ్రు నెన్ వన్. ³⁶ అందెజె మీరు జాయ్ దు బత్కిజిని నా కొడోరె ఆదెజ్, జాయి ఆతి నాను మీ వెట మనివలె నజీ నమ్మిదు. వాండ్రు యా మాటెజ్ వెవ్తాండ్రె వరిబాణిజ్ సాహండ్రె వరిజ్ తోరింండ డాజ్ జి మహాన్. ³⁷ వాండ్రు నిసా గొప్ప బమ్మాతి పణిజ్ వరిఎద్దు కితిజ్ బా యూదురు లోక నండ్ లోకుర్ వన్నిజ్ నమిఎతార్. ³⁸ ప్రబుమా మాపు వెవ్తా మాటెజ్ ఎయెర్ నమ్మి తార్? ఎయెరిజ్ దేవుణు వన్నిసత్తు తోరిస్తాన్?”, ఇజి యెసయ ప్రవక్త వెవ్తా మాట పూర్తి ఆని వందిజె వారు నమ్మిఎతార్.

³⁹⁻⁴⁰ యెసయ ప్రవక్త మరి ఈహు వెవ్తా మనాన్, ‘వారు వరి కణకాణిజ్ తోవండ మండ్రెజ్ దేవుణు వరి కణకు గుడి: కితాన్. వారు వరిదాన్ అర్థం కిండ మండ్రెజ్ దేవుణు వరి మన్సును గటి కితాన్. వరిజ్ నెగెణ్ కిదిజ్ వారు నా డగ్గు రెండ మండ్రెజ్ నాను అయా లెకెండ కిత”, ఇజి. అందెజె వారు యేసుజ్ నమ్మిదెజ్ అట్ ఏండ ఆతార్. ⁴¹ యెసయ ఎందానిజ్ యా లెకెండ వెవ్తాన్ ఇహిజ, యేసు గొప్ప పెరికాన్ ఇజి వాండ్రు సుడత మహాన్. వాండ్రు వెవ్తా మాటెజ్ యేసు వందిజె వెప్పినె.

⁴² గాని యూదురు అదికారిజ్ లోక నండ్ డార్ యేసు ముస్సు నమకం ఇట్టార్. గాని వరినయేరు వరిజ్ ఇన్నిక కినార్ ఇజి తియెల్ ఆజి వారు యేసుజ్ నమ్మిజినాన్ ఇజి లోకుర్ ఎద్దు వెహ్ ఎతార్. వరిజ్ యూదురి మీటిజ్ ఇండ్రెణిజ్ వెల్లి కినార్ ఇజి తియెల్ ఆతార్. ⁴³ ఎందానిజ్ ఇహిజ, వారు దేవుణు వరిజ్ పొగిడి: దని ముస్సు లోకుర్ వరిజ్ పొగిడి: దెజ్ ఇజి నండ్ కోరితార్.

⁴⁴ మరి యేసు ఈహు డటం వెప్పినాన్, “నా ముస్సు నమకం ఇట్టికాన్ ఎయెన్ బా నజీనె ఆఎండ, నజీ పొక్తి వన్నిజ్ బా నమిజినాన్. ⁴⁵ నజీ సుడెజినికాన్ ఎయెన్ బా నజీ పొక్తి వన్నిజ్ బా సుడెజినాన్.

46 నజీ నమ్మినికాన్ ఎయెన్బా సీకట్దు బత్తిఎండ మంజిని వందిజ్ నాను జాయి లెకెండ్ లోకమ్దు వాత మన్ను.

47 నా మాటజ్ వెంజి అయావజ కిఇవన్నిజ్, తీర్పు సీజినాను సిక్కు సివి. ఎందానిజ్ ఇహిజ, ఆహె తీర్పు సీజి సిక్కు సిదెజ్ ఆవిద్ నాను అయా లోకమ్దాన్ వాతిక. గాని లోకురిజ్ రక్కిన్ని వందిజ్ వాత. 48 నజీ నెక్కి పొక్కి నా మాటజ్ వజ కిఇవన్నిజ్, వాండ్రు కిఇకాదె వన్నిజ్ ఎలాకాలం మన్ని సిక్కు సీనాద్. నాను వెహ్ని మాటజ్నె ఆకార్ దినమ్దు నాను మరజి వానివలె వన్నిజ్ తీర్పు సీనాద్. 49 ఎందనిజ్ ఇహిజ, నాను నా సొంత అతికారమ్దాన్ వెహ్నిక ఆవిద్. గాని నజీ పోక్కి నా బుబ్బునె, నాను ఇన్నిక వెహ్నిజ్, ఎలాగ వెహ్నిజ్ ఇజి ఆత్త సిత మనాన్. 50 వాండ్రు వెహ్ని ఆత్తెజ్ లోజిజినికాన్ ఎలాకాలం బత్తినాన్. అందెజె నా బుబ్బు నజీ వెహ్ని అ ఇజి వెహ్నికెజ్నె నాను వెహ్నిన.

13

యేసు వన్నిసిసూరిజ్ పాదమ్కు నొరజినాన్

1 నస్తవలె, పస్కు పండోయ్ కిని ముజాహి దినం. యా లోకం డిసి బుబ్బు డగ్రు సొండ్రెజ్ టయం ఆతాద్ ఇజి యేసు నెస్తాన్. వాండ్రు ఎస్తవలెబా వన్ని ముస్కు. నమకం ఇడ్డివరిజ్ ప్రేమిసి మహాన్. వాండ్రు సొనిదాక ప్రేమిసి నె మహాన్. 2 యేసుని వన్ని సిసూరు పొదోయ్ బోజనమ్దిజ్ బస్త మహార్. సిమొను మరిసి ఆతి ఇస్కరియొతు యూద మన్నుదు సయ్యూను ముజాలె ఉండ్రె ఆలోసన పుట్టిస్త మహాన్, యేసుజ్ సెఇవరి కీదు ఒపజెప్పెజ్ ఇజి. 3 బుబ్బు వన్నిజ్ విజు దనిముస్కు అతికారం ఒపజెప్పె మహాన్, ఇజి యేసు నెస్తాన్. వాండ్రు దేవుణుబాణిజ్ వాత మహాన్, దేవుణుడగ్రు సొన్నినాన్ ఇజిబా నెస్తాన్. 4 అందెజె వాండ్రు బీజనమ్దిజ్ బస్త మహిబాణిజ్ నిజితాండ్రె, వాండ్రు పిడేగితి మన్ని సొల్ప లాగితాండ్రె ఉండ్రె తువాలు నడుముదు తోహె ఆతాన్. 5 తోహండ్రె, ఉండ్రె పల్లెమ్దు ఏరు వాండ్రె వన్ని సిసూర్ పాదమ్కు నొరజి వన్ని నడుముదు తోహె తువాలదాన్ వరి పాదమ్కు తేలెజినాన్.

6 ఆహె, వాండ్రు సిమొను వెతురుడగ్రు వాతివలె, వాండ్రు, “ప్రబువా, నీను నా పాదమ్కు నొరెదెజ్ నుడేజినిదా?”, ఇజి వెన్బాతాన్. 7 అందెజె యేసు, “నాను ఇనిక కిజన ఇజి ఏలు నీను నెన్ఇ గాని వెనుక నీను అర్థం నెస్తిలె”, ఇజి వన్నిజ్ వెహ్ని. 8 అయావలె పేతురు, “సిల్లె, నీను నా పాదమ్కు ఎనెజ్బా నొరెదెజ్ ఆవిద్”, ఇజి వెహ్ని. దనిజ్ యేసు, “నాను నీ పాదమ్కు నొరెండమహిజ, నీను నా సిసూడు ఆఇ”, ఇజి వెహ్ని. 9 అయావలె సిమోన్ పేతురు, “అహిజ ప్రబువా, నా పాదమ్కునె ఆవిండ నా కికు, నా బుర్లబా నొరెఅ”, ఇజి వెహ్ని. 10 అందెజె యేసు, “ఏరుకెబతి వన్నిజ్ వన్నిబుడోల్ విజు నొరెదెజ్ అవ్సరం సిల్లెద్. వన్ని పాదమ్కునె నొరెదెజ్. ఎందానిజ్ ఇహిజ, పాదమ్కునె వెటనె డుల్లిఆనె. నా సిసూర్ ఆత్తి మీరు విజెదెరె సుబ్రం ఆతిదెరె. గాని ఒరెన్ ఆవిన్”, ఇజి వెహ్ని. 11 వన్నిజ్ సెఇవరి కీదు ఒపజెప్పెకాన్ ఎయెన్ ఇజి వాండ్రు నెసి మహాన్. అందెజె ‘మీరు విజెరె సుబ్రం ఆత్తికిదెరె ఆఇదెరె’, ఇజి వాండ్రు వెహ్ని.

12 వరి పాదమ్కు నొరెజి వీస్తి వెనా, వాండ్రు లాగితి ఇడ్డి వన్ని సొల్ప వ్డేగితాండ్రె, బోజనమ్దిజ్ బస్తమహి బాడిఃదు సొహాన్. సొహండ్రె వాండ్రు వరిజ్ వెన్బాజినాన్, “నాను ఏలు మిజి కితివణిది అర్థం మిజి తెలినాదా? 13 మీరు నజీ కూక్కివలె, ‘ఓ బోదకినికె’ ఇజినో, ‘ఓ ప్రబువా’ ఇజినో కూక్కినిదెరె. నాను బోదకినికానె. ప్రబునె. అందెజె మీరు కూక్కినికె తప్ప సిల్లెద్. 14 ఏలు మీ ప్రబు ఆతి, బోదకినికె ఆతి నాను నీ పాదమ్కు నొరెత మన్ను. అందెజె మీరుబా ఒరెన్ మరి ఒరెన్ వన్ని పాదమ్కు నొరెదెజ్. 15 నాను మిజి కితిలెకెండ్ మీరు బా కిని వందిజ్, అయా పణి ఎలాగ కిదెజ్ ఇజి నాను మిజి తోరెస్త మన్ను. 16 నాను నిజం వెహ్నిన, ఎమేణి పణి మన్నిసి బా వన్ని ఎజుమాని ముస్కు పెరికాన్ ఆవిన్. అయ లెకెండ్ ఎమేణి కల్పు తనికాన్బా వన్నిజ్ పోక్కి వన్ని ముస్కు పెరికాన్ ఆవిన్. 17 మీరు ఏలు యా నిజమాతి సజతిజ్ నెస్తిదెరె. అందెజె మీరు అయా లెకెండ్ కితిజి మీరు గొప్ప వారు”.

యేసు వన్నిజ్ సెఇవరికీదు ఒపజెప్పె దనివందిజ్ జర్గినిముజాలె వెహ్నినాన్

18 “మీరు పాపవంకాణిజ్ నొరె ఆత్రిదెర్ ఇజి నాను వెహ్నినిక మీ విజెరె వందిజ్ ఆవిద్. నాను ఏర్పాటు కితికార్ ఎలాగ మర్రికార్ ఇజి నాను నెన్ను, గాని, ‘నా వెట బోజనం ఉణిజి మహికాన్ నజి వండే ఇకాన్ ఆతాన్’, ఇజి దేవుణు మాటదు రాస్తి మన్ని మాట పూర్తి ఆదిజ్ నాను యా లెకెండ్ కిత్త. 19 అయాక జర్గినివలె, నానె మెనయ ఇజి మీరు నమినివందిజె, అయాక జర్గిని ముజాల, యెలె నాను వెహ్నిన. 20 నాను నిజం వెహ్నిన, ఎయెన్ బా నాను పోక్తి వన్నిజ్ డర్గు కితిజ, వాండ్రు నజి డర్గు కితి లెకెండ్. ఎయెన్ బా నజి డర్గు కితిజ, నజి పోక్తి వన్నిజ్ డర్గు కితి లెకెండ్”, ఇహాన్. 21 యేసు యాక వెహ్నివలె వన్ని మన్నుదు బాద అతండ్రె, “నాను నిజం వెహ్నిన, మీ లోఇ ఒరెన్ నజి సెఇవరి కీదు ఒపజెప్పాన్లె”, ఇజి వెహ్నిన్.

22 అయావలె వన్ని సిసూర్ ఎయెన్ వందిజ్ వాండ్రు ఈహు వెహ్నిన్ ఇజి అర్తం ఆఇతిజ్ ఒరెన్ మొకొం ఒరెన్ సుండె ఆజినార్. 23 బోజనమ్ దిజ్ బన్ని మహివలె, సిసూర్ లోఇ యేసు నండ్రె ప్రేమిస్తి సిసూ వన్ని డర్గునె బోజనమ్ దిజ్ బన్ని మహాన్. 24 సిమోన్ పేతురు వన్నిజ్ సయన్ కిజి, “ఎయెన్ వందిజ్ వాండ్రు వర్గిజినాన్ ఇజి వన్నిజ్ వెన్ బాఅ”, ఇజి వెహ్నిన్.

25 అందెజె అయా సిసూడు: యేసుజ్ రోన్ పే ఆజి, “ప్రబువా, వాండ్రు ఎయెన్?” ఇజి వెన్ బాతాన్. 26 అందెజె యేసు, “నాను యా రొటె ముక పులాదు ముడుక్కి ఎయెన్ నీనానొ వాండ్రె నజి ఒపజెప్పాన్”, ఇజి వెహ్నిన్. వెహ్నిండ్రె ముక పులాదు ముడుక్కి సిమొను మరిసి అతి ఇస్కరియొతు యుదిజ్ సిత్తాన్. 27 యూద అయా రొట్టెముక్క తిహి వెటనె సయతాను వన్ని లోఇ డుగితాండ్రె వన్ని మున్ను అతికారం కితాన్. అయావలె యేసు, “నీను కిదిజ్ ఒండే బిజినిక బేగి కిత”, ఇజి వెహ్నిన్. 28 గాని బోజనమ్ దిజ్ బన్నివరి లోఇ ఎయెరికెబా ఎందానిజ్ యేసు ఆహె వెహ్నిన్ ఇజి అర్తం ఆవితాద్. 29 వరి కర్సువందిజ్ మన్ని డబ్బు విజా యూద కీదునె మనె. అందెజె వండ్రియేదిజ్ కావాలిస్తికెజ్, సొన్ని కొల్త ఇజిను, సిలిజ బీదాతివరిజ్ డబ్బు సిఅ ఇజి వెహ్నినాన్ ను ఇజి సిసూర్ నెగొండార్ ఒడిబితార్. 30 యూద ఆ రొట్టెముక్క తిహి వెటనె వెల్లి సొహాన్. అక్క రెయు.

31 వాండ్రు సొహి వెన్కా యేసు ఈహు వెహ్నిన్, “లోకు మరిసి అతి నాను ఎసొ గొప్పు పెరికాన్ ఇజి లోకుర్ ఏలు నూణార్లె. దేవుణు ఎసొ గొప్పు పెరికాన్ ఇజి నా వెట నూణార్లె. 32 దేవుణు గొప్పు పెరికాన్ ఇజి లోకు మరిసి వెట తోరె ఆతిజ, లోకు మరిసి గొప్పు పెరికాన్ ఇజి దేవుణునె తోరిస్సాన్. అయాక వెటనె తోరిస్సాన్. 33 నాను ప్రేమిస్తి కిదెరా, కండెక్ సమయమనె నాను మీ వెట మంజన. మీరు నజి రెబానిదెర్, గాని యూదురు అదికారిజ నాను వెహ్ని లెకెండ్, “నాను సొని బాడిడు మీరు వాదెజ్ అట్ ఇదెర్” ఇజి ఏలు మీవెట వెహ్నిన.

34 నాను కొత్త ఆడ్ర మిజి సిజన. మీరు ఒరెన్ మరి ఒరెన్ వన్ని వెట ప్రేమిన్ అ, ఇజి. నాను మిజి ప్రేమిస్తి లెకెండ్ మీరు బా ఒరెన్ వన్ని వెట ఒరెన్ ప్రేమిస్టెజ్ వలె. 35 మీరు ఒరెన్ వన్ని వెట ఒరెన్ ప్రేమిస్తిజ, మీరు నా సిసూర్ ఇజి లోకుర్ విజెరె నెస్సార్.

36 అయావలె సిమోన్ పేతురు, “ప్రబువా, నీను ఎంబె సొన్ సిని?”, ఇజి వెన్ బాతాన్. వెన్ బాతిజ్ యేసు, “నాను ఏలు సొని బాడిడు నీను ఏలు వాదెజ్ అట్ ఇ. గాని వెన్కా వానిలె”, ఇజి వెహ్నిన్. 37 అందెజె పేతురు, “ప్రబువా, ఎందానిజ్ నాను ఏలు మీ వెట వాదెజ్ అట్ ఇ. నీ వందిజ్ సాదెజ్ బా నాను తయారనె”, ఇజి వెహ్నిన్. 38 అందెజె యేసు, “నా వందిజ్ సాదెజ్ బా నీను నిజం తయారనెనా? కొరు కెరిని ముజాల, ‘నీను నజి నెన్ ఏ’ ఇజి ముసార్ వెహ్నిలె”, ఇజి వెహ్నిన్.

14

యేసు వన్ని సిసూరిజ్ దయరం సీజినాన్

1 యేసు మరిబా వన్ని సిసూరిజ్ వెహ్నినాన్, “మీ మన్నుదు తియెల్ ఆజి బాద ఆమాట్. దేవుణు మున్ను నమకం ఇడ్రిదెర్. నా మున్నుబా నమకం ఇండెదు. 2 వరలోకమ్ దు నా బుబ్బు ఇండ్రె నండ్రె గదిజ్ మనె. అయ లెకెండ్ సిల్లెండ మహిజ, నాను మిజి వెహ్ని మరి. మిజి ఉండ్రి బాడి: తయారకిదిజ్ నాను అబ్బి సొన్నిన. 3 నాను సొన్ని మిజి ఉండ్రి బాడ్డి తయార కితి వెనుక, నాను మర్జివాజి నావెట నాను మంజినిబాన్ మీరుబా మండ్రెజ్, కూక్కు ఒనాలె. 4 నాను సొన్నిని బాడిడు సొండ్రెజ్ సరి మీరు నెస్సిదెర్”, ఇజి వెహ్నిన్.

బుబ్బుడగ్రు సొండ్రెజ్ నానెసరి ఇజి వెహ్సినాన్

5 అయావలె తోమా వన్నిజ్, “ప్రబువా, నీను ఎంబె సొన్నిని ఇజి మాపు నెన్వేవ్. అందెజె సరి మాపు ఎలాగ నెన్నెజ్ ఆనావ్?”, ఇజి వెహ్సాన్. 6 అందెజె యేసు వన్నిజ్, “నానె బుబ్బు డగ్రు సొండ్రెజ్ సరి. నానె బుబ్బు వందిజ్ నిజమాతికెజ్ తోరిసి నెన్పిస్సాన్. నానె ఎలాకాలం దేవుణు వెట బత్తిని బత్తు, సీనికాన్. నా వెటనె లోకుర విజెరె బుబ్బుడగ్రు సొనార్. 7 నాను ఎయెన్ ఇజి మీరు నెస్తి మహిదెరెఇహిజ, నా బుబ్బు ఎయెన్ఇజిబా మీరు నెస్తిదెరెమరి. ఏలుదాన్ మీరు వన్నిజ్నెస్తి మనిదెరె, సుడిఃతి మనిదెరె”, ఇజి వెహ్సాన్. 8 నస్తివలె పిలిపు, “ప్రబువా, బుబ్బెజ్ మజి తోరిన్అ. ఆకాదె మజి సాలు”, ఇజి వన్నిజ్ వెహ్సాన్.

9 అందెజె యేసు వన్నిజ్, నాను నిసొ కాలం మీ వెట మహా. మహిజ్బా నీను నజి నెన్ఇదా పిలిపు? నజి సుడఃతికాన్ ఎయెన్బా నా బుబ్బెజ్ సుడఃతి మనాన్. అయావలె బుబ్బెజ్మజి తోరిన్అ ఇజి ఎలాగ నీను వెహ్సెజ్ అట్సినె? 10 నాను నా బుబ్బు వెట కూడిఃతి మన. బుబ్బు నా వెట కూడిఃతి మనాన్ ఇజి నీను నమేఇదా? నాను మీ వెట వెహ్సినా మాటెజ్నా సొంత మాటెజ్ ఆఱ. గాని నా వెటకూడిఃతి మన్ని బుబ్బు బాణిజ్మాతికెజె అయాకెజ్. వాండ్రు వన్ని వణిజ్ నావెట కిబిసినాన్. 11 నాను నా బుబ్బు వెట కూడిఃతి మన, బుబ్బు నా వెట కూడిఃతి మనాన్ ఇజి నాను వెహ్సినానిక మీరు నమ్మిదు. సిలిజ, నాను కిజిని విజా బమ్మ ఆని వణిజ సుడఃతి అయాక నమ్మిదు. 12 నాను నా బుబ్బు డగ్రు సొన్నిన. అందెజె నజి నిజం నమ్మితికాన్, నాను కిజిని బమ్మ ఆని వణిజ్ వాండ్రు బా కినాన్. ఒబ, దనిజ్ఇంక లాపు వణిజ్ వాండ్రు కినాన్ ఇజి మీ వెట నిజం ఇక వెహ్సిన. 13 నా ఇష్టమ్దిజ్ కూడిఃతి మన్ని ఇనికబా మీరు లొస్తిజ, నాను అయాక కిన. బుబ్బు గొప్ప పెరికాన్ ఇజి లోకురిజ్ తోరిస్తెజె, మరిసి ఆతి నాను అయాక కిన. 14 నా ఇష్టమ్దిజ్ కూడిఃతి మన్ని ఇనికబా మీరు లొస్తిజ, నాను అయాక కిన.

15 మీరు నజి ప్రేమిస్తిజ, నా ఆడ్రెజ్మీరు వెనిదెరె. 16 నాను బుబ్బెజ్ లొస్సు. మీ వెట ఎలాకాలం మండ్రెజ్ మరి ఒరెన్ తోడః మంజిని వన్నిజ్ బుబ్బు మిజి సీనాన్. 17 వాండ్రు దేవుణు బాణిజ్ నిజమాతికెజ్ వెహ్సినా దేవుణు ఆత్మ. క్రీస్తుజ్ నమ్మిఇకార్ ఒరెన్ తోడః మంజిని వన్ని వజ వన్నిజ్ డగ్రు కిదెజ్ అట్వెరె. ఎందనిజ్ ఇహిజ, వారు వన్నిజ్ రెబావెరె. వన్నిజ్ నెన్వెరె. గాని మీరు వన్నిజ్ నెస్తిదెరె. ఎందానిజ్ ఇహిజ, వాండ్రు మీ వెట మంజినాన్. మీ లొఇ మంజినాన్. 18 నాను మిజి డిఃసి సొనివలె, మిజి దిక్కు, సిలి వరి లెకెండ్డిఃన్వ. నాను మర్జి మీ డగ్రు వానాలె. 19 నెగం కాలం వెన్యా, నజి నమ్మిఇకార్ నజి మరి తోవెరె. గాని మీరు నజి సూణిదెరె. నాను బత్తిజిన. అందెజె మీరుబా బత్తినిదెరె. 20 నాను నా బుబ్బువెట కూడిఃతి మన్ను, మీరు నా వెట కూడిఃతి మనిదెరె. నాను మీ వెట కూడిఃతి మన ఇజి దేవుణు ఆత్మ మీ నడిఃమి మండ్రెజ్వాని దినమ్దు మీరు నెస్తిదెరె. 21 నా ఆడ్రెజ్ వెంజి అయావజ కినికానె నజి ప్రేమిస్సికాన్. నజి ప్రేమిస్సి వన్నిజ్ నా బుబ్బు ప్రేమిస్సాన్. నాను వన్నిజ్ప్రేమిసి వన్నిజ్తోరె ఆన్”, ఇజి యేసువెహ్సాన్.

22 నస్తివలె ఇస్కరియొతు యూద ఆజ మరి ఒరెన్యుద, “ప్రబువా నీను లోకురిజ్ విజెరిజ్ తోరెఆవెండ, ఎలాగ నీను మజి తోరె ఆనిలె?”, ఇజి వెన్బాతాన్. 23 అందెజె యేసు, “ఒరెన్ నజి ప్రేమిస్తిజ, వాండ్రు నా మాటెజ్ వినాన్. అయావలె నా బుబ్బు వన్నిజ్ ప్రేమిస్సాన్. నా బుబ్బుని నాను వన్నిడగ్రు వాజి వన్నివెట మంజినావ్. 24 నజి ప్రేమిస్ఇకాన్, నా మాటెజ్ వినేవేన్. మీరు వెంజిని యా మాటెజ్నా సొంత మాటెజ్ ఆఱ. నజి షొక్తి నా బుబ్బువినె.

25 నాను మీవెట మంజినె యా మాటెజ్ వెహ్సా మన్ను. 26 నా బుబ్బు, నా బదులు తోడః మంజిని వన్నిజ్ ఇహిజ, దేవుణు ఆత్మదిజ్ షొక్తివెరె, వాండ్రు మిజి దేవుణు వందిజ్ విజా సజతిజ్ నెన్పిస్సాన్. నాను మిజి వెహ్సా విజా వన్యాజ్ ఎత్తు కిబిసి మంజినాన్. 27 నాను మిజి డిఃసి సొన్సిన. గాని మీరు సమాదనమ్దాన్ మంజినిదెరె. అయా సమాదనం నా బాణిజ్ వాజినాద్. నజి నమ్మిఇ లోకురిజ్ మన్ని సమాదనం ననికాద్ ఆవేదనా బాణిజ్ వాజినకాద్. మీ మన్నుదు విసారిసి బాద ఆమాట్. మీరు తియెల్ ఆమాట్.

28 ‘నాను సొన్సిన. మర్జి మీ డగ్రు వానాలె’, ఇజి నాను వెహ్సా మాట మీరు విహిదెరె. నా బుబ్బు నజి ఇంక పెరికాన్. అందెజె మీరు నజి నిజం ప్రేమిస్తిజ, వీండ్రు బుబ్బు డగ్రు సొన్సినాన్ఇజి సరెద

అజినెదెర్. ²⁹ యాకెజ్ జగ్గినవలె, నాను వెహ్తాకెజ్ నిజం ఇజి మీరు నమ్మిని వందిజె, అయాకెజ్ జగ్గిని ముజాలె, ఇయేలె నాను మిజి వెహ్తా మన్ను. ³⁰ మరి నండొ నమయం మీ వెట వర్గిదెజ్ నాను అట్వలె. ఎందానిజ్ ఇహిజ, యా లోకమ్ ది అతికారి ఆతి నర్తాను వాజినాన్. నా మున్ను, వన్నుజ్ ఇన్ని అతికారం సిల్లెద్. ³¹ గాని, నాను నా బుబ్బెజ్ ప్రేమిన్ను. అందెజె వాండ్రు వెహ్సినికెజ్ విజు అయావజ నాను కిజిన ఇజి లోకమ్ దికార్ నెన్దెజ్ వలె. రదు, ఇబ్బెణిజ్ సొనాల్”, ఇజి వెహ్తాన్.

15

¹ నాను నిజమాతి ద్రాక్కుబడ్డఉదిజ్ మొదొల్. నా బుబ్బె పణికినికాన్. ² నా వెట కూడితి మన్ని పట్టు, అన్ ఇ విజు కొనెజ్ వాండ్రు కత్ నాన్. పట్టు అన్ ని విజు కొనెజ్, మరి నండొ పట్టు, అన్ ని వందిజ్ తెహ్సాన్. ³ నాను మీవెట వెహ్తా మాటెజ్, మీ పాపమ్ కాణిజ్ సుబ్బరం కిత్రె మనె. ⁴ నాను మీ వెట కూడిజి మంజినిలెకెండె మీరు నా వెట కూడిజినె మండ్రు. ఇన్ని కొనెజ్ బా బడ్డదు మన్ ఏండె మహిజ, అవి పట్టు, అన్ ఉ. పట్టు, అన్ దెజ్ ఇహిజ, అవి బడ్డదు మండ్రెజ్ వలె. అయాలెకెండె, నావెట కూడితి మహిజనె, మీరు పట్టు, అన్ నిదెర్.

⁵ నాను ద్రాక్కుబడ్డఉదిజ్ మొదొల్. మీరు కొనెజ్. ఎయెన్ బా నా వెట కూడిజి మంజి, నాను వన్ని వెట కూడితి మహిజ, వాండ్రు నండొ పట్టు, అన్ సాన్. నాను సిల్లెండె, నజి ఇన్దొ ఆతి నెగ్గికెజ్ ఇనికెజ్ బా మీరు కెదిజ్ అట్ ఇదెర్. ⁶ వెల్లి విసిర్తి ఉండ్రె కొనె వహ్తా లెకెండె, నా వెట కూడిజి మన్ ఇకాన్ మనాన్. వాండ్రు వెల్లి ఆజి వహ్సాన్. నన్ని కొనెజి, లోకుర్ కుంబ కిజి సుర్ నార్. ఆకెజ్ వెయెన్. ⁷ మీరు నావెట కూడిజినె మంజి నాను వెహ్తా మీ లో ఇ మహిజ, ఇనికబా మీరు దేవుణుదిజ్ లొస్తు. వాండ్రు అయాక మిజి సీనాన్. ⁸ మీరు నండొ పట్టు, అన్ ఆహె నా సిసూర్ ఇజి తోర్ ఆతిజ, నా బుబ్బె గొప్ప పెరికాన్ ఇజి లోకురిజ్ తోరిసినిదెర్.

⁹ నా బుబ్బె నజి ప్రేమిన్ను లెకెండె, నాను మిజి ప్రేమిన్ను. నాను మిజి ప్రేమిన్ను వందిజ్, నా వెట కూడిజినె మండ్రు. ¹⁰ నాను నా బుబ్బె వెహ్తా ఆడ్రెజ్ లోజెత మన. వాండ్రు నజి ప్రేమిన్నాన్. అయాలెకెండె మీరు నాను వెహ్తా ఆడ్రెజ్ లోజెతిజ, నాను మిజి ప్రేమినినె మంజిన. ¹¹ నజి మన్ని సర్ద మిజి బా మండ్రెజ్, మీ సర్ద పూర్ ఆదెజ్, ముజాలె వెహ్తా యా మాటెజ్ నాను మిజి వెహ్తా మన్ను. ¹² నాను మిజి ప్రేమినివజ, మీరు ఒరెన్ వన్ని వెట ఒరెన్ ప్రేమిని మండ్రు ఇజినె నా ఆడ్ర. ¹³ ఒరెన్ వన్ని కూలెజి వందిజ్ వన్ని సొంత పాణం సీనికాదె నండొ ప్రేమ. దిని ఇంక మిస్తి మరి ప్రేమ సిల్లెద్. ¹⁴ నాను ఆడ్ర సెతిక మీరు కితిజ, మీరు నా కూలెజె. ¹⁵ ఒరెన్ పణికినికాన్, వన్ని ఎజుమాని కిని పణిజ్ నెన్ ఎన్. అందెజె నాను మరి ఎనెజ్ మిజి పణికినికార్ ఇజి కూక్ ఏ, గాని కూలెజ్ ఇజి కూక్ మన. ఎందనిజ్ ఇహిజ, నాను నా బుబ్బె బాణిజ్ విహికెజ్ విజు మిజి వెహ్తా మన్ను. ¹⁶ మీరు నజి ఏర్ పాటు కెదెర్. గాని నాను మిజి ఏర్ పాటు కిత్ర. పట్టు, అన్ నివజ, మీరు సొన్ని లోకురిజ్ సువార్త వెహ్సి దేవుణు దరొట్ మహ్సి తని వందిజె నాను మిజి ఏర్ పాటు కితానె పొక్కిన. మీరు అన్ పట్టు, ఎలాకాలం మంజినాద్. అయావలె మీరు నా ఇన్దెమిదిజ్ కూడితి మన్ని ఇనికబా బుబ్బెజ్ లొస్తిజ, వాండ్రు సీనాన్. ¹⁷ మీరు ఒరెన్ వన్ని వెట ఒరెన్ ప్రేమిన్దెజ్ ఇజినె నాను సీజిని ఆడ్ర.

¹⁸ యా లోకమ్ దు మన్ని దేవుణుదిజ్ దూసిన్సికార్, మిజి దూసిన్సిజ, మీరు ఒడిబిదు వారు మిజి దూసిన్సి ముజాలె నజి దూసిన్సార్ ఇజి. ¹⁹ మీరు యా లోకమ్ దు మన్ని దేవుణుదిజ్ దూసిన్సి వరిలొ ఇ మన్ని కెదెర్ ఇహిజ, వరి సొంత లోకుర్ వజ వారు మిజి ప్రేమిన్సార్ మరి. గాని నాను వరి లెకెండె మీరు మన్ ఏండె, మిజి ఎర్లిన్. అయావలె, మీరు వరి లో ఇ మన్ని కెదెర్ ఆకెదెర్. అందెజె వారు మిజి దూసినినార్. ²⁰ ఎమేణి పణిమణినిబా వన్ని ఎజుమాని మున్ను, పెరికాన్ ఆప్ వన్*, ఇజి నాను వెహ్తా మాట మీరు ఎత్తు కిదు. వారు నజి హిమ్మెజ్ కితార్ ఇహిజ, మిజి బా హిమ్మెజ్ కిని. వారు నా మాటెజ్ లోజెతార్ ఇహిజ, మీ మాటెజ్ బా లోజెనార్. ²¹ మీరు నజి నమ్మితి వందిజ్ వారు యా లెకెండె విజు మిజి కిని. ఎందానిజ్ ఇహిజ, వారు నజి పొక్కి వన్నిజ్ నెన్ ఏర్. ²² నాను వాజి దేవుణు వందిజ్ నిజమాతికెజ్ వరిజ్ వెహ్ ఏండె మంజినిక ఇహిజ, వారు పాపమ్ కు కితార్ ఇజి దేవుణు వరిజ్ సుడెవితాన్ మరి. అహిజ, ఏలు వారు వరి పాపమ్ కాణిజ్ తప్తె ఆదెజ్ అట్ ఏర్. ఎందానిజ్ ఇహిజ,

* 15:20 15:20 13:16 సుడెదు

నాను వరిజ్ వెప్తా మన్ను. ²³ నజీ దూసిస్సికాన్ నా బుబ్బాజ్ దూసిసినాన్. ²⁴ ఎయెన్ బా కిఇ బమ్మాని పణిజ్ నాను వరి నడిమి కివిండ మంజినిక ఇహిజ, వారు పాపమకు కితార్ ఇజ దేవుణు వరిజ్ నుడేవితాన్ మరి. గాని ఏలు వారు యా బమ్మ అని పణిజ్ నుడూత మనార్. అహిజ్ బా, నజీ ని నా బుబ్బాజ్ వారు దూసిస్తి మనార్. ²⁵ ‘ఇని కారణంబా సిల్లెండ వారు నజీ దూసిస్టార్’, ఇజ దేవుణు మాటదు రాస్తి మన్ని మాట పూర్తి అదెజె యా లెకెండ వారు కిజనార్.

²⁶ నాను మీ డగ్రు తోడుః మంజిని వన్నిజ్ ఇహిజ, దేవుణుబాణిజ్ నిజమాతికెజ్ వెప్పి తోరిస్సి దేవుణు ఆత్మెజ్ పోక్కు. వాండ్రు బుబ్బ బాణిజ్ మీ డగ్రు వానాన్. అయావలె నా వందిజ్ విజు వాండ్రు వెప్పాన్. ²⁷ నాను సేవ మొదొల్సి బాణిజ్ మీరు నావెట మనిదెర్. అందెజె మీరు బా నా వందిజ్ విజెరిజ్ వెప్తాజ్ వలె.

16

¹ “మిజి ఇమ్ నెజ్ కినివలె, మీరు నమకం దాన్ డిఃన్ ఏండ మంజిని వందిజె, మిజి దూసిస్సికార్ కిని సజతిజ వందిజ్ నాను వెప్తా. ² వారు మిజి యూదురి మీటిజ్ ఇల్లాణిజ్ వెల్లి కినార్. మిజి సప్పికాన్ ఎయెన్ బా, వాండ్రు దేవుణుదిజ్ సర్ద కిజిన ఇజి ఒడిఃబిని కాలం వాజినె. ³ వారు నన్నికెజ్ కినార్. ఎందనిజ్ ఇహిజ, బుబ్బాజ్ నో నజీనో నెన్ ఏర్. ⁴ అయ కాలం వానివలె, నాను దినివందిజ్ వెప్తా మన ఇజి మీరు ఎత్తుకిని వందిజ్ నాను యాక మీ వెట వెప్తా మన. నాను యాకెజ్ ముజాలె మిజి వెప్తాజ్ సిలె. ఎందానిజ్ ఇహిజ, నాను మీవెట మహా”.

దేవుణు ఆత్మ కిని పణిజ్

⁵ “ఏలు నాను నజీ పోక్తి వన్ని డగ్రు సొన్నిన. గాని మీ లోఇ ఎయెన్ బా, ‘నీను ఎంబె సొన్నిని?’, ఇజి నజీ వెన్ బా ఇదెర్”. ⁶ నాను యా సజతిజ్ మిజి వెప్తా మనిజ్, మీ మన్నును దుకమ్ దాన్ నిండ్రిత మనాద్. ⁷ గాని నాను నిజం మీ వెట వెప్పిన, మిజి మేలు వాని వందిజె నాను సొన్నిన. నాను సొన్ ఏండ మహిజ, తోడుః మంజినికాన్ మీ డగ్రు రెప్పెన్. గాని నాను సొహిజ, నాను వన్నిజ్ మీ డగ్రు పోక్కు. ⁸ వాండ్రు వాజి, దేవుణుదిజ్ నమ్మిఇవరిజ్ పాపం ఇహిజ ఇన్నిక ఇజి, నాను నీతి నిజాయితి మన్నికాన్ ఇజి, దేవుణు సీని ఎలాకాలం మన్ని సిక్కు ఇన్నిక ఇజి కసితం వెప్పి తోరిస్సాన్. ⁹ వారు పాపం కిత్తమనార్ ఇజి వాండ్రు కసితం వెప్పి తోరిస్సాన్. ఎందానిజ్ ఇహిజ, వారు నజీ నమ్మి ఏర్. ¹⁰ నాను నీతి నిజాయితి మన్నికాన్ ఇజి వాండ్రు కసితం వెప్పి తోరిస్సాన్. ఎందనిజ్ ఇహిజ, నాను నా బుబ్బ డగ్రు సొన్ సిని. మీరు నజీ మరి తోఇదెర్. ¹¹ దేవుణు సీని ఎలాకాలం మన్ని సిక్కు ఇన్నిక ఇజి వరిజ్ కసితం వెప్పి తోరిస్సాన్. ఎందానిజ్ ఇహిజ, దేవుణుదిజ్ నమిఇ వరి మున్ను. అతికారం కిని నయ్ తానుజ్, దేవుణు ఎలాకాలం మన్ని సిక్కు సిత్తమనాన్.

¹² ‘నజీ మరి నండె మిజి వెప్తాజ్ మనాద్, గాని ఏలు మీరు నసా అర్దం కిదెజ్ అట్ ఇదెర్. ¹³ గాని దేవుణు వందిజ్ నిజమాతికెజ్ నెన్ పిస్సి దేవుణు ఆత్మ వానివలె, వాండ్రు దేవుణు బాణిజ్ వాజిని విజు నిజమాతికెజ్ మీరు నెస్సెజ్ మిజి నడిఃపిసినాన్. వాండ్రు వన్ని సొంతదిక ఇనికబా వెహ్ ఎన్. గాని బుబ్బ వెప్పినికెజ్ వెంజి మిజి వెప్పాన్. వాండ్రు జర్గిని వన్కాజ్ వందిజ్ మిజి వెప్పాన్. ¹⁴ నాను వెప్పిని నిజమాతికెజ్ వెంజి, అయాక మిజి వెప్పాన్. అయ లెకెండ నాను గొప్పు పెరికాన్ ఇజి మిజి తోరిస్సాన్. ¹⁵ బుబ్బాజ్ మన్నికెజ్ విజు నాదినె. అందెజె నాను వెప్తా, నాను వెప్పిని నిజమాతికెజ్ వాండ్రు వెంజి, అయాక మిజి వెప్పాన్ ఇజి. ¹⁶ నెగం రోస్కు వెన్కా, నాను సొన. మీరు నజీ మరి తోఇదెర్. మరి నెగం రోస్కు వెన్కా, మీరు నజీ నూణిదెర్”.

¹⁷ వన్ని సినూర్ లోఇ నెగెండార్ ఒరెన్ వెట ఒరెన్ ఈహు వెప్తాన్, “నెగం కాలం వెన్కా మీరు నజీ తోఇదెర్. మరి నెగం కాలం వెన్కా మీరు నజీ నూణిదెర్. నాను నా బుబ్బ డగ్రు సొన్ సిని. అందెజె మీరు నజీ తోఇదెర్”, ఇజి వాండ్రు వెప్పిని తరదం అర్దం ఇనిక? ఇజి. ¹⁸ “‘నెగం కాలం’ ఇజి వాండ్రు వెప్పిని దని అర్దం ఇన్నిక? వాండ్రు వెప్పిని దనిజ్ మజి అర్దం రెప్పెండ ఆజినాద్”, ఇజి మరి వర్గిజెని మహార్.

¹⁹ దినివందిజ్ వారు వన్నిజ్ వెన్ బాదెజ్ కోరిజినార్ ఇజి యేను నెస్తాండ్రె, ఈహు వరిజ్ వెప్పిన్నాన్, “నెగం కాలం వెన్కా మీరు నజీ తోఇదెర్. మరి నెగం కాలం వెన్కా మీరు నజీ నూణిదెర్”, ఇజి

నాను వెళ్లి దని అర్థం ఇన్నిక ఇజినా మీరు ఒరెన్దిజ్ ఒరెన్ వెన్బాజినిదెర్? 20 మీరు దుకం కిజి అడఃబానిదెర్ గాని దేవుణుదిజ్ దూసిస్సికార్ సరద ఆనార్. మీరు దుకం కినిదెర్ గాని మీ దుకం వెనుక సరదమనాద్ ఇజి నాను మీ వెట నిజం వెప్పొన. 21 ఉండ్రీ బోదలి ఏరుకబదెజ్ నోపిదిజ్ అడఃబానాద్. ఎందానిజ్ ఇహిజ, దనిజ్ నెగెండ ఆదెజ్ కాలం ఆతాద్. గాని దన్నికోడోః పుట్టిజ, లోకమ్దు ఒరెన్పుట్టాన్ ఇజి సరదదాన్ అయా బాదెజ్ అది ఎత్తు కివిద్. 22 అయాలెకెండె మిజి బా. మీరు ఏలు దుకం ఆనిదెర్. గాని నాను మర్జి వానివలె మిజి మరె సూణ. అయావలె మీరు సరద ఆనిదెర్. అయా సరద ఎయెన్బా మీ బాణిజ్ లాగ్ దెజ్ అటెవెన్. 23 నాను నిజితి సాహి వెన్కా, మీరు ఇనికబా నెస్టెజ్ నజి వెన్బాఇదెర్. ఎందానిజ్ ఇహిజ, దేవుణు ఆత్మ మిజి నెన్పిస్సాన్. నా ఇస్టమ్దిజ్ కూడితి మన్నికెజ్ ఇన్నికబా మీరు బుబ్బెజ్ లోస్తిజ, వాండ్రు అయాక సీనాన్, ఇజి నాను నిజం మీ వెట వెప్పొన. 24 ఏలుదాక నా ఇస్టమ్దిజ్ కూడితి మన్నికెజ్ ఇన్నికబా లోన్ ఇతిదెర్. మీ సరద పూర్తి ఆని వందిజ్ లొస్తు. మిజి దోహ్కానాద్.

25 నాను మిజి కతవజ యా సజతిజ్ నెన్పిస్త మన. గాని కతవజ నెన్పిన్ ఏండ, బుబ్బ వందిజ్ మిజి టెట అర్థం ఆనిలెకెండె వెప్పొ కాలం వాజినాద్. 26 అయా కాలమ్దు, నా ఇస్టమ్దిజ్ కూడితి మన్నికెజ్ మీరు లొస్సిదెర్. మీరు లొస్తికెజ్ వరిజ్ సిఅ ఇజి బుబ్బెజ్ వెహ్కా ఇజి నాను వెహ్వ. 27 ఎందానిజ్ ఇహిజ, బుబ్బనె మిజి నండో ప్రేమిస్సాన్. మీరు నజి ప్రేమిస్సిదెర్. నాను బుబ్బ బాణిజ్ వాత ఇజి మీరు నమిజినిదెర్. అందెజి వాండ్రు మిజి నండో ప్రేమిస్సాన్. 28 నాను బుబ్బ బాణిజె యా లోకమ్దు వాత. ఏలు నాను యా లోకం డిసి మర్జి బుబ్బ డగ్రు సొన్సిన్. 29 నన్సివలె వన్ని సినూర్, “ఇదిలో, వానివలె నీను కత లెకెండె ఆవిండ, అర్థం ఆని లెకెండె వెప్పొని. 30 నీను విజా నెస్తికి ఇజి ఏలు మాపు నెసినాప్. ఎయెర్ బా నిజి వెన్బా ఎండ ముజాలె, వారు ఒడఃబిజినికెజ్ నీను నెసిని ఇజి మాపు నెసినాప్. అందెజి నీను దేవుణు బణిజ్ వాతికి ఇజి మాపు నమిజినాప్”, ఇజి వెహ్కార్.

31 అందెజి యేసు, “మీరు ఏలు నమిజినిదెరా? 32 ఇదిలో, మీరు మీ ఇల్కాజ్ నెద్రిజి సాని కాలం వాజినాద్. అయాక ఏలె వాత మనాద్. మీరు నజి డిసి సొనిదెర్లె. నాను ఒరెనె ఆన. గాని నాను ఒరెనె ఆవ. నా బుబ్బ నావెట మనాన్. 33 మీరు నా వెట కూడితి మన్నిదెర్. అందెజి మీరు నమాదనం దాన్ మండ్రెజ్ నాను యా సజతిజ్ మిజి వెహ్కా మన. యా లోకమ్దు మిజి కన్టమ్కు బాదెజ్ మనె. గాని దయెరమ్దాన్ మండ్రు. నాను యా లోకమ్దు మన్ని దేవుణుదిజ్ దూసిస్సివరిజ్ గెలస్త మన్ను.

17

యేసు వన్నివందిజ్ పార్దనం కిజినాన్

1 యా మాటెజ్ వెప్పొ వీస్సాండ్రె, యేసు మున్ను పరలోకం దరోట్ బేసి ఈహు పార్దనం కిజినాన్. “ఓ బా, నాను సాదెజ్ నీను ఏర్ పాటుకితి కాలండగ్రు ఆత మనాద్. నీను గొప్పపెరికి ఇజి నీ మరెన్ ఆత్తి నాను తోరిస్సి వందిజ్ ని మరెన్ ఆత్తి నాను గొప్పపెరికాన్ ఇజి నీను తోరిన్ అ. 2 నీను నజి సితి లోకుర్ విజెరిజ్ ఎలాకాలం దేవుణువెట బత్తినిబత్తు. నాను సీనివందిజ్, నీను లోకుర్ విజెరె మున్ను. నజి అతికారం సిత్తి. 3 ఒరెండ్రె నిజమాతి దేవుణుఆతి నిజిని, నీను యా లోకమ్దు పొక్తి యేసు క్రిస్తుజ్ నెస్తిజనె ఎలాకాలం దేవుణువెట బత్తినిబత్తు. మనాద్. 4 నాను కిదెజ్ ఇజి నీను నజి సిత్తి పణివిజా నాను పూర్తి కిజి నీను గొప్పపెరికి ఇజి బూమిమున్ను. నాను తోరిస్త. 5 ఏలు ఓ బా, లోకం నీను పుటిస్సి ముజాలె నివెట నాను మహివలె నజి గవరం కితిలెకెండె, ఏలు నీ ఏర్దు నజి గవరం కితి.

యేసు సినూర్ వందిజ్ పార్దనం కిజినాన్.

6 నీను నజి సితివరిజ్ నాను నీ వందిజ్ వెప్పొ తోరిసి నెప్పొస్త. మీరు దేవుణుదిజ్ దూసిస్సి ననికార్ ఆవిర్. మీరు నీ వారు. నీను వరిజ్ నజి సిత్తి. నీ మాటెజ్ వారు లోజెతార్. 7 నీను నజి సిత్తి విజా నీ బాణిజె వాతమనె ఇజి ఏలు వారు నెస్టార్. 8 ఎందానిజ్ ఇహిజ, నీను నజి సిత్తి మాటెజ్ నాను వరిజ్ సిత. వారు అయకెజ్ నమిజతార్. నాను నీ బాణిజ్ వాతికాన్ ఇజి వారు అనుమానం సిల్లెండ నెస్టార్. నీనె నజిపొక్తి ఇజి వారు నమిజత మనార్. 9 నాను యా సినూర్ వందిజ్ పార్దనం కిజిన. యా లోకమ్ది లోకుర్ విజెరె వందిజ్ నాను పార్దనం కివి. గాని నీను నజి సితి విరివందిజ్ పార్దనం కిజిన. ఎందానిజ్ ఇహిజ, మీరు నీ వారు. 10 నా వారు విజెరె నీ వారు. నీ వారు విజెరె నా వారు. అయలెకెండె

వారు బత్తి నారె, నాను గొప్పపెరికాన్ ఇజి వారు తోరిసినార్. 11 ఏలు నాను నీ డగ్రు వాజిన. నాను మరి యా లోకమ్దు మన్వీ. గాని వీరు ఇబ్బై మంజినార్. ఓ నెగ్గి బుబ్బు, మాటు ఉండ్రె ఆతి లెకెండే వీరుబా ఉండ్రె ఆదెజ్, నీను నజీ సీతి సత్తుదాన్ వరిజ్ కాపాడెఱ. 12 నాను యా లోకమ్దు వరి వెట మహివలె, నీను నజీ సీతి సత్తుదాన్ వరిజ్ కాపాడెఱ. నాను వరిజ్ నెగ్రెండ తప్రిసి మహా. వరి లోక ఎలాకాలం నాసనం ఆదెజ్ మన్నికాన్ ఆవీండ, మహికార్ విజెరె ఎలాకాలం నాసనం ఆవతార్. దేవుణు మాటదు రాస్తి మనికెజ్ పూర్తి ఆదెజ్ యాకెజ్ విజా జరిదెజ్ వలె.

13 నాను ఏలు నీ డగ్రు వాజిన. నజీ మన్ని సర్ద వరి మన్నుదుబా నిండ్రు మంజిని వందిజె, నాను యా లోకమ్దు మన్నివలెనె యా సజతిజ్ వెస్సిన. 14 నాను వరిజ్ నీ మాటెజ్ సిత మన్ను. యా లోకమ్దు మన్ని దేవుణుదిజ్ దూసిస్సికార్ వరిజ్ దూసిస్తార్. ఎందానిజ్ ఇహిజ, నాను లోకమ్దికాన్ ఆఇలెకెండ, వారు బా లోకమ్దికార్ ఆవర్. 15 నీను వరిజ్ యా లోకమ్దాన్ ఒఱ ఇజి నాను పార్దనం కివీ గాని సయ్యాను బాణిజ్ వరిజ్ కాపాడెఱ ఇజినె పార్దనం కిజిన. 16 నాను లోకమ్దికాన్ ఆఇలెకెండ, వారు బా లోకమ్దికార్ ఆవర్. 17 నీ నిజమాతి మాటెజ్ నెన్ పిసి, వారు దేవుణువందిజ్ కేట ఆతిలెకెండ వరిజ్ ఇడెఱ. నీ మాటెజ్ నిజమాతి మాటెజ్. 18 నీను నజీ యా లోకమ్దు పోక్తి లెకెండ, నాను వరిజ్ లోకమ్దు పోక్తిన. 19 నిజమాతి మాట నెసి వారు వరిజె నీ కీదు ఒవజెప్పిని వందిజ్, నాను వరి వందిజ్ ని కీదు ఒవజెవె ఆజిన.

యేసు దేవుణుదిజ్ నమ్మితివరిజ్ విజెరెవందిజ్ పార్దనం కిజినాన్

20-21 ఓ బా, నాను కిజినె పార్దనం వరి వందిజె ఆవ. వరి మాటెజ్ వెంజి నమ్మిదెజ్ మన్ని వరిజ్ విజెరె వందిజ్ నాను పార్దనం కిజిన. ఎందానిజ్ ఇహిజ, నీను నా వెట కూడెజి మంజిని లెకెండ, నాను నీ వెట కూడెజి మంజిని లెకెండ వారు విజెరె ఉండ్రె ఆదెజ్. నీను నజీ పోక్తి మన్ని ఇజి లోకమ్ది లోకుర్ విజెరె నమ్మినివందిజ్ వారు మావెట కూడెజి మనీర్. 22 నాను పెరికాన్ ఇజి నీను నజీ గవరం నాను వరిజ్ సిత మన. మాటు ఉండ్రె ఆతి లెకెండ వారుబా ఒండ్రె ఆదెజె నాను సిత. 23 వారు పూర్తి ఉండ్రె ఆనివందిజ్ నాను వరివెట కూడెఱ మన. నీను నా వెట కూడెఱ మన్ని. నీను నజీ పోక్తి ఇజి, నీను నజీ ప్రేమిస్సి లెకెండవరిజ్ బా ప్రేమిస్సి ఇజి లోకుర్ విజెరె నెస్సి వందిజ్ వారు ఉండ్రె ఆదెజ్.

24 ఓ బా, నీను వరిజ్ నజీ సీతి. అందెజె నాను మంజిని బాన్ వారుబా మండ్రెజ్ ఇజి నాను కోరిజిన. ఎందానిజ్ ఇహిజ, నాను గొప్ప పెరికాన్ ఇజి నీను నజీ సీతి గవరం వారు సుడెదెజె. లోకం పుటిన్ ఏండ ముజాల, నీను నజీ ప్రేమిస్తి. అందెజె నీను నజీ అయా గవరం సీతి.

25 సీతి నిజాయితీ మన్ని బుబ్బు, లోకమ్ది లోకుర్ నిజె నెన్ ఎర్. గాని నాను నెన్ను. నీను నజీ పోక్తి ఇజి వీరు నెసినార్. 26 నాను వరి వెట కూడెజి మంజిని వందిజ్, నీను నజీ ప్రేమిస్తి లెకెండ, వారు బా మహివరిజ్ ప్రేమిస్సివందిజ్ నాను నీ వందిజ్ వరిజ్ నెన్ పిన్ మన. నెన్ పిసినె మంజిన.

18

యేసుజ్ అరెస్టు కిజినార్

1 యేసు పార్దనం వీస్తి వెస్కా, వన్ని సిసూర్ వెట సోతాండ్రె, కెడ్రోన్ ఇని జోరెడాట్టి సోహాన్. అబ్బై ఉండ్రె టోట మహాద్. వాండ్రుని వన్నిసిసూర్ అయా టోటాదు సోహార్.

2 నండ్రె సుట్టు యేసుని వన్నిసిసూర్ అబ్బై కూడెజి మహార్. అందెజె యేసు అయా టోటాదు మంజినాన్ లె ఇజి యూద నెస్సాన్. వీండ్రె యేసుజ్ యుదురి అదికారిజి కీదు ఒవజెప్పికాన్. 3 అందెజె యూద అబె వాతాన్. పెరి పుజెరిబు పరిసయరు పోక్తి సెగొండార్ దేవుణు గుడిడి జుహాణు, మరి రోమ సయనమ్ది సెగొండారిజ్ బా వన్ని వెట కూక్త తత్తాన్. వారు సిను బొద్దు, లాందెరిబు, కూణామ్కు అస్త మహార్. 4 యేసు వన్ని మున్ను, వానికెజ్ విజు నెసినె, వాండ్రు సోతాండ్రె వరిజ్, “మీరు ఎయెరిజ్ రెబానిదెర్?”, ఇజి వెన్ బాతాన్. 5 దన్నిజ్ వారు, “నజరేతుది యేసుజ్”, ఇహార్. అందెజె వాండ్రు, “వాండ్రు నానె”, ఇజి వెహ్సాన్. అయావలె యేసుజ్ ఒవజెప్పి యూద వరి వెట నిహా మహాన్. 6 “వాండ్రు నానె”, ఇజి యేసు వరిజ్ వెహ్సావలె, వారు వెస్కా గుసె ఆజి బూమిదు అర్దార్. 7 మరి వాండ్రు వరిజ్ వెన్ బాతాన్, “మీరు ఎయెరిజ్ రెబానిదెర్?”, ఇజి. “నజరేతుది యేసుజ్”, ఇహార్ వారు. 8 అందెజె యేసు, “నాను మిజి వెహ్సాగదె, వాండ్రు నానె ఇజి. మీరు నజీ రెబానిదెర్ ఇహిజ, నా సిసూర్ ఆత్తి

విరిజ్ పోక్కు”, ఇజి వెహ్లాన్. 9 వారు సిసూరిజ్ పోక్కిజ్, “నీను నజీ సీతి వరి లోఇ ఒరిన్ వన్నిజ్ బా నాను పాడుకివీ” ఇజి వాండ్రు ముజాలె వెహ్లా మాటెజ్ పూర్తి ఆతె.

10 సిమోన్ పేతురు డగ్రు ఉండ్రీ కూడం మహాద్. నస్తివలె వాండ్రు అయాక లాగితండ్రె, విజు పుజెరిజు ముస్సు పెరిపుజెరి పణిమన్నిసిజ్ ఉణెర్ గిబి కత్తాన్. అయా పణిమన్నిసి పేరు మల్కు. 11 యేసు పేతురుజ్, “నీ కూడం దన్నిఒరదు ఇడెఱ. నాను ఓరిస్టెజ్ నా బుబ్బి ఏర్ పాటుకితి ప్రమెజ్ నాను ఓరిస్టెజ్ ఆఎద్ ఇజి నీను ఒడెఱిజినిదా?”, ఇజి వెహ్లాన్.

యేసుజ్ అన్న ముజాల ఒసిసూర్

12-13 నస్తివలె రోమ సయ్ నమ్ దికార్, వరి అతికారి, జమానూర్ యేసుజ్ అస్తారె తోహ్కాతార్. వారు వన్నిజ్ తోహ్కాతారె, ముజాల, అన్న ఇని వన్నిడగ్రు ఒతార్. వాండ్రు అయా ఏంటు విజు పుజెరిజు ముస్సు పెరి పుజెరి అతి కయపెజ్ మామ్ సి. 14 యా కయపన, ‘లోకుర్ విజెరి వందిజ్ ఒరిన్ సానికాదె నెగెద్’ ఇజి యూదురి అతికారిజ్ బుద్ధి వెహ్లా మహాన్.

పేతురు యేసుజ్ నెన్ ఏ ఇజి వెహ్లానాన్

15 సిమోన్ పేతురు ని మరి ఒరిన్ సిసూ యేసు వెన్కా సొహార్. అయా సిసూ, విజు పుజెరిజు ముస్సు పెరిపుజెరిజ్ నెల్గు ఆతికాన్. అందెజె వాండ్రు యేసువెటె పెరిపుజెరి ఇండ్రెణి డేవారు సొహాన్. 16 పేతురు గవుని వెల్లి నిహ మహాన్. పెరిపుజెరిజ్ నెల్గు ఆతి అయా సిసూ మర్జి వాతండ్రె, గవ్ నిడగ్రు నిల్చి మంజిని అయ్ లిదిజ్ వెహ్లాండ్రె, పేతురుజ్ లోఇ కూక్ ఒతాన్.

17 అయావలె అయా అయ్ లి పేతురువెటె, “నీనుబా వన్ని సిసూర్ లోఇ ఒరిగదె?”, ఇజి వెన్ బాతాన్. దన్నిజ్ వాండ్రు, “నాను ఆవ?”, ఇహాన్. 18 అయావలె గొప్ప పిని మహాద్. అందెజె అతికారిజుని పణిమన్నిసిర్ సిను ఎర్ సి దన్ని సుటులం నిల్చికాయెజి మహార్. పేతురుబా వరివెటె నిహండ్రె, సిను కాయెజి మహాన్.

పెరి పుజెరి యేసుజ్ వెన్ బాజినాన్

19 అయావలె, విజు పుజెరిజు ముస్సు మన్ని పెరిపుజెరి యేసుజ్ వన్ని సిసూర్ వందిజ్ వాండ్రు నెన్ పిన్ బోద వందిజ్ వెన్ బాజి మహాన్. 20 అందెజె యేసు, “నాను లోకుర్ విజెరి ఎద్రునె వెహ్లామన. యూదురు విజెరి కూడ్డి వాజి మంజిని, యూదురి మీటిజ్ ఇల్కాజ్ ని దేవుణగుడిఱెదు ఎస్తివలెబా నేర్ పిసి మహా. నాను ఇనికబా డొజ్ సాటు వెహ్లావత. 21 మురి ఎందానిజ్ నజీ వెన్ బాజిని? నా మాట విహివరిజ్ వెన్ బాఅ. నాను వెహ్లాకెజ్ పర్తికెజ్ వారు నెస్సార్”, ఇజి వెహ్లాన్.

22 యేసు యాకెజ్ వెహ్లాజ్, అబ్బి నిహిమహి అతికారిజు లోఇ ఒరిన్ యేసుజ్ ఉండ్రీ లెవడెయితాండ్రె, “యాలెకండ విజు పుజెరిజు ముస్సు మన్ని పెరిపుజెరిజ్ మర్జి వెహ్లాని?”, ఇజి వెహ్లాన్. 23 అయావలె యేసు, “నాను తపు ఇన్నిక వెహ్లాజు, అయాక నజీ వెహ్లా. గాని నాను నిజం వెహ్లాజు, ఎందనిజ్ నజీ డెయిజిని?”, ఇజి వెహ్లాన్. 24 అందెజె అన్న వన్నిజ్ తోహ్లా డెసనె విజు పుజెరిజు ముస్సు పెరిపుజెరి కయపడగ్రు పోక్తాన్.

యేసుజ్ నెన్ ఏ ఇజి పేతురు మరి వెహ్లానాన్

25 పేతురు సిను కాయెజి నిహ మహాన్. అయావలె మహికార్ వన్నిజ్, “నీనుబా వన్ని సిసూర్ లోఇ ఒరిగదె?”, ఇజి వెన్ బాతాన్. గాని పేతురు, “నాను ఆవ”, ఇజి కెవెతాన్. 26 నస్తివలె పేతురు గిబ్బి తెవ్ కతి పణిమన్నిసి బంతుకులు ఒరిన్ అబ్బి మహాన్. వాండ్రు విజు పుజెరిజు ముస్సు మన్ని పెరి పెరి పుజెరి పణిమన్నిసిర్ లోఇ ఒరిన్. వాండ్రు, “నిజీ వన్నివెటె టోటాదు నాను సుడెఱ గదె?”, ఇహాన్. 27 మరిబా, “నాను నెన్ ఏ”, ఇజి వెహ్లాన్. వెటెనె కొరు కెరెతాద్.

యేసుజ్ పిలాతు ముజాల ఒసిసూర్

28 వెన్కా యూదురు యేసుజ్ కయప బాణిజ్ రోమా గవర్నరు మన్ని పెరి ఇండ్రె ఒతార్. అయావలె పెందాలతాద్. యూదురు ఆఇ వన్ని ఇండ్రె డుగ్ జి మయ్ ల ఆనావ్ ఇజి ఒడెఱిజి వారు గవర్నరు మన్ని ఇండ్రె డుగ్ ఏతార్. ఎందానిజ్ ఇహిజు, వారు పన్ను బోజనం ఉండెజ్ నుబమ్ క మండ్రెజ్ వలె. అయాక ఉండ్రీ ఆసారం. 29 అందెజె గవర్నరు ఆతి పిలాతు, వెల్లి వరిడగ్రు వాతండ్రె, విని ముస్సు ఇనిజిని నేరమ్ కు మొప్పినిదెర్?”, ఇజి వెన్ బాతాన్. 30 అయావలె వారు, “ఏండ్రు తపు కిఇకాన్

ఇహిజ, నీ బాన్తెవెతాప్ మరి”, ఇజి మరజి వెప్టార్. 31 పిలాతు వరిజ్, “మీరె వన్నిజ్ ఒసి, మీ యూదురి రూలుదు మన్ని వజ తీర్పు సీదు”, ఇహాన్. దనిజ్ వారు, “ఎయెరిజ్ వా సప్టెజ్ మజి అక్కుసిల్లెద్”, ఇహార్. 32 యేసు ఎలాగ మర్తి సావు సానాన్ ఇజి వాండ్రు వెహి మాటెజ్ పూర్తి అదెజ్ యాక జర్గితాద్. 33 పిలాతు వన్ని ఇండ్రో మరజి సాహాండ్రె, యేసుజ్ కూక్పిస్తాండ్రె వన్నిజ్, “నీను యుదురిజ్ రాజునా?”, ఇజి వెన్ బాతాన్. 34 అందెజె యేసు, “నీలొ ఇహాన్ వాతి మాటనా, మహికార్ నా వందిజ్ నిజి వెప్టారా?”, ఇజి వెన్ బాతాన్. 35 అయావలె పిలాతు, “నాను యూద వాండ్రనా? నీ సాంత లోకర్ ని నీ సాంత పెరిపుజెరిజు నిజి నాబాన్ ఒవజెప్టార్. నీను ఇన్నిక కితి?”, ఇజి వెప్టార్. 36 అందెజె యేసు, “నా అతికారం యా లోకమ్ ది రాజురిజ్ మన్ని అతికారం లెకెండ మన్నిక అవద్. నన్ని అతికారం నజి మహిజ, యూదురు నజి అరెస్టు కివిండ నా సిసూర్ అడ్డు కిత్తార్ మరి. గాని నాను యా లోకమ్ ది రాజు అవ”, ఇజి వెప్టార్. 37 “అహిజ, నీను ఒరెన్ రాజునా?”, ఇజి పిలాతు వెప్టార్. అందెజె యేసు, “నాను రాజు ఇజి నీను వెహిని. నిజమాతి మాటెజ్ వెహిని వందిజె నాను పుట్టానె యా లోకమ్ దు వాత. నిజమాతికెజ్ కోరిజినికాన్ నాను వెహిని మాటెజ్ వినాన్”, ఇజి వెప్టార్. 38 అయావలె పిలాతు, “నిజమాతి మాటెజ్ ఇన్నికెజ్?”, ఇజి వెన్ బాతాన్. వెన్ బాతాండ్రె వాండ్రు వెల్లి యూదురు బాన్ సాహాండ్రె, “వినిజ్ తిర్పు సీదెజ్ విని లొ ఇ ఇన్ని నేరంబా తోరెవద్. 39 గాని మీ అలవాటు లెకెండ, ఏంటు ఏంటు వన్ను వండ్రెయ్ కాలమ్ దు, “కయ్ దు మన్ని ఒరెన్ వన్నిజ్ మజి డిజిసి పోకెల”, ఇజి మీరు లొస్సిదెర్. అందెజె యుదురిజ్ రాజుజ్ నాను డిజిసి సీదెజ్ మీరు కోరిజినిదెరా?”, ఇజి వెన్ బాతాన్. 40 అయావలె వారు, “పోని! వినిజ్ పోని. బరబెజ్ డిజిసి సిదా మజి”, ఇజి డేల్లి మరజి వెప్టార్. యా బరబ్బు ఒరెన్ కజారి.

19

1 అందెజె పిలాతు, “యేసుజ్ ఒసి కొరడెజె జాణిజ్ డెయ్ దు”, ఇజి సయనమ్ దివరిజ్ వెప్టార్. 2-3 సయనమ్ దికారె సాప్కాణిజ్ టోపి తయారె కితారె వన్ని బురాదు తోడిగిస్తారె. వారు వన్నిజ్ నండ్రె ఎరాని సరి సాక్క తోడిగిస్తారె, వన్నిడగ్రు సాన్సి, “యూదురిజ్ రాజు నిజి జెయము”, ఇజి వెక్రిసి వెప్టార్. వారు వన్ని లెపాదు డెయ్ టార్. 4 మరి ఉండ్రె సుటుబా, పిలాతు వన్ని ఇండ్రోణిజ్ వెల్లి వాతాండ్రె, మంద యూదురిజ్ ఇదిలో, వన్ని లొ ఇ ఇన్ తపుబా నజి తోరెవద్ ఇజి మీరు నెన్జెనాను వన్నిజ్ వెల్లి మీ డగ్రు తపిన్న”, ఇజి వెప్టార్. 5 అందెజె యేసుజ్ సాప్కాణి టోపి ని ఎరాని సాక్క తోడిగిస్తారె వెల్లి తతారె. అయావలె పిలాతు వరిజ్, “ఇవిలోన్ వాండ్రు”, ఇజి వెప్టార్.

6 పెరిపుజెరిజుని దేవుణు గుడిది జమాజ్ ణు వన్నిజ్ సుడిజెతారె, “వన్నిజ్ సిలువాదు కుటిజాణిజ్ డెయిజి సప్ అ, సిలువాదు కుటిజాణిజ్ డెయిజి సప్ అ”, ఇజి డేడిజెస్తారె. గాని పిలాతు, “విని లొ ఇ నజి ఇన్ని తపు బా తోరెవద్. అందెజె మీరె వన్నిజ్ ఒసి, సిలువాదు డెయిజి సప్టు”, ఇహాన్. 7 అయావలె వారు, “మజి మా యూదురి రూలుజ్ మనాద్. అయా రూలుజ్ వజ వీండ్రు సాదెజ్ వలె. ఎందానిజ్ ఇహిజ, వీండ్రు, “నానె దేవుణు మరిసి ఇజి వెప్టార్”, ఇహార్. 8 పిలాతు యా మాటెజ్ విహిజ్ మరి ఒది తియెల్ అతాన్. 9 వాండ్రు మరి వన్ని ఇండ్రో డుగితాండ్రె యేసుజ్, నీను ఎంబెజెజ్ వాతికి? ఇజి వెన్ బాతాన్. గాని యేసు మరజి ఇనికబా వెహి అతాన్. 10 అందెజె పిలాతు, “నీను నా వెట వర్గదా? నిజి సిలువాదు కుటిజాణిజ్ డెయిజి సప్టెజ్ బా నజి అతికారం మనాద్. విడుదల కిదెజ్ బా అతికారం మనాద్ ఇజి నీను నెన్ ఇదా?”, ఇహాన్. 11 అందెజె యేసు, “నా మున్ను దేవుణు నిజి అతికారం సితిజ్ నె, నిజి అతికారం మనాద్. అందెజె నజి నీ బాన్ ఒవజెప్టాన్ నిజి ఇంక లావు పాపం కిత్తాన్”, ఇజి వెప్టార్.

12 యా మాట విహండ్రె పిలాతు యేసుజ్ విడుదల కిదెజ్ సుడెజెతాన్. గాని యూదురు, “నీను వినిజ్ డిజిసి సితిజ, నీను కయ్ సరు రాజుజ్ కులవాండ్రు ఆఇ. రాజు ఇజి వన్నిజ్ వాండ్రె వెహి ఆనికాన్ ఎయెన్ బా కయ్ సరుజ్ పగ అతికాన్”, ఇజి మరి డటం డేల్లిస్తారె.

13 పిలాతు యా మాటెజ్ విహివెలె, వాండ్రు యేసుజ్ వెల్లి తతాన్. తతాండ్రె నాయం తిర్సికాన్ బన్ని కుర్ సిదు బస్తాండ్రె యేసుజ్ సిలువాదు డెయ్ అ ఇజి తీర్పు సితాన్. అయా కుర్ సి పణకాణిజ్ తయారె కితి బాడి ఇజి కూక్పి బాడిదు మనాద్. అయా బాడిజ్ ఎల్లి బాసదు గబత ఇనార్.

14 నస్తివలె పన్నుపండోయ్ నడిమి మన్ని విస్త్రాంతిదినం ముజాల మన్ని తయారాని రోజు. పెందాల్తారు గంటిజ్ఆతాద్. అయావలె పిలాతు, “ఇవిలోన్ మీ రాజు”, ఇజి యుదురిజ్ వెప్తాన్. 15 అందెజి వారు, “సవ్తల వన్నిజ్, సవ్తల వన్నిజ్, సిలువాదు వన్నిజ్ కుంటిజాణిజ్ డెయిజి నవత”, ఇజి డెడి:స్తార. “నాను మీ రాజుజ్ సిలువాదు కుటిజాణిజ్ డెయిజి నప్తజా?”, ఇజి పిలాతు వెన్బాతాన్. అయావలె పెరి పుజెరబు, “కయ్సరు ఒరెండ్రె మా రాజు. మరి ఎమేణి రాజు మజి సిల్లెన్”, ఇజి వెప్తాన్.

16 అందెజి పిలాతు యేసుజ్ సిలువాదు డెయిజి నప్తజ్ వరిజ్ ఒపజెప్తాన్. వారు వన్నిజ్ ఒతార.

యేసుజ్ సిలువాదు పొక్కినార

17 యేసు వన్ని సొంత సిలువ పిండిజి, పట్టుం వెల్లి వాతండ్రె బుర్రి పిణికి ఇజి కూకె ఆని బాడిడు వాతాన్. ఎల్లి బానదు దన్నిజ్ గోల్గోత ఇనార. 18 అబ్బె సయనమ్దికార్ వన్నిజ్ సిలువాదు కుటిజాణిజ్ డెయ్తార. వారు రివిర్ లోకురిజ్బా వన్నివెట సిలువాదు కుటిజాణిజ్ డెయ్తార. యేసుజ్ నడిమి ఇట్టాన్. ఒరెన్ వన్నిజ్ ఉణెర్ పడఃకాద్. ఒరెన్ డెబర పడఃకాద్. ఆహె సిలువాదు డెయ్తార. 19 పిలాతుబా ఉండ్రె బోర్డు తయార కిబిస్తాండ్రె, సిలువాదు తొహ్కత ఇట్టాన్. అయా బోర్డుదు, ‘నజరెతుదికాన్ ఆతి యేసు. యూదురిజ్ రాజు’, ఇజి రాసి ఇట్టాన్. 20 ఎల్లి, గ్రీకు, రోమ యా మూండ్రె బానిజాణిజ్ బోర్డుదు ఆహెరాస్త మహార్. యేసు ప్రబుజ్ సిలువాదు డెయితి బాడ్డి: పట్టుం డగ్రు మనాద్. అందెజి నండెండార్ యూదురు అయాక నద్విత్తార. 21 నస్తివలె యూదురిజి పెరి పుజెరిజు పిలాతుజ్, “యూదురిజ్ రాజు ఇజి రాస్టు. గాని ‘నానె యూదురిజ్ రాజు’, ఇజి వీండ్రు వెప్తాన్ ఇజి రాస్అ”, ఇహార్. 22 అందెజి పిలాతు, “నాను రాస్తి మన్నికదె మన్నిద్. మరి మారిన్వి”, ఇహాన్. 23 సయనమ్దికార్ యేసుజ్ సిలువాదు కుటిజాణిజ్ డెయితివలె వన్ని సొక్కెజ్ లాగితార. వాండ్రు వ్డెగతి మహి సాల్వదిజ్నాల్లి ముకెజ్కిస్తారె, ఉండ్రె ముక ఒరెన్ వన్నిజ్ ఆహె సిబె ఆతార. పాదమ్దాక మంజిని ఉండ్రె నిరి సొక్కుబ మహాద్. అయాక కుటు సిలిక. ముస్కుహాన్ అడ్డి దాక కుటు సిల్లెండ ఉండ్రె లెకెండగుత మహాద్. 24 ఒరెన్ మరి ఒరెన్ వెట, “అయాక కిస్తాట్. ఎయెరిజ్ అయాక వానాద్ ఇజి సిటి పొక్కి సూణాట్”, ఇజి వర్గితార. ‘నా సాల్వు వారు సిబె ఆతార. నా నిరి సొక వరిజ్ సిటి పొక్కార్*”, ఇజి దేవుణు మాటదు రాస్తి మనికెజ్ పూర్తి ఆని వందిజ్ యాక జర్గితాద్. సయనమ్దికార్ అయాలెకెండె కిత్తార. 25 నస్తివలె, యేసుజ్ డెయితి సిలువ డగ్రు వన్ని అయిసి, వన్ని కొర్రి అయిసి, క్లోవా ఇన్ని వన్ని ఆల్లి మరియ, మగ్దలెనె మరియ ఇనికెజ్ నిహె మహె. 26 యేసువన్ని అయిసిని వాండ్రు నండ్రె ప్రేవిస్తి సిసూ, డగ్రునిహి మహిక సుడఃతాండ్రె అయిసిజ్, “ఒ యా, నేండ్రుహాన్ వీండ్రె నీ మరిన్ లెకెండె మంజినాలె”, ఇజి వెప్తాన్. 27 మరి సిసూడుజ్, “ఇదిలో నీ యాయ”, ఇజి వెప్తాన్. నాండిహాన్ అయా సిసూ దనిజ్ వన్ని ఇండ్రె కూక్ ఒతాన్.

యేసు సాజినాన్

28 వెన్కా, బుబ్బె ఒపజెప్తి వణిజ్ విజు ఏలు పూర్తిఆతె, ఇజి ఏలు నెస్తాన్. నెస్తాండ్రె, కీర్తన పుస్తకమ్దు రాస్తి మన్ని మాటిజ్ పూర్తి ఆని వందిజ్ ‘నజి ఏహ్కా కట్టినాద్”, ఇజి వెప్తాన్. 29 అయావలె అబె నండ్రె సేందు ద్రాక్కు కడు మన్ని ఉండ్రె డొకు మహాద్. సయనమ్దికార్ ఉండ్రె దూది ననిక అయా సేందు ద్రాక్కుకల్లుదు ముడుకెతారె, అయాక ఇసాపు మరాతి కొమాదు తొప్తారె, వన్ని వెయ్దు సిత్తార. 30 వాండ్రు అయాక ఉటాండ్రె, “నా పణిజ్ పూర్తి ఆతాద్”, ఇజి వెప్తాండ్రె, బుర్రి వక్కి పాణం డి:స్తాన్. 31 నస్తివలె, అయా రోజు విస్త్రాంతిదినం ముజాల మన్ని తయారాని రోజు. మహ్నా నాండిజ్ విస్త్రాంతి దినం. యా దినం ముకెలమాతిక. ఎందానిజ్ ఇహెజు, యూదురి పన్ను పండోయి అయనాండిజె మొదోలీసినాద్. నాండిజ్ మొడ సిలువాదు మండ్రెజ్ వరిజ్ ఇస్టం సిల్లెద్. అందెజి యూదురు పిలాతుజ్, సిలువాదు పొక్కి వరి కాల్కు రుజు డెయిజి వరిజ్ బేగి సపిసి, వరి పినుగు సిలువెజాణిజ్ డి:ప్తెజ్ నెల్వ లొస్తార. 32 పిలాతు నెలవ సిత్తిజ్, సయనమ్దికార్ వాతారె, యేసువెట సిలువాదు డెయిజి మొదోహి వన్ని కాల్కు రుజు డెయ్తార. వెన్కా మహి వన్ని కాల్కు బా రుజు డెయ్తార. 33 గాని యేసుడగ్రు వాతిజ్, వాండ్రు ముజాలె సాతాన్ ఇజి వారు నెస్తార. అందెజి వారు

* 19:24 19:24 కీర్తన 22:18.

వన్ని కాల్యు రుజు డెయ్‌వితార్. 34 గాని సయ్యుమ్‌దివరి లోఇ ఒరెన్ బలెందాన్ ఉండ్రి పడెకాదు గుతాన్. గుతిజ్‌వెటనె, ఏరు నల సోతె. 35 మీరుబా నమినివందిజ్, యాక జర్గితివలె సుడెఃతికాన్ దనివందిజ్ వెహ్లాన్. వాండ్రు వెహ్లాక నిజమనె. వాండ్రు నిజం వెహ్లానానఇజి వాండ్రు నెస్సాన్.

36-37 ‘వన్ని డుముక లోఇ ఉండ్రి బా రుజ్‌వద్ద†’, ఇజి, మరి, ‘వారు గుతివన్నిజ్ వారు సూణార్†’, ఇజి రాస్తి మన్ని దేవుణు మాటెజ్ పూర్తిఅని వందిజె యా సజతిజ్ జర్గితె.

యేసుజ్ సమాది క్రిజినార్

38 యోసేపు ఇనికాన్ ఒరెన్ మహాన్. వాండ్రు అరిమతియ ఇని పట్టుమ్‌దికాన్. వాండ్రు యేసు సిసూ ఒరెన్. గాని వాండ్రు అయాక ఎయెరిజ్‌బా వెహ్‌వితాన్. ఎందానిజ్ ఇహిజ, వాండ్రు యూదురిజ్ తియెల్ ఆతార్. వెన్కా వాండ్రు యేసు పీనుగు సిలువదాన్ డిప్పి సమాది కిదెజ్ పిలాతుజ్ సెల్‌వ లొస్తాన్. నెల్క సితిజ్ వాండ్రు వాతండ్రి మొడః ఒతాన్. 39 నికొదిమొ ఇన్నికాన్‌ఒరెన్‌బా వన్ని వెట సోహాన్. యా నికొదిమొనె, ముజాలె, యేసుజ్‌రెయ్‌తు సొన్ని సుడెఃతికాన్. వాండ్రు డర్గు ముప్పుయ్ నాల్లి కె. జి, బోలము కలపి అగరు ఇన్ని మొడః సబ్‌వెండ ఇడ్చి మాయమ్‌కు తత్తాన్ 40 వారు రివెర్, యేసు పీనుగు ఒతార్, మాయమ్‌కు రాసి తెలాని పాతెజాణ్ సుటిస్తార్. యూదురు సమాది కిని ముజాల, పీనుగుతయార్ కిని అలవాటు లెకెండ ఈహు కిత్తార్. 41 యేసుజ్ సిలువారు డెయ్‌తి బాడిఃదు ఉండ్రి టోట మనాద్. అబ్బె పణుకుదు దొల్లిన్ ఉండ్రి కొత్తదూకి మహాద్. అబ్బె ఎయెరిజ్‌బా ఎసెజ్‌బా ఇడఃవెరె. 42 అయా రోజు యూదురి విస్త్రాతిదినం ముజాల మన్ని తయార్‌అని రోజు. మరి, అయా దూకిడర్గు మహాద్. అందెజె వారు యేసుజ్ అబ్బె ఇట్టార్.

20

1 వారమ్‌దిజ్ మొదొహి రోజు పెందాల్, సీకట్‌మన్‌బెనె మగ్గలెనె మరియ పీనుగు నూనెజ్ రాస్తిజ్ దూకిదు సోహాద్. అది వాతిజ్, పీనుగుఇడ్చి సమాదిదిజ్ మూక్తి పణుకు లాగితిక సుడఃతాద్. 2 అందెజె అది ఉహ్కాజి సొన్ని, యేసు నండ్రి ప్రేమిస్తి సిసూ బాన్, సిమోన్ పేతురుబాన్ వాతాద్ వరిజ్, “ప్రబుజ్ సమాదిదాన్ వారు ఒతార్. వన్నిజ్ ఎంబె ఇడ్తారొ ఇజి మాపు నెన్‌వెప్”, ఇజి వెహ్లాద్. (మరియవెట మరి సెగొండెజ్‌దెక్‌బా మహె) 3 అందెజె పేతురుని, అయా సిసూ సోతార్ సమాదిదు సోహార్. 4 వారు రివెర్ ఉహ్కాజి సోసే మహార్. గాని అయా సిసూ పేతురుజ్ ఇంక బేగి ఉహ్కాతాండ్రి సమాది ముజాల వాతాన్. 5 వాండ్రు వజ్‌జి సుడఃతిజ్, తెలాని పాతెజ్ అబె అర్త మహిక సుడఃతాన్. వాండ్రు లోఇ డుఃగవితాన్. 6-7 నన్చివలె సిమోన్ పేతురు వన్ని వెన్కా వాతండ్రి లోఇ డుగితాన్. వాండ్రు తెలాని పతెజ్‌అర్చి మహిక సుడఃతాన్. యేసు బుర్ల సుటిస్తి మహి పన్‌నెబా అబ్బె అర్త మహిక సుడఃతాన్. అయా పన్‌సె, తెలాని పాతెవలె కూడఃవెండ సుటిస్తిడఃసనె వేరె మహాద్. 8 మనుక ముజాల సమాదిదు వాతి సిసూబా డుగితాన్. వాండ్రు పాతెజ్ అర్చి మహిక సుడఃతాండ్రి, యేసు మరజి నిజితాన్ ఇజి నమ్మితాన్. 9 యేసు సాతి వరిబాణిజ్ తవ్‌వెండ మరజి నిజ్‌నాన్‌లె ఇజి దేవుణు మాటదు రాస్తి మన్ని మాటదిజ్ వారు ఇంక అర్దం కివెరె. 10 సిసూర్ వరి ఇల్కాజ్ మరజి సోహార్.

యేసు మగ్గలెనె మరియెజ్ తోరెఆజినాన్

11 మరియ మరి సమాదిదు వాత మహాద్. అది వెల్లినిహదె, అడఃబాజి మహాద్. అడఃబాజినె అది వజ్‌జి సమాది లోఇ సుడఃతాద్. 12 అయావలె, తెలాని పాతెజ్ పొర్‌పాతి రివెర్ దేవుణు దూతెజ అది సుడిఃతాద్. యేసు పీనుగుమహి బాడిఃదు బస్త మహార్. పాదమ్‌క దరిజ్ ఒరెన్ బస్త మహాన్. బుర్ల గాడిద్ ఒరెన్ బస్త మహాన్. 13 వారు మరియెజ్, “ఓ బీ ఎందానిజ్ నీను అడఃబాజిని?”, ఇజి వెన్‌బాతార్. అందెజె అది, “నా ప్రబు మొడః ఎయెరో పెహ్లా ఒతార్. ఎంబె ఇడ్తారొ నజి తెలివద్”, ఇజి వెహ్లాద్. 14 యా మాటెజ్ వెహ్లాద్, వెన్కా మరజి బేస్తాద్. బేస్తిజ్ యేసు అబ్బె నిహి మహిక సుడఃతాద్. గాని వన్నిజ్ గుర్తు అన్‌వితాద్. 15 అయావలె యేసు, “ఓ బీ, ఎందానిజ్ నీను అడఃబాజిని? ఎయెరిజ్‌రెబాజిని?”, ఇజి వెన్‌బాతాన్. వీండ్రు అయా టోటాదు పణి కినికాన్‌సు ఇజి ఒడిఃబిజి, “బాబు, నీను వన్ని పీనుగుపిండితి ఒతి మహిజ, ఎంబె ఇడ్చి మన్నిదొ నజి వెహ్‌అ. నాను సొన్ని వన్నిజ్‌వెర్న ఒనాలె”, ఇజి వెహ్లాద్. 16 నన్చివలె యేసు దన్నిజ్, “మరియ”, ఇజి కూక్తాద్.

వెటని అది మరణి వన్ని దరిజ్ మహ్ద. వాండ్రు యేసు ఇజి గుర్తు అస్తాదె ఎబ్రి బానదు, “రబుని”, ఇజి కూక్తాద్. దని అర్థం బోదిస్సికాన్ ఇజి. ¹⁷ అయావలె యేసు, “నాను నా బుబ్బుడగు ఇంక మరణి సొన్వెనె. అందెజె నజీఅసి మన్మా. గాని నీను నా సిసూర్ డగు సొన్ని వరిజ్, “నాను నా బుబ్బుడగు మరణి సొన్వెనె. వాండ్రునె నా బుబ్బు మీ బుబ్బు. వాండ్రె నా దేవుణు మీ దేవుణు”, ఇజి వెవ్తాత్”, ఇజి వెవ్తాన్. ¹⁸ అందెజె మగ్గలెనె మరియ సిసూర్ డగు వాతాదె, “ప్రబుజ్సుడేత”, ఇజి వెవ్తాద్. మరి ప్రబు దన్నిజ్ వెప్తాకేజా వెవ్తాద్.

యేసు వన్ని సిసూరిజ్ తోరె ఆజినాన్

¹⁹ అయా ఆదివారమెనె, పొదోయ్ సిసూర్కూడితారె, సేప్టా కెప్పి బస్త మహార్. ఎందానిజ్ ఇహిజ, వారు యుదురిజ్ తియెల్అతారె. యూదురు వరిజ్అదికారుజ బపజెప్పార్ ఇజి. నస్తవలె యేసు వాతండ్రె వరినడిమి నిహండ్రె, “సమాదనం కల్లిపిద్”, ఇజి వెవ్తాన్. ²⁰ యాక వెవ్తాండ్రె, సిలువారు డెయ్ఎ ఆతివెలె వన్ని కికాజ్, వన్ని పడకాద్ వాతి గాయమ్కు వాండ్రు వరిజ్ తోరిస్తాన్. ప్రబుజ్సుడతారె సిసూర్ నండె సర్ద అతారె.

²¹⁻²² మరి బా యేసువరిజ్, “మిజి సమాదనం కల్లిపిద్. నా బుబ్బు వన్ని మాట బోదిస్తెజ్ నజీ యా లోకమ్దు పొక్తి వజ నాను మిజి పొక్సిన”, ఇజి వెవ్తాండ్రె, వరి మున్కు తూబితాన్. తూబితాండ్రె, వరిజ్, “దేవుణు ఆత్మదిజ్ మీ మున్కు ఇడేదు. ²³ మీరు ఎయిపాపమ్కు సెమిస్సిదెరో, వరి పాపమ్కు సెమిస్త మనె. ఎయిపాపమ్కు మీరు సెమిస్ఇదెరో, అయకేజ్ సెమిసి మన్ఉ”, ఇజి వెవ్తాన్.

యేసుతోమెజ్తేరె ఆజినాన్

²⁴ యేసు సిసూరిజ్ తోరె అతివలె, పన్నెండ్రు మన్నిసీర్ సిసూర్లోఇ మన్ని దిదుము ఇన్ని తోమా సిల్లెండ మహాన్. ²⁵ అందెజె మహి సిసూర్, “మాపు ప్రబుజ్సుడేతావ్ ఇజి వెప్తాజ్, వాండ్రు, “నాను వన్ని కికాజ్ కుంటిజాణిజ్ డెయ్తి గాయమ్ది మనదిజ్తోఎండ, అయా మనదు ముట్విండ, వన్ని పడకాదు నాను కియు ఇడేవిండ, వాండ్రు నిజీత మనాన్ ఇజి నమిఎ”, ఇహాన్. ²⁶ ఉండ్రె వారం వెన్యా వన్ని సిసూర్విజెరె మరిబా కూడితారె, ఉండ్రె ఇండ్రె మహార్. తోమాబా వరివెట మహాన్. సేప్టా కెహె ఆత మహాద్. గాని యేసు వాతండ్రె వరినడిమి నిహండ్రె, “సమాదనం కల్లిపిద్”, ఇజి వెవ్తాన్. ²⁷ మరి తోమెజ్, “నీ డెస్కు ఇబ్బె ఇడేఅ. నా కికాజ్ సుడేఅ. నీ కియు సొప్పి నా పడకాద్ మన్ని గాయమ్దు ఇడేఅ. అనుమానం సిల్లెండ నమిఎ”, ఇజి వెవ్తాన్. ²⁸ అయావలె తోమా, “నీనె నా ప్రబు. నీనె నా దేవుణు”, ఇజి వెవ్తాన్. ²⁹ అందెజె యేసు వన్నిజ్, “నీను నజీ సుడేతిజ్ నిజీతమనాన్ ఇజి నమ్మితి. నజీ తోవిండ నమ్మితికార్ గొప్పు వారు”, ఇజి వెవ్తాన్.

³⁰ యేసు వన్నిసిసూర్జు నడిమి, మరి నండె బమ్మాని పణిజ్ కితాన్. అయకేజ్ యా పుస్తకమ్దు రాన్ఉ. ³¹ గాని, యేసు క్రీస్తు ఇజి, వాండ్రు దేవుణుమరిసి ఇజి మీరు నమ్మినివందిజ్, వన్ని మున్కు మన్ని మీ నమకమ్దాన్ మిజి ఎలాకాలం దేవుణువెట బత్కిని బత్కు దొప్పివందిజ్ యాకేజ్ రాస్త మన్నె.

21

¹ దిని వెనుక, యేసు తిబెరియ సమ్దరం డగు మరి వన్ని సిసూర్జు తోరె ఆజినాన్. వాండ్రు ఈహు తోరె ఆతాన్. ² సిమోన్ పేతురు, దిదిమ ఇజి కుకెఅని తోమా, గలిలయ ప్రాంతమ్ది కానా ఇన్ని పట్టుమ్ది నతనయేలు, జెబెదయ మరిసిరెఅతి యాకోబు యోహాను, మరి రిపర్ సిసూర్ కూడిత మహార్. ³ సిమోన్ పేతురు, “నాను మొయెజ్ అస్తెజ్సొన్వెనె”, ఇజి వరిజ్ వెవ్తాన్. అయావలె వారు, “మాపు బా నీ వెట వానావ్”, ఇహార్. అందెజె వారు సొహరె, ఉండ్రె డోణి ఎక్టారె సొహార్. గాని ఆ రెయితు ఇనికబా అన్వితారె. ⁴ పొద్దు సొసి మహివలె, యేసు సమ్దరం దరిదు నిహాన్. గాని వన్ని సిసూర్ యేసుఇజి గుర్తు అన్వితారె. ⁵ అందెజె వాండ్రు వరిజ్, “తంబెరిజాండ్రె, మొయెజ్ఇన్నికబా అస్తెదెరా?”, ఇజి వెన్బాతాన్. వారు, “సిల్లెద్”, ఇజి వన్నిజ్ వెవ్తాన్. ⁶ నస్తవలె వాండ్రు, “డోణి ఉకెరె పడకాదు మీ వలెజ్సొక్కు. మిజి దొప్పానె”, ఇజి వెవ్తాన్. వారు అయ లెకిండ్ కిత్రార్. మొయెజ్ నండె అర్తె. వల లాగ్దెజ్ అట్వితారె.

7 అయావలె, యేసు నండో ప్రేమిస్తి సిసూ, “వాండ్రు ప్రబు”, ఇజి పేతురుజ్ వెహ్లాన్. “వాండ్రు ప్రబు”, ఇజి అయా సిసూ వెహ్లా మాట విహి వెటనె, సిమోన్ పేతురు వాండ్రు లాగితి ఇడ్డి సాల్వ వడ్డిగితాండ్రె, నమ్దరమ్దు డాట్టాన్. 8 వారు గటుదాన్ ఎంజు మెంసు నూరు మూరెజ్ నె దూరం మనార్. అందెజె మహి సిసూర్ మొయెజ్ మన్ని వల లాగ్ జినె డోణిదు వాతార్.

9 వారు డింగెజి వాటిజ్ గటుదు, సిసూ డింపుజ్ దనిముస్కు మొయెజ్ రొటెజ్ తోరితె. 10 యేసు వరిజ్, “మీరు ఏలు అస్తి మహి సెగం మొయెజ్ అగాట్”, ఇజి వెహ్లాన్. 11 సిమోన్ పేతురు డోణి ఎక్తాండ్రె వల గటుదు లాగితాన్. అబె నూటి యాబయి మూండ్రె పెరి మొయెజ్ వలదు నిండ్రెతె మహె. గాని నిసా మహిజ్ బా వల కింజ్ ఏతాద్. 12 యేసు వరిజ్, “రదు తిండ్రు”, ఇజి వెహ్లాన్. వాండ్రు ప్రబు ఇజి వరిజ్ తెలితార్. అందెజె, నీను ఎయి ఇజి వన్నిజ్ వెన్ బాదెజ్ సిసూర్ లోఇ ఎయెన్ వన్నిజ్ బా దయరం సిల్లెతాద్. 13 యేసు వాతాండ్రె, రొట్టెజ్ లాగితాండ్రె వరిజ్ సీబాజ్ సితాన్. అయ లెకెండ్ మొయెజ్ బా సితాన్. 14 యేసు సాతి వరిబాణిజ్ బత్తితి వెన్కా, దనివెట ఏలు ముసార్ సిసూర్ జ తోరె ఆత్తాన్. 15 వారు తిహి వెన్కా, యేసు సిమెన్ పేతురుజ్, “యోహాను మరిసి ఆతి సిమెను, నీను మహి సిసూర్ జ ఇంక నీను నండో నజి ప్రేమిస్తిదా?”, ఇజి వెన్ బాతాన్. “ఒబ ప్రబువా, నాను నిజి ప్రేమిస్తి ఇజి నీను నెస్తి”, ఇజి వాండ్రు వెహ్లాన్. అందెజె యేసు, “నా గొరె పిల్కాజ్ మేవ్ అ”, ఇజి వెహ్లాన్. 16 మరిబా యేసు వన్నిజ్, “యోహాను మరిసి ఆతి సిమెను, నీను నజి ప్రేమిస్తిదా?”, ఇజి వెన్ బాతాన్. “ఒబ ప్రబువా, నాను నిజి ప్రేమిస్తి ఇజి నీను నెస్తి”, ఇజి రిజి వెహ్లాన్. అందెజె యేసు, “నా గొరెజ్ అడిఃఅ”, ఇజి వెహ్లాన్. 17 “యోహాను మరిసి ఆతి సిమెను, నజి ప్రేమిస్తిదా?”, ఇజి ముసార్ వెన్ బాతాన్. నీను నజి ప్రేమిస్తిదా ఇజి ముసార్ దిజ్ వెన్ బాతిజ్, పేతురు బాద ఆతాన్. “ప్రబు నీను విజు నెస్తికి. నాను నిజి ప్రేమిస్తి ఇజి నీను నెస్తి”, ఇజి పేతురు వెహ్లాన్. అందెజె యేసు, “నా గొరెజ్ మేవ్ అ”, ఇజి వెహ్లాన్. 18 “నాను నిజం నివెట వెహ్లాన్, నీను దజడః మనివలె, నీను తయార్ ఆజి నీ ఇన్ఠం ఆతి బాడిఃదు సాహి. గాని నీను డొక్ర ఆనివెలె, నీకికు నీను సాప్పి. మరి ఎయెన్ బా నిజి తోహ్ని నిజి ఇన్ఠం సిల్లి బాడిఃదు పిండిజి ఒనాన్”, ఇజి వెహ్లాన్. 19 పేతురు ఎలాగ మర్తి సాపు సాజి దేవుణు గొప్పపెరికాన్ ఇజి తోరిస్సాండ్రె, దనివందిజ్ వాండ్రు యా మాటెజ్ వెహ్లాన్. వెన్కా వన్నిజ్, “నా సిసూ ఆజి రఅ”, ఇజి వెహ్లాన్. 20 పేతురు వెనుక మహ్తాండ్రె, యేసు నండో ప్రేమిస్తి సిసూ, వరి వెన్కా వాజినిక నుడతాన్. (యా సిసూనె వస్కు బోజనం తిహివలె యేసు గుంజమ్దు ఒరిగితాండ్రె, “ప్రబువా, నిజి అదికారిజ కీదు ఒపజెప్పికాన్ ఎయెన్”, ఇజి వెన్ బాతికాన్). 21 పేతురు వన్నిజ్ నుడతాండ్రె, “ప్రబువా, వినిజ్ ఇన్నిక జర్గినాద్?”, ఇజి వెన్ బాతాన్. 22 అందెజె యేసు, “నాను మరీజి వానిదాక వాండ్రు బత్తిదెజ్ నజి ఇన్ఠం ఆతిజ, నిజి ఇన్నిక? నీను నా సిసూ ఆజి వెన్కా వాదెజ్ వలె”, ఇజి వెహ్లాన్. 23 యేసు అయలెకెండ్ వెహ్లాజ్, యా సిసూ సావన్ ఇజి ఉండ్రె మాట మహి వరి నడిఃమి నెద్రిస్తాద్. గాని వాండ్రు సావన్ ఇజి యేసు వెహ్లాతాన్. నాను వానిదాక వాండ్రు బత్తిదెజ్ నజి ఇన్ఠం ఆతిజ, నిజి ఇన్నిక?”, ఇజి నె వాండ్రు వెహ్లాన్. 24 యా నజతిజ వందిజ్ వెహ్లాకాన్ యా సిసూనె. వీండ్రె ఆయాకెజ్ రాస్త ఇట్టాన్. వాండ్రు వెహ్లాకెజ్ నిజం ఇజి మాపు నెసినావ్. 25 యేసు మరి నండో నజతిజ్ కితాన్. అయాకెజ్ విజు రాసి ఇడదెజ్ ఇహిజ, రాసిని పుస్తకమ్కు అస్తెజ్ యా లోకమ్దు మన్ని బాడ్డి సాల్ వద్ ఇజి నాను ఒడకీస్త్రు ఇజి.

అపొస్తురు కిత్తి పణిజ్

నెల్వ కిటిసినిక

లూక సువార్త రాస్తిమహి లూకనె యా పుస్తకం రాస్తాన్. లూక ఒరెన్ డాక్టరు. క్రీస్తు సకం 60-63 నడిమి యాక రాస్త మనాద్ ఇజి వెహ్సినార్. క్రీస్తు సాజి నిజితి వెన్యా మొదోహి 30 వంటిజ్ లోక జర్గితికెజ్ ఇబ్బె రాస్తి మన్నె. లూక సువార్తదు యేసుక్రీస్తు కిత్తి గొప్ప పణిజ వందిజ్ లూక రాస్తాన్. వెనుక, యేసుక్రీస్తు పరలోకమ్దు సాహి వెనుక దేవుణు అత్తు వాతండ్రె వన్ని అపొస్తురు వెట గొప్ప బమ్మాతి పణిజ్ కిత్తాన్. యూదయదేసమ్దాన్ అంతియొకయాదు, బాణిజ్ రోమపట్నం దాక యేసుక్రీస్తు వందిజ్ సువార్త సాటిస్తారె అపొస్తురు అయ కాలమ్దు కిత్తి పణిజ వందిజ్ ఇబ్బె రాస్త మనాద్.

దేవుణు యేసుజ్ పరలోకమ్దు ఒత్తాన్

1-2 నా ప్రియమాతి దెయొపిలా, నాను ముందాల్ రాస్తి పుస్తకమ్దు, దేవుణు యేసుజ్ పరలోకమ్దు ఒనెండ యేసు కిత్తి విజు పణిజ వందిజ్, యేసు నెన్పిస్తి విజు మాటెజవందిజ్ రాస్త మనాద్. దేవుణు యేసుజ్ పరలోకమ్దు ఒనిముందాల యేసు, వాండ్రు ఏర్పాటు కిత్తి అపొస్తురుజ్ వారు కిని పణి వందిజ్ దేవుణు అత్తు సత్తుదాన్ ఆడ్ర సిత్తాన్. ³ యేసు కర్ణమ్కు ఒరిసి సాతి వెనుక నిజితండ్రె, నాను బత్తిత్త ఇజి అపొస్తురు అనుమానం సిల్లెండ నమ్మిదెజ్ యేసు వరిజ్ తోరె ఆత్తాన్. నలవయ్ రోస్కాజ్ నండో సుట్టు యేసు అపొస్తురుజ్ తోరె ఆతండ్రె దేవుణు ఏలుబడి: వందిజ్ వర్గిత్తాన్. ⁴ వారు కూడెజి వాతివలె యేసు ఈహు ఆడ్ర సిత్తాన్, “యెరూసలేం పట్నం డిసి సాన్కాట్. నా బుబ్బు మిజి సీనా ఇజి ఒట్టు కిత్తి వన్ని అత్తు ఇని ఇనాయమ్వందిజ్ నాను ముందాల్నె వెహ్సాగదె. ధన్నివందిజ్ కావ్ కిజి మండ్రు. ⁵ యోహాను ఏరుదాన్ బాప్తినం సిత్తాన్. గాని సెగం రోస్కు సాహిజ దేవుణు మిజి వన్ని అత్తుదాన్ బాప్తినం సీనాన్”, ఇహాన్. ⁶ అపొస్తురు యేసు వెట కూడెజి వాతారె వెన్బాతారె, “ప్రబువా, ఏలునె మా ఇస్రాయేలు లోకాజ్ మా దేసెమ్ది ఏలుబడి: మరజి సీనిలెనా?”* ⁷ యేసు వెహ్సాన్, “కాలం వందిజ్ నా బుబ్బానె ఏర్పాటు కిత్తాన్. అక్కెజ్ విజు నా బుబ్బాతి దేవుణు అతికారమ్దు మనాద్. యాకెజ్ విజు ఎనెజ్ ఇర్గినాద్ ఇజి మీరు నెస్టెజ్ అవ్సరం సిల్లెద్. ⁸ అహిజ, దేవుణు అత్తు మీ ముస్కు వానివలె మీరు సత్తు ఆనిదెర్. అయావలె మీరు యెరూసలేమ్దు, యూదయ దేసెం విజు, సమరియ దేసెం విజు, లోకం విజుబాన్ నా వందిజ్ వెహ్సె నా సాసిర్ ఆనిదెర్”. ⁹ యా మాటెజ్ వెహ్సాండ్రె వారు సుడెజిమహిజ్ దేవుణు యేసుజ్ పరలోకమ్దు ఒత్తాన్. అయావలె ఉండ్రె మొసాప్ వాతాదె అడ్డు కిత్తిజ్ వారు యేసుజ్ తోర్విండ ఆత్తారె. ¹⁰ యేసు ఆగాసం ముస్కు సొన్ని మహిజ్ వారు ఆగాసం దరోట్టె డిటం బేసి మహారె. అయావలె వెటనె తెల్లాని పాతెజ్ పొర్పాతిమహి రిఎర్ దూతారె వరి డగ్రు నిహారె. ¹¹ “ఓ గలీలయాదికిదెరా, మీరు ఎండనిజ్ ఆగాసం దరోట్ సుడెజినిదెర్? మీ డగ్రుహాన్ దేవుణు పరలోకమ్దు యేసుజ్ ఒత్తాన్. ఎలాగ సాహండ్రె అయావజనె మరజి వానాలె”, ఇజి వారు వరిజ్ వెహ్సారె.

త్తియెజ్ అపొస్తురు వెట కూడెజ్ ప్లెజ్ ఏర్పాటు కిత్తారె

¹² వెనుక అపొస్తురు ఒలివ మరెక్ మన్ని గొరొతాణ్ యెరూసలేం పట్నమ్దు మహ్తా సాహారె. (ఒలివ మరెక్ మన్ని గొరొన్ యెరూసలేం పట్నం డగ్రునె. ఉండ్రె కిలో మీటర్ దూరం మనాద్) ¹³ వారు యెరూసలేమ్దు సాహారె వారు మహి మేడ: గదిదు ఎక్తారె. వారు ఎయెర్ ఎయెర్ ఇహిజ, పేతురు, యోహాను, యాకోబు, అంద్రెయ, పిలిపు, తోమా, బర్థోలోమయి, మత్తయి, అల్వయ్ మరిసి ఆతి యాకోబు, జలోతె† ఇని మరి ఉండ్రె పేరు మహి సీమోను, యాకోబు మరిసి ఆతి యూద ఇనికారె.

* 1:6 1:6 అయ కాలమ్దు ఇస్రాయేలు లోకురి దేసెం రోమాదికారె ఏలుబడి: కిజి మహారె. † 1:13 1:13 జలోతె ఇహిజ పటుదల మన్నికాన్ ఇజి అర్థం

14 వారు విజేరె కూడితారె ఉండ్రె మన్నుదాన్ డిన్విండ పార్లనం కిజి మహార్. వరివెట సెగిండెక్ అయ్లికొడొక్ బా వాతె మహా. యేసు యాయ అతి మరియ, వన్ని తంబెర్సిర్ బా అబ్బె మహార్.

15 నెగం లోస్కు సొహి వెనుక డర్గు డర్గు నూట ఇర్వయ్ మణిసిర్ యేసుజ్ నమ్మితికార్ కూడిత మహార్. పేతురు వరినడిమి నిహండ్రె ఈహు వెప్తాన్, 16 “తంబెరిజాండె, దేవుణు మాటదు రాస్తి మహాక తవ్విండ జర్గితాద్. దేవుణు అత్తు సత్తుదాన్ దావీదు రాజు యూద వందిజ్ ముందాల్న వెప్తికాద్ జర్గితాద్. యా యూద యేసుజ్ అన్జె వాతివరిజ్ సరి తోరిస్తాన్. 17 వాండ్రు మా లోఇ ఒరెన్. ఎందనిజ్ ఇహిజ మాపు అపొస్తురు వెట కూడిజి పణి కిదెజ్ యేసు వన్నిజ్ ఏర్పాటు కిత్తాన్”.

18 (యా యూద మొసెం పణిదాన్ సంపాదిన్తి డబ్బుజాణ్ బూమి కొటాన్. అబ్బె గడియబుర కితాండ్రె అర్తాండ్రె సాతాన్. అయావలె పొట బదెజ్ ఆజి వన్నిజ్ విజు వెల్లి సాతె. 19 యేరూసలేమ్ దికార్ విజేరె యా సజతిజ్ వెహరె నెస్తార్. అందెజె యూద అర్తిసాతి యా బూమిదిజ్ వరి బాసాదు అక్కెల్లెమ ఇజి వెప్తార్. దన్ని అర్థం ఇనిక ఇహిజ, ‘ఒరెన్ లోకుదిజ్ సప్తి వందిజ్ దొప్తి డబ్బుదాన్ కొటి బూమి’ ఇజి అర్థం).

20 పేతురు మరి వెప్తాన్, “కిర్తనం పుస్తకమ్దు ముందాల్న ఈహు రాస్త మనాద్: వన్ని ఇల్లు ఎయెన్ బా మన్విండ ఆపిన్, దన్ని లోఇ ఎయెన్ బా బత్తిఎండ ఆపిన్”. ఈహుబా రాస్త మనాద్: అపొస్తుడు† వజి వాండ్రు కిత్తి పణి మరి ఒరెన్ లాగె ఆపిన్. 21-22 అందెజె మాపు పదకొండు మణిసిర్ అపొస్తురు వెట కూడిజి మండ్రెజ్ మరి ఒరెన్ వన్నిజ్ ఏర్పాటు కిదెజ్ వలె. యోహాను యేసుప్రబుజ్ బాప్తీసం సిత్తి బాణిజ్ అని యేసుప్రబు పరలోకమ్దు సొనిదాక మా నడిమినె కూడిజిపాడిజి మా వెట మహికాన్ ఒరెన్ వన్నిజ్ అవ్వసరం. ఎందనిజ్ ఇహిజ యేసు సాతి వరిబాణిజ్ మర్జి బత్తితాన్ ఇజి వాండ్రుబా మా వెట సాని మండ్రెజ్.

23 అందెజె కూడిజి వాతి మహికార్ రిఎరి పేర్కు వెప్తార్. ఒరెన్ యోసేపు (వన్నిజ్ యుస్తు, బర్గుబ ఇని పేర్కుబా మహా) మరి ఒరెన్ మత్తియ. 24-25 అయావలె వారు ఈహు పార్లనం కిత్తార్, “ప్రబువా, విజేరి మన్నురు మన్ని విజు ఆలోసనమ్కు నీను నెసిని. యూద, వన్నిజ్ తగితి బాడ్డిదు సొహాన్. వాండ్రు డిసెసొహి పణి, ఇహిజ సజమ్దిజ్ నడిపిసి సేవకిని పణి సిదెజ్ వన్నిజ్ బదలు యా రిఎర్ లోఇ ఎయెజ్ నీను ఏర్పాటు కిత్తి ఇజి మజి తోరిన్ అ”. 26 వెనుక వారు సిటిజ్ పొక్తార్. అయావలె మత్తియ ఇని పేరుదాన్ సిటి వాతాద్. అందెజె మత్తియెజ్ బా పదకొండు మణిసిర్ అపొస్తురు వెట లెక్క కల్తెప్తార్.

2

పెంతెకొస్తు పండొయ్ నాండిజ్ దేవుణు అత్తు వాజినాద్

1 పెంతెకొస్తు ఇని పండొయ్ నాండిజ్ యేసుజ్ నమ్మితికార్ విజేరెకూడిజి ఉండ్రె ఇండ్రొ మహార్. 2 వెటనె ఆగాసమ్దాన్ ఉండ్రె జాటు వాతాద్. అయ జాటు, పెరి గాలి వానివజి జాటుదాన్ వాతాదె వారు బస్తిమహి ఇండ్రొ నిండ్రెతాద్.

3 వారు నుడెతిజ్ సినుబొద్దు లెకొండ్రె తోర్తిక ఉండ్రె వాతాదె ఒరెన్ ఒరెన్ మున్ను ఉండ్రె ఉండ్రె కొనెజ్ డిగితె. 4 విజేరె మున్ను దేవుణు అత్తు సత్తు వాతిజ్ వారు, వరిజ్ నెన్ ఇ బాసిజ్ వర్గిదెజ్ మొదొల్స్తార్. దేవుణు అత్తనె నెన్ ఇ బాస వర్గిదెజ్ వరిజ్ సత్తు సిత్తాన్.

5 అయావలె విజు దేసమ్కాణిజ్ వాతిమహి బక్తిమన్ని యూదురు యేరూసలేం పట్టమ్దు మహార్. 6 యూదురు మంద లోకుర్ యా జాటు వాతిబాన్ కూడితార్. వారు వర్గినిక వీరు వన్ని వన్ని సొంత బాసిజాణిజ్ వెహరె యా కూడిజి వాతి మహి యూదురు బమ్మ ఆతార్. “వీరు మాటు వర్గిని బాసిజ్ వర్గిజినార్ కొటె”, ఇజి వెప్తార్. 7 అయావలె వాతి మహికార్ విజేరె ఒదె బమ్మ ఆతార్ ఒరెన్ వెట ఒరెన్ వెప్తార్, “యాక ఎలాగ? వీరు విజేరె గలీలయాదికార్ ఆవిరా? 8 గాని మాపు పుట్టిమహి నాహ్కాణి ఆఇ ఆఇ బాసిజ్ యా గలీలయాదికార్ వర్గిజినార్. యాక మాపు వెంజినామ్. 9-11 పార్తియికు, మదియికు, ఎలామియికు, మెసొపొతేమియ, యూదయ, కపడొకియ, పొంతు, ఆసియ, ప్రుగియ, వంపులియ,

అయ్యగుచు, కురేనే డగ్గు మన్ని లిబియ, రోమ దేసెమ్దాన్ కూల వాతికార్ (యూదురు, యూదుమతం నమ్మితి యూదురు ఆఇకార్) క్రేతియురు, అరబియురు, దేవుణు కిత్తి గొప్ప పణిజ్ మాటు విజెటి పుట్టి బాసారు వెప్పిక వెంజినాట్. ¹² ఒడిబిత్తిజ మన్ను కూడివిద్. యాక ఇనిక ఆనాద్లెనో, ఇజి వారు విజేరె పంబ్ర ఆతారె ఒరెన్ వెట ఒరెన్ వర్గితార్.

¹³ నెగెండార్ వీరు తియాజ్ ద్రాక్కు రసం ఉటారె సొస్త మనార్ ఇజి వరిజ్ సెకాల్ కిత్తార్.

పేతురు కూడిజి వాతి లోకుర్ వెట వెప్పినాన్.

¹⁴ అయావలె పదకొండు మణిసిర్ అపొస్తురు వెట మహి పేతురు నిజితండ్రె అబ్బె కూడిజి వాతి లోకుర్ వెట డటం వెప్తాన్, “యెరూసలేమ్దు బత్తిజిని మా సొంత లోకుర్ ఆతి యూదురు లోకాండె, నాను వెప్పిక నెగెండ వెండ్రు. వీరు విరిజ్ నెన్ ఇ బాసెజ్ వర్గితక మీరు వెహెదెర్. ¹⁵ మీరు ఒడిబిని లెకెండె వీరు సొస్తికార్ ఆవిర్. పొద్దు సొసి ఏలు అంబెలి వేడబా ఆవిద్.* ¹⁶ గాని దేవుణు మాటెజ్ వెప్పె యెవెల్ ప్రవక్త ముజాలె వెప్పికదె మీరు సుడిజినిదెర్.

¹⁷ యెవెల్ ప్రవక్త ఇనిక వెప్తాన్ ఇహిజ ఆకార్ దినమ్కాజ్ నాను ఇనిక కిన్ ఇజి దేవుణు వెప్పినాన్. విజు లోకాజ్ నా ఆత్మదిజ్ సీన. మీ మరిసిర్, మీ గాడ్డిక్, ప్రవక్తరు లెకెండె దేవుణు మాటెజ్ వర్గినారె. మీ దుజ్డిజ్ దేవుణు బాణిజ్ వాని దర్చనమ్కు[†] నూణార్. మీ డొక్రారబా దేవుణు బాణిజ్ వాని కలెజ్ నూణారె. ¹⁸ అయ ఆకార్ దినమ్కాజ్ నా మున్ను నమకం ఇడిజితి పణి మణిసిరిజ్ బా విజేరిజ్, అయెలి కొడెకాజ్, మొగ్గ కొడెకాజ్ నా ఆత్మ సీనా. వారు విజేరె దేవుణు మాటెజ్ వెప్పారె. ¹⁹ ఆగాసం మున్ను విజేరె నూణి వజి నాను గొప్ప బమ్మాతి పణిజ్ తోరిన్ను. యా బూమి మున్ను ఎయెర్ బా తొఇ పణి నాను కిన్. నల, సిను, కర్నిగోయి బూమి మున్ను వానెలె. ²⁰ ప్రబు మర్జి వాని అయ గొప్ప బమ్మాని దినం వాని ముజాల పొద్దు సీకటి ఆనాదెలె. నెల నల లెకెండె ఎరాజ్ ఆనాదెలె. ²¹ అయావలె ఎయెర్ బా దేవుణు పేరు అసి వన్ని మున్ను నమకం ఇట్టిజి వరిజ్ విజేరిజ్, దేవుణు, తీర్పుదాన్ గెల్పెస్సాన్లె.

²² పేతురు మరి వెప్తాన్, “ఇస్రాయేలు లోకాండె, నెగెండ వెండ్రు. నజరేతు వాండ్రు ఆతి యేసు అతికారం దేవుణు బాణిజ్ వాతిక ఇజి దేవుణు రుజువ్ కిత్తాన్. ఎలాగ ఇహిజ, యేసు వెట మీ లోక కిత్తి గొప్ప పణిజాజ్, ఎయెర్ కిదెజ్ అట్ ఇ బమ్మాతి పణిజాణ్ రుజువ్ కిత్తాన్. యాక విజు మీరు నెసినిదెర్.

²³ యా యేసుజ్, ఒరెన్ మణిసి మీ డగ్గు ఒపజెప్తాన్. యా సజతి దేవుణు ముందాల్నె నెస్తాన్. యాక దేవుణు ముందాల్నె వీర్పాటు కిత్తి సజతి. మీరు యేసుజ్ సెఇవరి దర్చుదాన్ అస్సిదెరె సిలువ మున్ను డెయెజి నస్తిదెర్. ²⁴ గాని దేవుణు యేసుజ్ సావుదాన్ తప్పిసి బత్తిస్తాన్. నండో మాలెజ్ ఆజి సాతాన్ గాని దేవుణు వన్నిజ్ సావుదు డిసెవితాన్. యేసుజ్ ఎలాకాలం తొప్పి ఇడిదెజ్ సావుదిజ్ అట్విండ ఆతాద్. ²⁵ యేసు మాటెజ్ దావీదురాజు ముందాల్నె ఈహు వెప్తాన్ నాను దేవుణుదిజ్ ఎల్లకాలం నా డగ్గు సుడిజి మహా. దేవుణు నా ఉణెర్ పడక మనాన్. అందెజె నాను మన్నుదు మాలెజ్ ఆవి. ²⁶ అందెజె నా మన్నుదు నాను గొప్ప సర్ద ఆజిన. నాను సర్ద ఆజి వర్గిజిన. నాను నా ఒడిజెల్ దేవుణుదిజ్ ఒపజెప్పె. ఎందనిజ్ ఇహిజ ఒడిజెల్ సాతి వెనుక మురి బత్తిన్ ఇజి నాను నెసిన్. ²⁷ ఎందనిజ్ ఇహిజ నీను నా పాణమదిజ్ డిసెఇ. నమ్మిదెజ్ తగ్గికాన్ ఆతి నీ సేవ కినివన్ని పీనుగు సబ్జి సొండెజ్ సరి సిజ. ²⁸ నీను నజి ఎలాకాలం బత్తిన్ సరి తోరిస్తి. నీను నా వెట మహిజ్ నాను గొప్ప సర్ద ఆజిన”.

²⁹ “నా తంబెరిజాండె, నాను దయెరమ్దాన్ వెప్పిన, మా అనిగొగొ ఆతి దావీదురాజు సాతండ్రె వన్నిజ్ ముస్తార్. వన్నిజ్ ముస్తి బాడ్డి ఎంబె మనాద్ ఇజి ఏలుబా మాటు నెసినాట్. ³⁰ గాని దావీదురాజు దేవుణు ప్రవక్త. దేవుణు వన్ని పేరు అసి వాండ్రె దావీదురాజు వెట ఒట్టు పొక్తాన్. అక్క ఇనిక ఇహిజ, దావీదురాజు కుటుమ్దాన్ ఒరెన్ వన్నిజ్ దావీదురాజు లెకెండె రాజు కిన్ ఇజి. యాక దావీదురాజు నెస్త మహాన్. ³¹ దేవుణు యేసుక్రీస్తుజ్ సాతి వరి బాణిజ్ డిసెవన్ ఇజి, యేసుక్రీస్తు పీనుగు సబ్జి సొన్విద్ ఇజి దావీదురాజు ముందాల్నె నెస్తాన్. ముందాల్నె నెస్తాండ్రె, యేసు సాతి

* 2:15 2:15 యూదురు పండోయే వేడడుదు పెందాల్నె ఉణెవెర్. పార్లనం వీజితి వెనుక తొమ్మిది గంట వెనుకానె ఉణారె † 2:17 2:17 దర్చనమ్కు. దేవుణుబాణిజ్ వాని మాటెజిని బొమ్మెజ్ కలాదు సుడిజితి లెకెండె తెలివి మహివలె సూణిక

వెనుక మరి మరిని నిజ్ నానలె ఇజి ముందాల్న దావీదురాజు వెహ్లాన్. 32 యా యేసుజ్ దేవుణు మరజి బత్తిస్తాన్. దన్నిజ్ మాపు విజెపె సాసీర్. 33 అహిజ దేవుణు యేసుజ్ వన్ని ఉణెర్ పడకాద్ బన్ పిసి వన్నిజ్ ఇంక మిస్తి గవరం ఏలు సిత్తాన్. దేవుణు సీనా ఇజి ఒట్టు కిత్తి వన్ని ఆత్మ యేసుజ్ సిత్తాన్. ఏలు మీరు సుడెజినికెట్ వెంజినికెట్ యేసు మజీ సీనా ఇజి వెహ్లా దేవుణు ఆత్మనె. 34-35 దావీదురాజు వెహ్లా వన్ని వందిజె ఆవిద్. దావీదురాజు పరలోకమ్దు సాన్ ఏన్. గాని వాండ్రు ఈహు వెహ్లాన్, నాను నిజి పడెక వరిజ్ నీ పాదమ్కాజ్ ముణుకుజ్ ఊర్జి మాడిసెప్పిన్ దాక నీను నా ఉణెర్ పడకాదు బసి మన ఆ ఇజి దేవుణు నా ప్రబు వెట వెహ్లాన్.

36 పేతురు మరి వెహ్లాన్, “ఇస్రాయేలు కుటుమ్ దికార్ ఆతి మాటు విజెటె యాక అనుమానం సిల్లెండ నెస్టెజ్ వలె. మీరు సిలువాద్ సప్తి యేసుజ్ దేవుణు ప్రబువజ, క్రీస్తువజ ఏర్ పాటు కిత్తాన్”. 37 యాక వెహ్లా లోకుర్ వరి మన్నుదు నండో బాద్ ఆజి పేతురుజ్ మరి అపొస్తరుజ్ వెన్ బాతార్, “దాదారండె, ఏలు మాపు ఇనిక కిడెజ్ అటూప్?” 38 అయావలె పేతురు వెహ్లాన్, “మీ పాపమ్ కు విజి ఒప్పుకోడెజి డిసీసిజి, దేవుణుదిజ్ లోజిజి నాన్ ఇజి విజెరిజ్ తోరిస్టెజ్ యేసు, క్రీస్తు ఇజి, వాండ్రు, మీ ప్రబు ఇజి తోరిస్టెజ్ బాప్తీసం లాగె ఆదు. అయావలె మీ పాపమ్ కు నొరె ఆనె. దేవుణు సీనా ఇజి ఒట్టు కిత్తి దేవుణు ఆత్మ నిజి దోహ్ క్వాద్ లె.

39 దేవుణు సీనా ఇజి ఒట్టు కిత్తి యా దేవుణు ఆత్మ మిజి, మీ కొడెరిజ్, దూరమ్ ది వరిజ్ విజెరిజ్ దేవుణు సీనాన్. వన్ని మున్ను నమ్మిదెజ్ దేవుణు కూక్కి వరిజ్ విజెరిజ్ దేవుణు ఆత్మ సీనాన్”. 40 మరి నండో నండో మాటెజాణ్ పేతురు వరిజ్ గటిజ వెహ్లాన్. దేవుణుదిజ్ డిసీసి సాని యా సెజ లోకాజ్ వాని తీర్పుదాన్ మీరు గెల్చి సాండ్రెజ్ ఇజి పేతురు వరిజ్ మరి మరి వెహ్లాన్. 41 పేతురు వెహ్లా మాటెజ్ నమ్మిత్తికార్ బాప్తీసం లాగె ఆతార్. అయా రోజు రమరమి మూండ్రె వేలు లోకుర్ యేసుజ్ నమ్మిత్తి వరివెట కూడితార్.

నమ్మిత్తికార్ కూడెజి మంజినార్

42 వారు అపొస్తరు నెన్ పిస్తి మాటెజ్ డిసెన్ ఏండ మహర్. వారు యేసుజ్ నమ్మిత్తికార్ కూడెజి మంజిని బాన్ డిసెన్ ఏండ కూడెజి వాతార్ ప్రబు ఏర్ పాటు కిత్తి బోజనం † కిజి మహర్. డిసెన్ ఏండ పార్దనం కిజి మహర్. 43 అపొస్తరు దేవుణు సత్తుదాన్ నండో బమ్మాని పణిజ్ బమ్మాని గుర్తుజ్ కిత్తార్. అయావలె విజెరె నండో బమ్మ ఆతార్. 44 యేసుజ్ నమ్మిత్తికార్ విజెరె ఉండ్రె మన్ను మంజి వరిజ్ కల్లితి మహిక విజి విజెరె వందిజ్ కర్చు కిత్తార్. 45 అక్కాదె ఆవిండ వారు వరి ఆస్టిజ్ పొర్చి ఎయెజ్ ఎయెజ్ అవ్ సరం మనాదో వరిజ్ సిత్తార్. 46 రోజు తవ్ ఏండ వారు యెరూసలేమ్ దు మన్ని దేవుణు గుడిది డేవాదు కూడెజి వాజి మహర్. వారు విజెరె ఇల్లదిజ్ తవ్ ఏండ కూడెజి వాతార్ సర్ద ఆజి బోజనం కిజి మహర్. ఎయెజ్ బా అవ్ సరం మన్ని వరిజ్ వారు సర్దదాన్ సీజి మహర్. 47 వారు దేవుణుదిజ్ స్తుతి కిజి మహర్. బాన్ మహికార్ విజెరె యా యేసుజ్ నమ్మిత్తి వరి వందిజ్ ‘వీరు ఎసానొ నెగ్గికార్’ ఇజి వెహ్లాన్. రోజురోజు యేసుప్రబు మున్ను నమకం ఇడెతి వరి లెక్క వాండ్రు నండో కిత్తాన్.

3

నడిదెజ్ అట్ ఇ సాట వన్నిజ్ పేతురు నెగండ కిత్తాన్.

1 ఒర్నెండు వేల మూండ్రె గంటెజ్ టయమ్ దు, లోకుర్ దేవుణు గుడిదు పార్దనం కిని టయమ్ దు పేతురు, యోహాను, రిఎర్ కూడెజి దేవుణు గుడిదు సాన్ని మహర్. 2 పుట్టి బాణిజ్ అసి నడిదెజ్ అట్ ఇ ఒరన్ సాట వాండ్రు అబ్బె దేవుణు గుడిది లోజి సాని సరి పడకాద్ డబ్బు లోసి మహాన్. దేవుణు గుడిది డేవాదు సాని అయ సరి పేరు సుందరం ఇహర్. అయ సాట వన్నిజ్ వన్ని లోకుర్ రోజు పిండిజి తసి అయ పడకాద్ ఇడెజి మహర్. 3 పేతురు యోహాను దేవుణు గుడిదు సాని సరి డగ్రు వాతిజ్ అయ సాట వాండ్రు డబ్బుజ్ లోస్తాన్. 4 లోస్తాజ్, పేతురు వన్నిజ్ డిటం బేస్తాన్. యోహానుబా వన్నిజ్ నె డిటం బేస్తాన్. పేతురు వన్నివెట, “నీను మా దరోట్టె బేన్ అ” ఇహాన్. 5 అందెజె సాట వాండ్రు, వీరు ఇనికబా సీనార్ ఇజి ఒడిబిజి వరి దరోట్టె బేస్తాన్.

† 2:42 2:42 యేసుప్రబు సాపు వందిజ్ గుర్తు కిడెజ్ మన్ని బోజనం

6 గాని పేతురు, “నిజీ సీదెజ్ నా బాన్ డబ్బుజ్ సిల్టా. గాని నా బాన్ మనిక నాను నిజీ సీనా. నజరేతుదికాన్ యేసుక్రీస్తు అతికారమ్దాన్ నీను నడిఃఅ”, ఇహాన్.

7 పేతురు అయ సొట వన్నిజ్ ఉణికిదు అస్తాండ్రె నిక్తాన్. వెటనె వన్ని పాదమ్కు కణ్క కాల్కు సత్తు ఆతె. 8 వాండ్రు లిటనె నిజితండ్రె నడిఃతాన్. పేతురు యోహాను వెట దేవుణు గుడిః డేవాదు నడిఃజి సొహండ్రె డాట్టి దేవుణుదిజ్ స్తుతి కిత్తాన్. 9 వీండ్రు నడిఃసినిక, దేవుణుదిజ్ స్తుతి కినిక విజేరె సుడఃతాన్. 10 దేవుణు గుడిఃదు సొని సుందరం ఇని సరిడగ్గు బసి డబ్బు లొసి మహి అయ సొట వాండ్రు వీండ్రె ఇజి వారు గుర్తు అస్తాన్. వన్నిజ్ జర్గితిక సుడఃజి వారు విజేరె గొప్పు బమ్మ ఆతాన్.

దేవుణు గుడిఃదు మన్ని లోకుర వెట పేతురు వర్గిజనాన్

11 పేతురు, యోహానుని అయ నెగెండ అతికాన్ దేవుణు గుడిఃదు మన్ని సొలోమోను ఇని అరబుదు మహాన్. ఆ నెగెండ అతికాన్ పేతురుజ్ యోహానుజ్ గటిజ కిక్కుజ్ అసి మహాన్. అబ్బె మహికార్ జర్గితిక సుడఃజి గొప్పు బమ్మ ఆతారె పేతురు యోహానుని నెగెండ అతి సొట వాండ్రు మహికాన్ ఉక్కుసి వాతాన్. 12 లోకుర విజేరె కూడఃజి వానిక సుడఃతండ్రె పేతురు వరిజ్ వెన్బాతాన్, “ఇస్తాయేలు లోకాండె, ఇబ్బె జర్గితిక సుడఃజి మీరు ఎందనిజ్ బమ్మ ఆజినిదెర? మీరు ఎందనిజ్ మజి బేసినిదెర? మా సొంత సత్తుదాన్, మా బక్తిదాన్ వీండ్రు నడిఃదెజ్ కిత్తాప్ ఇజి మీరు ఒడిఃబిజినిదెరా? 13 మా అనిగొగొర ఆతి అబ్రాహాం, ఇస్సాకు, యాకోబు పార్దనం కిత్తి దేవుణు, యా సొట వన్నిజ్ నెగెండ కిజి వన్ని సేవ కినికాన్ ఆతి యేసుజ్ నండొ మర్యాద సిత్తాన్. గాని మీరు యా యేసుజ్ సప్తెజ్ ఒపజెప్తిదెర. పిలాతు యేసుజ్ డిఃసిసిదెజ్ ఒడిఃబిత్తిజ్బా మీరు పొని ఇహిదెర. 14 పాపం సిల్లి నీతినిజిల్లుమన్ని వన్నిజ్ మీరు పొని ఇజి వెప్తిదెర. లోకాజ్ సప్పి ఒరెన్ వన్నిజ్ మీరు డిఃసిసిదు ఇజి వెప్తిదెర. 15 విజు దన్నిజ్ బత్తు సిత్తి వన్నిజ్ మీరు సప్తిదెర. గాని దేవుణు వన్నిజ్ మరజి నిక్తాన్. యా సజతి వందిజ్ మాపు విజెవె సొసిరె.

16 యేసు సత్తుదాన్యె యా సొట వాండ్రు సత్తుఆతాన్. మీరు విజిదెర ఏలు సుడఃజినిక యేసు పేరుదు ఇడ్డి నమకమ్దానె వాతాద్. యేసు ముస్సు ఇడ్డి నమకమ్దానె విన్నిజ్ సత్తు వాతాద్”. 17 “ఏలు నా తంబెరిజాండె, మీరుని, మీ పెద్దెలుజ్, యేసుజ్ కిత్తిక మీరు ఇనిక కిజినిదెరొ ఇజి నెన్విండ కిత్తిదెర ఇజి నాను నెస్సు. 18 దేవుణు నండొ పంటిజ్ ముందాల్పా విజేరె ప్రవక్తర్ వెట ‘వన్నిక్రీస్తు కన్యమ్కు ఓరిస్సాలె’ ఇజి వెప్తా మహాన్. దేవుణు ముందాల్పా వెప్తివజనె ఈహు జర్గితాద్. 19-20 దేవుణు మీ పాపమ్కు నెమిస్సి వందిజ్ మీరు మీ పాపమ్కు ఒప్పుకోడఃజి డిఃసిసిజి దేవుణు డగ్గు మరజి రదు. దేవుణు మీ ఆత్మదిజ్ నెగ్గి పాణం సీని వందిజ్, దేవుణు మీ వందిజ్ ఏరపాటు కిత్తి క్రీస్తు ఆతి యేసుజ్ మీ డగ్గు పొక్కి వందిజ్ దేవుణు డగ్గు మరజి రదు. 21 దేవుణు ముందాల్పా వాండ్రు పొక్కి ప్రవక్తర్ వెట వెప్తివజ దేవుణు విజు దన్నిజ్ కొత్తాక లెకెండ కినిదాక యేసు పరలోకమ్దు మండ్రెజ్ వలె. 22 దేవుణు - ప్రవక్తరు లోఇ ఒరెన్ మోసె ఇనికాన్ ఈహు వెప్తాన్: “ప్రబు ఆతి మీ దేవుణు, నా లెకెండ ఒరెన్ ప్రవక్తెజ్ మీ లోకుర లోఇహాన్ పుటిస్సాలె. వాండ్రు వెప్పిక విజు మీరు నెగెండ వెంజి లోజిదెజ్ వలె. 23 ఎయెరబా ఆ ప్రవక్త వెప్పిక వెంజి లోజివిండ మహిజ వాండ్రు దేవుణు లోకుర వెట మన్విండ పూర్తి పాడాఃనా సొనాన్.

24 నముయేలు ప్రవక్త, వన్ని వెనుక వాతి ప్రవక్తరు విజేరె యా దినమ్కాజ్ వందిజ్ దేవుణు సిత్తి మాటెజ్ ముందాల్పా వెప్తా మహాన్. 25 దేవుణు ప్రవక్తర్ వెట కిత్తి ఒట్టు మీ వందిజి. దేవుణు మీ అనిగొగొర వెట కిత్తి ఒట్టు మీ వందిజి. మీ అనిగొగొర ఆతి అబ్రాహాం వెట దేవుణు కిత్తి ఒట్టు ఇనిక ఇహిజ, మీ తెగాది వన్ని బాణిజ్ యా లోకమ్దు మన్ని విజేరిజ్ నాను దీవిస్సు. 26 అందెజి దేవుణు వన్ని సేవ కిని క్రీస్తుజ్ ఏరపాటు కితాండ్రె ముందాల మీబానె పొక్తాన్. ఎందనిజ్ పొక్తాన్ ఇహిజ మీ సెఇ పణిజాణ్ మజి డిఃబిసి దేవుణుబాన్ మరజి తసి మిజి దీవిస్సెజ్ వన్నిజ్ పొక్తాన్”, ఇజి పేతురు వెప్తాన్.

4

పేతురుజ్ యోహానుజ్ అస్తాన్

1 పేతురు యోహాను లోకుర్ వెట వర్గిజ మహిజ్ పుజేరిజు, నదుకెయరు, దేవుణు గుడిఁదు మన్ని జమాన్జ అతికారి పేతురు యోహాను బాన్ వాతార్. 2 అపొస్తరు నెన్పిసినిక వెహారె వారు కోపం ఆతార్. ఎందనిజ్ ఇహిజ యేసు సాజి మరజి బత్తితాన్ ఇజి వెప్పి సాతికార్ మరి బత్తినార్ ఇజి వారు రుజుప్ కితార్. 3 వారు పేతురుజ్ యోహానుజ్ తొప్తా ఒతారె మహ్నా నాండిజ్ పెందాల్ దాక జెలిదు ఇట్టార్. ఎందనిజ్ ఇహిజ అయావలె పొదొయ్ ఆత మహ్ద. 4 గాని వారు నెన్పిసినిక వెహికార్ నండొ లోకుర్ యేసుజ్ నమ్మితార్. యేసుజ్ నమ్మిత్తి వరి లెక్క ఏలు రమరమి అయ్దు వేలు ఆతాద్.

5 మహ్నా నాండిజ్ యూద అతికారిజ్, యూద పెద్దెలుజు, యూదురి రూలు నెప్పిసినికార్ వీరు విజేరె యెరూసలేమ్దు కూడిఁత వాతార్. 6 విజేరె పుజేరిజ మున్సు పెరి పుజేరి ఆతి అనయు, కయవయు, పెరి పుజేరి కుటుమ్దికార్ యోహాను, అలెక్సంతరు ఇనికార్, మరి సెగొండార్ మొగకోడొరి బాన్ కూడిఁత వాతార్. 7 వారు పేతురుజ్ యోహానుజ్ వరి ముందాల నిల్స్తారె వెన్బాతార్, “మీరు ఎమేణి నత్తుదాన్, ఎయె పేరుదాన్ ఇక కిత్తిదెర్?”.

8-9 అయావలె దేవుణు ఆత్మ సత్తు పేతురు మున్సు వాతాద్. అయ సత్తుదాన్ పేతురు వెప్తాన్: “లోకాజ్ అతికారిజాండె, పెద్దెలుజాండె, యా సొట వన్నిజ్ కిత్తి నెగ్గి పణి వందిజ్ వాండ్రు ఎయె సత్తుదాన్ నెగెండ ఆతాన్ ఇజి మీరు మజి నేండ్రు కరాయి ఇజినిదెర్. 10 దిన్ని వందిజ్ మాపు వెప్తాజ్ ఇహిజ, మీరు విజిదెరె, ఇస్తాయెలు లోకుర్ విజేరె యాక నెస్తజ్ వలె. మీరు సిలువాదు డెయేజి నప్పి యేసుక్రీస్తుజ్ దేవుణు మరజి బత్తిస్తాన్. సాతి బత్తితి నజరేతు వాండ్రు ఆతి యేసుక్రీస్తు సత్తుదాన్ వీండ్రు పూర్తి నెగెండ ఆజి మీ నడిఁమిదు మనాన్. 11 యా యేసుక్రీస్తు వందిజ్ ఈహు రాస్త మనాద్. అక్క ఇనిక ఇహిజ, ఇల్లు తొప్పి మీరు నెక్రిపోక్తి పణుకునె మూలదిజ్ మూలపణుకు ఆతాద్.

12 యేసునె మిజి వాజిని సిక్కుదాన్ గెల్పెస్తిజ్ అట్టాన్. ఎందనిజ్ ఇహిజ యా లోకమ్దు లోకాజ్ వాని సిక్కుదాన్ వరిజ్ గెల్పెస్తిజ్ మరి ఎయెరి పేరుబా దేవుణు సివితాన్. యేసు పేరునె సిత్తాన్.

13 పేతురు యోహాను తియెల్ ఆవిండ నెగెండ వర్గిజని మాటేజ్ వెంజి సన్హద్రిం సజమ్దికార్ బమ్మ ఆతార్. “వీరు ఇనికబా నెన్ఇకార్, పెరి సదువు సద్విఇకార్” ఇజి నెస్తారె బమ్మ ఆతార్. పేతురు యోహాను యేసు వెట కూడేజి మహికార్ ఇజి వారు నెస్తార్. 14 గాని ఆ నెగెండ అతికాన్ పేతురు యోహాను వెట నిల్పి మహిజ్ ఇనికబా మరజి వెప్తాజ్ సన్హద్రిం సజమ్దికార్ అట్వెతార్. 15 అందెజి వారు పేతురుజ్ యోహానుజ్ నెగెండ ఆతి వన్నిజ్ సజమ్ లొఇహాన్ వెల్లి పొక్తారె వరి లొఇ వారె వర్గితార్. 16 “విరిజ్ ఇనిక కిదెజ్? వీరు కిత్తి బమ్మాని పణి వందిజ్ యెరూసలేమ్దికార్ విజేరె నెసినార్. అక్క జర్పితాద్ ఇజి మాటు వెప్తాజ్ అట్వెట్. 17 యేసు పేరు అసి ఎయెన్ వెటబా ఎనెబా ఇనికబా వెహ్యోట్ ఇజి మాటు విరిజ్ గటిజ వెహ్యోట్. యా సజతి మహికార్బా నెన్విండ మండ్రెజ్” ఇహార్.

18 అయావలె వారు పేతురుజ్ యోహానుజ్ లొఇ కూక్తారె, “ఎనెబా యేసు పేరు అసి వెహ్యోట్. యేసు పేరు అసి బోదిస్మాట్”, ఇజి ఆడ్ర సితార్. 19 గాని పేతురు యోహాను ఈహు వెప్తార్, “ఏలు మీరె వెప్తూ, దేవుణుదిజ్ లోబడేదెజా మిజి లోజేదెజా? దేవుణు సుడేతిజి ఎమేణిక సరియాతిక? 20 మాపు ఇహిజ, మాపు సుడేతిజి దన్ని - వందిజ్ మాపు వెహి దన్ని వందిజ్ వెహి - విండ మండ్రెజ్ అట్వెప్”.

21 పేతురుజ్ని యోహానుజ్ ఎలాగ సిక్కు సీదెజ్ ఇజి వారు నెన్వితార్. ఎందనిజ్ ఇహిజ దేవుణు కిత్తి గొప్ప వణి వందిజ్ లోకుర్ విజేరె దేవుణుదిజ్ స్తుతి కిజి మహార్. అందెజి సజమ్దికార్ పేతురుజ్ యోహానుజ్ “యేసు పేరు అసి వెప్తాజ్ అవిద్” ఇజి గటిజ మరి బెద్దిసి వెప్తారె డిస్తార్. 22 దేవుణు వన్ని సత్తుదాన్ బమ్మాతి పణి కిజి నెగెండ కిత్తి యా సొట వన్నిజ్ వయసు నలవయ్ పంటేజ్ ఎక్కునె మహాద్.

నమ్మితి వరి పార్దనం

23 పేతురు యోహాను డిఁబె ఆతి వెటనె నమ్మిత్తి వరి డగ్గు సొహార్. సొహారె పెరి పుజేరిజు, పెద్దెలుజు వరి వెట వెహికారి విజు వెప్తార్. 24 పేతురు యోహాను వెహికారి వారె విజేరె కూడిఁతారె ఉండ్రె మన్సుదాన్ దేవుణుదిజ్ ఈహు పార్దనం కితార్, “విజు దన్నిజ్ ప్రబు ఆతి దేవుణు, నీనె ఆగానం, బూమి, సమ్దరం, వనక లొఇ మన్ని విజు దన్నిజ్ పుటిస్తి. 25 దేవుణు, నీ సేవ కినికాన్ ఆతి మా అనిగొగొ దావీదురాజు వెహికారి నీ ఆత్మ సత్తుదాన్ నీనె వెహిపిస్తి. అక్క ఇనిక ఇహిజ, యా యూదురు

అఇకార్ ఎందనిజ్ కోపం ఆజినార్. యా లోకుర్ ఎందనిజ్ ఇని దన్నిజ్ పణిదిజ్ రెవకెజ్ ఒడిబిజినార్? 26 బూ లోకమది రాజర్, అతికారి లోకుర్, ప్రబు ఆతి దేవుణు వెట, దేవుణు ఏర్పాటు కిత్తి క్రిస్తు వెట ఎద్రిస్తెజ్ కూడేజి వాజినార్.

27 అపొ హేరోదు, పొంతి పిలాతు, యూదురు, యూదురు అఇ లోకుర్ వెట యా పట్టుమదు కూడిత మహర్. వారు నీను ఏర్పాటు కిత్తి పాపం సిల్లి నీ సేవ కినికాన్ ఆతి యేసుజ్ సప్తజ్ ఒడిబిజి మహర్. 28 దేవుణు, నీ సత్తుదాన్, నీ ఇష్టమదాన్ ఇనిక జర్గినాదెల ఇజి ముందాల్లి నీను ఏర్పాటు కిత్తిదొ అయాలెకెండె వారు కిత్తార్. 29 ఏలు ప్రబువా, వారు మజి బద్రిసిని దన్నిజ్ సుడేఅ. మీ సేవ కినికార్ ఆతి మాపు నండొ దయరమదాన్ నీ మాటెజ్ బోద్రిస్తెజ్ మజి సత్తు సిదా. 30 క్రస్టమకు మన్ని వరిజ్ నెగెండె కిజి మీ సత్తు తోరిసెఅ. మీ బాణిజ్ వాతి నమ్మిదెజ్ తగ్గికాన్ ఆతి మీ సేవ కినికాన్ ఆతి యేసు పేరుదాన్ గొప్ప బమ్మాతి పణిజ్ బమ్మాతి గుర్తుజ్ కిఅ”.

31 వారు పార్దనం కిత్తి వెనుక వారు కూడేజి మహి బాడ్డి కద్దితాద్. అయాలె దేవుణు ఆత్మ సత్తు వరి ముస్సు వాతాద్. వారు దయరమదాన్ దేవుణు మాటెజ్ వెహ్దార్.

నమ్మితికార్ వరి అస్తి అపొస్తురుబాన్ తతార్

32 నమ్మితికార్ విజేరె ఉండ్రె మన్ను అజి ఎయెన్బా సరిసె వన్నిజ్ మన్నిదన్ని - బాణిజ్ ఇనికబా నాదిసె ఇజి ఆవద్ ఇజి వరిజ్ మన్నిక విజెరె వందిజ్ కర్పు కిత్తార్. 33 దేవుణు సత్తుదాన్ బమ్మాతి పణిజ్ కిజి అపొస్తురు ప్రబు ఆతి యేసు, సాతివరి - బాణిజ్ మర్జి బత్రితాన్ ఇజి సాసి వెప్పొ మహర్. దేవుణు దయాదర్మం వరి ముస్సు నండొ మహద్. 34-35 బూమిజ్ ఇల్లు కల్లితి మహికార్ విజేరె అక్కెజ్ పొర్ని కల్లితి డబ్బు అపొస్తురు డగ్గు తతార్. విజేరెజ్ వరివరి అవ్సరం సుడేజి సిబాజి సితార్. అందెజె వరి లోఇ ఎయెన్బా సరి అవ్సరం వాతిజ తక్కు సిల్లిండ ఆతాద్.

36 కుప్ర దేనమదు పుట్టి లేవి కుటుమదికాన్ ఆతి యోసిపు ఇని ఒరెన్ మహాన్. వన్నిజ్ అపొస్తురు బర్బుబ ఇజి కూక్కి మహర్. (వన్ని పేరు అర్దం ఇనిక ఇహిజ సాయం కినికాన్ ఇజి) 37 వాండ్రు వన్నిజ్ మహి బూమి ఉండ్రె పొర్ని అయ డబ్బు అపొస్తురు డగ్గు తతాన్.

5

అననియ, సపీర

1 అయాలె అననియ ఇని ఒరెన్ మహాన్. వన్ని ఆల్ని పేరు సపీర. వారుబా ఉండ్రె బూమి పొర్దార్. 2 పొర్దారె మాసి సెగం ఇట్టాండ్రె మిగ్లితి డబ్బు అపొస్తురు డగ్గు ఒతాన్. యాక విజి ఆల్నిబా నెస్తాద్. 3 అయాలె పేతురు అననియెజ్, “నీ బూమి పొర్ని డబ్బుజాణి సెగం డాప్టి దేవుణు ఆత్మదిజ్ ఎందనిజ్ మొసెం కిత్తి? నన్ని మొసెం పణి కిదెజ్ నీను ఎందనిజ్ నీ మన్నుదిజ్ నయ్తానుజ్ ఒవజెప్తి? 4 బూమి నీ బాన్ మహివలె నీదినెగదె. అక్క పొర్నివలెబా ఆ డబ్బు నీ సాంతనె గదె. నిన్ని పణి కిదెజ్ ఎందనిజ్ నీ మన్నుదు ఒడిబిత్తి? నీను లోకు వెట ఆవద్, దేవుణు వెటనె అబద్దం వర్గితి”, ఇజి వెహ్దాన్.

5 అననియ యా మాటెజ్ వెహివెటనె అర్దాండ్రె పాణం డిస్తాన్. యాక వెహికార్ విజేరె తియెల్ ఆతార్. 6 దక్షణాయెర్ వాతారె పినుగుదిజ్ పాతెజ్ సుటిస్తారె, పిండిజి ఒతారె ముస్తారె.

7 రమరమి మూండ్రె గంటెజ్ వెన్యా వన్ని ఆల్ని జర్గితిక నెన్వండ లోఇ వాతాద్. 8 పేతురు దన్ని వెట, “మీరు యా బూమి నిస్సా డబ్బుదిజి పొర్నిదెరా, వెహ్అ”, ఇహాన్. వెన్బాతిజ్ అది, “నిస్సాదిజి పొర్నావ్”, ఇహాద్. 9 పేతురు దన్ని వెట, “మీరు రిఇదెర్ కూడేజి దేవుణు ఆత్మదిజ్ తప్పు వెహ్తిదెర్. దేవుణు ఆత్మదిజ్ తప్పు వెహ్తి మొసెం కిదెజ్ మీరు ఎందనిజ్ ఒడిబిత్తిదెర్? ఇదిలో నీ మాసిజ్ ముస్తికార్ ఇబ్బె మనార్. వారు నిజిబా పిండిజి ఒనార్”, ఇహాన్.

10 వెటనె అది పేతురు పాదం డగ్గు అర్దాదె పాణం డిస్తాద్. అయ దక్షణాయెర్ లోఇ వాతారె అది సాతాద్ ఇజి సుడేతారె దన్నిజ్ పిండిత ఒతార్. ఒతారె మాసి డగ్గు ముస్తారె. 11 దేవుణు సజమదు మహికార్ విజేరె, యా మాటెజ్ వెహికార్ విజేరె గొప్ప తియెల్ ఆతార్.

అపొస్తురు నండొ లోకాజ్ నెగెండె కిత్తార్

12 అపొస్తురు లోకుర్ నడిమి నండొ బమ్మాతి వణిజ్ బమ్మాతి గుర్తుజ్ కిత్తార్. నమ్మిత్తికార్ విజేరె ఉండ్రె మన్ను ఆజి దేవుణు గుడిడు మన్ని సొలోమోను అరుజు ఇని బాడ్డిదు కూడేజి వాజి మహార్. 13 'యా నమ్మిత్తికార్ ఎస్సానొ నెగ్గికార్' ఇజి లోకుర్ వెహ్తార్. అహిజ్ బా మరి ఎయెరబా నమ్మిత్తికార్ వెట కూడేదెజ్ తియెల్ ఆతార్. 14 గాని నండొ లోకుర్, మొగ్గకొడోర్, అయ్లికొడోక్ యేసుజ్ నమ్మిత్తారె నమ్మిత్తి వరివెట కూడితార్. 15 అందెజి అపొస్తురు కిత్తి గొప్పు వణిజ్ సుడేతారె కస్తం మన్ని వరిజ్ సాప మున్ను, మన్నుమ్ మున్ను, పేతురు నడిజి వాని సరిపడకాదు తతార్. ఎందనిజ్ ఇహిజి పేతురు అయ సరి వానివలె వన్ని నీడేబా తాక్కిజి నెగెండ ఆనార్ ఇజి. 16 యెరూసలేమ్దు సురుల మన్ని నాహ్కణిజ్ బా నండొ లోకుర్ బాన్ వాతార్. వరి లోక కస్తమ్కు ఆతివరిజ్, దెయమ్ కాణిజ్ మాలెజ్ ఆతివరిజ్ అబె తసి మహార్. విజేరె నెగెండ ఆతార్.

యూదురి అతికారిజు అపొస్తురిజ్ మాలెజ్ కిత్తార్

17 నస్తవలె విజేరె పుజేరిజి మున్ను, పెరి పుజేరి, వన్ని వెట కూడితి మహికార్ విజేరె, ఇహిజి, నదుకెయరు ఇని పారి లోక నెగెండార్ అపొస్తురు వెట గొప్పు గోస ఆతార్. 18 వారు అపొస్తురుజ్ అస్తారె పట్టుమ్దు మన్ని జెలిదు ఇట్టార్. 19 గాని దేవుణు దూత పొదోయ్ వాతండ్రె జెలిది సేష్టాజ్ రేతాండ్రె వరిజ్ వెల్లి తతాన్. 20 వెల్లి తతాండ్రె దూత, "మీరు దేవుణు గుడి డేవాదు సొన్ని లోకాజ్ విజెరిజ్ యా కొత్త బత్తువందిజ్ హూర్ వెహ్చు" ఇహాన్.

21 వారు జాయ్ అని డగ్రు దేవుణు గుడి డేవాదు సొహారి దూత వెష్టా వజి లోకాజ్ బోదిస్తెజ్ మొదోల్స్తార్. వెనుక, విజేరె పుజేరిజి మున్ను, పెరి పుజేరి, వన్నివెట మహికార్ వాతారె సన్హద్రి సజమ్దు మహి యూదవెద్దెలుజి విజేరిజ్ కూక్కి మీటిజ్ కిత్తార్. మీటిజ్దు కూడితారె జెలిదు మన్ని అపొస్తురుజ్ వరిబాన్ తత్తెజ్ జమాన్జి పోక్తార్. 22-23 గాని వారు జెలిదు సొన్ని సుడేతిజ్ పేతురుని యోహాను లోక సిల్లెర్. వారు మహ్తా వాతారె వెహ్తార్, "మాపు సొన్ని సుడేతిజ్ జేలిదు సేష్టాజ్ తాలం అర్పె మహి, కాప్ కినికార్ సేష్టాజి ముందోల్ నెహ మహార్. గాని మాప్ సొన్ని సేష్టాజ్ రేనివలె లోక వారు సిల్లెర్". 24 వీరు వెష్టాక వెహారి పెరి పుజేరిజి, దేవుణు గుడిది జమాన్జి అతికారి గొప్పు బమ్మ ఆతారె, 'ఇక ఇనిక ఆనాద్లెనొ' ఇజి ఒడిబితార్.

25 అయావలె ఒరెన్ వాతండ్రె, "ఇదిలో మీరు జెలిదు ఇడ్డిమహి లోకుర్ ఏలు దేవుణు గుడిడు నిహారి లోకాజ్ బోదినినార్", ఇజి వెహ్తార్. 26 వెష్టాజ్, అతికారి జమాన్జి వెట సొహాండ్రె అపొస్తురుజ్ కూక్ తతార్. 'లోకు మజి పణుకుజాణిజ్ డెయ్ నారెను' ఇజి తియెల్ ఆతారె అపొస్తురుజ్ ఒపెసి కూక్ తతార్.

27 వరిజ్ కూక్ తత్తారె సన్హద్రిం సజం నడిమి నిల్వార్. నిల్వారె విజేరె పుజేరిజి మున్ను, పెరి పుజేరి వరివెట వెన్బాతాన్: 28 "యా యేసు పేరు అసి బోదిన్మాట్" ఇజి మాపు మిజి డటం బెద్రిసి వెహ్చాప్ గదె. గాని మీరు యెరూసలేమ్దు విజు మీ బోదె సొట్టిదెర్. సాతి వన్ని వందిజ్ మాప్ వన్నిజ్ సహ్చాప్ ఇజి మీరు మా మున్ను, తప్పు ఇడేదెజ్ సుడేజినిదెర్", ఇహాన్. 29 దన్నిజ్ పేతురు మరి అపొస్తురు, "లోకాజ్ అవిద్, దేవుణుదిజి మాపు లోజిదెజ్ గదె? 30 మీరు యేసుజ్ సిలువాదు డెయ్ జి సప్పిదెర్. గాని మా అనిగొగొరి వలెహాన్ అసి మన్ని దేవుణు, వన్నిజ్ సాతి వరి బాణిజ్ నిక్తాన్. 31 యా యేసుజ్ రాజు మరిసి వజి, విజెరిజ్ రక్కిసిని వన్ని వజి దేవుణు గొప్పు మర్యాద సితండ్రె వన్ని ఉణెర్ పడకాదు బన్పిస్తాన్. ఎందనిజ్ ఇహిజి ఇస్తాయేలు లోకుర్ వరి పాపమ్కు డిసి దేవుణుదిజ్ లోజిదెజ్. వరి పాపమ్కు నొరె ఆదెజ్ సరి సీదెజ్ ఇజి దేవుణు వన్ని ఉణెర్ పడకాదు యేసుజ్ బన్పిస్తాన్. 32 యా సజతిజి వందిజ్ మాపు సానిర్. దేవుణుదిజ్ లోజిని వరిజ్ దేవుణు సీని వన్ని ఆత్మబా యా సజతిజి వందిజ్ సాని", ఇజి వెహ్తార్.

33 అపొస్తురు వెష్టాక వెంజి విజేరె పుజేరిజి మున్ను, పెరి పుజేరి, వన్నివెట మహికార్ కోపం ఆతారె 'వరిజ్ సప్పాప్' ఇజి ఒడిబితార్. 34 అయావలె సజమ్దు మహి పరిసయరు లోక ఒరెన్ గమాలియేలు ఇనికాన్ సన్హద్రిం సజమ్దు నిహండ్రె వెహ్చాన్, "వీరు సణెం సజమ్దాన్ వెల్లి నె మనిర్". గమాలియేలు ఎయెన్ ఇహిజి యూదురి రూలుజ్ నెస్సెసిని వరిలోక ఒరెన్. లోకుర్ విజేరె వన్నిజ్ మర్యాద నీజి మహార్. 35 అపొస్తురుజ్ వెల్లి పోక్తారె గమాలియేలు సజమ్ది లోకాజ్

ఈమా వెహ్లాన్, “ఇస్రాయేలు లోకాండె, యా లోకాజ్ మీరు ఇనిక కిదెజ్ ఇజి ఒడిబిజినిదెరో జాగర్ల మండ్రు. ³⁶ సెగం పంటెజ్ ముందాల దూద ఇనికాన్ ఒరెన్ నిజితండ్రె నాను గొప్పవాండ్రు ఇజి వెహ్లాన్. రమరమి నాల్లి వందెజ్ లోకుర్ వన్నివెట కూడితార్. ఎయెరో వన్నిజ్ సహార్. వన్నివెట కూడితి మహికార్ విజెరె సెద్రితారె వరి పణి ఇని దన్నిజ్ రెవీండాతా సాహద్. ³⁷ వెనుక, లోకుర్ లెక్క నుడిని జనాబా దినమ్కాజ్ గలీలయ వాండ్రు ఆతి యూద ఇనికాన్ ఒరెన్ నిజితాన్. మంద లోకుర్ వన్నివెట కూడితారె వారు ఏలుబడి: కినివరి మున్సు ఎద్రిస్తార్. వన్నిజ్బా ఎయెరో సహార్. వన్నివెట కూడితి మహికార్ విజెరె సెద్రిత సాహర్. ³⁸ అందెజె, నాను ఇనిక వెప్పిన ఇహిజ, విరిజ్ ఇనికబా కిమాట్. విరిజ్ డి:సినిఅ. ఎందనిజ్ ఇహిజ విరి ఆలోసనమ్కు, విరి పణిజు లోకువలెహాన్ వాతిక ఇహిజ అది ఇనిదన్ని పణిదిజ్ రెవీండాన సానాద్. ³⁹ గాని ఇక్క దేవుణు బాణిజ్ వాతిక ఇహిజ విరిజ్ అడ్డు కిదెజ్ మీరు అట్ఇదెర్. అక్కాదె ఆవిండ మీరు దేవుణు వెట టంటెజ్ ఆతికార్ ఇజి మిజి తెలినాద్”. ⁴⁰ సజమ్దికార్ గమాలయేలు వెహ్లా మాటదిజ్ ఒప్పకొటార్. వారు అపొస్తురుజ్ కూక్పిసి వరిజ్ కొండెదాన్ డెయేబిని యేసు పేరు అసి ఎసెజ్బా బోదిస్సాట్ ఇజి డటం వెప్పి వరిజ్ డి:స్తార్.

⁴¹ యేసు పేరు వందెజ్ మాలెజ్ ఒరిస్టెజ్ తగితికార్ ఆతి వందెజ్ అపొస్తురు డెయేతి దెబ్బు తిహిజ్బా సర్ల ఆజి అబెణిజ్ సాహర్. ⁴² రోజు అపొస్తురు దేవుణు గుడి: డేవాదు, లోకురి ఇల్కాజ్ బోదిసి మహార్. యేసు దేవుణు పొక్తి క్రిస్తునె ఇజి నెగ్గిమాట వారు తవ్వేండా బోదిసి మహార్.

6

అపొస్తురు ఏడుగురు మొగ వరిజ్ ఏర్పాటు కిత్తార్

¹ యేసుప్రబుజ్ నమ్మితికార్ ఆ కాలమ్దు నండో లోకుర్ ఆజి వాతార్. అయావలె ముండ మణిసిరిజ్ బోజనం సీని దన్నిలోజ, మా ముండ మణిసిరిజ్ బోజనం సివర్ ఇజి గ్రీకు బాన వర్గిని యూదురు ఏబ్రి బాన వర్గిని యూదురు మున్సు మొరో ఆతార్. ² అయావలె పన్నెండు మణిసిర్ అపొస్తురు నమ్మితి వరిజ్ విజెరిజ్ కూక్తరె వెహ్లార్, “మాపు బోజనం సీబాజి సీని వందెజ్ దేవుణు మాట నెస్సిస్తెజ్ డి:సి సీనిక తగివద్. ³ తంబెరిజాండె, అందెజె ఏడుగురు మొగ వరిజ్ ఏర్పాటు కిదు. మీ లోజ దేవుణు ఆత్మ నిండ్రీతి మన్ని, గెణం నిండ్రీతి మన్ని విజెరె ఒప్పకొటి మని ఏడుగురు మొగ్గ వరిజ్ ఏర్పాటు కిదు, మాపు వరిజ్ యా పణి ఒపజెప్పావ్. ⁴ అహిజ మాపు పార్లనం కిదెజ్, దేవుణు - మాట నెస్సిస్తెజ్ కేట మంజిసావ్”, ఇహార్.

⁵⁻⁶ అపొస్తురి మాటెజ్ అబ్బి కూడితి మహి లోకాజ్ విజెరిజ్ ఇస్తం ఆతాద్. అందెజె దేవుణు మున్సు పూర్తి నమకం ఇడె:జి దేవుణు ఆత్మ సత్తు పూర్తి నిండ్రీతి మహి స్తెపాను, పిలిపు, ప్రొకొరు, నికనొరు, తిమొసు, పర్తనసు, యూద మతమ్దు కూడితి అంతియెకియ దేసమ్దికాన్ నికొలాసు ఇని ఏడుగురు మొగవరిజ్, నమ్మితికార్ అపొస్తురి ముందాల తతార్. అపొస్తురు పార్లనం కితారె వరి మున్సు కిక్క ఇడె:జి వరిజ్ అయా పణి కిదెజ్ అతికారం సితార్. ⁷ అందెజె మరి నండో లోకుర్ దేవుణు మాటెజ్ నమ్మితార్. యెరూసలేమ్దు మన్ని నమ్మితి వరి లెక్క నండో ఆజి వాతాద్. నండోడార్ పుజెరిబు యేసుప్రబు మున్సు నమకం ఇట్టార్.

లోకుర్ స్తెపానుజ్ అస్తార్

⁸ వరి లోజ ఒరెన్, స్తెపాను ఇనికాన్, దేవుణు దయదర్మమ్దాన్ దేవుణు ఆత్మ సత్తుదాన్ నిండ్రీతాండ్రె లోకుర్ నడిమి గొప్ప బమ్మాని పణిజ్ బమ్మాని గుర్తుజ్ కిజి మహాన్. ⁹ గాని, కురెనియ పట్టుమ్దికార్ యూదురు, అలెక్సంత్రియ పట్టుమ్దికార్ యూదురు, (వీరు లిబెర్తి ఇని యూదురు మీటిజ్ ఇండ్రొణి గుంపుదికార్) మరి కిలికియ దేసమ్దాన్ వాతి యూదురు, ఆసియ దేసమ్దాన్ వాతి యూదురు వాతారె స్తెపాను వెట తర్కిస్తార్. ¹⁰ గాని వాండ్రు వెహ్లా మాటెజ్ ఎద్రిస్టెజ్ వారు అట్ఎండాతార్. ఎందనిజ్ ఇహిజ దేవుణు బాణిజ్ వాతి గెణమ్దాన్, దేవుణు ఆత్మ సత్తుదాన్ స్తెపాను వరివెట వర్గితాన్.

¹¹ అయావలె వారు, ‘పీండ్రు మోసె మున్సు, దేవుణు మున్సు దూసినిని మాటెజ్ వర్గినిక మావ్ వెహావ్’ ఇజి వెహ్లాజ్ నెగొండార్ లోకాజ్ ఎయెర్ నెన్ఎండ సుత్రిస్తారె కూడుస్తారె. ¹² కూడుస్తారె,

లోకాజ్, పెద్దెల్జ, యూదురి రూలు నెస్పిసినికార్ విజెరిజ్ రేప్తారె వన్ని మున్సు వాతార్. వాతారె సైపానుజ్ అస్తారె యూద పెద్దెల్జ సన్హద్రిం ఇని పెరి సజమ్దు తతార్. బానె అబద్దం సాసి వెహ్ని వరిజ్ నిల్వార. ¹³ వారు ఈహు వెప్తార్, “వీండ్రు ఎస్తివలెబా దేవుణుదిజ్ కేట కిత్తి యా దేవుణు గుడిడిజ్, మోసా సిత్తిరూలుజ వెత్తేకం వర్గిజనాన్. ¹⁴ యా సజరేతు వాండ్రు ఆతి యేసు యా దేవుణు గుడి పాడు కినాన్, మాటు ఎలాగ నడిడిజ్ ఇజి మోసా మా అనిగోగోరిజ్ సిత్తి మాటేజ్ మారిస్సాన్ ఇజి వీండ్రు వెహ్నిక మాపు వెహ్వి”. ¹⁵ సన్హద్రిం సజమ్దికార్ సైపాను మొకొం డిటం సుడిజి మహిజ్ వన్ని మొకొం దేవుణు దూత మొకొం లెకెండ్ జాయ్ తోర్చిక వారు సుడిజతార్.

7

సైపాను సన్హద్రిం సజమ్దు మన్ని వరివెట వర్గిజనాన్

¹ అయావలె విజేరి పుజేరిజ మున్సు పెరి పుజేరి సైపానుజ్ వెన్బాతాన్, “యా మాటేజ్ నిజమా? వీరు వెహ్ని లెకెండ్ నీను వెహ్నిదా సిల్లెదా?”. ² దన్నిజ్ సైపాను వెహ్నిక ఇనిక ఇహిజ, “తంబెరిజాండ్, బుబ్బురాండ్, వెండ్రు, మా అనిగోగో ఆతి అబ్రాహాం ఆరోను ఇని పట్టుమ్దు బత్తిఎండ ముందాల, మెసాపొతెమియ ఇని దేసమ్దు బత్తిజి మహాన్. అయావలె నండ్ జాయ్ మన్ని దేవుణు వన్నిజ్ తోరె ఆతాన్. ³ దేవుణు అబ్రాహాం వెట ఈహు వెహ్ని, ‘నీను నీ దేసం డిసి, నీ సొంత లోకాజ్ డిసి నాను నిజి తోరిసిని దేసం సాన్అ’.

⁴ అయావలె వాండ్రు కల్లియుజ్ బత్తితి మహి మెసాపొతెమియ దేసం డిసి ఆరోను పట్టుమ్దు సొన్సి బత్తితాన్. వన్ని బుబ్బు సాతి వెనుక అబెణిజ్ మీరు ఏలు బత్తిజిని యా దేసమ్దు బత్తిదెజ్ దేవుణు వన్నిజ్ కూక్ తతాన్. ⁵ అయావలె దేవుణు వన్నిజ్ ఉండ్రి ముక బూమిబా అక్కు సివతాన్, యా దేసమ్దు. గాని అయావలె అబ్రాహాముజ్ కొడోరి సిల్లితిజ్బా దేవుణు వన్ని వెట ఉండ్రి మాట సిత్తాన్. అక్కు ఇనిక ఇహిజ, ‘నిజి, నీ పొటెజాణి వరిజ్ విజెరిజ్ యా బూమి ఆనాద్’. ⁶ దేవుణు వన్ని వెట, ‘నీ పొటెజాణికార్ ఆఇ దేసమ్దు సానారె బానె ఆఇకార్ లెకెండ్ మనార్. అయ దేసమ్దికార్ నీ లోకాజ్ నాల్లి వందెజ్ వంటెజ్ వెట్టివణి కిజిని వరిలెకెండ్ పణి కిబిని వరిజ్ లోజిజి మంజిని వజ ఇణ్డిజి మాలెజ్ కినార్’. ⁷ గాని వారు ఎమేణి దేసమ్దు పణి కిజినారో అయ దేసమ్ది వరిజ్ నాను తీరిపు తీరిసి సిస సీనాలె. వెనుక వారు ఆ దేసం డిసి వాజి యా బాడ్డిదు మంజి నజి పొగిడిజి మాడిస్సార్లె ఇజి వెహ్ని మహాన్. ⁸ దేవుణు అబ్రాహాం వెట ‘విజెరి కుటుమ్కాజ్ పుట్టి మొగ్గ కొడోరిజ్ సునతి కిడిజ్ వలె’, ఇజి వెహ్ని. అందెజ్ అబ్రాహాం, వన్ని మరిసి ఇస్సాకు పుట్టి ఏడు రోస్సు వెనుక మహ్నా నాండిజ్, ఇహిజ, ఎనిమిది రోస్కాజ్ సునతి కిత్తాన్. ఇస్సాకు, వన్ని మరిసి యాకోబుజ్ సునతి కిత్తాన్. యాకోబు వన్ని పన్నెండు మంది మరిసిరిజ్ సునతి కిత్తాన్. యా పన్నెండు మందిని ఇస్సాయేలుది పన్నెండు కుటుమ్ది అనిగోగోరె ఆతార్.

⁹⁻¹⁰ యా పన్నెండు మంది అనిగోగోరె వరి లోఇ తంబెరి ఆతి యోసేపు మున్సు గోస ఆతారె వన్నిజ్ గొత్తి పణి కిడిజ్ పొర్రార్. ఆహె యోసేపు అయ్గుప్పు దేసమ్దు గొత్తి పణి కిత్తాన్. గాని దేవుణు వన్ని వెట మహండ్రి వన్నిజ్ వాతి విజి మాలెజాణిజ్ తప్పిస్తాన్. దేవుణు వన్నిజ్ గెణం సిత్తిజ్ అయ్గుప్పు రాజు ఆతి పరో యోసేపు మున్సు దయ తోరిస్తాన్. పరో రాజు యోసేపుజ్ అయ్గుప్పు దేసమ్దిజ్ నడిపిసిని వన్నిలెకెండ్ నిల్వార. పరో రాజుజ్ కల్లితి మహి విజి వనకాజ్ మున్సు నడిపిసిని వన్నిలెకెండ్ కిత్తాన్.

¹¹ అయావలె అయ్గుప్పు దేసమ్దు విజి, మా అనిగోగోరె బత్తిజి మహి కనాను దేసమ్దు విజి పెరి కరు వాతాద్. కరు వాతిజ్ నండ్ మాలెజ్ వాతె. మా అనిగోగోరె ఆతి వరిజ్ తిండి దొహ్కాండ్ ఆతాద్. ¹² అయావలె, అయ్గుప్పు దేసమ్దు తిండి మనాద్ ఇజి యాకోబు వెహాన్. వెహండ్రి వన్ని మరిసిరిజ్, ఇహిజ, మా అనిగోగోరిజ్ ముందాల్సి ఉండ్రి సుటు బాన్ పోక్తాన్. ¹³ వారు మరి ఉండ్రి సుటు సొహిజ్, యోసేపు, వన్ని దాదారిజ్ వాండ్రు ఎయెన్ ఇజి నెల్వి కిబె ఆతాన్. అయావలె యోసేపు కుటుమ్ది వరి వందెజ్ పరో రాజు నెస్తాన్. ¹⁴ వెనుక యోసేపు వన్ని బుబ్బు ఆతి యాకోబుజ్ వన్ని సొంత లోకాజ్ విజేరిజ్ అయ్గుప్పు దేసమ్దు రదు ఇజి కబ్బు పోక్తాన్. వారు మొత్తం డబయ్ అయ్దుగురు మహార. ¹⁵ అయావలె యాకోబు, వన్నివెట మహికార్ విజేరి అయ్గుప్పు దేసం సాహార. వారు అబ్బె బత్తితాన్.

వెనుక యాకోబు, మహి అనిగొగోరు బానె సాతార్. 16 వెనుక వరి డుముక్ సెకెం ఇని వట్టుమదు మరజి తత్తార్, ముందాల అబ్రాహాం హామోరు మరిసిర్ బాణిజ్ కొటి దూకి లొఇ ముస్తార్*.

17 దేవుణు అబ్రాహాముజ్ ముందాల్ని సెత్తి మాట వజ ఇర్దిదెజ్ డగ్రు ఆజి వాతాద్. అయావలె మా లోకు అయ్యగుప్పు దేసెమదు నండో లోకు ఆజి వాతార్. 18 అయావలె, యోసేపు ఎయెస్ ఇజి నెన్ఇ ఒరెన్ రాజు అయ్యగుప్పు దేసెమదిజ్ ఏలుబడిః కిదెజ్ మొదొల్స్తాన్. 19 యా రాజు మా లోకాజ్ మాయ మాటెజ్ వెప్పి మొసెం కిత్తాన్. గొప్పు మాలెజ్ కిత్తాన్. మొగ్గకొడొః పుట్టిజ వరిజ్ నప్పెజ్ వెటనె గడ్డదు విసిర్దిజ్ వలె ఇజి యా రాజు ఆడ్ర సెత్తాన్. ఎందనిజ్ ఇహిజు వారు సాజి సాండ్రెజ్.

20 ఆ కాలమదు మోసె ఇనికాన్ ఒరెన్ పుట్టాన్. వాండ్రు సుడెదెజ్ గొప్పు నెగ్గికాన్. వాండ్రు మూండ్రె నెలెజ్ దాక వన్ని బుబ్బ ఇండ్రె పిరితాన్. 21 మూండ్రె నెలెజ్ వెనుక వన్నిజ్ ఇండ్రె వెల్లి సోప్పి గడ్డ ఒడ్డుదు ఇట్టార్. అయావలె పరో రాజు గాల్ని వాతాదె కొడొదెజ్ లాగితాదె దన్ని మరిసి లెకెండ్ పోస కిబిస్తాద్. 22 మోసెజ్ అయ్యగుప్పు వరి విజు తెలివి నెన్పిస్తాన్. వాండ్రు, వర్గిని మాటెజ్ లొఇ బాగ వర్గిదెజ్ అట్టాన్. కిని వణిజ్ లొఇ నెగ్రెండ కిదెజ్ అట్టాన్.

23 మోసెజ్ నలవయ్ పంటెజ్ ఆతివలె నా సాంత లోకుర్ ఆతి ఇస్తాయేలుర్ బానె సాన ఇజి బుద్ది పుట్టాద్. 24 వాండ్రు సాహిజ్ అయ్యగుప్పుదికాన్ ఒరెన్, ఒరెన్ ఇస్తాయేలు వన్నిజ్ మాలెజ్ కిజి మహిజ్ సుడెతాన్. సుడెతండ్రె, ఇస్తాయేలు వన్నిజ్ గెల్లిస్తెజ్ ఇజి అయ్యగుప్పు వన్నిజ్ నప్పాన్. ఆహె నాయం తీరిస్తాన్. 25 ఇస్తాయేలు లోకాజ్ వరి బాదెజాణిజ్ డిఃబిస్తెజ్ దేవుణు నజి పోక్తాన్ ఇజి మోసె ఒడిఃబితాన్. గాని వారు అర్ధం కివితార్. 26 ముహ్నా నాండెజ్ మోసె ఇస్తాయేలు లోకాజ్ సుడెఃజి సాహాన్. రిఎర్ ఇస్తాయేలు లోకుర్ టంటెజ్ ఆజి మహిజ్ మోసె వరిజ్ సుడెఃతండ్రె, 'ఒరె ఒరె బాబు, మీరు తంబెరి రిఇదెర్గదె? మీరు ఎందనిజ్ ఒరెన్ వన్ని మున్ను. ఒరెన్ టంటెజ్ ఆజినిదెర్' ఇజి వెప్తాండ్రె వారు రిఎర్దిజ్ కూడుప్పెజ్ ఇజి సుడెఃతాన్. 27-28 గాని ఆఇ వన్ని మున్ను. అనయం కినికాన్ వెప్తాన్, 'మా మున్ను. అతికారి వజ మండ్రెజ్, తీర్పు తీర్స్సి వన్నివజ మండ్రెజ్ నిజి ఎయెస్ ఏర్పాటు కిత్తాన్? నీను ఇఎన్ అయా అయ్యగుప్పు వన్నిజ్ సప్తిలెకెండ్ నజిబా నప్పెజ్ ఇజి సుడెఃజినిదా ఇజి వెప్తాండ్రె మోసెజ్ నెక్తపాక్తాన్. 29 యాక వెహండ్రె మోసె తియెల్ ఆతాన్. వెటనె అయ్యగుప్పు దేసెం డిఃసి సాహాన్. మిద్వాను ఇని దేసెమదు సాహండ్రె ఆఇకాన్ లెకెండ్ బత్తిత్తాన్. బానె పెండ్లి ఆతండ్రె రిఎర్ కొడొఃరిజ్ ఇట్టాన్. 30 నలవయ్ పంటెజ్ వెనుక, సినాయి ఇని పెరి గొరోన్ డగ్రు మన్ని బిడిఃమ్ బూమిదు మహిజ్, ఒరెన్ దేవుణు దూత మోసెజ్ తోరె ఆతాన్. యా దూత వెయెజి మహి తుప్పెజ నడిఃమి ఉండ్రె నీను కొఇ లొఇ తోరె ఆతాన్. 31 మోసె అక్క సుడెఃతిజ్ బమ్మ ఆతాన్. బమ్మ ఆతండ్రె నెగ్రెండ సుడెదెజ్ తుప్ప డగ్రు సాహాన్. డగ్రు సాహిజ్ దేవుణు మాట ఈహు వెహాన్, 32 'నాను నీ అనిగొగోర్ ఆతి అబ్రాహాం, ఇస్సాకు, యాకోబు ఇని వరి దేవుణు'. యాక వెహండ్రె మోసె తియెల్ ఆజి వణెక్తాన్. సుడెదెజ్ బా అట్వితాన్.

33 దేవుణు మరి వెప్తాన్, 'నీ జోడ్డు. కుత్తి ఇడెఃఅ. నీను నిహిమన్ని బాడ్డి దేవుణుదిజ్ కేట ఆతి బాడ్డి'. 34 అయ్యగుప్పు దేసెమదు మన్ని నా లోకాజ్ మాలెజ్ నాను నెగ్రెండ సుడెఃత. వారు అడెఃబానిక వెహ. అందెజి నాను వరిజ్ డిఃబిస్తెజ్ డిఃగిత వాత. ఏలు రత నిజి నాను అయ్యగుప్పు దేసెం పోక్తు ఇజి వన్నివెట వెప్తాన్.

35 'మా మున్ను. అతికారి వజ మండ్రెజ్ తగ్గు తెప్పికాన్ వజ మండ్రెజ్ నిజి ఎయెర్ ఏర్పాటు కిత్తాన్' ఇజి వెప్పి ఇస్తాయేలు లోకుర్, ముందాల నెక్తి పొక్తి యా మోసెజ్, దేవుణు అతికారి వజ, తప్రిసినికాన్ వజ వరిబాన్ పోక్తాన్. వెయెజి మహి తుప్ప లొఇ తోరె ఆతి దేవుణు దూత సాయమ్దాన్ మోసెజ్ దేవుణునె పోక్తాన్. 36 అయ్యగుప్పు దేసెమదు బమ్మ పణిజ్ కిజి మోసె ఇస్తాయేలురిజ్ తప్రిస్త తతాన్. ఎర్దెజ్ సమ్దరంబానె, మరి వారు నలవయ్ పంటెజ్ నడిఃజి సాహిమహి బిడిఃమ్ బూమిదుబా మోసె బమ్మాని వణిజ్ బమ్మాని గుర్తుజ్ కిత్తాన్. 37 యా మోసెనె ఇస్తాయేలురు వెట, 'దేవుణు నజి పోక్తి లెకెండ్ మీబాణిజ్ ఒరెన్ ప్రవక్తెజ్ మీబాన్ పోక్తాన్', ఇహాన్. 38 బిడిఃమ్ బూమిదు నజం కూడిఃతి మహి ఇస్తాయేలు లోకుర్ వెట మహికాన్ యా మోసెనె. మా అనిగొగోర్ వెట మహికాన్ వీండ్రె. సీనాయి

* 7:16 7:16 అయ కాలమదు అయ్యగుప్పు దేసెమదికార్ పిసుగుదిజ్ నూనె రాసి పాత లొఇ ఇద్దార్, నబేండ్ మండ్రెజ్

గొర్రెతు దేవుణు దూత విన్నివెటనె వర్గితాన్. మజీ సీదెజ్ దేవుణు బాణిజ్ ఎల్లకాలం బత్మిని మాటెజ్ తత్తికాన్ వీండ్రె.

39 గాని యా మోసెజ్ మా అనిగొగొర్ లొజిజి మన్ ఏండ నెక్కపొక్కార్. మర్జి అయ్ గుప్పు దేసెమదు సాహిజ నెగ్గెద ఇజి వారు కోరితార్. 40 అయ్ గుప్పు దేసెమదాన్ మజీ కూక్తి తత్తి యా మోసె ఇనిక అతాండ్రొ మజీ తెలివద్. అందెజె మర్జి అయ్ గుప్పు దేసెమదు సొండ్రెజ్ మజీ ముందాల నడిదెజ్ దెయమకు తయార్ కిజి సిదా ఇజి మోసె అన్నసి ఆతి ఆరోసు వెట వెప్టార్. 41 అయావలె వారు ఉండ్రె దూడః లెకెండ బొమ్మ తయార్ కిత్తరె పూజ కిత్తార్. వరి కిక్కాణిజ్ తయార్ కిత్తి దన్నిమున్ను వారు నండొ సర్వ ఆతార్. 42 గాని దేవుణు కోపం ఆతండ్రె మొకొం వెనుక మప్టాన్. ఆగాసెమదు మన్నికెజ్ సుడఃదెజ్, నెల పొద్దు సుక్కెజ్ విజి దన్నిజ్ పూజ కిదెజ్ వరిజ్ డింస్త సిత్తాన్. ప్రవక్తరు ముందాలై రాస్తిమహిక దిని వందిజె. అక్క ఇనిక ఇహిజ “ఇస్రాయేలు లోకాండ, మీరు బిడిఃమ్ బూమిదు నలవయ్ వంటిజ్ నడిసి సాన్సి మహివలె పూజ కిత్తిక నజీనె ఆవద్. 43 మీరు పూజ కినాట్ ఇజి తయార్ కిత్తి మొలూకు రెంపయు ఇని సుక్కెజాణి దెయమకాజె గూడాఃరమదు పిండిజి ఒసి మహిదెర్. వనకాజె పూజ కిత్తిదెర్. అందెజె బబులోసు దేసె అతాలే మజీ తొప్పి ఒతెజ్ నాను సరి సీనాలె. 44 మా అనిగొగొర్ బిడిఃమ్ బూమిదు సాన్సి మహివలె సాసి గూడారం వరివెట మహాద్. దేవుణు మోసెజ్ తొరిస్తి లెకెండ మోసె యా సాసి గూడారం తయార్ కిత్తాన్. 45 మరి లావు పంటిజ్ వెనుక యెహోసువ ఇనికాన్ అయ్ టయమదు యా సాసి గూడారం పిండిత ఒతండ్రె మా అనిగొగొరిజ్ నడిఃపిస్తాన్. అయావలె ఇస్రాయేలు లోకాజ్ సీనా ఇజి దేవుణు వెప్టె దేసెమదు వారు సాహార్. దేవుణు వరివెట మహిజ్ బానె మహి యూదురు ఆఇ లోకుర్ వెట ఉద్దం కితారె, గెల్స్తారె ఆ దేసెం సొంతం కిత్తార్. బానెబా మా అనిగొగొర్ యా సాసి గూడారం పిండిత ఒతార్. దావీదురాజు వరిజ్ ఏలుబడిః కిత్తి కాలమదాక యా సాసి గూడారం బానె మహాద్. 46 దావీదురాజు ఇహిజ దేవుణు వెప్టె వజి నడిఃతికాన్. దేవుణు దయ వన్ని మున్ను లావు మహాద్. అహిజ్ బా మా అనిగొగొ ఆతి యాకోబు పార్లనం కిత్తి యా దేవుణుదిజ్ ఎలాకాలం మండ్రెజ్ ఉండ్రె గుడిః తొప్టెజ్ దావీదు రాజు వెనెబాతిజ్ బా దేవుణు సరి సివితాన్. 47 గాని దావీదురాజు మరిసి ఆతి సొలోమొసుజ్ నె దేవుణు గుడిః తొప్టెజ్ సరి సిత్తాన్. 48 అహిజ్ బా విజెరిజ్ ఇంక గొప్ప పెరి దేవుణు, లోకు కిక్కాణిజ్ తయార్ కిత్తి బాడ్డిదు మన్ ఏన్.

49 దేవుణు మాటెజ్ ప్రవక్త ఈహు వెప్పినాన్: “వరలోకం నాను బనిని సిమననం†. బూమి నా పాదమకు ఇడ్డి పీట. నాను మండ్రెజ్ ఉండ్రె గుడిః తొప్టెజ్ మీరు అట్ ఇదెర్. 50 ఎందనిజ్ ఇహిజ, వరలోకం, బూమి, దన్ని లొజి మన్నికెజ్ విజి నానె పుట్టెన్”. 51 మూర్కం బుద్ది మన్నికిదెరా, దేవుణు మాటెజ్ ఒప్పుకొటావ్ ఇజి మీరు సునతి కిత్తిదెర్ గాని దేవుణు మాటెజ్ గిబ్బిజాణి వెంజిబా సరినె వెనెఇ లెకెండ మంజినిదెర్. వెహిజ్ బా సరినె మన్నుదు ఇడఃఏండ లొజిఇదెర్. మీ అనిగొగొర్ లెకెండ మీరుబా ఎనెజ్ బా సరినె దేవుణు ఆత్మదిజ్ నెక్కిపొక్కినిదెర్. 52 మీ అనిగొగొర్ ప్రవక్తరిజ్ విజెరిజ్ గొప్ప మాలెజ్ కిత్తార్. దేవుణు పొక్కు ఇజి వెప్టె ఆ నీతి వాండ్రు వందిజ్ ముందాలై వెప్టె ప్రవక్తరిజ్ బా మీ అనిగొగొర్ సప్టార్. ఏలు ఆ నీతి వన్నిజ్ మీరు ఒవజెప్టెదెర్. వన్నిజ్ సప్టిదెర్. 53 దేవుణు వన్ని దూతవెట మిజి నీత్తి రూలుజ్ మిజి దోహ్కె గాని మీరు దన్నిజ్ లొజిఇతిదెర్”.

సైపానుజ్ పణుకుజాణిజ్ డెయ్ జినార్

54 యా మాటెజ్ వెహారె వారు గొప్ప కోపం ఆతారె సైపానుజ్ సుడఃజి పల్కు కొహ్కార్. 55 గాని సైపాను దేవుణు ఆత్మ సత్తు పూర్తి నిండ్రెజి ఆగాసం దరోట్ సుడఃతాన్. సుడఃతిజ్ దేవుణు గొప్ప జాయ్ సుడఃతాన్. యేసుప్రబు దేవుణు ఉణెర్ వడఃక నిహి మహిక సుడఃతాన్. 56 “సుడఃఆ, ఆగాసం రే ఆతి మహిక, లోకు మరిసి ఆతి యేసు దేవుణు ఉణెర్ వడఃక నిహిమహిక నాను సుడఃజిన”, ఇజి సైపాను వెహాన్.

57 గాని యా మాటెజ్ వెహారె వెటనె వారు గిబ్బిజ్ మూకె ఆతారె డటం గగోలాజి విజెరె ఉండ్రె ఆజి వన్ని మున్ను వాతార్. 58 పట్టెమదాన్ వెల్లి లాగిత ఒతారె వన్నిజ్ పణుకుజాణి డెయ్ జి సప్టెజ్

† 7:44 7:44 సాసి గూడారం. దేవుణు ఇబ్బె మనాన్ ఇజి లోకాజ్ వెప్పె మహి గూడారం ‡ 7:49 7:49 సిమననం. తీర్పు కిదెజ్ రాజుర్ బనిని కుర్చి

మొదొల్స్తార్. పణుకుజ్ విసిర్ని సాసి లోకుర్ వరి సాక్కెజ్ ముందాల సవులు ఇని ఒరెన్ దజడాఁయెన్ పాదమ్కాజ్ డగ్రు తత్తారె ఇట్టార్.

59 వారు నైపానుజ్ పణుకుజాణిజ్ డెయ్జి మహిజ్ నైపాను, “యేసుప్రబువా నా పాణమ్దిజ్ ఏలు నీ డగ్రు కూడుఁవ్అ”, ఇజి పార్లనం కిత్తాన్. 60 వెనుక నైపాను ముణుకుజ్ ఊర్జి, “ప్రబువా, వీరు కిజిని యా పాపం విరి మున్సు మోప్ప”, ఇజి డటం డేల్స్తాన్. యా మాట వెప్తాండ్రె వాండ్రు పాణం డిస్తాన్. నైపానుజ్ సప్తిక సవులు ఒప్పుకొటాన్.

8

దేవుణుదిజ్ నమ్మితి వరిజ్ సవులు పాడుః కిజినాన్

1 ఆ దినమ్కాజ్ యెరూసలేమ్దు మహి దేవుణు నజమ్దిజ్ గొప్ప మాలెజ్ ఆజి మహాద్. అపొస్తురు ఆవిండ మహి నమ్మితికార్ విజెరె యూదయ సమరియ దేనమ్కాజ్ సెద్రిత సాహార్. 2 బక్తి కల్లితి నమ్మితి లోకుర్ నైపానుజ్ నమాది కితారె వన్ని వందిజ్ గొప్పదుకం ఆజి అడఃబాతార్. 3 నస్తివలె సవులు ఇనికాన్ యేసుప్రబు మున్సు. నమకం ఇడ్డిమహి వరి నమకం పాడుః కిదెజ్ నుడఃతాన్. ఇల్కాజ్ ఇల్కాజ్ డుఃగజి మొగ్గకొడొరిజ్ అయ్లికొడొకాజ్ ఈడిసి ఒసి జెలిదు ఇడఃజి, వాండ్రు నజమ్దిజ్ పాడుః కిదెజ్ మొదొల్స్తాన్.

సమరియ దేనమ్దు సువార్త సాటిస్తార్

4 అయావలె సెద్రితి సాహి నజమ్దికార్ సువార్త సాటిసి విజు బాడ్డిజు విజెరిజ్ వెన్పిసి బూలాతార్. 5 అయావలె అపొస్తురు ఏర్పాటు కిత్తివరి లొఇ ఒరెన్ పిలిపు ఇనికాన్ సమరియ పట్టుమ్దు సాహాన్. అబ్బె యేసు, క్రీస్తు* ఇజి బొద్దిస్తాన్. 6 పిలిపు వెప్తి మాటెజ్ లోకుర్ విజెరె నెగ్రెండ వెహరె వాండ్రు కిత్తి బమ్మాని గుర్తుజ్ నుడఃతార్. 7 కిక్కు కాల్కు సాతికార్, సాటవారు నండొండార్ అబ్బె వాతారె నెగ్రెండ ఆతార్. నండొండార్ లోకుర్ దెయం అస్తి మహికార్ అబ్బె మహార్. దెయమ్కు నండొ గగోలాజి వరిజ్ డిస్తా సాహి. 8 అందెజి సమరియ పట్టుమ్దు నండొ సర్ద కల్లితాద్.

గార్డి పణి కిని సిమోను

9 సమరియ పట్టుమ్దు సిమోను ఇని ఒరెన్ మహాన్. సిమోను ఆ పట్టుమ్దు సెగం పంటెజ్ గార్డి విది కిజి నాను ఒరెన్ గొప్ప వాండ్రు ఇజి వెప్పి మహాన్. అబ్బె మహి లోకాజ్ సిమోను బమ్మ కిబిసి మహాన్. 10 అయ పట్టుమ్దు మహికార్ ఇజిరికార్ పెరికార్ విజెరె వీండ్రు “దేవుణు గొప్ప సత్తు ఇనికాన్” ఇజి వెప్పి వన్ని మున్సు. నమకం ఇడఃతార్. 11 నండొ కాలం సిమోను గార్డి పణి కిజి లోకాజ్ బమ్మ కిబిసి మహాన్. అందెజి వారు సిమోనుజ్ నమ్మితార్. 12 గాని దేవుణు ఏలుబడిః వందిజ్, యేసుక్రీస్తు వందిజ్ పిలిపు పట్టుమ్ది లోకాజ్ సాటిస్తాజ్ యా సువార్త వెహికార్. నమ్మితారె మొగ్గకొడొర్, అయ్లికొడొకాజ్ బాప్తినం లాగె ఆతార్. 13 అయావలె సిమోనుబా నమ్మిజి బాప్తినం పొందితాండ్రె పిలిపుజ్ డిన్విండ వన్నివెటనె మహాన్. పిలిపు కిని బమ్మాని గుర్తుజ్, బమ్మాని పణిజ్ నుడఃజి సిమోను గొప్ప బమ్మ ఆతాన్.

14 యేసు ప్రబు వందిజ్ వెప్తి సువార్త సమరియ దేనమ్దికార్ ఒప్పుకొటార్ ఇజి యెరూసలేమ్దు మన్ని అపొస్తురు వెహార్. వెహారె పేతురుజ్ యోహానుజ్ వరి డగ్రు పొక్తార్ 15 వీరు వాతారె సమరియ పట్టుమ్దు నమ్మితి వరి మున్సు. దేవుణు ఆత్మ సత్తు వాదెజ్ ఇజి పార్లనం కిత్తార్. 16 ఎండనిజ్ ఇహిజ అబ్బెణి దాక దేవుణు ఆత్మ సత్తు వరి ఎయేరి మున్సుబా రెవిండ మహాద్. వారు ప్రబువాతి యేసు పేరుదాన్ బాప్తినం ఉండ్రెనె లాగె ఆజి మహార్. 17 అయావలె పేతురు, యోహాను వరి మున్సు. కిక్కు ఇడ్డిజ్ దేవుణు ఆత్మ సత్తు వరి మున్సు. వాతాద్.

18-19 అపొస్తురు లోకుర్ మున్సు. కిక్కు ఇట్టి వలె వారు దేవుణు ఆత్మదాన్ నిండ్రెజినార్ ఇజి సిమోను నుడఃతాన్. నుడఃతండ్రె, “నాను ఎయెన్ మున్సు. కిక్కు. ఇడ్డానో, వాండ్రు దేవుణు ఆత్మ సత్తుదాన్ నిండ్రెని వజి యా అతికారం నజిబా సిదా”, ఇజి వెప్పి వరి ముందాల డబ్బు ఇట్టాన్. 20 అయావలె పేతురు, “నీను డబ్బు నీజి దేవుణు వరం సంపాదనం కిన్ ఇజి ఒడిఃబిత్తిదా? నీ డబ్బు నీ వెట నాననం

* 8:5 8:5 క్రీస్తు (మెనయ) ఇహిజ దేవుణు ఏర్పాటు కిత్తి పొక్తాన్ ఇజి అర్దం

అపొస్తలు 8:21 21 నీ ఆలోచనను దేవుణులు నుడొకటికే సరి ఆతిక అపొస్తలు. అందెజె మాపు కిని పణిదు నిజి ఇని వంతు సిల్లెద్. 22 అందెజె యా సెఇ ఆలోచనమకు డిఃసిసిజి దేవుణులు డగ్రు వాజి పార్లనం కిదు. నీను ఒడిఃబిల్లి ఆలోచనమ వందిజ్ దేవుణులు నిజి సెమిస్సాన్సు. 23 నీ మన్సుదు నండ్ గోస నిండ్రిత మనాద్ ఇజి నాను నెస్సా. అక్కాద్ అపొండ నీ పాపమకు నిజి తొహై మన్నె ఇజి నాను నెస్సా”, ఇజి పేతురు వెహ్సాన్. 24 దన్నిజ్ సిమోను, “నీను వెహైకెజ్ ఇనికబా నా మున్సు. రెపొండ మీరు నావందిజ్ యేసుప్రబుజ్ పార్లనం కిదు”, ఇజి పేతురుజ్ యోహానుజ్ వెహ్సాన్.

25 వెనుక పేతురు, యోహాను సాసి వెహ్సా, యేసుప్రబు సువార్త సాటిసి, యెరూసలేమ్దు మహ్త వాతార్. వాని సరి సమరియదు మహి నండ్ నాహ్కాజ్ సువార్త సాటిసి వాతార్.

పిలిపు అయ్యుయెపియది వన్నిజ్ బాప్తీసం సిత్తాన్

26 అయావలె, ఒరెన్ దేవుణులు దూత పిలిపుజ్ వెహ్సాన్, “నీను దనిణం దరోట్ సొన్ని యెరూసలేమ్దాన్ గాజ ఇని పట్టుం సొని బిడిఃమ్ బూమిదు సొన్అ”, ఇజి వెహ్సాన్. 27-28 అందెజె పిలిపు సొతాండ్రె సొహాన్. సొన్ని మహిజ్ ఒరెన్ అయ్యుయెపియదికాన్ రదం మున్సు, సొన్నినాన్. వాండ్రు అయ్యుయెపియ దేసెమ్ది రాణి కందెకెబాన్ ముకెలమతి పణి కినికాన్ ఒరెన్. ఇని పణి ఇహిజ దేసెమ్ది డబ్బు నడిఃపిసిని దన్ని మున్సు. వీండ్రు మంత్రి. వీండ్రు యెరూసలేమ్దు పార్లనం కిదెజ్ సొహాండ్రె మరజి సొన్నినాన్. సొన్ని మహిజ్ వీండ్రు రదందు బసి యెసయ ప్రవక్త రాస్తి పుస్తకం సద్విజినాన్. 29 అయావలె దేవుణులు ఆత్మ పిలిపుజ్, “నీను రదం డగ్రు సొన్ని దన్ని వెట నడిఃజి సొన్అ”, ఇజి వెహ్సాన్. 30 పిలిపు రదం డగ్రు ఉహ్కాక్కి సొహిజ్ అయా అయ్యుయెపియదికాన్ యెసయ ప్రవక్త రాస్తి పుస్తకం సద్విజినాన్. పిలిపు అక్క వెహాన్. వెహాండ్రె, “నీను సద్విజనిక అర్లం కిజినిదా?”, ఇజి వెన్బాతాన్. 31 వెన్బాతిజ్, “ఎలాగ అర్లం కిని? ఎయెన్బా నజి అర్లం వెహ్ఎండ మహిజ ఎలాగ అర్లం కిని? రదం మున్సు, ఎక్కి నా వెట బన్అ. దిన్ని అర్లం వెహ్సి సిదా” ఇహాన్, అయ అయ్యుయెపియదికాన్. అందెజె పిలిపు రదం ఎక్కి వన్ని డగ్రు బస్తాన్. 32 అయ అయ్యుయెపియదికాన్ సద్విజి మహి మాటజ్ ఇనికెజ్ ఇహిజ “సప్తెజ్ ఒని గొరై వజి వన్నిజ్ ఒతార్. బుడుఃస్సుజ్ కత్రిసినివలె అలెజి మంజిని మెండగొరైపిల్ల వజి అలేత మహాన్. వాండ్రు ఇనికబా ఇన్ఎతాన్. 33 వారు వన్నిజ్ సిగ్రి కిత్తార్. వన్నిజ్ నాయం దొహ్కంపండత సొహాద్. వన్ని పొటెజాణి వరి వందిజ్ ఎయెర్బా వెహ్ఎండ ఆనార్. ఎందనిజ్ ఇహిజ, వన్ని పాణమ్దిజ్ బూమి మున్సుహాన్ లాగితార్”.

34 అయ అయ్యుయెపియదికాన్ ఈహు వెన్బాతాన్, “ప్రవక్త ఎయె వందిజ్ ఈహు వెహ్సి నాన్? వన్ని వందిజెనా, మరి ఒరెన్ వందిజా? దయ కిజి వెహ్అ”. 35 అందెజె పిలిపు అయ అయ్యుయెపియదికాన్ సద్విజి మహి యెసయ ప్రవక్త రాస్తి పుస్తకందు మహి మాటదాన్ మొదొల్లి యేసుప్రబు వందిజ్ సువార్త వెహ్సాన్. 36 ఆహె వారు సొన్ని మహిజ్ ఏరు మహి ఉండ్రీ బాడ్డిదు వాతార్. అయ అయ్యుయెపియదికాన్ వెహ్సాన్, “ఇబ్బె ఏరు మన్నె. నాను బాప్తీసం లాగి అదెజ్ ఇనికబా అడ్డు మనాదా?”. 37 దన్నిజ్ పిలిపు, “నీను మన్సు పూర్తి యేసుప్రబుజ్ నమ్మిత్తిజ బాప్తీసం లాగి అదెజ్ ఇని అడ్డుబా సిల్లెద్”, ఇహాన్. అందెజె వాండ్రు, “ఒఒ, యేసుక్రీస్తు దేవుణులు మరిసి ఇజి నాను నమ్మిజిన్”, ఇహాన్.

38 అయావలె, “రదం నిల్వఅ”, ఇజి అయ్యుయెపియదికాన్ ఆడ్ర సిత్తాన్. రదం నిల్వొండ్రె వాండ్రు, పిలిపు, రివెర్ డిఃగ్జి ఏరుదు డిఃగితార్. పిలిపు అయ్యుయెపియది వన్నిజ్ బాప్తీసం సిత్తాన్. 39 వారు ఏరు లొఇహాన్ వెల్లి వాతిజ్ వెటన దేవుణులు ఆత్మ పిలిపుజ్ కూక్ ఒతాన్. అయ్యుయెపియదికాన్ పిలిపుజ్ మరి నుడొకటి. గాని వాండ్రు సరద ఆజి వన్ని సరినె సొహాన్.

40 పిలిపు నుడొకటి అజితు పట్టుమ్దు మన్న ఇజి నెస్తాన్. అబ్బెణిజ్ సొసి వాండ్రు సొహి సరిదు మహి విజి పట్టుమ్కాజ్ యేసు ప్రబు వందిజ్ సువార్త వెహ్సి కయసరియ ఇని పట్టుమ్దాక వాతాన్.

9

సవులు యేసుప్రబుజ్ నమ్మిత్తాన్

1-2 అయావలె సవులు ఇనికాన్ యేసుప్రబు మున్సు, నమ్మితి వరిజ్ బెద్రిసి మహాన్. వరిజ్ మాలెజ్ కిజి మహాన్. వాండ్రు విజేరె పుజేరిజు మున్సు, పెరి పుజేరిబాన్ సాహండ్రె దమన్సు, పట్టుమ్దు మన్ని యూదురి మీటిజ్ ఇల్కాణి సేదెల్జ్ సీదెజ్ ఉత్తమ్కు లొస్తాన్. ఇని ఉత్తమ్కు ఇహిజు, దమన్సు, పట్టుమ్దు యేసుప్రబు మున్సు, నమకం ఇడ్డికార్ ఎయెరిబా మహిజు, మొగ్గకొడోర్ గాని అయ్లికొడోజ్ గాని వరిజ్ తొప్పి ఒసి యెరూసలేం పట్టుమ్దు తతెజ్ సవులుజ్ అతికారం మనాద్ ఇజి వెప్పిని ఉత్తమ్కు.

3 విజేరె పుజేరిజు మున్సు, పెరి పుజేరి సిత్తి ఉత్తమ్కు అస్తాండ్రె సవులు దమన్సు, పట్టుమ్దు సాండ్రెజ్ సొత్తాన్. దమన్సు, పట్టుం డగ్గు వాజి మహిజ్ గదెం ఆగసమ్దాన్ ఉండ్రె గొప్ప జాయ్ వన్ని సురులం డెయ్తాద్. 4 అయావలె సవులు బూమిదు అర్దాన్. అర్దిజ్, “సవులు, సవులు, నీను ఎందనిజ్ నజీ మాలెజ్ కిజిని”, ఇజి వన్ని వెట వెప్పి ఉండ్రె మాట వెహాన్.

5 “ప్రబు, నీను ఎయి”, ఇజి సవులు వెన్బాతాన్. “నీను మాలెజ్ కిజిని యేసునె నాను. 6 ఏలు నిజ్జి పట్టుమ్దు సొన్అ. నీను ఇనిక కిదెజ్ ఇజి ఒరెన్ నిజి వెప్పానాన్లె”, ఇజి మాట వెప్తాన్. 7 సవులు వెట సొన్ని సుమికార్ జాటు వెహోర్ గాని ఎయెరిజ్బా తోర్ఏతార్. వారు అల్లెత్ నిహ మహోర్. 8 సవులు బూమిదాన్ నిజిత్తాండ్రె బేస్తాన్ గాని కణకు తోర్ఏండ ఆతె. అందెజి వారు వన్నిజ్ కికాజ్ అస్తాం దమన్సు, పట్టుమ్దు నడెపిసి ఒతార్. 9 వాండ్రు మూండ్రె రొస్సు, కణకు తోర్ఏండ మహాన్. ఇనికబా తిన్ఏండ ఉణెంండ మహాన్.

10 దమన్సు, పట్టుమ్దు యేసుప్రబు సిసూడుః ఒరెన్ అననియ ఇనికాన్ మహాన్. యేసుప్రబు వన్నిజ్ దర్సనమ్దు తోర్ ఆతండ్రె, “అననియ”, ఇజి కూక్తాన్. కూక్తిజ్ అననియ, “ప్రబువా నాను ఇబ్బె మన్న”, ఇహాన్.

11 యేసుప్రబు వన్నివెట, “నీను తినాజ్ ఇజి కూక్తి సరిదు సొన్అ. బానె యూద్ ఇని వన్ని ఇండ్రె సొన్ని తార్పు పట్టుమ్దికాన్ సవులు ఇని వన్ని వందిజ్ వెన్బాఅ. సవులు పార్దనం కిజి మంజినాన్. ఉండ్రె దర్సనమ్దు సవులు ఇనిక సుడెతాన్ ఇహిజు, 12 అననియ ఇనికాన్ ఒరెన్ వాతండ్రె వన్ని కణెకెజ్ నెగిండ కిజి మరి సూణి లెకెండ ఆదెజ్ వన్ని బురారు కిక్కు ఇడ్డివజు సుడెతాన్”, ఇజి వెప్తాన్.

13 దన్నిజ్ అననియ వెప్తాన్, “ప్రబు వీండ్రు యెరూసలేమ్దు నిజి కేట ఆతి వరిజ్ ఎస్సానొ మాలెజ్ కిత్తాన్ ఇజి వన్ని వందిజ్ నాను నండొ వెహ మహా. 14 ఇబ్బె యా పట్టుమ్దు నీ మున్సు, నమకం ఇడ్డి వరిజ్ తొప్పి ఒసి యెరూసలేమ్దు ఒతెజ్ వన్నిజ్ అతికారం సీని ఉత్తమ్కు పెరి పుజేరిజు బాణిజ్ అస్తాండ్రె వాత మహాన్”. 15 యేసుప్రబు అననియ వెట, “నీను సొన్అ. యూదురు ఆఇ లోకుర్ నడెమి, రాజురిజు నడెమి, ఇస్తాయేలు లోకాజ్ నడెమి నా వందిజ్ వెప్తాజ్ నాను వన్నిజ్ ఏర్పాటు కిత మన్న. 16 నా వందిజ్ వాండ్రు ఎసానొ మాలెజ్ ఆనాన్ ఇజి నాను వన్నిజ్ తోరిన్న”, ఇహాన్.

17 అందెజి అననియ అయ ఇండ్రె సాహండ్రె సవులు మున్సు, కిక్కు ఇట్టాన్. “సవులునా, నీను వాతి సరిదు నిజి తోరె ఆతి ప్రబు ఆతి యేసు నజీ పొక్త మనాన్. నీను మరి సూణి వందిజ్ దేవుణు ఆత్తు నత్తు నీ మున్సు, వాని వందిజ్ నజీ పొక్త మనాన్”, ఇజి సవులు వెట వెప్తాన్. 18 అయావలె వన్ని కణకాణిజ్ పొరోజ్ నన్నికెజ్ రాల్లిజ్ సుడెదెజ్ అట్టాన్. సవులు నిజితండ్రె బాప్తిసం లాగె ఆతాన్. 19 వెనుక బోజనం కిత్తాండ్రె సత్తు ఆతాన్.

సవులు దమన్సు, పట్టుమ్దు, యెరూసలేం పట్టుమ్దు యేసుప్రబు వందిజ్ వెప్పినాన్.

సవులు దమన్సు, పట్టుమ్దు మహి యేసుప్రబు సిసూర్ వెట సెగం దినమ్కు మహాన్. 20 యూదురి మీటిజ్ ఇల్కాజ్ తిన్నాజ్ సాహండ్రె యేసునె దేవుణు మరిసి ఇజి యేసుప్రబు వందిజ్ బోద్రిస్తెజ్ మొదొల్స్తాన్. 21 అక్క వెహికార్ విజేరె నండొ బమ్మ అతార్. యెరూసలేమ్దు యేసుప్రబుజ్ నమ్మితి వరిజ్ పాడుః కిజి మహికాన్ వీండ్రెగదె. యేసుప్రబుజ్ నమ్మితి వరిజ్ తొప్పి పెరి పుజేరిర్ డగ్గు కూక్తి ఒతెజ్ ఇబ్బెబా వీండ్రు వాత మనాన్ ఇజి వెప్తాన్. 22 అహిజాబా పవులు మరి నండొ సత్తుదాన్ బోద్రిసి మహాన్. యేసునె దేవుణు పొక్తి క్రీస్తు ఇజి రుజుప్ కిత్తాండ్రె దమన్సు, పట్టుమ్దు మహి యూదురుజ్ గాబ్ర కిత్తాన్. 23 నండొ రొస్సు సాహి వెనుక సవులుజ్ సప్తెజ్ ఇజి యూదురు అలోసనం కిత్తార్. 24 గాని

వరి ఆలోచనం సవులుజ్ తెలితాద్. వన్నిజ్ సప్తెజ్ వారు రెయువేల పూర్తి పట్టుం వెల్లి సొని సేప్లా* బాన్ సుడెజి కాత మహార్. 25 గాని వన్ని సిసూర్ రయు వన్నిజ్ ఒతార ఉండ్రీ గంపదు బని కితార పట్టుం సురుల మన్ని గోడెదు మన్ని ఉండ్రీ కిటికి బొరొదాన్ వన్నిజ్ అడిగి డిఃప్తార్.

26 సవులు యెరూసలేమ్దు సాహిజ్ సిసూర్ వెట కూడెదెజ్ సుడెజతాన్. గాని వాండ్రు సిసూర్ లొఇ ఒరెన్ ఆవెన్ ఇజి వారు ఒడిబితారె వన్నిజ్ వరివెట కూడెపైజ్ తియెల్ ఆతార. 27 గాని బరబ్బు ఇనికాన్ వన్నిజ్ అపొస్తరుబాన్ కూక్కి ఒతాన్. సవులు దమస్కు పట్టుమ్దు సాహి సరిదు ఎలాగ యెసుప్రబు వన్నిజ్ తోర ఆతాన్ ఇజి, ఎలాగ యెసుప్రబు వన్నివెట వర్గితాన్ ఇజి, వెనుక సవులు ఎలాగ దమస్కు పట్టుమ్దు తియెల్ సిల్లెండ యెసుప్రబు వందిజ్ బోదిస్తాన్ ఇజి బరబ్బు అపొస్తరు వెట వెప్తాన్. 28 అయావలె అపొస్తరు సవులుజ్ కూడెపైజ్ వాండ్రు వరివెట కూడిత మహాన్. వరివెట కూడితాండ్రె యెరూసలేమ్దు విజు బాడ్డిదు సొన్ని తియెల్ సిల్లెండ యెసుప్రబు వందిజ్ బోదిస్తెజ్ మొదొల్స్తాన్. 29 గ్రీకు బాస వర్గిని యూదురు వెట వర్గితాండ్రె తర్కిస్తాన్. అందెజి వారు సవులుజ్ సప్తెజ్ సుడెజతార. 30 యాక తెలితారె సిసూర్ వన్నిజ్ డిగు మన్ని కయెసరియాదు ఒతారె తార్చు పట్టుం పోక్తార్.

31 అయ కాలమ్దు యూదయ, గలిలయ, సమరియ దేసమ్కాజ్ మహి దేవుణు సజం తియెల్ సిల్లెండ సమదానమ్దాన్ మహార్. సజం దేవుణుదిజ్ లొజిజి దేవుణు ఆత్మ సాయమ్దాన్ సత్తు ఆజి వాతె. నమ్మితికార్ నండొండార్ ఆజి వాతార.

పేతురు లుదదు యోపాదు బమ్మాతి పణిజ్ కిత్తాన్

32 అయావలె పేతురు నాహ్కునాహ్కు, పట్టుమ్కుపట్టుమ్కు సొన్ని లుద ఇని నాటో దేవుణుదిజ్ కేట అతి వరిజ్ సుడెజి సాహాన్. 33 బానె ఒరెన్ అయెనెయ్ ఇనికాన్ ఎనిమిది వంట్లజాణ్ అసి నిజ్దిజ్ అట్ఇ వన్నిజ్ సుడెజతాన్. వాండ్రు కిక్కు కాల్కు అర్కికాన్. 34 పేతురు వన్నిజ్ సుడెజి, “అయెనెయ్, యెసుక్రీస్తు నిజి నెగెండ కిజినాన్. నిజ్జి, నీ మంసం నీనె పెర్లి ఉండ్రీ పడెకాద్ ఇడెఅ” ఇహాన్. 35 వెటనె అయెనెయ్ నిజ్జితాన్. లుదా నాటోదు, సారోను దేసమ్దు మహికార్ విజెరె, వన్నిజ్ జర్గితిక సుడెజతార యెసుప్రబుజ్ నమ్మితార.

36 అయావలె యోప ఇని పట్టుమ్దు తబిత ఇని ఉండ్రీ అయెలి కొడెజి మహాద్. అదిబా యెసుప్రబు సిసూ. గ్రీకు బాసాదు దన్ని పేరు దొర్కు. దొర్కు ఇహిజు డుపి ఇజి అర్థం. అది ఎనెజ్బా నెగ్గి పణి కిజి మహాద్. సిల్లి వరిజ్ సాయం కిజి మహాద్. 37 గాని అది అయావలె ఉండ్రీ కన్దం అస్తాదె సాతాద్. వారు పేనుగుదిజ్ ఏరు వడిస్తారె మేడె ముస్కు మన్ని గదిదు తెర్వార. 38 లుద పట్టుం యోప పట్టుం డర్గు మహాద్. పేతురు అబ్బె మనాన్ ఇజి యోపాదు మన్ని సిసూర్ వెహారె రివెర్ మణిసిరిజ్ పోక్కి, “దయ కిజి వెటనె రఆ”, ఇజి కల్బు పోక్తార్. 39 పేతురు నిజ్తండ్రె వరివెట యోపాదు సాహాన్. వారు వన్నిజ్ మేడెగది లొఇ ఒతార. అబ్బె ముండ మణిసిక్ అడెబాజి, దొర్కు వరివెట మహివలె గుత్తిసి సాక్యెజ్ పాతెజ్ తోరిసి వన్ని సురుల నిహె.

40 పేతురు విజెరిజ్ వెల్లి పోక్తాండ్రె ముణుకుజ్ ఊరెజి పార్దనం కిత్తాన్. పేనుగుదిజ్ సుడెజి, “తబిత, నిజ్అ” ఇహాన్. అయావలె అది బేస్తాదె పేతురుజ్ సుడెజి నిజ్త బస్తాద్. 41 పేతురు దన్నిజ్ కిక్కు అస్తాండ్రె నిక్తాన్. నమ్మితి వరిజ్, ముండ మణిసికాజ్ కూక్కి అది బత్కెత్తాద్ ఇజి వరిజ్ ఒపజెప్తాన్. 42 యాక యోపాదు మనికార్ విజెరె నెస్తారె నండొండార్ యెసుప్రబు ముస్కు నమకం ఇట్టార్. 43 పేతురు యోపాదు సిమోను ఇని ఒరెన్ తోల్కు పొర్ని వన్నిబాన్ యోప పట్టుమ్దు నండొ దినమ్కు బత్కెత్తాన్.

10

పేతురు కొర్నేలియెజ్ సువార్త వెప్పినాన్

1 అయావలె కయెసరియ ఇని పట్టుమ్దు, ఉద్దం కినివరి లొఇ కొర్నేలి ఇని ఒరెన్ సదాతిపతి* మహాన్. వాండ్రు, వన్ని అడ్డి మహి ఉద్దం కినికార్ ఇటలి దేసెమ్దాన్ వాతి మహి గుంపుదికార్ ఇజి

* 9:24 9:24 సేప్లా. దమస్కు పట్టుం సురుల వెరి గోడెజ్ తొప్తా మహాద్. గోడెదు పట్టుం వెల్లి సొని సేప్లాజ్ మహి. బానె పట్టుం కావ్ కినికార్ కావ్ కిజి మహార్ * 10:1 10:1 వంద మంది విదెం కినివరిజ్ నడిప్పి రోమ అతికార.

కూకె ఆతమహారే. ² కొర్నెలి, వన్ని ఇండ్రోణికార, బక్తి మనికార. వారు దేవుణుదిజ్ తియెల్ ఆతికార. వాండ్రు సిల్లి వరిజ్ వన్నిజ్ మనిక నెడ్డినె సీజి మహాన్. దేవుణుదిజ్ ఎస్తివలెబా పార్లనం కినికాన్. ³ ఒర్నెండు మదెనం రమరమి మూండ్రి గంటజ, దేవుణు బాణిజ్ వాతి ఒరెన్ దూత వన్నిబాన్ నిహండ్రె, “కొర్నెలి”, ఇజి కూక్తాన్. కూక్తిక్ యా దూతెజ్ టెటాజ్ సుడెతాన్. ⁴ కొర్నెలి గొప్ప తియెల్ ఆతండ్రె, “ప్రబు, ఇనిక?”, ఇహాన్. దూత వెప్టాన్, “నీను దేవుణుదిజ్ కిత్తి పార్లనంకు, సిల్లి వరిజ్ సీని దానం విజు దేవుణు సుడెతండ్రె నీ వందిజ్ ఒడిబిజినాన్. ⁵ ఏలు యోప ఇని పట్టుమదు లోకాజ్ పోక్కి పేతురు ఇజి కూకె ఆని సీమోను ఇని వన్నిజ్ కూక్కిన్ అ. ⁶ వాండ్రు సమదరం డగ్రు మన్ని సీమోను ఇని తోల్లు తయారే కినికాన్ ఒరెన్ వన్ని ఇండ్రో బత్తిజినాన్”.

⁷ యాక వెప్పి దూత సాహిజ్, కొర్నెలి వన్ని పణి మణిసిరి రిఎరిజ్ కూక్కిస్తాన్. ఎస్తివలెబా వన్నివెట కూడెజి మంజిని బక్తి మన్ని ఒరెన్ ఉద్దం కిని వన్నిజ్ బా కూక్కిస్తాన్. ⁸ జర్గితక విజు వరివెట వెప్టాండ్రె వరిజ్ యోప పట్టుమదు పోక్తాన్.

పేతురు సుడెతి దర్సనం

⁹ మర్సనాండిజ్ వారు సొన్ని యోప పట్టుం డగ్రు ఆతార. అయావలె మదెనం ఆతాద్. పేతురు పార్లనం కిదెజ్ మేడః మున్సు ఎక్తాన్. ¹⁰ పేతురు గొప్ప బజి కట్టిజ్ ఇనికబా ఉండెజ్ కోరెత్తాన్. బోజనం తయారాజి మహిజ్ వాండ్రు ఉండ్రి దర్సనం సుడెతాన్. ¹¹ అక్క ఇనిక ఇహిజి ఆగానం రే ఆజి నాల్లి సెంగుజి అసిమహి పెరి దుపాటి ననిక ఉండ్రి బూమిదు డిపె ఆతిలెకెండ్ సుడెతాన్. ¹² దన్ని లొఇ బూమి మున్సు మన్ని నాల్లి కాల్లు మన్ని విజు రకం జంతుజ్, బూమి మున్సు ఊజి బూలానికెజ్, ఆగసమ్ మున్సు ఎగ్రిని పొటిజ్ మహి.

¹³ అయావలె, “పేతురు, నిజ్ అ, సప్పి తిన్ అ”, ఇజి, ఉండ్రి మాట పేతురు వెహాన్. ¹⁴ దన్నిజ్ పేతురు, “సిల్లి ప్రబువా, తిండ్రెజ్ ఆఇకెజ్ ఎసెజ్ బా నాను తిన్ ఏ”, ఇజి వెప్టాన్ †.

¹⁵ వెప్టాజ్, మాట మరి వాతాద్, “దేవుణు నెగ్గక ఇజి ఇడ్డికెజ్ నీను సెవద్ ఇజి ఎర్లిస్సు”.

¹⁶ ఈహు మూండ్రి సుట్టు జర్గితాద్. వెటనె ఆ దుపాటి నన్నిక ఆగానమ్దు మర్జి పెరె ఆతాద్. ¹⁷ దర్సనమ్దు సుడెతి దన్ని అర్లం ఇనికాదో ఇజి పేతురు గొప్పజి ఒడిబిజి మహాన్. అయావలె కొర్నెలి పోక్తి లోకుర్ సీమోను ఇల్లు ఎమేణిక ఇజి వెన్ బాజి నెస్తారె వన్ని ఇల్లు ముందాల వాతార. ¹⁸ “పేతురు ఇజి కూకె ఆని సీమోను ఇబ్బె మనాండ్రా, సిల్లెండ్రా”, ఇజి పేరు అస్తారె డేడిస్తారె.

¹⁹ పేతురు దర్సనమ్దు సుడెతి దన్ని వందిజ్ ఒడిబిజి మహివలెనె దేవుణు ఆత్మ వన్నివెట వెప్టాన్, “సీమోను, ముఎర లోకుర్ నిజి రెబాజినార. ²⁰ నీను నిజ్ అడ్డి డిగెజి సొన్ అ. అనుమానం అవిండ వరివెట సొన్ అ. ఎందనిజ్ ఇహిజి నానె వరిజ్ పోక్త”.

²¹ పేతురు డిగెజి సాహండ్రె, “మీరు నజెనె రెబాజినిదెర. ఎందనిజ్ వాతిదెర?”, ఇహాన్. ²² దన్నిజ్ వారు, “సదాతిపతి ఆతి కొర్నెలి మజి పోక్తాన్. వాండ్రు నీతి నిజాయితి మన్నికాన్. దేవుణుదిజ్ తియెలాజి మన్నికాన్. వాండ్రు గొప్ప నెగ్గికాన్ ఇజి యూదురు విజెరె వెప్పినార. ఒరెన్ దేవుణు దూత వన్నిజ్ తోరె ఆతండ్రె, “పేతురుజ్ నీ ఇండ్రో కూక్కి తసి వన్ని మాటెజ్ వెన్ అ” ఇహాన్”, ఇజి వెప్టార. ²³ అయావలె పేతురు వరిజ్ ఇండ్రో తతాండ్రె, “నేండ్రు మా బాన్ మండ్రు”, ఇహాన్.

పేతురు కొర్నెలి ఇండ్రో సొన్నినాన్.

మహ్నా నాండిజ్ పేతురు నిజితండ్రె వరివెట పయనం ఆతాన్. యోసాదికార సెగిండ్రార యేసుప్రబుజ్ నమ్మితికార వరివెట సాహార. ²⁴ ఉండ్రి రోజు పయనం ఆతారె మహ్నా నాండిజ్ వారు కయసరియూదు అందితార. కొర్నెలి వన్ని కుటుమ్ది వరిజ్ వన్ని డగ్రుహి కూడెజి ఇండ్రో కూడుఃప్టాండ్రె పేతురు వందిజ్ కాన్ కిజి మహాన్. ²⁵ పేతురు ఇండ్రో వాతిజ్ కొర్నెలి సాహండ్రె వన్ని పాదమ్కాజ్ ఆర్తాండ్రె వన్నిజ్ మాడిస్తాన్. ²⁶ గాని పేతురు వన్నిజ్ నిక్తాండ్రె, “నిజ్ అ, నానుబా నీ నన్ని లోకునె” ఇహాన్.

† 10:9 10:9 మేడ మున్సు బాన్ మహి ఇల్కాజ్ మున్సు మేడెజ్ మన్నె. ఎక్కి సొన్ని బన్జెజ్ ఆనాద్ ‡ 10:14 10:14 యూదురుజ్ తిండ్రెజ్ ఆఇకెజ్ నెగం మన్నె, అక్కెజ్ తిన్ ఏరె

27 కొర్నేలి వెట వర్గిజ పేతురు లోక సాహిజ్ మంద లోకుర్ బాన్ కూడఁజమహిక సుడఁతాన్. 28 పేతురు వరి వెట వెహ్తాన్. “మా యూదురి రూలు వజ ఇహిజ యూదురు ఆక లోకుర్ వెట కూడఁనిక ఆవిద్. వరివెట మంజినిక ఆవిద్. ఇక్క మీరు నెసినిదెర్గద. గాని లోకాజ్ ఎయెరిజ్ బా తక్కుదికార్ ఇజ ఇండ్రజ్ ఆవిద్ ఇజ దేవుణు నజి తోరిస్త మనాన్. 29 అందెజె నజి కూకపిస్తిజ్ నాను అడ్డు వెహ్విండ వాత. నజి ఎందనిజ్ కూకపిస్తిదెర్. ఏలు వెహ్తా”, ఇహ్. 30

30 అయావలె కొర్నేలి వెహ్తాన్, “నాల్లి దినమ్కు ముందాల యా గడియారునె నాను మదెనం మూండ్ర గంటజ ఇండ్రొ పార్లనం కిజి మహ. వెటనె మెర్చిని నన్ని పాతెజ్ పొర్పాతి మన్ని ఒరెన్ నా ఎద్దు నిహాన్. 31 “కొర్నేలి, దేవుణు నీ పార్లనమ్కు వెహ్తాన్. సిల్లి వరిజ్ సెడ్డినె సిత్తికెజ్ దేవుణు సుడఁతాన్. 32 యోపాదు కల్లు పోక్కి పేతురు ఇజి కూకె ఆని సీమోనుజ్ కూక్కినె. వాండ్రు సమదరం డగ్రు తోల్కు తయార్ కినికాన్ ఒరెన్ సీమోను ఇని వన్ని ఇండ్రొ బత్తిజినాన్. 33 అందెజె వెటనె నిజి కల్లు పోక్కి. నీను వాతికాదె నెగద్. ఏలు మాపు విజెవె దేవుణు డగ్రు వాతాప్. మా వెట వెహ్తాజ్ దేవుణు నిజి ఆడ్ర సిత్తి విజి మాటెజ్ వెండ్రెజ్ మాపు వాతాప్.

34 దన్నిజ్ పేతురు వెహ్తాన్, “దేవుణు విజెరిజ్ ఉండ్రె లెకెండ్ర సుడఁజినాన్, ఇజి ఏలు నాను నిజమనె నెస్సా. 35 ఎమేణి జాతి ఇహిజ్ బా దేవుణుదిజ్ తియెలాజి, నీతి నిజాతిదాన్ నడిఁతిజ దేవుణు వన్నిజ్ ఒప్పుకొణాన్. 36 యేసు క్రీస్తు విజెరిజ్ ప్రబు. దేవుణు వెట లోకాజ్ కూల తోహ్పిస్తాజ్ వాండ్రు యేసుజ్ పోక్తాన్. యేనువలెహ్తాన్ ఇస్రాయేలు లోకాజ్ సమదనం వాతాద్ ఇజ దేవుణు సువార్ల పోక్తాన్. 37 యోహాను దేవుణు మాటెజ్ బోదిసి బాప్తిసం సిత్తి వెనుక గలీలయాదాన్ మొదొల్ని యూదయ దేసమ్దు విజి ఇనిక జర్గితాద్ ఇజి మీరు నెసినిదెర్. 38 యాక ఇనిక ఇహిజ, దేవుణు, నజెరేతు వాండ్రు ఆతి యేసుజ్ దేవుణు ఆత్మ సత్తు సీజి ఏర్పాటు కిత్తాన్. వాండ్రు సొన్ని నెగ్గి వణిజ్ కితాండ్రె సయ్యూన్ లోకురిజ్ కిజిని బాదెజాణిజ్ డిఁబిస్తాన్. దేవుణు వన్నివెట మహిజానె వాండ్రు అక్కెజ్ విజి కిదెజ్ అట్టాన్.

39 వాండ్రు యూదురి దేసమ్దుని, యెరూసలేమ్దుని, కిత్తి విజి వనకాజ్ మాపు సాసిర్. యూదురు వన్నిజ్ సిలువాదు డెయ్యూరె సప్టార్. 40 గాని మూండ్రె రోస్కాజ్ దేవుణు వన్నిజ్ సాతి వరిబాణిజ్ నిక్తాండ్రె మజి తోరిస్తాన్. 41 విజెరె లోకాజ్ వాండ్రు తోరె ఆవతాన్. దేవుణు ముజాలె ఏర్పాటు కిత్తి సాసిర్, ఇహిజ, మజినె వాండ్రు తోరె ఆతాన్. సాతి వరిబాణిజ్ నిజితి వెస్కా మాపె వన్నివెట తింజి ఉణిజి మహాప్. 42 సాతి వరిజ్, బత్తిజిని వరిజ్ తీర్పు సీదెజ్ దేవుణు యేసుజె ఏర్పాటు కిత్తాన్ ఇజి సాసి వెహ్పా సువార్ల సాటిస్తాజ్ యేసుప్రబు మజి ఆడ్ర సిత్తాన్. 43 ప్రవక్తరు విజెరె వన్ని వందిజ్ ఇని సాసి వెహ్తార్ ఇహిజ, వన్ని ముస్కు. నమకం ఇడ్చి విజెరి పాపం దేవుణు వన్ని వందిజ్ నెమిస్సొల్లె ఇజి.

యూదురు ఆక వరిజ్ దేవుణు ఆత్మ సత్తు, దోహ్కెసినాద్.

44 పేతురు యా మాటెజ్ వెహ్పి మహిజ్నె, వన్ని మాటెజ్ వెంజి మహివరి ముస్కు. దేవుణు ఆత్మ వాతాద్. 45 పేతురు వెట వాతి మహి నమ్మితికార్ యూదురు, యాక సుడఁతారె బమ్మ ఆతార్. “యూదురు ఆక వరిజ్ బా దేవుణు ఆత్మ సత్తు ఇని ఇనాయం దేవుణు సీజినాన్”, ఇజి బమ్మ ఆతార్. 46 ఎందనిజ్ ఇహిజ దేవుణు ఆత్మ సత్తు వరి ముస్కు. వాతిజ్ వారు ఆక బాసెజ్ వర్గిజ దేవుణు ఎసానో పెరికాన్ ఇజి స్తుతి కినిక వీరు వెహ్తార్.

అయావలె పేతురు వెహ్తాన్, 47 “మజి దేవుణు ఆత్మ దోహ్కె లెకెండ్రె విరిజ్ బా దోహ్కాద్. ఏలు వీరు ఏరుదు బాప్తిసం లాగె ఆదెజ్ ఇహిజ ఎయెర్బా అడ్డు కిదెజ్ అట్టూర్?” 48 అందెజె యేసుక్రీస్తు పేరు అసి ఏరుదు బాప్తిసం లాగె ఆదెజ్ పేతురు వరిజ్ ఆడ్ర సిత్తాన్. వెనుక, నెగం రోస్కు. మా వెట మనె అ ఇజి వారు పేతురుజ్ వెహ్తార్.

11

పేతురు జర్గితికెజ్ వెహ్పినాన్.

1 యూదురు ఆక లోకుర్ బా దేవుణు - మాటెజ్ నమ్మితార్ ఇజి యూదయ దేసమ్దు మన్ని నమ్మితికార్ని, అపొస్తురు వెహ్తార్. 2-3 అందెజె పేతురు ఎక్కు యెరూసలేమ్దు సాహివలె బానె మహి

సునతి కిబె అతి యూదురు, వన్నివెట తర్కిస్తార్. “నీను సునతి కిజ లోకుర్ వెట కూడితి మహి, వరివెట ఉణిజి మహి”, ఇజి వన్ని మున్సు తర్కిస్తార్.

4 అయావలె పేతురు, జర్గితికెజ్ విజు మొదోహాన్ అసి వరివెట వెహ్సాన్. 5 “నాను యోప పట్టుమదు మహివలె బరెనెండె పార్దనం కిజి మహిజ్ ఉండ్రీ దర్దనం సుడత. ఇనిక సుడత ఇహిజ, ఆగాసం రే ఆజి నాల్లి సెంగుజ అసిమహి పెరి దుపాటి ననిక ఉండ్రీ బూమిదు డిఁపె అతిలెకెండె నా డగ్గు డిఁగ్జి వాతాద్. 6 అక్క నెగ్గెండ సుడతెజ్ దన్ని లోఇ నాల్లి కాల్సు మన్ని జంతుజ్, అడివి జంతుజ్, బూమి మున్సు ఊజి బూలానికెజ్, ఆగాసం మున్సు ఎగ్రిని పొటిజ్ నజ్జి తోరితె. 7 అయావలె, ‘పేతురు నిజ్ అ. సప్పి తిన్ అ’, ఇజి ఉండ్రీ మాట వెహ.

8 దన్నిజ్ నాను, ‘సిల్లె ప్రబు, సెవిద్ ఇజి ఇడ్డికెజ్ ఇనికెజ్ బా నాను ఎనెజ్ బా తిన్ ఏ’ ఇహ. 9 ఆగాసమ్ దాన్ మాట మరి వాతాద్, ‘దేవుణు నెగ్గిక ఇజి వెహ్సాకెజ్ నీను ఏరిన్సు!’. 10 ఈహు మూండ్రీ సుట్టు వాతాద్. ఆక్కరెదిజ్ అక్కెజ్ విజు ఆగాసమ్ దు మరిజ పెరి అతె. 11 యాక జర్గితి వెటనె కయ్యురియదాన్ కొర్నెలి పోక్తి ముఎర్ లోకుర్ నజి రెబాజి నాను మహి ఇల్లు డగ్గు వాతార్. 12 అయావలె దేవుణు అత్తు, ‘నీను ఇని అనుమానం సిల్లెండ వరివెట సోన్ అ’ ఇహాన్. వీరు ఆరుగురు నమ్మిత్తికార్ బా నావెట వాతార్. వాతారి మాపు కొర్నెలి ఇండ్రో సోహాప్.

13-14 కొర్నెలి ఇండ్రో సోహిజ్, దేవుణు దూత వన్నివెట వెహ్సాకెజ్ విజు వెహ్సాన్. ‘నీను యోపాదు లోకాజ్ పోక్తి పేతురు ఇజి కూకె ఆని సీమోనుజ్ కూక్చిన్ అ. వాండ్రు వానాండ్రె నీను, నీ కుటుమదికార్ విజెరి పాపం కిత్తి దన్ని సిక్చదాన్ ఎలాగ గెలిస్తెజ్ ఆనాద్ ఇజి వెహ్సానాన్ లె’ ఇజి వెహ్సాకెజ్ విజు కొర్నెలి మజి వెహ్సాన్.

15 నాను వరివెట వర్గిదెజ్ మొదోల్ సెజ్, మా మున్సు దేవుణు అత్తు తోలిత ఎలాగ వాతాద్ అయావజనె వరి మున్సు బా వాతాద్. 16 అయావలె నజి ప్రబు మాటెజ్ గుర్తు వాతాద్. ఇనిక ఇహిజ, ‘యోహాను ఏరుదాన్ బాప్తినం సిత్తాన్. గాని మీరు దేవుణు అత్తుదాన్ బాప్తినం లాగి ఆనిదెర్ లె’ ఇజి. 17 అహిజ మాపు ప్రబు అతి యేసుక్రీస్తు మున్సు నమకం ఇట్టి వలె దేవుణు మజి సిత్తి ఇనాయమ్ నె వరిజ్ బా సిత్తాన్. దేవుణుదిజ్ అడ్డు కిదెజ్ నాను ఎపటిదికానా?”.

18 యాక వెహరె వారు మరి ఇని అడ్డుబా వెహ్ ఎతార్. “నిజమ్ నె, యూదురు ఆజి వరిజ్ బా వరి పాపమకు డిఁసిసీజి దేవుణుదిజ్ లోజిజి ఎలాకాలం బత్తిదెజ్ దేవుణు సరి సీజినాన్”, ఇజి వెహ్సా వారు దేవుణుదిజ్ స్తుతి కిత్తార్.

అంతియోకయాదు నమ్మితి వరిజ్ క్రీస్తు లోకు ఇజి పేరు వాతాద్.

19 స్టెపానుజ్ సప్టివెనుక యేసుప్రబు మున్సు నమ్మితి వరిజ్ లావు మాలెజ్ వాతిజ్ వారు సెద్రిత సోహార్. సెద్రితికార్ సెగెండార్ పెనికె, కుప్ర, అంతియొకియ ఇని దేసమ్ దాక సోహారి యూదురిజ్ ఉండ్రెనె దేవుణు మాటెజ్ వెహ్సార్. 20 గాని వరి లోఇ సెగెండార్ కుప్రదికార్, కురేనియదికార్ మహార్. వారు సోన్ని అంతియోకయాదు మన్ని గ్రీకు బాస వర్గిని వరిజ్ బా యేసు ప్రబు వందిజ్ సువార్త వెహ్సార్. 21 ప్రబు సత్తు వరివెట మహాద్. అందెజె మంద లోకు దేవుణు మాట నమ్మిత్తారి ప్రబు మున్సు. నమకం ఇట్టార్. 22 యెరూసలేమ్ దు మన్ని సజమ్ దికార్ యాక వెహరె బర్నబెజ్ అంతియోకయాదు పోక్తార్. 23 బర్నబు వాతండ్రె దేవుణు దయ వరి మున్సు వాతాద్ ఇజి సుడతాండ్రె సర్ద అతాన్. దేవుణు మున్సు ఉండ్రె మన్నుదాన్ నమ్మిదు ఇజి వాండ్రు వరిజ్ దయరం వెహ్సాన్. 24 బర్నబు దేవుణు అత్తు సత్తుదాన్, నమకమ్ దాన్ నిండ్రెతికాన్, నెగ్గికాన్. వాండ్రు దేవుణు మాటెజ్ బోదిస్తిజ్ మంద లోకుర్ యేసుప్రబు మున్సు నమకం ఇట్టార్.

25 వెనుక బర్నబు సవులుజ్ రెబాజి తార్పు పట్టు సోహాన్. 26 సవులుజ్ రెబాజి దోహ్ కిజ్ వన్నిజ్ అంతియోకయాదు తతాన్. వారు రిఎర్ ఉండ్రీ ఏండు బానె మహి సజమ్ దికార్ వెట కూడితారె మంద లోకాజ్ దేవుణు మాటెజ్ బోదిస్తార్. అంతియోకయాదునె, నమ్మితి వరిజ్ క్రీస్తు లోకు ఇజి పేరు తోలిత ఇడెః అత మహాద్. 27 యా కాలమ్ దు ప్రవక్తరు సెగెండార్ యెరూసలేమ్ దాన్ అంతియోకయాదు వాతార్. 28 వరి లోఇ అగబ ఇనికాన్ ఒరెన్ దేవుణు అత్తుదాన్ నిండ్రెతాండ్రె రోమరాజు ఏలుబడిః కిని దేసమ్ కాజ్ విజు ఉండ్రె పెరి కరు వానాద్ లె ఇజి వెహ్సాన్. (క్లవుదియ ఇని రాజు ఏలుబడిః కిత్తి కాలమ్ దు

యా కరు వాతాద్) ²⁹ అయావలె నమ్మితికార్ విజేరె యూదయదు బత్తిని నమ్మిని వరిజ్ సాయం పోక్తజ్ ఒడిబితార్. మాపు ఎసా సీనాపొ ససా సీనాప్ ఇజి వారు ఒడిబితార్. ³⁰ వరి సాయమ్కు వారు బర్చబని, సవులు వెట వెద్దెలుజబాన్ పోక్తార్.

12

పేతురు జెలిదాన్ గెలిస్తాన్.

1 అయ కాలమ్దు హేరోదు రాజు సజమ్ది వరిజ్ సెగొండారిజ్ మాలెజ్ కిదెజ్ మొదొల్స్తాన్. ² యోహానుజ్ దాద ఆతి యాకోబుజ్ కుర్దదాన్ సపిస్తాన్. ³ యా సజతి యూదురిజ్ ఇన్టం ఆతాద్ ఇజి నెస్తాండ్రె హేరోదు రాజు పేతురుజ్బా తొప్పి ఇడేదెజ్ ఆడ్ర సిత్తాన్. యూదురి పులాజ్ ఆఇ రొటెజ్ తిని వండొయ్ దినమ్కాజ్ యాక జర్తతాద్. ⁴ పేతురుజ్ అరెస్టు కితారె వన్నిజ్ జేలిదు ఇట్టార్. జెలిదు ఇట్టారె వన్నిజ్ కాప్ కిజి మండ్రెజ్ పదహారు మణిసిరీ జమానుజ ఒవజెప్తాన్. ఉండ్రె సుటు నాల్ఎరీ మణిసిరీ కాపు మంజినార్. పన్కు వండొయ్ వెన్కా లోకాజ్ నడిమి తసి పేతురుజ్ తీర్పు తీరిన్తెజ్ హేరోదు రాజు ఒడిబితాన్. ⁵ ఆపా పేతురు జెలిదు మహాన్. గాని సజమ్దికార్ వన్ని వందిజ్ గటిజ దేవుణుదిజ్ పార్దనం కిజి మహాన్.

⁶ మరీసనాండిజ్ పేతురుజ్ తీర్పు తీరిన్తెజ్ వెల్లి తన ఇజి హేరోదు రాజు ఒడిబిత మహాన్. అయ పొదొయ్ పేతురు రిఎరీ జమానుజ నడిమి రుండి గొల్స్కాణిజ్ తొవ్వా ఆజి నిద్ర కిజి మహాన్. రిఎరీ జమానుజ్ వెల్లి కాపు మహాన్. ⁷ అయావలె వెటనె ఒరెన్ దేవుణు దూత తోరె ఆతాన్. ఆ గది లోఇ జాయ్ నన్ని వెల్లూర్ వాతాద్. దూత పేతురుజ్ పడకాదు డెయ్జి బేగి నిజ్తె ఇజి వెప్పి నిక్తాన్. వన్ని కిక్కాణిజ్ గొల్స్కాణిజ్ ఇడేబితార్.

⁸ దూత వన్నివెట, “నీను నడుముదు తొవ్వా ఆజి జోడ్కు తొడేగిల”, ఇహాన్. పేతురు అక్కెజ్ తొప్పిజ్ దూత, “నీ పాత పిడిగ్గి నా వెనుక రల”, ఇహాన్. ⁹ పేతురు దూత వెనుక సాహండ్రె జెలిదాన్ వెల్లి వాతాన్. గాని జర్గినిక నిజమె ఆవిదో ఇజి పేతురు నెన్వితాన్. యాక విజు దర్చనమ్దు సుడేజిని ఇజి ఒడిబితాన్. ¹⁰ వారు ముందాల కాప్ కిని వరిజ్ డాట్టి వెనుకాది వరిజ్బా డాట్టి పట్టుం సొని ఇనుము గవుని డగ్రు వాతార్. వాతిజ్ అదిసె రే ఆతాద్. వారు సొసి వాజి ఉండ్రె వీది డాట్టిసాహి వెటనె దూత వన్నిజ్ డింస సాహాన్.

¹¹ అయావలె, జర్గితెజ్ విజు నిజమె ఇజి పేతురు తెలి ఆతాన్. దేవుణు వన్ని దూతెజ్ పోక్తాండ్రె నజీ హేరోదురాజు బాణిజ్ డిబిస్తాన్. యూదురు నజీ ఇనిక కిదెజ్ ఒడిబిత్రారొ దన్ని లోఇహాన్బా డిబిస్తాన్ ఇజి ఏలు నాను నిజం నెస్తా ఇజి ఒడిబితాన్. ¹² యాక నెస్తాండ్రె పేతురు, మార్కు ఇజి కూకె ఆని యోహానుజ్ అయ్సి ఆతి మరియ ఇండ్రె సాహాన్. బాన్ మంద లోకర్ కూడిత మహారె పార్దనం కిజి మహాన్. ¹³ పేతురు వెల్లి మహి సేప్లాదు కొత్తాన్. ఎయెన్ ఇజి వెండ్రెజ్ రోద్ ఇని పణి మణిసిబాన్ సాహాద్. ¹⁴ అది పేతురు కంటం గుర్తు అస్తాదె గొప్ప సర్త ఆతాద్. సేప్లా రేవిండ ఉహ్కప్పి సాహాద్, “పేతురు సేప్లా డగ్రు నిహ మనాన్”, ఇజి మహి వరిజ్ వెప్తాద్. ¹⁵ వారు, “నిజి వెరి మనాద్” ఇహాన్. గాని అది మరి మరి వెప్పిజ్ వారు, “అహిజ వన్ని దూత వాతాద్” ఇహాన్.

¹⁶ గాని పేతురు సేప్లాదిజ్ కొత్తి మహాన్. వారు సొన్ని సేప్లా రేతిజ్ పేతురుజ్ సుడేతారె గొప్ప బమ్మ ఆతార్. ¹⁷ మీరు జమ్స మండ్రు ఇజి పేతురు వరిజ్ కియు సయ్స కితాండ్రె, దేవుణు వన్నిజ్ ఎలాగ జెలి లోఇహాన్ వెల్లి తత్తాన్ ఇజి వరిజ్ విజు వెప్తాన్. యాక యాకోబుజ్ని మహి నమ్మితి వరిజ్ వెప్తూ ఇహండ్రె మరి ఉండ్రె బాడ్డిదు సాహాన్. ¹⁸ పెందాహిజ్ జేలిదు మహి జమాణెలు గొప్ప గాబ్ర ఆతార్. పేతురు ఇనిక అతాండ్రె ఎంబె సాహండ్రె ఇజి వారు గొప్ప గాబ్ర ఆతార్. ¹⁹ పేతురుజ్ రెబాజి దొప్కొన్తెజ్ హేరోదు రాజు ఆడ్ర సిత్తాన్. గాని వారు ఎసా రెబాతిజ్బా తోరీవితాన్. అందిజ్ హేరోదు రాజు కాప్ కిజిమహి జమాన్జ మరి మరి యా సజతి వందిజ్ వెన్బాజి పేతురు గెలస్త సాహాన్ కాక వరి మున్కు తీర్పు కితాండ్రె వరిజ్ సప్తెజ్ ఆడ్ర సిత్తాన్.

హేరోదు రాజు సాతాన్.

హేరోదు రాజు యూదయదాన్ కయ్సరియాదు సాహండ్రె బాన్ సెగం కాలం బత్తితాన్.

²⁰ హేరోదురాజు తూరు పట్నుమిది వరి మున్కు, సీదోసు పట్నుమిదివరి మున్కు గొప్ప కోపం కల్లిజ

మహాన్. అందెజె వారు ఉండ్రె మన్నుదాన్ వాతారె రాజు ఇండ్రెణి అతికారి అతి ఒరెన్ బ్లాస్తు ఇని వన్నిజ్ వరి పడెకాదు కూడుప్పార, రాజు వరి మున్ను. నమదనం ఆదెజ్ ఇజి. ఎందనిజ్ ఇహిజ రాజు దేసమ్దానె వరిజ్ పంట దొహ్కొన్ మహాద్. ²¹ ఏర్పాటు కిత్తి రోజు, హేరోదు రాజు, రాజుర్ తోడెగిని సొక్కెజ్ పొర్పాతాండ్రె రాజు కుర్చిదు బస్తాండ్రె వాతివరివెట మిటిజ్దు వర్గితాన్. ²² అక్క వెహారె లోకుర్, వీండ్రు ఒరెన్ దేవుణు లెకెండ వెహ్సినాన్, లోకు లెకెండ ఆవన్ ఇజి గగోల్ కిత్తార. ²³ రాజు యాక వెహిజ్ దేవుణుదిజ్ స్తుతి కివెతాన్. వెటనె దేవుణు దూత వన్నిజ్ ఉండ్రె క్షం పుటిస్సిజ్ వాండ్రు పిడుకు ఆజి సాతాన్. ²⁴ గాని దేవుణు సువార్త మరి మంద లోకు వెహర్కాక దేవుణు మున్ను నమకం ఇట్టార. ²⁵ బర్బబని సవులు యెరూసలేమ్దు సొన్ని వరి పణిజ్ వీస్తారె మార్కు ఇజి కూకె ఆని యెహోనుజ్ కూడుప్పారె యెరూసలేమ్దాన్ మర్జి వాతార.

13

బర్బబెజ్ని సవులుజ్ సువార్త సాటిస్సెజ్ దేవుణు సజమ్దికార్ ఏర్పాటు కిత్తార.

1 అంతియొకయాదు మహి సజమ్దు, సెగెండార్ ప్రవక్తరు, మరి సెగెండార్ దేవుణు మాటెజ్ బోదిసినికార్ మహర్. వారు ఎయెర్ ఇహిజ, బర్బబ, నిగెర్ ఇజి కూకె ఆని సిమెయోను, కురేనదికాన్ లూకియ, హేరోదు అంతివాన్*. ² వీరు దేవుణుదిజ్ పార్దనం కిజి ఉపాన్ కిజి మహివలె దేవుణు ఆత్మ వెహ్సాన్, “బర్బబెజ్ని సవులుజ్ నాను కూక్తి పణి వందిజ్ మీరు ఏర్పాటు కిదు”. ³ వెహ్సెజ్, సజం ఉపాన్ మంజి పార్దనం కితారె వరి మున్ను కిక్కు ఇట్టారె, దేవుణు వెహ్సె పణి వందిజ్ పొక్తార.

బర్బబని సవులు కుప్త ఇని ద్వీపుదు సొహార్.

⁴ దేవుణు ఆత్మ పొక్తిజ్ బర్బబని సవులు డిగు నమ్దరం డగ్గు మన్ని సెలూకిన ఇని పట్టుం సొహారె ఓడెదు ఎక్తారె కుప్త ఇని ద్వీపుదు సొహార్. ⁵ వారు సలామి ఇని పట్టుమ్దు సొహారె బాన్ మహి యూదురి మీటిజ్ కిని ఇల్కూజ్ సొహారె దేవుణు మాటెజ్ సాటిసి మహర్. మార్కు ఇజి కూకె ఆని యోహాను వరివెట వరిజ్ తోడు; లెకెండ మహాన్. ⁶ వారు అయ ద్వీపు విజు పయనం కితారె పాపు ఇని పట్టుమ్దు వాతార. బానె వారు బర్యేసు ఇజి కూకె ఆని ఒరెన్ యూద వన్నిజ్ సుడెతార. వాండ్రు ఒరెన్ సెట్టికాన్. వాండ్రు అబద్దం మాటెజ్ వెహ్సె ప్రవక్త. దేవుణు మాటెజ్ వెహ్సె ప్రవక్త ఇజి నాటిసినాన్ గాని ఆవన్. ⁷ వాండ్రు రోమ గవర్నరు అతి సెర్గిపవులు వెట మహికాన్. అయ రోమ గవర్నరు ఇహిజ వాండ్రు తెలివి మన్నికాన్. వాండ్రు దేవుణు మాటెజ్ వెనె ఇజి బర్బబెజ్ని సవులుజ్ కూక్సిహ్సాన్. ⁸ గాని అయ సెట్టికాన్ వరిజ్ అడ్డు కిత్తాన్. (గ్రీకు బాసదు వన్ని పేరు ఎలిమ) రోమ గవర్నరు అతి సెర్గిపవులు యెసుప్రబు మున్ను. నమకం ఇడెవిండాదిజ్ సుడెతాన్, యా గార్డి విది కినికాన్. ⁹⁻¹⁰ అయావలె సవులు (వన్నిజ్ పవులు ఇని పేరుబా మహాద్) దేవుణు ఆత్మదాన్ నిండ్రెతాండ్రె ఎలిమేజ్ తినాజ్ సుడెజె వెహ్సాన్, “నీను సయ్తాన్ పొటాదికాన్, నీతి నిజాయితి అతి విజు దన్నిజ్ పడెజెగి. నీను పూర్తి సెగెకి, గొప్ప మొసెం కినికి. నిజమాతి దేవుణు మాటెజ్ నిజం ఆగెకెజ్ ఇజి తోరిసిని.

¹¹ ఇదిలో, దేవుణు ఏలు నిజి తీర్పు సీజి సిక్కి సీజినాన్. నీను సెగం కాలం గుడ్డి ఆజి పొద్దుదిజ్ సుడెదిజ్ అట్విండ ఆనిలె” వెటని వాండ్రు గుడ్డి ఆతాన్. గోయ్ వన్ని గాండుదాన్ వన్ని కణెకెజ్ సీకటి ఆతె. ఎయెర్బా కికాజ్ అసి బుల్లెయ్ కిబిస్సారా ఇజి అతారె ఇతారె బూలాజి మహాన్. ¹² అయ రోమ గవర్నరు జర్గితిక సుడెతివలె యెసుప్రబు మున్ను. నమకం ఇడ్తాన్. ఎందనిజ్ ఇహిజ యెసుప్రబు - వందిజ్ బోద వెంజి బమ్మ ఆతాన్.

పవులుని బర్బబ పిసిదియ దేసమ్దు మన్ని అంతియొకయాదు సువార్త వెహ్సినార

¹³ వెనుక పవులుని వన్నివెట మహికార్ ఓడె; ఎక్తారె పాపుదాన్ పంపులియాదు మన్ని పెర్గ ఇని పట్టుం సొహార్. బానె యోహాను వరిజ్ డిస్తారె యెరూసలేమ్దు మర్జి సొహాన్. ¹⁴ వారు పెర్గు పట్టుమ్దాన్ సొత్తారె పిసిదియ దేసమ్దు మన్ని అంతియొకయాదు సొహార్. బానె వారు విస్తాంతి

* **13:1** 13:1 హేరోదు అంతివాన్. మార్కు సువార్తదు బస్తానం సీని యోహానుజ్ జెలిదు ఇడ్డి వెనుక వన్నిజ్ సప్తెజ్ ఆడ్ర సిత్తి హేరోదు రాజు విండ్రె. (మార్కు 6:14-28) రాజు వెట కూడెజి పిరితి మనయేను, సవులు ఇనికార్ † **13:4** 13:4 ద్వీపు. సురుల నమ్దరం మన్ని ఇజిరె దేసెం

దినమ్మదు యూదురి మీటిజ్ ఇండ్రో సాహారె బస్తారె. 15 మోసె సిత్తి రూలుదాన్, ప్రవక్తరు రాస్తి మాటెజదాన్ సెగం నదవితి వెనుక మీటిజ్ ఇండ్రోణి అతికారిజు పవులుని బర్గుబ వెట. “దాదారండె, లోకాజ్ బోద్నిజ్ ఇని మాటెజబా మహిజ వెప్తు” ఇహార్. 16 అయావలె పవులు నిజితండ్రె విజేరె అలెజి మండ్రు ఇజి కియు నయన్ కితాండ్రె పరివెట వెప్తున్, “ఇస్రాయేలు లోకాండె, దేవుణుదిజ్ తియెల్ ఆని యూదురు ఆఇ లోకాండె, నా మాట వెండ్రు. 17 మా ఇస్రాయేలు లోకు పార్లనం కిని దేవుణు, మా అనిగొగొరిజ్, వన్ని లోకుర్ ఇజి మండ్రెజ్ ఏర్పాటు కిత్తాన్. వారు అయగుప్పు దేనమ్మదు ఆఇదేనమ్మదివరిలెకెండ్ మహివలె వరిజ్ నండ్రె లోకు ఎల్పిస్తాన్. వెనుక గొప్పునత్తుదాన్ వరిజ్ అబ్బెణాన్ గెల్పిసి తత్తాన్. 18 రహారమి నలపయ్ పంటజ్ వారు బిడిమ్ బూమిదు సొన్ని మహివలె దేవుణు వరిజ్ ఓరిసి మహాన్. 19 కనాసు దేనమ్మదు మహి ఏడు జాతిజాణి వరిజ్ విదెం కిజి గెల్పిస్తాండ్రె వరిజ్ పాడు కిజి వరి దేనం వన్ని లోకాజ్ అక్కు లెకెండ్ సిత్తాన్. 20 యాకెజ్ విజు నాల్లి వందెజ్ యబాయ్ పంటజాణి జర్గితె.

వెనుక సముయేలు ఇని ప్రవక్త వాతి కాలమ్దాక వరిజ్ ఏలుబడి కిదెజ్ తీర్పు తీరిస్సి నెయ్యి లోకాజ్ దేవుణు ఏర్పాటు కిత్తాన్. 21 దన్ని వెనుక ఇస్రాయేలు లోకుర్ ‘మజి ఉండ్రె రాజుజ్ ఏర్పాటు కిత’ ఇజి వెప్తాజ్ దేవుణు వరిజ్ బెన్యమిను కుటుమ్దికాన్ కీసు మరిసి ఆతి సవులుజ్ నలపయ్ పంటజ్ ఏలుబడి కిదెజ్ ఏర్పాటు కిత్తాన్. 22 వెనుక సవులుజ్ లాగితాండ్రె దావీదుజ్ రాజువజ దేవుణు ఏర్పాటు కిత్తాన్. దావీదు వందెజ్ దేవుణు ఇని సాసి వెప్తాన్ ఇహిజ, ‘యెసెయి మరిసి ఆతి దావీదు ఇహిజ నాను ఒడిబిని లెకెండ్ ఒడిబిజినాన్. నాను ఇస్టం అనికెజ్ వాండ్రు ఇస్టం ఆజినాన్. వాండ్రు ఇనిక కిదెజ్ ఇజి నాను కోరిజినాన్ అక్కెజ్ వాండ్రు కినాన్’. 23 యా దావీదు పొటెజాణిజె మా అనిగొగొర వెట దేవుణు ఒట్టుకెత్తి లెకెండ్ ఇస్రాయేలు లోకాజ్ తప్తిస్సికాన్ ఆతి యేసుజ్ పుట్టిస్తాన్. 24 యేసు వాని ముందాల యోహాను ఇస్రాయేలు లోకాజ్ బోద్నిస్తాన్. ఇనిక ఇహిజ ‘విజేరె పాపమ్మకు ఒప్పుకోడిజి డిసిసీజి బాప్తిసం లాగి ఆదెజ్’ ఇజి. 25 యోహాను వన్ని పణి వీస్సివలె లోకాజ్ వెప్తాన్, ‘నాను ఎయెన్ ఇజి మీరు ఒడిబిజినిదెర? మీరు ఒడిబిజినికాన్ ఆవిన్ నాను. మీరు ఎద్రు సుడిజి మహికాన్ వెన్యా వాజినాన్. వన్ని జోడ్కుబెట్టు కూతెజబా నాను ఏపటిదిక ఆవి’.

26 తంబెరిజాండె, అబ్రాహాం కుటుమ్దికిదెరా, దేవుణుదిజ్ తియెల్ ఆనికిదెరా, దేవుణు లోకాజ్ ఎలాగ గెల్పిస్తాన్లె ఇజి కబ్బు దేవుణు మజి విజేరిజె పోక్తాన్. 27 ఎండనిజ్ ఇహిజ యెరూసలేమ్మదు మహికార్, వరి అతికారి లోకుర్, యేసు, దేవుణు పోక్తాన్ ఇజి గుర్తు అన్వితార్. విజు విస్తాంతి దినమ్మదు వారు ప్రవక్తరు రాస్తి మాటెజ్ నదవితార్ గాని అర్థం కివితార్. గాని ప్రవక్తరు ముందాల్పె వెప్తి అయ మాటెజ్ పజ జర్పిస్తారె. ఎలాగ ఇహిజ యేసుజ్ సప్తెజ్ వారు తీర్పు కిత్తారె. 28 యేసుజ్ తీర్పు కిని వన్నిడగ్రు తసి సాపుదిజ్ తగితి తప్పు ఇనికబా కివితాన్ ఇజి సుడిజిజెబా గాని విన్నిజ్ సిలువ డెయేజి నప్పు ఇజి వారు పిలాతుజ్ బతిమాలితారె. 29 యేసుజ్ యూదురు ఇనికెజ్ ఇనికెజ్ కినారె ఇజి ప్రవక్తరు రాస్తి మహికెజ్ విజు వారు కిత్తి వెనుక వన్ని సిసూర్ వన్ని పీనుగుదిజ్ సిలువదాన్ డిప్తారె నట్టుపణుకుదు దొలిస్సి సాలమ్ లోఇ ఇడ్డారె. 30 గాని దేవుణు యేసుజ్ సాతి వరిబాణిజ్ నిక్తాన్. 31 గలీలయదాన్ యెరూసలేమ్మదు వన్నివెట సొన్ని మహి వరిజ్ యేసు నండ్రె రోస్కు తోరె ఆతాన్. వారు ఏలు మాటు ఇస్రాయేలు లోకాజ్ నడిమి యేసుజ్ సాసిర్.

32-33 ఏలు మాపు మిజి సువార్త వెప్సియావ్. అయ సువార్త ఇనిక ఇహిజ దేవుణు యేసుజ్ సాతి వరిబాణిజ్ నిక్తాన్. యాక మా అనిగొగొర వెట దేవుణు కిత్తి ఒట్టు. వరిజ్ కిత్తి ఒట్టు వరి పొటెజాణికార్ ఆతి మా వందెజ్ ఏలు జర్గితాద్. “నీను నా మరిన్, నేండ్రు నాను నీ బుబ్బు ఆత మన్న”, ఇజి కిర్తన రుండిదు రాస్తి మనిక దిన్నివందెజె.

34 దేవుణు వన్నిజ్ సాతి వరిబాణిజ్ నిక్తాన్. వన్ని పీనుగు సబ్విద్ ఇజి వన్నివందెజ్ దేవుణు మాటాదు ఈహు రాస్త మనాద్. “దావీదుజ్ సీనా ఇజి ఒట్టు కిత్తి నెగ్గి దీవెనమ్మకు నాను మిజి తవ్వెండ సీనా”. 35 కిర్తన పుస్తకమ్మదు మరి రాస్త మనాద్. అక్కు ఇనిక ఇహిజ “నీను పొక్తివన్ని పీనుగు సబ్జి సాండ్రెజ్ నీను సరి నిజ”.

36 అపొజు దావీదురాజు దేవుణు యేసూ కిత్తి వజు వన్ని తరమది వరిజ్ సేవ కిజి వీస్తాండ్రె సాత సాహాన్. వన్ని అనిగొగొబాన్ వన్నిజ్ బా ముస్తార్. వన్ని పీనుగు సబిత సాహాద్. 37 గాని సాతి పరిబాణిజ్ దేవుణు నిక్తి యా యేసు పీనుగు సబజి సాన్వితాద్.

38 అందెజె తందెరిజాండె, మిజి వెప్పొని సువార్త యాకాద్. పాపమకు నెమిస్తెజ్ యేసు అట్టాన్. యాక మీరు నెగ్రెండ నెస్తెజ్ ఇజి నాను ఆస ఆజిన. 39 మోసె సిత్తి రూలుజ్ ఒరెన్ వన్నిజ్ వన్ని పాపమకాణ్ డిజిబిస్తాన్ అట్టె. గాని యేసు ముస్సు నమకం ఇడ్చి వరిజ్ పరి పాపమకాణ్ యేసు పూర్తి డిజిబిస్తాన్. 40 ప్రవక్తరు వెప్తిపజ మిజి రెవిండ సుడెడు. వారు ఇనిక వెప్టోర్ ఇహిజ.

41 “సుడెడు, వెక్తిసినికిదిరా, మీరు బమ్మ నిదెరెలె గాని పాడాజి సానిదెరె. ఎందనిజ్ ఇహిజ మీ కాలమదు నాను ఉండ్రె బమ్మాని పణి కిన. గాని అయ పణి వందిజ్ ఎయెర్బా వెప్తిజ్ బా మీరు నమ్మెదెర్”. 42 పవులుని బర్బబ యూదురి మీటిజ్ ఇండ్రెణిజ్ సొత్తిజ్, “వాని విస్తాంతి దినమదు వాజి యా మాటెజ్ మజి మరి వెప్పొ సిదాట్”, ఇజి బానె కూడితి మహికార్ వరిజ్ బతిమాలితార్. 43 మీటిజ్ ఆతి వెనుక నండెండార్ యూదురు, నండెండార్ యూద్ మతమదు కూడితి యూదురు ఆఇ బక్తి మన్నికార్ పవులుని బర్బబ వెట సాహార్. పవులు, బర్బబ వరివెట వరితార్. దేవుణు మిజి తోరిస్సి దయాదర్మమదిజ్ డిసెవిండ ఎలాకాలం నడిడు ఇజి పవులుని బర్బబ వరిజ్ ఉసార్ కిబిస్తార్.

44 మరి వాతి విస్తాంతి దినమదు పట్టుమదికార్ విజెరె సాహి లెకెండ మంద లోకుర్ దేవుణు మాట వెండ్రెజ్ ఇజి యూదురు మీటిజ్ కిని ఇండ్రె కూడాజి వాతార్. 45 పవులు వెప్పొ మాటెజ్ వెండ్రెజ్ మంద లోకుర్ కూడాజినార్ ఇజి సుడెతారె యూదురు గోస ఆతార్. వారు పవులు వెప్తి మాటదిజ్ మరజి వెప్టారె వన్నిజ్ దూసలాడితార్.

46 అయావలె పవులు, బర్బబ తియెల్ ఆవిండ వెప్టోర్, “దేవుణు మాట ముందాల మిజి వెప్టెజ్ వలె. అందెజె మాపు ముందాల మిజి వెప్టెజ్. గాని మీరు, ఎలాకాలం బత్కిని బత్కు దోహక్కికాన్ ఆవివ ఇజి మిజి మీరె నెక్కి పొక్తిదెరె తీర్పు కిజినిదెరె కక మాపు మిజి డిసెసి యూదురు ఆఇ లోకుర్ బాన్ సాన్నినామ్. 47 దేవుణు మజి సిత్తి ఆడ్ర ఇనిక ఇహిజ, ‘యూదురు ఆఇ వరిజ్ ఉండ్రె జాయ్ వజ మిజి ఇట్టా మన్న. ఎందనిజ్ ఇహిజ యా లోకమదు మన్ని విజు లోకాజ్, వరి పాపమకాణ్ వాని సిక్కుదాన్ గెల్వెస్తెజ్’ ఇజి వెప్టా మనాన్. 48 యూదురు ఆఇ లోకుర్ విజెరె యా మాటెజ్ వెహారె సర్ల ఆతార్. దేవుణు మాటెజ్ ఎస్సానో నెగ్గెకెజ్ ఇజి వారు వెప్టోర్. ఎలాకాలం బత్కిని బత్కుదిజ్ ఏరెపాటు అతికార్ విజెరె దేవుణు మాటెజ్ నమ్మితార్. 49 దేవుణు మాట అయ దేనమదు విజు సాటె ఆతాద్. 50 గాని యూదురు ఆ పట్టుమదు బక్తి మన్ని పల్కుబడి మనికెజ్ ఆతి అయిలె కొడెజ్ వెట, పెరికార్ ఆతి మొగవరి వెట వర్గిజ్ కోపం రేప్టారె పవులు ముస్సు, బర్బబ ముస్సు, మాలెజ్ కితారె వరిజ్ అయా పట్టుమదాన్ నెక్త పొకార్. 51 అందెజె పవులుని బర్బబ, వరి కాల్యాణి దూల్లి అయ పట్టుమది వరి ఎద్దు దుల్పెరె. ఎందనిజ్ ఇహిజ వారు దేవుణు మాట నెక్కిపొక్తిజ్ వరిజ్ వాని సిక్కు వారె తపిస్తారె ఇజి సాని లెకెండ మండ్రెజ్ ఇజి. వెనుక వారు ఇకోనియ ఇని పట్టుమదు సాహార్.

52 అంతియొకయాదు మన్ని సిసూర్ ఎసానో సర్ల ఆతార్. దేవుణు ఆత్మ వరి ముస్సు పూర్తి వాతాద్.

14

పవులు, బర్బబ ఇకోనియాదు సువార్త వెప్పొనార్

1 పవులుని బర్బబ కూడాజి ఇకోనియాదు సాహారె అంతియొకయాదు కిత్తిలెకెండ యూదురు మీటిజ్ కిని ఇండ్రె సాహార్. వారు నెగ్రెండ బోద్ వెప్టిజ్ నండెండార్ యూదురు, నండెండార్ యూదురు ఆఇకారెబా నమ్మితార్. 2 గాని నమ్మిఇకార్ యూదురు, యూదురు ఆఇ వరిజ్ రేప్టారె అపొస్తురుజు ముస్సు కోపం పుటిస్తార్. 3 గాని పవులు, బర్బబ నండ్రె రోస్కు బానె మహార్. యేసువందిజ్ దయరమదాన్ వర్గితార్. వారు ప్రబు దయాదరమమ్ వందిజ్ వెప్టి మాటెజ్ నిజం ఇజి ప్రబు విజెరిజ్ తోరిస్తాన్. ఎలాగ ఇహిజ బమ్మాతి పణిజ్ బమ్మాతి గుర్తుజ్ కిడిజ్ పవులుజ్ బర్బబెజ్ సత్తు సిత్తాన్. 4 అయ పట్టుమదు మహి లోకుర్ రుండి గుంపుజ్ ఆతార్. నెగెండార్ యూదురు పడెకాద్, మరి నెగెండార్ అపొస్తురి పడెకాద్.

5 అయావలె సెగొండార్ యూదురు ఆఇకార్, మరి సెగొండార్ యూదురు, యూదురి అతికారిజు వెట కూడఃజి అపొస్తురుజ్ అని వరిజ్ సిగు కిజి పణుకుజాణిజ్ డెయేజి సప్తజవలె ఇజి ఒడిఃబిజి మహార్. 6-7 అపొస్తురు అయ సజతి నెస్తారె లుకయొనియాదు మహి లున్త్ర, దెర్బ ఇని పట్టుమ్కాణ్, పన్కా సురుల మన్ని దేసమ్కాజ్ ఉన్కాసి సొహారె అబ్బె సువార్త సాటిస్తారె.

లున్త్ర దెర్బ ఇని పట్టుమ్కాజ్ సొన్సినార్

8 లున్త్ర ఇని పట్టుమ్దు, నడిఃదెజ్ అట్ఠ సొట వాండ్రు ఒరెన్ మహాన్. వాండ్రు పుట్టిబాణిజ్ మొదొల్లి సొటాదికాన్ ఆతండ్రె ఎనెజ్బా నడిఃదెజ్ అట్ఠవండ బనిసె మంజినాన్. 9 పవులు బోదెసి మహిజ్ వాండ్రు వెంజి మహాన్. పవులు వన్నిజ్ సుడఃతిజ్ నెగొండ్రె ఆన ఇజి వన్నిజ్ నమకం పుట్టినాద్ ఇజి నెస్తాన్. 10 అయావలె పవులు వన్నిజ్, “నిజ్అ, నీ పాదమ్కు బూమిదు మొప్పి నిల్అ”, ఇజి డటం వెప్తాజ్ అయ సొటాదికాన్ లిట్టె నిజితండ్రె డాట్టెజ్ మొదొల్తాన్.

11 పవులు కిత్తి బమ్మాతి పణి సుడఃతారె బాన్ మహి లోకుర్ లుకోనియ బాసాదు గగోలాతార్. “దెయమ్కు లోకు లెకెండ్రె ఆతెనె మాడగ్రు డిగ్జె వాతె”, ఇజి డటం గగోలాతార్. 12 బర్నబెజ్ బ్రుహాన్పతి ఇజి పేరు ఇట్టార్. నండ్రె బోద వెప్తా వందిజ్ పవులు హెర్న ఇజి పేరు ఇట్టార్. 13 పట్టుం వెల్లి మహి బ్రుహాన్పతి గుడిఃది పుజెర్ వాతండ్రె డాఃకుజ్, పూజుదండ్రెజ్ అస్తాండ్రె పట్టుం వెల్లి మహి సేప్లా డగ్రు త్తాన్. మంద లోకు కూడఃజి వాతారె పూజ కినాట్ ఇజి అయ పుజెర్ని, కూడిఃతి మహి లోకుర్ ఒడఃబితార్. 14 బర్నబని పవులు యాక నెస్తారె వారు కిని పణిదిజ్ ఒప్పుకోడఃఎవ్ ఇజి తోరిసిని వందిజ్ వరి సొక్కజ్ పాతెజ్ కిస్తారె లోకురి నడిఃమిదు ఉహ్కీ సొహారె డటం వెప్టార్.

15 “తంబెరిజాండ్రె, మీరు ఎందనిజ్ ఈహు కిజినిదెర్? మాపుబా మీ నన్ని లోకునె. మీరు యా పణిదిజ్ రెకెజ్ డిఃసిసీజి ఆగాసం, బూమి, సమ్దరం, బాన్ మన్ని విజు వనకాజ్ పుట్టిసి బత్తిజి మంజిని దేవుణుదిజ్ నమ్మిదు ఇజి మిజి సువార్త వెప్పినావ్. 16 గడ్డిఃస్తి కాలమ్దు విజు జాతిజ్ వరిజ్ వరిజ్ ఇన్వమాతి వన్కాజ్ పొగిడిఃజి మాడిఃస్తిజ్ దేవుణు డిఃస్తి సితాన్. 17 అహిజ్బా దేవుణు ఆగాసమ్దాన్ మిజి పిరు, ఎవేణివేల పంట అయావలె కనికారం ఆజి సీజినాన్. తక్కు సిల్లెండ్రె బోజనం సీజినాన్. మీ మన్సుదిజ్ సర్త కిబిసి పొస కిజినాన్. ఈహు వాండ్రు ఎలాగ మప్తా దేవుణు ఇజి లోకాజ్ తోరిస్తాన్”. 18 అపొస్తురు యాలెకెండ్రె వెప్తాజ్బా వారు విరిజ్ పూజ కివండ్రె ఆదెజ్ ఇజి లోకురిజ్ అడ్డు కిదెజ్ గొప్పు కన్సం ఆతాద్.

19 అయావలె అంతియొకయాదాన్, ఇకొనియదాన్ సెగొండార్ యూదురు వాతారె వరి మాటిజాణిజ్ నండ్రె లోకాజ్ వరి పడఃకాదు కూడుఃప్తారె. కూడుఃప్తారె, పవులు మున్కు పణుకుజ్ డెయ్యార్. వాండ్రు సాతాన్ ఇజి ఒడిఃబితారె పట్టుం వెల్లి వన్నిజ్ ఈడ్డిస్తారె బానె డిఃస్తారె. 20 గాని సిసూర్ వన్ని సురుల కూడిఃతి మహివలె పవులు నిజితండ్రె పట్టుమ్ లోఇ మర్జి సొహాన్. మహ్నా నాండిజ్ పవులు, బర్నబు కూడిఃతారె దెర్బ ఇని పట్టుమ్దు సొహార్.

పవులుని బర్నబు సిరియాదు మన్ని అంతియొకయాదు మర్జి సొహార్

21 పవులుని బర్నబు దెర్బ ఇని పట్టుమ్దు సువార్త బోదిస్తారె. నండ్రె లోకుర్ యేసుప్రబుజ్ నమ్మితార్. వెనుక పవులుని బర్నబు, లున్త్ర, ఇకొనియ, అంతియొకయాదు మర్జి వాతారె.

22 వాతారె, ఎవేణి పట్టుమ్ది వరిజ్ బానె సిసూరిజ్ ఉసార్ కిబిస్తారె. “మీ నమకం డిఃన్వండ్రె మండ్రు. మాటు నండ్రె మాలెజ్ ఓరిసి దేవుణు రాజెమ్దు సొండ్రెజ్ వలె”, ఇజి మరి మరి పణిసి వెప్టార్.

23 పవులు, బర్నబు విజు సజమ్కాజ్ వెద్దెల్ఠిజ్ ఏర్పాటు కితారె ఉపాన్ మంజి పార్లనం కిజి, వారు నమ్మితి దేవుణుదిజ్ వరిజ్ ఒపజెప్టార్. 24 వెనుక పినిదియ దేసం డాట్టారె పంపులియాదు వాతారె. 25 వెర్గ ఇనిబాన్ దేవుణు మాటిజ్ బోదిసి వెనుక అతలియ పట్టుమ్దు డిఃగ్జె సొహార్.

26 అబ్బెణిజ్ ఓడః ఎక్తారె వారు మొదొహి సొత్తి సొహి అంతియొకయాదు మర్జి వాతారె. యా అంతియొకయాదునె దేవుణు పణివందిజ్, వన్ని దయాదర్మమ్దిజ్ ఒపజెపె ఆతారె. అయ పణి వీస్తారె ఏలు బానె మర్జి వాతారె. 27 మర్జి వాతారె సజమ్ది వరిజ్ విజెరిజ్ కూడుఃప్తారె, దేవుణు వరి వెటనె కిత్తి పణిజ్ విజు వెప్టార్. యూదురు ఆఇకార్ దేవుణుదిజ్ నమ్మిదెజ్ వాండ్రు ఎలాగ సరి సితాన్ ఇజి వెప్టార్. 28 వారు నండ్రె కాలం బానె మంజి సిసూరి వెట బత్తిత్తారె.

15

అపొస్తురు, పెద్దెలుజు ఆలోసనం కిదెజ్ యెరూసలేమ్దు కూడేజి వాతార్

1 సెగొండార్ యూదయ దేసెమ్దికార్ అంతియొకయాదు వాతార్. వారు అబ్బె మన్ని లోకాజ్ ఈహు సెన్సిస్టెజ్ మొదోల్స్తార్. ఇనిక ఇహిజ మోసె సిత్తి రూలు వజ సునతి కిబె ఆవిండ మహిజ మీరు సిక్కుదాన్ గెలిస్టెజ్ అట్ఇదెర్ ఇజి నెస్పిస్తార్. 2 పవులుని బర్నబు యా సజతి వందిజ్ కూడితారె యూదయ దేసెమ్ది వరివెట నండో వర్గిజి ఆహె తర్కిస్తార్. అందెజె యా మాటిజ వందిజ్ పవులు, బర్నబు, వరివెట అంతియొకయ దేసెమ్దు మన్ని మరి సెగొండార్ ఎక్కు యెరూసలేమ్దు సొన్సి అబ్బె మన్ని అపొస్తురుజు, పెద్దెల్జ డగ్రు సొండ్రెజ్ వలె ఇజి తీర్మానం ఆతార్. 3 ఆహె అయ సజమది లోకుర్ వరిజ్ పోక్తార్. వారు పినెకె, సమరియ ఇని దేసెమ్క సరి సొహారె బానె మహి వరివెట యూదురు ఆఇకారె దేవుణు దరోట్ మస్తా వాతారె దేవుణుదిజ్ నమ్మిజినారె ఇజి విజు వెప్తారె సొహార్. అబ్బె మహి నమ్మితికార్ యాక వెహారె గొప్పు సర్ద ఆతార్. 4 వారు యెరూసలేమ్దు వాతివలె సజమదికార్, పెద్దెలుజు, అపొస్తురు విజేరె వరిజ్ గవేరం సీజి బసె కిత్తార్. దేవుణు వరివెట కిత్తి పణిజ వందిజ్ విజు వారు వెప్తార్.

5 గాని బాన్ పరిసయరు ఇని జటుదు మహి నమ్మితికార్ సెగొండార్ నిజ్జె వెప్తార్, “నమ్మిత్తి వరి లోక యూదురు ఆఇ లోకుర్ సునతి కిబె ఆదెజ్ వలె. మోసె సిత్తి రూలుదు మన్ని ఆద్రెజ్ విజు వారు బప్పుకోడేజి ఆహె కిదెజ్ వలె ఇజి మాటు వరిజ్ వెప్తాజ్ వలె”, ఇజి వెప్తార్.

6 అయావలె అపొస్తురు, పెద్దెలుజు యా సజతి వందిజ్ ఆలోసనం కిదెజ్ కూడేజి వాతార్. 7 నండో తర్కిసి వెనుక పేతురు నిజితండ్రె వరివెట ఈహు వెప్తాన్. “తంబెరిజాండె, సెగం కాలమ్కాజ్ ముందాల్పై* యూదురు ఆఇ లోకాజ్ సువార్త వెప్తాజ్ మీ నడిమిహానె దేవుణు నజి ఏర్పాటు కిత్తాన్ ఇజి మీరు నెసినిదెర్. ఎందనిజ్ ఇహిజ వారుబా దేవుణు మాట వెంజి దేవుణుదిజ్ నమ్మిదెజ్. 8 లోకు ఒడిబినికెజ్ విజు నెసిని దేవుణు, దేవుణుదిజ్ నమ్మితి యూదురు ఆఇ లోకాజ్ బా వన్నిబాన్ కూడుప్పాన్ ఇజి తోరిస్తాన్. ఎలాగ తోరిస్తాన్ ఇహిజ మజి సిత్తివజనె యూదురు ఆఇ లోకాజ్ బా దేవుణు వన్ని ఆత్మ సిత్తాన్. 9 యూదురు ఆతి మజిని ఆఇ లోకుర్ ఆతి వరిజ్ ఇని తేడ సిల్లెండ దేవుణు ఉండ్రె వజనె కిత్తాన్. ఎలాగ ఇహిజ వారు నమ్మితిజ్ వరి మన్నుదు మన్ని పాపమ్కు విజు లాగితండ్రె సుబరం కిత్తాన్. 10 అహిజ, మాపు గాని, మా అనిగొగొర్ గాని పిండికెజ్ అట్ఇ బరుదిజ్ ఎందనిజ్ యా నమ్మితి వరి మున్ను మొప్పినిదెర్? ఆహె మీరు కిత్తిజ మీరు దేవుణుదిజ్ కోపం రేప్పినిదెర్. 11 గాని ప్రబు ఆతి యేసు దయాదర్ మమదానె మాటు గెలిస్తమనాట్ ఇజి మాటు నమ్మిజినాట్. అయావజనె వారుబా గెలస్త మనార్”, ఇహాన్.

12 ఆఇ జాతి లోకుర్ నడిమి దేవుణు వరివెట కిత్తి గొప్పు బమ్మాతి పణిజ వందిజ్ గొప్పు బమ్మాతి గుర్నబు వందిజ్ పవులు, బర్నబు వెప్తాజ్, అబ్బె మహి లోకుర్ విజేరె జమ్న అలెతారె వెహార్. 13 వారు వెప్తా పిస్తి వెనుక యాకోబు ఈహు వెప్తాన్. “తంబెరిజాండె, నా మాట నెగ్రెండ వెండ్రు. 14 ఆఇ జాతి లోకుర్ వెట దేవుణు ముందాల్పై దయ తోరిస్తాన్. అక్క ఎలాగ ఇహిజ వరి బాణిజ్ ఉండ్రె జటు వన్ని సొంత లోకు వజ ఏర్పాటు కిదెజ్ దేవుణు వరిజ్ దయ తోరిస్తాన్. అక్క విజు పేతురు యెలె వెప్తా మనాన్. 15 ప్రవక్తరు ముందాల్పై వెప్తాకెజ్ యాకదె. ఇని తేడ సిల్లెద్. వారు ముందాల్పై వెప్తా మాట ఇనిక ఇహిజ.

16 “దిన్ని వెనుక నాను మర్జె వాజి దావీదురాజుది అర్తి సొహి ఇల్లు తొప్పా. లాగ్గి వినీర్జి దన్నిజ్ నాను మర్జె తొప్పి దన్నిజ్ నాను ముందాల్ మహిలెకెండ్రె కిన. 17-18 అయావలె ఆఇ జాతి లోకుర్ విజేరె నజి రెబానారె. ఆఇ జాతి లోకుర్ బాణిజ్ నా పేరు అస్తెజ్ నాను ఏర్పాటు కిత్తికార్ విజేరె నజి రెబానారె ఇజి దేవుణునె వెప్పినాన్”, “యాక నండో కాలమ్కాజ్ ముందాల్పై దేవుణు వెప్తా మనాన్”.

19 యాకోబు మరి వెప్తాన్, “నా మన్నుదు ఇనిక ఇహిజ, దేవుణు దరోట్ మస్తా వాతి ఆఇ జాతి లోకురిజ్ మాటు మాలెజ్ కినిక ఆవిద్. 20 మాటు వరిజ్ ఉండ్రె ఉండ్రె రాసి పోక్తెజ్. అబ్బె ఇనిక రాస్తెజ్ ఇహిజ, బొమ్మెజు పూజ సిత్తి కండ్రె తినిక ఆవిద్. అక్క నెఇక. సాని బూలానిక ఆవిద్. గొత్తిక

* 15:7 15:7 యూదురు ఆఇవరివెట సొన్సి సువార్త వెప్తాజ్ దేవుణు పేతురువెట వెప్తా కతవందిజ్ అపొస్తురు కిత్తి పణిజ్ 10:1-1; 1:18. దు నదేవిదు.

పిడికిళ్ళి నప్పిక తినిక ఆవిద. నల తినిక ఆవిద. యాక విజు డిసిసిదెజ్. అక్కెజె. మరి ఇనిక సిల్లెద్. ²¹ ఎండనిజ్ ఇహిజ యాక విజు రాస్తిమని మోసె సిత్తి రూలుజ్ ప్రతి విస్త్రాంతి దినమ్దు, నండొ కాలమ్కాణిక్ యూదురు మీటిజ్ కిని ఇల్కాజ్ సదివిజి మంజినాద్. మోసె వెహ్ మాటెజ్ విజు పట్టుమ్దు బోదిసి మంజినాద్, అందెజె వన్కాజ్ విజు వారు లోబడెదెజ్”, ఇజి వెహ్హన్.

అపొస్తురు ఉండ్రీ ఉత్తం రాస్త పోక్తార్

²² అయావలె అపొస్తురు, పెద్దెలుజు, నజమ్దికార్ విజెరె కూడితారె నమ్మిత్తి వరిలోఇహాన్ సెగొండారిజ్ ఏర్పాటు కిజి పవులుని బర్లుబవెట అంతియొకయూదు పోక్తెజ్ ఇజి తెగిస్తార్. వారు బర్లుబ ఇని మరి ఉండ్రీ పేరు మన్ని యూద వన్నిజ్, సీలెజ్ ఏర్పాటు కిత్తార్. యూదని, సీల రిఎర్. అయ నజమ్దు ముకెలమతికార్.

²³ వరివెట నజమ్దికార్ ఉండ్రీ ఉత్తం రాస్త పోక్తార్. అబ్బె ఇనిక రాస్త మనాద్ ఇహిజ, ‘మీ దాద్సీర్ ఆతి అపొస్తురు, పెద్దెలుజు, అంతియొకయూదు, సిరియూదు, కిలికియూదు మన్ని దేవుణుదిజ్ నమ్మిత్తి యూదురు ఆఇ జాతిజ విజెరిజ్ వందనమ్కు పోక్తినార్. ²⁴ సెగొండార్ మా డగ్రుహాన్ సాహారె వరి బోదదాన్ మజి మాలెజ్ కిత్తార్, మీ మన్నుజ విజు బాద కిత్తార్ ఇజి మాపు నెస్తావ్. గాని వరిజ్ మాపు పోక్వితావ్, ఇని అతికారంబా సివితావ్. ²⁵⁻²⁶ అందెజె, మా యేసు ప్రబు వందిజ్ పాణం సావుదిజ్ ఒపజెప్పి మా ప్రియమాతి బర్లుబ, పవులు ఇని వరివెట మా డగ్రుహాన్ సెగొండారిజ్ మీ బాన్ పోక్తావ్ ఇజి మాపు ఉండ్రె మన్ను అత మనావ్. ²⁷ అందెజె మాపు యూద, సీల ఇని రిఎరిజ్ పోక్తినావ్. వారు వాజి మాపు రాస్తి మాటనె వెహ్హర్లె. ²⁸⁻²⁹ మిజి అవ్సరం ఆతి ఆడ్రెజ్ ఇనికెజ్ ఇహిజ, దెయమ్కాజ్ పూజ కిత్తికెజ్ తిన్కాట్. నల తిన్కాట్. గొత్తిక పిడికిళ్ళి నప్పివనకాజ్ తిన్కాట్. సాని బూలాదిజ్ ఆవిద. యా పణిజ్ కివండ మీరు దూరం మహిజ మిజినె నెగెద్. మిజి అవ్సరం ఆతి యా ఆడ్రెజ్ ఆవిండ మరి నండొ ఆడ్రెజ్ వెహ్హి మీ మున్ను బరు ఇడ్డిక ఆవిద్ ఇజి దేవుణు ఆత్మని, మాపు ఉండ్రె మన్ను ఆజినావ్. మిజి మా వందనమ్కు.

³⁰ అయావలె నజమ్దికార్ సెల్ల సిత్తిజ్ వారు సొత్తారె డిగు అంతియొకయూదు వాతార్. బానె నమ్మిత్తి వరిజ్ విజెరిజ్ కూడుస్తారె ఉత్తం సితార్. ³¹ వారు అయ ఉత్తం సద్వితారె డటం సర్ల ఆతార్. ఎండనిజ్ ఇహిజ అయ ఉత్తం వరిజ్ దయరం కిత్తార్. ³² యూద, సీల రిఎర్ దేవుణు మాటెజ్ వెహ్హికార్. అందెజె వారు దేవుణు మాటెజ్ నండొ వెహ్హి అబ్బె మహి దాద్దిరిజ్ తంబెరిసిరిజ్ దయరం వెహ్హి ఇత్తార్. అక్క వెంజి వరి మన్నుదు బలం ఆతార్. ³³⁻³⁴ వారు అబ్బె సెగం రోస్సు గడెస్తార్. వెనుక, బానె మహి నమ్మిత్తికార్ వరిజ్ యెరూసలేమ్దు వరిజ్ పోక్తి వరిబాన్ మరజి పోక్తార్. “దేవుణు సమదనం మీబాన్ మనీద్”, ఇహారె పోక్తార్. ³⁵ గాని పవులుని బర్లుబ అంతియొకయూదు మహారె మరి నండొ లోకుర్ వెట దేవుణు మాటెజ్ బోదిసి సువార్ల వెహ్హి మహారె.

మార్కు వందిజ్ పవులుని బర్లుబ గొడెబ ఆతార్

³⁶ సెగం రోస్సు ఆతి వెనుక పవులు బర్లుబెజ్, “ఏలు సానాటె మాటు దేవుణు మాట వెహ్హి విజు పట్టుమ్కాజ్ మన్ని తంబెరిజు విజెరె ఎలాగ మనారొ ఇజి సూణ సానాట్ ఇజి వెహ్హన్. ³⁷ అయావలె మార్కు ఇజి ఆఇ పేరు మన్ని యోహానుజ్ వరివెట కూక్కి ఒతెజ్ బర్లుబ ఇన్లం ఆతాన్. ³⁸ గాని మార్కుజ్ వరివెట ఒతెజ్ ఆవిద్ ఇజి పవులు వెహ్హన్. ఎండనిజ్ ఇహిజ మార్కు ముండాల వరివెట పణిదిజ్ సాహెజ్ పూర్తి టయం మన్విండ పంపులియదు వరిజ్ డిస్స సాహన్.

³⁹ మార్కు వందిజ్ పవులుని బర్లుబ నండొ గొడెబ ఆతారె రియూజ సాహారె. బర్లుబ మార్కుజ్ వెట ఒతండ్రె ఒడె ఎక్కి కూప్త ఇని ద్విప్పుదు సాహారె. ⁴⁰ గాని పవులు సీలెజ్ కూక్కి ఒతాన్. బాన్ మహి తంబెరిజు వారు రిఎరిజ్ దేవుణు దయాదర్మమ్దిజ్ ఒపజెస్తారె వరిజ్ పోక్తార్. ⁴¹ వారు సొత్తారె సిరియ కిలికియ పట్టుమ్కాజ్ మన్ని నజమ్కాజ్ సాహారె. బానె దేవుణు మున్ను నమకం ఇడ్డివరి నమకం సత్తు కిబిస్తార్.

16

పవులుని సీల వెట తిమోతి కూడఁజినాన్

1 పవులు, సీల వెట దెరెబ, లున్త్ర ఇని పట్టుమకాణ్ వాతాన్. అబ్బె తిమోతి ఇనికాన్ ఒరెన్ యేసుప్రబుజ్ నమ్మిత్తికాన్ మహాన్. వన్ని అయ్సిబా నమకం ఇట్టా మహాద్. అది యూద జాతిదికాద్. వన్ని బుబ్బు ఆఇ జాతిదికాన్. వాండ్రు గ్రిసు దేసెమ్దికాన్. 2 తిమోతి వందిజ్ లున్త్రదు, ఇకొనియాదు నమ్మిత్తికార్ వాండ్రు గొప్ప పేరు మన్నికాన్, ఇజి పొగ్డితార్.

3 తిమోతిజ్ వన్నివెట ఒతెజ్ ఇజి పవులు ఆస ఆతండ్రె వన్నిజ్ సునతి కిబిస్తాన్. ఎందనిజ్ ఇహిజ వన్ని బుబ్బు ఆఇ జాతిదికాన్ ఇజి అబ్బె మహి యూదురు విజేరె నెస్త మహార్. 4 వారు పట్టుమకాణిజ్ సొన్ని మహిజ్, యేసుప్రబుజ్ నమ్మిత్తికార్ ఎలాగ నడిదెజ్ ఇజి యెరూసలేమ్దు మన్ని అపొస్తరు, పెద్దెలుబు ఏరెపాటు కిత్తి ఆడ్రెజ్ బోదిస్తారె అక్కాజ్ లోజిదెజ్ ఇజి వెస్తార్. 5 ఆహా సజమ్దు మన్నివరి నమకం లావు పిరితాద్. వరి లెక్క రోజు రోజు లావు ఆజి మహాద్.

పవులు మసిదోనియ దేసెమ్ది వన్నిజ్ దర్సనమ్దు సుడఁజినాన్

6 ఆనియ ప్రాంతమ్దు దేవుణు మాటెజ్ వెప్పిక ఆవిద్ ఇజి దేవుణు అత్తు వరిజ్ అడ్డు కిత్తిజ్ వారు ప్రిగియ, గలతియ దేసెమ్కాణిజ్ సొహార్. 7 అయావలె మునియ బెతనియ డగ్రు వాతారె బెతనియ సాండ్రెజ్ ఇజి సుడఁతార్. గాని బాన్ సాండ్రెజ్ యేసుప్రబు అత్తు వరిజ్ సరి సివితాన్.

8 అందెజె వారు మునియ ప్రాంతం డాట్టారె డిఃగు నమ్దరం డగ్రు మని త్రోయ ఇని పట్టుమ్దు సొహార్. 9 అయ పొదోయ్ పవులు, బాన్ మహిజ్, ఉండ్రీ దర్సనం సుడఁతాన్. అక్క ఇనిక ఇహిజ మసిదోనియ దేసెమ్దికాన్ ఒరెన్ నిల్సి, “నీను మసిదోనియాదు వాజి మజి సాయం కిత”, ఇజి బతిమాలితి పజ దర్సనం సుడఁతాన్. 10 పవులు అయా దర్సనం వాతిజ్, మాపు వెటెనె మసిదోనియ సాండ్రెజ్ తయార్ ఆతాన్. ఎందనిజ్ ఇహిజ, మసిదోనియాది వరిజ్ దేవుణు సువార్త వెప్పి వందిజ్ దేవుణు మజి కూక్త మనాన్ ఇజి మాపు నెస్తాప్.

లదియ యేసుప్రబుజ్ నమ్మిజినాన్

11 మాపు త్రోయ పట్టుమ్దాన్ ఓడః ఎక్టాపె తినాజ్ నమొత్ర ఇని ద్విప్పుదు సొహాప్. మహ్నా నాండిజ్ నెయపొలి ఇని పట్టుమ్దు అందితాప్. 12 అబ్బెణిజ్ పిలిప్పి ఇని పట్టుం వాతాప్. మసిదోనియ దేసెమ్దు పిలిప్పి పట్టుం ఉండ్రీ ముకెలమాతి పట్టుం. అక్క నండెండారె రోమాదికారె బత్కిజి మహి పట్టుం. మాపు నెగం రొస్కు ఆ పట్టుమ్దు మహాప్.

13 విస్త్రాతి దినమ్దు మాపు పట్టుం వెల్లి వాతాపె గడ్డ ఒడ్డు దరోట్ యూదురు పార్దనం కిని బాడ్డి మనాద్సు ఇజి వాతాప్. వాతిజ్, బాన్ బస్తాపె కూడఁజి వాతి మహి అయ్లి కొడెకెవెట వర్దిదెజ్ మొదోల్స్తాప్. 14 అయావలె లదియ ఇని ఉండ్రీ అయ్లి కొడెకె వెంజి మహాద్. అది తుయతయర పట్టుమ్దికాద్. అది లావు దరది ఊద రంగుది పాతెజ్ పొర్నికాద్. అది దేవుణుదిజ్ పార్దనం కినికాద్. దేవుణు మాటెజ్ అర్దం కిదెజ్ దేవుణు బుద్ది సిత్తిజ్ అది పవులు వెప్తి మాటెజ్ మన్నుదు ఇడఁతాది అయావజెనె నడితాద్. 15 అది, దన్ని ఇండ్రెణికార్, విజేరె బాప్తీసం లాగె ఆతార్. వెనుక అది, “నాను దేవుణుదిజ్ పూర్తి నమ్మిజిన ఇజి మీరు ఒప్పుకోటిజె నా ఇండ్రె వాజి మండ్రు”, ఇజి మజి బతిమాలితాద్.

పవులుజ్ సీలెజ్ జెలిలోఇ ఇడ్డార్

16 ఒర్వెండు మాపు పార్దనం కిని బాడ్డిదు సొన్ని మహిజ్ ఉండ్రీ వెట్టిపణి కిని ఇజిరి అయ్లి మా ఎద్దు వాతాద్. దన్నిజ్ పుతోన్* ఇని దెయం అస్త మహాద్. అది జాతకం వెప్పి దన్ని ఏజామాసురిజ్ నండె డబ్బు గణపిస్తాద్. 17 అది పవులుని మజి వెనుక వాజి డటం గగోల్ ఆజి వెస్తాద్, “యా లోకుర్, విజెరిజ్ ఇంక పెరి దేవుణుదిజ్ సేవ కినికార్. దేవుణు ఎలాగ మిజి గెల్పిస్తాన్ ఇజి మీరు వెప్పార్లె” ఇహాద్. 18 నండె రొస్కు అది ఆహా కిజి మహిజ్, పవులు మన్నుదు గొప్ప బాద ఆతండ్రె అయ

* 16:16 16:16 పుతోన్ ఇని దెయం యా అయ్లిదిజ్ వాని కాలమ్దు జర్జిని నజతిజవందిజ్ నెస్సిని మహాద్. అక్క వెప్తిజ్ లోకుర్ దన్నిజ్ డబ్బు సీజి మహాద్

దెయమ్దిజ్ “నీను యా ఇజిరి దన్నిజ్ డిసి సొన్ అ ఇజి యేనుక్కిస్తు అతికారమ్దాన్ వెహాసిన”, ఇజి వెహాన్. వెటనె అయ దెయం అయ్లిదిజ్ డిస్ట సాహాద్.

19 గాని దన్ని ఎజుమానిరు వరిజ్ వాని డబ్బు విజు సాహె ఇజి సుడెతారె పవులు సీలెజ్ పట్టుం నడిమి, అతికారిజు డగ్రు ఈడిసి తతార. 20-21 కోర్టు నడిపిసిని వరిబాన్ తతారె, “వీరు యూదురు. వీరు బోదిసిని అలవాటుజ్ మజి పడెఱకెజ్. మాటు రోమాదికాల్. మాటు అక్కెజ్ ఒప్పకొణిక ఆవద్, అయావజనె నడినిక ఆవద్. మా పట్టుమ్దు వీరు గొప్ప కలిబిలి కిజినార్”, ఇజి వెహాన్.

22 అయావలె బాన్ కూడితి మహి లోకుర్ విజెరె పవులుజ్ని, సీలెజ్ ఎద్రు వాతారె నింద మొప్తారె గగల్ ఆతార. వరి సొక్కెజ్ లాగిజి వరిజ్ డెయ్యు ఇజి కోర్టు నడిపిసినికార్ ఆడ్ర సితార. 23 వారు లావు దెబ్బెజ్ డెయ్యారె పవులు సీలెజ్ జెలి లొఇ ఇడ్రార. “వరిజ్ జాగర్ నుడెదు”, ఇజి జేలి ఎజుమానిజ్ ఆడ్ర సితార. 24 అయ ఆడ్ర వాటిజ్ జెలి ఎజుమాని వరిజ్ జేలిదు లొఇ మన్ని గదిదు వరి కాల్యాజ్ డుకెజి లొఇ తొప్తొండె ఇట్టాన్. 25 రమారమి మదరెయ్తు పవులుని సీల దేవుణుదిజ్ పార్లనం కిజి పాటిజ్ పార్లి మహార్. వీరు పారెజి మహిజ్ జెలిదు తొహె ఆతి మహికార్ విజెరె వెంజి మహార్. 26 అయావలె వెటనె బూమి విజు డటం కద్దితాదె అయ జేలి వునాదిజ్ విజు కద్దితె. వెటనె సేప్లాజ్ విజు రే ఆతె. జెలిదు మహివరి విజెరె కట్టు. ఊడితె. 27 అయ జేలి ఎజుమాని తెలి ఆతండె జెలిది సేప్లాజ్ విజు రే ఆతిమనిక సుడెతాన్. సుడెతండె జెలిదు మహికార్ ఉహ్క సాహార్ ఇజి ఒడిబిజి కుర్ల లాగితండె వన్నిజ్ వాండ్రె గుత్తె ఆజి సాదెజ్ తయార్ ఆతాన్. 28 అయావలె పవులు, “నీను ఇని కూనిబా కిజి ఆమ. మాప్ విజెపె ఇబ్బెనె మనాప్”, ఇజి డటం గగల్ ఆజి వెహాన్.

29 అయ జేలి ఎజుమాని, దీవ తగ్ అ ఇజి వెహి లొఇ ఉహ్క వాతాండ్రె వణిక్కి పవులు సీలారి పాదమ్కాజ్ డగ్రు అర్తాన్. 30 వాండ్రు పవులుజ్ని సీలెజ్ వెల్లి తతాండ్రె వెన్బాతాన్, “బాబురాండె, నాను తప్తె ఆదెజ్ ఇహిజు ఏలు ఇనిక కిదెజ్?”.

31 “యేసుప్రబు ముస్సు. నమకం ఇట్టిజు, అయావలె నీను నీ ఇండ్రెణికార్ విజెరె తప్తె ఆనిదెర్”, ఇజి పవులు సీల వెహాన్. 32 పవులుని సీల వన్నిజ్, వన్ని ఇండ్రెణి వరిజ్ యేసుప్రబు వందిజ్ సువార్ల వెహాన్. 33 ఆ పొదొయ్ అయా గడియారునె వాండ్రు పవులుని సీలెజ్ ఒతాండ్రె వరి దెబ్బెజ్ నొహాన్. వెటనె వాండ్రు, వన్ని ఇండ్రెణికార్ విజెరె బాప్తినం లాగె ఆతార. 34 వాండ్రు పవులుజ్ని సీలెజ్ వన్ని ఇండ్రె కూక్కి తసి బోజనం సితాన్. దేవుణు ముస్సు. నమకం ఇట్టి వందిజ్ వాండ్రు వన్ని ఇండ్రెణికార్ విజెరె నండ్రె సర్ల ఆతార.

35 పెందల కోర్టు నడిపిసినికార్, “అయ లోకాజ్ డిస్టు”, ఇజి ఆడ్ర సితారె జమాన్జు జెలి ఎజుమానిబాన్ పొక్తార. 36 జేలి ఎజుమాని అయ మాటిజ్ పవులు వెహాన్. “మిజి డిస్టు ఇజి కోర్టు నడిపిసినికార్ ఆడ్ర పొక్త మనార్. మీరు ఏలు జమ్నె సాండ్రు”, ఇజి వెహాన్.

37 గాని పవులు, “మాపు వర్గిదెజ్ అవకాసం సివండ వారు తీర్పు కిజి విజెరె ముందాల డెయ్యార. మాపు రోమాదిజ్ అక్కు మనికాప్ ఇహిజ్బా మజి జెలిదు ఇట్టార. ఏలు మజి ఎయెర్బా నెన్వండ పొక్తెజ్ సుడెజినార్. మాపు ఒవ్వివ్. వారి వాజి మజి వెల్లి తసి పొక్తెజ్”, ఇజి జమానుజ్ వెహాన్. 38 యా మాటిజ్ అయ జమానుజ్ కోర్టు నడిపిసిని వరిజ్ వెహాన్. పవులుని సీల రోమాదిజ్ అక్కు మనికార్ ఇజి వెహారె వారు తియెల్ ఆతార. 39 అయ కోర్టు నడిపిసినికార్ వాతారె పవులుజ్, సీలెజ్ సెమ లొస్తారె జెలిదాన్ వెల్లి కూక్కి తతారె ‘పట్టుం డిసి సాండ్రు’ ఇజి వరిజ్ వెహి పొక్తార. 40 వారు జెలిదాన్ వెల్లి వాతారె లుదియబాన్ సాహార్. అబ్బె నమ్మిత్తివరి వెట వర్గిజి వరిజ్ ఆదరిస్తారె వరి నమకందిజ్ సత్తు కిబిసి దయెరమ్ ముస్సు. మండ్రు ఇజి వెహాన్. వెనుక వారు బాణిజ్ సొత్త సాహార్.

1 అయావలె పవులుని సీల పిలిప్పి పట్టుమదాన్ సోత్తారె అంపిపొలి, అపొలోనియ పట్టుమకు డాట్టి దెసలోనిక* ఇని పట్టుమదు వాతార్. అబ్బె యూదురు మీటిజ్ కిని ఇల్లు ఉండ్రీ మహార్. 2 పవులు, వాండ్రు ఒజ అతి లెకెండె యూదురి మీటిజ్ కిని ఇండ్రో సాహార్. సాహండ్రె, బానె మహి పరివెటె మూండ్రీ విస్త్రాంతి దినమకు దేవుణు మాట వెప్పొముహాన్. ఇనిక ఇహొజ, 3 “క్రీస్తు ఇనికాన్ మాలెజ్ ఆజి సానాన్లె, సాజి మరీజి నిజ్నాన్లె” ఇజి ప్రవక్తరు రాస్తిక దేవుణు మాటాదు మనాద్. అయ లెకెండె జర్గిదెజె. నాను మీ వెటె సాటిసి వెప్పొ యా యేసుప్రబునె క్రీస్తు”. యా మాటెజాణిజ్ నదివిజి వెప్పొ సీత్తాన్. 4 యూదురు - లోఇహాన్ సెగొండార్ పవులు వెప్పొ మాటెజ్ ఒవుకొటారె పవులుని సీల వెటె కూడితార్. ఒక్కి మన్ని గ్రీకు జాతిదికార్ నండొండార్, ముకెలమాతి అయ్లెకొడొక్ నండొండెక్బా పరివెటె కూడితార్.

5 అహొజ యూదురు గోస ఆతార్. గోస ఆతారె ఇని పణి సిల్లెండె తిరిగిని సెఇ లోకాజ్ సర్దుహాన్ కూడుస్తారె మందెజ్ ఆజి పట్టుమదు కలిబిలి కిజి యాసోను ఇని వన్ని ఇండ్రో సాహార్. ఇండ్రోణి సేష్టాదిజ్ డెయ్త పొక్కారె పవులుని సీలెజ్ లోకుర్ నడిమి అసి తనాల్ ఇజి లోఇ డుఱిగితార్. 6 గాని పవులుజ్నె సీలెజ్ తోర్వెత్తారక యాసోనుజ్ మరి నమ్మిత్తి వరిజ్ సెగొండారిజ్ పట్టుం అతికారిజి డగ్రు లాగిత తతార్. “వీరు, యా లోకం విజు కలిబిలి కినికార్, ఇబ్బెబా వాత మనార్. 7 విరిజ్ యా యాసోను వన్ని ఇండ్రో ఇట్టా మహాన్. వీరు విజేరె యేసు ఇజి మరి ఒరెన్ రాజు మనాన్ ఇజి వెప్పొ కయ్సరు రూలుజ్ లోజీండె నడిసినార్”, ఇజి డటం గగ్గెలాజి వెప్పార్. 8 యాక వెహారె లోకుర్, పట్టుం అతికారిజు గొప్ప కలిబిలి ఆతార్. 9 అతికారిజు యాసోను బాణిజ్, అయ నమ్మిత్తి వరి బాణిజ్ డబ్బు తొప్పొస్తారె వరిజ్ డిస్త సీతార్.

పవులు బెరెయాదు సాహాన్

10 సీకటి అతిజ్ వెటెనె నమ్మిత్తికార్ పవులుజ్, సీలెజ్ బెరెయ ఇని బాడ్డిదు పొక్కార్. వారు బానె వాతారె యూదురు మీటిజ్ కిని ఇండ్రో సాహార్. 11 బెరెయాదు మహికార్ తెసలొనికదు మహి పరివెకెండె ఆవర్. వారు గొప్ప అసదాన్ దేవుణు మాటెజ్ వెహారె వనక వందిజ్ ఒడిఱిజి మహార్. పవులుని సీల వెప్పొ మహి సజతిజ్ నిజమనెనొ ఆవదొ ఇజి వారు రోజు దేవుణు మాటాదు నుడెఱిజి సదివిజి మహార్. 12 అందెజె వరి లోఇ నండొండార్ యూదురు నమ్మితార్. నండొండార్ గ్రీసు జాతిది వరి లోఇ పల్లుబడిఱి మన్ని అయ్లె కొడొక్ని మొగకొడొక్ నమ్మితార్. 13 గాని బెరెయాదుబా పవులు దేవుణు మాటెజ్ సాటిసినాన్ ఇజి తెసలొనికదు మన్ని యూదురు నెస్తారె బాణిజ్ వాతారె బెరెయా లోకాజ్ కొపం పుటిస్తారె కలిబిలి కీత్తార్.

14 అయావలె నమ్మిత్తికార్ పవులుజ్ వెటెనె సమ్దరం డగ్రు సొన్అ ఇజి పొక్కార్. గాని సీలని, తిమోతి బెరెయాదునె నిహ మహార్. 15 పవులుజ్ పొక్కెజ్ సాహికార్ ఏదెన్ను† పట్టుమదాకానె ఒతార్. సీల, తిమోతి వెటెనె నా బాన్ రద్దు ఇజి కల్లు సితండ్రె పవులు వరిజ్ మప్పొ పొక్కాన్.

పవులు ఏదెన్ను పట్టుమదు సాహాన్

16 పవులు ఏదెన్ను పట్టుమదు సీలెజ్ తిమోతిజ్ ఎద్దు నుడెఱిజి మహాన్. మహిజ్ అయ పట్టుమదు వారు మాడిస్తి మహి దెయమకాణి బొమ్మెజ్ †నండొ మహిజ్ అక్కెజ్ నుడెఱిజి మన్నుదు నండొ బాద ఆతాన్. 17 అయావలె యూదురు మీటిజ్ కిని ఇండ్రో సాహండ్రె యూదురు వెటె, ఒక్కి మన్ని యూదురు ఆజి పరివెటె పవులు వాదిస్తాన్. రోజు రోజు సత సహ్య కూడిఱిజి వాతి పరివెటె వాదిసి మహాన్. 18 అబ్బె లాపు నద్వెతి మన్నికార్ ఎపికూరియ జటదికార్ సెగొండార్ కి స్త్రోయికుల లోకుర్ లోఇ సెగొండార్ మహార్. వారు పవులు వెటె వాదిస్తారె. సెగొండార్, యా బడాకి ఇనిక వెప్పొనాన్ ఇజి

* 17:1 17:1 దెసలొనిక పట్టుం మసిదొనియ దెసమదు మహాద్. రోమదెసమదిజ్ రాజదాని ఆతాద్ యా పట్టుం. నండొ ఆస్తి మహాద్ బాన్. నండొండార్ రోమ లోకుర్ని యూదురు బాన్ బత్తిజి మహార్ † 17:15 17:15 ఏలు ఏదెన్ను పట్టుం గ్రీకు దెసమది ముకెలమాతి పట్టుం † 17:16 17:16 యా బొమ్మెజ్ అయ పట్టుమదికార్ మాడిస్తిమహి దెయమకెలెకెండె తోరెతె § 17:18 17:18 ఎపికూరియ లోకుర్, స్త్రోయికుల లోకుర్. వీరు గ్రీకుజాతిలోఇ ఎక్క, నద్వెతి లోకుర్. ఎపికూరియ లోకుర్ ఎపికూరు ఇని ఒరెన్వన్ని బొదెజ్ వజ నడిసినార్. వన్ని బొదె ఇనిక ఇహొజ, ఒడొలెదిజ్ మన్నుదిజ్ సర్గ కిటిసి బత్తిదెజె ఇజి మా బత్తుది ఉదెసం ఇజి. స్త్రోయికుల లోకుర్ ఇహొజ జెనొ ఇనివన్ని బొదెజ్ వజ నడిసినార్. బత్తుదు ఇనిక జర్గితిజ్బా జర్గిపిద్ ఇజి వాద్దు బొదిస్తాన్. బాగ అలోసనం కిజిని వారు విజు సూజారె

వెహ్తార్. యేసుప్రభు వందిజ్, సాతికార్ మర్జి నిజ్ని వందిజ్ పవులు నెస్పిన్జిజ్ అబ్బె మరి సెగొండార్ వీంత్రు ఆజ దెయ్మకాజ్ వందిజ్ వెహ్సొనాన్ ఇజి వెహ్తార్. ¹⁹ వారు పవులు అరెయొపగు ఇని నర్దుదు లాగిత తత్తారె. “నీను వెహ్సొని యా కొత్త మాట ఎలాగ మర్జికాదో, మాపుబా నెస్టెజ్ ఆనాదా? ²⁰ నీను సెగం కొత్త మాటెజ్ వెహ్సొని. అక్కెజ్ మాపు ఎసెజ్బా వెసెఇకెజ్. వన్యా అర్లం ఇనికాదో ఇజి నెస్టెజ్ మాపు కొరిజినావ్”, ఇజి వెహ్తార్. ²¹ ఆ ఏదెన్ను పట్టుమదికారొ విజేరె, అబ్బె బత్కిజి మహి ఏదెన్ను పట్టుమదికారొ ఆఇకారొబా ఇనికాదో ఉండ్రి కొత్త మాట విని వందిజ్, వర్గిని వందిజ్ లాపు ఇన్జమాజి వరి నమయం విజి బానె గడఱ్పి మహార్.

²² అయావలె పవులు అరెయొపగు నర్దుదు నిహండ్రె ఈహు వెహ్తాన్, “ఏదెన్ను పట్టుమదికిదెరా, మీరు విజి పణిజి లోక గొప్ప బక్తిమన్నికిదెరె ఇజి నజీ తోరిజినాద్. ²³ ఎందనిజ్ ఇహాజ నాను బూలాజి బూలాజి మీ బొమ్మెజు నెగ్రిండ సుడఱ్జి మహిజ్ ఉండ్రి మాళి పీట సుడఱ్జత. దన్ని మున్ను ‘నెన్ఇ దెయ్మదిజ్’ ఇజి రాస్త మనాద్. అందెజె మీరు నెన్ఏండ ఇని దన్నిజ్ మాడిసెనిదెరొ దన్ని వందిజ్ నాను మిజి బోదిసిన”, ఇజి వెహ్తాన్.

²⁴ పవులు మరి వెహ్తాన్, “యా బూ లోకమ్దిజ్, దన్ని లోక మన్ని విజువ నకాజ్, దేవుణునె పుటిస్తాన్. అయ దేవుణునె పరలోకమ్దిజ్, బూమిదిజ్ ప్రబు ఆత మనాన్. అయ దేవుణు లోక తోహ్తి గుడిఱ్డు బత్కిఎన్. ²⁵ దేవుణునె విజు లోకాజ్ బత్కు, పాణం, విజు సీజినాన్. దేవుణుదిజ్ ఇనికబా తక్కు ఆఏండ మన్ఏద్. అందెజె లోకు వన్నిజ్ ఇనికబా సీదెజ్ అవసరం సిల్లెద్. ²⁶ దేవుణు ఒరెన్ వన్ని వెట విజి జాతి లోకాజ్ పుటిస్తాన్. ఎందనిజ్ ఇహాజ యా బూలోకం మున్ను విజుబాన్ బత్కిని వందిజ్ పుటిస్తాన్. వారు ఎంబె బత్కిదెజ్ ఇజి, ఎమేణి కాలమ్దు బత్కిదెజ్ ఇజి దేవుణు ముందాల్ని ఏర్పాటు కిత మనాన్. ²⁷ ఎందనిజ్ ఇహాజ ఉండ్రి వేలా వారు నజీ రెబాజి వానార్పు ఇజి ఇక్కెజ్ విజు దేవుణు ఏర్పాటు కిత్తాన్. దేవుణు మా డగ్రుహాన్ దూరం మంజినికాన్ ఆఏన్. ²⁸ మాటు దేవుణు వెటనె బత్కినాట్, దేవుణు వెటనె నడిసెనాట్, దేవుణు వెటనె మంజినాట్. మీ లోక పాటెజ్ రాస్సికారొ వెహ్సొవజి ‘మాటు దేవుణు కొడొరె’.

²⁹ అందెజె మాటు దేవుణు కొడొరె ఆతిజ్, లోకు, వరి మన్నుదు మన్ని ఆలోసనం వజి, వారు నెస్తిమన్ని పణి వజి బజారమ్దాన్, వెండిదాన్, పణుకుజాణ్ తయార్ కిత్త బొమ్మెజు వజి దేవుణు మనాన్ ఇజి ఒడిఱ్బిదెజ్ ఆఏద్. ³⁰ నస్తివలె మాటు నెన్ఏండ మహివలె దేవుణు అక్క. సుడఱ్జిజ్బా సుడఱ్జి ఇ లెకెండ్ డిఱ్జాన్. ఏలు ఇహాజ ఎంబెబా సరినె, విజేరె లోకురొ వరి పావమ్కు డిఱ్జిజి దేవుణుబాన్ రద్దు ఇజి దేవుణు ఆడ్ర సీజినాన్. ³¹ ఎందనిజ్ ఇహాజ, దేవుణు విజేరె లోకాజ్ నీతినిజయ్దాన్ తీర్పు కిదెజ్ ఉండ్రి రోజు ఏర్పాటు కిత మనాన్. అయా రోజు దేవుణు ఏర్పాటు కిత్తి ఒరెన్ లోకువెట తీర్పు తీరిస్తాన్. దేవుణు ఆ లోకుదిజ్ సావుదాన్ మర్జి నిక్త మనాన్. ఎందనిజ్ నిక్తాన్ ఇహాజ ఆ లోకుదిజ్ తీర్పు కిదెజ్ అతికారం మనాద్ ఇజి విజేరిజ్ రుజువ్ కిదెజ్”.

³² లోకు సాజి మర్జి నిజ్ని వందిజ్ వెహ్తారె వరి లోక సెగొండార్ కరాయిత్తార్. గాని మరి సెగొండార్ “దన్ని వందిజ్ మరి వెహ్అ, వెనావ్”, ఇజి పవులుజ్ వెహ్తార్. ³³ ఆహె మహిజ్ పవులు వరిబాణిజ్ సాహాన్. ³⁴ అహాజ సెగొండార్ పవులు వెహ్సొ మాటెజ్ నమ్మిత్తారె వన్ని వెట కూడిఱ్జతార్. పవులు వెట కూడిఱ్జి మహి వరి లోక అరెయొపగు నర్దుదికాన్ ఒరెన్ దెయొసుసియు, దమరి ఇని ఉండ్రి అయ్లి కొడొ, మరి సెగొండార్ మహార్.

18

పవులు కొరింతు పట్టుమదు సువార్త వెహ్సొనాన్

¹ వెనుక, పవులు ఏదెన్ను పట్టుమదాన్ సోతాండ్రె కొరింతు ఇని పట్టుం సాహాన్. అయ కొరింతు పట్టుమదు సాహిజ్ బానె పొంతు దేనిమ్దికాన్ అక్కల ఇని ఒరెన్ యూదు వన్నిజ్ని వన్ని ఆల్ని ఆతి ప్రిస్తిలదిజ్ సుడఱ్జతాన్. ² యూదురు విజేరె రోమ పట్టుం డిఱ్జి సాండ్రెజ్వలె ఇజి క్లవదియ ఇని రోమ వెరిరాజు ఆడ్ర సిత్తాన్. ఆడ్ర సిత్తిజ్ యా ఆల్ని వూసీర్ ఇటలి దేసెం డిఱ్జి సారె కొరింతు పట్టుమదు కొత్తాజ్ వాత్తార్. పవులు వరిజ్ సుడఱ్జిజ్ సాహాన్. ³ పవులు వరివెట బత్కిజి వరివెట కూడిఱ్జి పణి కిత్తాన్. ఎందనిజ్ ఇహాజ వారుని పవులు టంబుజ్ గుత్తికారొ. ⁴ ప్రతి విస్రాంతి దినమ్దు పవులు యూదురు

మీటిజ్ కిని ఇండ్రో సొహాండ్రె, యూదురు వెట, గ్రీసు వరివెట తర్కిసి వెప్పి వాండ్రు వెప్పికెజ్ నిజం ఇజి ఒపిసి మహాన్. ⁵ సీలని తిమోతి మసిదోనియదాన్ వాతారె పవులు వెట కూడితార. అయావలె పవులు పూర్తి టయం దేవుణు మాటెజ్ బోదిసి మహాన్. యేసునె క్రీస్తు ఇజి యూదురుజు డటిసి సాసి వెప్పి మహాన్. ⁶ పవులు వెప్పి మాటెజ్ యూదురు నెక్తపొక్కారె పవులుజ్ దుసలూడితార. అయావలె పవులు, “దేవుణు మిజి సిక్ససిత్తిజు అక్క మీరె మీ ముస్సు తపిసినిదెర. దిన్ని వందిజ్ నా బాన్ తప్పు సిల్లెద్. ఇబ్బోహాన్ నాను యూదురు ఆజ వరిబాన్ సొనానె దేవుణు మాటెజ్ నెప్పిస్తాలె”, ఇజి వెప్తాండ్రె, సొక్కెజు దూల్లి దుల్వోన్.

⁷ పవులు యూదురు మీటిజ్ కిని ఇండ్రోహాన్ సొత్తాండ్రె పడెకాద్ మహి తీతియు యూస్తు ఇని వన్ని ఇండ్రో సొహాన్. తీతియు దేవుణుదిజ్ పార్దనం కినికాన్. వన్ని ఇల్లు యూదురు మీటిజ్ కిని ఇల్లు డగ్రునె మహాద్. ⁸ యూదురి మీటిజ్ ఇల్లు నడిపిసినికాన్ ఆతి క్రీస్తును, వన్ని ఇండ్రోణికార్ విజేరె యేసుప్రబుజ్ నమ్మితార. మరి కొరింతు పట్టుమ్దికార్ నండొండొరబా దేవుణు మాట వెహారె నమ్మితారె బాప్తీసం లాగ ఆతార. ⁹ ఒరనెండ్ర పొదోయ్, దర్చనమ్దు యేసుప్రబు, “నీను తియెల్ ఆవిండ వర్గిత. అలెజి మన్ అ. ¹⁰ ఎందనిజ్ ఇహిజు నాను నీవెటనె మంజిన. నిజి పాడు కిదెజ్ నీ ముస్సు ఎయెన్బా రెవన్. ఎందనిజ్ ఇహిజు యా పట్టుమ్దు నాలోకుర నండొండొర మనార్”, ఇజి పవులుజ్ వెప్తాన్. ¹¹ అందెజ్ పవులు దేవుణు మాటెజ్ నెప్పిసి వరి నడిపిం ఉండ్రె ఏండుని ఆరు నెలెజ్ దాక మహాన్. ¹² గాని గలియోను ఇనికాన్ అయ అక్రాయ దేసెమ్దిజ్ ఏల్లుబడిః కినికాన్ ఆతివలె యూదురు ఉండ్రె జటు ఆతారె పవులు ముస్సు వాతార. పవులుజ్ అస్తారె కొర్దుదు ఒతార. ¹³ వారు పవులు ముస్సు పిరాద్ కిత్తార. ఇనిక ఇహిజు, “దేవుణుదిజ్ ఎలాగ పార్దనం కిదెజ్ ఇజి మజి మన్ని రూలుదిజ్ ఎదిరిసివెప్పి వీండ్రు ఒపిసి మారిస్పితెకెండ్ర వెప్పిస్తాన్” ¹⁴ పవులు వర్గిదెజ్ సుడెతాన్. అయావలె గలియోను యూదురిజ్ ఈహు వెప్తాన్, “యూదురాండ్రె, ఇక్క ఉండ్రె తప్పు పణి వందిజ్ ఇహిజు, ఉండ్రె సెఇ పణి వందిజ్ ఇహిజు నాను మీమాటెజ్ నెగ్రెండ్ర వెండ్రెజ్ ఆనాద్. ¹⁵ గాని ఇక్క ఇనికాదొ ఉండ్రె మాటవందిజ్, పేర్కువందిజ్, మీ రూలుజ్ వందిజ్ తర్కిస్తెజ్ ఇహిజు మీరె పన్నిజ్ సుడెదు. నిన్ని సజతిజు వందిజ్ తీర్పు తీర్పెజ్ నజి ఇన్టం సిల్లెద్”, ఇజి యూదురు వెట వెప్తాన్. ¹⁶ ఈహు వెప్తాండ్రె వరిజ్ కొర్దుదాన్ పేర్దాన్. ¹⁷ అయావలె విజేరె కూడితారె యూదురి మీటిజ్ ఇల్లు నడిపిసినికాన్ ఆతి సొస్సెనేసు ఇనివన్నిజ్ అస్తారె కొర్దు డగ్రు తత్తారె డెయ్యూర్. అహిజ్బా గలియోను యా సజతిజు వందిజ్ ఇనికబా ఇన్ అతాన్.

ప్రిస్కిలని అక్కల

¹⁸ పవులు దేవుణువెట మొకిత మహాన్కాక అక్క వీస్తివలె బుర్ర కత్రె ఆతాన్. కొరింతు పట్టుమ్దు మరి నండ్రె రొస్సు మంజి వెనుక నమ్మిత్తివరిబాణిజ్ నెలవ లొస్తాండ్రె సొహాన్. కెంక్రయాదు సొహారె బుర్ర కత్రె ఆతాన్. బాణిజ్ ఓడః ఎక్తాండ్రె నీరియ ఇని దేసెమ్దిజ్ ప్రిస్కిల, అక్కల వెట సొహాన్.

¹⁹ వారు ఎపెను పట్టుమ్దు వాతార. ప్రిస్కిల అకులరిజ్ డిసి పవులు సొనివలె వీరు యా పట్టుమ్దునె మంజినార్. పవులు ఇహిజు ఒరెండ్రె బానె మహి యూదురి మీటిజ్ ఇండ్రో సొహాన్. సొహాండ్రె యూదురు వెట తర్కిసి వర్గిజు మహాన్. ²⁰ సెగం రొస్సు మా వెట మన్ అ ఇజి యూదురు పవులు వెన్బాతిజ్ పవులు కెపెతాన్. ²¹ వరిజ్ డిసి సొహివలె, “దేవుణు ఇన్టం ఇహిజు మీ డగ్రు మరెజి వాన”, ఇజి వెప్తాండ్రె సొత్తాన్. ఓడః ఎక్తాండ్రె ఎపెనుదాన్ సొహాన్. ²² కయెనరియాదు అందితాండ్రె పవులు యెరూసలేం పట్టుమ్దు ఎక్త సొహాన్. బానె మహి సజుమ్దివరిజ్ సుడిః సొహాన్. వెనుక అంతియొకయాదు సొహాన్.

²³ బానె సెగం కాలం మహి వెనుక సొత్తాండ్రె గలతియ ప్రుగియ ఇని దేసెమ్కాణిజ్ వర్చ బూలాతాండ్రె నమ్మిత్తి వరిజ్ నెప్పిస్తాన్. దేవుణుదిజ్ డిసిఏండ్రె నెగ్రెండ్ర మండ్రు ఇజి వెప్పి వరిజ్ దయెరం సిత్తాన్.

అపొలో ఇనికాన్

²⁴ అయావలె అలక్సంతియదికాన్ అపొలో ఇని ఒరెన్ యూదవాండ్రు ఎపెను పట్టుమ్దు వాతాన్. వాండ్రు గొప్ప నదేవితకాన్. దేవుణు మాటదు రాస్తిమన్నికెజ్ విజు బాగ నెస్తిమనికాన్. దేవుణు మాట నెగ్రెండ్ర వర్గిదెజ్ వాండ్రు అట్నాన్. ²⁵ వాండ్రు యేసు ప్రబువందిజ్ నెగ్రెండ్ర సుర్కుదాన్ నెన్పిస్తాన్.

ఎలాగ బత్తిదెజ్ ఇజి యేసుప్రబు నెన్పిన్సి మాటెజ్ వాండ్రు నెస్తాన్. గాని యోహాను లోకాజ్ సిత్తి బాప్తిసం వందిజె వాండ్రు నెస్త మహాన్. ²⁶ యూదురు మీటిజ్ కిని ఇండ్రొ దయరమ్దాన్ దేవుణు మాటెజ్ వర్గితాన్. ప్రిస్కిల అక్కల విన్ని మాటెజ్ వెహారె విన్నిజ్ వరి ఇండ్రొ కూక ఒత్తార్. ఒత్తారె దేవుణు వరిజ్ సిత్తి సువార్త వందిజ్ వీండ్రు నెన్ఇ వనకవందిజ్ వన్నిజ్ నెన్పిస్తార్.

²⁷ వెనుక అపోలో అకాయ దేనుమ్దు సొండ్రెజ్ సుడెతిజ్, ఎపెసుదు మన్ని నమ్మితికార్, నీను సొన్అ ఇజి వెప్పి, అక్కాయాదు మహి నమ్మితివరిజ్, 'విన్నిజ్ మీ వెట కూడుఱప్పు' ఇజి ఉత్తం రాస్తార్. వాండ్రు అబ్బె సొహండ్రె దేవుణు దయాదర్మమ్దాన్ నమ్మితి వరిజ్ నండ్రె సాయం కిత్తాన్. ²⁸ విజేరె కూడితి మహి బాడ్డిదు అపోలో యూదురువెట వాదిస్తాండ్రె వరి వాదం తప్పు ఇజి గటిజి వెస్తాన్. యేసునె క్రీస్తు ఇజి దేవుణు మాటదు రాస్తికెజ్ వెప్పి రుజుప్ కిత్తాన్.

19

పవులు ఎపెసు పట్టుమ్దు యేసువందిజ్ వెప్పినాన్

¹ అపోలో కొరింతు పట్టుమ్దు మహివలె పవులు, ముస్సుమన్ని దేనెమ్ది నాహ్కాణిజ్ బూలాజి సువార్త వెప్పి ఎపెసు పట్టుమ్దు వాతాన్. బాన్ సెగొండార్ సిసూరిజ్ సుడెతాన్. ² "మీరు నమ్మితివలె దేవుణు ఆత్మ సత్తు మీ ముస్సు వాతాదా సిల్లెదా?", ఇజి వరిజ్ వెన్బాతాన్. వెన్బాతిజ్ సిల్లెద్, దేవుణు ఆత్మ మనాద్ ఇజి మాప్ ఎనెజ్బా నెన్ఏప్", ఇజి వారు వెహార్. ³ దన్నిజ్ పవులు, "మీరు ఎమేణి బాప్తిసం లాగె ఆతిదెరె", ఇజి వెన్బాతిజ్, "మాపు యోహాను సిత్తిసన్ని బాప్తిసం లాగె ఆతాప్" ఇహార్. ⁴ పవులు మరి వెహార్, "పాపమ్కు ఒప్పుకోడిఱి డిస్టివరిజె యోహాను బాప్తిసం సిత్తాన్. నా వెనుక వాని యేసు ముస్సు నమకం ఇడ్దు", ఇజి వెహార్ బాప్తిసం సిత్తాన్. ⁵ యాక వెహారె వారు యేసుప్రబు పేరు అస్తారె బాప్తిసం లాగె ఆతార్. ⁶ పవులు వరి ముస్సు కికు ఇడ్డిజ్ దేవుణు ఆత్మ వరి ముస్సు వాతాద్. వాతిజ్, వారు వరిజ్ నెన్ఇ ఆఇ బాసిజ్ వర్గితార్. దేవుణుబాణిజ్ వాతి మాటెజ్ వెహార్ మొదొల్స్తార్. ⁷ వారు డగ్రుడగ్రు పన్నెండు మణిసిరె మొగకొడొరె మహార్.

⁸ పవులు అయ ఎపెసు పట్టుమ్దు మన్ని యూదురి మీటిజ్ ఇండ్రొ సొహండ్రె దేవుణు ఏలుబడిఱి వందిజ్ తర్గిసి వర్గిజి వరిజ్ ఒప్పుకోడిఱి దయరమ్దాన్ వర్గితాన్. ఆహా మూండ్రె నెలెజ్ బానె మహాన్. ⁹ గాని సెగొండార్ గర్త ఆజి అసల నమ్మివితార్. వారు పవులు వెప్తి సువార్త వందిజ్ విజెరి ముందాల దునలాడిఱి వర్గితార్. అందెజి పవులు వరిజ్ డిసి నమ్మితి వరిజ్ వన్నివెట ఒతండ్రె రోజు రోజు తురాను ఇని ఒరెన్ వన్ని బడిఱి ఇండ్రొ నెన్సిస్త మహాన్. ¹⁰ రుండి పంటెజ్ దాక పవులు యాలెకెండ్రె వెప్పిసిత్తిమహిజ్ అయ ఆనియ ప్రాంతమ్దు బత్తిజిని యూదురు, యూదురు ఆఇకార్, విజేరె దేవుణు మాట వెహార్. ¹¹ దేవుణు పవులువెట ఒద్దె గొప్ప బమ్మాతి పణిజ్ జర్గిస్తాన్. ¹² వన్ని తువాలిజ్, నడుఱిమ్దు తొప్పి కలు జబ్బు మన్నివరి డగ్రు తత్తిజ్ వారు నెగెండ్రె ఆతార్. దెయమ్కు విజు డిస్టె సొహె.

¹³ అయ్యవలె యూదురు లొఇ సెగొండార్ మోటిగురుజ్ బూలాజి దెయమ్కాజ్ పేర్జి మహార్. దెయమ్కాజ్ పేర్జిజ్ నెస్తికార్ వారు. వారు యేసుప్రబు పేరు అసి దెయమ్కాజ్ పేర్జిజ్ సుడెతాన్. "పవులు వెప్పి యేసు నత్తుదాన్ వెప్పిన, నీను విన్నిజ్ డిసిసి సొన్అ ఇజి నాను ఆత్త సిజిన్", ఇజి వారు దెయమ్కాజ్ అస్తి వరిజ్ వెప్పి మహార్. ¹⁴ స్కెవ ఇని ఒరెన్ యూదవరిపుజేరి మరిసిరె ఏడుగురు యా లెకెండ్రె దెయమ్కాజ్ పేర్దెజ్ సుడెజి మహార్. ¹⁵ గాని ఆ దెయం వరివెట, "నాను యేసుజ్ నెన్నా పవులు నెసిన, గాని మీరు ఎయిదెరె?", ఇజి వెన్బాతాన్. ¹⁶ అయ దెయం అస్తిమహికాన్ వరిముస్సు ఎగ్రితాండ్రె విజెరిజ్ అడిఱిగి అరెప్తాండ్రె గలిస్తాన్. వరి పాతెజ్ కిస్త విసిర్తాండ్రె గొప్ప దెబ్బాజ్ డెయ్తాన్. అందెజి వారు ఏడుగురు లొకుర్ డుమ్డ ఆతారె దెబ్బాజ్ తాక్కిజ్ అయ ఇండ్రొణిజ్ సొత్తారె ఉహ్కార్. ¹⁷ అయ ఎపెసు పట్టుమ్దు మహి విజేరె యూదురు, యూదురు ఆఇ జాతిదికార్ యాక వెహారె గొప్ప తియాలతార్. యేసుప్రబు పేరుదిజ్ గొప్ప గవరం సిత్తార్. ¹⁸ కొత్తజ్ నమ్మితికార్ నండ్రెండ్రె వాతారె వారు కిత్తి సెఇ పణిజ్ విజు విజెరి ముందాల వెహారె ఒప్పుకోటార్. ¹⁹ కొత్తజ్ నమ్మితి సెట్టిపణికినికార్ నండ్రెండ్రె మంత్రమ్కు రాస్తిమని వరి పుస్తకమ్కు తత్తారె విజెరి

ముందాల అక్కెజ్ సుర్దార్. వారు లెక్క సుడేతిజ్ వనక దర యబాయ్ వెయిజ్ వెండిరుపాయిజ్ *వాతె. 20 ఈహె దేవుణు - మాట విజుబాన్ సాటి ఆతాదె నండొండార్ నమ్మితికార్ ఆతార్.

21 ఇక్కెజ్ విజు జర్గితి వెనుక పవులు మసిదోనియ అకాయ ఇని దెసమ్కాజ్ సొన్ని దేవుణు నజమ్కాజ్ సుడే సొన్ని వెనుక బాణిజ్ యెరూసలేం పట్టుమ్దుబా సొండ్రెజ్ వలె ఇజి ఒడిబడిబితాన్. వెనుక రోమ పట్టుమ్దుబా సొండ్రెజ్ వలె ఇజి ఒడిబితాన్. 22 వన్నివెట కూడేజి పణి కిజిమహి తిమోతి, ఎరాస్తూ ఇనివరిజ్ మసిదోనియాదు పోక్రాండ్రె పవులు సెగం కాలం ఆనియ ప్రాంతమ్దు బత్తితాన్.

ఎపెసు పట్టుమ్దు గొడబ జర్గితాద్

23 అయ కాలమ్దు యెసుప్రబు ముస్సు లోకుర్ నమకం ఇట్టి వందిజ్ ఉండ్రె గొప్ప గొడబ వాతాద్. 24 ఇక్క ఎలాగ ఇహిజ, దెమెత్రి ఇని ఒరెన్ సరాబు మహాన్. వాండ్రు వెండిదాన్ అర్దెమి ఇని దెయమ్దిజ్ ఇండ్రె ఇడ్డి ఇజిరి గుడిజ్ తయార్ కినికాన్. యా దెమెత్రిజ్, వన్నివెట మహి సరాబురిజ్ విజెరిజ్ యా పణిదాన్ నండొ లాబం దోహొక్కి మహాద్. 25 యా దెమెత్రి యా పణికినివరిజ్ ని, వరిలెకెండ్రె ఆపణిజ్ కిని వరిజ్ బా కూడుస్తాండ్రె ఈహు వెప్తాన్, “బాబురాండ్రె, యా పణిదాన్ ఎక్కు ఆస్తి మజి వానాద్ ఇజి మీరు నెసినిదెర్ గదె. 26 గాని కికాణిజ్ తయార్ కినికెజ్ దెయమ్కు ఆఉ ఇజి యా పవులు వెహి, ఎపెసు పట్టుమ్దు ఉండ్రె ఆవిద్, ఆనియ ప్రాంతమ్దు విజుబాణిలెకెండ్రె నండొండొరిజ్ నమ్మిసి మహాన్. ఇక మీరు సుడేజినిదెర్. వెంజినిదెర్. 27 ఏలు గొప్ప ప్రమాదం ఆజినాద్. మా పణి వందిజ్ మన్ని నెగ్గి పేరు పాడానాద్దె. అక్కాదె ఆవిండ్రె పెరి దెయమాతి యా అర్దెమి దెయమ్ది గుడిబా ఎయెరిజ్ బా అవ్ సరం సిల్లెండ్రె ఆనాద్. ఆనియ దేసెమ్దికార్ విజెరె, బూలోకం విజు పూజి కిని యా అర్దెమి దెయమ్ది గొప్ప పేరు సిల్లెండ్రె ఆనాద్”, ఇజి యా దెమెత్రి వరివెట వెప్తాన్.

28 యాక వెహొరె వారు గొప్ప కోపం ఆతారె, “ఎపెసుదికార్ పూజికిని అర్దెమి దెయం గొప్ప పెరి దెయం”, ఇజి గొప్ప గగోల్ ఆతారె. 29 అయ పట్టుమ్దు గొప్ప కలిబిలి ఆతాద్. వారు ఉండ్రె మన్ను ఆతారె పవులువెట బూలాజి మహి మసిదోని - యాదికార్ గాయి, అరిస్తర్కు ఇని రివిరిజ్ అస్తారె అయ పట్టుమ్దు మన్ని పెరి సద్దుదు† లాగిత ఒతారె. 30 మంద కూడితి మహి అయ సద్దుదు సొండ్రెజ్ ఇజి పవులు ఒడిబడిబితాన్. గాని నమ్మితికార్ వన్నిజ్ సరి సివితారె. 31 పవులు కాలయెర్ అతి అయ ఆనియ ప్రాంతమ్ది అతికారి లోకుర్ సెగొండ్రె బా లోకుర్ కూడేజి వాతిమహిబాన్ సొన్నా ఇజి కల్లు పోక్రాం బతిమాలితారె.

32 అయ సద్దుదు గొప్ప కలిబిలి జర్గితాద్. సెగొండ్రె అహు వెహి, మరి సెగొండ్రె ఈహు వెహి గగోల్ ఆతారె. గాని వారు ఇని దన్నిజ్ కూడిత మనారొ ఇజి నండొ లోకుర్ నెన్ వితారె. 33 యూదురు అలెకెండ్రె ఇనివన్నిజ్, విజెరె వందిజ్ నీనె వర్గిఅ ఇజి లోకుర్ నడిమిహాన్ ముందాల నిల్వారె. అలెజి మండ్రు ఇజి వాండ్రు కియు సొస్తాండ్రె ఉండ్రె మాట కివెహ్నా ఇజి సుడేజి మహాన్. 34 గాని వాండ్రు యూద వాండ్రు ఇజి నెస్తారె వారు రుండి గంటెజ్ దాక, ‘ఎపెసువరి అర్దెమి దెయం గొప్ప దెయం’ ఇజి ఉండ్రెలెకెండ్రె గగోల్ ఆతారె. 35 అయావలె అయ పట్టుం కర్ణం *వాతాండ్రె లోకాజ్ విజెరిజ్ గగోల్ ఆవిండ్రె మండ్రు ఇజి వెప్తాన్. “ఎపెసు పట్టుమ్దికిదెరా, మాపు అర్దెమి పెరి దెయమ్ది గుడిదిజ్ కావ్ కినికాన్ ఇజి విజెరె నెసినిదెర్ గదె. ఆగాసమ్దాన్ అర్ది అర్దెమి దెయమ్ది పణకుదిజ్ బా కాపు కినికార్ మాపె ఇజి విజెరె నెసినిదెర్ గదె. 36 యా సజతిజ విజు ఎద్దిసినిక ఆవిద్. అహిజ మీరు ఏలు అలెజి మండ్రెజ్ వలె. ఇనికబా గజబిజి అజి కిదిజ్ ఆవిద్. 37 మీరు యా లోకాజ్ లాగితి తత్తిదెర్. గాని వీరు గుడిబి డొజ కినికార్ ఆవిర్. మా దెయమ్దిజ్ దుసలాడేవిర్. 38 దెమెత్రిజ్, వన్నివెట కూడితి మహి పణిమణిసిరిజ్ ఎయెన్ ముస్సుబా నేరం మొప్పజ్ ఇహిజ, కోర్ట్లజ్ నడిసెనె, అతికారి లోకుర్ మనారె. బానె సొన్ని వారు ఒరెన్ ముస్సు, మరి ఒరెన్ నేరమకు సిదిజ్. 39 గాని మరి ఇనివందిజ్

* 19:19 19:19 ఉండ్రె వెండి రుపాయి ఉండ్రె రోజుది కూలి † 19:24 19:24 ఇజిరి గుడిజ్ ఇహిజ అర్దెమి దెయమ్ది గుడిది ఇజిరి బొమ్మెజ్ ‡ 19:29 19:29 సద్దు ఇహిజ స్టిడియం లెకెండ్రె మహాద్. బానె లోకు కూడేనారె బేను కర్ణనారె. లోకు సురుల బస్తారె. ఇరువయ్ ఆరువెయి లోకుర్ బస్తెజ్ ఆనాద్ అయ సద్దుదు. కొడెవేలి నని గుండ్రాజ్ మనారె అయ సద్దు. గాని మేడే సిల్లెద్. ఎపెసు పట్టుం నడిమిద్ మహాద్ యా సద్దు. § 19:33 19:33 గొడబ కినికార్ మాపు యూదురు ఆవిప్, పవులుని వన్నివెట మన్నికారె ఇజి వెప్తాజ్ సుడేతాన్ * 19:35 19:35 ముకెలమాతి ఒరెన్ అతికారి

ఇనికబా తగ్గు మహిజ అక్క రోజు జర్గిని నర్దుదు వర్గిజి తీర్పు తీరిస్తెజ్. 40 నేండ్రు జర్గితి గొడఃబవందిజ్ రోమ అతికారిబు మా ముస్సు కేసు పొక్వారో ఇజి నాను తియెలాజిన. జర్గితి గొడఃబవందిజ్ వెహ్రాజ్ ఇని మాటబా నిల్లెద్. ఎందానిజ్ ఇహిజ యావజ కూడఃజి గగోలాజి వర్గినిదన్నిజ్ వెహ్రాజ్ అనల కారణం సిల్లెద్”, ఇజి వరివెట వెహ్రాన్. 41 వాండ్రు ఈహు వెహ్రా కూడఃతి మహి వరిజ్ విజెరిజ్ సాండ్రు ఇజి పోక్వాన్.

20

పవులు మసిదోనియ గ్రీసు దేసెమ్కాజ్ సాహాన్

1 అయ గొడఃబ అణస్తి వెనుక పవులు నమ్మిత్తివరిజ్ కూకపిస్తాండ్రె వరి నమకమ్దిజ్ సత్తు కిబిస్తాన్. దయరమ్ముస్సు మండ్రు ఇజి వెహ్రా నిల్సు లోస్తాండ్రె మసిదోనియదు సాండ్రెజ్ సోత్తాన్. 2 పవులు ఆ దేసె విజు బూలాజి నమ్మితి వరిజ్ సుడఃజి సాహాన్. వరి నమకమ్దిజ్ సత్తు కిబిస్తాన్. వెనుక అకాయ ఇజి కూక్కి గ్రీసు దేసెమ్దు వాతాన్ 3 పవులు అబ్బె మూండ్రె నెలెజ్ మహాన్. ఓడః ఎక్కి సిరియాదు సాస ఇజి మహిజ్ యూదురు వన్నిజ్ సప్తెజ్ కుట్ల ఆజి మహో ఇజి వెహాన్. అక్క నెస్తాండ్రె మసిదోనియదాన్ నడిఃజి సాస్సి అబ్బెణాన్ ఓడః ఎక్కి సాండ్రెజ్ ఒడిఃబితాన్. 4 పురు మరిసి ఆతి బెరెయ పట్టుమ్దికాన్ సాపత్తు ఇనికాన్, దెసలోనియదికార్ అరిస్తర్కు, సెకుందు ఇనికార్, దెరెబ పట్టుమ్దికాన్ గాయి ఇనికాన్, మరి తిమోతి, ఆసియ దేసెమ్దికార్ ఆతి తుకికు, త్రోపిము ఇనికార్ పవులు వెట సాహో. 5 వీరు ముందాల్సా సాహారె త్రోయ ఇని పట్టుం మా వందిజ్ సుడఃజి మహో. 6 పులాజ్ ఆజ రొట్టెజ పండోయ్ ఆతి వెనుక మాపు పిలిప్పి పట్టుం డిసి ఓడః ఎక్కి అయదు రోన్కాణ్ త్రోయ పట్టుం వాతావ్. అబ్బె ముందాల సాహిమహివరివెట ఏడు రోస్సు మహావ్.

పవులు సాతివన్నిజ్ నిక్వాన్

7 వారమ్ది మొదోహి రోజు †బు ఏర్పాటు కిత్తి బోజనం తిండ్రెజ్ మాపు కూడిత వాతావ్. అయావలె పవులు మర్చ నాండిజ్ సానాలె ఇజి వరిజ్ నెస్సిస్తాన్. మదరెయ - దాక నండ్రె మాటెజ్ వర్గిజి మహాన్. 8 మాపు కూడితి మహి మేడః గదిదు నండ్రె దీవెజ్ మహె. 9 అయావలె అర్యుకు ఇని ఒరెన్ దజ్డాఃయెన్ కిటికిదు బస్తాండ్రె వెంజిమహాన్. వెంజిమహిజ్ నిద్ర వాతాద్. పవులు లాపు సుట్టు నెస్సిస్తా మహిజ్ యా దజ్డాఃయెన్ నిద్ర లాపత్తిజ్ జోజితాండ్రె మూండ్రె అంత్రంకాణిజ్ అడిఃగి అర్తాన్. పెహ్రా సుడఃతిజ్ సాత మహాన్. 10 గాని పవులు అడ్డి డిఃగితాండ్రె వన్ని ముస్సు అర్చి వన్నిజ్ పొబిజి అస్తాన్. “మీరు బాద ఆమాట్. వన్ని పాణం వన్నిలోఇనె మనాద్”, ఇజి వరివెట వెహ్రాన్. 11 పవులు మరి మేడఃముస్సు సాహండ్రె రొటె రుక్కి వరివెట బోజనం కిత్తాన్. జాయానిదాక నండ్రె మాటెజ్ వర్గిజి సోతాండ్రె సాహాన్. 12 వారు బత్తితి మహి అయ దజ్డాఃజ్ ఇండ్రె తతార్ గొప్ప నర్ద్ర ఆతార్.

పవులు ఎపెసు పట్టుమ్ది పెద్దెలుజవెట సెలవ లోస్తాండ్రె యెరూసలేమ్దు సాహాన్.

13 పవులు అసోసు ఇనిబాన్ నడిఃజి సాండ్రెజాతిజ్ మాపు వన్నిముందాల ఓడః ఎక్కి అసోసు సాహావ్. పవులుజ్ బానె ఓడఃదు ఎక్వావ్ ఇజి మాపు ఒడిఃబితావ్. 14 అసోసుదు పవులు మా వెట కూడితివలె మాపు వన్నిజ్ ఓడఃదు ఎక్కిస్తావె మితులె ఇని బాడ్డిదు వాతావ్. 15 బాణిజ్ సాసి మహ్నా నాండిజ్ కియోసు ఇని బాడ్డిజ ఎద్రు వాతావ్. మహ్నా నాండిజ్ సహెసు ఇనిబాన్ సాహావె బాణిజ్ మహ్నా నాండిజ్ వెలితె ఇని బాడ్డిదు వాతావ్. 16 పెంతెకోస్తు ఇని పండోయ్ నాండిజ్ యెరూసలేమ్దు అందిదెజ్ వలె ఇజి పవులు తొంత్ర ఆతాన్. ఆసియదు సాహిజ అలన్యం ఆనాద్ ఇజి ఎపెసు పట్టుమ్దు సాన్ఎండ తినాజ్ సాండ్రెజ్ ఒడిఃబిటాన్.

† 19:40 19:40 ఎపెసు పట్టుమ్దు మన్ని లోకర్వందిజ్ యా ముకెలమాతి అతికారి, రోమ అతికారిబు వెట వర్గినికాన్. లోకు గొడఃబ పుటిస్తెజి వరిజ్ వాని అపుకానమ్కు సిల్లెండ్రె అనె * 20:5 20:5 యా పుస్తకం రాస్తిమహి లాక పవులువెట పయనం కిదెజ్ మర్చి వాతాన్ † 20:6 20:6 మసిదోనియ దేసెమ్దు మన్ని పిలిప్పి ఇనిబాణిజ్ ఓడః ఎక్టార్. గాలి వరి ఎద్రు డెయితిజ్ త్రోయ అందిదెజ్ అయదు రోస్సు అతె. సాహివలె రుండి రోస్సునె అతె మహె. 16:11 † 20:7 20:7 యూదురి దినమ్కు లెక్క కినిక ఎలాగ ఇహిజ సనివారం పొదోయ్ అయ గంటిజ్ కొత్త వారం మొదోల్సినాద్. లాక యా పుస్తకం రాస్తివలె యారెకెండ్ లెక్క కిత్తాన్ ఇజి బయ్బిల్వందిజ్ ఎక్కు నదు కిత్తికార్ నండ్రెండాద్ వెహ్రానార్

17 అందెజె పవులు మిలెతుదు అందితివలె ఎపెసు పట్టుమదు మన్ని సజమ్ది పెద్దెల్జ వన్నిబాన్ కూకపిస్తాన్. 18 వారు వన్ని డర్లు వాతిజ్ పవులు వరివెట ఈహు వెప్తాన్, “నాను అసియదు వాతి మొదొల్ దినమ్కాజ్ ఎలాకాలం మీ నడిమి ఎలాగ బత్తిజి మహానో ఇజి మీరె నెస్సిదెర్గదె. 19 యూదురు నజీ సప్తెజ్ కుట్ర కిజి నజీ మాలెజ్ కిత్తార్ గాని నాను గొప్ప వాండ్రు ఇజి ఒడిబివిండ కళెరు వాక్సి దేవుణు పణి కిజి ఎలాగ మహానో ఇజి నిజినె తెలినాద్. 20 సిక్కుదాన్ ఎలాగ గెలిస్తెజ్ ఇని వందిజ్ అవ్సరమాతిక ఇనికబా సరినె మీలోకుర్ నడిమి విజెరె కూడితి మహి బాడ్డిదు నాను సాటిన్. మీ ఇల్కాజ్బా వాతానె మిజి నెస్సిన్. 21 పాపమ్కు ఒప్పుకోడెజి డిసిసిజి, దేవుణుదిజ్ లోజిజి, మా ప్రబు ఆతి యేసుక్రీస్తు మున్ను నమకం ఇడదు ఇజి నాను యూదురిజ్ యూదురు ఆఇ వరిజ్ సాసి వెప్తా.

22 ఇదిలో, నాను దేవుణు ఆత్మదిజ్ లోజిత్తానె యెరూసలేమ్దు సొన్నిన. అబ్బె నజీ ఇనిక జర్గినాద్దెనె నజీ తెలివిద్. 23 గాని విజా పట్టుమ్కాజ్బా, నజీ మాలెజ్ వాజినె ఇజి, యెరూసలేమ్దు నజీ జెలిదు ఇడ్నార్లె ఇజి, దేవుణు ఆత్మ నజీ వెప్పినాన్. 24 గాని నా పాణుమదిజ్ నాను కండెకబా విలువ సివి. ఎందానిజ్ ఇహిజ ప్రబు ఆతి యేసు నజీ సత్తి పణి పూర్తి కిదెజె. అయ పణి ఇనిక ఇహిజ దేవుణు దయాదర్మమ్వందిజ్ మన్ని సువార్త వందిజ్ నాను సాసి వెప్తాజ్.

25 నాను బూలాజి దేవుణు ఎలుబడి: వందిజ్ మీ నడిమి వెప్తా గాని మీలోఇ ఎయిదెర్బా మరి నజీ తొఇదెర్లె ఇజి నాను ఏలు నెస్సా. 26 గాని మీలోఇ ఎయిదెర్బా పాడాజి సాహిజ నా పూసి తెవితాద్ ఇజి నేండ్రు మీరె సాసిర్ అనిదెర్లె. 27 దేవుణు ఇన్టం పూర్తి నాను మిజి నెస్సిన్. ఇనికబా డావ్పిత. 28 దేవుణు వన్ని సొంత మరిసి నల సితండ్రె సజమ్దిజ్ సమ్పాదిస్తాన్. అయ సజమ్దిజ్ మీరు బాగ కావ్కిదెజ్. దేవుణు ఆత్మ మిజి సజమ్దిజ్ సుడెదెజ్ ఒపజెప్తాన్. అయ పణిలోఇ నెగెండ సుడెదు. మీవందిజ్బా మీరు జాగర్త సుడెదు. 29 నాను సాహి వెనుక క్రూరమాతి కార్నుకుడిజ్ నన్ని లోకుర్ మీలోఇ డు:గ్నార్లె ఇజి నాను నెస్సా. వారు నమ్మితి వరి మున్ను కనికారం తోరిన్విర్. సజమ్దిజ్ పాడు కినార్. 30 మీలోఇహానె సెగెండార్, నమ్మితి వరిజ్ వెకొర మాటెజ్ వెప్పి నెగ్గి సరిదాన్ లాగ్గి సెఇ సరిదు నడిపిసి, వరివెట కూక్సి ఒతెజ్ సూణార్లె. 31 అహిజ జాగర్త మండ్రు. నాను మూండ్రి పంటెజ్ దాక రెయుపొగలు కళెరు వాక్సి నమకమ్వందిజ్ విజెరిజ్, ఒరెన్ ఒరెన్ వన్నిజ్ డిసివిండ వెప్తా మన్ను. అక్క మీరు ఒడిబిజి జాగర్త మండ్రు.

32 దేవుణుదిజ్ని వన్ని దయాదర్మం తోరిన్ని మాటదిజ్ మిజి ఒపజెప్పిన. మీ నమకం నండొ కిదెజ్ అట్టి దేవుణు - మాటదిజ్ మిజి ఒపజెప్పిన. దేవుణుదిజ్ కేట ఆతి వరివెట మిజి అక్కు సిదెజ్ అట్టి దేవుణుమాటదిజ్ మిజి ఒపజెప్పిన. 33 నాను ఎయె డబ్బుదిజ్, బజరమ్దిజ్, సొక్కిజ్ పాతెజ్ వందిజ్ ఆస ఆవిత 34 నా అవ్సరమ్వందిజ్ గాని నావెట మహివరి అవ్సరమ్మకు వందిజ్ గాని నా కికాజిజెజి పణి కిజి బత్తిత్త ఇజి మీరు నెసినిదెర్. 35 నాను కిత్తి విజా పణిజాజ్ మిజి నెస్సిక ఇనిక ఇహిజ మీరు డటం పణి కిజి సల్లి వరిజ్ సాయం కిదెజ్. దిన్ని వందిజ్ యేసుప్రబు నెస్సి మాట గుర్తు కిదెజ్. అక్క ఇనిక ఇహిజ సీనివన్ని సర్ల లొస్సివన్ని సర్ల ఇంక పెరిక.

36 పవులు ఈహు వెప్తాండ్రె ముణుకుజ్ ఊర్జి వారు విజెరె వెట పార్లనం కిత్తాన్. 37 వారు విజెరె పవులుజ్ పొంబితారె వన్నిజ్ ముద్దు కిజి లావు అడెబాతార్. 38 ఎందానిజ్ ఇహిజ, మీరు ఇబ్బెహాన్ నజీ సుడెఇదెర్లె ఇజి పవులు వెప్తా అయ మాటవందిజె గొప్ప దుకం ఆతార్. వారు ఓడె: ఎక్సి అందు పవులు ఇట్టా వాతార్.

21

పవులు యెరూసలేం సొన్నినాన్

1 మాహు వరిజ్ డిసిసొత్తి వెనుక ఓడె: ఎక్రావె తినాజ్ సొన్ని కోసు ఇనిబాన్ వాతావ్. మహ్నా నాండిజ్ రోదు ఇనిబాన్ వాతావె బాణిజ్ వతరు ఇనిబాన్ వాతావ్. 2 బానె పెనికెదిజ్ సొని ఉండ్రి ఓడె: సుడెతావె, ఎక్రావె సొహావ్. 3 సొహావె కుప్త ఇని ద్విపు మా డేబ్రు పడెకాద్ సుడెతావ్ గాని దన్ని డేబ్రు పడెకాద్ తినాజ్ సిరియ దరోట్ సొహావె, తూరు ఇనిబాన్ డిగితావ్. బాన్ డిప్పెజ్ ఓడె:దు సామనమ్కు మహె. 4 బాన్ సిసూరిజ్ రెబాజి సుడెతిజ్ వరివెట కూడితావె ఏడు రోస్సు బానె

మహావ్. 'నీను యెరూసలేమ్దు సొన్యా', ఇజి దేవుణు ఆత్మ వెప్తి లెకెండ్ పవులు వెప్టోర్ 5-6 గాని బాణిక్ సొండ్రెక్ టయం ఆతివలె మాపు సొత్తాపె పయనం కిత్వాన్. నమ్మితికార్ విజేరె, అయ్లికొడొకె, కొడొరె, మా వెట పట్టుం వెల్లిదాక ఇడ్డిః వాతార్. మాపు విజెపె నమ్దరం ఒడ్డుదు ముణుకుజ్ ఊరిజి పార్దనం కిత్తాపె ఒరెన్ వెట ఒరెన్ సెలవ లొస్తాపె ఓడః ఎక్టావ్. వారు వరి ఇండ్రొ మరజి సొహార్.

7 మాపు తూరుదాన్ సొత్తాపె తొలెమాయి ఇని పట్టుమ్దు వాతావ్. బాన్ నమ్మితి తంబెరెసిరిక్ సుడిః సొహాపె వరివెట ఉండ్రొ రోజు మహావ్. 8 మహ్నా నాండిక్ సొత్తాపె కయ్సరియాదు వాతావ్. బానె సువార్త వెప్పొకాన్ పిలిపు ఇండ్రొ సొహాపె వన్ని ఇండ్రొ మహావ్. పిలిపు యెరూసలేమ్దు మన్ని సజమ్దు వీరపాటు కిత్తి ఏడుగురు లొఇ ఒరెన్. 9 అయా పిలిపుజ్ నాల్గురు విడ్డిః అయ్లిక్ మహా. అవిక్ దేవుణుబాణిక్ వాని మాటెక్ వెప్పొకెజ్.

10 మాపు సెగం రొస్కు బానె మహివలె అగబు ఇని ఒరెన్ ప్రవక్త యూదయ ప్రాంతమ్దాన్ బానె వాతాన్. 11 అగబు మాపు మన్నిబాన్ వాతాండ్రె పవులు నడుముదు తొప్తి మన్ని కటు కుతాన్. కుతాండ్రె, వన్ని కికాక్ కాల్యాజ్ అగబు తొహె ఆతాన్. తొహె ఆతండ్రె, యా కటు ఎయెర్ది ఇహిజ వన్నిజ్ యెరూసలేమ్దు మన్ని యూదురు తొప్సి ఆఇ లోకాజ్ ఒపజెప్పొర్లె ఇజి దేవుణు ఆత్మ వెప్పొనాన్ ఇజి యా అగబు వెప్టాన్.

12 యాక మాపు వెహాపె మాపు, బానె మహి నమ్మితికార్, పవులు వెట, "యెరూ - సలేమ్దు సొన్యా", ఇజి బతిమాలితావ్. 13 దన్నిజ్ పవులు, "మీరు ఎండనిజ్ అడఃబాజి నజీ దుకం కిడిసినిదెరె? నా ప్రబు ఆతి యేసువందిక్ తొహె అదెజి ఆవిద్, వన్ని వందిక్ యెరూసలేమ్దు సాదెజ్బా నాను ఒప్పుకొడొజిన", ఇహాన్. 14 పవులు మా మాటెజ్ ఒప్పుకొడొఇతిజ్ మాపు అలెతావ్. దేవుణుదిజ్ ఇష్టమాతి వజ జర్దిపిద్ ఇహావ్. 15 అయ పట్టుమ్దు సెగం రొస్కు మహి వెనుక మాపు సొమనమ్కు విజు అస్తాపె ఎక్కు యెరూసలేం పట్టుమ్దు సొండ్రెజ్ సొత్తావ్. 16 కయ్సరియాదాన్ సెగెండార్ సిసూర్ మా వెట వాతారె మాపు మండ్రెజ్ ఇజి ఒడిఃబిత్తి మ్నాసొను ఇండ్రొ మజి తతార్. మ్నాసొను కుప్రదికాన్. మొదొహాన్ అసి యేసుప్రబు సిసూడుః ఆతికాన్.

పవులు యెరూసలేమ్దు అందితాన్

17 మాపు యెరూసలేమ్దు వాతిజ్ నమ్మితి తంబెరెసిర్ మజి సర్దదాన్ మర్యాద కిత్తార్. 18 మర్న నాండిక్ పవులు మా వెట యాకోబు డగ్రు సొహాన్. సజం పెద్దెలుబు విజేరె బానె మహార్. 19 పవులు వరిజ్ మాడిఃస్తాన్. వెనుక యూదురు ఆఇవరిలొఇ పవులు కిత్తి సువార్త పణిదాన్ దేవుణు జర్దిస్తికెజ్ విజు పూర్తి వెప్టాన్. 20 వారు ఇక్కిజ్ వెహారె దేవుణుదిజ్ స్తుతికిత్తార్. పవులు వెట వారు ఈహు వెప్టార్, "పవులునా, యూదురు లొఇ నమ్మితికార్ నండొ వెయ్యుజ్ లోకుర్ మనార్ ఇజి నీను సుడిఃజినిగదె. వారు విజేరె దేవుణు మోసెజ్ సిత్తి రూలుజ్ వందిజ్ నండొ పటుదల మనికార్. 21 ఇబ్బె మన్ని యూదురు విజేరె నీవందిజ్ ఉండ్రొ బోగట్ వెహ మనార్. అక్క ఇనిక ఇహిజ, మోసె వెప్తికెజ్ విజు డిఃస్తెజ్ ఇజి నీను యూదురు ఆఇవరి లొఇ బత్కిని యూదురిజ్ నెస్సిసిని ఇజి. వరి ఇజిరె కొడొరిక్ సునతి కినిక ఆవిద్ ఇజి నీను నెస్సిసిని ఇజి. మరి, యూదురు ఎలొగ నడిఃదెజ్ ఇజి మహి పదతిజ్ వజ నడిఃనిక ఆవిద్ ఇజి నీను నెస్సిసిని ఇజి. వినకవందిజ్ బోగట్ వెహ మహావ్", ఇహాన్. 22 "అహిజ మాటు ఇనిక కిదెజ్? నీను వాతివందిజ్ విజేరె తవ్విండ వెనార్. 23 అందెజి మాపు వెప్పొవజ నీను కిఅ. ఇనిక ఇహిజ మొకు నిల్పి మన్ని నాలెవర్ మొగావారు ఇబ్బెన్ మనార్. 24 నీను వరిజ్ వెట కూక్కి ఒసి వారు మొకుబడిః సొన్సిస్తెజ్ వరివెట దేవుణు గుడిఃదు సొన్అ. వారు పూజ సీజి బుర్ బోడి కిదెజ్ మన్ని కర్న నీ సెఅ. అహిజ నీవందిజ్ లోకుర్ వెహిమన్ని బోగట్ నిజం ఆవిద్ ఇజి విజేరె నెస్సార్. నీను మోసె సిత్తి రూలుజ్ లోజిజి నడిఃజినాన్ ఇజి విజేరె నెస్సార్. 25 అహిజ యూదురు ఆఇ నమ్మితి వరిజ్ మాపు ఇనిక తీరమానం కిజి రాస్త మనాద్ ఇహిజ, బొమ్మెజి పూజ కిత్తి వన్నాజ్ తినిక ఆవిద్ ఇజి, నల తినిక ఆవిద్ ఇజి, మెడః పిడిఃక్కి సప్తి వనకాజ్ తినిక ఆవిద్ ఇజి. రంకు బూలానిక ఆవిద్ ఇజి". ఈహు సజమ్ది పెద్దెలుబు పవులు వెప్టార్.

26 అందెజి పవులు, మహ్నా నాండిజ్ అయ నాలెవరిజ్ వెట కూక్కి ఒతండ్రె వరివెట సుబ్బురం ఆతాన్. వారు సుబ్బురం ఆజి మంజిని కాలం ఎసెజ్ అందినాద్, వరి లొఇ విజేరెవందిజ్ ఎసెజ్ పూజ కిదెజ్,

ఇక్కడ వెప్పొందెదజ్ పవులు దేవుణ గుడిఁదు యూదురు లోఁగ మొగావారు మండ్రెజ్ మన్ని బాడ్డిదు సొహాన్.*

పవులు యూదురు అస్తార

27 సుబ్బరం ఆజమంజని ఏడు రోస్సు డగ్గు అతాద్. అయావలె ఆసియదాన్ వాతిమహి సెగొండార యూదురు, దేవుణ గుడిఁదు యూద మొగవరిజ్ మన్ని బాడ్డిదు పవులు సుడఁతారె, బానె మహి లోకాజ్ విజేరిజ్ కలిబిలి కితారె వన్నిజ్ అస్తార. 28 “ఇస్రాయేలు లోకాండె, తోడుఁ కిదెజ్ రద్దు. మా లోకాజ్ పడఁఇకెజ్, మోసె సెత్తి రూలుజు పడఁఇకెజ్, యా దేవుణ గుడిఁదిజ్ పడఁఇకెజ్ విజు బాడ్డిజు సొన్ని లోకాజ్ విజేరిజ్ నెన్పిసినికాన్ వీండ్రె. అక్కాదె అవండ, వీండ్రు యూదురు ఆఇ వరిజ్ దేవుణ గుడిఁదు కూక్త తతాండ్రె దేవుణదిజ్ కేట కిత్తి యా బాడ్డి మయ్లు కిత్తాన్”, ఇజి నండొ గగోలాతార. 29 ఎందానిజ్ ఇహిజు, పట్టుమదు పవులు వెట యూదురు ఆఇ ఎవెసుదికాన్ త్రోపిమును ఇని ఒరెన్ వన్నిజ్ ముందాల్నె వారు సుడఁత మహార. వన్నిజ్ పవులు దేవుణ గుడిఁదు యూదురి మొగ్గ వరిజ్ మండ్రెజ్ మన్ని బాడ్డిదు తతాన్ ఇజి వారు ఒడిబితారో. 30 పట్టుమదు మహి లోకుర్ విజేరి కలిబిలి అతార. విజుబాణిజ్ లోకుర్ మందెజ్ మందెజ్ ఆజి ఉహాక్కి వాతారె పవులుజ్ అస్తారె దేవుణ గుడిఁదు యూదురి మొగ్గ వరిజ్ మండ్రెజ్ మన్ని బాడ్డిహాన్ వెల్లి లాగితార. వెటెనె యూదురి మొగ్గ వరిజ్ మండ్రెజ్ మన్ని బాడ్డిదు సొని సేస్టాజ్ కెహె అతె. 31 పవులుజ్ వారు సప్టెజ్ ఇజి సుడఁజుమహిజ్ యెరూసలేం పట్టుం విజు కలిబిలి అతాద్ ఇజి అబ్బె మహి రోమ సయన్మది పెరి అతికారిజ్ కల్లు వాతాద్. 32 వెటెనె అయ పెరి అతికారి సయన్మదివరిజ్, నదాతిపతివరిజ్ వెట ఒతండ్రె కూడితి మహి లోకుర్ డగ్గు ఉహాక్కి వాతాన్. లోకుర్ అయ పెరి అతికారిజ్, వన్నివెట వాతి సయన్మది వరిజ్ సుడఁతిజ్ పవులుజ్ డెయ్డెజ్ డెస్టార. 33 అయ పెరి అతికారి డగ్గు వాతండ్రె పవులు అస్తాన్. ‘రుండి గొలుస్కాణిజ్ వన్నిజ్ తోహు’ ఇజి ఆడ్రె సెత్తాన్. వీండ్రు ఎయెన్? ఇనిక కిత్తాన్ ఇజి వెన్బాతాన్. 34 వెన్బాతిజ్ లోకుర్ సెగొండారె ఈహు ఇజి, సెగొండారె అహు ఇజి వెప్పొ డెల్లి మహిజ్ గగోలే లావాత్తిజ్ నిజం ఇనికాదొ ఇజి నెన్వండ అతండ్రె ‘బారి గోడెలోఁగ వన్నిజ్ ఒతు’ ఇజి ఆడ్రె సెత్తాన్. 35 పవులు పావు అన్ను ముస్సు వాతివలె లోకుర్ ఒదె కోపమాజి లాగదెజ్ నెక్రెజ్ కిత్తిజ్ సయన్మదికారె పవులుజ్ పిండితారె ఒతార. 36 ఎందానిజ్ ఇహిజు, వన్నిజ్ సవల ఇజి లోకుర్ విజేరి డటం గగోలాజి వెటసొహార.

పవులు లోకుర్ వెట వరగిజినాన్

37 మొదొహి పావు అన్నుదాన్ ఎక్కి సొన్ని ఆకరి పావు అన్ను దాక వారు సొహార. సయన్మదికారె పవులుజ్ బారిగోడెలోఁగ ఒతెజ్ సుడఁజి మహిజ్ పవులు అయ పెరి అతికారి వెట, నీ వెట ఉండ్రె మాట వెస్టెజ్ ఆనాదా ఇజి వెన్బాతాన్. అందెజి అయ అతికారి, “గ్రీకు బాస నీను నెసినిదా?”, ఇజి వెన్బాతాన్. 38 “యా దినమ్కాజ్ ముందాల్నె అతికారిజు ఎద్దువెప్పొ లోకాజ్ నప్పి నాల్లి వెయి లోకాజ్ బిడిఁజ్బూమిదు వెట కూక్కి ఒసి మహి అయ్గుప్తు దేసెమదికి నీను ఆఇదా?”, ఇజి పవులుజ్ వెన్బాతాన్. 39 దన్నిజ్ పవులు, “నాను కిలికియాదు మన్ని తార్పు పట్టుమదికాన్ యూద వాండ్రు. నాను అయ గొప్ప పట్టుమది లోకు. లోకుర్ వెట వరిదెజ్ నజె సెల్గు సిదా”, ఇజి బతిమాలితాన్.

40 పవులు సెలవ లొస్సిజ్ పెరి అతికారి సరి సెత్తాన్. అయావలె పవులు పావు అన్ను ముస్సు నిహండ్రె లోకాజ్ అతిజి మండ్రు ఇజి కియు సయ్లు కిత్తాన్. వారు అతిజి మహివలె పవులు యూదురి బాసాదు ఈహు వెహ్హాన్.†

22

1 “తంబెరిజాండె, బుబ్బరాండె, నా లోఁగ ఇని తప్పుబా సెల్లెద్ ఇజి మీరు నెసినివందిజ్ నాను వెప్పొని మాటెజ్ వెండ్రు”. 2 పవులు వరి సొంత బాసాదు వర్గినిక వెహారె వారు జమెన్ అల్లెత్ మహార. అయావలె పవులు ఈహు వెహ్హాన్. 3 “నాను కిలికియాదు మన్ని తార్పు పట్టుమదికాన్ యూద వాండ్రు.

* 21:26 21:26 యా బాడ్డిదు మొగవారె మంజనార. అయెలికొడెజ్ బాన్ సొండ్రెజ్ ఆవిద్ † 21:29 21:29 యూదురు ఆఇకారె దేవుణ గుడిఁ దేవాదు సొండ్రెజ్ ఆవిద్. బాన్ యూద మొగకొడెజ్ సొండ్రెజ్ ఆనాద్ ఇజి రూలు మనాద్ ‡ 21:40 21:40 యూదవరి బాస ఏబ్రి బాస. యూద పుజేరిజు నదవితి మహి దేవుణ మాటెజ్ ఏబ్రి బాసాదునె రాస్త మహాద్. వారు వర్గితి మాట అరామియ బాస

అహిజ యా పట్టుమీదు గొప్ప పేరు పొందితి మేస్తర్ గమాలియెలు బాన్ మోసె మా అనిగొగొరిజ్ సీత్తి రూలుజ ఎలాగ లోబడెదెజ్ ఇజ నెగ్రెండ నెస్తానె పిరితా. మీరు విజెదెరె నేండ్రు ఎలాగ పటుదలదాన్ మన్నిదెరె అయ పజనె నానుబా యా రూలుజ్ వందిజ్ పటుదలదాన్ మహా. 4 నాను యేనుప్రబు ముస్సు. నమ్మితి వరిజ్ మొగ్గకొడొరిజ్, అయిలి కొడొకాజ్ అసి తొప్పి జెలిదు ఇడెజి సానేండ మాలెజ్ కిత. 5 దిన్ని వందిజ్, విజెరె పుజెరిజ ముస్సు. పెరి పుజెరి, పెద్దెలుజు విజెరె నజి సాసి ఆత మనార్. దమస్సు. పట్టుమీదు మహి మా సొంత లోకురాతి యూదురు లొఇ మహి నమ్మిత్తి వరిజ్బా అసి తొప్పి మాలెజ్ కిదెజ్ యెరూసలేమీదు తతెజ్ ఇజి పుజెరిజ బాణిజ్ ఉత్రమ్ము. లొస్త ఒతానె దమస్సు. పట్టుమీదు మహి యూదురుబాన్ సొహా.

6 నాను పయనం కిజి దమస్సు. పట్టుండ్రు సొన్ని మహిజ్, మదెనం వేడెడు, ఆగాసమ్దాన్ వెటెనె గొప్ప జాయ్ నా సుటులం డెయ్తాద్. 7 అయావలె నాను బూమి ముస్సు. అర్తానె, 'సవులు, సవులు, నీను ఎందానిజ్ నజి మాలెజ్ కిజిని', ఇజి నావెట ఉండ్రె జాటు వాతిక వెహా. 8 'ప్రబు, నీను ఎయి' ఇజి నాను వెన్బాత. వెన్బాతిజ్ వాండ్రు 'నీను మాలెజ్ కిజిని నజరేతుదికాన్ ఆతి యేసునె నాను', ఇజి నావెట వెహ్హాన్. 9 నావెట సొన్ని మహికార్ అయ జాయ్ సుడెతార్ గాని నావెట వర్గితిమహిపన్ని జాటు నెన్వితార్.

10 అయావలె నాను, 'ప్రబు నాను ఇనిక కిదెజ్' ఇజి వెన్బాతిజ్, 'నీను నిజ్జి దమస్సు. పట్టుం సొన్అ. అబ్బె నీను ఇని పణి కిదెజ్ ఇజి నీ వందిజ్ నాను ఏర్పాటు కిత్తికెజ్ విజు నిజి ఒరెన్ వెహ్హానాలె' ఇజి నావెట ప్రబు వెహ్హాన్. 11 అయ సుడెదెజ్ అతెజ్ నన్ని పెరి జాయ్ మహిజ్ నాను కణుకు తొరెదెజ్ అటెండాత. నావెట మహికార్ నా కికు అసి నడిపిని దమస్సు. పట్టుమీదు కూక్త తతార్.

12 అయావలె మోసె సీత్తి రూలుజ్ లొజిజి, బక్తి మన్నికాన్ అననియ ఇనికాన్ ఒరెన్ బాన్ మహాన్. అబ్బె మహి యూదురు విజెరె యా అననియ, ఒరెన్ పల్లుబడి: మన్నికాన్ ఇజి వెప్పి మహార్. వాండ్రు నా డ్రు వాతాన్. 13 డ్రు వాతండ్రె నా డ్రు నిహండ్రె, 'సవులునా, బేన్అ', ఇజి వెప్టాజ్ వెటెనె నాను బేస్తానె వన్నిజ్ సుడెత. 14 అయావలె అయ అననియ వెహ్హాన్, 'మా అనిగొగొరి దేవుణు నిజి ఏర్పాటు కిత మనాన్. దేవుణు నిజి ఇని పణి వందిజ్ ఏర్పాటు కిత్తాండ్రె అక్కు. నీను నెస్తాజ్. అందెజి నీను సుడెతిమహి, వెహిమహి సీతి నిజాయితి మన్నికాన్ నిజి ఏర్పాటు కిత్తాన్. 15 ఎందనిజ్ ఇహిజ, నీను సుడెతికెజ్, నీను వెహికెజ్, విజు లొకాజ్ సొన్ని వెహ్హాజ్, వన్నివందిజ్ ఉండ్రె సాసివజి నీను మంజిని. 16 ఏలు ఎందనిజ్ ఆలస్యమాజిని? నిజ్జి బాప్తినం లాగె ఆత. యేసు పేరు అసి, పార్దనం కిజి నీ పాపమ్కాన్ నొరె ఆత', ఇజి వెహ్హాన్. 17 నాను యెరూసలేమీదు మరజి వాతానె దేవుణు గుడిడు పార్దనం కిజి మహా. పార్దనం కిజి మహిజ్ ఎద్రునె ఉండ్రె దర్దనం సుడెత. 18 అయ దర్దనమీదు నావెట, 'నీను యెరూసలేం డి:సి గజిబిజి సొన్అ. ఎందానిజ్ ఇహిజ నావందిజ్ నీను వెప్పి సాసి వీరు ఒప్పుకొడె:ఏర్', ఇజి వెప్పి మహికా నాను సుడెత.

19 ప్రబు అయ మాట వెప్టాజ్ నాను, 'నాను యూదురి మీటిజ్ ఇల్కాజ్ వరస సొన్ని మీ ముస్సు. నమకం ఇట్టి వరిజ్ డెయ్జి జెలిదు ఇట్టా ఇజి వారు విజెరె బాగ నెనినార్. 20 అక్కాడె ఆవిండ, నీవందిజ్ సాసి వెప్టా స్తెపూసుజ్ సప్తివలె, నానుబా అక్కు ఒప్పుకొటానె వన్నిజ్ సప్తివరి సాల్వెజ్ కావ్కిజి మహాగదె', ఇజి ప్రబు వెట వెహ్హా. 21 గాని ప్రబు, 'నీను సొన్అ, దూరం మన్ని దేసమీదు బత్తిని యూదురు ఆఇవరిబాన్ నాను నిజి పొక్కు' ఇజి నావెట వెహ్హాన్".

పవులు రోమదిజ్ అక్కు అతికాన్

22 యా మాటదాక లోకుర్ పవులు వెంజి మహార్. గాని యాక వెప్టాజ్, "నీన్ని వన్నిజ్ ఇడ్మాట్. విన్నిజ్ సప్తు. వీండ్రు బత్తిదెజ్ ఆవిద్", ఇజి వారు విజెరె డటం గగోలాత్తార్. 23 ఈహా వారు గగోలాజి వరి సాల్వెజ్ కిసి విసిర్తారె దూల్లి అసి ఎగ్రిస్తార్. 24 అయావలె 'పవులుజ్ బారిగొడె: లొఇ తగెఅ' ఇజి రోమ సయనమీదు పెరి అతికారి ఆడ్రె సీత్తాన్. లొకు పవులు ముస్సు. ఎందానిజ్ ఈహు కోపం ఆతారె గగోల్ ఆతార్ ఇజి నెస్సి వందిజ్ పవులుజ్ కొర్దాన్ డెయ్దెజ్ అయ అతికారి ఆడ్రె సీత్తాన్. 25 గాని పవులు డెయ్దెజ్ తొప్టాజ్ పవులు వన్ని డ్రు మహి సదాతిపతివెట ఈహు వెన్బాతాన్, "రోమదిజ్ అక్కు మన్నికాన్ ఆతి ఒరెన్ వన్నిజ్ తీర్పు సివిండనె కొరెడె:దాన్ డెయ్దెజ్

రోము రూలుజ్ వజ మిజీ అతికారం మనాదా?” 26 అయ నతాతిపతి యాక వెహండ్రె రోము సయనమది పెరి అతికారిబాన్ సాహండ్రె ఈహు వెహ్సాన్. “నీను ఇనిక కిడెజ్ సుడఃజిని? వీండ్రు రోమదిజ్ అక్కు మన్నికాన్”, ఇజి వెహ్సాన్. 27 అయావలె అయ పెరి అతికారి పవులుబాన్ వాతండ్రె, “నీను రోమదిజ్ అక్కు మన్నికిదెనా?”, ఇజి వెన్ బాతాన్. “ఓఓ”, పవులు ఇహాన్. 28 దన్నిజ్ అయ పెరి అతికారి, “లాపు డబ్బు సిత్తానె యా రోమది అక్కు నాను పొందిత”, ఇహాజ్ పవులు, “నాను ఇహాజి పుట్టివలెహానె రోమదిజ్ అక్కు మన్నికాన్” ఇహాన్. 29 అందెజె పవులు వెట డటిసి వెహ్సాజ్ వాతికార్ వెటనె వన్నిజ్ డిస్త సిత్తార్. రోమదిజ్ అక్కు మన్ని వన్నిజ్ గొలుస్కాణిజ్ తోహాపిస్త మహ ఇజి నెసి అయ రోము సయనమది పెరి అతికారి తియెలాతాన్.

పవులు యూద పెద్దెల్జ నడిఃమి వర్గిజినాన్

30 మహ్సా నాండిజ్, పవులు ముస్సు యూదురు ఇని నేరం మొప్పారో ఇజి నెస్సెజ్ అయ రోము పెరి అతికారి ఆస ఆతాన్. అందెజె పవులు డిఃబిస్తాన్. పెరి పుజేరిజ్ ని సంహద్రి సజమదిజ్ కూక్ పిస్తాండ్రె ‘మీటిజ్ కినాట్’ ఇజి ఆడ్ర సిత్తాన్. వారు కూడఃజి వాతివలె పవులుజ్ వరి ముందాల నిల్పాన్.

23

1 పవులు సంహద్రి సజమదివరిజ్ తినాజ్ సుడఃజి ఈహు వెహ్సాన్, “తంబెరిజాండ్రె, గడిఃస్తి సాహి దినమ్ కు విజి నాను దేవుణు ఎద్దు నా గర్భం గదిన్ ఏండ మహ”. 2 అయావలె విజేరి పుజేరిజి ముస్సు పెరి పుజేరి అతి అననియ పవులు డగ్రు నిల్పిమహివరివెట, “వన్ని వెయ్యు డెయ్ అ”, ఇజి ఆడ్ర సిత్తాన్. 3 దన్నిజ్ పవులు, “నీను తెలాజ్ దూల్లి రాస్తి గొడ్డః* నన్నికి. దేవుణు నిజి డెయ్ నాన్సె, మోసె సిత్తి రూలుజ్ తగితివజ నజి తీర్పు కిడెజ్ నీను బస్తిమన్ని. గాని మోసె సిత్తి రూలుదిజ్ తగింపండ నజి డెయ్ డెజ్ ఆడ్ర సీజినదా?”, ఇహాన్. 4 పవులుడగ్రు నిహికార్, “నీను దేవుణు పెరి పుజేరిదిజ్ దుసలాడిఃజినదా?”, ఇహాన్. 5 దన్నిజ్ పవులు, “తంబెరిజాండ్రె, వాండ్రు విజేరి పుజేరిజి ముస్సు పెరి పుజేరి ఇజి నాను నెన్ ఏత. మీ లోకాజ్ ఏలుబడిః కినివరిజ్ దుసలాడిఃజినిక ఆవిద్ ఇజి దేవుణు మాటదు రాస్త మనాద్ గదె”, ఇహాన్. 6 యూద పెద్దెల్జ పెరి సజమలోఇ సెగొండార్ పరిసయరు, సెగొండార్ నదుకయరు ఇజి పవులు నెస్తాన్. నెస్తాండ్రె వెనుక పవులు డటం వెహ్సాన్, “తంబెరిజాండ్రె, నానుబా పరిసయ వాండ్రునె, పరిసయ వన్నిజ్ పుట్టికాన్. దేవుణు సాతివరిజ్ నికాన్ ఇజి నాను నమ్మిజిన. అక్కు నాను ఎద్దు సుడఃజి మంజిన. దన్నివందిజ్ నాముస్సు తప్పు మొప్పి తీర్పు కిజినార్”. 7 పవులు యాక వెహ్సావలె పరిసయరుజ నదుకయరుజ నడిఃమి గొడఃబ పుట్టాద్. గొడఃబ పుట్టాద్ వారు రుండి జుటజ్ ఆతార్. 8 (ఎందానిజ్ ఇహాజి సాతికార్ మరజి బత్తిఎర్, దూతార్ సిల్లు, దెయమ్ కు సిలు ఇజి నదుకయరు వెహ్సినార్. పరిసయరు ఇహాజి అక్కెజ్ విజి మన్నె ఇజి వెహ్సినార్).

9 అయావలె అబ్బె గొప్ప గగోల్ ఆతాద్. పరిసయరులోఇ సెగొండార్ దేవుణు మోసెజ్ సిత్తి రూలుజ్ నెస్సినికార్ నిజిత్తార్, “మాపు సుడఃతిజ్, యా లోకు ముస్సు ఇని తప్పుబా తోర్ ఎద్. ఒరెన్ దూత గాని ఉండ్రె తోర్జెజ్ అట్ ఇకాద్ గాని వన్నివెట వర్గితాద్ ను, ఇజి గొడఃబెజ్ ఆతార్. 10 వరి లోఇ గొడఃబ లావాత్తిజ్ వారు పవులు కిస్సు విసిర్కార్లెను ఇజి తియెలాతాండ్రె అయ రోము సయనమది పెరి అతికారి సయనమది వరిజ్ పొక్తాండ్రె పవులుజ్ వరి నడిఃమిహాన్ లాగ్గి బారిగొడః లోఇ తత్తెజ్ ఆడ్ర సిత్తాన్. 11 ఆ పొదోయ్ వ్రబు పవులు తోర్ ఆతండ్రె, “దయరం ముస్సు మన్ అ. నీను యెరూసలేమ్ దు నావందిజ్ ఎలాగ సాసి వెహ్సాదో అయావజెనె రోము పట్టమదుబా సాసి వెహ్ అ”, ఇజి వెహ్సాన్.

పవులు సప్తెజ్ యూదురు కుట్ర కిత్తార్

12 మర్స నాండిజ్ పెందల సెగొండార్ యూదురు కూడితారె, ‘మాటు పవులు సవ్ ఏండ ఉండెజ్ తిండ్రెజ్ ఆవిద్’ ఇజి ఒట్టు కితారె పవులు సప్తెజ్ ఇజి పూర్తి తెగిస్తార్. 13 పవులుజ్ సప్తెజ్ ఆలోసనం కిత్తికార్ నల్పయ ముస్సు మొగావారు మహార్. 14 వారు పెరి పుజేరిజబాన్ పెద్దెలుజబాన్ సాహారె వెహ్సార్, “మాపు పవులుజ్ సవ్ ఏండ ఇనికబా తిన్ ఏవ్ ఉణ్ ఏవ్, ఇజి గటిజ ఒట్టు కిత మహావ్. 15 అందెజె మీరు, సంహద్రి సజమదికార్ విజేరి కూడఃజి రోము సయనమది పెరి అతికారి వన్నిజ్ కబ్బు

* 23:3 23:3 పవులు కోపమాజి వెహ్సా మాటిజ్

పోక్త. అక్క ఇనిక ఇహిజ, పవులు మరి మాబాన్ రపిన్ ఇండ్రు. వన్నివెట మరి వర్గిజి వన్ని వందిజ్ మాపు విజ నెస్తెజ్ ఇజి నాటిస్నాట్. వాండ్రు ఇబ్బె అందివిండనె మాపు వన్నిజ్ సప్తెజ్ తయారాజి మనావ్". 16 గాని పవులుజ్ బణిజ ఆతికాన్ యాక నెస్తాండ్రె నెల్ల లొస్తాండ్రె బారిగొడః లొఇ సొన్ని పవులుజ్ వెప్తాన్. 17 అయావలె పవులు సదాతిపతిరలొఇ ఒరెన్ వన్నిజ్ కూక్తాండ్రె, "యా దజ్డెజ్ రోమ సయ్నమ్ది పెరి ఆతికారిబాన్ ఒఅ. పెరి ఆతికారి వెట విన్నిజ్ ఉండ్రీ మాట వెప్తెజ్ మనాద్" ఇహాన్. 18 వెప్తెజ్ అయ సతాతిపతి అయ దజ్డెజ్ పెరి ఆతికారిబాన్ ఒతాన్. ఒతండ్రె, "జెలిదు మన్ని పవులు నజి కూక్తాండ్రె యా దజ్డెజ్ మీబాన్ ఒతెజ్ ఇజి వెప్తాన్. యా దజ్డః మీ వెట ఇనికాదొ వెప్తాన్", ఇజి వెప్తాన్.

19 అయ పెరి ఆతికారి అయ దజ్డెజ్ కీదు అస్తాండ్రె ఉండ్రీ పడఃకాద్ ఒతాన్. "నా వెట వెప్తెజ్ ఇని మాట మనాద్?" ఇజి వన్నిజ్ వెన్బాతాన్. 20 వెన్బాతిజ్ అయా దజ్డెజ్ యెన్, "విగెహిజ్ పవులుజ్ సంహద్రి సజం నడిఃమి తసి వన్ని వందిజ్ మరి నెస్తెజ్ ఇజి నాటిసి వన్నివెట మరి వర్గిదెజ్ నీబాన్ సెలవ లొస్తెజ్ ఇజి యూదురు ఒపుకొట మనార్. 21 గాని నీను వరిజ్ సరి సీమ. ఎందానిజ్ ఇహిజ నలవయ్ మణిసిరిజ్ ముస్సు మొగావారు, పవులు సవ్విండ మాటు ఉండెజ్ తిండ్రెజ్ ఆవిద్ ఇజి ఒట్టు కితారె వన్ని వందిజ్ సరిదు సుడఃజినార్. వారు వన్నిజ్ సప్తెజ్ తయారాత మనార్. మీమాటదిజ్ కాప్ కిజినార్" ఇహాన్.

22 యాక వెహండ్రె అయ పెరి ఆతికారి, "నీను నజి యాక వెప్తె ఇజి ఎయెజ్బా వెహ్య", ఇజి గటిజ వెహండ్రె అయ దజ్డెజ్ యెనుజ్ పొక్తాన్.

23 వెనుక అయ పెరి ఆతికారి సదాతిపతిర లొఇ రిఎరిజ్ కూక్తాండ్రె, "యా పొదొయ్ తొమ్మిది గంటజ కయ్సరియ దాక సొండ్రెజ్ తయార్ ఆదు. రుండి వందిజ్ సయ్యమ్దికార్, డబయ్మణిసిర్ గుర్తమదాన్ సొని సయ్నమ్దికార్, రుండి వందిజ్ బల్లెమ్కు అస్తికార్ సొండ్రెజ్ వలె. 24 పవులుజ్ ఎకిసి ఒతెజ్ గుర్తమకు సీదు. వన్నిజ్ గవర్నరు ఆతి పేలిక్కుబాన్ ఇని ప్రమాదం రెవిండ ఒతెజ్", ఇజి వెప్తాన్. 25 అయ పెరి ఆతికారి ఈహె ఉండ్రీ ఉత్తం రాస్తాన్, 26 "క్లవుదియ లూసియ ఆతి నాను గొప్ప పేరు మన్ని పేలిక్కు గవర్నరుజ్ వందనమ్కు వెప్తాన్. 27 విన్నిజ్ యూదురు అస్తారె సప్తెజ్ సుడఃతిజ్ నాను నా సయ్నమ్దివరివెట వాతానె విన్నిజ్ గెల్పెస్స. ఎందనిజ్ ఇహిజ వీండ్రు రోమదిజ్ అక్కుమన్నికాన్ ఇజి నాను నెస్స. 28 విని ముస్సు యూదురు ఎందనిజ్ నేరం మొప్పినార్ ఇజి నెస్సెజ్ నాను విన్నిజ్ యూదురి సంహద్రి సజమి నడిఃమి ఒత. 29 ఒతిజ్, యూదురి రూలుజలొఇ మన్ని ఇనికెజ్ వందిజ్ వారు విన్నిజ్ నేరం మొప్పారె గాని, సప్తెజ్నొ, జెలిదు పొక్తెనొ తగితి తపుజ్ తోరెఉతె. 30 విన్నిజ్ సప్తెజ్ ఇజి యూదురు కుట్ర కిజినార్ ఇజి నాను నెస్తానె వెటనె విన్నిజ్ నీబాన్ పొక్కిన. విని ముస్సు నేరం మొప్పికార్బా నీబాన్ వాజి వన్ని ముస్సు మన్ని నేరమ్కు విజు వెప్తెజ్ నాను పరిజ్ ఆడ్రె సిత్త".

31 అయ రోమ సయ్నమ్ది పెరి ఆతికారి ఆడ్రె సిత్తిలెకెండ సయ్నమ్దికార్ పవులు ఆ పొదొయెన్ అంతిపత్తి ఇని పట్టుమ్దాక కూక్త ఒతార్. 32 మహ్సా నాండిజ్ వారు పవులు గుర్తమ్కు అస్తి సయ్నమ్ది - వరివెట పొక్తారె మహికార్ మరణి వాతార్. 33 వారు కయ్సరియదు అందితిజ్ ఆతికారి పొక్తి ఉత్తం గవర్నరుజ్ సితార్. పవులుజ్బా గవర్నరుబాన్ ఒవజెప్తారె. 34-35 గవర్నరు అయ ఉత్తం సద్వితాండ్రె పవులు వెట, "నీను ఎమెణి ప్రాంతమ్దికి", ఇజి వెన్బాతాన్. "కిలికియదికాన్", ఇజి వెప్తెజ్, "నీ ముస్సు నేరం మొప్పికార్ వానివలె నీ సజతి నూణ ఇజి వెప్తాన్. పవులు హేరోదు రాజు పెరిఇండ్రె ఇడఃజి కాప్ కిజి మండ్రెజ్ ఆడ్రె సిత్తాన్.

24

పేలిక్కు గవర్నరుబాన్ పవులు నిల్పినాన్

1 అయదు రోమ్కు సొహిజ్ విజెరె పుజెరిజ ముస్సు పెరి పుజెరి ఆతి అననియ, వన్నివెట సెగొండార్ యూద పెద్దెలుజు, తెర్తుల ఇని ఒరెన్ తగ్గు వర్గినికాన్, డిఃగు మన్ని కయ్సరియాదు వాతార్. వాతారె పేలిక్కు గవర్నరుబాన్, పవులు వందిజ్ మొప్పి నేరమ్కు వెప్తారె. 2-3 పవులుజ్ కూక్కిసి కోర్టుదు నిల్పాన్. అయావలె తెర్తుల ఇని తగ్గు వర్గినికాన్ పవులు వందిజ్ ఈహె నేరం మొప్పెజ్ మొదొల్స్తాన్,

“పెరి పేరు మన్ని గవర్నరు ఆతి పేలిక్కు, నీను నండో కాలం ఏలుబడికి కిజినిజ్ మాపు సమదానమ్దాన్ మంజి - నావ్. మా జాతివందిజ్ మీరు బాగ కిత్తిజ్ మజీ నెగ్రెండ బత్తిదెజ్ అవ్సరం ఆతికెజ్ విజు మన్నె. మాపు విజెపె మీరు కిత్తి యా నెగ్గి పణిదిజ్ బప్పుకోడెజి నిజి వందనమ్కు వెప్పినావ్. 4 గాని నాను నీ పణిదిజ్ అడ్డు కివండ, మాపు ఎందానిజ్ మీబాన్ వాతాపా అయ సజతి వందిజ్ వర్గిన. దయ కిజి వెన్అ.

5 యా పవులు గొప్పు గొడెబ కినికాన్. లోకం విజు యూదురి నడిమి గొడెబెజ్ రేప్పికాన్. వీండ్లు నజరేతుది జటుదిజ్ నెయ్యి. యాక విజు మాపు నెసినావ్. 6-7 వీండ్లు యెరూసలేమ్దు మన్ని దేవుణు గుడిదిజ్ మర్లు కిదెజ్ బా సుడెతాన్. అందెజె మాపు విన్నిజ్ అస్తావ్. గాని రోమ సయనమ్ది పెరి అతికారి లూసియ వాతండ్రె మాబాణిజ్ విన్నిజ్ లాగితాన్. 8 నీను విన్నిజ్ వెన్బాఅ. మాపు విన్నివందిజ్ వెప్పికెజ్ విజు నిజమె ఇజి నిజి నెస్సెజ్ ఆనాద్”.

9 తెర్దుల వెప్తి మాటెజ్ విజు నిజం ఇజి బానె వాతిమహి యూదురుబా బప్పుకోటార్.

10 పవులు వర్గిదెజ్ గవర్నరు సయన కిత్తిజ్ పవులు వర్గిదెజ్ మొదొల్స్తాన్, “గవర్నర్ ఆతి పేలిక్కు, నీను నండో పంటిజ్ యా యూదురి లోకాజ్ నెగ్రెండ ఏలుబడికి కిజిమహి. అందెజె నాను దయరమ్దాన్ వెప్పిన. 11 నాను యెరూసలేమ్దు దేవుణు గుడిదు పార్దనం కిదెజ్ సాహిజ్ ఏలు పనెండు రోస్కునె ఆతె ఇజి విరిజ్ వెన్బాతిజ నీను నెన్సి. 12 దేవుణు గుడి లొఇబా, యూదురి మీటిజ్ ఇండ్రెబా, పట్టుమ్దుబా నాను ఎయెన్ వెటబా లోకురిజ్ నెక్తి పొక్తిక, జటు కిజి రేప్పిక, ఇనికబా యూదురు సుడెవితార్. 13 ఏలు నావందిజ్ వీరు వెప్పికెజ్ నిజం ఇజి రుజువ్ కిదెజ్ వీరు అటేవర్. 14 గాని నాను ఉండ్రె నిజం మాట వెప్పా. అక్క ఇనిక ఇహిజ. నిజం ఆవిద్ ఇజి వీరు వెప్పిన బోదవజ నాను నడిజిన. ఆహె నడిజి దేవుణు మోసెజ్ సీత్తి రూలుజ్ వజ విజు, ప్రవక్తరు రాస్తికెజ్ విజు నాను నమ్మిజి మా అనిగొగొర్ పొగడిజి మాడిజి దేవుణుదిజ్ పార్దనం కిజిన. 15 వీరు నమ్మినవజ నెగ్గికార్, సెఇకార్ విజేరె సాతి వరిబాణిజ్ మర్జి నిజ్నార్ ఇజి నానుబా దేవుణుదిజ్ నమ్మిజి ఆసదాన్ ఎర్దు సుడెజిన. 16 అందెజె నాను, దేవుణు ఎర్దుగాని, లోకుర్ ఎర్దుగాని నా గర్బం గదివీండ మండ్రెజ్ సుడెజిన. 17 నెగం పంటిజ్ సాహి వెనుక ఏలు నాను నా సొంత జాతిజ్ సాయం కిదెజ్, దేవుణు గుడిదు పూజ కిదెజ్ యెరూసలేమ్దు వాత. 18-19 దిన్ని వందిజ్ నాను దేవుణు గుడిదు సాహిమహిజ్, సుబ్బరం ఆతి వెనుకానె యూదురు నజి బాన్ సుడెతార్. అయాలె నావెట మంద లోకుర్ ఎయెర్ సిల్లెతార్. ఇని గొడెబ జర్గివితాద్. గాని నాను బాన్ మహివలె ఆసియ దేసెమ్దాన్ వాతిమహి సెగొండార్ యూదురు, బాన్ మహారె నా ముస్కు గొడెబ ఆతార్. నా ముస్కు వరిజ్ ఇని నేరం మహిజ వారి వాజి నీ వెట వర్గిదెజ్. 20 సీలిజ నాను సహద్రి నజమదు వర్గిజి మహిజ్ ఇని తప్పు వర్గిత ఇజి వీరు వెపెర్. 21 గాని ఉండ్రె మాట నాను వెప్తా. అక్క ఇనిక ఇహిజ, సాతి లోకుర్ మర్జి బత్తినార్ ఇజి నమ్మినవందిజ్ మీరు నేండ్లు నజి తీర్పు కిజినిదెర్ ఇజి నాను బానె డటం వెప్తా మహా”.

22 పవులు వెప్తి బోదవందిజ్ గవర్నరాతి పేలిక్కు నెగ్రెండ్రె నెస్సె మహాన్. అందెజె వాండ్రు, “రోమ సయనమ్ది పెరి అతికారి ఆతి లూసియ వానివలె తీర్మానం కిన”, ఇజి వెప్తాండ్రె అయ సర్దు మీటిజ్ ముగిస్తాన్. 23 వెనుక పవులు జెలిదు ఇడెజి వన్నిజ్ కాపు ఇడెదెజ్ సదాతిపతిజ్ ఆడ్రె సీత్తాన్. వన్ని లోకుర్ వాజి వన్నిజ్ సుడెజి వన్నిజ్ సాయం కిదెజ్ అడ్డు కిమాట్ ఇజి ఆడ్రె సీత్తాండ్రె వన్నిజ్ కండెక్ సరి సీత్తాన్. 24 నెగం రోస్కు సాహిజ్ పేలిక్కు వన్ని ఆల్సి ఆతి ద్రుసెలవెట వాతాన్. అది యూదురి అయెలి కొడెః. పేలిక్కు పవులుజ్ కూకేపిస్తాన్. యెసు క్రీస్తు ముస్కు మన్ని నమకంవందిజ్ పవులు వెప్తికెజ్ వెంజి మహాన్. 25 గాని పవులు సరియాతి పణి కిని వందిజ్, మన్నుదిజ్ అణెనె ఆజి ఇడ్డివందిజ్, దేవుణు, లోకుర్ ముస్కు, కిని తీర్పువందిజ్ గటిజ వర్గితిజ్ పేలిక్కు తియాలాతాండ్రె, “ఆనె, ఏలు సొన్అ. మరి ఒర్పు టయం మహివలె కూకేపిన్న”, ఇజి వెప్తాండ్రె పొక్తాన్. 26 పవులు నజి డబ్బు సీనాన్ ఇజిబా పేలిక్కు ఒడిబడిబితాన్. అందెజె పవులు మాట మాటదిజ్ కూకేపిస్తాండ్రె వన్నివెట వర్గితాన్.

27 రుండి పంటిజ్ సాహిజ్, పేలిక్కు వెనుక పొర్కియు పెస్తు ఇనికాన్ గవర్నరు ఆతాన్. పేలిక్కు యూదురిజ్ సర్ద కిబిన్తెజ్ పవులుజ్ జెలిదునె ఇట్టాన్.

25

పవులు పెస్తు ఎద్దు నిల్సినాన్.

1 పోర్కియు పెస్తు అయ ప్రాంతమిదిజ్ గవర్నరు ఆజి మూంత్రి రోస్కు సాహిజ్ వాండ్రు కయసరియాదాన్ ఎక్కి యెరూసలేమ్దు సాహాన్. 2 బానె పెరి పుజేరిజు యూదురి పెద్దెలుజు పవులు ముస్కు మహి తప్పుజవందిజ్ గవర్నరుజ్ వెప్టార్. 3 “దయ కిజి పవులు యెరూసలేమ్దు పోకొత్”, ఇజి వారు గవర్నరుబాన్ నండో సుట్టు బతిమాలితార్. ఎందానిజ్ ఇహిజ పవులుజ్ సర్దు సప్పావ్ ఇజి వారు కుట్రి కిజి మహార్. 4 గాని గవర్నరు, “పవులు కయసరియాదు కావ్ ఇట్టా మనాద్. నాను వెటనె బానె సొన్సిన. 5 అందెజి మీలోఇ మన్ని పెరిలోకుర్ నావెట బానె సొండ్రెజ్. పవులు ముస్కు ఇని తప్పుబా మహిజ వీరు కోర్దుదు నేరమకు తోరిస్తెజ్ ఆనాద్” ఇహాన్.

6 గవర్నరు పరివెట ఎనిమిదిసో పది రోస్కునొ మహి వెనుక, డిఃగు కయసరియాదు సాహాన్. మహ్నా నాండీజ్ కోర్దుదు సాహండ్రె తీరిపు కిదెజ్ ఇజి, తీరిపు కినిబాన్ బస్తాన్. ‘పవులు కోర్దుదు తగాట్’ ఇజి ఆడ్ర సిత్తాన్. 7 పవులు వాతిజ్ యెరూసలేమ్దాన్ డిఃగు వాతి యూదురు వన్ని సుటులం నిహారి వన్ని ముస్కు నండో రకమిది బలోమి ఆతి తప్పుజ్ మొప్టార్ గాని ఆక్కజ్ నిజం ఇజి రుజువ్ కిదెజ్ వారు అట్టెవితార్.

8 పవులు, “నాను యూదురు రూలుజ్ వందిజ్ గాని, యెరూసలేమ్దు మన్ని దేవుణు - గుడివందిజ్ గాని, రోమ దేసెమ్దిజ్ ఏలుబడిః కిని కయసరువందిజ్ గాని ఇని తప్పుబా కివిత”, ఇజి వన్ని వందిజ్ వాండ్రె వెప్టాన్.

9 నాను నెగ్గికాన్ ఇజి యూదురు ఒడిఃబిదెజ్ ఇజి గవర్నరు సుడఃతాన్. అందెజి వాండ్రు పవులు వెట వెన్బాతాన్, “యెరూసలేమ్దు సొన్సి బానె నీ వందిజ్ వీరు వెప్పొకెజ్ నిజమనో అబద్దమనో ఇజి నాను తీరిపు కిదెజ్ నీను ఒప్పుకోడఃజినిదా?”.

10 దన్నిజ్ పవులు, “రోమ రాజు ఆతి కయసరుది కోర్దుదు నిల్సిన. యా కోర్దుదునె నజీ తీరిపు కిదెజ్. యూదురిజ్ ఇని తప్పుబా నాను కివిత. అక్క నీను నెగ్రిండ సెన్సిగదె. 11 నాను ఇని రూలుదిజ్బా తప్పిజ, సాపుదిజ్ తగితి పణి కిత ఇహిజ, సిక్చదాన్ తప్పె ఆదెజ్ నాను సుడఃఏ. గాని నా ముస్కు వీరు వెప్పొకెజ్ నిజం ఆఉ ఇహిజ నజీ వరిజ్ ఒపజెప్టెజ్ ఎయెరిజ్బా అక్కు సిల్లెద్. నాను రోమ పెరి రాజు ఆతి కయసరుబాన్ సొండ్రెజ్ ఆజిన”, ఇహాన్.

12 అయావలె గవర్నరు వన్నివెటమహి లోకుర్ వెట వర్గితాండ్రె పవులుజ్, “నీను కయసరుబాన్ సొన్సి వెప్టాజ్ ఇజి వెప్టా. అందెజి కయసరుబానె సొన్అ”, ఇహాన్.

పెస్తు అగ్రిప రాజు వెట పవులువందిజ్ వెప్పొనాన్

13 సెగం రోస్కు సాహి వెనుక రాజు ఆతి అగ్రిప *వన్ని తజీసి ఆతి బెర్నికయువెట కొత్త గవర్నరు ఆతి పోర్కియు పెస్తుజ్ మాడిఃస్తెజ్ కయసరియాదు వాతార్ 14 వారు పెస్తువెట నండో రోస్కు మహార్. మహిజ్ పెస్తు పవులు వందిజ్ రాజు వెట వర్గితాన్, “గవర్నరు ఆతి పేలిక్కు పవులు ఇని ఒరెన్ వన్నిజ్ జెలిదు ఇడిస్తాన్. 15 నాను యెరూసలేమ్దు సాహివలె, యూదురి పెరి పుజేరిజు, పెద్దెలుజు విని ముస్కు నేరమకు మొప్టార్ సిక్చని అ ఇహార్. 16 దన్నిజ్ నాను పరివెట వెప్టా, ‘రోమ అలవాటు ఇహిజ, నిందెజ్ మొప్పికార్ ఎయెన్ ముస్కు తప్పు మొప్పారో, వాండ్రు వాజి వరి నడిఃమి వన్ని వందిజ్ వర్గిదెజ్ అవకాసం సివిండ ముందాల్పొ తీరిపు కిదెజ్ అవద్’ ఇజి. 17 అందెజి వారు నావెట ఇబ్బె వాతివలె నాను ఆలోనం ఆవిండ వర్చనాడిజ్ నెసర్దు కూడిఃప్తానె పవులు నాముందాల తప్పిస్త. 18 నేరమకు మొప్పికార్ నిహివలె నాను ఒడిఃబిత్తిలెకెండో వారు నేరమకు లోఇ ఉండ్రీ నేరంబా వన్ని ముస్కు మొవ్పెవితార్. 19 ఇహిజ, వరి మతంవందిజ్, సాతి సాహి యేసు ఇని ఒరెన్వందిజ్ పవులు వెట గొడఃబ ఆతికాదె తోరితాద్. పవులు ఇహిజ యేసు బత్రిజినాన్ ఇజి వెప్పొనాన్. 20 యా సజితివందిజ్ మరి ఇనిక కిదెజ్ ఇజి నెన్ఏండాతానె నాను పవులు వెట, ‘నీను యెరూసలేమ్దు సొన్సి బానె దిన్ని వందిజ్ తీరిపు తీరిసె ఆదెజ్ మన్ను ఆజినిదా?’, ఇజి వెన్బాత. 21 గాని పవులు, ‘రోమ రాజు ఆతి కయసరు నజీ తీరిపు కిదెజ్’ ఇజి వెప్టాజ్ నాను వన్నిజ్ కయసరుబాన్ పోక్చెండ ఇబ్బె జెలిదునె ఇడెదెజ్ ఆడ్ర సిత్త’.

* 25:13 25:13 యూదయదేసెమ్దిజ్ ఎక్కు మన్ని ప్రాంతమికాజ్ పిండ్రు రాజు

22 అగ్రిప రాజు పెస్తువెట, “అయ పవులు వెప్పికెక్ వెండ్రెక్ నాను ఇస్టమాజిన” ఇహిక్, “విగిహిక్ నీను వెండ్రెక్ ఆనాద్”, ఇహాన్.

పవులు అగ్రిప రాజు ఎద్దు నిల్సినాన్

23 మహ్నా నాండిక్ అగ్రిప రాజుని, వన్ని తజీసి ఆతి బెర్కికయ రాజు వర్గిని అతికారం ఇండ్రో వాతార్. వారు ఎసా గొప్ప పెరికార్ ఇజ తోరిసి కర్సు ఆతి రాజురి సొక్కెక్ ఇట్కిజి, బజారం, వెండి ఇడ్కిజి రోమ సయనమ్ది పెరి అతికారి లోకుర్ వెట, పట్టుమ్ది ముకెలమతివరివెట వాతార్. వాతారె పవులుక్ తగ్ అ ఇజ పెస్తు ఆడ్ర సిత్తిక్ జమానుక్ సొహారె పవులుక్ వరి నడిమి తతార్. 24 అయావలె పెస్తు వెప్తాన్, “అగ్రిప రాజు, మాబాన్ కూడజి వాతిమహి విజు లోకాండ, మీరు యా పవులు సుడజినిదెర్. యెరూసలేమ్దు మరి ఇబ్బెబా యూదురు విజేరె వీండ్రు బత్కినిక ఆవద్ ఇజ గగ్లాత్తారె నావెట పిరాడ్ కిత్తార్. 25 గాని సావుదిక్ తగితిక ఇనికబా వీండ్రు కివెతాన్ ఇజి నాను నెస్తానె రోమ రాజుబాన్ సొండ్రెక్ వీండ్రు వెప్తాక్ రోమ రాజుబాన్ సొన్ని తీర్పు ఆవద్ ఇజి నాను తీర్మానం కిత. 26 గాని నాను రోమ రాజుక్ విన్నివందిక్ ఇనిక రాస్తి పొక్తెక్ ఇజి తోర్వెత్. తీర్పు కిదెక్ తగితిక ఇనికబా విని ముస్సు సిల్దెద్. అందెజె మీరు విజెరి నడిమిని, అగ్రిప రాజు, నీ నడిమిబా విన్నిక్ తత్త మన్ను. మాపు విన్నివెట వర్గితివెనుక ఇనికబా రాస్తిక్ నెస్తాను. 27 తొప్పి అసి తీర్పు కిదెక్ పొక్తివన్నిముస్సు ఇని నింద మోప్త మనాద్ ఇజి వెవోవండ వన్నిక్ కయసరుబాన్ పొక్తెక్ ఆవద్ ఇజి నాను నెస్తాన్”.

26

1 అగ్రిప రాజు పవులుక్ సుడజి, “ఏలు నీ వందిక్ వర్గిదెక్ నాను సరి సీజిన”, ఇజి వెప్తాన్. అయావలె పవులు కియు సాప్తాండ్రె వన్ని వందిక్ వాండ్రె ముదాయి ఇజి మొదోల్స్తాన్, 2 “అగ్రిప రాజు, యూదురు నా ముస్సు మొప్తి నేరమ్కు నిజం ఆవద్ ఇజి నావందిక్ నీ ఎద్దు వర్గిదెక్ నాను గొప్ప సర్ద ఆజిన. 3 ఎందానిక్ ఇహిజ యూదురి అలవాటుక్ విజు వరి గొడబెక్ విజు నీను బాగ నెసినికి. అందెజె దయ కిజి నా మాట ఓరిసి వెండ్రు.

4 ఇజిరివలెహాన్ అసి నాను ఎలాగ మహ ఇజి, నా సొంత లోకుర్ నడిమి, నా సొంత దేసమ్దు, యెరూసలేమ్దుబా, ఎలాగ బత్తిజి మహ ఇజి, యూదురు విజేరె బాగ నెసినార్. 5 మా మతమ్దు పరిసయేరి జటుదికార్ ఉండ్రీ రూలుబా తవ్వెండ నీతి నిజాతిదాన్ నడిమి. వరి లోఇ ఒరెన్వజ నాను బత్తిజి మహ ఇజి వారు నావందిక్ సొసి వెప్తాక్ ఇహిజ, సొసి వెప్తాక్ అట్నార్. ఎందనిక్ ఇహిజ, వారు మొదోహాన్ అసి నజీ నెసినార్. 6 ఏలు ఇహిజ, దేవుణు మా అనిగొరె వెట, సీనా ఇజి కిత్తి ఒట్టుదిక్ ఎద్దు సుడజి మహిదన్నివందిక్ నజీ తీర్పు కిజినార్. 7 మా పన్నెండు తెగ్రిదికార్ యా ఒట్టువందిజి ఎద్దు సుడజి దేవుణుదిక్ రెయు పొగల్ డిన్విండ పార్దనం కిజి మంజినార్. ఓ రాజు, నానుబా ఆసదాన్ ఎద్దు సుడజి మంజినిదన్నివందిజె యూదురు నా ముస్సు నేరం మొప్పినార్. 8 సాతివరిక్ దేవుణు నిక్కాన్ ఇజి నమ్మిదెక్ మాపు అట్వెప్ ఇజి మీరు ఎందనిక్ వెప్పినెదెర్?

9 నజరెతుదికాన్ యెసువందిక్ వెప్తామని విజు దన్నిక్ నెక్కిపొక్తెక్ నాను అట్టి పణి విజు కిదెక్వలె ఇజి నానుబా ముందాల ఒడిబిజి మహ. 10 అయావజనె నాను యెరూసలేమ్దు కిత. పెరి పుజేరిక్ నజీ అతికారం సిత్తిక్ నాను దేవుణుదిక్ కేట ఆతి నండోదారిక్ జెలిదు ఇట్టా. అక్కాదె ఆవండ, వరిక్ సప్తెక్ తీర్మానం ఆతిక్ ‘నానుబా ఒప్పుకోడెజిన’, ఇజి వెప్తా.

11 నాను నండో సుట్టు యూదురి మీటిక్ ఇల్లాక్ ఇల్లాక్ సొన్ని నమ్మితి వరిక్ గొప్ప మాలెక్ కిత. యేను ముస్సు నమకం ఇడ్వెప్ ఇజి వారు వెప్పిదాక నాను బలవంతం కిత. అక్కాదె ఆవండ వరి ముస్సు ఒదె కోపం ఆతానె, ఆఇ పట్టుమ్కాక్బా సొహానె బాన్బా మాలెక్ కిత”.

పవులు ఎలాగ యేసుప్రబుక్ నమ్మితికాన్ ఆతాన్ ఇజి వెప్పినాన్

12 “అహి నాను ఒర్సు, పెరి పుజేరిజు సిత్తి అతికారమ్దాన్ ఆడ్రదాన్ దమస్సు పట్టుమ్దు సొన్ని మహ. 13 ఓ రాజు, మదెనెం ఆతివలె సర్దు సొన్ని మహివలె, ఆగానమ్దాన్ వాతి పెరి జాయ్ సుడత. అయ జాయ్ పొద్దు జాయ్ ఇంక పెరి జాయ్. అక్క, నజీ సుటులం, నావెట మహివరి సుటులం డెయ్తాద్. 14 మాపు విజెవె బూమిదు అర్తావ్. అయావలె, ‘సవులు, సవులు, నీను నజీ ఎందానిక్

మాలెజ్ కిజిని? ముల్లు డుడ్డుదాన్ గుతివలె మర్జి వెనుక గుసె ఆతిజ నండో కస్తుం తప్పిస్సి', ఇజి అరామియ బాసాదు వెప్పొ మాట నాను వెహ.

15 'నీను ఎయి, ప్రబు', ఇజి నాను వెనబాతిజ్, 'నీను మాలెజ్ కిజిని యేసు నానె' ఇజి ప్రబు నావెట వెప్తాన్. 16 'ఏలు నిజ్జె నిల్ అ. నాను ఎందనిజ్ నిజి తోరె ఆత ఇహిజ, నావందిజ్ పణి కిదెజ్, నావందిజ్ నేండ్రు సుడేతికెజ్ విజెరిజ్ వెప్పొ, వాని కాలమ్దు నాను నిజి తోరిస్సికెజ్ విజెరిజ్ వెప్పొ నజి ఉండ్రి సాసివజ మండ్రెజ్ నిజి నాను ఏరపాటు కిజిన. 17 ఇస్రాయేలు లోకాణిజ్ నిజి నాను గెల్పిస్సు, యూదురు ఆజ లోకాణిజ్ గెల్పిస్సు. యూదురు ఆజవరినడిమి నాను నిజి పోక్కు.

18 ఎందానిజ్ నిజి పోక్కిన ఇహిజ, వారు సీకటిదాన్ జాయ్దు వాజి వరి కణెకెజ్ తోరె ఆదెజ్. వరిజ్ సయ్తాన్ సత్తుహాన్ దేవుణు దరోట్ మహైజ్. నా ముస్సు, నమకం ఇణెజి, వరి పాపమ్కు నొరె ఆదెజ్. నావందిజ్ కేట ఆతి వరివెట కూడేజి మండ్రెజ్. దిన్నివందిజె నిజి వరి నడిమి పోక్కిన' ఇజి ప్రబు నావెట వెప్తాన్.

19 అందెజె ఓ అగ్రివ రాజు, నాను ఆగానమ్దాన్ వాతి అయ మాటెజ్ లోజిత్త. 20 లోజిత్తానె తొలిత దమస్సు, పట్టుమ్దు, వెనుక యెరూసలేం పట్టుమ్దు, మరి యూదయ ప్రాంతం విజి, యూదురు ఆజ వరిజబా నెస్సిస్త. ఇనిక నెస్సిస్త ఇహిజ, విజెరె, పాపమ్కు డిసి దేవుణు దరోట్ మర్దు ఇజి. పాపమ్కు డిస్సినిత్తిదన్నిజ్ తగిలికెండె నెగి పణిజ్ కిదు ఇజి. 21 నాను ఈహా నెస్పిస్సి దన్నివందిజె యూదురు నజి యెరూసలేమ్దు మన్ని దేవుణు గుడిడు సుడేతారె నజి అస్తారె సప్తెజ్ సుడేతారె. 22 గాని గడేస్తి సాహ కాలం విజి దేవుణు నజి తోడు: మహాన్. అందెజె నాను ఏలు ఇబ్బె నిల్లి తక్కువరివెట, పెరివరివెట నిజం వెప్పొన. వాని కాలమ్దు ఇనికెజ్ జర్గినెలె ఇజి ప్రవక్తరుని, మోసి వెప్పొకెజ్ నానుబా వెప్పొన. 23 అక్కెజ్ ఇనికెజ్ ఇహిజ, క్రీస్తు నండో మాలెజ్ అజి సాతాన్. సాతి వరిబాణిజ్ తొలిత నిజ్నాన్. నిజ్జె, యూదురిజ్, యూదురుఆజవరిజ్ దేవుణు - దరోట్ సాండ్రెజ్ జాయ్ తోరిస్సాన్".

24 పవులు ఈహా, వన్ని వందిజ్ వర్గిజి మహిజ్ పెస్తు, "పవులు, నీను వెరి వాండ్రు. నండో సదు కిత్తిజ్ అక్కు నిజి వెరి కిబిసినాద్", ఇజి డటం వెప్తాన్.

25 దన్నిజ్ పవులు, "గొప్పు పెరికాన్ ఆతి పెస్తు, నాను వెరి వాండ్రు అవి. నాను నెగ్గిబుద్దిదానె నిజం వెప్పొన", ఇహాన్. 26 "రాజు యా సజతిజ వందిజ్ నెసినాన్. అందెజె వన్నివెట దిన్ని వందిజ్ నాను అడ్డు సిల్లెండ వర్గిజిన. దిన్ని వందిజ్ ఇనికబా వన్నిజ్ డాజ్జె మనిక సిల్లెద్. ఎందనిజ్ ఇహిజ, జర్గితికెజ్ విజి ఉండ్రి మూల పడకాద్ జర్గివితాద్. 27 ఓ రాజు, ప్రవక్తరమాటెజ్ నీను నమ్మిజిని ఇజి నాను నెస్సా". 28 దన్నిజ్ రాజు, "నిస్సా సులువుదాన్ నజి క్రీస్తు లోకు కిదెజ్ ఇజి నీను నజి ఒపిసినిదా?" ఇహాన్.

29 "సులువుదానొ ఆలస్యమ్దానొ నీను ఒరిదె అవి, నేండ్రు నజి వెంజినికారె విజెరె నా వజ ఆదెజ్ ఇజి నాను దేవుణుదిజ్ పార్దనం కిజిన. గాని నా వజ గొల్స్కాణిజ్ తోహా ఆదెజ్ పార్దనం కివి", ఇజి పవులు వెప్తాన్. 30 అయావలె రాజు, గవర్నరు, బెర్లిక్, వరివెట బన్ని మహికారె విజెరె నిజిత్తారె. 31 వారు వెల్లి వాతారె, "వీండ్రు సావుదిజ్ గాని, తోహా ఆదెజ్ గాని తగితి పణి ఇనికబా కివితాన్", ఇజి ఒరెన్ వెట ఒరెన్ వర్గితాన్. 32 "వీండ్రు 'కయనరు రాజుబాన్ సాన', ఇజి వెహ్విండు మహాన్ ఇహిజ విన్నిజ్ డిస్సినిత్తిక మరి", ఇజి అగ్రివ రాజు పెస్తుజ్ వెప్తాన్.

27

పవులు ఓడ: ఎక్కి రోమ పట్నం సొన్నినాన్

1 మాపు ఓడ: ఎక్కి ఇటలి దేసెం సాండ్రెజ్ ఇజి ఆక్ర వాతిజ్, పవులుజ్, మరి జెలిదు మహి సెగొండారిజ్ యూలి ఇని సదాతివతిజ్ ఒపజెప్తారె. వాండ్రు రోమ సయనమ్లోఇ ఉండ్రి గుంపు ఆతి అవ్గుస్తు ఇని గుంపుదికాన్. 2 మాపు అద్రమత్తియదాన్ వాతి ఉండ్రి ఓడ: ఎక్కావె పయనం ఆతావ్. యా ఓడ: అనియ ప్రాంతమ్దు సమ్దరం డగ్రు మహి పట్టుమ్కాజ్ సానిక. దెసలోనిక పట్టుమ్దాన్ ఒరెన్ మసిదోని దేసెమ్దికాన్ అరిస్తరకు ఇనికాన్ మావెట మహాన్. 3 మహ్నా నాండిజ్ సీదోను ఇనిబాన్ వాతావ్. సతాతివతి ఆతి యూలి పవులు ముస్సు. దయ తోరిస్తాండ్రె పవులు వన్ని కూలబాబుర్బాన్ సొన్ని వారు వన్నిజ్ నెరెండ సుడేదెజ్ సెల్వ సిత్తాన్. 4 వెనుక బాణిజ్ సోతావె కుప్ర ఇని ద్విపు

ఓరమ్దాన్ గాలి తక్కు మహి బాడ్డిదు పయనం అతావ్. ఎందానిజ్ ఇహిజ ద్విపుదాన్ గొప్పు గాలి సమ్దరం దరోట్ డెయ్జి మహాద్.

⁵ వెనుక మాపు కిలికియ, పంపులియ ఇని ప్రాంతమ్కాజ్ డగ్రు మహి సమ్దరం డాట్టాపె లుకియాదు మన్ని మూర ఇని పట్టుమీదు వాతావ్. ⁶ బానె అలెక్సంత్రియదాన్ వాతి ఉండ్రె ఓడః ఇటలి పట్టుం సాండ్రెజ్ తయారాత మనాద్ ఇజి రోమ సతాతిపతి సుడఃతాన్. సుడఃతండ్రె మజి అయ ఓడఃదు ఎకిస్తాన్. ⁷ మాపు నండ్రె రోస్సు, మెలేక పయనం కిత్తావె గాలివందిజ్ మాలెజ్ అతాపె క్షీదు ఇని ద్విపుదిజ్ ఎద్రు వాతావ్. గాలి మజి ఎద్రు డెయ్తిజ్ అయా సరి మరి సాండ్రెజ్ అట్ఎతావ్. అందెజె మాపు గాలి తక్కు డెయ్తిమహి బాడ్డిదాన్ సాహపె సల్గీసు ఇని బాడ్డి డాట్టి క్రేతు ద్విపు ఓరదాన్ పయనం కిత్తావ్. ⁸ గాలి డెయ్తిజ్ మాలెజ్ అజి, ఓరదాన్ పయనం కిత్తావె నెగ్గిబాడ్డి ఇని కూక్సి జాగదు వాతావ్. దన్ని డగ్రు లుసెయ పట్టుం మహాద్.

⁹ పయనం కిజినిజ్ నండ్రె రోస్సు అతె. యూదురి పండ్రెయ్ అతి ఉపాసి రోజుబా గడఃస్త సాహద్. సమ్దరమ్దు ఓడఃదు సాండ్రెజ్ ప్రమాదమాని కాలం అత మహాద్. అందెజె పవులు వరిజి బుద్ది వెప్తాన్. ¹⁰ “బాబురాండె, మాటు ఏలు సాన్సి మహిజ ఓడఃదిజిని ఇబ్బె మన్ని సామానమ్కాజ్, ప్పు నస్టమ్కు, మరి మా పాణమ్కాజ్బా నస్టమ్కు వానాద్, ఇజి నాను సెనా” ¹¹ గాని అయ రోమ సతాతిపతి పవులు వెహి మాట అన్ఎండ, అయ ఓడః నడిపినివన్ని మాటెజిని అయ ఓడః ఎజుమాని మాటెజ్ అస్తాన్. ¹² పిన్ని కాలమ్దు మండ్రెజ్ అయా బాడ్డి నెగ్గికాద్ అవిద్ ఇహిజ్ బాణిజ్ డిసి సోతెజ్ నండ్రెండ్రె వెప్తార్. క్రేతుదు మన్ని పినిక్కు ఇనిబాన్ అందిజె బానె పిన్ని కాలం గడఃప్పాట్ ఇజి వారు విజేరె ఒడిఃబితార్. యా పినిక్కు పట్టుం దనిణ పడఃమర, ఉస్సన్ పడఃమర దరోట్ మొకొ మహ్తా మహాద్.

సమ్దరమ్దు ముసూర్ డెయ్జినాద్

¹³ దనిణ దరోటాణ్ ఉండ్రె ఇజిరి గాలి డెయ్తిజ్ వారు సాండ్రెజ్ ఒడఃబిల్లికెండ్రె సానాట్ ఇజి ఒడిఃబితార్, ఓడఃది లంగరు* లాగితారె సోత్తార్. క్రేతు ఓర దానె సాన్సి మహాద్. ¹⁴ గాని సణెం వెనుక ఉస్సన్ తూర్పు దరోటాన్ ఊరకులోన్† ఇని పెరి గాలి ద్విపుదాన్ గొప్పుజ్ డెయ్తాద్. ¹⁵ పెరి గాలి ఓడఃదిజ్ డెయ్తిజ్ గాలి ఎద్రు సాండ్రెజ్ అట్ఎండ్రెతాద్. అందెజె మాపు గాలి ఎద్రు సాండ్రెజ్ అట్ఎండ్రెతానె గాలి డెయ్తి మహి దరోట్టి ఓడః మహ్తాపె సాహవ్.

¹⁶ వెనుక కంద ఇని ఉండ్రె ఇజిరి ద్విపు ఓరదాన్ సాహివలె అయ గాలి మా ముస్సు డెయ్విండ్రె అయ ద్విపు మజి ముస్తాద్. నండ్రె కస్టబాడిఃతాపె ఇజిరి ఓడఃదిజ్ ముస్సు లాగితావ్. ¹⁷ ముస్సు లాగితాపె నెగ్గెండ్రె తొహ్తా ఇడ్తావ్. వెనుక పెరి ఓడఃదిజ్ పెరి నాసుదాన్ సుటులం గటిజ తొహ్తార్. మరి సుర్తిసు ఇని ఇస్సు మెటు ముస్సు ఓడః డెయ్నాద్ను ఇజి తియెలాతారె ఓడః మెలేక సానీద్ ఇజి ఓడఃది సాప‡ డిఃస్తారె గాలి డెయ్నిదరోట్ సానీద్ ఇజి డిఃస్తారె. ¹⁸ అయ ముసూర్ డిఃవిండ్రె డెయ్జి మహిజ్ మహ్నా నాండిజ్ వారు ఓడఃదు మహి బరుజ్ సమ్దరమ్దు విసిర్డెజ్ మొదొల్స్తారె. ¹⁹ దన్ని మహ్నా నాండిజ్ వారు ఓడః నడపినిని సెగం సామనమ్కు వరి సాంత కికాణిజ్ సమ్దరమ్దు విసిర్డార్. ²⁰ నండ్రె రోస్సు, షాద్దు గాని సుక్యెజ్ గాని తోర్విండ్రె మహా. గాలి గొప్పుజ్ డెయ్జి మహాద్. మా పాణమ్దిజ్ ఎలాగ గెల్పెస్టెజ్, మాపు సానాప్లెసు ఇజి తియెలాతావ్.

²¹ వారు నండ్రె రోస్సు బోజనం కివిండ్రె మహిజ్ పవులు వరి నడిఃమి నిహండ్రె వెప్తాన్, “బాబురాండె, మీరు నామాట వెంజిమంజినిక ఇహిజ నెగ్గెండ్రె మహాద్ మరి. క్రేతుదాన్ సోవిండ్రె మహిదెర్ మరి. సోవిండ్రె మంజినిక ఇహిజ, యా నస్టమ్కు కస్టమ్కు ఇగ్గివిండ్రెతాద్ మరి. ²² ఏలు ఇహిజ దయ్ఠరమ్దాన్ మండ్రు ఇజి నాను గటిజ వెహ్పిన. ఎందానిజ్ ఇహిజ మీలోఇ ఎయెనిబా సాజి సాన్ఇదెర్. గాని ఓడః ఉండ్రెనె పాడాఃన సానాద్. ²³⁻²⁴ ఎందానిజ్ ఇహిజ, పొదొయ్ నాను, ఎయె వాండ్రునో, ఎవెణి దేవుణుదిజ్ పార్లనం కిజిననో, అయ దేవుణు దూత నాబాన్ వాతండ్రె, ‘పవులు, తియెల్ అమ. నీను కయనరు రాజు ఎద్రు నిల్లెజ్వలె. దేవుణు కనికారమాతికాన్. నీవందిజ్ ఇదిలో నీ

* 27:13 27:13 బరుమన్ని పణుకుదాన్ తయార్ కిత్తిక. గెలుస్కాణ్ తొహ్పి ఓడఃదు ఇడ్తార్. సమ్దరమ్దు డిఃప్తిజ ఓడః బానె నిల్పాడ్డి, సాన్విద్ † 27:14 27:14 ఊరకులోన్ ఇని తుపాన్ గాలి డెయ్తిజ్ ఓడః సాండ్రెజ్ గొప్పు కస్టమానాద్. అయ గాలి ఉస్సన్ తూర్పు దరోటాణ్ డెయ్తినాద్ ‡ 27:17 27:17 గాలి వాజి నెక్కి ఒనిదన్నిజ్ ఓడఃదిజ్ తెరలెకెండ్రె తొహ్పిక

వెట మన్నివరి పాణమ్కు దేవుణు గెల్పిస్సాన్వై' ఇజి వెప్తాన్. 25 అందెజె బాబురాండె, దయరమ్దాన్ మండ్రు. ఎందనిజ్ ఇహిజ దూత నావెట వెప్తివజ జర్గినాద్ ఇజి నాను దేవుణు మాట నమ్మిజిన. 26 గాని మా ఓడః గాలిదు సొన్ని ఎంబెబా ఉండ్రీ ద్వీపుదు పాడానాద్", ఇజి పవులు వరివెట వెప్తాన్.

27 పదినాల్లి రొస్సు అద్రియ ఇని సమ్దరమ్దు మాపు ముసూర్డిజ్ అబె ఇబ్బె బూలాజి మహాప్. మదరయ్తు అతిజ్ ఎంబెసో ఉండ్రీ దేసమ్ డగ్గు వాజినాప్ ఇజి ఓడః నడిపినివరిజ్ ఉదెసమ్దు వాతాద్. 28 అందెజె వారు ఇజిరి బరుదిజ్ తాడు తొప్పి డిస్తారె ఎసా లోతు మనాద్ ఇజి సుడఃతార. నూట ఇర్వయ్ అడుఃగుజ్ లోతు మనాద్ ఇజి నెస్తార. నెగం వెనుక మరి డిస్తారె తొంబయ్ అడుఃగుజ్ లోతు మనాద్ ఇజి నెస్తార. 29 మా ఓడః ఓరదు మన్ని పణుకుముస్సు తగ్గినాదో ఇజి తియెలాతారె వారు ఓడః వెనుకపడఃకదాన్ నాల్లి లంగరుజ్ డిస్తారె జాయ్ ఆనెండ పార్లనం కిజి మహార్. 30 ఇహిజ్, ఓడః నడిపివారె ఓడః డిసి సొండ్రెజ్ సుడఃతార. వారు ఓడః ముందాల్ పడఃక మన్ని లంగరుజ్ డిస్తాజ్ ఇజి నాటిసి ఓడఃదు మన్ని ఇజిరి ఓడః సమ్దరమ్దు డిస్తార. ఇజిరి ఓడఃదు ఎక్కిసొండ్రెజ్ ఆలోసనం కిస్తార. 31 పవులు అక్క నెస్తాండ్రె సదాతిపతివెట, "నయ్నమ్దివరివెట, యా ఓడః నడిపినివారె ఓడః డిసి సొనార్ ఇహిజ, మీరు తప్తె ఆదెజ్ అల్ ఇదెర్", ఇహాన్. 32 అందెజె సయ్నమ్దివారె ఇజిరి ఓడః తొప్తిమహి నాసు కుతారె సమ్దరమ్దు డిస్తాన్ సితార.

33 కోడిజామ్దు పవులు విజెరి వెట వెప్తాన్, "ఏలు బోజనం కిదు, మీరు బోజనం కిపిండాజి పదినాల్లి రొస్సు ఆతె. నిస్సా రొస్సు మీరు మన్ను బాద ఆజి ఇనికబా ఉణెండ మహిదెర్. 34 అందెజె నాను బతిమాల్లిన, బోజనం కిదు. ఎందనిజ్ ఇహిజ మీరు సాపిండ మండ్రెజ్ వరి ఇహిజ బోజనం కిదెజ్ వలె. తియెలామాట్. మీలో ఇ ఎయె బుర్రదాన్ బా ఉండ్రీ కొప్పుబా రాలజి సొనివద్ ఇహాన్. 35 ఈమా వెప్తి వెనుక పవులు రొట్టె అస్తాండ్రె వారు సుడఃజి మహివరి దేవుణుదిజ్ వందనమ్కు వెప్తాండ్రె రొట్టె ముకెజ్ కిస్తాండ్రె తిండ్రెజ్ మొదొల్స్తాన్. 36 వారు విజెరి దయ్ రం ఆతారె బోజనం కిస్తార. 37 అయ ఓడఃదు మాపు మొత్తం రుండివందెజ్ డబయ్ ఆరు - మంది మణిసిరి మహాప్. 38 వారు పొటపంజు ఉటి వ్వి వెనుక గొడుముజ్ సమ్దరమ్దు విసిరతార ఓడః సుల్కాజి కిస్తార.

ఓడః బదెజ్ ఆజినాద్

39 పొద్దు సొత్తిజ్ వారు అందితి దేసం ఎంబెబి దేసం ఇజి నెన్ ఏతారె గాని ఓడః ఉండ్రీ ఇస్సు మన్ని పడఃకాద్ ఒతెజ్ తగితి ఉండ్రీ నెగి పడః సుడఃతారె బాన్ ఒనాట్ ఇజి ఒడిబితార. 40 అందెజె ఓడః నడిపినివారె లంగరుజ్ తొప్తిమహి నాస్సుజ్ కుతారె సమ్దరమ్దు డిస్తార. ఓడః నడిపి సుకానుజ్ కట్టుజ్ కుతార. ముందాల్ పడఃకాదు మహి సాప ఎక్కిసారె గాలి నెక్కి ఒనిలెకెండ ఓరదు నడిపిస్తార. 41 గాని ఓడః ఏరులో ఇ మన్ని ఉండ్రీ ఇస్సు మెటుదు డఃని ఆతాదె ఓడః ముందాపొక ఇస్సాదు నాడితాద్. వెనుక పడఃకాదు వెరి ఉల్కిజ్ డెయ్ తిజ్ ఓడః బదెజ్ అత సాహద్.

42 జెలిదాన్ ఒసి మహి లోకర్ సమ్దరమ్దు ఈత డెయ్ జి తప్తె ఆజి సొనార్ ఇజి తియెలాతారె వరిజ్ సప్తెజ్ సయ్నమ్దివారె ఆలోసనం కిస్తార*. 43 గాని సతాతిపతి పవులు గెల్పిస్సాజ్ ఒడఃబిజి సయ్నమ్ది వరి ఆలోసనమ్దిజ్ సరి సివితాన్. ఈత డెయ్ జి నెస్సివారు ముందాల సమ్దరమ్దు డిగిజి గదె డాట్టి ఈత డెయ్ జి ఓరదు సొండ్రు ఇజి ఆడ్ర సిత్తాన్. 44 మహివరిజ్ బల్లెజ్ సిక్యెజ్ ఓడఃది ముక్యెజ్ అసి ఒడ్డుదు సొండ్రెజ్ ఆడ్ర సిత్తాన్. ఈసా మాపు విజెపె గెల్పావె ఒడ్డుదు అందితాప్.

28

మెలిత ద్వీపుదు అందిజినార్

1 మాపు తప్తె అతి వెనుక అయా ద్వీపు పేరు మెలిత ఇజి నెస్తాప్. 2 అయ ద్వీపుదికార్ మజి కిత్తి సాయం నిస్సా నసా ఆవిద్. వారు సిసు ఎర్తారె మజి విజెరిజ్ కూడఃస్తార. ఎందానిజ్ ఇహిజ పిరు డెయ్ జి మొదొల్స్తెజ్ పిన్ని కితాద్. 3 పవులు ఉండ్రీ కట రివెజ్ పెప్తా తతాండ్రె దొస్తాన్. అక్క సిసుముస్సు అర్పివరి గొప్పు వినం మన్ని ఉండ్రీ సరాన్ వేడిదిజ్ వెహాకాన్ వెల్లి వాతాదె పవులు కిదు కట్టాద్. 4 పవులు కిదు సరాన్ దూజ్ జి మహిక అయ ద్వీపుదికార్ సుడఃతిజ్ వారు ఒరెన్ వెట ఒరెన్

§ 27:40 27:40 ఓడః తిర్పి ఇజిరి మర * 27:42 27:42 కర్మువారు తప్తె అతిజి వరిజ్ కాప్ కిని సయ్నమ్ది వరిజ్ వరి అతికారి లోకర్ సప్తెజ్ ఇజి రోమ రూలు మహాద్

వర్గితార్, “నిజమేనె, వీండ్లు లోకాజ్ నప్పికాండ్రె, ఏలు సుడేఅ, నమ్దరమదాన్ గెలిసి వాతాన్ గాని నాయం సీని దేవుణు విన్నిజ్ బత్తిదెజ్ సరి సిఎన్.

5 గాని పవులు అయ సరాన్దిజ్ సినుముస్సు. సడేతిజ్ అది సినుద్ అర్తాద్. పవులుజ్ ఇనికబా ఆవితాద్. 6 ఆ ద్వీపుదు మనికార్ పవులు ఉబినాన్, సిలిజ వెటనె సానాన్ ఇజి ఒడిబిజి సుడేజి మహార్. గాని వారు సుడేజిమహిజ్ పవులు ఇనికబా ఆవితాద్. అందెజె వారు వరి మన్ను మారిస్తారె, ‘వీండ్లు ఒరెన్ దేవుణులెకండ్రె మన్నికాన్’ ఇజి వెహార్.

7 అయ ద్వీపుది నెయ్యి అతి పొప్లి ఇనివన్నిజ్ బానె డగ్రునె బూమిజ్ మహె. వాండ్రు మజి వన్ని కూలెజి వజి మర్కాద సితండ్రె మూండ్రె రోస్సు వన్ని ఇండ్రె కూడుస్తాన్. 8 అయ నెయ్యి అప్పొసి నోబుదిజ్, మరి నెత్తెర్పొటదాన్ బాద ఆజి మహాన్. పవులు, వాండ్రు మహి గదిలో ఇ సాహండ్రె పార్దనం కితాండ్రె వన్ని ముస్సు. కికు ఇడేజి వన్నిజ్ నెగండ్రె కితాన్. 9 ఇక జగ్గితిజ్ అయా ద్వీపుదు కస్తం అస్తిమహికార్ విజెరె బానె వాతారె నెగండ్రె ఆతారె. 10 వారు మజి నండ్రె ఇనాయమకు సిత్తారె నెగ్గిక కితారె. వెనుక మాపు పయనమాతివలె మజి అవసరం మనికెజ్ విజి ఒడేదు తత్తారె ఇట్టారె.

పవులు మెలిత ద్వీపుదాన్ రోమ పట్టం సొన్నినాన్

11 ముండ్రె నెలిజ్ అతి వెనుక అలికృంత్రయదాన్ వాతి ఉండ్రె ఒడే ఎక్రావె పయనమాతావ్. అయ ఒడే పిన్ని కాలమ్దు మెలిత ద్వీపుదు మహాద్. కాస్తరు, పొలుక్కు ఇని జవల దెయమ్కాణి బోమ్మెజ్ ఆ ఒడే ముందాహిబాన్ మహాద్. 12 మాపు సురకూన్ ఇనిబాన్ వాతావె బానె మూండ్రె రోస్సు మహావ్. 13 బాణిజ్ పయనమాతావె సుటులం తిరవ్జి రేగియు ఇనిబాన్ వాతావ్. ఉండ్రె రోజు వెనుక దసిణ దరోట్దాన్ గాలి డెయ్తిజ్ మప్ప నాండిజ్ పొతియెలి ఇనిబాన్ వాతావ్. 14 బానె నమ్మితి వరిజ్ సెగొండ్రెజ్ సుడేతావ్. ‘మాబాన్ వారం రోస్సు మండ్రు’ ఇజి వారు మజి బతిమాలితారె. దన్నివెనుక మాపు రోమ పట్టమ్దు వాతావ్. 15 రోమాదు మహి నమ్మితికార్ మాపు రోమాదు వాజినావ్ ఇజి కబ్బు వెహారె సెగొండ్రె రోమ పట్టమ్దాన్ అపియాదు* మహి సత దాక, మరి సెగొండ్రె మూండ్రె సత్రమ్కు† మహి బాడ్డిదాక మజి కూక్కి ఒతెజ్ వాతారె. పవులు వరిజ్ సుడేతిజ్ దేవుణుదిజ్ స్తుతి కితాన్. వన్నిజ్ దయరం వాతాద్. 16 రోమ పట్టమ్దు అందితిజ్ పవులుజ్, వన్నిజ్ కాప్కిని జమానివెట ఉండ్రె ఆదు ఇండ్రె కేట మండ్రెజ్ సెలవ దోహ్కాద్.

పవులు రోమదు మన్ని యూదురిజ్ దేవుణు మాట వెప్పినాన్

17 మూండ్రె రోస్సు సాహి వెనుక పవులు బానె మహి యూద పెద్దెల్జి వన్నిబాన్ కూక్పిస్తాన్. వారు కూడేజి వాతివలె పవులు వరివెట వెహాన్, “తంబెరిజాండ్రె, మా లోకాజ్ పడేఇకెజ్ గాని, మా అనిగొగొరి అలవాటుజి పడేఇకెజ్ గాని ఇనికబా నాను కివిత. ఇహిజ్బా, నజి యెరూసలేమ్దు అస్తారె రోమవరిజ్ ఒవజెప్తారె. 18 వారు నజి గవర్నరుబాన్ తత్తారె నండ్రె ప్రన్నజ్ వెన్బాజి సుడేతివలె సావుదిజ్ తగితి తప్పు ఇనికబా నాను కివిత ఇజి తెలితాద్. అయావలె నజి డిస్టెజ్ సుడేతారె. 19 గాని నజి డిస్టెజ్ యూదురు ఒప్పుకోడేవితారె. అందెజె నా సొంత లోకుముస్సు నజి ఇని మొరొ సిల్లిజ్బా కయనరుబాన్ సొన్ని నావందిజ్ వెహైజ్ అత. 20 అందెజె నాను మిజి సుడేదెజ్ మీ వెట వర్గిదెజ్ మిజి కూక్పిస్త. ఎందానిజ్ ఇహిజి ఇస్తాయెలు లోకు ఎయెవన్నివందిజ్ ఎర్దు సుడేజి మంజినారొ వన్నివందిజి నాను ఏలు యా గొలుస్కాణ్ తోహె అత మన్ను”, ఇజి వరివెట వెహాన్.

21 దన్నిజ్ యూదురు, “యూదయ ప్రాంతమ్దు మన్ని మా లోకాణిజ్ మీవందిజ్ మజి ఇని ఉత్రమ్బా రెవితాద్. ఇబ్బె వాతి మా లోకు ఎయెర్బా మీ వందిజ్ ఇని సెఇ మాటబా వెహేవితారె. నీను ఇనికాదొ తప్పు కిత్తి ఇజి మాపు వెన్వితావ్. 22 గాని యా సజితివందిజ్ మీ ఆలోసనం ఇనిక ఇజి వెండ్రెజ్ మాపు ఆస ఆజినావ్. ఎందానిజ్ ఇహిజి నీను కూడితి మహి యా జటువందిజ్ విజెరె లోకురె పగదాన్ వెప్పినారె ఇజి మాపు నెసినావ్”, ఇహార్.

23 అందెజె వారు పవులు వెట పలాన్ రోజు కూడేదెజ్ ఏర్పాటు కితారె పవులు బత్తినిబాన్ మంద్ర ఆజి వాతారె. పవులు ఎందాహాన్ అసి పొదొయదాక నెగ్రెండ్రె వరిజ్ వెప్పి దేవుణు ఏలుబడి వందిజ్

* 28:15 28:15 అపియాదు మహి సత రోమ పట్టమ్దాన్ అరువయ్తొమ్మిది కిలో మీటర్ దూరం మహా † 28:15 28:15 పయనం కినికార్ నిద్రదిజ్ సాని గదిజ్. మూండ్రె సత్రమ్కు మహి బాడ్డి రోమ పట్టమ్దాన్ యాబయ్ మూండ్రె కిలో మీటర్ దూరం మహా

వరివెట వెహ్లాన్. మోసె సిత్తి రూలుజ్ దాన్, ప్రవక్తరు రాస్తి మాటెజాణ్ యేసువందిజ్ తోరిసి, వాండ్రు వెహ్లాకెజ్ నిజమె ఇజి వెహ్లా తోరిస్తాన్. వరిజ్ ఒవుకొడిస్టెజ్ సుడెఱాన్. ²⁴ పవులు వెహ్లా మాటెజ్ సెగొండార్ నమ్మితార్, మహికార్ నమ్మివితార్.

²⁵ వారు ఒరెన్ వెట మరి ఒరెన్ వర్గిజి నెక్త పొక్తారె ఉండ్రె మన్ను ఆదెజ్ అట్ఎండెతారె మర్జి సాహార్. వారు మర్జి సొని ముండాల పవులు వరివెట ఉండ్రె మాట వెహ్లాన్, “దేవుణు ఆత్మ యెసయ ప్రవక్త దాన్ మీ అనిగొగొర్ వెట వెహ్లా మాట నిజమె.

²⁶ అక్క ఇనిక ఇహిజ, “నీను సొన్ని యా లోకాజ్ వెహ్లు. ‘మీరు బాగ వెంజినిదెర్ గాని అర్థం కిదెజ్ అట్ఇదెర్. బాగ సుడెఱినిదెర్ గాని తోఇదెర్’. ²⁷ ఎందానిజ్ ఇహిజ యా లోకురి మన్ను బేగి అర్థం కిఎద్. వారు కణుకెజ్ గిబ్లిజ్ ముక్త మనార్. సిల్లిజ్ వారు కణకాణ్ సుడెఱాన్ మరి. మన్నుదు అర్థం కిత్తార్ మరి. నా దరోట్ మహ్తాజ నాను వరిజ్ నెగండ కిన”, ఇజి దేవుణు వెహ్లాన్.

²⁸ అందెజె దేవుణు రక్సణ సీనాన్ ఇని సువార్త యూదురు ఆఇ వరిజ్ సీజినాన్ ఇజి, వారు అయ మాట వెనార్, ఇజి మీరు నెహ్లా వలె”. ²⁹⁻³⁰ రుండి పంటెజ్ పూర్తి పవులు ఉండ్రె ఇల్లు అదె లొస్తాండ్రె బత్తితాన్. వన్నిబాన్ వాతివరిజ్ విజెరిజ్ వాండ్రు డగ్రు కిత్తాన్. ³¹ దేవుణు ఏలుబడిః వందిజ్, ప్రబు ఆతి యేసుక్రీస్తు వందిజ్ దయరమ్దాన్, ఇని అడ్డు సిల్లెండ, నెస్సిస్తాన్.

అపొస్తుడు ఆతి పవులు రోమ పట్నమ్దు మన్ని దేవుణు నజమ్దివరిజ్ రాస్తి ఉత్తం.

నెల్వ కిబిసిని

యా ఉత్తం రాస్తికాన్ ప్రబు ఆతి యేసుక్రీస్తుజ్ అపొస్తుడు ఆతి పవులు. రోమాదు మన్ని దేవుణుదిజ్ నమ్మిత్తివరిజ్ యా ఉత్తం రాస్తాన్. రాస్తి కాలం క్రీస్తుయేసు యా లోకమ్దు వాజి నిలువాదు సాజి, మర్రి నిజ్జి పరలోకమ్దు సాహివెనుక 56 నమస్తం నడిఃమి (ఏ.డి 55-56) రాస్తి మంజిన. యా ఉత్తమ్దు ముకెలమాతిక ఇనిక ఇహిజ, క్రీస్తువందిజ్ వెప్పి సువార్త. సువార్త ఇహిజ ఇనిక, సువార్త నమ్మిత్తివరిజ్ ఇనికెజ్ జర్గినె, వినకవందిజ్ రాసినాన్. మరి, దేవుణు లోకురిజ్ నీతినిజయ్దు మన్నికార్ ఇజి ఎలాగ ఇజ్జినాన్, ప్రబు ఆతి యేసుక్రీస్తువలెహాన్ ఎలాగ విడుదల వానాద్ నన్ని నజతిజ వందిజ్ రాసినాన్.

1 క్రీస్తుయేసుజ్ పణి కినికానాతి పవులు ఇని నాను యా ఉత్తం రాసిన్. సువార్త వెహైజ్ దేవుణు నజి అపొస్తుడుజ వజ నిల్వ్తాన్. 2 సేన కాలమ్కు ముజాలె, ఇహిజ, యేసు ప్రబు యా లోకమ్దు వానెండ మాహివలెనె, దేవుణు మాటజ్ రాస్తి మహి ప్రవక్తరుబాన్ దేవుణు యా సువార్త వందిజ్ వెహ్నా ఇజి ఒపందం కిత్త మహాన్. 3 దేవుణు మరిసి వందిజె యా సువార్త. వీండ్రు లోకు వజ దావీదు రాజు తెగాదు పుట్టికాన్. 4 వీండ్రు దేవుణు వజ ఇహిజ, దేవుణు మరిసి ఇజి గొప్ప నత్తుదాన్ తోరె ఆతాన్. ఎలాగ ఇహిజ, వాండ్రు సాతి వరిబాణిజ్ మరజి నిజితాన్. వాండ్రు మా ప్రబు ఆతి యేసు క్రీస్తునె.

5 క్రీస్తు దయాదర్మమ్దాన్ అపొస్తుడు వజ దేవుణు నజి కూక్తాన్. ఎందానిజ్ ఇహిజ, విజు జాతిదికార్ క్రీస్తుముస్కు నమకం ఇడ్డి, వన్నిజ్ మాడిసి, వన్నిజ్ లోజిజి మండ్రెజ్ ఇజి. 6 రోమ పట్నమ్దు యేసు క్రీస్తుజ్ నమ్మిత్తికార్ ఆతి మీరుబా దేవుణు కూక్తి వరి లోక మన్నిదెర్. 7 దేవుణు ప్రేమ కిజి, వన్నిజ్ కేట ఆతి మిజి విజేరిజ్ నాను యా ఉత్తం రాసిన్. బుబ్బాతి మా దేవుణుబాణిజ్, ప్రబు ఆతి యేసుక్రీస్తుబాణిజ్ కనికారమ్ని నిపాతి మిజి మనీద్ ఇజి నాను పార్దనం కిజిన.

రోమ పట్నమ్దు మన్ని నమ్మిత్తివరిజ్ సొన్ని సుడెఃదెజ్ పవులు కోరిజనాన్

8 యా ఉత్తమ్దు తొలిత నాను మీరు విజిదెరె వందిజ్ దేవుణుదిజ్ వందనమ్కు వెప్పిన. యేసు ప్రబువలెహాన్ నమ్మిత్తి దన్నివందిజ్ రోమ దేసెమ్దికార్ ఏలుబడిః కిని విజు బాడ్డిదు మన్ని లోకుర్ వెప్పినార్. 9-10 నాను ఎస్తివలెబా పార్దనం కినివెలె మీ వందిజ్ వెప్పిని సువార్త పూర్తి మన్నుదాన్ నాను కిజిన ఇజి నెసిని దేవుణునె దిన్నిజ్ సాసి. గాని నాను ఎలాగ ఇహిజ్బా ఏలు వాజి మిజి సుడెఃదెజ్ దేవుణు సిత్తం ఆదిజ్ ఇజి పార్దనం కిజిన.

11 ఎందానిజ్ ఇహిజ, మిజి వాజి సుడెఃజి దేవుణు వందిజ్ బత్కిని బత్కుదు మిజి దయరం కిబిస్తెజ్ ఇజి ఆన ఆజిన. 12 ఎలాగ దయరం కిబిస్తెజ్ ఇహిజ మాటు ఒరెన్ వన్ని నమకమ్దాన్ మరి ఒరెన్ వన్నిజ్ దయరం వెహైజ్వెలె. 13 నమ్మిత్తి తంబెరిజాండె, నాను నండో సుట్టు మిజి సుడిః వాదెజ్ ఇజి ఆలోసనం కిత్త ఇజి మీరు నెస్టెజ్వెలె. గాని అట్వండ ఆత. ఎందానిజ్ ఇహిజ, నండో అడ్డుజ్ వాతె. మీ బాన్ వాజి మిజి సుడెఃతిజ మీ బాణిజ్ మజి గొప్ప లాబం వాని లెకెండె. ఎందానిజ్ ఇహిజ మీ నన్ని నండో జాతిజ నడిఃమి నాను సొని లెకెండె మీ నడిఃమిబా నాను వాజి సువార్త వెహైజి ఇజి. సువార్త వెంజి నమ్మిజి దేవుణు కొడెఃర్ ఆనార్.

14 యూదురు ఆజ వరిజ్ విజేరిజ్ సువార్త వెహైజ్ నాను ఉండ్రి అప్పు మన్నికాన్. గ్రికు బాస నెస్తి వరిజ్బా, నెన్ఇ వరిజ్బా, పెరి నదువు మన్ని వరిజ్బా, సదువు సిల్లి వరిజ్బా వెప్పి సిదెజ్ ఇజి నజి ఉండ్రి అప్పు మనాద్. 15 అందెజె, రోమ పట్నమ్దు మన్ని మిజిబా యా సువార్త వెహైజ్ ఇజి నాను గొప్ప ఆన ఆత మన.

16 ఎందానిజ్ ఇహిజ, నాను సువార్త వెహైజ్ సిగు ఆవి. యేసుక్రీస్తు మున్సు నమకం ఇడ్చి విజేరిజ్ వరి పాపమ్కాణిజ్ రక్సిస్తైజ్ యా సువార్తదిజ్ దేవుణుబాణిజ్ ఒద్దె నత్తు మనాద్. యా సువార్త తొలిత యూదురిజ్ వెనుక ఆజ జాతిజ సాటి ఆజినాద్. 17 యా సువార్తదు దేవుణు ఇనిక వెహ్నినాన్ ఇహిజ, లోకు కిత్తి తప్పు పణిజ వందిజ్ వారు సిక్కు పొందిదెజ్ అక్కర్ సిల్లెద్ ఇజినె. వారు యేసుప్రము మున్సు నమకం ఇడ్చి వందిజ్ సిక్కుదాన్ తప్తె ఆతార్. యాక ముందాల్ ఒరెన్ దేవుణు ప్రవక్త రాస్తి లెకెండెన. “ఎయెర్ నీతినిజయ్నికాన్ ఇజి నాను ఇడ్త మనానొ, వాండ్రు నా మున్సు నమకం ఇడ్చి వందిజ్ ఎలాకాలం బత్నినాన్”.

దేవుణు లోకుర్ మున్సు నండొ కోపం ఆజినాన్

18 దేవుణువందిజ్ మున్సు సిల్లి లోకాజ్ విజేరిజ్ సెఇపణి కిని విజేరిజ్ దేవుణు సిక్కు సీనాన్ ఇజి పరలోకమదాన్ తోరిస్త మనాన్. ఎందానిజ్ ఇహిజ, వరి సెఇ పణిదాన్ దేవుణు వందిజ్ నెస్తిమన్ని నిజమాతికెజ్ విజు వారు అడ్డు కిజినార్. 19 దేవుణు వందిజ్ నిజమాతికెజ్ అర్థం కిదెజ్ వారు అట్టూర్. ఎందానిజ్ ఇహిజ, దేవుణు ఎలాగమర్రికాన్ ఇజి వాండ్రు విజేరిజ్ తోరిస్త మనాన్. 20 మాపు దేవుణుదిజ్ నెన్ ఏవ్ ఇజి ఎయెన్బా వెహైజ్ వీలు సిల్లెద్. ఎందానిజ్ ఇహిజ, దేవుణు ఎలాగ మర్రికాన్ ఇజి మాటు సుండెదిజ్ సిల్లె, గాని వాండ్రు లోకం తయార్ కిత్తిబాణిజ్ అసి లోకమ్దు తయార్ కిత్తి వనకబాణిజ్ వాండ్రు ఎలాగ మర్రికాన్ ఇజి ఎలాకాలం మన్ని వన్ని పెరిసత్తు ఎలాగమర్రిక ఇజి మాటు సుండెజినాట్. అందెజె దేవుణుదిజ్ నెన్ ఏవ్ ఇజి ఎయెన్బా వెహైజ్ వీలు సిల్లెద్.

21 యూదురు ఆఇకార్, దేవుణు ఎలాగ మర్రికాన్ ఇజి నెస్తిజెబా దేవుణు ఇజి మాడిసెంబర్, వాండ్రు కిత్తి దన్నివందిజ్ వందనమ్కు వెహ్ ఏవర్. నస్తివలె వారు దేవుణు వందిజ్ అర్థం కిదెజ్ అట్ ఏండ ఆతారె. వరి ఆలోసనమ్కు సెఇకెజ్ ఆతె. 22 వారు బుద్ది మన్నికార్ ఇజి వెహె ఆజి బుద్ది సిల్లి పణిజ్ కిత్తూర్. 23 ఎలాకాలం మంజిని దేవుణుదిజ్ పొగడిజినగవరం సిఏండ బొమ్మెజు పొగడిజి గవరం సిత్తూర్. సబ్బిసాని లోకులెకెండె, పొటిజ్ లెకెండె, జమతుజ్ లెకెండె, మరి బూమి మున్సు ఊజి బూలాని వనకాజ్ లెకెండె తోర్ని బొమ్మెజు తయార్ కిత్తూర్ వనకాజ్ పొగడిజి గవరం సిత్తూర్.

24 అందెజె వారు, కిదెజ్ ఆఇ ఆసెజ్ వరి మున్సుదు పుట్టి లెకెండె కిదెజ్, దేవుణు వరిజ్ సరి సిత్తూన్. ఇనిక ఇహిజ వారు వరిజె సుగు ఆతి సెఇ పణిజ్ కిత్తూర్. 25 ఎందానిజ్ ఇహిజ, నిజమాతి దేవుణు వందిజ్, నిజమదిజ్ డిఃస్టారె నిజం ఆఇ దన్నిజ్ ఇడ్డూర్. విజు దన్నిజ్ పుటిస్సికాన్ ఆతి ఒరెండె దేవుణుదిజ్, మాడిసి వన్నిజ్ లోజిఎండ, దేవుణు పుటిస్సి వనకాజ్ మాడిఃస్టారె, వనకాజ్ లోజిత్తూర్. గాని పుటిస్సికెజ్ విజు అయ దేవుణుదిజె ఎస్తివలెబా మాడిఃస్టెజ్ వెలె.

26 అందెజె సిగు ఆతి ఒడోల్ ఆసెజు వందిజ్ దేవుణు వరిజ్ ఒపజెప్తాన్. అందెజె వరిలోఇ అయ్లికొడోకె మాసిరిజ్ సాన్ ఏండ అయ్లికొడోకాజ్ దరోట్ ఒడోల్ ఆసె ఆజి మహ్హె. 27 అయావజినె యూదురు ఆఇవరి లోఇ మొగకొడోకె ఆల్సికాజ్ ఇడెఏండ మొగకొడోకె దరోట్ ఏక ఉత్పుత్ ఆజి మహ్హూర్. వారు మొగకొడోకె వెట సిగు ఆతి పణిజ్ కిత్తూర్. అయ ఒద్దె తప్పు ఆతి పణిజ్ వరిజ్ తగితి సక్కు ఆజి వరిమున్సు వాతాద్.

28 వారు దేవుణుదిజ్ నెక్కుప్తూరె వన్ని వందిజ్ నెస్తిమన్ని నిజమాతికెజ్ విజు డిఃస్తిసిత్తూర్. నస్తివలె వరి సెఇ బుద్దిదు నడిదెజ్ ఇజి దేవుణు వరిజ్ డిఃస్తిసిత్తూన్. అందెజె సరి ఆఇ పణిజ్ కిదెజ్ వరి బుద్ది మహ్హూద్. 29 విజు రకమ్కాణి సెఇ పణిజ్ కిదెజ్ వారు ఏక ఒడోబినార్. ఇనికెజ్ ఇహిజ, మహి వరిజ్ నెడ్డ కిదెజ్, మహివరిజ్ మన్నికెజ్ మజి దోహ్కెజ్ ఇజి సెఇ ఆసె అదెజ్, ఎలాగబా మహివరిజ్ సెఇకె కిదెజ్, మహివరి వెట గోసె అదెజ్, సప్తెజ్, గొడోబ కిబిస్తిజ్, మొసెం కిదెజ్, మహివరివందిజ్ సెఇకెజ్ వెహైజ్, సాండి వెహైజ్. 30 నండొ లోకుర్ మహివరివందిజ్ తప్పుజ్ వెహ్నినార్. నండొడార్ దేవుణు ఎర్దు వెత్తేకం కిజినార్, ఆఇవరిజ్ సిగు కిబిస్సూర్, గర్త ఆజినార్, పొజిజినికార్ ఆజినార్, మరి రెకరకమది కొత్త సెఇపణిజ్ ఎలాగ కిదెజ్ ఇజి సుండెజినార్, వరి కొడోకె అయ్సి అపొసిరిజ్ లోజిఏవర్. 31 వారు అర్థం కిదెజ్ అట్ ఏవర్. ఒవందం కిత్తిలెకెండె కివర్. నండొడార్ వరి సాంత ఇండ్రోణివరిజ్ నెగెండ తొవర్. నండొడార్ కనికారం సిల్లికార్ ఆజినార్. 32 నిన్ని పణిజ్ కనివరిజ్ సప్తెజ్ వలె ఇజి

దేవుణు వెహ్తా మనాన్ ఇజి నెస్తిజ్బా వారు నిన్ని సెఇ పణిజ్నె కిజి మంజినార్. అక్కాడె ఆవిండ నిన్ని సెఇ పణిజ్ కినివరిజ్ వారు డగ్రు కిజినార్.

2

దేవుణు సరియాతి తీర్పు తీరిస్సాన్

1 మహికార్ తప్పు కినికార్ ఇజి మీరు వెహ్సి వరిముస్సు తీర్పు తీరిసినిదెరా? ఆహె వెహ్సిజి మీరు మిజెనే తప్పు కినికెదెర్ ఇజి వెహ్సినిదెర్. మాపు తప్పు కిఇకాప్, ఇజి వెహ్సిజ్ మీరు అట్ఇదెర్. ఎందానిజ్ ఇహిజ, మీరుబా వరిలెకెండె తప్పు కినికెదెర్. 2 తప్పు కిని యూదురు ఆఇవరిజ్ దేవుణు తీర్పు తీరిస్సివలె వరిజ్ సరియాతి తీర్పు తీరిస్సాన్ ఇజి మాటు నెసినాట్. 3 అందెజె ఆఇ లోకుర్ పాపం కినికార్ ఇజి వెహ్సిని మీరు అయ పాపమ్కునె కిజి మహిజ దేవుణు తీర్పుదాన్ తప్తె ఆఇదెర్ ఇజి నెస్తిజ్వెలె. 4 దేవుణు మీవెట వన్ని గొప్ప విలువాతి దయ, కనికారం తోరిసినాన్. అక్క మీరు ఇజిరి కణకదాన్ సుడఃజినిదెరా? దేవుణు మీవెట తోరిసిని కనికారం మీరు పాపమ్కు ఒప్పుకోడఃజి డిఃసిసిని వందిజ్నె ఇజి మీరు నెన్ఇదెరా?

5 గాని మీరు మీ మున్ను గొప్ప గర్ర ఆఇ పాపమ్కు ఒప్పుకోడఃజి డిఃసిసివిండ మహిజ దేవుణు తీర్పు కిని రోజుదు మీ మున్ను సిక్కు నండో కుంబ కిజినిదెర్. దేవుణు విజి లోకురిజ్ ఉండ్రె లెకెండె తీర్పు కిని దినమ్దు మిజిబా తీర్పు కినాన్. 6 దేవుణు ఒరెన్ ఒరెన్ వన్నిజ్ వారు కిత్తి పణిజ తగితిక మర్ది సినాన్లె* 7 దేవుణుబాణిజ్ జాయ్ని గవరం, సాపు సిల్లి బత్తు దొహ్కెజ్ ఇజి డిఃసివిండ నెగ్గి పణిజ్ కిజి మహివరిజ్ దేవుణు ఎలాకాలం బత్తిని బత్తు సినాన్. 8 గాని నజి నానె నెగెండ మండ్రెజ్ ఇజి సుడఃజిని వరిజ్, దేవుణు వెహ్సిని నిజమాతి మాటదిజ్ డగ్రు కివిండ ఒద్దె సెఇపణిజ్ కినివరిజ్, దేవుణుబాణిజ్ గొప్ప కోపం వానాద్. 9 పాపం కిజినె మంజిని ఒరెన్ ఒరెన్ వన్నిజ్ బాదెజ్ వానె. కష్టమ్కు వానె. నన్ని కష్టమ్కు యూదురుజ్ మొదొల్లినె. వెనుక యూదురు ఆఇ వరిజ్ వానె. 10 గాని నెగ్గి పణిజె కినివరిజ్ దేవుణు వన్ని గొప్ప జాయ్ని గవరం, సాంతి సినాన్. ముందాల యూదురిజ్ని వెనుక యూదురు ఆఇ వరిజ్ సినాన్. 11 ఎందానిజ్ ఇహిజ, దేవుణు లోకాజ్ తీర్పు కినివలె తేడ తొవిండ తీర్పు కినాన్లె.

12 విజెరె లోకుర్ పాపం కిత్తిజ్ విజెరిజ్ సక్కు వానాద్. దేవుణు మోసెజ్ సిత్తి రూలుజ్ వందిజ్ యూదురు ఆఇకార్ నెన్ఏతార్. అందెజె “మీరు ఎందానిజ్ రూలుజ్ లోజెఇతిదెర్?”, ఇజి వరివెట వెహ్ఏన్. దేవుణు మోసెజ్ సిత్తి రూలుజ్ నెస్తి యూదురుజ్ సిక్కుసిదెజ్ దేవుణు తీర్పు కినాన్. ఎందానిజ్ ఇహిజ వారు రూలుజ్ లోజెఏతార్. 13 నీతినిజయ్నికాన్* ఎయెన్ ఇహిజ, దేవుణు రూలుజ్ వెహికాన్ ఆవిన్, అయ రూలుజ్ లోజెత్తికాండ్రె. 14 దేవుణు యూదురిజ్ సిత్తి రూలుజ్ యూదురు ఆఇవరిజ్ సివితాన్. అహిజ్బా వారు అయ రూలుజ్ వజ బత్తిత్తిజ్, అయ రూలుజ్ వారు నెస్తిమనార్ ఇజి మాటు నెసినాట్. అయ రూలుజ్ వరిజ్ సిల్లు గాని మన్నిలెకెండె వారు నడిఃజినార్. 15 అయ రూలుజ్ వరి మున్నుదు ఇడె ఆతె మన్నె ఇజి వరి పణిజాణ్ తోరిసినార్. ఒరెన్ నెగ్గి పణిజ్ కిత్తిజ్బా సెఇ పణిజ్ కిత్తిజ్బా అక్కెజ్ నెగ్గెకెజ్, సెఇకెజ్ ఇజి వన్ని మున్నుదు నెసినాన్. అహె దేవుణు సిత్తి రూలుజ్ వన్ని బుద్దిదు మన్నె. 16 లోకుర్ వరి మున్నుదు ఎయెరిజ్ నెన్ఏవిండ ఇడ్డిమన్ని అలోసనమ్కు వందిజ్బా, దేవుణు తీర్పు కిని రోజుదు తీర్పు సినాన్. యేసు క్రీస్తు వెట యాకెజ్ విజి జగ్గిజినె ఇజి నాను వెహ్సిని సువార్దదు మనాద్.

దేవుణు మోసెజ్ సిత్తి రూలుజ్ వజ నడిఃనికాప్ ఇజి వెహ్సిని యూదురువందిజ్

17 ఏలు యూదురు ఆతి మిజి ఉండ్రె మాట నాను వెహ్సి. మాపు యూదుర్ ఇజి మీరు వెహ్సినిదెర్. దేవుణు మోసెజ్ సిత్తి రూలుజ్ వజ నడిఃనికాప్, అందెజె దేవుణు తీర్పుదాన్ తప్తె అదెజ్ అనాప్, ఇజి మీరు ఒడిఃబిజినిదెర్. దేవుణు కొడెర్ ఇజి షాగ్డః ఆజినిదెర్. 18 దేవుణుదిజ్ ఇస్తిమాతిక ఇనిక ఇజి మీరు నెస్సిదెర్. దేవుణు రూలుజ్ వందిజ్ నెగెండ నెస్తిజ్, డగ్రు కిదెజ్ విజి దన్నిజ్ మిస్తి ఏలువాతికెజ్ ఇనికెజ్ ఇజి మీరు నెసినిదెర్. 19 గుడ్డివరిజ్ సరి తోరిసి నడిఃపిసిని వరిలెకెండె, యూదురు ఆఇవరిజ్

* 2:6 2:6 కిర్చన 62:12; సామెత 24:12. * 2:13 2:13 దేవుణు మున్ను నమకం ఇడ్డి మన్ని పాపమ్కు దేవుణు మాయిత్తికాన్.

సరియ్యతి సరి వెప్పి నడఁపిస్తెజ్ అట్టాప్ ఇజ మీరు వెప్పినిదెర్. సీకటిదు నడిఁసిని వరిజ్ జాయ్ తోరిసిని వరిలెకెండ్ మీ మాటెజాణిజ్ యూదురు ఆఇవరిజ్ దేవుణు సరి తోరిసినిదెర్ ఇజ వెప్పినిదెర్. 20 బుద్ది సిల్లవరిజ్, యూదురు ఆఇవరిజ్ నెస్సిస్తెజ్ అట్టాప్ ఇజ మీరు ఒడిఁబిజినిదెర్. కొడొర్ లెకెండ్ మన్నివరిజ్, ఇహిజ దేవుణు వందిజ్ నిజమాతికెజ్ నెనఱ వరిజ్ నెస్సిస్తెజ్ అట్టికాప్ ఇజ ఒడిఁబిజినిదెర్. ఎందానిజ్ ఇహిజ, రాస్తిమన్ని దేవుణు మాటదు మన్ని విజు వనకాజ్ ఇంక ఒద్ది విలువతి గెణం మరి నిజమాతి మాట మీబాన్ మనాద్గదె. 21 మహివరిజ్ నెస్సిసిని మీరు, మిజి మీరె నేర్పె ఆఇదెరా? డొజ కిమాల్ ఇజ గటిజ వెప్పిని మీరు డొజ పణి కిజినిదెరా? 22 రంకు బూలాదెజ్ ఆవిద్ ఇజ వెప్పిని మీరు రంకు బూలాజినిదెరా? దెయమ్కాజ్ డొస్సి సిత్తి మీరు దెయమ్క గుడిఁదికెజ్ డొజ కిజినిదెరా? 23 దేవుణు రూలుజ్ మాబాన్ మన్నె ఇజ వెప్పి మీరు అయా రూలుజు లోజివండ్ దేవుణుదిజ్ సిగు తపిసినిదెర్. 24 “మీరు ఈహు కిత్తిజ్ దేవుణు పేరు యూదురు ఆఇకార్ దూసినినార్”, ఇజ దేవుణు మాటదు రాస్తి మన్నిక, మీ వందిజ్బా రాస్తి లెకెండ్నె.

25 దేవుణు మోసెజ్ సిత్తి రూలుజ్ వజ మీరు నడిఁజినిదెర్ ఇహిజ మీరు సునతి ఆతి వందిజ్ మిజి లాబం మనాద్. గాని దేవుణు సిత్తి రూలుజు మీరు లోజెఱతిజ మీరు దేవుణు లోకుర్ ఇజ తోరిస్తెజ్ సునతి కిబె ఆఇ యూదురు ఆఇవరిలెకెండ్ మీరు. 26 అయావజనె, సునతి కిబె ఆఇతిజబా దేవుణు సిత్తి రూలుజు వజ నడిఁసి యూదురు ఆఇకార్ వన్ని సొంతలోకుర్ లెకెండ్ వాండ్రు ఇడ్పాన్గదె. 27 సునతి కిబె ఆఇకార్ గాని దేవుణు రూలుజు లోజిని మిజి తీర్పు కినార్. ఎలాగ ఇహిజ, మిజి రూలుజు విజు రాస్తి మహిజ్బా, సునతి కిబె అతిజ్బా అయా రూలుజు లోజెఱతిజ్ యూదురు ఆఇకార్ మిజి తీర్పు కినార్.

28 దేవుణు లోకుర్ ఇజ తోరిస్తెజ్ ఇనికాదో అలవాటుజ్ లెకెండ్ కినికాన్, నిజమాతి యూద వాండ్రు ఆవిన్. దేవుణు లోకుర్ ఇజ తోరిస్తెజ్ మీ ఒడిఁలదిజ్ ఇనికాదో కిత్తిజ దేవుణు ఒప్పకొణాన్ ఇజ ఒడిఁబిమాట్. 29 గాని, నిజమాతి యూద వాండ్రు ఎయెన్ ఇహిజ, మన్ను మారిస్తెకాండ్రె నిజమాతి యూద వాండ్రు. దేవుణు ఆత్మదాన్ మన్ను మారిస్తెకారె దేవుణు లోకుర్. దేవుణు లోకుర్ ఆదిజ్ ఇజ మరి ఇనికబా కిదిజ్ ఆవిద్. నన్ని వరిజ్ లోకుర్ పొగడిఁజితిజ్ గాని దేవుణు వరిజ్ పొగడిఁజాన్.

3

దేవుణు నమ్మిదెజ్ తగ్గికాన్.

1 అహిజ, యూద వాండ్రు ఇజ ఇని లాబం మనాద్? సునతి కిబె అతికాన్ ఇజ ఇని లాబం మనాద్ ఇజ మీరు వెప్పిదెర్ను? 2 దన్నిజ్ నాను వెప్పిని విజు సజతిజులోఇబా గొప్పు లాబమ్నె! ఎలాగ ఇహిజ, దేవుణు వాండ్రు కిత్తిమన్ని ఒపందమ్కు మన్ని వన్ని మాటెజ్, ముజుల మా అనిగొగొరుజ్నె సిత్తాన్.

3 అహిజ, యూదురు నంఠెండార్ దేవుణుదిజ్ నమ్మిదెజ్ తగ్గికార్ ఆవిత్తార్. వారు నమ్మిదెజ్ తగ్గికార్ ఆఇతిజ్, దేవుణు వాండ్రు వెప్తిలెకెండ్ కిపన్ ఇజ వెప్పినిదెరా? 4 నాను వెహ్ప, ఆహె ఇండ్రెజ్ ఆవిద్. దేవుణు వెప్తిలెకెండ్ వాండ్రు కినాన్. లోకుర్ దేవుణు వెట వెప్తిలెకెండ్ కిఎండ అబద్దం వెప్తికార్ ఆతిజ్బా, దేవుణు నిజమ్నె వెహ్పాన్. దావీదు రాజు దన్నివందిజ్ కిర్తన పుస్తకమ్దు ఈహు రాస్తి మనాన్. దేవుణు ఈహు వెహ్పాన్, “నీను వర్గినివలె నీ మాటెజ్ నిజమాతికెజ్ ఇజ లోకుర్ వెహ్పార్. లోకు నీ మున్ను, నేరం మొప్పెజ్ సుడిఁజినివలె వారు గెలిస్తెజ్ అట్వండానార్దో”.

5 మాటు తప్పు కినివలె దేవుణు మా పాపమ్కు సెమిసి వాండ్రు సీతినిజయ్ మన్నికాన్ ఇజ ఒద్ది తోరిసినాన్. అందెజె మాటు తప్పుజ్ కిత్తివందిజ్, మజి సిక్కు సిత్తిజ దేవుణు నాయం కినికాన్ ఆవిన్ ఇజ వెప్పికార్ మనార్. 6 ఆహె ఇండ్రెజ్ ఆవిద్. ఎందానిజ్ ఇహిజ దేవుణు నాయం కినికాన్ ఆవిన్ ఇహిజ, విజెరె లోకాజ్ తీర్పు కిదిజ్ మన్ని అతికారం ఎలాగ మంజినాద్. 7 ఎయెన్బా, “నాను తప్పు వెహ్ప”, ఇజ వెహ్పొన్ను. గాని నాను తప్పు వెహ్ప ఇహిజ దేవుణు నిజమ్నె వెప్పినినాన్ ఇజ తోరిజినాద్. అందెజె లోకుర్ దేవుణుదిజ్ పొడిఁజిసార్. అహిజ దేవుణుదిజ్ పొగడు వానివలె నాను

☆ 2:24 2:24 యెసయ 52:5; యెహీ 36:22. ☆ 3:4 3:4 కిర్తన 51:4.

తప్పు కిత్తిదన్నిజ్ దేవుణు నజీ తీర్పు సీజి సిక్స సీదెజ్ ఆవద్ ఇజ మీరు వెప్పొదెర్ను. 8 అయాలెకెండ్ వెప్పొక్ నిజం ఇహిజ, దేవుణు పొగ్డె; ఆపిన్ ఇజ మాటు పాపం కిజ మండ్రెజ్నా? నానుబా ఈహు వెప్పొన ఇజ సెగెండార్ తప్పు మొప్పినార్. ఈహు వెప్పొవరిజ్ దేవుణు తీర్పు తీరిసి తగితి సిక్స సీనాన్.

దేవుణు ఎద్రు నిజమాతికాన్ ఎయెన్బా సిల్లెన్.

9 అహిజ ఏలు ఇనిక వెప్పొట్? మాటు యూదురు, యూదురు ఆఇవరిజ్ ఇంక పెరికాటా? అవెట్. యూదురిజ్ని యూదురు ఆఇవరిజ్ విజేరిజ్ దేవుణు తీర్పు కిసాన్ ఇజ నాను వెప్టాగదె. ఎందానిజ్ ఇహిజ, పాపం విజేరిజ్ అడిగి ఇడ్డినాద్. 10 దేవుణు మాటుదుబా దిన్ని వందిజ్ రాస్తమనాద్. ఇనిక ఇహిజ, “ఎయెన్బా నీతి మన్నికాన్ అవెన్, నీతిమన్నికాన్ ఒరెన్బా సిల్లెన్”. 11 సరియాతి ఇనిక ఇజ అర్థం కినికాన్ ఒరెన్బా సిల్లెన్. దేవుణుదిజ్ నెస్టెజ్ ఇజ రెబానికాన్బా సిల్లెన్. 12 విజేరి ఉండ్రెలెకెండ్ సెఇవణిజ్ కినికార్ ఆతార దేవుణుబాణిజ్ మహ్తా సాహార్. సరియాతి వణి కినికార్ ఎయెర్బా సిల్లెర్. ఒరెన్బా సిల్లెన్”, 13 “లోకుర్ మాటెజ్ ఎలాగ మన్నె ఇహిజ, పీనుగుదిజ్ మూస్తా వెనుక మర్రి లాగితిజ ఎలాగ కంపు డెయేనాదొ, అయాలెకెండ్నె. మాటెజాణిజ్ మొసం కిజినార్”. సరాసి వినం లోకాజ్ ఎలాగ పాడె; కిసాదొ అయాలెకెండ్నె వారు మాటెజాణిజ్ పాడె; కిసార్”. 14 “వారు ఆఇవరిజ్ నయివ్ కిజినె మంజినార్. ఆఇవరిజ్ దూసిసినార్.” 15 లోకాజ్ సప్టెజ్ వరిజ్ సులునె వానాద్. 16 వారు సొనిబాన్ విజు నానసం కిజినార్, లోకాజ్ గొప్ప కస్టమకు తపిసినార్. 17 ఆఇవరి వెట సమాదనమదాన్ బల్కిదెజ్ ఎనెజ్బా నెన్వెర్.” 18 వరి మన్నుదు దేవుణు ఇహిజ ఇని తియెల్ సిల్లికార్.

19 దేవుణు మాటాదు రాస్తిమన్నికెజ్ విజు దేవుణు ఎయెరిజ్ వన్ని రూలుజ్ సిత్రాండ్రో వరివందిజె ఇజ మాటు నెసినాట్. అందెజె యూదురు గాని యూదురు ఆఇకార్ గాని మా పాపమక వందిజె దేవుణు ఎద్రు ఇనికబా వెహెండ్ వంజినాట్. విజెరి తప్పుకిత్తికార్ ఇజ దేవుణు వెప్పొనాన్.

20 దేవుణు మోసెజ్ సీత్తి రూలుజ్ వజ కిత్తిదన్నివందిజ్ దేవుణు ఎయెరిజ్బా నీతినిజయ్కాన్ ఇజ వెహెం. ఎందానిజ్ ఇహిజ దేవుణు రూలుజ్ నెస్తిమహిజ్బా మాటు ఎస్సానొ తప్పుజ్ కిత్తికాట్ ఇజ నెస్తి మనాట్.

క్రీస్తుమున్ను నమకం ఇడ్డికాండ్రె నీతిమన్నికాన్ ఆనాన్.

21 గాని లోకుర్ దేవుణు ఎద్రు ఎలాగ నీతినిజయ్కార్ అదెజ్ అట్టూర్ ఇజ దేవుణు ఏలు మరి ఉండ్రె సుటు తొర్స్త మనాన్. మోసెజ్ సీత్తి రూలుజ్ లోజెత్తివలెహాన్ అవద్. గాని దిన్నివందిజ్ మోసెజ్ సీత్తి రూలుదు మరి ఒరెన్ దేవుణు ప్రవక్తరు రాస్తి మాటెజ్ లోఇబా తొర్స్త మహాద్. 22 యేసుక్రీస్తు మున్ను నమకం ఇడ్డివరి పాపమకు విజు దేవుణు మాయిప్తాన్. దేవుణు సుడె;తిజ యూదురుని యూదురు ఆఇకార్ ఇజ తెడె; ఇనిక సిల్లెద్. ఎయెర్ నమ్మిజినారొ దేవుణు వరి పాపమకు విజు మాయిప్తాన్. వారు నీతినిజయ్కార్ మన్నికార్. 23 ఎందానిజ్ ఇహిజ, విజేరి పాపం కిత్తార దేవుణు తయార కితిమన్ని గొప్ప జాయ్ పొందిదెజ్ అట్వెండాతార్. 24 గాని క్రీస్తుయేసు మా వందిజ్ సాతిజ్, అయ సావుదాన్ మాటు కిత్తి పాపమకు వందిజ్ వాని సిక్సదాన్ దేవుణు మజి డిబిస్తాన్. ఎలాగ ఇహిజ, తప్పు కిత్తికార్ ఇహిజ్బా, అయ తప్పుజ్ నాను సెమిస్త మన్న ఇజ దయాదర్మమదాన్ ఉండ్రె ఇనాయం లెకెండ్ సెడినె సీజినాన్.

25 లోకురి పాపమక వందిజ్ వాని సిక్స వన్ని మున్ను తపిసి, వన్ని సావుదాన్ లోకురి పాపమకు వరి నమకమదాన్ దేవుణు సెమిసిని వందిజె యేసుక్రీస్తుజ్ పొక్తాన్. ఎందానిజ్ ఈహు కిత్తాన్ ఇహిజ, దేవుణు నీతినిజయ్కార్ మన్నికాన్ ఇజ తొర్స్తెజె. ఎందానిజ్ ఇహిజ యేసు వాని ముందాల లోకుర్ పాపం కిత్తిమహివలె దేవుణు అక్కెజ్ ఒరిసి మహాన్. పాపం కిత్తివలె సిక్స సివతాన్. 26 గాని దేవుణు అయ పాపమకు పోన్వెన్. యేసు అక్కెజ్ విజు వన్నిమున్ను ఒత్తాండ్రె వరివందిజ్ సాతాన్. దేవుణు నీతిమన్నికాన్ ఇజ ఈహు తొర్స్తాన్. యేసు మున్ను నమకం ఇడ్డికార్ నీతినిజయ్కార్ ఇజ ఇడ్డార్.

27 అందెజె ఏలు, మోసె సీత్తి రూలుజ్ లోజెత్తిజ్ నీతిమన్నికాట్ ఆతాట్ ఇజ పొగిడి;దెజ్ అట్వెట్, యేసుక్రీస్తుజ్ నమ్మితిజాన్ మాటు కిత్తి పాపమకు విజు దేవుణు మాయిప్తాన్ ఇజ దేవుణు వహ్నాన్. అయావజనె మాటు నీతి మన్నికాట్ ఆనాట్. 28 రూలుజ్ లోజెత్తిజ్ అవద్, యేసుక్రీస్తుజ్ నమ్మితిజాన్

✧ 3:12 3:12 కీర్తన 14:1-3; 53:1-3. ✧ 3:13 3:13 కీర్తన 5:9. ✧ 3:13 3:13 కీర్తన 140:3. ✧ 3:14 3:14 కీర్తన 10:7. ✧ 3:17 3:17 యెసయ 59:7,8.

పాపముకు విజయమే అజి నీతి మన్నికార్ ఆతార్ ఇజ దేవుణు వెహ్సన్. యాక మాటు నెసినాట్. 29 దేవుణు, వహి యూదురిజ్ నె దేవుణు ఆవన్ గదె, మహి జాతిది వరిజ్ బా దేవుణు గదె. ఒఒ మహి జాతిది వరిజ్ బా దేవుణు నె. 30 ఒరెండ్రె దేవుణు నె మనాన్. వాండ్రు యూదురిజ్ ని యూదురు ఆజ వరిజ్ ని విజెరిజ్ వరి నమకం వందిజ్ పాపముకు విజయమిప్పి, నీతి మన్నికార్ ఆతార్ ఇజ వెహ్సన్. 31 అహిజ క్రీస్తు ముస్సు, నమకం ఇడ్డిజ్ దేవుణు ఎద్రు నీతి మన్నికార్ ఇజ దేవుణు వెహ్సా, రూలుజ విలువ సిల్లెద్ ఇజ ఒడోబినిదెర్ సు. సిల్లె, రూలుజ్ విలువ సిల్లికెజ్ ఆడ. యేసు క్రీస్తు ముస్సు, నమకం ఇడ్డి మహిజ్ అయ రూలుజ్ మరి మరి లోజెదెజె.

4

నమకమ్ దాన్ అబ్రహాం నీతి నిజాయి మన్నికాన్ ఆతాన్

1 అహిజ గొప్ప పేరు మన్ని మా అనిగొగొ అతి అబ్రాహాము నీతి మన్నికాన్ ఇజ దేవుణు వెహ్సా వందిజ్ ఇనిక వెహ్సాజ్? 2 వాండ్రు కిత్తి నెగ్గి పణిజ వందిజ్ దేవుణు వన్నిజ్ నీతి నిజయి కాన్ ఇజ ఇడ్డిజ దన్నివందిజ్ లోకురు వెట పొగిడిఃదెజ్ అట్నాన్ గాని దేవుణు బాన్ పొగిడిః ఆదెజ్ అట్ వీన్. 3 ఎందానిజ్ ఇహిజ దేవుణు మాటారు ఇనిక రాస్త మనాద్ ఇహిజ, “దేవుణు అబ్రాహాము వెట కిత్తి ఒవందం వాండ్రు నమ్మి తాన్. అందెజె వాండ్రు నీతి నిజయి కాన్ ఇజ దేవుణు ఒప్పుకోటాన్”^{*}.

4 ఒరెన్ పణి కిత్తి దన్నిజ్ కూలి దొహ్ క్విజ అయాక ఇనాయం ఆవిద్ గదె. అక్క వన్ని కూలి నె. నీతి నిజయి కాన్ ఆదెజ్ ఇహిజ బా అయాలెకెండ్లె. 5 గాని, తప్పు కిత్తి వన్ని తప్పుజ్ దేవుణు మాయిప్పి నీతి నిజయి మన్నికాన్ ఇజ ఇడ్నాన్. నమ్మిని వన్ని నమకమ్ దాన్, వాండ్రు నీతి నిజయి కాన్ ఇజ దేవుణు ఇడ్నాన్. గాని, వన్ని పణిజాణిజ్ నీతి నిజయి కాన్ ఆవీన్. 6 దిన్ని వందిజ్ దావీదు రాజు బా కీర్తన పుస్తకముదు రాస్త మనాన్. ఇనిక ఇహిజ, నమకం ఇడ్డి వందిజ్ నీతి నిజయి కార్ ఇజ దేవుణు ఇడ్డికార్ గొప్ప సర్ల ఆతికార్. వరి పణి వందిజ్ ఆవిద్, నమకం వందిజె. 7 పాపం కిత్తి దన్నిజ్ దొహ్ క్వి సెమ వందిజ్ వారు సర్ల ఆనికార్. ఎందానిజ్ ఇహిజ, వరి తప్పుజ్ మరి ఎత్తు కిఎ ఇజ దేవుణు తీర్మనం కిత్తాన్. 8 ఏయెర్ది పాపముకాజ్ దేవుణు లెక్క తొవండ్రొ వాండ్రు సర్ల ఆతికాన్.^{*} 9 పాపముకాజ్ దేవుణు సెమిస్తి దన్ని వందిజ్ మన్ని సర్ల సునతి అతి యూదురిజ్ నె ఆవిద్. సునతి కిబె ఆజ యూదురు ఆజ వరిజ్ బా మనాద్. అబ్రహాం దేవుణు దేవుణుదిజ్ నమ్మి తాన్. అందెజె వాండ్రు నీతి నిజయి మన్నికాన్ ఇజ దేవుణు ఒప్పుకోటాన్ ఇజ మాటు నెసినాట్ గదె. 10 ఎన్నివలె దేవుణు అబ్రహాం వందిజ్ యాలెకెండ్ వెహ్సాన్? సునతి కిబె ఆవిండ ముజాల్ నా? సునతి కిబె అతి వెసుకానా? అబ్రహాం నీతి మన్నికాన్ ఇజ ఎన్నివలె దేవుణు వెహ్సాన్ ఇహిజ, సునతి కిబె ఆని ముందాల్ నె అబ్రహాం నీతి మన్నికాన్ ఇజ దేవుణు వెహ్సాన్. 11 వెసుక అబ్రహాం సునతి కిబె ఆతాన్. ఎందానిజ్ ఇహిజ దేవుణు ముస్సు, నమకం ఇడ్డి వందిజ్ వాండ్రు నీతి మన్నికాన్ ఆతాన్ ఇజ గుర్తు వందిజె. సునతి కిబె ఆవిండ మహివలె దేవుణుదిజ్ నమ్మి తివరి పాపం దేవుణు మాయిష్టాన్. నన్నివరిజ్ బుబ్బలెకెండ్ దేవుణు అబ్రాహాముజ్ ఇడ్నాన్. 12 అయావజనె నమకం ఇడ్డి సునతి కిబె అతి వరిజ్ బా అబ్రహాం బుబ్బలెకెండ్ నె. సునతి కిబె ఆవిండ మహివలె నమకం ఇడ్డి బుబ్బాతి అబ్రహాం లెకెండ్ వారు. వారు బా అయా నమకమ్ నె ఇడ్నార్. 13 దేవుణు అబ్రహాం వెట ఉండ్రె ఒట్టు కిత్తాన్. ఇనిక ఇహిజ, అబ్రహాముజ్ నె వన్ని కొడెః కొక్రారిజ్ యా లోకముదిజ్ సీన ఇజ. యా ఒట్టు అబ్రాహాముజ్ ఎలాగ దొహ్ క్వాద్ ఇహిజ దేవుణు సిత్తి విజయ రూలుజ్ వాండ్రు లోజెత్తి వందిజ్ ఆవిద్. దేవుణు ముస్సు, నమకం ఇట్టివెలె నీతి నిజయి కాన్ ఆతాన్ కాక యా ఒట్టు దేవుణు బాణిజ్ దొహ్ క్వాద్. 14 రూలుజ లోజెత్తి వరిజె, దేవుణు సిత్తి ఒట్టు దొహ్ క్వాద్ ఇహిజ, దేవుణు ముస్సు. ఇడ్డి నమకముదిజ్ ఇని విలువ సిల్లెద్. ఆహె అతిజ దేవుణు సిత్తి అయ ఒట్టు బా విలువ సిల్లెండ్ మనాద్. 15 రూలుజ్ మన్నె ఇహిజ లోకు వనకాజ్ లోజెవిండ సిక్త తపిసినార్. ఎంబె రూలుజ్ మహిజ్ బా లోకుర్ వనకాజ్ లోజెవిర్.

16 నమకం ఇడ్డి రూలుజ్ లోజెత్తి యూదురు నె ఆవిద్ అబ్రహాం లెకెండ్ దేవుణు ముస్సు, నమకం ఇడ్డివరిజ్ విజెరిజ్ యా ఒట్టు దొహ్ క్వాద్. దేవుణు ముస్సు, నమకం ఇడ్డివరిజ్ అబ్రహాం ఒరెన్ బుబ్బువజనె. 17 “నాను నిజె నండో జతిజ బుబ్బలెకెండ్ ఏర్పాటు కిత్త మన్న”, ఇజ దేవుణు అబ్రహాం

* 4:3 4:3 ఆది 15:6. * 4:8 4:8 కీర్తన 32:1,2.

వెట కిత్తి ఒట్టు దేవుణు మాటాదు రాస్త మనాద్. సాతివరిజ్ బత్తు సీజినాన్. వన్ని మాటదాన్ సిల్లివనకాజ్ మన్నిలెకెండ కూక్కినాన్, యా దేవుణు. వన్నిజె అబ్రహాం నమ్మిత్తాన్. దేవుణు ఎర్దు, యా ఒట్టువలెహాన్ మజి విజేరిజ్ అబ్రహాం బుబ్బలెకెండ ఆతాన్.

18 దేవుణు అబ్రాహాముజ్ వెప్తి మాటోజ్ జర్దిదెజ్ కస్తమాతికెజ్ గాని అక్కెజ్ జర్దినె ఇజినె నమ్మిజి ఎర్దుసుడోజి మహాన్. అందెజె నండో జాతిజి బుబ్బువజి ఆని ఇజి దేవుణు వెప్తి మాటోజ్ లెకెండె వాండ్రు ఆతాన్. నీ కొడోర్ ఆగసమ్దు మన్ని లెక్క కిదెజ్ అట్ ఇ సస్సా సుక్కెలెకెండె నండోడార్ ఆనార్లె ఇజి దేవుణు వెప్తి మాటలెకెండె జర్దితాద్. 19 అబ్రాహాముజ్ డర్గు డర్గు వంద పంటోజ్ ఆత మహాద్. “నాను నిస్సా డొక్క ఆత. నా ఆల్సి సారాయిబా కొడోర్ ఇడ్డెజ్ అట్ ఏద్”, ఇజి ఒడోబీజి మహాన్. అహోజ్ దేవుణు వెప్తి మాటోజ్ అబ్రహాం ఇని అనుమానం సిల్లెండె నమ్మిత్తాన్. 20 వన్ని నమకం డోన్ ఏతాన్. దేవుణు కిత్తి ఒట్టు వందిజ్ అనుమానం ఆవితాన్. దేవుణు వెప్తిలెకెండె జర్దినాద్లె ఇజి నమ్మిత్తాండ్రె దేవుణుదిజ్ పోగోడితాన్. 21 దేవుణు ఒపందం కిత్తిలెకెండె కిదెజ్ అట్నాన్ ఇజి పూర్తి నమ్మిత్తాన్. 22 అందెజె దేవుణు మాటదు రాస్త మనాద్, “అబ్రహాం దేవుణుదిజ్ నమ్మిత్తాన్. అందెజె దేవుణు వన్నిజ్ నీతినిజయ్ మన్నికాన్ ఇజి ఇడ్డాన్”, ఇజి 23 నీతినిజయ్కాన్ ఇజి ఇడె ఆతాన్”, ఇజి దేవుణు మాటదు రాస్తి మన్నిక అబ్రహాం ఒరెన్ వందిజి ఆవెద్. 24 మా వందిజ్ బా నీతినిజయ్ మన్నుకార్ ఇజి దేవుణు ఇడ్డ మనాన్ ఇజి రాస్త మనాద్. సాతివరిబాణిజ్ యేసుక్రీస్తుజ్ నిక్కి దేవుణు మున్ను నమకం ఇడ్డి మా వందిజ్ బా నీతినిజయ్కార్ ఇజి రాసె ఆతమనాద్. 25 మా నెఇ పణిజి వందిజె యేసుక్రీస్తుజ్ సప్టార్. సాతివరిబాణిజ్ దేవుణు వన్నిజ్ నిక్కిజ్, మా పాపమ్కు విజు సెమిస్తాండ్రె మజి దేవుణు వెట కూడిత్తికార్ ఇజి ఇడ్డాన్.

5

దేవుణు వెట మజి సాంతి సమదనమ్ని సర్ల ఆజినాట్

1 మా వ్రబు ఆతి క్రీస్తు మావందిజ్ సాతాన్ ఇజి మాటు నమ్మిత్తిజ్, మాటు దేవుణు వెట కూడోజి మంజినాట్. అందెజె దేవుణు వెట సాంతి సమదనం వాత మనాద్. 2 యేసుక్రీస్తు మా వందిజ్ సాతిజ్ ఏలు దేవుణు మజి తోరిస్తి దయదర్థం మాటు నెస్త మనాట్. దేవుణు ఎస్సానో గొప్పవాండ్రు ఇజి నెస్తాటె వన్ని గొప్ప జాయ్దు మాటుబా మంజినాట్ల ఇజి ఎర్దుసుడోజి మంజినిలో ఇ సర్ల ఆజినాట్. 3 అక్కాదె ఆవిండ, క్రీస్తుమున్ను నమకం ఇడ్డి వందిజ్ వాని కస్తమ్కలో ఇ సర్లదాన్ మంజినాట్. ఎందానిజ్ ఇహిజ, ఆయ కస్తమ్కు వాతిజ్ అక్కెజ్ ఎలాగ బరిస్తిజ్ ఇజి మాటు నెస్తెజ్ ఆనాద్. 4 కస్తమ్కు వానివలె అక్కెజ్ బరిస్తిజి మాటు నెగ్గి గుణమ్కు మన్నికార్ ఇజి దేవుణు మా వందిజ్ ఒప్ప కొడోజినాన్. నెగ్గి గుణమ్కు మన్నికార్ ఇజి ఒప్పుకోటిజి మాటు ఆనదాన్ ఎర్దుసుడోజి మంజినాట్. 5 దిన్ని వందిజ్ మాటు ఎర్దు సుడోజి మన్నిజ్ అక్క నిజమ్నె జర్దినాద్ ఇజి సుడోజినాట్. ఎందానిజ్ ఇహిజ దేవుణు మజి ప్రేమిసినాన్ ఇజి మా మున్నుదు మాటు నెగెండె నెస్తాట్. మజి నెత్తి మన్ని దేవుణు అత్తుదానె దేవుణు మా మున్ను మన్ని ప్రేమ వందిజ్ నెసినాట్.

6 ఎలాగ ఇహిజ, మాటు ఇనికబా కిదెజ్ అట్ ఏండ మహివలె దేవుణు ఏర్పాటు కిత్తి కాలమ్దు, దేవుణు వందిజ్ బక్కిసిల్లి వరివందిజ్ క్రీస్తు సాతాన్. 7 నీతినిజయ్ మన్ని వన్నివందిజ్ ఒరెన్ సాదెజ్ ఇహిజ కస్తం. నెగ్గికాన్ ఆతివన్నివందిజ్ ఒరెన్ సానాన్సు. 8 గాని దేవుణు మజి ఎస్సానో ప్రేమిసినాన్ ఇజి తోరిస్తాన్. ఎలాగ ఇహిజ మాటు దేవుణు వేట వెత్తేకమ్దాన్ ఆఇసరి నడిసి మహివలెనె క్రీస్తు మా వందిజ్ సాతాన్.

9 అందెజె, క్రీస్తు మా వందిజ్ సాతిజ్ మాటు నీతిమన్నికాట్ ఇజి దేవుణు ఇడ్డిమన్నిక నిజమె. అహిజ, ఎలాకాలం మంజిని సిక్కుదాన్ మాటు క్రీస్తువెట తవ్రె ఆనాట్ ఇజి మన్నిక ఒడ్డె నిజమాతిక. 10 ఎందానిజ్ ఇహిజ, మాటు దేవుణు వెట పగ అస్తి మహివలె దేవుణు మరిసి మా వందిజ్ సాతాండ్రె మజి దేవుణు వెట కూడుస్తాన్. అహిజ ఏలు దేవుణు వెట మాటు కూడితాట్ ఇహిజ, మరి నండో మజి గెల్పిస్తెజ్ క్రీస్తు అట్నాన్ ఇజి మాటు నెసినాట్. వాండ్రు మరజి నిజిత్తిజెనె యా గెలుపు మజి

వాతాద్. 11 అక్కాదె ఆవిద్, మా ప్రబు ఆతి యేసుక్రీస్తు మా వందిజ్ సాతి వందిజ్ని మా వందిజ్ కిత్తి పణి వందిజ్ సర్ద ఆజినాట్. యేసుక్రీస్తు బాణిజ్ మాటు దేవుణువెలె నమదనం మన్నికాట్ ఆతాట్.

ఆదాముని క్రీస్తు

12 ఏలు నాసు ఉండ్రీ వెవ్నూ, ఒరెన్ లోకు, ఇహిజ ఆదాం పాపం కిత్తిజ్ పాపం యా లోకమ్దు డూగితాద్. పాపం కిత్తిజ్ ఆదాం సాతాన్. అందెజె యా లోకమ్దు విజేరె సాజినార్. విజేరె పాపం కిత్తిజ్ విజేరె సాజినార్. 13 దేవుణు మోసెవెట రూలుజ్ సివిండ మహివలె లోకుర్ పాపం కిజి మహార్. గాని వారు కిత్తి తప్పుజ లెక్క సుడెవితాన్. ఎందానిజ్ ఇహిజ రూలుజ్ సిల్లెండ మహద్కాక రూలుజ్ తప్టార్ ఇజి ఇన్ ఏన్. 14 గాని ఆదాం బత్తితి మహి కాలమ్దాన్ మోసె కాలమ్దాక బత్తిజి మహికార్ సాతార్. ఎందానిజ్ ఇహిజ ఆదాం కిత్తి పాపం లెకెండ వారు కివితార్ గాని వారుబా పాపం కిత్తార్. ఆదామ్ని వెనుక వాతి క్రీస్తు ఉండ్రెలెకెండ్తె. ఎలాగ ఇహిజ ఆదాం కిత్తి పణిని క్రీస్తు కిత్తి పణి విజేరిజ్ కూడిత వాతాద్.

15 గాని రివెర్బా ఉండ్రె లెకెండ ఆవిర్. దేవుణు సెడినె సిత్తి ఇనాయం తతాన్. మరి ఒరెన్ విజేరిజ్ సాపు తతాన్. గాని యేసు క్రీస్తు వన్ని దయాదర్మమ్దాన్ తత్తి ఇనాయం ఒద్దె పెరికాదె. దేవుణు విజేరిజ్ సెడినె సిత్తి వన్ని దయాదర్మమ్నె అయ ఇనాయం. 16 ఆదాం కిత్తి పాపమ్దాన్ వతిదన్నిజ్ క్రీస్తు సెడినె సిత్తి ఇనాయమ్దిజ్ లోక మరి ఉండ్రీ తేడ మనాద్. ఇనిక ఇహిజ, ఆదాం ఉండ్రీ పాపం కితిజ్ దేవుణుబాణిజ్ తీర్పు తతాన్. గాని క్రీస్తు దేవుణుబాణిజ్ తత్తి ఇనాయం అయాలెకెండ ఆవిద్. సెడినె దోహక్తి అయ ఇనాయం ఇనిక ఇహిజ దేవుణు లోకురిజ్ నీతినిజయ్యి కార్ ఇజి ఇడ్డికదె. నీతినిజయ్యి కార్ ఇజి దేవుణు లోకురిజ్ ఇడ్డిని అయ ఇనాయం వాతిజ్, లోకుర్ కిత్తి విజి పాపమ్క వందిజ్ “మీ పాపమ్కు విజు నాసు మాయిప్ప”, ఇజి దేవుణు వెహండ్రె వరిజ్ నీతినిజయ్యి కార్ ఇజి ఇడ్డాన్. 17 ఒరెన్ లోకు తప్పు కిత్తిజ్ లోకుర్ విజేరె సాజినారె, సాపు లోకురిజ్ ఏలుబడిః కిజినాద్. గాని మరి ఉండ్రీ ఒద్దె నిజమె, ఇనిక ఇహిజ, యేసు క్రీస్తు ఇని మరి ఒరెన్ కిత్తి పణిదాన్, దేవుణు బాణిజ్ గొప్ప దయాదర్మమ్ని సెడినె దోహక్తి నీతినిజయ్యి ఇనికెజ్ వాతిజ్ అక్కెజ్ మా బత్తుడు ఏలుబడిః కిజినె.

18 ఆహె ఒరెన్ వన్ని తపుదాన్ దేవుణు బాణిజ్ తీర్పు వాతి లెకెండ, మరి ఒరెన్ వన్ని నీతి పణిదాన్ విజేరె తీర్పుదాన్ తప్ప అదెజ్ అట్నూర్. యా నీతి పణి, వరిజ్ ఎలాకాలం బత్తిని బత్తు తతాద్. 19 ఎలాగ ఇహిజ ఒరెన్ లోకు దేవుణుదిజ్ లోజివిండ మహివలె ఎలాగ లోకుర్ విజేరె తప్ప కిత్తికార్ ఆతారో, అయాలెకెండెనె మరి ఒరెన్ లోకు దేవుణుదిజ్ లోజితిజ్ దేవుణు లోకురిజ్ నీతినిజయ్యి మన్నికార్ ఇజి ఇడ్డాన్.

20 దేవుణు రూలుజ్ లోకురిజ్ వాతివెలె తప్పజ్ నండో కిజినావ్ ఇజి లోకర్ నెస్తార్. గాని తప్పజ్ నండో ఆతివెలె దేవుణుది గొప్ప దయాదర్మమ్బా దన్నిజ్ ఇంక నండో పిరిజి వాతాద్.

21 పాపం నండో ఆజి వాతివలె లోకుర్ సాపుదిజ్ తగిజి వాతార్. గాని ఏలు దేవుణు లోకురిజ్ నీతినిజయ్యి మన్నికార్ ఇజి ఇడ్డిజ్ గొప్ప దయాదర్మం లోకుర్ ముస్సు, ఏలుబడిః కిజినాద్. ఎందానిజ్ ఇహిజ మా ప్రబు ఆతి యేసుక్రీస్తు కిత్తి పణిదాన్ ఎలాకాలం బత్తిని బత్తు, వాదెజ్ ఇజి.

6

పాపం వందిజ్ సాతికాట్ గాని క్రీస్తువెట బత్తినికాట్.

1 అహిజ, ఏలు ఇనిక వెవ్నూట్? మాటు పాపం కిత్తివెలె దేవుణు గొప్ప దయాదర్మం తోరిస్తాన్ ఇహిజ ఏలు మరి నండో దయాదర్మం తోరిస్తాజ్ ఇజి మరి నండో పాపమ్కు కిజినె మండ్రెజ్నా? 2 ఆవిద్, మాటు పాపం కిజినె మండ్రెజ్ ఆవిద్. ఎందానిజ్ ఇహిజ, పాపం కిదెజ్ ఆస మాటు డిఃస్తాట్. నన్ని ఆసెజ్ డిఃస్తాజ్ పాపం కిజినె మండ్రెజ్ అట్ ఏట్లె. 3 యేసు క్రీస్తు వెట కూడెదెజ్ ఇజి బాప్తినం పొందినివలె మాటుబా వన్నివెట సాతాట్ ఇజి విజేరిజ్ వెప్పినాట్. ఇక్క మీరు నెస్తిజ్ వలె. 4 అందెజె క్రీస్తు సాతి వెనుక బూమి లోక వన్ని పీనుగు ఎలాగ మూసె ఆతాదో, అయాలెకెండెనె బాప్తినం పొందితివెలె మాటుబా వన్నివెట మూసె ఆతి లెకెండ ఆతాట్. ఎలాగ ఇహిజ, పాపం కిదెజ్ మన్ని ఆసవందిజ్ బత్తిదెజ్ అట్ ఏండ ఆజినాట్. బుబ్బాతి దేవుణుది గొప్ప జాయ్ మన్ని సత్తుదాన్ యేసుప్రబు ఎలాగ సాపుదాన్ మర్జి నీజితాండ్రో అయాలెకెండ మాటుబా ఉండ్రీ కొత్త బత్తుడు మండ్రెజ్

అట్లాబ్. ⁵ మాటు మా పడాయ్ బత్సు డిసిసిజి యేసుక్రీస్తు వెట వన్ని సావుదు కూడితాట్ ఇహిజ యేసుక్రీస్తు సావుదాన్ మర్రి నిజిత్తి లెకెండ్ మాటుబా తవ్విండ ఉండ్రీ కొత్త బత్సుదు వన్నివెట కూడేజి మంజినాట్. ⁶ ఒరెన్ ఎజమాని అడిగి పణికినికాన్ లోజిజి మంజినిలెకెండ్, మాటు పాపం కిదెజ్ మన్ని ఆసదిజ్ లోజిజి మండ్రెజ్ అవిద్. అందెజి యేసుక్రీస్తు సిలువాదు సాతివెలె పాపం కిదెజ్ మన్ని మా ఆసెజబా అయ సిలువాదు సప్తి లెకెండ్నె. యాక మాటు గుర్తు కినాట్. ⁷ సాతిసాహికాన్ పాపం కిదెజ్ మన్ని ఆసెజాణిజ్ డిబె ఆతికాన్గదె.అయాలెకెండ్ మాటుబా డిబె ఆతాట్. ⁸ అహిజ, మాటు క్రీస్తు వెట సాతి లెకెండ్ ఇహిజ, క్రీస్తు వెట బత్సిత్తి లెకెండ్ మాటుబా వన్నివెట బత్సినాట్ ఇజి నమ్మిజనాట్. ⁹ క్రీస్తు సాతిజ్ దేవుణు క్రీస్తుజ్ సాతి వరిబాణిజ్ మర్రి నికాన్. వాండ్రు మరి సావిన్. అందెజి సావు వన్ని ముస్సు అతికారం కిదెజ్ అట్విద్ ఇజి మాటు నెసినాట్. ¹⁰ క్రీస్తు సాతివెలె లోకురి పాపమక వందిజ్ ఉండ్రె సుటునె సాతాన్. గాని మర్రి బత్సిత్తివెలె దేవుణు వందిజ్ బత్సిజనాన్. ¹¹ అయాలెకెండ్ మీరుబా పాపం కిదెజ్ మన్ని ఆసదిజ్ సాతికార్ ఇజి మిజి ఇడ్డు. మరి యేసుక్రీస్తు వెట కూడితి మహిజ్ దేవుణుదిజ్ ఇస్టమాతి బత్సు బత్సిజనిదెర్ ఇజి ఇడ్డు. ¹² అందెజె, పాపం కిదెజ్ మన్ని ఆసెజ్, సాజి సాని మీ ఒడోల్దు ఏలుబడి: కిదెజ్ ఆవిద్. ఎందానిజ్ ఇహిజ, పాపం కిదెజ్ మన్ని ఆసెజ్ వజి కిబిస్తెజె అక్క సుండేజినాద్. ¹³ పాపం మీ ముస్సు ఏలుబడి: కిజి సెఇ పణిజ్ కిదెజ్ వాడుకొని ఆయుదమ్కులెకెండ్ మీ ఒడోల్ది బాగమ్కాజ్ వాడుకొండేమాట్. గాని సావుదాన్ బత్సుదు వాతివరిలెకెండ్ మీ ఒడోల్దిజ్ దేవుణుదిజ్ ఒప్పుజెప్పెజ్. నస్తివలె మీ ఒడోల్లి బాగమ్కు నీతినిజయ్యి మన్ని పణిజ్ కిదెజ్ వాడుకొని ఆయుదమ్కులెకెండ్ ఆనె. ¹⁴ పాపం కిదెజ్ ఇజి ఆస మీ ముస్సు ఏలుబడి: కిదెజ్ ఆవిద్. ఎందానిజ్ ఇహిజ దేవుణు తీర్పుదాన్ తప్తె ఆదిజ్ ఏలు మోసె సీత్తి రూలుజి లోజిదెజ్ అవ్నరం సిల్లెద్. గాని పాపం కివిండ మండ్రెజ్ ఏలు దేవుణు దయాదర్తుం మీ ముస్సు ఏలుబడి: కిజినాద్.

నీతినిజయ్యి మన్ని బత్సు బత్సిదెజ్ ఇజి మన్ని ఆసదిజ్ మీరు వెటిపణి కినివరిలెకెండ్ లోజిజి మంజినిదెర్

¹⁵ ఏలు మాటు దేవుణు మోసెజ్ సీత్తి రూలుజి అడిగి మంజినిజ్, పాపం కిజి మండ్రెజా? ఆవిద్, ఎసెజ్బా ఆవిద్. ¹⁶ ఇనిక ఇహిజ యాక నిజం ఇజి మీరు నెసినెదెర్. ఎయెన్బా వెటిపణి కినివన్ని లెకెండ్ ఒరెన్ ఎజమానిజ్ లోజిజి మండ్రెజ్ సూణివలె, అయ ఎజమానిజ్ వెటిపణి కినికాన్ ఆజినాన్గదె. పాపమదిజ్ లోజిత్తిజి సావు తపిసినెదెర్. దేవుణుదిజ్ లోజిదెజ్ ఒప్పుకోటిజ దేవుణు మిజి నీతినిజయ్యికార్ ఇజి ఇడ్డాన్. ¹⁷ ముందాల్ మీరు ఇస్టం ఆతి వజి పాపం కిజి, పాపం కిదెజ్ మన్ని ఆస ఇని ఎజమానిజ్ వెటిపణి కినికార్ లెకెండ్ మహిదెర్. గాని వెనుక మిజి దేవుణు వందిజ్ నెస్సిస్తె దన్నివందిజ్ మీరు పూర్తి ముస్సుదాన్ నెస్తిదన్నిజ్ లోజిత్తి మన్నిదెర్. దిన్నివందిజ్ నాను దేవుణుదిజ్ వందనమ్కు వెహ్సిన. ¹⁸ పాపం కిదెజ్ మన్ని ఆసెజాణిజ్ దేవుణు మిజి డిబిన్సి దన్నిజ్ నాను దేవుణుదిజ్ వందనమ్కు వెహ్సిన. దేవుణు ఎర్దు నీతినిజయ్యి మన్ని బత్సు బత్సిదెజ్ ఇజి మన్ని ఆసదిజ్ మీరు వెటిపణి కినివరిలెకెండ్ లోజిజి మన్ని దన్నిజ్బా నాను దేవుణుదిజ్ వందనమ్కు వెహ్సిన.

¹⁹ దేవుణు వందిజ్ నిజమాతికెజ్ అర్థం కిబిస్తెజ్ ఇజి నాను అర్థం కిబిసినె మాటెజ్ వెహ్సిన. ఏలుదాక మీరు వెటిపణి కినివరి లెకెండ్ మీ ఒడోల్ది బాగమ్కు సెఇపణిజ్ కిదెజ్ మరి ఒద్దె సెఇకెజ్ కిజి, పాపం కిదెజ్ మన్ని ఆసెజ్ లోజిత్తి మహిదెర్. ఏలు దేవుణుదిజ్ కేట ఆతివరిలెకెండ్ నీతినిజయ్యి పణిజ్ కిజి దేవుణుదిజ్ వెటిపణి కినికార్ లెకెండ్ మీ ఒడోల్దిజ్ నడిసిన్సు. ²⁰ మిజి ఇస్టం ఆతివజి బత్సిజి పాపం కిదెజ్ మన్ని ఆసెజ్ లోజిజి మహివలె మీరు నీతినిజయ్యిదాన్ బత్సిదెజ్ ఇజి ఎయెర్బా మిజి డటం వెహ్వితార్. ²¹ గాని ఏలు మిజి సిగు తపిసినె నన్ని బత్సు మిజి ఇని లాబం తెవితార్. అయ బత్సుదాన్ దేవుణుబాణిజ్ దూరం మండ్రెజ్నె ఆతార్. నన్ని బత్సు దేవుణు ఇనిక తనాద్ ఇహిజ సావునె తనాద్. ²² గాని ఏలు పాపం కిదెజ్ మన్ని ఆస మీ ముస్సు ఏలుబడి: కివిండ మీరు దన్ని ముస్సు గెలిస్తెదెర్. దేవుణుదిజ్ వెటిపణి కినికార్ లెకెండ్ ఆతిదెర్. నన్ని బత్సుదాన్ వాతి ఉండ్రీ పండులెకెండ్ మీరు దేవుణుదిజ్ కేట ఆతి లోకుర్ ఆతిదెర్. నస్తివలె ఎలకాలం బత్సిని బత్సు

దోహాక్కాద్. 23 పాపమందిళ్ లోజీజి మహివరిళ్ దోహాక్కి కూలి ఎలాకాలం మన్ని సావు. గాని మా ప్రబు అతి క్రీస్తుళ్ నమ్మితివరిజ ఎలాకాలం బత్కిని బత్కు దేవుణు నెడినె సీనాన్.

7

అలు మాసిర్ నడిమి మన్ని రూలుళ్

1 యేసుప్రబుళ్ నమ్మితి మా తంబెరిజాండె, రూలుజ వందిళ్ నెనినివరి వెట నాను యాక వెహ్సిన. ఇనిక ఇహిజ ఒరెన్ లోకు బత్కిజి మహివలె ఉండెనె రూలుజ లోజీజి మండ్రెళ్గదె. 2 ఎలాగ ఇహిజ, పెండ్లి అతివందిళ్ మన్ని రూలుజ నుడెతిజ, ఉండ్రీ అయ్లి కొడోః దన్ని మాసివెట మంజినాద్గదె. గాని మాసి సాతసాహాన్ ఇహిజ అది వన్నిళ్ పెండ్లి అతిలెకెండ్ మండ్రెళ్ అవ్సరం సిల్లెద్గదె. అది మాసివెట మండ్రెళ్ ఇజి మన్ని రూలుజబాణిళ్ డిబె ఆతాద్. 3 రూలుజ నుడెతిజ, మాసి బత్కిజి మహివలె మరి ఒరెన్ వెట అది సాహిజ, అది రంకు బూలానికాద్ ఇనార్. గాని మాసి సాతిజ పెండ్లి అతి మన్ని రూలుదిళ్ లోజీజి మండ్రెళ్ అవ్సరం సిల్లెద్. వెనుక మరి ఒరెన్ వన్నిళ్ పెండ్లి అతిజ అది రంకు బూలానికాద్ ఇజి ఇన్వర్.

4 అయాలెకెండ్నె మా తంబెరిజాండె, యేసుప్రబు వెట మీరుబా సాతిలెకెండ్ అతిదెర్. అందెజె దేవుణు మోసెళ్ సిత్తి రూలుళ్ లోజీనిబాణిళ్ మీరు డిబె అతిదెర్. మాసి సాతికాద్ మరి ఒరెన్ వన్నిళ్ పెండ్లి అతిలెకెండ్ ఏలు మీరు, సాతివరిబాణిళ్ దేవుణు నిక్కిక్రిస్తువెట కూడితిదెర్. ఎందానిళ్ ఇహిజ, మా బత్కుడాన్ దేవుణువందిళ్ నెగ్గి పట్టు. వండెదెళ్ ఇజి. 5 ఒడోలెద్ది నెజ ఆసెళ్ వజ కిదెళ్ ఆస ఆని మన్ను మజి అడిజిమహివలె పాపం కిబిస్తెళ్ తగితి ఆసెళ్ మా ఒడోలెద్ది బాగమ్కాళ్ ఏలుబడిః కిజి మహా. దేవుణు మోసెళ్ సిత్తి రూలుళ్ మాటు నెస్తివలె యా ఆసెళ్ పిరితిళ్ పాపం కిజి మాటు సావు తపిసిని పట్టు. వండిస్తాట్. 6 గాని ఏలు యేసుప్రబు వెట సాతిలెకెండ్ మహిజ రూలుజ వెటివణి కినిదన్నిదటాన్ డిబె ఆతాట్. రాస్తిమహి అయ రూలుజ ఏలు మాటు వెటివణి కినికార్ ఆవిట్. ఏలు మాటు దేవుణు అత్తుదిళ్ వెటివణి కినివరివజ ఉండ్రీ కొత్త బత్కిజినాట్.

దేవుణు మోసెళ్ సిత్తి రూలుళ్

7 ఏలు మాటు ఇనిక వెహ్సాట్? దేవుణు మోసెళ్ సిత్తి రూలుళ్ పాపం కిదెళ్ మన్ని ఆసెళ్ పుటిసినాద్. అందెజె అయ రూలుళ్ నెకెకెళ్ ఇజి వెహ్సాట్? అట్విట్, ఆహు వెహ్సాళ్ ఆవిద్. గాని పాపం కిజిన ఇజి నాను ఎలాగ నెస్ ఇహిజ, దేవుణు మోసెళ్ సిత్తి రూలుజాణిళ్నె నెస్త్మన్ను. ఎలాగ ఇహిజ, ఆఇవరిళ్ మన్ని వనకాళ్ వందిళ్ ఆస ఆమాట్ ఇజి మోసెళ్ సిత్తి రూలుదు వెహ్విండ మంజనిక ఇహిజ, అక్క దేవుణు ఏర్తు పాపమ్కు ఇజి నెన్ఎతా మరి. 8 ఆఇ వరిళ్ మన్ని వనకాళ్ వందిళ్ ఆస ఆమాట్ ఇజి రూలు మహిళ్నె, నన్ని ఆసెళ్ పుట్టిళ్ నాను వనకవందిళ్ ఆస ఆత. పాపం కిమాట్ ఇజి రూలుళ్ సిల్లెండ మంజనిక ఇహిజ పాపం కిదెళ్ మన్ని ఆస మా మున్ను ఏలుబడిః కివిద్. 9 రూలుళ్ నెన్విండ మహివలె నాను ఇని బాద సిల్లెండ బత్కిజి మహా గాని రూలుళ్ నెస్తి వెనుక నాను తప్త ఇజి నెస్త్. దేవుణుబాణిళ్ దూరం అత ఇజి నెస్త్. 10 రూలుజ లోజీతిజ ఎలాకాలం బత్కిని బత్కు వానాద్ ఇజి నాను ఒడోబిత్త గాని అయ రూలుజాణిళ్ నా సావుదిళ్ తీర్పు వాత ఇజి నెస్త్ మన్ను.

11 ఎలాకాలం బత్కిని బత్కు వానాద్ ఇజి నాను మొసెం కిబె అత. అయ రూలుళ్ నాను తప్తానె సావుదిళ్ తీర్పు తత్త. 12 అందెజె దేవుణు మోసెళ్ సిత్తి రూలుళ్ దేవుణుబాణిళ్ వాతికెళ్. లోకుర్ ఎలాగ నడిదెజె ఇజి మన్ని అండ్రెళ్ నీతినిజయ్తికెళ్, నెగ్గికెళ్. 13 అహిజ, దేవుణు మోసెళ్ సిత్తి రూలుళ్ నెగ్గికెళ్ గాని నజి సావుదిళ్ తీర్పు తత్త ఇజి వెహ్సాజా? ఆవిద్, ఆహు ఆవిద్. రూలుళ్ నెగ్గికెళ్నె గాని పాపం కిదెళ్ నజి మన్ని ఆస యా రూలుజాణిళ్ ఒద్దె పెరిక ఆజి తోర్ ఆతాదె నాను దేవుణుబాణిళ్ దూరం అత. రూలుళ్ ఎందానిళ్ సిత్తాన్ ఇహిజ పాపం కిదెజె మన్ని మా మన్ను తోర్సిజె. రూలుజ వజ బత్కిదెళ్ అట్విండ, మాటు పాపం కినికాట్ ఇజి తోర్సిజె ఇక్కెళ్ పణిదిళ్ వాతె. ఆహె మాటు ఎస్సానో పాపం కినికాట్ ఇజి నెస్త్ యా రూలుళ్ పణిదిళ్ వాతె.

14 దేవుణు మోసెళ్ సిత్తి రూలుళ్ దేవుణు అత్తుడాన్ వాతికెళ్ ఇజి మాటు విజేటె నెసినాట్. గాని నాను ఇహిజ నావందిజె ఎత్తు కిజిని మన్నుడాన్ మన్ను. పాపం కిదెళ్ మన్ని ఆసదిళ్ ఒరెన్ వెటివణి కినివన్నిలెకెండ్ లోజీజి మంజిన. 15 ఎలాగ ఇహిజ, నాను కినికెళ్ ఎందానిళ్ ఆహె కిజిన ఇజి నాను

అర్థం కివీ. కిని ఇజి నండో నుట్టు ఒడోబినికెజ్ కివిండ ఆజిన. కిదెజ్ ఇస్టం సిల్లికెజ్ నండో నుట్టు కిజిన. ¹⁶ కిదెజ్ ఇస్టం సిల్లి సెకెజ్ నాను కినివెలె ఉండ్రీ నెసిని. ఇనిక ఇహిజ దేవుణు రూలుజ్ నెగ్గెకెజ్ ఇజి నెసిని. ¹⁷ అందెజె, కిదెజ్ ఇస్టం సిల్లి సెకెజ్ నాను కినివెలె, అక్క నాను ఆవి, నా లోఇ మన్ని పాపమనె అక్కెజ్ కిబిసిని. ¹⁸ ఒడోలది సెఇ ఆసెజ్ వందిజ్ ఎత్తు కిని నా మన్నులోఇ నెగ్గెకెజ్ ఇనికెజ్ సిల్లు ఇజి నాను నెసిని. ఎలాగ ఇహిజ, నెగ్గెకెజ్ కిదెజ్ ఇస్టం మనాద్ గాని కిదెజ్ అట్వి. ¹⁹ కిని ఇజి ఒడోబిత్తి నెగ్గె పణిజ్ నాను కివి. కిదెజ్ ఆవిద్ ఇజి ఒడోబిత్తి సెఇ పణిజ్ నె కిజిన. కిత్తిజ ²⁰ కిదెజ్ ఆవిద్ ఇజి ఒడోబిత్తి సెఇ పణిజ్ కిత్తిజ అక్క కినిక నాను ఆవి. నా లోఇ మన్ని పాపమనె అక్కెజ్ కిబిసిని. ²¹ అహిజ, ఇనిక జర్గిజనాద్ ఇహిజ నాను ఇనికాదో ఉండ్రీ నెగ్గెకె కిదెజ్ ఇజి నుడోతిజ సెఇకదె కిజిన. ²² ఎందానిజ్ ఇహిజ దేవుణు రూలుజ్ వందిజ్ నాలోఇ గొప్పు సర్ద ఆజిన. ²³ గాని మరి ఉండ్రీ సత్తు నా లోఇ ఏలుబడి: కినిక నాను నుడోజిన. నాను కిని ఇజి నుడోజిని దన్నిజ్ అయ సత్తు నావెట కార్టాడజనాద్. పాపం కిదెజ్ నా ఒడోల్లి బాగమక లోఇ మన్ని ఆసెజి అడిగి నజీ ఇడ్డెజ్ అయ సత్తు నుడోజి మంజినాద్. అందెజె గెల్లిస్తెజ్ అట్విండోజిన. ²⁴ ఒఒ, ఒఒ దిన్నివందిజ్ మన్నుదు గొప్పు కస్టమాతి మణిసి నాను. సాపుదిజ్ తీర్పు వాతి యా ఒడోలదాన్ నజీ డి:బిస్సికాన్ ఎయెనబా మంజనిక ఇహిజ బాగ మహద్మరి. ²⁵ మా ప్రబు ఆతి యేసు క్రీస్తు వెటనె మజీ అయ విడుదల వానాద్. దిన్ని వందిజ్ నాను దేవుణుదిజ్ వందనమ్కు వెప్పిన. అహిజ దేవుణు సిత్తి రూలుజ్ లోజిదెజ్ నుడోజిన. గాని ఒడోలది సెఇ ఆసెజ్ కిదెజ్ ఆస ఆని నా మన్ను నజీ అడిజి దన్ని అడిగి నజీ ఇడ్డినాద్. అందెజె నాను ఏలుబా పాపమదిజ్ వెటిపణి కినికాన్ లెకెండె.

8

దేవుణు ఆత్మ నడిపిసిని బత్తు.

¹ అందెజె ఏలు యేసుక్రీస్తు మున్ను నమకం ఇడ్డి దేవుణు ఎద్రు నీతినిజయ్యికార్ ఆతివరిజ్ సిక్కు సిల్లెద్. ² ఎందానిజ్ ఇహిజ, యేసుక్రీస్తుదాన్ వాతి కొత్త బత్తు బత్తిదెజ్ దేవుణు వన్ని ఆత్మ మజీ సిత్త మనాన్. అయ ఆత్మ సత్తుదాన్ పాపం కిదెజ్ మన్ని ఆసదాన్ మాటు డి:బె ఆత మనాట్. ఆహె సాపుని సిక్కు తపిసిని పాపం కిదెజ్ మన్ని ఆసెజాణిజ్ నాను డి:బె ఆత మన్ను. ³ మాటు ఒడోలది సెఇ అసెజాణిజ్ మహిజ్ పాపమదాన్ గెల్లిస్తెజ్ దేవుణు సిత్తి రూలుజ్ అట్విండో మహద్. ఎందానిజ్ ఇహిజ, ఒడోలది సెఇ ఆసెజ్ అడ్డు కిత్తాద్. గాని దేవుణు మజీ డి:బిస్తాన్. ఎలాగ ఇహిజ, మా పాపమకాజ్ వందిజ్ వన్ని సొంత మరిసిజ్ యా లోకమదు పొక్తాండ్రె, ఒడోలది సెఇ ఆసెజ్ మా మున్ను ఏలుబడి: కినిదన్నిదటాన్ మజీ డి:బిస్తాన్. వన్ని మరిసి మా లెకెండో ఒడోలదాన్ పుట్టాండ్రె మా పాపమకాజ్ వందిజ్ సాతాన్. ⁴ అందెజె ఏలు దేవుణు సత్తుదాన్ దేవుణు రూలుజ్ లోజిదెజ్ అట్టూట్. ఒడోలది సెఇ ఆసెజ్ లోజిదెజ్ అక్కర్ సిల్లెద్. ఏలు దేవుణు ఆత్మదిజ్ ఇస్టం ఆతి లెకెండో బత్తిదెజ్ అట్టూట్.

⁵ ఒడోలది సెఇ ఆసెజ్ లోజిజి బత్తినికార్ దన్ని వందిజె ఎత్తు కిజి మంజినార్. గాని దేవుణు ఆత్మదిజ్ లోజిజి నడి:నికార్ దేవుణు ఆత్మదిజ్ తగిత్తికెజ్ ఒడోబినార్. ⁶ పాపం కిదెజ్ ఒడోల్లు మన్ని సెఇ ఆసెజి ఏలుబడి: కిని మన్ను మన్నికార్ దేవుణుబాణిజ్ దూరం ఆనారి సానార్. గాని దేవుణు ఆత్మదిజ్ ఇస్టం ఆతిలెకెండో బత్తినికార్ దేవుణువెట బత్తినార్ వరిలోఇ సొంతి సమదనం మంజినాద్. ⁷ ఒడోలది సెఇ ఆసెజ్ ఏలుబడి: కిని మన్ను మన్నికార్ దేవుణువెట కుత్త మన్నికార్. వారు దేవుణు రూలుజ్ లోజికార్. లోజిదెజ్ అట్విర్. ⁸ అందెజె ఒడోలది సెఇ ఆసెజ్ ఏలుబడి: కిని మన్ను మన్నికార్ దేవుణుదిజ్ ఇస్టం ఆతివజ నడి:దెజ్ అట్విర్.

⁹ దేవుణు ఆత్మ మీ లోఇ మహిజ అయ ఆత్మదిజ్ లోజిజి మండ్రెజ్ అట్టిదెర్. ఒడోలది సెఇ ఆసెజ్ వందిజ్ లోజిజి మండ్రెజ్ ఎత్తు కిని మన్నుదిజ్ లోజిజి మండ్రెజ్ అక్కర్ సిల్లెద్. క్రీస్తుబాణిజ్ వాజిని ఆత్మ సిల్లికాన్, క్రీస్తుజ్ నెందితికాన్ ఆవిన్. ¹⁰ గాని మీ లోఇ క్రీస్తుబాణిజ్ వాజిని ఆత్మ మహిజ మీ ఒడోల్ పాపమదాన్ సానాద్ గాని మీ ఆత్మ బత్తినాద్. ఎందానిజ్ ఇహిజ దేవుణు మీ పాపమకు విజు మాయిస్తాండ్రె నీతి మన్నికార్ ఇజి ఇడ్డ మనాన్. ¹¹ సాతివరిబాణిజ్ యేసుజ్ మరి బత్తిస్తి

దేవుణు ఆత్మ మీలోని బియ్యమును, సాతివరిబాణిజ్ క్రీస్తుజ్ మరి బియ్యిన్ దేవుణు సాజిసాని మీ బియ్యిల్ దిజ్ బా బియ్యిన్. మీలోని మన్ని దేవుణు ఆత్మదాన్ యాక కిన్.

12 అందెజ్ తంబెరిజాండె, మాటు ఉండ్రె దన్నిజ్ లోజిజి మండ్రెజ్ బాజత మన్నికాట్ గాని అక్క బియ్యిల్ ది సెజ అసెజ్ లోజినిక అవద్. 13 ఎందానిజ్ ఇహిజ, మీ బియ్యిల్ ది సెజ అసెజాణిజ్ ఏలుబడి: కిబె ఆని మన్ను వెహ్తాలెకెండె నడిఃతిజ మీరు సాన సానార్. గాని దేవుణు ఆత్మదాన్ మీ మన్నుదు మన్ని సెజ అసెజ లాగ్టిపొక్తిజ ఎలాకాలం బియ్యినిదెర్. 14 దేవుణు ఆత్మ నడిఃపిసిని వజ నడిఃనికార్ దేవుణు కొణెః. 15 ఎందానిజ్ ఇహిజ, దేవుణు మజి సెత్తి అత్మ మజి తియెల్ తపిసి వెటి పణిమణిసిర్ లెకెండె ముందాల్ మహివజ సిక్చ వానాద్ ఇజ తియెలాజి మండ్రెజ్ ఇడవన్. గాని మజి దేవుణు కొణెః ఇజ ఇడ్డ మనాన్. అందెజ్ మాటు ఏలు దేవుణుదిజ్ అబ్బు ఇజ కూక్తెజ్ అనాద్. 16 మాటు దేవుణు కొణెఃఱె ఇజ దేవుణు ఆత్మ మా ఆత్మవెట కూడిఃతాండ్రె నిజం వెహ్సానాన్ ఇజ మాటు నెసినాట్. 17 మాటు దేవుణు కొణెఃఱె కాక దేవుణు వన్ని కొణెఃఱెజ్ ఇడ్డిమన్ని అస్తిదిజ్ అక్క మజి వానాద్. దేవుణు క్రీస్తుజ్ ఇడ్డిమన్ని అక్కజ్ బా క్రీస్తువెట మజి దోహ్కె. ఎలాగ ఇహిజ మాటు క్రీస్తువెట వన్ని గొప్ప గవ్ఱం దోహ్కెజ్ ఇహిజ వన్నివెట కస్టమకుబా బరిన్తెజ్ వలె.

వాని కాలమ్దు తోర్పి సోకు

18 యా కాలమ్దు మజి వాని కస్టమకు సుడఃతిజ అక్కెజ్ ఏవటిదిక్కెజ్ అఱ ఇజ నాను ఒడఃబిజన. గాని వాని కాలమ్దు దేవుణు మజి తోరిసిని సోకు దిన్నిజ్ ఇంక ఎసాని గొప్ప పెరిక. 19 దేవుణు కొణెఃఱె ఎయెర్ ఇజ దేవుణు తోరిసిని కాలం వందిజ్ దేవుణు తయార్ కిత్తికెజ్ విజ అసదాన్ ఎద్దుసుడఃజి మంజి. 20 ఎందానిజ్ ఇహిజ దేవుణు తయార్ కిత్తికెజ్ విజ పణిదిజ్ రెవండె సిక్చ సీజి ఇడ్డాన్. ఎలాగ ఇహిజ అక్కెజ్ కిత్తికె అవద్. ఉండ్రె దన్ని వందిజ్ వారు ఎద్దుసుడఃజి మండ్రెజ్ ఇజ దేవుణు అక్క జర్పిస్తాన్. 21 ఇనిక ఎద్దుసుడఃజి మంజి ఇహిజ, దేవుణు తయార్ కిత్తికెజ్ విజ ఏలు పాడాఃజి సాని దన్నిజ్ అడిగి అతె మన్నె గాని దన్నిబాణిజ్ దేవుణు డిఃబిన్ని దన్నిజ్ ఎద్దుసుడఃజి మంజి. వన్ని కొణెఃఱెజ్ తగితి లెకెండె గొప్ప జాయ్ కల్లితి మన్ని విడుఃదల సీనాన్ ఇజ ఎద్దుసుడఃజి.

22 ఏలుదాక, ఏరుకాబాని ఆయ్ లిక్తిః నొప్పిదాన్ అడఃబానిలెకెండె, దేవుణు తయార్ కిత్తికెజ్ విజ ఉండ్రెలెకెండె మొరొ ఆజి మంజి. 23 దేవుణు తయార్ కిత్తికెజ్ విజ అఱ, దేవుణు ఆత్మ దోహ్కె మాటుబా అడఃబాజి మంజినాట్. మా లోని మన్ని దేవుణు ఆత్మ ఇహిజ తొలిత దోహ్కె ఉండ్రె ఇనాయం లెకెండె. వెనుక వాని పూర్తి ఇనాయమ్దిజ్, ఇహిజ దేవుణు వన్ని కొణెఃఱెజ్ ఇడ్డిమన్ని గొప్ప అక్కవందిజ్ మాటు ఎద్దుసుడఃజి మంజినాట్. నస్తివలె మా ఒడఃఱె కస్టమదాన్ డిఃబె అనాద్. 24 దేవుణు మజి రక్తిన్తిబాణిజ్ అని మాటు మజి వాని జాయ్ కల్లితిమన్ని విడుఃదలవందిజ్ ఎద్దు సుడఃజి మంజినాట్. ఎద్దుసుడఃజి మంజినిక సుడఃతాన్ ఇహిజ ఒరెన్ దన్నివందిజ్ ఎద్దుసుడఃజి మండ్రెజ్ అక్కర్ సిల్లెద్ గదె. ఎందానిజ్ ఇహిజ సుడఃతి వెనుక దన్నివందిజ్ మరి ఎద్దుసుడఃజి మన్ ఏన్ గదె. 25 గాని మాటు సుడఃఱె దన్నివందిజ్ ఎద్దుసుడఃజి మహిజ్, దన్నివందిజ్ ఓరిసి మంజినాట్.

26 అయావజనె మా లోని మన్ని ఆత్మ వందితిమన్నివలె దేవుణు ఆత్మ మజి సత్తు సీజినాన్. ఎలాగ పార్లనం కిదిజ్ ఇజ నెన్ ఏండ్ మాటజాణిజ్ వెహ్తాజ్ అట్ ఇనన్ని గువె అనివలె దేవుణు ఆత్మనె మా వందిజ్ పార్లనం కిజినాన్. 27 మా మన్నుదు ఇనిక ఇజ దేవుణు సూణాండ్రె, దేవుణు ఆత్మ వెహ్కె అర్లం కిజినాన్. అక్క ఇనిక ఇహిజ దేవుణు ఆత్మ దేవుణు వెట ఎలాగ పార్లనం కిదిజ్ ఇజ దేవుణు అస అజినాండ్రె అయావజ దేవుణు ఆత్మ వరివందిజ్ పార్లనం కిజినాన్.

విజువనకాజ్ మున్ను గొప్పజ గెలిస్తాట్

28 దేవుణుదిజ్ ప్రేమిసినివరిజ్ వాండ్రు ఏర్ పాటు కిత్తిదన్నిజ్ ఎర్లిన్తివరిజ్, విజ నెగెండె జర్పిసినాన్ ఇజ మాటు నెసినాట్. 29 దేవుణు ముందాల్ నె వన్నిజ్ నమ్మిని వరిజ్ నెస్తాండ్రె వరిజ్ ఎర్లిన్తాన్. వన్ని మరిసిలెకెండె అనార్ ఇజ దేవుణు వరిజ్ కేట ఇడ్డాన్. ఆహె కిత్తిజ్ క్రీస్తు దేవుణుదిజ్ పెరిమరిసి లెకెండె అనాన్. దేవుణు కొణెఃఱెతి మాటు యెసుజ్ తంబెరుజు లెకెండె అనాట్. 30 ఎయెర్ దేవుణుదిజ్ నమ్మినార్ ఇజ దేవుణు ముందాల్ నె నెస్తాన్. వరిజ్ దేవుణు కూక్తాన్. దేవుణు కూక్తిజ్ వన్నిడర్లు

సాహివరిజ్ వరి పాపమకు విజు సెమిస్తాండ్రె దేవుణు వెట కూడిఃత్తికార్ ఇజి ఇడ్తాన్. కూడుఃప్తి వరిజ్ వన్ని గొప్ప జాయ్ సిత్తాన్.

దేవుణు ప్రేమ

31 ఏలు దన్నివందిజ్ మాటు ఇనిక వెహ్సీట్. దేవుణు మా దరిజ్ మహిజు మా ఎద్రు ఎయెర్బా నిల్వర్ ఇజినె వెహ్సాజ్. 32 దేవుణు వన్ని సొంత మరిసిజ్ సివండ అవితాన్. గాని గొప్ప కష్టమాతి సావుదిజ్ ఒపజెప్తాన్. క్రీస్తుజ్ మజి సీత్తి దేవుణు, మాటు వన్ని వందిజ్ బత్తిదెజ్ మజి కావాలిస్తికెజ్ విజు సివండ్రా? నిజం సినాన్. 33 దేవుణు ఎద్రిన్తివరి మున్సు తప్పుజ్ మొప్పి వరి మున్సు. గెలిస్తెజ్ ఎయెర్బా అట్వర్. ఎందానిజ్ ఇహిజు, దేవుణునె మా పాపమకు సెమిసి మజి వన్ని వెట కూడుఃప్త మనాన్. 34 మజి సిక్స సీదెజ్ ఇజి ఎయెన్బా తీర్పు తీరిస్తెజ్ ఆట్వన్. మజి సిక్స సీదెజ్ ఇజి యేసు తీర్పు సీనాండ్రా? సిల్లెన్. ఎందానిజ్ ఇహిజు, మా వందిజ్ సాతి యేసుజ్ దేవుణు వన్ని ఉణెర్ వడఃకాదు బసయి కితాండ్రె గొప్ప గవరం సిత్తాన్. ఏలు క్రీస్తునె మా వందిజ్ దేవుణుబాన్ బతిమాల్లినాన్ 35 క్రీస్తుజ్ మా మున్సు మన్ని ప్రేమదిజ్ అడ్డు కిదెజ్ ఇనిదన్నిజ్బా అట్వన్. స్రమెజ్ వాతిజ్బా గాని, కష్టమకు వాతిజ్బా గాని, మాలెజ్ వాతిజ్బా గాని, కరు వాతిజ్బా గాని, పొర్పాదెజ్ సాక్కెజ్ సీలితిజ్బా గాని, ఇని ప్రమాదమకు వాతిజ్బా గాని, మజి సప్తిజ్బా గాని క్రీస్తు ప్రేమ ఎసెజ్బా డీన్వండ మంజినాన్.

36 యాకెజ్ విజు దావీదు రాజు రాస్తి లెకెండ మన్నె. “మాపు మీ లోకుర్ ఆతావ్ కాక ఆఇకార్ ఎసెజ్బా మజి సప్తిజ్ ఇజి సుడఃజినార్. గొరెజ్ కత్తికార్ వనకాజ్ కొందెజ్ సుడఃనిలెకెండ మజి సప్తిజ్ సుడఃజినార్*”. 37 యాకెజ్ విజు జర్రితిజ్బా మాటు క్రీస్తు ప్రేమదాన్ విజు వనకాజ్ మున్సు. గొప్పజు గెలిసినాట్. 38-39 యాక నాను గటిజు నమ్మిజిన. ఇనిక ఇహిజు, సావు అతిజ్బా గాని, బత్తు అతిజ్బా గాని, దేవుణు దూతార్ అతిజ్బా గాని, దెయమక సత్తుజ్ అతిజ్బా గాని, ఏలు జర్రినికెజ్ అతిజ్బా గాని, వాని కాలమదు జర్రినికెజ్ అతిజ్బా గాని, ఏలుబడిః కినికార్ అతిజ్బా గాని, పెరి ఎత్తుదు మన్నికెజ్ అతిజ్బా గాని, పెరి జోరెదు మన్నికెజ్ అతిజ్బా గాని, మరి ఇనికబా గాని దేవుణుదిజ్ మా మున్సు. మన్ని ప్రేమదిజ్ అడ్డు కిదెజ్ వనకాజ్ అట్ఉ మా ప్రబు ఆతి యేసుక్రీస్తు మా వందిజ్ కిత్తి గొప్ప పెరి వణిజాణిజ్ దేవుణు వన్ని ప్రేమ తోరిస్తాన్.

9

యూదురు వందిజ్ వవులు విసారిసినాన్

1-2 ఏలు నాను ఉండ్రె వెహ్సా, అక్క నిజమనె. అబద్దం అవద్. నాను వెహ్సాక నిజమె ఇజి క్రీస్తు నెసినాన్. నాను వెహ్సాక అబద్దం అవద్. నా సొంత జాతి ఆతి యూదురు వందిజ్ నా మన్నుదు గొప్ప బాద ఆజిన. డీన్వండ దుకం ఆజిన. నాను వెహ్సాక నిజమనె ఇజి నా మన్నుని దేవుణు ఆత్తు సాని వెహ్సినార్. 3 నా సొంత జాతి ఆతి యూదురు, క్రీస్తుజ్ నమ్మిదెజ్ ఇజి నాను ఆన ఆజిన. అక్క జర్రిదెజ్ దేవుణు బాణిజ్ నా మున్సు. సయివ్ వాతిజ్బా, క్రీస్తుబాణిజ్ నజి ఎద్రిన్తిజ్బా పరవ సిల్లెద్ ఇజి ఒడఃబిజిన. 4 వారు ఇస్రాయేలుదికార్, వన్ని సొంత లోకుర్ ఇజి దేవుణు ఇడ్తికార్. దేవుణు వన్ని గొప్ప గుణమ్దాన్ ఎయెర్ సిల్లి బాడ్డిదు నడిఃపిస్తికార్. దేవుణు వరి వెటనె ఒపుమానమకు కిత్తాన్. దేవుణుదిజ్ ఎలాగ మాడిఃస్తిజ్ ఇజి వరిజె వెహ్సాన్. వరిజె దేవుణు సిన ఇజి ఒపుమానమకు కిత్త మనాన్. 5 వరి అనిగొగొరు ఆతి అబ్రహాం, ఇస్సాకు, యాకోబు ఇనికార్ ఇస్రాయేలు లోకుర్ లోగ గొప్ప పేరు పొందితికార్. దేవుణు పొక్క ఇజి ఒపుమానమకు కిత్తి రాజు యా యూదు జాతిలోఇనె లోకు వజ పుట్టాన్. విజేరిమున్సు. ఏలుబడిః కిని దేవుణు ఎసెజ్బా పొగిడః ఆజి మనీన్.

6 అహిజు, దేవుణు ఇస్రాయేలు లోకురిజ్ వెహ్సాకెజ్ జర్రివితాద్ ఇజి ఇండ్రెజ్ అవద్. ఎందానిజ్ ఇహిజు, ఇస్రాయేలు లోకుర్ ఇజి వెహ్ ఆనికార్ విజేరి దేవుణుదిజ్ సరియాతి సొంత లోకుర్ అవర్. 7 అబ్రాహాం పొటాదికార్ విజేరి వన్ని తెగాదు పుట్టికార్ ఇజి దేవుణు ఇడ్వన్. ఎందానిజ్ ఇహిజు “నీ కొడః ఆతి ఇస్సాకువెలెహన్ వానికార్ నీ జాతి అనార్*”, ఇజి దేవుణు అబ్రహాం వెట వెహ్సా మనాన్. 8 ఎలాగ

ఇహిజ, అబ్రహాం తెగాదు పుట్టికార్ విజేరె దేవుణు కొడోర్ ఆవిర్. గాని దేవుణు అబ్రహాముజ్ సిత్తి ఒప్పుమానం నమ్మితిజ్ దేవుణు కొడోర్ అబ్రాహముజ్ సరియాతి తెగాదికార్ ఇజి దేవుణు ఇడ్సాన్. 9 దేవుణు అబ్రహాం వెట కిత్తి ఒప్పుమానం ఇక్కాది. “కాలెహిజ్ యా సమయమ్దు నాను వాన. నస్తివలె నీ అల్లి ఒరెన్ కొడోర్ ఇడ్సాద్లె”[☆].

10 అక్కాది ఆవిద్, రిబెక పొటాదివరిజ్ ఒరెండ్రె అప్పొసి, ఎయెన్ ఇహిజ మా అనిగొ ఆతి ఇస్సాకు. 11-13 ఇస్సాకు అల్లి రిబెక పాత డిస్సి మహివలె, దేవుణు దన్నివెట వెప్సాన్. జవల మరిసిర్ పుట్వండ మహివలెనె, వారు తప్పు గాని నెగ్గిక గాని కివిండ మహివలెనె దేవుణు దన్నిజ్ వెప్సాన్, “పెరికాన్ ఇజిరె వన్నిజ్ అడిగి మంజినాన్లె”,[☆] ఇజి దేవుణు యాక వెప్సా నండ్రె పంటెజ్ వెనుక ఒరెన్ దేవుణు ప్రవక్త దేవుణు వెప్సా మాట వెప్సాన్. “యాకోబుజ్ నాను ప్రేమినిన, ఏసాపు నజి పడిఃఇకాన్”[☆]. ఇజి. ఎందానిజ్ ఇహిజ, వన్ని లోకుర్ వందిజ్ దేవుణుదిజ్ ఉండ్రె ఉదెనం మహాద్. అయాలెకెండ్రె వాండ్రు నడఃపిస్సాన్. లోకుర్ కిని పణిజాణిజ్ ఆవిద్. దేవుణు ఏర్పాటుదానె విజా జర్గిజెనె. దేవుణు ఏర్పాటు కినికెజ్ లోకుర్ ఒడఃబినిలెకెండ్రె ఆవిద్. 14 అహిజ, దేవుణు కొడోర్ ఎయెర్ ఇజి దేవుణు ఏర్పాటు కిత్తిదన్ని లోక దేవుణు తేడ సూణికాన్ ఇజి ఒడఃబినిదెరెసు. సిల్లె, దేవుణు అనెయం కినికాన్ ఆవిన్. 15 ఎలాగ ఇహిజ, దేవుణు మోనెవెట ఈహు వెప్సాన్. “ఎయెన్ మున్సు దయ తోరిస్సెజ్ నాను ఇస్టం అజినానొ వన్నిమున్సు దయ తోరిస్సు. ఎయెన్ మున్సు కనికారమాదెజ్ ఇజి ఇస్టం అజినానొ వన్ని మున్సు కనికారం అజిన్”[☆].

16 అందెజె, యాక లోకు అనదానె గాని వన్నిపణిజాణిజ్ గాని దొహ్కకిక ఆవిద్. దేవుణు దయదానె యాక జర్గిజెనాద్. 17 దేవుణు మాటదు ఈహు మనాద్. దేవుణు పరోరాజు వెట ఇనిక వెప్సాన్ ఇహిజ, నాను ఎస్సానొ సత్తు మన్నికాన్ ఇజి నీ వెలెహాన్ విజాబాణి లోకుర్ వెండ్రెజ్ నెజి రాజావజ ఇడ్త మన్సు”[☆] ఇజి. 18 అహిజ ఎయెన్ మున్సు దయ తోరిస్సెజ్ దేవుణు ఇస్టం ఆనాండ్రొ వన్ని మున్సు దయ తోరిస్సాన్. ఎయె మున్సు గర్త కిబిస్సెజ్ ఇస్టం ఆనాండ్రొ వన్ని మున్సు గర్త కిబిస్సాన్.

దేవుణు విజా జర్గిసినాన్

19 ఏలు మీరు మరి వెప్పొదెర్పు. దేవుణు ఇస్టమ్దిజ్ ఎయెన్బా ఎద్రిస్సెజ్ అట్విన్గదె. మరి దేవుణు ఇస్టం వజ లోకుర్ కిదెజ్ ఇజి విజా జర్గిస్సివలె, తప్పు కిత్తార్ ఇజి లోకుర్ వందిజ్ దేవుణు ఎలాగ వెప్సాజానాన్? 20 గాని దేవుణు ఎద్రు వర్గిదెజ్ లోకు నీను ఎయి?. “తయార్ కిత్తి వన్నివెట, తయార్ కిబె అతికెజ్ ఎందానిజ్ నజి ఈహు తయార్ కిత్తి ఇజి వెన్బాదెజ్ ఆనాదా? 21 కుండ్రెజ్ తయార్ కినివన్నిజ్ ఉండ్రె ముదదాన్ రుండి రకమ్ది కుండ్రెజ్ తయార్ కిదెజ్ అక్కు మనాద్గదె?. ఉండ్రె కుండ్రె లోకుర్ సుడఃజి ఇక్క ఎస్సా నెగ్గిక ఇజి వప్పొవందిజె మరి ఉండ్రె కుండ్రె మాముల్ వణిదిజ్ ఇడ్సి వందిజ్.

22 దేవుణుదిజ్బా లోకుర్వెట ఇస్టమాతి వజ కిదెజ్ అక్కు మనాద్. పాపం కిని వరి వెట వన్ని నండ్రొ కోపమ్దాన్ వాని గొప్ప సత్తు తోరిస్సెజ్ ఆస అజినాన్. గాని పరివెట దేవుణు వెటనె కోపం ఆవిండ్రె మహిజ, నాననం వందిజ్ ఇడ్రె ఆతి మన్నివరి వెట కోపం ఆవిండ్రె ఒర్పుదాన్ మంజినాన్. 23 ఎందానిజ్ ఇహిజ, వన్ని గొప్ప దయ దొహ్కక్తి మజి, వన్ని గొప్ప జాయ్ వందిజ్ తయార్ కిత్తివరిజ్ దేవుణు వన్ని గొప్ప జాయ్ తోరిస్సెజ్ అహె కిత్తాన్ ఇహిజ మాటు ఇనిక వెప్సాట్? 24 ఏర్పాటు కిబె అతి మాటు ఎయెర్ ఇహిజ, యూదురిని యూదురు అజజాతికార్బా. 25 యూదురు అజ జాతిదివరిజ్ ఎర్గినినివందిజ్ హుసెయ ప్రవక్త వెట దేవుణు ఈహు వెప్సాన్. “నా లోకు ఆజ వరిజ్ ఏలు నా లోకుర్ ఇజి కూక్కు. నాను ముందాల ప్రేమ తోరిన్ ఇ వరిజ్ నాను ప్రేమినిసికార్ ఇజి కూక్కు”[☆]. 26 దేవుణు అజ జాతిదివరి వందిజ్ వెప్సా మాటెజ్ హుసెయ మరి వెప్సాన్. “మీరు మా లోకుర్ అజదెర్ ఇజి నాను వెప్సాబాన్, బత్తిని దేవుణు కొడోర్ ఇజి మీరు పేరు ఇడ్రె ఆనిదెర్”[☆] 27 యెసయ ప్రవక్త ఇస్సాయేలు లోకుర్ వందిజ్ ఇనిక వెప్సాన్ ఇహిజ, “ఇస్సాయేలు సమ్దరం ఒడ్డుదు మన్ని ఇస్సు లెకెండ్రె, లెక్క కిదెజ్ అట్జెన సస్సా లోకుర్ అతిజ్బా, పరిలోక ఉండ్రె ఇజిరె గుంపుదిజ్నె దేవుణు రక్సిస్సాన్. 28 ఎందానిజ్ ఇహిజ దేవుణు

☆ 9:9 9:9 ఆది 18:10,14. ☆ 9:11-13 9:11-13 ఆది 25:23. ☆ 9:11-13 9:11-13 మలా 1:2,3. ☆ 9:15 9:15 నిర్గమ 33:19. ☆ 9:17 9:17 నిర్గమ 9:16. ☆ 9:25 9:25 షోనెయ 2:23. ☆ 9:26 9:26 షోనెయ 1:10.

అల్పాయం ఆవిండ యా లోకం మున్ను తీర్పు కినాండ్రై వన్ని పణి వెటనె పూర్తి కినాన్లె^౨”, 29 దేవుణు కనికారం తోరినెజ్జె ఎయెన్బా సిక్సదాన్ తప్రై ఆవీన్. యెసయ ప్రవక్త ముందాల వెప్పైలెకెండ, “విజు దన్నిజ్జె అతికారం మన్ని దేవుణు మా కొణెకొకారిజ్జె ఇడవిండ పూర్తి సప్తాన్ ఇహిజ, మాటుబా సొదోము గొముర పట్టుమీది వరిలెకెండ పూర్తి పాడాఃత మహాట్సు^౩”. దేవుణు అయ పట్టుమీదు మహివరిజ్జె పూర్తి విజేరిజ్జె సప్తాన్.

యూదురు గెలిస్తెజ్జె అట్విండ ఆజినార్

30 అహిజ, ఏలు ఇనిక వెప్పెజ్? దేవుణు వరిజ్జె నీతినిజయ్లు మన్నికార్ ఇజి ఇడెజ్జె యూదురు అఇకార్ సుడవితార్ గాని దేవుణు వరిజ్జె నీతినిజయ్లు మన్నికార్ ఇజి ఇడెజ్జె. క్రీస్తు మున్ను నమకం ఇడెజ్జె నీతినిజయ్లు మన్నికార్ ఇజి ఇడెజ్జె. 31 గాని ఇస్రాయేలు లోకుర్ ఇహిజ దేవుణు మోసెజ్జె సిత్తి రూలుజ్జె లోజెతిజ్జె నీతి మన్నికార్ ఆనార్ ఇజి నండ్రై సుడఃతార్ గాని అట్విండ ఆతార్. 32 ఎందానిజ్ ఇహిజ వారు దేవుణు మున్ను నమకం ఇడవితార్. గాని వరి పనిజాణిజ్జె నీతినిజయ్లుకార్ ఆనార్ ఇజి నంబ సుడఃతార్. అందెజ్ దేవుణు క్రీస్తు ఇజి ఎర్లిసి వన్ని మున్ను అడ్డు అతి పణుకు మున్ను అర్పిలెకెండ వారు తొరో ఒడిజి అర్దార్. 33 యాక ప్రవక్త రాస్తి లెకెండ మనాద్. “సుడఃదు, నాను సియెన్దు ఉండ్రై పణకు నిల్పిన్. అక్క అడ్డు ఆనాదె లోకాజ్ తొరో ఒడిజి అర్పాద్. గాని వన్ని మున్ను నమకం ఇడ్పికాన్ సిగు ఆవీన్^౪.”

10

1 తంబెరిజాండె, నా సొంత జాతి అతి యూదురిజ్ దేవుణు రక్సిస్తెజ్జె ఇజి నాను గొప్ప ఆస ఆజి పార్దనం కిజన. 2 వారు దేవుణు వందిజ్ గొప్ప ఉసార్దాన్ మన్నికార్ గాని దేవుణుదిజ్ పూర్తి నెన్విర్ ఇజి వరివందిజ్ నాను వెస్సిన. 3 ఎందానిజ్ ఇహిజ, దేవుణు లోకురిజ్ ఎలాగ నీతినిజయ్లుకార్ ఇజి ఇడాన్ ఇజి వారు అర్దం కివిర్. నీతినిజయ్లుకార్ ఇజి దేవుణు ఇడ్పివందిజ్ లోకు ఎలాగ నడిఃదెజ్ ఇజి దేవుణు తొరిస్తి సర్దు నడిఃవిండ నీతినిజయ్లుకార్ అదెజ్ ఇజి వారు వరి సొంత రూలుజ్ ఇడెజ్. 4 క్రీస్తు వాతిజ్ ఏలు దేవుణు మోసెజ్ సిత్తి రూలుజ్ లోకాజ్ దేవుణుబాన్ కూడుఃవీవిద్. క్రీస్తుమున్ను నమకం ఇడ్పికార్ విజేరిజ్ దేవుణు వన్నిబాన్ కూడుఃవ్పాన్.

విజేరి వందిజ్ ఉండ్రై కొత సరి

5 దేవుణు మోసెజ్ సిత్తి రూలుజాణిజ్ నీతినిజయ్లు మన్నికార్ అదెజ్ సుడఃజిని వన్ని వందిజ్ మోసెబా రాస్తి మనాన్. ఇనిక ఇహిజ “రూలుజ్ వజ నడిఃదెజ్ ఆస ఆనికాన్ వనకదటాన్ బత్తిదెజ్వలె^౫” 6 గాని నమకం ఇడ్పివందిజ్ నీతినిజయ్లు మన్నికార్ ఇజి దేవుణు ఇడ్పిదన్ని వందిజ్ మన్ని మాటాదు మాటు ఇని ఇనికెజ్ అవిద్ ఇజి వెప్తా మనాద్. ఇనికెజ్ ఇహిజ “రక్సణ దొహ్కాద్ ఇజి పరలోకమీదు ఎక్సి క్రీస్తుజ్ అడిగి తత్తెజ్ ఎయెన్ సొనాన్ ఇజి మీ మన్నుదు వెప్పెజ్ అవిద్”. 7 అయాలెకెండ సాతివరిబాన్ అయాలోకమీదు సొన్ని క్రీస్తుజ్ బాణిజ్ తత్తెజ్ ఎయెన్ సొనాన్ ఇజి మీ మన్నుదు వెప్పెజ్ అవిద్. 8 గాని అయ మాట ఇనిక వెహ్పినాద్? ఇనిక వెహ్పినాద్ ఇహిజ, “దేవుణు మాట డగ్గునె మనాద్. అయ మాటెజ్ మీ వెయెదునె మన్నె, వెప్పెజ్ ఆనిదెర్. మీ మన్నుదు మన్నె, ఒడ్డుబిదెజ్ ఆనిదెర్^౬” మాటు సాటిసిని యా మాట క్రీస్తు మున్ను నమకం ఇడ్డు ఇజెనె. 9 అయ మాట ఇనిక ఇహిజ, యెసునె ప్రబు ఇజి ఎయెన్బా లోకుర్ ముందాల వెప్పెజ్, అక్కాదె అవిద్, యెసుజ్ సాతివరిబాణిజ్ దేవుణు నిక్తాన్ ఇజి ఎయెన్బా వన్ని గర్బమీదు నమ్మిత్తిజ్ దేవుణు వన్నిజ్ రక్సిస్తాన్. 10 ఇనిక ఇహిజ, మీ మన్నుదు నమ్మిత్తిజ్ దేవుణు మిజి వన్నిబాన్ కూడుఃవ్పాన్. అక్కాదె అవిద్, యెసు నీ ప్రబు ఇజి లోకుర్ ముందాల వెప్పెజ్ దేవుణు నిజి రక్సిస్తాన్లె. 11 దేవుణు మాటదు ఇనిక రాస్తి మనాద్ ఇహిజ, క్రీస్తు మున్ను నమకం ఇడ్పికాన్ ఎయెన్బా సిగు ఆవీన్. 12 యూదురుజ్ గాని అఇజాతిది వరిజ్ గాని దేవుణు ఉండ్రైలెకెండ సూణాన్. వాండ్రు ఒరెండ్రై విజేరిజ్ ప్రబు అతిజ్, వన్నిజ్

✦ 9:28 9:28 యెసయ 10:22,23. ✦ 9:29 9:29 యెసయ 1:9. ✦ 9:33 9:33 యెసయ 8:14; 28:16. ✦ 10:5 10:5 లేవి 18:5. ✦ 10:8 10:8 ద్వితీ 30:14.

లోన్పవరిజ్ విజేరిజ్ వాండ్రు నండొ దీవిస్సాన్. 13 యాక ఒరెన్ ప్రవక్త వెహ్తాలెకెండె, “నజీ రక్సీన్అ ఇజి దేవుణు వెట వెహ్తీవరిజ్ విజేరిజ్ దేవుణు రక్సీస్సాన్”[☆].

14 గాని యూదురు వందిజ్ సెగొండార్ వెహ్తీనార్ను. క్రీస్తుముస్సు నమకం సిల్లిజ్ “నజీ రక్సీన్అ”, ఇజి క్రీస్తు వెట ఎలాగ ఇనార్? క్రీస్తువందిజ్ వెండ్రెజ్ ఇహిజ వెన్ఇకార్ ఎలాగ వన్నిజ్ నమ్మినార్? ఎయెరిజ్బా క్రీస్తువందిజ్ నెస్సీన్విండ మహిజ వారు ఎలాగ వెనార్? 15 ఎయెరిజ్బా దేవుణు షోక్విండ మహిజ సాటిస్సికార్ ఎలాగ సొనార్. దన్నివందిజె దేవుణు మాటాదు ఈహు రాస్త మనాద్. “దేవుణు సువార్త వెహ్తాజ్ సొన్నినిక ఎస్సా గొప్పు నెగ్గిక”[☆].

16 దన్నిజ్ నాను వెహ్తీన. క్రీస్తువందిజ్ వెహ్తాజ్ దేవుణు లోకాజ్ షోక్తాన్ గాని విజేరె సువార్తదిజ్ లోజివితార్. దిన్నివందిజ్ యెసయ ప్రవక్త ఇనిక వెహ్తాన్ ఇహిజ, “ప్రబు, మాపు వెహ్తా మాటెజ్ ఎయెర్బా వెన్ఏతార్”[☆], ఇజి. 17 అహిజ క్రీస్తువందిజ్ విహ్తాజానె నమకం ఇడ్పార్. ఎయెర్బా సువార్త సాటిస్తిజానె క్రీస్తు వందిజ్ వెండ్రెజ్ ఆనాద్.

18 గాని నాను వెన్బాజిన, “యూదురు సువార్త వెన్ఏరా?”, “నిజమె వెహార్”, ఇజి వెహ్తా క్రీర్తనదు రాస్తి మన్ని లెకెండె, దేవుణు వందిజ్ వారు వెహ్తాక లోకమ్దు విజు బాడ్డిజ మన్నికార్ వెహార్. అందిదెజ్ అల్ఇ బాడ్డిమబా దేవుణు వందిజ్ మాటెజ్ అందితె మన్నె[☆]. 19 మరి ఉండ్రె ప్రస్తు వెన్బాన, “సువార్త వందిజ్ యూదురు అర్లం కితారా? సెగొండార్ అర్లం కితార్ గదె. దేవుణు ఇస్రాయేలు లోకాజ్ దిన్నివందిజ్ వెహ్తాక మోసె వెహ్తాన్, “యూదురు ఆఇజాతిది వరివెట మిజి గోస కిబిస్సాలె. అర్లం కిదెజ్ అల్ఇ వరిజ్ నాను దీవిస్సాలె”[☆] 20 యెసయ ప్రవక్తబా దిన్నివందిజ్ గటిజ రాస్త మనాన్, “నజీ రెబాఇవరిజ్ నాను దోహ్కచ్చ. నజీ వెన్బాఇవరిజ్ నాను తోర ఆన”[☆]. 21 గాని ఇస్రాయేలు లోకుర్ వందిజ్ దేవుణు ఇనిక వెహ్తాన్ ఇజి యెసయ రాస్తాన్, “నా మాటదిజ్ లోజివిండ నా వెట ఎద్రిసిని నా లోకు వందిజ్, వారు మురి వానిదాక నాను ఎద్రుసుడెజి మంజిన”[☆].

11

యూదురిజ్ దేవుణు దయ తోరిస్సాన్.

1 అహిజ నాను వెన్బాజిన, దేవుణు వన్ని సొంత లోకుర్ ఆతి యూదురిజ్ డిఃస్స సితాండ్రా? సిల్లెన్, ఎస్సజ్బా డిఃన్వన్. ఎలాగ ఇహిజ నానుబా యూదువాండ్రునె. అబ్రహాం తెగాదు పుట్టి బెన్యామిను కులమ్దు పుట్ట మన్ను. గాని దేవుణు నజీ డిఃన్వితాన్. 2 సిల్లె దేవుణు ముందాలేనె కూక్సీ వన్ని లోకుర్ ఇజి కేటకిత్తి వరిజ్ నెక్సిషాక్వితాన్. ఏలియ ప్రవక్త దేవుణువెట మొరొ అతాన్ ఇజి దేవుణు మాటాదు రాస్తిమన్నిక గుర్తు కిజినిదెర్గదె. వాండ్రు ఇస్రాయేలు లోకుర్ వందిజ్ ఇనిక వెహ్తాన్ ఇహిజ, 3 “ప్రబువా నిజి మహి ప్రవక్తరిజ్ విజేరిజ్ వారు సహ్తార్. నిజి సంత సుర్ది సీని మాలి పిటెజ్ వారు డెయ్యె షోక్తార్. నిజి నమ్మినె వరి లోఇ నాను ఒరెనె మిగిలిత మన్ను. ఏలు నజిబా సప్తెజ్ సుడెజినార్”[☆]. 4 గాని దేవుణు వన్నిజ్ ఇనిక వెహ్తాన్ ఇజి గుర్తు మన్నిదెరా?. “నీను ఒరిదె ఆఇ బయాలు ఇని దెయమ్దిజ్ మాడిఃన్ఇ ఏడు వెయిజ్ లోకురిజ్ నావందిజ్ నాను కేట ఇడ్డ మన్ను”[☆]. 5 అయాలెకెండె యా కాలమ్దుబా దేవుణు యూదురి లోఇ ఉండ్రె ఇజిరి గుంపుదిజ్ కేట ఇడ్డాన్. వన్ని దయాదర్మమ్దానె వరిజ్ కేట ఇడ్డాన్. 6 లోకుర్, వారు కిత్తి నెగ్గి పణిజ వందిజ్ అవిద్ గాని, దేవుణు దయాదర్మమ్దానె వన్నిముస్సు నమకం ఇడ్డెజ్ అట్టార్. ఎందానిజ్ ఇహిజ వారు కిత్తి నెగ్గి పణిజ్ వందిజ్ దేవుణు వరిజ్ ఎర్లిస్తాన్ ఇహిజ, వన్ని గొప్పు దయ సెడినె దోహ్కచ్చ అవిద్గదె.

7 అందెజె ఇనిక జర్గితాద్ ఇహిజ, ఇస్రాయేలులోకుర్ నండొండార్ నండొ ఆసదాన్ రెబాతిక వరిజ్ దోహ్కచ్చితాద్. దేవుణు ఎర్లిస్తి ఇడ్డి ఇజిరి గుంపుదివరిజె అక్క దోహ్కచ్చాద్. మిగిలిత్తికార్ దేవుణు వందిజ్ ఇనికబా నెస్సెజ్ అల్ఇ లెకెండె దేవుణు కితాన్.

8 దిన్నివందిజ్ దేవుణు మాటాదు రాస్త మనాద్. ఇనిక ఇహిజ, దేవుణు వరిమన్ను నిద్ర కినివరి మన్నువజ కితాన్. వరిజ్ కణుకెజ్ మహె గాని సుడెనిదన్నిజ్ అర్లం కివిర్. వరిజ్ గిబ్బిజ్ మహె

☆ 10:13 10:13 యోవేలు 2:32. ☆ 10:15 10:15 యెసయ 52:7. ☆ 10:16 10:16 యెసయ 53:1. ☆ 10:18 10:18 కీర్తన 19:4. ☆ 10:19 10:19 ద్విత్తి 32:21. ☆ 10:20 10:20 యెసయ 65:1. ☆ 10:21 10:21 యెసయ 65:2. ☆ 11:3 11:3 1రాజు 19:10,14. ☆ 11:4 11:4 1రాజు 19:18.

గాని వెహిదన్నిజ్ అర్దం కివర్”^{*} 9-10 దిన్నివందిజ్ దావీదు రాజుబా వెహ్తా మనాన్. వన్ని మున్కు పగాతి వరివందిజ్ ఈహు వెహ్తాన్ “వారు సర్ద అనివలె కిని పణిజ్ వరిజ్ ఉరి లెకెండ్ ఆవిద్. నెగెండ్ మంజినాన్ ఇజి ఒడణిబినివలె వెటెనె వరి మున్కు నాసనం రవిద్. దేవుణు వందిజ్ నిజమాతిక నెసవిండ్ అనివందిజ్ వరి మన్కు సీకటి ఆజి సానీద్. వారు గొప్ప బరుదాన్ వజ్నిలెకెండ్ ఆవిద్”.^{*}

టోటాదు పిరిజిని ఒలివ మరాతు అడివిది కొమెజ్ అంతు తొహ్తాన్.

11 అపొజ, నాను వెనబాజిన, యూదురు క్రీస్తుజ్ నెక్తిపొక్తిజ్ దేవుణు బాణిజ్ తెగు సాహార్ ఇజి వెహ్తాజ్నా? ఆవిద్ ఎన్గుజ్బా ఆవిద్. గాని వారు క్రీస్తు మున్కు నమకం ఇడణిఇతిజ్, క్రీస్తుజ్ నమ్మితిజ్ వాని అయ రక్తణ దేవుణు యూదురు ఆఇవరిజ్ సిత్తాన్. మజి వానిక వరిజ్ దోహ్కాదా ఇజి యూదురు గోస ఆదెజ్వలె ఇజి యాక జర్గితాదా? 12 యూదురు క్రీస్తుజ్ నెక్తి పొక్తివలె యూదురు ఆఇజాతిదివరిజ్ దీవన దోహ్కాద్ ఇహిజ, వరిజ్ వాతి నస్టం ఆఇవరిజ్ లాబం ఆతాద్ ఇహిజ, దేవుణు ఎర్గిస్తి ఇడ్డి యూదురు దేవుణుబాన్ మర్జి వానివలె, యా లోకమ్ది విజా జాతిదివరిజ్ మరి ఎస్సానో గొప్ప లాబమ్కు వానె!

13 ఏలు యూదురు ఆఇ మిజి నాను వెహ్సిన. యూదురు ఆఇవరిజ్ అపొస్తుడు వజ దేవుణు నజి ఇడ్డిజ్ దన్నివందిజ్ గొప్పజ గవరం దోహ్కత్త మన్కు. 14 దేవుణు నజి ఒపజెప్తి యా పణి కిజి ఎలాగబా నా సొంత జాతి అతి యుదురిజ్ గోస పుటిస్తజ్ ఇజి నాను సుడణిజిన. ఎందానిజ్ ఇహిజ మిజి దేవుణు దీవెస్తిలెకెండ్ వరిజ్ దోహ్కెజ్ ఇజి వారుబా ఆస అతిజ దేవుణు వరిలోఇ నెగెండారిజ్బా రక్తిస్సాన్. 15 దేవుణు మా సొంత లోకర్ అతి యూదురు నండాండాం నెక్తి పొక్తివలె యా లోకమ్దు మన్కు ఆఇజాతిది వరిజ్ నండాండారిజ్ వన్నిబాన్ కూడుఘ్తాన్, అపొజ దేవుణు యూదురుజ్ వన్నిబాన్ కూడుఘ్తివలె ఇనిక వానాద్? సావుదాన్ బత్కునె వానాద్. 16 ఉండ్డి దూరు ముదదాన్ తొలిత సుహ్తాక దేవుణుదిజ్ సీనిక ఇహిజ అయ ముద విజా దేవుణుదిజ్ సిత్తి లెకెండ్. అయవజనె యూదురు దేవుణు లోకర్. ఎందానిజ్ ఇహిజ, వరి అనిగొగొరుబా దేవుణు లోకర్. ఉండ్డి మరాతి వెల నెగ్గి ఇహిజ అయ మరాతి కొమెజ్బా నెగ్గెకెనె. అయావజనె, యూదురి అనిగొగొరు దేవుణు లోకర్కాక వరి కొడొః కొక్రాదికార్బా దేవుణు లోకర్. 17 టోటాదు మన్కు నెగ్గి ఒలివ మరాతి కొమెజ్ నెగం రుక్తిపొక్తిలెకెండ్ దేవుణు యూదురి నెగెండారిజ్ నెక్తి పొక్తాన్. అడివిది ఒలివ మరాతి ఉండ్డి కొమలెకెండ్ యూదురు ఆఇ మిజి టోటాదు మన్కు నెగ్గి ఒలివ మరాతు కూడుఘ్తాన్. అయ నెగ్గి ఒలివ మరాతు కూడుఘ్తిజ్ కొమెజ్, అయ మరాతి వెలెజాణిజ్ కన లాగ్గి నత్తు ఆనివజ మిజిబా యూదురుజ్ దేవుణు సిత్తి దీవన దోహ్కత్త మనాద్. 18 మరాతాన్ కొమెజ్ కొయజి విసీర్పిలెకెండ్ దేవుణు యూదురిజ్ నెక్తి పొక్తాన్ గాని యూదురు ఆఇ మీరు గర్త అనిక ఆవిద్. మాపు వరిజ్ ఇంక పెరికాప్ ఇజి మీరు గర్త అతిజ యాక గుర్తు కిదిజ్. ఇనిక ఇహిజ వెలెజ్ బత్కినిక కొమెజాణిజ్ ఆవిద్. వెలెజ్దానె మీరు బత్కిజినిదిర్. 19 మజి కూడుఘ్తెనె దేవుణు యూదురిజ్ నెక్తి పొక్తాన్ ఇజి మీలోఇ ఒర్న్ వెహ్సాన్సు. 20 యాక నిజమె గాని, ఉండ్డి వెహ్సా. యూదురు క్రీస్తు మున్కు నమకం ఇడణి వందిజ్ దేవుణు వరిజ్ నెక్తి పొక్తాన్. మీరు క్రీస్తుమున్కు నమకం ఇడ్డి వందిజ్ నె గటిజ నిల్పినిదిర్. అందెజె గర్త అమాట్. జాగర్త మండ్రు. 21 ఎందానిజ్ ఇహిజ మరాతి కొమెజ్ ఇహిజ యుదురిజ్ దేవుణు నెక్తిపొక్తి లెకెండ్, మీరు నిల్వెండ్ మహిజ మిజిబా తవ్విండ్ నెక్తి పొక్తాన్.

22 యాక గుర్తు కిదు. దేవుణు కనికారమ్దాన్ మనాన్. వాండ్రు కొపమ్దాన్బా మనాన్. వన్నిజ్ నెక్తి పొక్తి యూదురువెటె దేవుణు కోపమ్దాన్ మనాన్. గాని యూదురు ఆఇ మిజి దేవుణు కనికారం తోరిసినాన్. గాని దేవుణు తోరిసి కనికారం మీరు నమ్మిత్తిజ్ నె మిజి కనికారం తోరిసినాన్. సిల్లిజ మిజిబా కత్తు విసీర్పాన్. 23 యూదురు క్రీస్తుమున్కు నమకం ఇట్టిజ మరాతు కొమెజ్ మరి అంతు తొహ్తాలెకెండ్ దేవుణు వరిజ్ మరి వన్నిబాన్ కూడుఘ్తాన్. ఎందానిజ్ ఇహిజ వరిజ్ కూడుఘ్తిజ్ అట్సాన్. 24 యూదుర ఆఇ మీరు అడణివిదాన్ తత్తి ఉండ్డి ఒలివ మరాతి కొమ లెకెండ్. టోటాదు పిరిజిని ఒలివ మరాతు యా అడణివిది కొమెజ్ దేవుణు అంతు తొహ్తాన్. యాక మాముల్ జర్గిదిజ్

^{*} 11:8 11:8 ద్వితీ 29:4; యెసయ 29:10. ^{*} 11:9-10 11:9-10 కీర్తన 69:22,23.

కన్యం. అహిజ కత్తివిసిద్ధి టోటమొక్కాది కొమెజ్ మరి అయ మరాతు అంతు తొవైజ్ ఎస్సానో సులు. అయా లెకెండ నెక్తి పొక్తి యూదురిజ్ మరి వన్నిబాన్ కూడుఃపైజ్ దేవుణుదిజ్ ఇని అడ్డు సిల్లెద్.

దేవుణు యూదురుజ్ రక్కిస్సాన్

25 నాను ప్రేమిసిని తంబెరిజాండె, ఏలు ఉండ్రీ డాఃజీతి మన్ని గొప్పు నజతి మీరు నెన్జెజ్ ఇజి నాను వెహ్సాన్. నాను ఎందానిజ్ వెహ్సాన్ ఇహిజ దేవుణు మిజి కూడుఃపైవందిజ్ యూదురిజ్ ఇంక తెలిమన్నికావ్ ఇజి మీరు గర్ర అవండ మండ్రెజ్ ఇజినె. ఇనిక ఇహిజ యూదురు ఆఇ జాతిదివరి లోఇహాన్ దేవుణుబాన్ వాదెజ్ ఇజి వాండ్రు కేట కిత్తి నస్సాండారో వన్నిబాన్ కూడుఃపె ఆనిపాక యూదురు దేవుణుదిజ్ నమ్మివండ వరిలోఇ నండోడారి మన్ను వాండ్రు గటి కినాన్. 26-27 యూదురు ఆఇవరి లెక్క పూర్తి అతి వెనుక, దేవుణు యూదురుజ్ రక్కిస్సాన్. దేవుణు ప్రవక్త ఒరెన్ రాస్తిలెకెండ అక్క జర్రినాద్. ఎలాగ ఇహిజ, “లోకురిజ్ రక్కిస్సికాన్, దేవుణు లోకుర్ బాణిజ్ వానాన్. సస్తివలె వాండ్రు మా లోకాజ్ వరి పాపం కిత్తి వందిజ్ ఎత్తుకిని బాణిజ్ డిఃబిన్నాన్. నాను ఒప్పుమానం కిత్తిలెకెండ వరి పాపమేకు నాను లాగ్గు”[☆].

28 యూదురు సువార్త నెక్తి పొక్తిజ్ దేవుణు వరిజ్, వన్నిజ్ పడిఃఇవరివజ ఇడ్తార్. గాని, వారు దేవుణు ఎర్లిస్తి లోకుర్ కాక దేవుణు వరిజ్ ప్రేమిసిని మనాన్. ఎందానిజ్ ఇహిజ వన్ని అనిగొగొర్ వెట వాండ్రు ఒట్టు కత్తి దన్నివందిజె, 29 దేవుణు యూదురిజ్ ఏలుబా ప్రేమిసినాన్. ఎందానిజ్ ఇహిజ దేవుణు ఎస్సెజ్బా వెహ్సాలెకెండ కినాన్. వన్ని లోకుర్ ఇజి కూక్తి వరిజ్ ఎస్తివలెబా ప్రేమిస్సాన్. వరిజ్ ఎస్సెజ్బా దీవిస్సాన్. 30 యూదురు ఆఇ మీరు ముందాల దేవుణుదిజ్ లోజివండ మహిదెర్. గాని యూదురు దేవుణుదిజ్ లోజివండ అతిజ్ దేవుణు కనికారం మిజి వాతాద్. 31 అయావజనె, యూదురు దేవుణుదిజ్ లోజివండ అతిజ్ మిజి ఏలు కనికారం తోరిస్తిలెకెండ వరిజ్బా దేవుణు మరి కనికారం తోరిస్సాన్. 32 విజెర్వెట కనికారం తోరిస్సెజ్ ఇజి దేవుణు విజెర్విజ్ వారు లోజివండ అతి మన్నిదన్ని లోఇనె డిఃస్స సిత్రాన్. 33 దేవుణు బుద్ది, గెణం ఎస్సానో గొప్పు పెరిక కొటె. వాండ్రు తీర్కనం కిత్తికెజ్ ఎయెన్బా అర్లం కిదెజ్ అటవన్. వాండ్రు కిని పణి వందిజ్ ఎయెన్బా అర్లం వెహ్సెజ్ అటవన్.

34-35 ప్రవక్త దేవుణు మాటుదు రాస్తిలెకెండ మనాద్ యాక. ఎలాగ ఇహిజ, “దేవుణు ఒడఃబినికెజ్ ఎయెజ్బా తెలివద్. దేవుణు ఇని ఇనికెజ్ కిదెజ్ ఇజి వన్నిజ్ బుద్ది వెహ్సెజ్ ఎయెజ్బా అటవన్”[☆]. “ఎయెన్బా దేవుణుదిజ్ ఇనికబా సీదెజ్ సిల్లెద్. అందెజె దేవుణు ఎయెరిజ్బా మర్లి సీదెజ్ అక్కర్ సిల్లెద్”[☆]. 36 యాక నిజం ఇజి మాటు నెసినాట్. ఎందానిజ్ ఇహిజ, దేవుణు విజు తయారో కిత్రాన్. అక్కెజ్ విజు మన్నె. వాండ్రు సిత్తి నత్తుదాన్ అక్కెజ్ బత్తిజనె. దేవుణుదిజ్ పొగిడిదెజ్ అక్కెజ్ మన్నె. విజెరె లోకుర్ దేవుణుదిజ్ ఎస్తివలెబా గొప్పు గవరం సీజి మనీద్. ఆమెన్.

12

కొత్త బత్తు

1 అందెజె మా తంబెరిజాండె, నాను మీవెట బతి మాల్లిన, దేవుణు మిజి నిస్సా దయ తోరిస్తివందిజ్ మీరు మిజినె దేవుణుదిజ్ పూజ లెకెండ సీదు. అయ పూజ బత్తిజి మంజిని వజ మండ్రెజ్వలె, దేవుణుదిజ్ కేట అతివజ దేవుణుదిజ్ ఇన్లం అతివజ మండ్రెజ్వలె. దేవుణుదిజ్ సీదెజ్ తగితి పొగిడిఃజి మాడిఃనినిక ఇక్కాదె 2 యా లోకమ్దికారో బత్తిని వజ దేవుణుదిజ్ పడిఃవండ బత్తిదెజ్ అవద్. గాని మీ బత్తు ఆనివందిజ్, మీ మన్ను పూర్తి కొత్తాజ్ కిదెజ్ దేవుణుదిజ్ సరి సీదు. ఆహె కిత్తిజ మీరు ఇనిక కిదెజ్ ఇజి దేవుణు కోరిజనాండ్రో అక్క ఎమేణిక ఇజి నెసి ఒప్పుకొండెజ్ ఆనిదెర్. దేవుణు మీ వందిజ్ కోరిజనిక నెగ్గికాదె, వన్నిజ్ ఇన్లం అతికాదె, ఇని తక్కు సిల్లికాదె.

3 దేవుణు నజి, వన్ని గొప్పు దయదాన్ నజి అపొస్తుడు వజ ఇడ్తాన్. అందెజె నాను మిజి విజెదెరిజ్ వెహ్సాన్. నాను ఎలాగ మర్తికాన్ ఇజి ఒరెన్ ఒరెన్ ఒడఃబినివలె మీరు మన్నిదన్నిజ్ ఇంక నండో మనాద్ ఇజి మీ వందిజ్ ఒడఃబిమాట్. గాని దేవుణు మిజి సిత్తి నమకమ్దిజ్ తగితివజ మిజి మీరె సరిఅతి వజ కొల్త కిదు. 4 ఉండ్రీ ఒడఃలదు కాల్కు కిక్కు ఇజి రక రకమ్ది బాగమ్కు మనె, వనక వనక పణిజ్

☆ 11:26-27 11:26-27 యెసయ 59:20,21; 27:9; యెర్మీయా 31:33,34. ☆ 11:34-35 11:34-35 యెసయ 40:13.

☆ 11:34-35 11:34-35 యోబు 41:11.

వేరే వేరే మన్నె. ⁵ అయవజనె, మాటుబా నండొండార్ గాని క్రీస్తు వెట కూల తోహ్లాజ్ మాటు ఉండ్రె లెకండ మనాట్. మాటు ఉండ్రె ఒడొల్దెదెజ్ సెందితికాట్. ఒరెన్ మరి ఒరెన్ వన్నివందిజ్ మనాన్. ⁶ దేవుణు వన్ని గొప్పు దయ మజీ సెత్తిజ్ నండొ రకమేది వరమకు* సెత్తాన్. యా వరమకు మాటు నెగెండ వాడుకొండెజ్. దేవుణు సెత్తి మాటెజ్ వెహ్లాజ్ అట్టు ఇహిజ అక దేవుణు నెవెట వెహ్లాజ్ ఇజ నీను నమ్మిత్తి వజ వెహ్లాజ్. ⁷ మహివరిజ్ అవ్సరం ఆతికెజ్ కెజి సీదెజ్నా మీ వరం ఇహిజ, అక్క కెదెజ్ దేవుణు మాటెజ్ నెస్సిసి సీదెజ్నా మీ వరం ఇహిజ నెస్సిసి సీదెజ్. ⁸ మహివరిజ్ దయరం వెహ్లాజ్నా మీ వరం ఇహిజ దయరం వెహ్లాజ్. సీబాజి సెనిక మీ వరం ఇహిజ అక్క కల్లి సెల్లి మన్నుదాన్ సీదెజ్. సజమేదిజ్ నడిపిసినికాన్ బాగ నడిపెస్తెజ్వెలె. బాద ఆతివరిజ్ కనికారం తోరిస్సికాన్, సర్దదాన్ కనికారం తోరిస్సెజ్వెలె.

ఎలాగ ప్రేమకిదెజ్

⁹ మీరు మహివరిజ్ కల్లి సెల్లెండ పేమిస్తెజ్. దేవుణుదిజ్ పడిఱ వనకబాణిజ్ దూరం మండ్రెజ్. అక్కెజ్ ఒడ్డె డిస్తెజ్. దేవుణుదిజ్ ఇన్టం ఆతి వనకాజ్ డగ్గు కిదు. ¹⁰ సొంత ఇండ్రొణివరి లెకెండ ఒరెన్ మరి ఒరెన్ వన్నిజ్ నండొ ప్రేమిస్తెజ్. మర్యాద సీని దన్నిలోఇ ఒరెన్, మరి ఒరెన్ వన్నిజ్ వాండ్రు నజీ ఇంక పెరికాన్ ఇజ మర్యాద సీజి మండ్రెజ్. ¹¹ దేవుణుది సెందితి సజతిజ్ లోఇ ఉసార్ ఆజి మండ్రు. బండెజ్ ఆమాట్. ప్రబు పణి లోఇ దేవుణు ఆత్మదాన్ ఉసార్ ఆజి పణికిదు. ¹² దేవుణు మీ వందిజ్ గొప్పు సజతిజ్ కిన్సాన్ ఇజ ఎద్రు సుడఱిజి సర్దదాన్ మండ్రు. కన్టం వానివలె ఒరిసి మండ్రు. పార్దనం కిదెజ్ మన్ని సజతిజ్ వందిజ్ డిన్వేండ పార్దనం కిదు. ¹³ దేవుణుదిజ్ నమ్మిత్తి వరిజ్ ఎయెరిజ్బా ఇనికబా అవ్సరం ఆతిజ వరిజ్ కావాలిస్తెజ్ సీదెజ్. దూరమేదాన్ వాజిని వరిజ్ ఇండ్రొ కూక్కి మిజి మన్నిబాణిజ్ సీజి మర్యాద కిదు.

¹⁴ మిజి బాద కినివరి మున్ను కనికారం తోరిన్అ ఇజి దేవుణుదిజ్ పార్దనం కిదెజ్. ఒబ వరిజ్ దీవిస్తెజ్ ఇజి దేవుణుదిజ్ వెహ్లా వరిజ్ సయిప్ సెల ఇజి వెహ్లాట్. ¹⁵ సర్ద ఆని వరివెట సర్ద ఆజి మండ్రు. దుకం ఆతి వరివెట వరి దుకమేదు కూడఱిజి మండ్రు. ¹⁶ ఒరెన్ మరి ఒరెన్వెట ఉండ్రె మన్ను ఆజి మండ్రు. గర్త ఆమాట్. తకుదివరి వెట కూడఱిజి మండ్రెజ్ మన్ను ఆదు. నానె గొప్పు బుద్ది మన్నికాన్ ఇజి ఒడఱిబిమాట్.

¹⁷ మిజి సెఇక కినివరిజ్ మర్రి సెఇకెజ్ కిమాట్. నెగ్గిక ఇజి విజేరె ఒప్పుకొడఱిని పణిజ్నె కిదెజ్. ¹⁸ విజేరి వెట సమదనమేదాన్ మండ్రెజ్ ఒడ్డె నెగెండ సుడఱిదు. ¹⁹ నాను ప్రేమిసిని కూలెండె, మిజి ఎయెన్బా సెఇక కెత్తిజ వన్నిజ్ మర్రి సెఇక కిమాట్. గాని దేవుణు వన్నిజ్ సిక్కు సీదెజ్ డిసిసిదు. దేవుణు మాటదు దన్నివందిజ్ రాన్ మనాద్. ఇనిక ఇహిజ, “లోకు కెత్తి సెఇ పణి వందిజ్ నీను కోపం తీరిన్యా. అక్క నానె తీరిన్సు. నిజి సెఇక కెత్తివన్నిజ్ నాను సిక్కు సీన”, ఇజి దేవుణు వెహ్లానాన్*. ²⁰ గాని మరి మీరు ఇనిక కిదెజ్ ఇహిజ; నిజి పగాతి వన్నిజ్ బజ కట్టిజ వన్నిజ్ ఉండెజ్ సెల. వన్నిజ్ ఎహ్కా కట్టిజ, ఏరు సెల. నస్తెవలె వాండ్రు సిగు ఆనాండ్రె వన్ని కోపం డిఱిస్నాన్”,* ఇజి రాన్ మనాద్. ²¹ మరి ఒరెన్ కెత్తి సెఇ పణిదిజ్ తగితి పణి మీరు కిమాట్. గాని మీరు వరిజ్ కిని నెగ్గిపణిబాణిజ్ వరి సెఇ పణిదిజ్ గెలిస్తెజ్.

13

ఏలుబడిఱి కినివరిజ్ లోజిదు.

¹ విజేరె ఏలుబడిఱి కినివరిజ్ లోజిజి మండ్రెజ్వలె. ఎందానిజ్ ఇహిజ, ఏలుబడిఱి కినివరిజ్ అతికారం దేవుణునె సీజినాన్. వరిజ్ ఏర్పాటు కెత్తికాన్ దేవుణునె. ² అందెజె ఏలుబడిఱి కినివరిజ్ లోజిజికార్ దేవుణు ఏర్పాటు కెత్తిదన్నిజ్ ఎద్రెసినార్. వరిజ్ తగితి తీర్పుదొహ్కాద్. ³ నెగ్గి పణిజ్ కినివరిజ్ ఆవద్, సెఇ పణిజ్ కినివరిజ్ ఏలుబడిఱి కినికార్ తియెల్ తపెస్నార్. అందెజె ఎయెన్బా ఏలుబడిఱి కినివరిజ్ తియెల్ సెల్లెండ మండ్రెజ్ ఇహిజ, నెగ్గి పణిజ్ కిజి మండ్రెజ్. నస్తెవలె ఏలుబడిఱి కినికార్ మీ వందిజ్ నెగ్గికెజ్ వెహ్లార్. ⁴ ఎందానిజ్ ఇహిజ మీ నడిఱిమి విజు నెగెండ జర్గిదెజ్ ఇజి

* 12:6 12:6 వరమకు ఇహిజ ఉంత్రి పణికిదెజ్ దేవుణు సీని ఇనాయం * 12:19 12:19 ద్వితి 32:35. * 12:20 12:20 సామెత 25:21,22.

పణికినికారె వీరు. దేవుణుదిజ్ పణికిదెజ్ దేవుణు ఏర్పాటు కిత్తికారె వీరు. మీ లోణ ఎయెన్బా తప్పు కిత్తిజ వాండ్రు తియెల్ ఆదెజె. ఎందానిజ్ ఇహిజ తప్పు కిత్తివరిజ్ సిక్స సీదెజ్ విరిజ్ అతికారం మనాద్. దేవుణు ఏర్పాటు కిత్తిజ్ దేవుణు వందిజ్ పణికినికారె లెకెండ, వారు తప్పు కినివరిజ్ సిక్స సీనార్. ⁵ అందెజె అతికారె లోకాజ్ లోజిజ మండ్రెజ్ వలె. సిక్సదాన్ తప్త ఆదెజ్ ఉండ్రె ఆవిద్, లోజిజ మంజనిక సరి అతికదె ఇజి నెస్తిబా లోజిదెజ్ వలె. ⁶ ఏలుబడిః కినికారె దేవుణుదిజ్ పణికిజినార్. వారు అయ ఏలుబడిః కినిపణి వందిజె కాలం విజు గడ్డెప్పినార్. అందెజె మీరు వరి వందిజ్ పన్నుబా తోప్పినాదెర్. ⁷ ఎయెరిజ్బా ఇనికబా సీదెజ్ ఇహిజ అక్కెజ్ సీదెజ్. ఎంబెబా పన్ను తోప్తాజ్ మహిజ బాన్ పన్ను తోప్తాజ్. ఎయెరిజ్ మర్యాద సీదెజ్ ఇహిజ వరిజ్ మర్యాద సీదెజ్. ఎయెరిజ్ గవరం సీదెజ్ ఇహిజ వరిజ్ గవరం సీదెజ్.

ప్రబు మర్ది వాజని కాలం డగ్రు ఆత మనాద్

⁸ ఎయెర్బాన్బా అప్పు తీరిన్ఎండ ఇడమాట్. ఎసెజ్బా ఒరెన్ మరి ఒరెన్ వెట ప్రేమిస్సికాదె అప్పు లెకెండ మనీద్. మహివరిజ్ ప్రేమిస్సికాన్ దేవుణు రూలుజ పూర్తి లోజినాన్. ⁹ దేవుణు రూలుజ లోణ రకరకమ్మె రూలుజ్ మనె. వనకలోణ సెగం ఇనికెజ్ ఇహిజ, “రంకు బూలాదెజ్ ఆవిద్. లోకాజ్ సప్తెజ్ ఆవిద్. డొజ కిదెజ్ ఆవిద్. ఆఇవరిజ్ మన్నికెజ్ నజి కావాలి ఇజి సెఇ ఆస ఆదెజ్ ఆవిద్” గాని యా రూలుజ్ విజు కూడుఃప్తిజ, యాకాదె, “నీను నిజి ప్రేమిన్అ”, ఇజినె. ¹⁰ మహి వరిజ్ ప్రేమిస్తిజ వరిజ్ ఇని తప్పుబా నీను కిజ గదె. అందెజె మహివరిజ్ ప్రేమిసినికాన్ దేవుణు రూలుజ విజు వనకాజ్ పూర్తి లోజిజినాన్.

¹¹ నాను వెప్తాలెకెండ మీరు కిజి మండ్రెజ్ వలె. ఎందానిజ్ ఇహిజ, మాటు బత్కిని యా కాలం నండొ ముకెలమాతి కాలం ఇజి మీరు నెసినిదెర్. ప్రబు మర్ది వాజి మజి రక్కిసీని కాలం డగ్రు ఆత మనాద్ కాక నిర్దదాన్ నిజ్జెజె తెలి అతివరి వజ జాగర్త మండ్రు. తోలిత మాటు నమ్మిత్తి మహి కాలమ్దిజ్ ఇంక అయ సమయం డగ్రు ఆత మనాద్. ¹² రెయి అందిజి వాజినిలెకెండ మా బత్కుబా అందిజి వాజినాద్. క్రీస్తు మర్ది వాని కాలం డగ్రు ఆత మనాద్. అందెజె సికటిదు కిని సెఇ పణిజ్ విజు డిఃసి సీదెజ్. వేడెక విదెమ్దిజ్ సొనికాన్ దన్నుజ్ కావాలిస్తికెజ్ తోడఃగిజి విదెమ్దిజ్ తయార్ అనిలెకెండ, సెఇ వనకాజ్ ఎద్రిస్తిజ్ తయార్ ఆజి మండ్రు.

¹³ సీకటుదు కిని సెఇ పణిజ్ డిఃసి సీజి మాటు జాయ్దు నడిఃసి మండ్రెజ్. కల్లు విందుజ సొన్ని ఉణిజి సొస్తిజ్ ఆవిద్. మొగ కొడొర్ గాని అయ్లి కొడొక్ గాని రంకు బూలాదెజ్ ఆవిద్, టంటెజ్ ఆదెజ్ ఆవిద్, గోస ఆదెజ్ ఆవిద్. ¹⁴ మరి ఎలాగ మండ్రెజ్ ఇహిజ, మహి లోకురిజ్ తోర్తివజి మీరు ప్రబు ఆతి యేసుక్రీస్తు లెకెండ మండ్రు. మీ ఒడొల్లి సెఇ ఆసెజ వజ కిజి సర్ద ఆదెజ్ ఇజి ఒడొబిజి మంజని మన్నుదాన్ మన్నాట్.

14

అనుమానం ఆని నమ్మితికారె వందిజ్

¹ ఇని ఇనికెజ్ కిదెజ్ దేవుణు సరి సీనాండ్రొ ఇజి అనుమానం ఆని నమ్మిత్తికారె మనార్. వారు నమ్మిత్తి దిన్నివందిజ్ పూర్తి అర్థం కిఇకారె గాని వరిజ్ డగ్రు కిదు. గాని నమ్మిత్తికారె ఇని ఇనికెజ్ కిదెజ్ ఆనాద్ ఇజి ఒడొబిని దన్నులోణ తేడ వానివలె వరివెట వాదిస్సాట్. ² విజు తిండ్రెజ్ ఆనాద్ ఇజి ఒరెన్ నమ్మిజినాన్. మరి ఒరెన్ కుసెన్ నె తింజినాన్. ఎందానిజ్ ఇహిజ, వారు నమ్మిత్తి దిన్నివందిజ్ పూర్తి అర్థం ఇంక కివన్. ³ విజు తినికాన్, విజు తిన్ ఇ వన్నిజ్ తక్కుదికాన్ ఇజి నుడదెజ్ ఆవిద్. విజు తిండ్రెజ్ ఆవిద్ ఇజి ఒడొబినికాన్ విజు తినికారె తప్పు కిజినార్ ఇజి వెప్తాజ్ ఆవిద్. ఎందానిజ్ ఇహిజ దేవుణు వరిజ్ డగ్రు కిత్త మనాన్. ⁴ మరి ఒరెన్ ఎజమానిజ్ వన్ని పణిమణిసి కినికెజ్ సరియాతికెజ్నో, ఆఇకెజ్నో ఇజి వెప్తాజ్ తగితికారె మీరు ఆఇదెర్. వాండ్రు కిని పణిజ్ నెగ్గెకెజ్నో సెఇకెజ్నో ఇజి వన్ని ఎజమానినె వెప్సాన్. అయావజనె నమ్మిత్తికాన్ కినిపణిజి వందిజ్ దేవుణునె తిర్పు కిజి సరిఅతికదొ ఆవిదొ ఇజి వెప్సాన్. ఎందానిజ్ ఇహిజ సరిఅతిక కిదెజ్ దేవుణు వన్నిజ్ సత్తు సినాన్లె. ⁵ నెగొండార్, ఉండ్రొ రోజు మహి రోస్సాజ్ ఇంక నెగ్గి రోజు ఇజి ఒడొబిజినార్. మరి ఒరెన్ విజు రోస్సు ఉండ్రె లెకెండ

☆ 13:9 13:9 నిర్మకు 20:13-15,17.

సుడోజినాన్. ఒరెన్ ఒరెన్ వన్నిజ్ వాండ్రె వన్ని మన్నుదు ఒడోబినిక ఎందానిజ్ అహు ఒడోబిజినాన్ ఇజి బోటాజ్ నెసి తిర్మానం కిదెజ్ వెలె. ⁶ ఉండ్రీ రోజు నెగ్గి రోజు ఇజి ఇడ్వికాన్ అక్క ప్రబు వందిజ్ ఇడ్జినాన్. విజు తినికాన్ ప్రబుజ్ వమదనమ్కు వెప్పొ ప్రబుజ్ గవరం సీదెజ్ ఇజి తింజినాన్. విజు తిన్ఇకాన్ తిని వనక వందిజ్ ప్రబుజ్ వందనమ్కు వెప్పొ ప్రబుజ్ గవరం సీదెజ్ ఇజి విజు తిన్ఎండ మంజినాన్.

⁷ మా లోఇ ఎయెన్బా వన్నిజె సర్ల కిబిస్తెజ్ ఇజి బత్తిఎన్. వన్ని వందిజె సర్ల కిబిస్తెజ్ ఇజి సాఎన్. ⁸ ఎందానిజ్ ఇహిజు మాటు బత్తినివెలె ప్రబుజ్ ఇస్టం కిబిస్సి లెకెండె బత్తిదెజ్. సానివల ప్రబుజ్ ఇస్టం కిబిస్సి లెకెండె సాదెజ్ వలె. అందెజె మాటు బత్తితిజ్బా సాతిజ్బా ప్రబుజ్ నెందితికాటె.

⁹ దినివందిజె సాతి వరిజ్ని బత్తిని వరిజ్ విజేరిజ్ ప్రబు లెకెండె మండ్రెజ్ క్రీస్తు సాజు మర్లి బత్తితాన్. ¹⁰ అహిజు, ఎయెర్బా మరి ఒరెన్ వన్నిజ్ తీర్పు తీరిస్తెజ్ అవిద్. ఎయెర్బా తకుదికాన్ ఇజి సుడోదెజ్ అవిద్. ఎందానిజ్ ఇహిజు మాటు విజేటె తప్పు కితికాటో, సరి అతిక కితికాటో ఇజి దేవుణు తీర్పు కిదెజ్ వన్ని ఎర్దు నిల్వూట్. ¹¹ దినివందిజ్ మాటు ఎలాగ నెనినాట్ ఇహిజు, ప్రబు వెప్పొ మాటెజ్ ఈహు రాస్సు మనాద్. ఇనిక ఇహిజు, “నాను ఒద్దె నిజం వెప్పొన, నానె దేవుణు ఇజి లోకుర్ విజేరె నా ఎర్దు ముణుకుజ్ ఊర్వార్. నానె దేవుణు ఇజి లోకుర్ విజేరె ఎర్దు వెప్పార్”. ¹² అహిజు, ఒరెన్ ఒరెన్ కిత్తి దన్నివందిజ్ దేవుణు ఎర్దు లెక్క ఒవజెప్తెజ్ వలె. దేవుణు తీర్పు తీరిస్సాన్.

¹³ అందెజె అజవరిజ్ తీర్పు తీరిసినిక డిసిసినాట్. అక్కాదె అఎండ, మరి ఒరెన్ నమ్మిత్తి వన్నిజ్ తప్పు సరిదు నడిపిసిని ఇనికబా కిదెజ్ అవిద్ ఇజి మీ మన్నుదు ఒప్పుకొండు. ¹⁴ నాను యేసుప్రబు వెట కూడితిజ్ ఉండ్రీ నిజం నెసిన్. ఇనిక ఇహిజు, తిండ్రెజ్ అవిద్ ఇజి దేవుణు వెప్పొ తిండి ఇనికబా సిల్లెద్. గాని ఇనికాదో ఉండ్రీ తినిక అవిద్ ఇజి ఎయెన్బా ఒడోబిత్తిజు అక్క వాండ్రు తినిక తప్పు. ¹⁵ నీను ఇనికదో ఉండ్రీ తిని దన్నిదాన్ మరి ఒరెన్ నమ్మిత్తికాన్ మన్నుదు బాద అతిజు నీను వన్ని ముస్సు ప్రేమ తోరిన్ఇ. నీను తినిదన్నిదటాన్ మరి ఒరెన్ నమ్మిత్తి వన్ని నమకమ్దిజ్ పాడు కిమా. ¹⁶ నెగ్గికెజ్ ఇజి ఒడోబిజు నీను కినికెజ్, మరి ఒరెన్ నమ్మిత్తి వన్నిజ్ పాపం కిబిస్తెజ్ తగితికెజ్ ఇహిజు అక్కెజ్ నెఇకెజ్ ఇజి వారు వెప్పార్. అందెజె నెగ్గి ఇహిజ్బా కిమా. ¹⁷ దేవుణు ఏలుబడిః కినిదన్నిజ్ లోజిజు మండ్రెజ్ ఇహిజు, ఇనికెజ్ తిండ్రెజ్ ఉండ్రెజ్ ఇజి రూలుజ్ అఉ. గాని దేవుణు ఏలుబడిఃదిజ్ ఎలాగ లోజిదెజ్ ఇహిజు, అత్తు సత్తుదాన్ దేవుణుదిజ్ ఇస్టం అతి వజు కిదెజ్, లోకుర్ వెట సమదనమ్దాన్ మండ్రెజ్, మన్ను లోఇ సర్ల నిండ్రెజు మండ్రెజ్. ¹⁸ యా లెకెండె క్రీస్తుజ్ లోజినికాన్ దేవుణుదిజ్ ఇస్టం కిబిస్సాన్. లోకుర్ వన్నిజ్ నెగ్గికాన్ ఇజి వెప్పార్.

¹⁹ అందెజె మాటు ఒరెన్ మరి ఒరెన్ వన్నివెట సమదనమ్దాన్ మండ్రెజ్ సుడోదెజ్ వెలె. మాటు ఒరెన్ మరి ఒరెన్ వన్నిజ్ నమకమ్దు సత్తు కిబిస్తెజ్ సుడోదెజ్ వెలె. ²⁰ ఇని తిండిబా తిండ్రెజ్ అనాద్ ఇజి ఒడోబిజు, దేవుణు కిత్తి పణిజ్ పాడోః కిమా దేవుణు సుడోతిజ్ విజు రకమది బోజునమ్కుబా తిండ్రెజ్ అనికెజ్ గాని, నీను తినిక, తిండ్రెజ్ అఇకెజ్ ఇజి మరిఒరెన్ వన్నిజ్ తప్పు కిబిస్తిజు అక్క తినిక తప్పునె. ²¹ కండె తింజి గాని ద్రాక్కు కల్లు ఉణిజి గాని, మరి నన్నిపణిజ్ ఇనికెజ్ గాని కిత్తిజు అక్క మరి ఒరెన్ నమ్మిత్తి వన్నిజ్ తప్పు కిబిస్తెజ్ కూడితిజు అక్కెజ్ డిస్సికాదె నెగ్గిక. ²² నిన్ని సజతిజు వందిజ్ నీను నమినికెజ్ నీను అఇవరిజ్ వెప్పాజ్ పొని. నిన్ని సజతిజు నీనుని దేవుణు నెస్తిజు అనె. ఉండ్రీ పణికిత్తి వెనుక, సరి అతిక కితానో, సిలిజు తప్పు కితానో ఇజి అనుమానం అవిండ మహిజు నీను దేవుణుబాణిజ్ సర్ల తసిని. ²³ గాని ఉండ్రీ తినిక దేవుణు ఎర్దు సరిఅతికదో అవిదో ఇజి అనుమానం అనికాన్, అక్క తిహిజు తప్పు కిత్తాన్ ఇజి తిర్పు వానాద్. ఎందానిజ్ ఇహిజు, తిండ్రెజ్ అఇక ఇజి ఇడ్జిక వాండ్రు తిహాన్. మాటు ఇనిక కిత్తిజ్బా దేవుణు ఎర్దు సరి అతిక కిత ఇజి నమకం సిల్లిజు అక తప్పునె.

15

¹ ఇనికెనికెజ్ సరిఅతికెజ్ కిదెజ్ అనె ఇజి మన్నుదు బాగ నెసిని నమ్మిత్తికాట్ అతి మాటు మజి ఇస్టం అతికెజ్ ఉండ్రెనె కిజి మండ్రెజ్ అవిద్. గాని అనుమానం అతివరిజ్ మాటు బరిస్తెజ్ వలె. ² మరి ఒరెన్ నమకమ్దు పిరినివందిజ్ మా లోఇ ఒరెన్ ఒరెన్ వన్నిజ్ నెగ్గికెజ్ కిజి సర్ల కిబిస్తెజ్. ³ క్రీస్తు కిత్తి లెకెండె మాటు కినాట్. క్రీస్తు వన్ని సర్ల ఉండ్రె వందిజెనె తోఎండ దేవుణుదిజ్ ఇస్టం అతిలెకెండె కిత్తాన్. కీర్తన

పుస్తకమీదు రాస్తి లెకెండ్, “లోకుర్ నిజి నింద కిత్తివెలె, అయ నింద నజి వెప్పొ లెకెండ్”, ఇజి క్రీస్తు దేవుణుదిజ్ వెహ్లాన్. 4 దేవుణు మాటదు ముందాల్ రాస్తి మన్నికెజ్ విజు మజి నెస్సిన్దెజ్ రాసి ఆత మనాద్. ఎందానిజ్ ఇహిజ, మాటు ఓర్పుదాన్ మంజి దేవుణు మాటెజ్ మజి ఉసార్ కిబిసి, మాటు ఆసదాన్ ఎద్దు సుడేజి మండ్రెజ్ వలె.

5-6 మజి ఓర్పుని ఉసార్ కిబిస్సిక దేవుణు ఉండ్రె మన్ను ఆజి మండ్రెజ్ సాయం కిపిన్. ఇహిజ యేసు క్రీస్తు వజ మండ్రు. నస్తివలె మా ప్రబు ఆతి యేసు క్రీస్తుజ్ బుబ్బు ఆతి దేవుణుదిజ్ ఉండ్రె మన్ను ఆజి ఉండ్రె లెకెండ్ పొగ్డిడెజ్ ఆనిదెర్.

7 అహిజ క్రీస్తు మిజి డగ్రు కిత్తి లెకెండ్ మీరు ఒరెన్ మరి ఒరెన్ వన్నిజ్ డగ్రు కిదు. ఎందానిజ్ ఇహిజ అహు కిత్తిజ లోకుర్ దేవుణుదిజ్ పొగ్డిసార్. 8 నాను ఇనిక వెప్పొన ఇహిజ, దేవుణు నమ్మిదెజ్ తగ్గివాన్ ఇజి, ఇహిజ వాండ్రు, మాటు యూదురి అనిగొగొరిజ్ కిత్తి ఒటు లెకెండ్ నిజం కినాన్ ఇజి తోరెన్దెజ్ ఇజి క్రీస్తు యూదురిజ్ పణి మణిసి ఆత మహాన్.

9 అక్కాదె ఆవదు, యూదురు ఆఇజాతిదికార్ దేవుణు తోరిస్సి గొప్ప కనికారం వందిజ్ దేవుణుదిజ్ పొగ్డిడెజ్ ఇజిబా క్రీస్తు యూదురిజ్ పణిమణిసి ఆతమహాన్. ఎలాగ ఇహిజ, “అందెజి నాను యూదురు ఆఇ లోకుర్ నడిమి నిజి పొగ్డిజిన. నిజి పొగ్డిజి పాటెజ్ పార్పు”, ఇజి రాస్తి మన్నె.

10-11 ఈహుబా రాస్తి మనాద్, “యూదురు ఆఇజాతిదికార్ ఆతికిదెరా మీరు దేవుణు లోకుర్ వెట నర్ల ఆదు”*. మరి ఉండ్రెబాన్ ఈహు రాస్తి మనాద్. “యూదురు ఆఇజాతికార్ ఆతికిదెరా, మీరు ప్రబుజ్ పొగ్డిడు. విజెర్ లోకుర్ వన్నిజ్ పొగ్డిడు”* 12 మరి యెసయ ప్రవక్త ఈహా వెప్పొనాన్, “యెస్సయి తెగాదికాన్ ఒరెన్ వానాన్లె. యూదురు ఆఇవరిజ్ ఏలుబడి: కినికాన్ వానాన్. వన్నిజి వారు ఆసదాన్ ఎద్దు సుడేజి మంజినార్”*.

13 ఎద్దు సుడేజి మండ్రెజ్ మిజి అటిసిని దేవుణుదిజ్, మీరు నమ్మిజి మంజినిదెర్ కాక మీ లోఇ నర్లని సమదనం నిండ్రెపిన్. ఎందానిజ్ ఇహిజ, అసదాన్ ఎద్దు సుడేజి మంజిని లోఇ దేవుణు ఆత్మ సత్తు మిజి మరి నండొ పిరిప్పెజ్ ఇజి.

దేవుణు సువార్ల యూదురు ఆఇకార్బా వెంజినార్

14 నమ్మితి తంబెరిజాండె, మీరు ఒరెన్ మరి ఒరెన్ వెట నెగెండ మంజినిదెర్ ఇజి నాను నెసిన్. మీరు బాగ నెస్తిజ్ ఇజి దేవుణు సుడేజినికెజ్ విజు మీరు నెస్సిదెర్ ఇజి నాను నెసిన్. ఒరెన్ మరి ఒరెన్ వన్నిజ్ బుద్ది వెప్పొ నెస్సిన్దెజ్ అట్టిదెర్ ఇజి నాను మీ వందిజ్ నిజం నెసిన్. 15-16 గాని నాను యా ఉత్తమీదు నెగం సజతిజ వందిజ్ మిజి ఎత్తు కిబిస్సివలె దయరమ్దాన్ వెప్తా. ఎందానిజ్ ఇహిజ, యేసుక్రీస్తుజ్ ఉండ్రె పణిమన్ని లెకెండ్ యూదురు ఆఇ జాతిది వరి నడిమి మండ్రెజ్ ఇజినె దేవుణు వన్ని గొప్ప దయాదగ్గుం నా మున్ను తోరిస్తాన్. దేవుణు ఆత్మ వరిజ్ కేటకిజి దేవుణుదిజ్ సిదెజ్ తగితి ఉండ్రె పూజ లెకెండ్ వరిజ్ తయార్ కినికాదె నా పణి. దన్నివందిజె ఒరెన్ పుజెరి లెకెండ్ నాను వరిజ్ సువార్ల వెప్పొన. 17 అందెజి, నాను క్రీస్తుయేసు వెట కూడేజి మన్నిజ్, దేవుణుదిజ్ కిని సేవ పణివందిజ్ పొగ్డిజిన. 18 యూదురు ఆఇకార్ దేవుణుదిజ్ లోజిని వందిజ్ క్రీస్తు నా వెట కిత్తి పణిజ్ ఉండ్రె వందిజి నాను దయరమ్దాన్ వెప్పొన. నాను నా మాటెజాణిజ్, నా పణిజాణిజ్ దేవుణుదిజ్ లోజిదెజ్ వరిజ్ నడపిన్. 19 బమ్మాతి పణిజాణిజ్ని దేవుణు ఆత్మ సత్తుదాన్ నడపిన్. ఆహె యెరూసలెం పట్టుం మొదొల్ని అయ సుట్టు పడక మన్ని పట్టుమకు విజు ఇలారికు ఇని పట్టుం దాక విజు బాడ్డిజ సొన్ని నాను క్రీస్తు వందిజ్ సువార్ల పూర్తి సాటిన్ మన్ను. 20 క్రీస్తు వందిజ్ సాటి ఆఇ బానె సువార్ల సాటిన్దెజ్ ఇజినె నజి ఉండ్రె ఆస. ఎందానిజ్ ఇహిజ, మరి ఒరెన్ సువార్ల కినిబాన్ సొన్ని వన్ని పణి లాగ్గెజ్ ఆవద్ ఇజినె నా మన్ను. 21 గాని నాను ఇనిక కిత్తి ఇహిజ, దేవుణు మాటదు రాస్తిమన్ని లెకెండ్ కిత్త, “వన్నివందిజ్ ఎనెజ్బా వెహె ఆఇకార్ వన్నివందిజ్ నిజం ఆతిక సూణార్. వన్నివందిజ్ ఎనెజ్బా వెహె ఆఇకార్ వన్నివందిజ్ అర్దం కినార్”*. 22 యా పణికిజి మహిజ్ నాను మీబాన్ వాదెజ్ నండొ అడ్డు ఆత మహాద్.

* 15:3 15:3 కీర్తన 69:9. * 15:9 15:9 2నము 22:50; కీర్తన 18:49. * 15:10-11 15:10-11 ద్విత్తి 32:43. * 15:10-11 15:10-11 కీర్తన 117:1. * 15:12 15:12 యెసయ 11:10. * 15:21 15:21 యెసయ 52:15.

పవులు రోమపట్టణం సొండ్రెజ్ ఒడోబిజినాన్

23-24 గాని ఏలు యా ప్రాంతమోకాడ్ మన్ని పణిజ్ వీజితె. నండొ పంటిజ్ అస్సిబా మీబాన్ వాజి మిజి నుడోదెజ్ ఆన ఆతిజ్బా, ఏలు వాదెజ్ ఎద్దు నుడోజిన. నాను స్పాయిను దేసెం సొని సరిదాన్, మిజి వాజి నుడోజి నణెం మీ వెట మంజి సర్ల ఆదెజ్ ఆన ఆజిన. బాణిజ్ సొనివెలె మీబాణిజ్ సాయం దొహ్కెజ్ ఇజి నుడోజిన.

25 గాని, ఏలు యెరూసలేమ్దు మన్ని దేవుణుదిజ్ నమ్మిత్తి వరిజ్ డబ్బు ఒత్తెజ్ యెరూసలేమ్దు సొన్నిన. 26 ఎలాగ ఇహిజి యెరూసలేమ్దు మన్ని నమ్మిత్తి వరి లొఇ డబ్బు సిల్లివరిజ్ సంద సీదెజ్ మాసిదోనియ ప్రాంతమదు మన్ని నమ్మిత్తికార్ని అకాయ ప్రాంతమదు మన్ని నమ్మిత్తికార్ వారె ఆజి ఇస్టం ఆతార్. 27 ఒబ, వారు సీదెజ్ ఇస్టం ఆతార్ సీజినార్. నిజమె, యూదురు ఆఇకార్ యెరూసలేమ్దు మన్ని దేవుణు లోకురిజ్ సాయం కిదెజ్నె. ఎందానిజ్ ఇహిజి, యూదురు ఆఇవరిజ్ ఉండ్రీ అప్పు మనాద్. ఎలాగ ఇహిజి, దేవుణు యూదురిజ్ సిత్తి దీవనమ్కు ఆఇ జాతిదివరిజ్ బాట వాతాద్. అందెజె యూదురిజ్ తక్కు ఆతిక యూదురు అఇకార్ వరిజ్ మన్నివనక లొఇహోన్ బాట కిజి సీదెజె. 28 యా పణి వీజిత ఇహిజి, వరిజ్ సీదెజ్ మన్ని డబ్బు పూర్తి వరిజ్ తప్పండ సిత్తి వెనుక నాను యెరూసలెం పట్టుమ్దాన్ స్పాయిను సొని సరిదు మీబాన్ వానా. 29 నాను మీబాన్ వానివలె క్రీస్తుబాణిజ్ మజి విజెరిజ్ గొప్పు వెరి దీవనమ్కు దొహ్కె ఇజి నాను నెసిన్. 30 ఏలు తంబెరిజాండె, ప్రబు ఆతి యేసుక్రీస్తు ముస్కు. మన్ని నమ్మకం మన్నిదన్నివందిజ్, దేవుణు ఆత్మ మిజి సిత్తి దన్నివందిజ్, మీరు నా వందిజ్ గట్టిజి పార్లనం కిదు ఇజి నాను బతిమాల్లిన. 31 యూదయ దేసమ్దు యేసుప్రబుజ్ నమ్మిఇ యూదురు బాణిజ్ నజి ఇని ప్రమాదం రెండె మండ్రెజ్ పార్లనం కిదు. 32 మరి దేవుణు సిత్తం ఆతిజి నాను సర్లదాన్ వాజి మీబాన్ రోమ్దెజ్ ఇజిబా పార్లనం కిదు. 33 మజి సమదనం సీని దేవుణు మిజి తోడు మసీన్.

16

రోమ పట్టుమ్దు సెగొండార్ నమ్మిత్తి వరిజ్ పవులు వందనమ్కు వెహ్సినాన్.

1 కెంకెయూదు మన్ని దేవుణు సజమ్దు సేవ కిదెజ్ ఏర్పాటు ఆతి పిబె ఇని మా బీబి వందిజ్ నాను వెహ్సిన. అది గొప్పు నెగ్గెకాద్. 2 దేవుణుదిజ్ నమ్మిత్తి దన్నిజ్, నమ్మిత్తికార్ కిదెజ్ తగితి లెకెండ్ డగ్గు కిదు. దన్నిజ్ కావాసిక ఇనికబా మీబాన్ మహిజి, మీబాణిజ్ సీజి మండ్రు. ఎందానిజ్ ఇహిజి, అది నండొండారిజ్ మరి నజిబా సాయం కిజి మహాద్.

- 3 క్రీస్తు వందిజ్ మా వెట కూడోజి పణికిత్తి మహి ప్రిస్తిలాదిజ్ని దన్ని మాసి అకులాదిజ్బా మా వందనమ్కు వెహ్సా. 4 వారు నా పాణం వందిజ్ వరి పాణమ్కు సీదెజ్ తయార్ ఆతికార్. నాను ఒరెనె ఆవి, యూదురు ఆఇవరి సజమ్కు విజు వారు కిత్తి దన్ని వందిజ్ వందనమ్కు వెహ్సినార్.
- 5 మరి వరి ఇండ్రొ మన్ని నమ్మిత్తివరిజ్బా వందనమ్కు వెహ్సా ఆసియ ప్రాంతమదు తొలిత క్రీస్తు ముస్కు. నమకం ఇడ్డి, నాను ప్రేమిసిని ఎపాయినెటుజ్ వందనమ్కు వెహ్సా.
- 6 మీ వందిజ్ నండొ కస్తబాడోజి పణి కిత్తి మరియెజ్ వందనమ్కు.
- 7 నావెట జేలిదు మహి, నా సొంత లోకుర్ యూదురు ఆతి అండ్రొనికుని, యూనియాకు వందనమ్కు వెహ్సిన. వారు అపొస్తురు నడిమి పెరికార్ ఇజి విజేరి నెసినార్. నజి ఇంక ముందాల్ వారు క్రీస్తు లోకు ఆతికార్.
- 8 ప్రబు వందిజ్ నాను నండొ ప్రేమిసిని అంప్లియతుజ్ వందనమ్కు.
- 9 క్రీస్తు వందిజ్ మా వెట పణి కిత్తి ఉర్బానుజ్ వందనమ్కు. నాను నండొ ప్రేమిసిని స్టాకుజ్ వందనమ్కు.
- 10 క్రీస్తు ముస్కు నిజమాతి నమకం ఇడ్డాన్ ఇజి రుజువ్ కిత్తి మన్ని అపెలుజ్ వందనమ్కు. అరిస్తాబులు ఇండ్రొణి వరిజ్ వందనమ్కు.
- 11 నా సొంత లోకు యూద వాండ్రు ఆతి హెరోదియెనుజ్ వందనమ్కు. నర్కిను ఇండ్రొణి వరి లొఇ ప్రబు ఆతి క్రీస్తుజ్ నెందితి వరిజ్ వందనమ్కు.

- 12 క్రీస్తు వందిజ్ కష్టబాడేజి పణికినికెజ్ అతి త్రువయానుజ్ని త్రపొసానుజ్ వందనమ్కు.
 నాను నండొ ప్రేమిసిని పెర్నిసుజ్ వందనమ్కు. అది ప్రబు వందిజ్ నండొ కష్టబాడేజి పణి
 కితామహద్.
- 13 ప్రబు వందిజ్ గొప్ప నెగ్గెకాన్ ఇజి కేట అతి రుపసుజ్ వందనమ్కు. వన్ని అయ్సిజ్ వందనమ్కు.
 అది నజీబా యాయ్ వజనె.
- 14 అసునక్రీస్తుజ్, ఫ్లెగొముజ్, హెర్మెకునుజ్, పత్రోబుజ్, హెర్మెకునుజ్, వరి వెట మన్ని నమ్మితి
 వరిజ్ వందనమ్కు.
- 15 పిలోగునుజ్, యూలియాకుజ్, నెర్యాతునుజ్, వన్ని తజీసిజ్, ఒలంపాకుజ్ వరివెట మన్ని
 నమ్మితి వరిజ్ వందనమ్కు.
- 16 నమ్మితి వరిజ్ తగితి లెకెండ ఒరెన్ మరి ఒరెన్ వన్నిజ్ ముదు కిజి వందనమ్కు వెహ్టూ. యా
 బాడ్డిదు క్రీస్తుజ్ నమ్మితి సజమ్కాణికార్ మిజి వందనమ్కు వెహ్నినార్.
- 17 నమ్మితి తంబెరిజాండె, మీరు నెస్తి మన్ని బోదదిజ్ డిసిసి దన్నిజ్ వెత్తెకం అతి బోద నెస్సిసి
 ఆఇ గుంపుజ్ కిడిజ్ ఇజి వెహ్నికార్ మనార్. వరి వందిజ్ జాగర్త మండ్రు. నన్ని వరి బాణిజ్ దూరం
 మండ్రు ఇజి నాను బతిమాల్లి వెహ్నిన. 18 నన్నికార్ మా ప్రబు అతి క్రీస్తుజ్ పణి కినికార్ ఆవెర్. గాని
 వారు వరిజ్ ఇష్టం అతి దన్నివందిజె బత్తిజినార్. నెగ్గె మాటెజ్ వెహ్నివజ బడాణియి మాటెజ్ వెహ్ని
 వీరు మొసెం కిజినార్. వారు సెఇలోకు ఇజి నెన్ఇకార్ వరి మాటెజాణి మొసెం కిబె ఆనార్. 19 మీరు
 దేవుణు మాటదిజ్ లోజీత్తి మన్నికార్ ఇజి విజెరె నెస్సార్. అందెజె మీ వందిజ్ నాను సర్త ఆజిన. గాని
 మీరు నెగ్గెక ఇనిక ఇజి నెస్సి దన్నిలోఇ బుద్ది కల్లిజి మండ్రు. సెఇ వనకవెట కూడేవిండ దన్నివందిజ్
 కల్లిసిల్లెండ మండ్రు ఇజి నాను ఆస ఆజిన.
- 20 సమదనం సిని దేవుణు, సయ్యూను సత్తు పాడూకిజి వనిజ్ మీ కాలూజ్ అడ్గి బేగినె సిదులు
 మటిస్సాండ్రె ఇడ్సాన్. ప్రబు అతి యేసుబాణిజ్ దయాదర్తం మిజి తోడు మనిద్.
- 21 మా వెట కూడేజి పణికిని తిమోతి మిజి వందనమ్కు వెహ్నినాన్. నా సొంత లోకుర్ యూదురు
 అతి లూకియ, యాసోను, సాసి పత్తు ఇనికార్ వందనమ్కు వెహ్నినార్.
- 22 పవులు వెహ్ని సిత్తిజ్ యా ఉత్తం రాసిని తెర్తియు ఇని నాను ప్రబు వందిజ్ వందనమ్కు వెహ్నిన.
- 23 సజమ్దు కూడేజిని వరిజ్ విజెరెజ్ని నజీని నెగెండ స్టూణి గాయియు మిజి వందనమ్కు
 వెహ్నినాన్. యా పట్టమదు పెర్ని డబ్బుజ్ లెక్క సుడేజి అన్నికాన్ ఎరస్తు, నమ్మితికాన్
 అతి క్వార్తును మిజి వందనమ్కు వెహ్నినార్. 24 మా ప్రబు అతి యేసు క్రీస్తుబాణిజ్ వన్ని
 దయాదర్తం మీబాన్ మనిద్.
- 25-26 మీ నమకమ్దు మిజి గటిజ నిల్పెజ్ దేవుణు అట్సాన్. నాను యేసుప్రబు వందిజ్ సువార్త
 సాటిసినివలె యాకదె వెహ్నిన. నండొ కాలం దేవుణు డాప్తి ఇడ్డి మహి నిజమాతి మాట ఏలు
 దేవుణు వెహ్టా మనాన్. ఏలు అయ నిజమాతి సువార్త మాటు సాటిస్తిజ్ ప్రవక్తరు రాస్తి మాటదానె
 క్రీస్తు వందిజ్ విజెరె నెసినార్. ఎలాకాలం మన్ని దేవుణు ఆగ్నదాన్ యా సువార్త విజు లోకాజ్
 నెస్సిసినాన్. ఎందానిజ్ ఇహిజ విజెరె లోకుర్ నమ్మితి లోజిదిజ్ ఇజి. 27 విజు వనకాజ్ నెసిని
 ఒరెండ్రె దేవుణుదిజ్, క్రీస్తుయేసుదాన్ ఎలాకాలం లోకుర్ పొగ్డిజి మనిర్. ఆమెన్.

అపొస్తుడు ఆతి పవులు కొరింతి పట్టమదు మని నమ్మిత్తి వరి సజమ్దిజ్ రాస్తి మొదోహి ఉత్తం

నెల్వ కిబిసినిక

ఇక్క అపొస్తుడు ఆతి పవులు కొరింతి పట్టమదు మన్ని దేవుణు సజమ్దిజ్ రాస్తి మొదోహి ఉత్తం. పవులునె ఇక్క రాస్తికాన్ ఇజి యా ఉత్తమనె రుజుప్ సీజినాద్. 1:1,16,21. దేవుణు సజమ్దు మన్ని విజు సజతిజ్ వందిజ్, నమ్మితి వరి నడివి మన్ని గొడబెజ్ వందిజ్, దేవుణుదిజ్ పొగడిజి మాడిస్సి వందిజ్, దేవుణు పణి వందిజ్ సీని వందిజ్, నమ్మితికార్ జటు ఆజిని వందిజ్, సజమ్దు మన్ని బోదెక్ ఎలాగ మండ్రెజ్ ప్రబు ఏర్పాటు కిత్తి బోజనం వందిజ్, పెండ్లి వందిజ్, మరి యాలెకెండ్ మన్ని నండో సజతిజ్ వందిజ్ ఎలాగ కిదెజ్ ఇజి యా ఉత్తమదాన్ పవులు కొరింతి సజమ్ది వరిజ్ వెహినాన్. యా ఉత్తమదు రాస్తిమన్ని సజతిజ్ వందిజ్ సుడోతిజ అయా కాలమదు మని సజమ్దిజ్ ఆవిండ యా కాలమదు మన్ని సజమ్కాజ్బా యాక ముకెలమాతి ఉండ్రె ఉత్తం. అక్కదె ఆవిండ నమ్మితి వన్నిజ్ మన్ని ప్రేమ వందిజ్, సాత్తికార్ మరజి నిజ్ని వందిజ్ రాస్తి సజతిజ్ ఎలాకాలమదు మన్ని నమ్మితి వరి వందిజ్ రాస్తిక్కాద్. యా ఉత్తం యేసుక్రీస్తు సాజి మరజి నిజితి వసుక యాబ్బుయ్ ఏడునో యాబ్బుయ్ ఆరునో పంటజ్ వెసుక రానె ఆత్త మనాద్ ఇజి విజెరె నమ్మిజినార్. పవులుని వన్ని జటుదికార్ వారు రుండి సుట్టు సువార్త సాటిస్తెజ్ సాస్సి మహివలె (A.D. 50) కొరింతి పట్టమదు అందితార్. డగ్గు 18 నెల్లెజ్ మంజి సువార్త పణి కిజి మహిజ్ బాన్ దేవుణు సజం తయాతాద్. (అపొస్తురు కిత్తి పణిజ్ 18:1-8). పవులు ఎపెను పట్టమదు మహివలె, బాణిజ్ యా ఉత్తం రాస్తికాన్. యా ఉత్తం నెగెండ్ సద్దీజి నెని మహిజ దేవుణు సజం ఎలాగ మండ్రెజ్ ఇజి సజమ్దిజ్ నడిపినిని వరిజ్, నమ్మితి వరిజ్ నెగెండ్ అర్థమానాద్.

మొదోల్

1 దేవుణు ఇస్తుమాతి వజ, క్రీస్తుయేసుజ్ అపొస్తుడు లెకెండ్, వాండ్రు కూక్తి మని పవులు ఇని నాను కొరింతి పట్టమదు మని దేవుణు సజమ్దిజ్ రాసిని ఉత్తం. మా తంబెరి ఆతి సాస్తినెను నా వెట మనాన్. 2 మీరు లోకమదు విజుబాన్ మని వరిజ్ని మజి ప్రబు ఆతి యేసుక్రీస్తు పేరు అసి పొగడిజి మాడిస్సి వరి వెట మీరుబా కూడ్లి మంజినిదెర్. అందెజె మీరు ప్రబు ఆతి యేసుక్రీస్తు వెట కూడిజి దేవుణు వందిజ్ కేట ఆతికిదెర్ని దేవుణుదిజ్ సెందితికిదెర్ ఆజి మండ్రెజ్ ఇజి కూకె ఆతి మనిదెర్. 3 మా బుబ్బాతి దేవుణుని ప్రబు ఆతి యేసు క్రీస్తు దయా దర్మమదాన్ మీరు నిపాతి మండ్రెజ్ సాయం కిపిన్. 4 క్రీస్తుయేసుదాన్ మిజి దేవుణు సతిమని వన్ని దయా దర్మం వందిజ్ నాను ఎస్తివలెబా మీ వందిజ్ దేవుణుదిజ్ వందనమ్కు వెహినాన్. 5 అహిజ, మీరు విజు సజతిజ్ వందిజ్, ఇహిజ, మీరు వర్గిజిని విజు మాటజ్ లోఇ, మిజి మని గెణమ్దు, క్రీస్తు వెట మని సంమదమ్దు మీరు దేవుణు సీజిని మేలుజ్ విజు కలితి మని కిదెర్ ఆజినిదెర్. 6 ఎందనిజ్ ఇహిజ క్రీస్తు వందిజ్ మాపు వెహ్తి మని సాస్యం వందిజ్ ఇని అనుమానమ్బా సిల్లెండ మీ మన్నుజ మీరు గటిజ గుర్తు అస్తిదెర్. 7 అందెజె, దేవుణు ఆత్మ సీజిని వరమ్కాజ్ లోఇ ఇని దనిజ్బా తకు సిల్లెండ, మా ప్రబు ఆతి యేసు క్రీస్తు తోరె అని దినం వందిజ్ గొప్ప ఆసదాన్ ఎర్దు సుడోజి మంజినిదెర్. 8 మా ప్రబు ఆతి క్రీస్తు యేసు తీర్పు సీని దినమ్దు మీరు ఇని తప్ప సిలెండ మనికిదెర్ ఇజి తోరె ఆదెజ్ దేవుణు మిజి సత్తు సీజి ఆకార్దాక కాప్ కినాన్లె. 9 వన్ని మరిన్ ఆతి, మా ప్రబువాతి యేసుక్రీస్తు వెట కూడిజి మండ్రెజ్ మిజి కూక్తి మని దేవుణు నమ్మిదెజ్ తగ్గికాన్.

దేవుణు సజమ్దు నమ్మిత్తికార్ కేట ఆజిని వందిజ్

10 తంబెరిజాండె, అందెజె మీ లోఇ ఇని కేట ఆవిండ మండ్రెజ్ ఇజి, మీరు విజిదెరె, ఒరెన్ మరి ఒరెన్ వెట ఉండ్రె మన్ను ఆజి మండ్రెజ్. మరి మీరు విజిదెరె ఒడోబినిబాన్, మీ మన్నుదు పూర్తి ఉండ్రె ఆజి

మండ్రెజ్ ఇజి మా ప్రబు ఆతి యేసుక్రీస్తు బాణిజ్ నజి దోహక్తి అతికారమ్దాన్ నాను మిజి బతిమాల్లిన. 11 ఎందనిజ్ ఇహిజ మా తంబెరిజాండె, మీ లొఇ గొడెబెజ్ మన్నె ఇజి క్లోయే ఇండ్రోణికార్ సెగొండార్ నజి కబ్బు తత మనార్. 12 నాను వెహ్నినిక ఇనిక ఇహిజ, ఒరెన్, “నాను పవులుజ్ సెందితికాన్”, ఇజినాన్గె, మరి ఒరెన్, “నాను అపొలుజ్ సెందితికన్”, ఇజినాన్గె. మరి ఒరెన్, “నాను కేపెజ్ సెందితికాన్”, ఇజినాన్గె, మరి ఒరెన్, “నాను క్రీస్తుజ్ సెందితికాన్”, ఇజి వెమె ఆజినిదెరెగె.

13 క్రీస్తు ఎయెర్ వందిజ్ బా బాటెజ్ ఆవితాన్. పవులు ఇని నాను మీ వందిజ్ సిలువాదు సాఎత. మీరు పవులు ఇని నా పేరుదాన్ బాప్తినం లాగె ఆఇతిదెరె. 14 క్రీస్తునుని గాయియుకు, వారు రిఎర్ ఆవిండె మరి ఎయెరిజ్ బా నాను బాప్తినం సివత. దన్ని వందిజ్ నాను దేవుణుదిజ్ వందనమ్కు వెహ్నిన్. 15 అందెజి నా పేరుదాన్ మీరు బాప్తినం లాగె ఆతిదెరె ఇజి వెవ్రెజ్ ఎయెరిజ్ బా అక్కు సిల్లెద్. 16 స్త్రీపాను ఇండ్రోణి వరిజ్ బా నాను బాప్తినం సితమన్. అక్కాదె ఆవిండె మరి ఎయెరిజ్ బా బాప్తినం సిత్రిక నజి ఎత్తు సిల్లెద్. 17 ఎందనిజ్ ఇహిజ, నువార్త వెవ్రెజ్ నె క్రీస్తు నజి పొక్తాన్. గాని బాప్తినం సీదెజ్ ఇజి నజి పొక్తాన్. అందెజి క్రీస్తు సిలువాదు సాతి సావుది సత్తు తకు ఆదెజ్ ఆవిద్ ఇజి నాను నువార్త సాటిస్పిక యా లోకమ్ది లోకురి గెణమ్దాన్ కూడితి మాటెబాణిజ్ ఆవిద్.

దేవుణు గెణమ్ని సత్తు ఆతిమన్ని క్రీస్తు

18 నాననమాజి సాని వరిజ్ క్రీస్తు సిలువాదు సాతి వందిజ్ వెహ్నిని నువార్త బుద్ది సిల్లి పణి కిత్తి వందిజ్ వెహ్నిని మాటెజ్ లెకెండె తోరిజినె గాని దేవుణు రక్కిన్సి మని మజి యాక దేవుణు సత్తు. 19 అందెజి, “వారు గెణం మనికార్గె! వరి గెణం నాను పాడెకినాలె. వారు బుద్ది మనికార్గె! వరి బుద్ది నాను పణిదిజ్ రెఎండె కినాలె”, ఇజి దేవుణు మాటదు రాస్త మనాద్. 20 బుద్ది మన్నికాన్ ఇజి ఒడిబితి మని వన్ని బుద్ది ఇనిక ఆత మనాద్? గొప్ప సదువు మనికాన్ ఇజి ఒడిబితి మని వన్ని సదువు ఇనిక ఆత మనాద్? యా లోకమ్ది వండెత్ ఇజి ఒడిబితి మనికాన్ ఇనిక ఆత మనాన్? యా లోకమ్ది విజి గెణం దేవుణు బుద్ది సీలి పణి లెకెండె పణిదిజ్ రెజి లెకెండె కివెతాండ్రా? 21 దేవుణు సీతి గెణమ్దాన్, లోకమ్దిజ్ సెందితి వరిజ్, వరి గెణమ్దాన్ దేవుణుదిజ్ నెస్తెజ్ ఆటెండె మహిజ్, లోకమ్దిజ్ సెందితి వరిజ్ బుద్ది సిల్లి పణి ఇజి తోరె ఆతి నువార్త సాటిసి, నమ్మిజిని వరిజ్ రక్కిన్సెజ్ దేవుణు ఇన్తం ఆతాన్. 22 యూదురు ఆతికార్ బమ్మాతి పణిజ్ కొరిజినార్. గ్రీసు దేనిమ్దికార్ గెణమ్దిజ్ రెబాజినార్. 23 గాని మాపు క్రీస్తు మా పాపమ్క వందిజ్ సిలువాదు సాతి సాపు వందిజ్ నువార్త సాటిసినావ్. ఇక్క యూదురిజ్ అడ్డు లెకెండె తోరిజినె. మరి యూదురు ఆఇ వరిజ్ బుద్ది సీలి పణి లెకెండె తోరిజినె. 24 గాని యూదురిజ్ని యూదురు ఆఇ వరిజ్, అహిజ రక్కిన్సెజ్ ఇజి దేవుణు కూక్తి మని విజెరిజ్, క్రీస్తు, దేవుణు సత్తు ఆత మనాన్. క్రీస్తు, దేవుణు గెణం ఆత మనాన్. 25 ఎందనిజ్ ఇహిజ, దేవుణు బుద్ది సీలి పణి ఇజి లోకుర్ ఒడిబినిక లోకురి బుద్దిదిజ్ ఇంక బుద్ది మనిక. దేవుణు సత్తు సిల్లి పణి ఇజి లోకుర్ ఒడిబినిక లోకురి సత్తుదిజ్ ఇంక బలం మనిక.

26 తంబెరిజాండె, దేవుణు మిజి కూక్తి మహివలె మీరు ఎలాగ కూకె ఆతి మనిదెరె ఇజి ఒడిబిదు. లోకమ్దు మన్నికార్ ఒడిబిని లెకెండె ఇహిజ, మీ లొఇ బుద్ది మనికార్ లావు నండెండార్ సిల్లెర్, గొప్ప వారు లావు నండెండార్ సిల్లెర్, పెరి కుటుమ్దికార్ లావు నండెండార్ సిల్లెర్. 27 వారు బుద్ది సీలికార్గె! గాని లోకమ్దు మని బుద్దిమని వరిజ్ సిగు కిదెజ్, దేవుణు బుద్ది సీలి వన్నాజ్ ఎర్రిస్తాన్. వారు సత్తు సీలికార్గె! గాని లోకమ్దు మని సత్తుమని వరిజ్ సిగు కిదెజ్ దేవుణు సత్తు సీలివనకాజ్ ఎర్రిస్తాన్. 28 యా లోకమ్దు ఇనికాదో ఆతిమని వన్నాజ్, అక్కెజ్ ఇనికెజ్ ఆఉ ఇజి తోరెస్తెజ్ ఇజి ఏకం అడిగి మని వనకాజ్ని ఇన్తం కిఇ వన్నాజ్, ఇనికబా ఆఇ వన్నాజ్ దేవుణు ఎర్రిస్తాన్. 29 అందెజి ఎయెన్బా దేవుణు ఎర్దు ఇనిదని వందిజ్ బా పొగడె: ఆదెజ్ ఆటెవన్. 30 వన్ని వెటన మీరు మా వందిజ్ దేవుణు బాణిజ్ వాతి మని గెణమాతి మన్ని క్రీస్తుయేసు వెట కూడిజి మంజినిదెరె. అహిజ, వన్ని వెటనె మాటు సీతి నిజాయితి మనికాట్ ఆతాట్, దేవుణు వందిజ్ కేట ఆతికాట్ ఆతాట్, విడువదల పొందితికాట్ ఆతాట్. 31 అందెజి దేవుణు మాటదు రాస్త మని లెకెండె. “పొగడె: ఆనికాన్ ప్రబు కిత్తి వన్నా వందిజ్ పొగడె: ఆదెజ్ వలె”.

2

1 తంబెరిజాండె దేవుణు వందిళ్ సాస్యం మీ నడఁమి సాటిన్చెళ్ ఇజి మీ డగ్గు నాను వాతివలె నెగెండ వర్గిదెళ్ అట్టి వన్ని లెకెండెనో, గొప్పు పెరి బుద్ది మని వన్ని లెకెండెనో మీ డగ్గు రెవత. 2 అందెజె నాను మీ నడఁమి మహివెల, యేనుక్రీస్తు వందిళ్ని వాండ్రు సిలువాదు సాతి సాపు వందిళ్నె ఆవిండ మరి ఇనికబా నెన్ఱ వన్ని లెకెండె మండ్రెళ్ ఇజి నాను నిర్ణం కిత. 3 నాను మీ నడఁమి వాతివలె నా సత్తు మున్ను ఆదారం ఆవిండ, సత్తు సిల్లిసవన్ని లెకెండె తియెల్దాన్, ఎసోనో వణకి వాత. 4 నాను మీ వెట వర్గితి మాట వెస్తామని సువార్త, లోకు బుద్దిదాన్ కూడితి మని తియాని మాటెజాణిళ్ ఆవితాద్. గాని మిజి తోరె ఆదెళ్ ఇజి దేవుణు ఆత్మ సత్తుదాన్ కిజిని పణిజాణిజె తోరిస్త మనాద్. 5 ఎందనిళ్ ఇహిజ, దేవుణు మున్ను మిజి మని నమకం లోకు బుద్ది మున్ను ఆదారం ఆవిండ, దేవుణు సత్తు మున్నునె ఆదారం ఆదెళ్ ఇజి.

దేవుణు ఆత్మ బాణిళ్ దొహ్కొ గెణం.

6 దేవుణు మున్ను మని నమకమ్దు పిరితివరి నడఁమి బుద్దిదాన్ కూడితి మని మాటెజాణిళ్ వర్గిజినావ్. గాని అక్క యా లోకమ్దు మని యా తరమ్ది వరి బుద్ది అవద్. మరి సిల్లెండ ఆజి సొన్నిని యా లోకమ్ది అతికారిజ బుద్ది ననికబా అవద్. 7 అక్కాదె ఆవిండ, దేవుణుదిళ్ డాఁజితి మని గెణం వందిళ్ వర్గిజినావ్. డాఁవె అతి మహి యా గెణం, మాటుబా వన్నిళ్ మని గొప్పు గవ్ఠమ్దు కూడిజి మండ్రెళ్ ఇజి లోకం పుట్వెండ ముందాలై దేవుణు మా వందిళ్ కేట కిత్తి ఇడ్డి మహిక. 8 యా తరమ్ది అతికారిజ ఎయెరిజెబ యాక అర్థం కిదెళ్ అట్వెండాతార్. ఎందనిళ్ ఇహిజ, వారు అర్థం కిజి నెసి మంజినిక ఇహిజ గొప్పు గవ్ఠమ్దిళ్ ప్రబు అతి వన్నిళ్ సిలువాదు డెయెజి నవ్వతార్మరి. 9 అందెజె దేవుణు మాటదు రాస్తా మన్ని లెకెండె, “దేవుణు వన్నిళ్ ప్రేమిసిని వరి వందిళ్ ఇనికెళ్ తయార్ కిత ఇట్టామనాండ్రొ ఇజి ఎయెర్బా వరి కణిజాణిళ్ నుడఁదెళ్ సిల్లెద్, ఎయెర్బా వరి గిబిజాణిళ్ వెండ్రెళ్ సిల్లెద్. ఎయెర్బా వరి మన్నుదు ఎనెజ్బా ఒడఁబిదెళ్ సిల్లెద్”.

10 గాని దేవుణు వన్ని ఆత్మదాన్ అయాకెళ్ మజి తెలియ కిత మనాన్. దేవుణు ఆత్మ విజు దనిళ్ రెబాజినాన్. దేవుణు లొఱ మని డాఁజితి మని సజతిజ్బా రెబాజి తోరిసినాన్ 11 ఒరెన్ వన్ని మన్నుదు ఒడఁబినికెళ్ విజు వన్ని లొఱ మని వన్ని ఆత్మనె ఆవిండ మరి ఎయెర్బా నెన్వెర్. అయా లెకెండెనె దేవుణు మన్నుదు మనికెళ్ వన్ని ఆత్మదిళ్నె ఆవిండ మరి ఎయెర్బా తెలివద్. 12 దేవుణు బాణిళ్ మజి సెడ్డినె సితమని వన్నాళ్ అర్థం కిజి నెస్తాళ్, మజి దొహ్కొ మని ఆత్మ లోకమ్ది వరి లెకెండె ఒడఁబిని నని ఆత్మ అవద్. దేవుణు బాణిళ్ వాతిమని దేవుణు ఆత్మనె మజి దొహ్కొ మనాద్. 13 మాపు వర్గిజిని యా మాటెళ్ లోకు బుద్దిదాన్ నెన్పిన్సి మాటెళ్ ఆఱ. గాని దేవుణు ఆత్మ నెన్పిన్సి మాటెజాణిళ్, దేవుణు ఆత్మదిళ్ సెందితి నిజమాతి సజతిళ్, దేవుణు ఆత్మదిళ్ సెందితి మాటెజాణిళ్ మాపు వర్గిజినావ్. 14 దేవుణు ఆత్మ సిలికాన్ దేవుణు ఆత్మబాణిళ్ వాని సజతిజ్ డగ్గు కివెన్. ఎందనిళ్ ఇహిజ అయాకెళ్ వన్నిళ్ బుద్ది సిల్లి పణిళ్ లెకెండె తోరిజనె. వన్నాళ్ అర్థం కిదెళ్ ఇహిజ దేవుణు ఆత్మదానె అర్థం కిబె ఆదెళ్. దేవుణు ఆత్మ వన్ని లొఱ సిల్లితిళ్, వన్నాళ్ అర్థం కిదెళ్ వాండ్రు అట్వెన్. 15 దేవుణు ఆత్మ లొఱ మనికాన్ విజు వన్నాళ్ అక్కెళ్ ఎలాగ మర్రికెళ్ ఇజి నెస్తాళ్ అట్వాన్. గాని వన్ని లొఱ ఇనికెళ్ మన్నె ఇజి ఎయెర్బా నెస్తాళ్ అట్వెర్. 16 దేవుణు మాటదు రానె అతి మని లెకెండె, “ప్రబుజ్ బుద్ది వెస్తాజె ఇజి వన్ని మన్నుదు మనికెళ్ నెస్తామనికాన్ ఎయెన్ మనాన్?”. గాని మజి క్రీస్తుళ్ మని నని మన్ను మన్నె.

3

సజమ్దు నమ్మిత్తికార్ కేట ఆజిని వందిళ్

1 తంబెరిజాండె, క్రీస్తుళ్ లొజిజి నడఁజిని వరి వెట వర్గిని లెకెండె నాను మీ వెట వర్గిదెళ్ అట్వెత. గాని ఒడఁబిదె ఆసెజె లొజిజి నడఁజిని వరివెట వర్గిని లెకెండెనె నాను మీ వెట వర్గిత. ఎందనిళ్ ఇహిజ, మీరు క్రీస్తు వెట కూడితి మహిదెర్ గాని క్రీస్తుళ్ సెందితి సజతిళ్ లొజిజిని దని లొఱ ఎలుబా మీరు లేత కొడోర్ లెకెండెనె మనిదెర్. 2 లేత కొడోరిళ్ పాలు సీని లెకెండె ఇజిరి సజతిళ్నె నాను మిజి నెన్పిస్త.

పెరికార్ ఉణి మాముల్ బోజనం నని గటిమని ఇనికబా నాను మిజి నెస్సినెత. నిజమె ఏలుబా మీరు దనిజ్ తగ్గికిదెర్ ఆవెర్, మీరు లేత కొడోర్ లెకండెన మనిదెర్. ³ ఏలుబా మీరు యేసుక్రీస్తుజ్ లోజిజి నడిజిని వరి లెకండె ఆఇదెర్. ఎందనిజ్ ఇహిజ మీ నడిమి గోన ఆనికెజ్, గొడబెజ్ మహిజ్ మీరు యేసుక్రీస్తుజ్ లోజిజి నడిజిని వరి లెకండె ఆఇదెర్. క్రీస్తు ముస్సు నమకం మన్ ఇవరి లెకండెన మీరు విజు నజతిజ్ కిజినిదెర్. ⁴ ఎందనిజ్ ఇహిజ ఒరెన్, “నాను పవులుజ్ నెందితికాన్”, ఇజ, మరి ఒరెన్, “నాను అపొలుజ్ నెందితికాన్”, ఇజ మరి ఒరెన్, యాలెకండె వెస్సానివలె మీరు క్రీస్తు ముస్సు నమకం ఇడెజ మామల్ లోకుర్ లెకండె ఆఇదెరా?

⁵ అపొలు ఎయెన్? పవులు ఎయెన్? పహి పణి కినికారెగదె? ఒరెన్ ఒరెన్ వన్నిజ్ ప్రబు ఒపనెస్తి లెకండె వారు కిత్తి పణిజాణిజ్ మీరు దేవుణుదిజ్ నమ్మిత్తిదెర్. ⁶ నాను గింజ ఉణుస్త, అపొలు దనిజ్ ఏరు వడిస్తాన్, గాని దనిజ్ పిరిప్తికాన్ దేవుణునె. ⁷ అందెజె ఉణుస్తికాన్ గాని ఏరు వడిస్తాన్ గాని ఇనిక ఆవెర్. గాని దనిజ్ పిరిప్తికాన్ దేవుణు ఒరెండ్రె. ⁸ ఉణుస్తి వన్నిజ్ నీ ఏరు వడిస్తాన్ వన్నిజ్ ఉండ్రె ఉదెనమెనె మహాద్. ఒరెన్ ఒరెన్ వన్నిజ్, వరి సొంత పణిదిజ్ తగితి జీతం దొహ్కాద్. ⁹ మాపు దేవుణు వెట కూడెజి పణి కినికావ్. మీరు దేవుణు మడిజ్ లెకండె ఆతి మనిదెర్. దేవుణు ఇల్లు లెకండె ఆతి మనిదెర్.

¹⁰ దేవుణు నా ముస్సు తోరిస్తి మన్ని దయా దర్మమాదాన్, నెగెండ ఇల్లు తోహ్తాజ్ నెస్తివన్ని లెకండె నాను పునాది పొక్త మన. మరి ఒరెన్ దని ముస్సు ఇల్లు తోహ్తాని వన్ని లెకండె తోహ్తానాన్. ఒరెన్ ఒరెన్ ఎలాగ దని ముస్సు తోహ్తానాండ్రె ఇజ వాండ్రు జాగర్త నుడెదెజ్ వలె. ¹¹ అహిజ పొక్తిమని పునాది ఆవెండ మరి ఉండ్రె పునాది పొక్తెజ్ ఎయెన్బా అట్ అవెన్. ¹² ఒరెన్ యా పునాది ముస్సు తోహ్తావలె బజారమాదాన్ తోహ్తాన్పు, సిల్లిజ వెండిదాన్ తోహ్తాన్పు, సిల్లిజ నండొ కరితి రంగు పణకాణిజ్ తోహ్తాన్పు, సిల్లిజ మరానదాన్ తోహ్తాన్పు, సిల్లిజ గడిదాన్ తోహ్తాన్పు, సిల్లిజ అకుజాణిజ్ తోహ్తాన్పు. ¹³ ఒరెన్ ఒరెన్ కిత్తి పణిజ్ ఎలాగ మర్రిక ఇజ యేసుక్రీస్తు తీర్పు తీరిస్తి దినమదు తోరె ఆనె. అయ పణిజ్ డాజ్ ఎండ తోర్పె, అయా పణిజ్ సిసు వెటనె తోరె ఆనె. ఒరెన్ ఒరెన్ కిత్తి మని పణి ఎలాగ మర్రికాదొ ఇజ సిసునె వరిన కినాద్. ¹⁴ ఒరెన్ అయ పునాది ముస్సు తోహ్తా మని పణి సిసుదిజ్ గెలిసి నిల్లి మహిజ వాండ్రు జీతం లొనె ఆనాన్. ¹⁵ ఒరెన్ కిత్తి పణి సిసుదాన్ వెతిజ వన్నిజ్ నస్తం వానాద్. గాని వాండ్రు తప్త ఆనాన్. గాని సిసుకొనెజ నడిమిహాన్ తప్త ఆతి లెకండె తప్త ఆనాన్లె.

¹⁶ మీరు దేవుణు గుడి: అతికిదెర్ ఇజ మీరు నెన్ ఇదెరా?. మరి దేవుణు ఆత్మమీ లోఇ బత్కిజినాన్ ఇజ మీరు నెన్ ఇదెరా? ¹⁷ ఎయెన్బా దేవుణు గుడి:దిజ్ పాడె:కిత్తిజ దేవుణు వన్నిజ్ పాడె:కినాన్. ఎందనిజ్ ఇహిజ అయ గుడి: దేవుణుదిజ్ నెందితిక. అయ గుడి: ఆతి మనికిదెర్ మీరె.

¹⁸ మిజి మీరె మొసెం కిబె ఆదెజ్ ఆవెద్. మీ లోఇ ఎయెన్బా యా తరమదిజ్ తగ్గి గెణం మనికాన్ వాండ్రె ఇజ ఒడి:బిజి మహిజ, గెణం మనికాన్ ఆదెజ్ ఇజ వన్నిజ్ వాండ్రె యా లోకమది వజ బుద్ధి సిలి వన్ని లెకండె ఆపిన్. ¹⁹ ఎందనిజ్ ఇహిజ యా లోకమది గెణం దేవుణు ఎద్రు పణిదిజ్ రెకాదె. ఎందనిజ్ ఇహిజ, “గెణం మనికార్ ఇజ ఒడి:బిని వరిజ్ దేవుణు వరి గెణమాదాన్ ఓడి:స్సాన్”, ఇజ దేవుణు మాటదు రాస్త మనాద్. ²⁰ మరి, “బుద్ధి మని వరి ఆలోననమకు పణిదిజ్ రెకెజ్ ఇజ ప్రబు నెసినాన్”, ఇజ దేవుణు మాటదు రాస్త మనాద్.

²¹ అందెజె ఎయెర్బా లోకు పేరు అసి నాను వన్నిజ్ నెందితికాన్ ఇజ పొజిదెజ్ ఆవెద్. మీరు నెగెండ మండ్రెజ్ ఇజి విజు నజతిజ్ దేవుణు మిజి సిత మనాన్. ²² పవులు ఆతిజ్ బా, అపొలు ఆతిజ్ బా, కేవ ఆతిజ్ బా మీరు నెగెండ మండ్రెజ్ ఇజి దేవుణు ఏర్పాటు కిత్తికావ్. లోకమదు మనికెజ్ విజు, పాణం ఆతిజ్ బా, సాపు ఆతిజ్ బా, యా కాలమదు జర్గినికెజ్ ఆతిజ్ బా, వాని కాలమదు జర్గిదెజ్ మనికెజ్ ఆతిజ్ బా విజు మీరు నెగెండ మండ్రెజ్ ఇజి దేవుణు సితికెజ్. ²³ మీరు క్రీస్తుజ్ నెందితికిదెర్. క్రీస్తు దేవుణుదిజ్ నెందితికాన్.

4

క్రీస్తుజ్ అపొస్తరు ఆతికార్

¹ అందెజె క్రీస్తుజ్ పణి కినికార్ ఇజ లోకుర్ మజి నుడెదెజ్ వలె. దేవుణుది డాజితి మని నజతిజ్ లోకురిజ్ నెస్సిస్తాజ్ ఒపజెవె ఆతికార్ ఇజి వారు మజి నుడెదెజ్ వలె. ² అక్కాదె ఆవెండ ఉండ్రె పణిదిజ్

బవజెవె ఆతి మనికాన్ అయ పణిదు నమ్మకమాతికాన్ ఇజి తోరె ఆదెజ్ వలె. ³ మీరు గాని లోకురి కోర్టుబగాని నజీ ఒవెజెవె ఆతి మని పణి నాను నెగండ కిజిననో సిలెనో ఇజి సుడఃజిని దనిజ్ నాను అస్యం కివె. నజీ నానెబా అయ లెకెండ నా పణిదిజ్ సుడఃదెజ్ సిల్లె. ⁴ నా గర్బం నజీ గదిన్ఎండ బాగనె మనాద్. అయ లెకెండ మహిజ్బ నాను ఇని తపు సిలికాన్ ఇజి వెహె ఆదెజ్ అట్వ. నజీ తీర్పు సినికాన్ ప్రబునె. ⁵ అందెజె ఏర్పాటు కిత్తి మని గడియ రెఎండ ఇనిదనిజ్బా తీర్పు తీరిస్తెజ్ ఆవెద్. ప్రబు వాని దాక కావ్ కిదెజ్. సీకటుదు డాఃజితి మని విజు తప్పు పణిజ్ వాండ్రు వెల్లి జాయ్దు తనాన్లె. లోకురి మన్సుదు మహి విజు ఉదెనమ్కాజ్ వెల్లి తనాన్లె. అయావలె ఒరెన్ ఒరెన్ వన్నిజ్ వాండ్రు కిత్తి పణిదిజ్, తగ్గి లెకెండ దేవుణు బాణిజ్ పొగ్డః ఆనాన్లె. ⁶ తంబెరిజాండె, “రాస్తి మహి దనిజ్ జవ డాట్టి సొండ్రెజ్ ఆవెద్”, ఇజి రాస్తి మని మాటదిజ్ అర్దం మీరు మజి సుడఃజి నెస్తెజ్ వలె. యాలెకెండెనె నా వందిజ్ని అపొలొ వందిజ్ నాను మిజు వెస్తా మహ. అయాలెకెండ మీరు ఒరెన్ వన్ని పేరు అసి పొజిదెజ్ ఆవెద్. ⁷ మహి వరిజ్ ఇంక మిజి గొప్పు పెరికార్ కిత్తికాన్ ఎయెన్? మిజి కలిగితి మని బుద్ధిని గెణం లొక దేవుణు బాణిజ్ దొహ్కెకెజ్నె ఆవెండ మరి ఇనికెజ్ మన్నె? అక్కెజ్ మిజి దేవుణు బాణిజ్ దొహ్కె మెనక, అక్కెజ్ దొహ్కెకెజ్ ఆడ, అక్కెజ్ మీరు గణస్తి మని లెకెండ పొజిజినిదెర్.

⁸ ఏలు మీరు ఇనికబా తకు సిల్లెండ మిజి కావాలిస్తెకెజ్ విజు మనికిదెర్ అతిదెర్గె! ఏలు మీరు అస్తి మనికిదెర్ అతిదెర్గె! మజి డిఃస్తి సీతిదెర్ మీరు దేవుణు వెట ఏలుబడిః కినికిదెర్ అతిదెర్గె! మపుబా మీ వెట దేవుణు వెట ఏలుబడిః కినికావ్ అని లెకెండ మీరు నిజమె మీరు అజిమంజినిక ఇహిజు ఎసొనో నెగెద్ ఇజి నాను ఎసొనో కోరిజిన. ⁹ మజి అయా లెకెండ సిల్లెద్. జంతుజు వెట విద్దెం కిజి సుడఃజి మంజిని వరి ముండాల సాదెజ్ ఇజి సావుదిజ్ తగితి సిక్కు దొహ్కె మని వరి లెకెండ దేవుణు మజి అపొస్టురు లొక కడఃవేరిదికార్ లెకెండ కిత మనాన్ ఇజి నజీ తోరిజినాద్. లోకమ్దు మనికార్ విజెరె, మరి దేవుణు దూతెజ్ విజు కణ్కు నవ్వెండ బేసిని లెకెండ మాపు ఇడః ఆత మనావ్ ఇజి నజీ తోరిజినాద్. ¹⁰ మాపు క్రీస్తు వందిజ్ బుద్ధి సిలికావ్ గాని మీరు క్రీస్తు లొక బుద్ధి మనికిదెర్గె! మాపు నీర్సమ్దికావ్ గె మీరు సత్తు మనికిదెర్గె! మీరు తగమాతికిదెర్గె మపు సిగు లాగె అతికావ్ గె! ¹¹ ఏలు యా గడియారుబా బజి ఏహ్కెదికావ్. గుడెజ్ తోహె అతికావ్. ముటిజాణిజ్ గుడె అతికావ్. మండ్రెజ్ ఇల్లుబా సిలికావ్. ¹² మా సొంత కికాణిజ్ కస్టబాడఃజి పణి కినికావ్. మజి నయివ్ సీని వరిజ్ మిజి నెగెండ మనిద్ ఇజి వెహ్పినావ్. మజి హిమ్మెజ్ కినివలె అక్కెజ్ ఒరిసినివ్. ¹³ దూసె అనివలె సార్దిదాన్ వర్గిజినావ్. ఏలు యా గడియారుబా మాపు యా లోకమ్దిజ్ కసర లెకెండ మనావ్. విజెరె ఎద్దు పెంటు లెకెండ మనావ్.

¹⁴ నాను ప్రేమిసిని నా కొడోఃర్ ఇజి మిజి సారిసి సరిసి వెహ్పి లెకెండెనె యా మాటెజ్ రాసిని, గాని మిజి సిగు కిదెజ్ ఇజి ఆవెద్. ¹⁵ క్రీస్తు వందిజ్ మిజి సూణికార్ పదివెయుజ్ లోకురి మహిజ్బా, మిజి అపొస్టిన్ నండెండార్ సిల్లెర్. ఎండనిజ్ ఇహిజు క్రీస్తుయెను వందిజ్ నాను వెహ్పి సువార్దదాన్ నానె మిజి కాస్త. ¹⁶ అందెజె నజీ పొలిసి యెసుక్రీస్తుజ్ లోజిజి నడిఃదెజ్ ఇజి మిజి బతిమాల్లిన. ¹⁷ దిని వందిజ్ ప్రబు ఎద్దు నమ్మకమాతికాన్ ఆతి, నాను ప్రేమిసిని నా మరిన్ అతి తిమొతిజ్ మీ డగ్రు పొక్కిన. విజు బాడ్డిజు విజు దేవుణు సజమ్కాజ్ నాను నెన్పిస్తి దనిజ్ తగితి లెకెండ క్రీస్తుయెనుజ్ నాను ఎలాగ లోజిజి నడిఃజిన ఇజి వాండ్రు మిజి ఎత్తు కిబిస్సాన్లె.

¹⁸ మీ లొక నెగెండార్ నాను మీ డగ్రు రెవి ఇజి ఉబె ఆత మనార్. ¹⁹ ప్రబు సితం ఇహిజు నాను మీ డగ్రు బేగి వాన. అయావలె ఉబె ఆతిమని వరి మాటెజ్నె ఆవెండ, వరిజ్ ఎసొ సత్తు మనాద్ ఇజిబా నాను సూణ. ²⁰ ఇనిక ఇహిజు, దేవుణు ఏలుబడిః ఇహిజు వర్గిని మాటెజాణిజ్నె ఆవెద్, సత్తుదాన్ మనాద్. ²¹ మీరు ఇనిక కోరిజినిదెర్? నాను మీ డగ్రు వానివలె మిజి దిదిదెజ్ డుడ్డు అసి వాదెజా, సిల్లిజు ప్రేమ తోరిసిని వన్ని లెకెండ వాదెజ్?

5

రంకు బూలాని వన్నిజ్ మీ బాణిజ్ వెల్లి పొక్కు

1 రంకు బూలానిక మీ లొఇ మనాద్ ఇజి నజీ నిజమె కబ్బు వాతాద్. మీ లొఇ ఒరెన్, వన్ని కొగ్రి అయ్సిజ్ ఇడె: ఆతాన్గె. ననిక నమ్మిఇ వరి లొఇబా జర్గిఇక. 2 మరి, యాక మీ నడిమి మంజి మీరు పొజీజనిదెర్! గాని అయాలెకెండె ఆవిండ, మీరు ఎసొనో దుకం ఆజి నన్ని పణి కిత్తి వన్నిజ్ మీ నడిమిహాన్ వెల్లి పొక్కి మండ్రెజ్, అయాలెకెండె మండ్రెజ్ గదె? 3 నాను ఒడొల్ వందిజ్ మీ బాణిజ్ దూరం మన్ను, గాని ఆత్మదాన్ నాను మీ వెటెన మన్ను. నాను మీ వెటె మన్ని తెకెండెనె నిన్ని పణి కిత్తి వన్ని మున్ను తీర్పు తీరస్త మన్ను. 4 మా ప్రబు ఆతి యేసు పేరుదాన్ మీరు కూడొజి వానివలె, మా ప్రబు ఆతి యేసుక్రీస్తు సత్తు మీ నడిమి మంజినాద్. నానుబా మీ వెటె మన్ను ఇజి మీరు ఒడిబిదు. 5 అయావలె మీరు యా తెకెండె కిదు. సయ్యూనుజ్ లొజిజి మన్ని వరి వెటె మండ్రెజ్ ఇజి వన్నిజ్ మీ నడిమిహాన్ వెల్లి పొక్తు. అబ్బె వన్ని ఒడొల్ కస్తమ్దిజ్ ఒపజెమె ఆనాద్లె. అయావలె వాండ్రు పాపం ఒప్పుకొడొజి డిసిసిజి, యేసుప్రబు యా లొకమ్దిజ్ తీర్పు తీరిసిని దినమ్దు వన్ని ఆత్మ తప్పై ఆనాద్లె.

6 మీరు పొజిజనిక బాగ సిల్లెద్. పులాని దూరు కండెక్ ఆతిజ్బా పులాజి సిల్లి దూరుదు కలప్తిజ, దూరు విజి పులాజ్ ఆనాద్ ఇజి మీరు నెసినిదెర్. సెఇకెజ్ మీ నడిమి మహిజ అయాలెకెండెనె మన్విదా? 7 అందెజి నిజమె పులాని దూరు తెకెండె మన్ని వన్నిజ్ మీ నడిమిహాన్ దూరం కిదు ఇజి నాను మిజి గటిజ వెప్పిన. అయావలె మీరు పులాజ్ సిల్లి నెగ్గి దూరు తెకెండె మనిదెర్. నిజమె మీరు పులాజ్ సిల్లి కొత్త దూరు నన్నికిదెర్, ఎందనిజ్ ఇహిజ పన్ను, పండొయ్దిజ్ సప్పి గొరైపిల్ల తెకెండె యేసుప్రబు మా వందిజ్ పూజ ఆత మనాన్. 8 అందెజి పులాజ్ మన్ని పడొయి దూరుదాన్ పిటం సుర్తి మాటు పండొయ్ కిమాట్. ఇహిజ, ముజాల మహి సెఇ అలవాటుజ్, ముజాల కిజి మహి సెఇ పణిజాణిజ్ మాటు పండొయ్ కిమాట్. నాను వెప్పినిక ఇనిక ఇహిజ, మాటు నిజం మన్నికాట్ని నమ్మిడెజ్ తగ్గికాట్ ఆజి మంజినాట్. అయాలెకెండె మాటు పండొయ్ కినాట్. 9 రంకు బూలాని వరి వెటె కూడొజి మన్మాట్ ఇజి మిజి రాస్తి ఉత్తమ్దు రాస్త మన్ను. 10 యా లొకమ్దు మన్ని రంకు బూలాని వరివెటెనో, లొబం కిని వరివెటెనో, డొజి కిని వరివెటెనో, బొమ్మొజి మాడిసిని వరివెటెనో మీరు ఎసెజ్బా కూడొదెజ్ ఆవిద్ ఇజి దన్నిజ్ అర్దం సిల్లెద్. అయాలెకెండె మండ్రెజ్ ఇహిజ మీరు యా లొకం డిసి సిండ్రెజ్ గదె? 11 నాను మిజి రాస్తి మన్ని దన్నిజ్ అర్దం ఇనిక ఇహిజ, నమ్మితికాన్ ఇజి కూకె ఆతికాన్ ఎయెన్బా రంకు బూలానికాన్ ఆతిజనో, లొబం కినికాన్ ఆతిజనో, బొమ్మొజ్ మాడిసినికాన్ ఆతిజనో, సెఇ మాటెజ్ వర్గినికాన్ ఆతిజనో, కడు ఉణికాన్ ఆతిజనో, ఇల్లు డెయెజి డొజి కినికాన్ ఆతిజనో, నన్ని వన్ని వెటె కూడొజి మండ్రెజ్ ఆవిద్. వన్ని వెటె బొజనమ్బా కిదెజ్ ఆవిద్.

12 దేవుణు సజమ్దిజ్ వెల్లి మన్ని నమ్మిఇకార్ ఆతి వరి మున్ను తీర్పు తీరిసినిక, నా పణి ఆవిద్. సజమ్దు మన్ని వరి మున్ను మీరు తీర్పు కిఇదెరా? 13 సజమ్దిజ్ వెల్లి మన్ని వరిజ్ దేవుణునె తీర్పు తీరిస్సికాన్. అందెజి, “అయ సెఇ వన్నిజ్ మీ నడిమిహాన్ వెల్లి పొక్తు”.

6

నమ్మిత్తి వరి నడిమి గొడొబెజ్ మహిజ

1 మీ లొఇ ఒరెన్ మరి ఒరెన్ వన్ని వెటె గొడొబ మహిజ, దేవుణుదిజ్ సెందితివరి ఎద్దు రెఎండ, వాండ్రు ఎందనిజ్ నమ్మిఇ వరి ఎద్దు తీర్పు వందిజ్ సొస్సికాన్? 2 దేవుణుదిజ్ సెందితికార్ యా లొకమ్దిజ్ తీర్పు తీరిసికార్ ఇజి మీరు నెన్ఇదెరా? మీరు యా లొకమ్దిజ్ తీర్పు తీరిసికిదెర్ ఆతిదెర్. అయ తెకెండె మహివలె మీ లొఇ మని గొడొబెజి వందిజ్ తీర్పు తీరిస్సెజ్ మీరు అట్ఇతిదెరా? 3 మాటు దేవుణు దూతరిజ్ తీర్పు తీరిసికాట్ ఇజి మీరు నెన్ఇదెరా? ఆహిజ యా లొకమ్దిజ్ సెందితి సజతిజి వందిజ్, మరి తీరిస్సెజ్ అట్టికాట్. 4 అందెజి నని గొడొబెజ్ మీ నడిమి మహిజ, వనకాజ్ తీర్పు తీరిస్సెజ్ ఎందనిజ్ మీరు సజమ్దు ఇనికబా ఆఇవరి ఎద్దు తీర్పు వందిజ్ బన్నిదెర్? 5 మీరు సిగు ఆదెజ్ ఇజి నె ఇక్క నాను వెప్పిన. దేవుణుదిజ్ నమ్మిత్తి వరి లొఇ మని గొడొబెజ్ తీరిస్సెజ్ అట్టికాన్ ఎయెన్బా మీ నడిమి సిల్లెంద్రా? 6 గాని ఒరెన్ నమ్మిత్తికాన్ మరి ఒరెన్ నమ్మిత్తి వన్ని వెటె

గొడవబెట్టే అజి కోర్టుడు సొన్నినిదెర్. అక్కాదె అవండ తీర్పు వందిజ్ నమ్మిజ వరి ఎద్దు తగుదిజ్ బనయి కిజినిదెర్.

7 మీ నడిమి ఎయెరిజ్ బా ఒరెన్ వెట కోర్టు కిత్తి మని గొడవబెట్టే మన్నె ఇహిజ మీరు పూర్తి అడిగి అర్తి మనిదెర్. కోర్టు కిని దనిజ్ ఇంక మీ వెట కిత్తి తప్పు బరిసినికాదె నెగెద్. కోర్టు కిని దనిజ్ ఇంక డొజ కిజి ఒత్తిక డిసినికకాదె నెగెద్. 8 గాని మీరె మొసెం కిజినిదెర్, తప్పు కిజినిదెర్. యాక నమ్మిత్తి కూలెజ వెటనె మీరు కిజినిదెర్.

9 సెజ పణిజ్ కినికార్ దేవుణు ఏలుబడిఁదు మండ్రెజ్ అల్వెర్ ఇజ మీరు నెన్ఇదెరా? మీరు ఒడొబినిబాన్ తప్పు కిమాట్. రంకు బూలానికార్, బొమ్మెజ మాడిసినికార్, సాని బూలానికార్, మొగవరి వెట కూడ్ని మొగ్గకొడొర్, 10 డొజ కినికార్, లోబం కినికార్, ఎస్పివలెబా కడం ఉణిజి సొసి మంజినికార్, దూసలాడిఁజినికార్, ఇల్లు డెయెజి డొజ కినికార్, నినికార్ ఎయెర్బా దేవుణు ఏలుబడిఁదు మండ్రెజ్ అక్కు మనికార్ అవెర్. 11 మీ లొజ నెగొండార్ యా లెకెండెనె మహిదెర్. గాని మీ పాపమకాణిజ్ నొరె అజి సుబరం అతికిదెర్. మా ప్రబు అతి యేసుక్రీస్తు పేరుదానెని, మా దేవుణు అత్తుదాన్ నీతినిజాయ్మిమనికార్ అతికిదెర్. మరి ఏలు దేవుణు వందిజ్ కేట అతికిదెర్.

రంకు బూలానిక

12 “ఇనిక కిదెజ్ బా మజి అక్కు మనాద్, ఇని అడ్డు సిల్లెద్”, ఇజ మీరు వెప్పినిదెర్. గాని విజు పణిదిజ్ వానికెజ్ అఉ ఇజి నాను వెప్పిన్, “ఇనిక కిదెజ్ బా నజి అక్కు మనాద్, ఇని అడ్డు సిల్లెద్”. అహిజ్ బా నాను కిని దని లొజ ఇనికబా నజి ఉండ్రె అలవాటు లెకెండె మండ్రెజ్ నాను సరి సేవ. ఎందనిజ్ ఇహిజ అయక సిల్లెండ బత్తిదెజ్ ఇజి ఉండ్రె అలవాటుదిజ్ అణజిజ మన్వ. 13 “తిండి పొటదిజ్ నర్ల వందిజ్ ని పొట తిండి ఊణి వందిజ్ నె తయార్ కిత మనాద్”, ఇజ మీ లొజ నెగొండార్ వెప్పినిదెర్. గాని వాని కాలమదు పొట గాని తిండి గాని అక్కర్ సిల్లెద్. అందెజి దేవుణు రుండి వనకాజ్ సిల్లెండ కిసాన్లె”, ఇజి నాను వెప్పిన్. ఒడొల్ రంకు బూలాని వందిజ్ అవెద్ ఇజి నాను గటిజ వెప్పిన్. గాని మా ఒడొల్ ప్రబు వందిజ్ పణి కిదెజ్ నె. ఒడొల్ వందిజ్ నూణికాన్ ప్రబునె. 14 దేవుణు వాని కాలమదు మా ఒడొలుబు సాతి వరిబాణిజ్ వన్ని సత్తుదాన్ నిక్కాన్లె. అయావలె సాతి వరిబాణిజ్ ప్రబుజ్ నిక్కి లెకెండె మజిబా నిక్కాన్. 15 మీ ఒడొల్ క్రీస్తు ఒడొల్ అతి దేవుణు సజమదు మని నమ్మిత్తి వరి వెట కూడిఁతి మనికెజ్ ఇజి మీరు నెన్ఇదెరా? అయాలెకెండె మహిజ ఎయెర్బా క్రీస్తు వెట కూడిఁతి మని వన్ని ఒడొల్ ఉండ్రె సాని దనివెట కుడుఁప్పిజ అయక తగ్గాదా? అవెద్, వాండ్రు ఎనెజ్ బా అయక కిదెజ్ అవెద్. 16 సాని దనివెట కూడిఁనికాన్ దని వెట కూడిఁజి ఉండ్రె ఒడొల్ అతి లెకెండె మనాద్, ఇజి మీరు నెన్ఇదెరా?. “వారు రివెర్ ఉండ్రె ఒడొల్ అన మంజినార్”, ఇజి దేవుణు మాటుదు రాస్త మనాద్. 17 గాని వన్నిజ్ వాండ్రె ప్రబు వెట కుడుఁవె అతి మనికాన్, వాండ్రు ఒడిఁబిని దని లొజ ప్రబు అత్తు వెట ఉండ్రె అజి మంజినాన్.

18 రంకు బూలావిండ దని బాణిజ్ దూరం ఉహొక్కి మండ్రు. లోకుర్ కిజిని విజు పాపమకు ఒడొల్దిజ్ వెల్లి మనికెజ్ నె. గాని రంకు బూలానికాన్ వన్ని సొంత ఒడొల్దిజ్ వెత్తెకం కిజినాన్. 19 దేవుణు బాణిజ్ మిజి దొహొక్కి మని మీ లొజ మని దేవుణు అత్తు మంజిని గుడిఁనె మీ ఒడొల్ ఇజి మీరు నెన్ఇదెరా? అందెజి మీరు మీ సొంత అజదెర్. 20 మీరు గొప్పు కరిదాన్ కొలె అతి మహికిదెర్. అందెజి మీ ఒడొల్దాన్ దేవుణుదిజ్ గవరం సీదు.

7

పెండ్లి వందిజ్ వెప్పిక

1 మీరు రాస్మిమని సజతిజ వందిజ్ ఏలు నాను వెప్పిన్. పెండ్లి అవండ మంజినిక మొగ్గ కొడొదిజ్ నెగెద్. 2 గాని రంకు బూలానిక లావ్ మనిజ్ ఒరెన్ ఒరెన్ వన్నిజ్ సొంత బొదెలి మండ్రెజ్. విజు బొదెకాజ్ వరి సొంత మాసి మండ్రెజ్ వలె. 3 మాసి అల్ని వందిజ్ కిదెజ్ మనికెజ్ విజు కిజి మండ్రెజ్ వలె. అల్నిబా మాసి వందిజ్ అయాలెకెండెనె మండ్రెజ్ వలె. 4 అల్ని ఒడొల్ దనిజె సొంతం అవండ దని మాసిజ్ బా సెందితిక. అయాలెకెండెనె మాసి ఒడొల్ వన్నిజె సొంతం అవండ వన్ని అల్నిజ్ బా సెందితిక. 5 పార్దనం కిని వందిజ్ మిజి సమయం దొహొక్కి వందిజ్ నె అవండ, రివెర్ కూడిఁజి ఒవెండ

మీరు కేట కేట మండ్రెజ్ ఆవద్. గాని మీ ఆసజ అణస్సె ఆజి మండ్రెజ్ అట్ఎండ మనిజ్, నయ్నాను మిజి తప్ప కిబిసి అర్పైజ్ సరి సిఎండ ఉండ్రెబానె కూడఃజి మండ్రు. ⁶ మిజి యాలెకెండ కిదెజ్ ఆనాద్ ఇజి యాక నాను వెప్పొన, గాని ఉండ్రె ఆడ్ర లెకెండ ఆవద్. ⁷ విజెరె నాను మని లెకెండ పెండ్లి ఆవండ మహిజ బాగ మనాద్ ఇజి ఆస ఆజిన. గాని ఒరెన్ ఒరెన్ వన్నిజ్ దేవుణు బాణిజ్ ఉండ్రె ఉండ్రె వరం దొహ్క మనాద్. ఒరెన్ వన్నిజ్ యా వరం, మరి ఒరెన్ వన్నిజ్ మరి ఉండ్రె వరం.

⁸ ఏలు పెండ్లి ఆజి వరి వెటని రాండి బోదెకాజ్ నాను వెప్పొనిక ఇనిక ఇహిజ, నాను మంజిని లెకెండ పెండ్లి ఆవండ మంజినికాదె వరిజ్ నెగెద్. ⁹ గాని వరి ఆసజ అణస్సె ఆజి మండ్రెజ్ అట్ఎర్ ఇహిజ వారు పెండ్లి ఆదెజ్ వలె. ఎండనిజ్ ఇహిజ మన్నుదు ఉత్పుత్ ఆజి సినుదాన్ వెయ్ని లెకెండ మనిదనిజ్ ఇంక పెండ్లి అనిక నెగెద్.

¹⁰ పెండ్లి ఆతి వరిజ్ నాను సీజిని ఆడ్ర, నానె ఆవద్ దేవుణు సిజిని ఆడ్ర ఇనిక ఇహిజ, ఆల్పి, దని మాసిజ్ డిసి సొండ్రెజ్ ఆవద్. ¹¹ అది మాసిజ్ డిసి సొహిజ మరి ఉండ్రె పెండ్లి ఆదెజ్ ఆవద్. మరి పెండ్లి ఆవండ మండ్రెజ్ ఇస్టం సిల్లెద్ ఇహిజ, దని మాసి వెట రాజినం ఆజి సమాదనం ఆజి మండ్రెజ్ వలె. మరి ఒరెన్ మాసి వన్ని ఆల్పిజ్ డిసి సీదెజ్ ఆవద్ ఇజిబా వన్ని ఆడ్ర మనాద్.

¹² మహి వరిజ్ నాను వెప్పొనిక ఇనిక ఇహిజ, ప్రబు అఎన్ నానె, నమ్మితికాన్ ఆతి ఒరెన్ వన్ని ఆల్పి నమ్మితికాన్ ఇహిజబా, అది వన్ని వెటనె బత్సినాద్ ఇహిజ వాండ్రు దనిజ్ డిసి సీదెజ్ ఆవద్. ¹³ మరి, ఉండ్రె నమ్మితికాన్ ఆతి బోదెల్దెజ్, మాసి నమ్మితికాన్ ఇహిజబా దని వెటనె వాండ్రు బత్కినాన్ ఇహిజ అది వన్నిజ్ డిసి సీదెజ్ ఆవద్. ¹⁴ ఎండనిజ్ ఇహిజ నమ్మితికాన్ ఆతి మాసి నమ్మితికాన్ ఆతి వన్ని ఆల్పి వెట దేవుణు వందిజ్ కేట ఆతికాన్ కిబె ఆత మనాన్. అయా లెకెండెనె నమ్మితికాన్ ఆతి ఆల్పి నమ్మితికాన్ ఆతి దని మాసి వెట దేవుణు వందిజ్ కేట ఆతికాన్ కిబె ఆత మనాద్. యా లెకెండె సిల్లెండ మహిజ మీ పొటాద్ పుట్టి కొడెః, దేవుణుదిజ్ నమ్మితి వరి కొడెః లెకెండె మంజినార్, గాని ఏలు దేవుణు వందిజ్ ఆతికారె.

¹⁵ గాని ఆల్పి మాసిర్ లొక నమ్మితికాన్ ఆతి మాసి గాని నమ్మితికాన్ ఆతి ఆల్పి గాని డిసి సీదెజ్ ఇజి ఆస ఆతిజ ఆహె కిపిర్. అయాలెకెండె జర్గినివలె, నమ్మితికాన్ నమ్మితి దనిజ్ గాని నమ్మితికాన్ నమ్మితి వన్నిజ్ గాని కూడఃజి మన్అ ఇజి బలవంతం కిదెజ్ ఆవద్. సమాదనమదాన్ బత్సిదెజ్ ఇజినె దేవుణు మిజి కూక్ మనాన్. ¹⁶ ఓ, బోదెలి నీ మాసిజ్ దేవుణు రక్సిన్సి లెకెండె కిదెజ్ అట్టిదొ సిల్లెదొ ఇజి నీను ఎలాగ నెస్సి? ఓ, మొగకొడెః నీ ఆల్పిజ్ దేవుణు రక్సిన్సి లెకెండె కిదెజ్ అట్టిదొ సిల్లెదొ ఇజి నీను ఎలాగ నెస్సి?

¹⁷ ఒరెన్ ఒరెన్ ఎలాగ బత్సిదెజ్ ఇజి దేవుణు ఒపసెప్త మనాండ్రొ అయాలెకెండె మండ్రెజ్ వలె. ఎలాగ మండ్రెజ్ ఇజి దేవుణు కూక్ మనాండ్రొ దనిజ్ తగితి లెకెండె వారు మండ్రెజ్ వలె. ఇక్కదె విజు సజమ్కాజ్ నాను సితి మని రూలు. ¹⁸ ఎయెన్బా దేవుణు వన్నిజ్ కూక్వలె సునతి కిబె ఆతికాన్ ఇహిజ వాండ్రు సునతి కిబె ఆతి లెకెండెనె మండ్రెజ్ వలె. అయాక మారిస్సెజ్ సుండెదెజ్ ఆవద్. మరి ఒరెన్ దేవుణు వన్నిజ్ కూక్ వలె సునతి కిబె ఇకాన్ ఇహిజ వాండ్రు సునతి కిబె ఆదెజ్ సుండెదెజ్ ఆవద్. ¹⁹ సునతి కిబె ఆతిజబా ఇనిక సిల్లెద్. సునతి కిబె ఇకాజబా ఇనిక సిల్లెద్. దేవుణు ఆగ్నెజ్ లొజిజ నడినికాదె ముకెలమతిక. ²⁰ ఒరెన్ వన్నిజ్ ఎలాగ మహివలె దేవుణు వన్నిజ్ కూక్ మనాండ్రొ అయాలెకెండెనె వాండ్రు మండ్రెజ్ వలె. ²¹ నీను వెట్టిపణి కిజి మహిజ కూకె ఆతిజ దని వందిజ్ బాద్ ఆమ. అబెణిజ్ విడుఃదల ఆదెజ్ నిజి అక్కు మనాద్ ఇహిజ ఆహె కితి. ²² ఒరెన్ వెట్టిపణి కినికాన్ ఆతి మహిజ దేవుణు మున్ను నమకం ఇట్టాన్ ఇహిజ వాండ్రు దేవుణుదిజ్ నెందితికాన్ నీ పాపమ్కాజ్ విడుఃదల ఆతి లెకెండె ఆజినాన్. అయాలెకెండెనె అక్కు మనికాన్ దేవుణు మున్ను నమకం ఇట్టాన్ ఇహిజ వాండ్రు క్రిస్టు వందిజ్ వెట్టిపణి కినికాన్ లెకెండె ఆజినాన్. ²³ నండొ విలువదాన్ కొలె ఆతికార్ మీరు, అండెజె లొకురి బుద్దిదిజ్ వెట్టిపణి కినివరి లెకెండె ఆమాట్. ²⁴ నమ్మితికిదెర్ ఆతి మా తంబెరిజాండె, ఒరెన్ ఒరెన్ ఎలాగ మండ్రెజ్ ఇజి దేవుణు ఇట్ట మనాండ్రొ అయాలెకెండె మండ్రెజ్ వలె. ఎలాగ మహివలె దేవుణు కూక్ మనాండ్రొ అయాలెకెండెనె దేవుణు వందిజ్ బత్సిదెజ్ వలె. ²⁵ ఏలు విడ్డి అయ్లిక వందిజ్ నజి ప్రబు బాణిజ్ ఇని ఆడ్ర సిల్లెద్. గాని దేవుణు కనికారమదాన్

నమ్మిదెజ్ తగ్గికాన్ ఇజి నజి ఒడఃబిజిని వందిజ్ నాను ఒడఃబినికెజ్ వెప్పిన. 26 యా లోకమ్దు ఏలుమని కన్ఱమ్కు సుడఃతిజ ఎయెన్బా వాండ్రు మని లెకెండెన్ మహిజ నెగెద్ ఇజి నాను ఒడఃబిజిన. 27 నీను పెండ్లి ఆతి మనిదా? అహిజ డిసి సీదెజ్ సుడఃమా. పెండ్లి ఆవిండ మహిజ పెండ్లి ఆదెజ్ సుడఃమా. 28 నీను పెండ్లి ఆతిజ పాపం ఆవిద్. విడిఃఅయ్లి పెండ్లి ఆతిజ పాపం ఆవిద్. గాని పెండ్లి ఆతి వరిజ్ యా బత్కుదు నండో కన్ఱమ్కు మంజినె. అయాకెజ్ మిజి రెవిండ మండ్రెజ్ ఇజిని నాను కోరిజిన.

29 తంబెరిజాండె, నాను వెప్పినిక ఇనిక ఇహిజ ఏర్పాటు కిత్తిమని సమయం ఆదెజ్ కాలం కండెక్నె మనాద్. అల్నిక్ మనికార్ ఏలుదాన్ అల్నిక్ సిలివరి లెకెండె బత్కిదెజ్. 30 అడఃబనికార్ అడఃబఇ వరి లెకెండె మండ్రెజ్ వలె, సర్ల అనికార్ సర్ల ఆఇకార్ లెకెండె మండ్రెజ్ వలె, కొణికార్ మాపు కొటిక మా వందిజ్ ఇడః అనికాప్ ఆవిప్ ఇజి మండ్రెజ్ వలె. 31 యా లోకమ్దు మనికెజ్ వాడఃబనికార్ వనక వందిజ్ మని ఆనదాన్ మన్ను నిండ్రెజి మండ్రెజ్ ఆవిద్. యా లోకం ఏలు మని లెకెండె ఎస్సివలెబా మన్ఎండ, సిల్లెండ ఆనాద్లె. 32 మీరు విసారిసి మంజిని వరి లెకెండె మండ్రెజ్ ఆవిద్ ఇజి నాను కోరిజిన. పెండ్లి ఆఇకాన్ ఎలాగ ప్రబుజ్ సర్ల కిదెజ్ అట్టు ఇజి ప్రబుజ్ సెందితి సజతిజ్ వందిజ్ ఒడఃబిజి మంజినాన్. 33 పెండ్లి ఆతికాన్ ఎలాగ అల్నిక్ సర్ల కిదెజ్ అట్టు ఇజి యా లోకమ్దిజ్ సెందితి సజతిజ్ వందిజ్ ఒడఃబిజి మంజినాన్. 34 వాండ్రు రుండి దరోటు లాగె ఆజినాన్. అయాలెకెండెన్ పెండ్లి ఆఇ బోదెలి గాని ఉండ్రె విడ్డిః అయ్లి గాని దేవుణుదిజ్ సెందితి సజతిజ్ వందిజ్ ఎత్తు కిజి మంజినాద్. పూర్తి అత్తుదాన్ పూర్తి ఒడఃల్దాన్ దేవుణు వందిజ్ కేట మండ్రెజ్ ఇజి అది ఒడఃబిజినాద్. గాని పెండ్లి ఆతికాద్ మాసిజ్ ఎలాగ సర్ల కిదెజ్ అట్టు ఇజి యా లోకమ్దిజ్ సెందితి వన్నా, వందిజ్ ఒడఃబిజి మంజినాద్. 35 మీరు నెగెండె మండ్రెజ్ ఇజినె నాను వెప్పిన, మిజి అడ్డు కిదెజ్ ఇజి సిల్లెద్. మీరు ఇతల్ అతాల్ ఆవిండ దేవుణు దరోట్ నెగెండె మంజి బత్కిదెజ్ ఇజి వెప్పిన. 36 ఎయెన్బా, వన్ని వందిజ్ పేరు కిత్తి అయ్లిదిజ్ పెండ్లి కివిండ మంజి, దనిజ్ సిగు కిబిస్సాన్ ఇజి వన్నిజ్ తోరితిజ, దనిజ్ వయసు డాట్టినాద్ ఇజి ఒడఃబిజి దనివెట పెండ్లి ఆదెజ్ వలె ఇజి ఒడఃబితిజ్ వాండ్రు కోరిజిన లెకెండె కిదెజ్ వలె. వాండ్రు కినిక పాపం ఆవిద్. వారు పెండ్లి ఆదెజ్ వలె. 37 ఎయెన్బా పెండ్లి ఆదెజ్ ఇని బలవంతం సిల్లెండ, వన్నిజ్ వాండ్రె వన్ని గర్పం గదిన్ఎండ పూర్తి అణాన్ ఆదెజ్ అట్టాన్ ఇజి అయ అయ్లి వెట నాను పెండ్లి ఆవి ఇజి, అయా సజతి వందిజ్ వన్ని మన్నుదు గటిజ తీర్మనం కిత్తాన్ ఇహిజ, వాండ్రు కిని తీర్మనమ్బా నెగ్గికాదె.

38 అందెజి వన్నిజ్ పేరు కిత్తి అయ్లిదిజ్ పెండ్లి కినికాన్ నెగ్గిక కిజినాన్. అయాలెకెండె పెండ్లి ఆఇకాన్ మరి ఒదె నెగ్గిక కిజినాన్.

39 మాసి బత్తితి మనిదాక అల్ని వన్ని వెట మండ్రెజ్ వలె. వాండ్రు సాతిజ దనిజ్ ఇన్ఱమాతి వన్ని వెట పెండ్లి ఆదెజ్ ఆనాద్ గాని వాండ్రు ప్రబుజ్ సెందితికాన్ ఆజి మండ్రెజ్ వలె. 40 అది రాండిణి లెకెండెన్ మహిజ ఒదె సర్లదాన్ మండ్రెజ్ ఆనాద్ ఇజి నాను ఒడఃబిజిన, నజిబా దేవుణు అత్తు మంజి నాను ఒడఃబిని దని లోఇ నజి నడిఃపిస్సాన్ ఇజి నాను ఒడఃబిజిన.

8

బోమ్మెజి పూజి సితమని బోజనం వందిజ్

1 ఏలు బోమ్మెజి పూజి సిత బోజనం వందిజ్ వెప్పిన. మాటు విజెటి గెణం మనికాట్ ఇజి నెసినాట్. గాని అయా లెకెండె మని గెణం పొజిస్సినాద్. గాని మా లిఇ ఒరెన్ వన్నిజ్ మరి ఒరెన్ వెట ప్రేమ మహిజ దేవుణు మున్ను, మని నమకమ్దు పిరిప్రెజ్ అట్టాట్. 2 ఎయెన్బా, నాను ఇనికాదె నెస్సికాన్ ఇజి ఒడఃబితిజ, వాండ్రు నెస్సెజ్ మని లెకెండె ఇనికబా నెస్సికాన్ ఆవిన్. 3 గాని దేవుణుదిజ్ ప్రేమిసిని వన్నిజ్ దేవుణుదిజ్ సెందితి వన్ని లెకెండె వాండ్రు సుణాన్. 4 అందెజి బోమ్మెజి పూజి సితకెజ్ తిని వందిజ్ వెప్పిన. ఉండ్రె బోమ్మె ఇహిజ యా లోకమ్దు ఇనికబా ఆఇక ఇజి మాటు నెసినాట్. మరి దేవుణు ఒరెండ్రె మనాన్ మరి ఒరెన్ దేవుణు సిల్లెన్ ఇజి మాటు నెస్స మనాట్. 5 దేవుణు ఇజి కూకె ఆనికెజ్ ఇజి నండో మహిజ్బా, నిజమె ప్రబుని దేవుణు ఇజి కూకె ఆనికెజ్ నండో మన్నె. ఆగాసమ్దు

గాని బూమి మున్ను గాని దేవుణు ఇజి పేరు కూకె ఆనికెళ్ నండో మన్నె. ⁶ గాని మజి ఒరెండ్రె దేవుణు మనాన్, వాండ్రు మా బుబ్బు. వన్ని బాణిజె మనికెళ్ విజు కల్లితె. వన్ని వందిళ్ మాటు బత్తిజినాట్. మజి యేసు క్రీస్తు ఒరెండ్రె మా ప్రబు అతికాన్. మనికెళ్ విజు వన్ని వెటనె తయారె ఆతె. వన్ని వెటనె మాటు బత్తిజినాట్.

⁷ గాని యాక విజెరె నెన్ఎరె. దేవుణుదిళ్ నమ్మిత్తికారె సెగెండ్రె ఏలుబా బొమ్మెళ్ నిజమె దేవుణు ఇజి ఒండేబిజినారె. అందెజె వారు నని బోజనం కినివలె, నిజమె ఆక బొమ్మెజు పూజ సెతికెళ్ ఇజి ఒండేబిజినారె. యాలెకెండ్రె ఒండేబిజినె వారు ఉణారె. అందెజె వారు నని బోజనం కిత్తారె ఇహిజ, వారు పాపం కిత్తారె ఇజి వరి గర్బం గదిసి మంజినాద్. ⁸ గాని ఉణి బోజనమదాన్ మాటు దేవుణుదిళ్ డగ్గు ఆదెళ్ అట్ఎట్. మాటు ఉణెఎండ్రె మహిజ ఇనికాదో గొప్ప విలువాతిక మజి నస్తం ఆఎద్. మాటు ఉణిజ ఇనికాదో గొప్ప విలువాతిక మజి లాబమబా మన్ఎద్.

⁹ అహిజ ఇనికబా కెడిళ్ నిజి మని అక్కుదాన్, మన్నుదు దయరం సిల్లి వరిళ్ తొరె ఇడ్డి లెకెండ్రె మండ్రెళ్ ఆఎద్. ¹⁰ ఎందనిళ్ ఇహిజ, యా గెణం మని నీను, బొమ్మెజు మని గుడిడు బోజనం కిజి మంజనిక, మన్నుదు దయరం సిలికాన్ ఒరెన్ సుండేతిజ, బొమ్మెజు పూజ సెతికెళ్ తిండ్రెళ్ వాండ్రు దయరం తపె ఆనాన్. అయాలెకెండ్రె కిజి వన్ని గర్బం వన్నిళ్ గదిసి మంజినాద్. ¹¹ ఎందనిళ్ ఇహిజ, యా మన్నుదు దయరం సిలి వన్ని వందిళ్బా క్రీస్తు సాత మనాన్. గాని, “సజి గెణం మనాద్”, ఇజి తొరె ఆజని నీను కిజిని పణిజాణిళ్ నీను వన్నిళ్ పాపం కిబిన్సి, మరి వన్నిళ్ పాడె కిజిని. ¹² యా లెకెండ్రె మీరు, గర్బం గదిసిని, దయరం సిల్లి తంబెరిజు పడిఎండ్రె పాపం కిజినిదెరె. ఎందనిళ్ ఇహిజ, నీను కిజిని పణిళ్ సుండేజ తపు ఇజి ఒండేబినికెళ్, వన్ని గర్బం గదిసినికెళ్ వాండ్రుబా కిజి మంజినాన్. యా లెకెండ్రె మీరు క్రీస్తుళ్ పణిజ పాపం కిజినిదెరె. ¹³ అందెజె నాను ఉణిజని దనిదటాళ్ నా తంబెరి ఒరెన్ తప్పి సొన్నినాన్ ఇహిజ, నా తంబెరి తప్పి సొన్ఎండ్రె మండ్రెళ్ ఇజి నాను ఎసెజ్బా నన్ని కండ తిన్ఎ.

9

అపొస్తుడు ఆతి వన్నిళ్ మన్ని అక్కుళ్

¹ నాను అక్కు మనికాన్ ఆవినా? నాను అపొస్తుడు ఆవినా? మా ప్రబు ఆతి యేసుజ్ తొవినా? మీరు, ప్రబు వందిళ్ నాను కిత్తి పణిదిళ్ పంట ఆఇదెరా? ² నాను అపొస్తుడు ఇజి మహికారె ఒండేబిఎండ్రె మహిజ్బా, నిజమె మీ వందిళ్ నాను అపొస్తుడునె. నాను ప్రబు వందిళ్ అపొస్తుడు ఇని దనిళ్ రుజుప్ మీరె. ³ నా మున్ను తీర్పు కిని వరిళ్ ఎద్రు నాను నా వందిళ్ వెప్పానిక యాక. ⁴ మాపు దేవుణు మాటెళ్ నెన్పిన్తి వరిబాన్ లొని ఉండెళ్ తిండ్రెళ్ మజి అక్కు సిల్లెదా? ⁵ మహి అపొస్తురుజ్ లెకెండ్రెని, ప్రబు తంబెరిజు ఆతివరి లెకెండ్రెని, పేతురు లెకెండ్రె నమ్మిత్తికాద్ ఆతి ఆల్సి వెట బుల్లెయ్ కిదెళ్ మజి అక్కు సిల్లెదా? ⁶ దేవుణు పణి కిజిని మహివరి లెకెండ్రె, మాపు దేవుణు పణి కినివలె నజిని బర్బబెళ్ తిండి వందిళ్ పణి కిఎండ్రె ఉణిజ తిండ్రెళ్ అక్కు మనాద్. ⁷ వన్ని సొంత డబ్బు కర్పు కిజి ఎయెన్బా నయనమదు పణి కినాండ్రా? ద్రాక్కు టోట ఉణుసి దని పట్టు తిన్ఇకాన్ ఎయెన్బా మనాండ్రా? గొరెజి పోస కిజి వన్కా పాలు ఉణిఇకాన్ ఎయెన్బా మనాండ్రా? ఎయెర్బా మన్ఎరె. ⁸ యా మాటెళ్ నాను లోకమదిళ్ సెందితి వరి వజనె వెవోఎ. దేవుణు సెత్తి రూలుదుబా యా లెకెండ్రెనె వెప్పానాద్. ⁹ “కలమ్దు మటిసిని డాను మూతుదు కిమా తోహోమాట్”, ఇజి మోసె వెట దేవుణు సెత్తి రూలుదు రాస్త మనాద్. దేవుణు డాకు వందిళ్నె విసారిస్సాండ్రా? ¹⁰ నిజమె, యాక మా వందిళ్బా వెవోఎతాండ్రా? మా వందిళ్ వెప్పాకెజె. ఎందనిళ్ ఇహిజ, పంట పంటితిజ, ఉండెళ్ ఆనాద్ ఇజి ఉండ్రె ఆసదాన్ డూనికాన్ డూజినాన్. మటిసినికాన్బా అయ ఆసదాన్ మటిసినినాన్. ¹¹ మీ వందిళ్ ఆత్మదిళ్ సెందితికెళ్ మాపు మీ నడిమి వితావ ఇహిజ, అందెజె మీ బాణిళ్ మా ఒండేల్దిళ్ కావాలిస్సికెళ్ మాపు లొనె ఆతిజ ఆక పెరి సజతినా? ¹² మీ బాణిళ్ సాయం లొనె ఆదెళ్ మహి వరిళ్ అతికారం మనాద్ ఇహిజ, మజి వరిళ్ ఇంక ఒద్దె అక్కు సిల్లెదా? గాని మాపు యా అతికారమదిళ్ వాడెడిళ్ సిల్లెద్. అక్కుదె అఎండ్రె క్రీస్తు సువార్దదిళ్ ఇని అడ్డుబా రెఎండ్రె మండ్రెళ్ ఇజి విజు వన్కాళ్ బరిస్తాప్. ¹³ దేవుణు గుడిడు పణి కిజిని వరిళ్ దేవుణు గుడిడాన్ బోజనం దోహోక్కాద్. పూజ సీని

మాల్లి పీటదు పణి కిజిని వరిజ్ పూజ సత్తి వన్నా లోఇహోన్ వంతు మనాద్ ఇజి మీరు నెన్ఇదెరా? 14 అయా లెకెండెన సువార్త వెప్పొని వరిజ్ బత్తుదిజ్ కావిల్లికెజ్ సువార్తదానె దోహొక్కికెజ్ ఇజి ప్రబు ఆడ్ర సిత్రా మనాన్.

15 గాని నాను ఇహొజ యా అత్తికారం లోఇ ఇనికబా వాడెఁవత. మీరు యా లెకెండెనజీ కినిదెరెలె ఇని అసదాన్ ఇక రాన్ఎత. నాను పొగ్గడెఁ ఆజి వెప్పొ యా మాటజ్ ఎయెన్బా ఇని అర్తం సిల్లెండ కిని దనిజ్ ఇంక నాను సాతిజానె నెగెద్. 16 అహొజ, నాను సువార్త సాటిసిన ఇజి పొగ్గడెఁ ఆదెజ్ నజీ అక్కు సిల్లెద్. ఎందనిజ్ ఇహొజ సువార్త సాటిసెజ్ ఇజి ఉండ్రీ బలవంతం నా లోఇ మనాద్. సువార్త సాటిసెండ మహొజ నజీ బాద. 17 నా సొంత ఇస్టమ్దాన్ నాను సువార్త సాటిసెజ్ నజీ జితం దోహొక్కాద్. నా సొంత ఇస్టమ్దాన్ ఆవండ కిత్తిజ, నాను కిదెజ్ ఇజి నజీ ఒప్పజెవ ఆతి పణి కిజిని ఇజి ఆజినాద్. 18 అహొజ నజీ దోహొక్కి జితం ఇనిక? సువార్త సాటిసెనవలె, నాను సువార్త సాటిసెని వరిజ్ మని అతికారమ్దాన్ ఇనికబా నా వందిజ్ గణసైజ్ సుడెఁవండ, సెడ్డినె కిదెజ్ వలె. అక్కాదె నజీ దోహొక్కి ఇనాయం.

19 నాను ఎయెరిజ్బా అడిఁగి మనికాన్ ఆవండ విజు దనిజ్ అక్కు మనికాన్. గాని, నజీ అట్టి నసొండారిజ్ దేవుణు దరిజ్ కలప్పెజ్ ఇజి నానె నజీ విజెరె వందిజ్ వెట్టిపణి కిని వన్ని లెకెండ కిబె ఆత. 20 యూదురిజ్ దేవుణు దరిజ్ కలప్పెజ్ ఇజి నాను వరి వందిజ్ యూదురు లోకు లెకెండ ఆత. నాను మోసె రాస్తి రూలుజ అడిఁగి మనికాన్ అత్తిజ్బా మోసె రాస్తి రూలుజ్ లోజిని వరిజ్ దేవుణు దరిజ్ కలప్పెజ్ ఇజి వరివందిజ్ మోసె రాస్తి రూలుజ్ లోజితి వన్ని లెకెండ ఆత మన. 21 దేవుణు మోసె సీతి రూలుజ్ లోజిఇ వరిజ్ దేవుణు దరోట్ కుడుఁప్పెజ్ ఇజి నాను వరి లెకెండ ఆత. దేవుణు మోసె వెట సీతి రూలుజ్ నాను లోజిఎ ఇజి నాను వెహొఎ, గాని క్రిస్తు సత్తి రూలుజ్ లోజిజి మంజిన. 22 సత్తు సీలి వరిజ్ దేవుణు దరిజ్ కుడుఁప్పెజ్ ఇజి నాను సత్తు సీలి వన్ని లెకెండ ఆత. ఎలాగ అత్తిజ్బా సెగొండారిజ్ దేవుణు రక్కిస్తి లెకెండ కిదెజ్ ఇజి నాను విజెరె వందిజ్ ననివరి లెకెండ ఆత మన. 23 ఎందనిజ్ ఇహొజ దేవుణు బాణిజ్ వాజిని దినమక వందిజ్ సువార్త సాటిసెని నజీబా వంతు మండ్రెజ్ ఇజి యాకెజ్ విజు నాను సువార్త వందిజ్ కిజిన. 24 పందెం పోటిదు ఉహొక్కి పందెమ్దు ఉహొక్కినార్ విజెరె ఉహొక్కినార్ గాని ఒరెన్ వన్నిజి ఇనాయం దోహొక్కాద్ ఇజి మీరు నెన్ఇదెరా? అందెజె ఇనాయం దోహొక్కెజ్ ఇజినె మీరు పందెమ్దు ఉహొక్కు. 25 పందెమ్దు పోటి ఆనికార్ విజెరె దనివందిజ్ ఒజ ఆజి తయార్ ఆజినార్. సాణెం మంజి పాడెఁ ఆజి సొన్సెని టోపి దోహొక్కి వందిజ్ యాకెజ్ విజు కిజినార్. గాని మజీ ఎలాకాలం మంజిని టోపినె దోహొక్కాద్. 26 అందెజె నాను గురి సుడెఁవండ ఉహొక్కికాన్ ఆవ. నాను ముటి అసి గాలిదిజ్ డెయెని నని వన్ని లెకెండ ఆవ. 27 గాని మహొ వరిజ్ సువార్త సాటిసె వెనక, ఇనాయం దోహొక్కి వన్ని లెకెండ నజీ నానె కివండ మండ్రెజ్ ఇజి నా ఒడిఁలదిజ్ నెగండ అడ్డిజి, నజీ వెట్టిపణి కిని వన్ని లెకెండ కిజిన.

10

ఇస్రాయేలు లోకురిజ్ సుడెఁజి నెస్సెజ్ మన్నికెజ్.

1 తంబెరిజాండె, మా అని గొగొరె ఆతి యూదరు విజెరె మోసె వెట మహొవలె ఇనిక జగ్గిత మనాద్ మీరు నెగండ నెసి మండ్రెజ్ ఇజి నాను ఆస ఆజిన. దేవుణు వరివెట మనాన్ ఇజి ఉండ్రీ గుర్తు లెకెండ దేవుణు వరి ముస్సు ఇడ్డి మని మొసొప్ అడిఁగి వారు నడిఁత మహూర్. ఎరాని సమ్దారం ఇని సమ్దారం నడిఁమిహాన్ వారు విజెరె వస్తా బూమిదాన్ అతాహా పడక నడిఁత సహూర్. 2 వారు విజెరె మోసె వెట మొసొప్ అడిఁగి మంజి సమ్దారం నడిఁమిహాన్ వస్తా బూమిదాన్ నడిఁజి మహొజ్, మోసె వెట బాప్తినం లాగి ఆతి లెకెండ అతార్. ఎందనిజ్ ఇహొజ వారు మోసెజ్ వరిజ్ నెయ్యి లెకెండ వారు ఒప్పొకొటార్. 3 విజెరె దేవుణు సీతి ఉండ్రె బోజనమనె ఉటార్. 4 వారు విజెరె సట్టుదాన్ దేవుణు రప్పిసి ఉండ్రె ఏరునె ఉటార్. అయ సటు క్రిస్తుజ్ గుర్తు లెకెండెన మనాద్. ఎందనిజ్ ఇహొజ వాండ్రు ఇనికబా తకు సిల్లెండ వరిజ్ కావాలిస్సికెజ్ విజు సీజి నిజమె వరి వెట నడిఁజి మహూర్. 5 అయా లెకెండ మహొజ్బా, వరి లోఇ నండోడారిజ్ దేవుణు ఇస్టం ఆవండ ఆతాన్. అందెజె ఎయెరెబా మనిక అయా అడిఁవిదు వరిజ్ సప్త విసీరతాన్. 6 ఇక్కెజ్ విజు మాటు నెస్సెజ్ ఇజి మజీ ఉండ్రీ గుర్తు లెకెండ వరిజ్ జగ్గిత మన్నె. వారు సెఇ వనకాజ్ వందిజ్ ఆస ఆతి లెకెండ మాపు ఆస ఆవండ జాగర్త మండ్రెజ్ ఇజి.

7 వరి లోక సెగొండార్ లెకెండ బొమ్మెజ మాడిసినికార్ ఆమాట్. “లోకుర్ తిండ్రెజ్ ఉండెజ్ బస్తార్, కర్తిదెజ్ నీజెతార్”, ఇజి వరి వందిజ్ దేవుణు మాటదు రాస్త మనాద్. 8 వరి లోక సెగొండార్ కిత్తి మహి లెకెండ మాటు రంకు బూలమాట్. ఉండ్రె రోజుదు ననికార్ ఇరువయముండ్రె వెయుజ్ లోకుర్ సాతార్. 9 వరి లోక సెగొండార్ కిత్తి మహి లెకెండ మాటు ప్రబుజ్ పరిస కిదెజ్ ఆవద్. ననికార్ సరాస్ వెట సాతార్. 10 వరి లోక సెగొండార్ దేవుణు ముస్సు సణిజెతార్. వారు నాసనం కినికాన్ ఆతి దేవుణు దూత వెట సాతార్. మాటు దేవుణు ముస్సు సణిజెదెజ్ ఆవద్.

11 మహివరిజ్ తోరదెజ్ ఉండ్రె గుర్తు లెకెండ యాకెజ్ వరిజ్ జర్తితె. యా తరమది ఆకర్ దినమదు బత్తిజిని మజి బుద్ది వాదెజ్ ఇజి గెవతం కిత్తి మని లెకెండ రాసి ఇడె ఆత మనాద్. 12 అందెజె ఎయెన్బా దేవుణు ముస్సు మని నమకమదు నాను గటిజి నిల్చిన ఇజి ఒడెబిజి, వాండ్రు వెటనె పావమదు అరెండ జాగర్ మండ్రెజ్ వలె. 13 మాములుక లోకురిజ్ వాజిని పరికెజ్ నె ఆవండ మరి పెరికెజ్ ఇనికెజ్ బా మిజి రప్పతె. దేవుణు సమ్మకమాతికాన్. అందెజె ఒరిస్తెజ్ అట్టి దనిజ్ ఇంక పెరిక ఇనికబా మిజి వాదెజ్ వాండ్రు ఒవ్ వన్. అక్కాదె ఆవండ వాజిని పరికెదెజ్ నిల్చి మండ్రెజ్ పరికె వెట తప్పె ఆదెజ్ ఉండ్రె సరిబా తోరిస్తాన్ లె.

దెయమక పండ్రెయ్ ని ప్రబు ఏర్పాటు కిత్తి బోజనం

14 అందెజె నజె ఇస్తమాతి తంబెరిజాండె, బొమ్మెజ మాడిసిని బాణిజ్ దూరం ఉహ్ క్వి మండ్రు. 15 మీరు నెగ్గి బుద్ది మనికిదెర్ ఇజి నాను వర్తిజన. నాను వెహ్ ప్పిని సజతిజి మీర్ అర్లం కిజి సుడెదు. 16 మాటు విజెటి కూడెజి వానివలె, మాటు దేవుణు ఏర్పాటు కిత్తి బోజనం ఉణువలె, దేవుణుదిజ్ వందనమకు వెహ్ గినాదిక ఉణిజి, మాటు ఉండ్రె రొటి రుక్తి తినివలె క్రీస్తు సలదాన్ మజి వాజిని నెగ్గి వన్కాజ్ కూడెజి మంజినికాట్ ఆజినాట్. 17 రొటి ఉండ్రెనె, అయ ఉండ్రె రొటిదనె మాటు విజెటి కూడెజి తింజినాట్. అందెజె నండ్రెండార్ ఆతి మాటు ఉండ్రె ఒడెల్ ఆత మనాద్. 18 ఇస్తాయెలు లోకురిజ్ సుడెదు, దేవుణుదిజ్ సంద సుర్తి బాడ్డిదు సంద సీని వన్కాజ్ తినికార్, దనివెట కూడెజి మంజినికార్ ఆఎరా? 19 అందెజె బొమ్మెజ పూజి సతి వనకాజ్ లోక ఇనికబా మనాద్ ఇజినె, బొమ్మెజ లోక ఇనికబా మనాద్ ఇజినె నాను వెహ్ ప్పినానా? 20 సిల్లెద్. గాని దేవుణు లోకుర్ ఆఇకార్ పూజెజ్ సీనివలె దేవుణుదిజ్ పూజి సీనినార్ ఇజి వారు ఒడెబిజినార్. గాని నిజమె వారు దెయమకాజ్ నె పూజి సీజినార్. అందెజె మీరు దెయమక వెట కూడెజి మంజినిక నజె ఇస్తం సిల్లెద్. 21 మీరు ప్రబు గినాదాన్ ఉణిజి మరి దెయమక గినదాన్బా ఉండెజ్ అట్ ఇదెర్. ప్రబు ఏర్పాటు కిత్తి బోజమమదుని దెయమక బోజనమదుబా ఒర్పె కూడెజి మండ్రెజ్ అట్ ఇదెర్. 22 దేవుణుదిజ్ నెందితి గవరం తగ్గి లెకెండె వన్నిజ్ సీదెజ్ వలె. అయా లెకెండ కిఎండ ప్రబు కోపం రేపిస్తెజ్ మాటు పణి కిజినాటా? మాటు వన్నిజ్ ఇంక సత్తు మనికాటా? నమ్మిత్తి వన్నిజ్ మని అక్కుజ్ 23 “విజు వన్కా వందిజ్ నజె అక్కు మనాద్”, గాని విజు పణిదిజ్ వానికెజ్ ఆఉ. “విజు వనక వందిజ్ నజె అక్కు మనాద్”, గాని విజు నెగెండె పిరిప్పికెజ్ ఆఉ. 24 ఎయెన్బా నజె నానె నెగెండె మండ్రెజ్ ఇజి తొవండ మహికార్బా నెగెండె మండ్రెజ్ ఇజి సుడెదెజ్ వలె.

25 మీ గర్బం మిజి గదిన్ ఎండ మహిజ సతాదు పొర్తి ఇని కండబా తిండ్రు. 26 ఎందనిజ్ ఇహిజ, “యా బూమి ప్రబుదినె, దని ముస్సు మనికెజ్ విజు వన్నివినె”, ఇజి దేవుణు మాటదు రాస్త మనాద్. 27 ఒరెన్ నమ్మిఇకాన్ మిజి విందుదిజ్ కూక్తి తనివలె, మిజి ఆన మహిజ సొండ్రు. గాని గర్బం గదిన్ ఎండ, మి ఎర్తు ఇడ్డికెజ్ ఇనికబా వెన్బా ఎండ తిండ్రు. 28 గాని ఎయెన్బా, “యాక బొమ్మెజ పూజి సతి దనిబాణిక”, ఇజి వెహ్ ప్పి, వెహ్ ప్పి వన్ని వందిజ్ ని మీ గర్బం గదిసిని వందిజ్ అక తిన్కాట్. 29 గర్బం గదిసిని వందిజ్ ఇజి వెహ్ ప్పి వలె అక్క నీది ఆవద్, వెహ్ ప్పి వన్ని వందిజ్ నె వెహ్ ప్పి. విజు వన్కా వందిజ్ మజి మని అక్కుదిజ్ మరి ఒరెన్ వన్ని గర్బమదు మని ఆలోసనమదాన్ ఎందనిజ్ మాపు తీర్పు కిబె ఆదెజ్? 30 నాను అయా బోజనం వందిజ్ దేవుణుదిజ్ వందనమకు వెహ్ ప్పి ఉటిజ, దేవుణుదిజ్ వందనమకు వెహ్ ప్పి ఉటి బోజనం వందిజ్ ఎందనిజ్ నాను దూనె ఆదెజ్ వలె.

31 అందెజె మీరు ఉటిజ్ బా, తిహిజ్ బా, ఇనిక కిత్తిజ్ బా విజు దేవుణుదిజ్ గొప్ప పేరు వాని లెకెండె కిదు. 32 యూదురిజ్ గాని, యూదురు ఆఇవ వరిజ్ గాని, దేవుణు సజమది వరిజ్ గాని తోరొడ్డి లెకెండె

ఇనికబా కిఎండ మండ్రు. 33 నండొండారిజ్ దేవుణు రక్సిస్తైజ్ ఇజి, నాను నజీ నానె నెగెండ మండ్రైజ్ ఇజి తోవ. గాని మహికారబా నెగెణ్ మండ్రైజ్ ఇజి విజు వన్కా లొక విజెరిజ్ సర్ద కిదిన్ని లెకండ నాను మంజిన. మీరుబా నాను కిజిని లెకండ కిజి మండ్రు.

11

దేవుణుదిజ్ పొగిడిజి మాడిసిక

1 నాను క్రీస్తుజ్ పొలిసి నడిసిని లెకెండ మీరు నజి పొలిసి నడిసు. 2 నాను మిజి నెన్పిస్సి బోదదిజ్ డిన్ఎండ లోజిజి నడిజినిదెర్ ఇజి, మరి విజు సజతిజ వందిజ్ నజి ఎత్తు కిజిని వందిజ్ నాను మిజి పొగిడిజిన. 3 ఏలు మీరు ఇక్కైజ్ నిజం నెస్తైజ్ ఇజి కోరిజిన. ఒరెన్ వన్నిజ్ బుర్ర క్రీస్తు, ఉండ్రీ బోదెలిదిజ్ బుర్ర మొగకొడై. క్రీస్తుజ్ బుర్ర దేవుణు ఇజి మీరు నెని మండ్రైజ్. 4 ఎమేణి మొగకొడైబా పార్దనం కినివలెనో, దేవుణు ప్రవక్త లెకెండ వర్గిని వలెనో వన్ని బుర్రుడు టుకుర్ ఇడ్డి మహిజ వాండ్రు వన్ని నెయ్యి క్రీస్తుజ్ గవరం సొన్నిస్సాన్. 5 మరి ఎమేణి బోదెలిబా పార్దనం కనివలెనో, దేవుణు ప్రవక్త లెకెండ వెప్పివలెనో బుర్రుడు టుకుర్ ఇడ్డిఎండ మహివలె అది దని బుర్ర బోడి కిబె అతి లెకెండ సిగు లాగె ఆజినాద్. 6 ఉండ్రీ బోదెలి బుర్రుడు టుకుర్ ఇడ్డిఎండ మహిజ అది దని బుర్రది కొప్పు కత్రిస్తైజ్ వలె. కొప్పు కత్రిస్తైజ్ నో బోడి బుర్ర అదెజ్ నో సిగు అతిజ అది బుర్రుడు టుకుర్ ఇడ్డిదెజ్ వలె. 7 మొగకొడై బుర్రుడు టుకుర్ ఇడ్డిదెజ్ అక్కర్ సిల్లెద్. ఎందనిజ్ ఇహిజ దేవుణు, వన్ని గవరం తొరిస్తైజ్ ఇజి మొగవన్నిజ్ వన్ని మూర్తి లెకెండ తయార్ కిత మనాన్. గాని బోదెలి బుర్రుడు టుకుర్ ఇడ్డిదెజ్ వలె. ఎందనిజ్ ఇహిజ బోదెలి దని మాసిజ్ గవరం తొరిసినాద్. 8 ఎందనిజ్ ఇహిజ బోదెలి మొగకొడై బాణిజ్ తయార్ కిబె అత మనాద్, గాని మొగకొడై బోదెలి బాణిజ్ తయార్ కిబె ఆవతాన్. 9 అక్కాదె ఆవండ, దేవుణు బోదెలి వందిజ్ మొగకొడైదిజ్ తయార్ కివతాన్, గాని మొగకొడై వందిజ్ నో బోదెలిదిజ్ తయార్ కిత్తాన్. 10 అందెజె యా సజతి వందిజ్ ని దేవుణు దూతార్ వందిజ్ అతికారమదిజ్ అడిగి మని దనిజ్ గుర్తు లెకెండ బోదెలి బుర్రుడు టుకుర్ ఇడ్డిదెజ్ వలె.

11 గాని ప్రబు వెట కూడితి మని బత్తుడు బోదెలి మొగకొడై వెట సమందం సిల్లెండ మన్ఎద్. మొగకొడై బోదెలి వెట సమందం సిల్లెండ మన్ఎన్. 12 మొగకొడై బాణిజ్ బోదెలి వాతి లెకెండె బోదెలి బాణిజ్ మొగకొడై పుట్టినాన్. గాని విజు దేవుణు బాణిజ్ నె వాజినె. 13 ఉండ్రీ బోదెలి బుర్రుడు టుకుర్ ఇడ్డిఎండ దేవుణుదిజ్ పార్దనం కిదిజ్ తగ్గాదా? మీరె ఒడిబిదు. 14 మొగకొడై వన్ని బుర్రది కొప్పు పిరిప్తి మహిజ అక్క వన్నిజ్ సిగు ఇజి ఎయెర్బా వెహ్ఎండ మిజి మీరె నెస్సిదెర్ గదె. 15 గాని ఉండ్రీ బోదెలిదిజ్ బుర్రది కొప్పు పిరితి మహిజ అక్క దనిజ్ ఉండ్రీ మీరు మని లెకెండెనె, ఉండ్రీ వాత సెంగు లెకెండెనె. 16 దిన్ని వందిజ్ ఎయెర్బా గొడెబ రేప్టిజ ఇక్కాదె ఆవండ మా లొక వేరె అలవాటు ఇనికబా సిల్లెద్. దేవుణు సజమదుబా సిల్లెద్.

ప్రబు ఏర్పాటు కిత్తి బోజనం వందిజ్.

17 మరి ఏలు నాను వెప్పిని మాటదు మీరు నెగ్గికార్ ఇజి నాను మిజి పొగిడిఎ. ఇనిక ఇహిజ మీరు నెగ్గిదని వందిజ్ నె కూడిజె వాజినిదెర్ గాని నెగ్గి దన్నిజ్ ఇంక అక్క సెఇక కిజినాద్. 18 మొదొహి సజతి ఇనిక ఇహిజ దేవుణు సజం లెకెండ మీరు కూడిజె వానివలె మీ లొక గుంపుజ్ మన్నె ఇజి నాను వెహమన. యాక కండెక్ నిజమెనె ఇజి నాను సమ్మిజిన.

19 దేవుణు ఎర్దు నెగ్గికార్ ఎయెర్ ఇజి తోరె అదెజ్ మీ లొక బేదమకు తవ్వెండ మంజినె. 20 మీరు విజెదెర్ కూడిజె వానివలె మీరు ఉణిక ప్రబు ఏర్పాటు కిత్తి బోజనం ఆవద్. 21 ఎందనిజ్ ఇహిజ, బోజనం కినివలె ఎయెర్ వందిజ్ బా క్రాప్ కిఎండ ఒరెన్ ఒరెన్ ముజాల బోజనం కిజినాన్. ఒరెన్ బజ సానాన్ మరి ఒరెన్ సొసి మంజినాన్. 22 అహ ఉండెజ్ తిండ్రైజ్ మిజి ఇల్కు సిలునా? మరి దేవుణు సజమదిజ్ ఇజిరె కణక సుడిజె ఇనిక సిల్లి వరిజ్ మీరు సిగు కిజినిదెరా? నాను మీ వెట ఇనిక వెప్తైజ్? దిన్ని వందిజ్ నాను మిజి పొగిడిదెజ్ నా? కసితం నాను పొగిడిఎ.

23-24 ప్రబు బాణిజ్ నజి దొహ్ క్రిక నాను మిజి ఒవజెప్పిక ఇనిక ఇహిజ, ప్రబువాతి యేసు వాండ్రు ఒవజెవె అతి పొదొయ్, ఉండ్రీ రొటె పెర్ది దేవుణుదిజ్ వందనమకు వెప్పి దనిజ్ ముక్కైజ్ కిజి, “ఇక్క మీ వందిజ్ నీజిని నా ఒడైల్. నజి ఎత్తు కిజి యా లెకెండ కిజి మండ్రు”, ఇజి వెప్తాన్. 25 అయా లెకెండెనె

బోజనం కిత్తి వెనుక వాండ్లు ద్రాసకాలు మని గిన్న పెర్లి, “యా గిన్న నా నలదాన్ కిజిని కొత్త ఒప్పుమానం, మీరు యా గిన్నదిక ఉణి ఎస్తివలెబా నజీ ఎత్తు కిజి యా లెకండ్ కిజి మండ్లు”, ఇజి వెహ్లాన్. ²⁶ అందెజె మీరు యా రొట్టె తింజి యా గినాది ద్రాసకాలు ఉణి ఎస్తివలెబా ప్రబు మరజి వానిదాక వన్ని సాపుదిక్ సాట్టిసినిదెర్.

²⁷ అందెజె ఎయెన్బా తగ్గికాన్ ఆవిండ ప్రబు ఏర్పాటు కిత్తి బోజనమ్దు రొట్టె తింజి గినాదిక ఉటిజ, వాండ్లు ప్రబు ఒడోల్దిక్ వన్ని నలదిక్ పడిఃఎండ పాపం కినికాన్ ఆజినాన్. ²⁸ అందెజె రొట్టెని గినాదిక ఉణి ముజాల్ ఒరెన్ ఒరెన్ వన్నిక్ వాండ్రె నాను తగ్గికాండ్రా ఇజి నుడః ఆదిక్ వలె. ²⁹ గాని ఎయెన్బా యాక ప్రబు ఒడోల్ ఇజి నిజం నెన్ఎండ ఉణి తినికాన్ వన్ని మున్కు వాండ్రె సిక్కు తపె ఆని వందిక్ ఉణిజి తింజినాన్. ³⁰ అందెజె మీ లొఇ నండొండారె సత్తు సిల్లికారెని జబుక్ మనికారె ఆతారె. నండొండారె సాత సాహారె. ³¹ గాని మజి మాటె నెగెణ్సుడః ఆతాట్ ఇహిజ దేవుణు తీర్పుదు రెఎండ తప్రె ఆతాట్మరి. ³² మాటు ప్రబు బాణిక్ తీర్పు తీర్పె ఆతాట్ ఇహిజ, యా లోకమ్ది వరిక్ సీని సిక్నాదు రెఎండ ప్రబు మజి బుద్ది వెహ్లా సిక్నదాన్ దిదిజినాన్.

³³ అందెజె నా తంబెరిజాండె, మీరు కూడఃజి వాజి బోజనం కినివలె మహివరి వందిక్ కావ్ కిదు. ³⁴ మీరు కూడఃజి వాజినిక సిక్నదిక్ గురి ఆవిండ మండ్రెక్ ఇజి ఎయెరిక్బా బజ కట్టిజి వాండ్లు వన్ని ఇండ్రెనె బోజనం కిదిక్వలె. నాను వానివలె మరి మని సజతిజి వందిక్ వెహ్లా.

12

దేవుణు ఆత్మ సీని వరమ్కు.

¹ తంబెరిజాండె, దేవుణు ఆత్మ సీజిని వరమ్కాక్ వందిక్ మీరు నెగెండ నెసి మండ్రెక్ ఇజి నాను కోరిజన. ² దేవుణుదిక్ నమ్మిఎండ మహివలె, ఇనికాదొ ఉండ్రె సత్తుదాన్ ఎయెండ్రె మిజి నడిఃపిన్తి మహి లెకండ్ మీరు సొన్ని వర్గి ఇ బొమ్మెజి మాడిఃసి మహిదెర్ ఇజి మీరు నెస్సిదెర్. ³ అందెజె, నాను మిజి వెహ్లానిక ఇనిక ఇహిజ, దేవుణు ఆత్మదాన్ వర్గిజినికాన్ ఎయెన్బా, “యేసు నయెవ్ పొందితొకాన్”, ఇజి వెహ్లాజ్నో, దేవుణు ఆత్మదాన్ ఆవిండ “యేసు, ప్రబు ఆత మనాన్”, ఇజి వెహ్లాజ్నో అట్వెన్.

⁴ దేవుణు ఆత్మ సీజిని వరమ్కు నండొ రకమ్కు మన్నె. గాని అయా ఉండ్రె దేవుణు ఆత్మనె విజు వరమ్కు సీజినాన్. ⁵ మరి దేవుణు వందిక్ కిదిక్ అట్టి పణిక్ నండొ రకమ్కు మన్నె, గాని ఒరెండ్రె ప్రబు వందిక్ మాటు విజెవి పణి కిజినాట్. ⁶ జర్గిని సజతిక్ నండొ రకమ్దికెక్ మన్నె. గాని విజు వన్నా లొఇ, మరి విజెరె లొఇ పణి కినికాన్ ఒరెండ్రె దేవుణునె. ⁷ విజెరిక్ పణిదిక్ వాని వందిక్ ఇజి ఒరెన్ ఒరెన్ వన్ని వెట దేవుణు ఆత్మ కిజిని పణిక్ తోరె ఆజినె. ⁸ ఎలాగ ఇహిజ, ఒరెన్ వన్నిక్ దేవుణు ఆత్మదాన్ బుద్ది మని మాటెక్ వెహ్లాక్ వరం సీజినాన్. మరి ఒరెన్ వన్నిక్ గెణం మని మాటెక్ వర్గిదిక్ అయా దేవుణు ఆత్మనె వరం సీజినాన్.

⁹ మరి ఒరెన్ వన్నిక్ అయా ఆత్మనె దేవుణు మున్కు సమకం సీజినాన్. మరి ఒరెన్ వన్నిక్ అయా దేవుణు ఆత్మనె జబుజాణి వరిక్ నెగెండ్రె కిదిక్ వరం సీజినాన్.

¹⁰ మరి ఒరెన్ వన్నిక్ బమ్మాతి పణిక్ సత్తుని, మరి ఒరెన్ వన్నిక్ దేవుణు బాణిక్ వాజిని మాటెక్ వన్ని ప్రవక్త లెకండ్ వెహ్లాక్, మరి ఒరెన్ వన్నిక్ ఆత్మెక్ ఎలాగ మర్రికెక్ ఇజి నెస్తెక్, మరి ఒరెన్ వన్నిక్ ఆఇ ఆఇ బాసెక్ వర్గిదిక్, మరి ఒరెన్ వన్నిక్ బాసెజి అర్దం కిజి నెస్తెక్ దేవుణు ఆత్మ వరమ్కు సీజినాన్. ¹¹ అయ ఉండ్రె దేవుణు ఆత్మనె వన్నిక్ ఇస్సమాతి వజి ఒరెన్ ఒరెన్ వన్నిక్ వరమ్కు సీజిని సీజి యా పణిక్ విజు కిజినాన్.

ఉండ్రె ఒడోల్ని నండొ బాగమ్కు.

¹² ఒడోల్ ఉండ్రెనె, గాని నండొ బాగమ్కు కూడఃజి తయారె ఆత మనాద్. నండొ బాగమ్కు కూడిఃతికాదె గాని అవి కూడఃజి ఉండ్రె ఒడోల్ ఆతి లెకండ్నె క్రీస్తుబా మనాద్. ¹³ ఎలాగ ఇహిజ, యూదురు ఆతిక్బా, యూదురు ఆఇకారె ఆతిక్బా, వెటి పణి కినికాన్ ఆతిక్బా, అక్కు మనికాన్ ఆతిక్బా మాటు విజెవి ఉండ్రె ఒడోల్దు ఉండ్రె ఆత్మదాన్ బాప్తీసం లాగె ఆతాట్. అయ ఉండ్రె దేవుణు ఆత్మదాన్ మా మున్కుజి దేవుణు మజి సిత మనాద్. ¹⁴ ఒడోల్ ఇహిజ నండొ బాగమ్కాణిక్

తయారై ఆతిక. ఉండ్రై బాగమ్దాన్ తయారై ఆతిక అవిద్. 15 అందెజె, “నాను కియు ఆవి, అందెజె నాను ఒడొల్దు మనిక అవి”, ఇజి పాదం వెహ్తైజి, అక్క ఒడొల్దు మంజినిక అవిండ అజినాదా? 16 మరి, “నాను కణక ఆవి, అందెజె నాను ఒడొల్దు మనిక అవి”, ఇజి గిబ్బి వెహ్తైజి, అక్క ఒడొల్దు మంజినిక అవిండ అజినాదా? 17 ఒడొల్దు విజు ఉండ్రై కణకానె ఆతిజు, ఎలాగ విండ్రెజ్ అనాద్? ఒడొల్దు విజు గిబ్బి ఉండ్రై ఆతిజు, వాసనం సూణిక ఎంబె మంజినాద్? 18 గాని ఉండ్రై ఉండ్రై బాగం ఎలాగ మండ్రెజ్నో, అయా లెకెండ దేవుణు వన్నిజ్ ఇస్సమాతి లెకెండ ఒడొల్దు ఇట్టా మనాన్. 19 ఆకెజ్ విజు ఉండ్రై బాగం ఆతిజు ఒడొల్దు ఎంబె? 20 ఆకెజ్ మని లెకెండ నండొ బాగమ్కు మన్నె గాని ఒడొల్దు ఉండ్రై. 21 అందెజె, కణక కియుదిజ్, “నీను నజి అక్కర్ సిల్లెద్”, ఇజి వెహ్తైజ్ అట్విద్. బుర్ర పాదమ్కాజ్, “మీరు నజి అక్కర్ సిల్లెద్”, ఇజి వెహ్తైజ్ అట్విద్. 22 అక్కాదె అవిండ, ఒడొల్దు కూడితి మని సత్తు తకు ఆతి బాగమ్కాజ్, అక్కాజ్ మండ్రెజ్ అక్కర్ సిల్లెద్ ఇజి డిస్సిస్టెజ్ అట్విద్. 23 ఒడొల్దు ఎమేణి బాగమ్కాజ్ గవరం సిల్లెకెజ్ ఇజి మాటు ఒడొబిజి నాటో వన్యాజ్ మరి నండొ గవరం మని లెకెండ తయారై కిజినాట్. సుడొదెజ్ సోకు తోరిక బాగమ్కాజ్ ఒద్దె అందం వాని లెకెండ కిజినాట్. 24 ఒడొల్దు మని అందం మని బాగమ్కాజ్ మరి నెగెండ సుడొదెజ్ అక్కర్ సిల్లెద్. గాని దేవుణు విజు బాగమ్కాజ్ కుడుప్పి ఒడొల్దు ఇట్టివలె, మర్యాద తకు మని వనకాజ్ లావ్ మర్యాద సితాన్. 25 అందెజె ఒడొల్దు గొడొబెజ్ మన్విండ విజు బాగమ్కు ఉండ్రై మరి ఉండ్రై బాగం వందిజ్ నెగెండ సుడొజు మంజినె. 26 ఉండ్రై బాగమ్దు కస్టం వాతిజు, బాగమ్కు విజు కూడొజు దని వెట కస్టమ్దు మంజినె. ఉండ్రై బాగమ్దిజ్ గవరం దొహ్కొప్పి వలె, బాగమ్కు విజు దనివెట కూడొజు సర్ద ఆనె.

27 ఏలు, మీరు క్రీస్తు ఒడొల్దు ఆతి మనిదెర్. ఒరెన్ ఒరెన్ ఉండ్రై బాగం ఆత మనాద్. 28 మరి దేవుణు సజమ్దు ముజాల సెగెండారిజ్ అప్పొస్తురు ఇజి, వెనుక మరి సెగెండారిజ్ దేవుణు ప్రవక్తరు ఇజి, దని వెనుక సెగెండారిజ్ దేవుణు మాటెజ్ నెస్సిసినికార్ ఇజి, దని వెనుక సెగెండారిజ్ బమ్మాతి పణిజ్ కినికార్ ఇజి, దని వెనుక మనికార్ ఇజి, సెగెండారిజ్ మహి వరిజ్ సాయం కినికార్ ఇజి, మరి సెగెండారిజ్ నడిపిస్సికార్ ఇజి, మరి సెగెండారిజ్ ఆఇ ఆఇ బాసెజ్ వర్గినికార్ ఇజి ఏర్పాటు కిత మనాన్. 29 విజెరె అప్పొస్తురునా? విజెరె దేవుణు ప్రవక్తరునా? విజెరె దేవుణు మాటెజ్ నెస్సిసినికార్నా? విజెరె బమ్మాతి పణిజ్ కినికారా? 30 విజెరె జుబుజాణి వరిజ్ నెగెండొ కిదెజ్ వరం మనికారా? విజెరె ఆఇ బాసెజాణిజ్ వర్గిజినారా? విజెరె అయ బాసెజు అర్దం కిజి వెహ్తైనారా? 31 గాని వరమ్క లొక గొప్ప పెరి వన్యా వందిజ్ ఆస ఆజి మండ్రు. ఏలు నాను మిజి గొప్ప నెగి సరి తోరిసినాలె.

13

విజు దనిజ్ పెరిక ప్రేమ

1 నాను లోకుర్ వర్గిజిని విజు బాసెజాణిజ్ వర్గితిజ్బా, దేవుణు దూతారై వర్గిని బాసెజాణిజ్ వర్గితిజ్బా, నాను ప్రేమ సిల్లికాన్ ఇహిజు పణిదిజ్ రెక కంసు, సిల్లిజు టిజ్టిజ్ పలక్కి తాలిబిలెజ్ లెకెండెనె. 2 నాను దేవుణు ప్రవక్త లెకెండ వరం మనికాన్ ఆతిజ్బా, డాజితి మని విజు సజతిజ్ నెస్టెజ్ అట్టికాన్ ఆతిజ్బా, విజు గెణం మనికాన్ ఆతిజ్బా, గొరొకాజ్ బస్సిసిని నమకం మనికాన్ ఆతిజ్బా ప్రేమ సిలికాన్ ఇహిజు నాను పణిదిజ్ రెకక. 3 నజి కల్లితి మనికెజ్ విజు బీద వరిజ్ సిత్తిజ్బా, సినుదు సుర్దెజ్ నా ఒడొల్దు ఒపజెత్తిజ్బా, ప్రేమ సిల్లికాన్ ఇహిజు నాను కినిక పణిదిజ్ రెకక.

4 ప్రేమ మనికాన్ నండొ ఓరిసినాన్. వాండ్రు మహి వరి ముస్కు దయ మనికాన్ ఆనాన్. వాండ్రు గోస ఆవెన్. వాండ్రు పొజిజినికాన్ ఆవెన్. వాండ్రు గర్ద ఆవెన్. 5 ప్రేమ మనికాన్ మర్యాద సిల్లెండ మనికాన్ ఆవెన్. వాండ్రు నజి నానె నెగెండొ మండ్రెజ్ ఇజి ఒడొబినికాన్ ఆవెన్. వాండ్రు బేగి కోపం ఆవెన్. వాండ్రు వన్ని వెట కిత్తిమని సెక వన్యా వందిజ్ మన్నుదు ఇడొజు మన్విన్. 6 ప్రేమ మనికాన్ సెక వన్యా వందిజ్ సర్ద అవిండ, నిజమాతి వన్యా వందిజ్ సర్ద అజినాన్. 7 ప్రేమ మనికాన్ ఎస్తివలెబా నణిజిఎండ విజు సెమిస్సాన్. వాండ్రు ఎస్తివలెబా మహివరి వందిజ్ నెగికెజ్ నమ్మిజు మంజినాన్. వాండ్రు ఎస్తివలెబా ఆసదాన్ ఎర్దు సుడొజు మంజినాన్. వాండ్రు ఎస్తివలెబా డిన్విండ ఓరిసి మంజినాన్.

8 ప్రేమ ఎలాకాలం మంజినాద్. దేవుణు ప్రవక్త లెకెండ వెహ్తైజ్ మని వరం ఎలాకాలం మన్విద్. ఆఇ ఆఇ బాసెజ్బా వర్గినికబా ఎలాకాలం మన్ఉలి. గెణమ్బా సిల్లెండ ఆనాద్. 9 ఎండనిజ్ ఇహిజు

ఏలు మాటు సెగమనె నెన్న మనాట. సెగమనె దేవుణు ప్రవక్త లెకెండ వెప్పొనాట. 10 గాని పూర్తి ఆతిక వానివలె పూర్తి ఆకక నిల్లెండ ఆనాడ. 11 నాను ఇజరికాన్ మహివలె ఇజరి వన్ని లెకెండ వర్గిత. ఇజరి వన్ని లెకెండ ఒడఃబిత. ఇజరి వన్ని లెకెండ ఆలొసనం కిత. పెరికాన్ ఆతివలె ఇజరికాన్ మహివలె మని పణిజ్ డిఃస్త సిత్త. 12 ఏలు అద్దమదు సుడిఃతి లెకెండ ఉండ్ర బొమ్మన సుడఃజినాట. నస్తవలె మొకొం నిండ్రు సూణాట. ఏలు సెగమనె నెన్నాట, నస్తవలె దేవుణు నజీ ఏలు నెస్తిమని లెకెండ పూర్తి నెన్నాటలె.

13 అహిజ దేవుణు మున్ను మని నమకం, ఆసదాన్ ఎద్దు సుడఃజి మంజినిక, ప్రేమ యా మూండ్రీబా నిల్పి మంజినె. గాని వినుక లొణ గొప్పు నెగ్గక ప్రేమనె.

14

దేవుణు ఆత్మ సీని వరమ్మకు.

1 మీ బత్తుదు ప్రేమనె ముజాల మనిద్. దేవుణు ఆత్మ సీజిని వరమ్కాజ్ వందిజ్ ఆస ఆజి మండ్రు. దేవుణు ప్రవక్తరు ఆదెజ్ ఆస ఆదు. 2 ఎండనిజ్ ఇహిజ, ఆక బాసెజ వర్గినికాన్ లోకుర్ వెట ఆవిండ దేవుణు వెటనె వర్గిజనాన్. నిజమె లోకు ఎయెన్బా వాండ్రు వర్గినికెజ్ అర్దం కిడెజ్ అట్వెన్. గాని వాండ్రు వన్ని ఆత్మదాన్ దేవుణుదిజ్ సెందితి డాజితి మని సజతిజ్ వర్గిజనాన్. 3 గాని, దేవుణు ప్రవక్తరు లెకెండ వర్గినికాన్ లోకుర్ వెటనె వర్గిజనాన్. లోకుర్ మన్నుదు సత్తు మనికార్ ఆదెజ్, వరిజ్ దయరం వెహైజ్, మరి ఒదరిస్తెజ్ ఇజ. 4 ఆక బాసెజ్ వర్గిజనికాన్ వన్నిజ్ వాండ్రె దయరం కిబె ఆజినాన్. గాని దేవుణు ప్రవక్తారు లెకెండ వర్గినికాన్ సజమ్దు మని వరిజ్ ఉసార్ కిజినాన్. 5 మీరు విజెదెరె ఆక బాసెజాణిజ్ వర్గినికెదెరె ఆదెజ్ ఇజ నాను కోరిజన. గాని దేవుణు ప్రవక్తరు లెకెండ ఆదెజ్ ఇజ లావ్ ఆస ఆజన. ఆక బాసెజాణిజ్ వర్గినికాన్, సజమ్దిజ్ దయరం వెహైజ్ ఇజ ఆక బాసెజాణిజ్ వర్గిని మాటెజ అర్దం కిజి వెహెవిండ మహిజ, దేవుణు ప్రవక్తనె వన్నిజ్ ఇక పెరికాన్ ఆజినాన్.

6 తంబెరిజాండె, నాను మీ డగ్రు వాజి, దేవుణుది డాజితి మని సజతిజ్ దేవుణు తోరిస్తికెజ్నొ, గెణం మాటెజ్నొ, దేవుణు ప్రవక్త లెకెండ దేవుణు సిత్రీ మాటెజ్నొ మీ వెట వర్గిఎండ, ఆక బాసెజాణిజ్ వర్గిజి మహిజ నా వెట మిజి ఇని లాబం వానాద్? 7 అయా లెకెండెనె, పలక్కివలె సెవుడః వాజిని పాణం సిల్లి వస్తుజ్ ఆతి, టొయల గాని పిరుడిః గాని పలక్కివలె ఇని తేడ సిల్లెండ ఉండ్రె లెకెండ పలక్కి మహిజ, ఉక్కి మనిక ఇనిక, పలక్కి మనిక ఇనిక ఇజ ఎలాగ నెస్తెజ్ ఆనాద్? 8 విదెమ్దిజ్ సొండ్రెజ్ ఇజి సయనమ్ది వరిజ్ కూక్తెజ్ జోడు బాంగ పలక్కివలె వరిజ్ అర్దమానిలెకెండ నెగెండ జాటు సెవిండ మహిజ, విదెమ్దిజ్ సొండ్రెజ్ సయనమ్దికార్ తయార్ ఆనారా? 9 అయాలెకెండెనె మీరుబా వెయుదాన్ నెగెండ వర్గిఎండ మహిజ, మీరు ఇనిక వర్గిజనిదెరె ఇజి వినికార్ ఎలాగ అర్దం కిడెజ్ అట్వార్? మీరు గాలి వెటనె వర్గినికెదెరె ఆజనిదెరె. 10 యా లోకమ్దు నండొ బాసెజ్ మన్నె ఇని దనిజ్ ఇని అనుమానం సిల్లెద్. గాని వన్నా లొణ ఉండ్రీబా అర్దం సిల్లిక ఆవిద్. 11 ఒరెన్ వర్గిని మాటెజ నాను అర్దం కిడెజ్ అట్వెండ మహిజ, నాను వర్గిని వన్నిజ్ ఆక దేనెమ్ది వన్ని లెకెండ ఆనాలె. వర్గినికాన్ నజీబా ఆక దేనెమ్ది వన్ని లెకెండ మంజినాన్. 12 మిజిబా అయాలెకెండెనె మంజినాద్. మీరు దేవుణు ఆత్మ సీజిని వరమ్కాజ్ వందిజ్ నండొ ఆస ఆజి మంజినికెదెరె. అందెజె సజమ్దిజ్ పిరిప్పి వందిజ్ అయా వరమ్కాజ్ నండొ పణి కిదు.

13 అందెజె దిన్ని వందిజ్, ఆక బాసెదాన్ వర్గినికాన్, బాసెజ అర్దం కిజి వెహైజ్ అట్టి లెకెండ పార్దనం కిడెజ్ వలె. 14 అహిజ, నాను ఆక బాసెదాన్ పార్దనం కిజి మహిజ, నా ఆత్మ పార్దనం కిజినాద్. గాని నా గర్బం కాలి మంజినాద్. 15 అందెజె నాను ఇనిక కిడెజ్ వలె? నాను నా ఆత్మదాన్ పార్దనం కిన్. గాని నా మన్నుదాన్బా నాను పార్దనం కినాలె. నాను నా ఆత్మదాన్ పాటెజ్ పార్పు. గాని నా మన్నుదాన్బా పాటెజ్ పార్పాలె. 16 మీరు మీ ఆత్మదాన్ దేవుణుదిజ్ పొగడిఃజి మహిజ, మీరు దేవుణుదిజ్ వందనమ్కు వెప్పొనిదెరె. మీరు వర్గిని మాటెజ అర్దం కిడెజ్ అట్వెకాన్ ఒరెన్, మీరు వెప్పొని వందనమ్దిజ్, ఎలాగ మీ వెట కూడఃజి, “ఆమెన్” వెహైజ్ అట్వెన్. 17 మీరు ఇహిజ ఒద్దె నెగెండ దేవుణుదిజ్ వందనమ్కు వెప్పొనిదెరె. గాని ఇకాన్ దయరం కిబె ఆదెజ్ అట్వెన్.

18 నాను మిజీ విజెరిజ్ ఇంక నెగెండ ఆఇ బాసెజాణిజ్ వర్గిజిని వందిజ్ దేవుణుదిజ్ వందనమ్కు వెప్పిన. 19 గాని సజమ్దు ఆఇ బాసెజాణిజ్ పది వెయుజ్ మాటెజ్ వర్గిని దనిజ్ ఇంక మహివరిజ్ నెస్సిన్సి లెకెండ బుద్దిదాన్ కూడితి అయిదు మాటెజ్నె నాను వెహ్న.

20 తంబెరిజాండె, మీరు ఇజిరి కొడోఱ్ ఒడోబిని లెకెండ ఒడోబిజి మంజినిక డిసి సీదు. సెఇ వన్కా వందిజ్ లేత కొడోఱ్ లెకెండ మండ్రు. గాని ఒడోబినిబాన్ పెరికిదెర్ ఆదు. 21 “ఆఇ బాసెజ్ వర్గిజిని ఆఇ దేసెమ్ది లోకుర్ నా వందిజ్ విరి వెట వర్గితిజ్బా వారు గిబిజ్ ఒడోబి నా మటెజ్ వినవర్”, ఇజి ప్రబు వెప్పినాన్ ఇజి దేవుణు మాటదు రస్త మనాద్.

22 అందెజె ఆఇ బాసెజ్ వర్గినిక, నమ్మిఇ వరిజ్ దేవుణు సత్తుదిజ్ ఉండ్రె గుర్తు లెకెండెనె మనాద్ ఇజి మాటు దేవుణు మాటదాన్ నెస్సాట్. నమ్మిత్తి వరిజ్ ఆవద్. గాని దేవుణు ప్రవక్తరు వెప్పిని మాటెజ్, నమ్మిత్తి వరి వందిజ్ రుజుమ్ ఆజిని గాని నమ్మిఇ వరివందిజ్ ఆవద్. 23 అందెజె సజమ్దు మనికార్ విజెరె కూడోబి వానివలె విజెరె ఆఇ బాసెజాణిజ్ వర్గిజి మహిజ, యాక అర్థం కిదెజ్ అట్ఇకానో, నమ్మిఇకానో లోఇ వాతిజ, మీరు బుద్ది నెగెండ సిల్లెండ ఆజి వర్గిజినిదెర్ ఇజి వారు వెహ్విరా? 24 గాని ఒరెన్ నమ్మిఇకాన్ గాని దిన్ని వందిజ్ నెన్ఇకాన్ గాని లోఇ వాతిజ, విజెదెర్ దేవుణు ప్రవక్తరు లెకెండ వెప్పి మహిజ, వెని మాటెజాణిజ్ వాండ్రు కిత్తి మని తప్పజు వందిజ్ ఎత్తు కిజి వన్ని మన్నుదు ఒడోబిజి ఒప్పుకొణాన్. మీరు వెప్పిని మాటెజాణిజ్ వన్నిజ్ వాండ్రె తీర్పు కిబె ఆనాన్లె. 25 మరి వన్ని మన్నుదు డాజితి మనికెజ్ విజు వెల్లి తోర్పె. అయావలె, “నిజుమె దేవుణు మీ వెట మనాన్”, ఇజి బమ్మ ఆజి వాండ్రు ముణుకుజ్ ఊరిజి దేవుణుదిజ్ పొగ్డిజిజి మాడిఃస్సాన్లె.

దేవుణుదిజ్ పొగ్డిజిజి మాడిఃస్సిక ఎలాగ మండ్రెజ్.

26 అహిజ తంబెరిజాండె, మాటు ఇనిక వెహ్జెజ్? మీరు కూడోబి వానివలె, ఒరెన్, ఉండ్రె పాటెజ్ పార్లెజ్ వలె ఇజినాన్. మరి ఒరెన్ బుద్ది మాటెజ్ నెస్సిన్సిజ్ వలె ఇజినాన్. మరి ఒరెన్ డాజితి మనిక దేవుణు తోరిస్సికెజ్ వెహ్జెజ్ వలె ఇజినాన్, మరి ఒరెన్ ఆఇ బాసెజాణిజ్ వర్గిదెజ్ వలె ఇజినాన్, మరి ఒరెన్ బాసెదిజ్ అర్థం వెహ్జెజ్ వలె ఇజినాన్, యాకెజ్ విజు సజమ్దు మని వరిజ్ దయరం వాని వందిజ్ కిదెజ్వలె.

27 ఆఇ బాసెజి వర్గినికార్ ఒరెనో రిఎరెనో వర్గిదెజ్ వలె. రిఎరిజ్ మిస్తిజి ముఎర్ వర్గిదెజ్ వలె. గాని విజెరె ఒర్పె వర్గిఎండ, ఒరెన్ ఒరెన్ వర్గిదెజ్ వలె. ఎయెర్బా దనిజ్ అర్థం వెహ్జెజ్ వలె. 28 ఆఇ బాసెజి వర్గిని దనిజ్ అర్థం కిజి వెప్పికాన్ సిల్లెండ మహిజ, ఆఇ బాసెజాణిజ్ వర్గినికాన్ సజమ్దు వల్లక మండ్రెజ్. వాండ్రు వన్ని మన్నుదు వర్గిజి దేవుణు వెట వర్గిదెజ్ వలె.

29 దేవుణు ప్రవక్తరు లెకెండ వర్గినికార్బా రిఎరెనో, ముఎరెనో వర్గిదెజ్ ఆనాద్. మహికార్ వెప్పి దనిజ్ నెగెండ వెంజి, ఇనిక వెప్పినార్ ఇజి జాగర్తు సుడోదెజ్వలె. 30 డగ్గు బస్తిమని మరి ఒరెన్ దేవుణు ప్రవక్తెజ్ ఇనికాబా దేవుణు బాణిజ్ తోరె ఆతిజ, ముజాల వర్గిజి మంజినికాన్ పలక మండ్రెజ్ వలె. 31 విజెరిజ్ నెస్సినిని వందిజ్, విజెరిజ్ దయరం వెప్పి వందిజ్, మీరు విజెదెర్ ఒరెన్ వన్ని వెనుక మరి ఒరెన్ దేవుణు బాణిజ్ వాజిని మాటెజ్ దేవుణు ఆత్మ నడిఃపిస్సి లెకెండ వర్గిదెజ్ ఆనాద్. 32 ప్రవక్తరు లోఇ మని వరి ఆత్మ ప్రవక్తరిజ్ లోజిజి మంజినాద్. 33 ఎందనిజ్ ఇహిజ దేవుణు సమాదానమ్దిజ్ దేవుణునె గాని గగోలిదిజ్ దేవుణు ఆవన్.

34 విజు దేవుణు సజమ్కాజ్ మని లెకెండ, సజమ్దు పొగ్డిజిజి మాడిఃస్సివలె, బోదెక్ గగోల్ ఆజి వర్గిజి మండ్రెజ్ ఆవద్, పలక మండ్రెజ్ వలె. సజమ్దు అవిక వర్గిదెజ్ ఆవద్. గాని మోసె రాస్సి రూలుదు వెహ్జె మని లెకెండ అవిక అణిజిజి మండ్రెజ్. 35 వరిజ్ ఇనికబా నెస్తిజ్ ఇహిజ, ఇండ్రో వన్కా వన్కా మాసిరిజ్ వెన్బాదెజ్ వలె. సజమ్దు బోదెలి వర్గిజి మంజినిక దనిజ్ సిగు.

36 మీరు ఇనిక ఒడోబిజినిదెర్? దేవుణు మాటెజ్ మీరె రాస్సి తయార్ కిత్తిదెరా? అక్క మిజి నె అక్క దోహ్క మనాదా? 37 ఎయెర్బా వాండ్రు దేవుణు ప్రవక్త ఇజి ఒడోబిజినాన్ ఇహిజ, దేవుణు ఆత్మ సిత్తి వరమ్కు మనికాన్ ఇజి ఒడోబిజి మహిజబా, వాండ్రు నాను మిజి రాస్సి మనికెజ్ ప్రబుబాణిజ్ వాతి ఆడ్రెజ్ ఇజి తపెండ ఒప్పుకొండెజ్ వలె. 38 ఎయెర్బా యాక నెక్కి పొక్తిజ, వన్నిజ్ వాండ్రె నెక్కి పొకె ఆనాన్లె.

39 అందెజె నా తంబెరిజాండె, దేవుణు ప్రవక్తరు ఆదెజ్ ఆన ఆజి మండ్రు. గాని ఆజ బాసిజాణిజ్ వర్గిని వరిజ్ అడ్డు కిమాట్. 40 గాని విజుబా నెగండ మర్యాదదాన్ తగ్గి లెకెండ కిడెజ్ వలె.

15

క్రీస్తు సాతి వరిబాణిజ్ మర్రి నిజితి వందిజ్.

1 తంబెరిజాండె, నాను మీ నడిమి సాటిన్సి సువార్త వందిజ్ మరి మిజి ఎత్తు కిబిస్తెజ్ ఇజి నాను కోరిజన. మీరు డగ్గు కిజి నమ్మిత్తి అయ సువార్త, దన్నిజ్ తగితి లెకెండ మండ్రెజ్ ఇజి నిరణెం కిత్తిదెర. 2 నాను మిజి వెస్తా మని అయా సువార్తదానె దేవుణు మిజి రక్సిస్త మనాన్. అందెజె నాను వెస్తా మని మాటెజ్, మీరు నెగండ అసి అయాలెకెండెనె మండ్రెజ్. సిల్లెండ మహిజ మీరు దేవుణు ముస్సు ఇట్టి నమకం నిజం ఆవిండ మంజినాద్. 3 దేవణు బాణిజ్ నజి దొహ్కీ మన్నిక, నాను మిజి ఒప్పజెప్పి మని వన్నా లొఇ గొప్ప ముకెలమతిక ఇనిక ఇహిజ, ముజాల దేవుణు మాటుదు రాస్తి మహిక పూర్తి కిత్తి లెకెండ, క్రీస్తు మా పాపమక వందిజ్ సాతాన్. 4 ముజాల దేవుణు మాటుదు రాస్తి మహిక పూర్తి కిత్తి లెకెండెనె మూసె ఆతండ్రె మూండ్రె రోస్కాణిజ్ మర్రి నీకె ఆతాన్. 5 ముజాల పేత్తుజ్ని* వెనుక వన్ని సిసర ఆతి పనెండు మన్సిరిజ్ తోరె ఆతాన్. 6 దన్ని వెనుక అయ్దు వందెజి మిస్తి నమ్మిత్తి తంబెరిజి ఒర్ని తోరె ఆతాన్. 7 వరి లొఇ నెగండార సాత సాహర్ ఇహిజ్బా నండొండార ఎలుబా బత్తిజినార్. 8 వెనుక వాండ్రు యాకోబుజ్ని అపొస్తురుజ్ విజెరిజ్ తోరె ఆతాన్. 9 విజెరిజ్ తోరె ఆతి వెనుక, కడెవేరిదు, నెగండ పుట్టకానాతి నజిబా తోరె ఆతాన్.

9 అపొస్తురు లొఇ విజెరిజ్ ఇంక పీన్కొడె: నానె. అపొస్తుడు ఇజి కూకె ఆదెజ్బా నాను తగితిక అవి. ఎందనిజ్ ఇహిజ నాను దేవుణు నజమిది వరిజ్ హిమ్సిజ్ కిత మన్ను. 10 ఎలు నాను ఇనిక ఆత మనానో, అక్క దేవుణు నజి తోరిస్తి దయాదర్మమదానె ఆత మన్ను. అహిజ వాండ్రు నా ముస్సు దయా దర్మం తోరిస్తిక దర్మమిదిజ్ సిత్తి లెకెండ అవతాద్. విజెరిజ్ ఇంక నండొ కన్సబాడెజి నాను పణి కిత మన. గాని కన్సబాడెతిక నాను అవి, నజి తోడు: మహి దేవుణు దయాదర్మమనె. 11 అందెజె నాను ఆతిజ్బా, వారు ఆతిజ్బా ఇక్కాదె మాపు సాటిస్త మనావ్.

సాతికార్ మరజి నీజ్ని వందిజ్.

12 గాని, క్రీస్తు సాతి వరి బాణిజ్ నీకె ఆత మనాన్ ఇజి సాటి ఆతి మహిజ్, సాతి వరి బాణిజ్ మరజి నీజ్నిక సిల్లెద్ ఇజి మీ లొఇ నెగండార ఎలాగ వెప్పినార్? 13 సాతి వరిబాణిజ్ మరజి నీజ్నిక సిల్లెద్ ఇహిజ క్రీస్తుబా మరజి నీజ్ఎతాన్. 14 క్రీస్తు సాతి వరిబాణిజ్ మరజి నీజ్ఎతాన్ ఇహిజ మాపు సాటిసిని సువార్త పణిదిజ్ రెఇక. మీరు దేవుణుదిజ్ నమ్మిత్తికబా పణిదిజ్ రెఇక. 15 అక్కాదె ఆవిండ, మాపు దేవుణు వందిజ్ అబద్దం వెప్పి సాసిర ఇజి తోరె ఆజినాద్. ఎందనిజ్ ఇహిజ దేవుణు సాతి వరిబాణిజ్ క్రీస్తుజ్ నిక్త మనాన్ ఇజి మాపు దేవుణు వందిజ్ సాసి వెప్తా మనావ్. సాతికార్ మర్రి నిజె ఆవెర ఇహిజ, దేవుణు క్రీస్తుజ్బా నిక్ఎతాన్. 16 దేవుణు సాతి వరిజ్ మర్రి బత్కిన్ఎన్ ఇహిజ అయాలెకెండెనె దేవుణు క్రీస్తుజ్బా మరజి బత్కిన్ఎతాన్. 17 క్రీస్తు మర్రి నిజె అవతాన్ ఇహిజ మీరు నమకం ఇడెతిక పణిదిజ్ రెఇక. మీరు ఎలుబా మీ పాపమక వందిజ్ దేవుణు సీని సిక్కిదిజ్ తగ్గిదిరె. 18 అక్కాదె ఆవిండ క్రీస్తుజ్ నమ్మిజి సాతికార్బా నాసనం ఆత సాహర్. 19 యా బత్తుదునె వాండ్రు మజి సాయం కినాన్, సాతిసాహి వెనుక సిల్లెద్ ఇజినె మాటు క్రీస్తు ముస్సు ఆసదాన్ ఎద్దు సుడెజి మంజినికాట్ ఇహిజ, మా బత్తు విజెరిజ్ ఇంక హినమాతి బత్తు బత్తిజినార్.

20 గాని, సాతి వరిబాణిజ్ తొలిత పండితి పంట లెకెండ, క్రీస్తు నిజమె సాతి వరిబాణిజ్ మర్రి నిజిత మనాన్. 21 ఇనిక ఇహిజ ఒరెన్ లోకు వెటనె సాపు వాతాద్. అయాలెకెండెనె సాతి వరిబాణిజ్ మర్రి నిజె ఆనికబా ఒరెన్ వన్ని వెటనె వాతాద్. 22 ఆదము వెట విజెరె ఎలాగ సాజినారో, అయాలెకెండెనె క్రీస్తు వెట విజెరె పాణం మనికార్ ఆనారలె. 23 గాని ఒరెన్ ఒరెన్ వన్ని వర్నాదునె పాణం మనికాన్ ఆనాన్. తొలిత పండితి పంట క్రీస్తు. వెనుక క్రీస్తు వానివలె వన్నిజ్ నెందితికార్ పాణం మనికార్ ఆనార్. 24 దని వెనుక వాండ్రు యా లోకమదు మని విజు సెఇ సత్తుజ్ని, విజు అతికారమ్కాజ్, విజు సత్తుజ

* 15:5 15:5 పేతురుజ్ కేప ఇజబా పేరు మనాద్.

మాయిప్పి పోక్కి, వన్ని బుబ్బాతి దేవుణు ఎలుబడిఁ కిని వందిజ్ విజు ఒపజెప్పాన్లె. నస్తవలె విజు దన్నిజ్ అక్కర్ ఆనాద్లె.

25 ఎందనిజ్ ఇహిజ వన్నిజ్ పగాతి విజెరిజ్, వన్ని పాదమ్కు అడిఁగి దేవుణు ఇఁడినిదాక క్రీస్తు ఎలుబడిఁ కిజ మండ్రెజ్ వలె. 26 లోకురిజ్ విజెరిజ్ పగాతి సావుదిజ్, కఁడేవేరిదు వాండ్రు నాసనం కిసాన్లె.

27 దేవుణు, “విజు వనకాజ్ వన్ని పాదమ్కు అడ్డి ఇట్టాన్”, ఇజి దేవుణు మాటదు రాస్త మనాద్. “విజు వన్కాజ్”, క్రీస్తు పాదమ్కు అడిఁగి ఇట్టా మనాన్ ఇజి వెప్పా వలె, విజు వనకాజ్ విని పాదమ్కు అడిఁగి ఇడ్డి మనికాన్ ఆతి దేవుణు అయ విజు వనకాజ్ వెట వన్నిజ్ వాండ్రె క్రీస్తు పాదమ్కు అడిఁగి ఇఁడెఁ ఆవెన్ ఇజి టేట తోర్జినాద్. 28 వాండ్రు యా లెకెండ కిత్తి వెనుక, మరిన్ విజు వనకాజ్ వన్ని పాదమ్కు అడిఁగి ఇట్టి మనికాన్ ఆతి దేవుణుదిజ్, వన్నిజ్ వాండ్రె అణజిజి మంజినాన్లె. ఎందనిజ్ ఇహిజ దేవుణు ఒరెండ్రె అయ విజు వన్కాజ్ ముస్కు అతికారం మనికాన్ ఆదెజ్వలె.

29 సాతికార్ మర్రి నిజ్నిక సిల్లెద్ ఇహిజ, సెగెండార్ కిని లెకెండ సాతి వరి వందిజ్ బాప్తినం లాగె ఆని దనిజ్ ఇని అర్లం మనాద్? సాతికార్ నిజె ఆవెర్ ఇహిజ ఎందనిజ్ లోకుర్ వరి వందిజ్ బాప్తినం లాగె ఆదెజ్? 30 మరి సాతికార్ మర్రి నీజ్నార్ ఇజి మాపు నమ్మివ్ ఇహిజ ఎందనిజ్ సావు తప్పిన్ని ప్రమాదమ్కాజ్ మాపు గురి ఆదెజ్. 31 తంబెరిజాండె, ప్రబు ఆతి క్రీస్తు యేసుక్రీస్తు వెట మీరు కూడిఁతి వందిజ్ నాను నిజం ఎసా సర్ల ఆజినాన్ అయాలెకెండెన్ ఎప్పివలెబా నాను సపె ఆదెజ్బా అక్కు మనద్ ఇజి నాను మిజి నిజం వెప్పిన్. 32 యా లోకమ్దిజ్ నెందితి సజతిజ్ వందిజ్నె నాను ఎపెసి పట్టుమ్దు అడిఁవి జంతుజ వెట విద్దె కితానా? సాతికార్ మర్రి నిజె ఆవెర్ ఇహిజ నజి ఇని లాబం మనాద్? సాతికార్ మర్రి నీజ్వెర్ ఇహిజ, “విగెహిజ్ సానాట్, అందెజె ఉణాట్ తినాట్”, ఇజి ఇకకార్ వెప్పాలెకెండెన్ మాటుబా కిదెజ్ వలె.

33 మీరు మొసెం కిబె ఆజి తవు సరిదు సాన్మాట్. “సెజ వరివెట కూడఁజి మనిజ్, నెగ్గి అలవాటుజ్ మనికార్బా పాడఁ ఆజినార్”. 34 నెగ్గి బుద్ది మనికిదెర్ లెకెండ మీరు మప్పి సాన్ని పాపం కివిండ నితినిజాయిద్నాన్ మండ్రు. ఎందనిజ్ ఇహిజ మీ లోఇ సెగెండార్ దేవుణు వందిజ్ నెన్వెర్. మిజి సిగు కిదెజ్ ఇజెనె ఇక్కు నాను వెప్పిన్.

సాతికార్ మర్రి నీజ్నివలె మంజిని ఒడోల్

35 సెగెండార్ యా లెకెండ వెన్బానార్లెను, “సాతికార్ ఎలాగ మర్రి నికె ఆనార్? ఎలాగ మర్రి ఒడోల్దాన్ వారు వానార్?”. 36 బుద్ది సిలికిదెరా మీరు విత్తు విత్తువలె, అయ విత్తి విత్తు సబితిజానె దని బాణిజ్ మొక నేర్లినాద్. 37 నీను వితిక కూలిజ్గాని, మరి ఎమేణి విత్తుబగాని వహి విత్తునె విత్తిని. విత్తిక విత్తునె గాని నేర్లిని మొక్క ఒడోల్ ఆవద్గద. 38 గాని దేవుణు వాండ్రు నిర్ణెం కిత్తి లెకెండ దనిజ్ ఉండ్రె ఒడోల్సిజినాన్. విత్తిమన్ని విజు రకమ్ది విత్తుజ వనక వనక ఒడోల్ సీజినాన్. 39 కంట విజు ఉండ్రె ననిక ఆవద్. లోకు కంట ఉండ్రె రకం మనాద్. జంతు కంట మరి ఉండ్రె రకం, పొటి కంట మరి ఉండ్రె రకం, మొయ కంట ఉండ్రె రకం. 40 అయాలెకెండెన్ ఆగాసమ్ది వనకాజ్ని, బూమిదు మని వన్కాజ్ తేడ మంజినాద్, ఉండ్రె ననికెజ్ ఆఉ. విజు అంతం మనికెజ్ గాని వనక అంతం ఉండ్రె లెకెండ మన్వద్. 41 ఎలాగ ఇహిజ, పొద్దుది అందం ఉండ్రె రకం, నెలాది అందం మరి ఉండ్రె రకం, సుక్కెజ అందం మరి ఉండ్రె రకం. ఉండ్రె సుక్కాది అందం మరి ఉండ్రె సుక్కాది అందమ్దిజ్ తేడ మనాద్.

42 అందెజె సాతికార్ మర్రి నిజె ఆనివలె అయాలెకెండెన్ మంజినాద్. బూమిదు మూసె ఆతి మని పీనుగు సబ్జె సానిక. గాని సబ్జె సాన్జ ఉండ్రె ఒడోల్దాన్ వారు నికె ఆనార్లె. 43 మూసె ఆతి పీనుగు సుడెదెజ్ బాగ సిల్లిక. సత్తు సిల్లిక. గాని నికె ఆజిని ఒడోల్ అంతమ్ని సత్తు మంజినిక ఆనాద్. 44 మూసె ఆజిని పీనుగు యా లోకమ్దు బత్తిదెజ్నె తగ్గాద్. గాని నికె ఆజిని ఒడోల్ దేవుణు మంజిని బాడింబ బత్తిదెజ్ తగ్గి. యా లోకమ్దు బత్తిదెజ్ తగ్గి ఉండ్రె ఒడోల్ మనాద్ ఇహిజ దేవుణు మంజిని బాడింబ బత్తిదెజ్ తగ్గి ఉండ్రె ఒడోల్బా మంజినాద్. 45 అందెజె, “తొలిత లోకు ఆతి ఆదము బత్తిజిని జీవు ఆతాద్”, ఇజి దేవుణు మాటదు రాస్త మనాద్. కఁడేవేరి ఆదము ఆతి క్రీస్తు పాణం సీజిని ఆత్తు ఆతాన్. 46 పరలోకమ్దు బత్తిదెజ్ తగితి ఒడోల్ ముజాల రెవతాద్.

యా లోకమదు బట్టిదెజ్ తగితి ఒడోల్తనె ముజాల వాతాద్. వెనుక పరలోకమదు బట్టిదెజ్ తగితి ఒడోల్త వానాద్. ⁴⁷ తొలిత ఆదాము యా బూమి ధూలిదాన్ తయార్ ఆత మనాన్. వెనుకాపి ఆదాము ఆతి క్రీస్తు దేవుణు మంజిని బాడిదాన్ వాతాన్.

⁴⁸ బూమిది ధూలిదాన్ తయార్ ఆతి వన్ని బాణిజ్ పుట్టి మాటు వన్ని లెకెండెనె మంజినాట్. దేవుణు మంజిని బాడిదాన్ వాతి వన్ని వెట కూడితికార్ దేవుణు మంజిని బాడిదు బట్టిదెజ్ తగ్గికార్ ఆనార్లె. ⁴⁹ ఏలు మాటు ఎలాగ బూమిదాన్ తయార్ ఆతి వన్ని మూర్తి లెకెండె మనాట్, అయా లెకెండెనె దేవుణు మంజిని బాడిదాన్ వాతి వన్ని క్రీస్తు మూర్తి లెకెండె తయార్ ఆనాట్లె.

⁵⁰ తంబెరిజాండె, కండాని నలదాన్ తయార్ ఆతిమని యా ఒడోల్తదాన్ మాటు దేవుణు కిజిని ఏలుబడిదు సాన్ని మండ్రెజ్ అట్వెట్ ఇజి నాను మిజి కనితం వెప్పిన. ఎందనిజ్ ఇహిజ సాపు మని యా ఒడోల్తకు సాపు మనె ఇ బాడిదు మండ్రెజ్ అట్వెద్. అక్కెజ్ కొత్తాకెజ్ కిబె ఆదెజ్ వలె. ⁵¹ గిబ్బిజ్ ఒడోజి విండ్రు, నాను దేవుణుది డాజెతి మని ఉండ్రీ సజతి మిజి తెలియ కిజిన. మాటు విజెటి సావెట్. మాటు విజెటి మూర్తాట్. ⁵² నకెమ్దు, అహిజ ఉండ్రీ కణక రెప డెయేజి పెర్ని ముజాలె, కడెవెరిది పెరి జోడుబంగ పలక్కిజ సరి అక్క జర్గినాద్. జోడు బంగ పలక్కివలె సాతికార్ సాపు మనె ఇ ఒడోల్తదాన్ నికె ఆనార్. ఏలుదాక బట్టిజిని మాపు కొత్తాజ్ కిబె ఆతి ఒడోల్తదాన్ మూర్తాట్లె. ⁵³ సబ్జి సాన్నిని మా యా ఒడోలుజు ఎసెజ్బా సబ్జి సాన్ ఇ ఒడోలుజ్ లెకెండె మూర్తాలె. నిజమె, సాపు వాజిని యా మా ఒడోలుజ్, సాపు సిలి ఒడోలుజ్ లెకెండె కొత్తాజ్ మూర్తాలె.

⁵⁴ సబ్జి సాని మా ఒడోలుజ్, ఎసెజ్బా సబ్జి సాన్ ఇ ఒడోలుజ్ లెకెండె మూర్తెజ్ వలె. సాపు వాజిని మా యా ఒడోలుజ్, సాపు సిల్లి ఒడోల్ లెకెండె మూర్తెజ్వలె. నస్తివలె దేవుణు మాటుదు రాస్తి యా మాటెజ్ నిజం అనాద్, “సాపు మున్ను పూర్తి గెలిస్తి వందిజ్, సాపు మరి మన్వెద్. సాపు డిజె ఆతి లెకెండె వీజెతాద్”. ⁵⁵ “సాపు మా మున్ను మరి గెలిస్తిజ్ అట్టూదా? మజి గుత్తెజ్ ఇజి సాపుదిజ్ మరి సాప్పు మనాదా?”, ఇజి దిన్ని వందిజ్ దేవుణు మాటుదు రాస్తి మనిక, నస్తివలె పూర్తి ఆనాద్. ⁵⁶ సాపు తపిసిని సాంపు పాపం. మాటు దేవుణు రూలుజ లోజెవండె మంజినిక, మజి ఒడిస్టెజ్ పాపమదిజ్ సత్తు ఆజినాద్. ⁵⁷ మా ప్రబువాతి యేసుక్రీస్తుదాన్ మజి పాపమదిజ్ని సాపు మున్ను గెలిస్తి మన్ని దేవుణుదిజ్ వందనమ్కు.

⁵⁸ అందెజె, నాను ప్రేమిసిని తంబెరిజాండె, ఇనికబా మిజి కద్దెన్వండె గటిజ నిల్లి మండ్రు. ఎస్తివలెబా దేవుణు వందిజ్ కష్టబాడిజె పణి కిదు. ఎందనిజ్ ఇహిజ ప్రబు వెట కూడిజి మీరు కష్టబాడిజె కిజిని పణిజ్, ఎసెజ్బా పణిదిజ్ రెవండెజి మనె ఇజి నెసి ఎస్తివలెబా పణి కిజి మండ్రు.

16

నమ్మిత్తి వరి వందిజ్ డబ్బు కుడుప్పిని వందిజ్ వెప్పినిక.

¹ దేవుణుదిజ్ నమ్మిత్తి వరి వందిజ్ డబ్బు కుడుప్పిని వందిజ్ ఇహిజ నాను గలాతియదు మని దేవుణు సజమ్కాజ్ వెప్పి మని లెకెండె మీరుబా కిదు. ² నాను వానివలె, అయావలెనె కుడుప్పెజ్ తొండె, విజు ఆదివారమ్కాజ్ మీ లోక ఒరెన్ ఒరెన్ వన్నిజ్ దోహక్కిని దని బాణిజ్ ఉండ్రీ వంతు కేట ఇడోజి వన్నిబాన్ కుడుప్పి మండ్రెజ్ వలె. ³ అహిజ నాను వానివలె, మీరు తగ్గికార్ ఇజి ఎయెరిజ్ ఎర్లిసినిదెరె, వరిజ్ ఉత్తమకు రాసి సీజి మీరు కుడుప్పిని డబ్బు వరి కిదు యెరూసలెమ్దు పోక్నాట్. ⁴ నానుబా సాహిజ బాగ మంజినాద్ ఇజి తొరె ఆతిజ వారు నా వెట వానార్లె. ⁵ అహిజ ఏలు నాను మాసిదోనియాదు సాన్ని అబ్బె మని దేవుణుదిజ్ నమ్మిత్తి వరిజ్ నెప్పిని మండ్రెజ్ ఇజి ఒడిబిజిన. మాసిదోనియాదు సాహి వెనుక నాను మీ డగ్గు వాన. ⁶ నస్తివలె మీ డగ్గు సెగం రోస్సు మండ్రెజ్ ఆనాద్ ఇజి, సిల్లిజె పణి కాలం విజు మీ బానె గడెప్పా. ఎందనిజ్ ఇహిజ, అయావలె నాను ఎమెణి దరిజ్ సాండ్రెజ్, అయా పయనమ్దు నజి సాయం కిదెజ్ మీరు అట్టిదెరె. ⁷ ఏలు పయనమ్దు మీ డగ్గు వాజి మిజి దసూల్ ఆజి సాండ్రెజ్ నజి ఇస్టం సిల్లెద్. ప్రబుజ్ ఇస్టం ఇహిజ మీ డగ్గు సెగం కాలం మండ్రెజ్

ఇజి ఆస ఆజిన. ⁸ గాని పెంతుకొస్తు* పండొయదాక ఇబ్బె ఎపెసి పట్టుమ్దునె నాను మంజినలె. ⁹ ఎందనిజ్ ఇహిజ, ఇబ్బె నెగెండ సువార్త పణి జర్గిని లెకెండ, తగ్గి నెగ్గి అవ్కాసం నజి దోహ్క మనాద్. నజి ఎద్రిసినికార్బా మనార్.

¹⁰ తిమోతాతి మీ డగ్గు వాతిజ, ఇని దనిజ్బా తియెల్ఆవిండ మీ వెట మంజని లెకెండ వన్నిజ్ సుడేజి మండ్రు. ఎందనిజ్ ఇహిజ, నాను కిజని లెకెండనె వాండ్రుబా ప్రబు పణి కిజనాన్. ¹¹ ఎయెన్బా వన్నిజ్ ఇజిరి కణక సుడేడెజ్ ఆవద్. వాండ్రు మర్రి నా డగ్గు వాదెజ్ వన్ని మన్సుదు సార్లిదాన్ వన్నిజ్ పొక్కు. మహి తంబెరిజ వెట వాండ్రు వానాన్లె ఇజి నాను ఎద్రు సుడేజిన.

¹² ఏలు తంబెరి ఆతి అపొలో వందిజ్ వెహ్నిక ఇమిక ఇహిజ, మహి తంబెరిజ వెట మీ డగ్గు సాండ్రెజ్ ఇజి నాను వన్నిజ్ బతిమాలిత గాని ఏలు వాదెజ్ వన్నిజ్ ఇన్సం సిల్లెతాద్. గాని మరి ఎసెజ్బా వాండ్రు అవ్కాసం దోహ్కవలె మీ డగ్గు వానాన్లె.

¹³ మీరు జాగర్త మండ్రు. దేవుణు మున్సు మని నమకమ్దు గటిజ మండ్రు. దయ్ రమ్దాన్ మండ్రు. సత్తుదాన్ మండ్రు. ¹⁴ మీరు కిజని పణిజ్ విజు ప్రేమదాన్ కిదు. ¹⁵⁻¹⁶ అక్కాయ ప్రాంతమ్దు తొలిత దేవుణుదిజ్ నమ్మిత్తికార్ సైపాను ఇండ్రోణికార్ ఇజి మీరు నెస్సిదెర్గదె? దేవుణుదిజ్ నమ్మిత్తి వరి వందిజ్ పణి సాయం కిదెజ్ వరిజ్ వారె ఒపజెపె అత మనార్ ఇజిబా మీరు నెసినిదెర్. అంద్రెజి తంబెరిజాండ్రె, మీరు నిని వరిజ్ అణిజ్జిజి మండ్రు. అక్కాదె ఆవిండ పణిదిజ్ కూడేజి వాని వరిజ్ని కన్బాడేజి పణి కిజని వరిజ్బా అణిజ్జిజి మండ్రెజ్ ఇజి నాను మిజి బతిమాల్లిన. ¹⁷ మీరు వాదెజ్ అట్ఎండ మహిజ్బా, సైపానుని పొర్మానాతు, అక్కాయికు ఇనికార్ వాతివలె నాను సర్ద ఆత. ఎందనిజ్ ఇహిజ, మీ బాన్ నజి సిదెజ్ సిల్లితికెజ్ వీరు నజి సితార్. ¹⁸ నా మన్సుదిజ్, మీ మన్సుదిజ్ వారు సర్ద కితార్. ననికార్ గవ్ రమ్దిజ్ తగ్గికార్.

¹⁹ ఆసియాదు మన్ని సజమ్కాణికార్ మీరు నెగెండ మనిదెరా ఇజి వెన్బాజినర్. అక్కుల, ప్రిస్కిల ఇనకార్ని వరి ఇండ్రో కూడేజి వాజని నమ్మిత్తి వరి సజమ్బా ప్రబు పేరుదాన్ మీరు నెగెండ మనిదెరా ఇజి వెన్బాజినార్. ²⁰ నమ్మిత్తి తంబెరిజ్ విజెరె మీరు నెగెండ మనిదెరా ఇజినార్. దేవుణు వెట కూడితి మన్ని వరిజ్ మీ ప్రేమ తొరిన్సు. నెగ్గి మన్సుదాన్ ఒరెన్ మరి ఒరెన్ వన్నిజ్ పొంబిజి వందనమ్కు వెహ్కు.

²¹ పవులు ఇని నాను నా కియుదానె యా వందనమ్కు రాసిన.

²² ఎయెన్బా ప్రబుజ్ ప్రేమిన్ఎండ మహిజ సయిప్ వన్ని మున్సు రపిద్. యేసు ప్రబు వాజినాన్. రఠ ప్రబువా. ²³ ప్రబువాతి యేసుక్రీస్తు దయదర్తం మిజి తోడే; ఆజి మనీద్.

²⁴ క్రీస్తుయేసు వెట కూడితి మన్ని మీరు విజదెరె వెట నా ప్రేమ మనీద్. ఆమెన్.

* **16:8** 16:8 పడాాయి ప్రమాణమ్దు ఇక్క వారముక పండొయ, మరి పంట కొయ్యి పండొయ ఇజి వెహ్ ఆజినాద్. (నిర్గమ 34:22, 23:16) వెజెరె వెట కూడేజి యా పండొయ కిదెజ్ ఇజి ఇస్రాయేలు లోకుర్ యెరుసలేమ్దు మంద వాజి మహార్. పెంతికొస్తు ఇహిజ యాబయ ఇజి అర్థం. యాక వస్సు పండొయ ఆతి వెసుక యాబయ రోస్సు ఆనివలె ఆజినాద్.

అపొస్తుడు ఆతి పవులు కొరింతి పట్టుమీదు మని దేవుణు సజమ్ది వరిజ్ రాస్తి రుండి ఉత్తం

నెల్ల కిబిసినిక

ఇక్క అపొస్తుడు ఆతి పవులు కొరింతి సజమ్ది వరిజ్ రాస్తిమన్ని రుండి ఉత్తం. యా ఉత్తమ్దు పవులు వన్ని వందిజ్, మరి వాండ్లు ఎలాగ నువార్త పణి కిత్తాన్, మరి అయావలె వన్నిజ్ ఇని ఇనికెజ్ జర్గితె ఇజి యా ఉత్తమ్దు లావ్ వెప్పినాన్. కొరింతి పట్టుమీదు మన్ని దేవుణు సజమ్దికార్ సెగొండార్, ఆఇవరి బోద వెంజి పవులు అపొస్తుడు ఆవన్ ఇజి వెవ్తార్. దన్ని వందిజ్ జవాబ్ వెప్పాలెకెండ్ యా ఉత్తమ్దు నండో సజతిజ్ రాస్తి మనాద్. దేవుణు ఇస్టమాతి వజ యేసుప్రబునె వన్నిజ్ అపొస్తుడు లెకెండ్ ఇత్తాన్ ఇజి రుజువ్ కిజినాన్. వాండ్లు కిత్తి పణిదునో, వెప్పి మాటదునో, వన్ని బత్తుదునో, ఇనికబా తప్పు మహిజ తోరిస్తు ఇజి వరిజ్ వెన్బాజినాన్. నన్ని వరి వెట మొకొ సుడెజి వర్దిజ్ తయారాజి వాజినాన్ ఇజి వెప్పి ఉత్తం ముగిసినాన్.

యేసుక్రీస్తు సాజి మరజి నిజితి వెనుక యాబ్బుయ్ ఆరునో యాబ్బుయ్ ఏడునో పంటెజ్ వెనుక యా ఉత్తం రాస్తిన్ ఇజి దిన్ని వందిజ్ నెస్తికార్ నమ్మిజినార్. పవులు మాసిదోనియదు మహివలె బాణిజ్ యా ఉత్తం రాస్తి పొక్తాన్ ఇజిబా వారు నమ్మిజినార్.

1 దేవుణు ఇస్టమాతి వజ యేసు క్రీస్తుజ్ అపొస్తుడు ఆతి పవులుని మా తంబెరి ఆతి మోతితి కొరింతి పట్టుమీదు మని దేవుణు సజమ్ది వరిజ్ని అక్కాయ ప్రాంతమ్దు మని దేవుణుదిజ్ నమ్మితి వరిజ్ విజెరిజ్ రాసిని ఉత్తం. ² మా బుబ్బాతి దేవుణు బాణిజ్ని ప్రబువాతి యేసుక్రీస్తు బాణిజ్ దయాదర్శమని సమాదనం మిజి మనిద్.

ఓదరిసిని దేవుణు

³ ఎస్తివలెబా మా ముస్సు కనికారం మనికాన్ ఆతి బుబ్బు, ఎస్తివలెబా మజి ఓదరిసిని దేవుణు ఆతి, మా ప్రబు ఆతి యేసుక్రీస్తుజ్ బుబ్బు ఆతి దేవుణు పొగిడె ఆపిన్. ⁴ ఎందనిజ్ ఇహిజ, విజు కస్టమ్కాజ్ దేవుణు మజి ఓదరిసిని ఓదర్పుదాన్ ఎలాగ మర్తి కస్టమ్దు మని వరిజ్బా ఓదరిస్తెజ్ మాపు సత్తుమనికావ్ ఆదెజ్ ఇజి వాండ్లు మా విజు కస్టమ్కాజ్ మజి ఓదరిసిని. ⁵ క్రీస్తు వెట కస్టమ్కు మా బత్తుదు ఎలాగ లావ్ ఆజినెనో, అయాలెకెండ్నె క్రీస్తు వెట ఓదర్పుబా మా బత్తుదు నిండ్రిజి పొజిజి వాజినాద్. ⁶ మాపు కస్టమ్దు మనావ్ ఇహిజ అక్క మిజి దేవుణు బాణిజ్ ఒదర్పు దొహ్కెజ్ ఇజిని దేవుణు మిజి రక్తిస్తెజ్ ఇజినె మాపు కస్టమ్దు మనావ్. దేవుణు మజి ఓదరిస్తి మనిక మిజి ఓదర్పు దొహ్కెజ్ ఇజినె. ఎందనిజ్ ఇహిజ, మజి వాతిమని లెకెండ్ కస్టమ్కు మిజి వానివలె, అయాలెజ్ మీరు డిఃన్ ఏండ్ ఓరిసినివలె అయ ఓదర్పు ఎలాగ మర్తిక ఇజి మీరు నెసినిదెర్. ⁷ మజి వాతిమని కస్టమ్కాజ్ మీరు ఎలాగ మా వెట కూడెజి మంజినిదెర్, అయాలెకెండ్నె మా వెట ఓదర్పుదుబా కూడెజి మంజినిదెర్ ఇజి మాపు నెసినావ్. అందెజి మీ వందిజ్ మాపు ఆసదాన్ ఎర్దు సూణిక కర్దిఎండ మంజినాద్.

⁸ తంబెరిజాండె, ఆసియ ప్రాంతమ్దు మాపు ఓరిస్తిమని కస్టమ్కు మీరు నెన్ ఏండ్ మండ్రెజ్ ఆవద్ ఇజి మాపు కొరిజినావ్. మాపు సానావ్లెను ఇజి ఒడిఃబితావ్. మజి ఓరిస్తెజ్ అటోగ నని సనా కస్టమ్కు మజి వాతె. ⁹ నిజమె సాపుదిజ్ సిక్కు మజి దొహ్కె మనాద్ ఇజి మాపు ఒడిఃబితావ్. గాని మాపు, మా ముస్సునె ఆదారం ఆవిండ, సాతి వరిజ్ నిక్కి దేవుణు ముస్సునె ఆదారం ఆదెజ్ ఇజిని ఇక్కెజ్ విజు మజి జర్గితె. ¹⁰⁻¹¹ మీరుబా మా వెట కూడెజి పార్దనం కిజి సాయం కిత్తిజ్, దేవుణు గొప్ప పెరి సాపు నని కస్టం కాణిజ్ మజి తప్తిస్తాన్. మరి వాని కాలమ్దుబా తప్తిసినాన్. వాండ్లు మరి ఎస్తివలెబా మజి తప్తిసి మంజినాన్ ఇజి వన్ని వందిజ్నె మాపు ఆసదాన్ ఎర్దు సుడెజి మంజినావ్. నండెండార్

పార్లనం కిత్తిజ్, దేవుణు బాణిజ్ అయ పార్లనమ్మక వందిజ్ మజి కనికారం దొహ్కాక్తి వందిజ్, నండొండార్ మా వందిజ్ దేవుణుదిజ్ వందనమ్మకు వెహ్మార్.

12 మా గర్బం వెహ్మార్ని సాస్యం ఇనిక ఇహిజ, యా లోకమ్మదు మని బత్తుదుబా, మరి మీవెట మన్ని విజా సజతిజ లోఇబా గర్బం గదిన్ఎండ దేవుణు సిత్తిమని నెగ్గి మన్నుదాన్, లోకమ్మదు మన్ని వరి బుద్దిదాన్ ఆవిండ దేవుణు దయాదర్మమ్మది సత్తుదాన్ బత్తుతామ్. దిన్ని వందిజ్ మాపు పొగ్డిజినామ్. 13 సద్విదెజ్నో, పూర్తి అర్థం కిదెజ్ అట్ఇ మాటెజ్నో మాపు మిజి రాస్తెజ్ సిల్లె. 14 ఏలు మీరు మజి సెగం నెస్తి మనిదెర్. గాని ప్రబు ఆతి యేసు మర్జి వాని దినమ్మదు మాపు మీ వందిజ్ పొగ్డిజి వెహ్మార్నామ్లె. అయాలెకెండ మా వందిజ్ పొగ్డిజి వెహ్మార్ అట్టిలెకెండ మీరుబా నజి పూర్తి నెస్తిదెర్లె ఇజి మాపు ఆసదాన్ ఎద్దు సుడెజి మంజినామ్.

15 యాలెకెండ మా మన్నుదు నమకం తవ్ఎండ మన్నిజ్, మిజి రుండి వంతుజ్ లాబం మండ్రెజ్ ఇజి ముజాల మీ డగ్గు వాదెజ్ ఇజి నజి ఉండ్రీ ఉదెసం మహద్. 16 ముజాల మీ డగ్గు వాజి మాసిదోనియ సొండ్రెజ్ ఇజి, మరి మాసిదోనియదాన్ మర్జి మీ డగ్గు వాజి, మీరె యూదయ దేసం సొండ్రెజ్ మజి పోక్తిదెర్ ఇజి నాను ఒడిబిత. 17 యాలెకెండ కిదెజ్ ఇజి నాను ఒడిబితవలె, యాక ఇజిరి సజతి ఇజి నాను ఒడిబితానా?. “ఒబ” ఇజి వెహ్మార్ వెటనె “ఆవిద్, ఆవిద్” ఇజి వెహ్మార్ యాకెజ్ నాను లోకమ్మదిజ్ నందితి లెకెండ కిజినానా?

18 దేవుణు సమ్మిదెజ్ తగ్గికాన్ ఇజి మన్ని లెకెండె, మాపు మిజి వెహ్మార్ మని మాటెజ్ ఎస్తివలెబా ‘ఒబ’ ఇజినె మంజినె, “ఆవిద్” ఇజి వెహ్మార్కెజ్ ఆఉ. 19 ఎందనిజ్ ఇహిజ, నావెట, సిలువాను వెట, తిమోతి వెట మీ నడిమి సాటె ఆతి మని దేవుణు మరిసి ఆతి యేసుక్రీస్తు ‘ఒబ’ ఇజినో “ఆవిద్” ఇజినో అవతాన్. గాని వన్ని వెట అక్క ఎస్తివలెబా ‘ఒబ’ ఇజినె మంజినాద్. 20 దేవుణు సితి ప్రమాణమ్మకు ఎస్సాడు ఆతిజ్బా, అక్కెజ్ విజా క్రీస్తు వెట ‘ఒబ’ ఇజినె మన్నె. అందెజె దేవుణు గొప్ప పెరికాన్ ఇజి తోరె ఆదెజ్ ఇజి క్రీస్తు వెట ‘అమెన్’ ఇజి మాటు వెహ్మార్నామ్.

21-22 మీ వెట మజిబా క్రీస్తు వెట కూడెజి గటిజ నిల్పి మంజనికాన్ దేవుణునె. బుర్దాన్ నూనె వాక్కి కేట కిత్తి లెకెండ ఏర్పాటు కిత్తికాన్ దేవుణునె. వన్ని సొంతం ఇజి మా మున్ను ముద్దు పొక్కి, వెనుక మజి దొహ్కెజ్ మని మేలుజ వందిజ్ రుజువ్ లెకెండ వన్ని ఆత్మ ఇని బయోన్ మా మన్నుజ మజి సిత మనాన్.

23 మీ మున్ను కనికారం మనిజెనె నాను మరి కొరింతి పట్టుమ్మదు రెవత, ఇని దనిజ్ దేవుణునె సాక్కి. 24 అందెజె మీరు దేవుణు మున్ను నమకం ఇడ్డి దనిజ్ మీ మున్ను అతికారం మనికాప్ ఇజి ఆవిద్ గాని సర్ద వందిజ్ మీ వెట కూడెజి పణికినికాప్ లెకెండెనె. ఎందనిజ్ ఇహిజ దేవుణు మున్ను మని నమకమ్మదాన్ మీరు గటిజ నిల్పి మంజనిదెర్.

2

1 అందెజె మరి ఉండ్రీ సుటు దుకమ్మదాన్ మీ డగ్గు రెవ ఇజి నా మన్నుదు నానె నిర్ణెం కిత. 2 ఎందనిజ్ ఇహిజ, నాను మిజి దుకం తప్పి ఇహిజ, నా వెట దుకం అతికారాతి మీరు ఆవిండ ఎయెర్ నజి సర్ద కిబిస్సార్?. 3 ఎందనిజ్ యా సజతిజ్ నాను మిజి రాస్తె ఇహిజ, నాను వానివలె, నజి సర్ద కిబిస్సెజ్ మని వరివెట నజి దుకం రెవిండ మండ్రెజ్ వలె ఇజి రాస్తె. మరి నజి మని సర్దాదు మీరుబా నావెట సర్ద ఆనిదెర్లె ఇజి మీ వందిజ్ నా మన్నుదు నమకం ఇట్టా మన. 4 మీరు దుకం ఆదెజ్ ఇజి ఆవిద్, గాని మిజి నాను ఎసానో ప్రేమిసిన ఇజి మీరు నెస్తిజ్ ఇజినె, నండొ దుకమ్మదాన్ మన్నుదు బాద ఆజి, ఎసానో కణెరు వాక్కి మిజి రాస్తె మన.

తప్పు కిత్తి వరిజ్ సెమిస్సి వందిజ్

5 ఎయెర్బా దుకం కిబిస్సాన్ ఇహిజ, నజినె లావ్ ఆవిండ, వాండ్రు మిజి విజెరిజ్ కండెక్ దుకం కిబిస్స మనాన్. అందెజె నజి దుకం కిబిస్సి వందిజ్ నాను గటిజ వెహ్మార్ ఆవిద్గదె? 6 వన్నిజ్ మీ లోఇ నండొండార్ వెట సితి సిక్కు సరి అనాద్. 7 అందెజె మీరు వన్నిజ్ సెమిసి ఓదరిస్సెజ్ వలె. ఎందనిజ్ ఇహిజ వాండ్రు మరి నండొ దుకమ్మదు మడుగ్జి మని లెకెండ మండ్రెజ్ ఆవిద్ ఇజి. 8 అందెజె వన్నిజ్ మీరు ప్రేమిసినెదెర్ ఇజి మరి వన్నిజ్ మీరు తోరిస్సెజ్ వలె ఇజి నాను బతిమాల్లిన. 9 మీరు విజా దనిజ్

లోజిజ తగ్గికిదెర్ లెకెండ మంజినిదెరా ఇజ నెస్టెజ్ నె నాను మిజి రాస్త మన. 10 మీరు ఎయెరిజ్ బా సెమిస్తిజ నానుబా వన్నిజ్ సెమిసిన. మరి ఇనిదని వందిజ్ బా సెమిస్తిజ్ ఇహిజ, మీ వందిజ్ అక్కబా క్రిస్తు ఎద్రు నాను సెమిస్త మన. 11 ఎందనిజ్ ఇహిజ, సయ్యాను మా ముస్సు గెల్లిస్తిజ్ ఆవద్ ఇజ నాను సెమిస్త మన్ను. మరి వన్ని సెజ పణిజ వందిజ్ మాటు నెనెఇకాట్ ఆవద్ గదె?

కొత్త బప్పుమానం వందిజ్ సాటిస్సికార్.

12 క్రిస్తు సువార్త సాటిస్తిజ్ నాను త్రోయ పట్టుమదు వాతివలె అబ్బె నెగ్గి అవ్ కాసం దేవుణు నజి సితాన్. 13 గాని నా తంబెరి ఆతి తీతుజ్ తోఎండ నా మన్నుదు నిసాతి సిల్లెండ ఆతిజ్, వరిజ్ నాను సొన్నిన ఇజ వెప్పి అబ్బెణిజ్ మాసిదోనియ సాండ్రెజ్ సోత.

14 గాని మాపు దేవుణుదిజ్ వందనమకు వెప్పినావ్. ఎందనిజ్ ఇహిజ, క్రిస్తు వెట కూడితి మజి దేవుణు ఎస్తివలెబా గెల్లిస్తి వరి సర్తదాన్ నడిపిసినాన్. ఉండ్రీ నెగ్గి వాసనం లెకెండ విజుబాన్ మాపు సాటిస్తి సువార్తదాన్ క్రిస్తు వందిజ్ విజెరి నెస్తిలెకెండ వాండ్రు కిబిస్సాన్. 15 దేవుణు రక్కిస్తి వరి నడిపి, పాడాజి సొన్నిని వరి నడిపి మాపు దేవుణుదిజ్ క్రిస్తుది నెగ్గి వాసనం లెకెండ ఆత మనావ్. 16 పాడాజి సొన్నిని వరిజ్ మాపు సాతి ఒణిది కంపు లెకెండ మనావ్. దేవుణు రక్కిస్తి వరిజ్ బత్తు సిజిని నెగ్గి వాసనం లెకెండ మనావ్. నిని పణిదిజ్ తగ్గికాన్ ఎయెన్ మనాన్? 17 మహి నండండార లెకెండ, లాబం రపిద్ ఇజ దేవుణు మాటదిజ్ బేరం కినికాప ఆవెవ్. దేవుణు బాణిజ్ పోకె ఆతివరి లెకెండ క్రిస్తు వెట కూడాజి నీతినిజాయ్ దాన్ దేవుణు ఎద్రు మాపు వర్గిజనావ్.

3

1 మరి మజి మాపె మర్తి పోగ్డిజి వెస్టెజ్ మొదొల్నినాపా? నెగెండారిజ్ అవ్ సరం మని లెకెండ మీబాణిజ్ నో, మిజి తోరిస్తిజ్ ఇజనో, కీదు పోక్కిని నెల్ ప కిబిస్తి ఉత్తమకు మజి మండ్రెజ్ నా? 2 మా మన్నుజ రాసె ఆతిమని లోకుర్ విజెరి నెస్తి సద్విజిని ఉత్తమకు మీరె. 3 పణకుదాన్ తయార్ కిత్తి బల్లెజ ముస్సు గిస్తి మనిక ఆవద్, మరి సిరదాన్ రాస్తిక ఆవద్, గాని లోకురి మన్ను ఇని మెతాని బల్లెజ ముస్సు, మాపు కిత్తి సువార్త పణిదాన్ బత్తిజిని దేవుణు ఆత్మదాన్, రాసె ఆతిమని క్రిస్తుబాణిజ్ వాతి మని ఉండ్రీ ఉత్తమనె మీరు ఇజ మీరె తోరిసినిదెర్.

4 క్రిస్తు వెట దేవుణు ఎద్రు మా మన్నుదు నెస్తి నమకం మనాద్. 5 మాపు కిజిని పణిజ్ విజు మా సత్తుదాన్ మాపె కిజినావ్, ఇజ ఒణిబిదిజ్ మా లోక ఇనికబా సిల్లెద్. యాకెజ్ కిదిజ్ మని సత్తు దేవుణు బాణిజ్ నె వాతాద్. 6 వాండ్రె మజి కొత్త బప్పుమానమదిజ్ నెగెండ పణికనికార్ ఇజ ఇట్ట మనాన్. కొత్త బప్పుమానం ఇహిజ అనరమ్దాన్ రాస్తిక ఆవద్, బత్తిజిని దేవుణు ఆత్మదాన్ వాతిక. ఎందనిజ్ ఇహిజ అనరమ్దాన్ రాసె ఆతి ప్రమాణం సాపు తపిసినాద్. ఆత్మదాన్ వాతి ప్రమాణం పాణం సీజినాద్.

కొత్త బప్పుమానం ఇని గొప్ప పెరి సజతి.

7 పణకు బల్లెజ ముస్సు అనరమ్దాన్ రాసె ఆతిమని సాపు తపిస్తి ప్రమాణం నెస్తి గొప్ప పెరిక మహాద్. 8 ఇహిజ, మోసె మొకొ తగిజ సొన్నిని జాయ్ దాన్ మహిజ్ బా, ఇస్రాయేలు లోకుర్ వన్ని మొకొమదు తినాజ్ బెస్తిజ్ అట్ ఇ లెకెండ గొప్ప పెరి జాయ్ దాన్ మహాన్. అక్క అయాలెకెండ పెరిక మహాద్ ఇహిజ, దేవుణు ఆత్మదాన్ మని పణిజ్ దన్నిజ్ ఇంక ఎస్సాన్ గొప్ప పెరిక ఆవిదా? 9 లోకురిజ్ తీర్పు తీరిని సిక్కు సీని పణి నెస్తి గొప్ప పెరిక మహాద్ ఇహిజ, లోకురిజ్ నీతి నిజాయితీదికార్ కిజిని యా పణి, దనిజ్ ఇంక ఒద్దె పెరిక మంజినాద్. 10 ఏలు మనిక ఒదె గొప్ప పెరిక ఆతిక ఆతిజ్, దినిజ్ పోలిని సుడఃతిజ, ముజాల గొప్ప పెరిక మహి దనిజ్ ఏలు ఇనిక సిల్లెండ ఆతాద్. 11 అనరమ్దాన్ రాసె ఆతి, కండెక్ కాలం మహి యా ప్రమాణం యాలెకెండ గొప్ప పెరిక వాతాద్ ఇహిజ, ఎస్తివలెబా మంజిని యా కొత్త ప్రమాణం మరి ఒదె గొప్ప పెరిక మంజినాద్.

12 మాపు యాలెకెండ అనదాన్ ఎద్రు సుడఃజి మంజినాట్. అందెజి మా మన్నుదు దయరమ్దాన్ మనావ్. 13 మాపు మోసె లెకెండ ఆవివ్. ఎందనిజ్ ఇహిజ ఇస్రాయేలు లోకుర్ వన్ని మొకొమదు మని తగిజ సొని జాయ్ దిజ్ బేనెండ మోసె వన్ని మొకొమదు టుకుర్ ఇట్టాన్. 14 గాని వరి మన్ను

గుడిః ఆత మహాద్. అందెజె ఏలుబా వారు పడాఃయి ఒపుమానం సద్విజనివలె వరి మన్సుజ మున్సు, అయా టుకుర్ ఏలుబా లాగి ఆవిండ అయా లెకెండెనె మనాద్. ఎందనిజ్ ఇహిజ క్రీస్తు వెటని అక్క, లాగి ఆజినాద్. ¹⁵ ఏలుదాక మోసె రాస్తి మనికెజ్ వారు సద్విజని వలె వరి మన్సుజ మున్సు, ఉండ్రీ టుకుర్ మని లెకెండెనె మనాద్. ¹⁶ గాని ఎయెన్బా ఎస్తివలెబా ప్రబువాతి యేసుక్రీస్తు దరిజ్ మహ్జిజ వన్ని బాణిజ్ టుకుర్ లాగి ఆజినాద్.

¹⁷ ప్రబు ఇహిజ దేవుణు అత్తనె. ప్రబు అత్త మజి విడుఃతల కిజినాద్. ¹⁸ మాటు విజెటె టుకుర్ మన్ఇ మొకొమ్దాన్, ఆదమ్దాన్ జాయ్ తోరితి లెకెండ, ప్రబు జాయ్ తోరిసినాట్. ఆత్త ఆతి ప్రబుబాణిజ్ వాని జాయ్దాన్ మరి ఒద్దె జాయ్ ఆజి వన్ని మూర్తి లెకెండ ఆజి మంజినాట్లె.

4

ఒడోఃల్ ఇని ఇస్కా, కుండ లోఇ మన్ని ఆస్తి

¹ దేవుణు కనికారమ్దానె మాపు దేవుణు పణిదు మనావ్. అందెజె మాపు మన్సుదు దయరం సిల్లెండ ఆవివ్. ² మాపు సిగు లాగిని డాఃజిజి కిజిమహి పణిజ్ డిఃస్త సిత్తావ్. మాపు మోసెం కిదెజ్ ఇజి సుడఃఎవ్. మాపు దేవుణు మాట మని లెకెండ దనిజ్ మారినెండ వెప్పినావ్. మాపు మోసెం కిదెజ్ ఇజి సుడఃఎవ్. మాపు దేవుణు మాట మన్ని లెకెండ మారినెండ వెప్పినావ్. అక్కాదె అవిండ నిజమాతికెజ్ విజెరిజ్ నెసిని లెకెండ వరి గర్భమ్దిజ్ ఎద్దు మజి మాపె నెగెండ దేవుణు ఎద్దు బత్తిజినావ్. ³ మాపు వెప్పిని సువార్త డాఃజె ఆతి మహిజ, అక్క పాడాఃజి సాన్నిని వరిజె డాఃజె ఆత మనాద్. ⁴ దేవుణు మూర్తి ఆతిమని క్రీస్తు జాయ్ ఆతి సువార్తదిజ్ జాయ్, వరిజ్ తోరిండ మంజిని వందిజ్ యా తరమ్దిజ్ అతికారి ఆతి సెతూను నమకం సిల్లికార్ ఆతివరి మన్సుది కణకెజ్ గుడ్డి కిబిస్తానె. ⁵⁻⁶ “సికటిదాన్ జాయ్ ఆవివ్”, ఇజి వెహ్తి దేవుణునె, క్రీస్తు మొకొమ్దు మని జాయ్ దేవుణు గెణమ్ది జాయ్ మజి మండ్రెజ్ ఇజి వన్ని జాయ్ మా మన్సుజ జాయ్ సీని లెకెండ మజి సిత్ర మనాన్. అందెజె మజి మాపె ఆజి సువార్త సాటిసెవ్. గాని యేసుక్రీస్తు ప్రబు ఇజి ఒడిఃబిజి, మాపు యేసు వందిజ్ మిజి పణి కినికావ్ ఇజి సువార్త సాటిసినావ్.

⁷ అహిజ విజు దన్నిజ్ మిస్తి యా సత్తు మాది ఆవిద్, గాని దేవుణు బాణిజ్ వాతిక ఇజి తోరి ఆదెజ్ ఇజి యా నెగ్గి ఆస్తి మా ఒడోఃల్ ఇని ఇస్కా, కుండెజు లోఇ మజి దొవ్క మనాద్. ⁸ విజు దరిజాణిజ్ గటిజి సేపె ఆజినికావ్ గాని పెడఃహికావ్ ఆవివ్. ఇనిక కెడిజెనో ఇజి తెల్లిండ ఆతికావ్ గాని ఇన్ని ఆస సిల్లికావ్ ఆవివ్. ⁹ హిమ్నెజ్ కెబె ఆజినావ్ గాని డిఃసి సెబె అతికావ్ ఆవివ్. డెయె ఆజి అడిఃగి అర్దికావ్ గాని నాసనం ఆజినికావ్ ఆవివ్. ¹⁰ మాపు ఎస్తివలెబా మా ఒడోఃల్దు యేసు సావుదిజ్ బరిసినావ్, ఎందనిజ్ ఇహిజ యేసు బత్తుబా మా ఒడోఃల్దాన్ తోరి ఆదెజ్ వలె ఇజి. ¹¹ ఏలు బత్తిజినికావ్ ఆతి మాపు ఎస్తివలెబా యేసు వందిజ్ సావుదిజ్ ఒపజెపె ఆజినావ్. ఎందనిజ్ ఇహిజ నాసనం అజి సాని మా ఒడోఃల్దు యేసు బత్తు, తోరి ఆదెజ్ వలె. ¹² అందెజె సావు మా లోఇ పణి కిజినాద్ గాని మీ లోఇ పాణం పణి కిజినాద్.

¹³ “నాను నమ్మిత మన్ను. అందెజె నాను వర్గిత మన్ను”, ఇజి దేవుణు మాటదు రాస్త మనాద్. అయాలెకెండ మన్ని మన్సుదాన్ మాపుబా నమ్మిత మనావ్, అందెజె వర్గిజినావ్. ¹⁴ ఇనిక ఇహిజ, ప్రబు ఆతి యేసుజ్ సాతి వరిబాణిజ్ నిక్తికాన్, యేసు వెట మజిబా నిక్తి మీవెట వన్ని ఎద్దు నిల్వొన్ ఇజి మాటు నెసినాట్.

¹⁵ దేవుణు దయా దర్మం మరి ఒద్దె నండెండారిజ్ అందిజి సార్నివలె, నండె పార్దనమ్కు కిజి, మరి వందనమ్కు వెప్పి వారు దేవుణుదిజ్ గవరం సీనారలె. యాకెజ్ విజు మీ వందిజ్నె.

¹⁶ అందెజె మాపు మన్సుదు దయరం సిల్లికావ్ ఆవివ్. వెల్లి తోరి ఆజిని మా ఒడోఃల్ పాడాఃజి సాన్నినాద్ గాని మా మన్సుదు మాపు రోజు రోజుదిజ్ కొత్త సత్తు మనికావ్ ఆజినావ్. ¹⁷ మాపు ఓరిసిని యా సాణెం మంజిని ఇజిరి కస్తమ్కు, మజి వనకాజ్ విజు మిస్తిక ఆతి ఎలాకాలం మంజిని గవరం దొహ్కీనె. ¹⁸ అందెజె మాపు తోరిజిని వనక మున్సు, మన్సు ఇడఃవిండ, తోరిఇ వనక వందిజ్నె ఎద్దు సుడఃజినావ్. ఎందనిజ్ ఇహిజ తోర్నికెజ్ సెగం కాలమ్నె మంజినె, తోరిఇకెజ్ ఎలాకాలం మంజినికెజ్.

5

1 యా బూమి ముస్సు మాపు బత్మిజిని గుడారం* లెకెండ్ మని మా ఒడోల్ ఎస్తివలె నాసనం ఆతి సోహిజ్ బా, మా వందిజ్ దేవుణు మంజిని బాడిడు లోకు కిక్కాణిజ్ తొహ్తక ఆవండ్, దేవుణు తయార కిత్తి మన్ని ఎలాకాలం మంజిని ఉండ్రి ఇల్లు మంజినాద్ ఇజి మాపు నెన్నాప్. 2 పరలోకమ్దు మన్ని ఇల్లు లెకెండ్ మన్ని ఒడోల్దు మండ్రెజ్ ఇజి ఆసదాన్ యా గుడారం ఆతి ఒడోల్దు మాపు ములుజిజెనె మంజినాప్. 3 మాపు అబ్బె ఒడోల్ మన్నివరి లెకెండ్ మన్నిజ్ మా ఆత్మ డుమ్డ లెకెండ్ తోర్వప్. 4 గుడారమాతి యా ఒడోల్దాన్ మన్నివలె మాటు ములుజిజి బరు పిండ్జిని వరిలెకెండ్ మంజినాప్. యా ఒడోల్ డిసి సిదెజ్ ఇజి సిల్దెద్. గాని దేవుణు మంజిని బాడిడు మని ఒడోల్దు మండ్రెజ్ ఇజి ఆస ఆజినాప్. అందెజె సాపు మన్ని యా ఒడోల్ ఎసెజ్ బా సాపు స్లి పాణం మని ఒడోల్ లెకెండ్ మార్నాద్లె. 5 వన్ని ఆత్మదిజ్ బయాన్ లెకెండ్ మజి సితిమనికాన్ ఆతి దేవుణునె దిన్ని వందిజ్ మజి తయార కిత్తి మనాన్. 6 అందెజె మాపు ఎస్తివలెబా మన్నుదు దయరం మనికాప్. మాపు యా ఒడోల్దు ఇబ్బె బత్మిజిని దాక ప్రబు బాణిజ్ దూరం మనాప్ ఇజి నెసినాప్.

7 మాపు దేవుణు ముస్సు మని నమకమ్దానె బత్మిజినాప్. కణకెజ తొర్తిని వన్నిక దటాజ్ ఆవద్. 8 యా ఒడోల్దు బత్మిని దన్నిజ్ ఇంక, యాక డిసి సిజి ప్రబు వెట మంజినికాదె మజి ఒదె ఇన్లం, దిన్ని వందిజ్ మజి మన్నుదు దయరం మనాద్, ఇజి నాను వెప్పిన. 9 అందెజె, మా ఒడోల్దు ఇబ్బె బత్మిజి మహిజ్ బా, యాక డిసి సిజి ప్రబు వెట మహిజ్ బా వన్నిజ్ ఇన్లమాతి లెకెండ్ మండ్రెజ్ ఇజి మాపు గురి సుడోజినాప్. 10 ఎందనిజ్ ఇహిజ ఒరెన్ ఒరెన్ యా ఒడోల్దాన్ మహివలె కిత్తి పణిజి వందిజ్, అయాకెజ్ నెగెకెజ్ ఆతిజ్ బా, నెకెకెజ్ ఆతిజ్ బా దన్నిజ్ తగితి లెకెండ్ దొప్పిని వందిజ్ మాటు విజెటె క్రిస్తు నాయం తీరిస్సి బాడిడు తోరె ఆదెజ్ వలె.

మహి వరిజ్ దేవుణు వెట కూల తోహ్ పిస్సి పణి

11 అందెజె దేవుణుదిజ్ ఎస్సానో తియెలాజి మండ్రెజ్ ఇజి నెసినె, మహి వరిజ్ అయాలెకెండ్ మండ్రు ఇజి బుద్ది వెప్పినాప్. మాపు ఎలాగ మర్తికాప్ ఇజి దేవుణు నెసినాన్. మీ గర్భం ఎద్రు మీరుబా మజి నెసినెదెరె ఇజి మాపు ఆస ఆజినాప్. 12 మరి మాపు మీ ఎద్రు మా వందిజ్ పొగ్డిజి వెహ్తెజ్ ఇజి సుడోజిం, గాని మా వందిజ్ పొగ్డిజెదెజ్ మిజి ఉండ్రి అవ్కాసం సీజినాప్. ఎందనిజ్ ఇహిజ మన్నుదు మనికెజ్ నెన్వండ్, వెల్లి తొర్తికెజ్ సుడోజి పొగ్డిజి వర్గిజిని వరివెట మర్తి వెహ్తెజ్ మీరు అల్పికిదెరె ఆదెజ్ ఇజినె. 13 మాపు వెరిదికాప్ లెకెండ్ మనాప్ ఇహిజ అక్క దేవుణు వందిజ్ నె. నెగ్గె బుద్ది మనికాప్ ఇహిజ అక్క మీ వందిజ్ నె. 14 క్రిస్తు ప్రేమ మజి బలవంతం కిజి నడిపెసినాద్. ఎందనిజ్ ఇహిజ విజెరె వందిజ్ ఒరెన్ సాతాన్ అందెజె విజెరె సాతార ఇజి ఇని అనుమానం సిల్దెండ్ నెసినాప్. 15 మరి, వాండ్రు విజెరె వందిజ్ సాతాన్ ఇజి బత్మిజినికార ఏలుదాన్ వరి వందిజ్ నె బత్మిండ్ వరి వందిజ్ సాజి మర్తి నిజితి వన్ని వందిజ్ నె బత్మిదిజ్ ఇజి నెసినాప్.

16 అందెజె ఏలుదాన్ మాపు ఎయెర్ వందిజ్ బా యా లోకమ్దు మనికార ఒడోబిని లెకెండ్ ఒడిబింపి. క్రిస్తుజ్ వందిజ్ బా ముజాల యా లెకెండ్ నె ఒడిబింతాప్ గాని ఏలుదాన్ వన్ని వందిజ్ అయాలెకెండ్ ఒడిబింపి. 17 అందెజె, ఎయెన్ బా క్రిస్తు వెట కూడితిజ, వాండ్రు కొత్తాజ్ తయార ఆజినాన్. వడాయికెజ్ విజు సాహ, ఇదిలో విజు కొత్తాకెజ్ ఆతె. 18 యాకెజ్ విజు దేవుణు బాణిజ్ నె ఆతె. దేవుణు వెట పగాతికాట్ మజి క్రిస్తు వెట, దేవుణు మజి వన్నిజ్ కూలెజ్ లెకెండ్ కిత్తాన్. మరి మహికార దేవుణు వెట వన్నిజ్ కూలెజ్ లెకెండ్ తయార కిని పణిబా మజి ఒపజెప్తాన్. 19 అహిజ, దేవుణు లోకురి పాపమ్కు విజు వరి ముస్సునె మొవ్విండ్, లోకమ్దు మని వరిజ్ క్రిస్తు వెట వన్నిజ్ కూలెజ్ లెకెండ్ కిత్తాన్. మహి వరిజ్ దేవుణు వెట కూలెజ్ లెకెండ్ కిబిస్సి అయ మటెజ్ మజి ఒపజెప్తాన్. 20 అందెజె మాపు క్రిస్తుజ్ బోగటు వెప్పికాప్. దేవుణు మా వెట మిజి బతిమాలజిని లెకెండ్ వర్గిజినాన్. మీరు దేవుణు వెట పగాతికిదెరె లెకెండ్ మన్విండ్ వన్నివెట రాజనమాజి వన్నిజ్ కూలెజ్ లెకెండ్ మండ్రు ఇజి మాపు క్రిస్తు వందిజ్ మిజి బతిమాలజినాప్. 21 మాటు క్రిస్తు వెట దేవుణు

* 5:1 5:1 ఇల్లు, గుడుస ఇజిబా ఒడోబిదిజ్ ఆనాద్

ఎద్దు నీతినిజాయి మనికాట్ ఆదెజ్ ఇజి దేవుణు ఇని పాపం సిల్లికాన్ ఆతి క్రీస్తుజ్ మా వందిజ్ పాపం ఆదెజ్ ఇట్టాన్.

6

1 దేవుణు వెట జత్ కూడేజి పణికినికాప్ ఇజి మపు మిజి బతిమాల్లినిక ఇనిక ఇహిజ, దేవుణుబాణిజ్ మిజి దొహక్తి మన్ని వన్ని దయా దర్మం పణిదిజ్ రెజదని లెకెండ మీరు కిదెజ్ ఆవెద్. 2 “నీను మొరొ ఆతిక తగితి సమ్మయమ్దు నాను వెహమన్న. రక్సిస్సెజ్ మన్ని రోజుదు నాను మిజి సాయం కిత మన్న ఇజి వాండ్రు వెప్పినాన్”, ఇజి దేవుణు మాటదు రాస్త మనాద్. అందెజె నాను వెప్పిన, ఇక్కాదె దేవుణుది తగితి సమయం. ఇక్కాదె దేవుణు రెసిసిని రోజు.

పవులుజ్ వాతి కస్టమ్కు

3 ఎయెరిజ్ బ ఇని తొరొ ఇడేఎండ మపు కిజిని విజు పణిదు ఎలాగ మర్ని నిందబా రెఎండ మాపు సుడేజినాప్. 4 విజు వన్నా లొఇ దేవుణు వందిజ్ పణి కినికాప్ ఇజి మజి మాపె తోరిసినాప్. ఎలగ ఇహిజ కస్టమ్కు విజు గొప్పజు ఓరిసినిబాన్, స్రమెజు లొఇ బాద ఆనిబాన్, దుకమ్దు, 5 డెయె ఆనిబాన్, జెలిదు మన్నిబాన్, మహికార్ గొడేబ ఆనిబాన్, కస్టబాడేజి పణి కినిబాన్, నిర్ది సిల్లి రెయ్కాజ్, బజ ఆతివలె, దేవుణు వందిజ్ పణికినికాప్ ఇజి మజి మాపె తోరిసినాప్. 6 మాపు ఇని తప్పుబా సిల్లెండ మహాప్. అర్దం కిజి నెసినిబాన్, ఓరిసినిబాన్, దయ ఆనిబాన్, దేవుణు ఆత్మ వెట, కల్లి సిల్లి ప్రేమదాన్, 7 నిజమాతి మాటెజ్ వర్నిని దన్ని లొఇ, దేవుణు సత్తు లొఇ, ఉణిర్ డెబ్బ కిక్కాణిజ్ నీతి నిజాయితి ఇని ఆయుదమ్కు అస్సిబాన్, 8 మర్కూద సిత్తిబాన్, సిగు ఆతిబాన్, పొగ్డె ఆనిబాన్, సెఇ మటెజ్ వెహ ఆనిబాన్ దేవుణు వందిజ్ పణికినికాప్ ఇజి మజి మాపె తోరిసినాప్. నిజమాతికెజ్ మాప్ వర్జినాప్ గాని అబద్దం వర్జినాప్ ఇజి లోకర్ మజి ఒడేబిజినార్. 9 విజెర బాగ నెస్తికార్ గాని ఎయెరబా నెస్ ఇ వరిలెకెండ మనాప్. సాజిని వరిలెకెండ మహిజ్బా మాపు బత్తిజినాప్. డెయె ఆజినాప్ గాని సపె ఆప్. 10 దుకమ్దాన్ మన్నికాప్ గని ఎస్తివలెబా సర్ద మన్నికాప్. బీదాదికాప్ గాని నంఠెండారిజ్ ఆస్తి మన్నికార్ కిజినాప్. ఇనికబా సిల్లికాప్ గాని విజు మన్నికాప్.

11 కొరింతి పట్టుమ్దికిదెరా, ఇనికబా డాప్ఎండ మా మన్నుదు మన్నికెజ్ విజు మీవెట మాపు వర్జిత మనాప్. 12 మాపు మీ వందిజ్ ప్రేమదాన్ కిక్కు సాప్పినాప్. మీరు మూక్తి కిక్కుబా మా వందిజ్ సాప్ ఇదెర్. 13 మీరు నా కొణెర్ ఇజి మిజి యా లెకెండ వెప్పిన. మాపు మీ వందిజ్ కిత్తి లెకెండ మీరుబా మా వందిజ్ కిదు. మా వందిజ్ మీ ప్రేమ తోరిస్త.

నమ్మిఇ వరి వెట జత్త కూడేజెజ్ ఆవెద్.

14 నమ్మిఇ వరివెట మీరు జత్త కూడేజి మన్నాట్. నీతి నిజాతిమనికార్ని సెఇకార్ ఎలాగ కుడేజి మండ్రెజ్ అట్టె? జాయ్ని సీకటి ఎలాగ ఉండెబాన్ కుడేజి మండ్రెజ్ అట్టె? 15 క్రీస్తుజ్ పగాతికాన్ ఆతి బెలియాలుదిజ్* క్రీస్తు వెట ఇని పొత్తు మనాద్. నమ్మితి వరిజ్ నమ్మిఇ వరిజ్ ఇని పొత్తు మనాద్? 16 దేవుణు గుడిడిజ్ బొమ్మెజు వెట ఇని పొత్తు మనాద్? మాపు బత్తిజిని దేవుణుది గుడి: ఆత మనాప్. అహిజ దేవుణు వెప్తి లెకెండెన, “నాను వరివెట బత్తిజి వరివెట నడిస. నాను వరిజ్ దేవుణు ఆజి మంజినాలె. వారు నా లోకర్ ఆన మంజినార్”. 17 “అందెజె వరి బాణిజ్ వెల్లి వాజి కేట మండ్రు”, ఇజి ప్రబు వెప్పినాన్. “సుబారం సిల్లి ఇని దనిజ్బా ముట్మాట్, నాను మిజి డగ్రు కిస”, 18 “నాను మిజి బుబ్బు ఆన మంజిన, మరి మీరు నజి మరిసిర్ గాల్సిక్ ఆనిదెరలె”, ఇజి విజు సత్తుజ్ మనికాన్ ఆతి ప్రబు వెప్పినాన్”.

7

1 నజి ఇస్టమాతి తంబెరిజాండె, దేవుణు మజి యాలెకెండ ప్రమాణమ్కు సిత్త మనాన్. అందెజె ఒడేలదిజ్ని ఆత్మదిజ్ సెఇకెజ్ కిజిని విజు వనక బాణిజ్ దూరం మంజి మజి మాటె సుబారం కిజి, దేవుణుదిజ్ గొప్ప మర్కూద సీజి, పూర్తి నెగ్గికాట్ ఆజి మంజినాట్. 2 మీ మన్నుజు మజి బాడ్డి సిదాట్.

* 6:15 6:15 బెలుయోల్ ఇహిజ సయ్యాను

మాపు ఎయెరిజ్ బా ఇని తప్పుబా కిఎతావ్. ఎయెరిజ్ బా పాడే కిఎతావ్. ఎయెరిజ్ బా ఇనికబా మోసాం కిజి లాగ్గె ఆఎతావ్. ³ మీరు తప్పు కిత్తిదెర్ ఇజి మీ మున్ను, తప్పు మోషైజ్ ఇజి నాను ఇక వెహావి. ఎందనిజ్ ఇహోజ, నాను ముజాల వెహ్ని మున్ను లెకెండ్ మీరు మజి నండో డగ్గుహికిదెర్. అందెజి మాపు బత్తితిజ్ బా మీ వెటనె, సాతిజ్ బా మీ వెటనె ఎస్తివలెబా మంజినావ్. ⁴ మీ వందిజ్ నా మున్నుదు నండో దయరం మనాద్. మీ వందిజ్ నాను గొప్పు పొగ్గిడిజిన. నాను ఒదర్చుదాన్ నిండ్రిత మున్ను, నజి నండో కన్లమకు వాతె గాని నాను గొప్పు ఒదర్చుదాన్ మున్ను.

⁵ మాపు మాసిదోనియాదు వాతి వెననుకబా కండెక్ బా రోమ్ దెజ్ అట్ ఏతావ్. విజు దరిజాణిజ్ మజి కన్లమకునె మహా. వెల్లెహాన్ గొడెబెజ్, మా లొఇ ఇహోజ తియెల్ దాన్ మహావ్. ⁶ గాని ఇని ఆస సిల్లెండ అడిగి అర్తి వరిజ్ ఒదసిసిని దేవుణు, తీతు వాతిజ్ వన్నివెట మజి ఒదరిస్తాన్. ⁷ వాండ్రు వాతి దని వెటనె ఆవండ, మీరు వన్నిజ్ ఒదరిస్తి దనివెటా దేవుణు మజి ఒదరిస్తాన్. నా వందిజ్ మీ మున్నుదు మని ప్రేమ వందిజ్, మీరు నా వందిజ్ నండో దుకం ఆతి వందిజ్, మరి నా వందిజ్ మీ మున్నుదు ఎస్సా ఆస మనాద్ ఇజి వాండ్రు నజి వెహ్నాన్. అందెజి నాను మరి ఒదె గొప్పు సర్ల ఆత. ⁸ నాను మిజి రాస్తి ఉత్తమదాన్ మీరు దుకం ఆతిజ్ బా, నజి దని వందిజ్ విసారం సిల్లెద్. అయ ఉత్తం మిజి సెగం రొన్ను, దుకం కిబిస్తాద్ ఇజి నెస్తానె విసారం అస్త. ⁹ గాని నాను ఏలు దని వందిజ్ సర్లదాన్ మన. మీరు దుకం ఆతి వందిజ్ ఆవద్, గాని మీరు అయ దుకమ్ దాన్ దేవుణు ఎర్దు మీ తప్పుజ్ ఒప్పుకోడిజి మారు మున్ను పొందితిదెర్ ఇజి నాను సర్లదాన్ మన. దేవుణు ఇస్టమాతి వజనె మీరు దుకం ఆతిదెర్, అందెజి దనివెట మిజి ఇనికబా నస్టం రెవత. ¹⁰ దేవుణు ఇస్టమాతి వజ వాజిని దుకమ్ దాన్, దేవుణు మిజి రక్కిస్సి లెకెండ్ మీ లొఇ మారు మున్ను పుటిసినాద్. అయ మరు మున్ను దుకం పుటిసివిద్. లొకమ్ దిజ్ సెందితి దుకం సావు తపిసినాద్. ¹¹ దేవుణు ఇస్టమాతి వజ వాతి యా దుకమ్ దాన్ మీరు ఎసానో జాగర్ల మనికిదెర్ అతిదెర్. మరి మీరు కల్లి సిలికిదెర్ ఇజి తోరిస్సెజ్ ఎసానో ఆస, తప్పు పణి వందిజ్ ఎసానో కోపం రెపిస్తాద్. మరి, దేవుణు వందిజ్ ఎసానో తియెల్, దేవుణు వందిజ్ ఎసానో ప్రేమ, దేవుణు వందిజ్ పణి కిదెజ్ మున్నుదు ఎసానో ఆస, నయం జగ్గిజి మండ్రెజ్ ఇజి ఎసానో ఆస, మీ లొఇ పుటిస్తాద్. యా విజు సజతిజి వందిజ్ మీరు నెగ్గికిదెర్ ఇజి రుజావ్ కిబె ఆతె.

¹² అందెజి, నాను మిజి ఉత్తం రాస్తిక అయ సెఇ పణి కిత్తి వన్ని వందిజ్ ఆవద్. వాండ్రు కిత్తి పణిదాన్ దుకం ఆతి వన్ని వందిజ్ బా ఆవద్. గానిమా వందిజ్ మీ మున్నుదు ఎసానో ఆస ఆజనిదెర్ ఇజి దేవుణు ఎర్దు మీరు నిజం నెస్సెజ్ ఇజినె నాను రాస్త. ¹³ యా విజు వన్యా, వందిజ్ మాపు ఉసారో కిబె ఆతావ్. అక్కాదె ఆవండ, మీరు తీతు మున్ను సలాజ్ కిత్తి వందిజ్ వాండ్రు సర్లదాన్ మనికబా సుడెజి మాపు మరి ఒద్దె సర్ల ఆతావ్. ¹⁴ నాను మీ వందిజ్ తీతు ఎర్దు పొగ్గిడిజి వెహ్ని వందిజ్ మీరు నజి సిగు కెఇతిదెర్. మాపు మిజి వెహ్ని విజు మాటెజ్ ఎలాగ నిజమాతికెజ్ నో, అయాలెకెండ్ నె మీ వందిజ్ తీతు వెట పొగ్గిడిజి వెహ్నికెజ్ బా నిజం ఇజి తోరె ఆతె. ¹⁵ మీరు విజిదెరె వన్నిజ్ లొజిజి, ఎసానో తియెలాజి ఆజి, వణకుదాన్ వన్నిజ్ డగ్గు కిత్తిదెర్. అక్క ఎత్తు కినివలె మీ వందిజ్ వన్ని మున్నుదు మని ప్రేమ మరి ఒద్దె పిరిజినాద్. ¹⁶ మరి మీ వందిజ్ మున్నుదు పూర్తి దయరమ్ దాన్ మండ్రెజ్ ఆనాద్ ఇజి నాను సర్ల మున్ను.

8

దేవుణుదిజ్ సంత సీని వందిజ్

¹ తంబెరిజాండె, మాసిదోనియాదు మున్ను దేవుణు సజమ్ కాజ్ దేవుణు తోరిస్తి మున్ను వన్ని దయా దర్లం వందిజ్ మీరు నెసి మండ్రెజ్ ఇజి మాపు కోరిజినావ్. ² వరిజ్ వాతి గొప్పు పెరి కన్లమకాణిజ్ వారు పరిస కిబె ఆతార్ గాని ఒద్దె సర్ల ఆజి మహార్. వారు గొప్పు బీదదికార్ ఆతి మహిజ్ బా దేవుణు వందిజ్ నండో సిదెజ్ అక్క వరిజ్ అడ్డు కివితాద్. ³ నాను వరి వందిజ్ వెహ్నిని సాస్యం ఇనిక ఇహోజ, వరిజ్ ఎసా సిదెజ్ అట్టూర్ అయాలెకెండ్ నె వారు సిత్తార్, నిజమె వరిజ్ సిదెజ్ అట్టి దనిజ్ ఇంక లావ్ నె సిత్తార్. వరి సాంత ఇస్టమ్ దాన్ సిత్తార్. ⁴ నమ్మిత్తి వరి వందిజ్ కిజిని యా సాయమ్ దు వరి వంతుజ్ కూడుపైజి ఇజి వరిజ్ అవ్ కాసం సిదెజ్ వారు మజి నండో బతిమాలితార్. ⁵ వారు కిత్తిక మాపు ఒడిబితి లెకెండ్ బా ఆవతాద్. ముజాల వరిజ్ వారె ప్రబుదిజ్ సిత్తార్. వెనుక దేవుణు ఇస్టమాతి వజ

వరిజ్ వారె మజిబా సిత్తార్. ⁶ అందెజె తీతు మీ లొణ మొదొల్స్ని లెకెండ, కనికారమ్దాన్ కిజిని యా పణి పూర్తి కిదెజ్ ఇజి మాపు వన్నిజ్ ఉసార్ కిబిస్తాప్. ⁷ మీరు విజు వన్యా లొణ ముజాల మనికిదెర్. అహిజ దేవుణు మున్సు మని నమకమ్దు, మాటెజ వర్గిని దని లొణ, గెణమ్దు, మహివరిజ్ సాయం కిదెజ్ మన్ని అసాదు, మా వందిజ్ మన్ని ప్రేమాదు ముజాల మన్ని లెకెండ నమ్మిత్తి వరి వందిజ్ సీని కనికారమ్దాన్ కిజిని యా పణిదుబా మీరు ముజాల మండ్రెజ్ వలె.

⁸ ఇక్క నాను మిజి ఉండ్రీ ఆడ్ర సిత్తి లెకెండ వెహి, గాని సీదెజ్ ఇజి మహివరిజ్ మన్ని అసదిజ్ పొల్సిని సుడెఱిజ, మీ మన్సుదు మని ప్రేమ ఎస్సా నిజమాతిక ఇజి నెస్టెజ్ ఇజి నాను వెప్తా. ⁹ మీరు మా ప్రబు అతి యేసుక్రీస్తు దయాదర్మమ్దిజ్ నెస్సిదెర్గదె? వాండ్రు గొప్ప అస్తి మన్నికాన్ గాని వాండ్రు మీ వందిజ్ బీదవాండ్రు ఆతాన్. ఎందనిజ్ ఇహిజ, మీరు అస్తి మన్నికిదెర్ అదెజ్ ఇజి వన్నిజ్ వాండ్రె బీదవాండ్రు కిబె ఆతాన్.

¹⁰ యా సజతిజ వందిజ్ మీరు యా లెకెండ కిత్తిజ బాగ మనాద్ ఇజి నాను ఒడిఱిజిన. నీరొండు, యా లెకెండ కిదెజ్ అస మనికిదెరె అవండ, సీదెజ్బా మీరు ముజాహికిదెర్. ¹¹ అందెజె, మీరు సీదెజ్ ఎలాగ అస అజినిదెరె, దనిజ్ తగితి లెకెండ, ఇహిజ మిజి కల్గితి మనిదనిజ్ తగితి లెకెండ సీజ యా పణి పూర్తి కిదు. ¹² ఒరెన్ వన్నిజ్ సీదెజ్ ఇజి మన్సు మహిజ, అట్టి దన్నిజ్ ఇంక మిస్తి అవిద్, గాని వన్నిజ్ మని దన్నిజ్ తగితి లెకెండ సిత్తిజ, అక్క దేవుణుదిజ్ ఇస్సమాతిక అజినాద్.

¹³ మహి వరిజ్ సులు అజిమంజి మిజి లావ్బరు మండ్రెజ్ ఇజి అవిద్ గాని విజెరిజ్ ఉండ్రె లెకెండ బరు మన్నిద్ ఇజినె మాపు కోరిజనాప్. ¹⁴ ఏలు మిజి లావ్మనిక వరిజ్ అవ్సరంక వందిజ్ సిత్తిజ, వరిజ్ లావ్మన్నివలె మీ అవ్సరం వందిజ్ మర్ది సీనారలె. అయాలెకెండనె విజెరిజ్ ఉండ్రె లెకెండ మంజినాద్. ¹⁵ "లావ్ పెప్తా వన్నిజ్ ఇనిక మిగిల్లివతాద్. తక్కు పెప్తా వన్నిజ్ సాల్వెండ అవతాద్".* ఇజి దేవుణు మాటదు రాస్తి మన్ని లెకెండనె. ¹⁶ మీ వందిజ్ మా మన్సుదు మన్ని అస లెకెండనె, దేవుణు తీతు మన్సుదుబా అస సిత్తి వందిజ్ నాను దేవుణుదిజ్ వందనమ్కు వెప్పిన. ¹⁷ తీతు మాపు వెప్తాక విహాన్. అక్కాదె అవిండ వన్నిజ్ వాండ్రె అజి గొప్ప సర్దదాన్ మీ డర్గు వాజినాన్. ¹⁸ సువార్త పణిదు విజు సజమ్కాజ్ వన్ని పణి వందిజ్ పేరు మనికాన్ అతి మరి ఒరెన్ తంబెరిబా వన్ని వెట పొక్కినాప్. ¹⁹ అక్కాదె అవిండ, ప్రబుజ్ పేరు వాదెజ్ ఇజిని మహి వరిజ్ సాయం కిదెజ్ మా మన్సుదు మన్ని అస తోరెస్టెజ్ ఇజినె మాపు కనికారమ్దాన్ కిజిని యా పణి కిజినాప్. యా సంత అసి మాపు సొనివలె, మా వెట వాదెజ్ ఇజి విజు సజమ్కు కూడెజి యా తంబెరిజ్నె ఎర్లిస్త మనార్. ²⁰ విజు సజమ్కు కూడెజి లోబం కివిండ సిత్తి యా సందదాన్ మాపు పణి కిత్తి వందిజ్ ఎయెర్బా మా మున్సు ఇని తవుబా వెహివండ గొప్ప జాగర్దదాన్ మనాప్. ²¹ అందెజె ప్రబు ఎర్దునె అవిండ లోకురి విజెరి ఎర్దుబా సరి అతికెజ్ కిదెజ్ జాగర్ద మనాప్.

²² అక్కాదె అవిండ, వరివెట మరి ఒరెన్ తంబెరిజ్బా పొక్కినాప్. నండొ పణిజాణిజ్ నండొ సుట్కు వన్నిజ్ పరిస కిజి వన్ని మన్సుది అస నెస్టె మనాప్. ఏలు మీ వందిజ్ వన్ని మన్సుదు మని గొప్ప దయరమ్దాన్ అస ఒద్దె పిరిజినాద్ ఇజి మరి నెసినాప్. ²³ తీతు ఇహిజ, నా వెట మహికాన్, మీ నడిఱిమి నా వెట జత కూడ్డి పణి కిత్తికాన్. వన్ని వెట వాజిని యా కూలెజ్ ఇహిజ, ఉండ్రీ ఉండ్రీ సజమ్కాణిజ్ వాతికార్. క్రీస్తుజ్ నెగ్గి పేరు తపెసినికార్. ²⁴ అందెజె విజు సజమ్క ఎర్దు తోర్ని లెకెండ, విరిజ్ మీ ప్రేమ, మరి మీ వందిజ్ మాపు పొగిడిజిని దని వందిజ్ రుజుప్ కిజి తోర్ను.

9

¹ నమ్మిత్తి వరి వందిజ్ కిజిని యా పణి వందిజ్ నాను మిజి రాస్టెజ్ అక్కర్ సిల్లెద్. ² సాయం కిదెజ్ మీ మన్సుదు మని అస నాను నెసిన. అందెజె అక్కాయదికార్ అతి మీరు దేవుణు వందిజ్ సీదెజ్ ఇజి నీరుండాన్ తయార్దాన్ మనిదెర్ ఇజి మీ వందిజ్ మాసిదొనియాది వరివెట పొగిడిజి వెప్పా మహాప్.

* **8:15** 8:15 నిర్దమకాండం 16:8 ఇస్రాయేలు లోకుర్ అయగొప్ప దేసమ్దాన్ కనాను దేసం సొన్ని మహివలె, వారు బిడిఱిబూమిదు 40 సంఠిజ్ మహివలె మన్సుని వరిజ్ ముకెలమతి తిండి అత మహాద్. బిడిఱిజ్ బూమిదు మహివలె వరిజ్ సరిఅతి తిండి సిల్లెద్ ఇజి వారు దేవుణు వెట సణిజ్తార్. దేవుణు అగసమ్దాన్ వరిజ్ మన్సు సిత్తాన్. రోజు పెండల మన్సు వారు మన్నిబాన్, ఇజిరి బెల్లమ్లెకెండ బూమిదు అర్ని మహాద్. రోజు రోజుదిజ్ సరి అతిక అయ రోజుదునె దేవుణు వరిజ్ సీజ మహాన్. వారు కనాను దేసం అందిజ బాణక తిండి తినిదాక దేవుణు వరిజ్ మన్సు సీజ మహాన్. (యెహోసువ 5:12)

మీ మన్నుడు మని ఆనదిజ్ నెస్తారె వరి లోఱ నండొండార్ సీదెజ్ ఇజి ఉసార్ ఆజినార్. ³ మాపు మీ వందిజ్ పొగ్డిఱజ వెప్తొకెజ్ అర్దం సిల్లికెజ్ ఆదెజ్ ఆవిద్ ఇజి ఏలు యా తంబెరిజ పొక్కిన. నాను వెప్తొ వజ సాయం సీజ పొక్తెజ్ తయార్ ఆజి మండ్రు. ⁴ ఉండ్రె వేలా మాసిదోనియాదికాన్ ఒరెన్ మా వెట వాతిజ, మీరు తయార్ అవిండ మనిక సుడఱిజ, మీ మున్ను మజి మని యా నమకం వందిజ్ అయావలె మజి సిగు వానాద్, మీరుబా సిగు ఆనిదెర్. ⁵ అందెజె, మీరు సీనావ్ ఇజి వెప్తొ మనిక లోబం కివిండ ముజాలె తయార్ కిజి మండ్రెజ్ ఇజి యా తంబెరిజ మూజాలేనె మీ డగ్రు సొండ్రు ఇజి వెప్తొ పొక్తెజ్ ఇజి నాను ఒడిఱిజ. అహిజ మీరు సీనా ఇజి వెప్తొ మనిక లోబమ్దాన్ సీని లెకెండ్ మన్విండ పూర్తి మన్నుదాన్ సీని సంత లెకెండ్ మంజినాద్.

దేవుణుదిజ్ లోబం కివిండ సరదదాన్ సీదెజ్ ఇజి వెప్తొనాన్.

⁶ తక్కు విత్తికాన్ తక్కునె పంట కొయ్యూన్. నండొ విత్తికాన్ నండొ పంట కొయ్యూన్. ఇజి గెపతం కిజి మండ్రు. ⁷ ఒరెన్ ఒరెన్, ఎస్సా సీన ఇజి వన్ని మన్నుడు నిరెణెం కిత్తిలెకెండ్ నె సీదెజ్. అక్కు సణజిఎండ, బలవంతమ్దాన్ ఆవిండ సీదెజ్ వలె. ఎందనిజ్ ఇహిజ సర్దదాన్ సీని వరిజ దేవుణు ప్రేమిసీనాన్. ⁸ ఎస్తివలెబా మిజి కావాలిస్తి దన్నిజ్ ఇంక లావ్ మండ్రెజ్ని, మరి విజు నెగ్గి పణిజ వందిజ్ లావ్ సీదెజ్ మిజి మండ్రెజ్, వన్ని దయాదర్మమ్దాన్ సీజిని దేవుణు ఇంక మరి ఒడ్డె మిజి సీదెజ్ అట్టికాన్. ⁹ దిన్ని వందిజ్ దేవుణు మాటదు యాలెకెండ్ రాస్త మనాద్. “వాండ్రు దోసదాన్ కెప్పొ విరివిత్తి ఇనాయమ్కు బీదాది వరిజ్ సీజినాన్. వన్ని నీతి నిజాయితి ఎలాకాలం మంజనిక”. ¹⁰ విత్తి వన్నిజ్ విత్తుని ఉండెజ్ తిండి సీని దేవుణు సీజినాన్. మిజి మా వాండ్రు విత్తెజ్ విత్తు సీజి, మీరు విత్తికెజ్ నెగెండ్ పిరిప్పి లావ్ కిజి, మీరు కిజిని నీతి నిజాయితి పణిజ్ లావ్ కిబిస్సాన్. ¹¹ విజు సజతిజ లోఱ మీరు లావ్ మన్నికిదెర్ కిబె ఆనిదెర్. అందెజె ఎస్తివలెబా మహి వరి వందిజ్ లావ్ సీదెజ్ మీరు అట్టిదెర్. మీరు మజి సీజిని దనిదటాజ్ మాపు మహివరిజ్ సీనివలె మా వెట దేవుణుదిజ్ వందనమ్కు వెహె ఆనాదలె. ¹² యా పణివెట నమ్మిత్తి వరి అవ్సరమ్కు తీరిసినికాదె అవిండ దేవుణు వందిజ్ వెప్తొని వందనమ్కు మరి ఒడ్డె లావ్ ఆజినె. ¹³ యా పణిజాణిజ్ మీరు తగ్గికిదెర్ ఇజి రుజువ్ కిజినిదెర్. అందెజె మీరు క్రీస్తు సువార్దదిజ్ ఒప్పుకొటి లోజిత్తి వందిజ్, మిజి కల్లితి మన్నికెజ్ వరిజ్ని మహి వరిజ్ విజెరిజ్ లోబం కివిండ సీదెజ్ తయార్ అతి వందిజ్ వారు విజెరె దేవుణుదిజ్ పొగ్డిఱనారె. ¹⁴ వరిజ్ సాయం కిదెజ్ దేవుణు మీ మున్ను తోరిస్తి విజు దనిజ్ మిస్తి వన్ని దయా దర్మం వందిజ్, మీ వందిజ్ పార్దనం కినివలె, మిజి సుడఱిజ్ మన్నుడు ఆసదాన్ మంజినార్. ¹⁵ వెప్తొజ్ అల్ఱెన నన్ని వరం సిత్తి దేవుణుదిజ్ వందనమ్కు!

10

¹ ఏలు పవులు ఇని నాను బతిమాల్లిన. మీ వెట మనివలె నిపాతి మనికాన్ లెకెండ్ గాని మీ బాణిజ్ దూరం మనివలె గటిజ మనికాన్ ఇజి మీరు ఒడఱిజిని నాను, క్రీస్తుజ్ మని సార్దదాన్ని సాంతిదాన్ మిజి బతిమాల్లిన. ² మాపు లోకమ్దిజ్ నెందితి వరి లెకెండ్ నడిఱిసినావ్ ఇజి మీ లోఱ నెగొండార్ మా వందిజ్ వెప్తొనిదెర్. ననివరి వెట నాను ఒడఱిజిని లెకెండ్ తెగిజ నండొ గటిజ వర్దిదెజ్ అట్టు. గాని నాను వానివలె గటిజ వర్దిఎండ మంజని లెకెండ్ మీరు మండ్రు ఇజి నాను మిజి బతిమాల్లిన. ³ యా లోకమ్దునె మపు బత్తిజినావ్ గాని లోకమ్ది వరి లెకెండ్ విదెం కినికావ్ ఆవివ్. ⁴ మాపు విదెం కిని ఆయుదమ్కు యా లోకమ్దిజ్ నెందితి ననికెజ్ ఆఱు. గాని సెఱ వన్కా పెరి ఎత్తుమని కోటెజ అర్పెజె దేవుణు బాణిజ్ వాతిమని సత్తుమని ఆయుదమ్కు అక్కెజ్. ⁵ మాపు, దేవుణు వందిజ్ నెన్ఎండ మండ్రెజ్ అడ్డు కినిలెకెండ్ మన్నుదాన్ రేజిజి వాజిని విజు వన్కాజ్ అడ్డిఱిజ అర్పి, విజు ఆలోసనమ్కాజ్ అని క్రీస్తుజ్ లోజిని లెకెండ్ కిజినావ్. ⁶ మీరు పూర్తి లోజిజి మంజినికిదెర్ ఆనిదాక, లోజివిండ మన్ని విజు వన్కా వందిజ్ మిజి సిక్కు సీదెజ్ తయార్ అత మనావ్.

⁷ మీరు వెల్లి మన్ని వనకాజ్ నె సుడఱిజినిదెర్. ఎయెన్బా వాండ్రు క్రీస్తుజ్ నెందితికాన్ ఇజి ఒడఱిజి మహిజ, వాండ్రు ఎలాగ క్రీస్తుజ్ నెందితికాన్ ఆజి మంజినాండ్రె, అయాలెకెండ్ నె మాపుబా క్రీస్తుజ్ నెందితికావ్ ఇజి వాండ్రు ఒడఱిజిదెజ్ వలె. ⁸ మీ బత్తు నాసనం కిదెజ్ ఇజి సిల్లెద్ గాని దన్నిజ్ నెగెండ్

పిరిపైజ్ ఇజి ప్రబు మజి అతికారం సిత్త మనాన్. అయ అతికారం వందిజ్ నండో పొగ్డిజి వెప్పిజ్ బా నాను సిగు ఆవ. ⁹ నాను మిజి రాసిని ఉత్తమదాన్ మిజి తియెల్నిని వన్ని లెకెండ్ మండ్రెజ్ ఆవద్ ఇజి కోరిజన. ¹⁰ “వన్ని ఉత్తమకు గొప్పు అర్లం మన్ని మాటెజ్ మన్నికెజ్, సత్తుదాన్ కూడితికెజ్ గాని వాండ్రు మా నడిమి మనివలె సత్తు సిల్లి వన్ని లెకెండ్ మనాన్. వర్గిజిని మాటెజ్ ఇని అర్లం సిల్లికెజ్ మన్నె”, ఇజి ఎయెలో వెప్పినార్గె. ¹¹ యాలెకెండ్ వెప్పినికార్ యాక సెన్జెజ్. ఇనిక ఇహిజ మాపు దూరం మనివలె రాసిని ఉత్తమదు మన్ని మాటెజ్ ఎలాగ మర్తికెజ్నో, అయాలెకెండ్నె మీ నడిమి మాపు మన్నివలె మాపు కిని పణిజ్ బా మంజినె.

¹² వరిజ్ వారి పొగ్డిజి ఆజిని సెగొండార్ లెకెండ్ మాపుబా మనాన్ ఇజినో, మాపు వరిజ్ సమానం అతికావ్ ఇజినో వెప్పాజ్. ఎందనిజ్ ఇహిజ, వారు మహి వరి వెట విజు సజతిజ లొఇ సమానం మనానా ఇజి పొలిసి సుడెజినార్. అయాక బుద్ది సిల్లి పణినె. ¹³ గాని మజి అక్కు మనిదనిజ్ ఇంక మాపు పగ్డిజి ఆవవ్. దేవుణు మా వందిజ్ కేట కిత్తి మన్ని పణిదిజ్ జవ డాట్ ఏండ్ దన్ని లొఇని పొగ్డిజినావ్. మాపు మీ నడిమి కిజిని పణిబా దన్ని లొఇ మనాద్. ¹⁴ మాపు క్రీస్తు వందిజ్ సువార్త సాటిసి మీ డగ్రు వాతివలె దేవుణు మజి ఒపజెప్పి మన్ని దనిజ్ జవ డాట్టి సానికావ్ ఆవతావ్. ఎందనిజ్ ఇహిజ మీరు దన్ని లొఇనె మన్నిదెర్. మాపె క్రీస్తు సువార్త ముజాల మీ నడిమి సాటిస్తావ్.

¹⁵ మహికార్ కస్త్రబాడెజి కిత్తి దన్ని లొఇ వంతు మనికావ్ ఇజి మాపు పొగ్డిజివ్. గాని దేవుణు మున్ను మన్ని మీ నమకం పిరిజి వానివలె మీ నడిమి మాపు కిజిని సువార్త పణి మరి ఒడ్డె పెరిక ఆజి సర్వాద్ ఇజి మాపు ఆస ఆజినావ్. ¹⁶ మీ అతాల మని నాహ్యుజ్ బా సువార్త సాటిస్తెజ్ ఇహిజ అట్టావ్. అయాలెకెండ్ కిజి ఒరెన్ వన్నిజ్ ఒపజెపె అతిమని ప్రాంతమదు కిబె అతి పణి వందిజ్ మజి మాపె పొగ్డిజి ఆవవ్. ¹⁷ గాని దేవుణు మాటదు రాస్తి మన్ని లెకెండ్, “పొగ్డిజి ఆజినికాన్ ప్రబు కిత్తి వనకాజ్ వందిజ్నె పొగ్డిజి ఆదెజ్ వలె”. ¹⁸ పన్నిజ్ వాండ్రె పొగ్డిజి ఆనికాన్ తగ్గికాన్ ఆవెన్, తగ్గికాన్ ఇజి దేవుణు వెప్పికాండ్రె తగ్గికాన్ ఆజినాన్.

11

¹ నా బుద్ది సిల్లి పణిజ్ మీరు కండెక్ ఒరిసినిదెర్ ఇజి నాను ఆస ఆజిన, నిజమె ఏలుబా మీరు ఒరిసినిదెర్. ² మీ వందిజ్ దేవుణు మన్నుదు మన్ని ఆస వజనె నానుబా మీ వందిజ్ అయాలెకెండ్నె సత్తు మన్ని ఆసదాన్ మంజిన. ఎందనిజ్ ఇహిజ, ఒరెన్ దజడెజ్ వందిజ్ నాను మిజి ప్రదానం కిత్త మన్ను. అహిజ, క్రీస్తు వందిజ్ నాను మిజి ఇని కల్లిసిల్లి ఉండ్రె విడిబోదెలి లెకెండ్ వన్నిజ్ ఒపజెప్ప మన్ను. ³ గాని సరాన్ వన్ని సెజ ఆలోసనమదాన్ అవ్వెజ్ మోసెం కిత్తి లెకెండ్, మీ మన్నుబా తపు బోదెజాణిజ్ మోసెం కిబె ఆజి, మీరు క్రీస్తు మున్ను మిజి మన్ని ఇని కల్లిసిల్లి ప్రేమ డిసి సిజి, వన్ని బాణిజ్ దూరం ఆనిదెర్, ఇజి నాను తియెల్ ఆజిన. ⁴ ఎందనిజ్ ఇహిజ, ఎయెన్ బా మీ డగ్రు వాజి మాపు సాటిస్తి యేసుజ్ ఆవండ మరి ఒరెన్ యేసుజ్ సాటస్తిజ, మరి మా వెట మీరు పొందితి మని దేవుణు అత్తు ఆవండ మరి ఉండ్రె అత్తు పొందితిజ, అక్కాదె ఆవండ మాపు వెప్పి సువార్త ఆవండ మరి ఉండ్రె సువార్త డగ్రు కిత్తిజ, సులుగ మీరు వన్యాజ్ లొజిజి వరిజ్ ఒరిసినిదెర్. ⁵ అయ గొప్పు మీరు పొందితికార్ అతి అపొస్తురు ఇంక నాను ఒద్దె తక్కుదికాన్ ఆవ ఇజి నాను ఒడెబిజిన. ⁶ నాను నెగెణ్ వర్గిదెజ్ నెన్ ఇకాన్ అతిజ్ బా, గాని నాను గెణం సిల్లిక ఆవ. మిజి విజెరిజ్ విజు పణిజాణిజ్, విజు మాటెజాణిజ్ మాపు అయ గెణం వందిజ్ రుజువ్ కిజి తోర్స్త మనావ్.

⁷ మీ బాణిజ్ ఇనికబా లొన్ ఏండ్ దేవుణు సువార్త మీ నడిమి సాటిసి, మీరు పెరికిదెర్ ఆదెజ్ ఇజి నజి నానె తగ అతివలె నాను పాపం కిత్తానా? ⁸ మీ నడిమి దేవుణు పణికిదెజ్ మహి సజమకాణిజ్ వరి డబ్బుజ్ డొజ కిత్తి లెకెండ్ వరి బాణిజ్ కూల్లి లొసె ఆత. ⁹ నాను మీ నడిమి మహివలె, ఇనికబా అవ్ నరం అతిజ్ బా, నాను ఎయెరిజ్ బా ఇనికబా లొన్ ఏత. మాసిదోనియదాన్ వాతి తంబెరిజ్ నా అవ్ నరమకాజ్ వందిజ్ సిత్తార్. మీ బాణిజ్ ఇనికబా లొన్ ఏండ్, నాను మిజి ఉండ్రె బరు లెకెండ్ మన్ ఏండ్ జాగర్తదాన్ మహి లెకెండ్నె వాని కాలమదుబా మంజిన. ¹⁰ క్రీస్తుజ్ మని నిజం నా లొఇ మన్నిజ్ అక్కాయ ప్రాంతమదు మనికార్ ఎయెర్ బా నాను యా లెకెండ్ పొగ్డిజి వెప్పిని దనిజ్ అడ్డు కిదెజ్ అట్ ఏర్. ¹¹ ఎందనిజ్ నాను అయాలెకెండ్ మహ ఇహిజ, మిజి ప్రేమిన్ ఇ వందిజ్ ఆవద్. నాను

మిజీ ఎన్నా ప్రేమిసిన ఇజి దేవుణు నెసినాన్. 12 గాని ఏలు కిజిని లెకెండె నాను దేవుణు పణి కిజి మంజిన, అందెజి మాపు కిజిని లెకెండెన వారుబా దేవుణు పణి కిజినార్ ఇజి వెహ్లాజ్ ఇజి ఆస ఆజిని వరిజ్ మా వెట పొగ్గడె: ఆదెజ్ అక్కు సిల్లెండ మన్వద్ ఇజి.

13 వారు నన్నికార్, క్రీస్తుజ్ అపొస్తురు లెకెండె వేసం పొకె ఆజి తోరె ఆతిమని మోసెం పణిజ్ కిజిని మిజీ మోసెం కిత్తి డొజ అపొస్తురు. 14 దన్ని వందిజ్ బమ్మ ఆదెజ్ అక్కుర్ సిల్లెద్. నయ్నానుబా జాయ్ మని దూత లెకెండె వేసం పొకె ఆనాన్. 15 అందెజి నయ్నాను వందిజ్ పణి కినికార్, వారు వరిజ్ వారె నీతి నిజాయితి పణిజ్ కినివరి లెకెండె వేసం పొకె ఆతిజ అక్కు పెరిక ఆవద్. వారు కిజిని పణిజ తగితి లెకెండెన ఆకార్దిజ్ వరిజ్ జర్గినాద్లె.

పవులు వన్నిజ్ వాతి కస్టమ్కాజ్ వందిజ్ పొగ్గడె:జినాన్.

16 నాను బుద్ది సిల్లికాన్ ఇజి ఎయెన్బా ఒడె:బిదెజ్ అవద్ ఇజి నాను మరి మిజి వెహ్లాన్. నాను బుద్ది సిల్లికాన్ ఇజి మీరు ఒడె:బిత్తిజ ఆహె ఒడె:బిదు. అందెజి నానుబా కండెక్ పొగ్గడె: ఆదెజ్ అట్టు. 17 యాలెకెండె నా మన్నుదు దయెరం ఆజి పొగ్గడె:జినివలె, అక్కు ప్రబు మాటెజ్ వర్గితి లెకెండె ఆవి, ఉండ్రీ బుద్ది సిల్లివన్ని లెకెండె వర్గిజన. 18 నండొండొర్ యా లోకమ్దిజ్ సెందితి వరి లెకెండె పొజిజినార్, అందెజి నానుబా అయా లెకెండెనె పొజిజిన. 19 మీరు గొప్ప బుద్ది మన్నికిదెర్గి. మీరు బుద్ది సిల్లివరిజ్ సర్లదాన్ డర్లు కిజినిదెర్. 20 ఒరెన్ మిజి వెట్టిపణి కిని వన్ని లెకెండె కిత్తిజబా, ఒరెన్ మోసం కిజి మిజి మన్నికెజ్ విజా లోసె ఆతిజబా, ఒరెన్ మిజి మోసెం కిజి వన్నిజ్ లాబం తప్పిన్దిజబా, మీ మొకొమ్దు డెయ్లిజ్బా మీరు వన్నిజ్ ఒరిసినిదెర్. 21 అయా లెకెండె వారు కిత్తి లెకెండె కిదెజ్ మాపు సత్తు మనికాప్ ఆవిప్ ఇజి నాను సిగు ఆజి వెహ్లాన్. గాని ఎయెన్బా ఇనిదన్ని వందిజ్బా పొగ్గడె: ఆదెజ్ అక్కు మనాద్ ఇహిజ, నజిబా అయాలెకెండె పొగ్గడె: ఆదెజ్ అక్కు మనాద్. నాను ఒరెన్ బుద్ది సిల్లి వన్ని లెకెండెనె వర్గిజన. 22 వారు ఎల్లివారునా? నానుబా ఎల్లి వాండ్రునె. వారు ఇస్రాయేలుదికారా? నానుబా ఇస్రాయేలుదికానె. వారు అబ్రాహము కుటుమ్దికారా? నానుబా నన్నికాండె. 23 వారు క్రీస్తు వందిజ్ పణి కినికారా? నాను వెరి వన్ని లెకెండె వర్గిజన. నాను క్రీస్తు వందిజ్ మరి ఒద్దె పణి కిత్త మన్ను. నాను నండొ కస్టబాడె:జి పణి కిత్తమన్ను. నండొ సుట్టు జెలిదు మహ. కొండె:జాణిజ్ నండొ సుట్టు గొప్ప డెయె ఆత. నండొ సుట్టు సావుదిజ్ డర్లు ఆత. 24 యూదురు లోకుర్ బాణిజ్ అయెదు సుట్టు, ఉండ్రీ తక్కు నలవయె దెబ్బెజ్ తిహ. 25 మూండ్రీ సుట్టు డుడ్డుదాన్ డెయె ఆత. ఉండ్రీ సుటు వణకాణిజ్ డెయె ఆత. మూండ్రీ సుట్టు సందరమ్దు పయెనం కిజి మహిజ్ ఒడె:జ్ పెడె:హిజ్ బాద ఆత. ఉండ్రీ రెయు పొగొల్ సందరమ్దు ఏరుదు మహ 26 ఎస్తివలెబా నాను పయెనం కిజి మహిజ్ నండొ సుట్టు పయెనమ్దు వెరి గడ్డె:జాణిజ్ ప్రమాదమ్కు వాతె. డొజారిజు వెట ప్రమాదమ్కు వాతె. మా సొంత జాతిదికారాతి యూదురి వెట ప్రమాదమ్కు వాతె. పట్టుమ్దు ప్రమాదమ్కు వాతె. అడి:విదు ప్రమాదమ్కు వాతె. సందరమ్దు ప్రమాదమ్కు వాతె. డొజ తంబెరిజ వెట ప్రమాదమ్కు వాతె. 27 నాను నండొ కస్టమ్దాన్ స్రమజాణిజ్ పణిజ్ కిజి, రెయ్యు నిర్తి సిల్లెండ మహ. ఏక, ఏక తిండి సిల్లెండ బజ ఎహ్లాదాన్ మహ. ఒడె:ల్దు సొక్కెజ్ సిల్లెండ పిన్నిదు నిగనాణె మహ. 28 యాకెజె ఆవిండె విజా దేవుణు సజమ్కాజ్ వందిజ్ ఎలాగ ఆనెనో ఇజి రోజా మన్నుదు ఒడె:బిజ మహ. 29 సత్తు సిల్లికాన్ ఎయెన్ మనాన్? నానుబా సత్తు సిల్లికాన్ ఆవినా? ఎయెన్ పావమ్దు తోరొడె ఆజినానా? నజి మన్నుదుబా కోపం రెజె ఆవిదా?

30 నాను పొగ్గడె: ఆదెజ్వలె ఇహిజ నజి మన్ని సత్తు సిల్లి వన్నా వందిజ్నె నాను పొగ్గడె:నాలె. 31 నాను వర్గిజినిక అబద్దం ఆవిద్ ఇనిదన్నిజ్ ఎస్తివలెబా పొగ్గడె: ఆజిని మా ప్రబువాతి యేసుజ్ బుబ్బాతి దేవుణునె నెసినాన్. 32 దమన్ను పట్టుమ్దు నాను మహివలె, రాజా ఆతి అరెత అడి:గి మన్నికానాతి అదికారి నజి అస్టెజ ఇజి దమన్ను పట్టుం విజా కాపు ఇడ్డాన్. 33 నస్తివలె పట్టుమ్ది కోట గొడా:దు మన్ని కిటికి బొరొదాన్, గంపదు డి:పె ఆతానె వన్ని కియుదాన్ తప్తె ఆత.

12

1 పొగ్గడె:జి వర్గిదెజ్ ఇహిజ మరి నండొ మన్నె. వహ్లాదన్నిజ్ ఇని లాబం సిల్లిజ్బా దేవుణు బాణిజ్

తోరె ఆతి కలెజ వందిజ్, డాజీతి మన్నికెజ్ దేవుణు తోరిస్తి వందిజ్ నాను వెప్పు. ² క్రీస్తుజ్ సందితికాన్ ఒరెన్ వన్నిజ్ నాను నెసిన. పదనాల్లి పంటిజ్ ముజాల వాండ్రు మూండ్రి ఆగాసం దాక పెరె అతాన్. ఒడోల్దాన్ పెరె అతాండ్రి, ఒడోల్ సీల్లెండ పెరె అతాండ్రి ఇజి నాను నెన్వ. అక్క దేవుణునె నెసినాన్. ³ పరదీసు ఇని దేవుణు మంజిని బాడిడాక పెరె ఆతి ఒరెన్ వన్నిజ్ నాను నెసిన. వాండ్రు ఒడోల్దాన్ పెరె అతాండ్రి, ఒడోల్ సీల్లెండ పెరె అతాండ్రి ఇజి నాను నెన్వ. అయ్యాక దేవుణు నెస్సాన్. ⁴ అబ్బె వర్గిదెజ్ అట్టిగ నన్ని సజతిజ్ వెహాన్. లోకు ఎయెన్బా వన్ని వెయెదాన్ అయ మాటిజ్ వర్గిదెజ్ అక్కు సిల్లెద్. ⁵ నని ఒరెన్ వన్నిజ్ పొగడిజి నాను వర్గిన గాని నజీ నానె పొగడి: ఆవి. నాను పొగడి: ఆదెజ్ ఇహిజ నజీ మన్నిసత్తు సిల్లి వన్కా వందిజ్నె పొగడి: ఆన. ⁶ నాను పొగడి:దెజ్ ఇజి ఒడోబిత్తిజ, నిజం మనికెజ్నె వెప్పు. అందెజి నాను బుద్ది సిల్లికాన్ ఆవి. ఎందనిజ్ ఇహిజ నాను కిత్తికెజ్ నుడోజిని, నాను వర్గినికెజ్ వెంజినో, నాను మన్ని దనిజ్ ఇంక ఒద్దె పెరికాన్ ఇజి నా వందిజ్ ఎయెన్బా ఒడోబివండ మండ్రెజ్ ఇజి నాను పొగడి:వి.

⁷ దేవుణుది డాజీతి మన్ని గొప్పు పెరి సజతిజ్ నజీ తోరె ఆతి వందిజ్, నజీ నానె పెరిక ఇజి ఉబె ఆవిండ మండ్రెజ్ ఇజి నజీ బాద్ కిదెజ్ ఇజి నా ఒడోల్దు ఉండ్రి సాంపు ఇడ్డె: ఆతి లెకెండ్ ఒరెన్ సయ్యూను దూత నా డర్గు పోకె ఆత మనాన్. ⁸ అయ్యాక నా ఒడోల్దాన్ లగిజి విసిరీఅ ఇజి నాను ప్రబు వెట మూండ్రి నుట్టు. బతిమాలిత. ⁹ గాని వాండ్రు నజీ, “నా దయా దర్మం నిజీ ఆనాద్, సత్తు సిల్లిబాన్ నా సత్తు పూర్తి సత్తు మనిక ఆజినాద్”, ఇజి వెహాన్. అయ్యావలె నజీ సత్తు సిల్లి వన్కా వందిజ్ మరి ఒద్దె సర్దదాన్ పొగడి:నాలె అందెజి క్రీస్తు సత్తు నా మున్కు నిల్లి మంజినాద్. ¹⁰ ఎస్తివలె నాను సత్తు సిల్లికాన్, నస్తివలె నాను సత్తుదికాన్ ఆజినాన్. అందెజి క్రీస్తు వందిజ్ నజీ మన్ని సత్తుసిల్లి వనక వందిజ్, నిందెజ వందిజ్, కస్టమ్కు వాతి వందిజ్, హిమ్సెజ వందిజ్, స్రమెజ వందిజ్ నాను సర్ద ఆజిన.

¹¹ నాను బుద్దిసిల్లి వన్నిలెకెండ్ మన, అయ్యా లెకెండ్ మండ్రెజ్ ఇజి మీరి నజీ బలవంతం కిత్తిదెర్. నాను తగ్గికాన్ ఇజి మీ బాణిజ్ వెహె ఆదెజ్ నజీ అక్కు మనాద్. ఎందనిజ్ ఇహిజ, నాను ఎపటిదికాన్ ఆఇజ్బా, మీ గొప్పు పేరు పొందితి అపొస్తురు ఇంక తక్కుదికాన్ ఆవి. ¹² నాను ఎస్సానో ఓర్పుదాన్ మీ నడి:మి తోరిస్తి మన్ని బమ్మాతి వణిజ్, ఎసెజ్బా తోఇ వణిజ్, బమ్మాని గొప్పు వణిజ్ నాను అపొస్తుడు ఇని దన్నిజ్ రుజువ్ కిజెనె. ¹³ ఇనిదన్ని వందిజ్బా నాను మీ మున్కు ఆదారం ఆవిత. ఇక్కడె ఆవిండ మరి ఇని సజతిదుబా మీరు మహి సజమ్క ఎద్దు తక్కుదికిదెర్ ఆఇతిదెర్. నాను కిత్తి యా తప్ప మీరు నెమిస్తు.

¹⁴ ఏలు మూండ్రి నుట్టు మీ డర్గు వాదెజ్ ఇజి తయారాజిన. నాను వాతివలె ఇనిదన్ని వందిజ్బా నాను మీ మున్కు ఆదారం ఆవి. ఎందనిజ్ ఇహిజ మిజి కల్లితి మన్నికెజ్ ఇనికబా నజీ అవసరం సిల్లెద్, గాని మీరి నజీ కావాలి. కొడోరె అయ్సి అప్పొసిరీ వందిజ్ ఆవిద్, గాని అయ్సి అప్పొసిరీనె కొడోరె వందిజ్ ఆస్తి గణస్తెజ్గదె. ¹⁵ అందెజి నాను నజీ కల్లితి మన్నికెజ్ విజు మీ వందిజ్ కర్పు కిన. మరి నజీ నానె మీ వందిజ్ కర్పు కిబె ఆన. నాను మిజి లాపు ప్రేమిస్తిజ మీరు నజీ తక్కు ప్రేమిసినిదెరా? ¹⁶ నాను ఇనిదన్ని వందిజ్బా మీ మున్కు ఆదారం ఆవి, అక్క నిజమె. గాని ఇనికాదొ ఉండ్రి ఉపాయ్కిజి మిజి మొసెం కిజి లొసె ఆనాన్లె ఇజి ఎయెర్బా వెహూర్లె. ¹⁷ నాను మీ డర్గు పోక్తి ఎయెర్ వెటబా మిజి మొసెం కిజి ఇనికబా లొసె ఆత మనానా? ¹⁸ మీ డర్గు సాండ్రెజ్ ఇజి తీతుజ్ నాను బతిమాలిత. వన్నివెట మా తంబెరి ఒరెన్ వన్నిజ్బా పోక్. తీతు మిజి మొసెం కిజి ఇనికబా లొసె అతాండ్రి? మాపు ఉండ్రె మన్పుదాన్, ఉండ్రె లెకెండ్నె నడి:వితాపా?

¹⁹ మాపు నెగ్గికాప్ ఇజి మీ ఎద్దు తోరిస్టెజ్ ఇక్కెజ్ విజు మీవెట వర్గిజనాప్ ఇజి మీరు ఒడోబిజనిదెరా? క్రీస్తుజ్ సందితికిదెర్ ఇజి దేవుణు ఎద్దునె మాపు వర్గిజనాప్. మా తంబెరిజాండె, మీరు మీ మన్పురు నెగెండ్ దేవుణు సత్తుదాన్ మండ్రెజ్ ఇజినె యాకెజ్ విజు మాపు కిత్తాప్. ²⁰ నాను వానివలె మీరు నజీ ఇస్టమాతికిదెర్ లెకెండ్ మన్ఇదెర్ను, మరి మిజి ఇస్టమాతి లెకెండ్ నానుబా మన్వెసు ఇజి నాను తియెలాజిన. మరి మీ నడి:మి జటిజ్, గోస ఆనికెజ్, కోపం ఆజి మంజినిక, గుంపుజ్ గుంపుజ్ ఆనికెజ్, దుసలూడి:నికెజ్, గుసగుస వర్గినిక, పొజిజి ఉబె ఆనిక, గగోలి ఆనిక విజు మంజినెసు ఇజి నాను ఒడోబిజిన. ²¹ మరి నాను మీ డర్గు వానివలె మీ ఎద్దు దేవుణు నా బుర్

డిస్సిని లెకెండ్ కిన్నానెన ఇజ నాను తియెలాజిన. మరి ముజాల వరిజ్ అలవాటు మహిలెకెండ్ సెజ పణిజ్ కిజ, కేలార్ బూలాజి, రంకు బూలాజి విజెరె ముందాల సిగు ఆజి మంజిని వందిజ్ మరి వారు దుకమాజి పాపమకు ఒప్పుకొడెజి డిసిసివిండ మన్ని వందిజ్ నాను దుకం ఆనాలె ఇజి తియెలాజిన.

13

1 ఏలు నాను మీ డగ్రు వానివలె ఇక కూడుఁప్పి మూండ్రీ నుట్టు. ఆనె. దేవుణు మాటదు రాస్తిమని లెకెండ్, “రిఎర్, ముఎర్ సాసిరి మాటెజ వెట విజు సజతిజ్ నిజమాతికెజ్ ఇజ రుజుప్ కిదెజ్ వలె”. 2 రుండి నుట్టు. నాను వాతిజ్ మీవెట మహివలె నాను మిజి బుద్ది వెస్తి లెకెండ్ నె వెప్తా మన. ఏలు మీబాణిజ్ దూరం మంజిబ వెస్సిన్. నాను మర్జి వానివలె ముందాహాన్ తపు కిత్తి వరిజ్ బా నాను డిసిన్, వెనుక తపు కిత్తి విజెరిజ్ ఎయెరిజ్ బా డిసిన్. 3 ఎందనిజ్ ఇహిజ క్రిస్తు నావెట వర్గజనాన్ ఇని దనిజ్ రుజుప్ కిఅ ఇజి మీరు వెస్సినిదెర్ గదె? వాండ్రు మీ వెట సత్తు సిల్లికాన్ ఆవెన్, గాని మీ నడిమి గొప్ప సత్తుమన్నికాన్. 4 క్రిస్తు యా బూమి మున్సు. మహివలె సత్తు సిల్లివన్ని లెకెండ్ సిలువ పొకె ఆతాన్, యాక నిజమ్నె. గాని దేవుణు సత్తుదాన్ ఏలు బత్తిజనాన్. అయాలెకెండ్ నె వన్నివెట కూడెజి మాపుబా సత్తు సిల్లికాప్ గాని దేవుణు సత్తుదాన్ మీ వందిజ్ దేవుణు పణి కిదెజ్ క్రిస్తు వెట కూడెజి బత్తిజనాప్.

5 మీరు దేవుణు మున్సు. నమకం మనికిదెరో ఇజి మిజి మీరె పరిస కిబె ఆదు. యేసుక్రిస్తు మీ లోఇ మనాన్ ఇజి మీరు నెన్ ఇదెరా? యేసుక్రిస్తు మీ లోఇ మనాన్ ఇజి నెన్ ఇదెర్ ఇహిజ, నిజమె మీరు అర్తిమనికిదెర్. 6 మాపు అయా లెకెండ్ అర్తికాప్ ఆవిప్ ఇజి మీరు నిజం నెస్సిదెర్ ఇజి నా మన్సుదు నజి నమకం మనాద్. 7 మీరు ఇని సెజ పణిజ్ కిఎండ మండ్రెజ్ వలె ఇజి దేవుణుదిజ్ పార్దనం కిజనాప్. మాపు పరిసెజ నిల్లి మంజినికాప్ ఇజి లోకుర్ ఎద్దు తొరె ఆదెజ్ ఇజి సిల్లెద్. గాని మాపు వీజితికాప్ ఇజి తోరె ఆతిజ్ బా మీరు నిజమాతికెజ్ కిజ మండ్రెజ్ ఇజి కోరిజనాప్. 8 నిజమాతికెజ్ నె ఆవెండ, నిజమాతి దనిజ్ పడిఎండ ఇనికబా కిదెజ్ మాపు అట్ ఎవ్. 9 మాపు సత్తు సిల్లికాప్ మనివలె, మీరు సత్తు మనికదెర్ ఇజి మాపు సర్దదాన్ మనాప్. అక్కాదె ఆవెండ మీరు దేవుణు ఎద్దు ఇనికబా తకు సిల్లెండ విజు నెగెణ్ మనికిదెర్ ఆదెజ్ ఇజి మాపు పార్దనం కిజనాప్. 10 మిజి దేవుణు మున్సు. మని నమకమ్దు పిరిప్తెజ్ నె ప్రబు నజి అతికారం సితాన్ గాని మిజి అర్పెజ్ ఇజి సిల్లెద్. అందెజి నాను మీ డగ్రు వానివలె ప్రబు నజి సితమని అతికారమ్దాన్ కోపమ్దాన్ గటిజ ఇనికబా కిఎండ మండ్రెజ్ ఇజి నె మీ బాణిజ్ దూరం మంజి యా ఉత్తం రాసిన.

11 కడెవెరిదు, తంబెరిజాండె, మీరు సర్దదాన్ మండ్రు. మీరు మరి ఒద్దె నెగెణ్ మనికిదెర్ ఆదెజ్ ఇజి దేవుణుదిజ్ సర్ద కిదెజ్ మిజి ఆట్టి లెకెండ్ విజు సజతిజ్ కిదు. ఓదర్దుదాన్ మండ్రు. మా మాటెజ్ మీ మన్సుదు నాటిసి మండ్రు. విజిదెర్ ఉండ్రె మన్సుదాన్ మండ్రు. సమాదానమ్దాన్ బత్తిదు. ప్రేమని సమాదనం మనికానాతి దేవుణు మీవెట మంజినాన్.

12 నెగ్గి మన్సుదాన్ ఒరెన్ మరి ఒరెన్ వన్నిజ్ పొంపిజి మాడిసి మండ్రు. 13 ఇబ్బెణికార్ నమ్మిత్తికార్ విజెరె మీరు బాగ మనిదెరా ఇజి వెన్ బాజినార్.

14 ప్రబువాతి యేసుక్రిస్తు దయా దర్మం, దేవుణు ప్రేమ, దేవుణు ఆత్మ మీవెట కూడెజి మంజినిక, మీ విజిదెర్ వెట మనీద్.

అపొస్తుడు ఆతి పవులు గలాతీయ ముటాదు మని దేవుణు సజమ్కాళ్ రాస్తి ఉత్తం

నెల్వ కిబిసినిక

అపొస్తుడు ఆతి పవులు గలాతీయ ముటాదు మని దేవుణు సజమ్కాళ్ రాసిని ఉత్తరమ్నె యాక. గలాతీయ ముటాదు పవులునె సువార్త వెహ్లాన్. వీరు నెగ్రెండనె క్రీస్తుజ్ నమ్మిజి వాజి మహార్. నస్తివలె నెగొండార్ నమ్మితి యూదురు, క్రీస్తు మున్సు, మని నమకమ్నె ఆవిండ, యూదురి రూలుజ్ లోజిజి, సునతిబా కిబె ఆదెజ్ వలె ఇజి తపు బోద వరిజ్ వెహ్లాన్. యా మాట వెహరె, విరి మన్సు అయా బోద దరోట్ మహ్లాన్. దినిజ్ దిదిజి పవులు రాసిని ఉత్తమనె యాక. ఒరెన్ సునతి కిబె ఆతిజి, దేవుణు ఎద్దు నీతి నిజాయితి మనికాన్ ఆవిన్. గాని యేసుప్రబు మున్సు నమకం ఇల్లిజనె దేవుణు ఎద్దు నీతి నిజాయితి మనికాన్ ఆనాన్ ఇజి వెహ్లానాన్. మరి, మాటు క్రీస్తుజ్ నమ్మితివలె డిజె ఆతి మని వరి లెకెండె మనాట్, అక్కు మని వరి లెకెండె మనాట్. రూలుజి అడిగి మన్ఎట్ ఇజి వెహ్లానాన్. మరి, ఒడోలది సెఇ ఆసెజ్ కిబిస్సి పణిజ్ ఇని ఇనికెజ్, దేవుణు ఆత్మ నడిః పిసిని వజి నడిఃనికాన్ ఎలాగ మంజినాన్ ఇజి బా వెహ్లానాన్.

1-2 అపొస్తుడు ఆతి పవులు ఇని నాను, గలాతీయ ముటాదు మని దేవుణు సజమ్కాళ్ రాసిని ఉత్తం. నెగొండార్ నజి అపొస్తుడు ఇజి ఏర్పాటు కిత్తిజ్ నాను అపొస్తుడు ఆవిత. ఒరెన్ లోకు నజి అపొస్తుడు ఇజి పోక్తిజ్ నాను అపొస్తుడు ఆవిత. గాని యేసు క్రీస్తుని బుబ్బాతి దేవుణు నజి అపొస్తుడు ఇజి ఏర్పాటు కిత్తి పోక్తిజ్ నాను అపొస్తుడు ఆవిత. వాండె యేసుక్రీస్తుజ్ సావుదాన్ మర్జి బత్తిస్తాన్. నానుని నా వెట ఇబ్బె మని దేవుణుదిజ్ నమ్మితి తంబెరిజు, అబ్బె మని సజమ్కాణి విజెరిజ్ వెన్బాతి లెకెండె వెహ్లానార్. ³ మా బుబ్బె ఆతి దేవుణుని ప్రబు ఆతి యేసుక్రీస్తు దయ దర్మమదాన్, మీరు నిసాతిదాన్ మండ్రెజ్ సాయం కిపిర్.

⁴ మాటు కిత్తి తపు పణిజ్ మజి తప్పిస్తెజ్, యా లోకమ్దు మని సెఇ బాణిజ్ డిస్పిస్తెజ్ క్రీస్తు మా పాపమ్క వందిజ్ వన్నిజ్ వాండె ఒవజెపె ఆతండ్రె సాతాన్. మా బుబ్బె ఆతి దేవుణు ఎత్తు కిత్తి వజనె వాండ్రు యా లెకెండె మా వందిజ్ సాతాన్.

⁵ దేవుణుదిజ్ అంతు సిల్లెండె ఎలాకాలం గవరం మనీద్. ఆమెన్.

సువార్త ఉండ్రె. మరి ఉండ్రె సిల్లెద్.

⁶ నిజమాతి సువార్త నమ్మితి వెనుక నిసా బేగి మీరు దేవుణుదిజ్ డిసి సీజినిదెర్ ఇజి నాను నండో బమ్మె ఆజిన. క్రీస్తు దయ దర్మమదాన్ మిజి సీజిని కొత్త బత్తుదిజ్నె, దేవుణు మిజి కూక్లాన్. వన్నిజ్ డిస్పిదెరె, సువార్త ఇజి పేరు వెహ ఆజిని తపు బోదదు మన్సు ఇడోజినిదెర్ ఇజి నాను నండో బమ్మె ఆజిన. ⁷ నాను నిజం వెహ్లాన, అయాక క్రీస్తు వందిజ్ తోరిసి నెస్పిసిని సువార్త ఆవిద్. గాని నెగొండార్ మిజి వంర కిబిసి, అయా సువార్త మారిస్తెజ్ సుడోజినార్. ⁸ గాని అపొస్తురు ఆతి మాపునో, పరలోకమ్దాన్ వాతి దేవుణు దూతనో మరి ఎయెన్ ఆతిజ్బ, మాపు ముజాలె మిజి వెహ్లా సువార్త ఆవిండ, దినిజ్ వెత్తెకం ఆతి సువార్త మిజి వెహ్లాజ, దేవుణు సాయిపు వన్ని మున్సు. ఎలాకాలం మనీద్.

⁹ మాపు ముజాలె మిజి వెహ్లా లెకెండె, ఏలు నాను మరి ఉండ్రె సుటుబా వెహ్లా న. మా బాణిజ్ మీరు వెంజి, నమ్మితి సువార్త ఆవిండ, దినిజ్ వెత్తెకం ఆతి సువార్త మిజి ఎయెన్బా వెహ్లాజ, దేవుణు సాయిపు వన్ని మున్సు మనీద్.

¹⁰ నాను యా లెకెండె వెహ్లా లోకుర్ బాణిజ్ మెపు కోరిజినానా? దేవుణు బాణిజ్ మెపు కోరిజినానా? లోకురిజ్ సర్ద కిదెజ్ సుడోజినానా? లోకురిజ్ సర్ద కిబిస్తెజ్ నాను సుడోజిని మహిజ, నాను క్రీస్తుజ్ సేవ కినికాన్ ఆవిండ మన.

దేవుణునె పవులుజ్ అపొస్తుడు ఇజి కూక్లాన్.

11 తంబెరిజాండె, నాను మిజీ వెహ్ని సువార్త లోకు బాణీజ్ వాతిక అఎద్ ఇజి నాను మిజీ వెహ్నిన. 12 అయూక లోకు బాణీజ్ నజీ దొహ్కక్తి అఎద్. ఎయెన్బా నజీ నెన్పిస్తిక అఎద్. గాని యేసు క్రీస్తునె యా సువార్త నజీ తోరిసి నెన్పిస్తాన్. 13 బరెన్ యూద వాండ్రు కిజిని లెకెండె యూదురి మతమ్మది రూలుజ్ విజు లోజీజి పటుదలదాన్ అయూకెజ్ కిజీ నాను ఎలగా బత్రిజి మహ ఇజి మీరు వెహ్ని మనిదెర్. అయూలెకెండె దేవుణు సజమ్కాజ్ కనికారం సిల్లెండె నాను ఎనానో హిమ్మెజ్ కిజి, వరిజ్ నాసనం కిదెజ్ సుడూజ్ ఇజి మీరు వెహ్ని మనిదెర్. 14 నా జతడు మని మహి యూదురిజ్ ఇంక యూద మతమ్మది రూలుజ్ విజు నాను తవ్వెండె కిత. నా అనిసిర్ నెన్పిస్తి ఆసారమ్మకు పటుదలదాన్ కిదెజ్ నండో సుడూత. 15-16 గాని నాను నా యాయ పొటాదు పిండెం ఆతి మహివలె, దేవుణు నజీ వన్ని వందిజ్ ఎల్లిస్తాన్. వన్ని దయ దర్మమ్దాన్ వన్నిజ్ సేవ కిదెజ్ నజీ ఏర్పాటు కిత్తాన్. నాను యూదురు ఆఇ వరి నడిమి యేసు వందిజ్ సువార్త వెహ్ని వందిజ్ వన్ని మరిసిజ్ నజీ తోరిసి నెన్పిస్తాజ్ ఇజి వాండ్రు తిర్మామానం కిత్తాన్. ఆహె తిరర్మానం కిత్తివలె నాను ఎయె వెటబా అలోసనం వెన్బావత. 17 నాను అపొస్తుడు ఆని ముజాల అపొస్తుడు ఆతి వరిజ్ సుడూదెజ్ యెరూసలెమ్మదుబ సాన్వెత. గాని వెటనె నాను అరిబియ ముటదు సాహ. వెనుక నాను దమస్కు పట్టుమ్దు మరీజి వాత.

18 దేవుణు వన్ని మరిసిజ్ నజీ తోరిసి, మూండ్రీ పంటజ్ వెనుక, కేపా ఇజి కూకె ఆని పేతురు వెట నెల్క ఆదెజ్ యెరూసలెమ్మదు సాహ. అబ్బె వన్ని వెట రుండి వారమ్మకు మహ. 19 మరి, ప్రబుజ్ ఎయెరిజ్బ సుడూవత. ప్రబుజ్ తంబెరి ఆతి యాకోబుజ్నె సుడూత. 20 నాను రాసినికెజ్ నిజమ్నె. అబద్దం ఆఉ. దిన్ని వందిజ్ దేవుణు నెసినాన్. 21 పేతురు వెట యెరూసలెమ్మదు మహి వెనుక నాను సిరియ, కిలికియ ఇని ముటజి సాహ.

22 నస్తివలె యూదయ ప్రాంతమ్దు మని దేవుణు సజమ్కాణికార్ నజీ తోవెండె మహార్.

23 గాని మహికార్ నా వందిజ్ వెహ్ని మనికెజ్నె వెహ మనార్. “మజీ ముజాలె హిమ్మెజ్ కిజి మహికాన్, ఉండ్రీ కాలమ్దు వాండ్రు నాసనం కిదెజ్ సుడూతి మని సువార్త ఏలు వెహ్నినాన్”, ఇజి వెహ్ని మనికెజ్నె వెహ మనార్.

24 అందెజె నా వందిజ్ వారు దేవుణుదిజ్ పొగిడితార్.

2

మహి అపొస్తురు వరి జతదు పవులుజ్ కుడుఃప్పినార్.

1 పతినాల్లి పంటజ్ గడప్పి వెనుక, నాను యెరూసలెమ్మదు మరి సాహ. బర్బుబ నా వెట వాతాన్. తితుజ్బా మాపు వెట కూక్త ఒతావ్. 2 నాను సాండ్రెజ్ వలె ఇజి దేవుణు నజీ తోరిసి వెహ్నిజ్నె నాను సాహ. అబ్బె పల్కుబడిః మని పెద్దలిజి కూడుప్తానె, యూదురు ఆఇ వరిజ్ నాను వెహ్నిని సువార్త ఇనిక ఇజి వరిజ్ వెహ్ని. ఎందన్నిజ్ ఇహిజి నాను వెహ్నినికెజ్ నిజం ఇజి వారు నెసిమండ్రెజ్. సిల్లిజి నాను ఏలు కిజిని సువార్త పణి, పణిదిజ్ రెవిండె ఆనాద్. యాలెకెండె వర్గిదెజ్ పల్కుబడిః మని పెద్దలిజి కుడుఃప్త. మరి ఎయెరిజ్బ కూడుఃవత. 3 నా వెట వాతి తీతు యూద వాండ్రు అఎన్. వాండ్రు గ్రీకు వాండ్రు. అందెజె వాండ్రు సునతి కిబె ఆఇకాన్. అహిజ్బా, వాండ్రు సునతి కిబె అదెజ్వలె ఇజి వారు కసితం వెహ్వెతార్. 4 గాని నమ్మితికావ్ ఇజి వెహె ఆని సెగెండార్ తీతు సునతి కిబె అదెజ్ వలె ఇజి వెహ్నార్. వీరు గుట్టు నెస్టెజ్ ఇజి మా నడిమి డుగితారె, క్రీస్తుయేసు వెట కూడితి మని దన్నిదటాన్ మజీ వాతి విడుఃదలదిజ్ సుడూతార్. మాటు యూదురి రూలుజ్ లోజీదెజ్ వలె ఇజి వెహ్నివతార్. 5 వారు వెహ్నిదన్నిజ్ నచెంబా లోజీవతావ్. ఎందనిజ్ ఇహిజి నిజమాతి సువార్త మీ నడిమి నిల్పి మండ్రెజ్ ఇజి కోరితావ్.

6 గాని పల్కుబడిః మని పెద్దెల్బు, నాను వెహ్నిని సువార్త మారిస్టెజ్ ఇజినో, కండెకబా దనివెట కుడుఃప్తెజ్ ఇజినో వెహ్వెతార్. నజీ వారు పలుకు బడిః మనికార్ ఆతిజ్బ ఆఇతిజ్బ నాను లెక్కు కివత. దేవుణు ఇజ్రికార్ పెరికార్ ఇజి తెడః తోవెన్. 7 గాని యూదురిజ్ సుహార్త వెహ్నిజ్ దేవుణు పేతురుజ్ ఒపజెప్తి వజ, యూదురు ఆఇ వరిజ్ సువార్త వెహ్నిజ్ నజీ ఒపజెప్తి మనాన్ ఇజి వారు నెస్తార్. 8 ఇహిజి యూదురు నడిమి అపొస్తుడు ఆజి సేవ కిదెజ్ పేతురుజ్ సత్తు సీతి దేవుణునె యూదురు ఆఇవరి నడిమి అపొస్తుడు ఆజి సేవ కిదెజ్ నజీ సత్తు సీతాన్. 9 నిటకోహి లెకెండె మని పెరి పెద్దెల్బు ఆతి యాకోబు, పేతురు, యోహాను ఇనికార్ దేవుణు నజీ యా పెరి పణి ఒపజెప్తి మనాన్ ఇజి నెస్తివలె

బర్బుబెజ్‌ని నజీ వరి వెట జత కూడేజి పణి కినికార్ ఇజి ఉండ్రీ గుర్తు లెకెండ మా కికు వరి వెట కలపూర్. మాపు యూదురు ఆఇ వరి నడిమి సువార్త వెహైజ్ ఇజి వారు యూదురు నడిమి సువార్త వెహైజ్ బప్పుకొటార్. 10 వరి నడిమి యెరూసలెమ్‌దు మని బీద వారు ఆతి నమ్మితి యూదురిజ్ మాపు సాయం కిదెజ్ ఇజని వారు మా బాణిజ్ కోరితార్. నాను కిదెజ్ ఇజి నండో ఆస ఆతికాదె అయా సజతి.

పవులు పేతురుజ్ జటిజ్ ఆజినాన్.

11 కెహె ఇని పేతురు అంతియొకయ ఇని పట్టుమ్దు వాతివలె, ఎద్దునె నాను వన్నిజ్ జటిజ్ ఆత. ఎందనిజ్ ఇహిజ వాండ్రు కిత్తి పణి తపు. 12 యాకోబు వెట కూడితి మని సెగొండార్ నమ్మితి యూదురుజు అబ్బె వాని ముజాల వాండ్రు యూదురు ఆఇ నమ్మితి వరి వెట కూడేజి బోజనం కిజి మహాన్. గాని వారు వాతిజ్, వీండ్రు యూదురు ఆఇ నమ్మితి వరివెట బోజనం కిఎండ వరి బాణిజ్ దూరం ఆతాన్. వాండ్రు యా లెకెండ కిత్తాన్. ఎందనిజ్ ఇహిజ మోసే సీతి రూలుజ్ లోజిదెజ్‌వలె ఇజి డట్టం వెహిమహి యూదురి గుంపుదిజ్ తియెల్ ఆతాన్. 13 అంతియొకయదు మని మహి నమ్మితి యూదురు పేతురు వెట వాండ్రు ఆతి వేసమ్దు కూడితార్. వారు కిత్తిక సుడేజి, బర్బుబ మొసెం ఆతండ్రె, వారు కిత్తి లెకెండ వాండ్రుబా కిత్తాన్.

14 నిజమాతి సువార్తదు వెహై వజి వారు నడిమి ఇక సుడేతానె, అబ్బె మని నమ్మితి విజెరి ఎద్దు పేతురుజ్ జటిజ్ ఆత. నాను ఈహు వన్నిజ్ వెహై, “ఓ పేతురు, నీను యూద వాండ్రు ఆజిబా, వరి లెకెండ బత్తి. యూదురు ఆఇవరి లెకెండ బత్తి. మరి యూదురు ఆఇకార్ యూదురు లెకెండ మండ్రెజ్ వలె ఇజి ఎలాగ నీను డటం వెహైజ్ అట్‌సినీ”.

15 నాను మరి వరి విజెరిజ్ వెహిసిన. మాటు యూదురు జాతిదు పుట్టికాట్. దేవుణు రూలుజ్ నెన్‌ఇకాట్ ఆవెట్.

16 గాని దేవుణు మోసెజ్ సీతి రూలుజ్ లోజిజి ఒరెన్ దేవుణు ఎద్దు సీతి నిజాయితి మనికాన్ ఆవెన్. గాని యేసుక్రీస్తు ముస్సు నమకం ఇట్టిజెనె సీతి నిజాయితి మనికాన్ ఆనాన్ ఇజి నెన్ మనాట్. అందెజి యూదురు ఆఇకార్‌నె ఆవెండ, మాటుబా క్రీస్తు యేసుజ్ నమ్మితాట్. రూలుజ్ లోజిజి దేవుణు ఎద్దు సీతి నిజాయితి మనికాట్ ఆవెండ, క్రీస్తుజ్ నమ్మిజెనె దేవుణు ఎద్దు సీతి నిజాయితి మనికాట్ ఆని వందిజి మాటు క్రీస్తు యేసుజ్ నమ్మితాట్. ఎందనిజ్ ఇహిజ, రూలుజ్ లోజిజి ఎయెన్‌బా దేవుణు ఎద్దు సీతి సీజాయితి మనికాన్ ఆవెన్‌ఇ జి మాటు నెసినాట్.

17 క్రీస్తు యేసు వెట కూడితి మని దనితాన్ మాటు దేవుణు ఎద్దు సీతి నిజాయితి మనికాట్ ఆదెజ్ కోరినాట్. గాని మాటు యా లెకెండ ఆదెజ్ సూణివలె, యూదురు ఆఇవరి లెకెండ పాపమ్దు మనాట్. అయావలె క్రీస్తునా మజి తపు కిబిసినాన్? ఆవెన్.

18 రూలుజ్ లోజిజి ఒరెన్ దేవుణు ఎద్దు సీతి నిజాయితి మనికాన్ ఆవెన్ ఇజి నాను ముజలె తోరిస్త. నాను నెక్తికొక్తి దన్ని దరోట్ మరి మహిజ రూలుజ్ తప్పి వన్ని లెకెండ నాను మన్న ఇజి రుజుమ్ కిజి. 19 యూదురి రూలుజ్ లోజిజి మహివలె, అయాకెజ్ కిజి, దేవుణు ఎద్దు సీతి నిజాయితి మనికాన్ ఆదెజ్ అట్‌వెన్ ఇజి నాను నెన్. అందెజి దేవుణు వందిజ్ బత్తిదెజ్ యూదురి రూలుజ్ బాణిజ్ డిబె ఆత.

20 నాను క్రీస్తు వెట సిలువాదు కుటిజాణిజ్ డెయె ఆతి లెకెండ మన. నాను బత్తిజి మహి లెకెండ మరి బత్తి. క్రీస్తునె నా మన్నుదు బత్తిజినాన్. ఏలు నాను ఆవె నా ముస్సు అతికారం కిజినాన్. గాని క్రీస్తు నా లోక మంజి నా ముస్సు అతికారం కిజినాన్. నాను యా లోకమ్దు బత్తిజని బత్తు దేవుణు మరిసిజ్ నమ్మిజి బత్తిజన. వాండ్రు నజి ప్రేమిసి నా వందిజ్ వన్ని పాణం సితాన్. 21 దేవుణు దయ దర్మం నాను నెక్తి పొకం. యూదురి రూలుజ్ లోజిజి ఒరెన్ సీతి నిజాయితి మనికాన్ ఆనాన్ ఇహిజ క్రీస్తు సాతి సావు అనవసరమెనె.

3

యూదురి రూలుజ్‌నా క్రీస్తు ముస్సు మని నమకమ్‌నా నిజమాతిక?

1 గలాతియ ముటాదు మని దేవుణుదిజ్ నమ్మితికిదెరా, ఎందనిజ్ మీరు బుద్ధి సీలివరి లెకెండ మనిదెర్? ఎయెర్ మిజి మొసెం కిత్తార్? యేసు క్రీస్తు మీ వందిజ్ సిలువాదు సాతిదని వందిజ్ నాను మీ కణకెజ్ నిండ్రు తోరిసి వెహై మన గదె? 2 “యూదురి రూలుజ్ లోజిజినిజ్ దేవుణు ఆత్మ మిజి

దోహక మనాదా? మాపు మిజి వెహ్తా నువార్త వెంజి నమ్మిత్తిళ్ గదె మిజి దోహక మనాదా?”. యా ఉండ్రె సజతిని వెహ్తా. ³ మీరు నిసా బుద్ది సిలికిదెరా? మీరు మీ కొత్త బత్తు మొదోల్స్తవల దేవుణు అత్తు సత్తుదాన్ మొదోల్స్తదెర్. మరి ఏలు మీ సొంత సత్తుదాన్ మీ బత్తు పూర్తి కిదెళ్ సుడఃజినిదెరా? ⁴ మీరు దేవుణుదిక్ నమ్మితి వెనుక, నండో ఒరిస్తెదెర్. మీరు ఒరిస్తెకెళ్ పణిదిక్ రెజకెళ్ ఆతెనా? మిజి జరిగితికెళ్ పణిదిక్ రెండ ఆఉతె ఇజి నాను ఆస ఆజిన. ⁵ అందెజె దేవుణు అత్తు మిజి నండో సీజి గొప్పు సత్తు మని పెరి పణిజ్ మీ నడిఃమి కిజినిక, మీరు మోసె సీతి రూలుజ్ లోజిజినిజ్నా? అఎద్. గాని మీరు నువార్త వెంజి నమ్మిజినిజ్నెనె వాండ్రు మిజి వన్ని అత్తు సీజినాన్.

⁶ అబ్రాహము వందిళ్ దేవుణు మాటదు రాస్తి మనిక నెస్తు, “వాండ్రు దేవుణుదిక్ నమ్మితాన్. అందెజె దేవుణు వన్నిజ్ సీతి నిజాయితి మనికాన్ ఇజి ఒప్పుకోటాన్”, ఇజి రాస్త మనాద్. ⁷ అందెజె దేవుణు ముస్సు, నమకం ఇట్టికారె, నిజమాతి అబ్రాహము కొడోరె ఇజి నెస్తు. ⁸ సీన దినమ్కాజ్ ముజాలె దేవుణు మాటదు రాస్తమనాద్, యూదురు ఆఇకారె దేవుణు ముస్సు, నమకం ఇట్టిజ, వాండ్రు వరిజ్ సీతి నిజాయితి మనికారె ఇజి డగ్గు కిసాన్. వాండ్రు అబ్రాహముజ్, “లోకమ్ది లోకురె విజెరిజ్ నీ వెట నాను దీవిస్తు”, ఇజి అయకం జగ్గిజ ముజాలె నువార్త వెహ్తాన్. ⁹ అందెజె దేవుణు ముస్సు, నమకం ఇట్టి విజెరిజ్ అబ్రాహము వెట కూడుఃప్పి దీవిసినాన్.

¹⁰ దేవుణు మోసెజ్ సీతి రూలుజ్ లోజిజి వన్ని ఎద్దు సీతి నిజాయితి మనికారె అందెజ్ సుడఃజిని విజెరె, దేవుణు సీతి సాయిపు అడిఃగి మంజినార్. ఎందనిజ్ ఇహిజ, దేవుణు మాటదు రాస్త మనాద్, “మోసె రాస్తి పుస్తకమ్కాజ్ మని రూలుజ్ విజు ఎస్తివలెబా కిజి ఎయెన్బా దేవుణు సీతి సాయిపు అడిఃగి మంజినాన్”, ¹¹ గాని నిజమె, ఒరెన్ విజు రూలుజ్ లోజితిజ్బా దేవుణు ఎద్దు సీతి నిజాయితి మనికాన్ అఎన్. ఎందనిజ్ ఇహిజ, “ఎయెజ్ సీతి నిజాయితి మనికాన్ ఇజి నాను ఇట్టమననో వాండ్రు నా ముస్సు, నమ్మకం ఇట్టి వందిజ్ ఎలా కాలం బత్తినాన్”, ఇజి దేవుణు వెహ్తామనాన్ ఇజి దేవుణు మాటదు మనాద్. ¹² గాని దేవుణు సీతి రూలుజ్ లోజి అయాలెకెండో అఎద్. ఎందనిజ్ ఇహిజ నమ్మకం మండ్రెజ్ వలె ఇజి రూలుజ్ వెహ్తా. దేవుణు మాటదు వెహ్తాక ఇనిక ఇహిజ, ‘రూలుజ్ నడిఃపిసీని వజ బత్తిదెజ్ కోరిజినికాన్ అయాలెకెళ్ ఎస్తివలెబ లోజిదెజ్ వలె’, ¹³ మోసె సీతి విజు రూలుజ్ లోజిజి వరి ముస్సు, వాజిని నయపుదాన్ క్రీస్తు మజి డిఃసేపిస్తాన్. ఎందనిజ్ ఇహిజ దేవుణు మాటదు రాస్త మనాద్, “కొహిదు డెఃలెపె ఆజి సాని ఎయెన్బా దేవుణు సాయిపు మనికాండ్రె”. ¹⁴ క్రీస్తు యా లెకెండో ఆతండ్రె మజి డిఃసేపిస్తాన్. ఎందనిజ్ ఇహిజ, దేవుణు అబ్రాహముజ్ ఒట్టు కిత్తి దీవెనమ్కు యూదురు ఆఇ వరిజ్ క్రీస్తు యేసు వెట దోహ్కె. మరి క్రీస్తు ముస్సు, మజి మని నమ్మకమ్దాన్, దేవుణు సీన ఇజి ఒట్టు కిత్తి వన్ని అత్తు మజి దోహ్కె వందిజ్ క్రీస్తు యా లెకెండో సాయిపు మొపె ఆతండ్రె మజి సాయిపుదాన్ డిఃసేపిస్తాన్.

¹⁵ తంబెరిజాండె, మాటు రోజు బత్తిజిని బత్తుదాన్ ఉండ్రె మాట లాగ్గి వెహ్తా. రిఎరె ఉండ్రె సజతి వందిజ్ ఉండ్రె ఆజి ఉండ్రె ఒప్పుమానం కిత్తి మహిజ, ఎయెన్బా అయకం తప్పెజ్నో, దనివెట ఇనికబా కూడుఃపెజ్నో అక్కు సిల్లెద్. అయాలెకెండో, దేవుణు మా వెట కిత్తి యా ఒప్పుమానమ్బా నిల్లి మంజినాద్. ¹⁶ దేవుణు అబ్రాహము వెట, మరి వన్ని తెగ్గదు పుట్టి వన్నివెట ఒట్టుజ్ కిత్తాన్. ‘తెగ్గదు పుట్టి వరిజ్ ఇహిజ నండో లోకురిజ్’, ఇజి దేవుణు మాటదు వెహ్తా. గాని ‘నీ తెగ్గదు పుట్టి వన్నిజ్’ ఇజి వెహ్తా. ఇహిజ అయకం ఒరెన్ వనిజ్నె. వాండ్రె క్రీస్తు. ¹⁷ నాను వెహ్తా వాజినిక ఇనిక ఇహిజ, దేవుణు ముజాలె అబ్రాహము వెట ఒట్టు కిత్తాండ్రె అయకం కిదెజ్ ఇజి తీర్మానం కిత ఇట్టాన్. అందెజె నాల్లి వందిజ్ ముపాయ్ (430) పంటెజ్ వెనుక దేవుణు మోసెజ్ సీతి రూలుజ్ అబ్రాహము వెట కిత్తి ఒప్పుమానమ్దిజ్ తప్పిసి నస్తివలె కిత్తి తిరుమానమ్దిజ్ సిల్లెండ కిదెజ్ అట్జ్.

¹⁸ దేవుణు సీన ఇజి ఒట్టు కిత్తి అక్కు, మాటు రూలుజ్ లోజితిజ్నె దోహ్కాద్. ఇహిజ వాండ్రు కిత్తి ఒట్టుదాన్ మజి అయా అక్కు దోహ్కె. గాని దేవుణు అబ్రాహముజ్ సీన ఇజి ఒట్టు కిత్తిజ్ వాండ్రు వన్ని దయా దర్మమ్దాన్ సితాన్.

¹⁹ అందెజె మరి ఎందనిజ్ దేవుణు మోసె వెట రూలుజ్ సితాన్? ఎందనిజ్ ఇహిజ తప్పజ్ ఇని ఇనికెజ్ ఇజి తోరెజ్ రూలుజ్ సితాన్. యా రూలుజ్ అబ్రాహము తెగ్గదు పుట్టికాన్ వానిదాక లోకురిజ్

నడిపిస్తానని తానీ. ఒట్టుదు ఎయె వందిజ్ వెహ్ మనానో వాండ్రె వీండ్రు. దేవుణు వన్ని దూతెజ్ వెట మోసెజ్ రూలుజ్ సితాన్. మోసె అయ్యాక లోకురిజ్ సితాన్. మోసెనె, దేవుణు లోకుర్ నడిమి ఒప్పెసిని వన్ని లెకెండ నిహ మనాన్.

20 రిఎర్ నడిమి నిల్వికాండ్రె ఒరెన్ ఒప్పెన్నికాన్. గాని ఒప్పెన్నికాన్ సిల్లెండనె దేవుణు అబ్రాహముజ్ ఒట్టు కితాన్. ఎందనిజ్ ఇహిజ ఒరెండ్రె ఒట్టు కితాన్ వాండ్రె దేవుణు.

21 అహిజ, దేవుణు అబ్రాహముజ్ ఒట్టు కితాన్ వెనుక, మోసెజ్ రూలుజ్ సితవలె వాండ్రు కితాన్ ఒట్టుదిజ్ వెత్తెకమ్దికెన్ రూలుజ్? సిల్లె అహి అవిద్. రూలుజ్ లోకురిజ్ ఎల్లకాలం బత్తిదెజ్ బత్తిని బత్తు సీదెజ్ అట్టి ఇహిజ, యా రూలుజ్ లోజిజ దేవుణు ఎద్దు నీతి నిజాయితి మనికార్ ఆతార్ మరి.

22 గాని దేవుణు మాట వెప్పినాద్, యా లోకమ్దు మని లోకుర్ విజెరె తోహ ఆతి వరిలెకెండ పాపం అడిగి మనార్ ఇజి. అందెజె దేవుణు ఒట్టు కితాన్ దోహ్కెజ్ ఇహిజ యేసుక్రీస్తు మున్ను నమ్మకం ఇడదెజ్. నమ్మకం ఇట్టిజనె దోహ్కె.

23 క్రీస్తు రెఎండ మహి ముజాల, యా నమ్మకం రెఎండ మహద్. నస్తివలె మోసె సిత రూలుజ్, ఒరెన్ జమాను కాప్ కిని లెకెండ, యూదురు ఆతి మజి తోహి ఇడెజి కాప్ కిజి మహె. ఇహిజ యా రూలుజ్ నె మా మున్ను అతికారం కిజి మహె. యాక, లోకుర్ క్రీస్తుజ్ నమ్మిదెజ్ అనాద్ ఇజి దేవుణు తోరిసిని కాలమ్దాన్ నె మహద్. 24 అందెజె క్రీస్తు రెఎండ మహివలె, యా యూదురి రూలుజ్ నె, మజి నుడెజి నడిపెసితె. ఎందనిజ్ ఇహిజ, క్రీస్తు వాతి వెనుక వన్నిజ్ నమ్మిజి దేవుణు ఎద్దు నీతి నిజాయితి ఆదెజ్ ఇజి వెహ్. 25 గాని ఏలు క్రీస్తుజ్ నమ్మిదెజ్ అట్టాట్. అందెజె రూలుజ్ మా మున్ను అతికారం కిడెజ్ అట్టె.

దేవుణు కొడెర్

26 క్రీస్తు యేసు మున్ను నమ్మకం ఇట్టిదెర్. అందెజె మీరు విజెరె దేవుణు కొడెర్. 27 మీ లోక మని బాప్తిసం లాగె అతికార్ విజెరె క్రీస్తు వెట కూడితి మనిదెర్. అందెజె క్రీస్తు గుణమ్కు మిజిబా మంజినె.

28 అందెజె యూదురు ఇజినో, యూదురు అకకార్ ఇజినో, వెట్టివణి కినికార్ ఇజినో, కికకార్ ఇజినో, మొకకొడె ఇజినో, అయ్లొకొడె ఇజినో అవిద్ ముకెలం మీరు విజెరె ఉండ్రె లోకుర్. ఎందనిజ్ ఇహిజ, మీరు క్రీస్తు యేసు వెట కూడితి మనిదెర్.

29 మీరు క్రీస్తు వెట కూడితి మనికెదెర్ ఇహిజ, అబ్రాహము తెగ్గదు పుట్టికెదెర్. ఎందనిజ్ ఇహిజ క్రీస్తు అబ్రాహము తెగ్గదు పుట్టికాన్. మీరు దేవుణు అబ్రాహము వెట ఒట్టు కితాన్ దన్నిజ్ అక్కు మనికెదెర్.

4

1 నాను వెప్పొనిక ఇనిక ఇహిజ, ఒరెన్ వన్ని ఆస్తిదిజ్ అక్కు మనికాన్ వన్ని కొడెనె. గాని అయా కొడె ఇజికాన్ మనివలె, వాండ్రు ఒరెన్ వెట్టివణి కినివన్ని లెకెండ ఇనిదని మున్నుబా అతికారం సిల్లెండ మనాన్. అయా కొడె అప్పొసి ఆస్తిదిజ్ అక్కు మనికాన్ అతిజ్బా ఇనిదని మున్ను అతికారం సిల్లెండ మనాన్. 2 వన్ని అప్పొసి ఎత్తుకెత్తి వయుసు వానిదాక, వాండ్రు వన్నిజ్ కోప కినివరి అడిగి, వన్ని ఆస్తి సూణి వణి మణిసిరి అడిగి మంజినాన్. 3 అయాలెకెండ మాటుబా క్రీస్తు యా లోకమ్దు వాని ముజాల, మాటుబా యా లోకమ్ది అలవాటుజ్ అడిగి మహట్. 4 గాని దేవుణు ఎత్తుకెత్తి తగితి సమయం వాతివలె వాండ్రు వన్ని మరిసిజ్ పోక్తాన్. వాండ్రు ఉండ్రె బోదెలి పోటా లొకహాన్ పుట్టాన్. వాండ్రు యూదురి రూలుజ్ విజి లోజిజ బత్తితాన్. 5 యూదురి రూలుజ్ లోజిజ దని అడిగి మహి మజి, దని బాణిజ్ డి డిన్పిన్ని వందిజ్, దేవుణు వన్ని మరిసిజ్ పోక్తాన్. ఎందనిజ్ ఇహిజ మాటు పూర్తి అక్కు మని దేవుణు కొడెర్ ఆదెజ్ ఇజి, 6 మీరుని మాపు వన్ని కొడెర్. అందెజె దేవుణు వన్ని మరిసి ఆత్మదిజ్ మా మున్నుదు మండ్రెజ్ ఇజి పోక్తాన్. యా ఆత్మనె మా లొకహాన్ 'ఓబా', ఇజి కూక్కి మజి పార్లనం కిబిసినాన్. 7 అందెజె విలుదాన్ మీరు ఒరెన్ ఒరెన్ వెటి వణికిని వన్నిలెకెండ ఆఇదెర్. గాని మీరు ఒరెన్ ఒరెన్ దేవుణు కొడెర్ ఆతి మనిదెర్. అందెజె మీరు వన్ని మరిసిరిరీ సీన ఇజి వాండ్రు ఒట్టు కితాన్ దన్నిజ్ విజి అక్కు మనికెదెర్.

8 ఉండ్రె కాలమ్దు దేవుణుదిజ్ నెన్ ఇ ముజాల నిజం ఆఇ దేవుణుక అడిగి మహిదెర్. 9 గాని ఏలు మీరు దేవుణుదిజ్ నెస్తి మనిదెర్. మరి ఒదె వాండ్రు మిజి నెస్తి మనాన్. మరి ఎందనిజ్ మీరు సత్తు సీతి

పణిదిళ్ రెణ దెయమక దరోట్ మర్జనిదెర్. మరిబ దన్ని అడిగి మండ్రెళ్ కోరిజనిదెరా? 10 మీరు నెగ్గి దినమకు ఇజి నెగ్గి నెలెళ్ ఇజి సర్ద ఆని కాలమకు ఇజి నెగ్గి ఏంటుళ్ ఇజి నూణిదెర్. 11 మీరు కిజిని వన్నాళ్ నాను నెసి, మీ వందిళ్ బాద ఆజిన. నాను మీ నడిమి కన్బడిజి కిత్తి సేవ పణి, పణిదిళ్ రెండె ఆనాద్ ఇజి బాద ఆజిన.

12 అందెజె తంబెరిజాండె, నాను మిజి బతిమాల్లిన. మీరు నజి పోలిజి మండ్రు. ఎందనిళ్ ఇహిజ మోసి సెతి రూలుజ బాణిళ్ డేబె ఆతి యూదురు ఆజి మీలెకెండె ఆతమన నాను. మీరు ఎన్సివలెబా నజి నెగ్గెండ సుడెతి మనిదెర్. 13 నాను మిజి సువార్త తొలిత వెన్సివలె నాను ఎలాగ మహా ఇజి మీరు నెన్సిదెర్. నాను నెగెండె సిల్లెండ కన్బం ఆరతమహా. 14 నాను కన్బం అర్దివలె మీరు నండొ బాద ఆతిదెర్. గాని మీరు నజి ఇజి కణకదాన్ తొఇదెర్. నజి నెక్కి పొక్ ఇతిదెర్. అహిజ దేవుణు పొక్కి ఒరెన్ దూత లెకెండె మీరు నజి డగ్గు కిత్తిదెర్. క్రీస్తుయేసుజ్ డగ్గు కిని లెకెండె నజి డగ్గు కిత్తిదెర్. 15 అయావలె మీరు గొప్పు సర్దదాన్ మహిదెర్. ఏలు మీ సర్ద విజు ఇనిక ఆతాద్? మీరు నా వందిళ్ ఇనికబా కిదెళ్ తయార్దాన్ మహిదెర్. మీ సొంత కణుకుబా లాగ్గి సీదెళ్ ఇజి నాను లొన్సిక్ ఇహిజ, అయాకబా కిదెళ్ మీరు తయార్దాన్ మహిదెర్ ఇజి నాను మీ వందిళ్ నిజం వెన్సిన్. 16 ఏలు నాను మిజి నిజం వెన్సినిళ్ మిజి వడెఇకాన్ ఆతానా?

17 యూదురి రూలుజ్ లోజెదెళ్ వలె ఇజి వెన్సిని వరి వెట మీరు కూడెదెళ్ ఇజి పటుదలదాన్ నండొ ఆన ఆజినార్. గాని వరి ఉదెసమకు నెగ్గెకెళ్ ఆఉ. మిజి మా బాణిళ్ దూరం కిబెన్సిజె వారు సుడెజినార్. ఎందనిళ్ ఇహిజ మీరు వరివెట కూడెజి, వారు మీ వందిళ్ పటుదలదాన్ ఆన ఆజిని లెకెండె, మీరు వరి వందిళ్ ఆన ఆజి మండ్రెళ్. 18 ఉదెసం నెగ్గెక ఇహిజ పటుదలదాన్ మంజినిక నెగెదె. ఎన్సివలెబా పటుదలదాన్ ఆహె మండ్రెళ్. నాను మీ వెట మని వలెనె ఆవండె, సెలివలెబా పటుదలదాన్ మండ్రెళ్. 19 నాను ప్రేమిన్సి లోకురండె, నాను మీ వందిళ్ మరిబా బాద ఆజిన. ఏరు ఈబదెళ్ నొప్పిదాన్ బాద ఆని ఉండ్రె బోదెల్లెకెండె నాను మరిబా మీ వందిళ్ బాద ఆజిన. క్రీస్తు నని గుణమకు మిజి వానిదాక నాను బాద ఆజినె మంజిన. 20 ఏలు మీ నడిమి మంజి, మిజి నిపాతి వెన్సిజె ఇజి నాను నండొ ఆన ఆజిన. ఎందనిళ్ ఇహిజ మీరు ఎందనిళ్ యా లెకెండె కిత్తిదెర్ ఇజి నాను గాబ్ర ఆజిన.

ఆగారుని సార

21 మోసె రాన్సి రూలుజ్ లోజెదెళ్ వలె ఇజి వెన్సిని వరిళ్ నాను వెన్బాజిన. మోసె రాన్సి పున్కమకాళ్ ఇనిక రాన్సి మనాద్ ఇజి మీరు నెన్సిదెరా? 22 ఇనిక రాన్సి మనాద్ ఇహిజ, అబ్రాహముజ్ రివెర్ మరిసిర్ మహార్. ఒరెన్ వన్నిజె వెటి పణిమణిసి కాన్సాద్. మరి ఒరెన్ వన్నిజె వెట్టిపణి మణిసి ఆకాద్ కాన్సాద్. 23 వెట్టిపణి మణిసి వెట పుట్టికాన్ ఒడెల్ ఆనదాన్ పుట్టాన్. గాని వెట్టిపణి మణిసి ఆక దని వెట పుట్టికాన్, దేవుణు ఎత్తు కిజి అబ్రాహము వెట కిత్తి ఒట్టు వజ పుట్టాన్.

24 యూ రుండి బోదెకాళ్ రుండి సజతిజ వెట పోలిసి వెన్సిజె ఆనాద్. యూ రుండి బోదెకు దేవుణు లోకుర్ వెట కిత్తి రుండి ఒపుమానమకు లెకెండె మన్నె. సీనాయి గొరొతు దేవుణు ఇస్రాయేలు లోకురిళ్ రూలుజ్ సెతివలె, వరి వెట కిత్తి ఒపుమానం ఆగారుజ్ పోలిత మనాద్. ఆగారు వెట్టిపణి కొడెరిళ్ ఇట్టి లెకెండె, యా ఒపుమానం లోకురిళ్ వెట్టిపణి మణిసిర్ లెకెండె కినాద్. 25 ఏలు అరెబియాదు మని సీనాయి గొరొతు సెతి ఒపుమానం ఆగారుజ్ పోలిత మనాద్. వెట్టిపణి మణిసి ఆతి ఆగారు ని దని కొడెరిల్ లెకెండె మనార్. ఏలు యెరూసలెమ్ని బాన్ మని లోకుర్ ఎందనిళ్ ఇహిజ వారు అయా ఒపుమానమదు వెన్సిని రూలుజ అడిగి మనార్. 26 గాని మున్సు మని యెరూసలెం వెట్టిపణి మణిసి ఆకాద్ ఆతి సారెళ్ పోలిత మనాద్. నమ్మితి మజి విజెరిళ్ ఆయెసిని సార. 27 ఎందనిళ్ ఇహిజ దేవుణు మాటదు వెన్సినాద్, “కొడెరిల్ కాన్ ఇ గొడ్డు బోదెలి సర్ద ఆఆ. ఏరు ఈబని వలె మని నొప్పి నెన్ ఇకి, సీను గొప్పు సర్ద ఆజి డటం డెడిన్ ఆ. ఎందనిళ్ ఇహిజ, మాసి మని బోదెల్దెళ్ ఇంక మాసి డెసి బోదెల్దెళ్ నండొండొ కొడెరిల్ మనార్”.

28 ఏలు తంబెరిజాండె, మీరు ఇస్సాకు లెకెండె మనిదెర్. ఎందనిళ్ ఇహిజ, దేవుణు అబ్రాహముజ్ సీన ఇజి కిత్తి ఒట్టు వజ మీరు పుట్టిదెర్. 29 నన్సివలె ఒడెల్ ఆనదాన్ పుట్టికాన్ దేవుణు ఆత్మదాన్ పుట్టి వన్నిజ్ మాలెజి కిత్తాన్. అయాలెకెండె ఏలుబా జగ్గెజినాద్. 30 గాని దేవుణు మాట ఇనిక దన్ని వందిళ్

వెప్పినాడ, 'వెట్టిపణి బోదెల్దిదేజ్ దని కొడోఁ వెట నెక్కి పొక్తు. ఎందనిజ్ ఇహొజ, వెట్టిపణి మణిసి పొటది కొడోఁదిజ్, వెట్టిపణి మణిసి ఆఇ దని పొటది కొడోఁ వెట అప్పొని అన్దిదిజ్ అక్కు మండ్రెజ్ వీలు సిల్లెద్',³¹ అందెజె తంబెరిజాండె, మాటు వెట్టిపణి బోదెలి కొడోఁర్ అవల్. గాని మాటు వెట్టిపణి మణిసి ఆఇ దని కొడోఁర్నె.

5

1 క్రీస్తు మోసె సీతి రూలుజ అడిఁగిదాన్ డిఁబిస్తవలె, దని అడిఁగి మన్ఎండ మంజిని వందిజె డిఁబిస్తాన్. అందెజె డిఁబె అతి వరిలెకెండ నెగ్రెండ నిల్ని మండ్రు. మీరు వెట్టిపణి మణిసి లెకెండ రూలుజ అడిఁగి మన్మాట్. 2 నా మాటెజ్ జాగర్త విండ్రు. పవులు ఇని నాను మిజి వెప్పొన. దేవుణు ఎద్రు సీతి నిజాయితి మనికిదెర్ అదెజ్ మీరు సునతి కిబె అదెజ్ సుడఁతిజ, క్రీస్తు మీ వందిజ్ అతిదని వందిజ్ ఇని విలువ సిల్లెద్. 3 సునతి కిబె ఆని విజెరెజ్ నాను మరిబా వెప్పొన. మోసె సీతి రూలుజ్ విజు మీరు పూర్తి లోజెదెజ్ వలె. 4 మోసె సీతి రూలుజ్ లోజెజ, దేవుణు ఎద్రు సీతి నిజాయితి మనికాన్ అదెజ్ సూణికాన్, క్రీస్తు బాణిజ్ పూర్తి దూరం ఆతాన్. దేవుణు దయా దర్మమదిజ్ నెక్కి పొక్తిదెర్. 5 గాని దేవుణు మజి సీతి నిజాయితి మనికార్ ఇజి వన్ని ఎద్రు ఇడ్నాన్ ఇజి మాటు ఆస ఆజినాట్. మాటు ఎందనిజ్ యా లెకెండ ఆసదాన్ ఎద్రు సుడఁజినాట్ ఇహొజ, దేవుణు మజి సీతి నిజాయితి మనికార్ ఇజి ఇడ్నాన్ దేవుణు అత్తునె మజి దయరం సీజినాన్. ఎందనిజ్ ఇహొజ మాటు క్రీస్తు యేసు ముస్కు నమకం ఇడఁజినాట్. 6 ఎందనిజ్ ఇహొజ, క్రీస్తు యేసు వెట కూడిఁతి మనాట్ ఇజి మాటు నెస్సాట్. ఒరెన్ సునతి కిబె ఆత మనాండ్రె, సెలెనొ ఇజి దేవుణు తోవెన్. గాని దేవుణు సూణిక, ఒరెన్ క్రీస్తు ముస్కు నమకం ఇట్టా మనాండ్రె ఇజినె. మహి వరిజ్ ప్రేమిసిన్ క్రీస్తు ముస్కు నమకం ఇట్టా మనాన్ ఇజి తోరెస్సెజ్.

7 మీరు నెగ్రెండనె నమ్మిజి మహిదెర్. మరి, ఎయెన్ మిజి మొసెం కిజి, నిజమాతి సువార్త లోజెఎండ అడు కిత్తాన్? 8 వన్ని లోకర్ అదెజ్ మిజి కూక్తి దేవుణు యా లెకెండ మిజి వెహొవెన్. 9 పులొని దూరు కండెక్ అతిజ్బా, కుండాద్ మని దూరు విజు పులాజ్ కినాద్. అయాలెకెండ ఉండ్రె తప్ప బొదబ కినాద్. 10 మాటు ప్రబు వెట కూడిఁత మనాట్. అందెజె మహి బొదెజ మిరు లోజెఇదెర్ ఇజి నాను అనుమానం సిల్లెండ నమ్మిజిన. మిజి పంబ్ర కిబిస్సికాన్, వాండ్రు ఎయెన్ అతిజ్బా దేవుణు వన్నిజ్ తగితి సిక్కు సీనాన్. 11 తంబెరిజాండె, నెగొండార్ వెప్పొనార్ దేవుణు కొడోఁరస అదెజ్ ఇహొజ సునతి కిబె అదెజ్వలె ఇజి. నాను అయాలెకెండ వెప్పొ మంజినిక ఇహొజ, యూదురు నజి మాలెజ్ కివెతార్మరి. సునతి కిబె అదెజ్వలె ఇజి నాను వెప్పొ మంజినిక ఇహొజ, సిలువారు క్రీస్తు సాతిసాపు వందిజ్ నాను వెప్పొ వలె వారు నా ముస్కు కోపం అవెతార్మరి. 12 సునతి కిబె అదెజ్వలె ఇజి వెప్పొ మజి పంబ్ర కిబిస్సి యా లోకర్, కొడోఁర్ ఇడఁదిజ్ అల్తవ వరి లెకెండ ఆపిర్ ఇజి నాను ఆస ఆజిన.

13 తంబెరిజాండె, డిఁబె అతి వరి లెకెండ దేవుణు మిజి కూక్త మనాన్. మీరు ఇన్ఘం అతి సెఇకెజ్ కిదెజ్ అనాద్ ఇజి ఒడఁబిమాట్. గాని మరి ఒరెన్ వన్నిజ్ ప్రేమిసి సేవ కిదెజ్ మిజి అక్కు మనాద్. 14 మోసె సీతి రూలుజ్ విజు ఉండ్రె మాటాద్ కూడిఁతె మన్నె. అయొక ఇనిక ఇహొజ, "నీను నిజి ప్రేమిస్సి లెకెండ, మహి వరిజ్ ప్రేమిస్ అ", ఇజి. 15 గాని మీరు జంతుజ లెకెండ కటె ఆజి, ముకెజ్ లాగ్గి మహొజ, మీరు ఒరెన్ మరి ఒరెన్ వన్ని బాణిజ్ పూర్తి నాసనం ఆనిదెర్ ఇజి జాగర్త సుడఁఆదు.

దేవుణు అత్తు నడిఁపిసిని బత్తు.

16 అందెజె నాను మిజి వెప్పొన, దేవుణు అత్తు మీ మన్సుదిజ్ వెప్పొ నడిఁ పిసిని వజ నడిఁదు. అయాలె మి ఒడోల్ది సెఇ ఆనెజ్ కిబిస్సి సెఇ పణిజ్ మీరు కిఎండ మంజినిదెర్. 17 మా ఒడోల్ది సెఇ ఆనెజి వడిఁవెద్ దేవుణు అత్తు. దేవుణు అత్తుదిజ్ పడిఁవెద్ సెఇ ఆనెజ్. యా రుండి సెఇ ఆనెజ్ని దేవుణు అత్తు కూడిఁజి మన్ఉ. అందెజె మీరు ఎస్తివలెబా కిదెజ్ కోరిజినిక కిఎండ మండ్రెజ్ అట్టిదెర్. 18 గాని దేవుణు అత్తునె మిజి నడిఁపిసి మహొజ, మీరు మోసె సీతి రూలుజ్ లోజెజి దని అడిఁగి మన్ఇదెర్.

19-21 ఒడోల్ది సెఇ ఆనెజ్ కిబిస్సి పణిజ్ విజెరె నెస్సికెజె. అయొకెజ్ ఇని ఇనికెజ్ ఇహొజ, రంకు బూలానిక, కెలార్బూలానిక, సాని బూలానిక, బొమెజి మాడిఁస్సిక, సెట్నిక, పగ ఆనిక, గొడబ ఆనిక,

అతని వనా వందీళ్ల నండో ఆన అనిక, సొంత ఇష్టమకునె సూణిక, కేటెళ్ల అనిక, మిజి వండేఇ వరి బాణిళ్ల దూరం అనిక, మిజి కూడ్డి వరివెట కూడ్డిక, గోన అనిక, సోస్సిక, ఉణిజి తింజి సోసి కర్జిజి సెఇ వణిళ్ల కిజినిక. నాను ముజాలె మిజి డటం వెహ్లా లెకెండ్ మరి వెహ్లాన్. నిని వణిళ్ల కిజి బత్తినికార్ దేవుణు ఏలుబడిః కిని లోకుర్ లోఇ మండ్రెళ్ల అట్వెర్.

22-23 గాని దేవుణు అత్తు వెహ్లాన్ నడిఃపిసిని వన్నిళ్ల నిని గుణమకు మంజిని. అయాకెళ్ల ఇని ఇనికెళ్ల ఇహిజ, మహి వరిళ్ల ప్రేమిస్సాన్, సర్లదాన్ మంజినాన్, సాంతి సమాదనమదాన్ మంజినాన్, కిడు కిత్తిజిబా అయాకెళ్ల ఓరిసి మంజినాన్, కనికారం తోరిస్సాన్, నెగ్గికెజి కినాన్, నమ్మిదెళ్ల తగ్గికాన్, స్సార్లిదాన్ మంజినాన్, సోన్ఎండ మంజినాన్. యా లెకెండ్ కిజి మంజినికార్, ఇని రూలుజిబా తవ్మెర్.

24 క్రీస్తుయేసు వెట కుడిఃతి మనికార్, వరి వడాఃయి బత్తు, వరి సెఇ అనిజ్ విజు, సిలువాదు కుంటిజాణిళ్ల డెయె అతి లెకెండ్ మనాద్. ఇహిజ వారు అయాకెళ్ల పూర్తి డిఃస్తి సితార్. 25 దేవుణు అత్తు మజి కొత్త బత్తు సిత మనాన్. అందెజె దేవుణు అత్తు వెహ్లాన్ నడిఃపిసిని వజ మాటు బత్తిదెళ్ల. 26 మాటు గొప్ప పెరికాట్ ఇజి గర్ల అవిండ మహి వరిళ్ల కోపం రేపిన్ఎండ, గోన అజి సెఇకెళ్ల కిఎండ ఒరెన్ మరి ఒరెన్ వన్ని వెట మండ్రెళ్ల.

6

1 తంబెరిజాండె, మీ లోఇ ఒరెన్ తపు కిత్తిజ, దేవుణు అత్తు నడిఃపిసిని వజ నడిఃజిని మీరు స్సార్లిదాన్ వన్ని తపు దిదిజి, నెగ్గి సరిదు తతెళ్ల. మరి అయాలెకెండ్, మీరుబా పావమదు అర్ఎండ జాగర్ల సుడఃదెళ్ల. 2 మహి వరి బాదెళ్ల, కస్టమకు నెసి వరిళ్ల సాయం కిదెళ్ల. యా లెకెండ్ కిజి క్రీస్తు వెహ్లా రూలుజ్ మీరు పూర్తి కిజినిదెర్. 3 ఎయెన్బా వాండ్రు పెరికాన్ అఇతిజ్బా, గొప్ప పెరికాన్ ఇజి ఒడఃబితిజ వన్నిళ్ల వాండ్రె మొసెం కిబె అజినాన్. 4 విజెరె ఎయెన్ కిజినికెళ్ల నెగ్గికెజ్నా సెఇకెజ్నా ఇజి వాండ్రె సుడః అదెళ్ల. అయావలె వాండ్రు కిజిని దనితాన్ వాండ్రు పొగడః అదెళ్ల అట్టాన్. మహికార్ కిజిని దనిజ్ అవిండ, వాండ్రు కిజినిదాన్ సుడఃజి పొగడః అదెళ్ల. 5 ఎండనిజ్ ఇహిజ, ఒరెన్ ఒరెన్ వన్నిళ్ల, వాండ్రు కిదెళ్ల మని బాజిత మనాద్.

6 దేవుణు మాటు వెంజి నెసినికాన్ ఎయెన్బా వెహ్లాన్ నెస్సిన్ని వన్నిళ్ల, వన్నిళ్ల కల్లితి మని విజు నెగ్గి వనాళ్ల లోఇ వంతు సీదెళ్ల.

7 మిజి మీరె మొసెం ఆమాట్. దేవుణుదిళ్ల సుత్తిసి అర్పెళ్ల ఆనాద్ ఇజి ఒడిఃబిమాట్. నాను ఎండనిజ్ యాక వెహ్లాన్ ఇహిజ, విత్తికాన్ ఇనిక విత్పాండ్రె, అయా పంటని కొయినాన్. 8 ఒడఃల్ది సెఇ అనిజ వజి కిజి బత్తిజినికాన్ నాసనం ఆనాన్. ఎండనిజ్ ఇహిజ వాండ్రు సెఇ ఆన వజ బత్తితాన్. గాని దేవుణు అత్తు వెహ్లాన్ నడిఃపిసిని వజ నడిఃనికాన్ ఎలాకాలం దేవుణు వెట బత్తినాన్. ఎండనిజ్ ఇహిజ, వాండ్రు దేవుణు అత్తు వెహ్లాన్ నడిఃపిసిని వజ బత్తితాన్. 9 నెగ్గి వణిళ్ల కిదెళ్ల విస్సిమాట్. ఎండనిజ్ ఇహిజ, మాటు విస్సిఎండ మహిజ, దేవుణు ఎత్తు కిత్తి సమయమదు మాటు కిత్తి దనిజ్ వాండ్రు పలితం సీనాన్. 10 అందెజె మహి వరివందిజ్ సాయం కిదెళ్ల సమయం దొహ్లావలె, మాటు విజెరిళ్ల నెగ్గికెళ్ల కిదెళ్ల. ముకెలం దేవుణుదిళ్ల, నమ్మితి వరివందిజ్ కిదెళ్ల.

సునతి అవద్ కొత్త బత్తునె ముకెలం.

11 నాను యా మాటెళ్ల నా సొంత కీదాన్ నె రాసిని, ఎసా పెరి అసరమ్కాణిళ్ల రాసిని ఇజి సుడఃదు.

12 మహి యూదురిళ్ల సర్ద కిబిస్సెళ్ల సూణికార్, మీరు తవ్ఎండ సునతి కిబె అదెళ్ల వలె ఇజి మిజి డటం వెహ్లాన్. వారు ఎండనిజ్ యా లెకెండ్ వెహ్లాన్ ఇహిజ, క్రీస్తు సిలువాదు సాతాన్ ఇజి నమ్మితిజనె దేవుణు రక్సిస్సాన్ ఇజి వెహ్లాన్ వలె లోకుర్ వరిళ్ల మాలెళ్ల కినార్. ఆహా వరి ముస్కు మాలెళ్ల రెండం మండ్రెళ్లనె సునతి కిబె అదెళ్ల వలె ఇజి డటం వెహ్లాన్. 13 సునతి కిబె అతికార్బా, మోసె సతి రూలుజ్ విజు లోజివెర్. గాని మిజి సునతి కిబిస్సెళ్ల కోరిజనార్. ఎండనిజ్ ఇహిజ, వారు వెహ్లాన్ మీరు సునతి కిబె అతిదెర్ ఇజి మహి యూదురిళ్ల వెహ్లాన్ వరి నడిఃమె పొగిడః అదెళ్ల సుడఃజినార్. 14 గాని నాను, మా వ్రబు అతి యేసు క్రీస్తు సిలువాదు మా వందిజ్ సాతాన్ ఇజి అవిండ మరి ఇనిదని వందిజ్బా పొగిడః. వాండ్రు అయాలెకెండ్ సాతిజ్, నాను గొప్ప విలువ మనిక ఇజి ఒడఃబిని దనిజ్ యా లోకమదికార్ విలువ సీవెర్. వారు విలువ మనిక ఇజి ఒడఃబిని దనిజ్ నాను

విలువ సిఎ. ¹⁵ ఒరెన్ సునతి కిబె ఆతాండ్రా, సిల్లెనా ఇజి ఆవిద్ ముకెలం. ముకెలమతిక ఇనిక ఇహిజ, ఒరెన్ పడాఃయి బత్కు డఃసి కొత్తాజ్ ఆతాన్ ఇజినె. ¹⁶ యా మాట వెంజి అయా వజ కిని విజెరిజ్ దేవుణు వన్ని సమాదనం సీజి, వన్ని ముస్కు కనికారం తోరిస్నాన్. వీరు ఎయెర్ ఇహిజ, దేవుణు వన్ని వందిజ్ ఎర్లిస్తికారె.

¹⁷ ఆకార్దు, ఎయెన్బా నజి మరి బాదెజ్ కిమాట్. ఎందనిజ్ ఇహిజ యేసుజ్ సేవ కిత్తి వందిజ్ నజి కిత్తి బాదెజు మసెజ్ నా ఒడొల్దు మన్నె. యాకెజ్ నాను వన్ని వెట్టిపణి మణిసి ఇజి తోరిస్సు.

¹⁸ తంబెరిజాండె, మా ప్రబు ఆతి యేసుక్రీస్తు దయ దర్మం మీ ముస్కు మనీద్. ఆమెన్.

అపొస్తుడు ఆతి పవులు ఎపెసుడు మని దేవుణుడిజ్ నమ్మితి వరిజ్ రాస్తి ఉత్తం

నెల్వ కిబిస్సిక

అపొస్తుడు ఆతి పవులు ఎపెసు ఇని పట్టుమీదు మని దేవుణు సజమ్దిజ్ రాసిని ఉత్తమ్నె యాక. యా ఉత్తం రాస్తి మహివలె, వాండ్రు రోమ జెలిదు తోహా ఆత మహాన్. నస్తివలె ఆసియ ఇని రోమ ప్రాంతమ్దు మని ఉండ్రె ముకెలమాతి పట్టుమీనె ఎపెసు.

పవులు యా ఉత్తం రాస్తాండ్రె, తుకికు వెట పొక్కినాన్. దేవుణుడిజ్ నమ్మిత్తికార్, వన్ని దయ దర్మం ఎసా గొప్ప పెరిక ఇజి వారు అర్థం కిజి నెస్టెజ్ రాస్తికాదె. మరి దేవుణు ఎత్తు కిత్తి సజతిజ్ క్రీస్తు వెటనె పూర్తి ఆతె. వాండ్రె విజి వన్యా మున్సు. మనికాన్. క్రీస్తు వెటనె దేవుణు యూదురిజ్, యూదురు ఆఇ వరిజ్ రక్కిసి వరిజ్ ఉండ్రె ఒడోల్ కిజినాన్. ఇబ్బె ఒడోల్ ఇజి వెహ్నినిక, యా లోకమ్దు మని దేవుణుడిజ్ నమ్మిత్తికార్ విజెరె కూడితి మని సజమ్నె. మరి దేవుణు సజం ఎలాగ ఉండ్రె ఆజి మండ్రెజ్ నమ్మిత్తికార్ ఒరెన్ ఒరెన్ ఎలాగ మండ్రెజ్ ఇజి వెహ్నినాన్. నమ్మిత్తికార్ ఎద్రిసినిక యా లోకమ్ది లోకుర్ వెటనె ఆవద్. గాని సయతాను వెటనె ఎద్రిసినికార్ ఇజి ఎత్తు కిబిసి, ఎలాగ సయతానుజ్ ఎద్రిస్టెజ్ ఇజి వెహ్నినాన్.

1 క్రీస్తు యేసు వందిజ్ అపొస్తుడు ఆతి పవులు ఇని నాను ఎపెసు పట్టుమీదు మని దేవుణు వందిజ్ కేట ఆతి వరిజ్ రాసిని ఉత్తం. దేవుణు ఎత్తు కిత్తి వజనె నాను క్రీస్తు యేసు వందిజ్ అపొస్తుడు ఆత. మీరు క్రీస్తు యేసుజ్ నమ్మిజినె మనికిదెర్. 2 మా బుబ్బె ఆతి దేవుణుని ప్రబు ఆతి యేసు క్రీస్తు దయ దర్మమ్దాన్ మీరు నిపాతిదాన్ మండ్రెజ్ సాయం కిపిర్. 3 దేవుణుడిజ్ పొగిడిజినాల్. వాండ్రె మా ప్రబు ఆతి యేసు క్రీస్తు దేవుణు. మరి వాండ్రె వన్ని బుబ్బెబా. ఎందనిజ్ ఇహిజ, దేవుణు ఆత్మ మా మన్సుదిజ్ వెహ్ని, వన్ని సరిదు నడిపిన్దినితాన్ మజి వాజిని విజి నెగికెజ్ సీజి వాండ్రె మజి దీవిస్తాన్. పరలోకమ్దాన్ వాజినికెజె అయా నెగ్గెకెజ్. క్రీస్తు వెట మజి కుడుస్తాండ్రె, యా నెగికెజ్ మజి సీతాన్. 4 ఎందనిజ్ ఇహిజ దేవుణు లోకం పుటిన్ఎండ ముజాలె మజి వన్ని లోకుర్ ఇజి ఎర్లిస్తాన్. క్రీస్తు వెట మజి మని సమమ్దమ్దాన్ యా లెకెండ్ మజి ఎర్లిస్తాన్. మాటు వన్ని వందిజ్ కేట ఆతి లోకుర్ లెకెండ్, ఇని నిందెజ్ సిల్లెండ వన్ని ఎద్రు మండ్రెజ్నె వాండ్రు యా లెకెండ్ ఎర్లిస్తాన్. 5 వాండ్రు మజి ప్రేమిసినాన్. అందెజె యేసు ప్రబు మా వందిజ్ ఆతి దనితాన్ మాటు వన్ని కొడోరె అదెజ్ ఇజి నండో ముజాలె వాండ్రు తిరుమానం కిత్తాన్. వాండ్రు యా లెకెండ్ తిరుమానం కిత్తాన్. ఎందనిజ్ ఇహిజ, అయాకదె వాండ్రు ఎత్తు కిత్తిక. వన్నిజ్ ఇన్లం ఆతిక. 6 అందెజె గొప్ప బమ్మ కిని వన్ని దయ దర్మం వందిజ్ దేవుణుడిజ్ పొగిడిజినాల్. వాండ్రు ప్రేమిసిని వన్ని మరిసి ఆతి దని దనటానె యా గొప్ప దయ దర్మం మా మున్సు వాతాద్. మజి నెడ్డినె దోహ్కాద్. 7-8 క్రీస్తు మా వందిజ్ నల వాక్కి సాతి సావుదాన్ దేవుణు మా పాపమ్కాణిజ్ మజి డిన్పిస్తాన్. ఇహిజ మా పాపమ్కు నెమిస్తాన్. అయా లెకెండ్ వన్ని దయ దర్మం గొప్ప పెరిక ఇజి తోర్లిస్తాన్. మా మున్సు నండో దయ దర్మం నెడ్డినె తోర్లిస్తాన్. వన్ని బుద్ది గెణమ్దాన్ వాండ్రు వన్ని దయ దర్మం మా మున్సు తోర్లిస్తాన్. 9 దేవుణు ఎత్తు కిత్తిక వాండ్రు కిత్తాన్. క్రీస్తు వెట పూర్తి కిదెజ్ ఇజి వాండ్రు వన్ని గర్భమ్దు ఎత్తు కిజి డాప్పి ఇట్టి పణి మజి తోర్లిస్తాన్. అయాక ముజాలె ఎయెర్బా నెన్ఎతార్. 10 వాండ్రు గర్భమ్దు ఎత్తు కిజి డాప్పి ఇట్టిక ఇనిక ఇహిజ, పరలోకమ్దు మని విజి వన్యాజ్, బూమి మున్సు మని విజి వన్యాజ్, కూడుప్పి ఒరెన్ వన్ని అడిగి ఇట్తాన్. వాండ్రె క్రీస్తు. యాక కిదెజ్ తగితి సమయం వానివలె వాండ్రు పూర్తి కినాన్.

11 విజి సజతిజ్ దేవుణు ఎత్తు కిత్తి వజి వాండ్రు కిజినాన్. క్రీస్తు వెట మజి కుడుస్తాండ్రె, వన్ని సొంత లోకుర్ ఇజి మజి ఎర్లిస్తాన్. ఎందనిజ్ ఇహిజ అయా లెకెండ్ ఎర్లిస్టెజ్ ఇజి వాండ్రు పూర్బమ్దునె తిరుమానం కిత మహాన్. అయాకదె వాండ్రు ఎత్తు కిత్తిక. 12 క్రీస్తు రక్కిస్టెజ్ వానాన్లె ఇజి విజెరె ఇంక ముజాలె సమకం ఇట్టికాపె యూదురు ఆతి మాపు. అందెజె దేవుణు గొప్ప పెరికాన్ ఇజి పొగిడిజినాన్.

అయాకదె వన్ని ఉదెనం. 13 అయాలెకెండె యూదురు ఆఇ మీరుబ నిజమాతి బోద వెహిదెర్ ఇహిజ, దేవుణు మిజి రక్సిస్సాన్లె ఇజి వెహిని నువార్త వెహిదెర్. మీరు క్రీస్తు ముస్సు, నమకం ఇట్టిదెర్ వన్ని వెట కూడితి మనిదెర్. అందెజె దేవుణు సీన ఇజి ఒట్టు కిత్తి దేవుణు ఆత్మేజ్ మిజి సితాన్. సితండ్రె దేవుణు మిజి లోకుర్ ఇజి కూక్తాన్. యా దేవుణు ఆత్మనె, మీరు దేవుణు లోకుర్ ఇని దనిజ్ ఉండ్రి గుర్తు. 14 మరి దేవుణు వన్ని లోకురిజ్ ఒట్టు కిత్తి విజు మజి దోహ్కెఇని దనిజ్ ఉండ్రి ఆదారమ్నె యా దేవుణు ఆత్మ. వాండ్రు వన్ని లోకురిజ్ పూర్తి విడుఁదల కినివలె అయొకెజ్ మిజి దోహ్కె. దేవుణు గొప్ప పెరికాన్ ఇజి దినితాన్ లోకుర్ పొగిడిఁనార్.

ఎపెసు సజమ్దు మని వరి వందిజ్ వవులు కిజిని పార్దనం

15-16 దేవుణు మిజి ముస్సు వెస్తా లెకెండె దీవిస్త మనాన్. అందెజె నాను మీ వందిజ్ వన్నిజ్ పార్దనం కిజి. మీరు ప్రబు అతి యేసుజ్ నమ్మిజినిదెర్. దేవుణు వందిజ్ కేట అతి వరిజ్ విజెరిజ్ ప్రేమిసినిదెర్ ఇజి నాను వెహి బాణిజ్ అసి మీ వందిజ్ ఎస్తివలెబా డిఁనెంండె దేవుణుదిజ్ వందనమ్కు వెహిని. ఎస్తివలెబా నాను పార్దనం కినివలె, మీ వందిజ్ పార్దనం కిజి. 17 గొప్ప పెరికాన్ అతి మా బుబ్బిజ్ పార్దనం కిజి. వాండ్రె మా బుబ్బి అతి యేసు క్రీస్తుజ్ దేవుణు. మీరు వన్నిజ్ బాగ నెన్ని వందిజ్ దేవుణు ఆత్మ మిజి గెణం సీదెజ్ ఇజి, దేవుణు వందిజ్ మిజి తెలివి కిబిస్తెజ్ ఇజి నాను వన్నిజ్ పార్దనం కిజి. 18 దేవుణు వందిజ్ కేట అతి లోకుర్ వందిజ్ వాండ్రు ఇట్టి మని గొప్ప పెరి దీవెనమ్కు ఇనికెజ్ ఇజి మీరు నెన్ని వందిజ్, అయా దీవెనమ్కాజ్ ఆసదాన్ ఎర్దు సూణి వందిజ్ వరిజ్ నెస్సిన్ అ ఇజి నాను పార్దనం కిజి. దేవుణు వన్ని లోకురిజ్ సీన ఇజి ఒట్టు కిత్తి దీవెనమ్కు ఎసా పెరికెజ్ ఇజి మీరు నెస్తిజ్ ఇజి నాను వన్నిజ్ పార్దనం కిజి.

19-21 వన్నిజ్ నమ్మిజిని మా లొఇ మని వన్ని సత్తు ఎసా పెరిక ఇజి మీరు నెస్తిజ్ ఇజి నాను పార్దనం కిజి. అయా సత్తు విజు వన్కా ముస్సు గొప్ప పెరిక. యా గొప్ప పెరి సత్తుదాన్ దేవుణు క్రీస్తుజ్ సావుదాన్ బత్తిస్తాండ్రె వరలోకమ్దు వన్ని ఉణెర్ వడఁకాదు బనె కిత్తాన్. క్రీస్తు అబె అతికారం కిజినాన్. విజు రకమ్కాణి అతికారం కిజిని దూతెజ, దెయమ్క ముస్సు అతికారం కిజినాన్. అతికారం కిజిని విజెరె ముస్సు వాండ్రె గొప్ప అతికారం మనికాన్. వన్ని అతికారం ఏలు అతికారం కిజిని వరి ముస్సునె ఆవది. గాని వాని కాలమ్దు అతికారం కిని వరి ముస్సుబా వాండ్రె గొప్ప అతికారం మనికాన్. 22 దేవుణు విజు వన్కాజ్ క్రీస్తు పాదమ్క అడిగి ఇట్టాన్. దేవుణు సజం ముస్సు అతికారి లెకెండె వన్నిజ్ ఏర్పాటు కిత్తాన్. 23 వాండ్రు దేవుణు సజమ్దిజ్ బుర్తె లెకెండె దేవుణు సజమ్నె వన్ని ఒడఁలె లెకెండె దేవుణు సజమ్నె వన్నిజ్ పూర్తి కిజినాద్. ఎంబెబా విజు వన్కాజ్ పూర్తి కిజినికాన్ వాండ్రె.

2

దేవుణు వన్ని కనికారమ్దాన్ మజి రక్సిసినాన్.

1 మీరు క్రీస్తుజ్ నమ్మిజి ముజాల సాతి వరి లెకెండె మహిదెర్. ఎందనిజ్ ఇహిజ మీరు దేవుణుదిజ్ లోజెఇతిదెర్, సెఇ వణిజ్ కిజి మహిదెర్. 2 యా లోకమ్దు మని దేవుణుదిజ్ దూసిస్సికార్ కిజి మహి లెకెండె మీరుబా కిజి మహిదెర్. ఆగాసమ్దు బుల్లెయ్ కిని దెయమ్కాజ్ నెయ్కి అతి సయ్తానుజ్ లోజెఇ మహిదెర్. వీండ్రె దేవుణుదిజ్ లోజెఇ వరి ముస్సు ఏలు అతికారం కిజినాన్. 3 ఉండ్రి కాలమ్దు, నిజమె, మాటుబా సని వరి లెకెండె మహాట్. మా సొంత సెఇ ఇస్సమ్దాన్ కిజి మహాట్. మ ఒడఁలెది ఆసెజ వజ, సెఇ ఆలోసమ్క వజ కిజి మహాట్. మహి విజెరె లెకెండె, మాటుబా దేవుణు కోపమ్దిజ్ గురి అతి మహికాట్. 4 గాని దేవుణు నండొ కనికారం మనికాన్. వాండ్రు మజి నండొ ప్రేమిసినాన్. 5 అందెజె మజి క్రీస్తు వెట కుడుస్తాండ్రె మజి కొత్త బత్తు సితాన్. మాటు దేవుణుదిజ్ లోజెంండె అతి మహిజ్, సాతి వరి లెకెండె మహాట్. అయావలెబా వాండ్రు యా లెకెండె కొత్త బత్తు సితాన్. దేవుణు దయాదర్మదానె వాండ్రు మజి రక్సిస్సాన్. 6 వాండ్రు మజి క్రీస్తుయేసు వెట సావుదాన్ మరెజ బత్తిస్తాండ్రె, వరలోకమ్దు వన్ని వెట కూడిఁజి ఏలుబడిఁ కిదెజ్ బనె కిత్తాన్. క్రీస్తు వెట మజి కుడుస్తాండ్రె యా లెకెండె కిత్తాన్. 7 వాని కాలమ్దు లోకుర్ విజెరె వన్ని దయ దర్మం విజు వన్కా

మున్ను గొప్ప నండ్ పెరిక ఇజి నుడెదెజె యా లెకెండ్ క్రీస్తు వెట మా మున్ను దయ దర్మం తోరిస్తాన్. ⁸ ఎందనిజ్ ఇహిజ దేవుణు, దయాదర్మమమదానె మిజి రక్సిస్తాన్. మీరు క్రీస్తుజ్ నమ్మిత్తి దనితానె రక్సిస్తాన్. మీరు కిత్తి నెగ్గి పణిజాణిజ్ ఆవిద్ వాండ్రు మిజి రక్సిస్తాన్. అయాక వాండ్రు మిజి సీతి ఉండ్రీ ఇనాయమ్నె. ⁹ మీరు కిత్తి నెగ్గి పణిజాణిజ్ ఆవిద్ దేవుణు మిజి రక్సిస్తాన్. అందెజె ఎయెంబా నాను కిత్తి నెగ్గి పణిజాణిజ్ దేవుణు నజి రక్సిస్తాన్ ఇజి పొజిదెజ్ ఆవిద్. ¹⁰ మాటు నెగ్గి పణిజ్ కిజినె మంజిని వందిజ్ క్రీస్తు యేసు వెట మజి కుడుఃవ్తాండ్రె కొత్త బత్తు, మజి సీతాన్. మాటు కిదెజ్ మని యా నెగ్గి పణిజ్ వాండ్రు ముజాలె తిరుమానం కితాండ్రె ఇట్టాన్. నిజమె దేవుణు ఒరెండ్రె యా లెకెండ్ మా బత్తుదిజ్ కొత్తాజ్ కిత్తాన్.

¹¹ అందెజె యూదురు జాతిదు పుల్ ఇతి మీరు క్రీస్తుజ్ నమ్మిణ ముజాలె ఎలాగ మహిదెర్ ఇజి ఎత్తు కిదు. మీరు సునతి కిబె ఆఇకిదెర్ ఇజి యూదురు మిజి వెప్పినార. ఎందనిజ్ ఇహిజ, వారు సునతి కిబె ఆత మనార్. అందెజె వారు దేవుణు లోకుర్ ఇజి ఒడెఃబిజినార్. (గాని యా సునతి ఒరెన్ వన్ని ఒడెఃల్ దు కిని ఆసారమ్నె) ¹² నుడెఃదు, అయా కాలమ్ దు మీరు క్రీస్తుజ్ దూరం మహిదెర్. దేవుణు లోకుర్ ఆతి ఇస్తాయేలుదిజ్ సెందిఇకిదెర్. మీరు పయివారు. దేవుణు వన్ని లోకురిజ్ కిత్తి ఒట్టుదిజ్ సమందం సీలికిదెర్. మీరు యా లోకమ్ దు ఇని ఆస సీల్లెండ, దేవుణుదిజ్ నెన్ ఎండ బత్తిజ మహిదెర్. ¹³ గాని ముజాలె క్రీస్తుజ్ దూరం మహి మీరు ఏలు వన్ని వెట కూడితి మనిదెర్. క్రీస్తు నలె వాక్సి సాతి సావుదాన్ దేవుణు మిజి డగ్గు కిత్తాన్. ¹⁴ క్రీస్తునె యూదురు ఆఇ మిజి, యూదురు ఆతి మజి రాజనం కిబిస్సికాన్. ముజాలె మిజి మజి అడ్డు లెకెండ్ మహి పగ వాండ్రు లాగితండ్రె, ఉండ్రె నన్ని లోకుర్ కిత్తాన్. ¹⁵ యూదురి రూలుదు మని ఆడ్రెజ, రూలుజ క్రీస్తు వన్ని ఒడెఃల్ దు సాతి సావుదాన్ వన్నాజ్ సత్తు సీల్లెండ కితాండ్రె, అడు లెకెండ్ మహి పగ లాగితాన్. ఎందనిజ్ ఇహిజ, రుండి లోకురిజ్ ఇహిజ, యూదురిజ్, యూదురు ఆఇ వరిజ్ వన్ని వెట కుడుప్పి ఉండ్రె నని కొత్త లోకు కిత్తాన్. యా లెకెండ్ వాండ్రు రాజనం కిబిస్తాన్. ¹⁶ మరి సీలువాదు సాతి సావుదాన్ వాండ్రు రుండి జాతిజ నడిఃమి మహి పగ సాస్సిసి, ఉండ్రె నని లోకుర్ లెకెండ్ కిజి, దేవుణు డగ్గు మరెజ తతెజ్ యా లెకెండ్ రాజనం కిబిస్తాన్. ¹⁷ క్రీస్తు యా లోకమ్ దు వాతండ్రె, దేవుణుదిజ్ దూరం మహి యూదురు ఆఇ మిజి, వన్ని డగ్గు మహి యూదురు ఆతి మజి సమాదనం సీజిని సువార్త వెచ్చాన్. ¹⁸ వన్ని వెట మజి రివిరిజ్, ఇహిజ యూదురు ఆఇ మిజి, యూదురు ఆతి మజి, బుబ్బు ఆతి దేవుణు ముజాలె దయెరమ్ దాన్ సాండ్రెజ్ వన్నిజ్ లొస్తాజ్ అక్కు దొహ్ క్కాద్. యాక దేవుణు ఆత్తు వెట మజి దొహ్ క్కాద్. ¹⁹ అందెజె మీరు ఏలుదాన్ పయిదికిదెర్ ఆఇదెర్. దేవుణుదిజ్ సెందిఇకిదెర్ ఆఇదెర్. గాని మీరు దేవుణు లోకుర్ వెట అక్కు ఆతికిదెర్. దేవుణు కుటుమ్ దికిదెర్. ²⁰ ఉండ్రీ ఇల్లు పణకాణిజ్ తొప్పిలెకెండ్ మీరు మనిదెర్. దనిజ్ పునాది ఆతికార్ ప్రవక్తరు, అపొస్తురు. దనిజ్ మూల పణకు క్రీస్తుయేసునె. ²¹ వాండ్రె ఆ ఇల్లు అరెండ్రె అస్సికాన్. వన్ని వెటనె ఆ ఇల్లు తొహ ఆజి పిరిసి ప్రబు ఆతి యేసు క్రీస్తు మండ్రెజ్ వన్ని వందిజ్ కేట ఆతి నెగ్గి ఇల్లు ఆనాద్. ²² క్రీస్తు వెట కూడితి మని మిజి వాండ్రు మహి నమ్మిత్తి వరివెట కుడుప్పినాన్. అయావలె మీరు మహి నమ్మిత్తి వరివెట, దేవుణు వన్ని ఆత్తు సత్తుదాన్ మంజిని ఉండ్రీ ఇల్లు ఆజినిదెర్.

3

యూదురు ఆఇ వరిజ్ సువార్త వెప్పి పణి పవులుజ్ దేవుణు ఒపజెప్పినాన్

¹ అందెజె క్రీస్తు యేసుజ్ సేవ కిని వందిజ్ జెలిదు మని పవులు ఇని నాను మీ వందిజ్ పార్దనం కిజిన. యూదురు ఆఇ మిజి సువార్త వెప్పిని వందిజె నాను జెలిదు ఆత.

² మీరు తవ్ ఎండ్రె వెహిమనిదెర్. దేవుణు దయ దర్మమ్ దాన్, మిజి సువార్త వెప్పి పణి నజి ఒపజెప్పాన్ ³⁻⁴ దేవుణు ఎత్తు కిజి వన్ని గర్బమ్ దు డాప్తి ఇట్టిక వాండ్రు నా వెట తోరిస్తాన్. దిని వందిజ్ నాను మున్ను కండెక రాస్త మన. అయాక మీరు నద్ వితిజ, క్రీస్తు వందిజ్ దేవుణు ఎత్తు కిజి గర్బమ్ దు డాప్తి ఇట్టిక నాను నెస్త మన ఇజి మీరు నెస్సిదెర్. ⁵ యాక దేవుణు పూర్ బమ్ దు మహి లోకురిజ్ తోరిసి నెన్ పిన్ ఎతాన్. గాని ఏలు వన్ని వందిజ్ ఏర్ పాటు కిత్తి అపొస్తుడురిజ్, ప్రవక్తరిజ్ తోరిసి నెన్ పిస్తాన్.

దేవుణులు ఆత్మదాన్ నె ఈహు తోరిసి నెన్ పిస్తాన్. 6 దేవుణులు ఎత్తు కిజి గర్భమదు డాప్పి ఇట్టిక ఇనిక ఇహిజ, యూదురు ఆఇ వరిజ్, యూదురు ఆతి వరివెట దేవుణు సీని దీవెనమ్కాజ్ అక్కు మనాద్. యూదురు ఆఇకాని, యూదురు ఉండ్రె ఒడోల్ ఆత మనార్. దేవుణు క్రీస్తు యేసు వెట యూదురిజ్ కిత్తి ఒట్టుదిజ్, యూదురు ఆఇ వరిజ్ బా వంతు మనాద్. యాకెజ్ మీరు సువార్త నమ్మిత్తిజ్ నె దోహక్త.

7 యా సువార్తనె నాను లోకురిజ్ వెప్పిన. యా సువార్త పణినె దేవుణు వన్ని దయ దర్భమదాన్ నజి ఒపజెప్తాన్. వన్ని సత్తు సీజి నా వెట కిబిసినాన్. 8 దేవుణు లోకుర్ లోఇ నాను ఎండనిజ్ పణిదిజ్ రెఇకాన్. గాని వాండ్రు నజి యా పెరి పణి ఒపజెప్తాన్. ఇహిజ, క్రీస్తు సీజిని అంతు సిలి దీవెనమ్క వందిజ్ యూదురు ఆఇ వరిజ్ వెప్తాజ్, 9 మరి దేవుణు ఎత్తు కిజి గర్భమదు డాప్పి ఇట్టిక ఎలాగ వాండ్రు కిన్ ఇజ లోకుర్ విజెరిజ్ నెస్పిస్తాజ్ వాండ్రు యా పణి నజి ఒపజెప్తాన్. విజు తయార్ కితి దేవుణు పూర్బమదాన్ అసి వాండ్రు ఎత్తు కిజి గర్భమదు ఇట్టిక లోకురిజ్ డాప్తాన్. 10 వాండ్రు ఎండనిజ్ యా లెకెండ్ డాప్తాన్ ఇహిజ, పరలోకమదు మని దూతారిజ్, వన్కా అతికారిజ, వాండ్రు గొప్ప గెణం మనికాన్ ఇజ దేవుణు నజం వెట ఏలు తోరిస్తాజ్ యాక వన్ని లోకుర్ వందిజ్ వాండ్రు ఆతి దనితాన్ నె తోరిసినాన్. 11 లోకం పుటిన్ ఎండ ముజాలె, యా లెకెండ్ కిదెజ్ ఇజ దేవుణు ఎత్తు కిత్ మహాన్. అయాలెకెండ్ మా ప్రబు ఆతి క్రీస్తు యేసు వెట కిత్తాన్ 12 మాటు వన్నిజ్ నమ్మిజినాట్. వన్ని వెట కూడిత మనాట్. అందెజె తియెల్ సిల్లెండ దయర్మదాన్ దేవుణు డర్పు సొన్ని లొస్తాజ్ అక్కు దోహక్త మనాద్. 13 అందెజె మా వందిజె వన్నిజ్ స్రమెజ్ వాతె ఇజ నా వందిజ్ విసారిస్కాట్ ఇజ నాను మిజి బతిమాల్లిన. గాని యా స్రమెజాణిజ్ మిజి గవరం సీనార్.

పవులు ఎపెసుదు మని నమ్మిత్తి పరి వందిజ్ పార్దనం కిజినాన్

14 దినివందిజె, నాను మా బుబ్బు ఆతి దేవుణు ఎద్రు ముణుకుజ్ ఊర్జి మీ వందిజ్ పార్దనం కిజిన. 15 పరలోకమదు మని నమ్మిత్తి విజెరిజ్, యా లోకమదు మని నమ్మిత్తి విజెరిజ్ వీండ్రె బుబ్బు, విజెరె వన్ని కుటుమ్దికార్. 16 వన్ని లోకుర్ వందిజ్ ఇట్టి మని నండో దివెనమ్కాణిజ్, మీ మన్ను దయర్మదాన్ నెగ్రిండ మండ్రెజ్ వన్ని ఆత్మ వెట సత్తు సీదిజ్ ఇజ నాను వన్నిజ్ పార్దనం కిజిన. 17 మీరు క్రీస్తుజ్ నమ్మిజినిదెర్. అందెజె వాండ్రు మీ మన్నుదు ఎలాకాలం మండ్రెజ్ ఇజ నాను పార్దనం కిజిన. మీరు దేవుణుదిజ్ ప్రేమిసి మహి వరిజ్ ప్రేమిసి మండ్రెజ్ ఇజ నాను పార్దనం కిజిన. అయ లెకెండ్ కిజి మహిజ, బూమి లోఇ సారితి సాహి వెల్లెజ్ మని మరాన్ లెకెండ్ మీరు మనిదెర్. నెగ్గి పునాది మున్ను తోహక్తి మని ఇల్లు లెకెండ్ మనిదెర్. 18 అయవలె క్రీస్తు మజి ఎసా ప్రేమిసినాన్ ఇజి మీరు, దేవుణు వందిజె కెట ఆతి లోకుర్ విజెరె వెట పూర్తి నెస్తాజె అట్టిదెర్. వాండ్రు మజి అంతు సిల్లెండ నండో ప్రేమిసినాన్. 19 ఎయెర్బా అర్దం కిదెజ్ అట్ఇ క్రీస్తు ప్రేమ మీరు నెసినె మండ్రెజ్ ఇజి నాను పార్దనం కిజిన. దేవుణుదిజ్ మని పూర్తి బుద్ధి మిజిబా మంజిని వందిజె నాను ఈహు పార్దనం కిజిన. 20 మాటు లొస్సి విజు దని ఇంక, ఒడిబిని దనిజ్ నండో కిదెజ్ దేవుణు అట్టాన్. మా లోఇ పణి కిజిని వన్ని ఆత్మ సత్తుదాన్ నె వాండ్రు కిజినాన్. 21 క్రీస్తు యేసు వెట వాండ్రు కితి గొప్ప పణి వందిజ్, దేవుణు నజం వెట వాండ్రు కితి గొప్ప పణి వందిజ్ యా దేవుణుదిజ్ తర తరమకు పొగిడిజి మంజినాట్. వన్నిజ్ ఎలాకాలం పొగిడిజినాట్. ఆమెన్.

4

క్రీస్తు వెట ఉండ్రె ఒడోల్ ఆతాట్

1 అందెజె ప్రబుజ్ సేవ కిజిని వందిజ్ జెలిదు ఆతి నాను మిజి బతిమాలిజిన. దేవుణు మిజి నా లోకు ఇజ కూక్తివలె నెగ్గి నరిదు నడిదెజ్ ఇజ కూక్తాన్. దనిజ్ తగ్గు వజి మీరు మండ్రెజ్ ఇజి నాను మిజి బతిమాలిజిన. 2 ఎస్సివలెబా గర్త్ర అవిండ తగిజి మండ్రు. మహి వరివెట సొర్దిదాన్ మండ్రు. మహి వరిజ్ ప్రేమిసి, వరి వందిజ్ ఒరిసి మండ్రు. 3 దేవుణు ఆత్మనె మిజి కుడుప్త మనాన్. అందెజె మీరు ఉండ్రె ఆజి మంజిని వందిజ్ నమాదనమ్దాన్ కూడిజి పాడిజి మండ్రెజ్ నండో నుడిదెజ్ వలె. 4 మాటు ఉండ్రె ఒడోల్. ఉండ్రె దేవుణు ఆత్మ మజి దోహక్త మనాన్. దేవుణు మజి వన్ని లోకుర్ ఇజి కూక్తివలె, వాండ్రు సీన ఇజి ఒట్టు కితి ఉండ్రె నని దీవనమ్క వందిజ్ మాటు విజెటె ఆసదాన్ ఎద్రు

నుండేజినాట్. ⁵ మజీ విజెరిజ్ ఒరెండ్రె ప్రబు. మాటు నమ్మిజిని బోద ఉండ్రె. మాటు ఉండ్రె బాప్టిసం లాగె ఆతాట్. ⁶ మాటు ఒరెండ్రె దేవుణుదిజ్ మాడిఃస్నాట్. వాండ్రె విజెరిజ్ బుబ్బు. వాండ్రె విజెరె మున్ను అతికారం కినికాన్. వాండ్రె మా లోఇ మంజినాన్. మా వెట పణి కిబిసినాన్.

⁷ గాని మా లోఇ ఒరెన్ ఒరెన్ వన్నిజ్ ఉండ్రె ఉండ్రె వరం, క్రీస్తు మజీ సితాన్. అయాక వన్నిజ్ ఇస్తుం ఆతి వజ వాండ్రు సీబాత సితాన్. ⁸ అందెజె దేవుణు మాటుదు రాస్త మనాద్, “వాండ్రు ఎత్తు మని బాన్ ఎక్కి సొహివలె, వాండ్రు ఉద్దం గెలస్తివలె, అస్తి వరిజ్ వన్నివెట తోహక్కు ఒతాన్. వాండ్రు లోకురిజ్ ఇనాయమ్కు సీబాత సితాన్”, ఇజి. ⁹ (వాండ్రు ‘ఎక్కు సొహాన్’, ఇజి వెప్పొని దనిజ్ అర్దం ఇనిక? దని అర్దం ఇనిక ఇహిజ, వాండ్రు ముజాల, అడిఃగి మని యా బూమిదు వాతాన్. ¹⁰ యా బూమి మున్ను డిగితి వాతికాండ్రె అగాసం డాట్టి మున్ను నండ్రె అతికారం మని బాన్ ఎక్కి సొహివాన్. యా బూలోకమ్దు మని విజి వన్మాజ్ వన్ని వెట పూర్తి కిదెజె వాండ్రు మున్ను ఎక్కు సొహాన్) ¹¹ వాండ్రె, లోకురిజ్ ఒరెన్ ఒరెన్ వన్నిజ్ ఉండ్రె ఉండ్రె వరం ఒపజెప్తాన్. సెగొండారిజ్ అహొస్తురు ఇజి సెగొండారిజ్ ప్రవక్తురు ఇజి, సెగొండారిజ్ సువార్త వెప్పొకార్ ఇజి, సెగొండారిజ్ దేవుణు సజం నుండేజి, నెస్సిసి, వరిజ్ నెగ్రెండ నడిఃపిస్సి ప్పాస్తురుజు ఇజి వాండ్రు ఏర్పాటు కిత్రాన్. ¹²⁻¹³ ఎందనిజ్ ఇహిజ, దేవుణు లోకురిజ్ దేవుణు పణి కిదెజ్ పూర్తి నెన్పిస్తిజె యా లెకెండ్రె ఏర్పాటు కిత్రాన్. క్రీస్తు ఒడోల్ ఆతి దేవుణు సజమ్దికార్ దేవుణుదిజ్ నెన్ పూర్తి పిరిని వందిజె దేవుణు లోకుర్ దేవుణు పణి కిదెజ్. అయా లెకెండ్రె మాటు దేవుణుదిజ్ నమ్మిజి, వన్ని మురిసీజ్ నెన్ ఉండ్రె ఆజి మంజినాట్. మాటు పూర్తి బుద్ది వాతి వరి లెకెండ్రె పిరినాట్ ఇహిజ క్రీస్తు లెకెండ్రె పూర్తి ఆనాట్. ¹⁴ అయావలె మాటు కొడోర్ లెకెండ్రె మన్ఎట్. గాలి డెఃయిజి, ఉల్కాజ్ ఇతల్ అతాల్ దూక్కిని డోణి లెకెండ్రె, అబద బోద నెస్సిస్సి మొసెం కిని వరి బాణిజ్ మొసెం అఎట్. ¹⁵ గాని మాటు ఎస్తివలెబా నిజం వెప్పొ ప్రేమిసి మండ్రెజ్. అయాలెకెండ్రె మాటు కిజిని విజి వన్మా లోఇ, క్రీస్తు లెకెండ్రె పూర్తి ఆనాట్. వాండ్రె మా బుర్త లెకెండ్రె. ¹⁶ మాటు వన్ని ఒడోల్. ఒడోల్దు ఒడోల్ది అత్తుజ్ అత్తిస్తి లెకెండ్రె క్రీస్తు మజీ అత్తిస్తాన్. ఒడోల్ది అత్తుజ్ విజి అయాలెకెండ్రె పణి కిదెజ్ మని లెకెండ్రె పణి కితిజ, ఒడోల్ సత్తుదాన్ పిపినాద్. అయాలెకెండ్రె దేవుణు సజమ్దికార్ ఒరెన్ మురి ఒరెన్ వన్నిజ్ ప్రేమిసి వారు కిదెజ్ మనికెజ్ కితిజనె దేవుణు సజం సత్తుదాన్ పిరినాద్.

¹⁷ అందెజె ప్రబు నజీ సీతి అతికారమ్దాన్ నాను మిజి వెప్పొన. నాను డటమ్నె మిజి వెప్పొన. ఏలుదాన్ దేవుణుదిజ్ నెన్ఇకార్ కిజిని లెకెండ్రె మీరు మన్మాట్. వారు పణిదిజ్ రెకెజ్ ఒడేఃబినార్ ¹⁸ వరి మున్నుదు సీకాట్ మని లెకెండ్రె మనార్. దేవుణు సీజిని కొత్త బత్తుదిజ్ దూరం మనార్. ఎందనిజ్ ఇహిజ, దేవుణు వందిజ్ నిజమాతికెజ్ వారు అర్దం కిఎర్. వరి మున్ను గటిదిక. ¹⁹ వరిజ్ సిగు సొహాద్. వారు ఒడోల్ది సెఇ ఆసెజ ఒజ ఆతార్. విజి రకమ్కాణి పాపమ్కు కిజినార్. వారు అయాలెకెండ్రె డిఃఎర్. మురి మురి కిదెజె ఆస ఆజినార్. ²⁰ గాని మీరు క్రీస్తు వందిజ్ నెస్తివలె అయాలెకెండ్రె మండ్రెజ్ అఎద్ ఇజి నెస్తిదెర్. ²¹ నిజమ్నె, మీరు వన్ని వందిజ్ వెహిదెర్. మీరు వన్ని వెట కూడిఃతివలె యేసు వందిజ్ నిజమాతి దనిజ్ తగ్గివజ మిజి దేవుణు ఆత్మ నెస్తిస్త మనాన్. ²² మీరు బత్తిజి మహి పడాఃఇ బత్తు డిఃస్తు ఇజిని నెస్తిస్తాన్. పడాఃఇ బత్తుదు, మిజి మహి సెఇ ఆసెజ మిజి మొసెం కిజి పాడు కిజిని మహా. ²³ మీ బుద్దిని మీ మున్ను దేవుణు మారిస్తెజ్ వలె. ²⁴ దేవుణు మిజి వన్ని నని బుద్ది సితాన్. అందెజె వాండ్రు సీతి ఆ కొత్త బుద్దిదాన్ మీరు మండ్రు. అయావలె సీతి నిజాయితీదాన్ మంజినిదెర్. తప్పజ్ కిఎండ్రె మంజినిదెర్.

²⁵ అందెజె ఏలుదాన్ అబద్దం వర్గిమాట్. మహి వరి వెట నిజం వర్గిదెజ్ వలె. ఎందనిజ్ ఇహిజ మాటు ఉండ్రె ఒడోల్దిజ్ సెందితికాట్. ²⁶ మీరు కోపం ఆతిజ, మీ కోపం మిజి పాపం కిబిన్ఎండ్రె నుండేజె. మీ కోపం వెడారు మండ్రెజ్ అఎద్. ²⁷ తప్ప కిబిస్తిజ్ నయతాన్దిజ్ సరి సీమాట్. ²⁸ డోజి కిజి మహికాన్ ఏలుదాన్ డోజి కిదెజ్ అఎద్. గాని వాండ్రు వన్ని కికాణిజ్ కల్బుడిఃజి వన్నిజ్ పణిదిజ్ వానికెజ్ కిదెజ్. ఎందనిజ్ ఇహిజ, అయావలె వాండ్రు బీదవరిజ్ సాయం కిదెజ్ అట్యాన్.

²⁹ మీ వెయ్దాన్ సెఇ మాటెజ్ వాదెజ్ అఎద్. గాని మహికార్ నమకమ్దు పిరిదెజ్ తగ్గి నెగ్గి మాటెజ్ వర్గిదెజ్. లోకురిజ్ వరి అవునరం నుండేజి వర్గిదెజ్. ఎందనిజ్ ఇహిజ అయావలె మీ మాటెజ్ వెని వరిజ్ లాబం మంజినాద్. ³⁰ దేవుణు ఆత్మదిజ్ దుకం కిబిస్మాట్. ఎందనిజ్ ఇహిజ, దేవుణు మిజి

పూర్తి విడుదల కిని దినమదాక మీరు వన్ని లోకుర్ ఇని దనిజ్ గుర్తు యా దేవుణు ఆత్మనె. ³¹ మీ లోజ మని కుత అన్నిక, కోపం, పగ అన్నిక, జటిజ్ అనిక, దుసలాడఃనిక, మహి వరిజ్ సెఇకెజ్ కిజ బుద్ది, మీ లోజహాన్ డిఃస్తు. ³² గాని మహి వరి వందిజ్ నెగ్గికెజ్ కిదు. వరిజ్ కనికారం తోరిస్తు. మిజి కితి సెఇ దని వందిజ్ సెమిస్తు. క్రీస్తు వెట దేవుణు మీ తప్పుజ సెమిస్తి లెకెండ్, మీరు వరిజ్ సెమిస్తు.

5

¹ అందెజె మీరు దేవుణుదిజ్ పోలిజ మండ్రు. ఎందనిజ్ ఇహిజ, వాండ్రు నండో ప్రేమిస్సి వన్ని కొడోరె మీరు. ² క్రీస్తు మజి ప్రేమిస్తాండ్రె, మా వందిజ్ సాదెజ్ వన్నిజ్ వాండ్రె ఒవజెవె ఆతాన్. వాండ్రు వన్ని పాణం నెగ్గి వాసనం సీని పూజ లెకెండ్ సితాన్. దనివెట దేవుణు సరద ఆతాన్. అయావజ మీరుబా ఒరెన్ మరి ఒరెన్ వన్నిజ్ ప్రేమిసి మండ్రు. ³ మీ లోజ ఎయెన్బా రంకు బూలమాట్. కెలార్ బూలమాట్. మని దనిజ్ ఇంక మరి నండో కావాలి ఇజి ఆస ఆమాట్. నిని పణి మీ లోజ మంజినె ఇజి మహికార్ వెహ్తాజ్బా సరి సీదెజ్ ఆఎద్. ఎందనిజ్ ఇహిజ, మీరు దేవుణు లోకుర్. ⁴ గాని మీ లోజ కేడి మాటనో, బుద్ది సీలి మాటనో వెంజి, సిగు ఆని మాటెజ్నో వర్గిదెజ్ ఆఎద్. అయాకెజ్ మిజి తగ్గె. గాని దేవుణుదిజ్ వందనమ్కు మీరు వెహ్తాజ్. ⁵ యాక మీరు తవ్వెండ నెస్తు రంకు బూలానికాన్, కెలార్ బూలానికాన్, మని దనిజ్ ఇంక మరి నండో కావాలి ఇజి ఆస ఆనికాన్ ఎయెన్బా దేవుణుని క్రీస్తు ఏలుబడిః కిని లోకుర్ లోజ మన్ఎర్. అబె అక్కు మనికార్ ఆఎర్. మని దని ఇంక మరి నండో కావాలి ఇజి ఆస ఆనికాన్, బోమెజ మాడిఃస్సి వన్నిలెకెండ్ మనాన్. వాండ్రు వన్నిజ్ కావాలి ఇజి ఆస ఆని దనిజె దేవుణు ఇజి ఒడిఃబినాన్. ⁶ పణిదిజ్ రెజ మాటెజ్ వెప్పి ఎయెన్బా మిజి మొసెం కిఎండ సుడఃదు. ఎందనిజ్ ఇహిజ, సెఇకెజ్ కిజ దేవుణుదిజ్ లోజిఎండ మని వరిజ్ వాండ్రు సిక్స సీనాన్. ⁷ అందెజె నని వరి వెట జత కూడాట్. ⁸ ఎందనిజ్ ఇహిజ, ఉండ్రె కాలమ్దు మీరు సిక్టుదు బత్తితిదెర్. గాని ఏలు మీరు ప్రబు వెట కూడితిదెర్ జాయిదు బత్తిజినిదెర్. అందెజె జాయిదు బత్తిజిని వరిలెకెండ్ బత్తిదు. ⁹ ఎందనిజ్ ఇహిజ జాయిదు బత్తిజినికార్, ఎస్తివలెబా నెగ్గికెజ్, నీతి మనికెజ్, నిజమాతికెజ్ కిజి మంజినార్. ¹⁰ ప్రబుజ్ ఇనికెజ్ ఇస్టం ఇజి నెసి అయావజ కిదెజ్ సుడఃదు. ¹¹ సిక్టుదు మనికార్ కిని పణిదిజ్ రెజ పణిజె వెట కూడాట్. గాని అయాకెజ్ సెఇకెజ్ ఇజి లోకురికె వెహ్తు. ¹² వారు సడి సీల్లెండ కిజిని పణిజె వందిజ్ వెహ్తాజ్బా సిగునె. ¹³ గాని విజు వన్నాజ్ జాయి వెల్లి తపిస్సివలె అయాకెజ్ ఇనికెజ్ ఇజి లోకుర్ నెస్సార్. ఎందనిజ్ ఇహిజ, జాయి నిజమాతికెజె వెల్లి తోర్నాద్. ¹⁴ అందెజె వెప్పి మంజినార్, “నిద్ర కిజికి తెలి ఆఅ. సాతి వరిబాణిజ్ నిజ్అ. క్రీస్తు నిజి జాయి సీనాన్”, ఇజి. ¹⁵ అందెజె మీరు ఎలాగ నడిఃజినిదెర్ ఇజి జాగర్ల సుడఃదు. బుద్ది సీలివరి లెకెండ్ ఆవిండ, బుద్ది మని వరిలెకెండ్ నడిఃదు. ¹⁶ కాలం గడాప్పాట్. ఎందనిజ్ ఇహిజ ఏలు నెగ్గి దనిమ్కు ఆఉ. ¹⁷ అందెజె బుద్ది సీలిలెకెండ్ బత్తిమాట్. గాని ప్రబుజ్ ఇనికెజ్ ఇస్టం ఇజి నెసి అయాకెజ్ కిదు. ¹⁸ మతు సీనికెజ్ ఉణిజి సోసి మన్మాట్. ఎందనిజ్ ఇహిజ అయాక పాడు కినాద్. గాని దేవుణు ఆత్మదాన్ నిండ్రెజి మండ్రు. ¹⁹ మీరు ఒరెన్ మరి ఒరెన్ వన్ని వెట వర్గిని వలె దేవుణు మాటెజ్ పాటెజ్ వజ వెప్పి, దేవుణుదిజ్ పొగిడిఃజి వందనమ్కు వెప్పి, దేవుణు ఆత్మ మీ మన్నుదిజ్ రేప్పిని వజ పాటెజ్ వెప్పి వర్గిదు. మీ మన్ను పూర్తిదాన్ ప్రబు ఆతి దేవుణుదిజ్ పాటెజ్ పార్డు. ²⁰ మా ప్రబు ఆతి యేను క్రీస్తు వెట మజి దోహ్కీ మని విజు దని వందిజ్ ఎస్తివలెబా మా బుబ్బ ఆతి దేవుణుదిజ్ వందనమ్కు వెహ్తు.

దేవుణు సజమ్దిజ్ క్రీస్తు మాసి

²¹ క్రీస్తుజ్ మీరు గవరం సీజినిదెర్. అందెజె ఒరెన్ మరి ఒరెన్వన్నిజ్ లోజిదు. ²² బోదెకాండె, మీరు ప్రబుజ్ లోజిజిని వజ మీ మాసిరిజ్ లోజిదు. మాసిరు మీ మున్ను అతికారం మనికార్ ఇజి ఒడిఃబిజి వరిజ్ లోజిదు. ²³ ఎందనిజ్ ఇహిజ క్రీస్తు, విజు దేవుణు సజమ్కాజ్ బుర్ర ఆతి లెకెండ్, మాసి వన్ని బోదెల్దిజ్ బుర్ర ఆత మనాన్. దేవుణు సజమ్కు విజు క్రీస్తు ఒడిఃల్నె. వాండ్రె విజు దేవుణు సజమ్కాజ్ రక్సిస్సికాన్. ²⁴ విజు దేవుణు సజమ్కు క్రీస్తుజ్ లోజిజిని వజ, బోదెకుబా వన్నా మాసిరిజ్ విజు వన్నా లోజ లోజిదెజ్.

25 మొగ్గ కొడోరాండె, మీరు మీ బోదెకాజ్ ప్రేమిస్తు. క్రీస్తు విజు దేవుణు సజమ్కాజ్ ప్రేమిసి విజు సజమ్క వందిజ్ సాతిలెకెండ మీరు మీ బోదెకాజ్ ప్రేమిస్తు.

26-27 క్రీస్తు ఎందనిజ్ విజు దేవుణు సజమ్కాజ్ వందిజ్ సాతాన్ ఇహిజు, విజు దేవుణు సజమ్కు సుబ్బురమ్దాన్ మండ్రెజ్ ఇజునె. వాండ్రు దేవుణు మాటదాన్, బాప్తిసమ్దాన్ సజమ్కాజ్ సుబారం కిత్తాన్. మరి సజమ్కు ఇని పాపం సిల్లెండ, నిందెజ్ సిల్లెండ, తకుజు సిల్లెండ, ఇని సెఇకెజ్ సిల్లెండ వన్ని ఎద్రు వాండ్రె నెగ్రెండ తోరిస్తెజు విజు దేవుణు సజమ్క వందిజ్ వాండ్రు సాతాన్. 28 అయలెకెండె క్రీస్తు విజు దేవుణు సజమ్కాజ్ ప్రేమిసి నాన్. అయలెకెండెనె ఒరెన్ మాసి అల్లిజ్ ప్రేమిస్తెజ్. ముకెలం మాసిరు వరి సాంత ఒడోల్దిజ్ ప్రేమిస్సి లెకెండ, వరి బోదెకాజ్ ప్రేమిస్తెజ్ వలె. వన్ని బోదెల్దిజ్ ప్రేమిస్సికాన్ వన్నిజ్ వాండ్రె ప్రేమిస్సాన్.

29-30 ఎందనిజ్ ఇహిజు ఎయెన్బా వన్ని సాంత ఒడోల్దిజ్ దూసిన్ఎన్. గాని దనిజ్ నెగ్రెండ సుడోజు పొస కి నాన్. మాటు క్రీస్తు ఒడోల్దు అత్తిత మనాట్. అందెజె క్రీస్తు వన్ని ఒడోల్ ఆతి విజు దేవుణు సజమ్కాజ్ నెగ్రెండ సుడోజునాన్. 31 యాక దేవుణు మాటదు రాస్తి మని లెకెండ మనాద్. అందెజె, “మొగ్గకొడో వన్ని అయిసి అప్పొసిరుజ్ డిసి వన్ని బోదెల్ వెట కూడోనాన్. వారు రిఎర్ ఉండ్రె ఒడోల్ ఆనార్”. 32 యా మాటదిజ్ నండో నిరీ అర్దం మనాద్. గాని యా మాటజ్ క్రీస్తు వెట విజు దేవుణు సజమ్కాజ్ మని సమదం వందిజ్ వెప్పొనికెజ్ ఇజు నాను ఒడోబిజున. 33 గాని యా మాటజ్ మీ వందిజ్బా మనికాదె. ఒరెన్, వన్నిజ్ వాండ్రె ప్రేమిస్సి లెకెండ, వాండ్రు వన్ని బోదెల్దిజ్బా ప్రేమిస్తెజ్ వలె. మరి బోదెల్ మాసిజ్ గవ్దం సీదెజ్ వలె.

6

కొడోరిజ్, అయిసి అప్పొసిరిజ్ వెప్పొనిక

1 కొడోరాండె, మీరు ప్రబు వెట కూడితి మనికిదెర్. అందెజె మీ అయిసి అప్పొసిరిజ్ లోజిదు. యాక కిదెజ్ తగ్గివాదె. 2-3 దేవుణు మాటదు రాస్త మనాద్, “మీ అయిసి అప్పొసిరిజ్ గవ్దం సీదు. యాకదె దేవుణు వెప్తి ఆడ్రెజు లోఇ ఒట్టుదాన్ కూడితి మని మొదోహి ఆడ్రె. అయా ఒట్టు ఇనిక ఇహిజు, ‘మీరు మీ అయిసి అప్పొసిరిజ్ లోజితిజు విజు మిజి నెగ్రెండ మంజిని. మీరు నండో పంటిజ్ యా బూమిదు బత్తినిదెర్’. 4 అప్పొసిరాండె, మీరు మీ కొడోర్ మన్నుదిజ్ కోపం రేవ్మాట్. గాని ప్రబుజ్ ఇన్దం ఆతి వజు, వరిజ్ బుద్ది వెప్పొ, నెప్పొసి పొస కిదు.

వెట్టిపణి కిని వరిజ్ ఎజుమానిరిజ్ వెప్పొనిక

5 వెట్టిపణి కినికిదెరా, బూమి మున్ను, మని మీ ఎజుమానిరిజ్ లోజిదు. మీరు క్రీస్తుజ్ లోజిజిని లెకెండ వరిజ్ లోజిదు. మీరు పూర్తి మన్నుదాన్ వరిజ్ తియెల్ ఆజి వరిజ్ సీని గవ్దం సీజి లోజిదు. 6 నెగ్గికార్ ఇజు వెపె ఆదెజ్ వారు నూణివలెనె ఆవద్. వరిజ్ లోజిదెజ్. గాని మీరు కిదెజ్ ఇజు దేవుణు కోరిజున వజు మీ పూర్తి మన్నుదాన్ కిదు. ఎందనిజ్ ఇహిజు మీరు క్రీస్తుజ్ వెట్టి పణిమణిసీర్. 7 మీరు పణిజ్ కిని వలె, లోకుర్ వందిజ్ కిజినాన్ ఇజు ఆవండ, దేవుణు వందిజ్ కిజినాన్ ఇజు సర్దదాన్ కిదు. 8 ఎందనిజ్ ఇహిజు వెట్టిపణి కినికాన్ ఆతిజ్బా, మరి ఎయెన్ ఆతిజ్బా మరి ఇని నెగ్గి పణి కినికాన్ ఆతిజ్బ ప్రబు పలితం సీనాన్ ఇజు మీరు నెసినిదెర్.

9 ఎజుమానురుజాండె, మీరుబా మీ వెట్టిపణి మణిసిరిజ్ నెగ్రెండ సుడోదు. వరిజ్ బెద్రిస్మాట్. ఎందనిజ్ ఇహిజు మీరు నెప్పొదెర్, మిజిని వరిజ్ ఒరెన్ ఎజుమాని దేవుణు మంజిని బాడిడు మనాన్. ఇజ్జికాన్ పెరికాన్ ఇజు వన్నిజ్ తెడ సిల్లెద్.

సయ్తానుజ్ ఎద్రిస్సిక ఎలాగ ఇజు వెప్పొనాన్

10 కడోవెరిదు నాను మిజి వెప్పొన, ప్రబు వెట మీరు కూడోజు వన్ని సత్తుదాన్ మండ్రు. ఎందనిజ్ ఇహిజు వన్ని సత్తు గొప్పు పెరిక. 11 దేవుణు సీజిని విజు అయిదమ్కు తోడిగిజి తయార్ ఆజి మండ్రు. సయ్తాను అడ్డుజు ఎద్రిసి గెలస్సివందిజ్ యా లెకెండ తోడిజు తయార్ ఆజి మండ్రు. 12 ఎందనిజ్ ఇహిజు, మాటు లోకుర్ వెట ఆవద్ ఎద్రిస్సిక. గాని సీకటుదు మని లోకుర్ మున్ను అతికారం కిజిని దెయమ్క వెట, వన్యా నెయ్కిర్ వెట, ఆగాసమ్దు మని విజు దెయమ్కాజ్నె మాటు ఎద్రిసి నాట్.

13 అందెజె మీరు దేవుణు సీజిని విజు అయుదమ్కు తొడిగిజి సయతానుజ్ ఎద్రిస్తెజ్ తయార్ ఆజి మండ్రు. సెఇ దినమ్కు వానివలె, దయిరమ్దాన్ నిల్దెజ్ అట్టిదెర్. ఆకర్ దాక, మీరు దయరమ్దాన్ నిల్దెనిదెర్. 14 అందెజె మీరు దయరమ్దాన్ నిల్దెజ్ తయార్ ఆజి మండ్రు. ఒరెన్ విదెం కినికాన్ నడుముదు బెట్టు తొపా ఆజి విదెమ్దిజ్ తయార్ ఆజిని లెకెండ, దేవుణు వందిజ్ నిజమాతికెజ్ నమ్మిజి తయార్ ఆజి మండ్రు. గుండెదు కాడెంండ మంజిని వందిజ్ ఇనుము కవసం తొడిగిజిని లెకెండ దేవుణు ఎద్రు సీతి నిజాయితిదాన్ మంజి, సయతాన్ బాణిజ్ తప్రె ఆదు. 15 జార్ఎండ నెగ్రెండ నిల్లి వందిజ్ బూట్టు తొడిగిని లెకెండ సమాదనం సీజిని సువార్త మాట నమ్మిజి, సయతానుజ్ ఎద్రిసి నెగ్రెండ నిల్దు. 16 యాకెజె ఆవిండ, ఒరెన్ ఉద్దం కినికాన్, వన్నిజ్ వడెఃఇకాన్ వన్ని ముస్సు, పొక్కిని సిసు బాణమ్కు డాలు అసి నప్పి ఎద్రిస్తి లెకెండ, సయతాను బాణిజ్ తప్రె అదెజ్ ఎస్తివలెబా యేసు క్రీస్తు ముస్సు, నమకం ఇడెజినె మండ్రు. 17 బుర్దు దెబ తగ్గిఎండ మంజిని వందిజ్ గొప్పు గటి మని టోపి తొడిగిని లెకెండ దేవుణు మిజి రక్సినత మనాన్ ఇజె నెసి నమ్మిజి సయతాన్ మిజి బాదెజ్ కిఎండ వన్ని బాణిజ్ దూరం మండ్రు. కీదు కూడం అసి తయార్ ఆతి లెకెండ, దేవుణు మాటదాన్ సయతానుజ్ ఎద్రిస్తెజ్ తయార్దాన్ మండ్రు. దేవుణు అత్తు మిజి సీజిని కూడెమ్నె దేవుణు మాట. 18 దేవుణు అత్తు మస్సుదు వెప్పి నడిపిస్తి లెకెండ ఎస్తివలెబా పార్దనం కిదు. దేవుణు బాణిజ్ సాయం లొస్తు. మీరు ఎస్తివలెబా పార్దనం కినివలె బదకమ్దాన్ పార్దనం కిమాట్. పార్దనం డిెస్మాట్. దేవుణు వందిజ్ కేట ఆతి లోకుర్ విజెరె వందిజ్ ఎస్తివలెబా పార్దనం కిదు. 19 నా వందిజ్ బా పార్దనం కిదు. నాను వర్గిని వలె నెగ్గి మాట నా వెయిదు దేవుణు సీని లెకెండ, ఎండనిజ్ ఇహిజ, సువార్తదు ముజాలె డాజితి మహి. గాని ఏలు దేవుణు తోరిసి నెన్పిస్తి గొప్పు నజతిజ్ వెల్లి తసి దయిరమ్దాన్ లోకురిజ్ తోరిస్తెజ్.

20 యా సువార్త వెహ్తెజ్, వన్ని కబ్బు తనివన్ని లెకెండ యేసుక్రీస్తు నజి ఏర్పాటు కిత్తాన్. దిని వందిజె ఏలు నాను జెలిదు మన. అందెజె నాను నెగ్రెండ దయిరమ్దాన్ వెహ్తెజ్, మని లెకెండ వెహ్తెజ్ నా వందిజ్ పార్దనం కిదు. 21 మాటు ప్రేమ కిజిని మా తంబెరి ఆతి తుకికు, నా వందిజ్ మిజి విజు వెహ్నన్. నాను ఇనిక కిజిన, ఎలాగ మన ఇజి మీరు నెస్తెజ్ నా వందిజ్ వాండ్రు వెహ్నన్. వాండ్రు ప్రబు వందిజ్ నమ్మకమ్దాన్ సేవ పణి కిజినికాన్. 22 మజి జర్గిజిని దని వందిజ్ మిజి వెహ్తెజ్, మిజి దయిరం మాట వెప్పి ఓదరిస్తెజ్, దిని వందిజె నాను వనిజ్ మీ డగ్రు పొక్కిన. 23 మా బుబ్బు ఆతి దేవుణుని మా ప్రబు ఆతి యేసు క్రీస్తు, తంబెరిజు ఆతి మీరు విజెరె, నిపాతిదాన్ మండ్రెజ్ సాయం కిపిన్. మీరు మహి వరిజ్ ప్రేమిసి మండ్రెజ్ క్రీస్తుజ్ నమ్మిజినె మండ్రెజ్ సాయం కిపిన్. 24 కొన సిల్లెండ, మా ప్రబు ఆతి యేసు క్రీస్తుజ్ ప్రేమిస్తి విజెరిజ్ దేవుణు దయ దర్మం మనీద్.

అపొస్తుడు ఆతి పవులు పిలిపియ పట్టుమ్దు మని దేవుణు సజమ్దిజ్ రాస్తి ఉత్తం నెల్వ కిబిస్సేక

అపొస్తుడు ఆతి పవులు పిలిపియ పట్టుమ్దు మని దేవుణుదిజ్ నమ్మిత్తి వరి సజమ్దిజ్ రాసిని ఉత్తమ్నె యాక. యా సజం మొదొల్సికాన్ పవులునె. డగ్గు పది పంటిజ్ వెనుక, సువార్త వెప్పిని వందిజ్ పవులు జెలిదు మహివలె, యా సజమ్దికార్ వన్నిజ్ ఎత్తు కితారె, వరి లొఇ మని ఎపప్రొదితుజ్ వన్నిజ్ తోడుః కిని వందిజ్ పొక్కినార్. పవులుజ్ సాయమ్బా వన్ని వెట పొక్కినార్. వారు కితి యా నెగ్గి పణి వందిజ్ వరిజ్ వందనమ్కు వెప్పి రాసిని ఉత్తమ్నె యాక. నిజమాతి సర్ద యేసుక్రీస్తు బాణిజె వానాద్ ఇజి వెప్పి వరిజ్ దయరం కిబిసిన్.

¹ క్రీస్తు యేసు పణిమనిసి ఆతి పవులు ఇని నాను రాసిని ఉత్తం. క్రీస్తు యేసు పణిమనిసి ఆతి తిమోతి నా వెట మనాన్. పిలిపియ పట్టుమ్దు మని క్రీస్తు యేసు వెట కూడితి మని దేవుణుదిజ్ కేట ఆతి విజెరిజ్, మరి సజం నడిఃపిన్సి పాస్టర్జ, సజ పెద్దల్జ, రాసినిక. ² బుబ్బు ఆతి దేవుణు ని ప్రబు ఆతి యేసు క్రీస్తు దయా దర్మమ్దాన్ మీరు నిపాతిదాన్ మండ్రెజ్ సాయం కిపిర్.

పవులు కిని పార్దనం

³ నాను ఎన్చివలెబా, మిజి ఎత్తు కినివలె, నా దేవుణుదిజ్ మీ వందిజ్ వందనమ్కు వెప్పిన. ⁴⁻⁵ మీరు సువార్త వెంజి, నమ్మిత్తి దినదాన్ మొదొల్ని ఏలుదాక, సువార్త సాటిన్సి వందిజ్ మీరు నా వెట జత కూడితి మనిదెర్. అందెజి మీ విజెరి వందిజ్ నాను పార్దనం కినివలె, నాను సర్దదాన్ పార్దనం కిజిన. ⁶ మరి, మీ మన్నుదు నెగ్గి పణి మొదొల్ని దేవుణు, క్రీస్తు యేసు వాని రోజుదు అయాక పూర్తి ఆనిదాక, వాండ్రు నడిఃపిన్సె మంజినాన్. యా సజతి, నాను అనుమానం సిల్లెండ పూర్తి నమ్మిజిన.

⁷ మిజి నాను నండొ పెమిన్సు. అందెజి మీ విజెరి వందిజ్ యా లెకెండ్ నాను ఒడఃబిదెజ్ తగ్గికాదె. ఎందనిజ్ ఇహొజ, నాను జెలిదు మనివలెబా, సువార్తదిజ్ విరోదం ఆతికెజ్ వెప్పి వరిజ్ నెగ్గెండ మరజి వెప్పి, అయా సువార్త నిజం ఇజి లోకురిజ్ వెప్పి తోరిన్సి వలెబా, దేవుణు నజి సీతి యా గొప్ప పణిదు మీరు విజెరి నా వెట కూడితి మనిదెర్. ⁸ క్రీస్తు యేసు మిజి ప్రేమిసిని వజనె, నానుబా మిజి ప్రేమిన్సు. మిజి విజెరిజ్ నండొ ఎత్తు కిజిన యాక నిజం ఇని దనిజ్ దేవుణునె సాక్కి. ⁹⁻¹¹ నాను ఈహునె మీ వందిజ్ పార్దనం కిజిన ఇనిక వాతిజ్బా, మీరు ఒరెన్ మరి ఒరెన్ వన్నిజ్ నెగ్గెండ లాపు ప్రేమిని మండ్రెజ్ ఇజి పూర్తి నెస్సెజ్ ఇజి, మరి, ఇనిక వాతిజ్బా, నెగ్గెకెజ్ ఇని ఇనికెజ్, సెఇకెజ్ ఇని ఇనికెజ్ ఇజి మీరు పూర్తి నెస్సెజ్ ఇజి నాను పార్దనం కిజిన. నాను ఎందనిజ్ ఈహు పార్దనం కిజిన ఇహొజ, క్రీస్తు వాని రోజుదాక నెగ్గెకె ఇనిక ఇజి టెట నెసి మీరు ఇని పాపం సిల్లెండ, ఇని నింద సిల్లెండ నెగ్గెండ మండ్రెజ్. మరి, యేసు క్రీస్తు నత్తుదాన్ మీ బత్తు. విజి పలితం వాని లెకెండ్ నీతి నిజయితిదాన్ మంజిని వందిజ్ నాను ఈహు పార్దనం కిజిన. నాను యా లెకెండ్ పార్దనం కిజిన, ఎందనిజ్ ఇహొజ, మీ బత్తు. నుడఃజి లోకుర్ దేవుణుదిజ్ గనం సిదెజ్, పొగిడిదెజ్.

పవులు జెలిదు మనిక సువార్త సాటె ఆని వందిజ్ నెగెద్

¹² తంబెరిజాండె, నజి వాతి బాదెజ్ విజి, మరి నండొ లోకుర్ సువార్త విని వందిజ్ పణిదిజ్ వాతాద్ ఇజి మీరు నెస్సెజ్ ఇజి నాను కోరిజిన. ¹³ అందెజె, క్రీస్తు వందిజ్ సువార్త వెప్పిని వందిజ్నె తోహొ ఆత మన ఇజి రాజు ఇండ్రొ మని జమనుజు విజెరిని మరి పట్టుమ్ది లోకుర్ విజెరి ఏలు నెస్సె మనార్. ¹⁴ మరి నాను తోహొ ఆతి మనిజ్, నమ్మిత్తి తంబెరిజా లొఇ నండొడార్ దయరమ్దాన్ తియిల్ సిల్లెండ దేవుణు మాట వెప్పినార్. ఎందనిజ్ ఇహొజ, నాను జెలిదు మహివలె, ప్రబు ఎలాగ నజి సాయం కితాన్ ఇజి వారు నుడఃతార్. అందెజె, వారు ప్రబు మున్ను. నండొ నమకం ఇట్టా మనార్. ¹⁵⁻¹⁷ నిజమె, సెగొండార్ నా మున్ను. గోస ఆజినార్. గొడుబెజ్ ఆజినార్. అందెజె వారు క్రీస్తు వందిజ్

వెప్పినారే. వీరు నెగ్గి మన్నుదాన్ ఆవిండ, పవులు మున్ను మాపు పెరికావ్ ఇజి పొజె ఆని వందిజె క్రీస్తు వందిజ్ వెప్పినారే. ఈహు కితిజ, నాను జెలిదు మనివలె, మరి నండో బాదెజ్ నజి వాన ఇజి వారు ఒడెబిజినారే. గాని మరి నెగ్గెండో నెగ్గి బుద్దిదాన్ వెప్పినారే. వీరు నజి ప్రైమిసినారే. నువార్తదిజ్ ఎద్రిన్సి వరిజ్, మర్జి వెప్పి నిజం ఇజి తోరిస్తెజ్ దేవుణు నజి ఏర్పాటు కిత మనాన్ ఇజి వీరు నెసినారే. అందెజె వీరు నెగ్గి బుద్దిదాన్ వెప్పినారే. ¹⁸ వారు నా వందిజ్ ఇనిక ఒడెబితిజ్బా, ఇనిక కిదెజ్ సుడెతిజ్బా నజి ఇని తియెల్ సిల్దెద్. నెగ్గి బుద్దిదాన్ ఆతిజ్బా, సెజ బుద్దిదాన్ ఆతిజ్బా, ఎలాగ ఆతిజ్బా, క్రీస్తు వందిజ్ వెమె ఆజినె. అయాకదె ముకెలం. దని వందిజ్ నాను సర్ద ఆజిన.

¹⁹ మరి, సర్ద ఆజినె మంజిన. ఎందనిజ్ ఇహిజ, మీ పార్దనమ్దాన్, యేసు క్రీస్తు నజి సితీ దేవుణు అత్తు సాయమ్దాన్, నజి ఏలు వాతి యా బాదెజ్ విజు, ఆకారదు, నా విడుడల వందిజెనె వాతె ఇజి నాను నెసిన. ²⁰ నాను ఇని దని లోఇబా సిగు ఆవిండ మండ్రెజ్ ఇజినె నాను నండో ఎద్రు సుడెజి ఆస ఆనిక. గాని ఎస్సివలెబా నాను కితి లెకెండ, ఏలుబా నండో దయరమ్దాన్ క్రీస్తు గొప్ప పెరికాన్ ఇజి తోరిస్తు. ఎందనిజ్ ఇహిజ, నాను సాతిజ్బా, బత్తితిజ్బా క్రీస్తు గొప్ప పెరికాన్ ఇజి నాను కిజిని విజు పణిజాణిజ్ నాను తోరిస్తు. ²¹ అందెజె నాను బత్తిజిన ఇహిజ క్రీస్తు వందిజె. నాను సాతిజ్ నజి లాబం. ఎందనిజ్ ఇహిజ, అయావలె నాను క్రీస్తు వెటెనె మంజినలె. ²²⁻²³ గాని నాను బత్తిజి మహిజ, క్రీస్తు వందిజ్ వలితం వాని పణి కిదెజ్ అట్టు. అయావలె ఇనిక నాను కోరిదెజ్? సాదెజనా, బత్తిదెజ్నా? నాను నెన్వె. నాను రుండి వన్యాజ్ గుపె ఆజిన. యా లోకం డిసి క్రీస్తు వెట మండ్రెజ్ ఇజినె నా ఆస. ఎందనిజ్ ఇహిజ అయాకదె నజి ఒదె నెగెద్. ²⁴⁻²⁵ గాని నాను బత్తిజినిక, మిజి గొప్ప అవుసరం. యాక నాను పూర్తి నెసిన. అందెజె, నాను మంజి మీ విజెరె వెట కూడెజి మండ్రెజ్ వలె ఇజి నెసిన. ఎందనిజ్ ఇహిజ, అయావలె, వీరు క్రీస్తుజ్ నెగ్రెండ నమ్మిజి మండ్రెజ్ సాయం కిని వందిజ్ నాను అట్టు. అయాలెకెండ వీరు నెగ్రెండ నమ్మిజినిజ్ వీరు సర్ద ఆనిదెర్. ²⁶ అందెజె, నాను మీ వెట మరి కూడ్లివలె, క్రీస్తు మరి నజి మీ నడిమి తపిస్తాన్ ఇని దని వందిజ్ క్రీస్తుయేసుజ్ పొగిడినిదెర్.

²⁷ ఇనిక ఆతిజ్బా, క్రీస్తు వందిజ్ వెప్పిని సువార్తదు మని దనిజ్ తగ్గి వజ నడిదు. ఎందనిజ్ ఇహిజ, నాను మీ డగ్రు వాజి, మిజి సుడెతిజ్బా, సిలిజ రెండె మీ వందిజ్ వెహిజ్బా, వీరు విజెదెరె సువార్తదు వెప్పిని నమకం వందిజ్ ఉండ్రె మన్ను కల్లిజి ఉండ్రె ఉదెనమ్దాన్ ఉండ్రె ఆజి నెగ్రెండ నిల్లిదెర్లె ఇజి నాను నెస్సాలె. ²⁸ మరి, మిజి ఎద్రిన్సి వరిజ్, ఇని దని లోఇ వీరు తియెల్ ఆజెదెర్ ఇజి నాను నెస్సాలె. యాక దేవుణు వరిజ్ నాసనం కినాన్ ఇని దనిజ్ నెగ్గి రుజువ్ ఆనాద్. గాని దేవుణు మిజి ఎల్లకాలం రక్కిస్తాన్లె ఇని దనిజ్బా రుజువ్ ఆనాద్. దేవుణునె యాకెజ్ విజు కినాన్. ²⁹ క్రీస్తుజ్ నమ్మిదెజ్నె ఆవిండ, వన్ని వందిజ్ కన్జమ్కు ఒరిస్తెజ్బా దేవుణు మిజి అక్కు సిత మనాన్. ³⁰ అందెజె సువార్తదిజ్ విరోదం ఆతికెజ్ వెప్పివరిజ్ ఎద్రిన్సిజ్ కన్జబడిజి దనిజ్ మాటు ఉండ్రె ఆతాల్. నాను ముజాలె, పిలిప్పీయదు మహివలె ఎద్రిన్సిజ్ కన్జబడితిక వీరు సుడెతిదెర్. ఏలుబా కన్జబడిజినిక వెంజినిదెర్.

2

¹ క్రీస్తు వెట కూడితి మనిజ్, మీ బత్తుదు దయరం మనాద్ గదె? క్రీస్తు మిజి ప్రేమిసిని ప్రేమదాన్ మిజి నిసాతి కల్లిత మనాద్ గదె? దేవుణు అత్తు వెట మిజి సమందం మనాద్ గదె? క్రీస్తు మీ వందిజ్ పాణం నొత మనాద్ గదె? ² ఆహె మహిజ, వీరు ఉండ్రె లెకెండ ఒడెబిజి, ఒరెన్ మరి ఒరెన్ వన్నిజ్ ప్రేమిసి, ఉండ్రె మన్నుదాన్, ఉండ్రె ఉదెనమ్దాన్ మంజి, నా సర్ద పూర్తి కిదు. ³ సొంత ఇన్జం వందిజ్ ఆవిండ, కితి దని వందిజ్ నాను కిత ఇజి పొజె ఆవిండ, ఇనికబా కిదెజ్ గాని, మహికార్ నజి ఇంక పెరికార్ ఇజి ఒడిబిజి, తగిజి మండ్రెజ్. ⁴ మీ లోఇ విజెదెరెబా, మీ సొంత పణిజె తోవండ, మహి వరిజ్ సాయం కిదెజ్బా సుడెదెజ్ వలె. ⁵ క్రీస్తుయేసుజ్ మహి యా మన్నునె మిజిబా మండ్రెజ్.

⁶ వాండ్రు ఎస్సివలెబా దేవుణు ననికాన్ ఆతిజ్బా, దేవుణు వెట సమానం ఆతికాన్ ఇజి, అయా అక్కు మండ్రెజ్ వలె ఇజి పటుతల కివెతాన్. ⁷ గాని వాండ్రు వన్ని మన్నుదాన్, అయాక విజు డిస్తాండ్రె, ఒరెన్ పణి కిని వన్ని లెకెండ ఒడెబిజి, లోకు ఆతాన్. ⁸ వాండ్రు ఒరెన్ లోకు ఆతండ్రె, వన్నిజె వాండ్రె తగి ఆతాన్. వాండ్రు దేవుణుదిజ్ లోజెతాండ్రె, సాదెజ్బా వన్నిజ్ వాండ్రె ఒపజెవె ఆతాన్. గొప్ప సిగుదాన్

కూడితి మని సిలువారు సాని సావు సాదెజ్బా వన్నిజ్ వాండ్రె ఒవజెవె ఆతాన్. ⁹ అందెజె దేవుణు వన్నిజ్ గొప్పు పెరికాన్ కితాండ్రె, మహి విజు పెర్కు మున్ను గొప్పు పేరు సీతాన్.

¹⁰⁻¹¹ దేవుణు యా లెకెండ్రెసీతాన్. ఎందనిజ్ ఇహిజు, పరలోకమదు మనికెజ్ విజు, బూమి మున్ను మనికెజ్ విజు సాతికారని మరి తోరెకెజ్ విజు యేసు పేరుదు ముణుకుజ్ ఊర్జి మాడిస్తెజ్. విజు యేసుక్రీస్తు ప్రబు ఇజి వరి వెయ్దాన్ ఒప్పుకొండెజ్. అయ లెకెండ్రె బుబ్బు ఆతి దేవుణుదిజ్ గొప్పు గనం సీజినార్.

¹² అందెజె నాను ప్రేమిసినికిదెరా, దేవుణు రక్కిన్తి లోకుర్ కిదెజ్ తగ్గి పణిజ్, మీ లోజ ఒరెన్ ఒరెన్ తియెల్దాన్ వణుకుదాన్ కిదెజ్ నండ్రె కన్ఠపడిదెజ్. ఎస్తివలెబా, మీరు నా మాట వెంజి లోజీతిదెర్. నాను మీ వెట మనివలెనె ఆవండ, మీ వెట ఏలు సీలివలె, మరి ఒదె అయాక కిదెజ్ కన్ఠబాడిదు.

¹³ మీరు అయాక కిదెజ్ అట్టిదెర్. ఎందనిజ్ ఇహిజు, దేవుణుదిజ్ ఇన్ఠం కితి పణిజ్, కిదెజ్ ఇజి మీ లోజ ఆన పుటిస్సికాన్ దేవుణునె. అయాక కిదెజ్ సాయం కినికాన్బా దేవుణునె.

¹⁴⁻¹⁵ మీరు విజు పణిజ్, ఒరెన్ వన్నిజ్ మొరొ ఆవండ, జటిజ్ ఆవండ కిదెజ్. ఎందనిజ్ ఇహిజు, మీరు మూర్కమ్ది వరి నడిమి, నెజవరి నడిమి బత్తినివలె, నిందెజ్ సిల్లెండ, పాపం సిల్లెండ, ఇని తప్ప సిలి దేవుణు కొడొర్ ఇజి తోరె ఆదెజ్. మీరు నని వరి నడిమి మంజి, బత్తు సీని మాట మీరు నెన్పిస్సివలె, ఆగానమ్దు సుక్కెజ్ ఎలాగ జాయి సీజినానో, అయా లెకెండ్రె మీరుబా మనిదెర్.

¹⁶ మీరు యా లెకెండ్రె మహిజు, క్రీస్తు వాని దినమ్దు నాను గెలస్తి వన్నిలెకెండ్రె సర్ద ఆదెజ్ అట్టు. ఎందనిజ్ ఇహిజు, నాను మీ నడిమి కన్ఠ బాడిజి కితి పణి, ఎందనిజ్ పణిదిజ్ రెండ్రె ఆవతాద్ ఇజి మీ బత్తు రుజువ్ కినాద్. ¹⁷ మీరు సువార్త నమ్మిత్తివలె, మీ బత్తు దేవుణుదిజ్ సీతిదెర్. ఒరెన్ పుజెరి, దేవుణుదిజ్ పూజ సీనివలె, పూజ సీని దని మున్ను ద్రాక్న పట్టు రసం వాక్తి లెకెండ్రె, రోమ అతికారిజు నజీ నప్తిజు, నా నల మీ పూజ మున్ను వాక్తి లెకెండ్రె ఆనాద్. అయ లెకెండ్రె జర్రితిజు, నాను సర్ద ఆజిన. మీ విజెరి వెట సర్ద ఆజిన. ¹⁸ అయాలెకెండ్రె మీరు విజెరెబా నా వెట నండ్రె సర్ద ఆదు.

తిమోతిని ఎవప్రాదితు

¹⁹ తిమోతిజ్ మీ డగ్రు బేగి పొక్తెజ్ ప్రబు ఆతి యేసు నజీ తవ్వెండ్రె సాయం కినాన్ ఇజి నాను ఆన ఆజిన. వాండ్రు నా వందిజ్ వెస్సి, మిజీ సర్ద కిబిస్సాన్. అయ లెకెండ్రె వాండ్రు మర్రజి వాజి మీ వందిజ్ వెస్తిజు, నాను సర్ద ఆన. అందెజె తిమోతిజ్ మీ డగ్రు బేగి పొక్కిన. ²⁰ మీరు నెగ్రెండ్రె మండ్రెజ్ ఇజి నిజం ఆన ఆజినికాన్ వీండ్రె. మీ వందిజ్ వినిజ్ మని ఆన ననికాన్ మరి ఎయెన్బా నా డగ్రు సీలెన్.

²¹ మహికార్ విజెరి, వరిజ్ ఇన్ఠం ఆతి సొంత పణిజె సుండ్రెజినార్. గాని యేసు క్రీస్తుజ్ ఇన్ఠం ఆతికెజ్ తొవర్. ²² గాని, తిమోతి నమ్మకమ్దాన్ ప్రబుజ్ సేవ కిజి నెగ్గికాన్ ఇజి రుజువ్ కితిక మీరు నెస్సిదెర్. అప్పొసి వెట మరిసి ఎలాగ కూడ్డి పణి కినాండ్రె, అయాలెకెండ్రె సువార్త నండ్రె లోకుర్ విని వందిజ్ నా వెట కూడ్డి సాటిస్తాన్. ²³ అందెజె, ఇబ్బె నజీ జర్రిదెజ్ మనిక ఎలాగ జర్గినాద్ ఇజి నెస్తిజు, వెటెన నాను వినిజ్ మీ డగ్రు పొక్తెజ్ ఇజి నాను ఆన ఆజిన. ²⁴ నానుబా బేగి మీ డగ్రు వాదెజ్ ప్రబు నజీ తవ్వెండ్రె సాయం కినాన్ ఇజి నాను నమ్మిజిన.

²⁵ ఎవప్రాదితుజ్ మీ డగ్రు మర్రజి పొక్తెజ్ వలె ఇజి నాను బాగ ఎత్తు కిజిన. వాండ్రు నా తంబెరి ననికాన్. నా వెట జత కూడ్రెజి పణి కినికాన్. క్రీస్తు వందిజ్ నా వెట కూడ్రెజి నండ్రె కన్ఠబాడిజినాన్. నజీ అవ్వసరం మనివలె తోడుజు మంజి సాయం కిదెజ్ మీరు నా డగ్రు పొక్కినాన్. ²⁶ నాను వన్నిజ్ మీ డగ్రు మర్రజి పొక్కిన. ఎందనిజ్ ఇహిజు, వాండ్రు మిజీ విజెరిజ్ నండ్రె ఎత్తు కిజినాన్. వన్నిజ్ జబ్బు వాతాద్ ఇని మాట మీరు విహిదెర్ ఇజి నెస్తిండ్రె, మీరు వెహిదెర్ ఇజి నండ్రె బాద్ ఆజినాన్. ²⁷ నిజమె, వాండ్రు నండ్రె కన్ఠం అర్పి సావు బత్తు ఆతాన్. గాని దేవుణు వన్ని మున్ను కనికారం తోరెస్సాన్. వన్నిజె ఆవండ, నా మున్ను బా కనికారం తోరెస్సాన్. వన్ని జబ్బు వందిజ్ దుకం ఆతి దని మున్ను వన్ని సావు వందిజ్బా దుకం ఆవండ మంజిని వందిజ్ నా మున్ను కనికారం తోరెస్సాన్. వన్నిజ్ నెగెణ్ కితాన్

²⁸ అందెజె, మీరు వన్నిజ్ మరి సుండ్రెజి సర్ద ఆని వందిజ్, నజీ మని దుకం తకు ఆని వందిజ్ గజి బిజి పొక్తెజ్ ఇజి ఒదె ఆన ఆజిన. ²⁹⁻³⁰ అందెజె, ప్రబు వెట కూడితి మని వినిజ్ నండ్రె సర్దదాన్ డగ్రు కిదు. వాండ్రు క్రీస్తుజ్ సేవ కిని వందిజ్ సావు బత్తు ఆతాన్. మీరు నా వందిజ్ కిదెజ్ అట్ఇతి

సాయం కిదెజ్, వాండ్రు వన్ని పాణం సీదెజ్బా గుసె ఆవిండ కితాన్. అందెజె వినిజ్ గవ్వరం సీదు. విని నని వరిజ్బా గవ్వరం సీదు.

3

1 ఆకార్దు, నా తంబెరిజాండె, ప్రబు వెట మీరు కూడితి మనిదెర్. అందెజె, మీరు సర్ద ఆజినె మండ్రు. నాను ముజాలె సెగొండార్ సెఇ వరి వందిజ్ వెహ్తా మన. అయా సజతిజ్ నె మరి మరి రాస్తిజ్బా నాను వంద్. అయాక మిజె మొసెం కిని వరి బాణిజ్ తప్పినాన్.

2 వెరి నుకుడిజు పోలితి వరి వరిజ్ జాగ్రత మండ్రు. వారు నండొ సెఇ పణిజ్ కినికార్. దేవుణుదిజ్ నమ్మితి లోకు ఆని వందిజ్ మొగకొండొర్ సునతి కిబె ఆదెజ్ వలె ఇజి వారు కసితం వెప్పినార్. అయాక నిజం అవెద్. వారు పణిదిజ్ రెండొ ఒడొల్ కొయ్జనార్. అందెజె వరి వందిజ్ జాగ్రత మండ్రు.

3 నాను అహె వెప్పిన. ఎందనిజ్ ఇహిజు, నిజమాతి సునతి కిబె ఆతికాట్ మాటి. వారు అవెర్. ఇహిజు, దేవుణుదిజ్ నిజమాతి లోకుర్ మాటి. దేవుణు అత్తుదాన్, మాటు దేవుణుదిజ్ పొగిడిజె మాడిసినాట్. క్రీస్తు యేసు మా వందిజ్ కితి దని వందిజ్ సర్ద ఆజినాట్. సునతి మున్సు అవెద్,

మా నమకం సునతి కితిజు, దేవుణు కొండొర్ ఆదెజ్ ఆనాద్ ఇజి నమ్మివెట్. 4 అహిజు, యా లెకెండ్ మని సజతిజు మున్సు ఒరెన్ వన్నిజ్ నమకం ఇడదెజ్ ఆనాద్ ఇహిజు, మహి వరిజ్ ఇంక నండొ వెహ్తాజ్ అట్టికాన్ నానె. దేవుణు కొండొర్ ఆదెజ్ యా లెకెండ్ మని సజతిజు కిదెజ్ ఆనాద్ ఇజి ఎయెస్బా ఒడొబితిజు, వన్ని మున్సు మరి ఒదె వెహ్తాజ్ అట్టికాన్ నానె. 5 ఎందనిజ్ ఇహిజు, నాను పుట్టి ఎనిమిది రోస్కాజె నజి సునతి కిత్తార్. నాను ఇస్రావీలు జాతిదిదు మని బెనియమిను తెగ్గుదు పుట్టికాన్. నా అనిగొగొర్ విజెరె ఎబ్రివారు. నానుబా పూర్తి ఎబ్రి వాండ్రునె. నాను పరిసయ వాండ్రు. దేవుణు మొసెజ్

సీతి రూలుజ్ నాను పూర్తి లోజిత. 6 యా లెకెండ్ కినిక దేవుణుదిజ్ ఇన్టం ఆతికాదెసు ఇజి ఒడిబిజి, క్రీస్తు మున్సు నమకం ఇట్టి వరిజ్ నాను నండొ బాదెజ్ కితికాన్. మొసెజ్ సీతి రూలుజు లోజిజె, ఒరెన్, సీతి నిజాయితి మనికాన్ ఇజి తోరె ఆదెజ్ అట్తిజు, వన్ని లెకెండ్ నానుబా తోరె ఆదెజ్ అట్టు. ఎందనిజ్ ఇహిజు, రూలుజు లోఇ ఇనికబా తవ్వెవత.

7 నజి లాబం వానిక ఇజి ఒడిబితి యా సజతిజ్ విజు, పణిదిజ్ రెఇక ఇజి నాను డిస్ట సీత. క్రీస్తుజ్ నెస్సి వందిజె డిస్ట సీత. 8-9 అయాకదె ఆవిండ, నాను ముజాలె కిజె మహి విజు సజతిజ్ పణిదిజ్ రెఇక ఇజి నాను ఒడిబిజిన. క్రీస్తు యేసుజ్ నెసినికాదె విజు వన్యా మున్సు గొప్పు విలువ వనిక. క్రీస్తు యేసుజ్ నెస్సి వందిజె యా సజతిజ్ విజు పణిదిజ్ రెఇక ఇజి డిస్ట సీత. నాను క్రీస్తు వెట కూడిజె మంజిని వందిజ్, మరి, నాను పూర్తి క్రీస్తుయేసు వాండ్రు ఆని వందిజ్ నాను అయాకెజ్ విజు గుమమ్ది కసర ఇజి నాను ఒడిబిజిన. దేవుణు మొసెజ్ సీతి రూలుదు మనికెజ్ లోజిజినిజ్ అవెద్ నాను నీతి నిజాయితి మనికాన్ అతిక. నాను క్రీస్తుయేసు మున్సు నమకం ఇడ్డిజ్నె, దేవుణు నజి నీతి నిజాయితి మనికాన్ ఇజి కూక్తాన్.

10-11 నాను క్రీస్తుజ్ పూర్తి నెస్తిజ్ ఇజినె నాను మరి మరి కోరిజిన. ముకెలం, వాండ్రు సాపుదాన్ నిజితి వలె, దేవుణు వన్నిజ్ సీతి సత్తు నజిబా కావాలి ఇజి నాను కోరిజిన. వాండ్రు నా వందిజ్ కన్ఠమ్కు ఓరిస్తి లెకెండ్ నాను వన్నివందిజ్ కన్ఠమ్కు ఓరిసి వన్ని వెట కూడిజె మండ్రెజ్ ఇజి నాను కోరిజిన. వాండ్రు నా వందిజ్ సాతి లెకెండ్ నాను వన్ని వందిజ్ సాదెజ్ ఇజి కోరిజిన. నాను సాతి వెనుక మరెజి బత్కిని బత్తు ఎలాగ్బా నజి దొప్పొద్ ఇజినె నాను అయా లెకెండ్ కోరిజిన.

12 నాను క్రీస్తు లెకెండ్ పూర్తి అత ఇజి నాను వెహ్. ఇహిజు, దేవుణుదిజ్ ఇన్టం ఆతి వజ నాను పూర్తి అతమన ఇజి వెహ్. గాని క్రీస్తుయేసు నజి కూక్తివలె, నాను ఎలాగ్ మండ్రెజ్ ఇజి వాండ్రు కోరిత మనాండ్రె, దని వందిజ్ నాను కన్ఠబడిజిన.

13 తంబెరిజాండె, క్రీస్తు లెకెండ్ నాను పూర్తి అత ఇజి నాను వెహ్. గాని ఉండ్రీ సజతి నాను కిజిన. నాను ముజాలె కిజె మహి వన్యాజ్ పోసి, నాను బత్కిజిని బత్తు అంతు క్రీస్తు లెకెండ్ మండ్రెజ్ ఇజి నాను సుడిజె కన్ఠబాడిజిన. 14 అందెజె దేవుణు నజి పరలోకమ్దు కూక్కి సీని ఇనాయం లొస్సి నా గురి వందిజ్, నాను కన్ఠ బాడిజిన. ఎందనిజ్ ఇహిజు, క్రీస్తుయేసు మున్సు నాను నమకం ఇట్టా మన. 15 అందెజె, నమకమ్దు పూర్తి పిరీతి మాటు విజెటి, ముజాలె వెహ్తా వజ మండ్రెజ్ ఇజి, ఉండ్రె మన్సు మండ్రెజ్. గాని ముజాలె వెహ్తా ఇని దని లోఇబా మిజి మరి ఉండ్రీ మన్సు మహిజు, దేవుణు అయాకబా

మిజి వెప్పి తోరిస్సాన్. 16 దేవుణు మిజి వెప్పి తోరిస్సి వజ మాటు మండ్రెజ్ ఇనికాదె ముకెలం ఆతిక. 17 తంబెరిజాండె, మీరు విజదెరె, నజి నుడొజి నడిదు. మాపు నడిఃతి వజ నడిఃజిని వరిజ్ నుడొజి మీరు నడిదు. 18 ఎందనిజ్ ఇహిజ, నండొండార్ నమ్మిత్తికాప్ ఇజి వెహె ఆనికార్, క్రీస్తు సిలువాదు సాతి ఉదెనమ్దిజ్ పడిఃఎండ మనార్ ఇజి వరి బత్తుదాన్ తోరిసిన్. నిని వరి వందిజ్ నాను ముజాలె మిజి నండొ నుట్టు వెహ్తా మన. ఏలు వరి వందిజ్ నాను వెప్పి వలె, అడఃబాజినె వెప్పిన్. 19 దేవుణు వరిజ్ నాననం కిన్. వారు ఒడొల్ది ఆన వందిజె బత్తిజినార్. దేవుణుదిజ్ సర్ద కిబిన్దెజ్ బత్తివెర. సిగు తప్పిన్ని పణిజె వారు కిజినార్. వన్యా లొఇనె సర్ద ఆజినార్. యా లొకమ్ది పణి కిదెజె వారు ఎత్తు కిన్. 20 గాని మాటు పరలొకమ్దు మనికాల్. అబెణిజ్ వాని, మజి రక్కిన్ని వన్నిజ్ మాటు ఎద్దు నుడొజినాల్. వాండ్రు ప్రబు ఆతి యేసు క్రీస్తు. 21 వాండ్రు మరజి వానివలె, మా సత్తు సిలి సబ్జి సాని ఒడొల్దిజ్, వన్ని సత్తు మని సబ్జి ఒడొల్ లెకెండ కిన్. విజు వన్యాజ్ అతికారం కిని వన్ని గొప్ప సత్తుదాన్, వాండ్రు యా లెకెండ మా ఒడొల్దిజ్ కిన్.

4

1 అందెజె నా తంబెరిజాండె, ముజాలె నాను నెన్పిన్ని దని వజ మీరు ప్రబు మున్కు మని నమకం డిఃఎండనె మండ్రు. మీరు నా లెకెండ దేవుణుదిజ్ నమ్మిత్తికిదెర. మీరు నజి నండొ ఇన్దం ఆతికిదెర. మీ వెట మండ్రెజ్ నాను నండొ ఆన ఆజిన. మీరె నజి నండొ సర్ద కిబిన్నికిదెర, నజి నెగ్గి పేరు తప్పిన్నికిదెర. 2 ఓ యువొదియ సుంటుకె మీరు కూడొజి పాడొజి మండ్రు ఇజి నాను మిజి బతిమాల్లిన్. ఎందనిజ్ ఇహిజ, మీరు ప్రబు లొకు. 3 మరి, నా వెట సేవ పణి కినికి, నీను నమ్మిదెజ్ తగ్గికి. నీను యా బొదెక్ కూడొజి పాడొజి మంజిని లెకెండ వెహ్తా ఇజి నాను నిజి వెప్పిన్. ఎందనిజ్ ఇహిజ, క్రీస్తు వందిజ్ నువార్ద సాటిన్దెజ్ నా వెట నండొ కన్దబాడిఃతె. మరి, క్లెమెంతు వెట, నా వెట జత పణి కిని మహి వరి వెటబా కూడొజి నువార్ద సాటిన్దెజ్ అవికు నండొ కన్దబాడిఃతె. ఎలాకాలం దేవుణు వెట బత్తిని వరి పేర్కు రాసి ఇడ్డిని పున్దకమ్దు వాండ్రు వన్యా పేర్కు రాస్త మనాన్.

4 ఎన్నివలెబా మీరు సర్ద ఆదు. ఎందనిజ్ ఇహిజ, మీరు ప్రబు లొకుర. నాను మరిబా వెప్పిన్, సర్ద ఆదు. 5 మీరు విజెరె వెట సార్లిదాన్ మంజిన ఇజి తోరిన్. ప్రబు బేగి వానాన్ ఇజి పొస్సాల్ 6 ఇని దని వందిజ్ బా విసారిస్సాల్. గాని ఎలాగ మర్తి సమయమ్దుబా, మహిజ్ బా, సిలిజ్ బా, దేవుణుదిజ్ పార్దనం కిదెజ్. మిజి మని అవ్సరమ్కు వన్నిజ్ వెహ్తాజ్. వన్ని సాయం మీరు లొస్తాజ్. వన్నిజ్ ఎన్నివలెబా వందనమ్కు వెహ్తాజ్. 7 అయావలె, దేవుణు వన్ని సమాదనం మీ మన్కుదు, మీ గర్భమ్దు మిజి కాపాడెదెజ్ సీనాన్. ఎందనిజ్ ఇహిజ, మీరు క్రీస్తు యేసు వెట కూడిఃతి మనికిదెర. యా సమాదనం లొకుర అర్దం కిదెజ్ అట్ ఇక. 8 నా తంబెరిజాండె, ఆకార్దు, నాను ఉండ్రె వెప్పిన్. మీరు ఈహు ఒడిఃబిజి మండ్రెజ్ ఇజి నాను వెప్పిన్. నిజమాతి వన్యాజ్, లొకుర గవేరం సీదెజ్ తగ్గి వన్యాజ్, నాయం మని వన్యాజ్, పాపం సిలి వన్యాజ్, లొకుర ఇన్దం కిదెజ్ తగ్గి వన్యాజ్, గొప్ప పేరు తప్పిన్ని వన్యాజ్, లొకుర పొగిడిఃని వన్యాజ్ మీరు ఒడిఃబిజి మండ్రు. 9 మరి నాను మిజి నెన్పిన్నికెజ్, మీరు నమ్మిత్తికెజ్, కిజినె మండ్రు. నా బాణిజ్ మీరు విహికెజ్, నాను కిజినెకెజ్ మీరు నుడొఃతికెజ్ కిజినె మండ్రు. అయావలె, సమాదనం మిజి సీజిని దేవుణు మిజి తోడుః మంజినాన్.

నజి సీజిని సాయం వందిజ్ వందనమ్కు

10 నెగం రొన్కు డిఃస్తిదెరె, నజి ఎత్తు కిజినావ్ ఇజి ఏలు మీరు తోరిస్సి వందిజ్ నాను ప్రబుజ్ సర్ద ఆజి వందనమ్కు వెప్పిన్. మీరు ఎన్నివలెబా నజి ఎత్తు కిజినె మహిదెరె ఇజి నాను నెన్. గాని నజి సాయం కిజి ఎత్తు కిజినావ్ ఇజి మిజి తోరిస్సెజ్ అవకాసం దొహ్కావతాద్. 11 నజి అవ్సరం మనిజ్ ఇజి ఆవద్ యా లెకెండ వెప్పినిక. ఎలాగ మర్తి సమయమ్దుబా నజి మనికాదె సాలు ఇజి సరి కిదెజ్ నెన్ మన. 12 ఇహిజ, నజి కావాలస్తికెజ్ విజు సిలితివలె ఎలాగ మండ్రెజ్ ఇజి నాను నెసిన. నండొ మనివలె ఎలాగ మండ్రెజ్ ఇజిబా నాను నెసిన. ఎలాగ మర్తి సమయమ్దుబా సరి కిబె ఆదెజ్ నాను నెన్ మన. పొట పంజితి వలెబా, బజ కట్టిని వలెబా, నండొ మనివలెబా, ఇనిక సిలివలెబా సరి కిబె ఆదెజ్ నాను నెన్ మన. 13 యా లెకెండ సరి కిబె ఆదెజ్ విజు నాను అట్ సిన. ఎందనిజ్ ఇహిజ, క్రీస్తు నజి సత్తు సీజినాన్.

14 అహిజ్బా, ఏలు యా లెకెండ్ నాను కస్టమ్దు మనివలె, మీరు నజీ సాయం కితిదెర్. నెగ్గి పణినె కితిదెర్. 15 పిలిప్పీయదు మని నమ్మిత్తికిదెరా, మీరు నెన్నిదెర్ నాను సువార్త వెహ్లాజ్ మొదొల్ని తొలి రోస్కాజ్, నాను మసిదొనియ రాస్ట్రం డీస్తి వాతివలె, మీ సజమ్దికిదెరె నజీ సీతిదెర్, నా బాణిజ్ లొసె ఆతిదెర్. మరి ఎమేణి సజమ్దికార్బా సిఎతార్. 16 మరి నాను తెసెలొనికయ పట్టుమ్దు మహిపలెబా నజీ అవ్సరం మహిపలె మీరు ఉండ్రి సుటునె ఆవిండ నండొ సుట్టు. డబ్బు పొక్తిదెర్. 17 మీరు యా లెకెండ్ మరి డబ్బు పొక్తెజ్ ఇజి నాను ఆస ఆజి వెహ్ఎ. గాని మీరు యా లెకెండ్ సీతి దనిజ్ దేవుణు మిజీ నండొ దీవిన్పిన్ ఇజినె ఆస ఆజిన.

18 ఏలు నజీ సరి ఆని నసా మనాద్. మరి నండొబా మనాద్. మీరు ఎపప్రొదితు వెట పొక్తికెజ్ వాండ్రు తత సితాన్. అందెజె ఒదె నండొ మనాద్. మీరు నజీ సీతిక, దేవుణుదిజ్ సీజిని వాసనం మని పూజ లెకెండ్ మనాద్. వాండ్రు దని వెట సర్ద ఆతండ్రె డగ్రు కితాన్. 19 మరి, నా దేవుణు, మీ అవ్సరం విజి తీరిస్సాన్. లెక్క సిల్లి వన్ని నండొ ఆస్తిదాన్ మాటు బమ్మ ఆని లెకెండ్ తీరిస్సాన్. ఎండనిజ్ ఇహిజ, క్రీస్తు యేసు వెట కూడిఃతి మనికిదెర్. 20 మా బుబ్బు ఆతి దేవుణుదిజ్ అంతు సిల్లెండ ఎల్లకాలం గవరం మనిద్. ఆమెన్. 21 క్రీస్తుయేసు ముస్కు నమకం ఇట్టి దేవుణు లోకుర్ ఆతి విజెరిజ్ నాను వెన్బాతి లెకెండ్ వెహ్లా. నా వెట మని తంబెర్బు మిజీ వెన్బాతి లెకెండ్ వెహ్లానార్.

22 ఇబ్బా మని దేవుణు లోకుర్ విజెరె, ముకెలం కయ్సరు రాజు ఇండ్రొ పణి కిజిని నమ్మిత్తికార్ మిజీ వెన్బాతి లెకెండ్ వెహ్లానార్. 23 ప్రబ్బు ఆతి యేసు క్రీస్తు దయా దర్మం మిజీ తోడు మనీద్. ఆమెన్.

అపొస్తుడు ఆతి పవులు కొలోసు పట్టమీదు మని దేవుణు సజమ్దిజ్ రాస్తి ఉత్తం నెల్వ కిబిస్సిక

అపొస్తుడు ఆతి పవులు కొలోసి పట్టమీదు మని దేవుణు సజమ్దిజ్ రాసిని ఉత్తమనె యాక. వాండ్రు రోమ జెలిదు పొకె ఆతి మహివలె రాస్తికాదె. పవులు ఎసెజ్బా కొలోసి పట్టమీదు సాన్ఎతాన్. వాండ్రు దేవుణు దరోట్ నడిపిస్సి ఎపప్రాదితునె యా పట్టమీదు దేవుణు సజం మొదోల్స్తాన్.

యా లోకమ్దు మని దేవుణుదిజ్ నమ్మిత్తికార్ విజేరె కూడితి మని సజమ్దిజ్ బుర లెకెండ్ క్రీస్తు మనాన్. వన్ని ఒడోలే దేవుణు సజం. వాండ్రు విజు వన్కాజ్ ముజాలె మనికాన్. విజు తయార్ కితికాన్ వాండ్రె. విజు అతికారమ్క ముస్సు అతికారం మనికాన్ వాండ్రె ఇజి ఎత్తు కిబిసి రాసిన్.

నమ్మిత్తికార్ యా లోకమ్ది సజతిజ ముస్సు మన్సు ఇడోఎండ, పరలోకమ్దు మని సజతిజ ముస్సు మన్సు ఇడదెజ్ ఇజి వెప్పినాన్. నమ్మిత్తికార్ ఎలాగ నడిదెజ్ ఇజిబా యా ఉత్తమ్దు రాసి వెప్పినాన్.

1-2 క్రీస్తు యేసు వందిజ్ అపొస్తుడు ఆతి పవులు ఇని నానుని, మా తంబెరి ఆతి తిమోతి కొలోసి పట్టమీదు మని దేవుణు వందిజ్ కేట ఆతి వరిజ్ రాసిని ఉత్తం. దేవుణు ఎత్తు కితి వజనె నాను క్రీస్తు యేసు వందిజ్ అపొస్తుడు ఆత. మీరు నమ్మిదెజ్ తగ్గి తంబెరిజు. మా బుబ్బు ఆతి దేవుణు దయ దర్మమ్దాన్, మీరు నిపాతిదాన్ మండ్రెజ్ సాయం కిపిన్.

3 మాపు మీ వందిజ్ ఒడోబిజి పార్లనం కినివలె, ఎస్తివలెబా మా వ్రబు ఆతి యేసుక్రీస్తుజ్ బుబ్బు ఆతి దేవుణుదిజ్ వందనమ్కు వెప్పినావ్. 4 ఎందనిజ్ ఇహిజ, మీరు క్రీస్తు యేసుజ్ నమ్మిజినిదెర్ ఇజి, దేవుణు వందిజ్ కేట ఆతి లోకుర్ విజెరిజ్ ప్రేమిసినిదెర్ ఇజి మాపు వెహ మనావ్. 5 మీరు యా లెకెండ్, క్రీస్తుయేసుజ్ నమ్మిజినిదెర్, దేవుణు వందిజ్ కేట ఆతి లోకురిజ్ విజెరిజ్ ప్రేమిసినిదెర్. ఎందనిజ్ ఇహిజ, నిజమాతి బోద, ఇహిజ, సువార్త మీరు వెహివలె, దేవుణు పరలోకమ్దు మీ వందిజ్ ఇడ్డి మని దని వందిజ్ ముజాలె మీరు వెహి మనిదెర్. అయాక తవ్ఎండ దోహ్కావ్ ఇజి దని వందిజ్ ఆసదాన్ ఎర్దు సుడోజినిదెర్. 6-7 లోకమ్ది నండో దేసమ్కాజ్ యా సువార్త వెహె ఆతి లెకెండ్, మీ నడిమిబా వెహె ఆత మనాద్. మీరు అయాక వెంజి దేవుణు దయ దర్మం నిజం ఇజి నెస్తి బాణిజ్ అని మీ నడిమి అయా సువార్త నెగ్గి పణి కిజినాద్. మీ నడిమి అయా సువార్త నెగ్గి పణి కిజిని లెకెండ్ మహి లోకురిజ్బా నెగ్గి పణి కిబిస్సాద్. మరి, నండో నండో లోకుర్ సువార్త నమ్మిజినార్. ఎవప్రానె మిజి సువార్త నెన్పిస్తాన్. మాపు వన్నిజ్ ప్రేమిస్సావ్. మజి బదులు వాండ్రు క్రీస్తుజ్ అబె సేవ కిజినాన్. మీ మేలు వందిజ్ నమకమ్దాన్ వాండ్రు క్రీస్తుజ్ సేవ కిజినాన్. 8 దేవుణు అత్తు మీ లోఇ పుటిస్సి ప్రేమదాన్, మీరు దేవుణు వందిజ్ కేట ఆతి లోకుర్ విజెరిజ్ ప్రేమిసినిదెర్ ఇజిబా వాండ్రు మజి వెప్తా మనాన్.

9 అందెజె, మీ వందిజ్ వెహి బాణిజ్ అని, డిస్ఎండ ఎస్తివలెబా మీ వందిజ్ దేవుణుదిజ్ పార్లనం కిజినావ్. మీ బత్తుదు మీరు కిదెజ్ ఇజి దేవుణు కోరిజిన విజు సజతిజ్ మీరు బాగ నెస్సెజ్ ఇజి పార్లనం కిజినావ్. ఇహిజ మీరు, దేవుణు అత్తు సీజిని విజు గెణం, బుద్ది మనికిదెర్ ఆదెజ్ ఇజి మాపు పార్లనం కిజినావ్. 10 మాపు ఎందనిజ్ యా లెకెండ్ పార్లనం కిజినావ్ ఇహిజ, దేవుణు కోరిజిన వజి మీరు బత్తిజి, వన్నిజ్ సరద కిబిస్సికెజ్ ఎస్తివలెబా కిదెజ్. ముకెలం, మీరు విజు రకమ్కాణి నెగ్గి పణి కిని వందిజ్, దేవుణుదిజ్ నిజం మరి లాపు నెస్సి వందిజ్ మాపు యా లెకెండ్ పార్లనం కిజినావ్. 11 దేవుణు, లోకురిజ్ తోరిస్సి గొప్ప బమ్మ కిని వన్ని సత్తుదాన్ మీరు సత్తు మనికిదెర్ అని వందిజ్ యా లెకెండ్ పార్లనం కిజినావ్. ఎందనిజ్ ఇహిజ, ఎస్తివలెబా విజు బాదెజ, సరదదాన్ విజు ఓరిసి, బరిసి మండ్రెజ్, మీరు సత్తు మనికిదెర్ ఆదెజ్. అందెజె యా లెకెండ్ పార్లనం కిజినావ్. 12 మరి, దేవుణు ఏలుబడిదు ఇహిజ గొప్ప జాయిదు వన్ని వందిజ్ కేట ఆతి లోకుర్ వందిజ్ వాండ్రు తయార్ కితి ఇడ్డి మని విజు

దని లోక మిజీబా అక్క మండ్రెజ్ తగ్గి వరి లెకెండ్ మిజీ కితి దని వందిజ్ బుబ్బు ఆతి దేవుణుదిజ్ వందనమ్కు వెహ్సినె మండ్రెజ్ ఇజి మాపు మీ వందిజ్ యా లెకెండ్ పార్దనం కిజినామ్. 13 దేవుణు మజీ నయతాన్ అతికారం అడిగి సీకటుదు తోహా ఆతి బాణిజ్ తప్తెస్తాండ్రె వాండ్రు ప్రేమిసిని వన్ని మరిన్ అతికారం అడిగి మజీ తతాన్. 14 వన్ని మరిన్ ఆతి దనితాన్ దేవుణు మజీ విడుఁదల కిత్తాన్. ముకెలం, మా పాపమ్కు వాండ్రు సెమిస్త మనాన్.

క్రీస్తు విజు వన్కా ముస్సు గొప్ప పెరికాన్

15 తోరె ఇ దేవుణు మూర్తినె క్రీస్తు. దేవుణు ఎలాగ మనాన్ ఇజి వీండ్రు తోరిస్తాన్. దేవుణు విజు తయార్ కిని ముజాల వీండ్రు మహాన్. తయార్ కితి విజు వన్కా ముస్సు అతికారం మనికాండ్రె క్రీస్తు. 16 ఎందనిజ్ ఇహిజు, వన్నివెటనె దేవుణు విజు తయార్ కిత మనాన్. బూమిదు మనికెజ్, ఆగానమ్దు మనికెజ్, తోర్నికెజ్, తోరెకెజ్, ముకెలం గొప్ప సత్తు మని విజు రకమ్కాణి అతికారం కిని విజు దూతెజు దెయమ్కాజ్, విజు వన్ని వెటనె దేవుణు తయార్ కిత్తాన్. విజు క్రీస్తు వెటనె తయార్ కిత్తాన్. విజు వన్నిజ్ గవరం సీని వందిజె దేవుణు తయార్ కిత్తాన్. 17 క్రీస్తు, విజు తయార్ ఆని ముజాల మనికాన్. విజు వన్కాజ్ వాండ్రు కుడుప్పి అస్త మనాన్. 18 వన్ని ఒడోల్ ఆతి దేవుణు సజమ్దిజ్ బుర్త వాండ్రె. వన్ని బాణిజె దనిజ్ కొత్త బత్తు వాజినాద్. ఎందనిజ్ ఇహిజు, సాతి వరి బాణిజ్ ముజాల మరజి బత్తుతి మనికాన్ వాండ్రె. విజు వన్కా ముస్సు గొప్ప పెరికాన్ ఆని వందిజె, సాతి వరి బాణిజ్, ముజాల మరజి బత్తుతి మనాన్. 19 ఎందనిజ్ ఇహిజు, వన్ని లోకనె వన్ని బుబ్బు ఆతి దేవుణు వెల్తి సెల్లెండ పూర్తి మండ్రెజ్ ఇజి తీర్తనం కిత్తాన్. 20 అందెజె, మరిన్ వెటనె బూమిదు మని విజు వన్కాజ్, పరలోకమ్దు మని విజు వన్కాజ్, వన్ని డగ్రు మరజి కుడుఁపైజె ఇజి దేవుణు తీర్తనం కిత్తాన్. వన్ని మరిన్ సీలువాదు సాతివలె, నల వాక్తి దనితాన్, దేవుణు బూమిదు మని విజు వన్కా వెట, దేవుణు మంజిని పరలోకమ్దు మని విజు వన్కా వెట రాజినం ఆతండ్రె, విజు వన్కాజ్ వన్ని డగ్రు మరజి కుడుఁపాన్. 21 ఉండ్రె కాలమ్దు, మీరు కితి సెఇ పణిజాణిజ్, సెఇ ఆలోసనెజాణిజ్ దేవుణు బాణిజ్ దూరం మహిదెర్. దేవుణుదిజ్ పడిఁఎండ మహిదెర్. 22 గాని ఏలు, వన్ని మరిన్ ఒరెన్ లోకు ఆజి సాతి సాపుదాన్ వాండ్రు మీ వెట రాజినం ఆతాన్. ఎందనిజ్ ఇహిజు, ఇని నింద సీలి, ఇని నేరమ్కుబా రెఇ, నోరె ఆతి లోకురె లెకెండ్, క్రీస్తు మరజి వానివలె మిజీ దేవుణు ఎద్దు మిజీ నిల్పెజె వాండ్రు మీ వెట రాజినం ఆతాన్. 23 మీరు సువార్త నమ్మిజి మహిజు అయాలెకెండ్ మంజినిదెర్. మీరు నమ్మకమ్దాన్ దిగజారెండ మండ్రెజ్ వలె. యా సువార్త వెహ్సినె ఆస వందిజ్ డిసెంండ ఎద్దు సుడఁజినె మండ్రెజ్ వలె. యా సువార్తనె నండో దేసెమ్కాణి లోకురె నడిఁమి వెహె ఆత మనాద్. యాక వెహ్తెజె పవులు ఇని సజీ దేవుణు ఏరెపాటు కిత్తాన్.

పవులు దేవుణు సజం వందిజ్ సేవ కిజినాన్

24 ఏలు, మీ మేలు వందిజ్ నాను స్రమెజ్ ఒరిసిన ఇజి సరద ఆజిన. ఇహిజు, క్రీస్తు ఒడోల్ లెకెండ్ మని సజమ్ది మేలు వందిజ్ నాను నా ఒడోల్దు స్రమెజ్ ఒరిస్తెజ్ వలె ఇజి క్రీస్తు ఏరెపాటు కితిక నాను పూర్తి కిజిన. 25-26 దేవుణు సజి సజమ్దిజ్ సేవ కిదెజ్ ఇజి ఏరెపాటు కిత్తాన్. మీ మేలు వందిజ్, క్రీస్తు వందిజ్ మని సువార్త మిజీ పూర్తి నెస్సిన్సి బాజత వాండ్రు నజీ సితాన్. యా సువార్త, ముజాలె బత్తుతి మహి లోకురె బాణిజె దేవుణు డాప్పి వన్ని గర్మమ్దు ఇట్టా మహాన్. గాని ఏలు వాండ్రు వన్ని వందిజ్ కేట ఆతి లోకురిజ్ అయాక తోరిసి నెస్పిస్తాన్. 27 దేవుణు అయాలెకెండ్ కిత్తాన్. ఎందనిజ్ ఇహిజు, వాండ్రు యూదురు ఆఇ వరిజ్ నండో దీవిస్తాన్ ఇజి వన్ని గర్మమ్దు వాండ్రు ఎత్తు కిజి డాప్పి ఇట్టిక వరిజ్ తెలివి కిదెజ్ ఇజి తీర్తనం కిత్తాన్ ఇజి తోరిస్తెజ్. ముకెలం, క్రీస్తు, యూదురు ఆఇ మీ మన్సుదు మంజినాన్. అందెజె, కడఁవేరిదు దేవుణు జాయ్దు మండ్రెజ్ మిజీ ఒనిదెర్ ఇజి ఆసదాన్ ఎద్దు సుడఁజి మంజినిదెర్ ఇజి. యాకదె దేవుణు వన్ని లోకురిజ్ తోరిసి నెస్పిస్తి సువార్త.

28 అందెజె మాపు క్రీస్తు వందిజ్ విజెరిజ్ వెహ్సినామ్. ముకెలం మాపు నండో గెణమ్దాన్ విజెరిజ్ బుద్ది వెహ్సి నెస్పిస్తామ్. ఎందనిజ్ ఇహిజు, క్రీస్తు వెట కూడిఁతి మని వరిజ్ విజెరిజ్ వాండ్రు మరజి వానివలె దేవుణు ఎద్దు నిల్పివలె, వారు పూర్తి ఆతికార్ ఆదెజ్ మాపు బుద్ది వెహ్సి నెస్పిస్తామ్.

29 వారు పూర్తి అతికార్ అని వందిళ్ క్రీస్తు సీజిని గొప్ప సత్తుదాన్ నాను నండొ కష్టబాడిజిన. అయా గొప్ప సత్తునె, నాను కష్టబాడిదెళ్ నజీ సత్తు కిబిస్నాద్.

2

1 మీ వందిళ్, లవొదియ పట్టుమదు మని దేవుణుదిళ్ నమ్మిత్తి వరి వందిళ్, నజీ ఎసెబా తొ ఇ వరి వందిళ్ నాను ఎసొ కష్టబాడిజిన ఇజి మీరు నెస్టెళ్ ఇజి నాను కోరిజన. 2 నాను ఎందనిళ్ యా లెకెండొ కష్టబాడిజిన ఇహిజ, మీరుని వారు, నెగ్రెండ దయరమ్దాన్ నిల్పి వందిళ్, మరి, మీరు ఒరెన్ మరి ఒరెన్ వన్నిళ్ ప్రేమిసిని వజ, కూడొజి పాడొజి మంజని వందిళ్ కష్ట బడిజిన. ఎందనిళ్ ఇహిజ, అయావలె మీరు అనుమానం సిల్లెండ దేవుణు వన్ని గర్బుమదు డాప్తి ఇట్టిక ఇహిజ, క్రీస్తుళ్ పూర్తి నెస్టెళ్. 3 ఎందనిళ్ ఇహిజ, క్రీస్తు వెటె దేవుణు వన్ని గర్బుమదు డాప్తి ఇట్టి విజు గెణమిని అలోసనెళ్ నెస్టెళ్ అట్నాట్. 4 నాను ఎందనిళ్ యా లెకెండొ వెస్సిన ఇహిజ, ఎయెరబా మిజీ తియాని మాటెళ్ వెస్సి మోసెం కిఎండ మండ్రెళ్. 5 నాను మీ నడిమి సిలితిజబా మీ వందిళ్ నండొ ఎత్తు కిజన. నాను నండొ సరదబా ఆజిన. ఎందనిళ్ ఇహిజ, మీరు ఉండ్రె ఆజి కూడొజి పాడొజి మంజనిదెర్. మీరు క్రీస్తుళ్ డటం నమ్మిజనిదెర్ ఇజి నాను నెస్స. 6 మీరు క్రీస్తుయేసుళ్, ప్రబు ఇజి ఒప్పకొటి మనిదెర్. అందెజె వన్ని వెటె కూడితి మనికార్ కిదెళ్ మని లెకెండొ మండ్రు. 7 వన్ని వందిళ్ మిజీ నెన్పిస్తి మనికెళ్ నమ్మిజి, అయకెళ్ కిజిన మండ్రు. అయా సజతిళ్ నలిజిజ నమకమ్దు పిరిదు. మిజీ నెన్పిస్తి వజ నిజమాతి బోదదిళ్ అసిని మండ్రు. మా బుబ్బు ఆతి దేవుణు మీ వందిళ్ కితి దని వందిళ్ పూర్తి మన్సుదాన్ వందనమ్కు వెస్సిన మండ్రు.

8 ఎయెరబా మోసెం కిని బోదెళ్ నెస్సిని మిజీ తొహక్తి మని వరిలెకెండొ కిఎండ జాగర్త మండ్రు. వారు మిజీ అర్దం సిలి మోసెం కిని లోకురిజ్ మని గెణం నెస్సిని మోసెం కినార్. అయాకెళ్ క్రీస్తు బాణిళ్ వాజనికెళ్ ఆఉ. గాని పూరబమ్దాన్ అసి నెస్సినిని బోదెజ బాణిళ్ వాజనికెజె. యా లోకమ్దిళ్ అతికారం కిజని దెయమ్క బాణిళ్ వాజనికెజె. 9 నాను అయ లెకెండొ వెస్సిన. ఎందనిళ్ ఇహిజ, దేవుణు, క్రీస్తు ఒడొల్దునె వెల్తె సిల్లెండ పూర్తి మంజనాన్. 10 క్రీస్తు వెటె మీరు కూడితి మనిళ్, మీ కొత్త బత్తుదిళ్ కావాలిస్తికెళ్ విజు మిజీ సిత మనాన్. అతికారం కిజని విజు సత్తుజ మున్సు, ఏలుబడికిని వరి మున్సు, తొర్ని వన్యాజ్ని, తొరెజ వన్యాజ్ మున్సు, వాండ్రె గొప్ప అతికారం మనికాన్. తొరెజ వన్యాజ్ ఇహిజ, దేవుణు దూతారని దెయమ్కు. వన్యా మున్సు గొప్ప అతికారం మనికాండ్రె వాండ్రు. 11 వన్నివెటె మీరు కూడితి మనిదెర్. అందెజె క్రీస్తు బాణిళ్నుసతి కిబె ఆతి లెకెండొ మనిదెర్. లోకుర్ వరి కివాణిళ్ కిని సునతి కిబె ఆజదెర్, గాని క్రీస్తు కితి సునతిని కిబె ఆతిదెర్. ఇహిజ, క్రీస్తు మీ సెజ ఆసెళ్ విజు పూర్తి లాగితాన్. 12 మరి, మీరు బాప్తిసం లాగె ఆతివలె, క్రీస్తు వెటె సాజి ముని ఆతి లెకెండొ మనిదెర్. వన్ని వెటె మరజి నికె ఆతి లెకెండొ మనిదెర్. దేవుణు గొప్ప సత్తు మనికాన్ ఇజి మీరు నమ్మిజని దనిదానె వన్ని వెటె మరజి నికె ఆతిదెర్. దేవుణు సత్తునె వన్నిళ్ సాతి వరి బాణిళ్ బత్తిస్నాన్.

13 ఉండ్రె కాలమ్దు, మీరు సాతి వరి లెకెండొ మహిదెర్. ఎందనిళ్ ఇహిజ, మీరు పాపమ్కు కిజినె మహిదెర్, పాపం కిబిస్సి సెజ ఆసెజబా మిజీ మహె. అయాకెళ్ సాన్ఎండ మహె. గాని ఏలు మిజీనె దేవుణు క్రీస్తు వెటె కొత్త బత్తు సితాన్. ఎందనిళ్ ఇహిజ, వాండ్రు మా పాపమ్కు విజు నొహన్. 14 ఇహిజ, మజీ సిక్స సీని, మాటు కితి తవుళ్ రాస్తి ఇడ్డి కాకితం సిల్లెండ లెకెండొ మనాద్ అయకెళ్ క్రీస్తు సాతివలె మా పాపమ్క వెటె అయా కాకితమ్బా సిలువాదు కుంటిబాణిళ్ డెయితాండ్రె అయాకెళ్ పూర్తి సిల్లెండ ఆతె ఇజి తొర్నిస్నాన్. 15 అతికారమ్దు మహి ఏలుబడికి కిజి మహి దెయమ్కాజ్ మరి తొరెజ సత్తుజ, దేవుణు విజిస్నాండ్రె, వన్యా మున్సు గెలస్నాన్. క్రీస్తు సిలువాదు ఆతి దనిదనటాన్ దేవుణు వన్యా మున్సు గెలస్నాండ్రె, విజెర్ ఎద్దు వన్యాజ్ సిగు కిత్తాన్.

16 అందెజె, మీరు సెగం బోజనం ఉణిజి తింజని వందిళ్ సిలిజ, మీరు ఏంటు ఏంటు బత్తువందిళ్ కిజని వండొయి కిజ వందిళ్, అమాన్దు వండొయి కిజ వందిళ్, విస్సాంతి దినం సుడొజ వందిళ్ మీరు తప్ప కితిదెర్ ఇజి తిర్పు కిని వన్నిళ్ దూరం కితి. 17 నిని ఆడ్రెళ్ విజు ఉండ్రె నీడొ లెకెండొ మన్సె. ఆ నీడొ ఎయెదిసొ వాండ్రు వెనుక వాజనాన్. అయా వాండ్రు క్రీస్తునె. 18 'తగె ఆజినాప్' ఇజి వేసం

తోరె ఆఇతిజ్, దూతెజ్ మాడిన్ ఇతిజ్, మీరు తపు కితిదెర్ ఇజి మిజి తీర్పు కిని వన్నిజ్ దూరం ఆదు. ఎందనిజ్ ఇహిజ, వాండ్రు కలారు సుడేతి ఇనిదనిజో ఆదారం ఇడేజి అతికారం కిజినాన్. వాండ్రు కిజిని అలోసనెజ్ సెఇకెజ్. అందెజె వాండ్రు గర్ర ఆజినాన్. వాండ్రు గర్ర ఆదెజ్ మని ఇని సజతిబా వన్నిజ్ సిలితిజిబా గర్ర ఆజినాన్. 19 అయా లెకెండ మనికాన్ క్రీస్తు బాణిజ్ ముజాలె దూరం ఆత మనాన్. బుర్ర ఆతి క్రీస్తు వందిజ్ మని నిజమాతి బోద వాండ్రు నెన్పిన్ఎన్. బుర్ర వెప్తి వజనె ఒడోల్ సత్తుదాన్ పిపినాద్. ఒడోల్ అత్పుజాణిజ్ సీరెజాణిజ్ అత్కిన్ మనాద్. అయాలెకెండ, దేవుణు ఎత్తు కితి వజనె సజమదిజ్ సత్తుదాన్ పిరిప్పికాన్ క్రీస్తునె.

20-21 సాతి క్రీస్తు వెట మీరు కూడితి మనిదెర్. అందెజె నని ఆడ్రెజ, బోదెజ లోజిఎండ డిబె ఆతిదెర్. అయకెజ్ క్రీస్తుజ్ నమ్మి ఇ లోకుర్ వందిజ్ ఇడ్డి మనికెజె. అందెజె మరి ఎందనిజ్, సెగం సజతిజ్ వాడుకోడుమాట్, రుసి సుణ్ మట్, ముట్ మాట్, ఇని యా లోకమది ఆడ్రెజ లోజిదెజ్ వలె ఇజి లోజిజి నిదెర్. 22 ఆడ్రెజాదు వెప్పిని బోజనమని మహి సజతిజ్ వాడు కొడుజి మహిజ, సిల్లెండ ఆనె. మరి ఎందనిజ్ అయకెజ్ లోజిజినిదెర్. అయకెజ్ లోకుర్ ఇడ్డి ఆడ్రెజ బోదెజె. 23 నిని ఆడ్రెజ్, ఇట్టికార్ గొప్ప గెణం మనికార్ ఇజి తోర్నార్. ఎందనిజ్ ఇహిజ, లోకుర్ తీర్పునం కిత ఇట్టా మనార్ ఎలాగ మాడిస్టెజ్ ఇజి. అయాలెకెండె కిదెజ్ ఇజి ఆడ్రెజ్ వెప్పినాద్. తగి ఆజినాన్ ఇజి వేసం తోరె ఆదెజ్ ఇజి, దేవుణుదిజ్ సరద కిదెజ్ ఒరెన్ వన్ని ఒడోల్ దిజ్ బాదెజ్ కిదెజ్ ఇజి ఆడ్రెజ్ వెప్పినాద్. అందెజె నిని ఆడ్రెజ్ నెగ్గెకెజ్ ఇజి తోర్నె. గాని, ఒరెన్ వన్నిజ్, వన్ని ఒడోల్ ది ఆనెజ, ఆవ్ కిదెజ్ ఇజి ఆస ఆని వన్నిజ్ ఇని సాయమబా కిఉ. అందెజె నిని ఆడ్రెజ్ లోకురిజ్ సెఇకెజి కిబిన్పు.

3

పరలోకమదు మంజిని సజతిజ వందిజ్ ఎత్తుకిజి మండ్రు

1 క్రీస్తుజ్ సాతి బాణిజ్ దేవుణు బత్కిన్ లెకెండె, మిజి బా వాండ్రు కొత్త బత్కు సితాన్. అందెజె క్రీస్తు మని దేవుణు మంజిని బాడిడు మని సజతిజ వందిజ్ ఎన్వెలబా నండో ఆస ఆజి మండ్రు. వన్నిజ్ దేవుణు గొప్ప అతికారమని నండో మర్యాద సిత మనాన్. 2 యా లోకమదు మని సజతిజ మున్పు మీ మన్పు ఇడ్డాట్. గాని పరలోకమదు మని సజతిజ మున్పు మీ మన్పు ఇడేడు. 3 ఎందనిజ్ ఇహిజ, మీ పడాఱు బత్కు సాత మనాద్. మీరు ఏలు క్రీస్తు వెట దేవుణు ఎద్రు బత్కిజినిదెర్. అయాక లోకుర్ సుడేదెజ్ అట్ఎర్. 4 మిజి నిజమాతి బత్కు సీజినికాన్ క్రీస్తునె. వాండ్రు మరెజి వానివలె, దేవుణు విజెరె ఎద్రు వన్నిజ్ వెల్లి తోరిన్పి వలె మిజిబా వన్నివెట వెల్లి తోరిన్పాన్. మీరుబా వన్ని వెట వన్ని జాయదు మంజినిదెర్. లోకుర్ మిజి వన్ని వెట గవరం సీనార్. 5 అందెజె, మీరు ముజాలె కిజి మహి యా లోకమది తపు పణిజ్ పూర్తి డిస్టు. ముకెలం, రంకు బూలమాట్, కేలార్ బూలమాట్. దిన్ని వందిజ్ నండో ఎత్తు ఆజి మన్పు ఇడ్డాట్. సెఇకెజ్ కిదెజ్ ఆస ఆమాట్. మని దని ఇంక మరి నండో కావాలి ఇజి ఆస ఆమాట్. ఎందనిజ్ ఇహిజ, అయా లెకెండె కినిక మీరు ఆస ఆనిదనిజ్ మాడిసెని లెకెండె మనాద్. 6 యా లెకెండె కిమాట్. ఎందనిజ్ ఇహిజ, దేవుణు కోపం యా లెకెండె కిజిని వరి మున్పు వనాద్. 7 ముజాలె మీరుబా దేవుణుదిజ్ లోజిఎండ మహివలె, యా లెకెండె కిజి మహిదెర్. 8 గాని ఏలు యాకెజ్ ఇనికబా కిమాట్. ముకెలం పగ అస్సాట్. కోపం ఆమాట్. మహి వరి వందిజ్ సెఇకెజ్ ఎత్తు కిమాట్. దుసలాడమాట్. కేడి మాటెజ్ మీ వెయదాన్ వర్గిమాట్. 9 మరి ఒరెన్ వన్ని వెట అబద్దం వర్గిమాట్. ఎందనిజ్ ఇహిజ, మీ పడాఱు బత్కు మీరు డిస్టిదెరె, నస్తివలె కిజి మహి సెఇ పణిజ్ మీరు డిస్టిదెరె. 10 అయకెజ్ డిస్టిదెరె, ఉండీ నెగ్గె కొత్త బత్కు బత్కిజినిదెర్. మిజి తయార్ కితి దేవుణునె యా కొత్త బత్కు మీ లోఇ ఇట్టాన్. వన్ని లెకెండె మంజిని వందిజ్ మరి మరి మిజి కొత్తాజ్ కిజినాన్. వన్నిజ్ మీరు నెగ్గెండె నెన్పి వందిజె, యా లెకెండె మరి మరి కొత్తాజ్ కిజినాన్. 11 అందెజె, యూదురు ఇజినో, యూదురు ఆఇకార్ ఇజినో, సుసతి కిబె అతికార్ ఇజినో, కిబె ఆఇకార్ ఇజినో, తకు జాతిదికార్ ఇజినో, మూర్కమది నని ఒదె తకు జాతిదికార్ ఇజినో, వెటి పణి కినికార్ ఇజినో, కిఇకార్ ఇజినో అవిద్ ముకెలం. గాని క్రీస్తునె ముకెలమాతికాన్. వాండ్రు నమ్మిత్తి వరి విజెరె లోఇ మంజినాన్. 12 మీరు దేవుణు లోకుర్. వాండ్రు మిజి ప్రేమిస్తాండ్రె వన్ని సొంత లోకుర్ ఇజి కేట ఇట్టాన్. అందెజె, మీరు మరి ఒరెన్ వన్ని వందిజ్ మీ పాణం నొతెజ్ దయ తోరిన్పు. తగిజి మండ్రు. సార్లెదాన్ మండ్రు.

ఓరిసి మండ్లు. ¹³ మహి వరి వెట బరిస్తు. మీ లోక ఒరెన్ మరి ఒరెన్ వన్ని వెట మొరొ ఆజి మహిజ, అయ్యాక ఇనిక ఆతిజ్బా సెమిస్తు. ప్రబు ఆతి క్రీస్తు మిజి సెడ్డినె సెమిస్తి వజ, మీరు సెమిస్తు. ¹⁴ దినిజ్ విజు ఇంక మహి వరిజ్ ప్రేమిస్తు. అయ్యాకదె ముకెలం. ఎందనిజ్ ఇహిజ, మీరు ప్రేమిస్సి దనిదనటాన్ మీరు పూర్తి కూడజి మంజినిదెర్.

¹⁵ మీరు ఒరెన్ మరి ఒరెన్ వన్ని వెట కూడజి పాడజి మండ్రెజ్ క్రీస్తు సీని సమదనం నీ మన్నుదు మంజినాద. ఎందనిజ్ ఇహిజ, మీరు దేవుణు సజమదు ఒరెన్ మరి ఒరెన్ వన్నివెట సమాదనమదాన్ మంజిని వందిజె, దేవుణు మిజి కూక్త మనాన్. దేవుణు కితి సజతిజ వందిజ్ ఎస్తివలెబా పోన్ఎండ దనిజ్ ఎత్తుకిజినె వందనమకు వెప్పి మండ్లు. ¹⁶ క్రీస్తు వందిజ్ మని బోద మీరు నెగ్రెండ నెసినె మండ్లు. నండొ గెణమదాన్ ఒరెన్ వన్నిజ్ నేర్పిసి, బుద్ది వెప్పి మండ్లు. దేవుణు మాటెజ్ పాటెజ్ వజ పార్జి, దేవుణుదిజ్ పొగిడిజె వందనమకు వెప్పిని పాటెజ్ పార్జి, దేవుణు ఆత్మ మీ మన్నుదిజ్ రేప్పిని వజ పాటెజ్ పార్జి మండ్లు. దేవుణు కితికెజ్ పోన్ఎండ మీ పూర్తి మన్నుదాన్ దేవుణుదిజ్ పాటెజ్ పార్లు. ¹⁷ మీరు ఇనిక వెప్పిజ్బా, ఇనిక కితిజ్బా ప్రబుయేసుజ్ లోజితికార్ కిదెజ్ మని వజ కీదు. మా ప్రబు ఆతి క్రీస్తు వెట, మిజి దోహక్తి దని వందిజ్ బుబ్బి ఆతి దేవుణుదిజ్ వందనమకు వెప్పివలె, యా లెకెండ కీదు.

దేవుణుదిజ్ నమ్మిత్తికార్ ఒరెన్ ఒరెన్ ఎలాగ మండ్రెజ్.

¹⁸ బోదెకాండె, మీరు మీ మాసిరి మీ మున్ను అతికారం మనికార్ ఇజి ఒడజిబిజి వరిజ్ లోజిదు. మీరు ప్రబు వెట కూడితి మనికిదెర్. అందెజె అయ్యాకదె మీరు కిదెజ్ మనిక.

¹⁹ మాసిరాండె, మీరు మీ బోదెకాజ్ ప్రేమిస్తు. వన్కాజ్ బాదెజ్ కిమాట్.

²⁰ కొడొరాండె, మీరు మీ యాయ బుబ్బిజ్ ఎస్తివలెబా వెండ్లు. ఎందనిజ్ ఇహిజ, యాకదె ప్రబుజ్ ఇన్లం ఆతిక.

²¹ అప్సారిరాండె, మీ కొడొరొ మన్ను రుజ్ఎండ మంజిని వందిజ్ మరి మరి జటిజ్ ఆమాట్.

²² వెటి పణి కినికిదెరా, మీరు యా లోకమది మీ ఎజుమారుజ, విజు వన్కా లోక లోజిదు. నెగ్గికార్ ఇజి వెహె ఆదెజ్ వారు సూణివలెనె ఆవద్. గాని పూర్తి మన్నుదాన్ వరిజ్ లోజిదు. ఎందనిజ్ ఇహిజ, మీరు ప్రబుజ్ తియెల్ ఆజి గవరం సీజినిదెర్. ²³ మీరు ఇనిక కితిజ్బా, పూర్తి మన్నుదాన్ కీదు. లోకుర్ వందిజ్ ఆవద్. గాని దేవుణు వందిజ్ కిజినాప్ ఇజి పూర్తి మన్నుదాన్ కీదు. ²⁴ ఎందనిజ్ ఇహిజ, ప్రబునె మిజి పలితం సీనాన్ ఇజి మీరు నెసినెదెర్. ఇహిజ, వాండ్లు ఒట్టు కితికెజ్ మిజి దోహక్తె. ఎందనిజ్ ఇహిజ మీరు సేవ కిజిని నిజమాతి ఎజమాని ప్రబు ఆత క్రీస్తునె. ²⁵ తప్తు కిని వన్నిజ్, వాండ్లు ఎయెన్ ఆతిజ్బా వాండ్లు కితి తప్పుదిజ్ దేవుణు సిక్స సీనాన్. ఇజ్జికార్ పెరికార్ ఇజి దేవుణుదిజ్ తేడ సిల్లెద్.

4

¹ ఎజుమానిరాండె, మీరు మీ వెట్టిపణి మనిసీరిజ్ నాయమదాన్, వరిజ్ సీదెజ్ మనికెజ్ సీజి నెగ్రెండ నుడెదు. ఎందనిజ్ ఇహిజ, మిజిబా ఒరెన్ ఎజమాని పరలోకమదు మనాన్ ఇజి ఒడజిబిదు.

² విస్కిఎండ పార్లనం కిజి మండ్లు. మీరు పార్లనం కినివలె మన్ను ఇతాల్ అతాల్ ఆవిండ జాగర్లదాన్ మండ్లు. దేవుణు మిజి కితి దని వందిజ్ వందనమకు వెప్పి మండ్లు. ³ మరి మా వందిజ్బా పార్లనం కీదు. దేవుణు బోద వెప్పాజ్ మజి సరి దోహక్తెజ్ సాయం కిపిన్ ఇజి పార్లనం కీదు. ఎందనిజ్ ఇహిజ, క్రీస్తు వందిజ్ ఉండ్రె కాలమదు డాజితి మహికెజ్ గాని, ఏలు తోరె ఆతి నిజమాతి సజతిజ్ బోద్దిస్తెజ్. యాక బోద్దిస్తెజ్, నాను జెలిదు ఆత. ⁴ యాక నాను బోద్దిస్తెజ్ మనికాదె. అందెజె నాను నెగ్రెండ, అర్లం ఆనిలెకెండె వెప్పాజ్ నజి సరి దోహక్తెజ్ సాయం కిపిన్ ఇజి నా వందిజ్ దేవుణుదిజ్ పార్లనం కీదు. ⁵ మీరు కిజిని దనితాన్ తెలివిదాన్ నమొక వరివెట మండ్లు. మిజి దోహక్తి సమయమదు విజు క్రీస్తు వందిజ్ వరిజ్ వెప్పాజ్ తయార్దాన్ మండ్లు. ⁶ మీరు తెలివిదాన్, నెగ్రెండ, ఎస్తివలెబా వరి వెట వర్గిదు. అయ్యావలె, వరి లోక విజెరె వెట వారు వెన్బాతి దనిజ్ ఎలాగ మర్జి వెప్పాజ్ ఇజి ఎస్తివలెబా నెస్సిదెర్. ⁷ నజి జర్గిజిని విజు సజతిజ్, తుకికు మిజి వెహ్పాన్. వాండ్లు నాను ప్రేమ కిజిని ఒరెన్ తంబెరి. నమ్మకమదాన్ దేవుణు సేవ పణి కిజినికాన్. నా వెట జత కూడజి ప్రబుజ్

సేవ కిజనికాన్. వాండ్రు నా వందిజ్ మిజీ వెహ్సాన్. ⁸ మజీ జర్గినికెజ్ మీరు నెస్సి వందిజ్ నెగ్గి మాట వెహ్సి మిజీ దయరం కిబిన్సి వందిజ్ నాను వన్నిజ్ మీ డగ్రు పోక్కిన. ⁹ ఒనెసిము వన్ని వెట మీ డగ్రు వాజినాన్. వీండ్రు నమ్మిదెజ్ తగ్గికాన్. మాపు ప్రేమిన్సి ఒరెన్ తంబెరి. మీ పట్టుమదికాన్. ఇబ్బె జర్గినికెజ్ విజు వీరు మిజీ వెహ్సార్.

¹⁰ నా వెట జెలిదు మని అరిస్సర్కు మిజీ వెన్బాతి లెకెండ్ వెహ్సినాన్. బర్నబెజ్ బణిజ ఆతి మార్కుబా మిజీ వెన్బాతి లెకెండ్ వెహ్సినాన్. (విని వందిజ్ ముజాల మీరు వెహె ఆతి మనిదెర్. అందెజె వాండ్రు మీ డగ్రు వాతిజ డగ్రు కిదు) ¹¹ యుస్టు ఇని యేసుబా మిజీ వెన్బాతి లెకెండ్ వెహ్సినాన్. నమ్మిత్తి యూదుర్జ లొఇ నా వెట కూడేజి పణి కిజనికార్ వీరు ముఎరె. దేవుణు ఏలుబడిః వందిజ్ వెహ్సెజ్ వారు పణి కిజినార్. వారు నజీ గొప్ప తోడేః ఆత మనార్. ¹² క్రీస్తుయేసుజ్ సేవ కిజని, మీ లొఇ ఒరెన్ ఆతి ఎపప్రా మిజీ వెన్బాతి లెకెండ్ వెహ్సినాన్. వాండ్రు ఎస్తివలెబా మీ వందిజ్ డిఃన్ఎండ డటం పార్దనం కిజినాన్. మీరు అనుమానమ్కు సిల్లెండ నమకమ్దు పూర్తి పిరీని వందిజ్, దేవుణు ఇస్టం కినికెజ్ విజు మీరు పూర్తి నెస్సి వందిజ్ వాండ్రు డటం పార్దనం కిజినాన్. ¹³ ఎందనిజ్ ఇహిజ, వాండ్రు మీ వందిజ్, అవొదికియ పట్టుమ్ది నమ్మిత్తి వరి వందిజ్ ఇయరపొలి పట్టుమ్ది నమ్మిత్తి వరి వందిజ్ వాండ్రు నండొ కస్ట బాడిఃజినాన్. యాక నిజం ఇజి నాను వెహ్సెజ్ అట్టు. ¹⁴ మాపు ప్రేమ కిజని లూక డాక్టరుని దెమా మిజీ వెన్బాతి లెకెండ్ వెహ్సినార్. ¹⁵ అవొదికియ పట్టుమ్దు మని కూలెజ్, నుమ్పాకుజ్, వన్ని ఇండ్రొ కూడేజి వాజిని దేవుణు సజమ్దిజ్ నాను వెన్బాతి లెకెండ్ వెహ్సెఅ.

¹⁶ మీ లొఇ యా ఉత్రం డటం సద్విజి వెనుక అవొదికియ పట్టుమ్దు మని దేవుణు సజమ్దుబా యాక సద్విదెజ్. అయాలెకెండ్ అవొదికియ పట్టుమ్దు మని దేవుణు సజమ్దిజ్ నాను రాస్తి ఉత్రం, వారు మిజీ పోక్సార్. అయాక మీరుబా డటం సద్విదెజ్.

¹⁷ అర్కిపుజ్ వెహ్సెఅ, 'ప్రబు వెట నీను కూడితి మనికి. నిజీ ఏర్పాటు కితి పణి పూర్తి కిదెజ్ సుడేదెజ్ వలె', ఇజి. ¹⁸ పవులు ఇని నాను మిజీ వెన్బాతి లెకెండ్ వెహ్సిన. నా సొంత కీదానె ఆకర్తి యా మాటెజ్ రానిన. నాను జెలిదు మన ఇజి పోస్సాట్. దేవుణు దయాదర్మం మీ ముస్సు మనిద్.

అపొస్తుడు ఆతి పవులు తెస్సలోనిక పట్టుమది దేవుణు సజమ్జ్ రాస్తి మొదోహి ఉత్తం

నెల్ల కిబిసినిక

ఇక్క అపొస్తుడు ఆతి పవులు దెసలోనిక పట్టుమదు మని దేవుణు సజమ్జి వరిజ్ రాస్తి మొదోహి ఉత్తం. పవులు కొరింతు పట్టుమదు మహివలె బాణిజ్ యా ఉత్తం రస్తపోక్తాన్ ఇజి నండోడార్ ఒడెబిజినార్. తిమోతి, సిల ఇనికార్ యా ఉత్తం ఒత్త సిత్తార్ ఇజి నండోడార్ ఒడెబిజినార్. పవులుని వన్ని వెట సువార్త పణి కినికార్ కూడెజి దెసలోనిక పట్టుమదు సొన్ని సువార్త సాటిసి దేవుణు సజం మొదోల్స్త మనాద్. (అపొస్తురు కిత్తి పణిజ్ 17:1-9). యూదురు మీటిజ్ కిని ఇల్కాజ్ వాండ్రు సువార్త సాటిస్తాజ్ మొదోల్స్తాన్. బక్తిమనికార్ ఆతి యూదురు ఆఇకార్బా నండోడార్ బాన్ కూడ్డి వాజి దేవుణుదిజ్ పొగ్డిజి మాడిసి మహార్. అందెజె దెసలోనిక పట్టుమదు మని సెగోడార్ యూదురుని యూదురు ఆఇకార్, పవులు సాటిస్తిమని సువార్త నమ్మితార్. యూదురిజ్ ఇంక యూదురు ఆఇకార్ నండోడార్ సువార్త నమ్మితార్. ఇంజముంజు మూండ్రి వారమ్కు బాన్ మహంత్రి వాండ్రు బాణిజ్ సోత సాహన్. కొత్తాన్ దేవుణుదిజ్ నమ్మితి వరిజ్ హిమ్సెజ్ కినికార్లెసు ఇజి వరిజ్ దయరం వెప్తాజ్ ఇజి బాన్ తిమోతిజ్ పోక్తాన్. మరి వెసుక దేవుణు సజమ్జి వరిజ్ దయరం వెప్తాజ్ ఇజి, మరి దేవుణుదిజ్ నమ్మితికార్ దేవుణుదిజ్ తియాలాజి ఎలాగ బత్తిదెజ్, మరి బండెజ్ ఆవండ, మహికార్ గవరం సీనిలెకెండె ఎలాగ బత్తిదెజ్ ఇజి నెస్సిస్తాజ్ ఇజి యా ఉత్తం వరిజ్ రాస్తాన్. నండోడార్ యేసుప్రబు మర్దివాని దన్ని వందిజ్ అనుమానమాతార్. దన్ని వందిజ్ వరిజ్ నెస్సిస్తాజ్ ఇజి యా ఉత్తం రాస్తాన్. యేసుప్రబు మర్దివాని వందిజ్ విజు అద్యయమ్కు రాస్త మనాద్.*

1 బుబ్బాతి దేవుణుదిజ్ దేవుణుదిజ్ని, ప్రబు ఆతి యేసుక్రీస్తుజ్ సెందితి మన్ని, తెస్సలోనిక పట్టుమదు మని దేవుణు సజమ్జి వరిజ్, పవులుని సిలువాను తిమోతి ఇనికార్ రాసిని ఉత్తం. దేవుణు దయాదర్మమదాన్ మీరు నిపాతిదాన్ మండ్రెజ్ నయం కిపిన్.

తెస్సలోనికాది వరి నమకం వందిజ్ దేవుణుదిజ్ సమదనమ్కు!

2 ఎస్సివలెబా మా పార్లనమ్దు మిజి ఎత్తు కిజి, మీరు విజిదెరె వందిజ్ మాపు దేవుణుదిజ్ వందనమ్కు వెస్సానామ్. 3 మిజి దేవుణు ముస్కు మని నమ్మకమ్దాన్ మీరు కితి పణిజి వందిజ్, మహి వరి వందిజ్ ప్రేమదాన్ మీరు కష్టబాడెజిని దన్ని వందిజ్, ప్రబు ఆతి యేసు క్రీస్తు ముస్కు మని ఆసదాన్ ఎర్దు సుడెజి డిన్విండ ఓరిసిని ఓర్పు వందిజ్ మాపు ఎస్సివలెబా మా బుబాతి దేవుణు ముందాల ఎత్తు కిజి మంజినామ్.

4 తంబెరిజాండె, దేవుణు మిజి ప్రేమిస్తాండె ఎర్లిస్త మనాన్ ఇజి మాపు నెస్సామ్. 5 ఎందనిజ్ ఇహిజి, మాపు మిజి వెప్తా సువార్త, వహి మాటెజాణిజ్నే ఆవండ, దేవుణు సత్తుదాన్, దేవుణు ఆత్తుదాన్ మరి మా మస్సుదు పూర్తి నమ్మకమ్దాన్ మిజి నెస్సిస్తామ్. మీ వందిజ్ మాపు మీ వెట కూడెజి ఎలాగ బత్తితామ్ ఇజి మీరు నెసినిదెరె. 6 గొప్ప పెరి కష్టమ్దు మీరు ప్రబుజ్ని మజి పోలిసి నడితిదెరె. గొప్ప పెరి కష్టమ్కు మిజి వాతె. గాని దేవుణు ఆత్తు మిజి సీతి సర్దదాన్ మీరు యా సువార్తదిజ్ డగ్రు కితిదెరె. 7 అందెజె అయాలెకెండె నమ్మితికిదెరె ఎలాగ మండ్రెజ్ ఇజి నెస్సెజ్ మాసిదోణియని అకాయ ఇని ప్రాంతమ్కాజ్ నమ్మిత్తి వరిజ్ విజెరిజ్ మీరు ఉండ్రి గుర్తు లెకెండె అతిదెరె. 8 మాసిదోణియని అకాయ ప్రాంతమ్కాజ్నే ఆవండ దేవుణు సువార్త మీ బాణిజ్ విజుబాన్ సాటి ఆతాద్. అక్కాదె ఆవండ దేవుణు ముస్కు మిజి మని నమకం విజెరె నెస్సార్. అందెజె దని వందిజ్మాపు ఇనికబా వెప్తాజ్ అకర్ సిల్లెద్.

* 0: 1:0 1:8-10; 2:19-20; 3:13-18; 5:23-24

9-10 ఎందనిజ్ ఇహిజ మీరు ఎలాగ మజి డగ్రు కితిదెర్ ఇజి వారె వెప్పినార్. బొమ్మెజ మాడిసిక్ డిసి,సిజి బత్తిజిని నిజమాతి దేవుణుదిజ్ పొగ్డిజి మాడిస్టెజ్ మీరు ఎలాగ దేవుణు దరోటు మప్తిదెర్ ఇజి వారె వెప్పినార్. బత్తిజిని నిజమాతి దేవుణుదిజ్ నమ్మిజిని వందిజ్, దేవుణు బాణిజ్ వాని కోపమదాన్ మజి తప్పిసినికాన్ నాతి, సాతివరి బాణిజ్ దేవుణు నిక్తిమని వన్ని మరిన్ ఆతి యేసు, దేవుణు పరలోకమదాన్ డిగ్జి వానాన్లె ఇజి వన్ని వందిజ్ ఆనదాన్ ఎద్రు సుడ్జిజి మంజినిదెర్.

2

దెసలోనిక పట్టుమదు పవులు కితి సువార్త పణి

1 తంబెరిజాండె, మాపు మీ డగ్రు వాతిక పణిదిజ్ రెఎండ ఆవతాద్, ఇజి మీరె నెసినిదెర్. 2 ముజాల పిలిపియా పట్టుమదు మజి ఎసా కష్టమకు వాతె, మరి ఎసానో సిగు కిత్తార్ ఇజి మీరు నెసినిదెర్. గాని గొప్పు గటిదాన్ అడ్డుజ్ వాతిజ్బాగాని దేవుణు మజి సితి దయరమదాన్ సువార్త మాపు మిజి వెప్టావ్ ఇజి మీరు నెసినిదెర్. 3 మా మన్నుదు ఇనికాదొ నెజ ఉదేసమదానో, మజి ఇనికాదొ లాబం దొహ్కెజ్ ఇజినో, మిజి మోసం కిదెజ్ ఇజినో మాపు యా సువార్త మిజి వెహ్పతావ్. 4 గాని అక్కదె అవిండ మాపు తగ్గికావ్ ఇజి దేవుణు మజి సుడ్జిజి సువార్త వెప్టాజ్ ఇజి ఒపజెప్పి వందిజ్ మాపు వర్గిజినావ్. అందెజె మాపు లోకురిజ్ సర్త కిబిస్సికార్ అవిండ, మా మన్నుజ పరిక్కు కిజిని దేవుణుదిజ్ నె సర్త కిబిస్సికార్ ఆదెజ్ ఇజి సుడ్జిజినావ్. 5 మాపు మిజి వెప్టాకెజ్ ఇనికెజ్బా పొజిజిని మాటెజ్ ఆఉ ఇజి మీరు నెసినిదెర్. మరి మజి డబ్బు వందిజ్ నండో ఆన మనాద్ ఇజి మీరు నెన్ఎండ, మీ బాణిజ్ ఇనికబా గణెస్టెజ్ ఇజి మాపు ఇనికబా డాఃప్పి వర్గివతావ్ ఇనిదన్నిజ్ దేవుణునె సాక్కి. 6 లోకుర్ మజి పొగ్డిదెజ్ ఇజి మాపు కోర్వతావ్. మీరు గాని మహికార్ ఎయెర్బాగాని మజి పొగ్డిదెజ్ ఇజి మాపు కోర్వతావ్. మాపు క్రీస్తు వందిజ్ అపొస్తురు అతికావ్ ఇజి మిబాణిజ్ లోసె ఆదెజ్ అక్కు మన్నికావ్.

7 గాని అయాలెకెండ కివిండ, ఉండీ అయేసి దని కొడొరిజ్ ఎలాగ సుడ్జిజినాదొ, అయాలెకెండెనె మాపు మీ నడిమి తగి ఆత మహావ్. 8 మీరు మజి నండో ఇష్టం ఆతికిదెర్. అందెజె మాపు గొప్పు సర్దాదాన్ మీ వెట దేవుణు సువార్త వెప్టాకెదె అవిండ, మరి మీ వందిజ్ మా బత్తుదాన్ ఇనిక కిదెజ్ అట్టాపా అక్కెజ్ కిదెజ్బా తయార్ ఆత మహావ్. ఎందనిజ్ ఇహిజ మీరు మజి నసా డగ్రుహికిదెర్ ఆతిదెర్. 9 తంబెరిజాండె, మీ నడిమి సువార్త వెప్పి మహివలె, మాపు మీ ముస్సు ఆదారం అవిండ, రెయు పొగోల్ కష్టబాడ్డి వణి కిజి మహావ్. మాపు కష్టబాడ్డి వణికితిక మరి మా కష్టమకు విజా మీరు తవ్విండ ఎత్తు కిజి మంజినిదెర్ ఇజి మాపు నెసినావ్.

10 దేవుణుదిజ్ నమ్మిత్తికిదెర్ ఆతి మీ నడిమి, మాపు ఎసా బక్తిదాన్, నీతి నిజాయితిదాన్, నిందెజ్ సిల్లెండ ఎలాగ బత్తితావ్ ఇని దనిజ్ మిరె సాక్కి, దేవుణుబా సాక్కి. 11-12 ఎందనిజ్ ఇహిజ. వన్ని గొప్పు జాయ్దుని, వన్ని ఏలుబడిడు మండ్రెజ్ ఇజి మిజి కూక్తి మని దేవుణుదిజ్ తగితి లెకెండ మీరు బత్తిదెజ్ ఇజి మిజి ఒరెన్ అప్పొసి వన్ని కొడొఃర్ వెట ఎలాగ వెప్పి నెగ్గి సర్దు నడిపిసినండ్రొ, అయ లెకెండె మీ లోజ ప్రతి ఒరెన్ వన్నిజ్ ఉసార్ కిజి, దయరం వెప్పి, బతిమాలజ్ మాపు మీ వెట మహావ్ ఇజిబా మీరు నెస్సిదెర్.

13 మాపు దేవుణుదిజ్ ఎస్సివలెబా డిన్ఎండ వందనమకు కిజినె మంజినావ్. ఎందనిజ్ ఇహిజ మా బాణిజ్ మీరు వెపా మని దేవుణు మాట, అక్క లోకుర్ బాణిజ్ వాతి మాట లెకెండె అవిండ, అక నిజం మని లెకెండెనె, దేవుణు బాణిజ్ వాతి దేవుణు మాట లెకెండె మిరు డగ్రు కితిదెర్. అందెజె దేవుణుదిజ్ నమ్మిత్తికిదెర్ ఆతి మీ మన్నుదు అక్క నెగ్గి వణి కిజినాద్. 14 తంబెరిజాండె మీరు యూదయ దేసమదు మని క్రీస్తు యేసుజ్ నమ్మిత్తి మని దేవుణు సజమ్కాణి వరిజ్ పొలిసి నడిపిసినిదెర్. ఎందనిజ్ ఇహిజ, వారు వరి సొంత లోకుర్ ఆతి యూదురు బాణిజ్ స్రమెజ్ ఒరిస్సి మహి లెకెండె మీరుబా మీ సొంత లోకుర్ బాణిజ్ స్రమెజ్ ఒరిస్సిదెర్. 15 యూదురు ఆతికార్ ప్రబు ఆతి యేసుజ్ని దేవుణు ప్రవక్తరుజ సప్టార్. వారు మజిబా డిన్ఎండ హిమ్మెజ్ కిత్తార్. యూదురు ఆఇకార్ సువార్త వీంజి దేవుణు వరిజ్ రక్సిస్టెజ్ ఆవెద్ ఇజి మాపు వరి వెట వర్గివిండ మజి అడు కిజి దేవుణుదిజ్ పడిఃఇ పణిజ్ కిజి వారు

లోకుర విజెరిజ్ పగాతికార్ ఆజినార్. 16 యా లెకెండ్ వారు వరి పాపమ్కు ముస్సు, మరి కుడుఱ్ఱి పూర్తి కిజినార్. అందెజె కడిఱేవేరు దేవుణు కోపం వరి ముస్సు, మనూద్.

తెస్సలొనికది వరిజ్ సుడేదెజ్ పవులుజ్ మని గొప్పు ఆస

17 తంబెరిజాండె, మాపు నెగం కాలం మీ బాణిజ్ దూరం ఆతి మనిజ్ (మా ఒడొలేనె దూరం ఆతూద్ గాని మా మస్సు దూరం ఆవతూద్) మరజి మీ డగ్రు వాజి మిజి సుడేదెజ్ ఇజి నండొ ఆస ఆజి నండొ పణి కిత్వాన్. 18 నిజమె, మీ డగ్రు వాదెజ్ ఇజి గొప్పు ఆస ఆతూప్ గాని సయ్తాను దనిజ్ అడ్డు కిత్వాన్. పవులు ఇని నాను మరి మరి మీ డగ్రు వాదెజ్ ఇజి సుడేత. 19 మాపు ఎయెర్ వందిజ్ దేవుణు ఎద్రు ఆసదాన్ ఎద్రు సుడేజినాప్? మజి సర్ల కిబిస్సికార్ ఎయెర్? సిల్లిజి ఎస్సివలెబా మాపు యేసుక్రీస్తు ఎద్రు పొగిడిఱి, మజి గొప్పు సర్ల కల్లిసిని ఉండ్రీ టోపి లెకెండ్ మనికార్ ఎయెర్? మా ప్రబు ఆతి యేసు క్రీస్తు వాని వలె వన్ని ఎద్రు మంజిని మీరెగదె?. 20 నిజమె మీరె మజి నెగ్గి పేరు తపిసినికిదేర్. మజి సర్ల కిబిసినికిదేర్ మీరె.

3

1 మిజి సుడేదెజ్ ఇజి మజి మని ఆస బరిస్తెజ్ అట్వండాతిజ్, మాపు ఏదెస్సు ఇని పట్నమ్దు మంజినిక నెగ్గిక ఇజి ఒడిఱిజినె, 2 యేసుక్రీస్తు ముస్సు మీరు ఇడ్డి నమకమ్దు కద్దిఎండ మిజి దయరం వెస్సి, సత్తు మని వరి లెకెండ్ ముజాల నడిఱిస్తెజ్ ఇజి యేసుక్రీస్తు వందిజ్ సువార్ల సాటిస్తెజ్ మా వెట కూడ్డి దేవుణు పణి కినికానాతి మా తంబెరి ఆతి తిమోతిజ్, మీ డగ్రు పొక్టాప్. 3 అందెజె మీ లొఇ ఎయెన్బా యా కస్టమ్కాజ్ సుడేజి వెనుక సొన్ఎండ, యేసుక్రీస్తు ముస్సు, మని నమకమ్దు గటిజి నిల్లి మండ్రెజ్ వలె. ఎండనిజ్ ఇహిజి మాటు యాకెజ్ ఓరిస్తెజ్ వలె ఇజి మీరు నెసినిదేర్. 4 నిజమె, మాపు మీ వెట మహివలెనె మజి హిమ్మెజ్ వానె ఇజి మిజి వెస్సి మహాప్. యాకెజ్ మాపు వెహితి లెకెండ్నె జర్లితె ఇజి మీరు నెసినిదేర్. 5 ఎలాగబా సయ్తాను సెఇ పణిజ్ కిదెజ్ ఇజి మీ మస్సుదు ఆస పుటిసి, మీ నడిఱి మి మాపు కితి పణిజ్ విజు ఉండ్రీ వేల పణిదిజ్ రెవిండ కిత్వాను ఇజి నాను తియెలాత. అందెజె దన్ని వందిజ్ ఎత్తు కిజి, యాక ఓరిస్తెజ్ అట్వండ్ మీ నమకం వందిజ్ నెస్తెజ్ ఇజి నాను తిమోతిజ్ పొక్.

తిమోతి తతి నెగ్గి కల్లు

6 గాని తిమోతి మీ బాణిజ్ ఏలె మా డగ్రు వాతాన్. మిజి దేవుణు ముస్సు, మని నమకం వందిజ్, మీ ప్రేమ వందిజ్ నెగ్గి కల్లు తతాన్. మాపు మిజి సుడేదెజ్ ఆస ఆజిని లెకెండ్, మీరుబా మజి సుడేదెజ్ ఆస ఆజినిదేర్ ఇజి వాండ్రు వెహ్లాన్. మరి మా వందిజ్ ఎస్సివలెబా సర్గాదాన్ ఎత్తు కిజినిదేర్గె. 7 అందెజె తంబెరిజాండె, మాపు మజి వాతి దుకమ్దాన్ మహివలె, మజి హిమ్మెజ్ వాతివలె మీ నమకం వందిజ్ విహాపె ఉసార్ కిబె ఆతూప్. 8 మీరు ప్రబు ముస్సు, మని నమకమ్దు గటిజి నిల్లి మంజినిదేర్, అందెజె దేవుణు ముస్సు, మిజి మని నమకం మా బత్తు లెకెండ్నె మజి విలువాతిక ఆజినాద్. 9 దేవుణు ముందాల మీ వందిజ్ మన్ని విజు సర్ల వందిజ్ దేవుణుదిజ్ వందనమ్కు ఎసా వెస్తిజి సరి ఆనాద్? ఎస్సా మాపు వెహ్లిజ్బా అక్క తక్కునె మంజినె. 10 మాపు మిజి మరి ఉండ్రీ సుటు సుడేజి దేవుణు ముస్సు, మని మీ నమకమ్దు మిజి తకు మనిక పూర్తి కిదెజ్ ఇజి ఉండ్రీ సుటు అవ్కాసం దొహ్కెకెజ్ ఇజి రెయు పొకల్ దేవుణు వెట పార్లనమ్దు నండొ బతిమాలిజనాప్.

11 మా బుబ్బాతి దేవుణుని మా ప్రబువాతి యేసు మీ డగ్రు వాదెజ్, మజి ఇని అడ్డు సిల్లెండ సరి తొరిసిన్. 12 మాపు మిజి ప్రేమిసిని లెకెండ్ మీరు ఒరెన్ మరి ఒరెన్ వెట ప్రేమిస్తెజ్, మరి మీ లొఇ మని ప్రేమ నండొ ఆజి పొగిజిని లెకెండ్ ప్రబు మిజి సాయం కిపిన్.

13 మా ప్రబువాతి యేసు వన్ని నీతి నిజాయితి మని వరి వెట వాని వలె, మా బుబ్బాతి దేవుణు ఎద్రు మీరు ఇని కరయి సిల్లెండ, నీతి నిజాయితిదాన్ మండ్రెజ్, మీ మస్సుదు దేవుణు మిజి సత్తు సిపిన్.

4

దేవుణుదిజ్ ఇస్టమాతి లెకెండ్ బత్కిని వందిజ్

1 తంబెరిజాండె, దేవుణుదిజ్ ఇన్ఱం ఆతివజ ఎలాగ బత్తిదెజ్ ఇజి మాపు మిజి నెస్సిన్ఱ మనావ్. మీరు అయాలెకెండెనె కిజినిదెర్. గాని అక్కర్దిజ్, మాపు మిజి యేసుప్రబు పేరుదాన్ గటిజ సారిసి సారిసి వెహ్సానిక ఇనిక ఇహిజ మీరు అయ లెకెండె మరి ఒదె నెగెణ్ కిజి మండ్రు. 2 యేసుప్రబు బాణిజ్ మజి దోహ్కాత్తి అతికారమ్దాన్ మాపు మిజి నెస్సిన్ఱికిజ్ ఇనికెజ్ ఇజి మీరు నెసినిదెర్.

3 మీరు దేవుణు వందిజ్ ఒప్పుజెప్పి వన్ని వందిజ్ కేట అతికార్ ఆజి మండ్రెజ్ ఇజినె దేవుణు ఇన్ఱమాజినాన్. మీరు రంకు బూలానిక ఆవెద్ ఇజినె దేవుణు కోరిజినాన్. 4 అక్కాదె ఆవెండ దేవుణు మీ ఒడోల్దిజ్ మని ఆసదిజ్ సరి సివిండ, ఒరెన్ సాంత ఒడోల్దిజ్ ఇని పాపమ్దిజ్ సాన్విండ ఎలాగ తగితి లెకెండె దేవుణుదిజ్ ఇన్ఱమాతి వజ అడిదెజ్ ఇజి మీరు ఒరెన్ ఒరెన్ నెస్సెజ్ వలె. 5 మీరు, దేవుణుదిజ్ నెన్ఇ, దేవుణుదిజ్ నమ్మిఇ వరిలెకెండె, ఉత్పుత్ ఆజి మండ్రెజ్ ఆవెద్. 6 ఎయెన్బా, ఉత్పుత్ ఆజి, వన్ని వెట మన్ని నమ్మిత్తికానాతి ఒరెన్ తంబెరి ఆల్ని వెట, కూడజి మంజి, వన్నిజ్ మొసెం కిదెజ్ ఆవెద్. యా లెకెండె కిని వరిజ్ దేవుణు సిక్స సీనాన్. దిన్ని వందిజ్ మాపు ముజాల మీ వెట కసితం వెహ్కా మహావ్. 7 ఎందనిజ్ ఇహిజ. రంకు బూలాజి బత్తిదెజ్ ఇజి దేవుణు మజి కూకెజ్ సిల్లెన్, గాని పాపం సిలి నెగ్గి బత్తు బత్తిదెజ్ ఇజినె కూక్ మనాన్. 8 అందెజె యా బోదదిజ్ నెక్కి పొక్కికాన్, లోకుదిజ్ నెక్కి పొక్విన్ గాని దేవుణు అత్తుదిజ్ మిజి సీజిని దేవుణుదిజ్ నెక్కి పొక్కికాన్ ఆజినాన్.

9 తంబెరిజి నడిమి, ఒరెన్ వన్నిజ్ మరి ఒరెన్ వన్ని వెట మన్ని ప్రేమ ఎలాగ మండ్రెజ్ ఇజి, మాపు మిజి ఏలు రాస్సెజ్ అవ్సరం సిల్లెద్. ఒరెన్ మరి ఒరెన్ వన్నిజ్ ఎలాగ ప్రేమిసి మండ్రెజ్ ఇజి దేవుణునె మిజి నెస్సిన్ఱ మనాన్. 10 నిజమె మాసిదొనియ ప్రాంతమ్దు మనిక తంబెరిజి వెజెరిజ్ మీరు ప్రేమిసినిదెర్. గాని మీరు మరి ఒదె ప్రేమిసి మండ్రెజ్ ఇజి మాపు సారిసి సారిసి వెహ్సానావ్. 11 మాపు ముజాలెత్ మిజి ఆడ్ర సిత్తిమహి లెకెండె సార్దిదాన్ బత్తిదెజ్ ఆస ఆజి మండ్రు. మరి మీ కికాణిజ్ మీ వందిజ్ పణి కిజి మండ్రు మహివరి సజతిజ లోఇ బుర డూత్వండ, మీ పణిజ్ సుడేజి మండ్రు. 12 నస్సివలె మీ బత్తు నడేజి నమ్మిఇకార్ మిజి గవ్వరం సీనార్. మరి మీరు, మహి వరి మున్కు ఇనిదని వందిజ్బా ఆదారం ఆవెండ మంజినిదెర్.

ప్రబు మర్జి వాని వందిజ్

13 తంబెరిజాండె, దేవుణు మున్కు నమకం ఇట్టి సాతివరిజ్ ఇనికా జర్గినాద్లె ఇజి మీరునెసి మండ్రెజ్ ఇజి మాపు కోరిజినావ్. ఎందనిజ్ ఇహిజ దేవుణు ఎద్రు ఇని ఆస సిలి నమ్మిఇ వరి లెకెండె మీరు దుకం ఆవెండ మండ్రెజ్ వలె ఇజి మాపు కోరిజినావ్. 14 యేసుప్రబు సాంత్రె మర్జి నిజిత్తాన్ ఇజి మాటు నమ్మిజినాట్. అయాలెకెండెనె యేసుప్రబు మున్కు నమ్మకం ఇడేజి సాతివరిజ్బా దేవుణు యేసు వెట కూక్కు తనాన్. 15 అందెజె ప్రబు ఆతి యేసు వెహ్కా మని మాట అసి మాపు మిజి దయ్యరమ్దాన్ వెహ్సానిక ఇనిక ఇహిజ, ఏలు బత్తిజిని మాటు, యేసు ప్రబు మర్జి వాని రోజు బత్తిజి మహిజ్బా, ప్రబు మున్కు నమకం ఇడేజి సాతి వరిజ్ ఇంక ముజాల వన్ని డర్సు సాంత్రెజ్ అటవెట్. వారి ముజాల సానార్లె. 16 ప్రబువాతి యేసుక్రీస్తు వన్ని గొప్ప పెరి జాటుదాన్ ఆడ్ర సీజి, విజు దాతారి మున్కు నెయ్యి ఆతి దూత జాటుదాన్, దేవుణుది గొప్ప పెరి జోడూబంగ ఊక్కి జాటుదాన్ పరలోకమ్దాన్ డిజిగ్గి వానివలె, యేసుప్రబు మున్కు నమకం ఇడేజి సాతికార్ ముజాల నిజ్నార్లె. 17 నస్సివలె బూమి మున్కు బత్తిజిని మాటు యేసుప్రబుజ్ దసుల్ అదెజ్ ఆకానమ్దు మని మొసాపుదు వరివెట పెరి ఆనాట్లె. అయాలెకెండె మాటు ప్రబు వెట ఎలాకాలం మంజినాట్లె. 18 అందెజె మీరు యా మాటెజాణిజ్ ఒరెన్ మరి ఒరెన్ వన్ని వెట దయ్యరం వెహ్కా మండ్రు.

5

1 తంబెరిజాండె, ఎస్సివలె అక్కెజ్ విజు జర్గినాద్లె ఇజి, ఆ గడియం వందిజ్నో, అకెజ్ ఎలాగ జర్గినె ఇని వందిజ్నో మాపు మిజి రాస్సెజ్ అవ్సరం సిల్లెద్.

2 ఎందనిజ్ ఇహిజ, ఎయెన్బా ఒడేబివిండ మనివలె రెయ్యి, డిజి కిదెజ్ డిజిజారి ఎలాగ వానాండ్రె, అయాలెకెండెనె ప్రబు వాని దినంబా మంజినాద్ ఇజి మీరు బాగ నెసినిదెర్. 3 “సమదనమ్దాన్ మనావ్, మజి ఇని తియెల్ సిల్లె”, ఇజి లోకుర్ వర్గిజి మంజిని వలెనె, పొటాదు మన్ని బోదెలిదిజ్ ఎలాగ

ఏరు ఈబాని నొప్పి వానాదొ, అయలెకెండెన వెటనె నాసనం వరి మున్ను వానాదలె. అందెజె ఎయెర్బా తప్తె ఆదెజ్ అట్వేర్.

⁴ తంబెరిజాండె, ఇనికబా ఒడెబిఎండ మనివలె, ఒరెన్ డొజారి లెకెండె అయా దినం మీ మున్ను వాతిజ్బా మీరు బమ్మ ఆఇదెర్. ఎందనిజ్ ఇహిజ, మీరు దిని వందిజ్ నెన్వండె సీకటిబు బత్తిని కిదెర్ ఆఇదెర్. ⁵ మీరు విజదెరె జాయ్దు పుట్టి నని వరి లెకెండె మనిదెర్, వెడెదిజ్ పుట్టి నని వరి లెకెండె మన్నిదెర్. మాటు రెయుదిజ్ పుట్టి నని వరి లెకెండె అవెట్. ⁶ అందెజె మాటు మహి వరి లెకెండె నిద్ర కిజి మన్వండె మా మున్నుదిజ్ అడిజి తెలిదాన్ మంజినాట్. ⁷ నిద్ర కినికార్ రెయు నిద్ర కిజినార్. ఉణిజి సొస్సికార్ రెయు సొసి మంజినార్. ⁸ మాటు వేలెదిజ్ పుట్టి నని వరి లెకెండె మనికాట్. అందెజె మాటు మా మున్నుదిజ్ అడ్డిజి, దేవుణు మున్ను మని నమకమ్ని ప్రేమ, మజి గుండెదిజ్ అడు కిని ఉండ్రీ ఇనుము సొక లెకెండె తొడుగినాట్. మరి దేవుణు మజి రక్సిస్సాన్లె ఇజి వన్ని వందిజ్ ఆసదాన్ ఎద్రు సుడెజి మంజనిక, మజి బురాదిజ్ అడు కిని ఇనుము టోపి లెకెండె తొడిగిజి మంజినాట్. ⁹ ఎందనిజ్ ఇహిజ, మా ప్రబువాతి యేసుక్రీస్తు మజి రక్సిస్సాజ్ ఇజినె దేవుణు మజి ఏర్పాటు కిజ్తాన్. గాని వన్ని బాణిజ్ వాని సిక్ర వందిజ్ అవద్. ¹⁰ మాటు బత్తితి మహిజ్బా, సాతి మహిజ్బా, వాండ్రు మరజి వానివలె వన్నివెట మజి బత్తిస్సెజ్ యేసుక్రీస్తు మా వందిజ్ సాతాన్. ¹¹ అందెజె మీరు ఏలు కిజిని లెకెండెన ఒరెన్ మరి ఒరెన్ వన్ని వెట దయరం వెప్పి, ఒరెన్ వన్నిజ్ దేవుణు మున్ను మని నమ్మకమ్దు పిరిని లెకెండె సాయం కిజి మండ్రు.

¹² తంబెరిజాండె, యేసుప్రబు బాణిజ్ మన్ని అతికారమ్దాన్ మిజి నెస్సిసి, బుది వెప్పి, మీ నడిమి కన్డబాడిజి దేవుణు పణి కిని వరిజ్ గవరం సీదు ఇజి మిజి బతిమాలజినావ్. ¹³ వారు కిజిని పణి వందిజ్ వరిజ్ నండె ప్రేమిసి గవరం సీజి మండ్రు. ఒరెన్ మరి ఒరెన్ వన్ని వెట నిపాతిదాన్ బత్తిజి మండ్రు. ¹⁴ తంబెరిజాండె, మాపు మిజి వెప్పినిక ఇనిక ఇహిజ, బదకమ్దాన్ మని వరిజ్ మీరు బుద్ది వెప్తూ. ఏసారం అస్తి మనివరిజ్ దయరం వెప్పి మండ్రు. దేవుణు మున్ను మని నమకమ్దు పిరిదెజ్ అట్జ వరిజ్ సాయం కిజి మండ్రు. విజెరె వెట ఒరిసి మండ్రు. ¹⁵ ఎయెన్బా వన్ని వెట మరి ఒరెన్ కితి సెఇ పణిదిజ్ మర్రి సెఇ పణిజ్ కివండె సుడెదు. ఎన్నివలెబా ఒరెన్ మరి ఒరెన్ వన్ని వెట కనికారమ్దాన్ మండ్రు. లోకుర్ విజెరె వెటబా కనికారమ్దాన్ మండ్రు.

¹⁶ ఎన్నివలెబా సర్దదాన్ మండ్రు. ¹⁷ డిన్వండె పార్దనం కిజి మండ్రు. ¹⁸ ఎలాగ మర్రి సమయమ్దుబా విజి దనిజ్ దేవుణుదిజ్ వందనమ్కు వెప్పి మండ్రు. యేసుక్రీస్తుజ్ నమ్మిత్తి మని మీరు యాలెకెండె మండ్రెజ్ ఇజినె దేవుణు కొరిజినాన్.

¹⁹ మీ లొఇ మని దేవుణు ఆత్మదిజ్ నమ్మాట్. ²⁰ దేవుణు బాణిజ్ వాతి దేవుణు ప్రవక్తరు వెప్తి మాటెజి నెక్కి పొక్కాట్. ²¹ విజి వనకాజ్ పరిస కిజి నెగ్గి దనిజ్ డగ్రు కిదు. ²² సెఇ విజి వన్కాజ్ దూరం కిదు.

²³ నిపాతిదిజ్ ప్రబువాతి దేవుణునె మిజి పూర్తి నెగ్గికార్ కిపిన్. మా ప్రబువాతి యేసుక్రీస్తు వానిదాక వన్ని ఎద్రు మీ దేవుణు ఆత్మాని, మీ పాణం, ఒడెజ్ విజి ఇని నిందెజ్ సిల్లెండె దేవుణు కాపాడిజి మనిన్ ఇజి నాను పార్దనం కిజిన. ²⁴ మిజి కూక్తి మని దేవుణు నమ్మకమాతికాన్. అందెజె వాండ్రు వెప్తి లెకెండెన కినిన్.

²⁵ తంబెరిజాండె, మా వందిజ్ పార్దనం కిదు. ²⁶ పూర్తి నెగ్గి మున్నుదాన్ పొంపిజి ముద్దు కిజి తంబెరిజ్ విజెరిజ్ వందనమ్కు వెప్తూ. ²⁷ తంబెరిజ్ విజెరిజ్ యా ఉత్రం నద్విజి వెన్పిస్సెజ్ ఇజి ప్రబువాతి యేసుక్రీస్తు పేరుదాన్ మిజి బతిమాలిజిన. ²⁸ మా ప్రబువాతి యేసుక్రీస్తు దయాదర్శం మీ వెట మనిదె.

అపొస్తుడు ఆతి పవులు దెసలోనిక పట్టుమ్ది నమ్మిత్తి వరిజ్ రాస్తి రుండి ఉత్రం

నెల్వ కిబిసినిక

ఇక్క అపొస్తుడు ఆతి పవులు దెసలోనిక పట్టుమ్దు మహి దేవుణు సజమ్ది వరిజ్ రాస్తి మన్ని రుండి ఉత్రం. సీలాని తిమోతి ఇనికార్ దెసలోనిక పట్టుమ్దు సొన్ని, అపొస్తుడు ఆతి పవులు రాస్తి ఉత్రం సీజి మర్రి వాత్తి వెనుక యా ఉత్రం రాసె అత మనాద్ ఇజి ఒడెబిజినార్.

యా ఉత్రమ్దు మొదోహి ఉత్రమ్దు మన్ని దన్నిజ్ సమానమాతి మాటజ్ మన్నె. (ఉండి దెస్సలోనిక నెల్వ కిబిసినిక సుడెడు). రుండి ఉత్రమ్కాజ్, వాండ్రు కిత్తి సువార్త పణిదాన్ తయారాతి మన్ని సజమ్కాజ్ వన్ని మన్నుదు మన్ని బాద, పవులు తోరిసినాన్. తప్పు బోదదిజ్, అబద్దం నెస్సిసిని వరిజ్ లోజిజి మన్ఎండ, గటిజ నిల్పి మండ్రు ఇజి పవులు వరిజ్ ఎత్తు కిబిసినాన్.

యేసుప్రుబు మర్రి వాని వందిజ్ యా ఉత్రమ్దు రాస్త మనాద్. (రుండి దెస్సలోనిక 1:9-10; 2:1-3). యేసుప్రుబు సిలువాదు సాజి, మర్రి నిజితి వెనుక ఇంజు ముంజు 17-20 పంటజ్ డాట్టి వెనుక పవులు ఇక్క రాస్తాన్ ఇజి విజెరె ఒడెబిజినార్ దేవుణు మున్ను, నమ్మకం ఇట్టి వరిజ్ వాని కాలమ్దు ఇనిక ఆనాద్ ఇజి నెస్సిన్జె, మరి వారు నమకం డిన్ఎండ గటిజ నిల్పిమండ్రెజ్ ఇజి యా ఉత్రం రాస్తాన్.

¹ బుబ్బాతి దేవుణుదిజ్ని ప్రబు ఆతి యేసు క్రీస్తుజ్ నెందితి మని దెసలోనిక పట్టుమ్ది దేవుణు సజమ్దిజ్ పవులుని సిలువానుని తిమోతి రాసిని ఉత్రం. ² బుబ్బాతి దేవుణుని ప్రబు ఆతి యేసుక్రీస్తు, దయాదర్మమదాన్ మీరు నిపాతిదాన్ మండ్రెజ్ సాయం కిపిరె.

³ తంబెరిజాండె, మాపు ఎస్తివలెబా మీ వందిజ్ దేవుణుదిజ్ వందనమ్కు వెప్పినె మండ్రెజ్ వలె. అయ లెకెండ్ వెప్పినిక, కిదెజ్ మన్ని సరి ఆతి సజతినె. ఎందనిజ్ ఇహిజ దేవుణు మున్ను, మని మీ నమకం మరి నండో ఆజి పిరిసినాద్. ఒరెన్ వన్నిజ్ మరి ఒరెన్ వన్ని వెట మని ప్రేమ మీరు విజెదెరె లోఇ మరి నండో ఆజినాద్. ⁴ అందెజి మీరు, డిన్ఎండ హిమ్మెజ్ ఒరిసిని వందిజ్, ప్రమెజ్ ఒరిసి మహిజ్బా దేవుణు మున్ను, మని నమకమ్దు మీరు ఎలాగ గటిజ నిల్పి మంజనిదెరె ఇజి మహి దేవుణు సజమ్కాజ్ మీ వందిజ్ మాపు పొగడిజి వెప్పినావ్.

⁵ నీతి నిజాయిదాన్ దేవుణు తీర్పు సిజినాన్ ఇని దనిజ్ యాకెజ్ విజు రుజవ్ ఆజినె. దేవుణు కిని ఎలుబడిడు మండ్రెజ్ మీరు తగ్గికిదెరె ఆజనిదెరె. దని వందిజ్నె యా కర్ణమ్కు విజు మీరు ఒరిసినిదెరె. ⁶⁻⁸ మా ప్రబు ఆతి యేసు నేగడిజిని సిసు కొనెజాణిజ్ వన్ని గొప్ప సత్తుమని దూతెజ వెట పరలోకమ్దాన్ తోరె ఆనివలె, దేవుణుదిజ్ నెన్ఇ వరిజ్నె, మా ప్రబు ఆతి యేసు సువార్త మాటజ్ లోజిజి వరిజ్ సిక్కి సీనాన్లె. దేవుణు నీతి నిజాయిమనికాన్. అందెజి నస్తివలె మిజి ప్రమెజ్ కితి వరిజ్ ప్రమెజ్ మరెజి సీనాన్లె. ప్రమెజ్ ఒరిస్తిమని మిజిని, మజి రొబిన్సాన్లె. ⁹ నస్తివలె యేసుప్రుబు సెఇ వరిజ్ వన్ని ఎద్రుహాన్, వన్ని గొప్ప సత్తుదాన్, వారు వన్ని డగ్రు మన్ఎండ దూరం కిజి ఎలాకాలం మంజని నాసనమ్దాన్ సిక్కి సీనాన్లె. ¹⁰ అయా రోజు, వన్నిజ్ నెందితి వరివెట వన్ని గొప్ప జాయ్ తోరె ఆదెజ్, మరి వన్నిజ్ నమ్మిత్తికార్ విజెరె బమ్మ ఆని లెకెండ్ వరి నడిమి ప్రబు వానివలె మాపు వెప్తి మా సాస్యమ్కు నమ్మిత్తికిదెరె ఆతి మీరుబా వరి వెట మంజనిదెరెలె. ¹¹ యాకా మా మన్నుదు మంజి, మిజి వాండ్రు కూక్తి దనిజ్ తగ్గికిదెరె లెకెండ్ దేవుణు మిజి సుడెదెజ్ ఇజి, మరి మీ నెగ్గి ఉదెనమ్కు విజు, మరి మీరు వన్ని మున్ను ఇడ్డి మని నమ్మకమ్దాన్ కిజిని విజు పణిజ్ దేవుణు వన్ని సత్తుదాన్ పూర్తి కిదెజ్ ఇజి మాపు మీ, వందిజ్ ఎస్తివలెబా దేవుణుదిజ్ పార్దనం కిజినావ్. ¹² మా దేవుణు బాణిజ్ని ప్రబు ఆతి యేసు క్రీస్తు బాణిజ్ వాతి దయా దర్మమ్దాన్ యేసు ప్రబు పేరు మీ నడిమి గొప్ప పెరిక ఆదెజ్, మరి మీరు వన్ని వెట కూడ్డి గొప్ప పేరు పొందితికిదెరె ఇజి తోరె ఆదెజ్ ఇజి మాపు యా లెకెండ్ మీ వందిజ్ దేవుణుదిజ్ పార్దనం కిజినావ్.

2

దేవుణుడితో పడినవాడవు

1-2 తంబెరిజాండె, మా ప్రబు ఆతి యేసు క్రీస్తు మర్రి వాని దినమ్ వందిజ్ని మాటు వన్ని వెట కూడ్డి మంజిని వందిజ్ ఏలు వెప్పినాన్. ప్రబు ఆతి యేసు వాత మనాన్ ఇజి ఉండ్రీ ప్రవక్త మాటదానో, మా బాణిజ్ వాతి లెకెండె ఉండ్రీ ఉత్తం వాతాద్ ఇజినో, కబ్బు వాతాదిజినో వెంజి గజబిజి ఆజి మీ మన్ను సెద్రిన్ ఏండ, తియెల్ అవీండ మండ్రెజ్ ఇజి మాపు మిజి బతిమాల్జినాన్. 3 ఎయెర్బా ఇని పణి కిజి మిజి మోసెం కివీండ జాగర్త మండ్రు. (అయ దినం ఏలు దాక రెవెదె). లోకుర్ నండెండో దేవుణుడితో పడిన పణిజ్ కిజి టంటెజ్ ఆనార్లె. మరి దేవుణు రూలుజ విజు పడిన కిజిని నాసనమిదిజ్ తగ్గికాన్ ఆతి సెకాన్ తోరె ఆనిదాక అయ రోజు రెవెదె. 4 దేవుణు ఇజి పేరు ఇడె ఆతి మని విజు వన్నాజ్, పూజెజ్ కిబె ఆజిని విజు వనకాజ్ పడిన ఏండ పణిజ్ కిజి, అయ విజు వన్నాజ్ మున్ను వన్నిజ్ వాండ్రె దేవుణు ఇజి వెప్పాడ్రె, వాండ్రు దేవుణు గుడిదుబా సొన్ని బసాన్.

5 నాను మీ వెట మహివలె యా సజతిజ్ మీవెట వెప్పి మహిక మీరు ఎత్తు కిజెదెరా? 6 వన్ని వందిజ్ ఏర్పాటు కితి మని గడియూదనె వాండ్రు తోరె ఆదెజ్ వలె. అందెజె, ఏలు నాసనమిదిజ్ తగ్గికాన్ ఆతి వన్నిజ్ అడ్డు కిజి నిల్సినిక ఇనికాదో ఇజి మీరు నెస్సిదెర్. 7 దేవుణు విజు రూలుజ పడిన పణి కిజిని డాజెతి మని సత్తు ఏలుబా పణి కిజినాన్. గాని దనిజ్ అడ్డు కిజి నిల్సె మంజినికాన్ నడిమిహాన్ లాగి ఆనిదాక యా లెకెండె అడ్డు కిజి మంజినాన్. 8 నస్తివలె దేవుణు రూలుజ పడిన పణిజ్ కినికాన్ తోరె ఆనాన్లె. వన్నిజ్ మా ప్రబు ఆతి యేసు వన్ని వెయుదాన్ వాని ఉప్పిదాన్ సప్పి, వాండ్రు వానివలె మంజిని గొప్ప జాయ్దాన్ వన్నిజ్ నాసనం కినిన్లె. 9-10 దేవుణు రూలుజ పడిన పణిజ్ కినికాన్ తోరె ఆనివలె నయ్యూను వన్ని సత్తుదాన్ రకరకమేది బమ్మ పణిజ్ని గొప్ప పెరి పణిజ్ కిజి, నాసనం ఆజి సాని వరిజ్ విజెరిజ్ మోసెం కిదెజ్ విజు సెక పణిజ్ కిజి తోరెస్సాన్. ఎందనిజ్ ఇహిజు నిజమాతి దనిజ్ ప్రేమిసి దేవుణు వరిజ్ రక్తిస్తెజ్ వారు ఒవెవతార్. అందెజె వారు నాసనం ఆజి సొన్నినార్. 11 అందెజె వారు అబదమ్దిజ్ నమ్మిని లెకెండె మోసెం కిని సత్తుదిజ్ దేవుణు వరి మున్ను పొక్కాన్. 12 అందెజె, నిజమాతి దనిజ్ నమ్మిందె సెకదని వెట సర్ల ఆతి విజెరిజ్ దేవుణు సిక్కు సీనాన్.

గటిజు నిల్పి మండ్రు

13 గాని మీ వందిజ్ ఎప్పివలెబా దేవుణుడితో మాపు వందనమ్కు వెప్పి మండ్రెజ్ వలె. యాక కిజి మంజినిక సరి ఆతి పణినె. తంబెరిజాండె ఎందనిజ్ ఇహిజు దేవుణు ఆత్మ, వన్ని నెగ్గె కిజిని పణిదాన్, మీరు నిజమాతి దనిజ్ నమ్మిజి దేవుణు మిజి రక్తిస్తెజ్ ఇజి, దేవుణు యా లోకం పుట్ ఏండ ముజాలె మిజి ఎర్లిస్త మహాన్. 14 మీరు యా లెకెండె యేసుప్రబు వెట వన్ని గొప్ప పెరి జాయ్దు మండ్రెజ్ అక్కు, మనికిదెర్ ఆదెజ్ ఇజి మాపు వెప్పి సువార్తదాన్ దేవుణు మిజి కూక్త మనాన్. 15 అందెజె తంబెరిజాండె, మాపు మాటదానో ఉత్తమదానో మిజి నెస్తితికెజ్ డిజిన్ ఏండ మీ మన్నుదు ఇడ్డి కర్లివీండ మండ్రు.

16-17 మజి ప్రేమిసి ఎలాకాలం ఎర్దు సుడెజి మంజిని ఆసని, ఉసార్ మా మన్నుదు వన్ని దయాదర్మమదాన్ మజి సీతి మా బుబ్బాతి దేవుణుని, మా ప్రబు ఆతి యేసు క్రీస్తు మీ మన్నుజు దయరం వెప్పి, మీ విజు నెగ్గి మాటాదుని, మీరు కిజిని నెగ్గి పణిదు సత్తు సిజి నడిపిసీర్.

3

పార్లనం కిజి మండ్రు

1 కడెవేరిది మాట ఇనిక ఇహిజు, తంబెరిజాండె, ప్రబు మాటెజ్ మీ నడిమి సారితె లెకెండె మహిబాన్బా మరి బేగి సార్లెజ్, గవరం లొసె ఆదెజ్ ఇజి మీరు మా వందిజ్ పార్లనం కిజి మండ్రు. 2 విజెరిజ్ నమకం సిల్లెదగదె, అందెజె మాపు మూర్కతమ్దు మని వరి బాణిజ్ సెక వరి బాణిజ్ తప్తె ఆనిలెకెండెబా మా వందిజ్ పార్లనం కిదు. 3 అహిజు ప్రబు నమ్మిదెజ్ తగ్గికాన్ అందెజె వాండ్రు మిజి సత్తు సీజి సెక వన్ని బాణిజ్ వాండ్రు కాపాడ్వాన్. 4 ఇక్కెజ్ మీరు కిజి మండ్రెజ్ ఇజి మాపు మిజి ఆడ్ర సీతిమనికెజ్ అయాలెకెండె మీరు కిజినిదెర్. మరి కిజి మంజినిదెర్లె ఇజి ప్రబు పేరుదాన్ మాపు

మన్నుడు ఒడోబిజినావ్. ⁵ దేవుణు మున్ను మని ప్రేమని, మరి మీరు ఎలాగ కష్టమకు ఓరిస్తాజ్ ఇజి యేసుక్రీస్తు తోరిస్తి లెకెండ్ ఒరిస్తాజ్ మీ మన్నుడు రేపె ఆజి మండ్రెజ్ దేవుణు మిజి సాయం కిపిన్.

బండెజ్ ఆదెజ్ ఆవద్
⁶ తంబెరిజాండె, మా బాణిజ్ మీరు నెస్తిమని లెకెండ్ ఆవిండ బదకమ్దాన్ మంజిని వరిజ్ గుర్తు కిజి, వరి బాణిజ్ మీరు ఏడాః డిసి మండ్రు ఇజి మా ప్రబు ఆతి యేసుక్రీస్తు పేరుదాన్ మిజి ఆడ్ర సితి లెకెండ్ వెస్సినావ్. ⁷ మజి సుడోఃజి మా లెకెండ్ ఎలాగ నడిదెజ్ ఇజి మీరు నెస్తిదెర్ గదె. మాపు మీ వెట మహివలె బదకమ్దాన్ మన్వితావ్. ⁸ మావ్ఎయెర్ బాణిజ్బా సెడ్డిఃనె తిండి ఉణ్వితావ్. ఎయెన్ మున్నుబా ఆదారం ఆవిండ మాపు రెయు పొగల్ కష్టబాడోఃజి పణి కిజి మహిజ్ మీరు నెస్తిదెర్. ⁹ మీ బాన్ లొసి ఉండెజ్ అతికారం సిల్లెద్ ఇజి ఆవద్. గాని మీరు మజి సుడోఃజి నెసి అయా లెకెండ్ మండ్రెజ్ ఇజినె మాపు అయా లెకెండ్ ఇనికబా లొన్ఎండ పణి కిజి మహిజ్. ¹⁰ మరి మాపు మీ నడిమి మహివలె “ఒరెన్ పణి కవిండ మహిజి వాండ్రు బోజనం కిదెజ్ ఆవద్”, ఇజి మిజి రూలు సిత్తావ్.

¹¹ మీ లొఇ సగొండార్ వరి సొంత పణి ఇనికబా కివిండ, అనవునరమ్దిజ్ ఇజివరి నజతిజ్ లొఇ బుర్ల డుక్కి మంజినార్ ఇజి మాపు వెహావ్. ¹² ననికార్ వారు కిజిని అవ్సరం సిల్లి పణిజ్ డిసి సిజి నిపాతి పణి కిజి, వరి తిండి వందిజ్ గణస్తాజ్ ఇజి మా ప్రబు ఆతి యేసుక్రీస్తు పేరుదాన్ బతిమాల్జి ఆడ్ర సితి లెకెండ్ వెస్సినావ్. ¹³ మరి తంబెరిజాండె మీరు నెగ్గెకెజ్ అతికెజ్ కిదెజ్ ఎనెజ్బా వందిదెజ్ అవద్.

¹⁴ మాపు యా ఉత్తమ్దు రాస్తి పొక్తి మాటెజ్ లొజిఇ వన్నిజ్ గుర్తు కిదు. వాండ్రు సిగు ఆని వందిజ్ వన్ని వెట కూడోఃవిండ మండ్రు. ¹⁵ అహిజి వన్నిజ్ వగాతి వన్ని లెకెండ్ ఒడోబివిండ తంబెరి లెకెండ్ ఒడోబిజి వన్నిజ్ బుది వెహు.

¹⁶ సమాదానమ్దిజ్ప్ ప్రబు ఆతికాన్ ఎస్తివలెబె ఎలాగ మర్తి కాలమ్దుబా మిజి నిపాతిదాన్ మండ్రెజ్ సిపిన్. ప్రబు మీ విజెరె వెట ఎస్తివలెబా మనిన్. ¹⁷ పవులు ఇని నాను, నా కియుదాన్ యా కడెవెరి మాటెజ్ రాసిన్. నా విజు ఉత్తమ్దు యాకాదె గుర్తు. అందెజి నాను ఎలాగ రాసిన్ ఇజి మీరు పొలిస్తాజ్ అట్టిదెర్. ¹⁸ మా ప్రబు ఆతి యేసు క్రీస్తు దయా దర్మం మీ విజిదెరె వెట మనిద్.

అపొస్తుడు ఆతి పవులు తిమోతిజ్ రాస్తి ఉండ్రీ ఉత్రం

నెల్వ కిబిసినిక

అపొస్తుడు ఆతి పవులు తిమోతిజ్ రాస్తి ఉండ్రీ ఉత్రమనె యాక. ఎపెసి పట్టుమదు మని దేవుణుదిజ్ నమ్మిత్తి వరి సజమదిజ్ నడిపిస్సి వన్ని లెకెండ తిమోతిజ్ ఏర్పాటు కిత మనాన్. అందెజె, సజం నడిపిస్సిక ఎలాగ, నడిపిస్సి పాస్టరుజు, పెద్దెల్జు ఎలాగ మండ్రెజ్ ఇని దనివందిజ్ వెప్పినాన్.

ఎపెసి పట్టుమదు నండో రకమ్కాణి గుడిజ్ మన్ను. దేసమ్కాజ్ నండో లోకుర్ బాన్ వానార్. అందెజె క్రీస్తు వందిజ్ నిజమాతి బోదదిజ్ కూడఁకెజ్ నెన్పిస్సికార్ నండోడార్ మనార్. వరి వందిజ్ జాత్రత మండ్రు. నని బోద తపిస్సివరిజ్ బాణిజ్ దూరం ఆదు ఇజి వెప్పినాన్.

1-2 క్రీస్తు యేసుజ్ అపొస్తుడు ఆతి పవులు ఇని నాను తిమోతిజ్ రాసిన. నీను నా సొంత మరిన్ లెకెండ మని. ఎందనిజ్ ఇహిజ నానె నిజి దేవుణు దరొట్ తత. మజి రక్సిసిని దేవుణు వెప్తి ఆడ్ర వజ, మాటు ఆసదాన్ ఎద్రు సుడఁజిని క్రీస్తు యేసు వెప్తి ఆడ్ర వజ, నాను క్రీస్తు యేసుజ్ అపొస్తుడు ఆత. బుబ్బు ఆతి దేవుణుని ప్రబు ఆతి క్రీస్తుయేసు దయా దర్మమదాన్, మీ మున్ను కనికారం తోరిసి, మీరు నిపాతిదాన్ మండ్రెజ్ సాయం కిపిర్.

3-4 నాను మసిదోనియదు సొసి మహివలె నిజి వెప్తి లెకెండ, నీను ఎపెసుదు మండ్రెజ్ వలె ఇజి నాను కసితం వెప్పిన. ఎందనిజ్ ఇహిజ, అబె నెగొండార్ తపు బోద నెన్పిసినార్. వారు అయకెజ్ మరి ఎనెజ్బా నెన్పిన్తెజ్ అవద్ ఇజి నీను డటం వెప్టెజ్ వలె. వారు డొక్టార్ వెప్పి మంజిని కత సాన్తరమ్క లోజ, అంతు సిల్లెండ అని గొగొర్ వందిజ్ వెప్పిని సాన్తరమ్క లోజ మున్ను ఇడఁదెజ్ అవద్ ఇజి నీను డటం వెప్టెజ్ వలె. అయకెజ్ దేవుణు ఎత్తు కితి సజతిజ అడ్డు కిజి ఒరెన్ వెట ఒరెన్ తర్పిసిని సజతిజ్ నె రెజ్జెనె. దేవుణు మున్ను మని నమకం దానె, వాండ్రు ఎత్తు కితి సజతిజ్ నెస్తెజ్ అనాద్. ⁵ నమ్మిత్తికార్, ఒరెన్ వెట ఒరెన్ ప్రేమిసి మండ్రెజ్. అందెజె నీను యా లెకెండ డటం వెప్టెజ్ వలె ఇజి నాను నిజి వెప్పిన. నెగ్గి మున్నుదాన్ వాజిని ప్రేమదాన్, నెగెండ గదిసిని గర్బందాన్ వాజిని ప్రేమదాన్, దేవుణు మున్ను మని నిజమాతి నమకమ్దాన్ వాజిని ప్రేమదాన్, ప్రేమిసి మండ్రెజ్. ⁶ నెగొండార్, మున్ను వెప్తి సజతిజ డిఁస్త సొహారె పణిదిజ్ రెఇకెజ్ వర్గిజనార్. ⁷ వారు దేవుణు మోసెజ్ సితి రూలుజ్ నెస్సినికార్ ఆదికె కోరిజనార్. గాని ఇని దని వందిజ్ వర్గిజనార్ ఇజినో, నండో దయరమ్దాన్ నిజమనె ఇజి వర్గిజని సజతిజ వందిజ్నో, వారు నెన్పెర్.

⁸ దేవుణు మోసెజ్ సితి రూలుజ్ వాడుకండెజ్ మని వజి వాడుకోటిజ, అయా రూలుజ్ నెగ్గికెజ్ నె ఇజి మాటు నెస్సాట్. ⁹⁻¹¹ మరి మాటు నెసినాట్, దేవుణు మోసెజ్ సితి యా రూలుజ్, నాయమ్దాన్ మని వరిజ్ వరి తపుజ్ దిదిదెజ్ సిఎన్ ఇజి. గాని రూలుజ్ తప్పి వరిజ్, లోజ్ ఇ వరిజ్, నమ్మిజ వరిజ్, పాపిన్టిజ్, దేవుణు బాణిజ్ వాజిని సజతిజ్ ఇజ్జి కణకదాన్ సూణి వరిజ్ మతమదిజ్ దూసిస్సి వరిజ్, అయిసి అప్పొసిరిజ్ నప్పి వరిజ్, లోకాజ్ నప్పి వరిజ్, రంకు బూలాని వరిజ్, మొకకొడఁకె మొకకొడఁకెనె కూడ్డి వరిజ్, వెట్టిపణి కిదెజ్ లోకురిజ్ అసి పొర్ని వరిజ్, అబద్దం వర్గిని వరిజ్, అబద్దమదిజ్ ఒట్టు కిని వరిజ్, నిజమాతి బోదదిజ్ విరోదం అతికెజ్ కిని వరిజ్, నని వరి వందిజ్ రూలుజ్ సిత మనాన్. నీను మహి లోకురిజ్ వెహొ అ ఇజి, దేవుణు నజి ఒవజెప్పి సువార్తదు అయా నిజమాతి బోద మనాద్. లోకుర్ పొగిడిఁజిని కిజిని గొప్ప పెరి దేవుణు బాణిజె అయా సువార్త వాజినాద్.

పవులు మున్ను దేవుణు తోరిస్తి కనికారం

12-13 ముజాల నాను యేసుప్రబు ఆతి యేసుక్రీస్తుజ్ దూసిస్సికాన్. నమ్మిత్తి వరిజ్ ఇమ్మెజ్ కిజి ఆహె వన్నిజ్ ఇమ్మెజ్ కితికాన్. వన్నిజ్ స్రమెజ్ కితికాన్. అహిజ్బా నాను నమ్మిదెజ్ తగ్గికాన్ ఇజి వాండ్రు ఒడిఁబిజి, మహివరిజ్ సువార్త వెప్పిని వన్ని పణిదిజ్ నజి ఏర్పాటు కిత్తాన్. అందెజె నాను మా ప్రబు ఆతి క్రీస్తు యేసు నజి కితి దని వందిజ్ ఎనెజ్బా పొన్ఎండ మన. వాండ్రునె వన్ని పణి కిదెజ్ నజి సత్తు సితాన్. నాను యేసుజ్ నమ్మిఎండ మహివలె, తెలిఎండ అక్కెజ్ కిత. అందెజె దేవుణు నా మున్ను

కనికారం తోరిస్తాన్. 14 మా ప్రబు దయా దర్శమదాన్, వన్నిజ్ నమ్మిదెజ్, మహివరిజ్ ప్రేమిస్తాజ్ నజీ సాయం కిత్తాన్. క్రీస్తుయేసు వెట మాటు కూడితి మని దని దటాన్, నమకమని ప్రేమ నజీ దోహ్కై.

15 పాపం కిని వరిజ్ రక్సిస్తాజ్ క్రీస్తు యేసు లోకమ్దు వాతాన్ ఇని మాట నిజం ఆతిక. అయూక పూర్తి నమ్మిదెజ్ తగ్గిక. నాను కిత్తి పాపం నసా పాపం కినికార్ కివర్. 16 గాని, నసా పాపం కితి నా మున్ను దేవుణు కనికారం తోరిస్తాన్. ఎందనిజ్ ఇహిజ, వాని కాలమ్దు యేసు మున్ను. నమకం ఇడేజి, ఎలాకాలం దేవుణు వెట బత్తిని బత్తు దోహ్కై వరిజ్ నాను ఉండీ గుర్తు లెకెండ్ ఆని వందిజ్, నసా పాపం కితి నజీ, క్రీస్తుయేసు అంతు సిల్లెండ నండో ఓరిస్తాన్. 17 ఎలాకాలం రాజు ఆతి, ఎసెజ్బా సాఇ, నుడెదెజ్ అట్ఇ ఒరెండ్రె దేవుణుజ్ ఎలాకాలం గవరం సీజి పొగిడిజి మనీర్. ఆమెన్.

18 నా మరిన్ లెకెండ్ మని తిమోతి యాకదె నాను వెప్పిని బుద్ధి 'నిను కిదెజ్ మని వన్యా వందిజ్ ప్రవక్తరు ముజాలె వెప్తా మనార్గెదె. వారు వెప్తి వజనె నాను వెప్పిన్. వారు వెప్తి మని వజ లోజిజి, త్తపు బోద్ నెన్పిన్ వరిజ్ గటిజి ఎద్రిన్అ. 19 నా మున్ను మని నీ నమకం డిస్య. గర్భం గదిన్ఎండ నెగ్రెండ మన్అ. సెగొండార్, గర్భం గదిసి వెప్పిని దనిజ్ నెక్కపొక్కారె వరి నమకం పాడు కిత్తార్. 20 నని వరి లోఇ, హుమెనియ, అలక్కాండర్ ఇనికార్ మనార్. దేవుణుదిజ్ దూసిస్తాజ్ ఆవిద్ ఇజి వారు నెన్ని వందిజ్, సయతాను కీదు నాను వరిజ్ ఒపజెప్త మన.

2

నజమ్దు పార్లనం కిని వందిజ్ వెప్పినాన్.

1 అందెజె మరి ముకెలం, లోకుర్ విజెరె వందిజ్, దేవుణుదిజ్ పార్లనం కిదెజ్. వరిజ్ కావాలిస్కికెజ్ సిఅ ఇజి బతిమాలేజి లొస్తాజ్, వరి విజు వన్యా వందిజ్ ఎస్తివలెబా పార్లనం కిదెజ్, వాండ్రు విజెరిజ్ కితి మేలు వందిజ్ వన్నిజ్ వందనమ్కు వెప్తాజ్ ఇజి నాను మిజి ఉసార్ కిబిన్సు. 2 యా లెకెండ్ రాజుర్ వందిజ్, అదికార్మ్దు మని విజెరె వందిజ్ పార్లనం కిదెజ్. ఎందనిజ్ ఇహిజ, మాటు సాంతి సమాదనమ్దాన్ మహి వరి ఎద్దు నెగ్రెండ బత్తిదెజ్, దేవుణుదిజ్ తియెల్ ఆజి పూర్తి బక్సిదాన్ మండ్రెజ్. 3 యా లెకెండ్ కినిక నెగెద్. మజీ రక్సిన్సి దేవుణుదిజ్ ఇన్టం ఆతిక. 4 ఎందనిజ్ ఇహిజ, లోకుర్ విజెరిజ్ ఎల్లకాలం మని సిక్కుదాన్ తపిస్తాజ్ ఇజి, లోకుర్ విజెరె క్రీస్తు వందిజ్ నిజమాతి మాటెజ్ నెస్టెజ్ ఇజి దేవుణు కోరిజినాన్. 5 దేవుణు ఒరెండ్రె, దేవుణు, లోకుర్ నడిమి ఒప్పిన్కాన్ ఒరెండ్రె మనాన్. అయా ఒరెన్ క్రీస్తుయేసునె. 6 వాండ్రు లోకుర్ విజెరె పాపమ్కాజ్, ఎల్లకాలం మని సిక్కుదాన్ తప్తిన్సి వందిజ్ సాదెజ్ వన్నిజ్ వాండ్రె ఒపజెవె ఆతాన్. యాకదె, దేవుణు ఏర్పాటు కితి కాలమ్దు, లోకుర్ విజెరిజ్ రక్సిస్తాజ్ దేవుణు కోరిజిని దనిజ్ సాన్యం. 7 అందెజె, ఒరెన్ సాటిన్సి వన్ని లెకెండ్, అపొస్త్రుడు లెకెండ్, నేర్పిన్సి వన్ని లెకెండ్, యూదురు ఆఇకార్ యేసు వందిజ్ నిజమాతి సజతిజ్ నెసి నమ్మిదెజ్, వరి వందిజ్ దేవుణు నజీ ఏర్పాటు కిత్తాన్. ఈహు నజీ ఏర్పాటు కిత్తాన్ ఇజి వెప్పినిక నిజమనె అబద్ధం ఆవిద్. 8 అందెజె, దేవుణుదిజ్ పార్లనం కిదెజ్ మీరు కూడేజి వానివలె ఎంబెబా మొకకోడోర్ పార్లనం కిదెజ్ ఇజి నాను కోరిజిన. వారు దేవుణు వందిజ్ కేట ఆతి బత్తు, బత్తిదెజ్ వలె. వారు పార్లనం కినివలె, వరి మున్నుదు కోపం సిల్లెండ, ఎయెవెటబ జటిజ్ ఆవిండ కిక్కు పెర్తి కిదెజ్. 9 అయాలెకెండ్, దేవుణుదిజ్ పార్లనం కిదెజ్ మీరు కూడేజి వానివలె, బోదెకు నెగ్రెండ తయార్ ఆజి, వన్యాజ్ తగ్గి వజ తయార్ ఆజి వాదెజ్. అవికు సొకుజాణిజ్ మూల కనినో, బజరమ్నో, నండో కరీద్ది పూసెజ్నో నండో కరీద్ది పాతెజ్నో పొర్పాజి తయార్ ఆదెజ్ ఆవిద్. 10 గాని దేవుణుదిజ్ నమ్మిజినికెజ్ ఇజి వెహె ఆని బోదెకు మహివరి వందిజ్ నెగ్గి వణిజ్ కిజి వన్యా సొకు తోర్ ఆదెజ్. 11 మొకకోడోర్ నెన్పిన్సివలె, బోదెకు నెగ్రెండ వెంజి, జమ్న మంజి, వరిజ్ లోజిజి నెస్టెజ్. 12 మొక వరిజ్ నెన్పిన్సిజ్నో వరి మున్ను అతికారం కిదెజ్నో బోదెకాజ్ నాను సెల్వు సిఎ. అవికు జమ్న మండ్రెజ్. 13 ఎందనిజ్ ఇహిజ, దేవుణు అవ్వెజ్ ఆవిద్, ఆదముజునె ముజాలె తయార్ కిత్తాన్. 14 సయతాను ఆదముజ్ ఆవిద్, అవ్వెజ్నె మొసం కిత్తాన్. ఆహె అది పాపమ్దు అర్దాద్. 15 గాని అవికు దేవుణు మున్ను మని నమకం డిన్ఎండ, మహి వరిజ్ ప్రేమిని, దేవుణుదిజ్ ఒపజెవె ఆతి లోకు వజ నెగ్రెండ బత్తిదెజ్. ఆహె బత్తిజి మహిజ, కొడోరిజ్ ఏరుకబాని వలె దేవుణు బోదెకాజ్ రక్సిస్తాన్.

3

1 ఒరెన్ పాస్టరు ఆదెజ్ కోరిజినాన్ ఇహొజ, వాండ్రు నెగ్గి పణి కోరిజినాన్. యా మాట పూర్తి నమ్మిదెజ్ తగ్గి. 2 పాస్టరు నింద సిలికాన్ ఆదెజ్ వలె. ఉండ్రె అల్ని మంజనికాన్, అణసె ఆజి మంజనికాన్ ఆదెజ్ వలె. నెగ్గి బుది మంజనికాన్, వని పణిజాణిజ్ తగమాతికాన్ ఇజి తోరె ఆదెజ్ వలె. వాతి వరిజ్ నెగ్రెండ డగ్గు కినికాన్ ఆదెజ్ వలె. దేవుణు మాట నెగ్రెండ నెన్పిస్సికాన్ ఆదెజ్ వలె. 3 వాండ్రు సోన్ఎండ, డెయ్సె ఆవండ మంజనికాన్, సొర్దాన్ మంజనికాన్, జటిజ్ ఆవండ మంజనికాన్ ఆదెజ్ వలె. వాండ్రు డబ్బుదిజ్ ఆన ఆఇకాన్ ఆదెజ్ వలె. 4 వాండ్రు వన్ని సొంత ఇండ్రెణి వరిజ్ నెగ్రెండ సూణికాన్ ఆదెజ్ వలె. వన్ని కొడోరె ఎస్తివలెబా విజెరిజ్ గవరం సీజి, వన్ని మాటదిజ్ లోజిజిని వరి లెకెండ వాండ్రు కిదెజ్. 5 ఎందనిజ్ ఇహొజ, సొంత ఇండ్రెణి వరిజ్ నెగ్రెండ సుడెదెజ్ నెన్ఇకాన్ ఇహొజ ఎలాగ దేవుణు సజం నడిపిసెజ్ అటూన్. 6 వాండ్రు కొత్తాజ్ నమ్మిత్తికాన్ ఆజి మండ్రెజ్ ఆవెద. ఎందనిజ్ ఇహొజ, కొత్తాజ్ నె వన్నిజ్ యా పెరి పణిదిజ్ ఏరపాటు ఆత ఇజి గర్త ఆజి, సయ్నాన్ ఎలాగ దేవుణు తీర్పు ఆజి సిక్కుదు అర్త మనాండ్రె, అయ లెకెండ వీండ్రు బా అర్పాన్. 7 మహికార్ వన్ని వందిజ్ నెఇకెజ్ వెహొఎండ, సయ్తాన్ సికుదు అరెండ మంజని వందిజ్ నమ్మిఇ వరి ఎద్రు పల్కుబడి: మనికాన్ ఆదెజ్ వలె.

8 అయాలెకెండ, పెద్దలజ్, విజెరె వన్నిజ్ గవరం సీదెజ్ తగ్గి వరి లెకెండ మండ్రెజ్. వారు రుండి నాలికెజ్ మన్ఇకార్ ఆదెజ్ వలె. వారు సోన్ఎండ, డబ్బు వందిజ్ ఆనగొటు ఆవండ మంజనికార్ ఆదెజ్ వలె. 9 దేవుణు ఏలు తోరిసి నెన్పిస్తి డాజితి మహి గొప్పు నిజమాతి సజతిజ్, వన్ని గర్తుం వన్నిజ్ గదిసిని లెకెండ ఆవండ నెగ్రెండ మంజనికాన్ ఆదెజ్. 10 పెద్దలజు ఇజి వరిజ్ ఏరపాటు కిని ముజాల, వారు నెగ్రెండ మంజినారా, నమ్మకమ్దాన్ పణి కిజినారా ఇజి సుడెదెజ్. నింద సిలికార్ ఇజి వారు రుజువ్ కితిజ, వారు పెద్దలజ్ పణి కిదెజ్.

11 అయాలెకెండ, పెద్దలజ్ బోదెకు, మహికార్ వరిజ్ గవరం సీని వరి లెకెండ మండ్రెజ్. అవికు సొండిజ్ వర్గిఎండ, సోన్ఎండ మండ్రెజ్ వలె. విజా దని లొఇబా మాపు నమ్మిదెజ్ తగ్గికెజ్ ఇజి తోరె ఆదెజ్ వలె. 12 పెద్దలె ఉండ్రె అల్ని మంజనికాన్ ఆదెజ్ వలె. వన్ని కొడోరిజ్ వన్ని ఇండ్రెమని వరిజ్ నెగ్రెండ సుడెజి నడిపిస్సికాన్ ఆదెజ్ వలె. 13 నెగ్రెండి పణి కిని పెద్దలె ఎయెన్ వన్నిజ్ బా పల్కు బడి: మనాద. క్రీస్తు యేసు ముస్సు మని వన్ని నమకం వందిజ్ వెప్తాజ్ వన్నిజ్ తియెలె సిల్దెద.

14 నీ డగ్గు బేగి వాదెజ్ ఇజి నాను ఆన ఆజిన. అహొజ్ బా, నాను యా సజతిజ్ నిజి రాసిన్. 15 ఎందనిజ్ ఇహొజ, నాను వాదెజ్ ఆల్సెం ఆతిజ, దేవుణు కుటుమ్దు ఒరెన్ ఒరెన్ ఎలాగ మండ్రెజ్ ఇజి నీను నెస్తిలె. బత్తిజిని దేవుణు సజమ్దికార్ విజెరెనె దేవుణు కుటుమ్దికార్. ఉండ్రె నిట కొహి ఉండ్రె ఇల్లు అరెండ అన్ని లెకెండ దేవుణు సజమ్దికార్ దేవుణు వందిజ్ నిజమాతికెజ్ అస్సార్. అయాలెకెండ, ఉండ్రె పునాది లెకెండ దేవుణు సజమ్దికార్ దేవుణు వందిజ్ నిజమాతికెజ్ అస్సార్. 16 మాటు నమ్మిజిని మతమ్దు మని, యేసుక్రీస్తు వందిజ్ ముజాలె డాజితి మహికెజ్, గాని ఏలు దేవుణు తోరిసి నెన్పిస్తి నిజమాతికెజ్ గొప్పు పెరిక ఇజి ఎయెర్బా ఒపుకొణార్. క్రీస్తు లోకు వజి లోకమ్దు వాతాన్. దేవుణు ఆత్మ, వాండ్రు నీతి నిజాయితీ మనికాన్ ఇజి రుజువ్ కిత్తాన్. దేవుణు దూతార్ వన్నిజ్ సుడెతార్. లోకుర వన్ని వందిజ్ యూదురు ఆఇ వరిజ్ వెప్తార్. లోకమ్దు ఎంబెబా, లోకుర వన్నిజ్ నమ్మిత్తార్. పరలోకమ్దు దేవుణు వన్నిజ్ ఒత మనాన్.

4

తప్పుబోద నెన్పిసినికార్.

1 కడెవెరి దినమ్కాజ్ సెగ్గెండార్, వారు నమ్మిత్తి నిజమాతి మాటెజ్ డి:సి, అబద్ధం వర్గిని దెయమ్కు వెట సొనారె, అయా దెయమ్క బోద వినారె దనిజ్ లోజినార్ ఇజి దేవుణు ఆత్మ టెటెజ్ వెస్సినాన్. 2 అబద్ధం వర్గిని వేసం కినికారె యా బోదెజ్ నెన్పిసినార్. ఇనుముదాన్ సుహొతిజ ఎలాగ మా తోలు సాతి లెకెండ అనాదొ అయ లెకెండ వరి గర్తుం గదిన్ఎండ సాత మనాద. 3 వెండ్రె ఆనిక తప్పు ఇజి, సెగం రకమ్కాణి ఉణి తినికెజ్ తిండ్రెజ్ ఆవెద ఇజి వారు నెన్పిస్సార్. గాని దేవుణుదిజ్ నమ్మిత్తి, నిజమాతి మాటెజ్ నెస్సికార్, దేవుణుదిజ్ వందనమ్కు వెస్సి తిండ్రెజ్ ఇజినె దేవుణు అయాకెజ్ తయార్ కిత్తాన్.

4 ఎందనిజ్ ఇహిజ, దేవుణు తయార్ కితికెజ్ విజు నెగ్గెకెజ్. ఇనికబా నెక్కి పొక్కిక అవద్. గాని దేవుణుదిజ్ వందనం వెప్పి అయకెజ్ తిండ్రెజ్. 5 ఎందనిజ్ ఇహిజ, దేవుణు మాటదాన్, పార్దనదాన్ దేవుణు వందిజ్కేట అతికెజ్ ఆతె మన్నె.

6 నీను యా సజతిజ్, నీ సజమ్దు మని తంబెర్సిరిజ్ నెస్సిసి మహిజ, నీను క్రిస్తు యేసుజ్ నెగ్గె పణి మనిసి ఆని. దిని వెట, ఏలుదాక నీను నమ్మిజిని నీ నమకం వందిజ్ వెప్పిని మాటదాన్ నిజమాతి నెగ్గె బోదదాన్ నీను నమకమ్దు పిరిత 7 వర్దిదెజ్బా విలువ సిలి, డొక్టార్ వెప్పి మంజిని కత సాన్తరమ్కాణిజ్ నీను దూరం మన్త. గాని దేవుణు వందిజ్ తియెల్ ఆజి బక్తిజి మండ్రెజ్ నీను ఒజ్జ ఆత. 8 ఒడొల్దిజ్ రూణు వాక్కి ఒజ్జ కితిజ నెగెద్. గాని దేవుణు వందిజ్ తియెల్ ఆజి బక్తిజి మహిజ, విజు వన్నా లోక గొప్ప లాబం మంజినాద్. ఎందనిజ్ ఇహిజ, అయాలెకెండ్ మహిజ, ఏలుబా నెగ్గె బత్తు మంజినాద్, వాని కాలమ్దుబా నెగ్గె బత్తు మంజినాద్ ఇజి ఒజ్జు కిజినాద్.

9 నాను మున్ను వెప్పి సజతి నమ్మిదెజ్ తగ్గిక. పూర్తి నమ్మిదు. 10 బత్తిజిని దేవుణు మున్నునె మా ఆస మాటు ఇట్టా మనాట్. అందెజ్ మాటు అయా నెగ్గె బత్తు వందిజ్ నండొ అరల ఆజి క్లబ్బబడిజినాట్. వాండ్రె లోకర్ విజెరిజ్ ముకెలం వన్ని మున్ను నమకం ఇడ్డి వరిజ్ రక్కిన్సికాన్.

11 నీను యా సజతిజ్ నీ సజమ్దు మని వరిజ్ నెస్సిసి, ఆహా కిదెజ్ ఇజి డటం వెహొత. 12 నీను దజడః ఇజి, ఎయెర్బా నిజి ఇజ్జి కణక సుడఃఎండ నీను నిజి సుడఃత. గాని నీను వర్గిని మాటదు, నడిఃని నడఃకదు, నీను ప్రేమిన్సి ప్రేమదు, దేవుణు మున్ను మని నీ నమకమ్దు, ఇని పాపం సిలి నీ బత్తుదు, నమ్మిత్తి వరిజ్ ఉండ్రె గుర్తు లెకెండ నీను మన్త. వారు నిజి సుడఃజి అయాలెకెండ్ మండ్రెజ్, నీను గుర్తు లెకెండ్ మన్త. 13 నాను వానిదాక, నీను విజెరిజ్ దేవుణు మాట నద్విజి విన్పినె, బోదినె, నెస్పినె మన్త. 14 సజం పెద్దెల్జు నీ మున్ను కికు ఇట్టివలె, ప్రవక్తరు నీ వందిజ్ వర్గితి దని వెట, దేవుణు ఆత్తు నిజి సితి వరం డిఃన్ఎండ, నీను అయొక కిత.

15 యా సజతిజ్ నీను జాగర్దదాన్ కిత. నీ మన్ను విజు, దిని మున్నునె ఇడఃత. ఎందనిజ్ ఇహిజ, నీను నమకమ్దు పిరిజినిక లోకర్ విజెరె టెటజ్ సుడఃదెజ్. అందెజ్, నీ మన్ను విజు దని మున్నునె ఇడఃత. 16 నీను కిజిని పణి నెగ్రెండ కిత. నీను నెస్సిసిని బోదదు తప్ప సిల్లెండ నెస్సిన్త. నీను అయకెజ్ డిఃన్ఎండ కిజి మన్త. ఎందనిజ్ ఇహిజ, నీను అయ లెకెండ్ కితిజ, ఎలాకాలం మని సావుదాన్ నిజి నీనె తప్తె ఆనిలె. నీను వెప్పినికెజ్ వెని వరిజ్బా తప్తెన్సిలె.

5

1-2 నీ సజమ్దు మని డొక్రెజ్ జటిజ్ ఆవండ వన్నెజ్ బుబ్బు లెకెండ్ ఒడిఃబిజి, పణిసి వెహొత. దజడఃరిజ్ తంబెరిజు లెకెండ్ సుడఃత. డొక్రికాజ్ యాయెక్ లెకెండ్ సుడఃత. దజడిఃకాజ్ తప్ప అలోసనదాన్ సుడఃఎండ, తజిక్ లెకెండ్ సుడఃత. 3 దిక్కు సిల్లి రాండి బోదెకాజ్ గవరం సిత. 4 ఎంబెణి రాండి బోదెలదిజ్బా కొడొర్నొ నాతిసిర్నొ మహిజ, వీరు వరి సాంత ఇండ్రెణి వరిజ్ సుడఃదెజ్ వలె. సాంత ఇండ్రెణి వరిజ్ సూణికాదె దేవుణుదిజ్ సేవకిని వందిజ్ ముకెలమతిక ఇజి ముజాలె నెస్సెజ్ వలె. అయ లెకెండ్ అయెసి అప్పానిజ్, అని అమ్మెజ్ రుణం తీర్సినార్. ఎందనిజ్ ఇహిజ, అయొక దేవుణుదిజ్ ఇస్టం ఆతిక.

5 దిక్కు సిలి రాండి బోదెలి దేవుణు మున్నునె వాండ్రు కావలిస్తికెజ్ విజు సీనాన్ ఇజి, దని ఆస ఇట్టా మనాద్. అది రెయు పొగాల్ పార్దనం కిజి, వన్ని సాయం లోసి మంజినాద్. 6 గాని ఉణిజి, తింజి సుకం వందిజ్ బత్తిజిని రాండి బోదెలి బత్తిజిజ్బా ఆత్మియ బత్తు సాతి లెకెండ్ మనాద్. 7 మహికార్ ఎయెర్బా వరిజ్ దుసలాడఃఎండ మంజిని వందిజ్, నీను సజమ్దు మని నమ్మిత్తి వరిజ్ యా సజతిజ్ ఆడ్ర సిత. 8 ఎయెర్బా వన్ని కుటుమ్ది వరిజ్, ముకెలం వన్ని సంత ఇండ్రెణి వరిజ్ సుడఃఎండ మహిజ, వన్ని నమకం డిఃస్తి లెకెండ్నె దేవుణు ఎద్రు మనాన్. వాండ్రు నమ్మిజి వన్ని ఇంక నండొ సెకాన్.

9 ఉండ్రె రాండి బోదెలిదిజ్ అరువయ్ పంటెజ్ లావు మహిజనె, దనిజ్ రాండి బోదెక్ లెక్కాదు కూడుఃవ్త. మరి, అది ఒరెన్ వన్నిజె పెంట్టి ఆతిమహికాద్ ఆదెజ్ వలె. 10 నెగ్గె పణిజి వందిజ్ నెగ్గెకాద్ ఇజి పేరు అనువె ఆతికాద్ ఆదెజ్. ఇహిజ, దని కొడొరిజ్ నెగ్రెండ పొన్ కితాదా, నెల్వ సిల్లి

వరిజ్బా డగ్గు కిజి నెగ్గెండ సుడేశతదా, దేవుణుదిజ్ నమ్మిత్తి వరి పాదమ్కు నొరజి మహదా, కన్ఠమ్దు మని వరిజ్ సాయం కిజి మహదా, విజు నెగ్గి పణిజ వందిజ్ దనిజ్ అదిని ఒపజెపె ఆజి మహదా, ఇజి సుడేశదెజ్. యా లెకెండ మని వన్కాజ్ లెక్కాదు కుడుఃవ్అ.

11 దజడిః కాలమ్దు రాండి ఆతి బోదెకాజ్ లెక్కాదు కూడుఃబమ. ఎందనిజ్ ఇహిజ, సెగం కాలం వెన్కా అవికు మన్సు అన్జెజ్ అల్వెండ పెండ్లి ఆనె. ఆహె క్రీస్తుజ్ డిఃస్సు. 12 అయావలె, మరి పెండ్లి ఆఎ ఇజి దేవుణు పణినె కిన ఇజి ముజాల కితి ఒట్టు తప్పినె. అందెజె, అవికు తప్పె ఇజి లోకుర్ బాణిజ్ వెహె ఆనె. 13 మరి అవికు బదకం ఆజి ఇల్లు, ఇల్లు, బులాదెజ్ ఒజ ఆనె. బదకమ్నె ఆవెండ సొండిజు వర్గిజి మహి వరి సజతిజ జోలి కినె. వర్గిదెజ్ ఆఇకెజ్ వర్గినె. 14 అందెజె, దజడిః కాలమ్దు రాండి ఆతి బోదెకు పెండ్లి ఆజి, కొడొర ఇడఃజి, ఇండ్రెణి పణి సుడేశజి మండ్రెజ్ ఇజి నాను కోరిజిన. ఆహె, సజమ్దిజ్ దూనిస్తజ్ పడఃఇ వన్జిజ్ అవ్వసరం సీదెజ్ అవద్ ఇజి నాను కోరిజిన. 15 దజడిః కాలమ్దు రాండి ఆతి సెగొండెక్ నమకం డిఃస్సినె సయ్తాన్ వెట సొహె.

16 దేవుణుదిజ్ నమ్మిత్తి ఉండ్రె దని కుటుమ్దు రాండి బోదెక్ మహిజ, అది వన్కాజ్ సుడేశదెజ్ వలె. వెన్కు బాజిత సజమ్దు ఒపజెప్పెజ్ అవద్. ఎందనిజ్ ఇహిజ, దిక్కు, నీలి రాండి బోదెకాజ్ సుడేశదెజ్ సజం ఆనాద్.

17 దేవుణు సజం ఎలుబడిః కిజిని పెద్దెల్జ, ముకెలం కన్ఠబడిఃజి దేవుణు మాట బోదిసి నెస్సిసిని వరిజ్ వరి జితమ్దిజ్ మరి ససానె కుడుఃప్పి లొసె ఆదెజ్ వారు తగ్గికార్. 18 ఎందనిజ్ ఇహిజ, “కలమ్దు మటిసిని డాఃను మూతుదు కిమ తొహమాల్” ఇజి, “పణికినికాన్ జితమ్దిజ్ తగ్గికాన్”, ఇజి దేవుణు మాటదు వెప్పినాద్.

19 ఒరెన్ పెద్దెలి మున్సు, మోప్పి నేరమ్దిజ్ రిఎర్ ముఎర్ సాసిరు మహిజనె అయాక నమ్మిదెజ్. 20 మహికార్ తప్పిదిజ్ తియెల్ ఆజి మంజిని వందిజ్ పాపం కిజినె మంజిని పెద్దలుజు వరి సజమ్దు మని విజెరె ఎద్దు డటం దిదిఅ.

21 ఇజ్జికాన్ పెరికాన్ ఇజి తేడ తొవండ నాను మున్సు. వెప్పా సజతిజ్ నీను కిదెజ్ వలె ఇజి దేవుణు ఎద్దు, క్రీస్తుయేసు ఎద్దు, ఏర్పాటు ఆతి దేవుణు దూతార్ ఎద్దు నాను నిజి ఆడ్ర సీజిన.

22 గబి బిజ, ఎయెరి మున్సుబా పెద్దెలి పణి వందిజ్ కిక్కు ఇడఃజి దీవిన్సు. మహి వరి పాపమ్కాజ్ వెట కూడఃజి మన్అ. విజు పాపమ్కాజ్ నీను దూరం మన్అ.

23 నీను ఉణిజినిక అర్గిని వందిజ్, డిఃన్వెండ వాజిని జబ్బు వందిజ్ ఏరునె ఉణెవెండ, బుకెండ ద్రాక్కు కల్లుబ ఉణ్అ.

24 సెగొండార్ కిజిని పాపమ్కు విజెరె ఎద్దు తోరజినె. వారు, తీర్పు తిరసె ఆదెజ్ సొని ముజాల, తీర్పు సీనికార్ వరి సజతి నెసినార్. గాని మరి సెగొండార్ పాపమ్కు వెనుకనె తెలిసె.

25 అయాలెకెండ, సెగొండార్ కితి నెగ్గి పణి విజెరె ఎద్దు తోరజినె. విజెరె ఎద్దు తోరక ఎసెజ్బా డాజ్జి మండ్రెజ్ అల్ఉలె.

6

వెటిపణి కినికార్ ఎలాగ మండ్రెజ్

1 దేవుణుదిజ్ నమ్మిత్తి వెట్టిపణి కినికార్ విజెరె వరి ఏజుమానురిజ్ సీని గవ్వరం విజు సీదెజ్. ఎందనిజ్ ఇహిజ, ఎయెర్బా దేవుణు పేరుదిజ్, యేసు వందిజ్ మాపు నెన్పిసిని మాటదిజ్ దూసిన్వెండ మంజిని వందిజ్ వరిజ్ సీదెజ్ మన్సి గవ్వరం సీదెజ్.

2 వరి ఏజుమానిరు నమ్మిత్తికార్ ఇహిజ, వారు మా తంబెరిజునెగదె ఇజి తక్కు గవ్వరం సీదెజ్ అవద్. గాని వారు మరి ఒదె ఏజుమానిరు వందిజ్ పణికిదెజ్. ఎందనిజ్ ఇహిజ, వారు ప్రేమిసిని నమ్మిత్తి వరిజె వారు కిజిని పణిజాణిజ్ మేలు వాజినె. నీను యా సజతిజ్ నీ సజమ్దు మని వరిజ్ నెన్పిసి, డటం వెప్పెజ్ వలె.

డబ్బు వందిజ్ ఆస ఆదెజ్ అవద్.

3-5 ఎయెన్బా యేసుప్రబు వందిజ్ ఆఇ బోదెజ్ నెన్పిసి, మా ప్రబు ఆతి యేసుక్రీస్తు వెప్పా నిజమాతి బోదెజ ఒప్పకొడెవెండ, దేవుణు బక్తిదాన్ కూడిఃతి మని బోదెజ ఒప్పకొడిఃవెండ మనికాన్ గర్దూన్

నిండిత మనాన్. వన్నిజ్ ఇనికబా తెలివెద. వన్నిజ్ అవసరం మన్ని దన్నిజ్, అవసరం సిల్లి దన్నిజ్ విజు వన్యా వందిజ్ తర్కిస్తాజ్ పెరి ఆస మనాద్. క్రీస్తు వెప్తి మాటిజ అర్థం వందిజ్ జటిజ్ ఆనాన్. యా లెకెండ కినిక, గోస, జటిజ్, దుసలాడెనిక, సెఇ అనుమానమకు విజు పుటిస్సు. ఎస్తివలెబా గొడెబెజ్ పుటిస్సు. యా లెకెండ తర్కిస్సి వరి బుద్ది సెద్రిత మనాద్. వరి లొఇ నిజమాతి బోద సిల్లెద్. క్రీస్తు మతం వందిజ్ వెప్పి, ఆస్తి గణస్తాజ్ ఇజి వారు ఒడెబిజినార్.

6 దేవుణుడిజ్ ఇస్టం ఆతివజ బత్తిజి, దన్ని దటాజ్ సరదె ఆజి, నజి యాకదె సాలు ఇజి ఎత్తు కిని వన్నిజ్ గొప్పు లాబు మనాద్ 7 ఎందనిజ్ ఇహిజు, మాటు పుట్టివలె ఇనికబా యా లోకమ్దు తెవతాల్. మాటు సానివలె యా లోకమ్దాన్ ఇనికబా ఒతెజ్ అట్వెట్. 8 అందెజె, మజి ఉణిక మహిజు, పొరిపాదెజ్ పాత పర మహిజు, అయాకదె మజి సాలు. 9 గాని ఆస్తి మన్నికానాదెజ్ కోరిజినికాన్ డబ్బు గణస్తాజ్ ఇని ఆసెజు సిక్కుడు అర్నాన్. బుద్ది సిలి పాడు కిని నండో ఆసెజ్ ఉరి లెకెండ ఆజి, అయాకెజ్ వన్నిజ్ పాడు కిని, నాసనం కిని. 10 ఎందనిజ్ ఇహిజు, ఉండ్రీ మొకదిజ్ వెల ఎలాగ మంజినాదో, అయ లెకెండ విజు సెఇ పణిదిజ్ డబ్బు ఆసనె వెల. సెంగొండార్ డబ్బుదిజ్ ఆస ఆజి, వారు నమ్మిత్తి నిజమాతికెజ్ డిసి, వరి మన్సు కూడం గుత్తి సాహిజు ఎలాగ మంజినాద్, అయ లెకెండ వరిజ్ వారి నండో బాదెజ్ కల్లిస్తె.

11 గాని దేవుణు లోకు ఆతి నీను యా సెఇ ఆసెజాణిజ్ దూరం మన్అ. నీతి నిజయాకెజ్ని నెగ్గికెజ్ కిజి దేవుణు బక్తిదు మన్అ. దేవుణుదిజె నమ్మిజి మహి వరిజ్ ప్రేమిసి, కష్టమకు ఓరిసి, సార్లిదాన్ మన్అ. 12 నీను యేసుక్రీస్తుజ్ నమ్మితిజ్ కష్టమకు వానె. వన్యాజ్ నీను గెలస్తాజ్ నీను నెగ్గెండ నుడెఅ. నీను అయాలెకెండ గెలస్తాజు, ఎలాకాలం బత్తిని బత్తు దోహక్కాద్. దిని వందిజె దేవుణు నిజి కూక్త మనాన్. 'నాను క్రీస్తుజ్ నమ్మిజన', ఇజి నండో లోకుర్ ఎద్దు నీను ఒపుకొటివలె, నని బత్తు వందిజె దేవుణు నిజి కూక్తాన్. 13-14 విజు వన్యాజ్ పాణం సీజిని దేవుణు ఎద్దుని పొంతి పిలాతు ముజాలె వెనెబాతివలె, దయరమ్దాన్ నెగ్గెండ ఒపుకొటి క్రీస్తుయేసు ఎద్దు నాను నిజి ఆడ్ర సీజిన. మా ప్రబు ఆతి యేసుక్రీస్తు వాని దినమ్దాక నీను పాపం సిల్లెండ, నిందెజ్ సిల్లెండ నాను నిజి వెప్తి సజతిజ్ కిజి మన్అ ఇజి ఆడ్ర సీజిన. 15 దేవుణు ఏర్పాటు కితి సమయమ్దు యేసుప్రబుజ్ వాండ్రు రపిస్నాన్. గొప్పు పెరికాన్ ఆతి విజు వన్యా మున్సు ఒరెండ్రె అతికారం మనికాండ్రె దేవుణు. వాండ్రు రాజారిజ్ ఇంక పెరి రాజు. ప్రబురిజ్ ఇంక పెరి ప్రబు. 16 వాండ్రు ఒరెండ్రె ఎసెజ్బా సాఇకాన్. డగ్రు సొండ్రెజ్ అట్ఇ నసా జాయ్దు బత్తిజినాన్. వన్నిజ్ ఎయెర్బా ఎసెజ్బా తొవెర్. ఎయెర్బా ఎసెజ్బా నుడెదిజ్ అట్వెర్. వన్నిజె విజు గవేరమ్ని ఎలాకాలం అతికారం మనిద్, ఆమెన్.

17 యా లోకమ్దు ఆస్తి మనికార్, గర్ర ఆవిండ, ఆస్తి మున్సు ఆస ఆవిండ మండ్రెజ్ ఇజి నీను డటం వెహెఅ. యా ఆస్తిదిజ్ నమ్మిదిజ్ అట్ఇక. గాని వరి ఆస దేవుణు మున్సు ఇడెదిజ్ ఇజి నీను వెహెఅ. సుకమ్దాన్ సరద ఆజి మండ్రెజ్ దేవుణునె తకు సిల్లెండ విజు సీనికాన్. 18 వారు మహి వరిజ్ నండో మేలు కిదెజ్, నండో నెగ్గి పణిజ్ కిదెజ్, నీను వారు ఆవిండ, నండో సీబాజి సీనికార్ ఆదెజ్ ఇజి నీను వరిజ్ వెహెఅ. 19 అయాలెకెండె, వాని కాలమ్ది వరి బత్తు వందిజ్ వారు ఉండ్రీ నెగ్గి పునాది తయూర్ కిజినార్. ఎందనిజ్ ఇహిజు, అయావలె వరిజ్ దేవుణు వెట ఎలాకాలం బత్తిని బత్తు దోహక్కాద్.

20 ఓ తిమోతి, దేవుణు నిజి ఒపజెప్తి సేవ పణి నీను నెగ్గెండ నుడెఅ. పణిదిజ్ రెఇ సెఇ మాటిజు వర్ణిఎండ దూరం మన్అ. అరదం సిల్లెండ తర్కిస్సి వన్యాజ్ దూరం మన్అ. దనిజె సెంగొండార్ అబద్దమక గెణం ఇజి కూక్కినార్. 21 సెంగొండార్, 'అయాక నజి మనాద్', ఇజి ఒపుకొటారె, యేసు వందిజ్ నిజమాతి సజతిజ్ డిస్త సాహార్. దేవుణు దయా దర్థం మీ వెట మనిద్.

అపొస్తుడు ఆతి పవులు తిమోతిజ్ రాస్తి రుండి ఉత్తం

నెల్ల కిబిస్సిక

అపొస్తుడు ఆతి పవులు ఎవెసి సజం నడిపిసిని తిమోతిజ్ రాస్తి రుండి ఉత్తమనె యాక. పవులు, సాదెజ్ కాలం డగ్రు ఆతాద్ ఇజి నెస్తాండ్రె, సజమదిజ్ నెగ్రెండ నడిపిసి, నిజమాతి బోద వరిజ్ నెన్పిస్సెజ్ వలె ఇజి తిమోతిజ్ వెప్పిన్నాన్.

1-2 క్రీస్తుయేసు పోక్తి అపొస్తుడు ఆతి పవులు ఇని నాను, నా సొంత మరిన్ లెకెండ నాను ప్రేమిసిని తిమోతిజ్ రాసిన్. దేవుణు ఎత్తు కితి వజనె నాను అపొస్తుడు ఆత. క్రీస్తుయేసు వెట మాటు కూడిఃతి మన్ని దన్నితాన్ లోకర్ ఎలాకాలం బత్తిన్గార్ ఇజి దేవుణు కితి ఒట్టు వెహ్లాజ్నె నాను అపొస్తుడు ఆత. మా బుబ్బు ఆతి దేవుణుని ప్రబు ఆతి క్రీస్తుయేసు దయా దర్మమదాన్ మీ ముక్కు కనికారం తోరిసి, నిపాతిదాన్ మండ్రెజ్ సాయం కిపిర్.

నమకమ్దాన్ మంజిని వందిజ్ దయరం వెప్పిన్నాన్

3 రెయు పొకాల్ నాను పార్లం కినివలె డిన్ఎండ నిజి ఒడిఃబిజి దేవుణుదిజ్ వందనమ్కు వెప్పిన్న. నా అనిగోగెరు వన్నిజ్ పొగిడిఃజి మాడిఃస్తి లెకెండ, నానుబా నా గర్బం నజి గదిన్ఎండ నెగ్రెండ వన్నిజ్ పొగిడిఃజి మాడిఃసిన్. 4 నాను నిజి డిఃస్తానె వాజి మహిజ్, నీను అడఃబాతి. అయాక ఎత్తు కితానె నిజి సుడఃదెజ్ ఇజి నండో ఆన ఆజిన్. ఎందనిజ్ ఇహిజ, నజి నరద పూర్తి వానాద్. 5 నీను క్రీస్తుయేసుజ్ నిజం నమ్మిజిని. అయాక నాను ఎత్తు కిజిన్. ముజాలె, నీ డొక్ర బీబి ఆతి లొయిని నీ యాయ యునికె, క్రీస్తుయేసుజ్ నమ్మిత మహె. అయ లెకెండ ఏలు నీనుబా నమ్మిజిని ఇజి నాను తవ్వెండ నెసిన్. 6 అందెజె నీను కిదెజ్ ఇజి దేవుణు నిజి సీతి, వరం నీను నెగ్రెండ నండో కిదెజ్ ఇజి నాను నిజి ఎత్తు కిబిసిన్. నాను దేవుణు నేవ పణి వందిజ్ నీ మున్సు కిక్కు ఇడఃజి దీవిస్తివలె, దేవుణు అయా వరం నిజి సీత్తాన్. 7 నీను కిదెజ్ ఇజి దేవుణు నిజి సీతి వరం నీను కితి. ఎందనిజ్ ఇహిజ, దేవుణు వన్ని ఆత్మ మజి సీత మనాన్. అయాక మజి తియెల్ పుటిసిని ఆత్మ అవద్. గాని దేవుణు పణి కిదెజ్ సత్తు సీని, మహి వరిజ్ని దేవుణుదిజ్ ప్రేమిసిని, మాటు అణసె ఆజి మండ్రెజ్ సాయం కిని ఆత్మనె సీత మనాన్.

8 అందెజె, మా ప్రబు వందిజ్ వెహ్లాజ్ నీను సిగు ఆమ. వన్ని వందిజ్ వెహ్లాజ్ జెలిదు ఆతి, నా వందిజ్బా సిగు ఆమ. గాని సువార్త వందిజ్ నా వెట కస్టమ్కు ఓరిన్అ. దేవుణు సత్తుదాన్ అయాక ఓరిన్అ. 9 దేవుణు మజి రక్తిస్తాండ్రె, వన్ని వందిజ్ కేట ఆతి బత్తు, బత్తిదెజ్ ఇజి మజి కూక్తాన్. మాటు కితి పణిజాణిజ్ అవద్ గాని వన్ని సొంత ఎత్తుదాన్ వన్ని దయా దర్మమదాన్ వాండ్రు మజి రక్తిస్తాండ్రె కూక్తాన్. లోకం పుట్ఎండ ముజాలె, క్రీస్తు యేసు కితి దనితాన్ యా దయా దర్మం దేవుణు మజి సీత మనాన్. 10 గాని మజి రక్తిస్సి క్రీస్తుయేసు లోకమ్దు వాతివలెనె అయాక ఏలు తోరె ఆతాద్. వాండ్రు సావుదిజ్ సిల్లెండ కితాండ్రె, సువార్త వెంజి నమ్మిని దనితాన్, సాఎండ దేవుణు వెట ఎలాకాలం బత్తిని బత్తు తోరిస్తాన్. 11 యా సువార్త వెప్పి వందిజె, ఒరెన్ సాటిస్సి వన్ని లెకెండ, అపొస్తుడు లెకెండ, నెన్పిస్సి వన్ని లెకెండ దేవుణు నిజి ఏర్పాటు కిత్తాన్. 12 అందెజె నాను యా కస్టమ్కు ఓరిసిన్. గాని నాను సిగు ఆమ. ఎందనిజ్ ఇహిజ, నాను నమ్మిత్తి వన్నిజ్ నాను నెన్ను. వాండ్రు, తీర్పు కిదెజ్ వాని దినమ్దాక, నజి ఒపజెప్పి సువార్త కాపాడఃదెజ్ వాండ్రు అట్టికాన్ ఇజి నాను నిజం నెన్ను.

13 నిజమాతి మాట నీను నా బాణిజ్ విహి లెకెండ నీను మహి వరిజ్ వెవ్అ. క్రీస్తుయేసు వెట మని సమందమ్దాన్ మని నమకమ్దు ప్రేమాదు నీను మన్అ. 14 దేవుణు నిజి ఒపజెప్పి సువార్త ఎయెర్బా మారిన్ఎండ నీను సుడఃఅ. మా లొఇ మంజిని దేవుణు ఆత్మ సాయమ్దాన్ అయాక కాపాడఃఅ. 15 ఆనియ ప్రాంతమ్దు మన్ని నమ్మిత్తికార్ విజెరె నా బాణిజ్ దూరం ఆతార్ ఇజి నీను నెస్సి. పుగెలు హెరెమెను ఇనికార్ వరి లొఇ మనార్. 16 ఒనెసిపారు ఇండ్రొణి వరిజ్ ప్రబు కనికారం తోరిన్పిన్. ఎందనిజ్ ఇహిజ, వాండ్రు నజి నండో సుట్టు ఆదరిస్తాన్. నాను జేల్లిదు మహిజ్బా వాండ్రు నా వందిజ్ సిగు ఆతాన్. 17 గాని వాండ్రు రోము పట్నమ్దు వాతివలె, నాను తోర్నిదాక నండో రెబాతాన్.

18 నాను ఎవెసుదు మహివలె, వాండ్లు నజీ నెగ్రెండ సుడూజి, ఎసా సాయం కిత్రాన్ ఇజి నీను బాగ నెసిని. ప్రబు తీర్పు కిని దినమదు ప్రబు వన్నిజ్ కనికారం తోరిసిపన్.

2

1 అందెజె నా మరిన్ లెకెండ్ మని నీను, క్రీస్తుయేసు దయా దర్మదాన్ సత్తు పొందిజి మన్అ. 2 నండో లోకుర్ ఎద్రు నాను వెప్తి నిజమాతి మాటెజ్ నీను వెహిమని. అయా మాటెజ్ నమ్మిదెజ్ తగ్గి వరిజ్ ఒపజెవ్అ. వారు యా నిజమాతి మాటెజ్ మహివరిజ్ బాగ నెన్పిస్తెజ్బా అట్టికార్ ఆదెజ్. 3 ఒరెన్ నెగ్గి విద్దె కినికాన్ వన్ని కస్టమకు ఓరిసిని లెకెండ్ నీను క్రీస్తుయేసు వందిజ్ మా వెట కస్టమకు ఓరిసి మన్అ. 4 ఒరెన్ ఉద్దం కినికాన్, వన్ని బత్తు. వందిజ్ మరి ఆజ పణిజ సొన్ఎన్. ఎందనిజ్ ఇహిజ, సొహిజ వన్నిజ్ సయనమదు ఏర్పాటు కితి అతికారిజ్ సర్ద కిబిన్ఎన్. అయా లెకెండ్ నీనుబా క్రీస్తు సేవ పణిదు మన్అ. 5 మరి అయాలెకెండ్, ఉహ్కాక్కి పందెమదు ఒరెన్ ఉహ్కాక్కికాన్ పందెమదు వెప్తి రూలు వజ ఉహ్కాఎండ మహిజ, వాండ్లు గెలెన్ఎన్. వన్నిజ్ ఇనాయం దోహ్కాఎద్. అయా లెకెండ్ నీనుబా క్రీస్తు సేవ పణిదు మన్అ.

6 కస్టపడిజి పణి కిని ఒరెన్ రయ్యు వన్నిజ్, పండితి పంటది తోలి వంతు దోహ్కాకెజ్వలె. అయా లెకెండ్ నీనుబా క్రీస్తు సేవ పణిదు మన్అ. 7 నాను ముస్సు వెప్తి దన్ని వందిజ్ నీను మరి మరి ఆలోసనం కితి. ఎందనిజ్ ఇహిజ, నీను ఆలోసనం కితిజ, నీను నెస్టెజ్ మన్ని విజి వన్కాజ్ వాండ్లు అరదం కిబిస్సాన్.

8 ఎస్తివలెబా క్రీస్తు యేసుజ్ ఒడూబిఅ. సావుదాన్ దేవుణు వన్నిజ్ బత్తిస్త మనాన్. దావీదు రాజు తెగ్గదు పుట్టి మనికాన్. యాకదె నాను లోకురిజ్ వెహిని సువార్త. 9 నాను యా సువార్త వెహినిజ్, నజీ బాదెజ్ వాజెనె. తపుజ్ కితి ఒరెన్ వన్నిజ్ తోహ్కాలెకెండ్, నాను తోహ్కా ఆజిన. గాని దేవుణు మాట తోహ్కా అవతాద్. 10 అందెజె, దేవుణు ఏర్పాటు కితి వరి వందిజ్ నాను విజి కస్టమకు ఓరిసిని. క్రీస్తుయేసు వరిజ్బా రక్కిసి, దేవుణు గొప్ప జాయ్దు మంజిని బాడిడు వన్ని వెట ఎల్లకాలం వారుబా మంజిని వందిజ్, వరి వందిజ్ నాను కస్టమకు ఓరిసిని.

11 యా మాటెజ్ నమ్మిదెజ్ తగ్గికమాటు వన్ని వెట సాతిజి వన్నివెట బత్తి.నాట్మరి. 12 మాటు మా కస్టమకు ఓరిస్తిజి వన్నివెట ఏలుబడి కినాట్మరి. వన్నిజ్ నెన్ఎ ఇహిజ వాండ్లుబా మజీ నెన్ఎ ఇనాన్. 13 మాటు నమ్మిదెజ్ తగ్గికాట్ ఇహిజ వాండ్లు ఎస్తివలెబా నమ్మిదెజ్ తగ్గికాన్ ఆజి మంజినాన్. ఎందనిజ్ ఇహిజ వన్నిజ్ వాండ్రె తప్పెజ్ అట్ఎన్.

నమకమాతి నెగి పణిమణిసి

14 నాను ముస్సు వెప్తి సజతిజ్ లోకురిజ్ ఎత్తు కిబిసి మన్అ. ఇని ఇని మాటెజి వందిజ్ జటిజ్ ఆమాట్ ఇజి దేవుణు ఎద్రు వరిజ్ సరి దిదిఅ. అయాక పణిదిజ్ రెజక. వెనివరి నమకం పాడు: కిజినాద్. 15 నెగ్గి పణి మనిసి ఇజి దేవుణు బాణిజ్ అనువె ఆదెజ్, నీను అయ లెకెండ్ మండ్రెజ్ బాగ సుడూజి. కిని పణిజి వందిజ్ దేవుణు వెనబానివలె, సిగు ఆవండ మంజిని పణి మనిసి లెకెండ్ నీను మన్అ. నిజమాతి మాట నెగ్రెండ నెన్పిస్సి వన్ని లెకెండ్ మన్అ. 16 పణిదిజ్ రెజ, సెజ మాటెజిణిజ్ నీను దూరం మన్అ. ఎందనిజ్ ఇహిజ, నని మాటెజ్ వర్గిజి మంజినికార్ మరి ఒది సెఇకార్ ఆజి దేవుణు బాణిజ్ దూరం ఆనార్. 17 మలెరియ నోబు నండోడారిజ్ పాడు కిని లెకెండ్, వారు నెస్సిసిని మాటెజ్ మహివరిజ్ పాడు: కిసె. నని వరి లోఇ మనికారె హుమెనయ, పిలెతు ఇనికార్. 18 వీరు నిజమాతి మాటెజి డిస్ట సొహార్. వారు తపు వెహిసనార్, దేవుణు సాతి సొహి వరిజ్ మరీజి బత్తిస్త మనాన్ ఇజి ఆహ వెహిస్సి, ఇనిక నమ్మిదెజ్ ఇజి నెన్ఎండ, ఇతల్ అతల్ కిజి నెగెండారిజ్ బమ్మ కిజినార్. 19 అహిజ్బా, దేవుణు బాణిజ్ వాతి నిజమాతి మాట తవ్ఎదు. అయాక నెగెండ నిల్పిని ఉండ్రె పునాది లెకెండ్ మనాద్. 'ప్రబు వన్ని సొంత వరిజ్ నెస్సాన్' ఇజి, 'యేసుజ్ నా ప్రబు ఇజి ఒప్పకొణికార్ విజెరెబా సెజ పణిజాణిజ్ దూరం ఆదెజ్ వలె' ఇజి అయా పునాదిదు ముద్ర పొక్త మనాద్.

20 ఉండ్రె పెరి ఇండ్రె నండో రకమకాణి కుండెజ్ మండిజ్ మంజినె. సెగం వెండిదాన్, బజారమదాన్ తయార్ కితికెజ్, మరి సెగం సెకదాన్, దుల్లిదాన్ తయార్ కితికెజ్. విన్కా లోఇ వెండిదాన్ బజారమదాన్ తయార్ కితికెజ్ నెగ్గి పణిదిజ్ వాడుకొణార్. సెకదాన్, దుల్లిదాన్ తయార్ కితికెజ్ ఆజ

పణిదిట్ వాడుకొణార్. అయాలెకెండె, దేవుణుదిట్ నమ్మిత్తి వరి సజమదు, దేవుణు వందిట్ నెగ్గి పణి కిదెట్ తగ్గికార్ మంజినార్. ఆకార్బా మంజినార్.

21 అందెజె ఎయెన్బా సెకెట్ విజు డిస్టిజ, వాండ్రు నెగ్గిపణి కిదెట్ తగ్గికాన్ ఆనాన్. పెరి ఇండ్రోణి ఎజుమాని, నెగ్గి పణిదిట్ వాడుకొండెట్ కేట ఇడ్డి వెండి బజారమది కుండెట్ మండిట్ లెకెండె, వీండ్రుబా దేవుణు వందిట్ ఇని నెగ్గి పణిదిట్బా తగ్గికాన్ ఆనాన్.

22 దజడాఱిట్ మని ఉత్పత్తదాన్ దూరం మన్అ. గాని నీతి నిజయిదికెజె కిదెజె సుడెఱ. దేవుణు వందిట్ నిజమాతి మాటెట్ నమ్మిత్తి. ఎన్సివలెబా ప్రేమ తోరిన్అ. విజెరె వెట సాంతి సమాదనమదాన్ మండ్రెట్ సుడెఱ. నెగ్గి మన్సుదాన్ ప్రబుట్ పార్దనం కినివరి వెట కూడెఱ మన్అ. 23 బుద్ది సిల్లెండ అర్దం సిల్లెండ తర్కిసిని వరి బాణిట్ దూరం మన్అ. ఎందనిట్ ఇహిజ, వారు జటిట్ పుటిసినార్ ఇజి నీను నెసిని. 24 దేవుణు పణి మనిసి జటిట్ ఆదెట్ ఆవద్. గాని వాండ్రు విజెరివెట కనికారం ఆజి మండ్రెట్ వలె. నెగ్గెండ నేన్పిసినికాన్ ఆదెట్ వలె. ఓరిసినికాన్ ఆదెట్వలె. 25 నిజమాతి మాటెజ, ఎద్రిస్సి వరిట్ వాండ్రు సారలిదాన్ వెప్పి దిదిదెట్. వారు పాపమకు ఒప్పకొడిఱ, నిజమాతికెట్ నెస్సి వందిట్, దేవుణు ఉండ్రె వేలా వరి మన్సు మారిస్సాన్సు. 26 ఆహా వారు బుద్దిదు వాజి, సయ్తాన్ ఉరిదాన్ తప్తె ఆనార్. సయ్తాను, వన్ని ఇన్మమకు కిబిన్జె వరిట్ అన్మనాన్. అందెజె దేవుణు పణి మనిసి వరిట్ సారలిదాన్ వెప్తాట్.

3

కడెవెరి దినమక వందిట్ వెప్పినిక

1 యేసుప్రబు వాని ముజాల, కడెవెరి దినమకాట్ నండో తియెల్ ఆని రోన్కు మంజినెలె ఇజి నీను నెన్అ. 2-5 లోకుర్, వరిట్ వారి నెగ్గెండ మండ్రెట్ ఇజి సుడెఱ ఆనార్ డబ్బుదిట్ ఆస ఆనార్. నా ననికాన్ మరి ఎయెన్బా సిలెన్ ఇజి వెహె ఆనార్. గర్త ఆనార్, దూసిస్సార్. యాయబ్బారిట్ లోజెవెర్. మేలుదిట్ నెన్ఎర్, సెకార్ ఆనార్. ప్రేమ సిల్లికార్ ఆనార్, సెమిన్ఇకార్ ఆనార్. సొండిజ్ వెప్పికార్ ఆనార్. అణసె ఆకార్ ఆనార్. అడిఱి జంతు నని మూర్కమదికార్ ఆనార్. సొంత వరిట్బా మొసెం కినికార్ ఆనార్. బుద్ది సిల్లెండ ఇని ఇనికెట్ కినార్. గర్త ఆనార్. దేవుణుదిట్ ప్రేమినెండ వరి సుకమకాట్ ప్రేమిస్సార్. వారు దేవుణు బక్తి మనికార్ ఇజి మున్కునె తోరె ఆనార్. గాని వన్నిట్ లోజెదెట్ వాండ్రు నీజని సత్తుదిట్ నెక్కి పొక్కినార్. నని వరి బాణిట్ దూరం మన్అ.

6-7 ఎందనిట్ ఇహిజ, నని వరి లొక సెగొండార్, లోకుర్ వెట నెల్ల ఆజి ఇల్కాట్ వానారి, తప్ప బోదెట్ వెప్పి, బాన్ మని బుద్ది నీలి బోదెకాట్ మొసం కినార్. అవికు వీరు వెప్పినికెట్ నమ్మిజి మొసం ఆనె. అవికు కితి నండో పాపమక వందిట్ వన్కా గర్బమకు గదిసిని మంజినె. అవికు, వన్కా ఆసెజ విజు ఎత్తు కిజెనె మంజినె. ఎన్సివలెబా నెనె ఆదెట్ ఆస ఆనె. గాని నిజమాతికెట్ ఇనికెట్ ఇజి టెటట్ నెన్ఉ. 8 యెనె, యెంబై ఇనికార్ మొసెట్ ఎద్రిస్తిలెకెండె, వీరుబా దేవుణు వందిట్ నిజమాతికెట్ ఎద్రిసినార్. వీరు విరి మన్సుదు సెకెకెన్ లె డెఱబినార్. అందెజె వారు నమ్మిజినికెట్ పణిదిట్ రెకెకెట్ 9 యెనె, యెంబై బుద్ది నీలికార్ ఇజి లోకుర్ విజెరె టెటట్ సుడిఱి లెకెండె, వీరుబా బుద్ది నీలికార్ ఇజి లోకుర్ విజెరె టెటట్ సూణారలె. అందెజె ఎలాకాలం దేవుణు మాటదిట్ ఎద్రిసి సొండ్రెట్ వారు అట్ఎర్.

తిమోతిట్ ఆడ్ర సిజినాన్.

10-11 గాని నాను నెన్పిన్కెట్, నాను ఎలాగ బత్తిజి నడిఱత ఇజి నాను కిదెట్ ఇజి నా బత్తుదు మని ఉదెనం, నాను దేవుణుదిట్ ఎలాగ నమ్మిజి మహా ఇజి, నజి కితి కీదెదిట్ ఎలాగ ఓరిన్ ఇజి, నాను ఎలాగ మహి వరిట్ ప్రేమిన్ ఇజి నీను పూర్తి నెసిని. లోకుర్ నజి బాదెట్ కితివలె నాను ఎలాగ అయకెట్ ఓరిన్కెట్ అత్త ఇజి నీను నెసిని. నజి వాతి హిమ్సెట్ విజు నీను నెసిని. అందియెకయ, ఇకొనియ, లున్త్ర ఇని పట్టుమకాట్ నజి వాతికెట్ విజు నీను నెసిని. లోకుర్ కితి నండో బాదెట్ నాను ఓరిన్. గాని ప్రబు వన్కా బాణిట్ విజు నజి తప్తిస్సాన్. 12 క్రీస్తుయేసు వెట సమందం ఆజి, దేవుణు బక్తిదాన్ బత్తిదెట్ ఆస ఆని ఎయెరిట్బా బాదెట్ వానె. 13 గాని సెక పణిట్ కినికారి, మహివరిట్ మొసం కినికార్ ఇంక ఒదె పాడాఱి. వారు మొసం కినార్. మొసం కిబై ఆనార్. 14-15 గాని నీను, నెస్తిమనికెట్, తప్ఎండె నమ్మిజి మనికెట్ డిఱెన్ఎండె మన్అ. ఎందనిట్ ఇహిజ, నిజి నెన్పిన్ వరిట్

నీను నెసిని. ఇజ్రివలెహాన్ అని నీను దేవుణు మాట ఎలాగ నెస్తి ఇజి నీను నెసిని. యాకెజ్, క్రీస్తు యేసు ముస్సు, నీను ఇడ్డినమ్మకమ్దాన్, దేవుణు నీ పాపమ్కాజ్ నిజీ రక్కిస్సి వందిజ్ నిజీ గెణం సీదెజ్ అట్టు. ¹⁶ దేవుణు మాటజ్ విజు దేవుణు వన్ని ఉఱ్ఱిదాన్ వెప్పి రాన్ పిస్తికెజ్. అయాకెజ్, నిజమాతికెజ్ మజీ నెస్సిస్టెజ్, మా తప్పజ్ తోరిస్టెజ్, మజీ సరి దిదిదెజ్, నీతి నిజయితికెజ్ కిదెజ్ నెన్ పిస్టెజ్ పణిదిజ్ వానికెజ్. ¹⁷ ఈహునె ఒరెన్ దేవుణు లోకు వాండ్లు కిదెజ్ మనికెజ్ విజు కి నాన్. విజు నెగ్గి పణి కిదెజ్ ఎస్తివలెబా తయారీ ఆనాన్.

4

¹ దేవుణు ఎద్దు, సాతి వరిజ్ బత్తిజుని వరిజ్ తీర్పు సీని క్రీస్తుయేసు ఎద్దు నాను నిజీ ఆడ్ర సీజిన. ఎందనిజ్ ఇహిజు వాండ్లు మరీజ వాజి రాజు వజ విలుబడిః కి నాన్లె. ² నాను నిజీ ఈహు ఆడ్ర సీజిన నీను దేవుణు మాట లోకురిజ్ వెహాల. లోకుర్ వినారో, వినెవరో ఇజి నెగ్గి సమయం, ఆఇ సమయం తోఎండ ఎస్తివలెబా అయాక వెస్టెజ్ తయారీ ఆజి మన్ల. లోకురిజ్ వరి తప్పజ్ తోరిసి వెహాల. వరి తప్పజు దిదిల. వారు కిదెజ్ మనికెజ్ పణన్ల. నీను కోపం ఆవిండ నిసాతిదాన్ వరిజ్ నెస్సిన్ల. ³ ఎందనిజ్ ఇహిజు, లోకుర్ నిజమాతికెజ్ వినెండ బత్తిని కాలం వానాద్. గాని వరిజ్ ఇస్సం ఆని వజ లోతు మాట వెప్పి నని బోద కిని నండొండారెజె వారు తపిసి డర్పు కి నార. అందెజె, నని వరిజ్ తపిసి డర్పు కి నార. ⁴ ఇహిజు, నిజమాతి మాట వారు వినెవర. గాని కత సాన్తరమ్క దరోట్ మర్నార. ⁵ గాని ఓ తిమోతి, నీను విజు వన్నా లోఇ నెగ్గి బుద్ధిదాన్ మన్ల. కష్టమ్కు ఒరిన్ల. క్రీస్తుయేసు వందిజ్ సువార్త లోకురిజ్ వెహాల. దేవుణు సేవపణి కినివలె, నీను కిదెజ్ మనిక విజు పూర్తి కిల. ⁶ ఎందనిజ్ ఇహిజు, నాను పూజ ఆదెజ్ సమయం డర్పు అత మనాద్. నాను సాదెజ్ సమయం డర్పు ఆత మనాద్.

⁷ పందెమ్దు ఒరెన్ కన్బబడిఃలె తికెండ, నాను సువార్త లోకురిజ్ వెప్పి వందిజ్ కన్బబడిఃత. ఉప్పి పందెమ్దు, ఒరెన్ ఉప్పిక, పూర్తి కిని లెకెండ, నాను కిదెజ్ దేవుణు నజీ వెప్తికెజ్ పూర్తి కిల. దేవుణు ముస్సు మని సమకం డిఱన్ల. ⁸ అందెజె నజీ ఉండ్రీ ఇనాయం మనాద్. నాను నీతి నిజయితిదాన్ బత్తితి దని వందిజ్ సీని ఇనాయం. అయాక ఆకరి దినమ్ది తీర్పుదు, నీతి నాయమ్దాన్ తీర్పు సీని ప్రబు అయాక నజీ సీనాన్. నజీన్ ఆవిండ వాండ్లు వాని దనిజ్ ఎద్దు సుడఃజి ఆస ఆని విజెరిజ్ సీనాన్.

⁹⁻¹⁰ తిమోతి, నా డర్పు బేగి వాదెజ్ నీను సుడఃల. ఎందనిజ్ ఇహిజు, దెమ, యా లోకమ్ది సజతిజ్ ప్రేమిసి, నజీ డిస్స సాహాన్. వాండ్లు దెసలోనిక పట్టుమ్దు సాహాన్. క్రెన్కె ఇనికాన్ గలతియ ఇని ముటాదు సాహాన్. తీతు దెల్మియ జిల్లాదు సాహాన్. ¹¹ లూక ఒరెండ్రె నా వెట మనాన్. నీను వానివలె మార్కుజ్ నీ వెట కూక్కి తగ్గల. ఎందనిజ్ ఇహిజు, వాండ్లు నజీ తోడుదిజ్ బాగ మంజినాన్. ¹² తుకికుజ్ ఎపెను పట్టుమ్దు ఘొక్. ¹³ నీను వానివలె త్రోయ పట్టుమ్దు కార్పు ఇని వన్నిబాన్ నాను ఇట్టా వాత సాల్వ తగ్గల. పుస్తకమ్కుబా తగ్గల, ముకెలం తోలుదు రాస్తి మనికెజ్.

¹⁴ అలెక్సెజండర్ ఇని కంను తయారీ కిని సరాబు నజీ నండొ బాదెజ్ కిత్తాన్. వాండ్లు కితి దనిజ్ ప్రబు వన్నిజ్ సిక్కు సీనాన్. ¹⁵ వాండ్లు నిజీబా బాదెజ్ కివిండ నీను జాగర్త మన్ల. ఎందనిజ్ ఇహిజు, మాటు బోద్దిసి మాటిజు, వాండ్లు నండొ ఎద్దిస్తాన్.

¹⁶ నజీ ముజాలె, కోర్టుదు ఒసి వెనబాతివలె, నజీ నానె ముదాయి. ఎయెర్బా నా దరోట్ వర్గిఎత్తార్. విజెరి నజీ డిస్స సాహాన్. దిన్ని వందిజ్ దేవుణు వరిజ్ సిక్కు సివిండ మసీన్. ¹⁷ అహిజు, కోర్టుదు మహి యూదురు ఆఇకార్ విజెరి, నా వెట సువార్త పూర్తి విని వందిజ్, ప్రబు నా పడఃవాద్ మంజి, నజీ సత్తు సితాన్. నొరెన్ వెయుదాన్ తప్పిస్తి లెకెండ సాపు సిక్కుదాన్ తప్పిస్తాన్. ¹⁸ అందెజె, ప్రబు నజీ విజు సెఇ వన్నా బాణిజ్ తప్పిసి, వాండ్లు రాజు వజ విలుబడిః కిని పరలోకమ్దు నెగ్గెండ కూక్కు ఒనాన్. వన్నిజ్ ఎలాకాలం గవ్వరం మనీద్. ఆమెన్.

¹⁹ ప్రిస్కోలెజ్, అక్కులెజ్, ఒనెసిపారు ఇండ్రోణి వరిజ్ నాను వెన్బాతి లెకెండ వెహాల.

²⁰ ఎరాస్టు కొరింతు పట్టుమ్దు నిహాన్. త్రోపిముజ్ కస్సం అర్దిజ్, వన్నిజ్ మిలెతు పట్టుమ్దు డిస్స వాత. ²¹ పినికాలం రెవిండ ముజాలె, నీను బేగి వాదెజ్ సుడఃల. యుబులు, పుదె, లిను, క్షణియ ఇనికార్ నిజీ వెన్బాతి లెకెండ వెప్పినార. అయ లెకెండ యా పట్టుమ్దు మని మహి సమ్మిత్తికార్బా వెన్బాతిలెకెండ వెప్పినార.

22 ఓ తిమోతి, ప్రబు నీ వెట తోడుః మనీన్. వన్ని దయా దర్మం మీ విజిదెరె వెట మనీద్.

అపొస్తుడు ఆతి పవులు తీతుజ్ రాస్తి ఉత్రం

నెల్వ కిబిసినిక

అపొస్తుడు ఆతి పవులు తీతుజ్ రాస్తి ఉత్రమ్ నె యాక. పవులువెట దేవుణు సేవపణి కినివరి లొణ ఒరెనె తీతు. క్రేతు దేనమ్దు మన్ని దేవుణుదిజ్ నమ్మితి వరి సజమ్కాజ్ నెగ్రెండ నడిపిన్జెజ్, వన్నిజ్ సజం మున్కు అతికారి లెకెండ పవులు ఏర్పాటు కిత్తాన్. అందెజె సజమ్కాజ్, ఎలాగ మన్ని పెద్దల్జ నిల్పాజ్, వారు కిదెజ్ మన్ని పణిజ్, దిన్ని వందిజ్ వెప్పి పవులు తీతుజ్ రాసిన్. మరి, సజమ్దు మన్ని ఒరెన్ ఒరెన్ ఎలాగ మండ్రెజ్ ఇజిబా వెప్పినాన్.

1-4 దేవుణు సేవకిని, యేను క్రీస్తు వందిజ్ అపొస్తుడు ఆతి పవులు ఇని నాను తీతుజ్ రాసిన్. నీను నా సొంత మరిన్ లెకెండ మన్ని. ఎందానిజ్ ఇహిజ, దేవుణు వందిజ్ వెప్పి మన్ని మాటెజ్, నాను నమ్మిజినికెజె నీనుబా నమిజిని. దేవుణుదిజ్ నెగ్రెండ నమ్మిదెజ్, వాండ్రు ఏర్పాటు కిత్తి లోకురిజ్ నడిపిన్జివందిజ్, వాండ్రు నజి ఏర్పాటు కిత్తాండ్రె పొక్తాన్. మరి, దేవుణు వందిజ్ నిజమాతి సజతిజ్ నెన్పిసిని వందిజ్ వాండ్రు నజి ఏర్పాటు కిత్తాండ్రె పొక్తాన్. యా నిజమాతి సజతిజ్ దేవుణుదిజ్ లోజిజి నడిపినిక ఎలాగ ఇజ వెప్పి తోరిస్తాద్. అయాపలె వారు ఎలాకాలం దేవుణు వెట బత్కిని బత్కుదిజ్ ఆసదాన్ ఎర్దునూణార్. అబద్దం వర్గిజ దేవుణు, ఎలాకాలం వన్నివెట బత్కిని బత్కు వందిజ్ లోకుర్ వెట ఒట్టు కిత్తాన్. నిరకారమ్బా సిల్లెండ మన్నివలె మహి వన్ని ఉదినం వజనె వాండ్రు ఒట్టు కిత్తాన్. దేవుణు పణిమనిసిర్ సువార్త వెప్తార్. ఆహె వాండ్రు ఏర్పాటు కిత్తి కాలమ్దు, లోకురిజ్ సువార్త వెన్పిస్తాన్. అయాక వెప్తాజ్ నజి ఒపజెప్త మనాన్. మజి రక్కిసిని దేవుణు ఆత్ర వజనె నాను వెప్పిన. బుబ్బాత్తి దేవుణుని, మజి రక్కిసిని క్రీస్తుయేను, దయాదర్మమ్దాన్, నీను నిపాతిదాన్ మండ్రెజ్ సాయం కిపిర్.

క్రేతు దేనమ్దు తీతు కిదెజ్ మన్ని పణి

5 నాను నిజి వెప్పి వజనె, తప్పికెజ్ దిదిజి, దేవుణు సజమ్కు మన్ని పట్టుమ్కాజ్ విజు పెద్దెలుజ నిల్వఅ. దిన్నివందిజె నాను నిజి క్రేతు దేనమ్దు డిఃస్త వాత. 6 దేవుణు సజమ్దు, పెద్దెలి అనికాన్ ఎయెన్ ఇహిజ, నింద సిల్లికాన్. ఉండ్రె ఆలేసి మంజినికాన్. వన్ని కొడోజ్ దేవుణుదిజ్ నమినికార్ ఆదెజ్. కొడోజ్, సెజ పణిజ వందిజ్ నేరం మొపె ఆఇకార్ ఆదెజ్. వెప్పిమాట వెనికార్ ఆదెజ్. నన్ని వరి అప్పొసిని పెద్దెలి ఆదెజ్. 7 ప్సార్దు నింద సిల్లికాన్ ఆదెజ్వెలె. ఎందానిజ్ ఇహిజ, వాండ్రు దేవుణుదిజ్ నమ్మితి వరిజ్ నడిపిన్జికాన్. వాండ్రు గర్త ఆఇకాన్. మూంజిద్ కోపం మన్ఎండ, సోన్ఎండ, డెయెసె ఆవండ, సిగు వాని సెజ పణిజ్ కిజి లాబమ్వందిజ్ సుడెఎండ మంజినికాన్ ఆదెజ్వెలె. 8 అహిజ, వాండ్రు వాతివరిజ్ డగ్రు కినికాన్, నెగ్గి వన్కాజ్ కోరిజినికాన్, అణె ఆజి మంజినికాన్, నీతి నిజాయ్తి మనికాన్, దేవుణు వందిజ్ కేట ఆతికాన్, నెగ్గి బుద్ది మనికాన్ ఆజి మండ్రెజ్. 9 ప్సార్దు అనికాన్ యేనుక్రీస్తు వందిజ్ మాటు నెన్పిన్జి నిజమాతి మాటెజ్ అయావజ గటిజ నమ్మినికాన్ ఆదెజ్వెలె. ఎందానిజ్ ఇహిజ, వాండ్రు నమ్మిత్తి వరిజ్ నిజమాతి మాటెజ్ నెన్పిసి, నిజమాతి మాటెజ్ ఎద్రిసిని వరిజ్ వరి తప్పుజ తోరిస్తెజ్ అట్టికాన్ ఆదెజ్.

10 ఎందానిజ్ ఇహిజ, నండొండార్ మనార్, అతికారమ్దిజ్ లోజిఎండ, పొక్తి వర్గిజ, మొసం కినికార్ నండొండార్ మనార్. ముకెలం, యేనుప్రబు రక్కిస్తెజ్ ఇహిజ సునతి కిబె ఆదెజ్ వెలె ఇజి కసితం వెప్పినికారి యాలెకెండ మనార్. 11 వరి వెయికు మీరు మూక్తెజ్వెలె. ఎందానిజ్ ఇహిజ, వారు నమ్మిత్తి వరిజ్ తప్పుజ్ నెన్పినార్. ఆహె నమ్మిత్తి వరి కుటుమ్దికార్ విజేరె నిజమాతి మాటెజ్ నమ్మిఎండ ఆవకిజనార్. వరి సొంత లాబం వందిజె వారు ఈహు కిజనార్. 12 క్రేతుదికార్ వెప్తాన్, “క్రేతుదికార్ ఎస్తివలెబా అబద్దం వర్గినికార్, మూర్కమ్దికార్, బదకం ఆజి తిండికకరతి ఆతికార్”, ఇజి. యా లెకెండ వెప్పికాన్, వరి లొణ ఒరెన్ పల్కుబడిః మన్నికాండ్రె. 13 వాండ్రు క్రేతుది వరి వందిజ్ వెప్పికెజ్ నిజమెనె. అందెజె బాన్ మన్ని నమ్మితికార్ నిజమాతి మాటెజ్ నెగ్రెండ నమ్మిని వందిజ్ నీను వరిజ్

డటిసి డటిసి దిదిఅ. 14 వారు అర్దం సిల్లి యూదురి కత సాన్తరమ్కు అన్ఎండ మంజిని వందిజ్ నీను వరిజ్ దిదిఅ. మరి, నిజమాతి సజతిజ్ డిఃసి సాహివరి మాటెజ లోజిఎండ మంజిని వందిజ్ నీను వరిజ్ డటం దిదిఅ. 15 మన్సు పాపమ్కాజ్ సుబరం ఆతివరిజ్, విజుబా సుబరం ఆతిలెకెండ నెగెండ మనాద్. గాని, మన్సు సుబరం ఆవిండ, యేసుక్రీస్తుజ్ నమ్మిజ వరిజ్ ఇనికబా సుబరం ఆవిండ నెవెన్ మనాద్. ఎండానిజ్ ఇహిజ, వరి గర్బం సెఇక ఆత మనాద్. వారు సెఇకెజ్ కినివెలె, 'తప్తాప్', ఇజుబా వరి గర్బం గదిన్వద్. 16 వారు దేవుణుదిజ్ నెస్నాప్ ఇజి వెహె ఆజినార్. గాని వరి పణిజాణిజ్ వన్నిజ్ నెక్కిపొక్కినార్. వారు పెంటు లెకెండ మనికార్. దేవుణుదిజ్ లోజిఇకార్. ఇని నెగ్గి పణిజ్ కిదిజ్ బా తగ్గఇకార్.

2

నిజమాతి మాటెజ్ వెస్సినాన్

1 తీతు, నీను దేవుణుదిజ్ నమ్మితి వరిజ్, నిజమాతి మాటెదిజ్ కూడిఃతి మన్ని సజతిజ్ నెన్పిన్అ. 2 డొక్రారిజ్ నెన్పిన్అ, వారు సోన్ఎండ మండ్రెజ్ ఇజి. విజేరె వరిజ్ గవరం సీజి మంజిని లెకెండ మండ్రెజ్ ఇజి. నెగ్గి బుద్దిదాన్ మండ్రెజ్ ఇజి నెస్పిన్అ. మరి, వారు నిజమాతి మాటెజ్ నెగ్గెండ నమ్మిజి, మహివరిజ్ ప్రేమిసి ఓరిసి మండ్రు ఇజి నెస్పిన్అ. 3 అయాలెకెండ, డొక్రికాజ్ బా నెన్పిన్అ, అవిక్ బక్తిదాన్ మంజిని వరిలెకెండ మండ్రెజ్ ఇజి. అవిక్ సాండిజ్ వర్తిఎండ, సోన్ఎండ, మహి వన్కాజ్ నెగ్గి సజతిజ్ నెన్పిన్అ ఇజి. 4-5 అయావలె అవిక్, బోదెకాజ్ నెన్పిన్అ ఆనాద్. ఇనికెజ్ నెన్పిన్అ ఇహిజ, వనక మాసిరిజ్ని కొడొరిజ్ ప్రేమిన్లెజ్, అణెన ఆజి మండ్రెజ్, నెగ్గి మన్సుదాన్ మండ్రెజ్, ఇండ్రొణి పణిజ్ సుడఃజి, కనికారం తోరిసి మండ్రెజ్, మాసిరిజ్ లోజిదిజ్ ఇజి. బోదెక్ అయాలెకెండ మండ్రెజ్, ఎండానిజ్ ఇహిజ దేవుణు మాట ఎయెన్బా దూసిన్వండ మండ్రెజ్.

6 అయాలెకెండ, దజ్డార్ అణెన ఆజి మండ్రెజ్ వరిజ్ ఉసార్ కిబిన్అ. 7-8 నీను విజు వనకాజ్ లొఇ నెగ్గెకెజ్ కిజి వరి ఎద్దు ఉండ్రీ గుర్తు లెకెండ తోరె ఆఅ. నీను నెన్పిసిన్వెలె, డొజి సాటు వెహె ఆవిండ, నీను వెస్సినాన్ మాటెదు మొసం సిల్లెండ, పూర్తి నీను వరిజ్ నెన్పిన్అ. ఎండానిజ్ ఇహిజ, మజి పడఃఇకార్ మా మున్సు సెఇ మాటెజ్ వర్తిదిజ్ ఆవిండ, సిగు ఆజి మండ్రెజ్.

9-10 నీను వెటి పణి కినివరిజ్ నెన్పిన్అ, వారు విజు దని లొఇ ఎజుమానిరిజ్ లోజిజి, వరిజ్ ఇన్టం ఆనివజి కిజి మండ్రెజ్ ఇజి. ఎజుమానిరిజ్ మర్జి వెహెవిండ, డొజి కివిండ మండ్రెజ్ ఇజి నెన్పిన్అ. వారు ఎజుమానిరిజ్, 'మజి పూర్తి నమ్మిదిజ్ ఆనాద్', ఇజి తోరిన్లెజ్. వెట్టివణి కినికార్ అయాలెకెండ మండ్రెజ్. ఎండానిజ్ ఇహిజ, వారు కిని విజు దన్ని లొఇ లోకుర్ నెస్సెజ్, మజి రక్సినిని దేవుణు వందిజ్ మన్ని మాటెజ్ గొప్ప నెగ్గెకెజ్ ఇజి.

11 ముజాలె వెహిలెకెండ నమ్మితి వరిజ్, నీను నెన్పిన్లెజ్. ఎండానిజ్ ఇహిజ, లోకురిజ్ విజెరిజ్ రక్సిన్నివందిజ్ దేవుణు, వన్ని దయాదర్మమదాన్ యేసుక్రీస్తుజ్ యా లోకమ్దు షొక్లాన్. 12 వాండ్రు మజి వన్ని దయా దర్మమదాన్ నెన్పినాన్, దేవుణుబాణిజ్ దూరం కిబినిని విజు సజతిజ్ డిఃన్అ, ఇజి. యా లోకమ్ది లోకుర్ ఆస ఆజినికెజ్ డిఃన్అ', ఇజి నెస్పినినాన్. మరి, మాటు నెగ్గి బుద్దిదాన్, నీతి నిజయ్దిదాన్, దేవుణుదిజ్ సర్ల నీనికెజ్ కిజి యా తరమ్దు మండ్రెజ్ ఇజి నెన్పిన్లెజ్. 13 మాటు అయాలెకెండ మండ్రెజ్. ఎండానిజ్ ఇహిజ, మజి గొప్ప సర్ల కిబిన్ని ఉండ్రీ రోజువందిజ్ మాటు ఆసదాన్ ఎద్దు సుడఃజినాట్. ఇహిజ, మాటు మజి రక్సినిని పెరి దేవుణు ఆతి యేసుక్రీస్తు వాజిని రోజు వందిజ్ ఆసదాన్ మజి కొత్తాజ్ పుటిస్తాండ్రె ఎద్దు సుడఃజినాట్. వాండ్రు గొప్ప జాయ్ కూడిఃతి మన్ని నండ్రొ సోకుదాన్ వానాన్. 14 మా విజు పాపమ్కాజ్ మజి డిఃన్పిన్లెజ్, సాదెజ్ వన్నిజ్ వాండ్రె ఒవజెపె ఆతాన్. మరి, మజి సుబరం కిజి, నెగ్గెకెజ్ కిదిజ్ పూర్తి ఒవజెపె ఆతి వన్ని సొంత లోకుర్ లెకెండ తయార్ కిదిజ్ వాండ్రె ఒవజెపె ఆతాన్.

15 నాను ఏలు వెహిలెకెజ్ విజు నమ్మితివరిజ్ పూర్తి అతికారమ్దాన్ నెస్పిన్అ. వారు అయాలెకెజ్ కిదిజ్ వరిజ్ పణిసి వెహెఅ. అయాలెకెజ్ కిఇవరిజ్ దిదిఅ. నిజి ఎయెన్బా దుసలొడఃవిండ సుడఃఅ.

3

నెగ్గి పణిజ్ కినివందిజ్ వెహ్నినాన్

1 దేవుణుదిజ్ నమ్మితి లోకుర్ అతికారిజు లోజీదెజ్, వెహ్ని మాట వెంజి మండ్రెజ్, ఇని నెగ్గి పణిజ్ కిదెజ్బా తయారాజి మండ్రెజ్ ఇజి నీను వరిజ్ ఎత్తు కిబిసి మన్అ. 2 వారు, ఎయెరిజ్బా సెఇకెజ్ వెహ్ఎవిండ, జటిజ్ ఆవిండ, సార్లిదాన్ విజెరె వెట తగిజి మండ్రెజ్ ఇజి వరిజ్ వెహ్ని మన్అ.

3 ఎందానిజ్ ఇహిజు, మాటుబా ముజాల నమ్మిఇ వరిలెకెండ, బుద్ది సిల్లెండ మహాట్. మాటు ఎయెరిజ్బా లోజీవిండ మహాట్. మొసెం కిబె ఆజి మహాట్. యా లోకమ్ది సెఇ ఆసెజ్ని సుకమ్కాజ్ నండో ఆస ఆజి మహాట్. పగదాన్, గోనదాన్ కాలం గడఱ్పి మహాట్. మహి వరిజ్ దూసలాడిఱిజి మహాట్. వారు మజి దూసలాడిఱితార్. 4 గాని అయాలెకెండ మహివలెనె, మజి రక్కిసిని దేవుణు వన్ని కనికారం తోరిస్తాండ్రె, ప్రేమ తోరిస్తాండ్రె మజి రక్కిస్తాన్. 5 మాటు కిత్తి నీతి పణిజాణిజ్ ఆవిద్. గాని వన్ని కనికారమాదానె మజి రక్కిస్తాన్. దేవుణు ఆత్మదాన్, వాండ్రు మా పాపమ్కు నొరిజి మజి కొత్తాజ్ పుటిస్తాండ్రె, ఉండ్రె కొత్త బత్తు సిత్తాండ్రె మజి రక్కిస్తాన్.

6-7 దేవుణు దయా దర్మమాదాన్ మాటు నీతి నిజయ్తి మన్నికాట్ ఇజి వాండ్రు తీర్పు సితాన్. ఆహె, తీర్పు సిత్తిజ్ మాటు కోరిజని ఎలాకాలం దేవుణు వెట బత్కిని బత్కుదిజ్ అక్కు మన్నికార్ ఆనివందిజ్ మా మున్ను దేవుణు ఆత్మ నండో పోక్తాన్. వాండ్రు మజి రక్కిసిని యెసుక్కిస్తు వెటనె దేవుణు ఆత్మ నండో పోక్తాన్. 8 యా మాట పూర్తి నమ్మిదెజ్ తగ్గిక. అందెజె దేవుణుదిజ్ నమ్మితి వరిజ్ అయాకెజ్ డటిసి నీను నెన్పిస్తెజ్ ఇజి నాను కోరిజన. ఎందానిజ్ ఇహిజు, వారు మహి వరిజ్ వరి మన్ను పూర్తిదాన్ నెగ్గి పణిజ్ కిదెజె. మున్ను వెహ్ని మన్ని మాటజ్ విజు విజెరిజ్ నెగ్గికెజెనె, పణిదిజ్ వానికెజెనె.

9 గాని అరదం సిల్లెండ తర్కిస్సికెజ్, అనిగొగొర్ వందిజ్ వెహ్నినికెజ్, జటిజ్ ఆనికెజ్, యూదురి రూలుజు వందిజ్ వెహ్ని గొడఱబ కినికెజ్ విజు, ఎందానిజ్ పణిదిజ్ రెఇకెజ్, విలువ సిలికెజ్. అందెజె వనక వందిజ్ దూరం మన్అ. 10 నమ్మిత్తి వరి సజమ్దు, నిజమాతి మాటెజు వెట కూడఱిఇకెజ్ నెన్పిసి, వరిజ్ ఎరలిసి కేట కిని వన్నిజ్ ఉండ్రె రుండి సుట్టు బుద్ది వెహ్అ. మరి, వాండ్రు వినవిండ మహిజు, వన్నిజ్ దూరం కిఅ. 11 నన్నికాన్ నిజమాతి సజతిజ్ సరి తప్పి పాపం కిజినాన్ ఇజి నిజి తెలినాద్. వన్ని పాపమ్కు వాండ్రు తప్పు కిజినాన్ ఇజి రుజుప్ కిజినె.

12 నాను పిన్నికాలం నికొపొలితు గడఱ్పెజ్ ఇజి తిరుమానం కిత్త మన. అందెజె నాను అరైమానుజ్ ఇని వన్నిజ్నో, తుకికుజ్నో నీ డగ్గు పొక్కు, నస్తివలె నీను అబె నా డగ్గు వాదెజ్ సుడఱెఅ. 13 జెనా ఇని లాయిరు, అపాలు, క్రేతు దేసం డిఱిసి మరి సొండ్రెజ్ సుడఱిజినార్. వరి పయన్మదు ఇనికబా తక్కు సిల్లెండ వరిజ్ కావాలిస్తికెజ్ విజు సీజె నెగ్గెండ పోక్అ. 14 నమ్మితికార్ పణిదిజ్ రెఇ బత్తు బత్కివిండ, పణిదిజ్ వానికెజ్ కిజి మండ్రెజ్. అందెజె, వారు వరి సమయం విజు అవ్సరం మన్ని వరిజ్ సాయం కిదెజ్ నెస్సెజెవెలె.

15 నా వెట మనికార్ విజెరె నిజి వెన్బాతిలెకెండ వెహ్నినార్. మాటు నమ్మిజిని లెకెండ నమ్మిజి, మజి ప్రేమిస్సివరిజ్ నాను వెన్బాతి లెకెండ వెహ్అ. దేవుణు దయా దర్మం మీరు విజెదెరె వెట మనీద్.

అపొస్తుడు ఆతి పవులు పిలెమొనుజ్ రాస్తి ఉత్తం

నెల్వు కిబిస్సిక

అపొస్తుడు ఆతి పవులు కొలోసి పట్టుమ్దు మని పిలెమొను ఇని ఒరెన్ దేవుణుదిజ్ నమ్మిత్తి వన్నిజ్ రాస్తి ఉత్తమ్ నె యాక. పిలెమొనుజ్ ఒనెసిము ఇని ఒరెన్ వెట్టిపణి మనిసి మహాన్. ఒనెసిము పిలెమొనుజ్ డిస్తాండ్రె, ఉహాక్కి ఎంబెనో సోహాన్. వాండ్రు సోహి మహివలె పవులుజ్ దనూల్ ఆతాన్. పవులు వన్నిజ్ నువార్త వెప్తిజ్, వాండ్రు యేసుక్రీస్తుజ్ నమ్మితాన్.

పవులు ఒనెసిముజ్ పిలెమొను డగ్రు మరజి పోక్కినాన్. నీను, ఒనెసిముజ్ సెమిసి ఒరెన్ తంబెరి లెకెండ వన్నిజ్ డగ్రు కిఅ, ఎందనిజ్ ఇహిజ, వాండ్రు ఏలు దేవుణు వెట నమందం ఆతికాన్ ఇజి యా ఉత్తమ్దు రాసి ఒనెసిము వెట పోక్కినాన్.

1-2 క్రీస్తుయేసు వందిజ్ జెలిదు మన్ని పవులు ఇని నాను రాసిని ఉత్తం. మా వెట నువార్త పణి కిజిని మా సొంత కూలాయెన్ ఆతి పిలెమొనుజ్, మా తజి లెకెండ మని ఆపియెజ్, మా వెట క్రీస్తు వందిజ్ సేవకిదెజ్ నండొ కష్టబడిజి కల్లాడజిని అరికిపుజ్, మీ ఇండ్రొ కూడజి వాజిని దేవుణు నజమ్దిజ్ రాసిని. మా కూలాయెన్ ఆతి తిమోతిబా నా వెట మిజి వెన్బాతి లెకెండ వెప్పినాన్.

3 మా బుబ్బు ఆతి దేవుణుని ప్రబు ఆతి యేసు క్రీస్తు దయా దర్మమ్దాన్ మీరు నిపాతిదాన్ మండ్రెజ్ సాయం కిపిర్.

దేవుణుదిజ్ వందనమ్కు

4-5 ఓ పిలెమొను, నాను నిజి ఒడిబిజి పార్దనం కినివలె, నా దేవుణుదిజ్ ఎస్తివలెబా వందనమ్కు వెప్పినాన్. ఎందనిజ్ ఇహిజ, లోకుర్ నజి వెప్పినార్ నీను ప్రబు ఆతి యేసుజ్ నమ్మిజిని ఇజి. దేవుణుదిజ్ నమ్మిత్తి వరిజ్ విజెరిజ్ ప్రేమిస్సి ఇజి. దిని వందిజ్ నాను దేవుణుదిజ్ వందనమ్కు వెప్పినాన్. 6 క్రీస్తు వందిజ్ నీను నమ్మిత్తి నజతిజ్ మహివరిజ్ ఉసార్దాన్ వెప్తిజ్ ఇజి నాను పార్దనం కిజిని. అయావలె దేవుణు మజి సీజిని విజి నెగ్గి ఇనాయమ్కు నీను పూర్తి నెస్తిలె. యేసు క్రీస్తు వెట మాటు కూడితి మనితానె దేవుణు అయా ఇనాయమ్కు మజి సీనాన్. 7 ఓ తంబెరి, దేవుణుదిజ్ నమ్మిత్తి వరిజ్ నీను ప్రేమిసి, వరి పాణమ్దిజ్ నిమాలం కిబిన్అ. ఆహె, నీను నజి నండొ సర్ద కిబిస్తిదె ఆదరిస్తి.

పవులు ఒనెసిము వందిజ్ బతిమాల్జినాన్.

8-10 అందెజె, క్రీస్తు నజి సీతి అతికారమ్దాన్ నీను కిదెజ్ మని పణి కిఅ ఇజి ఆడ్ర సీదెజ్ నజి అక్కు మనాద్. గాని నాను నిజి బతిమాల్జిన. ఎందనిజ్ ఇహిజ, నీను దేవుణుదిజ్ నమ్మిత్తి వరిజ్ ప్రేమిస్సికి ఇజి నాను నెనిన. డొక్ర ఆత, ఏలు క్రీస్తుజ్ సేవ కిని వందిజ్ జెలిదు మని పవులు ఇని నాను నిజి బతిమాల్జిన. నా మరెన్ లెకెండ మని ఒనెసిముజ్ సాయం కిని వందిజ్ నాను బతిమాల్జిన. నాను గొలుస్కాణిజ్ మహివలె వాండ్రు నా మరెన్ లెకెండ ఆతాన్. నానె వన్నిజ్ దేవుణు దరొట్ తత. 11 వాండ్రు* ముజాల, నిజి ఎందనిజ్ పణిదిజ్ రెఇకాన్. ఎందనిజ్ ఇహిజ, వాండ్రు నిజి డిస్సు సోహాన్. గాని ఏలు నిజిని నజి పణిదిజ్ వాతికాన్ ఆతాన్. 12 నజి నండొ ఇస్టం ఆతి వినిజ్ నీ డగ్రు మరజి పోక్కిన. 13 నువార్త వెప్పిని వందిజ్ నాను గొలుస్కాణిజ్ మనివలె, నజి సాయం కిదెజ్ వినిజ్ నా డగ్రు ఇడెదెజ్ నజి ఇస్టం మనాద్. ఎందనిజ్ ఇహిజ, విన్ని సాయం నీను కితి లెకెండ ఆదెజ్. 14 గాని నీను వెహెండ నాను వినిజ్ ఇబ్బె ఇడెవ. ఎందనిజ్ ఇహిజ, నా వందిజ్ నీను కిని ఇని మేలుబా నాను డటిసి వెప్తిజ్ ఇజి అమాట్. గాని నిజి ఇస్టం ఆతివజ, పూర్తి మన్నుదాన్ కిదెజ్.

15-16 వాండ్రు మరజి వానిక నీ డగ్రు ఎలాకాలం మంజిని వందిజ్ నెను. వాండ్రు నెగం కాలం దూరం ఆత మహాన్. అందెజె ఏలుదాన్ వాండ్రు నీ వెట్టిపణి కిని వన్నిలెకెండ అవెన్. దన్నిజ్ ఇంక నండొ ఇస్టం మని ఒరెన్ తంబెరి లెకెండ మనాన్. నజి వన్ని మున్ను ఒరెన్ తంబెరి లెకెండ నండొ ఇస్టం

* 1:11 1:11 ఒనెసిము ఇని పేరుదిజ్ అరీదం పణిదిజ్ వానికాన్ ఇజి.

మనాద్. గాని వన్నిజ్ నిజి ఒదె ఇస్టం మంజినాద్లె. ఒరెన్ వెట్టిపణి కిని వన్ని వజ ఇస్టం మంజినాద్లె. యేసుప్రబు వెట కూడితి మని దనితాన్ ఒరెన్ తంబెరి వజబా ఇస్టం మంజినాద్లె.

17 అందెజె క్రిస్తు వందిజ్ నీ వెట జత కూడఃజి పణికినికాన్ ఒరెన్ ఇజి, నజి ఒడఃబితిజ, నీను నజి ఎలాగ డగ్గు కినిదొ, అయా లెకెండ్ వన్నిజ్ డగ్గు కితి. 18 వాండ్రు నిజి ఇని తపు కితిజనొ, నిజి అప్పు మర్జి సిదెజ్ మహిజనొ, అయాక నా ముస్కు మోవ్ల. 19 పవులు ఇని నాను నా సొంత కీదాజె రాసిన. నీను దేవుణు దరోట్ వాదెజ్ నానె సాయం కిత. అందెజె నీ కొత్త బత్తు. వందిజ్, నజి నీ బత్తునె సిదెజ్ మనాద్. గాని నాను అయాక లొన్లె. వాండ్రు సిదెజ్ మనికెజ్ నాను తిరిస్సు. 20 ఒఓ తంబెరి, యేసుప్రబు వెట మజి మని సమందమ్దాన్, నీ బాణిజ్ నాను యా సాయం కోరిజిన. యేసుప్రబు వెట కూడితి మని దనితాన్ వన్నిజ్ డగ్గు కిజి నజి సర్ద కిబిన్ల. 21 నాను వెహ్తాకెజ్ నీను తవ్వండ్ కిని ఇజి నాను నెసిన. అందెజె నాను నిజి రాసిన. ఒబ, నాను వెహ్తా దని ముస్కు నీను నండొ కినిలె ఇజి నాను నెసిన.

22 జెలిదాన్ నజి డిఃస్సి వందిజ్ మీరు పార్దనం కిజినిదెర్. మీ పార్దనం దేవుణు వెంజి, మీ డగ్గు మర్జి వాదెజ్, దేవుణు సాయం కినిన్ ఇజి నాను కోరిజిన. అందెజె నా వందిజ్ ఉండ్రీ బాడ్డిః తయార్ కీతి.

23 యేసు క్రిస్తుజ్ వెహ్సాని వందిజ్ నా వెట జెలిదు మని ఎపప్ర నిజి వెన్బాతి లెకెండ్ వెహ్సానాన్.

24 అయాలెకెండ్, నా వెట సేవ పణి కిజిని మార్కు, అరిస్తార్కు, దెమ, లూక ఇనికార్బా నిజి వెన్బాతి లెకెండ్ వెహ్సానార్.

25 ప్రబు ఆతి యేసుక్రిస్తు దయా దర్మం మిజితోడు మనీద్.

ఎబ్రి లోకురిజ్ రాస్తి ఉత్తమదిజ్ నెల్ల కిబిసినిక

ఇస్రాయేలు లోకురి అయగుప్పు దేనమ్దు వెటిపణి కిజి మహార్. వారు నండో బాదెజ్ ఆజి మహార్. దేవుణు ఇస్రాయేలు లోకురిజ్ అయగుప్పు దెనమ్దాన్ డిఃన్పిసి, కానాను దేనమ్దు ఒత్తెజ్ ఇజి, మోసి వరిజ్ నడిఃపిసి తత్తాన్. కానాను దేనమ్నె వరిజ్ సీన ఇజి దేవుణు వరిజ్ ఒట్టు కిత్తాన్, వారు పయనం కిజి మహి వలె, మోసె వెట దేవుణు వరిజ్ వది ఆత్తెజ్ సీజినాన్. దన్ని వెట దేవుణు వెప్పినాన్, “నాను వరి నడిఃమి మండ్రెజ్ ఇజి నా వందిజ్ నెగ్గి ఇల్లు లెకెండ మంజిని ఉండ్రీ గుడారం తోవ్తాజ్”, ఇజి (నిర్గమ 25:8). యాక ఎలాగ తోవ్తాజ్ ఇజి గుర్తులెకెండ ఉండ్రీ రూపు దేవుణు మోసెజ్ తోరిసినాన్. “నాను మిజి నుడఃజి, మీ వెట అబ్బె వర్గిన”, ఇజి దేవుణు వెవ్తాన్ (నిర్గమ 29:42). అందెజె, దేవుణు మంజిని ఉండ్రీ బాడ్డినె గుడారం. దేవుణు మంజిని బాడ్డిదిజ్ పోలిత మనాద్ యా గుడారం (ఎబ్రి 9:11).

పుజేరిజు - యూదురి మతమ్దు, లేమి తెగాదు మన్ని వరిజె, పుజేరిజు ఇజి ఏర్పాటు కినార్. మహి తెగాదికార్ విరిజ్ వరి దనమ్బాగం సీదెజ్. పుజేరిజు ఆవిండ, పెరి పుజేరిజు ఇజి, విజేరి పుజేరిజు మున్సు, మన్ని పెరి పుజేరిజు ఇజి నండొండారబా మహార్. ఉండ్రీ కాలమ్దు విజేరి పుజేరిజు మున్సు, మన్ని పెరి పుజేరి ఇజి దేవుణు తోలిత ఏర్పాటు కిత్తాన్*. పుజేరిజు దేవుణుదిజ్ ఒద్దె కెట ఆతి గదిదు డుఃగజి సేవ కిత్తార్. గాని విజేరి పుజేరిజు మున్సు, మని పెరి పుజేరి ఒరెండ్రె దేవుణుదిజ్ ఒద్దె కేట ఆతి గదిదు డుఃగజి సేవ కిత్తాన్. ఏలు యేసు మా వందిజ్ విజేరి పుజేరిజు మున్సు, మన్ని పెరి పుజేరి వజ వాత మనాన్.

గుడారం - దేవుణు మోసెజ్ తోరిస్తి రూపు వజ తయార్ కిత్తి ఉండ్రీ టంబు గుడుఃసని దన్నిలోఇ మన్ని వనక వందిజ్నె గుడారం ఇనార్. ఇబ్బినె దేవుణు వన్ని లోకుర్ వెట వర్గినాన్. టంబు గుడుఃసనిజ్ రుండి గద్దిజ్ మన్నె. దేవుణు వందిజ్ కేట ఆతి గదిని దేవుణు వందిజ్ ఒద్దె కెట ఆతి గది ఇజి రుండి మన్నె. యా రుండి గదిజ్బా దేవుణు వందిజ్ కేట ఆతి ఇట్టికెజె. ఉండ్రీ తెరనె యా రుండి గదిజ కేట కేట కిత్తాద్. తెర, సీరి దుపాటి లెకెండ మనాద్. రుండి గదిజ నడిఃమి డోయె ఆత మనాద్. అయాక నండో దలం మన్నిక, నండో సోకుదాన్ అట మనార్.

దేవుణుదిజ్ కేట ఆతి గది - దేవుణుదిజ్ కేట ఆతి గది పెరిక. దన్నిజ్ 30 మూరెజ్ సీరిండ, 15 మూరెజ్ ఒసార్ మహాద్. దిన్ని లోఇ దేవుణు ఎద్దు రొటెజ్ ఇడ్డి బల్ల ఉండ్రీ కల్లితి సిల్లి బజారమ్దాన్ తయార్ కిత్తి దీవెజ్ డండి ఉండ్రీ, దేవుణుదిజ్ దూపం సురుని మాలి పెటె ఉండ్రీ, మన్నె.

1 దేవుణు ఎద్దు రొటెజ్ ఇడ్డి బల్ల

దేవుణుదిజ్ కేట ఆతి గదిది ఉణెరి పడఃకాదు యా బల్ల మంజినాద్. యాక తుంబ మరాతి సెక్యెజాణిజ్ తయార్ కిత్తిక. దిన్ని మున్సు, కల్లిసిల్లి బజారమ్దాన్ పూత రాస్త మనాద్. దేవుణు ఎద్దు ఇడ్డి రొటెజ్ ఎస్తివలెబ దిన్ని మున్సు, మంజినె. యూదురి ఆసారం వజ యా రొటెజ్ ఉండ్రీ పలెమ్దు, రుండి వర్గిజ్ ఆరు దొత్తిజ్ మంజినె. విస్తాంతి దినమ్దునె యాకెజ్ మారిసి మరి కొత్తెజ్ ఇడ్డార్. అయా పడాయి రొటెజ్ పుజేరిజునె తిండ్రెజ్. మరి ఎయెరిబా తిండ్రెజ్ ఆవిద్. లేమి తెగాదు మన్నికారె, యా రొటెజ్ తయార్ కినార్. విస్తాంతి దినమ్దిజ్ ముజాల మన్ని రెయినె తయార్ కినార్.†

2 కల్లితి సిల్లి బజారమ్దాన్ తయార్ కిత్తి దీవ డండిజ్

యా డండిజ్ కల్లితి సిల్లి బజారమ్దాన్ తయార్ కిత్తిక్కాద్. దేవుణు వందిజ్ కేట ఆతి గదిది డేబ్ పడఃకాద్ మంజినాద్. యా కంతుదు ఏడు దీవెజ్ మంజినె. దిన్ని ముజాల మన్ని బాడ్డిదు జాయ్ మండ్రెజ్నె యాక మంజినాద్. ఒరెన్ పుజేరి పెందల్కని పొదొయ్క కనిసి మంజినాన్.‡

3 దూపం సుర్ని మాలి పెటె

యాక, నడిఃమి డెర డగ్గు మంజినాద్. దిన్ని మున్సు, దూపమ్నె ఆవిండ మరి ఇనికబా కూలిజ్నె, జంతుజ్నె పార పొట్టిజ్నె సురదెజ్ ఆవిద్. పెందల్కని పొదొయ్క దూపం సుర్నార్. గాని యాక

* 0: 1:0 ఏబ్రి 5:4 † 0: 1:0 లేమి 24:5-9 ‡ 0: 1:0 నిర్గమ 26:35

దేవుణు వందిళ్ ఒద్దె కేట ఆతి గదిదు మన్ని ఉండ్రీ వస్తు. అందెజె, దేవుణు వందిళ్ ఒద్దె కేట ఆతి గద్దిదు మంజినక ఇజి ఒడెబిజినార్. §

దేవుణు వందిళ్ ఒద్దె కేట ఆతి గది - దేవుణు వందిళ్ ఒద్దె కేట ఆతి గది నీరిండ, ఒసార్ ఉండ్రె సమాసమనె. 15 మూరెళ్ మన్నె. దిన్ని లోఇ మందసం మనాద్. మందసం ఇహిజ ఉండ్రీ పెటె. యాక దేవుణు మనాన్ ఇజి ఉండ్రీ గుర్తు లెకెండ మనాద్. దేవుణుదిళ్ కేట ఆతి గదిదిజ్ని ఒద్దె కేట ఆతి గదిదిజ్ నడిఃమి ఉండ్రీ డెర అడ్డు మనాద్. యా డెర నండో దలం మన్నిక. నండో కరీదిక. దన్నిమున్ను, నండో సోకుదాన్ అటార్. దేవుణు వందిళ్ ఒద్దె కేట ఆతి గదిదు విజెరె పుజెరిజ మున్ను, పెరి పుజెరి ఒరెండ్రె సొనాన్. మరి ఎయెన్బ సొన్ఎన్. వాండ్రుబా ఏటుదిజ్ ఒర్పునె, సోనాన్. లోకురి విజెరె పాపమక వందిళ్ పూజ సీదిజ్ ఉండ్రీ రోజు మనాద్. నాండిజె డెర పెరజె, లోఇ సొనాన్.*

యేసు మా వందిళ్ విజెరె పుజెరిజ మున్ను, మన్ని పెరి పుజెరి అత మనాన్. వాండ్రు సిలువాదు సాతిజ్, పాపమక వందిళ్ ఎలాకాలం వందిళ్ ఉండ్రీ సుట్టు పూజ లెకెండ వన్నిజ్ వాండ్రె ఒపజెపె ఆతాన్. † యేసు సిలువాదు సాతి గడిఃయాదు దేవుణు గుడిఃదు దేవుణు వందిళ్ కేట ఆతి గదిదిజ్ని దేవుణు వందిళ్ ఒద్దె కేట ఆతి గదిదిజ్ నడిఃమి మహి డెర, మున్నుహాన్ అడిఃగిదాక రుండి బదెజ్ ఆజి కింజితాద్. ‡ ముజాల డెర పెరజె విజెరె పుజెరిజ మున్ను, మన్ని పెరి పుజెరి ఒరెండ్రె దేవుణు వెట వర్గిదెజ్ లోఇ డుఃగ్నాన్. గాని క్రిస్తు సాతిజ్, వన్ని మున్ను, నమకం ఇడ్డి ఎయెన్బా దేవుణు డగ్రు సొండ్రెజ్ అటూన్. మరి పూజదిజ్ అవ్సరమబా సిల్లెద్.

మందసం - మందసం ఉండ్రె దేవుణు వందిళ్ కేట ఆతి గదిదు మన్ని వస్తు. మందసం ఇహిజ ఉండ్రె పెటెనె. యాక తుంబ మరాతి సెక్కెజాణిజ్ తయార్ కిజి దిన్ని మున్ను, లోఇ కల్తెతి సిల్లి బజారమదాన్ పూత రాసి ఆతమనాద్. దిన్ని మున్ను, ఉండ్రీ మూత మనాద్. అయాకబా కల్తెతి సిల్లి బజారమదాన్ పూత రాసి ఆత మనాద్. అయాక మూత నెక్కి ముద కిదిజ్ ఆనాద్. లాగిజి సాప్తెజబా ఆనాద్. § యా మూతదిజ్ “కరుణ పీటం” ఇనార్.* కరుణ పీటం ఇహిజ, పాపమకు సెమిన్ని బాడ్డి ఇజి అర్థం. కరుణ పీటం మున్ను, కెరూబుజ్ మన్నె, కెరూబుజ్ లోకు మూర్తి వజనె మన్నె గాని రెక్కెజ్ మన్నె. యా కెరూబుజ్ ఇతాన్ ఉండ్రీ ఆతాన్ ఉండ్రీ ఎద్దు నిల్లి, కరుణ పీటమదునె బేసి రెక్కెజ్ కోరిస్తె మన్నె. † కెరూబుజు నడిఃమి మొసొప్ మనాద్. కరుణా పీటం మున్ను, యా మొసొప్దు దేవుణు మంజినాన్. పరిసుద్దమాతి దేవుణు యా లెకెండ బాన్ మంజినాన్. అందెజె ఇని సెకాన్నో తప్పు కిత్తికాన్నో బాన్ కరుణ పీటం డగ్రు సొండ్రెజ్ అటూన్. గాని దేవుణు ఏరపాటు కిత్తి విజెరె పుజెరిజ మున్ను, మన్ని పెరి పుజెరి ఒరెండ్రె సొండ్రెజ్ అటూన్. వాండ్రుబా వన్ని సొంత ఇన్దమదాన్నో, పూజ కిత్తి దన్ని నల సిల్లెండో సొండ్రెజ్ ఆవిద్. యా లెకెండ సిల్లెండ సాహిజ వాండ్రు నిజం సొనాన్.

మందసమదు మన్నికెజ్ - మందసమదు దేవుణు మోసెజ్ సిత్తి పది ఆడ్రెజ్ రాన్ని మన్ని రుండి పల్కెజ్ మన్నె. కల్తెతిసిల్లి బజారమదాన్ తయార్ కిత్తి జగ్గుదు మన్నా మనాద్. మరి, సిగిరిస్తెమన్ని, అహారోసు డుడ్డుబా మనాద్.

మన్నా ఇహిజ తెలాని గింజ లెకెండ మనాద్. తేనె నూనె లెకెండ రుసి మంజినాద్. దేవుణు ఇస్రాయేలు లోకురిజ్ బిడిఃమ్ బూమిదు నడిఃపిసి మహివలె వరిజ్ తిండ్రెజ్ యాక సిత్తాన్. ‡

పది ఆడ్రెజ్ రాన్ని ఇడ్డి పల్కెజ్ - యా పల్కెజ్ పణకాణిజ్ తయార్ కిత్తికెజె. నన్ని పల్కెజు ఆడ్రెజ్ గిస్త మనాద్. §

డేవ - డేవ నడిఃమి టంబు గుడుఃస మనాద్. డేవ సుటులం వెల్గు మనాద్. దిన్నిజ్ ఉండ్రీ సరి మానాద్. డేవదు సంత సుర్తి మాలి పీటని నోర్బాదెజ్ ఏరు ఇడ్డి వలెం మన్నె.

సంత సుర్తి మాలి పీట - యాక తుంబ మరాతి సెక్కెజాణిజ్ తయార్ కిత్తిక. దిన్ని మున్ను, కంసు పూత రాస్త మనాద్. ఇబ్బెనె సంద సుర్తి పూజ కినార్. యా పీటదు సిసు ఎన్సివలెబా నమబిఏండ్ కసీనె మండ్రెజ్, యా మాలి పీట సరి డగ్రు మంజినాద్.

§ 0: 1:0 ఏబ్రి 9:4, 1రాజు 6:22 * 0: 1:0 ఏబ్రి 9:27 † 0: 1:0 ఏబ్రి 7:27 ‡ 0: 1:0 మత్తయి 27:51 § 0: 1:0 నిర్గమ 25:10-15 * 0: 1:0 నిర్గమ 25:7 † 0: 1:0 నిర్గమ 25:18-22 ‡ 0: 1:0 నిర్గమ 16:14-31 § 0: 1:0 నిర్గమ 31:18

నోరబాదెజ్ ఏరు ఇడ్డి పలెం - యా పలెం నంద నుర్ని మాలి పీటని, గుడారం నడిమి మంజినాద్. యాకబా కంసుదాన్ తయార్ కిత్తిక. పుజేరిజు పూజ కిని ముజాల్ నో, గుడారమ్ లొజ సొని ముజాల్ నో నోరబాదెజ్ ఏరు ఇడ్డికాదె యాక.

ఏత్తి లోకురిజ్ రాస్తి ఉత్తం

నెల్వ కిబిసినిక

ఏత్తి లోకురిజ్ రాసిని ఉత్తమ్ నె యాక. ఏత్తి లోకుర్ ఇహిజ, క్రీస్తు ముస్సు నమకం ఇట్టి యుదురి లోకుర్. యా ఉత్తం రాస్తికాన్ ఎయెన్ ఇజి తెలివిద్. యేసు ప్రబునె, దూతారిజ్ ఇంక మోసెజ్ ఇంక, మోసె సితి రూలు వజ పుజేరి పణి కిజిని పెరి పుజేరిజ ఇంక గొప్ప పెరికాన్ ఇజి యా ఉత్తమ్ దు వెప్పినాద్. పూజెజ్ లోకురి పాపమ్ కు సొనిపిన్ ఉ. గాని యేసు ప్రబు పూజ అతి దన్నితాన్ నె లోకురి పాపమ్ కు సొనె. వన్ని నలదాన్ నె, లోకుర్ సుబ్బరం ఆనార్. దేవుణు డగ్రు దయ్ రమ్ దాన్ మండ్రెజ్ అట్నార్. అయాలెకెండ, కొత్త బవుమానం నడిపిన్సికాండ్రె యేసు ఇజి వెప్పినాద్. మరి దేవుణు ముస్సు నమకం ఇట్టి పూర్ బమ్ దు బత్తిజి మహి నండెండార్ వరిజ్ వెప్పినార్. కండెవెరిదు, నమ్మితి లోకుర్ ఎలాగ మండ్రెజ్ ఇజి యా ఉత్తమ్ దు వెప్పినాద్.

1 పూర్ బమ్ దు, ఆఇ ఆఇ నండె సమయమ్ దు, నండె రకమ్ కాణిజ్, దేవుణు ప్రవక్తరు వెట మా అనిగొగొరిజ్ వర్ణితాన్. 2 గాని యా కడెవెరి దినమ్ కాజ్, వాండ్రు వన్ని మరిన్ వెట మజి వర్ణితాన్. వన్ని వెటనె బూలోకమ్ ని దని లొజ మనికెజ్ విజు దేవుణు తయార్ కిత్తాన్. వన్నిజె, విజు దనిజ్ అక్కు మనికాన్ ఇజి వీరపాటు కిత్తాన్. 3 దేవుణు గొప్ప పెరికాన్ ఇజి తోరిన్సికాండ్రె మర్చిన్. వన్ని లెకెండె వీండ్రు మనాన్. గొప్ప సత్తు మని వన్ని మాటదాన్, బూలోకమ్ దు మని విజు వన్కాజ్ వీండ్రు నడిపిసినాన్. లోకురి పాపమ్ కు నోరెజ్ వాండ్రు సాతి వెనుక, గొప్ప పెరి దేవుణు ఉణెరె పడెకాదు అతికారమ్ దు బస్తాన్. 4 అందెజె, వాండ్రు దూతార్ ముస్సు గొప్ప పెరికాన్ ఆతాన్. దూతార్ పేర్కు ముస్సు దేవుణు వన్నిజ్ సితి పేరు గొప్ప పెరిక మని లెకెండె, వాండ్రు పెరికాన్ ఆతాన్. 5 ఎండనిజ్ ఇహిజ, దేవుణు యేసు ప్రబుజ్ నె అవిండ, వన్ని దూతారిజ్ ఎయెరిజ్ బా ఎసెజ్ బా వెహ్ ఎతాన్, “నీను నా మర్చిన్. నేండ్రు నానె నీ బుబ్బు ఆత మన”,* ఇజి. మరి, దేవుణు దూతారిజ్ ఎయెరిజ్ బా ఎసెజ్ బా వెహ్ ఎతాన్”, నానె వన్ని బుబ్బు ఆన. వాండ్రె నా మరిన్ ఆనాన్ లె”,* ఇజి. 6 మరి, దేవుణు వన్ని లోల్ నుర్ కొణెదిజ్ యా లోకమ్ దు తపిసిని వలె, వెప్పినాన్, “దేవుణు దూతార్ విజెరె వన్నిజ్ పొగిడిజి మాడిన్సిజ్ వలె”,* ఇజి. 7 దూతార్ వందెజ్ వెప్పినివలె, వాండ్రు ఈహు వెప్పినాన్, “గాలి లెకెండె వన్ని దూతారిజ్ తయార్ కిజినాన్, కసిన్సి నీను లెకెండె, వన్ని పణి మణిసిరిజ్ తయార్ కిజినాన్”,* ఇజి. 8 గాని వన్ని మరిన్ వందిజ్ ఈహు వెప్పినాన్, “ఓ దేవుణు, నీను బస్తి నిమాసనం అంతు సిల్లెండె ఎల్లాకలం మంజినాద్. నీను సితి నిజాయితిదాన్ రాజు వజ ఎలుబడిజి కిని. 9 నీను నిజమాతి దనిజ్ ప్రేమిస్తి మని. సెఇ దనిజ్ దూసిస్తి మని. అందెజె, నీ దేవుణు అతి దేవుణు నిజి ఎర్లిసి సరద ఆని గొప్ప గనం సితాన్. యాక నీ జత మని వరిజ్ సితి దన్నిజ్ ఇంక నండె గొప్ప పెరిక”,* ఇజి, దేవుణు మరిన్ వందిజ్ వెప్పినాన్. 10 వాండ్రు మరి వెప్పినాన్, “ఓ ప్రబుమా, లోకం పుటిన్ ఎండ ముజాలె, యా లోకమ్ దిజ్ పునాది ఇడ్డికి నీనె. ఆగాసం తయార్ కితికి నీనె. 11 అయొకెజ్ విజు నాననం ఆనె. గాని నీను మ్పంజిని. పాత పణిదిజ్ రెండె పడాయిక ఆనిలెకెండె అయొకెజ్ విజు పణిదిజ్ రెండె పడాయికెజ్ ఆనె.

12 పంసె మడత కినిలెకెండె, నీను వన్కాజ్ మడత కిని. పాత మారిసిని లెకెండె, వన్కాజ్ మారిసిని. గాని నీను ఎలాకాలం ఉండ్రె లెకెండె మంజిని. నీను ఎసెజ్ బా డొక్ర ఆఇ”,* ఇజి. 13 దేవుణు వన్ని దూతార్ ఎయెరిజ్ బా ఎసెజ్ బా వెహ్ ఎతాన్, “నాను నీ పగాతి వరిజ్ నీ పాదమ్ క అడిగి ఇడ్డిదాక, నీను నా ఉణెరె పడెకాద్ మని మన్ అ”,* ఇజి. 14 అహిజ, దూతార్ ఎయెర్? వారు విజెరె దేవుణుదిజ్ సేవ కిని ఆత్మెజెనె. దేవుణు రక్సిసిని వరిజ్ సాయం కిదిజ్, వాండ్రు పొక్కికారె.

* 1:5 1:5 కీర్తన 2:7. * 1:5 1:5 1నమ 7:14; 1దినరు 17:13. * 1:6 1:6 ద్వితి 32:43. * 1:7 1:7 కీర్తన 104:4. * 1:9 1:9 కీర్తన 45:6,7. * 1:12 1:12 కీర్తన 102:25-27. * 1:13 1:13 కీర్తన 110:1.

2

యేసు రక్తిస్నాన్ ఇని నిజమాతి పెరి సజతి నెక్సిపోక్వండ జాగర్త వెండ్రెజ్. 1 అందెజె మాటు వెహిమని నిజమాతి సజతిజ్, మరి నండో జాగర్తదాన్ వెండ్రెజ్ వలె. ఎందనిజ్ ఇహిజ, దని బాణిజ్ దూరం ఆవండ మంజిని వందిజె. 2 దేవుణు దూతారిజ్ వాండ్రు వెహిపిన్తి మాటజ్, నిజం ఇజి రుజువ్ ఆత మనాద్. అయా మాటజ్ తప్పికాన్, లోజిఇకాన్ ఎయెన్ ఆతిజ్బా, తగితి సిక్చ వన్నిజ్ దోహక్త మనాద్. 3 అహిజ, దేవుణు లోకురిజ్ సిక్చదాన్ ఎలాగ గెల్పిస్టెజ్ ఇజి వెహిని ముకెలమాతి బోద మాటు నమ్మిదెజ్ కెఇతిజ, అయా సిక్చదాన్ ఎలాగ తప్తె ఆదెజ్ అట్నూట్? గెల్పిస్టి వందిజ్ మని యా బోద ప్రబునె తొలిత వెహ్లాన్. వాండ్రు వెహ్వికెజ్ వెహికార్, అయాక నిజం ఇజి మజి రుజువ్ కిత్తార్. 4 మరి, దేవుణుబా విజు రకమ్కాణి సత్తుమని పణిజ్, గొప్పు బమ్మాని పణిజ్ కిజి రక్తణ వందిజ్ వెహ్విక నిజం ఇజి రుజువ్ కిత్తాన్. వన్నిజ్ ఇస్టం ఆతివజ, దేవుణు ఆత్మెజ్ సీబాజి సీజి దేవుణు రుజువ్ కిత్తాన్.

యేసుప్రబునె లోకురిజ్ రక్తిస్సికాన్.

5 వాజిని కాలమ్ది లోకం ఏలుబడిః కిదెజ్ దేవుణు, దూతారిజ్ ఒపజెవ్ ఎతాన్. పరలోకం వందిజె మాటు వర్తిజినాట్. 6 గాని దేవుణు మాటదు ఎంచెనో ఎయెండ్రో డటిసి ఈహు వెహ్పిన్నాన్, “ఒ దేవుణు, నీను ఎత్తు కిదెజ్ లోకు ఏవటిదికాన్? నీను బాగ సుడఃదెజ్ లోకు ఏవటిదికాన్? 7 నీను దూతారిజ్ ఇంక వన్నిజ్ సణె ఇజ్జికాన్ కితి. నీను వన్నిజ్ పెరికాన్ కితి. గవరవమ్దిజ్ తగ్గికాన్ లెకెండ కితి. 8 విజు వన్యాజ్ మున్సు. వన్నిజ్ అతికారం సీతి*[†]. లోకురిజ్ విజు వన్యాజ్ మున్సు. దేవుణు అతికారం సీతి”, ఇజి వెహ్పిన్నాన్. ఇహిజ, విజు వన్యాజ్ మున్సు. అతికారం వన్నిజ్ మనాద్. గాని ఏలు, లోకుర్ విజు వన్యాజ్ మున్సు. అతికారం కిజినిక తొవట్. 9 గాని ఏలు, యేసుజ్ గొప్పు గనమ్దాన్, గొప్పు గవరవమ్దాన్ దేవుణు పెరికాన్ కితిక మాటు సుడఃజినాట్. ఎందనిజ్ ఇహిజ, వాండ్రు నండో బాదెజ్ ఓరిసి సాతాన్. వన్నిజ్ దూతారిజ్ ఇంక సణె దేవుణు ఇజ్జికాన్ కిత్తాన్. ఎందనిజ్ ఇహిజ, వాండ్రు యా లెకెండ లోకుర్ విజెరె వందిజ్ సాదెజ్. యా లెకెండ, దేవుణు దయా దర్శం కిత్తాన్. 10 విజు, దేవుణు తయార్ కిత్తాన్. విజు వన్నివందిజె తయార్ కిత్తాన్. యేసుప్రబు బాదెజ్ ఓరిసి సాజిని దనితాన్ దేవుణు వన్నిజ్ పూర్తి కిజినాన్. వాండ్రు పూర్తి ఆతికాన్ ఆతాన్. అయ లెకెండ యేసుజ్ పూర్తి కిజినిక తగ్గికాదె. ఎందనిజ్ ఇహిజ, నండో కొడోరిజ్ వాండ్రు ఎలాకాలం దేవుణు వెలు బత్కిని బత్కుదు నడిపిస్తెజ్. యేసునె వరిజ్ రక్తణదు నడిపిస్సికాన్. 11 వాండ్రె లోకురిజ్ దేవుణు వందిజ్ కేట ఆతి వరి లెకెండ కిజినాన్. వన్నిజ్ని వాండ్రు దేవుణు వందిజ్ కేట కిత్తి లోకురిజ్, బుబ్బు ఒరెండ్రె. అందెజె వరిజ్ తంబెరిజు ఇజి కూక్తెజ్ యేసు సిగు ఆవన్. 12 వాండ్రు దేవుణుదిజ్ వెహ్పిన్నాన్, “నీ వందిజ్ నాను నా తంబెరిజు వెహ్పూ, నీ లోకుర్ కూడఃనిబాన్, నాను నిజి పాగిడిఃన”* ఇజి. 13 మరి వాండ్రు వెహ్పిన్నాన్, “నాను వన్ని మున్సు. నా నమకం ఇడ్చ”* ఇజి. మరి బా వెహ్పిన్నాన్, “ఇదిలో, నానుని దేవుణు నజి సీతి కొడోరి”,* ఇజి. 14 దేవుణు కొడోరి నలని, కండదాన్ తయార్ ఆతి లోకుర్నె. అందెజె యేసుప్రబుబా నలని, కండదాన్ తయార్ ఆతి లోకు వజ ఆతాన్. ఎందనిజ్ లోకు ఆతాన్ ఇహిజ, ఒరెన్ లోకు వజనె సాదెజ్ అట్నూట్. వాండ్రు సాజిని, సాపు మున్సు. అతికారం మని నయతానుజ్ సీల్లెండ కిదెజ్ అట్నూట్. 15 అయా లెకెండ, సాపుదిజ్ తియెల్ ఆజి, వరి బత్కు విజు సాపు తియెల్దిజ్ అడిగి మని విజెరిజ్ డిఃపిస్తెజ్ అట్నూట్. 16 నిజమె, వాండ్రు దూతారిజ్ సాయం కివన్. గాని అబ్రాహము* తెగ్గాది వరిజ్ సాయం కిజినాన్. 17 దిన్నివందిజ్, వాండ్రు ఎల్లగాతిజ్బా వన్ని తంబెరిజు లెకెండ ఆదెజ్వలె. ఎందనిజ్ ఇహిజ, వాండ్రు నండో కనికారం మని, నమ్మిదెజ్ తగ్గి పెరి పుజెరి ఇజి, దేవుణుదిజ్ సేవ కిదెజ్ మరి, లోకురి పాపమ్క వందిజ్ పూజ కిదెజ్. 18 వాండ్రె పరిసెజ్ కిబె ఆజి, బాదెజ్ ఆతాన్. అందెజె పరిసెజ్ కిబె ఆని వరిజ్ సాయం కిదెజ్ అట్నూట్.

3

యేసు మోసె మున్సు పెరికాన్.

* 2:8 2:8 క్రిచ్చన 8:4-6. * 2:12 2:12 క్రిచ్చన 22:22. * 2:13 2:13 యెనయ 8:17. * 2:13 2:13 యెనయ 8:18. * 2:16 2:16 అబ్రహము తెగాతికా ఇజి వెహ్పినిక దేవుణు లోకుర్ వందిజె.

1 అందెజె దేవుణు వందిజ్ కేట ఆతి, దేవుణు కూకె ఆతి తంబెరిజాండె, యేనుప్రబుజ్ ఎత్తు కిదు. వాండె, దేవుణు పోక్తి అపొస్తూడుః ఇజి, విజెరె పుజెరిజ మున్ను పెరి పుజెరి ఇజి, మాటు నమ్మిజి ఒప్పుకొడిజినాట్. 2 దేవుణు కుటుమ్ది వరిజ్ విజెరిజ్ మోసె నమ్మకమ్దాన్ సేవ కితి లెకెండె, వీండ్రుబా వన్నిజ్ పణి ఒవజెప్తి దేవుణుదిజ్ నమ్మకమ్దాన్ సేవ కిత్తాన్. 3 ఉండ్రీ ఇల్లుదిజ్ ఇకం ఇల్లు తోహిస్సి వన్నిజ్ గొప్ప గనం వానాద్. అయాలెకెండె, మోసె ఇకం యేనుసె గొప్ప గనమ్దిజ్ తగ్గికాన్. 4 నిజమె, విజు ఇల్లుబా, ఎయెండ్రో ఒరెన్ తోహిస్సాన్. గాని విజు తోహిస్సాన్ దేవుణునె. 5 దేవుణు కుటుమ్ది వరిజ్ విజెరిజ్, ఒరెన్ సేవమపణిమణిసి వజ మోసె నమ్మిదెజ్ తగ్గికాన్ అతాన్. వాని కాలమ్దు దేవుణు వెహైజ్ మనికెజ్ వాండ్రు వెహైజ్. 6 గాని దేవుణు కుటుమ్ది వరి మున్ను అతికారం మని మరిన్ వజ, క్రీస్తు నమ్మిదెజ్ తగ్గికాన్. మాటు దయరమ్దాన్ నిల్సి, మాటు ఎద్రు సుడేజిని ఆసదిజ్ డిస్ఎండ గటిజ అనిసె మహిజ, మాటు వన్ని కుటుమ్దికాట్.

నమ్మిఇతి వందిజ్ సారిసి సారిసి వెహిస్సానిక.

7-8 అందెజె, దేవుణు ఆత్మ ఈహు వెహిస్సాని లెకెండె, “నేండ్రు మీరు దేవుణు వెహిస్సానిక వెహిజ, అయా దినమ్దు బిడిమ్ బూమిదు దేవుణుదిజ్ లోజెదిజ్ కెఇత్తి వలె, వన్నిజ్ వరిస కితివలె, మీ మున్నుజ్ గర్త ఆతి లెకెండె గర్త కిమాట్.

9 అబె, నాల్వయి పంటజ్ నాను కితి గొప్ప బమ్మ ఆతి పణిజ్ సుడేతిజ్బా, మీ అనిగొగొర నజి వరిస కిజి నజి లోజెదిజ్ కెఇత్తార.

10 అందెజె నాను అయా తరమ్ది లోకుర్ వెట కోపం అతానె వెహై. “ఎస్తివలెబా వరి మున్ను నా బాణిజ్ దూరం ఆజినాద్, నాను వెహిస్సానికె వారు వెన్ఎర్”, ఇజి.

11 అందెజె నాను నండో కోపం ఆజి ఉండ్రీ ఒట్టు కిత, ‘వారు ఎసెజ్బా నా డగ్రు వాజి నా వెట రోమ్బెఎర్లె’,* ఇజి. 12 తంబెరిజాండె, మీ లొఇ ఎయెన్ వన్నిజ్బా, బత్తిజిని దేవుణు బాణిజ్ దూరం కిబిస్సి నమకం సిలి, సెఇ మున్ను మన్ఎండ జాగర్త సుడేదు. 13 గాని, విజు దినమ్కాజ్ మీరు ఒరెన్ మరి ఒరెన్ వన్నిజ్ బుద్ది వెహిస్సా, ఆదరిసి మండ్రెజ్ వలె. ‘నేండ్రు’ ఇజి వెహిస్సా దినం విజు, అయాలెకెండె కిజి మండ్రెజ్ వలె. ఎండనిజ్ ఇహిజ, మీ లొఇ ఎయెన్బా పాపమ్దాన్ మొసెం ఆజి, మున్ను గటి ఆవండ మంజిని వందిజ్ ఆదరిసి మండ్రెజ్ వలె. 14 మాటు, క్రీస్తుజ్ తొలిత నమకం ఇట్టివలె వన్నిజ్ నమ్మిత్తి లెకెండె, ఆకర్దాక డటం నమకమ్దాన్ మహిజనె, మాటు క్రీస్తు వెట జత కూడితి మనికాట్.

15 దేవుణు మాటదు ముజాలె వెహిస్సాని లెకెండె, “నేండ్రు, మీరు దేవుణు వెహిస్సానిక వెహిజ, దేవుణుదిజ్ లోజెదిజ్ కెఇత్తి వలె మీ మున్ను గర్త ఆతిలెకెండె గర్త కిమాట్”*. 16 దేవుణు వెహిస్సానిక వెంజి, వన్నిజ్ లోజెదిజ్ కెఇతికార ఎయెర్? ఎయెర్ ఇహిజ, అయగుప్తు దేనమ్దాన్ మోసె డిస్సిసి, నడిపిసి తతి లోకుర్ విజెరె గదె. 17 ఎయెర్ వెట దేవుణు నలపయ్ పంటజ్ కోపం దాన్మహాన్? పాపం కిజి, బిడిమ్ బూమిదు సాతి వరివెట గదె కోపమ్దాన్ మహాన్. 18 “వారు ఎసెజ్బా నా డగ్రు వాజి నా వెట రోమ్బెఎర్లె”, ఇజి దేవుణు ప్రమానం కితివలె ఎయెర్ వందిజ్ వెహైజ్? వాండ్రు వెహైకెజ్ వెన్ఇతి వరి వందిజ్ గదె వెహైజ్. 19 అందెజె, వారు నమ్మిఇతిజ్నె, దేవుణు డగ్రు సొన్ని రోమ్బిదిజ్ అట్ఎత్తార ఇజి మాటు నెస్సాట్.

4

దేవుణు లోకురిజ్ రోమ్బిదిజ్ సిత మనాన్

1 దేవుణు డగ్రు సొన్ని వన్ని వెట రోమ్బిదిజ్ అట్నార్లె ఇజి వాండ్రు కితి ఒట్టు ఏలుబా మనాద్. అందెజె, మీ లొఇ ఎయెన్ వన్నిజ్బా అయా ఒట్టు కితిక తప్పి సొన్ఎండ మండ్రెజ్, మాటు జాగర్త మంజినాట్. 2 ఎండనిజ్ ఇహిజ, బిడిమ్ బూమిదు నడితికార్ వెహిలెకెండెన మాటుబా సువార్త వెహా మనాట్. గాని వారు వెహి మని దేవుణు మాట, వరిజ్ ఎండనిజ్ పణిదిజ్ రెవతాద్. ఎండనిజ్ ఇహిజ, వారు అయా మాట నమ్మిఎత్తార. 3 ఏలు అయాక నమ్మిత్తి మాటు, దేవుణు డగ్రు సొన్ని వన్నివెట రోమ్బిజినాట్. యాక, వాండ్రు వెహై లెకెండెనె మనాద్. “అందెజె, నాను నండో కోప ఆజి ఉండ్రీ ప్రమానం కిత. ‘వారు ఎసెజ్బా నా డగ్రు వాజి రోమ్బెఎర్లె”, ఇజి. దేవుణు లోకం తయార కితి

* 3:11 3:11 కీర్తన 95:7-11. * 3:15 3:15 కీర్తన 95:7,8.

వలెహాన్ అని, వన్ని డగ్రు సొన్ని మాటు వన్నివెట రోమ్బిదెజ్ వాండ్రు మా వందిజ్ తయార్ కితండ్రె మనాన్. గాని వాండ్రు అహా వెహ్లాన్. ⁴ ఎందనిజ్ ఇహిజ, దేవుణు మాటదు ఎంబెనొ ఏడు దినం వందిజ్ వెహ్లాన్. “దేవుణు విజు పణిజ్ పూర్తి కితండ్రె, ఏడు దినమ్దు రొంబితాన్”, ఇజ. ⁵ మరి, ముజాలె వెహ్లాన్ మాటదు వెహ్లాన్, “వారు ఎసెజ్బా నా డగ్రు వాజి రోమ్బెవెర్లె”,^{*} ఇజ.

⁶ ముజాలె సువార్త వెహి మనికార్, దేవుణు డగ్రు సొన్ని వన్నివెట రోమ్బెవెర్లె. ఎందనిజ్ ఇహిజ, వారు నమ్మివెత్తార్. గాని, దేవుణు డగ్రు సొన్ని వన్నివెట రోమ్బెదెజ్ మహి సెగెండార్ మనార్. ⁷ అందెజె, దేవుణు, వన్ని డగ్రు సొన్ని వన్నివెట రోమ్బెదెజ్ మరి ఉండ్రె రోజు ఇట్టాండ్రె, ‘నేండ్రు’, ఇజి కూక్లాన్, దిన్ని వందిజ్, నండొ కాలం వెనుక దావీదు వెట వెహ్లాన్ వలె, ముజాలె వెహ్లా అయా మాటనె వెహ్లాన్. “నేండ్రు మీరు దేవుణు వెహ్లానిక వెహిజ, మీ మన్ను గర్త కిమాట్”,^{*} ఇజ.

⁸ దేవుణు డగ్రు సొన్ని వన్నివెట రోమ్బెదెజ్, యెహ్లానువ వరిజ్ నడిపిసి మంజిని కిహిజ, మరి ఉండ్రె రోమ్ని దినం వందిజ్ దేవుణు వెనుక వెహ్లాండ మహాన్ మరి. ⁹ అందెజె దేవుణు ఏడు దినమ్దు రోమ్బెతిలెకెండ, లోకుర్బా రోమ్బెదెజ్ ఇజి వాండ్రు సిత మనాన్. ¹⁰ ఎందనిజ్ ఇహిజ, దేవుణు డగ్రు సొన్సి వన్ని వెట రోమ్ని ఎయెన్బా, దేవుణు వన్ని పణిజ్ వీస్తాండ్రె రోమ్బెతి లెకెండ, వాండ్రుబా వన్ని పణిజ్ వీస్తాండ్రె రోమ్బెజినాన్. ¹¹ అందెజె, దేవుణు డగ్రు సొన్ని వన్నివెట రోమ్బెదెజ్ మాటు నండొ కన్బడిజినాట్. ఎందనిజ్ ఇహిజ, ఇస్తాయేలు లోకుర్ దేవుణుదిజ్ లోజిఎండ అర్తిలెకెండ ఎయెన్బా అర్ఎండ మండ్రెజ్.

¹² ఎందనిజ్ ఇహిజ, దేవుణు మాట పాణం మనిక. నండొ సత్తు మనిక. రుండి దరోట్ తెవుగు మని ఎలాగ మర్తి కుర్తదిజ్ ఇంక ఒదె తెవుగు మనిక. దేవుణు మాట, లొఇ డుగ్జి మన్నుదిజ్ గర్బమ్దిజ్ ఎర్దిసి డూగ్గు సొనాన్. అత్తుజ, ముల్వెజి ఎర్దిసినాన్. అలోననమ్కాజ్, మన్నుదు మని ఉదెనమ్కాజ్ పరిక్కి కినాన్. ¹³ తయార్ అతి ఇనికబా దేవుణు బాణిజ్ డవె అదెజ్ అట్ఉ. విజు వన్ని కణెకె ఎర్దు టెటాజ్ తోరిజనె, డాజ్ఎండ తోరిజనె వన్నిజె, మాటు కితి విజు వన్నా వందిజ్ లెక ఒపజెవెజ్ మనాన్.

యేసునె విజు పుజెరిజ మున్ను గొప్ప పెరి పుజెరి.

¹⁴ అందెజె, మాటు డటం వెహ్లాని నమకం డిసెన్ఎండ అని మంజినాట్. ఎందనిజ్ ఇహిజ, అగాసం డాట్టి, దేవుణు డగ్రు సొహి విజెరె పుజెరిజ మున్ను మని పెరి పుజెరి ఒరిన్ మజి మనాన్. వాండ్రు దేవుణు మరిసి అతి యేసు. ¹⁵ మా విజెరె పుజెరిజ మున్ను మని పెరి పుజెరి, మజి మని తకుజ విజు నెన్ఇకాన్ అవెన్. గాని మజి వాజిని విజు రకమ్కాణి పరిసెజ్, వన్నిజ్బా వాతె. గాని వాండ్రు పాపం కివెతాన్.

¹⁶ అందెజె నండొ దయా దర్మం తోరిసిని దేవుణు బన్ని సిమసనం డగ్రు మాటు తియెల్ సిల్లెండ దయరమ్దాన్ సొనాట్. అబె వన్ని కనికారం మజి దోహ్నాన్. మజి అవసరం మనివలె మజి సాయం కిదెజ్ వన్ని దయా దర్మం దోహ్నాన్.

5

¹ విజెరె పుజెరిజ మున్ను మని పెరి పుజెరిజబా వరి లోకుర్ నడిమిహానె దేవుణు ఎర్లిస్తాండ్రె, లోకుర్ వందిజ్ దేవుణుదిజ్ సేవ కిదెజ్, వాండ్రు ఏర్పాటు కినాన్. ఎందనిజ్ ఇహిజ, వారు లోకురి దేవుణుదిజ్ సీదెజ్. ² విజెరె పుజెరిజ మున్ను మని పెరి పూజెరి, నెన్ఎండ తపు కినివరిజ్, సరి తప్పి సొని వరిజ్ సారలి తోరిస్తెజ్ అట్టాన్. ఎందనిజ్ ఇహిజ, వరిజ్ మని తకుజ్ విన్నిజ్బా మన్నె. ³ దిన్ని వందిజె, లోకురి పాపమ్క వందిజె అవండ, వన్ని సొంత పాపమ్క వందిజెబా, వాండ్రు పూజెజ్ సీదెజ్ మనాన్. ⁴ ఎయెన్బా వన్నిజ్ వాండ్రె, విజు పుజెరిజ మున్ను మని పెరి పూజెరి ఇని పెరి గనం తవె అవెన్. అహరోసుజ్ విజెరె పుజెరిజ మున్ను మని పెరి పూజెరి ఇజి దేవుణు ఏర్పాటు కితి లెకెండ, దేవుణునె వన్నిజ్ ఏర్పాటు కిదెజ్ వలె. ⁵ అయాలెకెండ, క్రిస్తుబా వన్నిజ్ వాండ్రె విజెరె పుజెరిజ మున్ను మని పెరి పుజెరి ఇని యా పెరి గనం తవె అతాన్. గాని విజెరె పుజెరిజ మున్ను మని పెరి పుజెరి ఇజి వన్నిజ్ ఏర్పాటు కితి దేవుణు వన్నిజ్ వెహ్లాన్. “నీను నా మరిన్. నేండ్రు నాను నీ బుబ్బు అత మన”, ఇజ. ⁶ మరి, ఎంబెనొబా దేవుణు వెహ్లాన్, “మెల్నినెదెక్ మహి లెకెండ, నీను

* 4:5 4:5 కీర్తన 95:11. * 4:7 4:7 కీర్తన 95:7,8.

ఎల్లకాలం మని ఒరెన్ వుజెరి”, ఇజి. 7 యేసు బూమిదు మహివలె, వన్నిజ్ సావుదాన్ తపిస్తెజ్ అట్టి దేవుణుదిజ్ డటం అడఃబాజి, కణెర్ వాక్కి పార్దనం కిత్తాన్. వన్ని మొరొ దేవుణు వెహాన్ ఎందనిజ్ ఇహిజ వాండ్రు తియెల్దాన్ తగ ఆత మహాన్. 8 వాండ్రు దేవుణు మరిసి ఆతిజ్బా, వన్నిజ్ వాతి స్రమెజాణిజ్ దేవుణుదిజ్ లోజిదెజ్ వాండ్రు నెస్తాన్. 9 దేవుణు వన్నిజ్ పూర్తి కితివలె, వన్నిజ్ లోజిని వరిజ్ విజెరిజ్ రక్కిస్సికాన్ ఆతాన్. 10 మెల్లిసెదెక్ మహి లెకెండ, విజెరి వుజెరిజ మున్కు మని పెరి వుజెరి ఇజి దేవుణు వన్నిజ్ ఏర్పాటు కిత్తాన్.

నమకమ్దాన్ అరెండ జాగర్త సుడఃదెజ్.

11 దిన్ని వందిజ్ మరి నండొ వెహ్తాజ్ మజి మన్నె గాని, మీరు నిపాతినె అర్దం కిజినిదెర్. అందెజె నండొ వెహ్తాజ్ కర్ణం ఆజినాద్. 12 మీరు దేవుణుదిజ్ నమ్మిజి నండొ పంటజ్ ఆజినాద్. ఏలు మహి వరిజ్ బోదెస్తెజ్ మనికిదెర్ మీరు. గాని, దేవుణు మాటదు తొలిత నెస్తెజ్ మని నిజమాతి సజతిజ్ మరిబా నెస్సిస్తెజ్ ఎయెన్బా నెన్పిస్తాన్ మండ్రెజ్ వలె. పాలు ఉణిజిని లేత కొడెర్ లెకెండ మీరు మనిదెర్. బోజనం ఉండెజ్ అట్లెకెదెర్. 13 పాలు ఉణికాన్ ఎయెన్బా లేత కొడెఃనె. నిజమాతికెజ్ ఇనికెజ్ ఇజి నెన్పిసిని బోదె నెన్ఎన్. 14 గాని పెరి వరిజె బోజనం మనాద్. నెగ్గికెజ్, సెకెకెజ్ తేడ నెసి, నెగ్గికెజ్ కిదెజ్ నెస్సిమనికారె వారు.

6

1 అందెజె, క్రీస్తు వందిజ్ తొలిత నెస్తి మహి బోదెజె నెనినె మన్ఇండ, మరి పెరి మాటెజ్బా నెసి పిరినాట్. సావుదు నడిఃపిసిని సెఇ పణిజ్ ఒప్పుకొడిఃజి డిసి సీజి, దేవుణు మున్కు నమకం ఇడఃదెజ్ ఇజి మరి మరి వెహ్తానె మన్మాట్. 2 బాప్తినం లాగె ఆని దని వందిజ్, కికు ఇడ్డి దని వందిజ్, లోకుర్ సావుదాన్ మరజి నిజ్ని దని వందిజ్, ఆకారదు దేవుణు సీని లిర్వు వందిజ్ మరి మరి వెహ్తానె మన్మాట్. 3 దేవుణుదిజ్ ఇస్టం ఇహిజ, మరి లావు నెసి పిరినాట్. 4-6 ఉండ్రీ కాలమ్దు దేవుణు జాయ్దు మహికార్, పరలోకమ్ది ఇనాయం వందిజ్ బాగె నెస్తి మనికార్, దేవుణు ఆత్మ వెట కూడిఃతికార్, దేవుణు మాట నెగ్గిక ఇజి నెస్తికార్ క్రీస్తు మరజి వానివలె నమ్మిత్తి లోకురిజ్ నస్తివలె మంజిని పెరి సత్తు వందిజ్ నెస్తికార్, వారు దేవుణు బాణిజ్ దూరం ఆతిజ, మరి పాపమ్కు ఒప్పుకొడిఃజిని వరిజ్ మరజి తతెజ్ అట్ఎద్. ఎందనిజ్ ఇహిజ, వారు దేవుణు మరిసిజ్ మరి ఉండ్రీ సుటుబా సిలువాదు కుటిజాణిజ్ డెయ్జి, విజెరి ఎర్దు సిగు కిబిస్తాన్. 7 నిన్ని వరిజ్ పణిదిజ్ రెఇ బూమిదిజ్, పోలిస్తెజ్ ఆనాద్. ఎందనిజ్ ఇహిజ, ఎసెజ్ ఎసెజ్ అరెసిని పిరుదాన్ ఊద్ది బూమిదు, పంట పండిసిని వన్నిజ్ పణిదిజ్ వానిలెకెండ బూమి పంట పండిసి సీనాద్. అయా బూమిదిజ్ దేవుణు దీవిస్తాన్. 8 గాని లటెజ్ సాప్పుజ్ పండిసిని బూమి పణిదిజ్ రెఎద్. దేవుణు దనిజ్ తవ్వెండ సాయివు సీనాన్ కడఃవేరిదు సిసుదాన్ నానసం మనాద్. 9 గాని తంబెరిజాండె, మాపు యా లెకెండ వెహ్తాజ్బా, మీరు అయాలెకెండ ఆఇదెర్, ఇజి మాపు పూర్తి నమ్మిజినావ్. క్రీస్తు మున్కు నమకం ఇడఃజి రక్సణదు వాతి లోకుర్ కిని నెగ్గి పణిజె, మీరుబా కిజినిదెర్ ఇజి మాపు పూర్తి నెసినావ్. 10 దేవుణు అనెయం కినికాన్ ఆఎన్. మీరు వన్ని వందిజ్ కితి పణిజ్, వన్ని లోకురిజ్ సాయం కిజి, మరి మరి సాయం కిజి వన్నిజ్ తోరిసిని ప్రేమ వాండ్రు పోన్ఎన్. 11 మీ లొఁ ఇ విజెరిదెబా, యా లెకెండ కడఃవేరిదాక మండ్రెజ్ ఇజి మాపు ఆన ఆజినావ్. ఎందనిజ్ ఇహిజ, మీరు ఆన ఆజినికెజ్ విజి తవ్వెండ పూర్తి ఆదెజ్ 12 మీరు బండెజ్ ఆదెజ్ ఇజి మాపు కోరిఎవ్. గాని దేవుణు మున్కు మని నమ్మకమ్దాన్, కర్ణమ్కు ఓరిసినిదనితాన్ దేవుణు సీన ఇజి ఒట్టు కితికెజ్ దోహ్కీ వరిలెకెండ మీరు ఆదెజ్ ఇజి కోరిజినావ్.

దేవుణు అబ్రాహముజ్ కితి ఒట్టు

13 దేవుణు అబ్రాహముజ్ నెగ్గికెజ్ కిని ఇజి ఒట్టు కిత్తాన్. కితివలె వన్ని మున్కు ఎయెన్బా పెరికాన్ సిలితిజ్, వాండ్రు వన్నిజె, తోడః ఇడ్డెః ఆజి అబ్రాహముజ్ ఒట్టు కిత్తాన్. 14 వాండ్రు వెహ్తాన్, “నాను నిజి తవ్వెండ దీవిసి, నిజి నండొ తెగ్గది వరిజ్ సీన”,* ఇజి. 15 అబ్రాహము ఓరిసి కావ్ కిజి మహాన్. అందెజె దేవుణు సీన ఇజి ఒట్టు కితికెజ్ వన్నిజ్ దోహ్కాద్. 16 లోకుర్ ఒట్టు కినివలె వరిజ్ ఇంక పెరి వరిజ్,

* 6:14 6:14 అది 22:17.

వాండ్రె నజీ తోడుః ఇజి వెప్పి ఒట్టు కినార్. వరి నడిఃమి మని గొడుఃబెజ్ విజు ఉండ్రె ఒట్టుదాన్ సారలి ఆని. 17 దేవుణు, వాండ్రు ఒట్టు కితిక దొహ్కైజ్ అక్కు మని వరిజ్, వన్ని ఉదెసం వాండ్రు కండెక్బా మారినెవన్, ఇజి వరిజ్ టెటాజ్ నెన్పిసిని వందిజ్, వాండ్రు వన్నిజ్ తోడుః ఇడ్డెః ఆజి ఒట్టు కిత్తాన్. 18 అందెజె దేవుణు మజి వన్ని ఒట్టు సిత మనాన్. వన్నిజ్ తోడుః ఇడ్డెః ఆజి సిత మనాన్. యా రుండి సజలిజ్ మార్ఉ. ఎందనిజ్ ఇహిజ, దేవుణు అబద్దం వర్దిజ్ అట్ఎన్. అందెజె, దేవుణునె నా గతి ఇజి నమకం ఇడ్డి మజి, మా ఎద్దు ఇడ్డి మని ఆసదిజ్ డిఃనెండ అన్జెజ్ దయరం మంజినాద్. 19 మా పాణం ఇతల్ అతాల్ కద్దిఎండ, నెగండ నిల్తెజ్ యా ఎద్దు సూణి ఆసనె ఉండ్రె కన్నె లెకెండ మనాద్. తెర వెన్కా మని దేవుణు వందిజ్ ఒదె కేట ఆతి గదిదు అయాక ఒనాద్. 20 యేసు మా వందిజ్ మజి ఇంకముజాలె అబె సాహాన్. మెల్కిసెదెకు మహివజ, వాండ్రు ఎల్కాలం ఒరెన్ విజెరె పుజెరిజ మున్ను మని పెరి పుజెరి ఆత మనాన్.

7

పుజెరి ఆతి మెల్కిసెదెకు

1 యా మెల్కిసెదెక్ సాలెం పట్టుమది రాజు. విజు దని మున్ను ఆతికారం మని దేవుణు పుజెరి. నండె రాజారి మున్ను విదెం కిజి గెలసి, అబ్రాహము వన్ని ఇండ్రో మరజి వాజి మహివలె, మెల్కిసెదెక్ వన్నిజ్ దనూల్ ఆతండ్రె, దీవిస్తాన్. 2 అయావలె అబ్రాహము, వాండ్రు ఉద్దం కిజి గెలసి దొహ్కై విజు వన్కాజ్ లొజ మెల్కిసెదెకుజ్ దసంబాగం సితాన్. వన్ని పేరు తొలిత అద్దం ఇనిక ఇహిజ, సీతి నిజాయితిదాన్ ఏలుబడిః కిని రాజు. మరి ఉండ్రె అద్దం ఇనిక ఇహిజ సమాదనమదాన్ ఏలుబడిః కిని రాజు ఇజి. ఎందనిజ్ ఇహిజ, వాండ్రు సాలెం పట్టుమది రాజు. సాలెం ఇహిజ సమాదనం. 3 వన్ని అయేసి అప్పాసి వందిజ్నో, వన్ని అనిగొగొర్ వందెజ్నో గుర్తు ఇనికెజ్ సిలు. వన్ని పుడుగు వందిజ్నో, పాపు వందిజ్నో తెలిఎద్. వాండ్రు దేవుణు మరిసి లెకెండ ఎల్కాలం ఒరెన్ పుజెరి. 4 యా మెల్కిసెదెకు ఎసాపెరికాన్ ఇజి ఎత్తు కిదు. దేవుణు వీర్పాటు కితి లోకుర్ లొజ గొప్పపెరి అనిగొగొ ఆతి అబ్రాహము, విదెమదు గెలసి వన్నిజ్ దొహ్కై విజు వన్కాజ్ లొజ వన్నిజ్ దసంబాగం సితాన్. 5 మోసె సీతి రూలు వజ, లేవి తెగ్గదు పుట్టి పుజెరిజ ఆతికార్, ఇస్రాయేలు లోకుర్ బాణిజ్ దసంబాగం లొసినార్. ఇహిజ వారు వరి సొంత లోకుర్ బాణిజ్ లొసినార్. యా పుజెరిజుబా, అబ్రాహము తెగ్గదు పుట్టికార్ ఆతిజ్బా వరి సొంత లోకుర్ బాణిజ్ దసంబాగం లొసినార్. 6 మెల్కిసెదెకు లేవి తెగ్గదు పుట్టికాన్ ఆవెన్. గాని వాండ్రు అబ్రాహము బాణిజ్ దసంబాగం లొస్తాండ్రె, దేవుణు సీతి ఒట్టుజ్ మని అబ్రాహముజ్, దీవిస్తాన్. 7 దీవిస్సికాండ్రె, దీవన లొసె ఆని వన్నిజ్ ఇంక పెరికాన్ ఇని మాట అనుమానం సీలికాదె. 8 యూదురి పుజెరిజు సుడఃతిజ, సాజెసానికారి దసంబాగం లొసినార్. గాని మెల్కిసెదెకుజ్ సుడఃతిజ, దసంబాగం లొసె ఆనికాన్ బత్రిజినాన్ ఇజెనె దేవుణు మాట వెప్పినాద్. 9 అహిజ, దసంబాగం లొసెనె లేవి తెగ్గదు పుట్టికార్, మెల్కిసెదెకుజ్ దసంబాగం సితార్. వరి అనిగొగొ ఆతి అబ్రాహము సీలిదనితాన్ వారు సితార్ ఇజి ఒరెన్ వన్నిజ్ వెప్తాజ్బా ఆనాద్. 10 ఎందనిజ్ ఇహిజ, మెల్కిసెదెకు అబ్రాహముజ్ సుడఃతివలె, లేవి పుట్ఎండ్రె. వాండ్రు అబ్రాహము పొటాద్ నెన్సెవలె మహాన్.

మెల్కిసెదెకు లెకెండ యేసు ఒరెన్ పుజెరి

11 దేవుణు మెసె వెట మజి రూలుజ్ సిత మనాన్. అయా రూలుజ్ వజ, లేవి తెగ్గదు పుట్టికార్ పుజెరిజు ఆదెజ్వలె. ఏలు, లేవి తెగ్గదు మని పుజెరిజు ఇహిజ ఆరోసు కుటుమదికార్ దేవుణు ఎత్తు కితి ఉవదేసమ్మకు పూర్తి కిడిజ్ అట్టార్ ఇహిజ, మరి ఒరెన్ పుజెరి వాడిజ్ అవ్సరం సిలెతాద్ మరి. అహారోసు కుటుమదు మనికాన్ ఆవండ, మెల్కిసెదెకు మహి లెకెండ ఒరెన్ వన్నిజ్ పొక్తెజ్ అవ్సరం సిల్లెద్. 12 పుజెరిజు యా లెకెండ మారితిజ, మోసె సీతి రూలుజ్బా మార్దెజ్ వలె. 13 ఎయె వందిజ్ మాటు వెప్పినాటో, వాండ్రు మరి ఉండ్రె తెగ్గదు మనికాన్. అయా తెగ్గదు మనికార్ ఎయెరబా పుజెరి వజ, మాలి పీటదు ముజాలె సేవ పణి కిఎర్. యా సజతిజ, మా ప్రబు వందిజ్ వెప్తా మన్నె. 14 వాండ్రు యూద తెగ్గదు పుట్టికాండ్రె ఇజి టెటాజ్ నెసినాట్. పుజెరిజు వందిజ్ మోసె వెప్తావలె, యూద తెగ్గ వందిజ్ ఇనికబా వెహ్ఎతాన్. 15 మెల్కిసెదెకు పుజెరి మహివజ, మరి ఒరెన్ పుజెరి వాత మనాన్.

అందెజె, మాటు వెహ్పిక మరి ఒదె టెటాజ్ అర్లం ఆజినాద్. 16 లేవి తెగ్గదు మనికాండ్రె పుజెరి ఆదెజ్ ఇని రూలు వాండ్రు పూర్తి కిపెండ పుజెరి ఆతాన్. గాని నాసనం కిదెజ్ అట్జ, బత్తిజిని సత్తుదాన్ నె పుజెరి ఆతాన్. 17 ఎండనిజ్ ఇహిజు “మెల్లిసెదెకు మని లెకెండ, నీను ఎలాకాలం ఒరెన్ పుజెరి”,* ఇజి దేవుణు మాటు క్రీస్తు వందిజ్ వెహ్పినాద్. 18 అందెజె, పుజెరిజు వందిజ్ మని పడాఱు రూలుదిజ్ విలువ సిల్లెద్. ఎండనిజ్ ఇహిజు దనిజ్ సత్తు సిల్లెతాద్. పణిదిజ్ రవతాద్. 19 ఎండనిజ్ ఇహిజు, మోసె సెతి రూలుజ్, ఇని దనిజ్ బా పూర్తి కిఉతె. ఏలు మాటు ఎద్దు సుడఱతిక మోసె సెతి రూలుజ్ కితి ఒటుదిజ్ ఇంక నెగెద్. అయా ఒట్టుదాన్ దేవుణు డగ్గు సాండ్రెజ్ అట్టాట్. 20 క్రీస్తు ఎలాకాలం మని ఒరెన్ పుజెరి ఇజి దేవుణు ఒట్టు కిత్తాన్. గాని మరి ఎమేణి పుజెరిజుబా దేవుణు యా లెకెండ ఒట్టు కిపెతాన్. 21 దేవుణు యేసుజ్ నె వెహ్పాన్, “ప్రబు ఉండ్రీ ప్రమాణం కిత మనాన్. అయాక ఎనెజ్ బా తప్పెవెన్. ‘నీను ఎలాకాలం మని ఒరెన్ పుజెరి’”*, ఇజి. 22 దేవుణు యా లెకెండ ఒట్టు కతాన్. అందెజె, యాక ఉండ్రీ నెగ్గి ఒప్పమానం ఇజి తవ్వెండ నిజం కినికాన్ యేసునె. 23 పడాఱు అలవాటు వజ నండెండార్ పుజెరిజు మహార్. ఒరెన్ సాతిజు, మరి ఒరెన్ వన్ని పణి కినాన్. 24 గాని యేసు ఎలాకాలం మని ఒరెన్ పుజెరి. ఎండనిజ్ ఇహిజు, వాండ్రు ఎలాకాలం బత్తిజినాన్. 25 అందెజె వాండ్రు, ఏలు మరి ఎలాకాలం వన్ని వెట దేవుణు డగ్గు సాని వరిజ్ రక్కిసెజ్ వాండ్రు అట్టాన్. ఎండనిజ్ ఇహిజు, వరి వందిజ్ దేవుణుదిజ్ బతిమాలదెజ్ వాండ్రు ఎల్లకాలం బత్తిజినాన్. 26 అందెజె, మా అవ్వనరం ముకు తిరిసిని విజు పుజెరిజు మున్ను, మని పెరి పుజెరి యేసునె. వాండ్రు ఇని పాపం సిలికాన్, నింద సిలికాన్, ఇని తప్ప సిలికాన్, పాపం కిని వరిబాణిజ్ కేట ఆతికాన్. వన్నిజె పరలోకమ్దు గొప్ప పెరి గవ్వరం సిత మనాన్. 27 మహి పెరి పుజెరిజు లెకెండ, వాండ్రు రోజు పూజెజ్ సీదెజ్ అవ్వనరం సిల్లెద్. ముజాలె వన్ని పాపమ్క వందిజ్, వెనుక లోకురి పాపమ్క వందిజ్ పూజెజ్ సీదెజ్ అవ్వనరం సిల్లెద్. వన్నిజ్ వాండ్రె సిలువాదు ఒపజెప్పి వలె, వరి పాపమ్క వందిజ్, ఎలాకాలం వందిజ్ ఉండ్రీ సుటు పూజ సితాన్. 28 మోసె సెతి రూలు వజ ఏర్పాటు అతి విజెరె పుజెరిజు మున్ను, మని పెరి పుజెరిజు పూర్తి ఆకారం. గాని మోసె సెతి రూలుజ్ వెనుక, దేవుణు ఒట్టు కిత్తాన్. అయా ఒట్టు వజ మరిని విజెరె పుజెరిజు మున్ను, మని పెరి పుజెరి ఇజి ఏర్పాటు ఆతాన్. దేవుణు వన్నిజ్ ఎలాకాలం పూర్తి ఆతికాన్ కిత్తాన్.

8

యేసునె పుజెరిజు మున్ను మన్ని మా పెరి పుజెరి.

1 మాపు వెహ్పిని సజతిజు లోఇ ముకెలమాతి మాట యాకదె. అయాక ఇనిక ఇవెహిజు పరలోకమ్దు గొప్ప పెరి దేవుణు బసిని సమానం ఉణెర్ పడాఱు, గొప్ప బస్తిమని ఒరెన్ విజెరె పుజెరిజు మున్ను, మని పెరి పుజెరి మజి మనాన్. 2 వాండ్రు దేవుణు వందిజ్ ఒదె కేట కితి గదిదు విజు పుజెరిజు మున్ను, మని పెరి పుజెరి వజ సేవ కిజినాన్. ఇహిజు, ప్రబునె తయార్ కిజి ఇడ్డి నిజమాతి గుడారమ్దు సేవ కిజినాన్. లోకుర్ తయార్ కితి గుడారమ్దు ఆవద్ సేవ కిజినిక. 3 విజెరె పుజెరిజు మున్ను, మని పెరి పుజెరిజుబా, నండె రకమ్కాణి పూజెజ్ దేవుణుదిజ్ సీదెజ్ ఏర్పాటు ఆత మనార్. అందెజె, విజెరె పుజెరిజు మున్ను, మని యా పెరి పుజెరిబా ఇనికబా ఉండ్రీ పూజ సీదెజ్ వలె. 4 వాండ్రు యా లోకమ్దునె మంజినిక ఇహిజు వాండ్రు ఒరెన్ పుజెరిబా ఆతాన్ మరి. ఎండనిజ్ ఇహిజు, మోసె సెతి రూలుజ్ వజ పూజెజ్ సీని నండె పుజెరిజు మనార్. 5 వారు సేవ కిజిని గుడారం, పరలోకమ్దు మని నిజమాతి గుడారమ్ది ఉండ్రీ రూపునె, నీడఱె. నని బానె వారు సేవ కిజినార్. అందెజె, మోసె గుడారం తయార్ కిదెజ్ మొదెల్లెస్తెవలె దేవుణు డటం వెహ్పాన్, “నిజి గొరెతు తోరిస్తి రూపు వజనె విజు తయార్ కిదెజ్ జాగ్రత సుడఱెదెజ్ వలె”, ఇజి. 6 గాని ఏలు, దేవుణుదిజ్ లోకుర్ నడిఱెమి యేసు ఏర్పాటు కితి ఒప్పమానమ్నె గొప్ప నెగ్గిక. అయాలెకెండె, మహి పుజెరిజు పణి ఇంక, యేసుజ్ దొహ్కీ మని పుజెరి పణి నె గొప్ప నెగ్గిక. ఎండనిజ్ ఇహిజు, నెగ్గి సజతిజ్ సిన ఇజి కితి ఒటుదిజ్ ఆదారం ఇడఱెజిని యేసు అయా ఒప్పమానం ఏర్పాటు కిత్తాన్. 7 మొదెహి ఒప్పమానం, ఇని తప్ప సిలికాన్ అనిక ఇహిజు, మరి ఉండ్రీ ఒప్పమానమ్దిజ్ అవ్వనరం సిల్లెతాద్ మరి. 8 గాని దేవుణు, లోకుర్ లోఇ తప్ప సుడఱెతండ్రె, వరి తప్పజు తోరిసి, వరిజ్ ఈహు వెహ్పాన్, “ప్రబు వెహ్పినాన్, ‘ఇస్రాయేలు లోకుర్ వెట, యూద తెగ్గాది వరి

* 7:17 7:17 క్రిస్ట 110:4. * 7:21 7:21 క్రిస్ట 110:4.

వెట నాను ఉండ్రీ కొత్త బపుమానం కిని కాలం వాజినాద్. 9 నాను వరి అనిసిరిజ్ అయ్ గుప్పు దేసెమ్ దాన్ వరి కియు అసి వెల్లి నడిపిస్తవలె వరివెట కితి బపుమానం లెకెండ ఆవిద్ యా బపుమానం. నాను వరివెట కితి బపుమానం వారు తప్తార్. అందెజె, నాను వరిజ్ డిస్త సిత”, ఇజి ప్రబు వెప్పొనాన్. 10 మరి ప్రబు వెప్పొనాన్, ఇస్తాయేలు లోకుర్ వెట నాను కిని బపుమానం యాకదె. వాని దినమ్ కాజ్ వెనుక, నాను నా రూలుజ్ వరి గబమ్ దు ఇడ్చు. నాను వరి మన్పుదు అయాకెజ్ రాన్పు. నాను వరి దేవుణు ఆన. వారు నా లోకుర్ ఆనార్. 11 ఎయెర్ బా వరి వడకది వరిజో, వరి సొంత ఇండ్రోణి వరిజో, “వీరు ప్రబుజ్ నెస్తు, ఇజి నెస్ పిన్ ఎర్. ఎందనిజ్ ఇహిజ, వారు విజెరి నజి నెస్నార్. ఇజివరి బాణిజ్ మొదోలీసి, పెరివరిదాక నజి నెస్నార్. 12 నాను, వారు కితి సెఇకెజ్ సెమిన్పు. వరి పాపమ్ కు నాను ఎనెజ్ బా ఎత్తు కిఎ”,* ఇజి. 13 యా బపుమానమ్ దిజ్, “కొత్తక” ఇజి దేవుణు వెప్పొ, మొదోహి బపుమానమ్ దిజ్ పడాఁయ్ కిత్తాన్. పణిదిజ్ రఇ పడాఁయ్ బపుమానం బేగినె సిల్లెండ ఆనాద్.

9

కొత్త బప్పుమానమ్ ది విజేరె పుజేరిజ మున్పు మన్ని పెరి పుజేరి

1 దేవుణుని వన్ని లోకుర్ నడిమి మహి మొదోహి బపుమానమ్ దు, దేవుణుదిజ్ పొగ్ డిఃజి మాడిఃసిని వందిజ్ రూలుజ్ మహి. యా బూమిదు దేవుణుదిజ్ పొగ్ డిఃజి మాడిఃస్తెజ్ ఉండ్రీ గూడారమ్ బా మహాద్. 2 ఉండ్రీ గూడారం తయార్ కిత మనాద్. దన్నిజ్ రుండి గదిజ్ మహి. మొదోహి గదిదు దీవ డండి ఉండ్రీ, బల్ల ఉండ్రీ, మరి దేవుణు ఎర్తు ఇడ్చి రొటెజ్ మహి. యా గదిదిజ్ దేవుణు వందిజ్ కేట ఆతి గది ఇనార్. 3 (యా రుండి గదిజ నడిమి అడ్డు వజ ఉండ్రీ తెర మనాద్) తెర వెనుక మన్ని గదిదిజ్ దేవుణు వందిజ్ ఒద్దె కేట ఆతి గది ఇనార్. 4 అబ్బె బజారమ్ దాన్ తయార్ కితి దూపం సుర్పి మాలి పెటి, బపుమానం కితిక ఇడ్చిమని మందనం మన్నె. మందనమ్ దిజ్, లొఇ వెల్లి సుటులం బజారం పూత రాస్త మనాద్. యా మందనం లొఇ బజారమ్ దాన్ తయార్ కితి జగ్గుదు మన్పు, సిగిరితిమన్ని అహారోను డుడ్డుని దేవుణు మోసెజ్ సిత్తి పతి ఆడ్రెజ్ రాన్సి ఇడ్చి పల్కెజ్ మన్నె. 5 మందనం మున్పు, దేవుణు మనాన్ ఇజి, తోరిసిని కెరూబుజ్ మన్నె. కెరూబుజ్ కరుణపీటం మున్పు, ఇహిజ, మందనం మూత్త మున్పు. రెక్కెజ్ కోరిసయ్యె మన్నె. ఏలు యా సజతిజ్ లాపు వెస్తెజ్ మాటు అట్ ఎట్. 6 యాలెకెండ, విజు నెగ్రెండ ఇడ్చివెనుక, పుజేరిజు, మొదోహి గదిదు వరి సేవపణి కిదిజ్ ఎస్తినస్తవలె డుఃగ్ నార్. 7 గాని విజేరె పుజేరిజ మున్పు మన్ని పెరి పుజేరి ఒరెండ్రె, లొఇమన్ని గదిదు డుఃగ్ నాన్. అయాకబా వాండ్రు ఏంటుదు ఉండ్రీ సుటునె డుఃగ్ నాన్. డుఃగ్ నవలె నల సిల్లెండ డుఃగ్ వన్. అయాక వాండ్రు వన్ని పాపమ్ కాజ్ వందిజ్, నెస్ వండ లోకుర్ కితి పాపమ్ కాజ్ వందిజ్ దేవుణుదిజ్ పూజ సినాన్. 8 యాలెకెండ కిజిని అలవాటుదాన్, దేవుణు ఆత్తు టోటాజ్ నెప్పొసిని సజతి ఇనిక ఇహిజ, మొదోహి గదిని అబ్బె కిని అలవాటుజ్ విజు నిల్పి మంజినివలె, లోకుర్ దేవుణు వందిజ్ ఒదె కేట ఆతి గదిదు సొండ్రెజ్ అట్ ఎర్.

9 యాక యా కాలమ్ దిజ్ ఉండ్రీ గుర్తు. ఇనిక ఇహిజ, దేవుణుదిజ్ పూజ సీని విజు రకమ్ కాణి పూజెజ్, సీనివన్ని గర్బమ్ దు సుబ్బరం కిదిజ్ అట్ ఉ. 10 యా పడాయ్ ఆసారం, తిండి వందిజ్, ఉణి దన్ని వందిజ్, రకమ్ రకం సమయమ్ దు నోర్ బాని దన్ని వందిజె వెప్పొని రూలుజ్. యా రూలుజ్ మున్పు కిజినికెజ్. కొత్త రూలుజ్ వాని కాలమ్ దాక యా రూలుజ్ మంజినె. 11 గాని, ఇబ్బె ఏలె మన్ని నెగ్గి సజతిజ్ కల్లిసిని విజేరె పుజేరిజ మున్పు మన్ని పెరి పుజేరి ఇజి క్రీస్తు వాత మనాన్. వాండ్రు సేవ కిని గూడారం ఇహిజ పరలోకం. గొప్ప ముకెలమతిక. నండో పూర్తియతిక. అయాక లోకుర్ తయార్ కితిక ఆవిద్. తయారాతి లోకమ్ దు మనిక ఆవిద్. 12 క్రీస్తు గూడారమ్ దు డుఃగ్ జి, ఎలాకాలం వందిజ్ ఉండ్రీ సుటు, దేవుణు వందిజ్ ఒదె కేట ఆతి గదిదు సొహివలె, పూజ సీదిజ్ ఇజి గొరెజ, దూడెజు నల వాండ్రు ఒవన్. గాని, వాండ్రు వన్ని సొంత నలనె ఒతాండ్రె మజి పాపమ్ కాణిజ్ సాపుదాన్ ఎలాకాలం డిఃన్ పిస్తాన్. 13 మోని సిత్తి రూలుజు వజ, గొరెజ, కొడ్డిఃజు నలని దూడెజ్ సుప్తి నీరు, ముయిల* ఆతి లోకురి ఒడోల్ దు వాక్నార్. ఎందనిజ్ ఇహిజ, వరి ఒడోల్ సుబ్బరం ఆజి దేవుణు వందిజ్ ఒపజెవె

* 8:12 8:12 యిర్షియా 31:31-34. * 9:13 9:13 ఇబ్బె ముయిల ఇజి వెప్పొనిక దేవుణుదిజ్ డగ్గు కిదిజ్ అట్ ఇ సజతిజ్, సిల్లిజ దేవుణు ఎర్తు కల్లి అతికెజ్

అజి కేట అదెజ్. 14 అహిజ, క్రీస్తు నల ఎసా నెగ్రెండ సుబ్బరం కినాద్ ఇజి ఎత్తు కిదు. ఎలాకాలం మన్ని అత్తునత్తుదాన్, క్రీస్తు మా పాపమకాజ్ వందిజ్ వన్నిజ్ వాండ్రె దేవుణుదిజ్ ఒపజెవె ఆతాన్. ఇని పాపం సిల్లి పూజ లెకెండ, వన్నిజ్ వాండ్రె ఒపజెవె ఆతాన్. సాపు తపిస్సి నెజ పణిజాణిజ్ వన్ని నల మా గర్భం మజి గదన్విండలెకెండ సుబ్బరం కినాద్. ఎందనిజ్ ఇహిజ బత్తిజిని దేవుణుదిజ్ మాటు పొగిడిజి మాడిస్టెజ్. 15 అందెజె క్రీస్తునె అయా కొత్త ఒపుమానం నడిపిస్సికాన్. ఎందనిజ్ ఇహిజ, దేవుణు కూక్తి లోకురిజ్ దేవుణు సీన ఇజి ఒట్టు కితి ఎలాకాలం మంజిని దీవెనమకు దోహకెజ్. మొదోల్ కితి ఒపుమానమదిజ్ అడిగి మహివలె, వారు కితి తప్పుజాణిజ్ వాజిని సిక్కుదాన్ వరిజ్ డిసిపిస్టెజె, క్రీస్తు సాతాన్. 16 ఉండ్రె తీర్తన పత్రం రాస్తి ఇడ్డిమహిజ, అయా తీర్తన పత్రం తయార్ కితికాన్ సాత మనాన్ ఇజి రుజువ్ అదెజ్. 17 అయాక రాస్తిమన్నికాన్ బత్తిజి మహిజ, అయా తీర్తన పత్రమదిజ్ విలువ సిల్లెద్. వాండ్రు సాతివెనుకానె అయా తీర్తన పత్రం పణిదిజ్ వానాద్. 18 అందెజె, మొదోల్ సిత్తి ఒపుమానమదిజ్బా నల సిల్లెండ సత్తు మన్విద్. 19 దేవుణు వెహ్తై రూలుజ్ విజు, లోకురిజ్ విజేరిజ్ సిత్తివెనుక, మోసె దూడెజ నల, ఏరువెట కలప్తాండ్రె, ఇసాపు మొక్కాది కొముదాన్, నండో ఎరాని బులుస్కుదాన్ లోకుర్ విజేరి ముస్కు, దేవుణు రూలుజ్ రాస్తి ఇడ్డి పుస్తకం ముస్కు సిల్కరిస్తాన్. 20 వాండ్రు వెహ్తాన్, “మీరు కిదెజ్ ఇజి దేవుణు ఆడ్ర సిత్తి ఒపుమానమదిజ్ ముద్దనె యా నల”*, ఇజి. 21 అయాలెకెండ, గుడారం ముస్కుని అబ్బె మన్ని విజు వనకాజ్ ముస్కు నల సిల్కరిస్తాన్. 22 మోసె సిత్తి రూలుదు వెహ్తాని వజ విజు నలదాన్ సుబ్బరం ఆనాద్ ఇజి వెహ్తాజ్ ఆనాద్. నల వాక్విండ, పాపమకు సాన్ఉ. 23 అందెజె, పరలోకమదు మన్ని వనకాజ్ రూపు లెకెండ మన్ని లోకమది గూడారమని దన్ని లోక మనికెజ్, జంతుజ నలదాన్ సుబ్బరం అదెజ్ వలె. గాని పరలోకమదు మనికెజ్ జంతుజ నలదాన్ అవిండ, దన్నిజ్ ఇంక నెగ్గి పూజెజాణిజ్ సుబ్బరం అదెజ్ వలె. 24 ఎందనిజ్ ఇహిజ, క్రీస్తు పరలోకమదు సాహాన్. ఏలు మా వందిజ్ దేవుణు ఎద్దు జామ్లి నిల్సిని వన్నిలెకెండ నిల్దెజ్ సాహాన్. వాండ్రు లోకుర్ కిదాన్ తయారాతి గుడారమదు డుగ్గివతాన్. అయాక నిజమాతి గుడారమది ఉండ్రె మూర్తినె. 25 యూదురిజ పెరి పుజేరి, ఏంటు ఏంటు జంతుజ నలదాన్ దేవుణు వందిజ్ ఒది కేట అతి గదిదు డుగ్గాన్. గాని, యేసు వన్నిజె ఒపజెవె అదెజ్ మరి మరి పరలోకమదు సాన్విన్. 26 ఆహా సాండ్రెజ్ ఇహిజ, లోకం పుటిస్తి బాణిజ్ అసి, వాండ్రు మరిమరి సాదెజ్ మహాద్ మరి. గాని కాలమది ఆకారదు, వాండ్రు పూజ అతి దన్నిదటాన్, పాపం సిల్లెండ కిదెజ్, వాండ్రు ఎలాకాలం వందిజ్ ఉండ్రె సుటు తోరి ఆతాన్. 27 లోకుర్ విజేరి ఉండ్రె సుటు సాదెజ్ వలె. వెనుక దేవుణు బాణిజ్ తీర్పు జర్గిదెజ్ వలె, ఇజి ఏర్పాటు మనాద్. 28 అయాలెకెండ, నండొడారి పాపమకు సాన్పిస్టెజ్, క్రీస్తు పూజ ఆతాన్. వాండ్రు మరి మర్జి వానాన్, పాపమకు సాన్పిస్టెజ్ అవిద్; గాని వన్నిజ్ ఆనదాన్ ఎద్దుసుడెజి మంజిని వరిజ్ రక్తిస్టెజె వానాన్.

10

క్రీస్తు ఎలాకాలం వందిజ్ ఉండ్రె సుటు పూజ ఆతాన్

1 మోసె సితి గూలుజ్దు మని పడాాయి ఆసారమకు, వాని కాలమదు వాజిని నెగ్గి నజతిజ ఉండ్రె నీడెనె. అయాకెజ్ నిజమాతి నజతిజ్ అఉ. అందెజె పడాాయి ఆసారం వజ కిని పూజెజ్, డిన్విండ ఏంటు ఏంటు కిజి మహార్. గాని దేవుణుదిజ్ పొగిడిజి మాడిస్టెజ్ వాని వరిజ్ పూర్తి సుబ్బం కిదెజ్ అల్ఉ. 2 దేవుణుదిజ్ పొగిడిజి మాడిస్టెజ్ వాతి లోకుర్, వరి పాపమదాన్ పూర్తి సుబ్బం ఆతార్ ఇహిజ, వారు మరి మరి పాపమక వందిజ్ ఎత్తు కిజి బాద అవతార్ మరి. విజు పూజెజ్బా ఆప్ అతె మరి. 3 గాని యా పూజెజ్, ఏంటు ఏంటు, లోకురిజ్ వరి పాపమకు ఎత్తు కిబిస్సు. 4 ఎందనిజ్ ఇహిజ, కొడ్డిజు, గొరెజ నల పాపమకు సాన్పిస్టెజ్ అల్ఉ. 5 అందెజె, క్రీస్తు యా లోకుమదు వాతివలె వాండ్రు దేవుణుదిజ్ వెహ్తాన్, “పూజెజ్ని నందెజ్, నీను కోరిజ. గాని నీను నా వందిజ్ ఉండ్రె ఒడోలే తయార్ కితి”. 6 మాలి పీట ముస్కు సుప్తి జంతుజాణిజ్ నీను సర్ద అఇ. పాపమకు సాన్పిస్టెజ్ సీజిని పూజెజాణిజ్ సర్ద అఇ, ఇజి. 7 నస్తివలె నాను వెహ్తా, “ఓ దేవుణు, ఇదిలో నాను దేవుణు మాటదు నా వందిజ్ రాస్తి మని వజ, నాను కిదెజ్ ఇజి నీను కోరిజినికెజ్ కిదెజ్ నాను వాత మన్న”,*

* 9:20 9:20 నిర్గమ 24:8. * 10:7 10:7 క్రిస్ట 40:6-8.

ఇజి. 8 ముజాలె వాండ్రు వెప్టోన్, “పూజెజ్ నీనె నందెజ్ పూజ సీని పెటె మున్సు, సురుజిని జంతుజుని పాపముకు సాన్పిస్తెజ్ సీని పూజెజ్ నీను కోరిక. వన్కాణిజ్ నీను సరద ఆక”, ఇజి. (మోసె సీతి రూలుజు వజ యా పూజెజ్ కిదెజ్ మనికాదె. గాని వాండ్రు అయాలెకెండె వెప్టోన్) 9 వెనుక వాండ్రు వెప్టోన్. “ఇదిలో నీను కోరికెనికెజ్ కిదెజ్ నాను వాత మన”, ఇజి. అందెజె, దేవుణు పడాయీ పూజెజ్ విజు సిల్లెండ కిజి, క్రీస్తు పూజ ఆతి దనిజ్ పడాయీ పూజెజు మున్సు. ఇడ్డినాన్ 10 దేవుణు కోరికెకెజ్ వాండ్రు కిత్తాన్. అందెజె యేను క్రీస్తు ఒడోలదాన్ ఎలాకాలం వందిజ్ ఉండ్రీ నటు పూజ ఆతి దనిదాన్, మాటు పాపముకాణిజ్ సుబ్బం ఆత మనాట్. 11 యూదురి పుజెరిజు విజెరె, మాలి పీట ముజాలె నిల్చి, రోజు రోజు వరి పుజెరి పణి కిజినార్. మరి మరి ఉండ్రె నని పూజెజె కిజినార్. అయా పూజెజ్ ఎసెజ్బా పాపముకు సాన్పిన్ఉ. 12 గాని క్రీస్తు ఎలాకాలం వందిజ్ దేవుణుదిజ్ ఉండ్రీ పూజ ఆతాన్. వాండ్రె అయా పూజ ఆతాన్. ఎలాకాలం వందిజ్ పూజ ఆతాన్. వెనుక వాండ్రు దేవుణు ఉణెరె పడకాద్, గొప్ప మర్యాదదు బనె ఆతాన్. 13 అబ్బె, ఎలు క్రీస్తు పడికె వరిజ్, వన్ని పాపముక అడిగి దేవుణు ఇడ్డిదాక వాండ్రు కావ్ కిజినాన్. 14 ఎందనిజ్ ఇహిజు, అయా ఉండ్రీ పూజదాన్ పాపముకాణిజ్ సుబ్బం ఆతి వరిజ్, వాండ్రు ఎలాకాలం పూర్తి ఆతికార్, కిత మనాన్. 15 దేవుణు ఆత్మబా యాక నిజం ఇజి నెసి వెప్పినాన్. తొలిత వెప్పి నాన్. 16 “వాని దినుముకాజ్ వెనుక, నాను వరివెట కిని కొత్త ఒపుమానం యాకదె. నాను వరి గర్బముదు నా రూలుజ్ ఇడ్చు. వరి మన్సుదు అయాకెజ్ రాన్సు, ఇజి ప్రబు వెప్పినాన్”,* ఇజి. 17 వెనుక వాండ్రు వెప్పినాన్, “నాను వరి పాపముకు, వరి సెక పణిజ్ ఎసెజ్బా ఎత్తు కి”,* ఇజి. 18 దేవుణు పాపముకు నెమిని మహివలె, పాపం నెమిస్తెజ్ మరి పూజ అవునరం సిల్లెద్.

నమ్మిజినె మండ్రెజ్.

19 అందెజె, తంబెరికాండె, యేను నల వాక్కి సాతి సావుదాన్ దేవుణు వందిజ్ ఒద్దె కేట ఆతి గదిదు, మాటు దయరమదాన్ డుకగదెజ్ ఆనాద్. 20 వాండ్రు మా వందిజ్, బత్తుదు నడిపెసిని ఉండ్రీ కొత్త సరి రేతాన్. అయాక తెరదాన్, ఇహిజు వన్ని సొంత ఒడోలదాన్ రేతాన్. 21 దేవుణు లోకుర్ మున్సు. అతికారం మని ఒరెన్ పెరి పుజెరినె మజి మనాన్. 22 అందెజె, మాటు వన్నిజ్ పూర్తి నమ్మిజి నెగ్గి మన్సుదాన్ దేవుణు ఎద్రు సొనాట్. మజి సుబ్బం కిదెజ్, మా సెక పణిజ్ నెసిని మన్సు, క్రీస్తు నలదాన్ సిల్కరెసె ఆత మనాద్. మా ఒడోలె, నెగ్గి ఎరుదాన్ నొరె ఆత మనాద్. ఆహె మాటు దేవుణు ఎద్రు సొనాట్. 23 ఇతల్ అతల్ కద్దిండె, మటు మనాట్ ఇజి మాటు వెహె ఆజిని ఎద్రు సూణి ఆనదిజ్ డటం అన్నాట్. ఎందనిజ్ ఇహిజు, మా వెట ఒట్టు కితికాన్ నమ్మిదెజ్ తగ్గికాన్. 24 మహికార్ ప్రేమ తోరిస్తెజ్, నెగ్గి పణిజ్ కిదెజ్ వరిజ్ ఉసార్ కిబిన్సుక ఎలాగ ఇజి ఎత్తుకిజినాట్. 25 నెగొండార్ డిసి సీజిని లెకెండె, కూడోజి వాజిని అలవాటు మాటు డిస్తెజ్ ఆవద్. గాని మాటు ఒరెన్ మరి ఒరెన్ వన్నిజ్ మరి ఒదె దయరం కిబిసి మంజినాట్. ఎందనిజ్ ఇహిజు, ప్రబు వాని దినం డగ్గు ఆజినాద్ ఇజి మీరు సుడోజినిదెర్. 26 నిజం నెస్తి వెనుక మరి మరి పాపముకు కిజినాట్ ఇహిజు, అయా పాపముకు సాన్పిస్తెజ్ మరి పూజ సిల్లెద్. 27 గాని మరి మనిక ఇనిక ఇహిజు, దేవుణు సీని తీర్చుదిజ్, వన్నిజ్ పడోకె వరిజ్ నాననం కిని గొప్ప పెరి సిసుదిజ్ ఎద్రు సుడోజినికాదె. 28 మోసె సీతి రూలుజ్ లోజెఇతి ఎయె వన్నిజ్బా, రిఎరో, ముఎరో సాక్కిరు వాండ్రు తప్ప కిత్తాన్ ఇజి వెప్పిజు, కనికారం తొండెనెప్పార్. 29 అహిజు, దేవుణు మరిసిజ్ దూసిస్తి వరిజ్ ఎసా పెరి సిక్కు మనాద్. వరిజ్ దేవుణు వందిజ్ కేట కిత్తి నలదిజ్ పణిదిజ్ రెక లెకెండె సుడోతి వరిజ్ ఎసా పెరి సిక్కు మనాద్. అయా నలనె ఒపుమానం తప్పిస్తాద్. కనికారం తోరోసిని దేవుణు ఆత్మదిజ్ దూసిస్తి వరిజ్ ఎసా పెరి సిక్కు మనాద్ ఇజి ఎత్తు కిదు. 30 ఎందనిజ్ ఇహిజు, “సిక్కు నానె సీన. సిక్కుదిజ్ తగితి వరిజ్, నాను మరజి సీన”, ఇజి వెప్పి వన్నిజ్ మాటు నెసినాట్. మరిబా వెప్పినాన్, “ప్రబునె వన్ని లోకురిజ్ తీర్చు సీనాన్”,* ఇజి. 31 బత్తుజిని దేవుణు కీదు అర్చిక గొప్ప తియెల్ కల్లిన్చి సజతిసె. 32 మీరు క్రీస్తు వందిజ్ తొలిత నెస్తి రోన్సు. ఎసెజ్బా షోన్మాట్. నండె బాదెజ్ వాతిజ్బా, నమ్మకముదాన్ ఎలాగ నిహి మహిదెర్ ఇజి ఎత్తు కిదు. 33 నెగం కాలముదు, మిజి విజెరె ఎద్రు దూసిస్తార్. మిజి డెయ్తార్. మరి నెగం కాలముదు, మీరు, అయాలెకెండె బాదెజ్ ఆతి వరివెట కూడోజి నిహిదెర్. 34 జెలిదు ఆతి వరిజ్ సుడోజ్ మీ పాణం

* 10:16 10:16 యిర్షియా 31:33. * 10:17 10:17 యిర్షియా 31:34. * 10:30 10:30 ద్వితీ 32:35.

నోతాద్. మిజి కల్లిజి మనికెళ్ విజు లాగ్గి ఒతివలెబా నర్లదాన్ ఓరిస్తెదెర్. ఎందనిళ్ ఇహిజ, ఎలాకాలం మనికెళ్, మిజి మన్నె ఇజి నెసినిదెర్. అయొక కల్లితి మహిదని ఇంక మరి ఒదె నెగ్గిక. ³⁵ అందెజె, దయరమ్దాన్ మండ్రు. ఎందనిళ్ ఇహిజ నండో పలితం దోహ్కాద్. ³⁶ మీరు ఓరిసి మండ్రెళ్ వలె. ఎందనిళ్ ఇహిజ, మీరు దేవుణుదిళ్ ఇన్టం ఆతికెళ్ కితి వెనుక, వాండ్రు సీన ఇజి ఒట్టు కితికెళ్ దోహ్కా. ³⁷ ఎందనిళ్ ఇహిజ, దేవుణు మాటదు వెహ్సాని లెకెండ, “సణెం కాలం లోఇ, వాదెళ్ మనికాన్ బేగినె వానాన్. ఆల్సెం ఆఎన్. ³⁸ సీతి నిజాయితి మని నా వారు, నమ్మకమ్దాన్ బత్కినార్. వారు మరజి వెనుక సొహిజ, నాను వరివెలె సరద ఆఎ”,* ఇజి. ³⁹ మాటు, మరజి వెనుక సొన్ని నానం ఆని లోకు ఆఎట్. గాని మజి దేవుణు మున్ను నమకం మనాద్. వాండ్రు మజి రక్కిస్తాన్.

11

¹ నమకం ఇహిజ, మాటు ఆస ఆనిక తవ్వెండ జర్గినాద్ ఇజి పూర్తి నమ్మిజినిక. కణకదాన్ సుడెఱకెళ్ నిజం మన్నె ఇజి పూర్తి నమ్మిజినిక. ² దేవుణు మున్ను నమకం ఇడ్డి లోకుర్ పూర్బమ్మదు మహార్. అందెజె దేవుణు బాణిళ్ అనువె ఆతార్. ³ దేవుణు మాటదానె యా బూలోకం తయార్ ఆత మనాద్ ఇజి నమకమ్దానె మాటు నెసినాట్. ఎందనిళ్ ఇహిజ, మాటు ఏలు సూణికెళ్, సుడెఱకెళ్ వన్నా బాణిళ్ తయార్ కితికెజె. ⁴ నమకమ్దానె, కయసు సీతి దని మున్ను ఏబలు దేవుణుదిళ్ నెగ్గి పూజ సితాన్. వన్ని నమకమ్దానె, సీతి నిజాయితి మనికాన్ ఇజి దేవుణు బాణిళ్ మెపు దోహ్కాద్. ఎందనిళ్ ఇహిజ, వాండ్రు సీతి నందదు దేవుణు సరద ఆతాన్. వాండ్రు సేనదినమ్కాళ్ ముజాలె సాత సొహాన్. అహిజ్బా, వన్ని నమ్మకమ్దాన్ ఏలు బా మజి వర్గిజనాన్. ⁵ నమకమ్దానె, హానోకు సాఎండ దేవుణు మంజిన బాడ్డిఱదు దేవుణు ఒత మనాన్. ఎయెర్బా వన్నిళ్ సుడెఱకెళ్ అట్వెతార్. ఎందనిళ్ ఇహిజ, దేవుణునె వన్నిళ్ ఒత మహాన్. వన్నిళ్ ఒఇ ముజాలె, దేవుణుదిళ్ సరద కితికాన్ ఇజి అనువె ఆతాన్. ⁶ నమకం సిల్లెండ, దేవుణుదిళ్ సరద కితికెళ్ అట్వెట్. ఎందనిళ్ ఇహిజ, వన్ని డగ్గు వానికాన్ ఎయెర్బా దేవుణు మనాన్ ఇజి నమ్మిదెళ్వలె. వన్నిళ్ నిజం రెబాని వరిళ్ వాండ్రు నెగ్గికెళ్ కినాన్ ఇజి నమ్మిదెళ్వలె. ⁷ నమకందానె, నోవ వని ఇండ్రొణి వరిళ్ పెరి గడదాన్ రక్కిస్తెళ్ ఉండ్రె ఓడె తయార్ కిత్తాన్. జర్గిదెళ్ మని నజతిజ వందెళ్ దేవుణు డటం వెహ్సావలె వాండ్రు లోజితాన్. వన్ని నమకమ్దానె, లోకమ్దు మహి, మహి లోకురిళ్ దేవుణు మున్ను నమకం సిల్లెద్ ఇజి వాండ్రు తోరిస్తాన్. అందెజె వారు తపు కిత్తార్ ఇజి దేవుణు తీర్పు కితాండ్రె, నోవెళ్ సీతి నిజాయితి మనికాన్ ఇజి ఇట్టాన్. నోవ నమకమ్దానె సీతి నిజాయితి మనికాన్ ఇజి ఇట్టాన్. ⁸ నమకమ్దానె, అబ్రాహము, ‘సీను సీ ఇల్లు డిసి, నీది ఇజి వెనుక దోహ్కా క్వి బాడిఱదు సొన్అ’, ఇజి దేవుణు వెహ్సావలె, లోజితాండ్రె సొహాన్. ఎంబె సొన్సినాన్ ఇజి తెలిఎండ వాండ్రు సొహాన్. ⁹ నమకమ్దానె, పయువాండ్రు లెకెండ దేవుణు సీన ఇజి ఒట్టు కితి దేనమ్దు బత్కితాన్. వాండ్రు గుడారమ్దు బత్కితాన్. అయాలెకెండ, ఇసాకు ని యాకోబు బా. వరిళ్బా వెనుక అయా ఒట్టునె దేవుణు సితాన్. ¹⁰ అబ్రాహము పయువాండ్రు లెకెండ అబె బత్కితాన్. ఎందనిళ్ ఇహిజ, వాండ్రు ఎలాకాలం నిల్లినె నిజమాతి పునాది మని పట్టుం వందిళ్ ఎద్రు సుడెఱకెళ్ మహాన్. అయా పట్టుం రూపు సీజి తోహ్కాన్ దేవుణు. ¹¹ నమకమ్దానె, అబ్రాహము నండో డొక్ర ఆతిజ్బా, సార గొడ్డు బోదెలి ఆతిజ్బా అప్పొసి ఆతాన్. ఎందనిళ్ ఇహిజ, సీన ఇజి ఒట్టు కితికాన్ నమ్మిదెళ్ తగ్గికాన్ ఇజి ఒడిఱితార్. ¹² అందెజె, సాతిలెకెండ మని యా ఒరెన్ వన్ని బాణిళ్, నండో నండో లోకుర్ ఆతార్. ఆగానమ్దు మని సుకెజి లెకెండ, సమదరమ్ది ఒడ్డుదు మని లెకెడిదెళ్ అట్ఇ ఇన్కు లెకెండ, లోకుర్ ఆతార్. ¹³ యా లోకుర్ విజెరి, సానిదాక వారు నమకమ్దానె బత్కిజి మహార్. దేవుణు సీన ఇజి ఒట్టు కితికెళ్ దోహ్కాతు. వారు నండో ముజాలె వన్నా వందిళ్ ఆనదాన్ ఎద్రు సుడెఱకెళ్ వన్నాళ్ సరద ఆతార్. యా బూమిదు వారు పయువారు ఇజి ఒప్పుకోటార్. ¹⁴ యా లెకెండ వెహ్సా లోకుర్, వరిళ్ సొంత ఉండ్రె దేసెం వందిళ్ ఎద్రు సుడెఱకెణార్ ఇజి టెటాళ్ తోరిసినాద్. ¹⁵ వారు డిసి వాతి దేసెం వందిళ్ ఎత్తు కివెర్. ఎత్తు కిత్తార్ ఇహిజ, మరజి సొండ్రెళ్ అవ్వసరం మహాద్మరి. ¹⁶ గాని వారు, ఇంక నెగ్గి ఉండ్రె దేసెం వందిళ్ కోరితార్. ఇహిజ పరలోకమ్ది దేసెం వందిళ్ కోరితార్. అందెజె, దేవుణు, వరి దేవుణు ఇజి వెహ్ ఆదెళ్ సీగు

* 10:38 10:38 అబ్బుకు 2:3,4.

అవెన్. ఎందనిజ్ ఇహిజ, వాండ్రు వరి వందిజ్ వరలోకమ్దు ఉండ్రీ పట్టుం తయార్ కిత మనాన్. 17 నమకమ్దానె, దేవుణు అబ్రాహముజ్ పరిస కితివలె, వన్ని మరిసి ఇస్సాకుజ్, పూజ లెకెండే సితాన్. దేవుణు అబ్రాహముజ్ నెట్టు సితాన్. గాని వన్ని ఒరెండ్రె ఒరెన్ మరిసిజ్ పూజ లెకెండే సీదెజ్ వాండ్రు తయార్ అతాన్. 18 దేవుణు అబ్రాహముజ్ వెహ్లాన్, “ఇస్సాకు వెటనె నీ తెగ్గదికార్ పుట్టూర్”,* ఇజ 19 సాతి వరిజ్ మరజి బత్కిస్తెజ్ దేవుణు అట్వాన్ ఇజి అబ్రాహము ఒండేబితాన్. యాక సుడేతిజ, అబ్రాహముజ్ సావుదాన్ ఇస్సాకుజ్ మరజి దోహక్తి లెకెండే మనాద్. 20 నమకమ్దానె, ఇస్సాకు, యాకోబుజ్ ని యాసాపుజ్, వరిజ్ వానికాలం వందిజ్ దీవిస్తాన్. 21 నమకమ్దానె, యాకోబు వాండ్రు సాని ముజాలె యోసేపు మరిసిరి రిఎరిజ్ దీవిస్తాన్. వన్ని డుడుదు ఒగ్గితాండ్రె దేవుణుదిజ్ పొగిడేజి మాడిస్తాన్. 22 నమకమ్దానె, యోసేపు సాదెజ్ డగ్గు అతివలె ఇస్సాయేలు లోకురిజ్ అయగుప్పు దేసెమ్దాన్ దేవుణు నడిపిసి తనిదని వందిజ్ వెహ్లాన్. వన్ని డుముక వందిజ్ ఇనిక కిదెజ్ ఇజి ఆడ్ర సితాన్. 23 నమకమ్దానె, మోసె అయిసి అప్సొసిర్, వాండ్రు పుట్టి మూండ్రీ నెలెజ్ డాప్పి ఇట్టార్. ఎందనిజ్ ఇహిజ, వాండ్రు నెగ్గి ఒరెన్ కోడోః ఇజి వారు నెస్తార్. రాజు సీతి ఆడ్రదిజ్ తప్తెజ్ వారు తియెల్ అవతార్. 24 నమకమ్దానె, మోసె, వాండ్రు పిరితి వలె వరో గాల్పి మరిసి ఇజి కూకె ఆదెజ్ కెవతాన్. 25 వాండ్రు, పాపం తప్పిస్తె సణెం మంజిని సర్దదు మంజిని దని ముస్సు, దేవుణు లోకుర్ వెట బాద ఆదెజ్ కోరితాన్. 26 అయగుప్పు దేసెమ్ది ఆస్తి ముస్సు, క్రీస్తు వందిజ్ బాదెజ్ అనికాదె విలువ మనిక ఇజి వాండ్రు ఒండేబితాన్. ఎందనిజ్ ఇహిజ, వాని కాలమ్దు దేవుణు వన్నిజ్ కిని నెగ్గి దని వందిజ్ వాండ్రు ఎద్రు సుడేతాన్. 27 నమకమ్దానె, మోసె, రాజు కోపమదిజ్ తియెల్ అవిండ, అయగుప్పు దేసెం డిస్తాన్. వాండ్రు మరజి వాదెజ్ కెవతాన్. ఎందనిజ్ ఇహిజ, వాండ్రు తోరెణ దేవుణుదిజ్ సుడేతి లెకెండే మనాద్.

28 నమకమ్దానె, మోసె, ఇస్సాయేలు లోకురిజ్ పులాజ్ అజ రోటెజ్ తయార్ కిని పండోయి కిదెజ్ ఇజి ఆడ్ర సితాన్. వరి తోలిత పుట్టి కోడోఃరిజ్, సప్పి దూత నవేండ మండ్రెజ్, వరి దార్బందరమ్దు నల సీల్కరిస్తెజ్ ఇజి ఆడ్ర సితాన్. 29 నమకమ్దానె, ఇస్సాయేలు లోకుర్ ఎర్రజ్ సమదరమ్దాన్ వహ్తి బూమిదు నడిసి లెకెండే నడిసి సాహార్. అయగుప్పు దేసెమ్దికార్ అయాలెకెండే కిదెజ్ సుడేతి వలె వారు ముడుఃగితార్. 30 నమకమ్దానె, ఇస్సాయేలు లోకుర్ ఏడు రోస్సు, యెరికో పట్టుం సుటులం బూలాతివలె, పట్టుమది గోడేజ్ అద్దె. 31 నమకమ్దానె, సాని బూలాని రాహబు, దేవుణుదిజ్ లోజిఇ దని పట్టుమది వరివెట సావతాద్. ఎందనిజ్ ఇహిజ, దేసెమ్దిజ్ గుటు లాగ్దెజ్ వాతి వరిజ్ అది డగ్గు కితాద్. 32 నాను మరిబా వెహ్లాజా? గిదియెను, బరాకు, సంసాను, యెష్ట, దావీదు, సముయేలు, ప్రవక్తరు నిని వరి వందిజ్ వెహ్లాజ్ నజీ సమయం సాల్ఎద్. 33 నమకమ్దానె, వారు దేసెమ్కాజ్ ముస్సు విద్దెం కిజి గెలస్తార్. వారు సీతి నిజాయితికెజ్ కితారె, దేవుణు ఒట్టు కితికెజ్ దోహక్తె. వారు నోరెస్సు వెయ్యు మూక్తార్. 34 నండో కన్సి సిసుదిజ్ నస్తార్. కూర్జెజిజ్ సాఎండ తప్తె అతార్. వారు సత్తుసిలికార్ గాని సత్తు మనికార్ అతార్. వారు విదెమ్దు సత్తు మనికార్ అతార్ పయ సయెనమ్ది వరిజ్ ఉలుస్తార్. 35 సెగ్గొడెక్ బోదెకాజ్, వరి సాంతది వరిజ్ సావుదాన్ మరజి దోహక్తె. మహికార్ నండో బాదెజ్ అతిజ్బా, వారు దేవుణు ముస్సు, మని నమకం డిసి, డిబె అని దని ముస్సు, సానిక నెగెద్ ఇజి సుడేతాన్. ఎందనిజ్ ఇహిజ, వారు మరజి నిజ్ ని వలె నెగ్గి బత్తు దోహక్తె. 36 సెగ్గొడార్ దూసె అతార్. కోరడేజిజ్ డెయెవ అతార్. మరి సెగ్గొడార్ తోహ అతారె, జెలిదు ఇడ్డెః అతార్. 37 వారు పణకాణిజ్ డెయెవ అతార్. రంపవకాణిజ్ రుండి ముకెజ్ కాయె అతార్. కుర్జెజిజ్ సపె అతార్. సెగ్గొడార్ మెండ గొరెదినో, ఏలెటు గొరెదినో తోలు పొరెవె అజి, బజ అజి, బాదెజ్ అజి, దూసె అజి బూలాతార్. 38 యా నెగ్గి లోకుర్ మండ్రెజ్, యా లోకం తగ్గెద్. వారు బీడిఃమ్ బూమిజ, గొరొకాజ్ బూలాతార్. సాలమ్క లోజ, బూమిదు మని బోరోజ డాజిజ్. 39 వారు నమకం ఇట్టార్. అందెజె, నెగ్గికార్ ఇజి దేవుణు బాణిజ్ మెపు దోహక్తాద్. గాని వరి లోజ ఎయెరిజ్బా, దేవుణు సీన ఇజి ఒట్టు కితికెజ్ దోహక్తు. 40 ఎందనిజ్ ఇహిజ, దేవుణు మా వందిజ్ ఇంక నెగ్గిక ఏరెపాటు కిత మనాన్. మా వెటనె, వరిజ్ పూర్తి కిదెజ్ ఇజి వన్ని ఉదెసం.

* 11:18 11:18 అది 21:12.

12

దేవుణు వన్ని కొడొరిజ్ దిదిజి సిక్స సీజినాన్

1 అందెజె, మా సుటులం సేన సాక్సీరు మనార్. అందెజె, అడు కిజిని సజతిజ డిసి, మజీ సిక్కుజ అర్వీసీని పాపం డిసి, దేవుణు మా ఎద్దు ఇడ్డి బత్తు. ఇని ఉవ్వాక్కి పోటీదు ఓరిసినె ఉవ్వాక్కి. 2 మా గురి యేసు దరోటెనె ఇడొజి ఉవ్వాక్కి. వాండ్రె మా సమకం మొదొల్స్తాన్. పూర్తి కినికాన్. వాండ్రు సిలువాదు సిగు మని సాపు సాదెజ్ తయార్ ఆతాన్. ఎందనిజ్ ఇహిజ, వెనుక వన్నిజ్ మంజిని సర్ద వాండ్రు నెస్నాన్. ఏలు పరలోకమదు దేవుణు సిమసనం ఉణెర్ పడకాదు గొప్పు మర్నాద్దాన్ బస్త మనాన్. 3 పాపం కినికార్ కితి నండొ బాదెజ్ వాండ్రు ఓరిస్తాకెజ్ ఎత్తు కిదు. అందెజె, మీరు మన్ను విస్సిఎండ, డిసిసిఎండ మండ్రెజ్, వన్నిజ్ ఎత్తు కిదు. 4 పాపం వెట కాట్లాడొజినిక నల సీని నసా ఏలుదాక మీరు ఎద్రిసిఇతిదెర్. 5 దేవుణు వన్ని కొడొరి లెకెండ మిజి ఉసార్ కిబిస్సి మాట మీరు పొస్తాదెరా? “నా కొడొ, ప్రబు నిజి దిదిని వలె మన్ను బాద కిమాట్. వాండ్రు డటం వెస్సి వలె మీ మన్ను విస్సిమాట్. 6 ఎందనిజ్ ఇహిజ, ప్రబు వాండ్రు ప్రేమిసిని వరిజ్ దిదినాన్. వన్ని మరిన్ ఇజి డగ్గు కిని వన్నిజ్ దిదినాన్”, ఇజి వెస్సినాన్. 7 ఒరెన్ అప్పాసి దిదిని వజ, మీ స్రెమెజ్ ఓరిస్తు. ఎందనిజ్ ఇహిజ, మీ స్రెమెజ్, దేవుణు మిజి వన్ని కొడొరి లెకెండ సుడొజినాన్ ఇజి తొరిన్సి. అప్పాసి దిదిని మరిసి ఎయెన్బా మనాండ్రా? 8 వన్ని మరిసిర్ విజెరిజ్ దిజినిలెకెండ, మిజి దిదిఎండ మహిజ, మీరు వన్ని నిజమాతి కొడొరి ఆవెర్. గాని ఆజ కొడొరి ఇజినె అర్లం. 9 మజి విజెరిజ్ కాస్తి అప్పాసిర్ మహార్. వారు మజి దిదిజి మహార్. మాటు వరిజ్ గవరం సీజి మహార్. అహిజ, మా అయా లోకమది బుబ్బు ఆతికాన్దిదినివలె, ఎసా లాపు వన్నిజ్లోజిజి మాటు ఎలాకాలం బత్తిదెజ్? 10 మా బుబ్బర్, సెగం కాలం మజి దిదితార్. ఎందనిజ్ ఇహిజ అయాక నెగెద ఇజి వారు ఒడొబితార్. గాని, మా నెగెదనివందిజ్ దేవుణు మజి దిదిజినాన్. ఎందనిజ్ ఇహిజ, మాటు వన్నిలెకెండ పరిసుదమక మండ్రెజ్. 11 మజి దిదినివలె, అయాక సర్ద కిబిస్ఎద్, దుకం కిబిస్నాద్. గాని అయాలెకెండ దిదిజి సిక్స లాగె ఆజి నెగె సరిదు వాతికార్, వెనుక నీతి నిజాయితిదాన్ కిజి, సమాదనందాన్ మంజినార్. 12 అందెజె, డిష్టి* మీ కికు పెర్దు. వణక్కిని ముణుకుజ్ సత్తు కిబిస్సు†. 13 “మీ కాల్యాజ్ తినాజ్ సరి తయార్ కిదు”*. సొట కాల్యు బెణ్ఎండ, సత్తు ఆని వందిజ్ తినాజ్ సరి తయార్ కిదు.

దేవుణుదిజ్ నెక్కి పొక్మాట్

14 విజెరి వెట సమాదనమదాన్ కూడొజి పాడొజి మండ్రెజ్ సుడొదు. పాపం కిజ, దేవుణు వందిజ్ కేట ఆతి బత్తు, బత్తిదెజ్ సుడొదు. ఎందనిజ్ ఇహిజ, అయాలెకెండ బత్తిఇకాన్, ప్రబుజ్ సుడొవెన్. 15 ఎయెన్బా దేవుణు బాణిజ్ వాజిని వన్ని దయా దర్తుం తప్పి సాన్ఎండ జాగర్ల సుడొదెజ్. ఉండ్రీ సేందు మొక్కు పిరిసి దని సేందు నండొండారిజ్ బాద కినిలెకెండ, ఎయెన్బా ఆవండ జాగర్ల సుడొదెజ్. 16 సాపు లెకెండ సాని బూలాజనొ, దేవుణు వందిజ్ బక్తి సిల్లెండనొ, ఎయెన్బా మన్ఎండ జాగర్ల సుడొదెజ్. వాండ్రు ఉండ్రీ పుటా తిండి వందిజ్, వన్ని పెరి మరిసి ఇని అక్కు పొర్తాన్. 17 మీరు నెసిని లెకెండ, వెనుక వన్ని అప్పాసి. సీని దీవెనమకు వాండ్రు కోరితివలె, వాండ్రు నెక్కి పొకె ఆతాన్. ఎందనిజ్ ఇహిజ, వాండ్రు కితిక మారిస్టెజ్ వాండ్రు అట్ఎతాన్. వాండ్రు నండొ అడొబాజి దీవెనమకు లొస్తిజిబా దొవ్కతె. 18 మీరు, ఇస్రాయిలు లోకుర్ సినాయి గొరోణ్ డగ్గు వాతి లెకెండ రెజతిదెర్. ముట్టి నెస్టెజ్ ఆని, సిసు కసిసి, గొప్పు సీకట్మని, తుపాన్ మని గొరోన్ డగ్గు రెజతిదెర్. 19 వారు, జోడుబాకెజ్ ఉవ్వాక్కి పెరి జాటు, వర్గిని జాటు వెహర్. అయాక వెహివలె, మరి వరివెట వర్గిమా ఇజి దేవుణుదిజ్ బతిమాల్తార్. 20 ఎందనిజ్ ఇహిజ, “ఉండ్రీ జంతు ఆతిజిబా, గొరోతు మట్టిజ, దనిజ్ వణకాణిజ్ డొయిజి సస్తెజ్”*, ఇజి దేవుణు వెస్తా ఆడ్ర ఓరిస్టెజ్ అట్ఎతార్. 21 అబ్బె తొరి ఆతిక, గొప్పు తియెల్ కల్లిస్సిక. అందెజె మోని వెప్తాన్, “నాను గొప్పు తియెల్ అజి వణకసిన”, ఇజి. నని గొరోన్ డగ్గు ఆవిద్ మీరు వాతిదెర్. 22 గాని మీరు, సియెను గొరోత్నె వాతి మనిదెర్. బత్తిజిని దేవుణు

* 12:6 12:6 సామెత 3:11-12. * 12:12 12:12 దిని అర్లం ఇనిక ఇహిజ, క్షమ్మకు వాని వలె మీరు మనుసు విస్సిఎండ దయరమదాన్ నిల్దు ఇజినె. † 12:12 12:12 స్రమెజ్ వాని వలె, మన్ను విస్సిఎండ దయరమదాన్ నిల్వి మండ్రు ఇజినె అర్దం. * 12:13 12:13 సామెత 4:26. ‡ 12:17 12:17 మరి ఉండ్రీ రకం వెస్తాజ, వాండ్రు కిత్తి తప్పి ఒప్పుకొడెజ్ వన్నిజ్ అట్ఎండ ఆతాద్ ఇజి. * 12:20 12:20 నిర్గమ 19:12,13.

మంజిని పట్టుమీదునె వాతి మనిదెర్. ఇహిజ, పరలోకమీది యెరూసలెమీదునె వాతి మనిదెర్. సేన దూతార్ సర్దదాన్ కూడితి మని బానె, వాతి మనిదెర్. ²³ దేవుణు తొలిత కొడోకర్, కూడితి మని బానె వాతి మనిదెర్. వరి పేర్కు పరలోకమీదు రాస్తె ఇడ్తె మన్నె. మీరు దేవుణు డగ్గునె వాతి మనిదెర్. వాండ్రె విజెరిజ్ తీర్పు సీనికాన్. పరలోకమీదు మని నీతి నిజాయితి మని వరి పాణమక, డగ్గునె వాతిమనిదెర్. వారు పూర్తి కిబె ఆతికార్. ²⁴ మీరు యేసు డగ్గునె వాతి మనిదెర్. వాండ్రె, అయా కొత్త బవుమానం నడిపిస్సికాన్. మీరు, సీల్కరెనె ఆతి నల డగ్గు వాతి మనిదెర్. ఏబేలు నల వెప్పొని దన్నిమున్ను నెగ్గి మాట వెప్పొని నల డగ్గు వాతి మనిదెర్. ²⁵ అందెజె, మీ వెట వర్గిజిని దేవుణుదిజ్ జాగర్త వెండ్రు. యా లోకమీదు, దేవుణు డటం వెప్తావలె వెండ్రెజ్ కెతి ఇస్తాయేలు లోకుర్, దేవుణు సీని తీర్పుదాన్ తప్తె ఆదెజ్ అట్వెతార్ ఇహిజ, పరలోకమీదాన్ డటం వర్గిజిని వన్నిజ్ నెక్తి పొక్తిజ, మాటు సిక్కుదాన్ తప్తె ఆదెజ్ అట్టాట? ²⁶ దేవుణు, సీనాయి గొరొత్దాన్ వర్గితివలె, బూమి కర్ణితాద్. గాని ఏలు వాండ్రు ఒట్టు కిత మనాన్. “మరి ఉండ్రీ సుటుబా, నాను బూమిదిజ్నె ఆవండ, అగాసమీదిజ్ బా కద్లిన్నుత”^{*} ఇజి. ²⁷ ‘మరి ఉండ్రీ సుటుబా’, ఇని మాటదిజ్, కర్ణినికెజ్ మారిన్ను ఇజినె అర్దం. ఇహిజ, తయార్ కితికెజ్ కర్ణిజి మారె ఆనె ఇజి. ఎందనిజ్ ఇహిజ, కద్లినికెజ్ ఎలాకాలం మండ్రెజ్. ²⁸ అందెజె దేవుణు ఏలుబడి ఎసెజ్ బా కద్లివిద్. అందెజె^{*} దేవుణుదిజ్ వందనం వెప్పొ తియెల్ దాన్ గవర్మదాన్, వాండ్రు నరద ఆని వజ మాడిసెన్టాట్. ²⁹ ఎందనిజ్ ఇహిజ, “మా దేవుణు సుర్పి సేసు ననికాండ్రె.

13

దేవుణుదిజ్ ఎలాగ నరద కిబిస్సెజ్

¹ క్రీస్తు వెట కూడితి మని తంబెరిబు ఇజి, ఒరెన్ మరి ఒరెన్ వన్నిజ్ ప్రేమినిసె మండ్రు. ² నెన్ ఇ వరిజ్ డగ్గు కిదెజ్ పోన్మాట్. యా లెకెండ డగ్గు కిజి, నెగొండార్, నెన్ ఎండనె దూతారిజ్ డగ్గు కిత్తార్. ³ జెలిదు మని వరిజ్ ఎత్తు కిదు. మీరు వరి వెట బాన్ మహివజ ఎత్తుకిదు. బాద ఆని వరిజ్ ఎత్తు కిదు. మీరు వరి లెకెండ బాద ఆజి మహివజ వరిజ్ ఎత్తు కిదు. ⁴ పెండ్రెదిజ్ విజెరి గవర్మం సిదెజ్ వలె. ఆల్ని మాసీర్ రిఎర్ బా, ఒరెన్ మరి ఒరెన్ వన్నిజ్ నమ్మిదెజ్ తగ్గు వరిలెకెండ మండ్రెజ్ వలె, సాని బూలాని వరిజ్, రంకు బూలాని వరిజ్ దేవుణు తవ్వెండ సిక్కు సీనాన్. ⁵ డబ్బుదిజ్ ఆస అమాట్. మిజి కల్లితి మనిదనితాన్ నరద ఆదు. ఎందనిజ్ ఇహిజ, దేవుణు వెప్తా మనాన్, “నాను ఎసెజ్ బా మిజి డిఃనె, నాను ఎసెజ్ బా మిజి నెక్తి పొక్వె”,^{*} ఇజి. ⁶ అందెజె దయర్మదాన్ వెప్తాజ్ అట్టాట్, “ప్రబునె నజి తోడుః. నాను తియెల్ ఆవె. లోకు నజి ఇని కిదెజ్ అట్వెర్”^{*}. ⁷ దేవుణు మాట మిజి వెప్పొ, మిజి నడిపిసెని వరిజ్ ఎత్తు కిదు. వరి బత్తుదాన్ వాతి విజా నెగ్గి దని వందిజ్ ఎత్తు కిదు. వారు నమ్మిత్తి లెకెండ నమ్మిదు. ⁸ యేసు క్రీస్తు ఇవెన్, నేండ్రు, ఎలాకాలం ఉండ్రె లెకెండ మంజినాన్. ⁹ విజు రకమ్కాణి నెన్ ఇ బోదెజ వెట సొన్మాట్. దేవుణు దయా దర్మమీదాన్ మా మన్ను సత్తు ఆనికాదె నెగెద్. తిండి వందెజ్ మని రూలుజ లోజిజి ఆవిద్. అయాకెజ్ లోజితి వరిజ్ ఇని లాబమ్ బా రెవిద్. ¹⁰ మజి ఉండ్రీ పూజ సీని మాలి పీట మనాద్. దని బాణిజ్, గుడారమీదు సేవ కిజిని పుజెరిజ తిండ్రెజ్ అక్కు సెల్లెద్. ¹¹ యూదురి రూలు వజ, విజు పుజెరిజ మున్ను. మని పెరి పుజెరి పాపం వందిజ్ పూజ లెకెండ జంతుజ నల దేవుణు వందిజ్ ఒద్దె కేట ఆతి గదిదు తనాన్. గాని కండ పట్టుం వెల్లి సుర్వార్. ¹² అందెజె, యేసుబా పట్టుమీది వెల్గు వెల్లి బాద ఆతండ్రె సాతాన్. వన్ని సొంత నల వాక్కి వన్ని లోకురిజ్ పాపం సీలివరి లెకెండ కిదెజ్ వాండ్రు పట్టుమీది వెల్గు వెల్లి బాద ఆతండ్రె సాతాన్. ¹³ అందెజె మాటు పట్టుం వెల్గు వెల్లి వన్ని డగ్గు సొన్ని వాండ్రు లాగి ఆతి సిగుదు వన్నివెట కూడ్తాట్. ¹⁴ ఎందనిజ్ ఇహిజ యా బూమిదు మజి ఎలాకాలం మని ఉండ్రీ పట్టుం సిల్లెద్. వాదెజ్ మని పట్టుం వందిజ్ మాటు ఎర్దు సుడెజినాట్. ¹⁵ అందెజె, యేసు పేరుదాన్, పూజ లెకెండ దేవుణుదిజ్ ఎస్తివలెబా పొగిడిజినాట్. ఇహిజ, వాండ్రు ప్రబు ఇజి మా వెయ్ దాన్ ఒప్పుకొడిజిని పూజ సీనాట్. ¹⁶ మహి వరి వందెజ్ నెగ్గికెజ్ కిదెజ్, వరిజ్ సాయం కిదెజ్ పొన్మాట్. ఎందనిజ్ ఇహిజ, నిని

^{*} 12:26 12:26 అగ్గయి 2:6. ^{*} 12:28 12:28 ద్విత్తి 4:24. ^{*} 13:5 13:5 ద్విత్తి 31:6. ^{*} 13:6 13:6 కీర్తన 118:6-7.

పూజెజ దేవుణు సర్ద ఆనాన్. 17 మీ అతికారిజ మాటెజ్ వెండ్రు. వరి అతికారమ్దిజ్ లోజీదు, వారు మిజి జాగర్త సూణార్. ఎందనిజ్ ఇహిజ వరి పణిదిజ్ దేవుణుదిజ్ లెక్క ఒవజెప్పెజ్ ఇజి వారు నెస్సార్. మీరు వరిజ్ లోజితిజ, వారు సర్దదాన్ వరి పణిజ్ కినార్. సిలిజ వారు దుకమ్దాన్ కినార్. అయాకెజ్ మిజి నెగికెజ్, సిఉ. 18 మా వందిజ్ పార్దనం కిదు. మా గర్బం మజి గదిన్ఎండ మన ఇజి మాపు పూర్తి నమ్మిజినావ్. మాపు కిజిని దని లోఇ నెగ్గెండ విజు కిదెజ్ కోరిజినావ్. 19 దేవుణు బేగినె నజి మీ డగ్గు మర్జి తలెజ్ మీరు మరి లాపు పార్దనం కిదెజ్ ఇజి నాను ముకెలం బతిమాల్లిన.

20-21 దేవుణు మా ప్రబు అతి యేసుజ్ సావుదాన్ నిక్తాన్. వాండ్రె గొరెజ పెరి గవుడుఎన్. ఎందనిజ్ ఇహిజ, వాండ్రు వన్ని నల వాక్తాండ్రె సాతాన్. వన్ని నలదాన్ వాండ్రు ఎలాకాలం వందిజ్ ఒపుమానం ముద్ర కిత్తాన్. లోకురిజ్ సమాదనం సీని దేవుణు, వన్నిజ్ ఇన్దం అతికెజ్ కిదెజ్, మిజి నెగికెజ్ వాదెజ్ సాయం కిపిన్. యేసు క్రిస్తు సత్తుదాన్, వన్నిజ్ ఇన్దం అతికెజ్ విజు మా లోఇ కిపిన్. వన్నిజ్ ఎల్లకాలం గవరం మనిద్. ఆమెన్. 22 తంబెరిజాండె, నాను మిజి ఉండి ఇజి ఉత్తమ్నె రాస్ట మన. అందెజె, నాను పణిస్తి మాటెజ్ జాగర్త వెండ్రు ఇజి ఉసార్ కిబిన్సు. 23 మా తంబెరి అతి తిమోతి జెలిదాన్ డిబె అతాన్ ఇజి మీరు నెస్టెజ్ ఇజి నాను కోరిజిన. వాండ్రు ఇబ్బె బేగి వాతిజ, మిజి సుండెదెజ్ వన్నిజ్బా నా వెట తన. 24 మిజి నడిపిసిని విజెరిజ్, దేవుణు లోకుర్ విజెరిజ్ నాను వెన్బాతి లెకెండ వెప్టు. ఇటలిదు మని నమ్మిత్తికార్ మిజి వెన్బాతి లెకెండ వెప్పినార్. 25 దేవుణు దయా దర్తం మీ విజిదెరె వెట మనీద్.

యాకోబు రాస్తే ఉత్త్రం

నెల్లొకిబిసినిక

యా ఉత్త్రం రాస్తే యాకోబు ప్రబు ఆతి యేసుజ్ తంబెర్సి ఆతికాన్. యాకోబు యెరుసలేమ్దు మన్ని సజమ్ది వెద్దెలిజ లోఇ ఒరెన్. యాక రాస్తే కాలం రమారమి క్రీస్తు సకం 45 దాన్ 50 నడిమి కాలమ్దు రాస్త మనాన్. యా ఉత్త్రమ్దు ముకెలమాతిక నమకమ్దిజ్ రుజుప్ కినికాదె. నమకం నిజమాతికదొ ఆవీదో ఇజ ఎలాగ నెస్టెజ్ ఇజ రాస్త మనాన్.

1 దేవుణుదిజ్ని, ప్రబు ఆతి యేసు క్రీస్తుజ్, సేవకినికానాతి యాకోబు, ఆజ దేసెమ్కాజ్ సెద్రితి మని దేవుణు లోకాజ్ విజేరిజ్ రాసిని ఉత్త్రం. మిజి విజేరిజ్ వందనమ్కు.

మాలెజ్ వానివలె అక్కెజ్ ఒరిస్టెజ్వలె

2-3 నాను ప్రేమిసిని తంబెరిజుండె, నండో మాలెజ్ వానివలె మీరు సర్దదాన్ మండ్రు. ఎందనిజ్ ఇహిజ, మాలెజ్ వానివలె యేసుప్రబు ముస్సు. మన్ని నమకం డిసెంండ మహిజ, మాలెజ్ బిరిస్టెజ్ మిజి సత్తు మనాద్ ఇజ దినివలెహాన్ రుజుప్ వానాద్. 4 మీరు కిజిని పణిదు డిసెంండ ఒరిసి మండ్రు. అయాలెకెండ్ కితిజ మీరు కష్టం బరిస్సిదన్ని లోఇ పూర్తి ఆతికిదెర్ ఆనిదెర్. అయాలె మి గుణమ్దు ఇనికబా తక్కు సిల్లెండ మంజినిదెర్. 5 మీ లోఇ ఎయెజ్బా గెణం తక్కు మహిజ, వాండ్రు దేవుణుదిజ్ లొస్టెజ్. దేవుణు వన్నిజ్ సీనాన్. ఎందానిజ్ లొసినార్ ఇజ కోపం ఆవిండ దేవుణు విజేరిజ్ తక్కు సిల్లెండ సీనాన్. 6 గాని, వాండ్రు కండెక్బా అనుమానం సిల్లెండ నమకమ్దాన్ దేవుణుదిజ్ లొస్టెజ్. ఎందానిజ్ ఇహిజ అనుమానం ఆనికాన్ గాలిదాన్ ఎగ్రిని నమ్దరమ్ది ఉల్కాలెకెండ్ తూల్లి అర్పి జోజ్జీవజ ఆనాన్. 7-8 అనుమానం ఆనికాన్ దేవుణు బాణిజ్ ఇనికబా దోహక్కాద్ను ఇజ ఒడెబినిక ఆవెద్. అనుమానం ఆనికాన్ రుండి మన్సుజ్ ఆజ ఇనిదన్ని లోఇబా స్తిరం సిల్లికాన్. 9 దేవుణుదిజ్ నమ్మితి బీదవాండ్రు, దేవుణు వన్నిజ్ పెరికాన్ కిత్తిజ్ సర్ద ఆజి మండ్రెజ్. 10 అయావజనె ఆస్తి మనికాన్, వన్నిజ్ కల్గెతిక తక్కు ఆజి ఇజరికానాతిజ్బా సర్ద ఆజి మండ్రెజ్. ఎందానిజ్ ఇహిజ ఉండ్రె గడ్డి పూజు వెటనె రాల్లివజ, ఆస్తి మనికాన్ ఆహె ఆన సొనాన్ ఇజి వాండ్రు నెస్సాన్. 11 పొద్దు సొసి నండో ఎండ కిత్తిజ గడ్డి వన్నా సొనాద్, పూజు రాల్లు సొనాద్. అయ పూజు సొకు విజి పాడాస సొనాద్. అయావజనె గణెస్టెజ్ కిని పణిలోఇ ఆస్తి మన్నికాన్ సిల్లెండ ఆనాన్. 12 మాలెజ్ వానివలె దేవుణు ముస్సు. నమకం డిసెంండ అక్కెజ్ బరిస్సికాన్ సర్ద ఆనాన్. మాలెజ్ విజి బిరిస్తి వెనుక దేవుణుజ్ ప్రేమిస్తివరిజ్ సీనా ఇజ ఒట్టు కిత్తి ఎలాకాలం బత్తిని బత్తు ఇని ఇనాయం దేవుణు సీనాన్.

13 తప్పుపణి కిదెజ్ మన్నుద్ వాతివెలె, అక్క దేవుణు సిత్తిక ఇజి ఎయెంబా వెప్పిక ఆవెద్. ఎందానిజ్ ఇహిజ సెజ దన్నిదటాన్ దేవుణు తప్పుపణి కిబిస్టెజ్ అట్వెన్. తప్పుపణి కిబిస్టెజ్ దేవుణు ఎయెరి మన్నుదుబా ఆన పుటిన్వెన్. 14 గాని ఒరెన్ ఒరెన్ వన్ని సొంత మన్నుదాన్ మన్ని ఆసదాన్ మరెజ లాగ ఆజి సెజ పణి కిజినాన్. 15 తప్పుకిదెజ్ మన్ని ఆన ఎలాగ ఇహిజ అయలికొడె పొటాద్ పిండెం ఆతిలెకెండ్ అయక పిరితివలె ఏరు ఈబాజినాద్. అయాలెకెండ్ ఒరెన్ మన్నుదు సెజ ఆన నండో ఆజి పాపం పుట్నాద్. పాపం ముద్రితిజ వన్నిజ్ సాపు వాజినాద్.

16 నాను ప్రేమిని తంబెరిజుండె, ఎయెర్బా మిజి మోసం కివిండ నుండెదు. 17 నెగ్గెకెజ్ విజు, కల్లిసిల్లికెజ్ విజు దేవుణు సీని ఇనాయమ్కునె. ఆగనమ్దు మన్ని జాయ్ విజు పుటిస్తి దేవుణుబాణిజ్ నెగ్గెకెజ్ విజు వాజినె. జాయ్ సొన్ని నీడె వానాద్. గాని దేవుణు మారెకాన్. 18 నిజమాతి వన్ని మాటదాన్ వాండ్రు తీర్తనం కిత్తిలెండ దేవుణు మజి కొత్త బత్తు సిత్తాన్. ఎందానిజ్ ఇహిజ పుటిస్తి విజు వనకముస్సు. దేవుణు మజి వన్ని వందిజ్ ఎగ్రిని ఇట్టాన్.

దేవుణు మాట వెంజి అయ మాటవజ నడిదెజ్వలె

19 నాను ప్రేమిసిని తంబెరుజాండె, యాక నెగ్గెండ వెండ్రు. ఒరెన్ ఒరెన్ బాగ వెంజె, వెహి వెటనె వర్గివెండ, వెహి వెటనె కోపం ఆవిండ మండ్రెజ్. 20 ఒరెన్ కోపం ఆతిజ దేవుణుదిజ్ ఇస్టమాతివజ

నీతినిజయిద్దాన్ పణి కిదెజ్ అట్ ఏన్. ²¹ అందెజె మన్సుద్ నిండ్రీతి సెకెజ్ విజు డిసిసీజి, పిరిజివాని సెక అలవాటుజ్ విజు డిసిసీజి, మిజీనే తగిసి దేవుణు మీ మన్సుదు ఇట్టి మాటెజు లోజీదు. దేవుణు మీ మన్సుదు ఇట్టి ఆ మాటెజులోఱ, మిజి గెల్పిస్తెజ్ సత్తు మన్నె.

²² మీరు దేవుణు మాటెజ్ వెండ్రెజె ఆవెద. దేవుణు మాట వెంజి అయ మాట పజ నడిదెజ్ బావలె. దేవుణు మాటెజ్ వెంజి అయవజనె నడివెండ మహిజు మిజీ మీరి మొసెం కిజినిదెర్. ²³ దేవుణు మాట వెంజి అయావజ నడికెకాన్ అద్దమదు వన్ని మొకొం సుడెతి వన్నిలెకెండు మనాన్. ²⁴ వాండ్రు అద్దమదు సుడెజి మర్జి సొహి వెటనె వన్ని మొకొం, ఎలాగ మర్జికో ఇజి పోసినాన్. ²⁵ దేవుణు వెప్తి పూర్తి ఆతి రూలుజ్ లోకాజ్ పాపమదాన్ డిసిస్సాద్ లె. ఒరెన్ లోకు దేవుణు వెప్తి అయ మాటెజ్ విజు నెగ్రెండ నదవీజి బాన్ మనికెజ్ పోసివెండ అయావజనె వన్ని బత్తుదు నడికెజి, వాండ్రు కిని విజు పణిజులోఱ దేవుణు వన్నిజ్ దివిస్సాన్.

²⁶ ఎయెన్ బా, నజి దేవుణు మున్సు నండో బక్తి మనాద్ ఇజి వెప్సి వెనుక, వన్ని నాలిక అడ్డు సిల్లెండ వర్గితిజు వన్నిజ్ మన్నిబక్తి విలువ సిల్లికాద్. వన్నిజ్ వాండ్రె మొసెం కిబె ఆజినాన్. ²⁷ మా బుబ్బాతి దేవుణు సుడెతిజు నిజమాతి బక్తి ఇనిక ఇహిజు, యాయ బుబ్బార్ సిల్లి కొడెరిజ్, ముండ మణిసి ఆతి అయెలికొడెకాజ్ వరి కష్టమదు సాయం కిదెజ్, దేవుణుదిజ్ పడికె పనకలోఱ కూడెవెండ మండ్రెజ్ ఇకాదె నిజమాతి బక్తి.

2

విజేరిజ్ ఉండ్రెలెకెండు సుడెదెజ్ వలె

¹ నాను ప్రేమిసిని తంబెరిజుండె, గొప్పు జాయ్ దాన్ నిండ్రీతి సొకు మన్ని ప్రబువాతి యేసుక్రీస్తుజ్ నమ్మిత్తి మీరు, లోకాజ్ నడిమి తేడ తోరిస్సాట్. ²⁻⁴ ఎలాగ ఇహిజు బజారం బొందు ఇట్ కిజి, నండో దరది సొక్కెజ్ పొర్పాజి ఒరెన్, మరి ఒరెన్ బీదవాండ్రు, మీరు పార్లనం కినిబాన్ యా రిపర్ వాతార్ ఇహిజు, నెగ్గి సొక్క పొర్పాజి వాతివన్నిజ్ మర్యాద సీజి అయ బీదవన్నివెట, “నీను అబ్బె నిల్ అ, సిల్లిజు నా కాల్యు డగ్రు ఇబ్బె అడిగి బస్ అ”, ఇజి వెప్తిజు, మీరు బీదవన్నిజ్ ఆస్తిమన్ని వన్నిజ్ ఎర్లిస్తిలెకెండు మంజినాద్. ఈహు మీరు మీ మన్సుదు మన్ని సెక ఉదెనమదాన్ లోకాజ్ తీర్పు కిజినిదెర్. ⁵ నాను ప్రేమిసిని తంబెరిజుండె, మీరు నెగ్రెండ వెండ్రు. యా లోకమది బీదవారు దేవుణు మున్సు ఇడ్డి నమకం వందిజ్ ఆస్తి మన్నికారాదెజ్ దేవుణు వరిజ్ ఏర్పాటు కిత్తాన్. దేవుణుదిజ్ ప్రేమిసిని వరిజ్ సీనా ఇజి ఒట్టు కిత్తి దేవుణు రాజ్యం దేవుణు వరిజ్ సీనాన్. ⁶ గాని మీరు బీదవరిజ్ సిగు కిజినిదెర్. మిజి మాలెజ్ కినికార్ ఆస్తిమన్నికారె గదె. మిజి కోర్టుదు లాగిజి ఒనికార్ వారి గదె. ⁷ మీరు అసిని యేసుక్రీస్తు నెగ్గి పేరు, వీరి దూసిసినార్ గదె.

⁸ దేవుణు మాటదు మన్ని ముకెలమాతి రూలు ఇనిక ఇహిజు, నీను నిజి ప్రేమిసిని లెకెండు మహివరిజ్ బా ప్రేమిస్ అ* ఇజి ఆహు కిత్తిజు మీరు బాగ నడిసినిదెర్. ⁹ గాని మీరు విజేరిజ్ ఉండ్రె లెకెండు సుడెవెండ మహిజు పాపం కిజినిదెర్. దేవుణు సిత్తి రూలు మీరు తప్పిదెర్ ఇజి తీర్పు వాజినాద్. ¹⁰ ఎయెరుబా దేవుణు రూలుజు విజు వన్యాజ్ లోజిజి ఉండ్రె రూలు తప్పిజు విజు రూలుజ్ తప్పిలెకెండు. ¹¹ మీరు రంకు బూలానిక ఆవద్ ఇజి రూలు మనాద్. లోకాజ్ సప్పిక ఆవద్ ఇజిబా రూలు మనాద్. మీరు రంకు బూలాఇదెర్ గాని లోకాజ్ సప్పిజు విజు రూలుజ్ తప్పిలెకెండు. ¹² లోకాజ్ విడుడల సీని రూలుదాన్ దేవుణు మిజి తీర్పు కినాన్ లె. అందెజె సరి ఆతి మాట వర్గిదు, ఆహె నడిదు. ¹³ ఎందానిజ్ ఇహిజు, కనికారం తోరిస్ ఇ వన్నిజ్ కనికారం సిల్లి తీర్పు వానాద్. గాని దేవుణు తీర్పుకినివలె కనికారం తోరిస్సి వన్ని మున్సు. దేవుణు కనికారమెనె గెల్పిస్తాద్దె. వన్నిజ్ తీర్పు రెవిద్. ఎందానిజ్ ఇహిజు దేవుణు తీర్పు కిదెజ్ తయార్ ఆతిజ్ బా వన్ని కనికారం తీర్పుదిజ్ ఇంక పెరిక.

నెగ్గి పణిని నమకం

¹⁴ నా తంబెరిజుండె, ఒరెన్ దేవుణు మున్సు నమకం మనాద్ ఇజి వెప్సి నమ్మకమదిజ్ తగ్గివజు పణి కివెండ మహిజు వన్నిజ్ లాబం సిల్లెద్. నన్ని నమకం వన్నిజ్ గెల్పిన్ ఏద్. ¹⁵⁻¹⁶ ఉండ్రె వేల ఒరెన్

* 2:8 2:8 లేవ 19:18.

తంబెరి గాని తజిసి గాని సరి అతి సొక్కపాతెజ్ సిల్లెండ, తిండి సిల్లెండ మహివలె వరిజ్ కావాలిన్ని వనకాజ్ వందిజ్ ఇని సాయం కివిండ, “ఏలు సొన్అ, సిసు కాయ్జి నెగ్గెండ ఉణిజి మన్అ”, ఇజి వెహ్హిజి ఇని లాబంబా సిల్లెద్. 17 అయావజనె నమకమ్దిజ్ తగితి పణికివిండ, నమకం ఉండ్రె మహిజి అయ నమకమ్దాన్ ఇని లాబం సిల్లెద్. 18 గాని మీరు ఒప్పుకొడెఇదెర్సు. ఒరెన్ వన్నిజ్ దేవుణు ముస్సు. నమకం మనాద్ ఇజి వెహ్హినిదెర్సు, మరి ఒరెన్ వన్నిజ్ నెగ్గి పణిజ్ మన్నె. గాని నెగ్గి పణిజ్ కివిండ మిజి నమకం మనాద్ ఇజి ఎలాగ మీరు తోరిస్సిదెర్ ఇజి నాను వెన్బాజిన. నాను నా నెగ్గి పణిజాణ్ నా నమకం తోరిస్సు. 19 దేవుణు ఒరెండ్రె ఇజి నీను నమ్మిజిని. ఆహె నమ్మిదెజ్ నెగ్గెదె. దెయమ్కుబా ఆహె నమ్మిజి తియెలాజి వణిక్కినె. 20 బుద్ది నీల్లికి, నిజి నమకం మనాద్ ఇజి తోరిసిని నెగ్గి పణిజ్ సిల్లు ఇహిజి అయ నమకం పణిదిజ్ రెఇక ఇజి నీను నెన్ఇదా? 21 మా అనిగొగొ అతి అబ్రహం, వన్ని మరిసి అతి ఇస్సాకుజ్ పూజి కిదెజ్ పూజి బసాదు ఒత్తివలె, వాండ్రు కిత్తి పణిదాన్ నీతి నిజయ్లు మన్నికాన్ ఇజి దేవుణు వన్నిజ్ ఇడ్డాన్. 22 సుడెడు, వన్ని నమకమ్ని, వాండ్రు కిత్తి పణి రుండిబా కూడెజి వన్ని నమకం పూర్తి అతాద్. 23 “అబ్రహం దేవుణుదిజ్ నమ్మితాన్. అందెజె దేవుణు వన్నిజ్ నీతినిజయ్లు మన్నికాన్ ఇజి ఒప్పుకొటాన్”, ఇజి దేవుణు మాటదు రాస్తి మాట ఆహె జర్గితాద్. మరి దేవుణు కూలాయెన్ ఇజి పేరు వన్నిజ్ వాతాద్. 24 ఎయెన్బా దేవుణు ముస్సు, మన్ని నమకం ఉండ్రెదానె అవిద్, నెగ్గి పణిజాణ్బా నీతినిజయ్లుకాన్ ఇజి దేవుణు ఇడ్డాన్ ఇజి మీరు నెసినిదెర్. 25 అయావజనె సాని బూలానికాద్ అతి రాహుబుబా పట్టుమ్దిజ్ నడి: సిల్లెండ సుడెదెజ్ వాతి వరిజ్ దన్ని ఇండ్రొ బాడ్డి సీజి ఆఇ సరి దాన్ పొక్తాద్. అది కిత్తి నెగ్గి పణిదాన్ నీతినిజయ్లుకాద్ ఇజి దేవుణు ఇడ్డాన్. 26 పాణం సిల్లి ఒడెల్ సాతికదె. అయావజనె నెగ్గి పణి సిల్లి నమకం సాతి వజనె.

3

నాలికదిజ్ అడ్డు కిదెజ్

1 నాను ప్రేమిసిని తంబెరిజండె, మీ లొఇ నండొండొర్ బోద వెహ్హికిదెర్ అమాట్. ఎందానిజ్ ఇహిజి, బోదిసినికార్ అతి మిజి దేవుణు గటిజ్ అతి తీర్పు సీనాన్ ఇజి మీరు నెసినిదెర్.

2 మాటు విజేటి నండొ పణిలోఇ తప్పి సొన్నినాట్. గాని ఎయెన్బా వాండ్రు వెహ్హి మాటిజి లొఇ ఎనెజ్బా తవ్వందాతిజి వాండ్రు పూర్తి అతికాన్, ఇని తప్ప సిలికాన్. వాండ్రు వన్ని ఒడెల్ మన్ను విజి అణనె ఆజి మండ్రెజ్ అట్నాన్.

3 గుర్రమ్ది వెయ్దు కలెం* ఇట్టిజి అక్క లొజిజినాద్. అయ ఇజిరి కలెమ్దానె మజి ఇస్టమాతి బాడ్డిదు దన్నిజ్ మహ్లాజ్ అనాద్. 4 సిల్లిజి ఉండ్రె ఓడెదిజ్ సుడెడు. అక్క ఎసా పెరిక అతిజ్బా, పెరి గాలిదాన్ సొనికెజ్ అతిజ్బా, ఓడెడు మన్ని సుకాని ఇని ఇజిరి మరదాన్ ఓడె: నడి:పిసినికాన్, వన్నిజ్ ఇస్టమాతి బాడ్డిదు ఒసినాన్. 5 అయాలెకెండె నాలికబా ఇజిరిక అతిజ్బా అక్క గొప్ప వనక వందిజ్ పొజిజి వర్గిజినాద్ ఎస్సా ఇజిరి సిసు అతిజ్బా పెరి గొరొంది మరెకాజ్ విజి సుర్నుకాన్. 6 నాలికబా ఉండ్రె సిసు లెకెండె. ఒడెల్దు మన్ని వనకలోఇ అక్క పూర్తి సెఇక. అక్క ఒరెన్ వన్నిజ్ పూర్తి సెవణ్ కిజినాద్. నరకమ్దానె వాతి సిసు నాలికాదు కసి వన్ని బత్తు. విజి నానం కిజినాద్. 7 విజి రకమ్కాణి జంతుజి, ఆగనమ్దు మన్ని పొటిజి, సరాన్కాజ్, ఏరు లొఇ మన్ని విజి మొయెజి, లొజిస్టెజ్ లొకు అట్నాన్. 8 గాని ఎయెర్బా నాలికదిజ్ లొజిస్టెజ్ అట్విర్. అది పూర్తి సెఇక. దనిజ్ అడ్డు కిదెజ్ ఎయెర్ అట్విర్. సాపుదిజ్ తగితి వినం తసినాద్. 9 యా నాలికదానె బుబ్బాతి దేవుణుదిజ్ స్తుతి కిజినాట్. యా నాలికదానె దేవుణు మూర్తి లెకెండె పుటిస్తి లొకాజ్ సయమ్ సీజినాట్. 10 ఉండ్రె వెయుదానె నెగ్గి మాటజ్, సయమ్ సీని మాటిజ్ వాజినాద్. నా తంబెరిజండె, మీరు ఆహె మంజినిక అవిద్. 11 ఉండ్రె ఊటదానె నెగ్గి ఏరుని సెఇ ఏరు రెఉ.† 12 బొడె మరాతు ఒలివ పట్టు. అన్ఉ. ద్రాక్కు తివాద్ బొడె పట్టు. రెఉ. అయావజనె సొరు ఏరు సొని ఊటదాన్ నెగ్గి ఏరు రెఉ.

రుండి రకమ్కాణి గెణమ్కు

* 3:3 3:3 గుర్రం వెయ్దు ఇడ్డి ఇజిరి నెక్క ముక్క అక్క గుర్రం వెయ్దు మహిజానె దన్నిజ్ నడి:పిన్జ్ అనాద్. † 3:11 3:11 బూమిలోఇహాన్ నెగ్గి ఏరుని సెఇ ఏరు వానె. బానె సెఇ ఏరునె వానె. తియాజ్ అఉ. సొరు మన్నికాదె.

13 మీ లోక గణం తెలివి మన్నికాన్ మహిజ, అక్క వన్ని నెగ్గి బత్తుదాన్ రుజువ్ కిదెజ్. గెణమ్దాన్, లోజిజి మంజిని గుణం వానాద్. సజి గెణం తెలివి మనాద్ ఇజి లోజిజి మంజిని గుణమ్దాన్ వాండ్రు కిని పణి లోక తోరిసిన్. 14 గాని మీ మన్నుదు నండో పగ, గోస, మీ వందిజ్ మన్ని మన్ను ఇడోతిజి మీ గెణం వందిజ్ పొజిదెజ్ ఆవిద్. మీ గెణం వందిజ్ వెప్పిక నిజం ఆవిద్. 15 నన్ని బుద్ది దేవుణు సిత్తిక ఆవిద్. అక యా లోకమ్దాన్, లోకు బుద్దిదాన్, సయతానుబాణిజ్ వాతి గెణమె. 16 ఎంబె గోస, మీ వందిజె మని మన్ను మనాదో, అబ్బె టంటజ్, విజు రకమ్కాణి పాపమ్కు మంజిని. 17 గాని దేవుణుబాణిజ్ వాని గెణం కల్లి సిల్లిక. అయ గెణం మన్నికార్ సమదనమ్దాన్, సార్దిదాన్, విజేరివెట కూడోజి, లోజిజి మంజిని బుద్దిదాన్, కనికారమ్దాన్, నెగ్గి పణిజాణ్, విజేరిజ్ ఉండ్రెలెకెండ్ సుడోజి, నిజమ్దాన్ పణి కినార్. 18 సమదనం కినికార్ సమదనం విత్తి, సీతి నిజయ్తి ఇని పంట కొయ్నార్.

4

దేవుణుదిజ్ లోజిదు

1 మీ లోక జటిజ్ ఆదిజ్, పొట్లాడోదెజ్ బుద్ది మనాద్. సుకు మున్ను మండ్రెజ్ ఇజి మీ మన్నుదు మన్ని ఆనదాన నన్ని బుద్ది వాజినాద్. 2 మీరు ఇనికెజ్ దోహ్కద్ ఇజి ఆన ఆజినిదెర్ గాని అకెజ్ మిజి దోహ్కెండ్ ఆజిని. అయావలె మీరు సప్పిదెర్. ఇతాహ వరిది ఆన ఆనిదెర్ గాని దోహ్కెన్జిజ్ అట్ఇదెర్. మీరు టంటజ్ ఆజి పొట్లాడోజినిదెర్. మిజి కావల్సెక ఎండానిజ్ దోహ్కెండ్ ఇహిజ, మీరు దేవుణుదిజ్ లోసెదెర్. 3 మీరు లోస్సివలె మిజి దోహ్కెండ్. ఎండానిజ్ ఇహిజ మీరు సెజ ఉదెసమ్దాన్ లోస్సిదెర్. సుకం మున్ను మండ్రెజ్ ఇజి మీరు లోస్సిదెర్. 4 మీరు దేవుణుదిజ్ డిసి సాహికిదెర్. యా లోకమ్దిజ్ ప్రేమిస్తికాన్ దేవుణుదిజ్ విరోదమాతికాన్ ఇజి మీరు నెన్ఇదెరా? యా లోకమ్దిజ్ కూల తోహ్కెన్ దేవుణుదిజ్ పడికెకాన్ ఆనాన్. 5 దేవుణు మా లోక ఇడ్డి ఆత్తు, మా వందిజ్ నండో ఆన ఆజినాన్ ఇజి దేవుణు మాటదు మనాద్. అయ మాట నిజం ఇజి మీరు నెనినిదెర్. 6 గాని దేవుణు సత్తుదాన్ కూడితి దయాదర్మం మీరు ఆన ఆని దన్నిజ్ ఇంక నండో సీజినాన్. అందెజె “గర్త ఆని వరిజ్ దేవుణు ఎద్రిసినాన్. గాని తగి ఆతి మన్ని వరిజ్ దయాదర్మం సీజినాన్”, ఇజి దేవుణు మాటదు వెప్పినాద్. 7 అందెజె మీరు దేవుణుదిజ్ లోజిదు. సయతాన్దిజ్ ఎద్రిస్సు. అయావలె సయతాన్ మీబాణిజ్ ఉహ్కెన్ సానాన్. 8 మీరు దేవుణు డర్గు రద్దు. అయావలె మీ డర్గు రద్దు. అయావలె దేవుణు మీ డర్గు వానాన్. మీరు కిని పణిజి లోక ఇని తప్పుబా మన్విండ మండ్రెజ్, పాపం పణిజ్ విజు డిసిసీదు. దేవుణుదిజ్, లోకమ్దిజ్, ప్రేమిసిని రుండి మన్ను డిసిసీజి, దేవుణుదిజ్ ప్రేమిసిని ఉండ్రె మన్ను ఆజి మండ్రు. 9 మీ పాపం వందిజ్ ఒడోబిజి దుకం ఆజి నండో అడోబాదు. మీరు సిక్కిక డిసి, అడోబాదు. మీరు సర్ద డిసి, దుకం ఆదు. 10 దేవుణు ముజాల మీరు తగిజి మండ్రు. అయావలె దేవుణు మిజి గవరం సీనాన్. 11 నాను ప్రేమిసిని తంబెరిజాండె, ఒరెన్ మున్ను ఒరెన్ విరోదం వర్గిమాట్. మరి ఒరెన్ వన్నిజ్ పడికెక వెప్పికాన్, మరి ఒరెన్ వన్నిజ్ తీర్పు కినికాన్. దేవుణు వెప్పె రూలుదిజ్ విరోదం ఆజినాండ్రె దేవుణు సిత్తి రూలుదిజ్ వాండ్రు నెక్కిపొక్కినాన్. మీరు దేవుణు రూలుజ్ నెక్కిపొక్కిజి మీరు దేవుణు రూలుదిజ్ లోబడోకెదెర్. గాని దేవుణు రూలుజ్ సరిఆతికెజ్, ఆవిదో ఇజి మీరు తీర్పు తీరిసినికార్ ఆనిదెర్. 12 విజు రూలుజ్ సీనికాన్ దేవుణుని. విజేరిజ్ తీర్పు సీనికాన్ దేవుణుని. ఒరెన్ వన్నిజ్ గెల్పిస్తెజ్ వాండ్రు అటాన్. ఒరెన్ వన్నిజ్ నాసనం కిదెజ్ వాండ్రు అటాన్. పడోకాతి వన్నిజ్ తీర్పు సీదెజ్ నీను ఎయి?

మర్స రోజు వందిజ్ పొజిదెజ్ ఆవిద్

13 నాను వెప్పిక నెగ్రెండ వెండ్రు. మీ లోక సెగెండార్ ఈహు వెహ్పార్, “నేండ్రు సిల్లి, విగెహిజ్ ఎంబె ఎంబె ఉండ్రె పట్టుం సొన్ని, అబ్బె ఉండ్రె ఎంటు మంజి బేరం కిజి నండో డబ్బు గణస్సు”. 14 అహిజ, విగెహిజ్ నీ బత్తుదు ఇనిక వానాదో నిజి తెలివిద్. నీ బత్తు సణెం తోరె ఆజి సణెమ్దిజి మాయ ఆని ఆవిరి నన్నిక. 15 అందెజె మీరు ఈహు వెహ్కెజ్, “దేవుణుదిజ్ ఇన్జం మహిజ మాయ బత్తినావ్, అక్క కినావ్, ఇక్క కినావ్”. 16 గాని మీరు గర్త ఆజినిదెర్. మీరు మీ వందిజె పొజిజినిదెర్. ఇక్క విజు తప్పు. 17 ఎయెర్బా సరిఆతి పణి ఎమేణిక ఇజి నెసి, అయాలెకెండ్ కివిండ మహిజ వాండ్రు పాపం కిజినాన్.

5

ఆస్తి మన్నికార్ జాగ్రత్త మండ్రు

1 ఆస్తి మన్నికార్ నాను వెహ్సాక వెండ్రు. మిజి వాని గొప కష్టమక వందిజ్ దుకమ్దాన్ నండో అడబాదు. 2 మీ ఆస్తి విజు పాడాన సొనాద్దె. మీ పాతెజ్ విజు నెద తినెలె. 3 మీ బజారం, వెండిదిజ్ కరి తినాద్దె. దేవుణు తీర్పు కినివలె ఆ కరి నీ ముస్సు, రుజువ్ మంజి సిసువజ మిజి నాననం కినాద్దె. మీరు గణస్తి ఆస్తి విజు, దేవుణు తీర్పు కిని రోజు వందిజ్ కుంబ కిజినిదెర్. 4 నుడోడు, మీ బూమిదు పణి కిత్తివరిజ్ కూలి డబ్బు సిఇతిదెర్. అయా కూలిడబ్బు మీ ఎర్దు మొరో ఆజినె. మీ పంట కొయ్లివరి మొరో గొప్ప సత్తు మన్ని దేవుణుబాన్ సాహాద్. 5 మీరు యా లోకమ్దు మహివలె సుకం ముస్సు, మంజి సర్దదాన్ బత్తుతిదెర్. కొయ్దెజ్ బలస్తి మన్ని కోడ్డిలెకెండ్ కడెవెరి దినమ్కాజ్ వాని మీ నాసనమ్ వందిజ్ మీ మస్సు బలిసి వాతాద్. 6 తప్పు కిజి వరిజ్ తప్పు కిత్తికార్ ఇజి నేరం మొప్పి, పరిముస్సు, తీర్పు తపిసి సప్తిదెర్. మిజి ఎద్రిన్జెజ్ వారు అట్ఎతార్.

కష్టమ్దు ఓరిసి మండ్రు

7 అందెజె, నా తంబెరిజాండె, ప్రబు ఆతి యేసు క్రిస్తు వాని దాక వన్నివందిజ్ ఓరిసి మండ్రు. నుడోడు, ఒరెన్ రెయ్లు వాండ్రు గొప్ప విలువాతి వన్ని బూమి పంట బూమిపంట వానేండ ఎస్సాకాలం కాన మంజినాన్. ముజాల్ పిరుదిజ్, కడివేరి పిరుదిజ్ వాండ్రు కాన మంజినాన్. 8 అయావజనె మీరుబా ఓరిసి మండ్రు. మీ మస్సు కద్దివండ ఇడోడు. ప్రబు ఆతి యేసు క్రిస్తు వాని రోజు డగ్రు ఆతాద్. 9 నాను ప్రేమిసిని తంబెరిజాండె, దేవుణు మిజి తీర్పు కివండ మండ్రెజ్ ఇహిజ ఒరెన్ ముస్సు, ఒరెన్ మొరో ఆమాట్. ఎందానిజ్ ఇహిజ దేవుణు మిజి తీర్పు సీనాన్లె. తీర్పు కినికాన్ డగ్రునె మనాన్. 10 దేవుణు మాట వెహ్సా ప్రవక్తరు ఎలాగ మహార్ ఇజి నుడోడు. వరిజ్ నండో మాలెజ్ కిత్తిజ్బా వారు అక్కెజ్ బరిస్తార్. 11 నమకం డిన్వండ బరిసి మహికార్ సర్ద అనికార్ ఇజి మాప్ వెహ్సానాప్ ఇజి మీరు నెసినిదెర్. యోబు, కష్టమ్కు వాతివలె ఓరిస్తిజ్ దేవుణు ఎలాగ వన్ని ఉదెనమ్కు పూర్తి కిత్తాన్ ఇజి మీరు వెహిదెర్. ఎందానిజ్ ఇహిజ దేవుణు నండో కనికారం, దయ మన్నికాన్. 12 ముకెలమాతి ఉండ్రీ మాట ఇనిక ఇహిజ మీరు ఆగనం తోడు గాని, బూమి తోడు గాని, మరి ఇనిదన్ని తోడుబా గాని అసి ప్రమాణం కినిక అవద్. మీ మాట ఒఓ ఇహిజ ఒఓ ఇజి, అవద్ ఇహిజ అవద్ ఇజి మండ్రెజ్. ఆహె మహిజ దేవుణు తీర్పు సీనివెలె మిజి సిక్ర రెవద్.

నమకమ్దాన్ కూడితి పార్దనం

13 మీ లోఇ ఎయెజ్బా మాలెజ్ వాతిజి వాండ్రు దేవుణుదిజ్ పార్దనం కిదెజ్. మీ లోఇ ఎయెజ్బా సర్దదాన్ మహిజ దేవుణు వందిజ్ పాటెజ్ పార్దెజ్. 14 మీ లోఇ ఎయెజ్బా జబ్బు మహిజ వాండ్రు సజం పెద్దెలెజ్ కూక్తెజ్. వారు ప్రబు పేరుదాన్ నూనె రాసి వన్ని వందిజ్ పార్దనం కిదెజ్. 15 నమకమాతి పార్దనం ఆ జబ్బుది వన్నిజ్ నెగెండ్ కినాద్. దేవుణు వన్నిజ్ నికాన్. వన్ని పాపమ్కు దేవుణు నెమిస్సాన్. 16 అందెజె మీరు నెగెండ్ అనివందిజ్ ఒరెన్, పాపమ్కు మరి ఒరెన్ వన్నిజ్ ఒప్పుకోడిజి, ఒరెన్, మరి ఒరెన్ వందిజ్ పార్దనం కిదు. నీతి నిజయ్లు వాండ్రు కిని పార్దననమ్దిజ్ గొప్ప సత్తు మనాద్.

17 ఏలియ ప్రవక్త మానన్ని లోకునె. వాండ్రు బూమి ముస్సు, పిరు రమ ఇజి గటిజ పార్దనం కితిజ్, మూండ్రీ పంటెజ్ ఆరు నెలెజ్ దాక బూమి ముస్సు, పిరు రెవతాద్. 18 ఏలియ మరి పార్దనం కితిజ్ ఆగనం పిరు సిత్తాద్. పిరు సిత్తిజ్ బూమి పంట సిత్తాద్. 19 నా తంబెరిజాండె, మీరు యాక నెస్తు. మీ లోఇ ఎయెజ్బా నిజమాతి సరి తప్తిజ, వన్నిజ్ మరి ఒరెన్ నిజమాతి సరిదు తత్తెజె. 20 అహు కితిజ పాపం కిత్తిజ్ వాతి సావుదాన్, వన్ని అత్మదిజ్ తప్తిస్సాన్. దేవుణు వన్ని పాపమ్కాజ్ విజు నెమిస్సాన్.

పేతురు రాస్తి మొదోహి ఉత్త్రం

నెల్ల కిబిసినిక

యా ఉత్త్రం రాస్తికాన్ యేసుప్రబుజ్ అపొస్తుడు ఆతి పేతురు. రమారమి క్రీస్తు సెకం 60 దు యా ఉత్త్రం రాస్తాన్. అయా కాలమ్దు ఆసియాదు బానె బత్తిజి మహి క్రీస్తు లోకాజ్ మాలెజ్ వాజి మహె. ఏలుబడిః కిని రాజుర్ క్రీస్తు లోకాజ్ వరి నమకం వందిజ్ హిమ్స కిత్తార్. వరిజ్ దయరం కిబిస్తాజ్ యా ఉత్త్రం రాస్తాన్. ముకెలమాతి మాటెజ్ ఇహిజ, కస్టమ్కు వానివలె ఓరిసి మండ్రెజ్, అతికారి లోకాజ్ లోజిజి మండ్రెజ్, దేవుణు వందిజ్ బత్తిదెజ్ ఇహిజ ఎలాగ నినికెజె.

1 యేసు క్రీస్తుజ్ అపొస్తుడు ఆతి పేతురు రాసిని ఉత్త్రం. పొంతు, గలతీయ, కపదోకియ, ఆసియ, బితునియ ఇని దేనమ్కాణో సెద్రితి మని ఆజ దేసెమది వరి లెకెండ మనివరిజ్, ఎయెర్ ఇహిజ దేవుణు వన్ని వందిజ్ ఏర్పాటు కితి వరిజ్ రాసిన్. 2 బుబ్బాతి దేవుణు మిజి ఎర్లిస్తాజె ఇజి ఒండెబితాంత్రె వన్ని వందిజ్ మిజి ఎర్లిస్తాన్. యేసు క్రీస్తుజ్ లోజిజి వన్ని నలదాన్ నొర్ ఆజి సుబరం ఆజి మండ్రెజ్ దేవుణు అత్తు మిజి కేట కిత మనాన్. మిజి దేవుణు దయా దర్మం, నిపాతి నిండ్రెజి మనీద్.

ఎలాకాలం ఎర్దు సుడెఃజి మండ్రెజ్.

3-4 మాటు దేవుణుదిజ్ నండో పొగిడిఃనాల్. వాండ్రె, మా ప్రబు ఆతి యేసుక్రీస్తుజ్ బుబ్బ. దేవుణు గొప్ప కనికారమ్దాన్ మజి కొత్త బత్తు, సితాన్. ఎలాగ ఇహిజ, యేసు ప్రబుజ్ సాతి వరి లోకహోన్ నిక్రాన్. నిక్రిజ్ ఎల్లకాలం ఎర్దు సుడెఃజి మండ్రెజ్ కొత్త బత్తు, మజి సితాన్. అక్కడె ఆవిండ మజి ఉండ్రె అక్కు సితాన్. అక్క పాడాఃజి సాన్ఇక, పూర్తి నెగిక. ఎల్లకాలం మంజినిక. అక్క పరలోకమ్దు మీ వందిజ్ ఇట్టా మనాన్. 5 మీరు దేవుణుదిజ్ నమ్మితిజ్ దేవుణు వన్ని గొప్ప సత్తుదాన్ మిజి కాప్కిజి ఇడ్నాన్. కడెవెరి రోస్కాణో మజి వాని సిక్చదాన్ ఎలాగ గెల్చిస్తాన్ ఇజి తోరిస్తాన్. 6 దిన్ని వందిజ్ మీరు నండో సర్ల ఆదు. గాని ఎలు సెగం రోస్కు మిజి కల్లితి అనెకమాతి విజి రకమ్కాణి కస్టమ్క వందిజ్ దుకం అదెజ్ వలె. 7 ఎందనిజ్ ఇహిజ, పడాఃజి సాని బజారం సినుదు ఇడ్డి సుబ్రం కిసార్ గదె. అయ లెకెండ బజారం ముస్కు, విలువ మన్ని మీ నమకమ్బా కల్లి సెలిక ఇజి రుజుప్ కిదెజ్ వలె. ఆహె రుజుప్ కితిజి యేసు క్రీస్తు తోరి ఆనివలె నని నమకమ్ వందిజ్ మిజి పొగిడిఃనాన్. మిజి, గొప్ప గనం దోహోక్కాద్.

8-9 మీరు వన్నిజ్ సుడెఃజినిదెర్ గాని వన్నిజ్ ప్రేమిసినిదెర్. ఎలు సుడెఃవిండ మహిజ్బా వన్నిజ్ నమ్మిజినిదెర్. మరి, వెప్టాజ్ అటోణ నని గొప్ప సర్లదాన్ సర్ల ఆజినిదెర్. ఎందనిజ్ ఇహిజ మిజి యేసు క్రీస్తు ముస్కు, మన్ని నమకమ్దానె, మీ పాణం ఎలాకాలం మంజిని కిక్చదాన్ గెల్చిస్తాజ్ అట్నాద్.

10 మిజి వాని రక్చణ వందిజ్ దేవుణు మాటెజ్ వెప్టా ప్రవక్తరు రెబాతరి బాగ నెస్తాజ్ సుడుఃతార్. దేవుణు మిజి సీదెజ్ ఇడ్డి యా దయా దర్మం వందిజ్ వారు వర్గితార్. 11 క్రీస్తు కస్టమ్కు ఓరిస్తి వెనుక గొప్ప గనం కల్గినాద్ ఇజి ప్రవక్తరు లోక మన్ని క్రీస్తు ఆత్తు అక్క జర్గివిండ మహి నండో ముందాలెన్ వరిజ్ వెప్టా మహార్. వెప్టాజ్ దన్ని అర్థం ఇనిక ఇజి వారు రెబాతార్. అక్కజ్ ఎనెజ్ జర్గెనెలె, ఎలాగ జర్గెనెలె ఇజి రెబాతార్. 12 ఆహు రెబాతిజ్, వారు వరి వందిజ్నె ఆవిద్, మీ వందిజె వెప్టానార్ ఇజి దేవుణు ఆత్తు వరిజ్ నెస్పిస్తాన్. పరలోకమ్దాన్ దేవుణు పోక్తి వన్ని ఆత్తు సత్తుదాన్ మిజి సువార్త వెప్టాకార్ యాక్కెజ్ మిజి నెస్పిస్తార్. పరలోకమ్దు మని దూతెజ్బా దిన్ని వందిజ్ నెస్తాజ్ ఇజి ఆస ఆజినార్.

దేవుణు వందిజ్ కేట ఆజి మండ్రు.

13 అందెజి మీ ముస్కుదిజ్ తయార్ కిజి మండ్రు. ముస్కుదు అణసె ఆజి మండ్రు. యేసుక్రీస్తు తోరి ఆనివలె మిజి దోహోక్తి దేవుణి దయా దర్మం వందిజ్ పూర్తి ఆసదాన్ ఎర్దు సుడెఃజి మండ్రు. 14 దేవుణుదిజ్ లోజిజి వన్ని కొడోర్ లెకెండ మండ్రు. ముజల్నె మీరు దేవుణుదిజ్ నెన్ఎండ మహివలె సెణ ఆసెజి వందిజ్ లెకెండ అమాల్. 15 గాని మీరు కిని విజు దని లోనుబా దేవుణు వందిజ్ కేట ఆజి మండ్రు. ఎందనిజ్ ఇహిజ వన్ని సొంతం ఇజి మిజి ఇడ్డికాన్ పరిసుదం ఆతికాన్. 16 ఎందనిజ్ ఇహిజ

దేవుణు పరినుదం ఆతికాన్. అయ లెకెండ్ మీరుబా పరినుదం ఆజి మండ్రెజ్ ఇజి దేవుణు మాటదు రాస్త మనాద్.

17 బుబ్బు ఇజి కూక్కి మీరు పార్దనం కిజిని దేవుణు విజెరిజ్ వరి పణిజ సుడెజి ఇని తేడః సిల్లెండ తీర్పు కిజినాన్. అందెజె మీరు యా లోకమ్దు కూడః వాతి వరిలెకెండ్ బత్కిని వరి దేవుణుదిజ్ తియెల్ ఆజి మండ్రు. 18 మీ అనిగొగర్ బత్కితి లెకెండ్ దేవుణుదిజ్ నెన్ఎండ బత్కిని మీ బత్కు పణిదిజ్ రెఇక. నన్ని బత్కుదాన్ యేసు ప్రబునె మిజి డిఃబిస్తాన్. సిల్లెండ ఆజి సాని వెండి బజారం మిజి డిఃబిన్ఎతాద్ ఇజి నెస్సిదెర్ గదె. 19 గాని ఇని తప్ప సిలి గొర్రె పిల్ల నని యేసుక్రీస్తు విలువాతి నలదాన్ మిరు డిఃబె ఆతిదెర్. 20 యా లోకెమ్దిజ్ వుటి నెలెండ మహివలెనె దేవుణు యేసుక్రీస్తుజ్ యా పణి వందిజ్ ఎర్లిస్తాన్. గాని యా కడెవెరి రోస్కాజ్నె వన్నిజ్ పొక్తాన్. మీ వందిజె పొక్తాన్. 21 సాతి వరిబాణిజ్ దేవుణు నిక్కి యేసు క్రీస్తు వెటనె మిజి దేవుణు ముస్కు నమకమ్ మనాద్. నిక్కిజ్ వన్నిజ్ గొప్ప పెరికాన్ ఇజి ఇట్టాన్. అందెజె మీ నమకం దేవుణు ముస్కు ఇడ్డిదెర్. అందెజె దేవుణు ఒట్టు కితి దనిజ్ ఎర్దు సుడెజి మంజినిదెర్.

22 నిజమాతి మాటదిజ్ మీరు లోజితిజ్ మీరు టేటజ్ ఆతిదెర్. అందెజె నమ్మితి వరిజ్ కల్లి సిల్లెండ ప్రేమిసినిదెర్. అహిజ నిజమాతి ప్రేమదాన్ మీ మన్ను పూర్తి నెమిస్తెజ్ వలె. 23 ఎందనిజ్ ఇహిజ సాజి సాని లోకాజ్ ఆవిద్. గాని ఎల్లకాలం బత్కిని దేవుణుదునె మీరు వుట్టిదెర్. ఎల్లకాలం బత్కిని దేవుణు మాటదాన్ మిరు మరి వుట్టిదెర్.

24-25 ఎందనిజ్ ఇహిజ, “విజెరి లోకుర్ గడ్డి లకెండె వరి పేరు గడ్డి పుజు లెకెండె మనాద్. గడి వహ్నాద్. పుజు రాల్ప అర్నాద్. గాని ప్రబు ఆతి దేవుణు మాట ఎల్లకాలం మంజినాద్”, అయా మాట ఇనిక ఇహిజ మిజి సువార్త వెప్తా మని మాటనె.

2

1-3 యేసు క్రీస్తు ఎసా నెగ్గికాన్ ఇజి మీరు నెసి సుడెజి మహిదెర్. అందెజె ఆఇ వన్ని ముస్కు కుల్ల కినికెజ్, విజు మొసెం పణిజ్, మీ మన్నుదు మనికెజ్, డాఃప్పి మరి ఉండ్రె వెప్పికెజ్, కినికెజ్, గోస, మరిబెరెన్ వన్నిజ్ దూసిస్సిక యాకెజ్ విజు డిఃస్తు. ఏలు పుట్టి ఇజి కొడెఃరి లెకెండ్ దేవుణు మాట ఇని కల్లి సిలి పాలు ఉండెజ్ నండె ఆస ఆదు. దని సత్తుదాన్ పిరిజి మీ బత్కు రక్కిస్తు.

పాణం మన్ని పణుకు, దేవుణుదిజ్ ఎర్లిసి మన్ని లోకుర్.

4 మీరు బత్కిజి మని క్రీస్తుబాన్ వాతిదెర్. ఇల్లు తోహ్పికార్ పణిదిజ్ రెఇక ఇజి నెక్కి పొక్కి పణుకు లెకెండె క్రీస్తు. లోకుర్ వన్నిజ్ నెక్కపొక్తార్ గాని దేవుణు వన్నిజ్ గొప్ప విలువాతికాన్ ఇజి ఎర్లిస్తాన్. 5 మీరుబా పణుకుజ్ లెకెండె దేవుణు మండ్రెజ్ ఇజి తోహె ఆని గుడిదిజ్ మీరు పణుకుజ్ లకెండె. గాని క్రీస్తు లెకెండె మీరుబా పాణం మని పణుకుజె. దేవుణుదిజ్ కేట ఆతి పుజెరి లోకుర్ లెకెండె మండ్రు. దేవుణుదిజ్ పొగ్డిజె, వందనమ్కు వెప్పి, వన్నిజ్ లోజిజి మంజి యేసు క్రీస్తు వలెహాన్ వన్నిజ్ తగితి పూజెజ్ సీదు. 6 దేవుణు మాటదు ఈహు రాస్త మనాద్ ఇనిక ఇహిజ ఇదిలో నాను సియెనుదు ఉండ్రె పణుకుదిజ్ ఎర్లిసిన. అయా మూల పణుకు గొప్ప విలువాతిక. వన్ని ముస్కు నమకం ఇడ్డికాన్ ఎయెన్బా సిగు ఆవిన్. 7 అందెజె, యేసు క్రీస్తుజ్ నమ్మితి మిజి, యా పణుకు గొప్ప విలువాతి పణుకు. గాని నమ్మిఇ వరిజ్ ఇనిక ఆనాద్ ఇహిజ, “ఇల్లు తోహ్పికార్ నెక్కి పొక్కి పణుకునె మూలదిజ్ మూల పణుకు ఆతాద్”. 8 మరి రాస్త మనాద్ ఇనిక ఇహిజ “అయ పణుకునె లోకాజ్ ఆడ్డు కినాద్. అయ పణుకుదిజ్ తోరోడిజి అర్నార్. ఎలాగ్ అర్నార్ ఇహిజ దేవుణు మాటదిజ్ లోజివెర్. దేవుణు మాటదిజ్ లోజిజికార్ అర్నార్ ఇజి దేవుణు ముందాల్ప నెస్తాండ్రె వెప్తా మహాన్.

9 గాని మీరు దేవుణు ఎర్లిస్తి జాతి. రాజుజ్ పుజెరి లోకుర్. దేవుణుదిజ్ కేట ఆతి వన్ని సొంత లోకుర్. ఆహె పాపం ఇని సీకటిదాన్ వాని గొప్ప బమ్మాతి జాయ్దు మిజి కూక్ తతాన్. వన్ని గొప్ప బమ్మాతి పణిజ వందిజ్ సాటిస్తెజె ఇట్టాన్. 10 ముందాల మీరు దేవుణు లోకుర్ ఆఇకిదెర్. ఏలు దేవుణు లోకుర్ ఆతిదెర్. ముందాల దేవుణు కనికారం మిజి దొహ్కావతాద్. ఏలు కనికారం దొహ్కాద్.

11 నాను ప్రేమినిని తంబెరిజాండె, నాను మిజి బతిమాల్లి వెప్పిన, మీరు యా లోకమది వరి లెకెండ అజదెర్, ఆజ దేసెమది వరి ననికెదెర్. దేవుణు వందిజ్ మని ఆసెజ అడ్డు వాజిని ఒడోలేది ఆసెజ్ డి:స్తు. 12 దేవుణుదిజ్ నెనెజ లోకుర్ నడి:మి మీరు నెగ్రెండ మండ్రెజ్. ఎందనిజ్ ఇహిజ ఇని దని లోజబా మిజి నెకార్ ఇజి వారు వెప్పిజ, మీ నెగ్గి బత్తుదిజ్ నుడో:జి దేవుణు తీర్పు కిదెజ్ వాని రోజుదు వారు దేవుణుదిజ్ పొగిడి:దెజ్.

అతికారమదు మన్ని వరిజ్ లోజిజి మండ్రు.

13-14 ఏలుబడి: కినివరి లోజ పెరికాన్ అతి రాజుజ్ గాని, అతికారమదు మని వరిజ్ గాని క్రీస్తు వెప్పి లెకెండ లోజిజి మండ్రు. తపు కితి వరిజ్ సిక్కు సీదెజ్, నెగ్గికెజ్ కితి వరిజ్ పొగిడి:దెజ్ విరిజ్ పోక్తాన్ గదె. 15 ఎందనిజ్ లోజిదెజ్ ఇహిజ, మీ నెగ్గి పణిజ తోరిసి మీరు బుద్ది సిల్లెండ వర్గిని వరి వెయు మూకెజ్ ఇజి దేవుణు కోరిజనాన్. 16 మీరు డి:బె అతి లోకుర్. అహిజ, మీరు ఎయెర్ నెసెండ నెజ పణిజ్ కిదెజ్ అవెద్. దేవుణు అడ్డి పణి కినివరి లెకెండ మండ్రు. 17 విజెరిజ్ మర్యాద సీదు. నమ్మిత్తి వరిజ్ ప్రేమిస్తు. దేవుణుదిజ్ తియెల్ ఆజి మండ్రు. రాజుజ్ మర్యాద సీదు. 18 పణి మణిసిర్ వరి ఎజుమానిరిజ్ నండో మర్యాద సీజి లోజిజి మండ్రెజ్. మీ ముస్కు కనికారమదాన్ సార్లిదాన్ మని వరిజె అవెద్. మీ ముస్కు కనికరం సిలి వరిజబా లోజిజి మండ్రు. 19 ఎందనిజ్ ఇహిజ, నాయం సిల్లెండ ఎయెన్బా మిజి బాద కితిజ అక్కు మీరు దేవుణు వందిజ్ ఓరిస్తు. ఆక నెగ్గికదె. దేవుణుదిజ్ ఇస్తుమాతి పణిజె. 20 మీరు తపు కితి వందిజ్ ఉండ్రీ దెబ తిహిజ అక ఓరిస్సిదెర్. గాని మిజి ఇని లాబం? గాని దేవుణు ఎద్రు సరి అతికెజ్ కితి దనిజ్ సిక్కు వానివలె అక ఓరిస్సిజ అక నెగ్గికదె. దిని వందిజె దేవుణు మిజి ఏర్పాటు కిత్తాన్. 21 ఎందనిజ్ ఇహిజ క్రీస్తుబా మీ వందిజ్ కస్తుం ఓరిస్తాండ్రె మీరుబా వాండ్రు నడి:తి లెకెండ నడి:దెజ్ ఉండ్రీ గుర్తు తోరిస్త సితాన్.

22 “క్రీస్తు ఇని తపుబా కివెతాన్. వన్ని మాటోజ్ లోజ ఇని అబద్దమబ సిల్లెతాద్. 23 వన్నిజ్ దూసిస్తి వలె మర్జి దూసిసెవతాన్. వన్నిజ్ మల్లెజ్ కితివలె వరిజ్ బెద్రిసెవతాన్. నాయమదాన్ తీర్పు కిని దేవుణుదిజ్ వానిజ్ వాండ్రె ఒపజెవె అతాన్. 24 యెసుక్రీస్తు సిలువారు సాతివలె మా పాపమకు పిండితాన్. ఎందనిజ్ ఇహిజ మాటు పాపమకు పూర్తి డి:సిసిదెజ్ ఇజి, దేవుణు ఎద్రు సరి అతి బత్తు బత్తి:దెజ్ ఇజి. వన్ని ఒడోలేది దెబ్బిజాణిజ్ మాటు నెగెణ్ అతాట్. 25 ఎందనిజ్ ఇహిజ మీరు గొర్రెజ్ లెకెండ తప్పి సాహిదెర్. గాని ఏలు గవడు:ఎన్ అతి వన్ని డగ్గు, మీ పాణం కావ్ కిని వన్ని డగ్గు మర్జి వాతిదెర్.

3

అల్నిమాసిర్

1-2 అయావజనె, అల్నికెజ్ అతికెజ్ వన్యా, సాంత మాసిరిజ్ లోజిజి మండ్రెజ్. ఎందనిజ్ ఇహిజ, మాసిర్ దేవుణు మాటు నమ్మిఇకార్ అతిజబా వన్యా నెగ్గి బత్తుదాన్ దేవుణుబాన్ వరిజ్ తతెజ్ అట్టి. ఎలాగ ఇహిజ వన్యా కల్లిసిల్లి బత్తుని, దేవుణు ముస్కు. మన్ని తియెల్ నూణార్ దేవుణుదిజ్ నమ్మినార్. 3-4 నెగ్రెండ తోర్ ఆదెజ్ ఇజి బుర్ డూసి మండ్రెజ్, బజారం గొలుస్కు ఇట్టి:దెజ్, నెగ్గి పాతెజ్ పొర్పాదెజ్, గాని వనక వందిజె మన్సు ఇడో:దెజ్ అవెద్. మీ మన్సుదు ఇని ఇనికెజ్ ఇడో:జినిదెర్ ఇజి నుడో:దు. ఇనికెజ్ ఇహిజ సార్లిదాన్, నిపాతి మన్సుదాన్, పాడా:జి సానెజ నన్ని నెగ్గి గుణెమకు మన్సుదు ఇడో:దు. నన్నికదె దేవుణుదిజ్ గొప్ప విలువాతికాద్.

5-6 అయావజనె, పూర్పమదు దేవుణు ముస్కు నమకం ఇడ్డి బో:దెజ్, దేవుణు ఒట్టు కితి దన్నిజ్ ఎద్రునుడో:జి మపానె, వన్యా, సాంత మాసిరిజ్ లోజిజి వన్యా నెగ్గి గుణెమకు అయాలెకెండ తోరిస్తె. అబ్రాహం అల్ని అతి సార నన్నికదె. అది అబ్రాహముజ్ లోజిత్తాది, వాండ్రు నా ముస్కు అతికారం మన్నికాన్ ఇజి మర్యాద సిత్తాద్. మీరుబా అయావజనె సరి అతికెజ్ కిజి ఇనిదన్నిజబా తియెల్ సిల్లెండ మహిజ సార పొటది గాల్నిక్ అనిదెర్.

7 అయావజనె, మాసిర్ వరి బో:దెకాజ్, మజి ఇంక సత్తు తక్కు మనికెజ్ ఇజి నెసి, వన్యాజ్ గవర్ం సీజి, నెగ్రెండ నుడో:జి మండ్రెజ్ వలె. దేవుణు కనికారమదాన్ సిత్తి ఎలాకాలం బత్తుని బత్తు. ఉండ్రె

లెకెండ్ మీ వెట వనకాజ్ బా సీనాన్. అందెజె వన్కాజ్ మీరు మర్కాద్ సీదెజ్. అయాలెకెండ్ కితిజ మీ పార్లనమ్ దిజ్ ఇని అడ్డుబా మన్ వద్.

సరి ఆతికెజ్ కితి వందిజ్ వాజిని బాద

8 అక్కర్దు నాను విజేరిజ్ వెస్పాన, ఉండ్రె మన్ను ఆజి మండ్రు. ఒరెన్ మరి ఒరెన్ వెట వన్నుజ్ సర్ల మహివలె గాని దుకం మహివలె గాని కూడఃజి పాడఃజి మండ్రు. తంబెరిజు లెకెండ్ ఒరెన్ మరిఒరెన్ వన్నుజ్ ప్రేమకిజి మండ్రు. ఒరెన్ మరిఒరెన్ వందిజ్ పాణం నొత్తెజ్. నాను పెరిక ఇజి గర్ల ఆవిండ విజెరె వెట ఉండ్రె మన్ను ఆజి మండ్రు. 9 ఎయెన్ బా మిజి కీడు కితిజ మరజి వన్నుజ్ కీడు కిమాల్. దూసిస్తీజ మరజి దూసిస్తూల్. అపా కివిండ వరిజ్ నెగ్గికెజ్ రపిద్ ఇజి దేవుణుదిజ్ వెవ్సు. ఎండనిజ్ ఇహిజ మిజి దేవుణు బాణిజ్ నెగ్గికెజ్ దోహొకెజె, దేవుణు మిజి దీవిస్తెజె, వన్ను వందిజ్ ఎర్లిసి ఇట్టా మనాన్. 10 అందెజె “నెగ్గి బత్తు, బత్తిదెజ్ సుడఃజినాన్, నెగ్గి రొమ్ము గడఃపైజ్ సుడఃజినాన్ ఎయెన్ బా సెఇ మాటెజ్ వర్లివిండ, అబద్దం మాటెజ్ వర్లివిండ మండ్రెజ్ వలె. 11 వాండ్రు సెఇకెజ్ డిఃసి మండ్రెజ్, నెగ్గికెజ్ కిజి మండ్రెజ్. సమదనమ్ వందిజ్ సుడఃజి అక్కాదె దోహొకెజ్ ఇజి దన్ను వందిజ్ రెబాదెజ్. 12 ఎండనిజ్ ఇహిజ, దేవుణు ఎర్దు సరి ఆతికెజ్ కిని వరిజ్ దేవుణు కావకిజినాన్. వరి పార్లనమ్ కు వెనాన్. గాని సెఇ పణిజ్ కిని వరివెట దేవుణు వన్ను మొకొం కోపం దాన్ ఇడాన్”.

13 మీరు నెగ్గి పణిజ్ కిదెజ్ ఇజి నండొ ఆస ఆజి మహిజ, ఎయెర్ బా బాద కివిర్ గదె. 14 గాని దేవుణు ఎర్దు సరి ఆతికెజ్ కితి వందిజ్ ఉండ్రె వేలా బాద వాతిజ్ బా సర్ల ఆదు. వరిజ్ తియెల్ అమాల్. వరిజ్ బెద్రిమాల్. 15-16 మీ మన్నుదు క్రీస్తుజ్ మీ ప్రబు ఇజి బని కిదు. మరి, మీ నమకమ్ వందిజ్ మిజి వెన్ బాని వరిజ్ నెగ్గెండ వెహైజ్ ఎస్తివలెబా తయార్ ఆజి మండ్రు. గాని సార్లిదాన్, దేవుణుదిజ్ తియెల్ దాన్ వెహైజ్. ఎండనిజ్ ఇహిజ మిజి బెద్రిసినికార్ మిజి దూసిసిని వలె మీ మన్ను దేవుణు ఎర్దు నిపాతి మండ్రెజ్. మీరు క్రీస్తు లోకుర్ ఇజి, నెగ్గి గుణమ్ కు కల్లిజి మనికార్ ఇజి సుడఃజి వారు సిగు ఆదెజ్. 17 సరి ఆతికెజ్ కితి వందిజ్ కన్టం బరిస్తెజ్ ఇజి దేవుణు ఇన్టం ఆతిజ అక్క నెగ్గికాద్. సెఇకెజ్ కితి వందిజ్ కన్టం బరిసిని మున్ను అక్కాదె నెగ్గికాద్. 18 ఎండనిజ్ ఇహిజ క్రీస్తుబా ఉండ్రె నుటునె పావమ్ కు లాగదెజ్ సాతాన్. మజి దేవుణుబాన్ తతెజ్ ఇజి దేవుణు ఎర్దు నీతిమనికాన్ ఆతికాన్ దేవుణు ఎర్దు నీతి సిల్లెండ మహి వరి వందిజ్ సాతాన్. వన్ను ఒడొల్ నస్తార్. గాని దేవుణు ఆత్మ వన్నుజ్ నిక్తాన్. 19 క్రీస్తు ఆత్మ అయా లోకమ్దు తోహా ఆతిమని వరి నడిఃమి సాహండ్రె నువార్త సాటిస్తాన్. 20 మీరు నోపవు కాలమ్దు దేవుణుదిజ్ లోజివిండ మహికార్. నోపవు ఓడః తయార్ కిజి మహివలె దేవుణు విరివందిజ్ ఓరిస్తు మహాన్. గాని ఓడః తయార్ ఆతిజ్ నెగొండార్, ఇహిజ ఎనిమిది మణిసిరె పెరి గడ్డదాన్ తప్రె ఆతార్. 21 యాక బాప్తిసమ్ దిజ్ పొలిత మనాద్. యా బాప్తిసమ్ దానె దేవుణు మిజి రక్తిసి నాన్. యా బాప్తిసం ఒడొల్ సుబ్బరం ఆదెజ్ ఆవిద్. గాని ఏలు దేవుణు ఎర్దు పాపం సిల్లెండ మండ్రెజ్ ఒప్పుకొడఃజినామ్ ఇజి తోరిస్తెజె యా బాప్తిసం. యేసు క్రీస్తు సావుదాన్ నిజిత్తిజ్ మీరు సావుదాన్ తప్రె ఆతిదెర్ ఇజి తోరిస్తెజె. 22 యేసు క్రీస్తు సావుదాన్ నిజితండ్రె పరలోకమ్దు ఎక్కి సాహండ్రె, దూతారిజ, అతికారిజ, సత్తు మన్నివరిజ వన్ను అడ్డి ఇట్టాండ్రె, దేవుణు ఉణెరె పడఃకాద్ బస్తాన్.

4

పేతురు రాస్తి మొదొహి ఉత్తం

1 అందెజె క్రీస్తు, వన్ను ఒడొల్దు కన్టం ఓరిస్తి లెకెండ్ కన్టం ఓరిస్తెజ్. మీరుబా మన్ను తయార్ కిజి మండ్రు. ఎండనిజ్ ఇహిజ ఒడొల్దు కన్టం ఓరిస్తికాన్ పావమ్దు నడిఃవన్. 2 అహిజ ఏలుహాన్ అని సావుదాక, మాములుక లోకుర్ ఆస అని వజ ఆవిద్, దేవుణుదిజ్ ఇన్టం ఆతి లెకెండ్ బత్తిదెజ్. 3 గడిఃస్తి సాహి కాలమ్దు దేవుణుదిజ్ నెసిఇకార్ బత్తిని లెకెండ్ మీరు బత్తిజి మహిదెర్. ఎలాగ ఇహిజ, రంకు బూలాజి, ఒడొల్ వందిజ్ ఆసెజ్ ఆజి, కల్లు ఉణిజి సాసి, సిగు సిల్లెండ డాట్టి కర్లిజిజ, కల్లు విందుజ్ నడఃపిసి, దెయమ్ కాజ్ పూజ కిజి మహిదెర్. 4 ఏలు మీరు వరివెట కూడఃవిండ, వారు కిని వెరి పణిజ్ లొఇ సాన్ ఎండ ఆజినిజ్ వారు బమ్మ ఆజి మిజి దూసిసి నార్. 5 గాని బత్తిని వరిజ్

సాతి వరిజ్ తీర్పు తీరిస్తే తయారీ అజి మని డేవుణుబాన్ వారు బత్తుతి బత్తు, వందిజ్ ఎందనిజ్ నన్ని సెకెజ్ కిజి బత్తుత్తార్ ఇజి వెవ్వాజ్ వలె. ⁶ అందెజి సాతిసోహి నమ్మిత్తి వరిజ్ నువార్త సాటి అజి మహాద్. ఎందనిజ్ ఇహిజి యా బత్తుదు మహివలె లోకాజ్ తీర్పు లెకెండే సాపు వానాద్. గాని సాతి వెనుక దేవుణు బత్తుజిని లెకెండే బత్తుదెజె.

⁷ అహిజి విజు దన్నిజ్ అక్కరి రోస్సు వాజినాద్. అందెజె నెగ్గి బుది కల్లిజి మండ్రు. మన్నుదు అణెని అజి మండ్రు. నస్తివలె మీరు ప్రార్థనం కిదెజ్ అట్టిదెర్. ⁸ అక్కదె అవెద్. విజు దని మున్ను, మని సజతి ఇనిక ఇహిజి, ఒరెన్ మరి ఒరెన్ వన్నిజ్ నెగ్గెండ ప్రేమ కిజి మండ్రు. ఎందనిజ్ ఇ హిజి మహికార్ కితి విజు తప్పజ్ మాటు ప్రేమదాన్ సెమిస్తేజ్ అట్టాట్. ⁹ మొరొ అవండ ఒరెన్ మరి ఒరెన్ వన్నిజ్ డర్గు కిజి సీనికార్ అజి మండ్రు. ¹⁰ ఒరెన్ మరి ఒరెన్ వన్నిజ్ దేవుణు సీతి వరమ్దాన్ తోడె: కిజి మండ్రెజ్. దేవుణు సీతి విజు రకమ్ది వరమ్కు నెగ్గెండ వాడు కొండెజ్. ¹¹ ఎయెన్బా దేవుణు మాట బోదిస్సాన్ ఇహిజి వాండ్రు దేవుణు మాట బోదిస్తేజ్ వలె. ఎయెన్బా మహి వరిజ్ తోడె: కిదెజ్ ఇహిజి దేవుణు సీతి సత్తుదాన్ కిదెజ్ వలె. యేసు క్రీస్తు పేరుదాన్ దేవుణుదిజ్ పొగడె: కల్లిదెజ్ ఇజి యాకెజ్ విజు కిదు. వన్నిజ్ నె అంతు సీల్లెండ ఎల్లకాలం గనమ్ని, సత్తు మనీద్. ఆమెన్.

¹² నాను ప్రేమిసిని తంబెరిజాండె, మీ నమకం ఎలాగ్ మహికార్ ఇజి రుజువ్ కిదెజ్ సిసు నని పెరి క్లమ్కు వానివలె ఇనిక ఇగ్గినాదో ఇజి బమ్మ అమాట్. ¹³ క్రీస్తు మహిమదాన్ యా లోకమ్దు వానివలె మీరుబా గొప్ప సర్ల అజి మండ్రెజ్ ఇజి క్రీస్తు ఓరిస్తి క్లమ్కు లోక మీరుబా కూడ్డి ఓరిసి సర్ల అదు. ¹⁴ క్రీస్తు వందిజ్ ఎయెన్బా మిజి దూసలాడి:తిజి సర్ల అదు. ఎందనిజ్ ఇహిజి గొప్ప పెరికాన్ అతి అత్తు, ఇహిజి దేవుణు అత్తు మీ మున్ను, మనాద్. ¹⁵ మీ లోక ఎయెన్బా ఓరిస్తేజ్ ఇహిజి అక్క ఒరెన్ వన్నిజ్ సప్తి వందిజ్ అవెద్. డోజి కితి వందిజ్ అవెద్. సెన పణి కితి వందిజ్ అవెద్. అఇ వరి వెట ఒడె: ఆదెజ్ అవెద్. ¹⁶ గాని మీ లోక ఎయెన్బా క్రీస్తు లోక అతిదని వందిజ్ ఓరిస్తిజి సిగు అమాట్. గాని క్రీస్తు పేరు అన్నిదని వందిజ్ దేవుణుదిజ్ స్తుతి కిదెజ్. ¹⁷ ఎందనిజ్ ఇహిజి దేవుణు తీర్పు వన్ని లోకర్ లోక మొదొల్నిని కాలం వాత మనాద్. దేవుణుదిజ్ నమ్మిత్తి వరి లోకనె తీర్పు మొదొల్స్తేజి నువార్తదిజ్ లోజిఇతివరి గతి ఇనిక అనాదో. ¹⁸ “దేవుణు ఎద్దు నితి నిజాయితిదాన్ మన్ని వరిజ్ నిసాన్ క్లమ్ వాతిజి దేవుణుదిజ్ నెసికార్ ఎలాకాలం మన్ని సిక్కుదాన్ తప్పె ఆదెజ్ ఒద్దె అట్వెర్ల”, ¹⁹ అందెజె దేవుణుదిజ్ ఇస్టం అతి వజి క్లమ్కు ఓరిస్సికార్ వరి బత్తు, పుట్టిన్ దేవుణుబాన్ ఒపజెప్పెజ్జులె. వాండ్రు నమ్మిదెజ్ తగ్గికాన్. వారు నెగ్గి పణిజ్ కిజి బత్తుజి మండ్రెజ్.

5

పెద్దెలుజి వందిజ్ వెహ్నిని మాటెజ్.

¹ క్రీస్తు క్లమ్కు ఓరిస్తిక నాను సుడె:త. క్రీస్తు ఎసా గొప్ప పెరికాన్ ఇజి తోరిసి గొప్ప జాయ్దాన్ మర్జి వానివలె నానుబా వన్ని జాయ్దు మంజినాలె. అందెజె, మీ లెకెండే ఒరెన్ పెద్దెలి అతి నాను పెద్దెలుజు అతి మిజి దటిసి వెహ్ని. ² గొరెజ్ అడినికాన్ గొరెజి నెగ్గెండ సూణి వజి మీ అడిగి మన్ని దేవుణు లోకాజ్ నెగ్గెండ నడి:ప్పు. బల్లి కిత్తిజ్ అవెద్. పూర్తి మన్నుదాన్ కిదు. దేవుణు ఇస్టమ్దు కూడి:తి లెకెండే సుడె:దు. ఇనికదో లాబం వానాద్ ఇజి ఆస అజి సుడె:మాట్. గాని నెగ్గి మన్నుదాన్ సుడె:దు. ³ మీ అడ్లి మని లోకాజ్ మున్ను గర్దదాన్ ఏలుబడి: కినిక అవెద్. మీ నెగ్గి గుణమ్కు సుడె:జి వారుబా అయాలెకెండే నడి:ని వజి మండ్రు. ⁴ అహిజి గొరెజ్ అడిని వరి లోక పెరి గవ్డుయెన్ అతికాన్ తోరె అనివలె ఎనెజ్బా పాడా:జి సాన్ ఇ మెరిసిని టోపి మిజి దోహ్కాద్.

⁵ అయ వజినె ఇజిరికిదెరా, మీరుబా పెద్దెల్లెజి లోజిజి మండ్రు. ఒరెన్ మరి ఒరెన్ వెట తగిజి మండ్రు. ఎందనిజ్ ఇహిజి “గర్ల అని వరిజ్ దేవుణు ఎద్దిసి నాన్. గాని తగి అతి మని వరిజ్ వన్ని దయా దర్మం సీజినాన్”, ⁶ అందెజె దేవుణు, సరియాతి టయ్ముదు మిజి పెరికాన్ కిదెజ్ ఇజి వన్ని గొప్ప సత్తుమని అతికారమ్దిజ్ తగి అజి మండ్రు. ⁷ మీ విసారమ్కు విజు దేవుణు మున్ను పొక్తు. ఎందనిజ్ ఇహిజి దేవుణు మిజి విజు సీదెజ్ సుడె:జినాన్.

8 మీ మన్నుడు అణసె ఆజి మండ్రు. నెగ్గి బుద్ది కల్లిజి తెలిదాన్ మండ్రు. ఆక్కర్నిని ఉండ్రీ పెరి నొరెన్ లెకెండ్ మిజి విరోదమాతి సయ్యాన్ ఎయెరిజ్ డిఃజ్ దెజి ఇజి రెబాజి బూలాజినాన్. 9 మీ సమకమ్ దిజ్ గటిజి అసి సయ్యానుజ్ ఎద్రిసి మండ్రు. విజు లోకమ్ దు మని సమ్మిత్తికార్ నిన్ని కస్టమ్ కాణ్ బాద ఆజినార్ ఇజి నెసి మండ్రు. 10 గొప్ప దయా దర్మం మన్ని దేవుణు, క్రీస్తు వెట ఎలాకాలం మంజిని జాయ్ దు మంజిని వందిజ్ మిజి కూర్తాన్. మాటు క్రీస్తు వెట కూడితిజ్ యాక జర్గిజినాద్. సెగం కాలం మీరు కస్టమ్ కు ఓరిస్తి వెనిక దేవుణు మిజి విజు దన్ని లోక పూర్తి ఆతికార్ కర్లివండ, సత్తుదాన్ నిల్ ప్పాన్. 11 వన్నిజె అంతు సిల్లెండ ఎలాకాలం గొప్ప సత్తు మనీద్. ఆమెన్.

12 దేవుణు గొప్ప ప్రేమ కిజి తోరిస్తి నిజమాతి దయాదర్మమ్ దు గటిజి నిల్ని మండ్రు, ఇజి నాను రాసిన. వెప్పిన. అయ క్రుపాదు గటిజి నిల్ని మండ్రు ఇజి నాను బతిమాల్తిన. యాక నాను బాగ సమకమ్ ఇడ్డి సిల్వాను దిన్ని వందిజ్ నాను సాసి వెప్పిన. యాక నాను బాగ సమకం ఇడ్డి సిల్వాను ఇని వన్ని కియుదాన్ రాస్సిసిన.

13 మీ లెకెండ్ బబులోను పట్టుమ్ దు దేవుణు ఏర్పాటు కిత్తి సజమ్ దికార్ మిజి వందనమ్ కు వెప్పినార్. నజి మరిన్ లెకెండ్ మని మార్కు మిజి వందనమ్ కు వెప్పినాన్. 14 క్రీస్తు ప్రేమదాన్ ఒరెన్ మరిఒరెన్ వన్నిజ్ ముదు కిజి వందనమ్ కు వెప్తూ. క్రీస్తుబాన్ కూడితి మిజి విజెరిజ్ సమదనం మనీద్.

పేతురు రాస్తే రుండి ఉత్తం

నెల్ల కిబిసినిక

యేసుప్రబుజ్ అపొస్తుడు ఆతి పేతురు యా ఉత్తం రాస్తాన్. పేతురు వన్ని బత్తు అందిదెజ్ డగ్రు ఆతివలె యాక రాస్తాన్ ఇజి బయ్బిల్ వందిజ్ నెస్తికార్ వెహ్సినార్. క్రీస్తు సకం 68 దు క్రీస్తు లోకాజ్ మాలెజ్ కిత్తి నిరో ఇని రోమ వరి పెరి రాజు పేతురుజ్ సపిస్తాన్ ఇజిబా బయ్బిల్ వందిజ్ నెస్తికార్ వెహ్సినార్. యా ఉత్తమ్దు ఇనికెజ్ రాస్తాన్ ఇహిజ, అయ కాలమ్దు సొత్తిమహి తప్పు బోద నెస్తిసిని వరి వందిజ్ జాగర్త మండ్రు ఇజి వెహ్సినాన్. యేసుక్రీస్తు మరజి రెవిన్ ఇజిబా వారు వెహ్సినాని వందిజ్ జాగర్త మండ్రు ఇజినాన్. దేవుణు కనికారమ్దాన్, గెణమ్దాన్ నెగ్రిండ పిరిదు ఇజి రాసినాన్.

1 యేసుక్రీస్తుజ్ పణి కినికాన్ ఆతి, అపొస్తుడు ఆతి సిమెను పేతురు రాసిని ఉత్తం. దేవుణు దయా దర్మమ్దాన్, రక్సిన్సికానాతి యేసు క్రీస్తుజ్ దయా దర్మమ్దాన్ గొ పువిలవాతి నమకం మజి దోహ్దాద్. మజి దోహ్కెత్తి లెకెండె అయ గొప్ప విలువాతి నమ్మకం దోహ్కెత్తి మన్ని వరిజ్ యాక రాసిన్. 2 మిజి దేవుణు దయాదర్మం, నిపాతి, నండో వంతుజ్ ఆజి మనీద్. ఎలాగ ఇహిజ దేవుణుదిజ్ నెసిని దన్నితాన్ వాని గెణమ్దాన్, ప్రబువాతి క్రీస్తుజ్ నెసిని దన్నితాన్ వాని గెణమ్దు పిరిదు.

దేవుణు ఎర్లిస్తి లోకుర్ ఇజి రుజుప్ కిదెజ్.

3 దేవుణు వన్ని గొప్ప జాయ్దాన్ నెగ్రి గుణమ్దాన్ మజి వన్ని వందిజ్ ఏర్పాటు కిత్తాన్. దేవుణు వన్ని గొప్ప సత్తుదాన్ మా బత్తుదిజ్ కావల్స్తికెజ్ విజు సితాన్. దేవుణుదిజ్ బక్తి మన్ని మన్ను సితాన్. యాకెజ్ విజు దేవుణుదిజ్ నెసిని దన్నితాన్ నె మణి తోహ్కె. 4 యా గొప్ప జాయ్దాన్ నెగ్రి గుణమ్దాన్ దేవుణు వన్ని ఒద్దె విలువాతి ఒట్టుజ్ సిత మనాన్. ఎందనిజ్ ఇహిజ అయ ఒట్టుజుణిజ్ దేవుణు గుణం కల్లిజి మండ్రెజ్ అట్టాట్. యా లోకమ్దు సెన ఆసదాన్ మజి సెఎణ్ కిని విజు వన్యా బాణిజ్ తప్రె ఆదెజ్ అట్టాట్.

5-7 అందెజె మీరు నిని వన్యా వందిజ్ అక్కెజ్ దోహ్కెత్తి లెకెండె కన్యబాడిజి మండ్రు. ఇనికెజ్ ఇహిజ మీ నమకం వెట నెగ్రి గుణమ్కు కూడెప్పు. నెగ్రి గుణమ్కు వెట గెణం కూడెప్పు. గెణం వెట మన్ను అణానె ఆజి మంజిని గుణం కూడెప్పు. దన్ని వెట విజు దనిజ్ ఓరిస్తెజ్ మని బుద్ది కూడెప్పు. ఓరిసినిదని వెట దేవుణు వందిజ్ బక్తిమని మన్ను కూడెప్పు. దేవుణు వందిజ్ బక్తి మన్ని మన్ను వెట మహి నమ్మితి వరిజ్ ప్రేమిసిని దన్ని వెట విజేరిజ్ ప్రేమిసిని మన్ను కూడెప్పు. 8 యా గుణమ్కు మీ బత్తుదు పిరిజి ఒద్దె నిండ్రెజి వాతిజి యేసు క్రీస్తుజ్ పుర్తి నెస్తి దనిజ్ అక్కెజ్ పణి కిని. బండెజ్ ఆని వరి లెకెండె ఆజదెర్లె. పణిదిజ్ రెజ వరి లెకెండె మన్ఇదెర్లె. 9 యా గుణమ్కు కల్లిజి నిండ్రెజి మనికార్ గుడ్డి వరి లెకెండె, దూరమ్దు మనికెజ్ తోరెండె ఆనె. ముందాల్ కితి పాపమ్కాణిజ్ నోరె ఆతాప్ ఇజి పోస్సినార్.

10 అందెజె నా తంబెరుజాండె, దేవుణు మిజి ఎర్లిసి, వన్ని లోకుర్ ఇజి కూక్కి ఎర్లిస్తాన్. మీరు అక్క ఒదె నెగ్రిండె రుజుప్ కిదెజ్. నిన్ని పణిజ్ కినికిదెజ్ ఇహిజ ఎస్తవలెబా జారెజి అరెండె నిల్పిదెర్.

11 యా లెకెండె మా ప్రబుని, మజి రక్సిన్సికాన్ ఆతి యేసుక్రీస్తు ఎల్లకాలం మంజిని రాజెమ్దు మజి గొప్ప మర్యాద సీజి కూడెప్పి వలె, మజి సీని అవకాసం తక్కు ఆవిద్.

ప్రవక్తరు దేవుణు మాటెజ్ వెహ్హార్.

12 అహిజ, ఏలు మీరు అస్తిమని దేవుణు వందిజ్ నిజమాతి యా సజతిజ్ మీరు బాగ నెసి కద్దివడ నిల్పి నిదెర్ గాని, మిజి నాను యా సజతిజి వందిజ్ ఎస్తివలెబ ఎత్తు కిబిస్తెజ్ తయార్ ఆజి మంజిన్.

13 నాను సాని దాక యా సజతిజి వందిజ్ మిజి మరి మరి ఎత్తు కిబిస్తెజ్ నా బాజిత ఇజి నాను ఒడెబిజన్. 14 ఎందనిజ్ ఇహిజ, మా ప్రబు ఆతి యేసుక్రీస్తు నజి వెహ్సె లకెండె నాను యా బత్తు బిగినె డెసిని సొండ్రెజ్ వలె ఇజి నెస్సు. 15 మరి నాను సాతి సాహి వెనుక మీరు ఎస్తివలెబా యా సజతిజ్ ఎత్తుకిజి మంజిని వందిజ్ నాను నండో పణికిన్.

16 ఎలాగ ఇహిజ, మా ప్రబువాతి యేసు క్రీస్తుజ్ మని గొప్ప సత్తు వందిజ్, వాండ్రు మరజి వాని వందిజ్ మిజి నెస్సిన్తి వలె, అక్క ఉండ్రీ కత సాన్తరం వలె అక్క ఉండ్రీ కత సాన్తరం వెప్తి లెకెండ అవిద్. గాని వాండ్రు ఎస్సి గొప్ప పెరికాన్ ఇజ మాపు కణకాణిజ్ సుడెతాపె, అక్కాదె మిజి వెప్తాప్. 17 ఎలాగ ఇహిజ, గొప్ప మెరిన్తి జాయ్ కల్లితి మహిమ నిండ్రీతి మహి బాణిజ్ ఉండ్రీ జాటు వాతాద్. ఇనిక ఇహిజ, “వీండ్రు నాను నా నండొ ప్రేమిసిని మరిన్. విన్ని మున్సు, నాను సర్ల ఆజిన. అయా మాటెజ్ బుబ్బాతి దేవుణు బాణిజ్ వాతివలె మరిసి అతి యేసుజ్ గొప్ప పేరు, మహిమ కల్లితాద్. 18 మాపు వన్ని వెట అయా పరిసుదుం అతి గొరొణ్ మున్సు మహివలె ఆగాసమ్దాన్ వాతి యా జాటు మాపె విహాప్.

19 మరి, ఒద్దె నిజమాతి మాటెజ్, ఇహిజ ప్రవక్తరు వెప్తి మాటెజ్ మజి మన్నె, అక్కెజ్ మీరు జాగర్ల విండ్రెజ్. ఉండ్రీ కస్తిమని దివ జాయిదాన్ సీకటిదు మనికెజ్ సుడెదెజ్ అట్టాట్. అయాలెకండెనె ప్రవక్తరు వెప్తి మాటెజ్ జాయ్ వానిదాక మీ గర్భమ్దు ఇడెదు. కోడిజామ్దు తోర ఆని జాయ్ ఆని సుక్క మీ గర్భమ్దు సోనాద్.

20 విజా వన్యాజ్ ఇంక ముకెలం మీరు నెస్సిక ఇనిక ఇహిజ, ప్రవక్తరు రాస్తి మని మాటదు ఉండ్రీ మాటబా వరి సొంత ఆలోసనమ్దాన్ వెప్తి లెకెండ వెహెతార్. 21 దేవుణు మాటెజ్ లోకు వన్నిజ్ ఇస్టం అతి వజ వెప్తికెజ్ ఆఉ. గాని దేవుణు ఆత్మ సత్తుదానె దేవుణు మాటెజ్ లోకుర్ వెప్తార్.

2

తప్పు బోద నెస్సిసిని వరిజ్ వాని నాసనం.

1 గాని అయ కాలమ్దు లోకు నడిమి తప్పు బోద నెస్సిసినికార్బా మహార్. అయ వజనె మీ నడిమి తప్పు బోద నెస్సిసినికార్ వానార్. వారు ఇనిక కినార్ ఇహిజ వన్ని సొంత పాణం సీజి కొటి ప్రబుజ్ నెక్క టొక్కార్ గొప్ప నాసనమ్దు ఒని ఆఇ బోదెజ్ డాప్సి నెస్సిసినార్. అయావజనె వరిజ్ వారి వెటనె వాని నాసనం తపె ఆజినార్. 2 నండొండార్ వీరు నెస్సితి సిగు ఆని పణిజ్ వెంజి ఆహా నడినార్లె. వరి సెన పణిజ్ సుడెజి క్రీస్తుజ్ని వాండ్రు నెస్సిన్తి నిజమతి దన్ని వందిజ్ లోకుర్ దూసిస్సార్. 3 యా తప్పు బోద వెప్సికార్ డబ్బుదిజ్ గొప్ప ఆస ఆజి నిజం ఆఇ మాటెజాణిజ్ మిజి మొసెం కినార్. వరిజ్ ముందాలెనె తీర్పు సీదెజ్ తయార్ ఆత మనాద్. వరిజ్ నాసనం తపెవిండ వానాద్.

4 ఎలాగ ఇహిజ, పాపం కితి దూతారిజ్ డిన్ఎండ తీర్పు వాని దాక ఇడెదెజ్ దేవుణు వరిజ్ ఎలాకాలం సిసు మంజిని బాడిదు టొక్కాన్. సీకటి మని సాలం లొఇ తొహిస్త ఇట్టాన్. 5 మరి, పూర్బకాలమ్దు పాపం కిజి మహి లోకాజి సిక్కు దాన్ తప్సిఎండ, దేవుణు వరి మున్సు పెరి గడ్డ తపిస్తాన్. గాని నీతినిజాయితి వందిజ్ వెప్సి మహి నోహాహుజ్ని, వన్ని వెట మహి ఏడగురుదిజ్ గడ్డదాన్ తప్తిస్తాన్. 6 మరి సాదొమ, గొమ్మెర్ల ఇని పట్నమ్కాన్ మహికార్ పాపం కిజి మహిజ్ దేవుణు వరిజ్ తీర్పు సితండ్రె సిసుదాన్ అయ పట్నమ్కాజ్ సుప్తాన్ దేవుణుదిజ్ ఇస్టం ఆఇ లెకెండ సెఇ పణి కిని వరిజ్ వాండ్రు ఇనిక కినాన్ ఇజ ఉండ్రీ గుర్తు లెకెండ వరిజ్ ఇడ్డాన్. 7 నీతి నిజాయితిదాన్ పణి కితి లోతు వన్ని సురుల జర్రిజి మహి గొప్ప సిగ్గు అతి పాపం పణిజ్ సుడెజి గొప్ప బాద ఆజి మహిజ్ దేవుణు వన్నిజ్ గెల్పిస్తాన్. 8 ఎందనిజ్ ఇహిజ అయ నీతి మనికాన్ వరి గొప్ప సెఇ పణిజ్ సుడెజి అక్కెజ్ వెంజి రోజు వన్ని నెగ్గి మన్సుదాన్ గొప్ప బాద ఆజి మహాన్. 9 దేవుణు మున్సు బక్తి మన్ని వరిజ్ వాని పరిసెజాణిజ్, వరిజ్ గెల్పిస్తెజ్ దేవుణు నెసినాన్. దేవుణు ఎర్దు నీతి నీజాయితి సిల్లెండ నడిని వరిజ్ సిక్కు సీజి తీర్పు దినమ్దాక ఇడ్డెజ్బా నెసినాన్. 10 సెఇ ఆలోసనమ్దాన్ పుట్టి ఒడెల్ వందిజ్ మన్ని సెఇ ఆనెజ్ వందిజ్ బత్తిజి దేవుణు అతికారమ్దిజ్ లోజిఎండ దన్నిజ్ నెక్సిటొక్తి వరిజ్ సిక్కు సీదెజ్ దేవుణు ఇడ్డ మనాన్. యా తప్పు బోద నెస్సిసినికార్ గొప్ప గర్ల ఆజి ఇనిక కిదెజ్బా తయార్ ఆనికార్. వరి సొంత ఇస్టమ్దాన్ విజా కినార్. గొప్ప బమ్మ అతి వనక వందిజ్ సెఇకెజ్ వెప్తాజ్బా తియెల్ ఆఇకార్ వీరు. 11 దేవుణు దూతార్ గొప్ప సత్తు మనికార్ ఇహిజ్బా దేవుణు ముందాలె వినక వందిజ్ వరిజ్ దూసిన్ఎర్. 12 గాని యా తప్పు బోద నెస్సిసినికార్, వారు నెసెఇ వన్యా వందిజ్బా దూసలాడ్వార్. వారు బుద్ధి కిదెజ్ ఆటెఇ మూర్కతం మన్ని జంతుజ్ లెకెండె ఆలోసనం కిదెజ్ ఆటెవర్.

వేట కినికార్ వనకాజ్ అసి సప్పి లెకెండ వీరుబా మురకతం మన్ని అడవి జంతుజ్ లెకెండ పాడాన సొనార్. ¹³ వారు కిజిని నాసనమ్మదిజ్ వరిజ్ మర్జి నాసనం వాజినాద్. ఒడోల్ ఆస వందిజ్ సిగు ఆని ఇని పణిబా కిదెజ్ సర్ల ఆజి వేడెకానె అయా సెఇ ఆసెజ్ సొన్నిసినార్. మీరు కిజిని ప్రేమ విందుజ లోఇ వారుబా కూడ్డి మజినార్. వారు మన్ను రుజ్ని లెకెండ ఉణిజి తింజి ఒడోల్దిజ్ సుకం కిబిసినార్. తెలొని పాతాదు మని మస సిగు తపిస్సి లెకెండ వీరుబా సిగు తపిసినార్. ¹⁴ బోదెకాజ్ సుడోజి వనక వెట ప్రాపం కిదెజ్ ఇజి ఆస ఆజి మంజినార్. పాపం కిదెజ్ మని ఆస ఎసెజ్బా డింఎర్. ఇతాల్ అతాల్ మన్ను మన్ని వరిజ్ వారు ఆసెజ్ తోరిసి ఆఇసరి నడిపెసినార్. వరి వందిజె లాబం తప్పె ఆదెజ్ సుడోజి మంజినార్. దేవుణు వరిజ్ సిక్స సీనాన్. ¹⁵ వారు సరిఆతి బత్తు బత్తుఎండ, బెయొరి ఇని వన్ని పొటదికాన్ బిలాము ఇని వన్ని లెకెండ ఆత మనార్. ఎలాగ ఇహిజ తప్పు కిత్తి వందిజ్ దోహక్కి డబ్బు వందిజ్ ఆజి బిలాము సరి తప్ప సొహాన్. ¹⁶ గాని అయ బిలాము కితి సెఇ పణిదిజ్ వాని గాడోదె అడ్డు కితాద్. మాటెజ్ నెసి అయ గాడోదె లోకు లెకెండ వర్గిజి బిలాము ఇని ప్రవక్త ఒడిబితి వెరి పణిదిజ్ అడ్డు కితాద్. ¹⁷ నిని బోద కినికార్ ఏరు సీలి ఊట లెకెండ, సుర గాలి ఎగ్రిసి ఒని మొసాప్ లెకెండె విరి వందిజ్ గొప్ప సీకటి మని బాడ్డి దేవుణు తయార్ కిత మనాన్. ¹⁸ ఎండనిజ్ ఇహిజ యా తప్పు బోద నెస్సినికార్ పణిదిజ్ రెఇ బడాయ్ మాటెజ్ వర్గిజి అయ మాటెజాణిజ్ వరి ఒడోల్ ఆసెజ్ సొన్నిస్సెజ్ సుడోజినార్. తప్ప సరి నడిఃని వరి లోఇహాన్ ఏలె తప్పె ఆతి లోకాజ్, వీరు మరి తప్పు సరి నడిపెసినార్. ¹⁹ ఇని దని అడ్డిబా మన్ఎండ పూర్తి విడుదల మన్నిబాన్ ఒనాప్ ఇజి వీరు వెప్పొ మంజినార్. గాని వీరి నాసనం తపిసిని పాపమ్దిజ్ తోహా ఆత మనార్. ఎండనిజ్ ఇహిజ ఒరెన్ ఇని దనిజ్ గెల్స్తెజ్ అటఎండ మంజినాండ్రె, దనిజె వెటిపణి మణిసి వజ అడిఃగి మంజినాన్. ²⁰ మా ప్రబుని, రక్కిన్నాన్ ఆతి యేసు క్రీస్తుజ్ బాగ నెస్తి వెనుక, యా లోకమ్ది సెఇ వన్యాణిజ్ తప్పె ఆతి వెనుక, మరి అర్గిజి అకెజ్ వన్నిజ్ అడిగి ఇట్టిజి వారు ముందాల ఆతిమహి దన్నిజ్ ఇంక ఒద్ది సెఇకార్ ఆనార్. ²¹ దేవుణు బాణిజ్ వాతి ఆడ్ర వరిజ్ ఒపజెవె ఆతి వెనుక అక్క తప్పి సొహార్. ఆహా తప్పిసొని దన్నిజ్ ఇంక అయ నీతి నిజాయితీ మన్ని సరి వందిజ్ నెన్ఎండ మంజినిక ఇహిజానె వరిజ్ నెగెత మహాద్ మరి ²² “నుకుడిః అది కక్కిక మరి మర్జి తింజినాద్”, “ఏరుదాన్ నొరె ఆతి పండ్రి మరి బుర్లదు నూడ్డాదెజ్ సొన్నినాద్”, ఇజి వెప్తి మని మాటెజ్ తప్ప సరిదు మప్తి సొహి విరి వందిజ్ నిజం ఆజినాద్.

3

ప్రబు మర్జి వాని దినం.

¹ నాను ప్రేమిసినికిదెరా, తొలిత ఉండ్రీ ఉత్రం రాస్త. మీరు ముందల్ నెస్తిమన్ని వనకాజ్ ఎత్తు కిబిస్సెజ్ ఏలు నాను మిజి మరి ఉత్రం రాసిన. కల్లిసిల్లి మీ మన్నుదిజ్ ఉసార్ కిబిస్సెజ్ ఇజి యా రుండి ఉత్రమకు రాసిన. ² దేవుణు ప్రవక్తరు పూర్బకాలమ్దు వెప్తి మాటెజ్, మరి మా ప్రబుని రక్కిన్నాకానాతి యేసుక్రీస్తు మీ అపొస్తూడుర్ సిత్తి ఆడ్రెజ్ మిజి ఎత్తు కిబిస్సెజ్ ఇజి నాను ఆస ఆజిన.

³ ముకెలమాతి ఉండ్రీ సజతి మీరు అర్దం కిజి మండ్రు. ఇనిక ఇహిజ, కడెవెరి రోస్కాజ్ సెగొండార్ వెక్కిసికార్ వానార్. వారు వరి ఒడోల్లి సెఇ ఆసెజ్ సొన్నిసి మంజినార్. వారు మిజి లివాల కీనార్.

⁴ వారు ఇనిక వెహ్సార్ ఇహిజ, “వాండ్రు వానన్ ఇజి ఒట్టు కితిత్తాన్గదె. ఎసెజ్ వానన్లె? మా అనిగొగొర సాత సొహార్. గాని ఏలుదాక వాండ్రు వాదెజ్ సిల్లె. యా లోకం పుట్టిబాణిజ్ అసి విజు యా లెకెండ మనాద్, ఇని తేడ సిల్లెద్”, ఇజి వెహ్సార్. ⁵ గాని పూర్బకాలమ్దు దేవుణు వన్ని మాటదాన్ ఆగాసమ్దిజ్ బూమిదిజ్ తయార్ కితాన్. యా బూమి ఏరుబాణిజ్ తయార్ ఆతాద్. ఏరు వెట తయార్ ఆతాద్ ఇజి నెస్తిమహికెజ్ వారు పొస్సెజె ఇజి సుడోజినార్. ⁶ వన్ని మాటదానె పెరిగడ్డ వాజి అయ ఏరుదాన్ అయావలె మహి లోకం విజు ముడుఃగితాదె పాడాతా సొహాద్. ⁷ దేవుణు అయా మాటదానె ఏలు మని ఆగాసమ్దిజ్ బూమిదిజ్ సిసుదాన్ నాసనం కిదెజ్ తీర్పు కిని రోజుదాక ఇట్టా మనాన్. దేవుణు వందిజ్ బక్కిసిల్లి లోకుర్ అయావలె పాడాజి సొనార్.

⁸ నాను ప్రేమిసిని తంబెరుజాండె, దిని వందిజ్ పొస్కాట్. ప్రబు ఎద్దు ఉండ్రీ రోజు వెయి పంటెజ్ లెకెండ మనాద్. వెయి పంటెజ్ ఉండ్రీ రోజు లెకెండ మన్నె. ⁹ ప్రబు ఒట్టు కితి లెకెండ మర్జి

వాదెజ్ అలన్యం ఆజినాద్ ఇజి సెగొండార్ ఒడెబిజినార్. గాని ఎయెర్బా పాడాజి సాన్ఎండ, విజేరె పాపమ్కు డిసి మన్సు మారిస్తెజ్ ఇజి మీ వందిజ్ ఓరిస్త మనాన్.

10 గాని ప్రబు మర్జి వాని దినం తవ్ఎండ వానాద్. ఒరెన్ డొజారి ఎస్తివలె వానంత్తొ ఇజి నెన్ఎండ వాని లెకెండ వానాద్. నస్తివలె ఆగాసమ్దు దీడిజిని వలె సిల్లెండ ఆనె. ఆగాసమ్దు మని విజు, సిసుదాన్ వేనె సానె. బూమి మున్సు మనికెజ్ విజు వేనె సానె.

11 విజు యా లెకెండ పాడానె సానె. అందెజె మీరు దేవుణు వందిజ్ కేట అతి లోకుర్ ఆజి దేవుణు వందిజ్ బక్తిమన్ని లోకుర్ ఆజి బత్తిదు. 12 దేవుణు వాని రోజు వాదెజ్ ఇజి మీరు ఎద్దు సుడెజినిదెర్. అయా దినం బేగెనె వాదెజ్ ఇజి మీరు గటిజ పణి కిదు. అయ దినమ్దు ఆగాసమ్కు దని లోఇ మనికెజ్ విజి సిసుదాన్ వేనె సానె. అయ సిసు వేడిదిజ్ విజు కర్జిజి సానె. 13 గాని దేవుణు ఒట్టు కితి నని కొత్త ఆగాసమ్దిజ్, కొత్త బూమిదిజ్ మాటు ఎద్దు సుడెజినాట్. బానె విజు నీతి నజాయితి పూర్తి మంజినాద్లె.

14 అందెజె నాను ప్రేమిసినికిదెరా, మీరు ఇని తపు సిల్లెండ, ఇని పాపమ్బా సిల్లెండ దేవుణు ఎద్దు నండొ కన్బాడిజి మండ్రు. దేవుణు వెట నిపాతిదాన్ మండ్రు. ఎందనిజ్ దేవుణు ఒట్టు కితి మన్ని దన్నిజ్ మీరు ఏద్దు సుడెజినిదెర్. 15 యాక నెస్సు. దేవుణు మా వందిజ్ ఎందనిజ్ ఓరిస్త మనాన్. ఇహిజ మాటు పాపం డిసి మన్సు మారిస్తెజె ఇజి. మాటు ప్రేమిసిని అన్న పవులుబా దేవుణు సీతి గెణమ్దాన్ వినుక వందిజ్ రాస్త మనాన్. 16 పవులు రాస్తి విజు ఉతరమ్క లోఇ యా లెకెండెనె రాస్త మనాన్. వన్కా లోఇ సెగం అర్దం కిదెజ్ కస్తం అతికెజ్. వనక వందిజ్ నెన్ఇకార్, దేవుణు మున్సు మన్ని నమకమ్దు ఇత్తాల్ ఆత్తాల్ దుజ్నికార్ అయ మాటెజ అర్దం మారిసినార్. మహి దేవుణు మాటెజ లోఇ మన్ని సెగమ్కుబా మారిసినార్. దిన్ని వందిజ్ వారు నాసనం ఆన సానార్.

17 నాను ప్రేమిసినికిదెరా, మీరు యా సజతిజ్ ముజాలె నెస్తి మనిదెర్. అందెజె జొగర్త మండ్రు. దేవుణు రూలుజ లోజిఇకార్ వెప్పిని తపు బోదెజాణిజ్ మొసిం కిబె ఆమాట్. ఎందనిజ్ ఇహిజ వరి బోదెజ్ మీ స్తిరం అతి మన్నిజ కర్లిస్సాద్. 18 గాని మీరు మా ప్రబు రక్కిన్నికాన్ అతి యేసు క్రిస్తు సీత్తి వన్ని దయా దర్మమ్దాన్, గెణమ్దాన్ నెగ్రెండ పిరిజి మండ్రు. వన్నిజ్ ఏలుని, మరి ఎల్లకాలం గవ్దం కల్లిపిద్. ఆమెన్.

యోహాను రాస్తీ మొదోహి ఉత్రం

నెల్ల కిబిసినిక

యేసు క్రీస్తు అపొస్తుడు అతి యోహాను యా ఉత్రం రాస్తాన్. వాండ్లు యా ఉత్రం యేసుప్రబుజ్ నమ్మితి వరిజ్ రాస్తాన్. యేసుప్రబు సాజి నిజితి వెనుక అరువయ్ పంటిజ్ డాట్టాద్. యోహాను డొక్క అత మహాన్. మహి స్తీసూర్ ఏజేరె సాత సాహార్. అయావలె బానె మహి సంగమ్కాజ్ యోహాను నడిపిసిని వన్ని లెకెండె మహాన్.

బత్తు అతి మాట

¹ దేవుణు మాట అతి వన్ని వందిజ్, నాను మిజి రాసిన. వాండ్లు దేవుణు వెట అతు సిల్లి బత్తుకు సినికాన్. వాండ్లు యా లోకం పుట్వెండ ముజాల్ మహాన్. గాని వాండ్లు యా లోకమ్దు వాతిజ్ మాపు వన్నిజ్ వెహాప్. మాపు వన్నిజ్ సుడఃతాప్. మాపు వన్నిజ్ బెస్తామహాప్. మా కికాణిజ్ వన్నిజ్ ముట్టమహాప్. అయాక మిజి నెన్పిసినాప్. ² బత్తు సీని వినిజ్ దేవుణు మా నడిపిసి పొక్తాన్. మాపు వన్నిజ్ సుడఃతాప్. మాపు సుడఃతిజ్ వన్నివందిజ్ మిజి నిజం వెప్పినాప్. బత్తు సీని వాండ్లు ఎల్లకాలం మంజి బత్తు. ఇజి మిజి నెస్తిస్తాప్. వాండ్లు ముందాహాన్ అసి బుబ అతి దేవుణుబాన్ మహాన్. ఏలు వన్నిజ్ దేవుణు మజి తోరిస్తాన్. ³ మాపు సుడఃతి వన్ని వందిజ్, వెహాప్ వన్ని వందిజ్ మిజిబా వెప్పినాప్. ఎందనిజ్ ఇహిజ మిరు వన్నిజ్ నమ్మిదెజ్. ఆహె మా బాన్ కూడ్డి మండ్రెజ్ ఇజి. మాపు బుబ్బ అతి దేవుణు వెట, మరిన్ అతి యేసు క్రీస్తు వెట కూడిత మనాప్. ⁴ మీరుబా ఆహె కూడితిజ మా సర్ద పూర్తి ఆనాద్లె. అందెజె మాపు ఇకెజ్ రాసినాప్.

జాయ్దు నడినిక

⁵ అహిజ యేసు క్రీస్తు మజి వెహి మాటెజ్ ఏలు మిజి వెప్పినాప్. యాకదె మాట. అక ఇనిక ఇహిజ దేవుణు జాయి లెకెండె మనాన్. పూర్తి నెగ్గికాన్. వన్ని లో సికాటి అనల సిల్లెద్. ఇని కల్తిబ సిల్లెద్. ⁶ అందెజె మాటు దేవుణు వెట కూడిత మనాట్ ఇజి వెప్పి మా లోక సీకాటి మని లెకెండె బత్తితిజ మాటు అబద్దం వర్గిజినికాట్. దేవుణు నెన్పిస్తి నిజమాతి సరిదు నడినికాట్ అవెట్. ⁷ గాని దేవుణు విజు దన్ని లోక జాయ్ తోరిసిని లెకెండె మాటు విజు పణిజ లోక జాయ్ తోరిస్తిజ, మాటు నమ్మితి వరి వెట కూడ్డి మంజినాట్. మరి దేవుణు మరిసి అతి యేసుప్రబు నల్ల, మాటు కిజిని విజు పాపమ్కాణిజ్ మజి సుబరం కిజినాద్. ⁸ మాటు ఇని తప్పబా కినికాట్ అవెట్ ఇజి వెహిజ మజి మాటె మోసం కెబె ఆజినాట్. ఎందనిజ్ ఇహిజ దేవుణు నెన్పిస్తి వన్ని నిజమాతి మాట వజ మాటు కిదెజ్ సిల్లె. ⁹ గాని మాటు తప్ప కితాట్ ఇజి దేవుణుబాన్ ఒప్పుకోటిజ దేవుణు మా లోక మని సెఇకెజ్ విజు లాగ్టి పొక్తాండ్రె సుబరం కినాన్. ఎందనిజ్ ఇహిజ సెమిస్తి ఇజి దేవుణు మాట వెహ్తా మనాన్. వాండ్లు నమ్మిదెజ్ తగ్గినాన్. నాయం మనికాన్. వెహి వజ కినికాన్. ¹⁰ మాటు తప్ప కిజికాట్ ఇజి వెహిజ దేవుణు అబద్దం వెప్పికాన్ ఇజి మాటు వెప్పినాట్. మాటు ఆహె వెహిజ దేవుణు వెహి మాట అస్సికాట్ అవెట్. ఎందనిజ్ ఇహిజ విజెరె లోకుర్ పాపం కిత్రార్ ఇజి దేవుణు వెహ్తా మనాన్గదె.

2

¹ నజి కొడోరె లెకెండె మీరు, అందెజె మిజి రాసిన. మీరు పాపం కిదెజ్ అవెద్ ఇజి యా సజతిజ్ మిజి రాసిన. గాని ఎయెనబా పాపం కిత్రాన్ ఇహిజ దేవుణు అతి దేవుణుబాన్ మా వందిజ్ వెప్పికాన్ ఒరెన్ ఒపిసినికాన్ మనాన్. విరి పాపమ్కు సెమిన్అ ఇజి వాండ్లు వెహ్తాన్. వాండ్లు నీతి నిజాతి మనికాన్ అతి యేసు క్రీస్తునె. ² వాండ్లు మా పాపమ్కు సాన్పిస్తిజ్ పూజ అతికాన్. వాండ్లు పూజ అతిజ్ దేవుణు మా పాపమ్కు సెమిస్తిజ్ అట్నాన్. మా పాపమ్కాజ్ వందిజ్ ఉండ్రె అవెద్. యా లోకమ్దు విజెరి పాపమ్కు వందిజ్ పూజ అతికాన్. ³ మాటు దేవుణుజ్ నెస్తికాట్ ఇజి మజి ఎలాగ తెలిజినాద్. దేవుణు మజి నీతి ఆడ్రెజ లోజితిజనె తెలినాద్. ⁴ నాను దేవుణుదిజ్ నెస్తి ఇజి వెప్పి, దేవుణు నీతి ఆడ్రెజ లోజికాన్ అబదం వెప్పికాన్. దేవుణు నెన్పిస్తి నిజం అతి మాటెజ వాండ్లు

లోజీఎన్. 5-6 దేవుణు వెహ్నీ మాటదిజ్ ఎయెన్బా లోజీతిజు, దేవుణు మున్సు వన్నిజ్ పూర్తి ప్రేమ మనాద్ ఇజి తోరిస్తాన్. దేవుణు వెట కూల తోహ్తామన ఇజి వెహ్నీకాన్, యేసు ప్రబు నడిఃతి లెకెండ దేవుణుదిజ్ లోజీజి నడిఃదిజ్. ఆహె దేవుణు వెట కూడఃజి మంజినాట్ ఇజి మాటు నెస్తాట్. 7 నాను ప్రేమిసినికిదిరా, నాను ఉండ్రీ కొత్త ఆడ్ర మిజీ రాన్ఎ. గాని ముజాల నెన్పిన్సి ఉండ్రీ పడఃయ్ ఆడ్రనె రాసిన. అయా ఆడ్ర మీరు క్రీస్తు లోకు ఆతి బాణిజ్ అసి నెన్సికదె. అయ ఆడ్ర మీరు వెహ్నీమని దేవుణు మాటనె. 8 గాని నాను ఏలు రాసిని మాట కొత్త ఆడ్రనె. ఎలాగ ఇహిజ యేసుప్రబు వన్ని బత్తుదు యా ఆడ్ర తోరిస్తాన్. మీ బత్తుదుబా మీరు తోరిన్సిదెర్. ఎందనిజ్ ఇహిజ మీ లోఇ సీకటి లెకెండ మని పాపం ఏలు సొస్సినాద్. జాయ్ లెకెండ మని నిజమాతికెజ్ మీ లోఇ వాజినె.

9 జాయ్దు నడిఃజిన ఇజి వెహ్నీ ఒరెన్, క్రీస్తుజ్ నమ్మిత్తి వన్నిజ్ దూసిన్సికాన్ ఇహిజ వాండ్రు ఏలుబ సీకటిదునె నడిఃజినాన్. 10 మరి ఒరెన్ క్రీస్తుజ్ నమ్మిత్తి వన్నిజ్ ప్రేమిన్సికాన్ ఇహిజ వాండ్రు జాయ్దు నడిఃజినాన్. వన్ని బత్తుదు పాపం కిబిన్సిక ఇనికబ సిల్లెద్. 11 మహివరిజ్ పగ ఆతికాన్ సీకటిదు మంజి సీకటిదు నడిఃజినాన్. ఎంబె సొన్సినాండ్రొ ఇజి వాండ్రు నెన్ఎన్. ఎందనిజ్ ఇహిజ సీకటిదు వన్నిజ్ గుడ్డి వన్ని లెకెండ కితాద్. 12 నాను ప్రేమిసిని బయిరాండె, క్రీస్తు మీ వందిజ్ సాతిజ్ దేవుణు మీ పాపమకు నెమిస్తాన్. అందెజె నాను యాకెజ్ మిజీ రాసిన. 13 బుబ్బురాండె, దేవుణు ఇనికబా పుటిన్ఎండ ముజాల మహి యేసుక్రీస్తుజ్ మీరు నెన్సిదెర్. అందెజె నాను మిజీ రాసిన. దజ్డారండె, మీరు సెఇ బుద్ది కల్గితి సయ్తానుజ్ గెలిన్సిదెర్. అందెజె నాను మిజీ రాసిన. నాను ప్రేమిసిని బయిరండె, బుబ్బు ఆతి దేవుణుదిజ్ మీరు నెన్సిమనిదెర్. అందెజె నాను మిజీ రాసిన. 14 అందెజె నాను మిజీ రాసిన. దజ్డారండె, దేవుణు మాట మీ లోఇ మనిజ్ మీరు సత్తుమనికిదెర్ ఇజి తోరిన్సిదెర్. మీరు సయ్తనుజ్ గెలిన్సి మనిదెర్ అందెజె మిజీ రాసిన.

లోకమ్దు మని వనకాజ్ ప్రేమ కిమాట్

15 యా లోకమ్దు మని వనక మున్సు మన్సు ఇడ్యాట్. యా లోకమ్ది బత్తుదిజ్ ప్రేమిన్మాట్. ఎందనిజ్ ఇహిజ యా లోకమ్దిజ్ ప్రేమిన్సి వన్నిజ్ దేవుణు మున్సు ప్రేమ సిల్లెద్. 16 ఎందనిజ్ ఇహిజ, యా లోకమ్దికెజ్ విజు దేవుణు బాణిజ్ వానికెజ్ ఆఉ. అక్కెజ్ ఇనికెజ్ ఇహిజ ఇనికెజ్ ఇనికెజ్ కిదెజ్ ఇజి ఆస ఆనాదో, అక్కెజ్ విజు కిదెజ్ ఇజి ఒడఃబినిక, మరి, కణకెబిణిజ్ సుడఃజినికెజ్ విజు కావాలి ఇజి ఆస ఆనిక, మరి, ఆస్తి కల్గితిమని వందిజ్ గర్ర ఆనిక, నినికెజ్ యా లోకమ్దిజ్ ప్రేమ కినివలె వానె. 17 యా లోకమ్ది లోకుర్ ఆస ఆనికెజ్ విజు సిల్లెండ ఆనెలె. గాని దేవుణుజ్ ఇస్సం ఆతివజు నడిఃనికాన్ ఎలా కాలం బత్కినాలె.

క్రీస్తుజ్ ఎద్రిన్సికార్ వానార్

18 నాను ప్రేమిసిని బయిరండె, లోకం అందిని కడిఃవేరి దినమ్కు ఆజినె. కడిఃవేరి దినమ్కాజ్ క్రీస్తుజ్ ఎద్రిన్సికాన్ వానాన్ ఇజి మీరు నెన్సిదెర్ గదె. అహిజ ఏలు క్రీస్తుజ్ ఎద్రిన్సికార్ నండొండార్ సోత మనార్. అందెజె కడిఃవేరి దినమ్కు ఆతె ఇజి మాటు నెస్తాట్. 19 వారు మా బాన్కూడిఃత మహార్. గాని డిఃస్త సాహార్. ఎలాగ ఇహిజ వారు మా లోకాజ్ నెందితికార్ ఆవర్. వారు మా బాన్ మంజినికార్ ఇహిజ మా వెటనె కూడిఃజి పాడ్డి మహార్మరి. గాని మజి డిఃస్త సాహార్, మజి నెందితికార్ ఆవర్ ఇజి వారు తోరిస్తాన్. 20 గాని క్రీస్తు షోక్తి దేవుణు ఆత్మ మిజి మనాన్. అందెజె మీరు విజెదెరి నిజమాతికెజ్ నెసినిదెర్. 21 మీరు నిజం నెన్ఇదెర్ ఇజి నాను యాక రాన్సిక ఆవద్. నిజమాతికెజ్ మీరు నెసినిదెర్. అందెజె నాను రాసిన. నిజమాతి దని లోఇ అబద్దం ఆతి బోద సిల్లెద్ ఇజి మీరు నెన్సిదెర్. అందెజె నాను రాసిన. 22 యేసు, దేవుణు షోక్తి క్రీస్తు ఆవన్ ఇజి వెహ్నీకాండ్రె అబద్దం వెహ్నీకాన్. అహు వెహ్నీనికాన్ క్రీస్తుజ్ ఎద్రిసినికాజ్. వాండ్రు బుబ్బు ఆతి దేవుణుదిజ్, మరిసి ఆతి క్రీస్తుజ్ నెక్కి షోక్సినికాన్. 23 దేవుణు మరిసి ఆతి యేసుక్రీస్తుజ్ నెక్కిషోక్సినికాన్ ఎయెన్బా బుబ్బు ఆతి దేవుణుదిజ్బ నెక్కిషోక్సికాన్. మరిసి ఆతి యేసుక్రీస్తుజ్ డగ్రు కినికాన్ బుబ్బు ఆతి దేవుణుజ్బా డగ్రు కిజినాన్. 24 యేసు క్రీస్తుజ్ నమ్మిత్తి బాణిజ్ అసి మీరు వెహి మనికెజ్ విజు మీ మన్సుదు నెగ్రెండ అసి మండ్రెజ్. ఆహె నెగ్రెండ మీ మన్సుదు మహిజ, మీరుబా మరిసి ఆతి యేసు క్రీస్తుబాన్, బుబ్బు ఆతి దేవుణుబాన్ కూడఃజి మంజినిదెర్. 25 మాటు ఆహె వన్నిబాన్ కూడఃతి మహిజ, మజి సిన ఇజి యేసు

ఒట్టు కితి ఎలా కాలం బత్తుని బత్తు మజి దోహక్కాద్. ²⁶ మిజి మోసం కిదెజ్ నూణి వరి వందిజ్ ఇకెజ్ నాను రాసిన. ²⁷ క్రీస్తు పొక్తి దేవుణు అత్తు మీ లోఇ మనాద్. అందెజి మరి ఎయెనబా మిజి నేరప్పిస్తెజ్ అవ్సరం సిల్లెద్. ఎందనిజ్ ఇహిజ దేవుణు అత్తు పూర్తి నిజమె. ఇని అబద్దం సిల్లెద్. దేవుణు అత్తునె మీరు నెస్తెజ్ మని విజు వన్కా వందిజ్ నేరప్పిస్తాన్. అందెజి దేవుణు అత్తు నెన్ప్పిస్తె లెకెండ్ నె మీరు క్రీస్తు బాన్ నిల్పి మండ్రు.

మాటు దేవుణు కొడోర్

²⁸ అందెజి నాను ప్రేమిసిని నా బయరండె, క్రీస్తుబాన్ నిల్పి మండ్రెజ్. ఎందనిజ్ ఇహిజ వన్ని వెట నిలేసి మహిజ క్రీస్తు మరజి వానివలె వన్ని ఎద్దు సిగు అవిండ దయరమ్దాన్ నిలేదెజ్ ఆనాద్. ²⁹ దేవుణు నీతి నిజాయితీ మనికాన్ ఇజి మీరు నెస్తెదెర్. అహిజ దేవుణు వెప్తా వజ కిని ఎయెనబ దేవుణు కొడో ఇజి మీరు నెస్తెదెర్.

3

¹ బుబ్బు ఆతి దేవుణు మజి నండొ ప్రేమిస్తెజ్ మాటు దేవుణు కొడోర్ ఇజి కూకె ఆజినాట్. నసా దేవుణు ప్రేమ మా ముస్కు మంజినాద్. మాటు దేవుణు కొడోర్ నె. గాని దేవుణుదిజ్ నమ్మిఇకార్, బుబ్బు ఆతి దేవుణుదిజ్ నెన్ఎర్. అందెజి మాటు దేవుణు కొడోర్ ఇజి వారు అర్దం కివెర్. ² నాను ప్రేమిసినికిదెరా, ఏలు మాటు దేవుణు కొడోర్ ఆత మనాట్. మాటు ఇనిక ఆనాట్లె ఇజి దేవుణు ఇంక మజి తోరిన్ఎతాన్. గాని యేసు క్రీస్తు తోరి అనివలె వాండ్రు మని లెకెండ్ మాటుబ అనాట్లె ఇజి నెన్నాట్. ఎందనిజ్ ఇహిజ వాండ్రు మనిలెకెండ్ మాటు వన్నిజ్ నుణాట్లె. ³ యేసు క్రీస్తు తోరి అని వందిజ్ ఎద్దు నుడోజిని ఎయెనబా వని వజ ఆన ఆజి పాపం డిసిని బతేకిజినాన్. ఎందనిజ్ ఇహిజ క్రీస్తు పాపం సిలికాన్. ⁴ పాపమ్కు కిజినె మంజినికాన్ ఎయెనబా దేవుణు అడ్రెజ్ నెక్కిపొక్కినికాజ్. పాపం ఇనిక ఇహిజ, దేవుణు అడ్రెజ్ నెక్కి పొక్కిక. ⁵ మా పాపమ్కు విజు లాగ్గి పొక్కెజి క్రీస్తు యా లోకమ్దు వాతాన్ ఇజి మీరు నెసినిదెర్. అకదె ఆవెద్, వన్ని లోఇ పాపం ఇనికబా సిల్లెద్ ఇజిబా మీరు నెసినిదెర్. ⁶ అందెజి యేసు క్రీస్తు వెట కూల తొప్పికాన్ పాపం కిజినె మన్ఎన్. పాపం కిజినె మనికాన్ ఎయెనబా క్రీస్తు ఎయెన్ ఇజి అర్దం కివెన్. ⁷ నాను ప్రేమిసిని బయరండె, ఎయెనబా మిజి మోసం కివిండ నుడోదు. యేసు క్రీస్తు నీతిమనికాన్. క్రీస్తు వెప్తా మాటెజ్ వజ నడిసికాన్, దేవుణు ఎద్దు నీతి నిజాయితీ మనికాన్. ⁸ పాపం కిజినె మంజినికాన్ సయతాను జటుదికాన్. ఎందనిజ్ ఇహిజ యా లోకం పుటేవిండ మహి బాణిజ్ అసి సయతాన్ పాపం కిజినె మంజినాన్. దేవుణు మరిసి ఆతి యేసుక్రీస్తు యా లోకమ్దు ఎందనిజ్ వాతాన్ ఇహిజ సయతాన్ కిని విజు పణిజ పూర్తి నాననం కిదెజి వాతాన్. ⁹ దేవుణు కొడోర్ ఆతికాన్ ఎయెనబా పాపం కిజినె మన్ఎన్. ఎందనిజ్ ఇహిజ దేవుణు గుణం వన్ని లోఇ మనాద్. వాండ్రు దేవుణు పొటాదికాన్. అందెజి పాపం కిజి మండ్రెజ్ అటేవెన్. ¹⁰ దేవుణు కొడోర్ ఎయెర్, సయతాన్ కొడోర్ ఎయెర్ ఇజి మాటు ఎలాగ నెస్సాట్ ఇహిజ దేవుణు ఎద్దు సరియాతికెజ్ కిఇకాన్ దేవుణు కొడోర్ ఆవెన్. మహి వరిజ్ ప్రేమ కిఇకాన్బా దేవుణు కొడోర్ ఆవెన్.

ఒరెన్ మరి ఒరెన్ వన్నిజ్ ప్రేమిస్తెజ్

¹¹ అందెజి మీరు నమ్మితి బాణిజ్ అసి వెహిక యాకదె. ఇనిక ఇహిజ మాటు, ఒరెన్ మరి ఒరెన్ వన్నిజ్ ప్రేమిస్తెజ్ ఇజి, ¹² మాటు కయిను లెకెండ్ మండ్రెజ్ ఆవెద్. వాండ్రు సయతాను జటుదికాన్ ఆతండ్రె వన్ని తంబెరెసిజ్ నస్తాన్. ఎందనిజ్ నస్తాన్ ఇహిజ వన్ని పణిజ్ నెఇ బుద్ధి కలగితికెజ్. వన్ని తంబెర్తి పణిజ్ దేవుణు ఎద్దు సరియాతికెజ్ అతెమహె. ¹³ అహిజ నా తంబెరుజాండె, దేవుణుదిజ్ నమ్మిఇకార్ మీ ముస్కు పగ అతిజ బమ్మ ఆమాట్. ¹⁴ మాటు మహి వరిజ్ ప్రేమ కిజి మహిజ మాటు సాతివరి లెకెండ్ ఆవెట్. ఎలా కాలం బత్తుని బత్తుదు బత్తుజినాట్ ఇజి నెసినిట్. మహి వన్నిజ్ ప్రేమ కిఇకాన్ సాతి వన్ని లెకెండ్ మనాన్. ¹⁵ మాటు ఒరెన్ వన్ని ముస్కు పగ అస్తిజ, వన్నిజ్ సప్తిలెకెండ్. లోకాజ్ సప్పి వన్నిజ్ ఎలా కాలం బత్తుని బత్తు సిల్లెద్ ఇజి మీరు నెసినిదెర్. ¹⁶ ప్రేమ ఇహిజ ఇనిక ఇజి మాటు ఎలాగ నెస్సాట్ ఇహిజ, యేసు క్రీస్తు, వాండ్రె వన్ని పాణం మా వందిజ్ సితాన్. అకదె ప్రేమ. అయవజనె మాటుబా మా తంబెరిజి వందిజ్ మా పాణం సిదెజ్వలె. ¹⁷ విజు కల్గితి మనికాన్ ఒరెన్, అవ్సరమ్దు మని ఒరెన్ వన్నిజ్ కనికారం తోరిన్ఎండ మహిజ అయ విజు కలగితి మనికాన్

దేవుణుని నెగ్రెండ ప్రేమిన్ ఎన్ ఇజ తోరిస్సాన్. 18 నాను ప్రేమినిని బయిరండె, మాటు మాట ఉండె దాని ఆవద్. మా పణిబ మా ప్రేమ నిజమె ఇజ తోరిస్సాట్. 19 మాటు మా పణిబాణిజ్ మహి వరిజ్ నిజం కిజి ప్రేమిస్తిజ మాటు నిజమాతిదాన్ లోజిజినాప్ ఇజ నెస్సాట్లె. మరి దేవుణు ఎద్దు మా మన్ను నిపాతి మంజినాద్లె. 20 ఎండనిజ్ ఇహిజ మాటు తప్తాట్ ఇజి మా మన్ను ఉండ్రీ వేలా వెప్పాద్ను గాని, దేవుణు మా మన్నుదిజ్ ఇంక పెరికాన్. దేవుణు నెన్ ఇకెజ్ ఇనికెజ్ సిలు. 21 నాను ప్రేమినినికిదెరా, మాటు తపు కిఎట్ ఇజి మా మన్నుదు నెస్తిజ మాటు దేవుణు వెట కూడిజి దయరం కల్లిజి మంజినాట్. 22 మాటు ఇనిక లొస్తిజ్ బా దేవుణు బాణిజ్ దొహ్ క్కీనాద్. ఎండనిజ్ ఇహిజ దేవుణు వెస్తికెజ్ మాటు కిజినాట్. దేవుణుదిజ్ ఇస్టం ఆతి వజ బత్తిజినాట్. 23 యాకదె దేవుణు మజి వెస్తి రూలు. ఇహిక ఇహిజ యేసు క్రీస్తు దేవుణు మరిసి ఇజి మాటు నమ్మిదెజ్ వలె. క్రీస్తు వెస్తి లెకండ ఒరెన్ మరి ఒరెన్ వన్నిజ్ ప్రేమిస్సెజ్. 24 దేవుణు సితి రూలుజ్ వజ నడిసెనాన్ దేవుణు వెట మంజినాన్. దేవుణు వన్ని వెట మంజినాన్. దేవుణు మా వెట మనాన్ ఇజి ఎలాగ నెస్సాట్ ఇహిజ, దేవుణు ఆత్తు మా లోఇ మనిజ్ మాటు నెస్సాట్.

4

విజు ఆత్మజ నమ్మిదెజ్ ఆవద్

1 నాను ప్రేమినినికిదెరా, దేవుణు ఆత్మదాన్ వరగిజన ఇజి వర్గిని విజు వన్నాజ్ నమ్మిమాట్. విజు దేవుణు బాణిజ్, వాతికదో ఆవదో ఇజి నెగ్రెండ నెసి సుండెదు. ఎండనిజ్ ఇహిజ అబద్దం వెస్పాప్రవక్తరు నండెండో యా లోకమదు సోతార తప్పు మాటెజ్ బోదిసినార. 2 దేవుణు ఆత్మ మనికార్ ఎయెర్ ఇజి ఎలగ నెస్సాట్ ఇహిజ లోకు వజ దేవుణు బాణిజ్ వాతి యేసు క్రీస్తుజ్ నాను నెందితికాన్ ఇజి ఒప్పకొణికాన్ ఎయెన్ బా దేవుణు ఆత్మ మనికార్ ఇజి నెస్సెజ్. 3 గాని ఎయెన్ బా, యేసు ప్రబు నా ప్రబు ఆవెన్ ఇజి వెస్తిజ వాండ్రు దేవుణు బోద వెస్పాకాన్ ఆవెన్. వాండ్రు క్రీస్తుజ్ పడికాన్ క్రీస్తుజ్ పడిఎండ వెస్పాకార్ వానార్ ఇజి మీరు వెహికెజ్ యాకదె. అయ గుంపుదికార్ ఏలు మా నడిమ్మి మనార్. 4 ఇజిరి బయిరండె, మీరు దేవుణుదిజ్ నెందితికిదెర్. మీరు వరి బోద కెఇతిదెర్, వరిజ్ గెల్సిదెర్. మీ లోఇ మని దేవుణు ఆత్మ సత్తు లోకమదు మని నయతాన్ సత్తు మున్ను పెరికదె. అందెజి మీరు వరిజ్ గెల్సిదెర్. 5 తప్పు మాటెజ్ బోదిస్సికార్ యా లోకమదికార్. అందెజి వరి బోద యా లోలమది వరి ఆలోసం లెకెండ మన్ను. అందెజి యా లోకమదికార్ వరి బోద వెనార్. 6 మాటు ఇహిజ దేవుణుదిజ్ నెందితికాట్. దేవుణుదిజ్ నెస్తికాన్ మా మాటెజ్ వినాన్. ఆఇకాన్ వినెన్. నిజం వెస్పాకార్ ఎయెరో, తప్పు వెస్పాకార్ ఎయెరో ఇజి మాటు ఈహు నెస్సాట్.

దేవుణు ప్రేమని, లోకు ప్రేమ

7 నా తంబెరిజడె, మాటు ఒరెన్, మరి ఒరెన్ వన్నిజ్ ప్రేమిస్సెజ్ వలె. ఎండనిజ్ ఇహిజ దేవుణు బాణిజె ప్రేమ వాజినాద్. మరి ఒరెన్ వన్నిజ్ ప్రేమిస్సికాన్ దేవుణు బాణిజ్ పుట్టికాన్. వాండ్రు దేవుణుదిజ్ బాగ నెస్తికాన్. 8 మహి వరిజ్ ప్రేమిన్ ఇకాన్ దేవుణుదిజ్ నెన్ ఇకాన్. ఎండనిజ్ ఇహిజ దేవుణు ప్రేమ మనికాన్. 9 దేవుణు మజి ప్రేమిస్సాన్ ఇజి ఈహు తోరిస్సాన్. ఎలాగ ఇహిజ వన్ని ఒరెండ్రె మరిసిజ్ యా లోకమదు పొక్తాన్. మజి ఎలా కాలం బత్తిని బత్తు దొహ్ కెజ్ ఇజి దేవుణు వన్నిజ్ పొక్తాన్. 10 నిజమాతి ప్రేమ ఇహిజ మాటు దేవుణుదిజ్ ప్రేమిస్సాట్ ఇజి ఆవద్. నిజమాతి ప్రేమ ఇహిజ యాకదె. ఏలాగ ఇహిజ దేవుణు మజి ప్రేమిస్సాండ్రె మా పాపమకు సొన్నిన్ని వందిజ్ వన్ని మరిసిజ్ పొక్తాన్. మా పాపమక వందిజ్ పూజ ఆదెజ్ పొక్తాన్. అకదె ప్రేమ. 11 నాను ప్రేమినినికిదెరా, దేవుణు మజి నిసా ప్రేమిస్సాన్. అందెజి మాటుబా ఒరెన్ మరి ఒరెన్ వన్నిజ్ ప్రేమిస్సెజ్ వలె. 12 ఎయెర్ బా ఎనెజ్ బా దేవుణుదిజ్ సుండెదెజ్ సిల్లె. గాని మాటు ఒరెన్ మరి ఒరెన్ వన్నిజ్ ప్రేమిస్తిజ దేవుణు మా లోఇ బత్తిజినాన్. అయావలె దేవుణు ప్రేమినిని లెకెండ మా ప్రేమబ పూర్తి ఆనాదెల్.

13 దేవుణు వన్ని ఆత్మ మజి సిత మనాన్. అందెజి మాటు దేవుణు వెట కూడిత మనాట్ ఇజి, మరి దేవుణు మా లోఇ మంజినాన్ ఇజి నెసినాట్. 14 మరి బుబ్బు ఆతి దేవుణు, మరిసి ఆతి యేసు క్రీస్తుజ్ పొక్తాన్. లోకాజ్ వరి పాపమకాణిజ్ వాని సిక్కుదాన్ తప్తిస్తిజ్ ఇజి పొక్తాన్. యాక మాపు సుండెతాపె

విజేరిజ్ వెప్పినాన్. యాక నిజమె ఇజి సాక్కి వెప్పినాన్. ¹⁵ యేసు దేవుణు మరిసి ఇజి ఎయెన్బా ఒప్పుకొటిజ, దేవుణు వన్ని వెట మంజినాన్. వాండ్రు దేవుణు వెట కూడేజి మంజినాన్. ¹⁶ దేవుణు మా ముస్సు తోరిస్తి ప్రేమ మాటు నెస్త మనాట్, నమ్మిత మనాట్. దేవుణు ప్రేమ మనికాన్. అందెజి మహి వరిజ్ ప్రేమిసినికాన్ దేవుణుబాన్ కూడేజి మంజినాన్. దేవుణు వన్నిబాన్ కూడేజి మంజినాన్. ¹⁷ దేవుణు ప్రేమిసిని తెకెండ మా నడిమ్మి మని ప్రేమ పూర్తి అనాద్లె. అందెజి దేవుణు తీర్పు సీని వలె తియెల్ అవిండ మంజినాట్. ఎందనిజ్ ఇహిజ యేసుప్రబు యా లోకమ్దు ఎలాగ బత్కితాండ్రో మాటుబ అయాలెకెండె బత్కిదెట్. ¹⁸ ప్రేమ లొఇ తియెల్ సిల్లెద్. అక్కాదె అవిద్. పూర్తి అతి ప్రేమ మహిజ అక్క తియెల్ సాన్పిస్నాద్. ఎందనిజ్ ఇహిజ సిక్కు వానాద్ ఇజినె తియెల్ వానాద్. తియెల్ అని వన్నిజ్ పూర్తి ప్రేమ సిల్లెద్. ¹⁹ దేవుణునె మజి ముజాలె ప్రేమిస్తిజ్, మాటు వన్నిజ్ ప్రేమిస్తిజ్ అటేసినాట్. ²⁰ ఎయెన్బా, 'నాను దేవుణుదిజ్ ప్రేమిస్సు' ఇజి వెప్పి, మరి ఒరేన్ నమ్మిత్తి వన్నిజ్ ప్రేమ కివిండ మహిజ వాండ్రు అబద్దం వెప్పినాన్. ఎందనిజ్ ఇహిజ తోరిజిని వన్నిజ్ ప్రేమిన్ఇకాన్ తోరిఇ దేవుణుదిజ్ ప్రేమిస్తిజ్ అటేవన్. ²¹ యేసు క్రీస్తు మజి ఇని రూలు సిత మనాన్ ఇహిజ, దేవుణుదిజ్ ప్రేమిస్తికాన్ మహి క్రీస్తు లోకాజ్బా ప్రేమిస్తిజ్ వలె.

5

దేవుణు మరిసి ముస్సు నమ్మకం

¹ యేసునె క్రీస్తు ఇజి నమ్మినికాన్ ఎయెన్బా దేవుణు బాణిజ్ పుట్టాన్. బుబ్బెజ్ ప్రేమిస్తికాన్ ఎయెన్బా వన్ని బాణిజ్ పుట్టి విజేరిజ్ ప్రేమిస్నాన్. ² దేవుణుదిజ్ ప్రేమిసి, వాండ్రు వెప్తి రూలుజ వజ కితజ, మాటు దేవుణు కొడెరిజ్ ప్రేమిస్నాట్ ఇజి నెస్నాట్. ³ దేవుణుదిజ్ ప్రేమిస్తిజ్ ఇహిజ వన్ని రూలుజ వజ కిదెజి. వన్ని రూలుజ్ కస్టం అతికెజ్ అఉ. సుల్కాణికెజి. ⁴ దేవుణుబాణిజ్ పుట్టికారె విజేరె యా లోకమ్దు దేవుణుదిజ్ పడిఇ విజు వన్నాజ్ జయిస్తిజ్ అట్టూర్. దేవుణుదిజ్ పడిఇ విజు వన్నాజ్ జయిస్తిజ్ ఎలాగ అట్టూట్ ఇహిజ, మాటు యేసుప్రబుజ్ నమకం ఇట్టివలెదాన్ అట్టూట్. ⁵ దేవుణుదిజ్ పడిఇ వన్నాజ్ జయిస్తికాన్ ఎయెన్? యేసు, దేవుణు మరిసి ఇజి నమ్మినికాండ్రె. ⁶ క్రీస్తు అతి యేసు యా లోకమ్దు వాతండ్రె. ఏరుదు బాప్తిసం లాగెఅతాన్. సీల్వాదు నల వాక్కి సాతాన్. బాప్తిసం ఉండ్రె అవిద్. సిలువాదు నల వాక్కి సాదెజి వాతాన్. యాక నిజమె ఇజి దేవుణు అత్తు సాక్కి వెప్పినాన్. అందెజి యాక నిజమె. ఎందనిజ్ ఇహిజ దేవుణు అత్తు నిజమేనె వెప్పినాన్. ⁷ క్రీస్తు వందిజ్ సాక్కి వెప్పికెజ్ మూండ్రె మన్నె. ⁸ దేవుణు అత్తు, బాప్తిసం లాగె అతి ఏరు, సిలువాదు వాక్కి నల. యా మూండ్రె ఒప్పు కొడిజి క్రీస్తు వందిజ్ సాక్కి వెప్పినె. ⁹ మాటు, లోకర్ సాక్కి అస్నాట్ గదె. అహిజ దేవుణు సీని సాక్కి ఒదె నత్తు మనికగదె. ఎందనిజ్ నత్తు మనిక ఇహిజ, దేవుణు వన్ని సొంత మరిసి అతి యేసు వందిజ్ వెప్తి సాక్కినె. ¹⁰ దేవుణు మరిసి ముస్సు నమం ఇట్టి వన్ని లొఇ యా సాక్కి మనాద్. గాని దేవుణు ముస్సు నమ్మకం ఇడెఇకాన్ దేవుణు మని మరిసి వందిజ్ వెప్తి సాక్కి నమ్మివన్. అందెజి వాండ్రు దేవుణు అబద్దం వెప్పినికాన్ ఇజి వెప్పినాన్. ¹¹ దేవుణు వెప్తి సాక్కి యాకదె. ఇనిక ఇహిజ దేవుణు వెట ఎలా కాలం బత్తిని బత్తు. దేవుణు మజి సితాన్. యా బత్తు మజి ఎలాగ వాతాద్ ఇహిజ యేసు క్రీస్తు ముస్సు నమకం ఇడెఇ వన్ని వెట కూడేతి మహిజ వాతాద్. ¹² దేవుణు మరిసి అతి యేసు క్రీస్తు వెట కూడేజి మంజిని వన్నిజ్ యా బత్తు మనాద్. దేవుణు మరిసి వెట కూడేజి మన్ఇ వన్నిజ్ దేవుణు వెట ఎలా కాలం బత్తిని బత్తు సిల్లెద్. ¹³ దేవుణు మరిసి ముస్సు నమ్మకం ఇడెఇతి వరిజ్ నాను ఇక్కెజ్ రాసిన. ఎందనిజ్ రాసిన ఇహిజ మిజి దేవుణు వెట ఎలా కాలం బత్తిని బత్తు. మనాద్ ఇజి నెస్తిజె రాసిన. ¹⁴ అహిజ మజి దేవుణు ముస్సు మని దయరం ఇనిక ఇహిజ, మాటు దేవుణు ఇష్టమిదిజ్ కూడితి మని ఇనికబా లొస్తిజ, వాండ్రు అక కినాన్. ¹⁵ మాటు ఇనిక లొస్తిజ్బా దేవుణు వెంజినాన్ ఇజి మాటు నెస్తిజ, మాటు దేవుణుబాణిజ్ లొస్తికెజ్ విజు దోహక్కి లెకెండె నెసినాట్.

¹⁶ ఒరెన్ నమ్మిత్తికాన్ సావు తెఇ పాపం కిజి మహిజ ఎయెన్బా అక సుడితిజ, వన్ని వందిజ్ పార్దనం కిదెజ్. దేవుణు వన్నిజ్ బత్తు సీనాన్. సావు తెఇ పాపం కినివరి వందిజె వెప్పిన. గాని

సావు తప్పిన్ని పాపం మనాద్. నని పాపం కిని వరి వందిజ్ పార్దనం కిఅ ఇజి నాను వెహ్. 17 ఇని తవు కితిజ్బా పాపమ్నె. గాని లోకాజ్ సావు తప్పిన్ ఇ పాపమ్కు మన్నె. 18 దేవుణు బాణిజ్ పుట్టికాన్ ఎయెన్బా పాపం కిజినె మన్ఎన్ ఇజి మాటు నెసినాట్. ఎందనిజ్ ఇహిజ దేవుణు మరిసి వన్నిజ్ కాప్కిజినాన్. అహిజ సయ్తాను వన్నిజ్ ముట్టి నాసనం కిదెజ్ అట్ఎన్. 19 మాటు దేవుణు కొడోర్ ఇజి నెసినాట్. దేవుణుదిజ్ సెందితికార్ ఆకకార్ సయ్తాను అడిగి మంజినార్ ఇజి నెసినాట్. 20 మరి దేవుణు మరిసి వాతండ్రె, నిజమాతి దేవుణుదిజ్ మాటు నెస్టెజ్ మజి తెలివి సితాన్. మాటు వన్ని వెట కూడితిజ్ నిజమాతి దేవుణు వెట కూడిత మనాట్. వీండ్రె నిజమాతి దేవుణు. వీండ్రె దేవుణు వెట ఎలా కాలం బత్కిని బత్కు లోకాజ్ సీనికాన్. 21 నాను ప్రేమిసిని బయిరండె, బోమ్మెజ మాడిస్టెజ్ అవ్ద.

యోహాను రాస్తే రుండి ఉత్తం

నెల్ల కిబిసినిక

యేసు క్రీస్తు అపొస్తలుడు అతి యోహాను రాస్తే ఉత్తమనె యాక. నండొ ముజాలె నువార్త వెప్పికార్ బూలాజు బూలాజినె నువార్త సాటిసి మహార్. అయావలె యేసుజ్ నమ్మిత్తికారె, యాలెకెండె నువార్త వెప్పి వరిజ్ వరి ఇండ్రొ డగ్రు కిజి, వరిజ్ కావాలికికెజ్ సీజి పొక్కి మహార్. తప్పు బోద్ వెప్పికార్ బా మహార్. వారుబా యాలెకెండె బూలాజు బూలాజినె కిజి మహార్. అందెజె నన్ని వరివందిజ్ జాగర్త మండ్రెజ్ ఇజి యా ఉత్తమదు రాసి వెప్పినాన్. నిజమాతికెజ్ నమ్మిజి అయాలెకెండె బత్తిదెజ్ వలె ఇజిబా వెప్పినాన్.

1-2 పెదెలి అతి నాను, దేవుణు ఎర్పాటు కితి అమ్మెజ్, దన్ని కొడొరిజ్ రాసిన్. నాను మిజి నిజమనె ఎత్తు కిజిన. నాను ఒరెనె ఆవిండ, దేవుణు తోరిస్తి నిజమాతి సజతిజ్ నెస్తికార్ విజెరెబా మిజి ఎత్తు కిజినార్. ఎందనిజ్ ఇహిజ, దేవుణు తోరిస్తి నిజమాతికెజ్ మజి తెలిజి మంజినె. అయాకెజ్ మాటు ఎలాకాలం తెలిజి మంజినె. ³ దేవుణు తోరిస్తి నిజమాతికెజ్ మాటు నమ్మిజినాట్. వాండ్రు మజి ప్రేమిస్సాన్. అందెజె బుబ్బు అతి దేవుణుని మరిసి అతి యేసు క్రీస్తు, దయా దర్మమదాన్, మా ముస్సు కనికారం తోరిసి మాటు నిపాతిదాన్ మండ్రెజ్ సాయం కిపిర్.

ప్రేమదాన్ నడినివందిజ్ వెప్పినిక.

4 మీ కొడొర్ లొఇ సెగెండార్, దేవుణు తోరిస్తి నిజమాతి సజతిజు వజ నడిజినార్ ఇజి నాను నెస్త. అందెజె నాను నండొ సర్ద అజిన. బుబ్బు మజి ఆడ్ర సిత్తివజినె వారు నడిజినార్. ⁵ అహిజు ఒ అమ్మ, నాను కొత్త ఆడ్ర మిజి రాన్వి. గాని క్రీస్తుజ్ నమ్మిత్తిబాణిజ్ అసి, మాటు నెస్తి మన్ని ఆడ్రనె రాసిన్. మాటు ఒరెన్ వన్నివెట ఒరెన్ ప్రేమిస్టెజ్ ఇని ఆడ్రనె వెప్పిన. ⁶ మాటు వన్ని ఆడ్రెజు లొజిజి, అయావజు నడిజిజినె దేవుణుదిజ్ ప్రేమిస్సాట్. మీరు క్రీస్తుజ్ నమ్మిత్తి బాణిజ్ అసి వెహిలెకెండె, మాటు ఒరెన్ వన్ని వెట ఒరెన్ ప్రేమిసి అయాలెకెండె నడిదెజ్ ఇజినె వన్ని ఆడ్ర.

మొసెం కినివరివందిజ్ జాగర్త మండ్రు.

7 యేసుక్రీస్తు, యాయపొటలొఇహాన్ వాతికాన్ ఇజి ఒప్పుకొడొఇ నండొండార్ మొసెం కినికార్ లొకమ్దు సొత్త మనార్. ననికాండ్రె మొసెం కినికాన్, క్రీస్తుజ్ ఎద్రిస్సికాన్. ⁸ అపొస్తరు అతి మాపు, మీ వెట మీ నడిమి కితి వణిజు పలితం, పాడు అవిండ మంజిని వందిజ్, మొసెం కినివరి ముస్సు జాగర్త మండ్రు. మరి, దేవుణు వెట ఎలాకాలం బత్తిని బత్తు దొహ్క్కివందిజ్, మొసెం కినివరి ముస్సు జాగర్త మండ్రు. ⁹ ఎయెన్బా, క్రీస్తు నెన్పిస్తి మాట నమ్మిజి మన్విండ, వన్ని సొంత మాటెజ్, క్రీస్తు నెన్పిస్తి మాటవెట కలప్తిజు, వాండ్రు దేవుణుదిజ్ సేందిఇకాన్. క్రీస్తు నెన్పిస్తి మాట నమ్మిజి మంజినికాన్ బుబ్బెజ్ మి మరిసిజ్ సేందితికాన్. ¹⁰ ఎయెన్బా క్రీస్తు నెన్పిస్తి మాట వెహ్విండ, మీ డగ్రు వాతిజు, మీరు వన్నిజ్ ఇండ్రొ కూక్యాట్. వన్నిజ్ డగ్రు కిమాట్. ¹¹ ఎందనిజ్ ఇహిజ, వన్నిజ్ డగ్రు కితికాన్ ఎయెన్బా వన్ని సెఇవణిజువెట కూడిత మనాన్. ¹² నండొ సజతిజ్ మిజి రాస్తెజ్ మనాద్. గాని ఉత్తమదాన్ వెప్టెజ్ నజి మన్సు సిల్దెద్. మా సర్ద పూర్తి ఆదెజ్ మీ డగ్రు వాజి, మిజి నుడిజు వర్గిదెజ్ నాను ఆన అజిన. ¹³ దేవుణు ఎర్పాటు కితి నీ తజి కొడొర్, మిజి వెన్బాతి లెకెండె వెప్పినార్.

యోహాను రాస్తీ మూంత్రి ఉత్తం.

నెల్ల కిబిసినిక

యేసు క్రీస్తు అపొస్తుడు ఆతి యోహాను రాస్తీ ఉత్తమనె యాక. వన్ని కూలాయెనాతి గాయుజ్ రాసినాన్. యా గాయు ఇనికాన్, యోహాను అతికారం అడిగి మన్ని దేవుణు సజం ఉంత్రి నుడేజి నడిపిస్తాన్. బూలాజి బూలాజి సువార్త వెప్పి వాజిని వరిజ్ వాండ్రు డగ్రు కిజి నెగ్రెండ మరజి పొక్కిని దన్ని వందిజ్ యోహాను వన్నిజ్ వందనమ్కు వెప్పినాన్. మరి, దియొత్తెపె ఇనికాన్ బూలాజి బూలాజి సువార్త కిని వరిజ్ డగ్రు కివిండ మరజి పొక్తాన్. వాండ్రు యోహాను అతికారం అడిగి మండ్రెజ్ కెపె ఇజినాన్. వన్నిజ్ డటిసి వెప్పిదన్ని వందిజ్బా యా ఉత్తమదు రాసినాన్.

¹ పెదెలి ఆతి నాను నిజం ఎత్తు కిజిని నా సొంత కూలాయెన్ ఆతి గాయుజ్ రాసిన్. ² ఓ, నాను ప్రేమిసిని కూలాయెన్, దేవుణు వెట నిజి మన్ని సమందం పిరిసిని వజ, నీను విజు వన్నా లొఇ పిరిదెజ్ ఇజి నాను పార్దనం కిజిన్. నీను నోబు నోప్పి సిల్లెండ నెగెండ నెగెండ మండ్రెజ్ ఇజిబా నాను పార్దనం కిజిన్. ³ నెగెండార్ నమ్మితికార్ నా డగ్రు వాతార్. వారు, దేవుణు తోరిస్తీ నిజమాతి సజతిజ్ నీను లోజిజిని ఇజి, అయావజి నీను నెగెండ నడిజిని ఇజి వెవ్వార్. అయాలెకెండ వెవ్వార్ నజి నండో సరద కిబిస్తార్. ⁴ నా కొడోర్ దేవుణు తోరిస్తీ నిజమాతి సజతిజ్ లోజిజినార్. వారు అయావజి నడిజినార్ ఇజి వెంజినికాదె నజి నండో సరద. దన్నిజ్ మిస్తీ సరద సిల్లెద్. ⁵ ఓ, నాను ప్రేమిసిని కూలాయెన్, బూలాజి బూలాజి సువార్త వెప్పి వాజిని వరిజ్ నీను డగ్రు కిజిని. వారు నిజి తెలికార్ ఆతిజ్బా నీను వరి వందిజ్ కిజిని ఇనికబా నమ్మకమ్దానె కిజిని. ⁶⁻⁷ వారు నీ ప్రేమి వందిజ్ ఇబ్బె దేవుణు సజం ఎద్రు సాసి వెవ్వార్. నీను, దేవుణుదిజ్ ఇష్టం ఆతి వజి పరి వయనమ్దు అవ్సరం ఆతికెజ్ సీజి పొక్తె. ఎందనిజ్ ఇహిజ, వారు క్రీస్తుజ్ నమ్మితి వరిబాణిజ్ ఇనికబా లొన్విండ, క్రీస్తుజ్ వెవ్వాజ్ సొత్తార్. ⁸ అందెజి వారు వెప్పివలె, మాటు పరివెట జత కూడేజి, దేవుణు వందిజ్ నిజమాతికెజ్ నెన్పిస్తీవందిజ్, నన్నివరిజ్ మాటు డగ్రు కిదెజ్వలె.

దియొత్తెపెని దెమెత్రియు.

⁹ నాను దేవుణు సజమదిజ్ ఉంత్రి సజతి రాస్త. గాని దియొత్తెపె నా అతికారమ్దిజ్ లోజివన్. ఎందనిజ్ ఇహిజ, వాండ్రు దేవుణు సజమదు పెరికాన్ ఆదెజ్ కోరిజినాన్. ¹⁰ వాండ్రు మా మున్ను, సెఇ మాటెజ్ వర్గిజినాన్. యాకాదె ఆవిండ బూలాజి బూలాజి దేవుణు మాట వెప్పి వరిజ్ డగ్రు కివన్. వరిజ్ డగ్రు కిదెజ్ మన్ను మన్ని వరిజ్ అడ్డు కిజి దేవుణు సజమదాన్ వరిజ్ వెల్లి పొక్కినాన్. అందెజి నాను వాతిజ, వాండ్రు కిజిని సెఇ వణిజ దేవుణు సజం ఎద్రు వెవ్వా. ¹¹ ఓ, నాను ప్రేమిసిని కూలాయెన్, సెఇ వణిజ్ కిజిని వరిజ్ నుడేజి నడిపిండ, నెగ్గి వణిజ్ కిజిని వరిజ్ నుడేజి నడిపి. నెగ్గి వణిజ్ కినికాన్ ఎయెన్బా దేవుణుదిజ్ సెందితికాన్. సెఇ వణిజ్ కినికాన్ ఎయెన్బా దేవుణుదిజ్ నెన్పిన్. ¹² దెమెత్రియు వందిజ్ లోకుర్ విజెరె నెగ్గికెజ్ పొగ్డిజినార్. దేవుణు తోరిస్తీ నిజమాతి సజతిజ్ లోజిజి వాండ్రు నడిజినాన్. అయాక వాండ్రు నెగ్గి లోకు ఇజి రుజువ్ కిజినాద్. మాపుబా వన్ని వందిజ్ నెగ్గికెజ్ వెప్పినావ్. మా సాని నిజమాతికెజ్ ఇజి నీను నెస్సి. ¹³ నండో సజతిజ్ నిజి రాస్తెజ్ మనాద్. గాని ఉత్తమదాన్ వెవ్వాజ్ నజి మన్ను సిల్లెద్. ¹⁴ నిజి బేగి నుడేజిజ్ ఆనాద్ ఇజి నాను కోరిజిన్. అయావలె మాటు కూడేజి వర్గినాట్. ¹⁵ నిజి సమాదనం రపిద్. ఇబ్బెణి దేవుణు సజమదికార్ నిజి వెన్బాతి లెకెండ వెప్పినార్. అబ్బె మన్ని వరిజ్ విజెరిజ్ వెన్బాతి లెకెండ వెవ్వా.

యూద రాస్తి ఉత్తరం

నెల్ల కిబిసినిక

మా ప్రబు ఆతి యేసుక్రీస్తుజ్ తంబెరిజ్ ఇజి వెహె ఆతి వరి లొఇ మన్ని యూద ఇనికాన్ యా ఉత్తరం రాస్తాన్. వాండ్రు యాకోబుజ్బా తంబెర్ని. క్రీస్తు సకం 68-80 నడిఃమి కాలమ్దు యా ఉత్తరం రాస్త మనాద్దు. క్రీస్తుజ్ నమ్మిత్తివరి సజమ్కలొఇ నిజతిమాతి బోద నెక్కిపొక్కి తప్పుజ్ నెస్సిసిని వరి వందిజ్ రాస్తాన్. వరి బోదవందిజ్ వరి బత్తువందిజ్ డటిసి రాస్తాన్. నమ్మితి వరిజ్ దేవుణు సిత్తి రక్కణ వందిజ్, నిజం వందిజ్ కాట్లాడఃదెజ్ ఇజి రాస్త మనాన్.

1 యేసు క్రీస్తుజ్ పణి కినికానాతి యూద (వాండ్రు యాకోబుజ్ తంబెరి) రాసిని ఉత్తరం. దేవుణు కూక్కి వరిజ్ నాను రాసి. బుబాతి దేవుణు నండొ ప్రేమిసి యేసు క్రీస్తు మరజి వానిదాక కావ్ కిజి ఇడ్డిని మిజిని రాసి 2 మిజి కనికారం, నిపాతి, దేవుణు - బాణిజ్ వాని ప్రేమ ఒదె నిండ్రజి మనిద్.

దేవుణు వందిజ్ మన్ను సిల్లి వరిజ్ వాని సిక్కు.

3 నాను నండొ ప్రేమిసికి దెరా, మజి విజెరిజ్ దొహ్కొక్కి రక్కణ వందిజ్ మిజి రాస్తాజ్ ఇజి నండొ ఆస ఆత మహా. గాని దేవుణుదిజ్ కేట ఆతి వరిజ్ ఉండ్రె సుటుని ఒపజెప్తి నిజతిమాతి నమకం కాపాడిఃజి ఇడ్దెజ్ మీరు కాట్లాడఃజి మండ్రెజ్ వలె ఇజి మిజి బతి మాల్లి రాస్తజె ఏలు ఒడఃబిజిన.

4 సెగొండార్ లోకుర్ మిజి తెలివండ మీలొఇ డుఃగిత మనార్. దేవుణుబాణిజ్ వరిజ్ వాని తీర్పు వందిజ్ పూర్బకాలమ్దు దేవుణు - మాటదు రాస్త మనాద్. వారు దేవుణు - వందిజ్ బక్కిసిల్లి లోకుర్.

వారు ఒడొల్వందిజ్ మని, వరి సెఇ ఆసెజి వజి కిజి సర్ద ఆనివందిజ్ దేవుణుబాణిజ్ వాతి, వన్ని దయదర్శమందిజ్ మారిస్తార్. అహు కితిజ్ మాటు సేవకిని ఒరెండ్రె ఎజుమాని ఆతి మా ప్రబు ఆతి యేసు క్రీస్తుజ్ నెక్కి పొక్కార్.

5 నాను వెస్సొని యా సజతిజ్ విజు మీరు ముజాలె నెస్సి మన్నిదెర్ గాని నాను మిజి మరి ఎత్తు కిబిస్తెజ్ ఆస ఆజిన. అక్క ఇనిక ఇహిజి పుర్షం అయ్గుప్తు దేసమ్దాన్ ఇస్తాయేలు లోకురిజ్ ఉండ్రె సుటుని గెల్పిస్తాన్. గాని వెసుక వరి లొఇ నమ్మిఎండొతి వరిజ్ దేవుణు నాసనం కిత్తాన్.

6 దేవుణు సిత్తి అతికారమ్దు మండ్రెజ్ ఇష్టం ఆవండ, వరిజ్ మహి అతికారం డిఃస్సిసిత్తి దేవుణు దూతార్ వందిజ్ ఎత్తు కిదు. తీర్పు సీజి సిక్కు సీని పెరిదినిమ్ దాక, ఎల్లకాలం మంజిని గొలు గొలుస్కాణిజ్ తొప్పొ - స్తాండ్రె సీకటి మన్ని బాడ్డిదు దేవుణు వరిజ్ ఇల్లు మనాన్.

7 అయలెకొండెనె సాదొమ గొమ్మెర్ పట్టుమ్క లొకాజ్, వనక సుటులం మన్ని నాహ్కాణి లొకాజ్ ఇనిక జర్గితాద్ ఇజి ఎత్తు కిదు. వారు దేవుణు దూతార్ కితిలెకొండెనె, ఒడొల్ది సెఇ ఆసెజ్ వజి కిజి సర్ద ఆని కిని పణిజ్ కిత్తాన్. ఆఇ బోదెకవెట ఉండ్రె ఆవిద్, మొగవరివెట మొగవారు కూడఃజి పాపం కిత్తారె ఎలాకాలం నంబిఇ సిసుదాన్ సురె ఆతార్. నిన్నివరిజ్ ఇని సిక్కు వానాద్ ఇని దన్నిజ్ అక్క విజెరిజ్ ఉండ్రె గుర్తులెకొండె మనాద్.

8 అయలెకొండెనె వీరు కలెజ్ గాని ఒడొల్ది సెఇ ఆసెజ్ వజి కిజి సర్ద ఆని పణిజ్ కిజినార్. మరి, ఏలుబడిః కినివరిజ్ లొజివిర్. వారు దేవుణు దూతారిజ్ దూసిస్తార్.

9 అహిజి దేవుణు దూతార్ మున్ను పెరి దూత ఆతి మికాఏలుబా, మొసె పీనుగు వందిజ్, నయ్తాను మికాయెలుజ్ ఒదిస్సివలె ఇనిక కిత్తాన్ ఇహిజి, వన్నిజ్ దూసిసిని మాటెజాణ్ నేరం మొవ్విన్. గాని “ప్రబుని నిజి గదిసిన్”, ఇజి వెప్తాన్.

10 గాని వీరు ఇహిజి వరిజ్ అర్థం ఆఇవనకవందిజ్ దూసిసినార్. బుద్దిసిల్లి జుంతుజ్ లెకొండె, మన్నుదు బాగ ఒడిఃబిదెజ్ అట్విర్. జంతుబలెకొండె ఒడొల్ ఆసెజ్ వజి కిజి సర్ద ఆదెజ్ సుడఃజినార్. వరి సెఇ పణిజాణ్ వారి పాడాఃజి సొన్పినార్.

11 అబయ! వరిజ్ కస్తమ్కు తవ్ఉ. ఎందనిజ్ ఇహిజి, వారు సెఇ పణి కితి కయిను లెకొండెబా మనార్.* వారు బిలాము ఇని ప్రవక్త లెకొండెబా ఇనాయం దొహ్కొద్ ఇజి, వరి బత్తు తప్పుదిజ్ పూర్తి ఒపజెప్తు మనార్.† వారు కోర్ ఇనివన్ని - లెకొండెబా మనార్. మొసె వెహ్విదన్నిజ్ మరజి వెహ్పండ్రె డటం ఎద్దిస్తాన్‡. వీరుబా

* 1:11 1:11 కయిను వందిజ్ నద్విదు, ఆదికాండం 4:1-16 † 1:11 1:11 బిలాము వందిజ్ నద్విదు, సంకియా పుస్తకం 22-24. అద్యాయమ్క లొఇ మనద్ ‡ 1:11 1:11 కోర్ వందిజ్ నద్విదు, సంకియా పుస్తకం 16:1-35

వన్నిలెకెండ్ నాననం ఆన సొనార్. 12 మీరు కిజిని ప్రేమవిందుల్లో ఇ వారు తెల్లని పాతాదు మన్ని మన లెకెండ్ సిగు తపిసినార్. ఇని తియెల్ సిల్లెండ పొటపంజు ఉణిజి వరిజ్ వారె పోస కిబె ఆజినార్. వారు గాలి డెయేజి ఒసిని పిరు సిల్లి మొసాప్ ననికార్. వారు కాయెజ్ అన్ని కాలమ్దు కాయెజ్ అనె ఇ మరెకె లెకెండ్. అక్కాదె ఆవిద్. వారు వలెజాణిజ్ తెరె ఆతి మరెకెలెకెండ్. పాణం సిల్లికార్, పూర్తి సాతికార్ వారు. 13 వారు సమ్దరమ్ది పెరి ఉల్కాజ్ లెకెండ్ మనార్. వరి సిగుపణిజ్ ఉల్కాజ్ డెయేజి తసిని పొజు లెకెండ్ మన్నె. మరి సరి తప్పి బూలాని సుక్కెజ్⁵ లెకెండ్ మనార్, వారు. అందెజె దేవుణు వరివందిజ్ ఎలాకాలం మండ్రెజ్ గొప్ప సీకటి మన్ని బాడ్డి* తయార్ కిజి ఇడ్డమనాన్. 14 ఆదముదాన్ మొదొల్ని ఏడవ తరమ్దికాన్ ఆతి హానోకు పూర్బకాలమ్దు దేవుణుబాణిజ్ వాతి మాటెజ్ వెహ్సాన్. విరివందిజ్ వెహ్తి అయ మాటెజ్ వాని కాలమ్దు జర్గిని వందిజె. ఇనిక ఇహిజ “ఇదిలో ప్రబు వన్ని వెయు వెయిజ్ దూతార్ వెట వాజినాన్. 15 విజెరిజ్ తీర్పు కిదెజ్ ప్రబు వాజినాన్. దేవుణు వందిజ్ బక్తి సిల్లి వరిజ్ తీర్పు సీజి సిక్కు సీదెజ్ వాండ్రు వాజినాన్. ఎందనిజ్ ఇహిజ దేవుణు వందిజ్ బక్తి సిల్లికార్, దేవుణుబాణిజ్ మన్ను దూరం ఇడ్డి సెఇ పణిజ్ కిత్తార్. దేవుణు వందిజ్ బక్తి సిల్లికార్ తియెల్ సిల్లెండ దేవుణు ఎద్రు వన్నిజ్ పణిజ్ కటినమతి మాటెజ్ వర్గితార్”. 16 వారు దేవుణు ఎద్రు సణిజిజినార్. ఆఇవరి ముస్సు. నింద మోప్పినికార్. వారు వరి ఒడోల్ది సెఇ అసెజ్ వజ కిజి సర్ద ఆదెజ్ ఇజినె సుడెజినార్. వారు వరి వందిజెన్ పణిదిజ్ రెఇ బడాయ్ మాటెజ్ వర్గిజినార్. ఆఇ వరిబాణిజ్ ఇనికబా దొప్పొద్ ఇజి వరిజ్ పొగడిజినార్.

ఓరిసి మండ్రెజ్ ఇజి వెహ్సినాన్.

17 అహిజ నాను నండొ ప్రేమిసినికిదెరా, మా ప్రబు ఆతి యేసు క్రీస్తుజ్ అపొస్తురు ఆతికార్ మిజి ముజాల వెహ్తిమని సజతిజ్ మీరు ఎత్తు కిదు. 18 వారు ఇనిక వెహ్తార్ ఇహిజ, కడెవెరి రోస్కాణ్ వెక్తిసినికార్ వానార్. వారు దేవుణు వందిజ్ బక్తి సిల్లెండ, వరి ఒడోల్లి సెఇ అసెజ్ వజ కిజి సర్ద ఆజినె మంజినార్. 19 లోకాజ్ కేటెజ్ కేటెజ్ కిబిస్సికార్ వీరె. పాపం ఏలుబడిః కిని మన్ను మన్నికార్, దేవుణు ఆత్మ సిల్లికార్ వీరు. 20 గాని మీరు, ఇహిజ నాను నండొ ప్రేమిసినికిదెరా, దేవుణుబాణిజ్ మిజి దొహ్కాక్తి నమకమ్దు పిరిజి వాదెజ్ ఒరెన్ మరి ఒరెన్ వన్నిజ్ తోడః కిదెజ్. దేవుణు ఆత్మ నడిపిసిని వజ పార్దనం కిజి మండ్రు. 21 దేవుణు మీ ముస్సు తోరిస్తె మన్ని ప్రేమదు మండ్రు. ప్రబు ఆతి యేసు క్రీస్తు మీ ముస్సు కనికారం మాజి, దేవుణు వెట ఎల్లకాలం బత్తిని బత్తు సీదెజ్ ఇజి ఎద్రు సుడెజి మండ్రు. 22 దేవుణు ముస్సు మన్ని నమకం వందిజ్ అనుమానం మని వరి ముస్సు కనికారం తోరిస్తె. 23 నమకమ్దాన్ తప్పిసాహి సెగొండారిజ్, సిను నడిమిహాన్ వెల్లి లాగితిలెకెండ్ రక్తిస్తె. తప్పి సాహి మరి సెగొండారిజ్ కనికారం తోరిస్తె. గాని తియెల్దాన్ మండ్రు. వరి పణిజ్ మజి పణిజెవిద్. వారు కిని సెఇ పణిజాజ్ మాటు సెఎణ్ ఆదెజ్ ఆవిద్. 24 మీరు పాపమ్దు తొరొ ఒడిజి అర్వెండ్ర మిజి కాప్ కిదెజ్, దేవుణు గొప్ప పెరి జాయ్ ఎద్రు, గొప్ప సర్దదాన్, ఇని తప్పిబా సిల్లెండ మిజి నిల్పెజ్, మజి రక్తిస్సికాన్ ఆతి ఒరెండ్రె దేవుణు అట్టాన్. 25 మజి రక్తిస్సికాన్ ఆతి దేవుణు, ఒరెండ్రె దేవుణు. మా ప్రబు ఆతి యేసు క్రీస్తు - వలెహానె వన్నిజ్ పొగడినాట్. ఎందనిజ్ ఇహిజ వాండ్రె జాయ్దాన్ నిండ్రెతి సోకు మన్నికాన్, వాండ్రె గొప్ప పెరికాన్, వాండ్రె గొప్ప సత్తు మన్నికాన్, వాండ్రె విజుదన్ని - ముస్సు యా అతికారం మన్నికాన్. వాండ్రు విజు వనకాజ్ ముజాల యావజ మహాన్, వాండ్రు ఏలు యావజ మనాన్, వాండ్రు వాని కాలమ్దు యావజ మంజినాన్. ఆమెన్.

S 1:13 1:13 యా సుక్కెజ్ బూమి నన్నికెజ్ గాని ఎనెజ్ ఎనెజ్ సాని సరి తప్పి సానె * 1:13 1:13 ఒదె సీకటి మని బాడ్డి. యా బాడ్డి సరకమ్నె

ప్రకటన పుస్తకం డాజీతిమన్నికెజ్ దేవుణు యోహానుజ్ తోరిస్తికెజ్

నెల్వు కిబిసినిక

ఇక్క బయ్బిల్దు మన్ని కడెవెరి పుస్తకం. తెలుగు బయ్బిలుదు యా పుస్తకం, ప్రకటన ఇజి మనాద్. ప్రకటన ఇని మాటదిజ్ అర్థం డాజీతిమన్నికెజ్ వెలి తోరిసినిక, టుకుర్ ఇడ్డిమన్నిక టుకుర్ లాగ్గి తోరిసినిక ఇజి అర్థం మనాద్. ఇక్కెజ్ ఎయెర్బా ముజాల నెస్తిమన్ని మాటెజ్ ఆఱ. యేసుప్రబు వందిజ్ని దేవుణుమాటదిజ్ సాస్యం వెహ్ని వందిజ్, యేసుప్రబు సిసుర్లోఇ ఒరెన్ ఆతి యోహాను ఇనివన్నిజ్ రోమప్రబుత్వం ఆతికారిబు, నారు డిబిస్తి పోక్తార్. ఈజియన్ సమ్దరం నడిమిమన్ని వత్తోన్ ఇని లోకు సిల్లి ఇజిరి దేసమ్దు పోక్తార్ (ప్రకటన 1:9).

వాండ్రు అయ ద్విప్పుదు మహివలె, దేవుణు వన్ని దూతవెట యోహానుజ్ తోరిస్తికెజ్ వాండ్రు యా పుస్తకమ్దు రాస్త మనాన్. యేసు క్రీస్తు సిలువాదు సాజి, మరజి నిజీత్తి వెనుక, ఇంజుముంజు 60 పంటెజ్ డాట్టివెనుక యా పుస్తకం రెని ఆత మనాద్ ఇజి నమ్మిజినార్.

యా పుస్తకం, ఆసియాదు మన్ని ఏడు సజమ్కాజ్ రాస్తి ఉండ్రీ ఉత్తమలెకెండే మనాద్ (ప్రకటన 1:10-11). వాని కలమ్దు ఇనికెజ్ జర్గినెలె ఇని వందిజ్ యా పుస్తకమ్దు రాస్త మనాద్. యేసుప్రబు మరజి వానివందిజ్, మరి యా లోకమ్దు జర్గిదెజ్ మన్నికెజ్ వందిజ్, మరి యా లోకమ్ది ఆక్కర్వందిజ్ యా పుస్తకమ్దు రాస్త మనాద్. డొమిసియన్ ఇనికాన్ రోమ రాజు మహివలె యా పుస్తకం రాసి ఆత మనాద్ ఇజి నండెండార్ నమ్మిజినార్.

మొదోల్

1 యాక డాజీతిమహి సజతిజ్ దేవుణు, యేసుక్రీస్తుజ్ సెందితివరిజ్ తోరిస్తికెజ్ ఇజి వన్నిజ్ తోరిస్తికెజ్. వెటనె ఇనికెజ్ జర్గినెలె ఇజి యేసు క్రీస్తు, వన్ని దూతెజ్ వెప్తా పోక్తాండ్రె, అయ సజతిజ్ వన్ని పణిమణిసి ఆతి యోహానుజ్ తోరిస్తాన్. 2 దేవుణు మాటెజ్ వందిజ్ని, యేసు క్రీస్తు వన్నిజ్ తోరిస్తి విజు వనకాజ్ సుడెజి నిజమాతికెజ్ ఇజి యోహాన్ సాస్యం వెహ్నినాన్. 3 దేవుణుబాణిజ్ వాతి యా ప్రవక్త మాటెజ్, డటం సదివిజి మహివరిజ్ వెన్పిసినికాన్ని, నద్వినికెజ్ వెంజి అయకెజ్ మన్నుదు ఇడ్డి నమ్మిజి మంజనికాన్ దేవుణు సిజిని దీవెనమ్కు మంజనికాన్ ఆనాన్. ఎందానిజ్ ఇహిజ, అయకెజ్ అయాలెకెండే జర్గిదెజ్ సమయం డగ్రు ఆత మనాద్.

దేవుణుదిజ్ పోగ్డిజి వెహ్నిని మాటెజ్.

4 ఆసియాదు మన్ని ఏడు, దేవుణు సజమ్కాజ్ యోహాను రాసినాన్. ముజాల మహికాన్, ఏలు మన్నికాన్, వాని కాలమ్దు మంజనికాన్ ఆతికాన్, మరి వాండ్రు బస్తిమన్ని వన్ని సింహాసనం ఎద్దుమన్ని ఏడు ఆత్మెజ్, వన్ని దయదార్థం మీ మున్కు మంజి, మీరు నిపాతిదాన్ మండ్రెజ్ సాయం కిపిన్. 5-6 నమ్మకమాతికాన్ ఆతి సాసి, సాతి వరిబాణిజ్ తోలిత నిజీత్తికాన్, బూమి మున్కు ఏలుబడి: కిజిని విజు రాజురిజ్ మున్కు రాజు ఆతి యేసుక్రీస్తుబా వన్ని దయదార్థమదాన్ మీరు నిపాతిదాన్ మండ్రెజ్ సాయం కిపిన్. మజి ప్రేమిస్తాండ్రె వన్ని నలదాన్, మా పాపమ్కాజ్ మజి విడుదల కిజి, వన్ని బుబ్బాతి దేవుణుదిజ్ ఉండ్రీ రాజ్యం లెకెండేని, వన్నిజ్ పణి కిని పుజేరిజ్ లెకెండే కిత్తిమన్ని యేసుక్రీస్తుజ్ గొప్పు గవ్దెమ్ని అతికారం అంతు సిల్లెండే ఎలాకాలం మనీద్. ఆమెన్.

7 ఇదిలో, వాండ్రు మొసాపుదాన్ వాజినాన్! విజేరి కణుకెజ్ వన్నిజ్ నూణెలె. వన్నిజ్ బల్లెమ్దాన్ గుత్తికారబా నూణార్లె. బూమి మున్కు మనికార్ విజేరె, వన్నిజ్ సుడెజి గుండే కొత్తె ఆజి అడెబనార్లె. అయాలెకెండేనే ఆనాద్లె. ఆమెన్.

8 “అల్పాని ఒమెగ* నాన”, ఇహిజ మొదోల్ని కొస నాన. “ముజాల మహికాన్, ఏలు మన్నికాన్, వాని కాలమ్దు మంజనికాన్ ఆతి విజు దన్నిజ్ సత్తు మన్నికాన్” ఆతిమన్ని ప్రబు ఆతి దేవుణు వెప్పినాన్.

లోకుమరిసి లెకెండ ఒరెన్
9 యేసువందిజ్ వాజిని స్రమెజు లోఇ, వాండ్రు కిని ఏలుబడిడుని, వన్ని వందిజ్ కస్టమ్కు ఓరిస్తెజ్, మీవెట కూడోజి మన్నికాన్ ఆతి, మీ తంబెరి ఆతి యోహాను ఇని నాను, దేవుణు మాట వందిజ్ని యేసువందిజ్ సాస్యం వెప్పి వందిజ్, సమ్దరం నడిమి మన్ని పత్మోసు ఇని ద్విప్పుదు[†] ఒరెనె మహా. 10-11 వారమ్దిజ్ మొదోహి రోజు ఆతి ప్రబు దినమ్దు, నాను దేవుణు ఆత్మదాన్ నిండ్రీతి మహివలె, జోడు బాంగ ఊప్పీలెకెండ ఉండ్రీ కంటం నా వెనుకహాన్ వెహా. నీను సుడోజినికెజ్ విజు ఉండ్రీ పుస్తకమ్దు రాసి, ఎపెను, స్మృతన, పెర్గాము, తుయతయేర్, సరదిను, పిలదెల్లియ, లవొదికియ ఇని ఏడు, దేవుణు సజమ్కాజ్ పోకీత ఇజి, అయా కంటం నజి వెప్పామన్నిక, నా వెనుకహాన్ నాను వెహా. 12 యాక వెహానె, నావెట వర్గిజిని కంటం ఇనికాదో ఇజి సుడోదెజ్, నాను వెనుక మహ్త. నాను వెనుక మహ్తజ్, బజారమ్దాన్ తయార్ కిత్తి ఏడు దీవ డండిజ్ సుడోత. 13 అయ దీవ డండిజ నడిమి, లోకు మరిసి ఆతి వన్నిజ్ పోలితి ఒరెన్ వన్నిజ్ సుడోత. వాండ్రు వన్ని పాదమ్ దాక అందితి మన్ని ఉండ్రీ నీరి సొక్క, పోర్పాజి గుండెదు బజారమ్దాన్ మన్ని కంటువ తోహా ఆత మహాన్. 14 వన్ని బురాని వన్ని బుర్రది కొప్పు తెల్లాని దూతిదిజ్ పోలిసి, గాందులెకెండ తెలాజ్ మహాద్. వన్ని కణుకెజ్, నీను కొనెజ్లెకెండ మహా. 15 వన్ని పాదమ్కు కంసు సొల్లుదు కాప్పి, కంజు మెర్నినిలెకెండ మహా. వన్ని కంటం గొప్పు పెరి గడ్డ జాటు లెకెండ మహాద్. 16 వాండ్రు వన్ని ఉణెర్ కియుదు ఏడు సుక్కెజ్ అస్త మహాన్. రుండి దరిజ్బా తెవుగు మన్ని కుర్త లెకెండ మన్ని మాటెజ్ వన్ని వెయుదాన్ వెల్లి వాతె. వన్ని మొకొ పూర్తి జాయ్దాన్ మెర్నిని పొద్దుది జాజ్ లెకెండ మహాద్. 17 వన్నిజ్ సుడోతానె, నాను సాతివన్నిలెకెండ వన్ని పాదమ్కాజ్ అర్త. అయావలె వాండ్రు వన్ని ఉణెర్ కియు మా మున్కు ఇడోజి ఈహు వెప్తాన్. “తియెల్ ఆమా. నాను మొదోహికాన్. నాను కడోవెరిదికాన్. 18 నాను బత్తిజి మంజనికాన్. నాను సాతిమహికాన్ గాని ఇదిలో ఎలాకాలం బత్తిజిన. మరి సావుదిని సాతికార్ మంజని అయా లోకమ్ది తాలంకియు నా కీదు మనాద్. 19 అందెజె, ఏలు మన్ని వనకాజ్ వందిజ్, మరి వాని కాలమ్దు జర్గిదెజ్ మనికెజ్, నీను సుడోతి మనికెజ్ నీను రాన్త. 20 నా ఉణెర్ కియుదు నీను సుడోతి మన్ని ఏడు సుక్కెజ్, ఏడు దేవుణు సజమ్క దూతార్. మరి బజారమ్దాన్ తయార్ కితి మన్ని ఏడు దీవ డండిజ్, ఏడు దేవుణు సజమ్కు.

2

ఎపెను పట్టుమ్దు మన్ని దేవుణు సజమ్దిజ్ రాసిని ఉత్తం

1 “ఎపెను పట్టుమ్దు మన్ని దేవుణు సజమ్ది దూతెజ్ రాన్త, వన్ని ఉణెర్ కియుదు ఏడు సుక్కెజ్ అసి, ఏడు దీవడండిజ నడిమి బూలాజినికాన్ వెప్పిని మాటెజ్ ఇక్కెజ్. 2 నీను కిజిని పణిజ్ని, నీను కస్తబాడోతికెజ్ నాను నెసిన్. నీను ఎస్సానో హిమ్మెజ్ ఓరిస్తిమన్ని ఇజిబా నాను నెసిన్. సెకెజ్ కినివరిజ్ నీను ఓరిసి మండ్రెజ్ అల్త ఇజి నాను నెసిన్. అహ్సార్దు ఇజి వెహా ఆజి అహ్సార్దు ఆఇ వరిజ్ నీను పరిస కిజి, వారు అబద్దం వెప్పికార్, ఇజి నీను నెస్తి ఇజి నాను నెసిన్. 3 నీను నా పేరు వందిజ్ హిమ్మెజ్ డిసివిండ ఓరిస్తి మన్ని మరి కస్టమ్కు బరిస్తిమన్ని గాని నీను దన్ని వందిజ్ ఎనెజ్బా వందితిఇ ఇజిబా నాను నెసిన్.

4 అహిజ్బా, మొదోహాన్ నా వందిజ్ నిజి మహి మొదోహి ప్రేమ, నీను డిస్తినిత్తి ఇజి ఉండ్రీ తప్పు నీ మున్కు. సుడోత. 5 నా మున్కు. మన్ని ప్రేమ డిసిసీజి, నీను ఎస్సా వెనుక సొన్ని మహి ఇజి నీను బడిబిఅ. దన్ని వందిజ్ నీ మున్కు మరిసి, తప్పుజ్ ఒప్పుకొడోజి డిసిసీజి, ముజాల కిజి మహికెజ్ కిజి మన్త. నీను మున్కు మారిసి, పావమ్కు ఒప్పుకొడోజి డిసిసి - నివిండ మహిజ, నాను నీడగ్రు వాజి, నీ దీవడండిదిజ్ దన్ని బాడ్డిదాన్ లాగ్గు విసిర్తు. 6 గాని, నీవందిజ్ ఉండ్రీ నెగ్గి సజతి మనాద్. నాను

* 1:8 1:8 అల్పగ్రీకుబానది మొదోహి అక్కరం. ఒమెగ కడోవెరిదికాన్ † 1:9 1:9 ద్విప్పుసురుల సమ్దరం మన్ని ఇజిరి దేసిం

ఇన్సం కిఇకార్ ఆతి నికొల జటుదివరి పణిజ్ నీనుబా ఇన్సం కిఇతి. 7 దేవుణు అత్తు దేవుణు సజమ్కాజ్ వెహ్నికెజ్ ఇనికెజ్ ఇజి గిబ్బిజ్ ఒడజి వెంజి అయావజ నడిజి మండ్రు. సెఇకెజి మున్సు. గెలిన్సి వన్నిజ్ పరలోకం ఆతి పరదీనుదు మన్సి పాణం సీని మరాతి పట్టు. తిండ్రెజ్ అక్కు సీనా.

స్మూర్న పట్టుమ్దు మన్సి దేవుణు సజమ్దిజ్ రాసిని ఉత్తం

8 “స్మూర్న పట్టుమ్దు మన్సి దేవుణు సజమ్ది దూతెజ్ రాన్అ. మొదోహికాన్ కడెవెరిదికాన్ ఆతి, సాతి వెనుక మరజి నిజితికాన్ వెహ్నిని మాటెజ్ ఇక్కెజ్. 9 నీ కన్సుమ్కు, నీ కరు బత్తు. నాను నెసిన. గాని దేవుణుదిజ్ సెందితి సజతిజిలోఇ నీను ఆన్సి మన్సికిలెకెండెనె. మాపు యూదురు ఇజి వెహ్నిని దేవుణు లోకుర్ ఆఇకార్ ఆతి, సయ్తానుజ్ సెందితికార్ ఆతి యూదురు, నీవందిజ్ వెహ్ని దూసణ మాటెజ్ నాను నెసిన. 10 నీ మున్సు. వాదెజ్ మన్సి కన్సుమ్కాజ్ వందిజ్ నీను తియెల్ ఆమా. నిజి పరిస కిదెజ్, నీ లోకురిజ్ సెగొండారిజ్ సయ్తాను అన్సిసి జెలిదు ఇడిస్నాలె. పది దినమ్కు నీను హిమ్మెజ్ ఓరిసి మండ్రెజ్ వలె. గాని నా మున్సు. మన్సి నమకమ్వందిజ్ సాపు వాతిజిబా నమకమాతికి ఆజి మన్అ. ఎలాకాలం మంజిని బత్తు. ఇని ఇనాయం నాను నిజి సీనాలె.

11 దేవుణు అత్తు దేవుణు సజమ్కాజ్ వెహ్నికెజ్ ఇనికెజ్ ఇజి గిబ్బిజ్ ఒడజి వెంజి, అయావజ నడిజిని మండ్రు. సెఇకెజి మున్సు. గెలిన్సి వన్నిజ్ రుండి సాపు ఇని దెబ తగ్గివద.

పెర్గాము పట్టుమ్దు మన్సి దేవుణు సజమ్దిజ్ రాసిని ఉత్తం

12 పెర్గాము పట్టుమ్దు మన్సి దేవుణు సజమ్ది దూతెజ్ రాన్అ.

“రుండి దరిజ్ తెపుగు మన్సి కుర్లలెకెండె మన్సి మాటెజ్ మన్సికాన్ వెహ్నినికెజ్ ఇక్కెజ్. 13 సయ్తాను ఏలుబడి: కిజిని పట్టుమ్దు నీను బత్తిజిని ఇజి నాను నెసిన. సయ్తాను ఏలుబడి: కిజిని అయ పట్టుమ్దు నా మున్సు. నమకం ఇడ్డి నమకమాతి సాసి ఆతి అందిపాయెజ్ సప్తి కాలమ్దుబా నా మున్సు. ఇడ్డి నమకం డిసిసివిండె, నా పేరు వందిజ్ నీను నిజం నిహిమహి ఇజి నాను నెసిన. 14 గాని నజి పడి:ఇకెజ్ సెగం సజతిజ్ నీబాన్ మన్సె. బొమ్మెజి పూజి సిత్తికెజ్ తింజి, రంకు బూలాజి పాపం కిదెజ్ ఇస్రాయేలు లోకురిజ్ రేప్పి మన్సికాన్ ఆతి బాలాకుజ్ * అక్కెజ్ నెస్సిసి మన్సికానాతి బిలాము† బోద లోజిజి నడి:సినికార్ నీ లోఇ మనార్. 15 నికొల బోద లోజిజి మన్సికార్బా నీ లోఇ మనార్. 16 అందెజె నీను మున్సు మారిసి పాపమ్కు ఒప్పుకొడె:జి డిసిసిఅ. సిలిజి నాను బేగి నీడగ్రు వాజి నా వెయుదాన్ వాజిని కుర్ల లెకెండె మన్సి మాటెజిణిజ్ వరివెలు విదెం కిసా.

17 దేవుణు అత్తు దేవుణు సజమ్కాజ్ వెహ్నికెజ్ ఇనికెజ్ ఇజి గిబ్బిజ్ ఒడజి వెంజి అయావజ నడి:జి మండ్రు. సెఇవనకాజ్ మున్సు. గెలిసినివన్నిజ్ నాను పరలోకమ్దు డా:జితి మన్సి మన్సి ఇని తిండి సెగం ఉండెజ్ సీనా. మరి, దోహ్కొకొండ్రె ఆవిండె, మరి ఎయెన్ వన్నిజిబా నెన్ఇ ఉండ్రె కొత్త పేరు రాస్సి మన్సి ఉండ్రె తెల్లాని పణకుబా సీనా.

తుయతయిర్ పట్టుమ్దు మన్సి దేవుణు సజమ్దిజ్ రాసిని ఉత్తం

18 “తుయతయిర్ పట్టుమ్దు మన్సి దేవుణు సజమ్ది దూతెజ్ రాన్అ కణుకెజ్ సినుకొనెజ్ లెకెండె మన్సి, మెర్నిని కంజుదిజ్ పోలితి పాదమ్కు మన్సి దేవుణు - మరిసి ఆతి వన్సి మాటెజ్ ఇక్కెజ్. 19 నీను కిజిని పణిజ్ ఎలాగ మర్రికెజ్, నీ ప్రేమ ఎలాగ మర్రికె, నీ నమకం ఎలాగ మర్రికె ఇజి నాను నెసిన. నీను మహివరి వందిజ్ కిజిని పణిజ్ నీను హిమ్మెజ్ డిసివిండె ఓరిసి మంజినిక విజి నాను నెసిన. నిజమె ముజాల కిజి మహి దన్సిజ్ ఒడ్డె నెగెండె నీను ఏలు కిజిని.

20 గాని నజి నపిఇ ఉండ్రె సజతి నీబాన్ మనాద్. దన్సిజ్ అది నె దేవుణు ప్రవక్త ఇజి వెహ్నిని యెజెబెలు ఇని బోదిలిదిజ్, నీబాన్ మండ్రెజ్ ఒప్పుకోటి ఇజి ఉండ్రె తప్పు నీ మున్సు. వెహ్నిజ్ మనాద్. అది దన్సి బోదదాన్ రంకు బూలాదెజ్ మరి బొమ్మెజి మాడిసి, బొమ్మెజి పూజెజ్ సిత్తికెజ్ తిండ్రెజ్ ఆనాద్ ఇజి నా మున్సు. నమకం ఇడ్డిమన్సి, నా పణికిని వరిజ్ మొసెం కిజి తప్పు సరిదు నడి:పిసినాద్. 21 అది

* 2:14 2:14 ఇస్రాయేలు లోకురి మున్సు. సయెప్ సీదెజ్ ఇజి బిలాము ఇని ఒరెన్ గురు నన్సి ప్రవక్తెజ్ కూక్కి మన్సి మోయాబు దేసెమ్ది రాజు. బుద్ది సిల్లింజ్ దేవుణుదిజ్ వెత్తెకమాతి పణి కితి వందిజ్ వన్సి వందిజ్ దేవుణు మాటదు రాస్త మనాద్. సంకియా 22-24, యెహ్శువ 24:9, నాయాది 11:25. † 2:14 2:14 ఇస్రాయేలు లోకురి మున్సు. సయెప్ సీదెజ్ ఇజి మోయాబు దేసెమ్ది రాజు బాలాక్ కూక్కి మని ఒరెన్ గురు నన్సి ప్రవక్త. సంకియా 22-24.

రంకు బూలానిక డిసిసిజి, దన్ని మన్ను మారిసి పాపమ్కు ఒప్పుకొండేజి డిసిసిదెజ్ సమయం సిత్త, గాని అది ఒవ్వితాద్. ²² ఇదిలో నాను దన్నిజ్ నిజ్దెజ్ అబ్బె పెరి కన్యమ్కాజ్ మంసమ్దు తెర్వాలె. దన్నివెట కూడేజి రంకు బూలాతికార్, వారు దన్ని వెట కూడేజి కిత్తిమహి పణిజవందిజ్ ఒడిబిజి, వనకాజ్ ఒప్పుకొండేజి డిసిసివిండ మహిజ, పరిజ్ నాను నండొ కన్యమ్దు అర్వాలె. ²³ దన్ని కొండేరిజ్ నాను సప్పు. అయావలె నాను లోకురి మన్నుజ మన్ని ఆలోసనమ్కుని అసెజ్ ఇనికెజ్ ఇజి నుడేజి నెసినికాన్ ఇజి విజు దేవుణుసజమ్కు నెసినె. నీ లోఇ ఒరెన్ ఒరెన్ వన్నిజ్ వన్నివన్ని పణిదిజ్ తగితి లెకెండ నాను సూణా. ²⁴ దన్ని బోదదిజ్ లోజిఇవరిజ్ని మరి సయ్యానులోఇ డాజితి మన్ని వనకాజ్ నెస్సెజ్ వరి మన్ను ఇడేవిండ మంజిని వరిజ్, నాను వెప్పినిక ఇనిక ఇహిజ, మీరు మరి ఇనికబా కిదెజ్ ఇజి వెప్పి, మీ మున్ను. మరి ఇని బరు నాను మొవ్వి. ²⁵ గాని నాను వానిదాక మీరు నెస్తిమన్ని వనకాజ్ నెగెండ అసి మండ్రు.

²⁶ ఆక్కర్దాక నజి ఇన్దమాతి వజ కిజి మంజి, సెఇ వనకాజ్ మున్ను. గెలిసినివన్నిజ్, దేసమ్కు లోకురి *మున్ను. ఎలుబడి: కిదెజ్ అతికారం సీనా. ²⁷ నా బుబ్బాతి దేవుణుబాసిజ్ నజి అతికారం దొహక్తిమన్నిలెకెండ, వన్నిజ్ లోకురి మున్ను. అతికారం సీనా. దేవుణు మాటదు రాస్తిమన్నిలెకెండ, “వాండ్రు ఇనుము డుడ్డుదాన్ వరిజ్ ఎలుబడి: కినాన్. కుంబెరి వన్ని కుండెలెకెండ వరిజ్ పెడెల్ కొత్తాన్” ²⁸ సెఇ వనకాజ్ మున్ను. గెలిస్తి వన్నిజ్, నాను కొడిజామ్దు సోని సుక సీనా. ²⁹ దేవుణు అత్తు దేవుణు సజమ్కాజ్ వెప్పినికెజ్ ఇనికెజ్ ఇజి గిబ్బిజ్ ఒడేజి వెంజి అయావజ నడిజి మండ్రు.

3

నర్దిను పట్టుమ్దు మన్ని దేవుణు సజమ్దిజ్ రాసిని ఉత్తం.

¹ “నర్దిను పట్టుమ్ది దేవుణు సజమ్ది దూతెజి రాన్అ. ఏడు సుక్కెజ్ని దేవుణు ఏడు అత్తు మన్నికాన్ వెప్పిని మాటెజ్ ఇక్కెజ్. నీను కిజిని పణిజ్ నాను నెసిన. బత్తిజినికాన్ ఇజి నిజి పేరు మనాద్. గాని నీను సాతికినె. ² నా దేవుణు ఎద్దు నీ పణిజ్ పూర్తి అతికెజ్ ఇజి తోరెఉతె. అందెజ్ నీను, నిజిజి తెలి ఆజి, సాదెజ్ డగ్గు ఆతి మన్ని మిగిలిత్తి వనకాజ్ సత్తు కిబిన్అ. ³ అందెజ్ నీను ముజాల ఇనిక నెస్తి మన్నిదొ, ఎలాగ వెహి మన్నిదొ ఇజి ఎత్తు కిఅ. వనకాజ్ లోజిజి పాపమ్కు ఒప్పుకొండేజి డిసిసిజి, మారు మన్ను పొందిఅ. నీను నిజిజి తెలి ఆజి మన్విండ మహిజ, ఒరెన్ డోజారి వానిలెకెండ నాను వానా. ఇనిక ఇహిజ ఎమేణి గడియారు నాను, నీ డగ్గు వానాన్ ఇజి నిజి తెలివిద్. ⁴ గాని వరి సొక్కెజ్ మొప్పి. అఎండ, సుబరం మన్నికార్ నెగెండార్ సర్దీన్ పట్టుమ్దు నీబాన్ మనార్. అందెజ్ వారు మొప్పి. సిల్లి తెల్లాని సొక్కెజ్ తోడిగిజి, నావెట బూలాదెజ్ తగ్గికార్. ⁵ సెఇ వనకాజ్ గెలిసినికాన్, వరిలెకెండ తెల్లాని సొక్కెజ్ తోడిగిజి మంజినాన్. దేవుణు వెట ఎలాకాలం బత్తినివరి పేరుకు రాసి ఇడేజిని పుస్తకమ్దాన్ నాను వన్ని పేరు ఎనెజ్బా డెయ్జి పోక్వి. గాని నా బుబ్బి ఎద్దుని వన్ని దూతార్ ఎద్దు వాండ్రు నజి నెందితికాన్ ఇజి వన్ని పేరు ఒప్పుకొణా. ⁶ దేవుణు అత్తు దేవుణు సజమ్కాజ్ వెప్పినికెజ్ ఇనికెజ్ ఇజి గిబ్బిజ్ ఒడేజి వెంజి అయావజ నడిజి మండ్రు.

పిలదెల్లియ పట్టుమ్దు మన్ని దేవుణు సజమ్దిజ్ రాసిని ఉత్తం.

⁷ “పిలదెల్లియ పట్టుమ్దు మన్ని దేవుణు సజమ్ది దూతెజి రాన్అ. పరిసుద్దమాతికాన్* నిజామాతికాన్ ఆతి, దావీదు పట్టుమ్దిజ్ ఎలుబడి: కిదెజ్ అతికారం మన్నివన్నిలెకెండ దన్ని తాలమ్కియు మన్నికాన్ వెప్పిని మాటెజ్ ఇక్కెజ్. వాండ్రు రేతిజి ఎయెన్బా కెప్తాజ్ అట్ఎన్. వాండ్రు కెప్తాజి ఎయెన్బా రెదెజ్ అట్ఎన్. ⁸ నీను కిజిని పణిజ్ నాను నెసిన. నిజి మన్ని సత్తు కండెజ్ ఆతిజ్బా నీను నా మాటెజ్ లోజిజి నా పేరు నెన్ఎ ఇజి వెహిఇతి. ఇదిలో నీ ఎద్దు నాను సెప్లా రేత మన్ను. దన్నిజ్ ఎయెన్బా కెప్తాజ్ అట్ఎన్.

⁹ యూదురు అవిండ, మాపు యూదురుజు, మాపు దేవుణు లోకుర్ ఇజి అబద్దం వెప్పిని సయ్యాను సజమ్దివరిజ్, నీ డగ్గు వాజి నీ పాదమ్కాజ్ అర్చి మాడిస్పిలెకెండ నాను కినా. నాను నిజి ప్రేమిస్త మన్ను ఇజి అయావలె వారు నెసార్లె. ¹⁰ స్రమెజ్ డిసిసివిండ ఓరిసినివందిజ్ నాను సిత్తి ఆడ్రెజ్ నీను

* 2:26 2:26 కీర్తన 2:9. * 3:7 3:7 గొప్ప నెగ్గికాన్, ఇని తప్పుబా సిలికాన్

లోజిత్తి మహి. అందెజె బూమి మున్ను బత్తిని వరిజ్ విజేరిజ్ వాజిని పెరి కన్వమ్కాజ్ కూడితి పరిన కాలమ్దు నాను మిజి కాపాడ్డా.

11 ఇదిలో, నాను బేగినె వాజన. నీను గెలిన్నివందిజ్ నిజి దోహ్కీని ఇనాయం మరి ఎయెన్బా బవండ, నీను నెన్నిమన్ని వనకాజ్ డిన్వండ గటిజ అసి మన్అ. 12 నెజ వనకాజ్ మున్ను గెలిన్ని వన్నిజ్ నా దేవుణు గుడిడు ఉండ్రీ తంపం లెకెండ కిన. వాండ్రు ఎనెజ్బా దన్ని బాణిజ్ డిసి సొన్వన్. నా దేవుణు పేరుని, పరలోకమ్దాన్ దేవుణుబాణిజ్ డిగ్గి వాజిని కొత్త యెరూసలేం ఇని నా దేవుణు పట్టుం పేరుని, నా కొత్త పేరుబా నాను వన్ని మున్ను రాస్సా. 13 దేవుణు ఆత్మ దేవుణు సజమ్కాజ్ వెస్సానికెజ్ ఇనికెజ్ ఇజి గిబ్బిజ్ ఒడేజి వెంజి అయావజ నడిజి మండ్రు.

లవొదికియ పట్టుమ్దు మన్ని దేవుణు సజమ్దిజ్ రాసిని ఉత్తం.

14 “లవొదికియ పట్టుమ్దు మన్ని దేవుణు సజమ్ది దూతెజి రాన్అ. నమ్మకమాతికాన్ని నిజమాతి సాసి ఆతికాన్, దేవుణు తయార్ కితి విజు వనకాజ్ మున్ను అతికారం ఆతి ఆమెన్ ఇనికాన్ వెస్సాని మాటెజ్ ఇక్కెజ్. 15 నీ పణిజ్ ఎలాగ మర్తికెజ్ ఇజి నాను నెసిన. నీను సలాజ్ మనికి ఆఇ. వేసాజ్ మన్నికిబా ఆఇ. నీను ఎమేణికబా ఉండ్రీ రకం ఆజి మంజనిక ఇహిజ బాగ మహాద్, ఇజి నాను కోరిజన† 16 నీను పణిదిజ్ రెఇకి. నీను సలాజ్ సిల్లెద్. వేసాజ్బా ఆఇ. నీను గోరువేసాజ్ నన్నికి. అందెజె నా వెయుదాన్ నాను నిజి పూన్పు విసిర్పు. 17 నీను గత్ర నన్నికి, దిక్కు గతి సిల్లికి, బీదాదికి, గుడ్డిదికి, డుమ్డ మన్నికి. గాని యాకెజ్ నిజం నెన్వండ, నజి ఆస్తి మనాద్, నాను డబ్బుజ్ గణస్త మనా, నజి ఇనిక తక్కు సిల్లెద్ ఇజి నీను వెపా ఆజిని. 18 గాని నాను నిజి బుద్ది వెస్సానిక ఇనిక ఇహిజ, నీను ఆస్తి మనికి ఆదెజ్ ఇజి సినుదు సుర్జి సుబరం ఆతి బజారం నా బాణిజ్ కోల్అ. మరి నీ సిగు డాజినిలెకెండ పొరపాదెజ్ తెల్లాని సొక్కెజ్ నా బాణిజ్ కోల్అ. నీ కణుకెజ్ టెటాజ్ తోర్లెజ్ కణుకెజి రాస్సెజ్ కాటికబా నా బాణిజ్ కోల్అ.

19 నాను ప్రేమిసిని విజేరిజ్ బుద్ది వెస్సా, సిక్కుదాన్ దిదిజనా. అందెజె నీను మన్నుదు నిజం ఆస ఆజి మన్అ. మరి మారు మన్ను పొందిజి నీ పాపమ్కు ఒప్పుకోడేజి డిసి సిఅ. 20 ఇదిలో, నాను సేప్లా డగ్గు నిల్లి, సేప్లా రేఅ ఇజి కొత్తినా. ఎయెన్బా నా కంటం వెంజి సేప్లా రేతిజ, నాను లోక సొన్ని వన్నివెట బోజనం కినా. వాండ్రుబా నావెట బోజనం కినాన్. 21 నాను ఎలాగ నెజ వనకాజ్ మున్ను గెలిసి, నా బుబ్బువెట వన్ని సింహాసనమ్దు బస్తి మనానో, అయాలెకెండనె, నెజ వనకాజ్ మున్ను గెలిన్ని వన్నిజ్ నావెట నా సింహాసనమ్దు బస్తిజ్బా అక్కు సీనా. 22 దేవుణు ఆత్మ దేవుణు సజమ్కాజ్ వెస్సానికెజ్ ఇనికెజ్ ఇజి గిబ్బిజ్ ఒడేజి వెంజి అయావజ నడిజి మండ్రు”.

4

పరలోకమ్దుమన్ని సింహాసనం.

1 యా సజతిజ్ జర్గితి వెనుక నాను సుడేతిజ్ ఇదిలో పరలోకమ్దు ఉండ్రీ సేప్లా రే ఆతి మహిక సుడేతి. జోడుబాంక పలక్కినన్ని జాటులెకెండ, నావెట ముజాల వర్గితి మన్ని కంటం మన్నికాన్, “ఇబ్బె ఎక్కి రఅ. దిన్ని వెనుక ఇనికెజ్ జర్గినెలె ఇజి నాను నిజి తోరిస్సాలె”, ఇజి వెప్లాన్. 2 వెటనె నాను దేవుణు ఆత్మ వెట నిండ్రీత. నన్నివలె పరలోకమ్దు ఉండ్రీ సింహాసనమ్దు ఒరెన్ బస్తిమన్నిలెకెండ, నా ఎద్దు తోరె ఆతాద్. 3 అయ సింహాసనమ్దు బస్తి మన్నికాన్ పొద్దులెకెండ గొప్పు జాయ్ మన్ని ఎరాని రంగు పణకుదిజ్ పోలిసి తోరితాన్. సింహాసనమ్దిజ్ సుటులం గొప్పు జాయ్ మన్ని ఆకు రంగుది కొడేవేలి మహాద్. 4 అయ సింహాసనమ్దిజ్ సుట్టులం ఇరువయ్ నాల్లి సింహాసనమ్కు మహా. అయ ఇరువయ్ నాల్లి సింహాసనమ్కాజ్, తెల్లాని సొక్కెజ్ తోడిగిజి, రాజురి టోపిజ్ నన్ని బజారం టోపిజ్ బురాదు తోడిగిజి ఇరువయ్ నాల్ఎర్ పెద్దెలుబు బస్తి మహార్. 5 అయ సింహాసనమ్దాన్ గొప్పు

† 3:15 3:15 లవొదికియ పట్టుమ్దిజ్ డగ్గు గొప్పు పేరు మన్ని రుండి పట్టుమ్కు మహా. హయెరపోలిన్ ఇని పట్టుమ్దు వేసాజ్ ఏరు సాని ఉండ్రీ గడ్డ మహాద్. లోకుర్ పరి జబ్బుజ్ సొండ్రేజ్ ఇజి, బాన్ సొన్ని అయ గడ్డాదు ఏరుకాబాజి మహార్. కొలోకాన్ ఇని పట్టుమ్దు ఉండ్రేజ్ గొప్పు రుసి మన్ని ఏరు సాని ఉండ్రీ గడ్డ మహాద్. గాని లవొదికియ పట్టుమ్ది ఏరు సపాజ్ మహాద్. అందెజె లవొదికియ పట్టుమ్ది దేవుణు సజమ్దిజ్ ఇని పణిదిజ్బా రెఇ సపాజ్ ఏరుదిజ్ పోలిసి యెసు క్రీస్తు వెస్సానాన్ ఇజి నిగొడార్ వెస్సానార్.

మెర్సిని జాయ్, దీక్షణినికెళ్ల, పిడుగుజ్జె వెళ్లి వాజి మహా. అయి సింహాసనం ఎద్రు ఏడు దీవెళ్ల జాయ్ సీజి మహా. అక్కెళ్ల దేవుణు ఏడు అత్తెళ్ల. ⁶ అయి సింహాసనం ఎద్రు గటి మన్ని గాజుదిళ్ల పోలితి సమ్దరమ్లెకెండ్ల మహాద్. అక్క ఇని రంగు సిల్లి గటి మన్ని అద్దం లెకెండ్ల మహాద్. నడిమిని, అయి సింహాసనమ్దిళ్ల సుటులం, ఒడోల్ ముస్కు, వెనుక ముందాల విజు, కణుకెణిళ్ల నిండ్రితి మన్ని పాణం మన్ని నాల్లి జంతుళ్ల మహా.

⁷ పాణం మన్ని, మొదోహి జంతు మొకొ సింహం లెకెండ్ల మహాద్. రుండి జంతు మొకొ దూడలెకెండ్ల మహాద్. మూండ్రి జంతు లోకు మొకొ నన్ని మొకొ మహికాద్. నాల్లి జంతు ఎగ్రిని డేగలెకెండ్ల మహాద్. ⁸ యా నాల్లి జంతుజు, ఉండ్రి ఉండ్రి దన్నిజ్ అరెసిళ్ల రెక్కెళ్ల మహా. అయి రెకెజు ముస్కుని అడిగి విజు నిండ్రు కణుకెళ్ల మహా. అయి నాల్లి జంతుళ్ల.

“ముజాల మహికాన్, ఏలు మన్నికాన్, వాని కాలమ్దు మంజినికానాతి విజు వనకాళ్ల అతికారం మన్ని దేవుణు పరిసుద్దమతికాన్, పరిసుద్దమాతికాన్, *పరిసుద్దమతికాన్”, ఇజి రెయు పొగల్ డిన్విండ పార్లి మహా.

⁹ ఎస్తివలెహి అయి పాణం మన్ని నాల్లి జంతుళ్ల, అయి సింహాసనమ్దు బస్తి మన్ని ఎలాకాలం బత్తిజినికాన్ అతి వన్నిజ్, పొగిడిజి గవరం సీజి వందనమ్కు వెప్పి పొగిడిజి మహారొ, ¹⁰ నస్తివలె అయి ఇరువయ్ నాలేవర్ పెద్దెలుజు అయి సింహాసనమ్దు బస్తి మన్నివన్నిజ్ ఎద్రు పడగజి అర్తారె, ఎలాకాలం బత్తిజిని వన్నిజ్ మాడిసి యా లెకెండ్ల పొగిడిజి వెప్పి మహారొ.

¹¹ “మా ప్రబు అతి దేవుణు, విజు వనకాళ్ల తయారొ కిత్తికి నీనె. నీను ఇస్తిమాతి వజ అక్కెళ్ల విజు తయారొ అతె. అయాలెకెండ్ల అక్కెళ్ల మన్నె. అందెజె నీ గొప్ప గవరం వందిళ్ల, నీ గొప్ప సత్తు వందిళ్ల లోకుర్ విజెరె నిజి గవరం సీజి పొగిడిజి మంజినారొ”, ఇజి వెప్పి బజారమ్దాన్ తయారొ కిత్తి రాజురి టోపిలెకెండ్ల మన్ని వరి టోపిళ్ల, సింహాసనం ఎద్రు ఇడ్వార్.

5

దేవుణు కియుదు మన్ని పుస్తాకమ్ని గొరెపిల్ల.

¹ నస్తివలె, లొఇని వెల్లి రాసి అతిమని, ఏడు సీలుజ్ పొక్తిమన్ని ఉండ్రి పుస్తకం అయి సింహాసనమ్దు బస్తి మన్నివన్ని ఉణెరె కియుదు అస్తి మన్నిక సుడెత. ² “అయి సీలుజ్ లాగ్లి పుస్తకం రెక్కెళ్ల తగ్గికాన్ ఎయెన్ మనాన్”, ఇజి గొప్ప సత్తుమన్ని ఒరెన్ దేవుణు దూత డటం డేల్లి వెప్పిక సుడెత. ³ గాని, పరలోకమ్దు మన్ని వరి లొఇ గాని, బూమి ముస్కు మన్ని వరి లొఇ గాని, అయాలొకమ్దు మన్ని వరి లొఇ గాని అయి పుస్తకం రెక్కెళ్ల లొఇ సుడెదెజ్ అట్టి ఎంబె వన్నిజ్ బా తొరెవితాద్. ⁴ అయి పుస్తకం రెక్కెళ్ల, లొఇ సుడెదెజ్ తగ్గి ఎయెన్ వన్నిజ్ బా తొరెఇతిజ్ నాను నండ్ అడెబాజి మహా. ⁵ నస్తివలె, అయి పెద్దెలుజు లొఇ ఒరెన్, “నీను అడెబామా. ఇదిలో, దావీదు మొదోల్దాన్ సిగ్రిస్తి, యూద కుటుమ్దికాన్ అతి సింహం ఇజి పేరు మన్నికాన్, అయి ఏడు సీలుజ్ లాగ్లి పుస్తకం రెక్కెళ్ల అట్టి వన్ని లెకెండ్ల గెలస్త మనాన్”, ఇజి నజి వెప్తాన్.

⁶ నస్తివలె, అయి పెద్దెలుజు నడిమిని పాణం మన్ని నాల్లి జంతుజు నడిమి మన్ని అయి సింహాసనం నడిమి, ముజాల కత్తె అతిమనిక, గాని ఏలు నిల్లి మంజిని ఉండ్రి గొరె పిల్లిదిళ్ల సుడెత. అయి గొరె పిల్లిదిళ్ల ఏడు కొముకుని ఏడు కణుకెళ్ల మహా. అయి కణుకు బూమి ముస్కు విజు బాడ్డిజు పొక్తిమన్ని దేవుణు ఏడు అత్తెళ్ల. ⁷ వాండ్రు వాతాండ్రి అయి సింహాసనమ్దు బస్తిమన్ని వన్ని ఉణెరె కియుదు మన్ని పుస్తకం లొస్టాన్. ⁸ వాండ్రు అయి పుస్తకం లొస్తివలె, పాణం మన్ని అయి నాల్లి జంతుజ్ని, అయి ఇరువయ్ నాలేవర్ పెద్దెలుజు విజెరె, టోమలెజ్ని, నమ్మితి వరి పార్లనమ్కు అతి నెగ్గి వాసనం సీజిని దుపమ్కు ఇడ్డి మన్ని బజారమ్ది గిన్నెజ్ ఒరెన్ ఒరెన్ వరి కియుదు అస్తారె గొరె పిల్ల ఎద్రు పడగజి అర్తారె. ⁹ అయాలె, “నీను అయి పుస్తకం లొసి, దన్ని సీలుజ్ లాగ్దిజ్ తగ్గికి. ఎందానిజ్ ఇపాజి నీనె కత్తె అతి, నీ నలదాన్ విజు జాతిజుణిజ్, విజు బానిజాణిజ్, విజు లోకుర్ బాణిజ్, విజు దేనమ్కాణిజ్ లోకురిజ్ దేవుణు వందిజ్ కొటి. ¹⁰ మరి వరిజ్ దేవుణుదిజ్ ఉండ్రి రాజ్యం లెకెండ్లని

* 4:8 4:8 ఇని కల్లి సిల్లెండ్ల గొప్ప నెగ్గికాన్

వన్నిజ్ వణి కిని పుజేరిబులెకెండ్ కిత్తి. వారు బూమి మున్ను, ఏలుబడిః కిసార్”, ఇజి అయ పాణం మన్ని నాల్లి జంతుజ్ని ఇరువయ నాల్ఎర్ పెద్దెలుబు ఉండ్రి కొత్త పాట పార్దార్. 11 నస్తివలె నాను సుడఃతిజ్ నండ్ దూతారి కంటం వెహ. వరి లెక్క కోటి కోటిదిజ్ ఇంక లావ్ మహా. వారు అయ సింహాసనమేదిజ్ని అయ పాణం మన్ని నాల్లి జంతుజ్ని అయ ఇరువయ నాల్ఎర్ పెద్దెల్లజ సుటులం మంజి, 12 “కత్తె అతి గొరె పిల్ల పొగడః ఆదెజ్ తగ్నికాన్. అతికారం మన్నికాన్ ఆదెజ్, ఆస్తి మన్నికాన్ ఆదెజ్, గెణం మన్నికాన్ ఆదెజ్, సత్తుమన్నికాన్ ఆదెజ్, మర్యాద లొసె ఆదెజ్, గవేరం లొసె ఆదెజ్, పొగడః ఆదెజ్ తగ్నికాన్”, ఇజి గొప్పు పెరి కంటమ్దాన్ పార్ది మహార్. 13 నస్తివలె పరలోకమ్దు మన్ని, బూమి మున్ను, మన్ని, బూమి అడిఃగి మన్ని, సమ్దరమ్దు మన్ని, పాణం మనికెజ్ విజు కూడఃజి.

“సింహాసనమ్దు బస్తి మన్నివన్నిజ్ని, గొరెపిల్లదిజ్, పొగడః ఆజి మంజినిక, మర్యాద, గవేరం, సత్తు అంతు సిల్లెండ ఎలాకాలం మనీద్”, ఇజి వనక కంటమ్కాణిజ్ పారెజనిక, పొగడఃజి మంజినిక నాను వెహ. 14 పాణం మన్ని అయ జంతుజ్ “ఆమెన్”, ఇజి వెహ్తాజ్ అయ ఇరువయ నాల్ఎర్ పెద్దెలుబు పడగజి అర్చి, గొరెపిల్లదిజ్ పొగడఃజి మాడిఃస్తార్.

6

సీలుజ్

1 నస్తివలె, గొరెపిల్ల అయ ఏడు సీలుజ్ లొఇ, మొదొహి దన్నిజ్ లాగితిక నాను సుడఃత. అయావలె అయ పాణం మన్ని నాల్లి జంతుజ్ని, ఉండ్రి జంతు పిడుఃగు జాటు నన్ని కంటమ్దాన్ “రఅ!”, ఇజి వెహ్తాజ్ వెహ. 2 నాను సుడఃతిజ్, ఉండ్రి తెల్లాని గుర్రం తొరితాద్. దన్ని మున్ను ఒరెన్ దొను అసి బస్త మహాన్. వన్నిజ్ బజారమ్దాన్ తయార్ కిత్తి, రాజురి టొపి నన్ని ఉండ్రి టొపి దొహ్కాద్. వాండ్రు గెలిస్తాన్ ఆజి మరి గెలిస్తెజ్ ఇజి సొత్తాన్.

3 గొరెపిల్ల రుండి సీలు లాగితివలె పాణం మన్ని రుండి జంతు “రఅ!”, ఇజి వెహ్తాజ్ నాను వెహ. 4 నస్తివలె సిను నన్ని ఎరాని రంగు మన్ని ఉండ్రి గుర్రం వెల్లి వాతాద్. బూమి మున్ను మన్ని లొకుర్, ఒరెన్ మరిఒరెన్ వన్నిజ్ సప్తెజ్ ఇజి, బూమి మున్ను సమదనం సిల్లెండ కిదెజ్ అయ గుర్రం మున్ను బస్తిమన్నివన్నిజ్ అతికారం దొహ్కాద్. వన్నిజ్ ఉండ్రి పెరి కుర్ల దొహ్కాద్.

5 గొరెపిల్ల మూండ్రి సీలు లాగితివలె పాణం మన్ని మూండ్రి జంతు “రఅ!”, ఇజి వెహ్తాజ్ నాను వెహ. నాను సుడఃతిజ్, ఇదిలో, ఉండ్రి కర్చి గుర్రం తొరితాద్. దన్ని మున్ను బస్తి మన్నికాన్ తూనినిక వన్ని కియుదు అస్త మహాన్. 6 “ఉండ్రి రొజుదిజ్ కూలి ఉండ్రి డొక్కు, గొదుము ఇజి, మరి, ఉండ్రి రొజుదిజ్ కూలి మూండ్రి డొక్కుజ్ సామ ఇజి వెహ్తాన్. మరి నూనెదిజ్ ఒలివ మరెక్ని, ద్రాసపట్టురసమ్వందిజ్ ద్రాక్కు టొటదిజ్ పాడః కిదెజ్ ఆవెద్”, ఇజి అయ పాణం మన్ని నాల్లి జంతుజ్ నడిఃమిహాన్ వెహ్తాలెకెండ్ ఉండ్రి కంటం నాను వెహ.

7 గొరెపిల్ల నాల్లి సీలు లాగితివలె, పాణం మన్ని నాల్లి జంతు “రఅ!”, ఇజి వెహ్తాజ్ నాను వెహ. 8 నాను సుడఃతిజ్ నస్తివలె, నీరు నన్ని రంగు మన్ని ఉండ్రి గుర్రం తొరితాద్. దన్ని మున్ను బస్తిమన్ని వన్ని పేరు, సాపు. అయా లొకం వన్ని వెనుక నడిఃజి మహాద్. కుర్దెజాణిజ్, కరుదాన్, జబ్బుజాణిజ్, బూమిదు మన్ని అడిఃవి జంతుజ్ వెట, బూమి మున్ను బత్తిజిని వరిజ్ నాల్లి బాటెజ్ లొఇహాన్ ఉండ్రి బాటది వరిజ్ సప్తెజ్ ఇజి వన్నిజ్ అతికారం దొహ్కా మనాద్.

9 గొరెపిల్ల అయదు సీలు లాగితివలె, దేవుణు మాట లొజిత్తివందిజ్, మరి దేవుణుమాటవందిజ్ మన్ని నెగ్గి సాస్యం వందిజ్ కత్తె అతిమన్ని వరి అత్తెజ్, పూజ సీని మాలిపీట అడిఃగి నాను సుడఃత. 10 వారు గొప్పు పెరి కంటమ్దాన్, “పరిసుద్దమాతికాన్ అతి విజు దన్నిజ్ అతికారం మన్ని నిజమాతి దేవుణు, నీను, మజి సప్తి వరిజ్ దన్నిజ్ తగితి సిక్న సివండ, బూమి మున్ను బత్తిని వరిజ్ తీర్చు తీరిసి, సిక్న సివండ ఎస్సా కాలం మంజినిలె?”, ఇజి డెల్చి వెహ్తా మహార్. 11 నస్తివలె వరిజ్ ఒరెన్ ఒరెన్ వన్నిజ్ తెల్లాని సొక్కె దొహ్కె. వెనుక వారు సప్పె అతిలెకెండ్నె సప్పె ఆదెజ్ మన్ని తంబెరిజ

లెక్క, మరి వరివెట కూడేజి పణికితివరి లెక్కబా పూర్తి ఆనిదాక మరి కండెక్ కాలం కాప్ కిజి మండ్రెజ్, ఇజి వరిజ్ వెహె ఆతాద్.

12 గొర్రెపిల్ల ఆరు సీలు లాగితిక నాను సుడేత. నస్తీవలె గొప్పు గటిజ బూమి కద్దితాద్. పొద్దు, కర్ని రంగులెకెండ ఆతాద్. నెల పూర్తి, నలరంగు లెకెండ ఎర్రజ్ ఆతాద్. 13 పెరి గాలిదిజ్ దూకె ఆజి బొడె మరాతి ఆక్కరి కాయెజ్ లాలితిలెకెండెనే ఆగనమదాన్ సుక్కెజ్ రాలై. 14 ఉండ్రీ కాకితం సుటిసి లెకెండెనే ఆగనం సుటి ఆజి తొవిండ ఆతాద్. విజు గొరొక్, నమదరం నడిమి మన్ని ఇజిరి దేసీమకు విజు వనక వనక బాడ్డిదాన్ డిస్సై సాహె.

15 నస్తీవలె, బూమి మున్ను మన్ని రాజుర్, ఏలుబడిః కినికార్, సయనమది నెయ్యిర్, ఆస్తి మనికార్, గొప్పు అతికారం మన్నికార్, వెట్టిపణి కినికార్ని వెట్టిపణిమణసిర్ అఇకార్ విజెరె తియెల్ ఆతారె, గొరొక సాలమ్కాజ్ లొజ, సట్టు పొరొజ డాఃజితార్. 16 వారు గొరొకాజ్ని సట్టుజ యాలెకెండ వెప్పి మహార్, “మీరు మా మున్ను అర్ని, సింహాసనమదు బస్తీమన్ని వన్ని మొకొమ్దాన్ని గొర్రెపిల్ల కొపమ్దాన్ మజి డాఃప్తు”. 17 “ఎందానిజ్ ఇహిజ దేవుణుని గొర్రెపిల్ల బూమి మున్ను మన్నివరి మున్ను తీర్పు తీరిస్సి రొజు వాతాద్. వరి ఎద్రు ఎయెన్ నిల్లెజ్ అట్నాన్?”.

7

సీలు పొకె ఆతి 144,000 లోకుర్.

1 దిన్ని వెనుక బూమి మున్నుబా సమదరం మున్నుబా మరెక మున్నుబా గాలి కిపిండ, నాల్లి దిక్కుజ గాలి అస్తారె బూమిది నాల్లి దిక్కుజ, నాలేవెర్ దూతార్ నిల్లి మంజినిక నాను సుడేత. 2 బత్తిజిని దేవుణుది సీలు అస్తిమన్ని, మరి ఉండ్రీ దూత పొద్దు సోని దరోటాన్ వాతిక నాను సుడేత. బూమిదిజ్ని సమదారమదిజ్ పాడెః కిదెజ్ అతికారం దొహక్తిమన్ని దూతార్వెట ఈహు వెప్తాన్. 3 “మాపు దేవుణు పణి కినివరి నొర్దుజ సీలు పొక్కిదాక బూమిదిజ్బా, సమదరమదిజ్బా, మరొకాజ్ పాడెః కిమాట్”, ఇజి వాండ్రు డటం వెప్తాన్. 4 నస్తీవలె, సీలు పొకె ఆతివరి లెక్క వెప్తాక నాను వెహ. ఇస్తాయేలుది విజు తెగిజాణిజ్ లక్క నలపయనాల్లి వెయిజ్ లోకుర్ మహార్.

5 సీలు పొకె ఆతికార్ యూదా తెగదాన్ పన్నెండు వెయిజ్ లోకుర్ మహార్. రూబెను తెగదాన్ పన్నెండు వెయిజ్ లోకుర్ మహార్. గాదు తెగదాన్ పన్నెండు వెయిజ్ లోకుర్ మహార్. 6 ఆసెరు తెగదాన్ పన్నెండు వెయిజ్ లోకుర్ మహార్. నస్త్రాలి తెగదాన్ పన్నెండు వెయిజ్ లోకుర్ మహార్. మనసె తెగదాన్ పన్నెండు వెయిజ్ లోకుర్ మహార్. 7 సీమెను తెగదాన్ పన్నెండు వెయిజ్ లోకుర్ మహార్. లేవి తెగదాన్ పన్నెండు వెయిజ్ లోకుర్ మహార్. ఇసాకారు తెగదాన్ పన్నెండు వెయిజ్ లోకుర్ మహార్. 8 జెబులూను తెగదాన్ పన్నెండు వెయిజ్ లోకుర్ మహార్. యోసేపు తెగదాన్ పన్నెండు వెయిజ్ లోకుర్ మహార్. బెన్యామిను తెగదాన్ పన్నెండు వెయిజ్ లోకుర్ మహార్.

తెల్లాని సొక్కెజ్ తొడఃగితిమన్ని గొప్పు మంద లోకుర్

9 దన్ని వెనుక నాను సుడేతిజ్, విజు దేసమ్కాణిజ్, విజు జాతిజణిజ్, విజెరె లోకుర్ బాణిజ్, విజు బాసెజ్ వర్నిని వరిబాణిజ్ వాతి ఎయెన్బా లెక్క కిదెజ్ అట్ఇనన్ని గొప్పు మంద లోకుర్ అయ సింహాసనం ఎద్రుని గొర్రెపిల్ల ఎద్రు నిల్లి మంజినిక సుడేత. వారు తెల్లాని సొక్కెజ్ తొడిగిజి ఈత మరాతి మటెజ్ కికాజ్ అన్త మహార్.

10 “సింహాసనమదు బస్తీ మన్నికాన్ ఆతి మా దేవుణుని గొర్రెపిల్ల మజి రక్కిస్త మనార్”, ఇజి వారు గొప్పు పెరి కంటమ్దాన్ వెప్పి మహార్.

11 అయ సింహాసనమదిజ్ని అయ పాణం మన్ని నాల్లి జంతుజ్ని ఇరువయ నాలేవెర్ పెద్దెల్జ సుటులం దేవుణు దూతార్ విజెరె నిహ మహార్. వారు సింహాసనం ఎద్రు పడగిజి అర్ని దేవుణుదిజ్ పొగిడిజి మాడిస్తారె. 12 “ఆమెన్, వన్ని గొప్పు పేరు వందిజ్, వన్ని గెణమ్వందిజ్, వన్ని అతికారమ్ వందిజ్, వన్ని సత్తువందిజ్ మాటు మా దేవుణుదిజ్ ఆంతుసిల్లెండ ఎలకాలం పొగిడిజి మంజినాట్. మాటు విజెటి వన్నిజ్ గవేరం సీజి వందనమ్కు వెప్పి మంజినాట్. ఆమెన్”, ఇజి వారు వెప్పి మహార్.

13 నస్తవలె అయ పెద్దెలుజలోక ఒరెన్, “యా తెల్లాని సొక్కెజ్ తోడుఃగితి మనికార్ ఎయెర్? వారు ఎమేణిజ్ వాత మనార్”, ఇజి నజీ వెన్బాతాన్.

14 “బాబు నీనె నెస్సి”, ఇజి నాను వన్నిజ్ వెప్తా. వాండ్రు నావెట ఈహు వెప్తాన్. “వీరు గొప్ప పెరి కస్టమ్కాణిజ్ వాతికార్. వారు గొరెప్పిల్ల నలదాన్ వరి సొక్కెజ్ నొరబజి వనకాజ్ తెల్లాజ్ కిత్తికార్. 15 అందెజె, “వారు దేవుణు సింహాసనం ఎద్రు మంజి రెయుపొగొల్ వన్ని గుడిఃదు వన్నిజ్ పణి కిజి మంజినార్. సింహాసనమదు బస్తి మన్నికాన్, వాండ్రె ఆజి వన్ని టంబు వరి ముస్సు వ్డెక్కి వరిజ్ కాపాడ్వాన్. 16 మరి ఎనెజ్బా వరిజ్ బజి కట్వద్. మరి ఎనెజ్బా వారు ఏస్కొ సావీర్. పొద్దుది గొప్ప విండ వరి ముస్సు తగ్గివద్. మరి సుర్పిలెకెండ్ మన్ని వేడిఃబా వరిజ్ తగ్గివద్. 17 ఎందానిజ్ ఇహిజ, సింహాసనం నడిఃమి మన్ని గొరెప్పిల్ల వరిజ్ గవడుఃయెన్ ఆత మనాన్. పాణం సీని ఏరు వాని ఊట డగ్రు వాండ్రు వరిజ్ నడిఃపిస్వాన్. దేవుణు వరి కణుకేజాణిజ్ కణెర్ విజు తేల్నాన్”.

8

ఏడు సీలుని బజరమది దూపమ్సుర్ని గిన్న

1 గొరెప్పిల్ల ఏడు సీలు లాగితివలె పరలోకమదు అరగంటు జమ్నెనచూద్. 2 నస్తవలె, దేవుణు ఎద్రు ఏడు దేవుణు దూతార్ నిల్సి మంజినిక నాను సుడఃత. వరిజ్ ఏడు జోడు బాంగెజ్ దోహ్కె మహా. 3 మరి ఒరెన్ దేవుణు దూత బజరమదాన్ తయార్ కిత్తిమన్ని దూపం సుర్ని గిన్న కియుదు అస్తాండ్రె దూపం సుర్ని మాలి పెటె ఎద్రు వాతాండ్రె నిహాన్. సింహాసనం ఎద్రు బజరమదాన్ తయార్ కిత్తి దూపం సుర్ని మాలి పెటెదు, దేవుణు వందిజ్ కేట ఆతివరి పార్దనమకువెట సుద్ది పూజ సీదెజ్ అయ దూతెజ్ నెగ్గి వాసనం సీని దూపం నండొ దోహ్కె.

4 నస్తవలె నెగ్గి వాసనం సీని దూపమది గోయి దేవుణు వందిజ్ కేట ఆతివరి పార్దనమకువెట కూడఃజి దేవుణు దూత కియుదాన్ ముస్సు దేవుణు దరోట్ సాహా. 5 వెనుక అయ దేవుణు దూత దూపం సుర్ని గిన్న అస్తాండ్రె, దూపం సుర్ని మాలి పెటెదాన్ డిప్పు లాగ్గి అయ గిన్నాదు నిండ్రిస్తాండ్రె, అయ డిప్పుజ్ బూమి ముస్సు విసీర్తాన్. నస్తవలె గొప్ప దీడఃనికెజ్, పిడుఃగుజ్, మెర్నినికెజ్ విజు వాతె. బూమి కద్దితాద్.

ఏడు జోడుఃబాంకెజ్.

6 నస్తవలె ఏడు జోడుఃబాంకెజ్ అస్తిమన్ని ఏడు దూతార్ వనకాజ్ ఊకెజ్ తయార్ ఆతార్. 7 మొదోహి దేవుణు దూత వన్ని జోడుఃబాంక ఉహ్కెజ్, వడఃజాని సీను నలదాన్ కూడఃజి బూమి ముస్సు సెదరె ఆజి అరై. అందెజె బూమిదు మూండ్రె వంతుజు లొక ఉండ్రె వంతు వెతాద్. మరెకబా మూండ్రె వంతుజు లొక ఉండ్రె వంతు వెతాద్. పసి గడ్డి విజు వెతాద్.

8 రుండి దేవుణు దూత వన్ని జోడుఃబాంక ఉహ్కెజ్, కసి మంజిని ఉండ్రె పెరి గొరెన్ నన్నిక సమ్దరమదు అర్దాద్. సమ్దరం మూండ్రె వంతుజు లొక ఉండ్రె వంతు నల ఆతాద్. 9 సమ్దరమదు మన్ని పాణం మన్ని జంతుజ్, మూండ్రె వంతుజు లొక ఉండ్రె వంతు సాతె. ఓడఃజ్బా మూండ్రె వంతుజు లొక ఉండ్రె వంతు నాసనం ఆతె.

10 మూండ్రె దేవుణు దూత వన్ని జోడుఃబాంక ఉహ్కెజ్ కగడలెకెండ్ కసిమంజిని ఉండ్రె పెరి సుక్క ఆగసమ్దాన్ రాల్లి పెరి గడ్డిజు ముస్సుని ఏరు సొని ఊటెజు మూండ్రె వంతుజు లొక ఉండ్రె వంతు ముస్సు అర్దాద్. 11 అయ సుక్క పేరు సేందు. అందెజె మూండ్రె వంతుజు ఉండ్రె వంతు సేందు ఆతాద్. ఏరు సేందు ఆతిజ్ లోకుర్ నంణొండ్రార్ సాతార్.

12 నాల్గి దేవుణు దూత వన్ని జోడుఃబాంక ఉక్కిజ్, పొద్దు మూండ్రె వంతుజు లొక ఉండ్రె వంతు సెఎణ్ ఆతాద్. నెల మూండ్రె వంతుజు లొక ఉండ్రె వంతు సీకటి ఆతాద్. సుక్కెజు దెబ్బ తగ్గితిజ్ మూండ్రె వంతుజు లొక ఉండ్రె వంతు సీకటి ఆతాద్. అందెజె వేడెక మూండ్రె వంతుజు లొక ఉండ్రె వంతు జాయ్ మన్వితాద్. రెయు మూండ్రె వంతుజు లొక ఉండ్రె వంతు నెల సుక్కెజు జాయ్ మన్వితాద్.

13 నాను సుడఃజి మహిజ్ నండొ ముస్సు ఎగ్రిజి మంజిని ఉండ్రె డేగ, “మరి ఊకెజ్ మన్ని మూండ్రె జోడుఃబాంకెజు జాటుదాన్ బూమి ముస్సు బత్తిని వరిజ్, అబాయా కస్టం, కస్టం, కస్టం”, ఇజి గొప్ప పెరి జాటుదాన్ వెహ్తిమన్నిక వెహ్.

9

1 అయ్యదు దేవుణు దూత వన్ని జోడు బాంక ఉహ్కీజ్ ఆగసమ్దాన్ బూమి మున్ను రాల్తి మహి ఉండ్రి సుక్క నుడత. దర్దిది తాలం కిక్కు అయ సుక్కదిజ్ దోహ్కాద్. 2 వాండ్రు అయ మటుసిల్లి దాన్సిమన్ని దర్దిదిజ్ రెతిజ్, గొప్ప పెరి సొల్లుదాన్ సిసుదాన్ గోయ్ వాతి లెకెండ్ గోయ్ వాతాద్. అయ దర్దిదాన్ వాతి గోయ్దాన్ పొద్దుని, ఆగసం సీకటి ఆతాద్. 3 అయ గోయ్దాన్ మేపిలెక్ బూమి మున్ను వాతె. బూమి మున్ను మన్ని కిపిడారోదిజ్ మన్నిలెకెండ్ వనకాజ్ సత్తు దోహ్కె. 4 నొద్దుజు దేవుణుగుర్తు సిల్లి లోకురిజ్ బాదకిదెజ్నే ఆఎండ, బూమి మున్ను మన్ని గడ్డిదిజ్బా, ఇని మొక్కుదిజ్బా, ఇని మరాతిజ్బా పాడె కిదెజ్ ఆవిద్ ఇజి వనకాజ్ ఆడ్ర దోహ్కాద్. 5 వరిజ్ సప్తెజ్ వనకాజ్ అతికారం సిల్లెతాద్. గాని అయ్యదు నెలెజ్ దాక వరిజ్ హిమ్మెజ్ కిజి మండ్రెజ్ వన్కాజ్ అతికారం దోహ్క మనాద్. అవిక హిమ్మెజ్ కితిజ్ వరిజ్ వాతి కన్టం, కుపిడారో లోకురిజ్ కట్టిజి వాని నొప్పిలెకెండ్ మహాద్. 6 అయ దినమ్కాజ్ లోకుర్ సావుదిజ్ రెబానార్ గాని సావు వరిజ్ తప్ప ఆనాద్లె. వారు సావువందిజ్ ఆస ఆనార్లె గాని సావు వరిజ్ డిసి సానాద్లె.

7 అయ మేపిలెక్ విదెమదిజ్ సొండ్రెజ్ తయార్ కితిమన్ని గుర్తమ్కాజ్ పొలితె మన్నె. బజారమ్దాన్ తయార్ కిత్తి టోపి నన్నిక ఉండ్రి, వనక బురెక మున్ను మహా. వనక మొకొమ్కు లోకు మొకొ లెకెండ్ మహా. 8 వనక కొప్పు బోదెక బురాతి కొప్పులెకెండ్ మహాద్. వనక పల్కు సింహం పల్కు లెకెండ్ మహా. 9 ఇనుముదాన్ తయార్ కితిమన్ని లెకెండ్ గుండెదిజ్ అడిసి సొక్కుజ్ వనకాజ్ మహా. వనక రెక్కెజాణి జాటు విదెమ్దిజ్ ఉహ్కీని గుర్తమ్కు లాగ్జని రదమ్క గొప్ప పెరి జాటులెకెండ్ మహాద్. 10 వనకాజ్ కిపిడారో తోకెజ్ నన్ని సాప్పు మన్ని తోకెజ్ మహా. లోకురిజ్ అయ్యదు నెలెజ్ గుత్తి బాదెజ్ కిదెజ్ అయ తోకెజి వనకాజ్ సత్తు మహాద్. 11 దర్దిదిజ్ అతికారం మన్ని దూత వరి మున్ను రాజు లెకెండ్ మహాన్. ఏల్లి బాసాదు వన్నిజ్ పేరు 'అబదోను' ఇని పేరు. గ్రీకు బాసాదు వన్ని పేరు 'అపొలుయోను' ఇని పేరు.

12 మొదొహి కన్టం గడెస్తాద్. ఇదిలో, మరి రుండి కన్టమ్కు వాదెజ్ మన్నె. 13 ఆరు దేవుణు దూత వన్ని జోడుబాంక ఉహ్కీజ్, దేవుణు ఎద్దు మన్ని బజారమ్దాన్ తయార్ కిత్తి పూజి సిని మాల్పిటిది కొముజాణిజ్ ఉండ్రి జాటు వెహా. 14 "యూప్టిసు ఇని గొప్ప పెరి గడ్డ జోరెదు తోహా అతిమన్ని నాల్ఎర్ దూతారిజ్ కుత్తి డిసెఅ", ఇజి వెహ్కా నాను వెహా. 15 బూమి మున్ను మన్ని లోకురి మూండ్రి వంతుజి లోఇ ఉండ్రి వంతుది వరిజ్ సప్తెజ్ ఇజి యా పంటాది, యా నెలాది, యా రోజాది, యా గంటవందిజ్ తయార్ కిబె ఆజి ఇడ్డి మన్నికారె, అయ నాల్ఎర్ దూతార్. 16 గుర్తమ్కు మున్ను ఎక్తిమన్ని నయనమ్ది వరిలెక్క రుండి వందెజ్ లెక్కెజ్. వరి లెక్క నిస్సా ఇజి నాను వెహా.

17 గుర్తమ్కాజ్ని వనక మున్ను బన్తిమన్ని వరిజ్ నజి వాతి కలాదు నాను యాలెకెండ్ నుడత. వరిజ్ సిసు నన్ని ఎరాని రంగుది, మరి నీలి రంగుది, మరి పసిజి రంగుది గుండెదిజ్ అడిని సొక్కెజ్ మహా. గుర్తమ్క బురెక్ సింహం బురెక్లెకెండ్ మహా. వనక వెయ్యుజాణిజ్ సిసు, గోయ్, రెంజికం వెల్లి వాజి మహా. 18 వనక వెయ్యుజాణిజ్ వాతి సిసు, గోయ్, రెంజికం ఇని మూండ్రి దెబ్బెజాణిజ్ లోకురి మూండ్రి వంతుజి లోఇ ఉండ్రి వంతు లోకుర్ సప్పె ఆతార్. 19 అయ గుర్తమ్క సత్తు వనక వెయ్యుజిలోఇని వనక తోకెజి మహా. లోకురిజ్ కట్టి గాయమ్కు కిదెజ్ బురెక్ మన్ని సరాన్లెకెండ్ మన్ని తోకెజ్ వనకాజ్ మహా.

20 యా మూండ్రి దెబ్బెజాణిజ్ సావండ మిగిలితి మన్ని లోకుర్ ఏలుబా వరి కిక్కాణిజ్ తయార్ కితిమన్ని దెయమ్కాజ్ని బొమ్మెజి మాడిసినిక డిసిసిజి పాపమ్కు ఒప్పుకోడెజి మన్ను మారినెవితార్. వారు వరి కిక్కాణిజ్ బజారమ్దాన్, వెండిదాన్, కంసుదాన్, పణుకుదాన్, సెక్కదాన్ తయార్ కితిమన్ని నుడెదెజ్ అట్ఇ, వెండ్రెజ్ అట్ఇ, నడిదెజ్ అట్ఇ సత్తు సిల్లి వనకాజ్ మాడిసినిక డిసి సివితార్. 21 అక్కాద్ ఆఎండ, లోకురిజ్ నప్పిక, గురుజువెతి సెట్టి కినిక, రంకు బూలానిక, డొజి కినిక యాలెకెండ్ వారు కిజి మహికెజ్ డిసిసిజి పాపమ్కు ఒప్పుకోడెజి డిసిసిజి మన్ను మారినెవితార్.

10

ఇజిరి పుస్తకం అస్తిమన్ని దేవుణు దూత.

1 నన్నవలె గొప్ప సత్తు మన్ని మరి ఒరెన్ దేవుణు దూత పరలోకమదాన్ డిగ్గి వాజినిక నాను నుడత. వాండ్రు మొసాప్ తోడుగిత మహాన్. వన్ని బుర్ర ముస్సు కొడెవేలి నుటె ఆత మహాద్. వన్ని మొకొం పొద్దులెకెండ్ని వన్ని పాదమకు తంపం లెకెండ్ మన్ని సిసు కొనెజ్లెకెండ్ మహా. 2 వన్ని కియుదు రెక్కిమన్ని ఉండ్రి పుస్తకం మహాద్. వాండ్రు వన్ని ఉణెర్ పాదం సమదరం ముస్సు మట్ట మహాన్. వన్ని డేబ్బ పాదం బూమి ముస్సు మట్ట మహాన్. 3 సింహం ఆక్కర్స్తీ లెకెండ్ వాండ్రు ఉండ్రి గొప్ప పెరి జాటు సిత్రాన్. వాండ్రు జాటు సిత్రవలె ఏడు పిడుగుజ్ వనక వనక జాటుజాణిజ్ వర్గిత. 4 అయ ఏడు పిడుగుజ్ వర్గితవలె, నాను రాస్టెజ్ తయార్ ఆతిజ్, “అయ ఏడు పిడుగుజ్ వర్గిత సజతిజ సీలు పోక్త. వనకాజ్ రాస్సు”, ఇజి పరలోకమదాన్ ఉండ్రి కంటం వెస్త్రాక వెహా.

5 నస్తవలె, సమదరం ముస్సుని బూమి ముస్సు నిహిమన్ని దేవుణు దూత వన్ని ఉణెర్ కియు పరలోకం దరోట్ పెవ్తాండ్రె యాలెకెండ్ వెవ్తాన్. 6 పరలోకమని అబ్బె మన్ని విజువనకాజ్ని, బూమిని బూమి ముస్సు మన్ని విజువనకాజ్ని, సమదరమని సమదరమదు మన్ని విజు వనకాజ్ తయార్ కిత్తికానాతి ఎలాకాలం బత్తిజని దేవుణు పేరు అని యా లెకెండ్ ఒట్టు పొక్తాన్. “మరి ఆలస్యం మన్విద్”. 7 ఏడు దేవుణు దూత వన్ని జోడుబాంక ఉంట్టి దినమకాజ్ దేవుణుది డాజెతి మన్ని సజతిజ్, దేవుణు, వన్ని పణికిని వరివెటని వన్ని ప్రవక్తర్ వెట ముజాల వెహా ఆతిమహిలెకెండ్ పూర్తి ఆనాద్లె”.

8 నస్తవలె పరలోకమదాన్ నాను ముజాల వెహిమన్ని కంటం మరి నావెట, “నీను సొన్ని సమదరం ముస్సుని బూమి ముస్సు నిహిమన్ని అయ దేవుణు దూత కియుదు మన్ని రెకె ఆతిమన్ని ఇజిరి పుస్తకం లొన్అ”, ఇజి వెస్త్రాక నాను వెహా.

9 అందెజి నాను సొన్ని “అయ ఇజిరి పుస్తకం నజీ సిదా”, ఇజి అయ దేవుణు దూతెజ్ లొస్త. వాండ్రు, “దన్నిజ్ లాగ్గి తిన్అ. అయాక నీ పొటాదు సేందు ఆనాద్ గాని నీ వెయదు తేనె లెకెండ్ తియాజ్ మంజినాద్”, ఇజి నావెట వెవ్తాన్. 10 అయావలె దేవుణు దూత కియుదాన్ అయ ఇజిరి పుస్తకం నాను లొస్తానె తిహా. అయాక నా వెయుదిజ్ తేనెలెకెండ్ తియాజ్ మహాద్. గాని అక తిహి వెనుక నా పొటాదు సేందు ఆతాద్. 11 అయావలె వాండ్రు, “నీను నండో లోకుర్ వందిజ్, నండో జాతిజాణిపరివందిజ్, నండో బానెజ్ వర్గినిపరివందిజ్, నండోడార్ రాజుర్వందిజ్ దేవుణు ప్రవక్తలెకెండ్ మరి వెవ్తాజ్ వలె”, ఇజి నజీ వెవ్తాన్.

11

దేవుణు వందిజ్ వాతి రిఎర్ సాసిర్.

1 మరి కొల్ల కిని ఉండ్రి డుడ్డు నజీ సితాండ్రె ఈహు వెవ్తాన్. “నీను నిజజి దేవుణు గుడిని, దేవుణుదిజ్ పూజ సీని మలిపీటదిజ్ కొల్ల కిజి, దేవుణు గుడిదు పొగిడిజి మాడిసినివరిజ్ లెక్క కిఅ. 2 గుడిదిజ్ వెల్లి మన్ని డేవ కొల్ల కివీండ డిసన్అ. అయాక దేవుణుదిజ్ నమ్మిఇవరి వందిజ్ మన్నిక. వారు నల్పయరుండి నెలెజ్ పరిసుద్దమతి యెరూసలేం పట్టుమదిజ్ వరికాల్యాణిజ్ మట్టూర్లె. 3 మరి నాను నా రిఎర్ సాసిరిజ్ అతికారం సీనాలె. వారు బస్త సొక్కెజ్ తోడిగిజి పన్నెండు వందిజ్ అరువయోస్సు దేవుణు ప్రవక్తరు లెకెండ్ దేవుణు మాటెజ్ సాటిస్తూర్. 4 బూమిదిజ్ ప్రబు ఆతి దేవుణు ఎద్దు నిల్లి మంజిని రుండి ఒలివ మరెక్ని రుండి దీవ డండిజ్ అతికారె యా రిఎర్ సాసిర్. 5 ఎయెర్బా వరిజ్ హిమసెజ్ కిదెజ్ నుడిజి, పరి వెయుదాన్ సిసు వాజి వరిజ్ పగాతివరిజ్ సుర్పు విసిర్నాద్. వరిజ్ హిమసెజ్ కిదెజ్ నూణికార్ యాలెకెండ్ సాదెజ్వలె. 6 వారు ప్రవక్తరులెకెండ్ దేవుణు మాటెజ్ వెప్పి దినమదు ఆగసమదాన్ పిరు రెవీండ అడ్డు కిదెజ్ వరిజ్ అతికారం మంజినాద్. మరి వరిజ్ ఇస్తమాతి వజ ఎస్తవలెబా బూమిదు మన్ని ఏరుదిజ్ నలలెకెండ్ కిదెజ్, మరి నండో రకమది జబ్బుజాణిజ్ బూమి ముస్సు మన్ని వరిజ్ బాదెజ్ కిదెజ్ వరిజ్ అతికారం మంజినాద్.

7 వారు సాస్యం వెప్పి మంజినిక పూర్తి అతిజసరి దర్లిదాన్ వాని క్రూరమతి జంతు వరివెట ఉద్దం కిజి వరిజ్ సప్పాద్. 8 వరి పీనుగుజ్ యెరూసలేం ఇని అయ పెరి పట్టుమది సర్లు అర్నె మంజినె. అయ పట్టుమదిజ్ సాదోమ పట్టుమదిజ్, అయెగుప్తు దేసెమదిజ్ పోలిసి వెహా ఆజినాద్. అబ్బె వరి ప్రబుబా సిలువ పోకె ఆత మహాన్. 9 వరి పీనుగుజ్ మూస్తాజ్ సరి సివీండ విజు దేసెమదికార్, విజు

తెగెజాణికార్, విజు బాసెజాణికార్, విజు జాతిదికార్ విజేరె మూండ్రినర రోస్సు, వరి పీనుగుజ్ నుడేజి మంజినార్. ¹⁰ యా రిఎర్ ప్రవక్తరు బూమి ముస్సు, మన్ని వరిజ్ బాదెజ్ కిత్తి వందిజ్, బూమి ముస్సు, మనికార్ విజేరె వరిజ్ జర్గితక నుడేజి గొప్ప సర్ద ఆజి ఒరెన్ మరి ఒరెన్ వన్నిజ్ ఇనామ్కు సీజి పండోయ్ కినార్.

¹¹ గాని అయ మూండ్రినర రోస్సు, ఆతి వెనుక దేవుణుబాణిజ్ పాణం మన్ని ఆత్మ వాజి వరి లోఇ డుఃగితిజ్ వారు కిక్కు, బూమిదు తిగిజి నిజ్జ నిల్తార్. వరిజ్ నుడేజికార్ విజేరె గొప్ప తియెల్ ఆతార్. ¹² నస్తవలె, “ఇబ్బె ఎక్కి రదు”, ఇజి పరలోకమ్దాన్ గొప్ప పెరి కంటమ్దాన్ వరిజ్ వెహ్తిక వారు వెహోరె, వరిజ్ పగాతికార్ నుడేజి మహివలెనె వారు మొసాపుదాన్ పరలోకమ్దు పెరె ఆజి సాహోరె.

¹³ అయ గడియోదునె గొప్ప గటిజి బూమి కద్దితిజ్, అయ పట్టుమది పది వంతుజి లోఇ ఉండ్రీ వంతు అర్తాద్. బూమి కద్దితిజ్ ఏడు వెయుజ్ లోకురె సాతార్. మిగిలిత్తికార్ గుండెజ్ వణక్కిలెకెండె తియెలాజి పరలోకమ్దు మన్ని దేవుణుదిజ్ పొగిడితార్. ¹⁴ రుండి కష్టం వీజితాద్. ఇదిలో, మూండ్రీ కష్టం బేగినె వానాదెలె.

మిగిలిత్తిమన్ని ఏడు జోడుఃబాంక.

¹⁵ ఏడు దేవుణు దూత వన్ని జోడుఃబాంక ఉక్కిజ్ పరలోకమ్దు గొప్ప పెరి కంటమ్దాన్ యాలెకెండె డేల్లిని జాటుజ్ వాతె. “యా లోకమ్దు ఏలుదాన్ ఏలుబడిః కినిక, మా ప్రబుజ్ని వన్ని క్రీస్తుజ్ ఆత మనాద్. వాండ్రు అంతుసిల్లెండె ఎలాకాలం ఏలుబడిః కిజి మంజినాల్”. ¹⁶ నస్తవలె, దేవుణు ఎద్రు సింహాసనమ్కాజి బస్తమన్ని అయ ఇరువయ్ నాల్ఎర్ వెద్దెలుజు పడగిజి అర్ని దేవుణుదిజ్ యా లెకెండె వెప్పి పొగిడిఃజి మాడిఃసి మహోరె. ¹⁷ “ఏలు మన్నికి, ముజాల మహికి ఆతి, విజుదన్నిజ్ అతికారం మన్ని మా ప్రబు ఆతి దేవుణు, నీను నీ గొప్ప పెరి సత్తుదాన్ ఏలుబడిః కిదెజ్ మొదెలిస్సివందిజ్ మాపు మిజి వందనమ్కు వెప్పినావ్. ¹⁸ దేవుణుదిజ్ నమ్మిఇకార్ ఆతి యా లోకమ్ది లోకురె కోపమ్దాన్ నిండ్రీతార్. ఎందానిజ్ ఇహిజి నీను కోపం ఆదెజ్ సమయం వాతాద్. సాతి వరిజ్ విజెరిజ్ నీను తీర్పు తీరిస్తెజ్ గడియె వాతాద్. నీ పణిమణిసిరిజ్, ప్రవక్తరిజ్, నిజి నమ్మిత్తి వరిజ్, నీ పేరు వందిజ్ గవేరం సీజి బత్తిత్తి ఇజిరివరిజ్ని పెరివరిజ్ విజేరిజ్ తగితి ఇనాయం సీదెజ్ గడియె వాతాద్. బూమిదిజ్ నాసనం కినివరిజ్, నాసనం కిదెజ్ గడియె వాతాద్”.

¹⁹ నస్తవలె, పరలోకమ్దు మన్ని దేవుణుగుడిః రే ఆతిజ్, దేవుణు లోకురె వెట కిత్తి ఒట్టు రాస్తి ఇడ్డి మన్ని మందసం తోరె ఆతాద్. నస్తవలె, మెరసిని జాయ్, పిడుఃగుజ్, దీడేజినికెజ్, వాతె. బూమి కద్దితాద్. గొప్ప వడేజెజ్ అర్తె.

12

ఉండ్రీ బోదెలిని ఉండ్రీ గొప్ప పెరి సరాన్.

¹ నస్తవలె పరలోకమ్దు ఉండ్రీ బమ్మాతి గుర్తు తోరితాద్. పొద్దుదిజ్ పొర్పాతి మన్ని ఉండ్రీ బోదెలి తోరె ఆతాద్. దన్ని పాదమ్క అడిఃగి నెల మహోద్. బురాదు పనెండు సుక్కెజ్ మన్ని రాజురి టోపెలెకెండె ఉండ్రీ బజారం టోపి మహోద్. ² అది పాత డిఃస్త మహోద్. అది ఏరు ఈబాదెజ్ నొప్పిదాన్ గొప్ప డేల్లి అడఃబాజి మహోద్. ³ నస్తవలె, మరి ఉండ్రీ గుర్తు పరలోకమ్దు తోరితాద్. ఇదిలో, ఉండ్రీ గొప్ప పెరి ఎరాని సరాన్ తోరితాద్. దన్నిజ్ ఏడు బురెకెన్ పది కొమ్ము మహో. దన్ని బుర్ర ముస్సు. రాజురి టోపెలెకెండె బజరమ్ది ఏడు టోపిజ్ మహో. ⁴ ఆగసమ్ది సుక్కెజి మూండ్రీ వంతుజ్లోఇ ఉండ్రీ వంతు సుక్కెజి దన్ని తోక డెయ్జి బూమి ముస్సు అర్స్తాద్. ఏరు ఈబాదెజ్ తయోర్ ఆతి మన్ని అయ బోదెలి, ఏరుఈబాతిజ్ సరి, అయ బయిజ్ డిఃజ్దెజ్ ఇజి అయ సరాన్ అయ బోదెలి ఎద్రు నిహ మహోద్. ⁵ అది ఒరెన్ మరినిజ్ కాస్తాద్. లోకమ్ది లోకురిజ్ విజేరిజ్ ఇనుము డుడ్డుదాన్ ఏలుబడిః కిదెజ్ ఇజి ఒరెన్ కొడోదిజ్ ఇట్టాద్. అది కాస్తి బయి దేవుణు డగ్రుని వన్ని సింహాసనం డగ్రు వెటని లాగిజి పెరె ఆతాన్. ⁶ అది పన్నెండు వందెజ్ అరువయ్ రోస్సు, దేవుణు దన్నిజ్ పొస కిదెజ్ ఇజి బిడిఃమబూమిదు దన్ని వందిజ్ తయోర్ కితిమన్ని బాడ్డిదు ఉహ్కెక్కి సాహోద్.

⁷ నస్తవలె పరలోకమ్దు ఉద్దం ఆతాద్. మికాయెలు ఇని దేవుణుదూతని వన్ని జుటుది దూతార్ కూడేజి అయ గొప్ప పెరి సరాన్వెట ఉద్దం కితార్. అయ గొప్ప పెరి సరాన్ని వన్ని దూతార్ మరేజి

ఉద్ధం కితార్. 8 గాని వారు దేవుణు దూతార్ ముస్సు, గెలిస్తైజ్ అటవితార్. అందెజె పరలోకమ్దు మరి ఎసెజ్బా వరిజ్ మండ్రెజ్ బాడ్డి మన్వితాద్. 9 లోకమ్దు మన్ని లోకురిజ్ విజేరిజ్ మొసెం కిజి నడిపిస్తాకాన్ ఆతి సెకాన్ ఆతి సయ్యూన్ ఇజి పేరు ఇడ్డె: ఆతి మొదోహా సరాన్ ఇని అయ గొప్ప పెరి సరాన్ పరలోకమ్దాన్ బూమి ముస్సు అర్పె ఆతాన్. వాండ్రుని వన్ని దూతార్ బూమి ముస్సు అర్పె ఆతార్.

10 నస్తీవలె పరలోకమ్దు యాలెకెండ్ వెహ్నిని ఉండ్రి పెరి కంటం నాను వెహ. “రెయుపొగోల్ మా దేవుణు ఎద్రు, మా తంబెరిజ ముస్సు తప్పు మొప్పి మహికాన్ ఆతి సయతాన్ అర్పె ఆత మనాన్. అందెజె వన్ని గొప్ప సత్తుదాన్ మజి రక్నిస్తీ దేవుణు ఎలాకాలం ఏలుబడి: కిజి మంజినాన్. మరి అతికారం వన్ని క్రిస్తూజ్ ఆతాద్. 11 మా తంబెరిసిర్ గొరెప్పెల్ల నలదాన్, వారు వస్తీమన్ని సాస్యమదాన్ సయతాన్ ముస్సు గెలస్త మనార్. వారు వరి సొంత పాణమ్కాజ్ గొప్ప పెరిక ఇజి ఒడి:బివిండ సాదెజ్బా తయార్ ఆత మహార్. 12 అందెజె పరలోకమ్దికెదిరా మీరు సర్గ ఆదు. బూమిదుని సమ్దరమ్దు మన్ని విజేరిజ్ కన్యమ్కునె. ఎందానిజ్ ఇహిజ సయ్యూను మీ డగ్రు వాత మనాన్. వన్నిజ్ సమయం తక్కునె మనాద్ ఇజి సెని వాండ్రు నండ్ కోపమ్దాన్ నీ డగ్రు వాత మనాన్”.

13 బూమి ముస్సు అర్పె ఆతాన్ ఇజి నెస్తాండ్రి, అయ గొప్ప పెరి సరాన్, అయ మొగకోడె:దిజ్ కాస్తీ బోదెలిదిజ్ అసి మాలెజ్ కెదిజ్ ఇజి వెటపెర్రి రెబాదెజ్ మొదోల్స్తాన్. 14 అందెజె, అయ గొప్ప పెరి సరన్బాణిజ్ తప్పె ఆజి దేవుణు దన్ని వందిజ్ బిడి:జ్బూమిదు తయార్ కితి మన్ని బాడ్డిదు ఎగ్రిజి సొండ్రిజ్ ఇజి రుండి పెరి డేగ రెక్కెజ్ దన్నిజ్ దోహ్కె. అబ్బె అయ గొప్ప పెరి సరాన్ దన్నిజ్ తోవిండ ఉండ్రి కాలం, కాలమ్కు, సెగం కాలం పోస కిబె ఆతాద్. 15 నస్తీవలె, అయ బోదెలిదిజ్ గడ్డ పెర్రి ఒతెజ్ ఇజి అయ గొప్ప పెరి సరాన్ దన్ని వెయ్దాన్ పెరి గడ్డలెకెండ్, అయ బోదెలి వెనుకహాన్ ఏరు కక్తాన్. 16 గాని బూమి బదెజ్ ఆజి రే ఆతాద్, అయ గొప్ప పెరి సరాన్ వెయ్దాన్ కక్తి ఏరుదిజ్ డి:జ్జెజ్ అయ బోదెలిదిజ్ తోడు: కితాద్. 17-18 అందెజె అయ గొప్ప పెరి సరాన్ అయ బోదెలి ముస్సు కోపం ఆతాద్, దేవుణు ఆడ్రెజ్ లోజిజి యేసువందిజ్ సాసెం వెహ్నిమన్నికార్ ఆతి దన్ని పొటాదు పుట్టిమహిపరివెట ఉద్ధం కిదెజ్ ఇజి తయార్ ఆతాద్. వరివెట ఉద్ధం కిదెజ్ ఇజి అయ గొప్ప పెరి సరాన్ సోత్తాద్ సమ్దరం ఒడ్డుదు నిహాద్.

13

సమ్దారమ్దాన్ ఎక్కి వాతి జంతు.

1 మరి, పది కొముకుని ఏడు బురెక్ మన్ని ఉండ్రి క్రూరమతి జంతు సమ్దారమ్దాన్ వెల్లి వాతిక నాను సుడె:త. దన్ని కొముకాజ్ పది టోపిజ్ మహె. ఉండ్రి ఉండ్రి బుర ముస్సు దేవుణుదిజ్ దుసలాడి:జిని ఉండ్రి ఉండ్రి పేరుకు మహె.

2 నాను సుడె:తిమన్ని అయ జంతు సిటాడె: నొరెన్ లెకెండ్ మహాద్. గాని దన్ని పాదమ్కు ఒడు:జు పాదమ్కు లెకెండ్ మహె. దన్ని వెయు పెరి నొరెన్ వెయులెకెండ్ మహాద్. అయ గొప్ప పెరి సరాన్ దన్ని సత్తుని వన్ని సింహాసనమ్ని దన్ని గొప్ప అతికారం విజు అయ జంతుదిజ్ సితాన్. 3 అయ జంతుది ఏడు బురెకలో: ఉండ్రి బురాదు సాదెజ్ సరియాతి పెరి గాయం తగ్గిత మహాద్. గాని సాదెజ్ సరియాతి అయ పెరి గాయం మాందితాద్. అందెజె బూమి ముస్సు మన్ని లోకుర్ విజేరె బమ్మ ఆజి అయ జంతువెట కూడి:తార్. 4 అయ జంతుదిజ్ అతికారం సిత్తివందిజ్ వారు అయ గొప్ప పెరి సరాన్దిజ్ పొగ్డి:జి మాడి:సి మహార్. మరి వారు అయ జంతుదిజ్ పొగ్డి:జి మాడి:సి, “యా జంతులెకెండ్ మన్నికాన్ ఎయెంబా సెలెన్. మరి దన్ని వెట ఉద్ధం కిదెజ్ అట్టికాన్ ఎయెంబా సెలెన్”, ఇజి గొప్ప వెహ్ని మహార్.

5 పొజె అని మాటెజ్ ఆహె వెహె ఆజి దేవుణుదిజ్ దుసలాడి:జి వర్దిదెజ్ దన్నిజ్ వెయు వాతాద్. నలపయరుండి నెలెజ్ దన్ని పణిజ్ కిదెజ్ దన్నిజ్ అతికారం దోహ్కాద్. 6 అందెజె దేవుణుదిజ్ దుసలాడి:జి, వన్ని పేరుదిజ్ అబద్ధం మాటెజ్ వెహ్ని, పరలోకమ్దిజ్, పరలోకమ్దు బత్తిని వరివందిజ్ దుసలాడి:జి అయ జంతు దన్ని వెయుదాన్ వర్దిజి మహాద్. 7 దేవుణు వందిజ్ కేట ఆతి వరివెట విదెం కిజి, వరిజ్ గెలిస్తైజ్ దన్నిజ్ అతికారం దోహ్కాద్. విజు తెగెజాణిపరి ముస్సు, విజు

జాతిజాణి వరి మున్ను, విజు బాసెజ్ వర్గిని వరి మున్ను, విజు దేసెమదివరి మున్ను దన్నిజ్ అతికారం దోహ్కాద్. ⁸ బూమి మున్ను బత్తినికార్ విజేరె అయ జంతుజ్ పొగిడిజి మాడిజిస్తార్. బూమి పుట్వండ ముందాల్ని కత్తె అతిమని గొరెపిల్లదిజ్ సెందితి మన్ని, దేవుణు వెట ఎలాకాలం బత్తిని వరి పేరుకు రాసి ఇడ్డిని పున్కమ్దు పేరు సిల్లికార్ విజేరె జంతుదిజ్ పొగిడిజి మాడిజిస్తార్లె. వరి పేరుకు అయ పున్కమ్దు సిల్లెద్. ⁹ వెండ్రెజ్ మున్ను మన్నికాన్ గిబ్బుజ్ ఒడజి వెంజి అయావజ నడిజి మండ్రు.

¹⁰ ఎయెన్బా ఆఇ దేసెమది వరివెట అస్సి ఆజి, ఆఇ దేసెం సొనికాన్ అయాలెకెండ్రె సొనాన్లె. ఎయెన్బా కుర్దదాన్ సప్పె ఆదెజ్ మన్నికాన్, కుర్దదాన్ సప్పె ఆనాన్లె. దేవుణు వందిజ్ కేట అతివరి ఓర్పు, మరి దేవుణు మున్ను వరిజ్ మన్ని నమకం దన్నిదటాన్ తోరె ఆనాద్.

బూమిదాన్ వెల్లి వాతి జంతు

¹¹ మరి బూమిదాన్ మరి ఉండ్రె కూరమతి జంతు వెల్లి వాతిక నాను సుడజత. గొరెపిల్ల కొము నన్ని రుండి కొముకు దన్నిజ్ మహా. గాని గొప్ప పెరి సరాన్లెకెండ్రె వర్గిజి మహాద్. ¹² అయ జంతుజ్, మొదోహి జంతుజ్ మహి విజు అతికారం దన్ని బాణిజ్ దోహ్కాద్. అయ అతికారమదాన్ బూమి మున్ను బత్తినికార్ విజేరె సాదెజ్ సరియాతి గాయం తగ్గిజి నెగెండ్రె అతి మన్ని మొదోహి జంతుజ్ పొగిడిజి మాడిజిస్తెజ్ ఇజి బలవంతం కిజి మహాద్. ¹³ అయ జంతు లోకుర్ విజేరె సూణిలెకెండ్రె ఆగసమదాన్ సిను డిగ్గి వాని నన్ని గొప్ప పెరి బమ్మాతి పణిజ్ గుర్తు లెకెండ్రె కిజి తోరిసి మహాద్. ¹⁴ మొదోహి జంతు దన్ని పేరుదాన్ బమ్మాతిపణిజ్ గుర్తు లెకెండ్రె కిజి తోరిస్తెజ్ అతికారం దోహ్కాత్తి అయ జంతు బూమి మున్ను బత్తిని వరిజ్ మొసెం కిత్తాద్. కుర్దదాన్ గాయం ఆతిజ్బా సావండ బత్తితి మొదోహి జంతుది బొమ్మ ఉండ్రె తయార్ కిదెజ్ ఇజి ఆడ్రె సిత్తాద్. ¹⁵ అయ మొదోహి జంతుది బొమ్మదిజ్ వర్గెదిజ్ అట్టిలెకెండ్రె పాణం సీదెజ్ దన్నిజ్ అతికారం దోహ్కాద్. అందెజె బొమ్మదిజ్ మాడిజివండ మంజిని వరిజ్ సప్పెజ్బా అతికారం దోహ్కాత్తి మనాద్. ¹⁶ అయ జంతు విజేరిజ్, అహిజ ఇజిరికారాతిజ్బా పెరికారాతిజ్బా, ఆస్తి మన్నికారాతిజ్బా బిదాదికారాతిజ్బా, వెట్టిపణిమణిసిర్ ఇకార్ ఆతిజ్బా వెట్టిపణి కినికారాతిజ్బా విజేరె వరి ఉణెర్ కిక్కాజ్నో, సిల్లిజి నొద్దుదునో మొదోహి జంతుది గుర్తు పోకె ఆదెజ్ ఇజి బలవంతం కిత్తాద్. ¹⁷ ఎందానిజ్ ఇహిజ, అయ జంతు పేరునో, దన్ని పేరుది అంకి అతి గుర్తునో పోకె అతివరిజ్నె ఆవండ మరి ఎయెరిజ్బా ఇనికబా కొండెజ్నో, పొర్తెజ్నో అతికారం సిల్లెద్.

¹⁸ ఏలు బుద్దిమన్నికాన్ ఎయెన్బా వన్ని బుద్దిదాన్ జంతు అంకి ఎసా ఇజి లెకిస్తెజ్ అట్టిజి లెక్కిసిన. అక ఉండ్రె లోకుది అంకి. ఆరువందెజ్ అరువయారు. యాక లెకిస్తెజ్ బుద్ది అవ్సరం.

14

గొరెపిల్లని లక్ష్మనాల్పయనాల్లి వెయ్ లోకుర్.

¹ నన్నివలె, నాను సుడజతిజ్ అయ గొరెపిల్ల యెరూసలేమ్దు మన్ని సియెను గొరొన్ మున్ను నిహ మనాన్. అయ గొరెపిల్ల పేరుని, వన్ని బుబ్బాతి దేవుణు పేరు వరి నొద్దుదు రాసె అతిమని లక్ష్మ నాల్పయనాల్లి వెయ్ లోకుర్ వన్నివెట మహార్. ² గొప్ప పెరి గడ్డాది జాటు లెకెండ్రె గొప్ప పిడుగుగు జాటు లెకెండ్రె ఉండ్రె కంటం పరలోకమ్దాన్ వాతిక నాను వెహ. నాను వెహిమన్ని కంటం టోయ్ల పలక్తివలె వాతి జాటు లెకెండ్రె మహాద్. ³ అయ లక్ష్మనాల్పయనాల్లి వెయ్ లోకుర్ అయ సింహాసనం ఎద్దుని అయ పాణం మన్ని నాల్లి జంతుజి ఎద్దుని ఇరువయ్ నాల్వెర్ పెద్దెల్జి ఎద్దు, ఉండ్రె కొత్త పాట పార్దార్. యా లోకమ్దాన్ కొలె అతి, వారె ఆవండ మరి ఎయెర్బా అయ పాట నెన్వితార్. ⁴ వీరు బోదెకవెట కూడజి, వరిజ్ వారె సెకార్ కిబె ఆవండ నెగెండ్రె మన్నికార్. గొరెపిల్ల ఎంబె సాహిజ్బా వీరుబా వన్నివెట సొన్ని మహార్. వీరు తొలిత పంటితి పంటలెకెండ్రె దేవుణు వందిజ్, మరి గొరెపిల్లవందిజ్ బూమి మున్ను మన్ని విజు లోకుర్ బాణిజ్ వర్గె ఆజి కేట అతికార్. ⁵ వీరు వెయ్దుదాన్ ఇని అబద్దం మాటబా వర్గివితార్. వీరు ఇని కల్లి సిల్లి నెగ్గికార్.

మూండ్రె దేవుణు దూతార్

6 నస్తివలె బూమి మున్ను, మన్నివరిజ్ విజేరిజ్, అహిజ విజు జాతిజణి వరిజ్, విజు తెగతివరిజ్, విజు బాసెజ వర్గిని వరిజ్, విజు దేసెమ్ది లోకురిజ్, వెహ్లాజ్ దేవుణు వెట ఎలాకాలం మంజిని బత్తు, సీని సువార్త అసి మరి ఉండ్రీ దేవుణు దూత ఆగసమ్దు ఎగ్రిజి మంజినిక నాను సుడెత. 7 వాండ్రు, “మీరు దేవుణుదిజ్ లోజిజ, వన్నిజ్ గవరం సీదు. ఎందానిజ్ ఇహిజ వాండ్రు తీర్పు తీరిసిని గడియ వాత మనాద్. అందెజె ఆగసమ్దిజ్, బూమిదిజ్, సమ్దారమ్దిజ్, ఏరు వాని ఊటెజ పట్టిసి వన్నిజె పొగిడిజి మాడిస్సు”, ఇజ గొప్ప పెరి కంటమ్దాన్ వెహ్లాన్.

8 మరి ఉండ్రీ దూత వన్ని వెనుక వాజి, “ఉత్పుత్ కిబిస్సి, రంకు బూలాజిని దన్ని పణిజాణిజ్ విజు లోకురిజ్ మత్తు కిబిస్సిలెకెండ ఉటిపిస్సికాద్ ఆతి గొప్ప పెరి పట్టుం ఆతి బబులోసు అర్తాద్, అర్తాద్”, ఇజ వెహ్లాన్.

9-10 అయ రుండి దేవుణు దూతార వెనుక, మరి ఒరెన్ దూత వన్ని వెనుక వాజి గొప్ప పెరి కంటమ్దాన్ ఈహు వెహ్లాన్. “ఎయెన్బా అయ జంతుజ్ మాడిసి, దన్ని బొమ్మదిజ్ మొకిజి, దన్ని గుర్తు వన్ని నొద్దుదునొ, కియుదునొ పొకె ఆతికాన్, ఇనికబా కలవ్ఎండ పూర్తి సత్తుదాన్ వాకె ఆజిని దేవుణు గొప్ప కోపం ఇని మత్తు కిబిస్సి కల్లు ఉణాన్లె. గొరెపిల్ల ఎద్దుని, దేవుణు వందిజ్ కేట ఆతికార్ ఆతి దేవుణు దూతార ఎద్దు, నెగిడిని సిసుదాన్, వెయిని గందకమ్దాన్ ఇమ్సెజ్ కిబె ఆనాన్. 11 వారు హిమ్సెజ్ కిబె ఆజిని దన్ని గొయ్ ఎలాకాలం డిన్ఎండ మున్ను, సొన్ని మంజినాద్. అయ క్రూరమతి జంతుదిజ్ గాని, దన్ని బొమ్మదిజ్ గాని పొగిడిజి మాడిస్సికార్, దన్ని పేరుమన్ని గుర్తు ఎయెన్బా పొకె ఆతిజ అబ్బె రెయుపొగొల్ కాలి సిల్లెండ హిమ్సెజ్ కిబె ఆజి మంజినాన్. 12 అందెజె దేవుణు ఆడ్రెజ్ లోజిజి మంజి, యెసువందిజ్ మన్ని నమకమ్దు నమకమాతివరిలెకెండ మంజినికార్, హిమ్సెజ్ విజు డిన్ఎండ ఓరిసి మంజినార్. వారు దేవుణుదిజ్ నెందితికార్ ఇజ తోరె ఆజినార్.

13 నస్తివలె, “ప్రబు మున్ను నమకం ఇడెజి ఏలుదాన్ సానికాన్ దేవుణు సీని దీవెనమ్కు మంజినికార్ ఇజ రాన్అ”, ఇజ పరలోకమ్దాన్ ఉండ్రీ కంటం వెహ్లాక వెహ్. “నిజమె, వారు కష్టబాడెజినిక డిసి రోహ్లార్. వారు కితిమన్ని పణిదిజ్ తగితి లెకెండ వరిజ్ ఇనాయం దోహ్కాన్”, ఇజ దేవుణు ఆత్తు వెహ్లానాన్.

బూమిది పంట కొయ్నిక.

14 మరి నాను సుడెతిజ్, ఇదిలో, తెల్లాని మొసాప్ తోరితాద్. “లోకు మరిసి” ఆతి వన్నిజ్ పొలితి ఒరెన్ మొసాప్ మున్ను బస్త మహాన్. వన్ని బుర మున్ను బజారం టోపి మహాద్. వన్ని కిదు తెవుగు మన్ని కొడెవేలి అస్త మహాన్. 15 నస్తివలె మరి ఉండ్రీ దేవుణు దూత, దేవుణుగుడిదాన్ వెల్లి వాజి, “బూమిది పంట పండిత మనాద్. కొయ్దెజ్ కాలం వాతాద్. అందెజె నీ కొడెవేలి అసి కొయ్అ”, ఇజ మొసాపు మున్ను బస్తమన్ని వన్నిజ్ పెరి కంటమ్దాన్ వెహ్లాన్. 16 మొసాపు మున్ను బస్త మన్నికాన్ వన్ని కొడెవేలి బూమి మున్ను నెల్హాన్. బూమిదు పంటితి మన్ని పంట కొయె ఆతాద్.

17 నస్తివలె మరి ఉండ్రీ దేవుణు దూత పరలోకమ్దు మన్ని దేవుణుగుడిదాన్ వెల్లి వాతాన్. వన్నిజ్బా తెవుగుమన్ని ఉండ్రీ కొడెవేలి మహాద్. 18 మరి ఉండ్రీ దేవుణు దూత దేవుణుదిజ్ పూజ సీని మాలిపీటదాన్ వెల్లి వాతాన్. వాండ్రు సిసు మున్ను అతికారం మన్నికాన్. “బూమి మున్ను మన్ని ద్రాక్కు పట్టు కొయ్దెజ్ పాకం వాతె. అందెజె తెవుగు మన్ని నీ కొడెవేలిదాన్ దన్ని గెలెజ్ కొయ్అ”, ఇజ గొప్ప పెరి కంటమ్దాన్ వాండ్రు కొడెవేలి అస్తిమన్ని దూతెజ్ వెహ్లాన్. 19 అందెజె అయ దేవుణు దూత వన్ని కొడెవేలి బూమి మున్ను నెల్హాండ్రె, ద్రాక్కు పట్టు కొయ్జి, ద్రాక్కు పట్టు మట్టి రసం లాగిజిని గనుగుదు ఇడ్డాన్. యా గనుగు దేవుణుబాణిజ్ వాజిని సిసునన్ని కోపమ్దిజ్ గుర్తు. 20 ద్రాక్కు పట్టు మట్టిని గనుగుదు పట్టుమ్దిజ్ వెల్లి వారు మట్టార్. రుండి వందిజ్ మయిలుజ్ దూరం, గుర్తం వెయిది కలిమ్దిజ్ నమానం ఆతిలెకెండ, అయ్దు అడుగుజ్ లోతు మన్ని గడ్డ లెకెండ, అయ గనుగుదాన్ నల సొత్తాద్.

15

ఏడు దేవుణుదూతారని ఏడు జబ్బుజ్.

1 మరి ఉండ్రీ గొప్ప బమ్మాతి గుర్తు పరలోకమదు నాను సుడేశత. దేవుణు కోపం పూర్తి ఆనిలెకెండ్ కిదెజ్ ఇజి, కడెవెరిది ఏడు జబ్బుజ్ అస్తి మన్ని ఏడు దూతారిజ్ సుడేశత. 2 మరి సినుదాన్ కూడితి మన్ని గాజుదిజ్ పోలితి సమ్దరం లెకెండ్ మన్నిక నాను సుడేశత. అయ క్రూరమతి జంతుజ్ దన్ని బొమ్మదిజ్, దన్ని పేరుది అంకిదిజ్ లోజివండ దన్నిజ్ గెలిస్తెకార్, దేవుణు వరిజ్ సిత్తి టోయలెజ్ అసి అయ గాజు నన్ని సమ్దరం వడేశాదు నిల్ని మంజనిక సుడేశత. 3 వారు, “ప్రబు ఆతి దేవుణు, విజు దన్నిజ్ అతికారం మన్నికి నీ పణిజ్ గొప్ప పెరికెజ్ ని బమ్మాతికెజ్. బూమి మున్ను మన్ని లోకుర్ మున్ను ఎలాకాలం రాజు ఆతికి, నీ సరిజ్ నాయం ఆతికెజ్ ని నిజమాతికెజ్ మన్నె. 4 ప్రబువా, నీను ఒరిదె గొప్ప నెగ్గికి, నీ నన్నికాన్ మరి ఎయెన్బా సిల్లెన్. లోకుర్ విజెరె నిజి లోజిజ మంజనార్. బూమి మున్ను మన్ని లోకుర్ విజెరె నీపేరుదిజ్ గవరం సీనారలె. తోరె ఆతిమని నీతినిజయ్ మన్ని పణిజ వందిజ్ లోకుర్ విజెరె వాజి నీ ఎద్దు నిజి పొగిడిజి మాడిసార్లె”, ఇజి దేవుణు పణికినికాన్ ఆతి మోసె పాటని గొర్పెల్ల పాట పార్తార్. 5 దన్నివెనుక, నాను సుడేశతిజ్ సాస్యమదిజ్ గుడారం ఇని దేవుణు గుడిజి పరలోకమదు రే అతాద్. 6 అయ ఏడు జబ్బుజ్ అస్తి మన్ని ఏడు దూతారి, కల్లిసిల్లి మెర్నిని తెల్లాని సొక్కెజ్ తొడిగిజి, దన్ని మున్ను గుండెదు బజారమదాన్ తయార్ కితి జిమిదం తోహా ఆజి అయ దేవుణు - గుడిదాన్ వెల్లి వాతార్. 7 నస్తవలె, అయ పాణం మన్ని నాల్లి జంతుజ లోక ఉండ్రీ జంతు ఎలాకాలం బత్తిజిని దేవుణు కోపమదాన్ నిండ్రీతి మన్ని, బజారమదాన్ తయార్ కితి ఏడు కుడుకెజ్ అయ ఏడు దేవుణుదూతారిజ్ సిత్తాన్. 8 అయవలె దేవుణు జాయదాన్ వన్ని సత్తుదాన్ వాతి గోయదాన్ దేవుణు గుడిజి నిండ్రీతాద్. అయ ఏడు దేవుణుదూతారివెట వాదెజ్ మన్ని జబ్బుజ్ వాజి పూర్తి ఆనిదాక ఎయెన్బా దేవుణు గుడిజు డుగదెజ్ అటవితాన్.

16

దేవుణు కోపం నిండ్రీతి మన్ని ఏడు కుడుకెజ్

1 నస్తవలె, “మీరు సొన్ని దేవుణు కోపమదాన్ నిండ్రీతి మన్ని అయ ఏడు కుడుకెజ్ బూమి మున్ను వాక్తు”, ఇజి దేవుణు గుడిదాన్ అయ ఏడు దేవుణుదూతారిజ్ గొప్ప పెరి కంటమదాన్ వెహ్కె వెహ. 2 మొదోహి దేవుణుదూత సాహండ్రె వన్ని కుడుకెజు మన్నిక బూమి మున్ను వాక్తిజ్, అయ క్రూరమతి జంతుది గుర్తు పోకె ఆతి వరిజ్ ని దన్ని బొమ్మదిజ్ మాడిస్సెవరిజ్ డటం నొప్పి కిజిని సెజ పుట్టు పుట్టె. 3 దన్ని వెనుక రుండి దేవుణు దూత సొన్ని వన్ని కుడుకెజు మన్నిక సమ్దరమదు వాక్తిజ్, సమ్దరమది ఏరు పీనుగుది నల లెకెండ్ అతాద్. అందెజె సమ్దరమదు మన్ని పాణం మనికెజ్ విజు సాతె. 4 అయ రుండి దేవుణు దూత వెనుక మూండ్రీ దేవుణు దూత సొన్ని వన్ని కుడుకెజు మన్నిక పెరి గడ్డెజుని ఏరు సొని ఊటెజ వాక్తిజ్, వనక ఏరు విజు నల ఆతె.

5 నస్తవలె, “ఏలు మన్నికి, ముజాల మహికి ఆతి నీను ఒరిదె పరిసుద్దమాతికాన్ ఆతికి. నీ నన్నికాన్ మరి ఎయెన్బా సిల్లెన్. 6 వారు దేవుణు వందిజ్ కేట ఆతి వరిజ్ ని దేవుణు ప్రవక్తరుజ్ సఫ్తార్. అందెజె వరిజ్ తగ్గిలెకెండ్ తీర్పు తీరిసి, వరిజ్ ఉండెజ్ నల సిత్తిజ్, నీను నీతినిజయ్ దాన్ తీర్పు తీరిసినికి ఆజిని”, ఇజి ఏరుదిజ్ అతికారం మన్ని దేవుణు దూత వెస్సెనిక వెహ. 7 అందెజె “నిజమె, ప్రబు ఆతి దేవుణు, విజు దన్నిజ్ అతికారం మన్నికి, నీను తీరిస్సి తీర్పుజ్ నిజమాతికెజ్, నాయమాతికెజ్”, ఇజి పూజ సీని మాలిపీటదాన్ వెహ్కె వెహ.

8 అయ మూండ్రీ దేవుణు దూత వెనుక నాల్లి దేవుణు దూత సొన్ని వన్ని కుడుకెజు మన్నిక, పొద్దుమున్ను వాక్తిజ్ లోకురిజ్ సినుదాన్ సురదెజ్ పొద్దుదిజ్ అతికారం దొహ్కాద్. 9 అందెజె లోకుర్ నండో వేడిదాన్ వెయ్జు, పుట్టాజ్ ని నొప్పి కిబిస్సి జబ్బుజ్ లోకుర్ మున్ను పొక్తిమన్ని దేవుణు పేరుదిజ్ దుసలాడితార్. గాని వారు, వరి పాపమకు ఒప్పుకోడిజి డిసీసీజి మన్ను మారిస్తెజ్ ఒప్వెతార్. వారు దేవుణుదిజ్ పొగిడిదెజ్బా ఒప్వెతార్.

10 అయ నాల్లి దేవుణు దూత వెనుక అయదు దేవుణు దూత సొన్ని వన్ని కుడుకెజు మన్నిక అయ క్రూరమతి జంతు బన్ని సింహాసనం మున్ను వాక్తిజ్, అది ఏలుబడి కిని దేసెం విజు సీకటి ఆతాద్. లోకుర్ వరిజ్ వాజిని నొప్పిజ్ బరిస్తెజ్ అట్వండ వరి నాలికెజ్ అడ్డం కొహ్కె ఆతార్. 11 వరి

వుట్టుజవందిజ్, నొప్పిజవందిజ్ వరలోకమ్దు మన్ని దేవుణుదిజ్ దుసలాడితార్. గాని వారు కిత్తి మహి సెజ పణిజ వందిజ్ ఒడిబిజి మన్ను మరిసి పాపమ్కు ఒప్పుకొండేజి డిసిసీదెజ్ ఒవ్మెతార్.

12 అయ అయ్దు దేవుణు దూత వెనుక ఆరు దేవుణు దూత సొన్ని వన్ని కుడుకాదు మన్నిక యూప్రటిసు ఇని గొప్పు పెరి గడ్డ మున్ను వాక్కిజ్, తూర్పు దరోటాన్ వాని రాజురిజ్ వాదెజ్ సరి తయార్ ఆతిలెకెండ గడ్డ వస్తూ సాహద్. 13 నస్తవలె, అయ గొప్పు పెరి సరాసు వెయుదాన్, మరి అయ క్రూరమతి జంతు వెయుదాన్ని అబద్ధం వెప్పి ప్రవక్త వెయ్దాన్ కపొకిజ్ నన్ని మూండ్రి దెయమ్కు వెల్లి వాతిక నుడత. 14 అయ దెయమ్కు బమ్మాని గుర్తుజ్ కిజి తోరిసినె. అవి విజు దన్నిజ్ అతికారం ఆతిమన్ని దేవుణు తీర్పు తీరిస్సి, గొప్పు తియెల్ అని రోజుదు, దేవుణు వెట ఉద్దం కిదెజ్ ఇజి లోకమ్దు మన్ని విజు రాజురిజ్ కుడుప్పి తత్తెజ్ ఇజి వరి డగ్గు సాహె.

15 “ఇదిలో, ఎయెన్బా ఒడిబివిండ మహివలె, డొజారి డొజి కిదెజ్ వానిలెకెండ నాసు వాజిన. నాసు వానివలె సిగు అనిలెకెండ డుమ్డ నడివీండ మండ్రెజ్ ఇజి తెలి ఆజిమంజి వన్ని సొక్కెజ్ కావ్కిజి మంజినికాన్ దేవుణు సీజిని దీవనమ్కు మంజినికాన్ ఆనాన్”.

16 నస్తవలె, అయ దెయమ్కు ఏబ్రి బాసదు ‘అర్మెగెదోసు’ ఇజి కూకె ఆజిని బాడ్డిదు లోకమ్ది రాజురిజ్ విజేరిజ్ కుడుప్పి తత్తె.

17 అయ ఆరు దేవుణు దూత వెనుక ఏడు దేవుణు దూత సొన్ని వన్ని కుడుకాదు మన్నిక ఆగనమ్దిజ్ని బూమిదిజ్ నడిమి మన్ని బాడ్డిదు వాక్కిజ్, “పూర్తి ఆతాద్”, ఇజి దేవుణుగుడిలోఇ మన్ని సోహాసనమ్దాన్ వెప్పిని ఉండ్రి పెరి కంటం వాతాద్. 18 నస్తవలె మెర్సిని జాయ్, దీడేజినికెజ్, పిడుగుజ్, విజు వాతె. బూమి గొప్పుజ కద్దితాద్. బూమి మున్ను లోకుర్ పుట్టిబాణిజ్ అని ఎనెజ్బా జర్గిలెకెండ సొన్నా గొప్పు గటిజ బూమి కద్దితాద్. 19 గొప్పు పేరు పొందితిమన్ని బబులోను పట్టుం బదెజ్ ఆజి మూండ్రి ముకెజ్ ఆతె. దేవుణుదిజ్ నమ్మిఇవరి పట్టుమ్కు అర్తి సాహె. బబులోను పట్టుమ్దిజ్, దన్ని పాపమ్కు వందిజ్, సిసు లెకెండమన్ని, వన్ని గొప్పు పెరి కోపం మన్ని గిన్ను ఉండెజ్ సీదెజ్ దేవుణు ఎత్తు కిత్తాన్. 20 సమ్దరం నడిమి మన్ని ఇజి దేసెమ్కు (ద్విపుజ్) విజు ముడుగితె సాహె. గొరోక్ అణెనె ఆజి సద్దుజ్ ఆతె. 21 డగ్గు యబాయ్ కేజిజ్ బరు మంజిని వడేజెజ్ ఆగనమ్దాన్ లోకురి మున్ను అర్తె. అయ వడేజెజాణిజ్ తగ్గితి గాయమ్కు గొప్పు పెరికెజాతిజ్, లోకుర్ అయ గాయమ్కు వందిజ్ దేవుణుదిజ్ దుసలాడితార్.

17

బోదెలిని జంతు

1 ఏడు కుడుకెజ్ అస్తిమన్ని ఏడు దూతారలోఇ ఒరెన్ దూత వాతాండ్ర నావెట, “నీను ఇప్పె రఅ. గొప్పు రంకు బూలాని బోదెలిలెకెండ మన్ని, నండొ గడ్డెజి వడకాదుమన్ని పెరి పట్టుమ్దిజ్ తీర్పు కిజి, సీజిని సిక్కు నిజి తోరిస్సాలె”, ఇజి వెప్తాన్. 2 బూమి మున్ను మన్ని రాజుర్ దన్ని వెట కూడేజి గూర్తార్. బూమి మున్ను బత్కినికార్ దన్ని రంకు బూలాని పణిజాణిజ్ మత్తు ఆజి సోస్తార్.

3 నస్తవలె, దేవుణు ఆత్మదాన్ నిండ్రితి మన్ని నజి, అయ దేవుణు దూత బిడిమబూమిదు లాగ్గి ఒత్తాన్. అబ్బె దేవుణు పేరుదిజ్ దుసలాడిజిని పేరుదాన్ నిండ్రితి మన్ని ఏడు బురెన్ పది కొమ్ము మన్ని, ఉండ్రి ఎరాని జంతు మున్ను బస్తిమన్ని ఉండ్రి బోదెలిదిజ్ నుడత. 4 అయ బోదెలి నీలి రంగు కూడితి మన్ని ఎరాని రంగుది గొప్పు విలువాతి పాత పొర్పాజి, మెర్సిని బజారం, విలువాతి రంగుపణకుది విలువాతి పూనిజ్ ఇట్టిజి మహద్. అది కిజి మంజిని సెజ పణిజాణిజ్. మరి అది కిజిని రంకు బూలాని పణిది సెజ గుణమ్కు విజు నిండ్రితి మన్ని ఉండ్రి బజరమ్ది గిన్ను కియుదు అస్త మహద్. 5 అర్దం కిదెజ్ అల్లెకె లెకెండ దన్ని పేరు దన్ని నొద్దుదు యాలెకెండ రాసె ఆత మహద్.

“బూమి మున్ను మన్ని రంకు బూలాని బోదెకాజ్ని విజు సెజ పణిజి అయ్సి ఆతిమన్ని గొప్పు పెరి బబులోను”.

6 అయ బోదెలి దేవుణు వందిజ్ కేట ఆతిమన్ని వరి నలని యేసువందిజ్ సాస్యం వెప్పిజ్ సప్పె ఆతివరి నల ఉణిజి మత్తు ఆజి సొస్త మహద్. నాసు దన్నిజ్ నుడేజి నండొ బమ్మ ఆత. 7 నస్తవలె, అయ దేవుణు దూత నావెట ఈహు వెప్తాన్. “నీను ఎందానిజ్ బమ్మ ఆజిని అయ బోదెలివందిజ్ని

మరి ఏడు బుర్రెని పది కొముకుమన్ని అది బస్తీమన్ని జంతువందిజ్ డాజీతి మన్ని సజతిజ్ నాను నిజి తెలియ కినా". 8 నీను సుడేతి అయ జంతు ముజాల్ మహాద్ గాని ఏలు సిల్లెద్. గాని వెటనె దర్లిదాన్ వెల్లి వాజి, దన్ని వందిజ్ తయార్ ఆతిమని లెకెండ నాసనం ఆజి సానాద్. బూమి పుట్వండ్ ముజాల్పా, దేవుణు వెట ఎలాకాలం బత్తిని వరి పేరుకు రాసి ఇడేజిని పుస్తకమదు పేర్పు సిల్లి, బూమి ముస్సు బత్తినికార్ అయ జంతుజ్ సుడేజి, ఇక్క ముజాల మహాద్, ఏలు సిల్లెద్. గాని మరి వానాద్లె, ఇజి బమ్మ అనార్.

9 ఇక్క నెస్టెజ్ గెణం మన్ని మన్ను మండ్రెజ్ వలె. అయ జంతుది ఏడు బుర్రెక్ ఇహిజ, అయ బోదెలి బస్తీమన్ని ఏడు గొరొక్. 10 అయ ఏడు బుర్రెక్, ఏడుగురు రాజురిజ్ బా పొలిత మనార్. అయ్దుగురుది కాలం గడేస్తాద్. ఒరెన్ ఏలుబడిః కిజి మంజినాన్. కడేవెరిదికాన్ ఇంక రెవండ్రె. గాని వాండ్రు వానివలె, కండెక్ కాలం వాండ్రు ఏలుబడిః కిజి మండ్రెజ్ వలె. 11 అయ క్రూరమతి జంతు ముజాల మహికాండ్రె గాని ఏలు సిల్లికాన్ ఆతి ఎనిమిది రాజు. వాండ్రు, వన్ని ముజాల మహి ఏడు రాజుజ్ సెందితికాన్. వాండ్రు వన్ని వందిజ్ మన్ని ఎలాకాలం మంజిని నాసనమేదిజ్ సాన్నినాన్. 12 నీను సుడేతి మన్ని పది కొముకు, పది మణిసి రాజురిజ్ పొలిత మనార్. వరిజ్ ఏలుబడిః కిడెజ్ ఏలుదాక అతికారం దొహ్కావెదె. గాని ఉండ్రీ గడియ అయ క్రూరమతి జంతు వెట రాజుర్ లెకెండ వరిజ్ అతికారం దొహ్కావెదె. 13 వారు ఉండ్రె ఉదెసమ్దాన్ వరి సత్తుని అతికారం విజు అయ జంతుదిజ్ ఒపజెప్పార్లె. 14 వారు గొరెప్పిల్లవెట విదెం కినార్ గాని రాజురిజ్ రాజు, ప్రబురిజ్ ప్రబు ఆతిమన్ని గొరెప్పిల్ల వరి ముస్సు గెలిస్సాన్లె. వాండ్రు కూకె ఆతిమన్నికార్, మరి వన్ని వందిజ్ వెర్లె ఆతిమన్నికార్ని వన్నిజ్ లోజిజి మంజిని సమ్మకమాతికార్ వన్నివెట మంజినార్లె.

15 నస్తివలె, అయ దేవుణు దూత నజి ఈహు వెహ్హాన్. "నీను సుడేతిమన్ని, అయ గొప్ప రంకు బూలాని బోదెలి బస్తీమన్ని నండొ పెరి గడ్డెజ్ ఇనిక ఇహిజ, యా లోకమదు మన్ని విజు జాతిజాణికార్, విజు దేసమ్క లోకుర్, విజు తెగాదికార్, విజు బాసెజ్ వర్గినికార్. 16 నీను సుడేతి మన్ని అయ క్రూరమతి జంతుని అయ పది కొముకు, అయ రంకు బూలాని బోదెలిదిజ్ ఇస్టం ఆవిర్. వారు దన్నిజ్ కల్లితి మన్నికెజ్ విజు లాగ్లి విసీర్జి, నగడి కిజి, దన్ని కండ కొయజి తింజి, మిగిలిత్తిక సినుదాన్ సుర్పు విసీర్పార్. 17 దేవుణు మాటుదు మన్నిలెకెండ పూర్తి ఆనిదాక ఏలుబడిః కిడెజ్ ఇజి అయ క్రూరమతి జంతుజ్, వరి అతికారమకు విజు సీదెజ్ ఇజి దేవుణు వన్ని ఉదెసం పూర్తి కిడెజ్ ఇజి వరి మన్నుజు బుద్ది సిత్తాన్ 18 మరి నీను సుడేతి అయ బోదెలి బూమి ముస్సు, మన్ని రాజురిజ్ ముస్సు, ఏలుబడిః కిని అయ గొప్ప పెరి పట్టుమనె".

18

బబులోను పట్టుం అర్పినిక

1 దిన్ని వెనుక మరి ఒరెన్ దేవుణు దూత పరలోకమదాన్ డిగ్గెజి వానిక నాను సుడేత. వన్నిజ్ గొప్ప పెరి అతికారం మహాద్. వన్నిబాణిజ్ వాతిమన్ని గొప్ప జాయ్దాన్ బూమి విజు జాయ్ ఆతాద్. 2 వాండ్రు గొప్ప పెరి కంటమ్దాన్ ఈహు డేల్లి వెహ్హాన్. "గొప్ప పెరి పట్టుం ఆతి బబులోను అరె ఆతాద్, అరె ఆతాద్. అక్క దెయమ్కాజ్ మండ్రెజ్ ఇల్లు ఆత మనాద్. విజు సెజ ఆత్తెజ్ బత్తిజిని బాడ్డి ఆత మనాద్. విజు సెజకెజ్ ఇస్టం కిడెజ్ అల్ ఇ పొటిజ్ బత్తిజిని బాడ్డి ఆతాద్. 3 ఎందానిజ్ ఇహిజ మత్తు కబిస్సి కల్లు నన్ని, ఉత్పుత్ కిబిస్సి, దన్ని రంకు బూలాని పణిజాణిజ్, ఉణిజి సోస్తిలెకెండ, విజు దేసమ్కాణి లోకుర్ సోస్సార్. బూమి ముస్సు, మన్ని రాజుర్ దన్ని వెట గూర్తార్. దన్నిజ్ మహి నండొ లావ్ ఆతిమన్ని, ఒడోల్ది ఆసెజ సర్ద కిబిస్సి పణిజాణిజ్ బూమి ముస్సు, మన్ని సవుకారిజు గొప్ప ఆస్తి మనికార్ ఆతార్.

4 నస్తివలె, యాలెకెండ మరి ఉండ్రీ కంటం పరలోకమదాన్ వెహ్హిక వెహ. "నజి ఇస్టమాతికిదెరా, మీరు దన్ని పాపమ్క లొక కూడేజి మనవండ్, దన్ని జబ్బుజ్ ఇనికబా మిజి అనెండ, మీరు దన్ని బాణిజ్ వెల్లి రదు. 5 అది కితి పాపమ్క ఆగసమ్దు అందితిలెకెండ కొట్టు ఆతె మన్నె. అది కిత్తి తప్పజ్ విజు దేవుణు ఎత్తు కిత మనాన్. 6 అది నెత్తిమన్ని లెకెండన్ దన్నిజ్ సీదు. అది కిత్తి మన్ని పణిజ రుండి వంతుజ్ దన్నిజ్ కిదు. అది కలప్తిమన్ని దన్ని గిన్నదాన్ ఉండెజ్ రుండి వంతుజ్ కలప్పి దన్నిజ్ సీదు.

7 నాను రాణిలెకెండ్ బస్త మన్ను. నాను రాండి బోదెలి అవెద. నాను ఎసెజ్ బా దుకమ్ దాన్ అడజబావి”, ఇజి దన్ని మన్నుదు అది పొజిజినాద్. అందెజి దన్నిజ్ అది నె ఎస్సానో పొజిజి ఒడొలది ఆసెజి సర్ల కిబిస్తెజ్ కిత్తిమన్ని పణిజి సమానం ఆతి నసా దుకమ్ ని హిమ్ సెజ్ దన్నిజ్ మరజి సీదు. 8 అందెజె, ఉండ్రె లోజిదునె, జబ్బుజ్, దుకం, కరు ఇని బాదెజ్ దన్నిజ్ వానె. దన్నిజ్ తీర్పు తీరిసి సిక్కు సీని ప్రబు ఆతి దేవుణు గొప్ప సత్తు మన్నికాన్, అందెజి దన్నిజ్ సిసుదాన్ సుర్లు విసిర్పాన్.

9 అది సురి ఆని సిసుదాన్ వాని గోయ్ సుడెజి, దన్ని వెట గూర్తి మహికార్, దన్ని ఒడొలది ఆసెజి సర్ల కిబిస్తె పణిజి వందిజ్ కూడితికారాతి బూమి ముస్సు. మన్ని రాజుర్ గుండె కొత్తె ఆజి దన్ని వందిజ్ అడజబానార్. 10 వారు, దన్నిజ్ వాతి సిక్కుదిజ్ సుడెజి తియెలాజి దూరం నిల్పి మంజి, అడజబాజి, “అబాయా, అబాయా, గొప్ప పెరి పట్టుమాతి బబులోను, సత్తుమన్ని పట్టుమా, ఉండ్రె గడియూదునె నాసనం వాతాద్”, ఇజి వెహె ఆజి మంజినార్.

11 అయ పట్టుం నాసనం ఆతిక సుడెజి, వరి వస్తుజ్ కొణికార్ మరి ఎయెర్ బా సిల్లెర్ ఇజి బూమి ముస్సు. మన్ని బేరం కినికార్ దన్నిజి సుడెజి గుండె కొత్తె ఆజి అడజబానార్. 12 వారు పొర్తి మహి వస్తుజ్ ఇహిజ, బజారం, వెండి, విలువాతి రంగు పణకుజ్ ని పూసెజ్, విలువాతి నూలు పాతెజ్, మరి నీలి రంగు కూడితి ఎరాని పాతెజ్, సిల్కు పాతెజ్, విలువాతి నల రంగునన్ని ఎరాని పాతెజ్, రకరకమ్ ది గందం మరాతి ఒస్తుజ్, ఏనుగు కొముకాణిజ్ తయార్ కిత్తి రకరకమ్ ది ఒస్తుజ్, నండె విలువ మన్ని మరెకాణి ఒస్తుజ్, కంసు, ఇనుము, సునాజ్ మన్ని పణకు సెక్కెజ్, దాసిని మరాతి తోలు, వాసనం మన్ని కాయెజ్, దూపం సుర్పి ఒస్తుజ్, వాసనం మన్ని నూనె, కల్లు, 13 ఒలివ నూనె, మెత్తాని దూరు, గొదము, కోడ్డిజ్, గొరెజ్, గుర్రమ్ కు, గుర్రమ్ కు లాగ్నిని బండిజ్, వెట్టిపణి కిని లోకురిజ్ బా వారు పొర్పి మహార్. ఏలుదాన్ ఇక్కెజ్ కొణికార్ సిల్లెర్ ఇజి వారు అడజబానార్. 14 “నీను కొరిత్తిమన్ని విలువాతి గొప్ప నెగ్గి వస్తుజ్ విజు నీ బాణిజ్ లాగి ఆతాద్. మరి ఎసెజ్ బా మరజి దొహ్మె ఇలెకెండ్, నీ విలువాతి వస్తుజ్ ని ఆస్తి విజు సిల్లెండాతాద్ ఇజి సవ్ కారిజు దన్నిజ్ వెహ్పార్. 15 అయ పట్టుమ్ దు సొన్ని వరి వస్తుజ్ పొర్పి దన్ని బాణిజ్ ఆస్తి గణస్తికార్ ఆతి బేరం కినికార్, దన్నిజ్ వాతిమన్ని బాదెజ్ సుడెజి తియెలాజి గుండె కొత్తె ఆజి అడజబాజి యాలెకెండ్ వెహ్పార్.

16 “అబాయా, అబాయా, విలువాతి నూలు పాతెజ్, నీలిరంగు కూడితి మన్ని ఎరాని పాతెజ్ ని నలరంగు నన్ని విలువాతి ఎరాని పాతెజ్ పొర్పాజి, మెర్పిని బజారమ్ ని విలువాతి రంగు పణకుజ్ ని పూసెజ్ అయ పట్టుమ్ దు దొహ్మె మహార్. 17 నిస్సా గొప్ప పెరి ఆస్తి ఉండ్రె గడియూదునె పాడాత సొహదా ఇజి ఓడెజు నడిపిసీని విజు నెయ్యిర్, ఓడెజు పయనం కినికార్, ఓడెజు పణి కినికార్, సమ్ దరమ్ దు పణి కిజి బత్తినికార్ విజెరె దూరం నిల్పి మంజినార్. 18 అది సురి ఆజిని సిసుది గోయి సుడెజి, “యా గొప్ప పెరి పట్టుమ్ దిజ్ సమానం ఆతి మరి ఉండ్రె పట్టుం ఎంబెబా మనాద్”, ఇజి గొప్ప డేల్పి వెహ్పార్. 19 వారు వరి బురెకాజ్ ముస్సు. దుల్లె వాకె ఆజి గుండె కొత్తె ఆజి అడజబాజి.

“అబాయ, అబాయ, సమ్ దరం ముస్సు. ఓడెజ్ మనికార్ విజెరె బేరం కిజి ఆస్తి గణస్తి మన్ని యా గొప్ప పెరి పట్టుమ్ ది ఆస్తి ఉండ్రె గడియూదునె నాసనం ఆత సొహద్”, ఇజి డటం డేల్పి మంజినార్. 20 పరలోకమ్ దు మన్ని కిదెరా, అయ పట్టుం నాసనం ఆతి వందిజ్ మీరు సర్ల ఆదు. దేవుణుదిజ్ నమ్మిత్తి కిదెరా, అహ్సారు ఆతి కిదెరా, దేవుణు ప్రవక్తరు ఆతి కిదెరా మీరు సర్ల ఆదు, ఎందానిజ్ ఇహిజ అది ఎలాగ మిజి తీర్పు సిత్త మనాదో, అయాలెకెండ్ నె దేవుణు అయ పట్టుం ముస్సు. తీర్పు తీరిస్త మనాన్.

21 నస్తివలె, సత్తుమన్ని ఒర్న్ దేవుణు దూత, ఉండ్రె గొప్ప పెరి జత్త పణకు నన్ని ఉండ్రె పెరి పణకు పేరజి సమ్ దరమ్ దు విసిరెతాండ్రె, “మరి ఎసెజ్ బా తొర్ ఏండాతిలెకెండ్ గొప్ప పెరి పట్టుమాతి బబులోను గొప్ప పెరి టండెజాణిజ్ యాలెకెండ్ అడిగి అరె ఆనాద్. 22 టోయ్ లెజ్ పలక్కి జాటుజ్, పాటెజ్ పొర్పిపరి జాటుజ్, పిరుడి: ఉక్కి జాటుజ్, జోడెబాంక ఉక్కి జాటుజ్ మరి ఎసెజ్ బా మీబాణిజ్ వెన్ ప ఆఉ. ఎమేణి రకమ్ ది పణి కినికాన్ ఎయెన్ బా, మరి ఎసెజ్ బా మీబాన్ తొర్ ఏన్. జత్త పణకుదు నూర్పి జాటు మరి ఎసెజ్ బా మీ లో ఇహాన్ విన్పె ఆవ 23 ఉండ్రె దీవ మరి ఎసెజ్ బా

మీలో ఇ జాయ్ సీజి మన్ ఏద్. పెండ్లి దళ్ డే జాటు గాని పెండ్లి బోదెలి జాటు గాని మరి ఎసెజ్ బా మీలో ఇ వెన్ పె ఆఉ. నీ బేరం కినికార్, బూమి ముస్సు మన్ని గొప్ప పెరికార్ ఆత మహార్. విజు దేనమ్ కాణి లోకుర విజేరె నీ మాయ పణిజాణిజ్, మొసెం కిజి, తప్పు సరిదు నీను నడిపిస్తి. ²⁴ మరి దేవుణు ప్రవక్తరిజ్ సప్తివందిజ్, దేవుణుదిజ్ నమ్మితి వరిజ్ సప్తి వందిజ్, బూమి ముస్సు సప్పె ఆతి విజేరె వందిజ్ బబులోను పట్టుమ్ దిజ్ యా సిక్కు వాతాద్”, ఇజి అయ దేవుణు దూత వెప్టాన్.

19

దేవుణుదిజ్ పొగిడిడు (హల్లెలుయ)

1-2 దన్ని వెనుక పరలోకమ్ దు గొప్ప పెరి మంద లోకురి గొప్ప పెరి కంటం యాలెకిండ్ వెహ.

“దేవుణుదిజ్ పొగిడిడు. మజి రక్సిస్తివన్నిజ్ పొగిడిడు. వాండ్రు ఒరెండ్రె పూర్తి జాయ్ ని సత్తు మన్నికాన్. ఎందానిజ్ ఇహిజ, ఎస్తివలెబా వాండ్రు నిజమాతి, నాయమాతి తీర్పుజ్ సీజినాన్. దన్ని రంకు బూలాని పణిజాణిజ్ బూమి ముస్సు మన్ని వరిజ్ అది పాడే కిత్తాద్. అయ గొప్ప రంకు బూలాని బోదెలిదిజ్ వాండ్రు తీర్పు తీరిసి సిక్కు సత్తాన్. వన్ని పణికినివరి నలవందిజ్ వాండ్రు దన్నిజ్ అయాలెకిండ్ నె మరజి సిక్కు సత్తాన్. ³ వెనుక వారు మరి ఈహు డేల్ని వెప్టార్. “హల్లెలుయ. అది సినుదు సురె ఆజిని గోయ్ డిస్ ఏండ్ ఎలాకాలం ముస్సు సొన్ని మంజినాద్. ⁴ నస్తివలె, అయ ఇరువయ్ నాలేవర్ పెద్దెలుజ్ ని, పాణం మన్ని నాల్లి జంతుజ్ పడగజి అర్పి “ఆమెన్, దేవుణుదిజ్ పొగిడిడు”, ఇజి వెప్టి సింహాసనమ్ దు బస్తిమన్ని దేవుణుదిజ్ మాడిస్తార్. ⁵ “మా దేవుణుదిజ్ సెందితికిదెరా, వన్నిజ్ లోజిజి మంజిని ఇజిరికార్ ని పెరికార్ ఆతికిదెరా, మీరు విజెదెరె దేవుణుదిజ్ పొగిడిడు”, ఇజి వెప్టిని ఉండ్రి కంటం అయ సింహాసనమ్ దాన్ వాతాద్. ⁶ నస్తివలె, గొప్ప పెరి గడ్డ సొని జాటులెకిండ్ ని పిడుగుజ గొప్ప పెరి జాటుదిజ్ పొలితి గొప్ప పెరి మంద లోకురి కంటమ్ లెకిండ్ ఉండ్రి జాటు యాలెకిండ్ వెప్టినిక నాను వెహ. “హల్లెలుయ! మా ప్రబు ఆతి దేవుణు, విజు దన్నిజ్ అతికారం మన్నికాన్ ఏలుబడి కిజినాన్. ⁷ అందెజె మాటు సర్త ఆజి డాట్టల్. వన్నిజ్ గవరం సీనాల్. ఎందానిజ్ ఇహిజ గొరెప్పెల్లె పెండ్లి నమయం వాతాద్. వన్నిజ్, పెండ్లి దళ్ డే దన్నిజ్ అదిని తయార్ కిజినాద్”. ⁸ “దన్నిజ్ పొర్రాద్దిజ్ ఇజి నమ్మితి వరి నీతి నిజాయితి మన్ని పణిజాతి సుబ్బరం ఆతి గొప్ప జాయ్ మన్ని, మెర్నిని పాతెజ్ దన్నిజ్ దోహాక్తె.

⁹ మరి “గొరెప్పెల్లె పెండ్లి విందుదు కూకె అతికార్ దీవనమ్ కు పొందితికార్ ఇజి రాన్ అ”, ఇజి అయ దేవుణు దూత నజి వెప్టాన్. “యా మాటెజ్ దేవుణు వెప్టి నిజమాతి మాటెజ్”, ఇజిబా అయ దేవుణు దూత నజి వెప్టాన్.

¹⁰ అయావలె, నాను వన్నిజ్ పొగిడిజి మాడిస్తిజి ఇజి వన్ని పాదమ్ కాజ్ పడగజి అర్తిజ్ వాండ్రు, “నీను అయాలెకిండ్ కిమా. నానుబా, యేనువందిజ్ సొస్యం వెప్టిని మీ తంబెరిజవెటని, నీ వెట కూడేజి పణికినికాండ్రె, దేవుణుదిజ్ నె పొగిడిజి మాడిస్తి. దేవుణుబాణిజ్ వాతి మాటెజ్, దేవుణు ఆత్మదాన్ వెప్టి దేవుణు పణిమణిసిరె యేను తోరిస్తిమన్ని నిజమాతికెజ్ నె వెప్టినార్”, ఇజి నజి వెప్టాన్.

తెల్లాని గుర్రమ్ ముస్సు బస్తి మన్నికాన్.

¹¹ మరి పరలోకం రే ఆతిమనిక నాను సుడేత. ఇదిలో, తెల్లాని గుర్రం ఉండ్రి తోరితాద్. దన్ని ముస్సు బస్తి మన్నికాన్, నమ్మకమాతికాన్, నిజమాతికాన్ ఇని పేరు మన్నికాన్. వాండ్రు నాయమ్ దాన్ తీర్పు తీరిసి లోకురిజ్ సిక్కు సీజి, నాయమ్ దాన్ వన్ని విదెం కిజి మంజినాన్. ¹² వన్ని కణుకు సిసుకొనేజ్ లెకిండ్ మన్నె, వన్ని బుర ముస్సు బజారమ్ దాన్ తయార్ కిత్తి రాజురి టోపిజ్ నన్ని, నండ్ టోపిజ్ మన్నె, వన్నిజె ఆవండ్ మరి ఎయెరెబా నెన్ ఇ ఉండ్రి పేరు వన్ని ముస్సు రాని ఆతిక, వన్నిజ్ మనాద్. ¹³ నలారు ముడుక్తిమన్ని సొక్క వాండ్రు తోడుగిత్త మనాన్. దేవుణు మాట ఇని పేరు వన్నిజ్ మనాద్. ¹⁴ పరలోకమ్ దు మన్ని నయనమ్ దికార్, కల్లినిల్లి తెల్లాని నూలు పాతెజ్ తోడిగిజి తెల్లాని గుర్రమ్ క ముస్సు ఎక్సి వన్నివెట సొన్ని మహార్ ¹⁵ దేనమ్ కాణి లోకురిజ్ డేయ్ దెజ్, వన్ని వెయ్ దాన్ తెవుగు మన్ని ఉండ్రి కుర్ల వెల్లి వాజి మహాద్. వాండ్రు ఇనుము డుడ్డుదాన్ వరిజ్ ఏలుబడి:

కినాన్. విజు దన్నిజ్ అతికారం మన్ని దేవుణుది సిసు నన్ని కోపం, గనుగుదు ద్రాక్కు పట్టు మటిసి ద్రాసపట్టురసం లాగ్నిలెకెండ్, వాండ్లు మటిసినాన్. ¹⁶ రాజారిజ్ రాజాని ప్రబురిజ్ ప్రబు ఇని పేరు వన్ని సొక్క ముస్సుని వన్ని కుర్గుదు రాసె ఆత మనాద్.

¹⁷⁻¹⁸ మరి ఉండ్రీ దేవుణు దూత పొద్దుదు నిహి మనిక నాను సుడత. వాండ్లు గొప్ప పెరి కంటుమాదాన్ డేల్ని వెహ్సాన్. “దేవుణు నండో కండ సీని గొప్ప పెరి విందుదిజ్ రదు. రాజారి కండ, మరి సయనమ్దిజ్ నడిపిసినివరి కండ, మరి గొప్ప సత్తుమన్నివరి కండ, గుర్తమ్క కండ, మరి వన్యా ముస్సు బన్తిమన్నివరి కండ, మరి వెట్టిపణిమణసిర్ ఆఇవరి కండ, వెట్టిపణి కినివరి కండ, ఇజిరి వరి కండ, పెరివరి కండ, యాలెకెండ్ లోకుర్ విజేరి కండ తిండ్రెజ్ మీరు రదు”, ఇజి ఆగసం అడిగి ఎగ్రిజిని విజు పొటిజ వెహ్సాన్.

¹⁹ నస్తివలె, అయ గుర్తం ముస్సు బన్తిమన్నివనివెటని వన్ని సయనమ్ది వరివెట విదెం కిదెజ్ ఇజి, అయ క్రూరమతి జంతుని బూమి ముస్సు మన్ని రాజూర్ని వరి సయనమ్కు విజు కూడేజి వాతిక నాను సుడత. ²⁰ నస్తివలె, అయ క్రూరమతి జంతుని దన్ని పేరుదాన్ బమ్మాని పణిజ్ గుర్తు లెకెండ్ కిజి తోరిస్తి మన్ని అబద్దం వెహ్సి ప్రవక్తబా అస్సె ఆతార్. అయ క్రూరమతి జంతుది గుర్తు పోకె ఆతి వరిజ్ని దన్ని బొమ్మదిజ్ పొగిడిజి మాడిస్తి మహివరిజ్ వాండ్లు బమ్మాతి పణిజాణిజ్ మొసెం కిజి మహాన్. వారు రివిర్ గందకం వెయ్జిని సిసు మన్ని బాడ్డిదు పాణం డసానె అర్పె ఆతార్. ²¹ మిగిలిత్తి మహికార్, గుర్తం ముస్సు బన్తిమన్ని వన్ని వెయ్దుదాన్ వాతి కుర్దదాన్ సప్పె ఆతార్. పొటిజ్ విజు వనక పొట పంజు వరి కండ తిహె.

20

వెయిజ్ పంటిజ్ మన్ని ఏలుబడి:

¹ మరి దర్దిది తాలమ్కియుని ఉండ్రీ గొప్ప పెరి గొలుసు కీదు అస్తిమన్ని మరి ఒరెన్ దేవుణు దూత, పరలోకమ్దాన్ డిగ్జి వాతిక నాను సుడత. ² వాండ్లు, అయ మొదొహి సరాన్దిజ్, అహిజ అయ గొప్ప పెరి సరాన్ ఇని, సయ్నాను ఇని సెజ వన్నిజ్ అస్తాండ్రె వెయు పంటిజ్ దాక తొహ్తా డిస్సాన్. ³ అయ వెయు పంటిజ్ గడెస్సిదాక ఎమేణి దేసెమ్కాణి లోకురిజ్బా మొసెం కివిండ మండ్రెజ్ ఇజి అయ గొప్ప పెరి సరాన్దిజ్, దర్దిదు అర్ప్పి మూక్చి దన్ని ముస్సు సీలు పొక్తాన్. వెయిజ్ పంటిజ్ వెనక వాండ్లు సెగం కాలం వన్నిజ్ కుత్తి డిస్సానె.

⁴ నస్తివలె, నాను సింహాసనమ్కాజ్ సుడత. అయ సింహాసనమ్క ముస్సు బన్తిమన్నివరిజ్, తీర్పు తీరిస్తెజ్ అతికారం దొహ్కె. దేవుణు మాట వందిజ్ని యేసువందిజ్ వారు వెహ్తా సాస్యం వందిజ్ బురెక్ కత్తె అతివరి ఆత్మ సుడత. వారు అయ క్రూరమతి జంతుదిజ్నో, దన్ని బొమ్మదిజ్నో పొగిడిజి మాడిస్విండ మహికార్. వరి నొర్దుజి గాని వరి కికాజ్ గాని దన్ని గుర్తు పోకె ఆవిండ మనికార్. వారు బత్తిత్తారె వెయు పంటిజ్ క్రీస్తు వెట కూడేజి ఏలుబడి: కితార్. ⁵ (మిగిలిత్తి మన్ని సాతికార్ అయ వెయిజ్ పంటిజ్ వీజినిదాక బత్తివెతార్) యాకాదె సాతి వరిబాణిజ్ తొలిత మర్జి నిజి ఆనిక. ⁶ తొలిత మర్జి నిజ్నిదన్నిలోజ కూడేజి మంజినికార్ దేవుణు సీని దీవనమ్కు మన్నికార్. వారు దేవుణు వందిజ్ పూర్తి కేట ఆతికార్. నిన్నివరిముస్సు రుండి సావుదిజ్ అతికారం సిల్లెద్. గాని వారు దేవుణుదిజ్ని క్రీస్తుజ్ పూజేరిబులెకెండ్ మంజి క్రీస్తు వెట కూడేజి వెయిజ్ పంటిజ్ ఏలుబడి: కినార్.

సయ్నాను నానసం ఆజినిక

⁷ వెయిజ్ పంటిజ్ పూర్తి ఆతి వెనక సయ్నాను తొహె అతిబాణిజ్ డిస్సె ఆనాన్. ⁸ వాండ్లు బూమి ముస్సు నాల్లి దిక్కుజాణి విజు దేసెమ్కాణి లోకురిజ్ మొసెం కిజి, విదెం కిదెజ్ ఇజి గొప్ప పెరి సయ్నామ్దిజ్ గోగ్ని మాగోగ్ ఇనిబాన్ కూడుప్పి తనాలె. వరి లెక్క నమ్దరం పడకాది ఇస్కలెకెండ్ మంజినాద్. ⁹ వారు బూమి ముస్సు మన్ని విజు దేసెమ్కాజ్ సాహార్. దేవుణు లోకుర్ మంద కూడేజిమంజిని, దేవుణు గొప్పజి ఇస్సెం కిజిని పట్టుమ్దిజ్ సుటులం ఆతార్, గాని పరలోకమ్దాన్ సిసు డిగ్జి వాజి వరిజ్ సుర్దాద్. ¹⁰ వరిజ్ మొసెం కిత్తికానాతి సయ్నాను గందకమ్దాన్ కసిని సిసు

మంజిని బాడ్డిదు అర్పె ఆతాన్. అబ్బె అయ క్రూరమతి జంతుని అబద్ధం వెప్పి వన్ని ప్రవక్త మనార్. అబ్బె వారు రెయుపొగోల్ డిఃన్ ఏండ ఎలాకాలం హిమ్ సెజ్ కిబె అజి మంజినార్.

సాతికార్ తీర్పు పొందిజనార్.

11 నస్తవలె, గొప్ప తెల్లాజ్ మన్ని ఉండ్రీ పెరి సింహాసనమీని దన్ని ముస్సు ఒరెన్ బస్తీమన్నికబా నాను సుడఃత. బూమిని ఆగసం వన్ని ఎద్దుహాన్ ఉవ్వాక్తి సాహి లెకెండ్ సిల్లెండ ఆతె. అక్కెజ్ తోవిండాతె. 12-13 మరి సాతికార్ విజేరె, అహిజ పెరికార్ని ఇజిరికార్ విజేరె అయ గొప్పపెరి సింహాసనం ఎద్దు నిహిమన్నిక సుడఃత. సమదరమదు సాతికార్ విజేరె సప్తరమదాన్ డిఃస్సి ఆతార్. సాతికార్ మంజిని అయా లోకమదు మహికార్బా డిఃస్సి ఆతార్. నస్తవలె, పుస్తకమకు రెకె ఆతె. దేవుణు వెట ఎలాకాలం బత్కిని వరి పేరుకు రాసి ఇడఃజిని మరి ఉండ్రీ పుస్తకమబా రెకె ఆతాద్. అయ పుస్తకమకాజ్ రాస్తి ఇడ్డిమన్నిలెకెండ్, ఒరెన్ ఒరెన్ కితిమన్ని పణిజ తగితి లెకెండ్ సాతికార్ తీర్పు పొందితార్. 14 సాపుని అయా లోకం గందకమదాన్ సిసు కసి మంజిని సెరు నన్ని బాడ్డిదు అర్పె ఆతె. యా సిసు మంజిని బాడ్డి రుండి సాపు. 15 దేవుణు వెట ఎలాకాలం బత్కిని వరి పేరుకు రాసి ఇడఃజిని పుస్తకమదు పేరు తోర్విండాతిజ ఎయెన్ బా అయ సిసు మంజిని బాడ్డిదు అర్పె ఆనాన్లె.

21

కొత్త యెరూసలేం

1 నస్తవలె, నాను ఉండ్రీ కొత్త ఆగాసమీని ఉండ్రీ కొత్త బూమి సుడఃత. మొదోహి ఆగసమీని మొదోహి బూమి సిల్లెండ ఆతె మహి. సమదరమబా సిల్లెండ ఆతె మహాద్. 2 మరి కొత్త యెరూసలేము ఇని దేవుణు పట్టుం, మాసి సొండ్రెజ్ ఇజి విజు ఇటికిజి గొప్ప నెగండ్ తయారాతిమన్ని పెండ్లి దక్షడిలెకెండ్, పరలోకమదాన్ డిఃగిజి వాతిక నాను సుడఃత. 3 నస్తవలె, “ఇదిలో, దేవుణు లోకుర్ వెట బత్కిని ఇల్లు మనాద్. వాండ్రు, వరి వెటనె బత్కినాన్. వారు వన్ని లోకుర్ ఆన మంజినార్. దేవుణు వన్నిజ్ వాండ్రె అజి వరివెట మంజి వరి దేవుణు ఆన మంజినాన్. 4 వాండ్రు వరి కణుకెకెణ్ కణిర్ తేల్వాన్. మరి సాపు, దుకం, అడఃబానిక, నొప్పిజ్ ఎసెజ్ బా మన్ ఉ. ఎందానిజ్ ఇహిజ మొదోహి సజతిజ్ విజు గడఃస్సె సాహి”, ఇజి అయ సింహాసనమదాన్ ఉండ్రీ పెరి కంటం వెప్పొక వెహ.

5 అయ సిమసనమదు బస్తి మన్నికాన్, “ఇదిలో నాను విజు కొత్తాకెజ్ కిజిన్”, ఇజి వెప్సాన్. మరి “యా మాటెజ్ నమ్మిదెజ్ అట్టికెజ్ నిజమాతికెజ్. అందెజి ఇక్కెజ్ రాసి ఇడఃఅ”, ఇజి వాండ్రు నజి వెప్సాన్.

6 మరి నావెట వాండ్రు ఈహు వెప్సాన్. “విజు పూర్తి ఆతె. అల్పాని ఒమెగ నానె. మొదోలీని అక్కర్ నానె. ఏప్పొ కట్టివన్నిజ్, పాణం సీని ఏరు వాని ఊటదాన్, వన్నిజ్ ఉండ్రెజ్ ఏరు, నాను సెడ్డిఃనె సీనా. 7 సెజవనకాజ్ ముస్సు గెలిస్సికాన్ వినుకాజ్ విజు అక్కు మన్నికాన్ ఆనాన్. నాను వన్నిజ్ దేవుణు ఆన మంజినాన్. వాండ్రు నజి మరిన్ ఆన మంజినాన్. 8 గాని పప్పొదికార్, దేవుణు ముస్సు నమకం సిల్లికార్, సెజ పణిజ్ కిసికార్, లోకురిజ్ సప్పికార్, రంకు బూలానికార్, గాడ్డి కిసికార్, బొమ్మెజి మాడిఃస్సికార్, విజు రకమది అబద్ధం వర్గినికార్, నిన్నికార్ విజేరె గందకమదాన్ సిసు కసిని సెరు నన్ని బాడ్డిదు అర్పె ఆనార్. అక్క వరి వంతు. యాకదె రుండి సాపు.

9 నస్తవలె, కడఃవెరిది జబ్బుజాణిజ్ నిండ్రీతి మన్ని ఏడు కుడుకెజ్ అస్తీమన్ని ఏడు దేవుణుదూతార్లోఇ ఒరెన్ వాజి, “ఇబ్బె రఅ. గొరెప్పిల్ల అల్పి ఆతి పెండ్లి దక్షడిఃదిజ్ నిజి తోరిన్ను”, ఇజి నజి వెప్సాన్. 10 దేవుణుఅత్తుదాన్ నిండ్రీతి మన్ని నజి, వాండ్రు గొప్ప ఎత్తు మన్ని ఉండ్రీ పెరి గొరొన్ ముస్సు ఒతాండ్రె, యెరూసలేము ఇని దేవుణు పట్టుం, పరలోకమదాన్ దేవుణుబాణిజ్ డిఃగిజి వాజినిక తోరిస్తాన్. 11 అయ పట్టుం, దేవుణు జాయ్ దాన్, దగదగ మెరిసిమంజిని జాయ్ మన్ని నూర్య కాంతం ఇని పేరు మన్ని ఎరాని జాయ్ మంజిని గొప్ప విలువాతి రంగు పణకుది జాయ్ లెకెండ్ ని, గటిమన్ని గాజు లెకెండ్ మహాద్. 12 అయ పట్టుమదిజ్ గొప్ప ఎత్తు మన్ని గోడఃని, మరి అయ

గోడేదిజ్ పన్నెండు దారబంద్రమ్కు మహా. అయ దారబంద్రమ్కాజ్ పన్నెండు దేవుణు దూతార మహార్. దారబంద్రమ్కాజ్ ఇస్తాయేలుది పన్నెండు తెగెజ పేరుకు రాసి ఆతె మహా. ¹³ తూర్పు దరిజ్ మూంత్రి దారబంద్రమ్కుని ఉత్తరదరిజ్ మూంత్రి దారబంద్రమ్కుని దనిణదరిజ్ మూంత్రి దారబంద్రమ్కుని పడమాట దరిజ్ మూంత్రి దారబంద్రమ్కు మహా. ¹⁴ అయ పట్టుమది గోడేదిజ్ పన్నెండు పునాదిజ్ మహా. అయ పన్నెండు పునాదిజ ముస్సు గొరెపిల్ల అపోస్తురు ఆతి పన్నెండు మణిసిరి పేరుకు తోరెజ మహా.

¹⁵ అయ పట్టుమదిజ్ని, దన్ని గోడేజ్ని దారబంద్రమ్కు కొలిదెజ్, నావెట వర్గిని దేవుణు దూత కియుదు బజారమ్దాన్ తయార్ కితిమన్ని ఉండ్రి కొలిని డుడ్డు మహాద్. ¹⁶ అయ పట్టుం నాల్లి దరిజ్ ఉండ్రి లెకెండ్ కొల్ల మన్నిక. దన్ని నిరిండ్, దన్ని వెడల్పు సమానం మహా. వాండ్రు అయ కొలిని డుడ్డుదాన్ అయ పట్టుమదిజ్ కొలిత్తిజ్, దన్ని కొల్ల రుండి వెయ్యజ్ నాల్లి వందెజ్ కిలోమీటరుజ్ ఆతె. దన్ని నిరిండ్, ఎత్తు, వెడల్పు విజు సమానం మహా. ¹⁷ వాండ్రు దన్ని గోడేజు కొలిత్తిజ్, అది లోకురి కొల్లదిజ్ వంద నాల్వయే నాల్లి మూరెజ్ దలం మనాద్. అయ కొల్లదానె దేవుణు దూత కొలిత్తాన్. ¹⁸ దన్ని గోడేజు, సూర్య కాంతం ఇని పేరు మన్ని ఎరాని జాయ్ మన్ని విలువతి రంగు పణకుజాణిజ్ తొవ్తా మనాద్. మరి అయ పట్టుం గాజు లెకెండ్ మన్ని మెర్గిని బజారమ్దాన్ తయార్ ఆత మనాద్. ¹⁹ అయ పట్టుమది గోడేజు పునాది రకరకమది గొప్ప విలువతి రంగు పణకుజాణిజ్ సోకుదాన్ తయార్ ఆత మనాద్. మొదోహి పునాది సూర్య కాంతం ఇని ఎరాని రంగు పణకు, రుండి పునాది నీలి రంగు పణకు, మూంత్రి పునాది జమున రంగు పణకు, నాల్లి పునాది ఆకు రంగు పణకు. ²⁰ అయదు పునాది వయ్డర్యం ఇని రంగు పణకు, ఆరు పునాది కెంపు ఇని రంగు పణకు, ఏడు పునాది బజారం రంగు పణకు, ఎనిమిది పునాది గోమెదికం ఇని రంగు పణకు, తొమ్మిది పునాది పుస్యరాగం ఇని రంగు పణకు, పది పునాది సార్జనూనియం ఇని రంగు పణకు, పదకొండు పునాది పద్మరాగం ఇని రంగుపణకు, పన్నెండు పునాది సుగందం ఇని రంగు పణకుజాణిజ్ కిత్త మనాద్ ²¹ దన్ని పన్నెండు దారబంద్రమ్కు పన్నెండు ముజెలుజాణిజ్ కిత్త మనాద్. ఉండ్రి ఉండ్రి దారబంద్రం ఉండ్రి పూనదానె కిత్త మనాద్. పట్టుమది రోడుజ్ అడ్డి మన్నికెజ్ తోరిజని గాజుదిజ్ పోలితి బజారమ్దాన్ తయార్ ఆత మనాద్.

²² విజు దన్నిజ్ అతికారం మన్ని ప్రబు ఆతి దేవుణుని గొరెపిల్ల దన్ని దేవుణు గుడిః ఆతిమన్నిజ్ అయ పట్టుమ్ లోక దేవుణు గుడిః ఉండ్రిబా తోరెవతాద్. ²³ అయ పట్టుమదిజ్ జాయ్ సిదెజ్ ఇజి పొద్దుబా నెలబా అక్కర్ సిల్లెద్. ఎందానిజ్ ఇహిజు, దేవుణు గొప్ప జాయ్నె పట్టుం విజు జాయ్ సీజి మహాద్. గొరెపిల్ల దన్నిజ్ దీవలెకెండ్ మహాద్. ²⁴ విజు దేసమ్కాణి లోకుర్ అయ జాయ్దు నడిఃనార్. బూమి ముస్సు మన్ని రాజార్, వరిజ్ కలేగతిమన్ని విజు గవరమ్ని ఆస్తి అయ పట్టుమ్ లోక తనార్. ²⁵ అబ్బె రెయు సిల్లెండ్, జాయ్నె మన్నిజ్ ఎసెజ్బా అయ పట్టుమది దారబంద్రమ్కు కెహ్విద్. ²⁶ విజు దేసమ్కాణికార్ వరి ఆస్తిజ్ని వరిజ్ గవరం తపిస్తికెజ్ విజు అయ పట్టుమ్ లోక తనార్. ²⁷ దేవుణు వెట ఎలాకాలం బత్తిని వరి పేరుకు రాసి ఇడఃజిని గొరెపిల్లాది పుస్తకమదు పేరుకు మన్నికార, దన్ని లోక సొనార్. గాని సెజ పణిజ్ కినికార్, మొసెం కినికార్, సిగు ఆనికెజ్ కినికార్ ఎయెర్బా దన్ని లోక సొండ్రెజ్ అట్విర్.

22

పాణం సీని గడ్డ

¹ నస్తవలె, కల్తిసిల్లి అద్దం నన్ని, పాణం సీని ఏరు మన్ని గడ్డ, దేవుణుదిని గొరెపిల్లది సింహాసనమ్దాన్ సొన్ని మంజినిక అయ దేవుణు దూత నజి తోరిస్తాన్. ² అయ గడ్డ పట్టుమది రోడు నడిఃమిహాన్ సొన్ని మహాద్. అయ పెరి గడ్డాది రుండి ఒడ్డుజ పన్నెండు నెలెజ, పన్నెండు సుట్టు కాయెజ్ కాసి పట్టు, సీని పాణం సీని మరాన్ మనాద్. అయ పాణం సీని మరాతి ఆకుజ్ విజు జాతిజణి వరిజ్ జబ్బుజాణిజ్ నెగెండ్ ఆదెజ్ పణి కినాద్. ³ దేవుణు సయమ్ సిత్తి మహికెజ్ ఇనికబా అయ పట్టుమదు మనవిద్. దేవుణుదిని గొరెపిల్లది సింహాసనం అబ్బె మంజినాద్. వన్ని పణికినికార్

వన్నిజ్ పొగ్గిడిజి మాడిసి మంజినార్. 4 వారు దేవుణు ఎర్దు మంజి. మొకొం నిండ్రు వన్నిజ్ సుడేజి మంజినార్. వన్ని పేరు వరి నొర్దుజ రాసె ఆనాద్లె. 5 అబ్బె ఎనెజ్బా రెయం మన్వద్. దీవ జాయ్ గాని పొద్దు జాయ్ గాని వరిజ్ అక్కర్ సిల్లెద్. ఎందానిజ్ ఇహిజ, ప్రబు ఆతి దేవుణునె వరిజ్ జాయ్ సిజి మంజినాన్. వారు అంతుసిల్లెండె ఎలాకాలం ఏలుబడిః కిజి మంజినార్.

6 మరి అయ దేవుణు దూత, నజి యాలెకెండె వెప్తాన్. “యా మాటెజ్ నమ్మిదెజ్ తగ్గికెజ్ని నిజమాతికెజ్. ఎందానిజ్ ఇహిజ ఇనికెజ్ వెప్తాజ్ ఇజి వన్ని ప్రవక్తరిజ్ వెప్సిని దేవుణు, బేగి జర్గిదెజ్ మన్ని వనకాజ్ వన్నిజ్ సెందితివరిజ్ తోరిసైజ్ ఇజి వన్ని దూతెజ్ పోక్తాన్.

యేసు మర్జి వాజినాన్.

7 “ఇదిలో నాను బేగినె వాజిన. యా పుస్తకమ్దు మన్ని, దేవుణుబాణిజ్ వాతి మాటెజ్, వెంజి, లోజిజి, నడినికాన్ దేవుణు సీని దీవెనమ్కు మంజనికాన్ ఆనాన్”.

8 యోహాను ఇని నాను, యా సజతిజ్ వెపా మన్సు, సుడేత మన్సు. నాను యాకెజ్ వెంజి వెనుక, యాకెజ్ నజి తోరిసిని వన్నిజ్ పొగిడిజి మాడిసైజ్ ఇజి అయ దూత పాదమ్కాజ్ పడేగ్జి అర్దు. 9 గాని వాండ్రు, “పోని, నీను యాలెకెండె కిమా. నాను, నీవెటని, ప్రవక్తరు ఆతి నీ తంబెరిజవెటని, యా పుస్తకమ్దు మన్ని మాటెజ్ లోజిజి నడినివరివెట కూడిజి పణికినికానె. దేవుణుదిజె పొగిడిజి మాడిసైజ్”, ఇజి నజి వెప్తాన్.

10 మరి నావెట ఈహు వెప్తాన్. “యా పుస్తకమ్దు మన్ని మాటెజ్ దేవుణు వెప్తాకెజ్, అందెజి దిన్నిజ్ మూక్కి సీలు కిదెజ్ ఆవెద్. ఎందానిజ్ ఇహిజ యాకెజ్ విజు జర్గిదెజ్ కాలం డర్గు ఆత మనాద్. 11 తప్పు పణిజ్ కినికాన్ మరి ఒదె తప్పు పణిజ్ కిపిన్. ఎయెన్బా కెలార్ బూలానికాన్ మరి కెలార్ బూలాజి మనీన్. నీతి మన్నికెజ్ కినికాన్ మరి ఒద్దె నీతి మనికెజ్ కిపిన్. దేవుణు వందిజ్ కేట ఆతికాన్, మరి అయాలెకెండె దేవుణు వందిజ్ కేట ఆజి మనీన్”.

12 “ఇదిలో, నాను బేగినె వాజిన. నాను వానివలె ఒరెన్ ఒరెన్ వన్నిజ్, వాండ్రు కితి పణిదిజ్ తగితి లెకెండె సీదెజ్ ఇనాయం తనా. 13 అల్పాని ఒమెగ నానె. మొదోహి - కాన్ని కడేవెరిదికాన్ నానె. మొదోలీని ఆకార్ నానె.

14 పాణం సీని మరాతి పట్టు. తిండ్రెజ్ అక్కు. మన్నికారాజి దారబంద్రమ్కాణిజ్ అయ పట్టుమ్ లోఇ సాండ్రెజ్ వరి సాక్కెజ్ నోరిబానికార్ దేవుణు సీని దీవెనమ్కు మంజనికార్ ఆనార్. 15 నుకుడిజ్ని మత్రిసినికార్, రంకు బూలానికార్, లోకురిజ్ సప్పికార్, బొమ్మెజి మాడిస్సికార్, అబద్దమ్దిజ్ ప్రేమిసి అయాలెకెండె కిజి మంజనికార్ విజేరె వెల్లి మంజినార్.

16 దేవుణు సజమ్కాజ్ మన్నివరివందిజ్, యా సజతిజి వందిజ్ సాస్యం వెప్తాజ్ యేసు ఇని నాను, నా దూతెజ్ పోక్త మన్సు. నాను దావీదువెలెదాన్ సోత్తి సిగ్గుని వన్ని తెగాదు పుట్టికాన్. కోడిఃజామ్దు సోని గొప్పు జాయ్ మన్ని సుక ఆత మన్సు”.

17 మరి దేవుణు ఆత్మని పెండ్లి దక్షడిః, “రఅ”, ఇజి వెప్సివార్. యాక వినికాన్బా “రఅ’ ఇజి వెప్తాజ్వలె. ఎయెన్బా ఏమ్కా కట్టిజి వాండ్రు రపిన్. ఎయెన్బా వాండ్రు కోరిత్తిలెకెండె, పాణం సీని ఏరు ఇని ఇనాయం సెడ్డిఃనె లోసీన్.

18 యా పుస్తకమ్దు మన్ని దేవుణు ప్రవక్త వెప్తా మాటెజ్ వెనివరిజ్ విజేరిజ్, వారు జాగర్త మండ్రెజ్ ఇజి నాను వెప్సినిక ఇనిక ఇహిజ, ఎయెన్బా దిన్నివెట మరి ఇనికబా కూడుఃప్పిజి యా పుస్తకమ్దు రాస్సిమని జబ్బుజ్ విజు, దేవుణు వన్ని ముస్కు తపిస్సాన్. 19 ఎయెన్బా యా పుస్తకమ్దు మన్ని దేవుణు ప్రవక్త వెప్తా మాటెజ్, ఇనికబా లాగితిజి, వన్నిజ్ దేవుణు యా పుస్తకమ్దు వెప్తామని పాణం సీని మరాతి పట్టు. తిండ్రెజ్ అక్కు. సిల్లికాన్ లెకెండె కినాన్. నెగి పట్టుమ్దు వంతు మన్ఇకాన్ లెకెండె కినాన్.

20 యా సజతిజ వందిజ్ సాస్యం వెహ్వికాన్, “నిజమె నాను బేగినె వాజిన”, ఇజి వెహ్వికాన్. ఆమెన్. ప్రబు ఆతి యేసు రఅ. 21 ప్రబు ఆతి యేసు దయాదర్మం దేవుణులోకుర్ విజెరె వెట మనీద్. ఆమెన్.